


Topě vĩ rá



New Testament in Kaingang (BR:kgp:Kaingang)

Topě vř rá

New Testament in Kaingang (BR:kgp:Kaingang)

copyright © 2011 Wycliffe Bible Translators, Inc.

Language: Kaingang

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kaingang

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-04

PDF generated using Haiola and XeLaTeX on 18 Apr 2025 from source files dated 29 Jan 2022
16af52c8-0e45-5e91-b36c-cd314d36d7fc

Contents

MATEUS	1
MARCOS	72
LUCAS	111
JOÃO	187
HAN KĀME	237
ROMA	298
1 CORINTO	328
2 CORINTO	357
GALÁCIA	375
ÉFESO	386
FILIPPOS	396
COLOSSOS	403
1 TESSALÔNICA	410
2 TESSALÔNICA	416
1 TIMÓTEO	420
2 TIMÓTEO	428
TITO	434
FILEMOM	438
HEBREU	440
TIAGO	462
1 PEDRO	471
2 PEDRO	479
1 JOÃO	484
2 JOÃO	491
3 JOÃO	492
JUDAS	493
NÉN VENH KE	496

MATEUS TỸ RÁ

*Jesus jóg'jóg ve ag
(Lc 3.23-28)*

¹ Jesus Cristo jóg'jóg ve ag rán ke vê. Jesus Cristo vỹ tỹ Davi krê'krê nĩ, kỹ Davi vỹ tỹ Abraão krê'krê nĩ.

² Abraão vỹ Isaque han. Kỹ Isaque vỹ Jacó han. Kỹ Jacó vỹ Judá han, ti mré ke ag ke gé.

³ Kỹ Judá vỹ Peres han. Zera ti ke gé. Ả prũ tỹ Tamar fi ki tóg ag hyn han, Judá ti. Kỹ Peres vỹ Esrom han. Kỹ Esrom vỹ Arão han.

⁴ Kỹ Arão vỹ Aminadabe han. Kỹ Aminadabe vỹ Nasom han. Kỹ Nasom vỹ Salmom han.

⁵ Kỹ Salmom vỹ Boaz han, ả prũ tỹ Raabe fi ki. Kỹ Boaz vỹ Obede han, ả prũ tỹ Rute fi ki. Kỹ Obede vỹ Jessé han.

⁶ Kỹ Jessé vỹ pã'i mág tỹ Davi ên han.

Kỹ pã'i mág tỹ Davi vỹ Salomão han, ả prũ ên fi ki, ừ tỹ Urias prũ ja nĩ ên fi ki.

⁷ Kỹ Salomão vỹ Roboão han. Kỹ Roboão vỹ Abias han. Kỹ Abias vỹ Asa han.

⁸ Kỹ Asa vỹ Josafá han. Kỹ Josafá vỹ Jorão han. Kỹ Jorão vỹ Uzias han.

⁹ Kỹ Uzias vỹ Jotão han. Kỹ Jotão vỹ Acáz han. Kỹ Acáz vỹ Ezequias han.

¹⁰ Kỹ Ezequias vỹ Manassés han. Kỹ Manassés vỹ Amom han. Kỹ Amom vỹ Josias han.

¹¹ Kỹ Josias vỹ Jeconias han, ti jãvy ag ke gé. Israel ag tỹ cidade Babilônia ra mũ ên kã tóg ag hyn han, Israel ag tỹ sigse kỹ mũ ên kã.

¹² Ag tỹ cidade ên tá vỹnvỹn ke kar kỹ Jeconias vỹ Salatiel han. Kỹ Salatiel vỹ Zorobabel han.

¹³ Kỹ Zorobabel vỹ Abiúde han. Kỹ Abiúde vỹ Eliaquim han. Kỹ Eliaquim vỹ Azor han.

¹⁴ Kỹ Azor vỹ Sadoque han. Kỹ Sadoque vỹ Aquim han. Kỹ Aquim vỹ Eliúde han.

¹⁵ Kỹ Eliúde vỹ Eleazar han. Kỹ Eleazar vỹ Matã han. Kỹ Matã vỹ Jacó han.

¹⁶ Kỹ Jacó vỹ José han, Maria fi mén ên ti. Maria ên fi ki Jesus tóg mur ja nĩ, hã vỹ: Cristo, he mũ.

¹⁷ Hã kỹ ag tóg 14 (ke) nỹtĩ, Abraão krê'krê ag, Davi mré nĩgrén kỹ. Kỹ Davi krê'krê ag tóg 14 (ke) nỹtĩ gé, ag tỹ ag sigse kỹ nỹtĩ tá ag nĩgrén kỹ, ag tỹ cidade tỹ Babilônia tá sigse kỹ nỹtĩ tá ag nĩgrén kỹ. Tag pãte ag krê'krê vỹ 14 (ke) nỹtĩ gé, Cristo mré nĩgrén kỹ. Cristo jóg'jóg ve ag hã vê.

*Jesus Cristo mur
(Lc 2.1-7)*

¹⁸ Jesus Cristo mur vỹ ge nĩ, ha mẽ. Ti mỹnh fi vỹ tỹ José prũnh ke fi nĩ, hã ra fag tóg ver jagnê mré nỹ ja tũ nĩ. Ên kã fi tóg kufy nĩ ha. Topê kuprĩg tỹ fi mỹ gĩr han jan hã vê.

¹⁹ Kỹ José tóg mẽg mũ sir, fi tỹ kufy nĩ ti, kỹ tóg ti mỹ e ti. Ủn jykré kuryj vỹ mỹr, José ti, hã kỹ tóg fi mỹ'ág han sór tũ nĩ, kỹ tóg fi to vỹ tũ nĩ sir. Hã ra tóg fi pin kỹ fi mỹ: "kỹ inh hỹn ả tỹ prũ nĩnh ke tũ nĩ ha." he sór mũ sir.

²⁰ Ti tỳ ver fi tovãnh to jykrén ký Topê tỳ jêñê jafã tóg ti mỳ vènh ven mũ sir, ti vènh péti ký. Ký tóg ti mỳ: “José,” he mũ. “Tỳ ã Davi krê krê ag kã ù nĩ,” he tóg. “Maria fi to jykrén kónãnh tũg nĩ. Jatun mỳ fi tỳ prũg nĩ, fi tovãnh tũg nĩ. Û tũ pijé, fi kósin ti. Topê kuprĩg tỳ fi mỳ han ja vē.

²¹ Ti mur ký tóg gré nỹnh mũ, ha vemnĩ. Ký ti mỳ: Jesus, hemnĩ. Æ povo krenkren han jé tóg ke mũ, ag tỳ Topê vĩ mranh mũ ra,” he tóg, José mỳ, Topê tỳ jêñê jafã ti.

²² Hã ra Topê vĩ vãsỹ ã vĩ tó tĩ ù mỳ tag tó ja nĩ, ha mẽ.

²³ “Ûn mén ja tũ fi vỹ kufy nĩnh mũ,” he ja tóg nĩ. “Fi kósin fi ki mur ken ký ag tóg ti to: Emanuel, henh ke mũ,” he ja tóg nĩ, Topê vĩ tỳ rán ký nĩ ki. Emanuel to ke vē, hã vỹ: “Topê vĩ êg ki rĩr há han mũ,” he mũ, êg vĩ ki, hã vỹ: Emanuel, he mũ. José vĩ Topê vĩ tag ve ja nĩ.

²⁴ Ký José tóg rĩr mũ sir, ti vènh péti kar ký. Ký tóg Topê tỳ jêñê jafã ên vĩ ki krom mũ sir. Vènh prũg han tóg mũ, Maria fi mré.

²⁵ Hã ra tóg ver fi mré nỹ tũ ãngĩ. Kejẽn fi tóg ã kósin vég mũ. Ký José tóg ti jĩjin ký ti mỳ: Jesus, he mũ. Fi tỳ ti ve kar ký tóg vãhã fi mré nỹ mũ sir.

2

Pã'i ag tỳ Jesus venh kãmũ

¹ Fi tỳ Jesus ve ên kã fag tóg cidade tỳ Belém tá nỹtĩ, ga tỳ Judéia tá. Herodes vỹ tỳ pã'i tỳ rei nĩ, fi tỳ ti ve ja ên kurã ki. Ký kejẽn ù ag tóg Jerusalém tá junjun mũ. Kuvar há tá ag tóg kãmũ ja nĩ, rã jur ja tá, ãjag jamã tá. Ûn estudo mág han mũ ag vē, krĩg to ag tóg estudar he mág han tĩ.

² Ag tỳ Jerusalém tá junjun ký ag tóg sir: “ũ tỳ ùri mur mũ vĩ tỳ Israel ag pã'i mág nĩnh mũ,” he mũ. “Ti kri êg krĩg vé, êg tỳ êg jamã tá nỹtĩn ký, rã jur ja tá nỹtĩn ký. Êg tỳ ti venh kãmũ vē, êg tỳ ti mỳ nén ù há vin sór vē. Êg hỹn hẽ tá ti venh ke mũ?” he ag tóg, ù tỳ kuvar há tá kãmũ mũ ên ag.

³ Ag vĩ tag vĩ pã'i tỳ Herodes mỳ e tĩ, ký tóg krĩ kufy nĩ sir. Jerusalém tá ke kar ag mỳ tóg e tĩ gé.

⁴ Ký Herodes tóg Topê tũ ki rĩr ti to pã'i ag jé prêr mũ sir, Topê vĩ to professor ag ke gé. Ký tóg ag mỳ: “Cristo hỹn hẽ tá mur ke mũ nẽji?” he mũ.

⁵ Ký ag tóg ti mỳ: “Belém tá ke nẽji, ga tỳ Judéia tá,” he mũ. “Topê vĩ tó tĩ ù vĩ vãsỹ ti to tag rán ja nĩ, ha mẽ,” he ag tóg.

⁶ “Sĩ ti nĩ, cidade tỳ Belém ti, ga tỳ Judéia tá, he ja tóg nĩ. Ti sĩ nĩ ra tóg cidade mág ag kar kãfór kar nĩ, pã'i mág ên tỳ tá mur kenh ke tũgrĩn. Pã'i mág ên vĩ tỳ êg povo tỳ Israel kri pã'i mág jẽnh ke mũ, ù tỳ Belém tá mur ke mũ ên ti, he ja tóg nĩ, Topê vĩ tỳ rán ký nĩ ki,” he ag tóg, professor ag, Herodes mỳ. “Hã ký tóg Belém tá mur ke mũ, Cristo ti,” he ag tóg, professor ag.

⁷ Ký Herodes tóg vènh pēju ký fóg ên ag mré vèmén mũ sir, ù tỳ krĩg to estudo mág han mũ ên ag mré. Ký tóg ag mỳ: “kurã tỳ hẽ ki ãjag krĩg ên ve vén?” he mũ.

⁸ Ag tỳ ti mỳ kurã tó ký tóg Belém ra ag jẽgnẽg mũ sir. “Ãjag tỳ tá junjun ký ti jãvãnh nĩ,” he tóg. “Vènh kar ki ti jẽmẽmĩ. Æjag tỳ ti ve ký inh mỳ tónh kãmũmĩ. Ký sóg ti venh tũg sór mũ gé, sỹ ti mỳ nén ù há nĩm jé,” he tóg, Herodes ti.

⁹ Ag tỳ pã'i ên vĩ mẽ kar ký ag tóg mũ mũ sir, Belém ra. Ag mũ ên ki ag tóg krĩg ên ve mãn mũ gé sir, ag tỳ rã jur ja tá krĩg vég mũ ên. Krĩg ên vĩ ag jo tĩ mũ. Ag tỳ Belém tá junjun ký krĩg tóg ùn sĩ nĩgia kri hã sa nĩ sir.

10 Ag t̄y kr̄ig ẽn ve k̄y ag fe tóg m̄rin ke m̄ũ sir.

11 Ɔn k̄ara ge k̄y ag tóg Ɔn s̄i ti v̄eg m̄ũ, ti m̄ȳnh fi ke gé. K̄y ag tóg ti kr̄em gr̄inhgr̄inh ke m̄ũ, ti m̄ȳ: “t̄y ă Top̄ẽ k̄osin n̄i,” he j̄e. K̄y ag tóg sir ti m̄ȳ ăjag t̄ũ ti vin m̄ũ, ouro ti, ka j̄enjo t̄y incenso ti ke gé, ẽg t̄y ti p̄ũn k̄y ger há han jaf̄a ẽn, kar k̄y ka t̄y mirra j̄enjo ke gé, ẽg t̄y ti p̄ũn k̄y ger há han jaf̄a Ɔ v̄ẽ gé.

12 H̄a ra Top̄ẽ tóg, ag v̄en̄h p̄eti ki (tóg) ag m̄ȳ: “Herodes m̄ȳ tóg t̄ũg n̄i,” he m̄ũ sir. H̄a k̄y ag tóg ẽp̄ry Ɔ jagma m̄ũ m̄ũ, ẽm̄in Ɔ jagma m̄ũ k̄y ag tóg ăjag jam̄a ra v̄ȳnv̄ȳn ke m̄ũ sir, r̄a jur ja ra.

José fag t̄y v̄enh pigju

13 Ag m̄ũ kar k̄y José tóg kej̄en Top̄ẽ t̄y j̄en̄ẽ jaf̄a v̄eg m̄ũ, ti v̄enh p̄eti k̄y. K̄y Top̄ẽ t̄y j̄en̄ẽ jaf̄a tóg ti m̄ȳ: “n̄i ra,” he m̄ũ. “Ɔn s̄i va t̄ig, ga t̄y Egito ra, ti m̄ȳnh fi mr̄e. Herodes v̄ȳ Ɔn s̄i tag t̄en s̄or m̄ũ. H̄a k̄y v̄enh p̄eju k̄y Egito ra t̄ig. Kej̄en s̄óg ă m̄ȳ: ha v̄ȳn k̄e, henh ke m̄ũ. Egito tá inh v̄i j̄äv̄anh n̄i,” he tóg, Top̄ẽ t̄y j̄en̄ẽ jaf̄a ti, José m̄ȳ. Ti v̄enh p̄eti k̄y tóg ti m̄ȳ ke m̄ũ.

14 K̄y José tóg kuty ẽn k̄a j̄egn̄ẽ k̄y fag tat̄in t̄i m̄ũ sir, ga t̄y Egito ra, v̄enh p̄eju j̄e.

15 Tá tóg n̄i n̄i. Herodes t̄y kej̄en ter k̄y tóg tá v̄ȳn ke m̄ũ. H̄a ra ti t̄ig ja tag v̄ȳ rán k̄y n̄i gé. V̄äs̄y Top̄ẽ tóg ă v̄i tó ti Ɔ m̄ȳ: “tag rán ra,” he ja n̄i, h̄a v̄ȳ: “ga t̄y Egito ra s̄óg v̄enh v̄i j̄en̄ẽ, inh k̄osin t̄y tá v̄ȳn ke j̄e,” he m̄ũ.

Herodes t̄y ḡir ag kygr̄en

16 H̄a ra Herodes tóg fagr̄inh m̄ȳ fóg ẽn ag j̄äv̄anh ja n̄i, Ɔn estudo m̄ág han m̄ũ ẽn ag. V̄äh̄a tóg: “ag t̄y inh m̄ȳ tóg t̄ũg h̄ȳn,” he m̄ũ. K̄y ti fe tóg ḡym ke m̄ũ sir. K̄y tóg ă p̄ã'i ag m̄ȳ: “ha m̄ũ j̄eg, Belém ra,” he m̄ũ. “Tá ḡir ag kygr̄en k̄an n̄i, Ɔn gr̄e ag, Ɔn kri pr̄ȳg t̄y 2 anos tá kr̄ȳg t̄ũ ẽn ag,” he tóg, ag m̄ȳ. Ag m̄ȳ tóg 2 anos tóg, fóg ag t̄y ti m̄ȳ: “1 ano k̄áfór ti n̄i ha, ẽg t̄y ti kri kr̄ig ve ja ti,” hen k̄y. K̄y polícia ag tóg ḡir ag k̄agt̄en m̄ũ m̄ũ sir.

17 H̄a ra tag tóg rán k̄y n̄i gé. V̄äs̄y Top̄ẽ v̄i tó ti tóg tag rán ja n̄igt̄i, ti jiji h̄a v̄ȳ: Jeremias, he m̄ũ. Ɔn tóg tag rán ja n̄i, ha m̄ẽ:

18 “cidade t̄y Ramá tá ẽg tóg v̄enh kygf̄y m̄eg m̄ũ, v̄es̄ȳr̄enh m̄ág ke gé. Raquel fi v̄ȳ v̄es̄ȳr̄enh m̄ũ, fi kr̄e ag j̄e. Ag t̄y fi m̄ȳ: f̄ȳ t̄ũg n̄i, he m̄ũ ra fi tóg v̄es̄ȳr̄enh m̄ũ. Fi kr̄e ag v̄ȳ t̄ũ' he k̄an, h̄a k̄y fi tóg f̄ȳ m̄ũ, v̄es̄ȳr̄enh m̄ũ,” he ja tóg n̄i, Jeremias ti. H̄a ra tóg tag ri ke n̄i, polícia ag t̄y ḡir ag kygr̄en m̄ũ ti.

José fag t̄y Egito tá v̄ȳn ke

19 Kej̄en Herodes ẽn v̄ȳ ter m̄ũ gé sir, p̄ã'i ti. K̄y Top̄ẽ t̄y j̄en̄ẽ jaf̄a v̄ȳ José m̄ȳ v̄enh ven m̄ũ, ti v̄enh p̄eti k̄y. Ga t̄y Egito tá tóg ti m̄ȳ venh ven m̄ũ. Tá fag tóg n̄ȳti n̄i, ga t̄y Egito tá. Tá tóg ti m̄ȳ v̄enh ven m̄ũ, José m̄ȳ, Top̄ẽ t̄y j̄en̄ẽ jaf̄a ti.

20 K̄y tóg ti m̄ȳ: “n̄i ra,” he m̄ũ. “Ḡir va t̄ig, ti m̄ȳnh fi p̄ere t̄ig gé, ga t̄y Israel ra. Ɔ t̄y fi k̄osin t̄en s̄or m̄ũ ẽn v̄ȳ hur ter,” he tóg, Top̄ẽ t̄y j̄en̄ẽ jaf̄a ti, José m̄ȳ.

21 K̄y tóg j̄egn̄ẽ k̄y t̄i m̄ũ sir. Ḡir va tóg t̄i m̄ũ, ti m̄ȳnh fi p̄ere tóg t̄i m̄ũ gé. K̄y fag tóg Israel ag ga ra m̄ũ m̄ũ sir.

22 Tá jun k̄y tóg p̄ã'i m̄ág t̄ag j̄ȳj̄ j̄em̄eg m̄ũ, José ti. H̄a ra tóg t̄y Arquelau n̄i. Ti panh t̄y Herodes ri k̄en tóg t̄y p̄ã'i t̄y rei n̄i, ga t̄y Judéia tá. K̄y tóg ti kam̄eg m̄ũ. K̄y Top̄ẽ tóg ti v̄enh p̄eti k̄y ti m̄ȳ: “ga t̄y Judéia tá n̄i m̄an s̄or t̄ũg,” he m̄ũ. K̄y tóg t̄ig m̄an k̄y ga t̄y Galiléia ra t̄i m̄ũ sir.

23 K̄y tóg cidade t̄y Nazaré tá jam̄an m̄ũ sir. H̄a ra tóg rán k̄y n̄i gé, Nazaré ti. V̄äs̄y Top̄ẽ v̄i tó ti Ɔ tóg tag rán ja n̄i gé, k̄y tóg: “ti to ag tóg: Nazaré tá ke v̄ẽ, henh ke m̄ũ,” he ja tóg n̄i, Top̄ẽ v̄i t̄y rán k̄y n̄i ki, Jesus to. H̄a ra tóg ge n̄i.

3

*João Batista t̄y ag jyv̄n
(Mc 1.1-8; Lc 3.1-18; Jo 1.19-28)*

¹ Kej̄n João tóg em̄a tũg ja ra tĩ mũ, ga t̄y Judéia tá ga kórég ra. João Batista ãn v̄. Ga kórég tá j̄e k̄y tóg ag jyv̄n mũ sir.

² “Ājag jykre tovãnh nĩ, ù t̄y kanhkã tá nĩ ãn t̄y t̄y ājag pã'i nĩ jé,” he tóg, João ti.

³ João ãn to tóg tag rán ja nĩ, vãs̄y Topê vĩ tó tĩ ãn ti, Isaías he mũ ãn, ha m̄. “Ēmã tũg ja tá tóg j̄enh ke mũ, ga kórég tá,” he ja tóg nĩ. “Tá tóg ag m̄y jamã hár(a) ke mũ sir. “Ēg Senhor kãt̄ig ke jo v̄enh jãnhkrigkrig nĩ,” he jé tóg ke mũ. “Ēpyr kurég ājag tóg tĩ, em̄n kuryrh ājag tóg tĩ gé, ājag pã'i mág jun ken k̄y. K̄y tag ri ke han nĩ, ājag jykre pãno togvãnh nĩ, ěg Senhor kãt̄ig ken jo,” he jé tóg ke mũ,” he ja tóg nĩ, Isaías ti, João to.

⁴ Jo João ãn kur tóg t̄y cavalo pãni sór kyki t̄y há nĩ. Nén ù fár t̄y tóg v̄esógfin ja han tĩ gé. Ópã hã ko ti tĩ, m̄ygr m̄rê hã, João ti.

⁵ K̄y ag tóg ti tá junjun kãn mũ sir, cidade t̄y Jerusalém tá kãmũ k̄y, ga t̄y Judéia kar tá kãmũ k̄y, goj t̄y Jordão tá ke kar ag ke gé. João tá ag tóg junjun kãn mũ sir.

⁶ K̄y tóg ag kygpég mũ sir, goj t̄y Jordão ki, ag t̄y: “Topê vĩ mranh ja sóg nĩgtĩ,” hen k̄y.

⁷ K̄y ù t̄y Fariseu he mũ ag v̄y ti tá junjun mũ gé sir, ù t̄y Saduceu he mũ ag ke gé, pã'i ag. Ón k̄y ag tóg ti to kãmũ mũ, ti t̄y ag kyge jé. K̄y tóg ag jyv̄n tar han mũ sir, João ti. “P̄yn ri ke ājag tóg n̄ytĩ, ājag jykre pãno tãvĩ n̄in k̄y,” he tóg ag m̄y. “Ū n̄y ājag m̄y: “Topê jũ venh ke tũ ājag nĩ,” he t̄y?”

⁸ Ājag jykre si tovãnh nĩ, ājag t̄y ti jũ ve jãvãnh t̄in k̄y. V̄enh jykre há han nĩ, ěg t̄y ājag jykre tãg hã ve jé.

⁹ Hã ra ājag tóg jagn̄e m̄y: “Abraão v̄y t̄y ěg jóg'jóg ve nĩ, k̄y Topê h̄yn tóg ěg to jũnh ke tũ nĩ, ěg t̄y t̄y Abraão kr̄e'kr̄e n̄yt̄in tugr̄in,” he tĩ. Ke tũ v̄e hã ra. Ājag jykre kórég ãn to ājag tóg jagtar ke mũ, ha vemn̄i. Topê v̄y Abraão kr̄e'kr̄e h̄yn han ki kanhró nĩ, pó tag t̄y m̄y, ti t̄y Abraão kr̄e'kr̄e ve sór k̄y, Topê ti.

¹⁰ Hã ra tóg ājag t̄y tũ' henh ke mũ, ājag t̄y ājag jykre kórég tovãnh tũ n̄in k̄y. Ēg t̄y ka ḡyn ri ke tóg nĩ. Ti kan̄en vãnh k̄y ěg tóg ti ḡyn tĩ, ti t̄y pĩ han jé. Ri ke han jé tóg ke mũ, Topê ti, ājag t̄y v̄enh jykre há han sór tũ n̄in k̄y. K̄y tóg pĩ ki ājag vãm ke mũ, Topê ti,” he tóg ag m̄y, João ti, Fariseu ag m̄y, Saduceu ag m̄y ke gé.

¹¹ K̄y João tóg v̄enh kar m̄y: “goj hã t̄y sóg ājag kygpég tĩ, ājag t̄y ājag jykre tovãnh k̄y,” he mũ. “Inh nón tóg kãt̄ig mũ hã ra, Cristo ti. Inh kãfór ti nĩ. T̄y sóg ti camarada nĩ jãvãnh nĩ, s̄y t̄y ti kr̄em ke p̄e j̄en k̄y. Ēg camarada ag v̄y ěg p̄en né gé mũgtĩ, ěg p̄en to ró ti. S̄y ti m̄y gé t̄ig ke v̄e v̄e, hã ra sóg t̄y ti kr̄em ke p̄e nĩ, ti t̄y inh kãfór n̄in k̄y. Ēn hã tóg Topê kupr̄ig t̄y ājag jagr̄e han ke mũ. K̄y tóg t̄y pĩ nĩ ve nĩ. Ti t̄y ājag kygpenh ken hã v̄e,” he tóg, João ti, Jesus to.

¹² “Ti kãt̄ig v̄y ěg t̄y rãgró r̄en ri ke nĩ. Ti r̄en kar k̄y ěg tóg ti fár pũn tĩ. Ti kan̄e hã vin han ěg tóg tĩ. Cristo kãt̄ig ken k̄y tóg ge n̄inh mũ. Ti to há n̄yt̄i ag m̄y tóg: “ha kãmũ j̄eg,” henh ke mũ. Ti to há n̄yt̄i tũ ag vãm jé tóg ke mũ, pĩ ki, hã ra tóg nhyn kenh ke tũ p̄e nĩ,” he tóg, João ti.

*João t̄y Jesus kypé
(Mc 1.9-11; Lc 3.21-22)*

13 Ēn kā kejēn Jesus tóg Joāo tá jun mū gé sir, goj tỹ Jordāo tá. Ga tỹ Galiléia tá tóg kātī mū. Kỹ tóg Joāo mỹ: “ha inh kypé gé,” he mū sir.

14 Hã ra tóg Joāo mỹ e tĩ, kỹ tóg ti mỹ: “ã hã tỹ inh kypenħ ke vë vë,” he mū. “Inh mỹ tóg e tĩ, ã tỹ inh mỹ: ha inh kypé, hen kỹ,” he tóg mū, Joāo ti, Jesus mỹ.

15 Hã ra Jesus tóg ti mỹ: “hỹ,” he mū. Hã ra tóg isỹ vënh jykre kuryj han kãn há tĩ,” he tóg, Joāo mỹ. Kỹ tóg ti kypég mū sir.

16 Ti tỹ Jesus kype kar kỹ ag tóg goj kãtã kãpa mū sir. Kỹ Jesus tóg kanhkã nor nĩ ên vëg mū, ha mẽ, kỹ tóg Topê kuprĩg kãtêre ên vëg mū. Sórãg ri ke tóg nĩ, ti kãtêre ti. Jesus kri tóg kãtêre mū.

17 Kỹ vënh vĩ tóg mẽ há tĩ, kanhkã tá, kỹ tóg: “inh kósin pir vëgtĩ,” he mū. “Inh fe pë vëgtĩ,” he tóg, ù tỹ kanhkã tá vĩ mū ti.

4

Japo tỹ Jesus krĩn kónãn sór (M̄c 1.12-13; Lc 4.1-13)

1 Kỹ Topê kuprĩg vỹ Jesus mỹ: “êmã tũgja ra tũg,” he mū. Kỹ tóg tĩ mū. Ēmã tũgja tá nĩn kỹ Japo vỹ ti tỹ ã jóg vĩ mranh han sór mū, hã ra Jesus tóg ke jãvãnh nĩ.

2 Kurã tỹ 40 (ke) han tóg, êmã tũgja tá nĩn ki. Kỹ tóg jëg tũ nĩ, kurã tỹ 40 (ke) ên ki, kuty mré ke gé. Kar kỹ tóg sir kókĩr mū, vëjên tũ nĩn kỹ.

3 Kỹ Japo tóg ti to kãtĩ mū sir, ù tỹ êg tỹ Topê vĩ mranh han sór mū ên ti. Kỹ tóg Jesus mỹ: “Topê kósin vỹ tỹ ã nĩ,” he mū. “Á tỹ tỹ Topê kósin nĩn kỹ pó tag tỹ êmĩ han, ã tỹ kon jé,” he tóg ti mỹ, Nén-Kórég ti, Jesus mỹ.

4 Kỹ Jesus tóg ti mỹ: “hã ra tag tóg rán kỹ nĩ, ha mẽ,” he mū. “Ēg pi(jé) êmĩ tãvĩ jamên kỹ rĩnrĩr mũgtĩ, hã ra êg tóg Topê vĩ hã jamên kỹ rĩnrĩr mũgtĩ, he tóg, Topê vĩ tỹ rán kỹ nĩ ki. Kỹ tóg isỹ ti vĩ mranh jãvãnh tĩ, êmĩ to,” he tóg, Jesus ti, Nén-Kórég mỹ.

5 Kỹ Japo vỹ ti pére tĩ mū, Jerusalém ra, cidade mág ên ra. Tá ag tóg Topê jo ĩn kri nỹtĩnh mū mū. Hã ra kãgnó tóg tá nĩ, Topê jo ĩn mã tá.

6 Kỹ Japo tóg Jesus mỹ: “ã hã ne tóg tỹ Topê kósin nĩ,” he mū. “Ha kema ki hũm,” he tóg. “Topê vĩ ki tag tóg rán kỹ nĩ, hã vỹ: ã tỹ jëgnê jafã ag mỹ tóg tónh mū, Topê ti, kỹ ag tóg ã jy nĩgãn mū, he mū. Kỹ ã tóg rỹj ke tũ nĩ. Á pën vỹ rỹj ke tũ nĩ, ag tỹ ã ki rĩr kỹ, he tóg, Topê vĩ tỹ rán kỹ nĩ ki. Kỹ ki kema hũm,” he tóg, Japo ti. “Rỹj ke tũ ã nĩ ã tỹ tỹ Topê kósin nĩn kỹ,” he tóg, Nén-Kórég ti, Jesus mỹ.

7 Kỹ Jesus tóg ti mỹ: “kỹ tag vỹ rán kỹ nĩ gé, ha mẽ,” he mū. “Topê mỹ: ã mỹ ã tỹ tó ja ên han mū vỹ? he tũg nĩ, he tóg mū gé, Topê vĩ tỹ rán kỹ nĩ ki. Hã kỹ sóg ti tỹ inh mỹ nén to: “han ra,” he mū ên hã han tĩ, kỹ sóg hũm ke tũ nĩ,” he tóg, Jesus ti, Nén-Kórég mỹ.

8 Kỹ Japo tóg ti mré tĩg mãn mū. Pãnónh téj ra ag tóg mū mū sir. Kỹ Japo tóg ti mỹ ga kar ven kãn mū, ga kri mū kar ag ke gé. Ti sĩnvĩ kar ên ven tóg ti mỹ.

9 Kỹ tóg ti mỹ ke mū. “Isũ vë, tag kar ti,” he tóg. “Hã ra sóg ã mỹ tovãnh kãn sór mū, ã tỹ ã jakrĩ tỹ krỹ' hen kỹ, inh krêm, inh mỹ: Topê vỹ tỹ ã nĩ, he jé,” he tóg, Nén-Kórég ti, Jesus mỹ.

10 Kỹ Jesus tóg ti mỹ: “ha tũg, Satanás,” he mū. “Ēg pã'i tỹ Topê hã krêm êg tóg êg jakrĩ tỹ krỹ' he tĩ, ti hã to êg tóg: Topê vë, he tĩ, hã kỹ tóg rán kỹ nĩ, Topê vĩ tỹ rán kỹ nĩ ki,” he tóg, Jesus ti, Nén-Kórég mỹ.

11 Kŷ Japo vŷ tóg sir tĩ mũ, ti tovãnh kŷ. Kŷ Topê tŷ jêgnê jafã ag tóg sir ti tá junjun mũ, Jesus ki rĩr jé. ã jóg vĩ mranh ja tũ tóg nĩ.

*Jesus tŷ Galiléia tá Topê vĩ tó
(Mc 1.14-15; Lc 4.14-15)*

12 Kejên ag tóg João ség mũ sir, kŷ Jesus tóg mêng mũ, ag tŷ ti se ti. Kŷ tóg ga tŷ Galiléia ra tĩ mũ, vênh péju jé.

13 Cidade tŷ Nazaré tá kãkutê kŷ tóg cidade tŷ Cafarnaum ra tĩ mũ, tá nĩ jé, goj nig tá, Zebulom ag jamã tá, Naftali ag jamã tá.

14 Hã ra tag tóg rán kŷ nĩ gé. Vãšŷ Topê vĩ tó tĩ tóg tag rán ja nĩ, Isaías ti, kŷ tóg:

15 “Zebulom ag jamã tá ti nĩnh mũ, Naftali ag jamã tá, goj nig tá, goj tŷ Jordão mã tá. Fóg ag jamã tá ti nĩnh mũ, Israel tũ ag jamã tá, ù tŷ Topê ki kagtĩg ag jamã tá, goj nig tŷ Galiléia fyr ki.

16 Tá ag tóg Topê ki kagtĩg nŷtĩ, hã kŷ tóg tá ag kri kuty ri ke nĩ. Ti tŷ tá jun kŷ tóg ag kri kurãg ên ri ke han mũ, ag kanhrãn kŷ. Ag kãgter ke vê vê, hã ra tóg ag kanhrãn mũ ag krenkren jé,” he tóg, Topê vĩ rán ki. Kŷ tóg ge nĩ, Jesus tŷ tá nĩn kŷ.

17 Ga ên tá nĩ kŷ tóg ag jyvên mũ, kŷ tóg ag mŷ: “ãjag jykre si tovãnh ra,” he mũ, “ãjag tŷ ũri ù tŷ kanhkã tá nĩ ên tŷ tŷ êg pã'i nĩ ve jé,” he tóg, Jesus ti. Ti tŷ ù tŷ ki kagtĩg ag mŷ Topê vĩ tón hã vê.

*Jesus tŷ ã mré mũ tĩ ag jé prêr
(Mc 1.16-20; Lc 5.1-11)*

18 Kŷ tóg kejên goj nig tŷ Galiléia ên fyr jagma tĩ mũ. Kŷ tóg tá ùn régre ag vég mũ. Û vŷ tŷ Simão nĩ, ag tŷ ù to: Pedro, he mũ tag ti. Kŷ ti jãvy vŷ tŷ André nĩ. Kur tŷ pirã kugmĩ jafã tŷ ag tóg goj kãki fón mũ, pirã kugmĩ jé. Ag rãnrhãj vê, pirã kugmĩg tĩ ag vê.

19 Kŷ Jesus tóg ag ve kŷ (tóg) ag to tĩ mũ sir. Kŷ tóg ag mré vĩ mũ. “Inh mré kãmũjêg,” he tóg mũ ag mŷ. “Pirã kugmĩ há ãjag nŷtĩ. ãjag kanhrãn jé sóg ke mũ, ãjag tŷ êprã ke ag tŷ inh ki ge han jé,” he tóg ag mŷ, Jesus ti.

20 Kŷ ag tóg vêsŷmér ãjag tŷ nén tovãnh kŷ mũ mũ, ti mré, Pedro ti, André ti ke gé.

21 Kŷ ag tóg mũ mũ, goj fyr jagma. Ag mũ sĩ han mũ ra Jesus tóg ùn régre ù ag ve mãn mũ gé. Tŷ ti Tiago nĩ, Zebedeu kósin, kŷ ti jãvy vŷ tŷ João nĩ gé. Canoa kãki ag nŷtĩ, kur tŷ pirã kugmĩ jafã ki ag tóg han nŷtĩ nĩ. Ag panh vŷ ag mré nĩ nĩ. Kŷ Jesus tóg ag jé prêr mũ sir.

22 Kŷ ag tóg vêsŷmér (ag tóg) ãjag tŷ nén tovãnh kŷ ti to kãmũ mũ, canoa tovãnh kŷ, ãjag panh ti tovãnh kŷ ke gé. Jesus mré ag tóg mũ mũ, Tiago ti, ti jãvy tŷ João ti ke gé.

*Jesus tŷ ag tŷ há' he
(Lc 6.17-19)*

23 Kŷ Jesus tóg ga tŷ Galiléia kar mĩ tĩ mũ sir, ag mré. Judeu ag vênh kanhrãn jafã krêm tóg ag kanhrãn mũ. Ag mŷ tóg Topê vĩ sér tó mũ, ù tŷ kanhkã tá nĩ tŷ tŷ êg pã'i nĩ tĩ. Ûn kagyga kar ag hyn han tóg, fag kar ke gé, gĩr kar ke gé.

24 Hã kŷ ti kãme tóg vênh kar kri rũm mũ sir, ga tŷ Síria tá ke kar kri. Kŷ ag tóg sir ùn kagyga ag taťn kãmũ mũ, ti to, vênh kaga vênhmŷ han mũ ag mré hã, kŷ tóg ag tŷ há' he kãn mũ sir. Vênh jagrê kórég ag pan kãn tóg mũ gé. Û tŷ

ter tĩ han mũ ag tỹ hághá' he tóg mũ gé, ùn grĩngrĩn kỹ nỹtĩ ag tỹ ke gé, fag kar tỹ ke gé.

²⁵ Hã kỹ ùn tỹ hên ri ke ag tóg ti mré mũ mũ sir. Û ag tóg ga tỹ Galiléia tá kãmũ mũ, kỹ ù ag tóg cidade tỹ Decápolis tá kãmũ mũ gé, cidade tỹ Jerusalém tá ke gé, ga tỹ Judéia tá ke gé, goj tỹ Jordão mã tá ke gé.

5

Jesus tỹ ag kanhrãn (Lc 6.20-23)

¹ Ûn e ag tỹ Jesus venh kãmũ kỹ tóg ag mré pãnónh ra tãpry mũ. Tá tóg nĩ mũ, kỹ ti mré mũ ti ag tóg ti mré nĩgnĩ mũ, ti rã hã.

² Kỹ tóg sir ag kanhrãn mũ, ag mỹ kãmén kỹ. Kỹ tóg ag mỹ tag tó mũ, ha mẽ.

³ “Topě vỹ ãjag ve há han mũ, ãjag tỹ: kórég inh nĩ, hen kỹ. Sỹ Topě kuprĩg tỹ jagrên kỹ nĩ tũ nĩ ra sóg tỹ ùn kórég nĩnh mũ vê, hemnĩ. Kỹ Topě vỹ ãjag ve há han mũ. Kỹ ãjag tóg ti tỹ tỹ ěg pã'i nĩ venh ke mũ, kanhkã tá,” he tóg, Jesus ti.

⁴ “Topě vỹ ãjag ve há han mũ, ãjag fỹn kỹ. Kỹ tóg ãjag fỹ ěn tỹ tũ' henh ke mũ,” he tóg.

⁵ “Topě vỹ ãjag ve há han mũ, ãjag tỹ vênh kar mỹ koměr hã vĩn kỹ. Kỹ ãjag tóg ga kar kri tỹ pã'i nỹtĩnh ke mũ, ùn mág pẽ,” he tóg.

⁶ “Topě vỹ ãjag ve há han mũ, ãjag tỹ vênh jykre kuryj ve sór nỹtĩn kỹ, ti tỹ ãjag mỹ ãjag kókĩr ri ke tĩn kỹ, ãjag tỹ vênh jykre kuryj ve sór nĩn kỹ. Kỹ ãjag tóg venh ke mũ,” he tóg.

⁷ “Topě vỹ ãjag ve há han mũ, ãjag tỹ jagně jagãgtãn kỹ. Kỹ Topě vỹ ãjag jagãgtãn ke mũ gé,” he tóg.

⁸ “Topě vỹ ãjag ve há han mũ, ãjag jãnhkri nỹtĩn kỹ. Kỹ ãjag tóg Topě venh mũ, ãjag jãnhkri nỹtĩn kỹ,” he tóg.

⁹ “Topě vỹ ãjag ve há han mũ, ãjag tỹ jagně krĩ tỹ kãnhvy' hen kỹ. Kỹ Topě tóg ãjag to: “inh krẽ ag vê,” henh ke mũ, ãjag tỹ jagně krĩ tỹ kãnhvy' hen kỹ,” he tóg.

¹⁰ “Topě vỹ ãjag ve há han mũ, ag tỹ vênh jykre kuryj to ãjag vóg kónãn mũ ra. Topě vỹ tỹ kanhkã tá ãjag pã'i nĩnh mũ, ag tỹ ti tugrĩn ãjag vóg kónãn mũ ra,” he tóg.

¹¹ “Topě vỹ ãjag ve há han mũ, ag tỹ isugrĩn ãjag mỹ vĩ kónãn mũ ra, ag tỹ ãjag vóg kónãn mũ ra. Ag tỹ ón kỹ ãjag to vĩ vĩ he kỹ tóg há tĩ, ag tỹ ón kỹ ãjag jykre pãno tó mũ ra, isugrĩn.

¹² Mỹ sér nỹtĩmnĩ, ãjag fe tỹ há' hemnĩ, ag tỹ ón kỹ ãjag kato vĩn kỹ. Kanhkã tá ãjag tóg nén kar há venh ke mũ, vênh kato. Ge ja ag tóg nĩgtĩ vãsỹ, Topě vỹ tó tĩ ag mỹ, ãjag jo ke ag mỹ. Ag ri kén ãjag tóg tag venh ke mũ,” he tóg, Jesus ti.

Sa to comparaço (Mc 9.50; Lc 14.34-35)

¹³ “Sa ri ke ãjag nỹtĩ, ãjag tỹ ga kri mũn kỹ. Sa kãhór nĩn kỹ ěg tóg ti tỹ sa há han mãn ki kagtĩg nỹtĩ. Kórég ti nĩgtĩ, ti kãhór nĩn kỹ. Kỹ ěg tóg ti vãm tí sir, kỹ tóg tũ' he tĩ sir,” he tóg, Jesus ti. Tĩ tỹ ěg tỹ ti jykre tovãnh ke tũ kãmén hã vê.

Jẽngrẽ kãmẽ (Mc 4.21-23; Lc 8.16-17)

14 “Ga kri mün ky ājag tóg jēngrē ri ke nýtī, ājag tȳ vēnh jykre há han ky, ag tȳ ājag ki ve jé, Topē jykre há ti. Cidade mág vȳ ve há tǫgtī, kuvar há tá jē ky, ti tȳ pānóh kri nȳn ky. Ti pi(jé) vēnh péju ky nȳ’.

15 Ri ke ti nī, néj gru ti. Ēg tȳ ti grug ky ēg pi(jé) lata krēm ti fēg tī’. Ti fēg jafā kri ēg tóg ti fēg tī. Kȳ vēnh kar tóg ēn vég tī sir, ĩn kátá nýtī kar ēn ti.

16 Gemnī, néj gru ri ke nýtīmī. Topē jykre han nī, vēnh kar tȳ ājag ki ve jé, ājag jykre há ti. Hā ky ag tóg ēg jóg tȳ Topē mȳ vī há han mū, ēg jóg tȳ kanhkā tá nī ēn mȳ,” he tóg, Jesus ti.

Topē tȳ Moisés mȳ vēnh jykre nȳv

17 “Ājag hȳn iso: ti há ne tóg Moisés tȳ ēg mȳ nén tó ja tȳ tū’ he sór mū’, he mū, ti há ne tóg Topē jykre ēn tȳ tū’ he sór mū’, he ājag hȳn tī. Vāsȳ Topē vī tó ti ag vȳ ēg mȳ tó ja nǫgtī, Topē jykre ēn ti, há ra tóg tȳ tū’ he sór mū’, he ājag hȳn tī iso. Hā tū vē. Sȳ ki króm kǎn sór vē, Moisés tȳ nén tó ja ēn ki, sȳ ki króm ky sóg tȳ ājag kanhrānrān kǎn ke mū,” he tóg.

18 “Topē vȳ ā jykre ēn tȳ tū’ henh ke tū nī, ha mē. Ga tȳ ver kanhkā mré nȳn ky tóg ā jykre tȳ tū’ henh ke tū nī, ga tȳ ver tū’ he tū nīn ky. Sȳ ki króm kǎn ke vē, ky tóg ki krov kǎn ky nȳnh mū, Topē jykre kar ti mȳr, ha mē,” he tóg.

19 “Kȳ ājag tȳ tȳ tū’ he sór ky tóg kórég nȳ, ājag tȳ ti vī pir tȳ tū’ he sór ky. Ājag tȳ ti vī pir to ū mȳ: han tȳ nī, hen ky ājag tóg tȳ ūn kǎsir nȳtīnh mū, vēnh kar krēm, kanhkā ki. Ājag tȳ há ra han kǎn ky ājag tóg tȳ ūn mág nȳtīnh mū, ājag tȳ vēnh kar mȳ: “ki króm kǎn sórmnī,” hen ky. Kȳ ājag tóg tȳ ūn mág nȳtīnh mū, kanhkā tá,” he tóg, Jesus ti.

20 “Fariseu ag ri ke nýtī sór tǫg nī. Topē vī to professor ag ri ke nýtī sór tǫg nī gé. Ón ky ag tóg Topē vī ki króm tī, há ra ag tóg ki króm há han tū nǫgtī. Ag jykre pi(jé) kuryj nȳ’. Ājag tȳ kanhkā ve sór nȳtīn ky vēnh jykre kuryj han nī,” he tóg, Jesus ti.

Ēg tȳ jagnē to há nȳtīnh ke to vēnh jykre

21 “Topē tȳ vāsȳ ēg si ag jyvēn mē ājag huri, há vȳ: ū tén tǫg nī, he mū. Ā tȳ ū tén ky ag tóg ā senh ke mū, ā tȳ ti mré ter jé, he ja tóg nī, Topē vī tȳ rán ky nī ki.

22 Sȳ ūri ājag jyvēn há vē, ha mē. Ā régre to ā fe tȳ gȳm ke tǫg nī. Ā tȳ ā régre to ā fe tȳ gȳm ke ky tóg ā tȳ ti tén ri ke nī. Kȳ tóg inh mȳ há tīnh mū, ag tȳ tag to ā se ky. Kȳ ā régre mȳ vī kónān tǫg nī gé. Ā tȳ ā régre mȳ vī kónān ky tóg inh mȳ há tīnh mū, ag tȳ tag to pā’i mág mȳ ā ven ky. Kȳ ā régre mȳ féfén tǫg nī gé. Ā tȳ ā régre mȳ féfén ky ā tóg nǫgme ki kutēnh ke mū, inferno ki, pī ēn ki,” he tóg, Jesus ti.

23 “Tag to jykrén nī, ā tȳ Topē mȳ nén ū pūn sór ky. Topē jo ĩn krēm. Ā tȳ tá jēn ky ā régre kar mī ékrén nī. “Ū mȳ iso jykrén kónān tū nī vȳ?” he jé ā tóg ke mū. “Inh mȳ ū jū han tū nī vȳ?” he jé ā tóg ke mū.

24 Ū tȳ ā to jykrén kónān ky ti venh tǫg nī ver, Topē mȳ nén ū pūn tovānh nī ver. Ā régre ēn mȳ: “inh mȳ vēnh pāte fón nī,” hemnī ver. Kar ky Topē mȳ nén ū pūn sórmnī sir, ā tȳ ā régre mré vī kar ky,” he tóg, Jesus ti.

25 “Kejēn ā tóg ā mré ke ū mȳ név(e) jē, ky tóg pā’i ag mȳ ā kāmén tǫg ke mū. Ti tȳ pā’i ag mȳ tónh tǫg ke mū ēn ti to há ti mré vīmī, ti mȳ: “kajām jé sóg ke mū,” hemnī. Ke tū nī (mū) ra pā’i vȳ ā jykre pāno venh ke mū, ky tóg polícia mȳ: “ti se ra,” henh ke mū sir, ky tóg sir ā senh mū.

²⁶ Ha mẽ, ki hã sóg tó mũ. Tá ã kãnhmar kãkutẽ mãn ke tũ nĩ. Ǻ tỹ kajãm kãn kar ã tóg kãkutẽ mãn mũ, tá, hẽn ri ke mũn,” he tóg, Jesus ti.

Ǻ prũ tũ fi mré nỹ tũ to vẽn h jykre

²⁷ “Topẽ tỹ ẽg si ag jyvẽn ù tag mẽ ãjag huri, ke gé, hã vỹ: “Ǻ prũ tũ fi mré nỹ tũ nĩ,” he mũ.

²⁸ Sỹ ùri ãjag jyvẽn hã vễ, ha mẽ: ã tỹ ùn týtá ù fi ki vễĩ kỹ tóg ã tỹ fi mré nỹ sỹ han ẽn ri ke nĩ sir, ã tỹ fi ki vễ i mũ ti. Ǻ tỹ ùn týtá ù fi mrẽ nũr sór kỹ tóg ã tỹ fi mrẽ nũr ri ke nĩ sir, ã tỹ fi to ẽn mũ ti. Ke tũg nĩ.

²⁹ Ǻ tỹ nén ù ki vễĩ tũgrĩn Topẽ vỹ mranh kỹ ã kanẽ tỹ nám kemnĩ, ã tỹ ki vễĩ jagy han mãn tũ nĩ jé. Ǻ kyvó nĩn kỹ tóg jagy tĩ gé vễ vễ. Ǻ tỹ hã ra nũgme ki kutẽ kỹ tóg jagy kãfór nĩ. Jagy pẽ ti nĩ, ã tỹ inferno ki kutẽ ti. Kỹ tag hã ve sór tũg nĩ.

³⁰ Ǻ tỹ ã nĩgẽ tỹ nén ù kórég han kỹ ã nĩgnó kym nĩ, ã tỹ ke mãn tũ nĩ jé. Ǻ nĩgnó pir nĩn kỹ tóg jagy tĩ gé. Ǻ tỹ hã ra nũgme ki kutẽ kỹ tóg jagy kãfór nĩ sir, kỹ tag hã kamẽg nĩ,” he tóg, Jesus ti.

Ǻ prũ fón tũ to vẽn h jykre

(Mt 19.9; Mc 10.11-12; Lc 16.18)

³¹ “Tope tỹ ẽg si ag jyvẽn ù hã vỹ nỹ gé, hã vỹ: “Ǻ tỹ ã prũ fi fón sór nĩn kỹ tóg há tũ nỹ,” he mũ. “Ǻ tỹ ge ra fi fón sór nĩn kỹ fi mỹ vẽn h rán kỹ nĩm nĩ, fi tỹ vẽn h rán ma tũg jé,” he ja tóg nĩ.

³² Sỹ ùri ãjag jyvẽn hã vễ, ha mẽ: ãjag prũ fón tũg nĩ. Ǻ tỹ fi fón kỹ fi tỹ ù mré nỹ mãn kỹ fi tóg ã tũgrĩn Topẽ vỹ mranh mũ sir, ã tỹ tỹ fi mén pẽ ra. Fi tỹ ã jãvo vėsóg ki ù mré nỹ ja nĩn kỹ tóg há sĩ nỹ, ã tỹ fi mỹ: ha tũg, hen kỹ. Kỹ fi mén tỹ fi fón kỹ fi tỹ prũg sór tũg nĩ gé. Ǻ prũ tũ fi vễ, fi mén tỹ fi fón ja nĩn kỹ,” he tóg, Jesus ti.

Jagnẽ to ón ke tũ to vẽn h jykre

³³ “Vãsỹ Topẽ tỹ ẽg si ag jyvẽn ù tag mẽ ãjag tóg huri ke gé, hã vỹ: “jagnẽ mỹ ón tũg nĩ,” he mũ. “Ǻ tỹ ù mỹ: Topẽ vỹ ki kanhró nĩ, hen kỹ ti mỹ ón sór tũg nĩ. Kỹ hã han nĩ gé, ã tỹ Topẽ mỹ: tag hã han jé sóg ke mũ, hen kỹ. Ón kỹ vỹ tũg nĩ,” he ja tóg nĩ, ẽg si ag mỹ, Topẽ ti.

³⁴ Sỹ ùri ãjag jyvẽn hã vễ, ha mẽ: “Topẽ vỹ ki kanhró nĩ,” he sór tũg nĩ, ón kỹ. “Ǻ tỹ kãnhkã tá nĩ ẽn vỹ ki kanhró nĩ,” he sór tũg nĩ gé, ón kỹ. Topẽ nĩgja vễ, kãnhkã tá, kỹ ón kỹ tag tó sór tũg nĩ.

³⁵ Kỹ: “ù tỹ ga kri ke ẽn vỹ ki kanhró nĩ,” he tũg nĩ gé. Topẽ tũ vễ, ga ti, hã kỹ ón kỹ tag tó sór tũg nĩ. Kỹ: “ù tỹ Jerusalém tá ke ag ki rĩr tĩ ẽn vỹ ki kanhró nĩ,” he tũg nĩ gé. Ẽg pã'i mág tũ vễ mỹr, Jerusalém ti, hã kỹ ón kỹ tag tó sór tũg nĩ.

³⁶ Kỹ: “ù tỹ inh krĩ han mũ ẽn vỹ ki kanhró nĩ,” he tũg nĩ gé. Ǻ tỹ ã gãnh kuprig sór mũ ra ã tóg ã tỹ nén tỹ ã gãnh kuprig ke mũ ẽn ki kagtũg nĩ, ã tỹ ã gãnh sãn sór mũ ra ã tóg ã tỹ nén tỹ sãn ke mũ ẽn ki kagtũg nĩ gé. Hã kỹ ón kỹ tag tó sór tũg nĩ gé.

³⁷ Ki hã tómnĩ, jagnẽ mỹ, ón sór tũg nĩ. Ón kỹ Topẽ jiji tó sór tũg nĩ gé. Ǻ tỹ ã mỹ ki hã tó kỹ: hỹ, hemnĩ. Ti tỹ ki hã ke tũ nĩn kỹ: vó, hemnĩ gé. Ǻ tỹ han ke nĩn kỹ: hej, hemnĩ. Ǻ tỹ han ke tũ nĩn kỹ: nejé, hemnĩ. Ki hã tómnĩ, jagnẽ mỹ. Ǻ tỹ ón sór kỹ ã tóg Nén-Kórég jykre hã han ke mũ. Ke tũg nĩ,” he tóg, Jesus ti.

*Ĕg tŷ vĕnh kajã ke tũ to vĕnh jykre
(Lc 6.29-30)*

³⁸ “Topĕ tŷ ĕg si ag jyvĕn ũ tag mĕ ajag huri, hã vŷ: “ũ tŷ ã kanĕ pir ki tãnh kŷ vĕnh kato ti kanĕ pir ũ ki tãnh nŷ gĕ,” he ja tóg nŷ. “Ũ tŷ ã jã pir ki tãnh kŷ mranh kŷ vĕnh kato ti jã pir ki tãnh kŷ mranh nŷ gĕ. Pãtĕn tũg nŷ,” he ja tóg nŷ, Topĕ ti.

³⁹ Sŷ ũri ajag jyvĕn mũn hã vĕ, ha mĕ: ũ tŷ ã vóg mũ ra ti vóg tũg nŷ. Ti tŷ ã jamĕ ki tãnh kŷ ti mŷ ã jamĕ ũ ti ven nŷ, ti tŷ ã mŷ ki tãnh jĕ gĕ.

⁴⁰ Ti tŷ ã palitó mãn sór kŷ ti mŷ ã camisa mrĕ nŷm nŷ gĕ.

⁴¹ Ti tŷ ã mŷ: “mũ nŷ, tag tá, kakó ja tá inh fón nŷ,” hen kŷ ti mrĕ tũg nŷ, hã ra ti mŷ: “kór há tá inh ã fón tũg mũ ha,” hemnŷ.

⁴² Ti tŷ ã mŷ nĕn ũ to: “inh mŷ nŷm,” hen kŷ ti mŷ nŷm nŷ. Ti tŷ ã mŷ: “inh mŷ prestar hemnŷ,” hen kŷ ti mŷ: vó, he tũg nŷ,” he tóg, Jesus ti.

*Ĕg tŷ ĕg kato vãsãn mũ ag to há nŷtĩnh ke
(Lc 6.27-28, 32-36)*

⁴³ “Topĕ tŷ ĕg si ag jyvĕn ũ mĕ ajag huri, hã vŷ: “ã mrĕ ke ag to há nŷm nŷ, kŷ ũ tŷ ã kato vãsãnsãn mũ ag to jũ nŷm nŷ gĕ,” he ja tóg nŷ, Topĕ ti.

⁴⁴ Isŷ ũri ajag jyvĕn hã vĕ, ha mĕ: ũ tŷ ajag kato vãsãnsãn mũ ag to há nŷtĩm nŷ, ũ tŷ ajag vóg kónãn mũ ag to Topĕ mrĕ vĩm nŷ.

⁴⁵ Hã ki ajag tóg tŷ Topĕ krĕ nŷtĩ, ti ri ke han kŷ, ajag jóg tŷ kanhkã tá nŷ ĕn ri ke han kŷ. Ti hã ne tóg rã han', ti tŷ vĕnh kar kri jĕngrĕg kŷ san jĕ, ũn jykre kuryj ag kri, ũn jykre pãno ag kri ke gĕ. Ta han ti ke gĕ, ti tŷ vĕnh kar há han jĕ, ũn jykre kuryj ag, ũn jykre pãno ag ke gĕ. Ver tóg vĕnh kar to há nŷ, Topĕ ti,” he tóg, Jesus ti.

⁴⁶ “Ajag mrĕ ke ũ ag tóg ajag to há nŷtĩ. Ajag tŷ tag ag hã to há nŷtĩn kŷ tóg tŷ nĕn ũ tũ tĩ ver. Ũn jykre kórĕg ag vŷ ge nŷtĩgtĩ gĕ, governo mŷ jãnkamy mãg tĩ ag. Ũ tŷ ajag to há nŷtĩ ag hã to ag tóg há nŷtĩ, vĕnh kato. Há ti nŷ, hã ra tóg tŷ nĕn ũ tũ nŷ ver.

⁴⁷ Kŷ ajag tŷ ajag mrĕ ke ag hã mŷ: ã mŷ há? hen kŷ tóg tŷ nĕn ũ tũ nŷ gĕ ver. Ũ tŷ Topĕ vŷ ki kagtũg ag vŷ ge nŷtĩgtĩ gĕ. Ajag mrĕ ke ag hã mŷ ag tóg: ã mŷ há? he tĩ gĕ, hã ra tóg tŷ nĕn ũ tũ nŷ ver.

⁴⁸ Hã kŷ vĕnh kar to vĕnh jykre kuryj han kŷ nŷtĩm nŷ, ũ tŷ ajag kato vãsãnsãn mũ ag mrĕ hã, ĕg jóg tŷ kanhkã tá nŷ ĕn ri ke han nŷ. Ti hã ne tóg vĕnh kar to vĕnh jykre kuryj han kŷ nŷ nŷ. Ti ri ke han nŷ,” he tóg, Jesus ti.

6

Ĕg tŷ ũ jagãgtãn ke to vĕnh jykre

¹ “Kŷ ajag tŷ Topĕ jykre han sór kŷ ũ tŷ vĕnh jykre pãno han mũ ag jykre ri ke han tũg nŷ. Őn kŷ ag tóg vĕnh kar rĩnve Topĕ jykre han sór tĩ, vĕnh kar tŷ ag ve jĕ, ag tŷ Topĕ jykre han mũ ĕn ti. Kar kŷ ag tóg hã ra hã tũ han tĩ sir. Kŷ ag ri ke han tũg nŷ, ke tũ nŷ (mũ) ra ĕg jóg tŷ kanhkã tá nŷ ĕn vŷ tóg ajag mŷ ven ke tũ nŷ, ajag tŷ ĕg jóg jykre han mũ ĕn kaja ti,” he tóg.

² “Hã kŷ ajag tŷ ũ jagãgtar ag jagãgtãn kŷ ũ mŷ: “ag jagãgtãn inh tĩ,” he tũg nŷ. Ũ tŷ vĕnh jykre régre han mũ ag jykre ri ke han tũg nŷ. Ag tŷ ón kŷ ũ jagãgtãn kŷ ag tóg ĕpŷy jagma mũ kŷ (ag tóg) vĕnh kar mŷ: “ag jagãgtãn inh tĩ,” he tĩ. Ĕg vĕnh kanhrãn jafã jo ĩn krĕm ag tóg tag tó tĩ gĕ. Ag tŷ ĕprã ke ag tŷ ag mŷ vŷ há han ve sór vĕ, hã jĕ ag tóg ón kŷ ũn jagtar ag jagãgtãn tĩ. Ag ganho hã vĕ, ĕprã

ke ag tÿ ag mÿ vënh vî há tó mü ên ti. Kanhkã tá ag ganho ù ve mãn ke tũ nî ha. Ājag mÿ sóg ki hã tó mü, ha mē,” he tóg, Jesus ti.

³ “Ag ri ke han tũg nî. Ūn jagtar ag jagãgtãn nî. Ū mÿ tó tũg nî, ājag tÿ ùn jagãgtãn mü ên ti, ājag mré ke fag mÿ tó tũg nî gé.

⁴ Kÿ ājag tÿ ag jagãgtãn kÿ ěg jóg tÿ kanhkã tá nî ên tóg ājag vég mü sir, kÿ tóg ājag mÿ nîm ke mü sir, ājag ganho ti. ěg tÿ vënh vatánh tá nén han mü ên ve kãn tóg tî (mÿr), Topê ti,” he tóg, Jesus ti.

Ěg tÿ Topê mré vēmén to vënh jykre
(Lc 11.2-4)

⁵ “Kÿ ājag tÿ Topê mré vēmén kÿ ù tÿ vënh jykre régre han mü ên ag jykre ri ke han tũg nî gé. Ag tÿ ón kÿ Topê mré vî kÿ ag tóg ěg vënh kanhrãn jafã jo ïn kãki jëgÿ kÿ nÿtî, ke tũ nî kÿ ěmĩn kri, ïn to hã. Kÿ vënh kar vÿ ag tÿ Topê mré vî mü tag vég mü sir. Kanhkã tá ag tóg ganho ù ve mãn ke tũ nî ha. Ājag mÿ sóg ki hã tó mü, ha mē.

⁶ Ag jãvo ājag tÿ Topê mré vēmén kÿ ājag ïn kãra gemnî. Kÿ jãnkã nífénh nî. Kÿ tá Topê mré vĩmnî sir, ěg jóg mré, ěg tÿ ùn vég tũ ên mré. Kÿ tóg kanhkã tá ājag mÿ nîm ke mü, ājag ganho ti. ěg tÿ vënh vatánh tá nén han mü ên vég tóg tî (mÿr), Topê ti,” he tóg, Jesus ti.

⁷ “Ājag tÿ ti mré vēmén kÿ fagrĩnh mÿ ti mré vēmén mág han tũg nî. Ū tÿ Topê vî ki kagtĩg ag ri ke han tũg nî. Ājag jãnãn kÿ ag tóg ón kÿ vî mág han tî. “Ěg tÿ vî mág han kÿ ti hÿn ěg vî mēg mü,” he ag tóg tî, ón kÿ.

⁸ Ag ri ke han tũg nî. ěg jóg vÿ nén kar ki kanhró nî, ājag tÿ ti mÿ tó tú ra tóg ki kanhró nî,” he tóg.

⁹ “Ājag tÿ Topê mré vî kÿ tag tómnî, ha mē:

“Ěg jóg mág, kanhkã tá ã tóg nî nî.

Ā jiji tó ěg tóg tî, kÿ vënh kar jé ã tÿ tÿ ùn mág nî vé.

¹⁰ Ěg jé kãnhmar ã tÿ tÿ ěg pã'i nî vé.

Vënh kar jé ã tÿ nén to jykren mü ên han sór, ga tá ke kar, ag jé kanhkã tá ke kar ag ri ke han.

¹¹ Ěg mÿ ùri ěg jën ti nîm, ěg tÿ kurã kar ki ko tî ên.

¹² Kÿ ěg mÿ vënh pãte fón nî, ěg tÿ ã vî mranh ja ti.

Hã jé ěg tóg ěg tÿ jagnë to jũ tÿ jagnë mÿ vënh pãte fón ke mü gé.

¹³ Kÿ ěg tÿ ã vî mranh sór kÿ ěg kren han nî, ěg tÿn mranh tũ nî jé.

Nén-Kórég jo ěg vemnî.

Ā hã ne tóg tar nî'.

Ā hã ne tóg mág nî inhhã'.

Ā jykre tóg tũ' henh ke tũ nî,”

hemnî, Topê mÿ,” he tóg, Jesus ti.

¹⁴ “Hÿ, ge ti nî,” he tóg. “Ū tÿ ājag to jũ kÿ ti mÿ vënh pãte fón nî. Ū tÿ ājag mÿ vî kónãn kÿ ti mÿ vënh pãte fón nî gé. Ājag tÿ gen kÿ ěg jóg vÿ ājag mÿ vënh pãte fón ke mü gé.

¹⁵ Ājag tÿ tag han tũ nîm kÿ, kÿ ěg jóg tóg ājag mÿ vënh pãte fón ke tũ nî gé, ājag tÿ ti vî mranh ja ti,” he tóg, Jesus ti.

Ěg vãkre to vënh jykre

¹⁶ “Kÿ ājag vãkre kÿ fe ù nÿtî tũg nî, ājag tÿ Topê mÿ há nÿtî jé jëg tũ nÿtĩn kÿ. Vãkre ki ù tÿ vënh jykre régre han mü ag jykre ri ke han tũg nî. Ag tÿ ón kÿ

vãkre ký ag tóg fe ù nýtĩn mũ sir, vẽnũ kar tỹ ag vãkre ve jé. Ag ganho hã vẽnũ. Kanhkã tá ag tóg ganho ù vẽnũ ke tũ nĩ ha. Ājag mũ sóg ki hã tó mũ, ha mẽ.

¹⁷ Ājag vãkre ký ājag gãnh tãg nĩ, ājag jamẽ kupemni, festa han nýtĩ ve nĩmni, ājag vãkren ký.

¹⁸ Hã ký ag tóg vég tũ nĩ, ājag vãkrég mũ ti. Ēg jóg hã ne vég mũ inhhã', Ēg tỹ ùn vég tũ ěn hã vỹ vég mũ. Ký tóg kanhkã tá ājag mũ nĩm ke mũ, ājag ganho ti. Ēg tỹ vẽnũ vatánh tá nén han mũ vég tóg tĩ (mỹr), Topẽ tĩ," he tóg, Jesus ti.

Ēg rico to vẽnũ jykre
(Lc 12.33-34)

¹⁹ "Ga kri mũn ký ricon ke to vãsãn sór tũg nĩ. Ga vỹ ājag tỹ nén kar ti konh ke mũ, ājag tỹ rico hã to vãsãn mũ ra. Ký ājag jãnkamy vỹ vẽnũ jãgfanh ke mũ gé sir, ti e nýtĩn ký. Ký ag tóg pigju ký ma mũnh ke mũ gé sir, ājag tỹ nén ti, ti e nýtĩn ký.

²⁰ Ājag tỹ inhhã kanhkã tá tũ mág pẽ nýtĩn ký tóg inhhã ājag mũ há tĩn mũ. Tá ti pi(jé) tỹ ga nĩ', ājag tũ ti, tá ti pi(jé) vẽnũ jãgfanh mũ'. Tá ag pi(jé) pēju ký ma mũnh mũ'. Hã ký tá ājag tũ vin han sórmni.

²¹ Ājag tỹ ga kri tỹ nén ù mág nýtĩn ký ājag tóg ga kri mũ mág sór mũ. Ājag tỹ hã ra kanhkã tá tỹ nén ù mág nýtĩn ký ājag tóg kanhkã ra mũ sór mũ, ký tag hã ne há nĩ'," he tóg, Jesus ti.

Ēg kanẽ tỹ ěg mũ kurã han
(Lc 11.34-36)

²² "Ēg kanẽ tỹ ěg vég tĩ. Ký tóg tỹ ěg mũ kurã ri ke nĩ, ěg kanẽ ti, ti há nĩn ký. Tỹ ěg tóg kurã ve há han ti, ěg kanẽ há nĩn ký.

²³ Ēg kanẽ kórég nýtĩn ký tóg ěg mũ kuty tĩn mũ. Ký tóg ěg mũ kurã vég tĩ ěn mũ (tóg) kuty nĩ sir, ký kuty tag vỹ kuty kar kãfór nĩ. Ge ti nĩ, ěg jykre kórég nĩn ký. Ēg kanẽ kórég ri ke vẽnũ sir, ěg jykre kórég ti," he tóg, Jesus ti.

Ēg tỹ ga kri rico to vãsãn sór ke tũ
(Lc 16.13; 12.22-31)

²⁴ "Ā jagrẽ régre nĩn ký tóg vẽnũmỹ tĩ. Ā tỹ Topẽ hã tỹ jagrẽ nĩn ký jãnkamy tãn ěn tỹ jagrẽ nĩ sór tũg nĩ. Ā tỹ jãnkamy e ve sór ký ti hã mũ ěkrén ký ti hã vỹ tỹ Ā jagrẽ nĩn mũ. Ký ěg tóg Topẽ tỹ ěg mũ nén tó mũ ěn to jykrén há han tũ nĩgtĩ. Ā tỹ Topẽ to há nĩn ký Ā tóg sir ga kri rico to vãsãn sór ke tũ nĩ. Ā tỹ ga kri rico nĩ sór ký Ā tóg Topẽ mũ ěkrég tũ nĩ, hã vemni," he tóg, Jesus ti.

²⁵ "Hã ký sóg ājag mũ tó mũ. Ājag tỹ nén ve sór mág mũ to krĩ kufy han tũg nĩ. "Inh hỹn ùri ne konh mũ', inh hỹn ne tunh mũ'?" he tũg nĩ. Topẽ tỹ ěg han ja vẽnũmỹ, ěg tỹ ga kri mũ jé. Hã ký tóg ěg mũ ěg jẽn ki rĩr mũ gé sir, ěg kur ki ke gé, Topẽ tĩ.

²⁶ Sēsĩ to jykrén nĩ. Ag mũ ěkrãn tĩ? Vó. Ag mũ pãjó krēm vin tĩ? Vó, ke tũ ag tóg nĩgtĩ. Ge ra ěg jóg tỹ kanhkã tá nĩ ěn tóg ag ki rĩr nĩ nĩ. Ājag mũ jēsĩ kãfór tũ nýtĩ', Topẽ mũ'? Vó, sēsĩ kãfór ājag tóg nýtĩ.

²⁷ Topẽ tỹ ěg kã ù jé prẽr ký ěg tóg ter ke mũ, ěg ter sór tũ ra. Ter jé ěg tóg ke mũ gé, ěg tỹ to krĩ kufy han mũ ra. Ēg krĩ kufy ěn pi(jé) ěg kren han mũ'.

²⁸ Ký kur to krĩ kufy han tũg nĩ gé. Ka fej hã to jykrén nĩ. Jatun mũ tóg mog tĩ. Rãnrhãj tũ tóg nĩgtĩ, kur han tũ tóg nĩgtĩ.

²⁹ Hã ra tóg s̄n̄vĩ n̄ȳtĩ, ka fej ti. K̄y pã'i mág t̄y Salomão kur tóg ri ke tũ n̄ȳtĩ, ti s̄n̄vĩ ra, v̄enh kar kur s̄n̄vĩ kãfór ti n̄i, Salomão kur ti. Hã ra tóg ka fej s̄n̄vĩ ri ke tũ n̄i. Ki hã sóg tó mũ m̄ȳr.

³⁰ Topê hã ne ka fej s̄n̄vĩ han, t̄y tóg kur s̄n̄vĩ ri ke n̄i, ka fej ti. Hã ra tóg kãnhmar kãgter tĩ, ka fej ti, ti s̄n̄vĩ ra. Ūri tóg há n̄ȳtĩ. K̄y tóg vaj k̄y kógungun k̄y p̄ur mũ sir, re mré. Hã k̄y Topê tóg ãjag ki r̄ir kãfór han mũ, ãjag kur mré hã. Hã k̄y Topê ki ge k̄y n̄ȳtĩmn̄i, ti v̄i kri fi k̄y.

³¹ Kr̄i kufy han tũg n̄i. “Inh h̄yn ne konh mũ’? Inh h̄yn ne kron mũ’? Inh h̄yn ne tunh mũ’?” he tũg n̄i.

³² Ū t̄y Topê v̄i ki kagt̄ig ag v̄y tag to jykrén mág tĩ, hã ra êg jóg t̄y Topê v̄y êg vég tĩ, êg t̄y n̄en ve sór mág mũ ti. K̄y to kr̄i kufy han tũg n̄i. Ti hã ne êg vég mũ, êg jóg t̄y Topê ti.

³³ Topê t̄y t̄y êg pã'i n̄i ên hã ve sórmn̄i. K̄y tag hã to vãsãn n̄i. Ti jykre kuryj tag hã to vãsãn n̄i. K̄y tóg ãjag m̄y ãjag t̄y n̄en ve sór mág mũ ên t̄y ãjag m̄y vin ke mũ sir.

³⁴ Hã k̄y ãjag t̄y vaj k̄y n̄en venh ke to kr̄i kufy han tũg n̄i. Vaj k̄y ãjag tóg venh ke mũ, k̄y ãjag tóg to jykrén ke mũ sir. Ūri ãjag t̄y n̄en t̄y ūri vég mũ hã to jykrén há han n̄i. ãjag t̄y ūri n̄en ū jagy vég mũ v̄y há n̄i, k̄y ãjag t̄y vaj k̄y n̄en venh ke to jykrén tũg n̄i, ūri,” he tóg, Jesus ti.

7

*Êg t̄y ū to jykrén kónãn ke tũ
(Lc 6.37-38, 41-42)*

¹ “Ã régre to jykrén kónãn tũg n̄i, ti jykre kórég ra. K̄y Topê v̄y ã to jykrén kónãn ke tũ n̄i gé.

² ã t̄y ū to jykrén mũ ên ri ke han jé tóg ke mũ, Topê ti, ã m̄y. ã t̄y ū m̄y kãmun mũ ri ke han jé tóg ke mũ, ã m̄y, Topê ti.

³ Jykre kórég mág ã tóg n̄i gé, hã ra ã régre jykre pãno s̄i ên ne ã m̄y kórég n̄y’.

⁴ K̄y ã hã ne tóg ã régre m̄y: ã jykre kórég kurynh jé sóg ke mũ, he mũ’, ã t̄y ã jykre pãno tãv̄i ên kurynh jãvãnh (hã) ra’.

⁵ Ke tũg n̄i. Ke tũ n̄i (mũ) ra ã tóg jykre régre n̄ȳtĩ. ã jykre kurynh vén n̄i. Kar k̄y ã tóg sir ã régre jykre kurynh há han mũ,” he tóg, Jesus ti.

⁶ “Hã ra cachorro jykre ri ke ag m̄y Topê jykre s̄n̄vĩ tó tũg n̄i. Porco jykre ri ke ag m̄y Topê jykre s̄n̄vĩ ên tó tũg n̄i gé. Jykre kavéj ag n̄ȳtĩ, hã k̄y ag tóg Topê jykre to é henh ke mũ. Ti t̄y tũ’ he sór ag tóg tĩ, ti sãn k̄y, Topê jykre s̄n̄vĩ ên ti. Kar k̄y ag tóg sir ã mré v̄enh génh sór mũ gé, ha vemn̄i, ã t̄y ag m̄y Topê jykre s̄n̄vĩ ên tó k̄y,” he tóg, Jesus ti.

*Topê t̄y t̄y ūn v̄i há n̄i
(Lc 11.9-13)*

⁷ “Topê m̄y n̄en kar to v̄imn̄i, k̄y tóg ãjag m̄y han mũ. ãjag t̄y ti m̄y n̄en ū to v̄i mũ ên jãvãnh n̄i, k̄y ãjag tóg venh ke mũ. Ti mré v̄i k̄y êg t̄y ti jãnkã t̄y tórón tórón ke ên ri ke han n̄i. K̄y tóg ãjag m̄y n̄on ri ke han mũ sir, ti t̄y ãjag m̄y ãjag t̄y n̄en to v̄i mũ ên han k̄y.

⁸ H̄y, hã v̄e. ãjag t̄y ti m̄y n̄en (ũ) to v̄in k̄y tóg ãjag m̄y han mũ sir. ãjag t̄y ti jãvãnh k̄y ãjag tóg ti venh mũ sir. ãjag t̄y êg t̄y jãnkã t̄y tórón tórón ke ri ke han k̄y tóg ãjag m̄y n̄on ri ke han mũ sir,” he tóg.

9 “Kejĕn ājag kósin tóg ājag mý ěmĩ to vĩ mũ. Ký ājag pi(jé) ti mý pó nĩm ke mũ. Ti mý ājag tóg ěmĩ há nĩm ke mũ.

10 Ājag kósin tỹ ājag mý pirā to vĩn ký, ký ājag pi(jé) ti mý pỹn nĩm ke mũ. Pirā há nĩm jé ājag tóg ke mũ.

11 Jykre pāno ājag nỹtĩ. Ge ra ājag tóg ājag krĕ mý nén ũ há vin tĩ. Ge ti nĩ gé, ājag tỹ Topĕ mý nén ũ to vĩn ký. Nén ũ há há nĩm jé tóg ke mũ. Há ra tóg ājag káfór han tĩ, ěg jóg tỹ kanhkā tá nĩ ti. Ājag tỹ ti mý nén (ũ) to vĩn ký tóg ājag mý nén ũ há tāvĩ han tĩ mýr,” he tóg.

12 “Ājag tỹ ājag mré ke ũ to: “ti tỹ ěg mý tag han há tóg tĩ vĕ,” he mũ ra ěg há tóg ti mý han ke mũ. Moisés tỹ ěg jyvĕn há vĕ, Topĕ vĩ tó tĩ ag tỹ ěg jyvĕn há vĕ,” he tóg, Jesus ti.

Jānkā régre

(Lc 13.24)

13 “Ũ tỹ inh ki rá mũ vỹ tỹ jānkā sĩ fĩn rām ke ri ke nĩ. Jānkā sĩ fĩn rām jé ěg tóg vāsān tĩ. Ri ke ti nĩ, ũ tỹ inh ki rānh ke mũ ti. Jānkā mág vỹ nĩ gé. Há ra ũ tỹ fĩn rām ke mũ ag vỹ kǎgter pĕ han ke mũ. Ājag tỹ jānkā mág ěn fĩn rām sór ký tóg ver jagy tũ nĩ, fĩn rām há tóg tĩ. Ký nũgme to ěpyr jagma tũg, pĩ to ěmĩn jagma tũg pi(jé) jagy tĩ, ti mág pĕ nũn ký. Há ký ũ tỹ ěn ri ke ag vỹ jagma mũ mũ. Kar ký ag tóg kǎgter pĕ han mũ sir, pĩ ki vár ký.

14 Ag jāvo jānkā sĩ ěn fĩn rām nĩ, ājag tỹ rĩr krỹg ja tũ ve jé. Sĩ ti nĩ, kanhkā to ěpyr ti, kanhkā to ěmĩn ti. Ũn pipir ag vỹ jagma mũnh mũ. Ā sĩ san ký tóg vég tũ sag tĩ, há ký ũ tỹ jagma mũnh ke mũ ag vỹ pipir nỹtĩ,” he tóg, Jesus ti.

Ón ký Topĕ vĩ tó tĩ ag

(Lc 6.43-44)

15 “Ón ký Topĕ vĩ tó tĩ ěn ag vĩ kri fig tũg nĩ. Há nỹtĩ ve ag tóg nỹtĩ, há ra ag tóg ājag kókén sór nỹtĩ. Ājag kókén sór to ag tóg mĩg jũ ěn ri ke nỹtĩ, mýr, ha mĕ.

16 Ājag tỹ ag jykre tugnỹm ký ājag tóg ag tỹ Topĕ vĩ mranh mũ ěn ki kanhró nỹtĩ. Ha vé, vānh tỹ jóhó ki ěg tóg uva vég tũ nĩgtĩ mýr. Ký ěg tóg sónh ki pĕnva vég tũ nĩgtĩ gé.

17 Ka vỹ ge nỹgtĩ. Ti há nĩn ký tóg kanĕ há han tĩ, ký ěg tóg ko tĩ. Ti kórég nĩn ký tóg kanĕ kórég han tĩ, ký ěg pi(jé) ko tĩ.

18 Ka há vỹ kanĕn kónān ki kagtĩg nĩ, ký ka kórég vỹ kanĕ há han ki kagtĩg nĩ gé.

19 Ký ěg tóg ka kórég ěn gỹn tĩ, tỹ ěg pĩ han tĩ. Ka tỹ kanĕ há han vānh ěn tỹ ěg pĩnh ti.

20 Ge ti nĩgtĩ, ón ký Topĕ vĩ tó tĩ ag tỹ. Ag tỹ Topĕ vĩ mrynhmranh ký ag tóg ón ký Topĕ vĩ tó tĩ. Ag tỹ nén han mũ ki ěg tóg ag jykre kórég vég mũ,” he tóg, Jesus ti.

Ěg tỹ Topĕ vĩ ki króm ke

(Lc 13.25-27)

21 “Vĕnh kar tóg iso: “pā'i vĕ, pā'i vĕ,” he tĩ. Há ra ũ ag tóg Topĕ tỹ nén tó mũ ěn han vānh nỹtĩgtĩ. Há ký ag tóg Topĕ tỹ tỹ ěg pā'i mág nĩ venh ke tũ nĩ. Ũ tỹ inh jóg vĩ han mũ ěn ag há vỹ Topĕ tỹ tỹ ěg pā'i nĩ venh ke mũ.

22 Kurā ěn kā, isỹ vĕnh kar jykre tugnỹm ke kurā ěn kā ag tóg inh mý tag tónh mũ, ha mĕ. “Senhor, Senhor, ā jykre tó ěg mýr,” he jé ag tóg ke mũ. “Ā jykre

hã ki êkren ký êg tóg êg tý nén han vãnh han ja nĩgtĩ m̃ỹr. Ā jykre hã tý êg tóg vãnh jagrê kórég pan m̃ỹr;” he jé ag tóg ke mũ, inh m̃ỹ.

²³ Hã ra sóg ag m̃ỹ: “ājag pi(jé) tý inh mré ke ñỹtĩ;” henh ke mũ. “Ājag ki kagtĩg sóg nĩ m̃ỹr. Ha mũ jêg. Jykre kórég ājag tóg ñỹtĩ,” he jé sóg ke mũ, ù tý inh panh vĩ han vãnh ag m̃ỹ;” he tóg, Jesus ti.

Īn nũna gunh gunh kãme
(Lc 6.47-49)

²⁴ “Ha mẽ, inh vĩ mẽg ājag tóg ñỹtĩ,” he tóg. “Ājag tý inh vĩ ki króm ký ājag tóg sir ùn há ri ke ñỹtĩ. Īn han ken ký tóg to jykren mũ. To jykren há ñn ký tóg ga kũm ký pãró kri Īn nũna ka fêg mũ sir.

²⁵ Ký vãhã ta tóg kutê mũ, ký goj vỹ var mũ sir. Kóho jũ vỹ kãtĩ mũ, Īn to, hã ra tóg kutê tũ nĩ sir, Īn ti. Pãró kri tóg ñỹtĩ, ti nũna ti, hã ký tóg kutê tũ nĩ. Ge ti nĩ, ājag tý inh vĩ kri fi ký.

²⁶ Ājag tý inh vĩ mẽg mũ ra ki króm tũ ñn ký ājag tóg ùn jykre kórég ri ke ñỹtĩ. Īn han ken ký tóg to jykren kónãn mũ, ký tóg ga tý r̃ynhr̃ỹj hã ki ka fêg mũ, krĩg m̃ỹ, Īn nũna ti.

²⁷ Ký ta tóg kutê mũ, ký goj vỹ var mũ sir. Kóho jũ vỹ kãtĩ mũ gé, Īn to, ký Īn tóg vom ke tere ký kutê mũ sir. Mráj kãn tóg mũ sir, Īn ti. Ge ti nĩ, ājag tý inh vĩ kri fig tũ ñn ký,” he tóg, Jesus ti.

Jesus vĩ tý vãnh kar vĩ kãfór nĩ

²⁸ Hã ki Jesus tóg krỹg he mũ sir, ag kanhrãn ki. Ký tóg vãnh kar m̃ỹ e tĩ sir, ti vĩ ti.

²⁹ Ti vĩ tóg vãnh kar vĩ kãfór nĩ, Topê vĩ to professor ag vĩ kãfór ti nĩ, ký tóg pã'i vĩ kãfór pẽ nĩ gé, ti vĩ ti. Hã ký tóg ki hã tó mũ. Ký tóg ag m̃ỹ e tĩ sir.

8

Jesus tý ùn kaga kren vãnh tý há' he
(Mc 1.40-45; Lc 5.12-16)

¹ Jesus tý ag m̃ỹ tó kãn ký tóg pãnónh ên to tere mũ sir. Ký ùn e ên ag tóg ti nón mũ mũ sir.

² Ký vãhã ù tóg ti tá jun mũ. Vãnh kaga kren vãnh han ký tóg nĩ, vãnh kaga tý lepra he mũ ên, ù tý tá jun mũ ti. Ký tóg ti krêm grĩnh ke ký ã jakrĩ tý jê nĩ, ký tóg ti m̃ỹ: “Senhor,” he mũ. “Ā m̃ỹ is̃ỹ há' he sór tũ nĩ? Ā hã tóg is̃ỹ há henh mũ, ã tý is̃ỹ há' he sór ký,” he tóg ti m̃ỹ.

³ Ký Jesus tóg ti m̃ỹ: “hej,” he mũ. “To há sóg nĩ, há' he ja há ã tóg nĩ,” he tóg ti m̃ỹ, Jesus ti. Ký tóg ti kaga kren vãnh ên tý kren han mũ vês̃ymér. Jãnhkri tóg nĩ, ti fãr ti.

⁴ Ký Jesus tóg ti m̃ỹ: “ker ù m̃ỹ tó hê', ã han tag ti,” he mũ. “Ha tĩg, Topê tũ ki rĩr ti to. Ti hã m̃ỹ tómnĩ. Ký ti m̃ỹ nén ù nĩm nĩ, ti tý Topê m̃ỹ pũn jé, Moisés tý vãs̃ỹ êg m̃ỹ nén tó ja ên ti. Hã tugrĩn vãnh kar vỹ ã tý há' he mũ tag ki kanhrãn mũ,” he tóg ti m̃ỹ, Jesus ti. Ký tóg tĩ mũ, há' hen ký.

Jesus tý pã'i mág camarada tý há' he
(Lc 7.1-10)

⁵ Ký Jesus tóg kejên cidade tý Cafarnaum tá jun mũ. Ký fóg tý capitão tóg ti venh kãtĩ mũ, ti m̃ỹ nén ù to vĩ jé.

⁶ Ký tóg ti m̃ỹ: “Senhor,” he mũ. “Inh camarada tóg ñỹ nĩ, inh Īn tá. Kãnhgrĩn kãn ký tóg ñỹ nĩ, hã ra tóg kaga jagy ñỹ,” he tóg ti m̃ỹ, capitão ti, Jesus m̃ỹ.

7 Kŷ Jesus tóg ti mŷ: “kŷ inh hŷn tóg ti venh tŷg ha, ã mré, sŷ ã mŷ ti han jé,” he mŷ.

8 Hã ra capitão tóg Jesus mŷ ke mãn mŷ. “Ã mŷn hŷn jagy nŷ, ã tŷ inh ãn kãki sãn ke ti, isŷ tŷ fóg nŷn kŷ,” he tóg ti mŷ. “Ã vŷ pir ki inh camarada vŷ há' henh mŷ. ã vŷ hã tŷ ã tóg ti tŷ há' henh ke mŷ,” he tóg, capitão ti.

9 “Ha vé, tŷ sóg pã'i krêm ke nŷ gé, kŷ soldado ag tóg tŷ inh krêm ke nŷtŷ gé. Hã kŷ sóg pã'i jykre ki kanhró nŷ. Isŷ soldado ù mŷ: kutŷg, hen kŷ tóg ti mŷ. Sŷ ti mŷ: kunŷg, hen kŷ tóg kãtŷ mŷ gé. Isŷ inh camarada mŷ: tag han ra, hen kŷ tóg han mŷ. Inh vŷ tŷ sóg ag jêgnêg tŷ. Hã kŷ sóg ki kanhró nŷ. ã vŷ tŷ ã tóg inh camarada tŷ há' he há nŷ,” he tóg, capitão ti, Jesus mŷ.

10 Kŷ tóg Jesus mŷ e tŷ, ti vŷ tag ti. Kŷ tóg ã mré mŷ ag mŷ: “ha mẽ, Israel ag vŷ ti ri ke tú nŷtŷ,” he mŷ. “Ki kanhró tóg nŷ (mŷr), kŷ tóg inh ki rã kŷ jê. Ge ve ja tú sóg nŷ,” he tóg.

11 “Ha vé, ù tŷ hên ri ke ag vŷ kãmũnh ke mŷ, rã jur ja tá ag kãmũnh mŷ, rã pur ja tá ke gé. Abraão mré ag tóg ù tŷ kanhkã tá nŷ ên tŷ tŷ êg pã'i nŷ venh ke mŷ, Isaque mré, Jacó mré ke gé, Topê tóg ag ki rŷr ke mŷ.

12 Ag jãvo Israel krê'krê ag tóg kuty ki vár ke mŷ. Ag tŷ ù tŷ kanhkã tá nŷ ên tŷ tŷ êg pã'i nŷ venh ke vê vê, hã ra ag tóg venh ke tú nŷ. Kŷ ag tóg vêsŷrênh ke mŷ, ãjag jã tŷ ag gángán ke mŷ, tŷ gangan ke mŷ, vêsô jũn kŷ,” he tóg, Jesus ti. ã mré nŷtŷ ag mŷ tóg ke mŷ.

13 Kŷ tóg capitão mŷ: “ha tŷg ge,” he mŷ. “Inh ki rã kŷ ã tóg jê nŷ, hã kŷ ã tóg venh ke mŷ sir, ã tŷ nêv ve sór mŷ ti. ã camarada tŷ inh hur há' hê,” he tóg, Jesus ti, capitão mŷ. Kŷ tóg tŷ mŷ sir. Hã ra ti camarada tóg há' he mŷ. Hora ên ki tóg há' he mŷ, Jesus tŷ hora ki tó mŷ ên ki.

*Jesus tŷ ùn kagyga ag tŷ hághá' he
(Mc 1.29-34; Lc 4.38-41)*

14 Kŷ Jesus tóg sir Pedro ãn kãra rã mŷ. Kŷ tóg ti prŷ fi mŷnh fi vég mŷ. Kaga fi tóg nŷ nŷ, rŷg kŷ.

15 Kŷ tóg fi nŷgé mẽg mŷ sir. Kŷ fi rŷg ên tóg tú' he mŷ sir. Kŷ fi tóg nŷ kŷ ag ki rŷr mŷ sir.

16 Kuty ên kã ag tóg ùn jagrê kórég ag tatŷn kãmũ mŷ ti to. Kŷ tóg ag mŷ vŷ mŷ, kŷ ag tóg pa kãn mŷ sir, vênh jagrê kórég ag. ùn kagyga ag hyn han tóg mŷ gé sir, Jesus ti.

17 Hã ra tag tóg rán kŷ nŷ gé. Vãsŷ Topê vŷ tó tŷ tŷ Isaiás vŷ tag rán ja nŷ, ha mẽ: “êg kaga nŷtŷn kŷ tóg êg han, kŷ êg tóg há' he kãn mŷ, ti tŷ êg jagfŷ jagtar tugrŷn,” he ja tóg nŷ, Isaiás ti. Hã ra tóg ge nŷ.

*Û tŷ Jesus mré mŷ sór mŷ ag
(Lc 9.57-62)*

18 Kejên ag tóg Jesus pênŷn e nŷtŷ, kŷ Jesus tóg ag ve kŷ: “mŷ jé ha,” he mŷ, ã mré mŷ tŷ ag mŷ. “Goj kafã ù ra êg mũnh mŷ,” he tóg.

19 Ag mũnh ke to hã Topê vŷ to professor ù tóg ti mré vŷnh kãtŷ mŷ. “Senhor,” he tóg. “Sŷ ã mré tŷg há tóg tŷ. ã tŷ hê ra tŷg kŷ sóg ã mré tŷ mŷ,” he tóg.

20 Hã ra Jesus tóg ti mŷ: “hã ra tóg jagy tŷ,” he mŷ. “Ïn tú sóg nŷ,” he tóg. “Mŷg vŷ kré nŷtŷgtŷ. Sêsŷ vŷ jagfe nŷtŷgtŷ gé. Ag jãvo isŷ hê tá nŷr ke tóg tú tŷ. Tŷ sóg êprã ke fi kósŷn nŷ,” he tóg, Jesus ti.

21 Kŷ Jesus mré tŷ ù tóg Jesus mŷ vŷ mŷ gé. “ã mré sóg tŷ mŷ, hã ra sóg ver inh panh tŷ ga ki ti fón sór mŷ,” he tóg, Jesus mŷ.

²² Kĩ Jesus tóg ti mĩ: “vó,” he mũ. “Ti kénh tĩ tũg,” he tóg. “Inh mré kãtĩg,” he tóg. “Inh ki ge tũ ag vỹ ã panh ti kej han mũnh mũ. ã tỹ inhhã inh mré kãtĩg há tóg tĩ,” he tóg, Jesus ti.

²³ Kĩ tóg sir canoa kãki rã mũ. Kĩ ti mré mũ tĩ ag tóg ti mré ki ge mũ gé sir, goj kafã ù ra mũ jé.

*Jesus tỹ kóho jũ tỹ tũ' he
(Mc 4.35-41; Lc 8.22-25)*

²⁴ Ag tỹ goj kãmĩ mũ (hã) ra kóho jũ tóg sir krog he mũ, ha mẽ. Kĩ goj tóg canoa kãki krém krém ke mũ, ti fãh sór tóg mũ. Hã ra Jesus tóg nũr kỹ nỹ nĩ.

²⁵ Kĩ ag tóg ti rĩn kỹ ti mỹ: “Senhor,” he mũ. “Ëg kren han nĩ,” he ag tóg. “Ëg kãgter ha mẽ tóg tĩ,” he ag tóg.

²⁶ Kĩ Jesus tóg ag mỹ: “ãjag tỹ nejé mũmẽgmẽg nẽ?” he mũ. “ãjag mỹ inh ki ge há han tũ’?” he tóg. Kĩ tóg nĩ kỹ jẽgnẽ mũ sir, kỹ tóg goj mỹ vĩ mũ sir, kóho mỹ. Kĩ tóg tũ' he mũ sir. Katy' he tóg mũ, katy tãvĩ tóg tĩ mỹr, ha mẽ.

²⁷ Kĩ tóg vènh kar mỹ e tĩ. “Ti jykre tóg ãg mỹ e tĩ,” he ag tóg mũ. “Kóho tóg ti vĩ han, goj ti ke gé,” he ag tóg.

*Jesus tỹ vènh jagrẽ kórég pan
(Mc 5.1-20; Lc 8.26-39)*

²⁸ Kĩ tóg goj fĩn rãm kỹ nig kafã ù tá jun mũ sir, Gadara tá, Jesus ti, ti mré mũ tĩ ag ke gé. Kĩ ùn régre ag tóg ti kato tẽgtẽ mũ, ùn jagrẽ kórég ag. Vènh kej tá ag tóg kãmũ mũ. Ag jamã vè, vènh kej ti. Jũ mẽ ag tóg nỹtĩ, kỹ ù ag tóg hèn ra mũ vãn h nỹtĩ, ag kamẽg kỹ.

²⁹ Jesus kato ag tóg kãmũ mũ, ùn jagrẽ kórég ãn ag. Ti ve kỹ ag tóg sir prẽr mũ, ha mẽ. “!..ã hỹn ãg tỹ hẽ ri kenh mũ ha, Topẽ kósin'!..!” he ag tóg mũ. “!..ã mỹ ãg vóg kónãh sór mũ ha, ãg kurã to hã..!” he ag tóg. Jesus mỹ.

³⁰ Hã ra porco tóg ki e nỹtĩ. Kákó tá ag tóg jẽg nỹtĩ.

³¹ Kĩ Nén-Kórég ag tóg Jesus mỹ: “ã tỹ ãg pan kỹ ã tỹ porco to ãg jẽgnẽnh há tóg tĩ,” he mũ.

³² Kĩ tóg ag mỹ: “hej,” he mũ. “Ha mũ jẽg ge,” he tóg. Kĩ ag tóg ãn ag togvãn h kỹ porco ki ge mũ sir, Nén-Kórég ag. Kỹ vãhã porco ag tóg rán ki re kãn mũ sir, goj nig ki ag tóg vãr kãn mũ. Nãgnãr kãn ag tóg mũ sir, tũ' he ag tóg mũ sir, porco ãn ag, mỹr, ha mẽ.

³³ Kĩ porco ki rĩr tĩ ag tóg pètẽ kãn mũ sir, cidade ra, kamẽg kỹ. Tá ag tóg kãmén kãn mũ. Nén-Kórég tỹ jagrẽ ja ãn ag tóg ag tóg mũ sir, Jesus tỹ ag pan ãn ti.

³⁴ Kỹ vãhã cidade tá ke kar ag tóg sir Jesus venh kãmũ mũ. Kãmũ kãn ag tóg mũ. Kỹ ag tóg tá junjun kỹ (ag tóg) Jesus mỹ to vĩ mũ, ti tỹ tá kutẽ jé, ti tỹ ag rã hã nĩ tũ nĩ jé, hã kỹ tóg tĩ mũ.

9

*Jesus tỹ ùn kãnhgrĩn kỹ nỹ tỹ há' he
(Mc 2.1-12; Lc 5.17-26)*

¹ Kĩ Jesus tóg canoa ki rã kỹ goj nig kafã ù ra tũg mãn mũ. Kĩ tóg ã jamã tá jun mũ.

² Ti tỹ ã jamã tá jun kỹ vãhã ag tóg ti mỹ ù vyn kỹ junjun mũ, ùn kónhgrĩn kỹ nỹ ãn, ha mẽ. Á cama kri tóg nỹ nĩ. Kỹ Jesus tóg ag tỹ ti ki ge mũ vég mũ sir. Hã kỹ tóg ùn kãnhgrĩ mỹ: “inh kósin’,” he mũ. “Á fe tỹ há' hé. Á tỹ Topẽ vĩ mranh ja ãn tỹ tũ' hen hã vè ha,” he tóg, ti mỹ, ùn kónhgrĩ mỹ.

³ Hã ra Topê vî to professor ag vỹ tá nỹtĩ gé. Ti vî mẽ kỹ ag tóg to jykrén mũ. “Topê to vî kónãn tóg mũ mỹr. Vēsỹ tóg Topê han mũ mỹr;” he ag tóg mũ, Jesus to, ti tỹ ti mỹ: “ã tỹ Topê vî mranh ja ên tỹ tũ' hen hã vễ,” hen kỹ. Kỹ tóg ag mỹ tỹ ù nỹ, ti jykre ti.

⁴ Hã ra Jesus tóg ki kanhró nĩ, ag tỹ nén to jykrén mũn ki. Kỹ tóg ag mỹ: “ãjag ne tog nén ù vênhmỹ to jykrén mũ!” he mũ.

⁵ “Ne nỹ ãjag mỹ vênhmỹ nỹ?” he tóg. “Ûn tĩg vãnh tag mỹ sóg: “ã tỹ Topê vî mranh ja ên tỹ tũ' hen hã vễ ha,” he mũ mỹr. Kỹn mỹ ãjag mỹ vênhmỹ?” he tóg. “Sỹ ti mỹ: “nĩ ra, tĩg ra,” henh ke vễ gé. Kỹn mỹ ãjag mỹ vênhmỹ ke gé?” he tóg.

⁶ “Hã ra isỹ ãjag mỹ inh jykre ven sór vễ. Tỹ sóg êprã ke fi kósin nĩ. Tá sóg krỹg ke mũ, Topê vî mranh tỹ vênh pãte fón ke tá, ùn kãnhrĩ tag mỹ. Sỹ tá krỹg mũ ven jé sóg ke mũ, ãjag mỹ,” he tóg.

Hã kỹ tóg ùn kónhrĩ mỹ: “nĩ ra, jêg ra, ã kur gé (g) tĩg ra, ã ìn ra,” he mũ.

⁷ Kỹ tóg vym ke nĩ mũ, kỹ tóg sir jêgnê kỹ tĩ mũ. ã ìn ra tóg tĩ mũ (mỹr) sir, ha mẽ.

⁸ Kỹ vênh kar ag tóg vég mũ. Kỹ tóg ag mỹ e tãvĩ tĩ. Topê mỹ ag tóg vî há han mũ, ti tỹ Jesus mỹ vênh jykre há nĩm kỹ. Êg mré ke vễ mỹr, Jesus ti, êprã ke, hã ra Topê tóg ti tar han, hã kỹ tóg ti tỹ há' he mũ.

Jesus tỹ Mateus mré vî (Mc 2.13-17; Lc 5.27-32)

⁹ Kỹ Jesus tóg ã jamã tá kã kutê kỹ tĩ mũ sir. Kỹ tóg Mateus vég mũ sir. Governo mỹ tóg jãnkamy mãng tĩ, imposto kaja ti, kỹ tóg ã rãnhrãj han kỹ nĩ nĩ. Kỹ Jesus tóg ti mỹ: “inh mré kãtĩg,” he mũ, Mateus mỹ. Kỹ tóg jêgnê kỹ ti mré tĩ mũ sir.

¹⁰ Kỹ tóg kejên ti mré jêg mũ, Jesus ti. Kỹ ù tỹ hên ri ke ag tóg tá vênh mãn mũ, ti ìn krêm, governo mỹ jãnkamy mãng tĩ ag, Topê vî mranh tĩ ag. Jesus mré ag tóg jêgiêg mũ, Jesus mré mũ tĩ ag mré ke gé.

¹¹ Kỹ Fariseu ag tóg vég mũ. Kỹ ag tóg ti mré mũ tĩ ag mỹ vî mũ. “Ãjag pã'i ne tóg ag mré jêg mũ”, governo mỹ jãnkamy mãng tĩ ag mré. Topê vî mranh tĩ ag mré hã tóg jêg mũ!” he ag tóg, Fariseu ag, Jesus mré mũ tĩ ag mỹ.

¹² Hã ra Jesus tóg mễg mũ, ag vî ti. Kỹ tóg ag mỹ kãmén mũ, ha mẽ. “Ûn kagyga tũ ag vỹ mēdico venh mũ tũ nĩgtĩ,” he tóg. “Hã ra ùn kagyga ag hã vỹ ti venh mũ tĩ,” he tóg.

¹³ “Ha vé, tag to jykrén, Topê vî tag to, ha mẽ. “Ãjag tỹ jagnê jagãgtãn kỹ tóg inh mỹ há tĩ inhã,” he tóg, Topê ti. “Ãjag tỹ inh mỹ nén ù pũn kãfór tóg nĩ, ãjag tỹ jagnê jagãgtãn mũ ti,” he tóg, Topê ti. Hã kỹ jagnê jagãgtãn nĩ, ag to vî tũg nĩ,” he tóg, Jesus ti. “Inh pi(jé) ù tỹ vênh jykre kuryj han mũ ag mỹ: “ãjag jykre tovãnh nĩ,” he sór tĩ. Û tỹ Topê vî mranh ja nĩ ên ag hã mỹ sóg: “ãjag jykre kórég tovãnh nĩ,” he sór tĩ. Hã jé sóg ãjag mỹ vênh ven,” he tóg, Jesus ti.

Jesus tỹ êg vãkre kãmén (Mc 2.18-22; Lc 5.33-39)

¹⁴ Kỹ João mré mũ tĩ ag tóg ti tá junjun mũ sir, Jesus tá. Kỹ ag tóg ti ki jêmễg mũ. “Êg hã ne tóg vãkrég tĩ”, Fariseu mré ke ag ke gé. Êg jãvo ã mré mũ tĩ ag tóg vãkre vãnh nỹtĩgtĩ. Hê ri ke jé?” he ag tóg, Jesus mỹ, João mré mũ tĩ ag.

¹⁵ Kỹ Jesus tóg ag mỹ: “hỹ,” he mũ. “Vênh kyprũg to kãmũ ag pi(jé) vãkrég tĩ,” he tóg. “Festa vễ mỹr, vênh prũgprũg ti, kỹ ti mré ke ag tóg ùn prũg mũ ên

venh kāmū tī. Hā ra sóg ũn prūg mū ěn ri ke nī, hā kŷ tóg inh mré mū tī ag mŷ sér tī ver;” he tóg. “Vāhā tóg jun mū, inh kurā ti. Kŷ hā ag tóg inh pére mūnh mū. Ěn kā hā ag tóg ājag vākrenh ke venh mū, kurā ěn kā, inh mré mū tī ag,” he tóg, Jesus ti.

16 “Ti si fag pi(jé) vāfe kygnej tū tŷ kur si jar ki hyn han tī ja nŷtŷgtī'. Ũn kygnej tū tŷ ki hyn han mū ra tóg jaran kenh mū. Kŷ kur si jar ěn tóg mág mū. Ũn kygnej hā tŷ fag tóg ki han han tī, kŷ tóg jaran ke tū nī;” he tóg, Jesus ti. Ti tŷ ā jykre tág tón hā vē, hā ra tóg kur kygnej ja tū ri ke nī.

17 Kŷ tóg ag mŷ: “kŷ vinho vŷ ge nŷgtī gé,” he mū gé. “Ěg pi(jé) vinho kajāg mū tŷ ti fār si tŷ sacco ki kujĕg tī'. Ke tū nī (mū) ra tóg kunānh kŷ jaran ke mū, kógnāj kŷ. Kŷ vinho ěn tóg tū' he mū, sacco ke gé. Vinho kajā tŷ ti fār tág tŷ ki kujĕn ke vē mŷr’;” he tóg, Jesus ti. Ti tŷ ā jykre tág tó vē, hā ra tóg vinho kajāg mū ri ke nī gé.

*Jesus tŷ ũn kagyga fag tŷ há' he
(Mc 5.21-43; Lc 8.40-56)*

18 Ti tŷ ver ag mré vēmĕn kŷ pā'i ũ tóg tá jun mū, ha mĕ. Ti krĕm tóg grĭnh ke mū. Kŷ tóg ti mŷ: “ha vé;” he mū. “Inh kósin fi tóg ter ke mū. Fi venh kātŷg. Ā tŷ ā nŷgé tŷ fi mĕ kŷ fi fe tóg mrin kenh ke mū, ha vemnī;” he tóg, pā'i ti, Jesus mŷ.

19 Kŷ Jesus tóg jĕgnĕ kŷ ti mré tī mū sir. Jesus mré mū tī ag vŷ ti mré mū mū gé sir.

20 Ti tŷ ti mré tŷg mū ra ũ fi tóg ti tá jun mū, ũn kaga ũ fi. Kyvĕnh krŷg ja tū han kŷ fi tóg nī, prŷg tŷ 12 (ke) ki. Jesus vatánh tá fi tóg ti kur mĕg mū sir; ti kur mráj ki.

21 “Sŷ hĕn ri ke mūn ti kur mĕ kŷ inh hŷn han mū;” he fi tóg, to jykrĕn kŷ. Hā kŷ fi tóg ti kur mĕnh kātŷ mū.

22 Hā ra Jesus tóg vĭrĭn ke kŷ fi vég mū. Kŷ tóg fi mŷ: “inh kósin;” he mū. “Kamĕg tŷg nī;” he tóg mū. “Ā tŷ inh ki rā hā kŷ ā tóg há' he mū;” he tóg. Kŷ fi tóg há' he mū sir vēsŷmĕr, ha mĕ.

23 Kŷ tóg tŷg mĕn mū, Jesus ti. Kŷ ag tóg pā'i ěn ĩn tá junjun mū sir. Kŷ tóg tá fór nī, ũn kygfŷ mū fag tŷ, ag tŷ ěg jĕnky tŷ vākŷr ěn kynkyn tī ag tŷ ke gé, ti kósin fi ter kŷ. Kŷ Jesus tóg fag vég mū.

24 Kŷ tóg: “ha mū jĕg;” he mū. “Gĭr sí fi vŷ ter tū nī. Nŷr fi nŷ nī;” he tóg. Hā ra fag tóg ti nŷg mū.

25 Hā ra tóg fag pan kĕn mū sir. Kŷ tóg gĭr fi nŷgé kĕgmŷg mū sir. Kŷ fi tóg nī mū sir.

26 Kŷ tag kĕme tóg vēnh kar kri rŷm ke mū, ga ěn kar mĭ hā, Jesus tŷ fi rĭn mĕn mū tī.

Jesus tŷ ũn kyvó ag tŷ ěvānh há hyn han

27 Kŷ Jesus tóg tá kĕkutĕ mū sir. Kŷ ũn kyvó régre ag tóg ti nón mū mū. Ti nón mū kŷ ag tóg ti jĕ prĕr mū: “!..Davi kósin'..!” he ag tóg. “!..Ěg jagāgtĕn ra..!” he ag tóg, prĕnrĕr kŷ.

28 Kŷ Jesus tóg ĩn kĕra rā mū sir. Kŷ ũn kyvó ěn ag tóg ti nón ge mū gé sir, ĩn kĕra. Kŷ Jesus tóg ag mŷ: “inh mŷ ājag mŷ ājag hyn han há nī'?” he mū. Kŷ ag tóg ti mŷ: “hŷ;” he mū.

29 Kŷ Jesus tóg ag kanĕ mĕg mū sir, ā nŷgé tŷ. Kŷ tóg ag mŷ: “ājag tŷ inh ki ge kŷ nŷtŷn kŷ ājag tóg há' hĕnh mū;” he mū.

³⁰ Kŷ ag kanē tóg mrin ke mŷ sir. Ēvānh há' he ag tóg mŷ. Kŷ Jesus tóg ag mŷ vī tar han mŷ. “Ker ū mŷ tó hē’,” he tóg ag mŷ.

³¹ Hā ra ag tóg mŷ kŷ (ag tóg) vēnh kar mŷ tugtó mŷ. Kŷ ti kāme ěn tóg vēnh kar kri rūm ke mŷ sir.

Jesus tŷ ūn vī vānh vīn

³² Kŷ ag mŷ kŷ ū tóg ti tá jun mŷ gé, ūn jagrē kórég. Ti jagrē tóg ti vī vānh han.

³³ Kŷ Jesus tóg ti jagrē kórég kutēm mŷ sir. Ti tŷ ti kutēm kŷ tóg sir vī há han mŷ sir, ūn vī vānh ja ěn ti. Kŷ tóg vēnh kar mŷ e tí. “Ge ve ja tŷ ěg tóg nŷtī, ěg povo tŷ Israel kāmī,” he ag tóg mŷ.

³⁴ Hā ra Fariseu ag tóg mēg mŷ. Kŷ ag tóg ón kŷ Jesus to vī kónān mŷ. “Vēnh jagrē kórég pan há tóg nŷgtī. Hā ra tóg vēnh jagrē kórég ag pā'i jykre tŷ ag pan tí nī, ti tŷ tŷ Japo mré ke nīn kŷ,” he ag tóg, ón kŷ, Fariseu ag. Ag tŷ Jesus to ón hā vē.

Jesus mŷ ūn jagtar ag

³⁵ Kŷ Jesus tóg cidade kar mī tí mŷ, ěmā kar ěn mī. Ěg vēnh kanhrān jafā krēm tóg ag kanhrān tí. Ag mŷ tóg ū tŷ kanhkā tá nī ěn tŷ tŷ ěg pā'i nī ěn to tí sir. Kŷ tóg ūn kagyga ag hyn han tí gé sir.

³⁶ Vēnh e ěn tóg ti mŷ jagāgtar nŷtī. Ū tŷ ag ki rīr há han ke tóg tŷ tŷgtī, jo ag tóg vēnh ki rīr há han ki kagtŷ nŷtī gé. Ti tŷ ag ve kŷ tóg carneiro tŷ mēg mī ěkrég mŷ sir. Ū tŷ carneiro tŷ mēg ki rīr tŷ nīn kŷ ag tóg véké mŷgtī. Tag ri ke ag tóg nŷtī, Jesus mŷ, ūn e ěn ag.

³⁷ Kŷ tóg ā mré mŷ tí ag mŷ: “sŷ ag ve kŷ sóg ěg jakré mī ěkrég tŷ,” he mŷ. “Ti e nīn kŷ ěg tóg kejěn kre kán tŷ nŷgtī, ěg pir nŷtīn kŷ. Ge ti nŷgtī. Ūn e ag tóg inh ki ge to há nŷtī, hā ra tóg ver ū tŷ ag mŷ tónh ke tóg tŷ tŷ,” he tóg, Jesus ti.

³⁸ “Hā kŷ Topē mré vī, ti tŷ ū jěgnē jé, ag tŷ ag mŷ ti vī tó jé,” he tóg, Jesus ti, ā mré mŷ tí ag mŷ.

10

Jesus tŷ apóstolo ag kuprěg mŷ

(Mc 3.13-16; Lc 6.12-16)

¹ Kŷ Jesus tóg ūn tŷ 12 (ke) ag jé prěr mŷ sir, ti mré mŷ tí ěn ag jé. Kŷ tóg ag mŷ vēnh jykre nīm mŷ, ag tŷ vēnh jagrē kórég pan jé, ag tŷ ūn kagyga ag hyn han jé ke gé. Vēnh kaga kar tŷ ag tóg hē ri ke mŷ sir, ti tŷ ag mŷ tag to vēnh jykre nīm kŷ.

² Ū tŷ 12 (ke) ag jijin hā vē, ha mē, Jesus tŷ ūn vīn mŷ ag jygjyn hā vē, ha mē. Ūn ve vŷ tŷ Simāo nī, kŷ ti jiji ū hā vŷ: Pedro, he mŷ. Kar kŷ ti jāvy vŷ nī gé, hā vŷ: André, he mŷ, Tiago ke gé, Zebedeu kósín tag ti, ti jāvy tŷ João ke gé,

³ Filipe ke gé, Bartolomeu ke gé, Tomás ke gé, Mateus ke gé, governo mŷ jānkamy māg tí tag ti, Tiago ū ke gé, Alfeu kósín tag ti, Tadeu ke gé,

⁴ Simāo ke gé, ag tŷ ū to: Zelote, he mŷ tag ti, kar kŷ Judas Iscariotes ke gé, Jesus vatánh tá pā'i ag mŷ ti kāmén ke tag ti.

Jesus tŷ apóstolo ag jěgnē

(Mc 6.7-13; Lc 9.1-6)

⁵ Ěn ag jěgněg tóg mŷ sir, Jesus ti, ag tŷ vēnh kar mŷ Topē kāmén jé. Ū tŷ 12 (ke) ěn ag jěgněg tóg mŷ, Jesus tŷ ūn kuprěg ja ěn ag. Kŷ tóg ag mŷ: “ver fóg

ag mý inh kāmén mū tūg nī, kanhgág ag mý kāmén tūg nī gé ver,” he mū. “Ký Samaria tá ke ag jamā ki ge tūg nī gé,” he tóg.

6 “Israel ag tāvī mý tómnī inhhā. Topē mý ag tóg tỹ carneiro vāfor ri ke nýtī, ký ag hā mý tómnī ver,” he tóg.

7 “Ājag tỹ ag mý tó ký tag tómnī, ha mē. Ū tỹ kanhkā tá nī ěn tỹ tỹ ājag pā'i nīnh ke vē ūri, hemnī, ag mý.

8 Ūn kagyga ag hyn han nī gé. Ūn kāgter mū ag rīnrīn mān nī. Ūn kaga kren vānh ěn kren han nī. Vēnh jagrē kórég ag pan nī. Ājag mý sóg ge ra inh jykre nīm mū, ký ge ra ag mý han nī gé. Ag mý: inh mý kajām, he tūg nī.

9 Ký jānkamy ma mū tūg nī, jānkamy mág, jānkamy sī ke gé.

10 Ký sacco ma mū tūg nī gé, bolso ěn. Kur tỹ vēnh kri rīnh tūg nī, pēn né ū gé mū tūg nī gé, pēn to ró ěn. Ký vātó vyn tūg nī gé, kātó ti. Inh rānhrāj han ājag tóg mū. Ký ag tóg to ājag jēn ke mū, vēnh kato, ha vemnī,” he tóg, Jesus ti.

11 “Ký ājag tóg kejēn ěmā ū tá junjun ke mū. Tá ūn jykre há jāvānh nī. Ký ěn ĩn ra gemnī. ěn ĩn krēm ājag tỹ kurā ki kā panh ke ěn tá krýg nī.

12 Ký ĩn ěn krēm nýtī fag mý: “Topē jé ājag ki rīr, ký ājag jé jatun mý nýtī nī,” hemnī.

13 Fag tỹ ājag mý vī há han ký fag tóg jatun mý nýtī. Fag tỹ ājag mý vī há han tū nīn ký fag tóg jatun mý nýtī tū nī. Fag javo ājag tóg jatun mý nýtī.

14 Kejēn ū tóg ājag mý: “kāge jēg ra,” henh ke tū nī, ěmā ū tá. Ký tá kāpamnī, ag tỹ ājag vī mē jāvānh nýtīn ký. Tá kāpa ký ājag pēn hā kykūnh nī. Ký ag tóg ki kanhró nýtī. Topē tỹ ag to kórég nī ti.

15 Ha mē, ki hā sóg to mū. Kurā tỹ ěgno ki, isý vēnh kar jykre tugnỹm ke kurā ěn ki ag tóg jagāgtar nýtīnh mū sir, ag tỹ ājag vī mē jāvānh nýtīn ký. Cidade tỹ Sodoma tá ke ag tóg jykre pāno nýtī ja nīgtī, cidade tỹ Gomorra tá ke ag ke gé. Ký ag tóg jagāgtar nýtīnh mū gé, kurā ěn kā. Hā ra ūn tỹ ājag vī mē jāvānh ěn ag tóg ag jagāgtar kāfór han ke mū (mýr), ha mē,” he tóg, Jesus ti.

Ag tỹ Jesus tigrīn ěg to jūnh ke

(Mc 13.9-13; Lc 21.12-17; 12.11-12)

16 “Carneiro vỹ vēnh jy nīgān han ki kagtīg nýtī, mīg tỹ ag mān sór nīn ký. Carneiro ri ke ājag nýtī, hā ra sóg ājag jēgnēg mū, ū tỹ mīg ri ke ag to, ký Topē hā tóg ājag jy nīgān ke mū sir. Hā ký vēnh ki rīr há han nī. Pýn jykre han nī. Vājig ti tī, pýn ti, ký ěg tóg kānhmar ti tỹ hē ri ke tū nīgtī. Pýn ri ke han nī. Ký sórag jykre han nī gé. Jū vānh pē ti nī, nén ū vēnhmý han tū ti nī. Ký sórag ri ke han nī gé.

17 Ěprā ke ag tóg ājag vóg kónān ke mū, isugrīn. Ājag pā'i ag mý ag tóg ājag kāmén ke mū, ag tỹ ājag vóg kónān jé. Ājag vēnh kanhrānrān jafā krēm ag tóg ājag mrānmrān ke mū. Hā ký vēnh ki rīr há han nī.

18 Fóg tỹ pā'i mág mý ag tóg ājag ven ke mū, pā'i mág ū ag mý ke gé. Isugrīn ājag tóg vēnh jagtar tag venh ke mū, ājag tỹ ag mý inh vī ti tó jé, fóg ag kar mý ke gé, kanhgág ag mý ke gé.

19 Pā'i ag tỹ ājag jé ke ký to jykrén tūg nī, ājag tỹ ag mý nén tónh ke mū ěn ti to. Topē kuprīg hā ne ājag krīn ke mū', ký ājag tóg ti tỹ ājag mý nén tó mū ěn hā tónh ke mū, hora ěn kā.

20 Hā ký ājag tỹ tó tū vē sir. Ěg jóg kuprīg tỹ ājag tỹ vēmén hā vē,” he tóg.

21 “Hā ra ū ag tóg ājag mré pafa mū fag kāmén ke mū, pā'i ag mý, ag tỹ fag kāgtén jé. Ký ū ag tóg ājag krē kāmén ke mū gé. Ký ū ag tóg ājag han mū fag kāmén ke mū gé, pā'i ag mý, ag tỹ fag kāgtén jé, mýr, ha mē.

²² Vēnh kar vỹ ājag to jũ kỹ ājag vóg sór nỹtĩ, isugrĩn. Hã ra ù tỹ isovãnh tũ ěn hã krenkren ke mũ, kurã tỹ ěgno ki,” he tóg, Jesus ti.

²³ “Ag tỹ cidade ù tá ājag vóg kónãn kỹ, kỹ cidade ù ra pétẽmĩ. Ki hã sóg tó mũ, ha mẽ. Israel ag cidade fĩn rãm kãn ke tũ ājag nĩ, kurã ěn kã. Si ti nĩ, ag tỹ ājag vóg kónãn ke kurã ti. Kãtĩg jé sóg ke mũ, ag tỹ ge kỹ ājag vóg kỹ, mỹr, ha mẽ. Tỹ sóg ěprã ke fi kósin nĩ, mỹr, ha mẽ.

²⁴ Aluno pi(jé) ã professor kãfór nĩ. Ûn camarada pi(jé) ã patrão kãfór nĩ’.

²⁵ Aluno tỹ ã professor ri ke nĩn kỹ tóg há tĩ. Ûn camarada tỹ ã patrão ri ke nĩn kỹ tóg há tĩ gé. Iso ag tóg: Belzebu, he ja nĩgtĩ, inh kato vãsãnsãn mũ ag, hã vỹ: Japo, he mũ, hã vỹ: Belzebu, he mũ. Tỹ sóg ājag professor ri ke nĩ, ājag patrão ri ke. Ag tỹ iso: Japo, hen kỹ ag tóg ājag to vĩ kónãn ke mũ gé, ha vemnĩ, ājag tỹ inh jykre hã han ti kỹ,” he tóg, Jesus ti.

Ěg tỹ Topẽ hã kamẽg ke

(Lc 12.2-7)

²⁶ “Ge ra ag kamẽg tũg nĩ, pã’i ag. Ěg tỹ pēju kỹ nén han mũ tóg vēnh ven kãn ke mũ, ěg tỹ vēnh kar vatãnh tá nén to jykren mũ tóg vēnh ven kãn ke mũ.

²⁷ Isỹ vēnh kar vatãnh tá ājag mỹ nén tó mũ tag tỹ vēnh kar mỹ tó kãn nĩ. Isỹ komẽr hã ājag mỹ nén tó mũ tag tỹ vēnh kar mỹ jamã há ra tómnĩ.

²⁸ Mũmẽg tũg nĩ, ag kamẽg tũg nĩ, pã’i ag. Ěg tén há ag nỹtĩ, hã ra ag tóg nũgme ki ěg vãm ke kagtĩg nỹtĩ, pã’i ag. Ûn pir kamẽg nĩ, hã vỹ: Topẽ, he mũ. Ti hã ne ěg tén kar kỹ nũgme ki ěg vãm ki kanhró nĩ, inferno ki, kỹ ti hã kamẽg nĩ.

²⁹ Ha vé. Sēsĩ vender he ag tĩ, jãnkamy to, kỹ ag tóg ùn régre to jãnkamy pir mãg tĩ. Hã ra Topẽ tóg jēsĩ ag ki rĩr tĩgtĩ. Ti tỹ: “hej,” hen kỹ ěg tóg ag pin tĩ, ke tũ nĩn kỹ ěg tóg ag krenkren tĩ.

³⁰ Hã ki Topẽ tóg ag ki rĩr tĩgtĩ, sēsĩ ag ki. Ěg ki rĩr tóg tĩ gé, Topẽ ti. Ěg tỹ nén vég mũ kar ki kanhró tóg nĩ. Hã kỹ tóg ěg gãnh kar nĩgkren ja nĩ gé, Topẽ ti.

³¹ Hã kỹ pã’i ag kamẽg tũg nĩ. Jēsĩ kãfór ājag tóg nỹtĩ, Topẽ mỹ. Ājag kãmĩ ùn pir tóg sēsĩ e kãfór nĩ, ti mỹ,” he tóg, Jesus ti.

Ěg tỹ Jesus kãmén ke

(Lc 12.8-9)

³² “Hã kỹ inh kãmén nĩ, ěprã ke ag mỹ. Ājag tỹ ag kamẽg tũ nĩn kỹ ag mỹ inh kãmén kỹ sóg inh jóg tỹ kanhkã tá nĩ ěn mỹ ājag kãmén ke mũ gé, kurã ěn kã.

³³ Ājag tỹ hã ra inh kãmén tũ nĩn kỹ sóg inh jóg tỹ kanhkã tá nĩ ěn mỹ ājag kãmén ke tũ nĩ gé, kurã ěn kã, ājag tỹ iso: “ti ki kagtĩg sóg nĩ,” hen kỹ,” he tóg, Jesus ti.

Ěg tỹ ěg jykre fĩnh ke

(Lc 12.51-53; 14.26-27)

³⁴ “Ājag hỹn iso: “vēnh kar tỹ jagnẽ to há han jé tóg ke mũ,” he tĩ. Hã tũ vē, ù tỹ hẽn ri ke tỹ jagnẽ to jũ han jé sóg ke mũ, ha vemnĩ.

³⁵ Hã kỹ ù tóg ã panh kato tẽnũ mũ, kỹ ù fi tóg ã mỹnh fi kato tẽnũ mũ gé. Kỹ ù fi tóg ã má fi kato tẽnũ mũ gé, mỹr, ha mẽ.

³⁶ Ti mré ke ag vỹ tỹ ti kato vãsãnsãn mũ ag nỹtĩnh mũ, kỹ fi mré ke fag tóg fi kato vãsãn ke mũ gé, ha mẽ.

³⁷ Iso há kãfor nýtĩmnĩ, ãjag han mũ fag kri, ke tũ nĩ (mũ) ra ãjag tóg inh mũ há tũ nýtĩ. Iso há kãfór nýtĩmnĩ, ãjag krẽ kri, ke tũ nĩ (mũ) ra ãjag tóg inh mũ há tũ nýtĩ.

³⁸ Isỹ inh cruz va tĩg ri ke han nĩ gé, isỹ tá ter ke ti, hã vỹ: iser ẽn ri ke han sór mũ, he mũ. Ke tũ nĩ (mũ) ra ãjag tóg inh mũ há tũ nýtĩ.

³⁹ ãjag tỹ iser ri ke han sór tũ nýtĩn kỹ ãjag tóg nũgme ki kutẽnũ mũ, ãjag tỹ ãjag jykre tovãnh sór tũ nýtĩn kỹ. ãjag tỹ isugrĩn kãgter sór kỹ ãjag tóg rĩr krỹg ja tũ ẽn venh ke mũ, ãjag tỹ ãjag jykre tovãnh kỹ,” he tóg, Jesus ti.

Topẽ tỹ ẽg mũ nén ù há tónh ke

(M̃c 9.41)

⁴⁰ “Û tỹ ãjag mũ: hej, hen kỹ tóg inh mũ: hej, he mũ gé sir, kỹ tóg inh ki rã mũ sir. Ti tỹ inh ki rã kỹ tóg ù tỹ inh jẽnẽg mũ ẽn ki rã mũ gé sir, hã vỹ: Topẽ, he mũ.

⁴¹ Û tóg Topẽ vĩ tó tĩ ag mũ: “ha kãrã,” he tĩ, ag tỹ Topẽ vĩ tó tĩ tugrĩn. Ti tỹ ag mũ vĩ há han kỹ tóg Topẽ mũ há nĩ sir. Kỹ tóg kejẽn ti mũ nén ù há tónh ke mũ, Topẽ ti, ù tỹ ti vĩ tó tĩ ag mũ: “ha kãrã,” he mũ ẽn mũ. Û tóg ùn jykre kuryj ag mũ: “ha kãrã,” he tĩ, ag jykre kuryj nýtĩ tugrĩn. Ẽn mũ tóg nén ù há tónh ke mũ gé, Topẽ ti.

⁴² Û tóg kejẽn ùn sĩ mũ nén ù nĩm tĩ, goj hẽn ri ke mũn. Ûn sĩ tỹ inh ki rã nĩ tugrĩn tóg ti mũ nén ù nĩm tĩ. Ẽn mũ tóg nén ù há tónh ke mũ gé, Topẽ ti. Ti pi(jé) to nén ù há venh ke tũ nĩ,” he tóg, Jesus ti.

11

João Batista tỹ Jesus ki jẽmẽ

(Lc 7.18-35)

¹ Jesus tỹ ã mrẽ mũ tĩ ag mũ tó kãn kỹ tóg tá kãkutẽ mũ sir, ù tỹ 12 (ke) ag mrẽ. Kỹ tóg cidade kar mũ tĩ mũ sir, vẽnũ kar kanhrãn kỹ, ag mũ Topẽ vĩ tón kỹ.

² Kỹ kejẽn João tóg ti kãme mẽg mũ. Se kỹ tóg nĩ nĩ, João ti, hã ra tóg Jesus tỹ nén han mũ mẽg mũ sir. Kỹ tóg Jesus mũ vẽnũ vĩ jẽnẽg mũ, ã mrẽ mũ tĩ ag tỹ, João ti.

³ Kỹ tóg Jesus mũ: “ã hã mũ?” he mũ. “Ẽg tỹ ùn jãvãnh mũ mũ tỹ ã nĩ? Topẽ tỹ ùn jẽnẽg mũ hã mũ tỹ ã nĩ?” he tóg. “Ẽg mũ ù jãvãnh mãn ke tũ nĩ ha’, ã pãte?” he tóg, João Batista ti, Jesus mũ.

⁴ Kỹ Jesus tóg ti mũ vẽnũ vĩ jẽnẽg mũ gé sir. “Ha João mũ ãjag tỹ nén vэг mũ tag ti tómnĩ, ãjag tỹ nén mẽg mũ tag ti, ha mẽ,” he tóg.

⁵ “Tag han inh tĩ, ha mẽ: ùn kyvó ag vỹ isugrĩn ẽvãnh há nýtĩ. Ûn kãnhgrĩ ag vỹ mũ há han mũ, ù tỹ vẽnũ kaga kren vãnũ han mũ ẽn ag krenkren han inh tĩ, lepra han mũ ag. Ûn kutu ag vỹ ẽmẽ há nýtĩ ha, ùn kãgter mũ ag vỹ rĩnrĩr mãn nýtĩ. Ûn jagãgtar ag vỹ Topẽ vĩ mẽg tĩ, ù tỹ kanhkã tá nĩ ẽn tỹ tỹ ẽg pã’i nĩnh ke to.

⁶ Kỹ tóg ti tỹ iso jykren kónãn tũ nĩn kỹ há’ he mũ. Kỹ Topẽ tóg ti ve há han mũ. Tag tómnĩ, João mũ,” he tóg, Jesus ti.

⁷ Kỹ ag tóg sir mũ mũ, João mũ tó jé, ti mrẽ mũ tĩ ag.

Ag mũn kỹ Jesus tóg vẽnũ e ag mũ João kãmén mũ. “ãjag tỹ ẽmã tũg ja ra mũn kỹ, ti ve jé, kỹ ti jykre hỹn ne ri ke nĩ, ãjag mũ?” he tóg. “Kejẽn kãka tóg

goj jagma krā tỳ man man ke tĩ. João jykre mỳ ājag mỳ tag ri ke tũ nĩ? Hỳ, ri ke tũ ti nĩ.

⁸ Kỳ ti jykre hỳn ne ri ke nĩ, ājag mỳ? Ti mỳ ājag mỳ ùn kur sĩnvĩ ag jykre ri ke nĩ? Vó, ùn kur sĩnvĩ ag vỹ cidade mág tá nýtĩ, pã'i mág ìn krēm.

⁹ Kỳ ti jykre hỳn ne ri ke nĩ, ājag mỳ? Ti jykre mỳ ājag mỳ Topê vĩ tó ti jykre ri ke nĩ? Hỳ, Topê vĩ tó ti vê mỳr. Hã ra tóg Topê vĩ tó ti ag kãfór kar nĩ, João ti.

¹⁰ Topê vỹ João jênê, ti tỳ ijo tĩg jé. Hã kỳ tag tóg ti to rán kỳ nĩ, Topê vĩ ki, ha mē. “Ha vé, ã jo sóg ù jênênh mũ, ti tỳ vênh kar jykre tỳ há' hen jé, ã tĩg ken jo,” he ja tóg nĩ, Topê ti, João to, iso ke gé,” he tóg, Jesus ti. “Ag jyvên jé tóg ke mũ, kỳ tóg êpry kure ri ke nĩ, êmĩn kurynh ri ke,” he ja tóg nĩ, Topê vĩ tỳ rán kỳ nĩ ki, João to.

¹¹ Ki hã sóg tó mũ, hã kỳ sóg ke mũ, ha mē. Êprã ke ag kãfór kar ti nĩ, João ti, Topê vĩ tón ki. Û tỳ ga kri mũ ag kãfór kar ti nĩ. Hã ra ù tỳ hên ri ke ag tóg ù tỳ kanhkã tá nĩ ên tỳ tỳ êg pã'i nĩnh ke ên venh ke mũ. Ag tỳ venh ke mũ (hã) ra ag tóg kãsir nýtĩnh mũ. Ûn kãsir ên ag tỳ êgno pē ên tóg João kãfór nĩnh mũ, hã ra,” he tóg, Jesus ti.

¹² “João Batista kãtĩg kar kỳ êg tóg vãsãn kỳ (êg tóg) ù tỳ kanhkã tá nĩ ên tỳ tỳ êg pã'i nĩ venh ke mũ. Êg vãsãn kỳ êg tóg venh ke mũ.

¹³ Topê vĩ tó ti ag kar vỹ Topê vĩ tó ja nĩgtĩ. Kỳ tóg rán kỳ nĩ gé, Topê tỳ êg jyvên mũ ti. Kỳ João tóg tó ja nĩ, ag nón.

¹⁴ João vỹ Elias ri ke nĩ. Tag to jykrén. Rán kỳ tóg nĩ, Topê vĩ tỳ rán kỳ nĩ ki, Elias kãtĩg mãn ke ti, Cristo kãtĩg ken jo. Ti hã vê, João hã vê, Elias kãtĩg mãn ên ti.

¹⁵ Û nĩgrêg nýtĩ tỳ tỳ jêmê jé, to jykrén jé,” he tóg, Jesus ti.

¹⁶ “Ûri ke ag vỹ ge nýtĩ gé, ha mē. Gĩr ag ri ke ag tóg nýtĩ. Gĩr ag vỹ jagnê mré kanhinnhir mũgtĩ. Kỳ ag tóg ājag mré ke ag jé prêr tĩgtĩ, “mũ nỹ, kanhinnhir jé,” hen kỳ. Kỳ ag tóg kejên jũgũ tĩ.

¹⁷ “Ājag mỳ êg tóg vākyn, kanhinnhir kỳ, hã ra ājag ne vênh gringrén jãvãnh nýtĩ,” he ag tóg tĩ, gĩr ag, jagnê mỳ. “Ājag vênh gringrén jãvãnh nýtĩn kỳ êg tóg vêsyrênh mũ sir, êg kanhinnhir kỳ, hã ra ājag tóg êg mré fỹ jãvãnh nýtĩ gé,” he ag tóg tĩ ge, ón kỳ jagnê to jũ kỳ, gĩr ag.

¹⁸ Gĩr tag ag ri ke ājag nýtĩ, João to, iso ke gé. João vỹ vãkre ja nĩgtĩ, jên mág tũ, kron tũ. Kỳ ājag tóg ti to: “jagrê kórég ti nĩ,” he ja nĩgtĩ, ti vãkre to.

¹⁹ Ti jãvo sóg vãkrég tũ nĩgtĩ, jêg sóg nĩgtĩ, kron sóg nĩgtĩ, kỳ ājag tóg iso: “ti hã ne jên mág nĩgtĩ', ti hã ne kronkron nĩgtĩ', ti hã ne governo mỳ jãnkamy mág tĩ ag to há nĩgtĩ', ti hã ne Topê vĩ mranh tĩ ag hã to há nĩgtĩ',” he ājag tóg sir, iso, êprã ke fi kósin to. Kỳ João jykre tóg ājag mỳ kórég nỹ, ti vãkre to. Jãvo inh jykre tóg ājag mỳ kórég nỹ gé, inh vãkrég tũ to. Hã ra êg tỳ ù jykre tugnỹm kỳ êg tóg ti jykre há ên ki kanhró nýtĩ sir. Kỳ tóg tỳ Topê krê nĩ sir, ùn jykre há ti, kỳ êg tóg ti ki Topê jykre ki kanhró nýtĩ sir,” he tóg, Jesus ti. Ti tỳ ag mỳ João kãmên hã vê.

Jesus tỳ cidade ù tá ke ag mỳ vĩ kónãn (Lc 10.13-15)

²⁰ Kỳ Jesus tóg cidade tá ke ag mỳ vĩ kónãn mũ sir. Cidade tỳ hên ri ke ki tóg êg tỳ nén han vãnh hyn han ja nĩgtĩ, milagre ti, hã ra ag tóg ājag jykre tovãnh sór ja tũ nĩgtĩ, ti ki ag tóg ge sór ja tũ nĩgtĩ. Hã kỳ tóg sir ag to vĩ kónãn ja nĩ, ha mē.

21 “Sỹ cidade tỹ Corazim ki ke ag mỹ tag tó sór mũ, ha mẽ,” he tóg. “Kórég ve jé ãjag tóg ke mũ,” he tóg. “Sỹ cidade tỹ Betsaida ki ke ag mỹ tag tó sór mũ, ha mẽ,” he tóg. “Kórég ve jé ãjag tóg ke mũ gé,” he tóg. “Milagre tỹ hên ri ke hyn han isóg ãjag mỹ, hã ra ãjag tóg ãjag jykre tovãnh sór tũ nĩgtĩ,” he tóg. “Cidade tỹ Tiro tá, cidade tỹ Sidom tá sóg êg tỹ nén han vãnh ên hyn han ja tũ nĩ. Sỹ tá milagre ên hyn han mũ ra ag tóg ãjag jykre tovãnh mũ vê, vãsỹ,” he tóg. “Kygfỹ ag mũ vê, ãjag mỹ e tĩn kỹ, ag jykre pãno ên, sỹ ag mỹ tó (hã) ra. Ag jãvo ãjag tóg tovãnh sór tũ nĩ, to jykren sór tũ nĩ,” he tóg.

22 “Tiro tá ke ag vỹ vêsýrénh ke mũ, kurã tỹ êgno ên ki, Sidom tá ke ag ke gé, ag jykre pãno to. Hã ra ãjag tóg ag vêsýrénh kãfór han ke mũ, ha vemni, ãjag tỹ inh vég mũ ra inh ki ge sór ja tũ nĩn kỹ. Ki hã sóg tó mũ,” he tóg, Jesus ti.

23 “Sỹ cidade tỹ Cafarnaum ki ke ag mỹ tag tó sór mũ, ha mẽ,” he tóg. “Ûri tóg ver ãjag mỹ sér tĩ,” he tóg. “Ãjag tỹ kanhkã jykre vég nỹtĩ ra ãjag tóg to jykren tũ nĩ, hã kỹ ãjag tóg nũgme ki vár ke kãn mũ. Cidade tỹ Sodoma tá ke ag vỹ ãjag jykre pãno to kãgter. Ag tỹ sỹ ãjag mỹ nén han mũ vég mũ ra ag vãsỹ to jykren mũ vê, kỹ ag kãgter ke tũ nĩ vê. Kỹ êg tỹ ùri ag jamã ve vê vê.

24 Kurã tỹ êgno ki ag tóg vêsýrénh ke mũ, Sodoma tá ke ag. Hã ra ãjag tóg ag vêsýrénh kãfór han ke mũ, sỹ vènh kar jykre tugnỹm ke kurã ên kã, ãjag tỹ inh vég mũ ra inh ki ge sór tũ nỹtĩn kỹ,” he tóg, Jesus ti.

*Jesus tỹ êg krĩ tỹ kãnhvy' henh ke
(Lc 10.21-22)*

25 Kỹ Jesus tóg tag tó mũ gé, ha mẽ. “Jóg’,” he tóg. “Tỹ ã tóg kanhkã tân ag kãfór kar nĩ, kar ã tóg tỹ êprã ke ag kãfór kar nĩ gé,” he tóg. “Inh mỹ tóg há tí, ã tỹ nén han mũ ti. Û tỹ: “ki kanhró mág inh nĩ,” he mũ ag mỹ ã tóg ã jykre ven ja tũ nĩ. Ag mỹ ã tóg kãmén ja tũ nĩ. Û tỹ gĩr ri ke ki kagtĩg ag hã mỹ ã tóg ven ja nĩ, ã jykre ti,” he tóg.

26 “Hỹ, hã vê. ã tỹ nén to jykren mũn hã vê, hã kỹ ã tóg ag hã mỹ ã jykre ti nĩm. Hã ra tóg há tãvĩ nĩ, jóg’,” he tóg, Jesus ti.

27 Kỹ tóg ag mỹ: “inh jóg tóg inh mỹ tovãnh kãn, ã tỹ nén han ja kar ti,” he mũ. “Kỹ ù pi(jé) ti kósin ki kanhró nĩ’. Inh jóg hã ne inh ki kanhró nĩ’. Kỹ ù pi(jé) inh jóg ki kanhró nĩ gé’. Inh hã ne ti ki kanhró nĩ’, isỹ tỹ ti kósin nĩn kỹ. Hã ra sóg ãjag mỹ ti kãmén jé kãtĩ mũ, inh jóg ti. Isỹ tag to ùn kuprêg mũ ag hã mỹ sóg ti kãmén tí, inh jóg ti,” he tóg.

28 “Ãjag jagãgtar nỹtĩn kỹ, ãjag tỹ Topẽ vĩ ki króm ki kagtĩg nỹtĩ tugrĩn jagtar nỹtĩn kỹ iso kãmũ jêg. Nén ù tỹ ãjag mỹ jagy tĩn kỹ iso kãmũ jêg. ãjag krĩ tỹ sóg kãnhvy' henh mũ mỹr, ha mẽ,” he tóg.

29 “Inh mré kãmũ jêg. ãjag kanhrãn jé sóg ke mũ. Komêr hã sóg vĩ tí. Inh pi(jé) vêsỹ ùn mág han tí’, vĩ tar han vãnh sóg nĩgtĩ. ãjag tỹ iso kãmũ kỹ ãjag krĩ tóg há’ henh mũ, ha vemni. Kuprã’ he jé tóg ke mũ, ãjag krĩ tí, ha vemni,” he tóg.

30 “Inh jykre pi(jé) kufy nĩ’, ãjag mỹ’. Isỹ ãjag mỹ nén tó mũ pi(jé) han kórég nĩ’,” he tóg, Jesus ti.

12

*Jesus tỹ vènhkãn ke kurã to pã’i
(Mc 2.23-28; Lc 6.1-5)*

¹ Kejēn Jesus tóg trigo jo ēp̄y mī tī mū, ti mré mū tī ag tóg ti mré mū mū. Vēnhkán ke kurā ki ke vē, hā ra ag tóg kókīnkīr mū, vējēn vég tū nīn k̄y. Hā k̄y ag tóg trigo mó ēn t̄y kam ke k̄y ko mū sir.

² K̄y Fariseu ag tóg ag vég mū. K̄y ag tóg Jesus m̄y vī mū. “Ha vé,” he ag tóg mū ti m̄y. “Ā mré mū tī ag ne tóg ājag t̄y nēn han ke tū han mū ha’, vēnhkán ke kurā kī’. Vēnh rānrhāj vē m̄y, ag t̄y trigo t̄y kam ke ti,” he ag tóg, Jesus, m̄y.

³ Hā ra Jesus tóg ag m̄y: “vó,” he mū. “Davi t̄y nēn han mū to jykrén nī,” he tóg. “Tī kókīr nīn k̄y tóg ā t̄y nēn han ke tū han gé, ti mré mū tī ag mré, hā ra Topē pi(jé) ti to jū mū’, ti t̄y ā t̄y nēn han ke tū han mū ra.

⁴ Tag han ja ti nī, ha mē. Topē jo īn kāra rā k̄y tóg tá Topē jamī ēn kó, t̄y ā t̄y konh ke tū ra. K̄y tóg ā mré mū tī ag m̄y vin gé, Topē jamī ēn. Topē tū ki rīr tī ag t̄y konh ke ja vē vē, Topē jamī ēn, hā ra tóg ko ja nī, ti t̄y t̄y Topē tū ki rīr tī tū ra, Davi ti. Hā k̄y tóg rán k̄y nī, Topē vī t̄y rán k̄y nī ki,” he tóg, Jesus ti.

⁵ “K̄y Topē tū ki rīr tī ag jykre to jykrén nī gé. T̄y vēnhkán ke kurā ra ag tóg rānrhāj mūgtī, Topē jo īn krēm, hā ra ag tóg Topē tū ki rīr tī. Hā k̄y ag tóg t̄y vēnhkán ke kurā ra ki vēnhkán tū nīgtī gé, ge ra ag jykre tóg há nī, Topē m̄y. Hā k̄y tóg rán k̄y nī gé, Topē vī t̄y rán k̄y nī ki.

⁶ Ha mē, Topē jo īn v̄y t̄y Topē tū nī. K̄y ag tóg ti tū ki rīr tī, t̄y vēnhkán ke kurā ra. Hā ra sóg Topē jo īn kāfór nī, Topē m̄y. Hā k̄y inh mré mū tī ag tóg Topē m̄y há n̄ytī, ag t̄y vēnhkán ke kurā ki vēnhkán tū ra,” he tóg, Jesus ti.

⁷ “K̄y Topē vī tag to jykrén nī gé, ha mē. “Ājag t̄y jagnē jagāgtān k̄y tóg inh m̄y há ti,” he ja tóg nī. Topē ti. “K̄y tag tóg inh m̄y ājag t̄y inh m̄y nēn ū pūn kāfór nī, ājag t̄y jagnē jagāgtān tag ti,” he ja tóg nī. Topē ti. Ājag t̄y tag to jykrén mū ra ājag tóg inh mré ke ag to jūnh ke tū nī vē. Ag kókīr vē m̄y. Nēn ū kórég han ja tū ag tóg nī,” he tóg, Jesus ti.

⁸ “Hā ra sóg t̄y vēnhkán ke kurā to pā’i nī. T̄y sóg ēprā ke fi kósin nī” he tóg, Jesus ti, Fariseu ag m̄y.

*Jesus t̄y ūn nīgē tóg t̄y há’ he
(Mc 3.1-6; Lc 6.6-11)*

⁹ K̄y tóg ēmā ēn tá kutē k̄y ēmā ū ra tī mū, k̄y tóg ēg vēnh kanhrān jafā kāra rā mū sir.

¹⁰ Tā ū tóg nī nī, ti nīgē tóg tóg ja nī. K̄y ag tóg Jesus m̄y: “m̄y há n̄y v̄y, ēg t̄y vēnhkán ke kurā ki ū kytgāg ke ti?” he mū. Hā ra ag tóg pā’i ag m̄y: “vēnhkán ke kurā ki tóg Topē vī mranh tī, ū kytgāg k̄y,” he sór mū. Hā k̄y ag tóg ti ki jēmēg mū. Ag m̄y tóg t̄y vēnh rānrhāj nī, ū kytgāg ti. Vēnhkán ke kurā ki ēg nēji ū kytgāg ke tū nī.

¹¹ Hā ra Jesus tóg ag m̄y: “ājag mēg t̄y vēnhkán ke kurā ki kāgnó ki kutē k̄y, ājag m̄y ti kunūnh ke tū nī, t̄y vēnhkán ke kurā nīn k̄y?” he mū. “Tī kunūnh jē ājag tóg ke mū. K̄y to jykrén nī.

¹² Ēg mré ke v̄y ēg mēg kāfór nī,” he tóg. “K̄y tóg há nī, ēg t̄y ēg mré ke kytgāg k̄y, t̄y vēnhkán ke kurā ra,” he tóg.

¹³ K̄y tóg ūn nīgē tóg ēn m̄y: “ā nīgē t̄y kr̄y’g hé,” he mū. K̄y tóg t̄y kr̄y’g he mū sir. Hā ra tóg há’ he mū. Tī nīgē há ēn hā ri ke tóg nī, ti nīgē kórég ja ti.

¹⁴ K̄y Fariseu ag tóg jūgū k̄y pa mū sir, īn ēn ki. “Ēg h̄yn hē ri kenh mū, ti tén jé?” he ag tóg mū, Jesus to.

¹⁵ Hā ra Jesus tóg ki kanhró nī, ag t̄y ti tén sór mū ti. K̄y tóg sir tá kākutē mū, ēmā ū ra tīg jé.

Isaías t̄y Jesus kāmén ja

Ti t̄g k̄y ũn t̄y hēn ri ke ag tóg ti nón m̄u m̄u sir, ũn kagyga ag ke gé, fag ke gé. K̄y tóg ag t̄y há' he k̄an m̄u sir, fag t̄y ke gé, Jesus ti.

¹⁶ K̄y tóg ag m̄y: “ker is̄y ājag t̄y há' he kāmén hē,” he m̄u.

¹⁷ Hã ra tóg rán k̄y n̄i gé, ti t̄y ag t̄y há' he m̄u tag ti. Isaías ti, ũ t̄y vās̄y Topē v̄i rán ti ěn hã v̄y Jesus to tag rán ja n̄i, ti t̄y Topē v̄i tó k̄y.

¹⁸ Topē v̄i tag tó ja ti n̄i, ha mē: “ha vé, s̄y ũn t̄y āprēg m̄u ěn,” he tóg, Topē ti,” he ja tóg n̄i, Isaías ti. “Inh camarada ri ke ti n̄i, ti t̄y is̄y nén tó m̄u ěn ki króm há han k̄y. Inh fe pē vēgt̄i, s̄y ti ve k̄y tóg inh m̄y sér t̄i. Ti hã m̄y sóg inh kupr̄ig jēnēnh m̄u, k̄y tóg inh v̄i tónh m̄u sir. Fóg ag m̄y tóg tónh m̄u, kanhgág ag m̄y ke gé, is̄y ag jykre tugn̄ym ke ti,” he tóg, Topē ti,” he ja tóg n̄i, Isaías ti.

¹⁹ “V̄i jū han ke tū ti n̄i, jū k̄y v̄i tar han ke tū ti n̄i gé. Re tá ag tóg ti v̄i mēnh ke tū n̄i gé. Komēr hã tóg v̄inh m̄u,” he tóg, Topē ti.

²⁰ “Ēprā ke ag t̄y inh v̄i mranh k̄y ag tóg v̄an t̄y ā t̄y tóg' he k̄y kam ke ěn ri ke n̄yt̄i. Hã ra ti pi(jé) ag t̄y kam ke k̄an ke m̄u', is̄y ũ to: inh fe, he m̄u ěn ti. Nėj gru t̄y nhyn ke sór ri ke ag n̄yt̄i gé. Ti pi(jé) ag t̄y nhyn kenh ke m̄u', hã ra'. Ag m̄y tóg v̄i há han ke m̄u. Tag kar k̄y sóg kejēn vēnh kar jykre tugn̄ym ke m̄u.

²¹ Ēn k̄a ũ t̄y ti ki ge k̄y n̄yt̄i ag hã v̄y krenkren ke m̄u, fóg ag mré hã, kanhgág ag mré hã,” he tóg, Topē ti,” he ja tóg n̄i, Isaías ti, Jesus to. Hã ra tóg ge n̄yt̄i.

Jesus t̄y Japo jykre tó (Mc 3.20-30; Lc 11.14-23)

²² Kejēn ag tóg Jesus to ũ pére kāmū m̄u, ũn kyvó. V̄i v̄anh tóg n̄i gé. Hã ra tóg jagrē kórég n̄i gé, hã k̄y tóg ge n̄gt̄i. K̄y Jesus tóg ti t̄y há' he m̄u sir. K̄y tóg v̄i há' he m̄u sir. Ve há' he tóg m̄u gé sir.

²³ K̄y tóg vēnh kar m̄y e t̄av̄i t̄i. K̄y ag tóg jagnē m̄y: “Davi kósín ěn tū m̄y'?” he m̄u sir, Jesus to. “Ū t̄y vās̄y rán k̄y n̄i ěn tū m̄y'?” he ag tóg m̄u. Ag m̄y tóg ti hã n̄i ve n̄i.

²⁴ K̄y Fariseu ag tóg mēg m̄u sir, Jesus t̄y ti t̄y há' he m̄u ti. Hã ra ag tóg Jesus to: “jagrē kórég ti n̄i,” he m̄u. “Nén-Kórég ag p̄a'i t̄y ti jagrē n̄i, Belzebu ěn t̄y,” he ag tóg m̄u. “Hã k̄y tóg Nén-Kórég ag pan t̄i, hã k̄y tóg ag jagrē kórég ag pan t̄i. Nén-Kórég ag p̄a'i jykre t̄y tóg ag pan t̄i,” he ag tóg, Fariseu ag.

²⁵ Hã ra Jesus tóg ki kanhró n̄i, ag t̄y nén to jykren m̄un ki. K̄y tóg ag m̄y: “p̄a'i p̄ir krēm ke ag t̄y jagnē kato tēgtēn k̄y ag tóg jagnē k̄agtēn k̄an ke m̄u,” he m̄u. “Ēmā p̄ir ki ke ag t̄y jagnē kato tēgtē k̄y, ĩn p̄ir krēm ke fag t̄y jagnē kato tēgtē k̄y fag tóg vēnh k̄ap̄am k̄y n̄yt̄inh m̄u, k̄y fag tóg jagnē k̄agtēn k̄an ke m̄u.

²⁶ Ge ti n̄i gé, Nén-Kórég ag. Nén-Kórég t̄y Nén-Kórég ũ kutēm k̄y tóg Nén-Kórég ag t̄y jagnē kato tēgtē han m̄u sir. K̄y ag tóg jagnē t̄y tū' henh ke m̄u gé, Satanás ag.

²⁷ “Belzebu t̄y tóg Nén-Kórég ag pan t̄i,” he ājag tóg t̄i iso. J̄avo ājag mré ke ag h̄yn vēnh jykre t̄y ne t̄y vēnh jagrē kórég ag pan t̄i? Ag m̄y Nén-Kórég ag jykre ki ag pan m̄u gé', Topē jykre ki m̄y vó? Topē jykre ki ag tóg ag pan t̄i. Ājag t̄y tag to jykren k̄y ājag tóg inh jykre há ki kanhr̄an ke m̄u vē,” he tóg ag m̄y, Jesus ti.

²⁸ “Topē kupr̄ig jykre t̄y sóg Japo ag pan t̄i m̄y. Topē kupr̄ig t̄y Japo ag pan k̄an k̄y Topē tóg t̄y ěg p̄a'i n̄i vē m̄y. Tag to jykren n̄i,” he tóg, Jesus ti.

²⁹ m̄an sór k̄y, ti ĩn tá, k̄y ěg tóg ti se vén t̄i, ke tū n̄i (m̄u) ra tóg ā tū ki r̄ir ke m̄u, k̄y ěg tóg ti tū m̄an t̄y hē ri kenh ke tū n̄gt̄i, ti tar n̄in k̄y. Ēg t̄y ti se kar k̄y ěg tóg ti tū m̄ag m̄u sir,” he tóg. “Ge ti n̄gt̄i, s̄y nén han m̄u ti. Tar ti n̄i, Japo ti.

Hã ra sóg hur ti sé, hã ký sóg ti tũ ag kygvãn ke mũ sir. Ag jagrê kórég pan sóg mũ sir,” he tóg, Jesus ti.

30 “Ájag tý tý inh mré ke tũ nýtĩn ký ájag tóg inh kato tégte mũ. Ájag tý inh mré êprã ke ag tý Topê to kãmũ han tũ nĩn ký ájag tóg ag kãmũ kamêg mũ,” he tóg.

31 “Hã ký sóg ájag mũ tó mũ. Ájag tý Topê vĩ mranh mũ ra tóg ájag mũ vênh pãte fón sór mũ, Topê ti. Ájag tý Topê to vĩ kónãn mũ ra tóg ájag mũ vênh pãte fón sór mũ gé. Ájag tý hã ra Topê kuprĩg to: “Japo tý êg jagrê vê,” hen ký tóg ájag mũ vênh pãte fón mãn ke tũ nĩ ha sir, Topê ti,” he tóg, Jesus ti.

32 “Ájag tý iso vĩ kónãn mũ. Ájag tý hã ra Topê kuprĩg to vĩ kónãn ký tóg ájag mũ vênh pãte fón mãn ke tũ nĩ ha. Ájag tý ga kri mũn ký tóg ájag mũ vênh pãte fón mãn ke tũ nĩ, Topê ti, ájag ter kar ký tóg ájag mũ vênh pãte fón mãn ke tũ nĩ gé,” he tóg, Jesus ti.

Ka to comparação (Lc 6.43-45)

33 “Êg tý ka kanê ko há krãn ký ti kanê vỹ ko há nĩ, êg tý ka kanê ko vãnħ krãn ký ti kanê vỹ ko kórég nĩ gé. Êg tý ti kanê ve ký êg tóg: “ũn kanê ko vãnħ ja vê,” henh ke mũ. Ge ti nĩgtĩ, êg jykre ti. Ũn jykre há tóg há nĩ, ũn jykre kórég tóg kórég nĩ gé.

34 Pỹn ri ke ájag nýtĩ. Kórég tãvĩ ájag nýtĩ, hã ra ájag tóg ón ký nén ũ há tó sór tĩ. Êg jênky ki tóg kutê tĩ, êg tý nén to jykrén mũ ti. Êg jykre kórég tãvĩ nĩn ký êg tóg nén ũ kórég tãvĩ tó tĩ. Hã ký ájag pi(jé) tó há han tĩ’.

35 Ũn jykre há vỹ nén ũ há kar to jykrén tĩ, ký tóg êg mũ tó há han tĩ gé sir, Ũn jykre kórég vỹ nén ũ kórég kar to jykrén tĩ, ký tóg êg mũ tó kónãn tĩ gé sir,” he tóg, Jesus ti.

36 “Ki hã sóg tó mũ ájag mũ, hã ký sóg ke mũ kurã tý êgno ki, sỹ vênħ kar jykre tugnỹm ke kurã ên ki sóg ájag vỹ tugnỹm ke mũ. Ký ájag tý ón ký vĩ ja nĩn ký sóg ên venh ke mũ gé. Ájag tý nén tó ja kar tugnỹm jé sóg ke mũ, ha vemnĩ,” he tóg, Jesus ti.

37 “Ájag tý vĩ há han ja nĩn ký ájag tóg inh mũ há nýtĩ gé. Ájag tý vĩ kórég han ja nĩn ký ájag tóg inh mũ kórég nýtĩ. Ký ã kato tẽ mũ ag mũ Topê jykre tón hã vê.

Ag tý milagre ve sór (Mc 8.11-12; Lc 11.29-32)

38 Ký Topê vĩ to professor vĩ ag tóg Fariseu ũ ag mré Jesus mũ: “Senhor,” he mũ. “Êg tý ã tý milagre han venh há tóg tĩ,” he ag tóg mũ, Jesus mũ.

39 Ký Jesus tóg ag mũ: “kórég ájag nýtĩ,” he mũ. “Topê ki ge sór vãnħ ájag tóg nýtĩ,” he tóg. “Ájag tý milagre ve sór mũ tag venh ke tũ ájag tóg nĩ. Nén pir hã ve jé ájag tóg ke mũ, hã vỹ: Jonas tý nén ve ja ên ri ke, he mũ, vãsỹ Topê vĩ tó tĩ ên tý nén ve ja ên ri ke.

40 Jonas ên vỹ goj tãn nug kãkã nĩ ja nĩ, kurã tãgtũ ki, kuty tãgtũ ki ke gé. Tag ri ke ve jé sóg ke mũ gé. Ga krêm sóg nỹnh mũ, kurã tãgtũ ki, kuty tãgtũ ki ke gé. Tý sóg êprã ke fi kósĩn nĩ,” he tóg, Jesus ti.

41 “Ký Nínive tá ke ag vỹ ájag kato vĩnh ke mũ sir, kurã tý êgno ki, ha vemnĩ. Ag tý Jonas vĩ mẽ ký ag tóg ájag jykre kórég tovãnħ, Nínive tá ke ag. Tý sóg Jonas kãfór nĩ, hã ra ájag tóg ájag jykre kórég tovãnħ sór tũ nĩ, sỹ Nínive tá ke

ag jãvo ãjag mÿ tó mÿ ra. Hã kÿ ag tóg ãjag jykre kórég tónh ke mÿ, kurã ên kã, ha vemni.

⁴² Kÿ pâ'i mág ên fi, pâ'i tÿ rainha ên fi, ù tÿ kanhkã fyn ja tá kãtÿg ja ên fi vÿ nÿnh ke mÿ gé, kurã tÿ êgno kã. ãjag mré fi tóg jênh ke mÿ, kÿ fi tóg ãjag to vÿ kónãn ke mÿ gé. Kanhkã fyn ja tá fi tóg kãtÿg ja nÿ, vãsÿ, fi tÿ Salomão vÿ mē jé. Salomão kãfór vÿ tÿ inh nÿ, hã ra ãjag tóg inh vÿ jêmê jãvãnh nÿtÿ," he tóg, Jesus ti.

Vênh jagrê kórég jykre

(Mc 11.24-26)

⁴³ "Kejên sóg vênh jagrê kórég ù kutêm mÿ. Kÿ sóg ga kórég mÿ tÿ mÿ, ti jagrê ên ti. Goj venh ke tÿ tóg nÿ tá. Vênhkán ke tÿ tóg nÿ gé, ti tÿ hê ri ken kÿ vênhkán ke tÿ tÿn kÿ.

⁴⁴ Kÿ tóg vãhã to jykren mÿ sir. "Inh hÿn ên ra tÿg mãn ha, sÿ ù tá kãkutê ja ên ra. Inh mÿ tóg tÿ ïn ri ke ja nÿ. Kÿ inh hÿn tóg ti kãra rã mãn ha," he tóg mÿ sir, ti jagrê ja ên ti. Kÿ tóg ti venh tÿ mÿ sir. Hã ra tóg sir krÿ há nÿ, kÿ tóg ti mÿ ïn há ri ke nÿ sir, in prur, ïn kuprã, ïn sÿnvi ri ke.

⁴⁵ Kÿ tóg Nén-Kórég tÿ 7 (ke) ag mÿ tónh tÿ mÿ sir. "Ha kãmÿ jêg he tóg mÿ sir. Hã ra ag jykre pãno tóg ti jykre pãno kãfór nÿ. Kÿ ag kar tóg ù ên kãge mÿ, tÿ ag ti jagrê nÿtÿ, isÿ ùn mÿ ti jagrê pir kutêm ja ên ti. Hã kÿ to, kórég tãvi nÿ sir. Ti jagrê pir kutêm inh nÿ vê, hã ra tÿ 8 (ke) ag tóg sir tÿ ti jagrê nÿtÿ, ti tÿ inh ki rã tÿ nÿn kÿ. ãjag mÿ tóg ge nÿnh mÿ, kurã tÿ êgno ki. Ûri ãjag jykre vÿ pãno nÿ. Hã ra kurã ên ki tóg sir pãno kãfór nÿnh mÿ. Kÿ ãjag tóg sir to jagtar tãvi nÿtÿnh mÿ," he tóg, Jesus ti.

Jesus mré ke pē fag

(Mc 3.31-35; Lc 8.19-21)

⁴⁶ Ti tÿ ver tÿ vēmén kÿ ti mÿnh fi tóg tá jun mÿ sir, ti jãvy ag mré. Ti mÿ fag tóg vênh vÿ jênêg mÿ, fag tÿ ti mré vēmén jé.

⁴⁷ Kÿ ù tóg ti mÿ tónh kãtÿ mÿ. "Ã mÿnh fi vÿ re tá jê, ã jãvy ag mré. Fag tÿ ã mré vēmén ke nêji," he tóg, Jesus mÿ.

⁴⁸ Kÿ tóg ù tÿ ti mÿ tó mÿ ên mÿ: "inh mÿnh fi mÿ inh ve sór mÿ', inh jãvy ag mré?" he mÿ. "Inh mÿnh pē fi pijé', inh jãvy pē ag pijé'," he tóg.

⁴⁹ Kÿ tóg ti mÿ ã mré mÿ tÿ ag ven mÿ sir, ã nÿgé tÿ. Kÿ tóg ti mÿ: "inh mÿnh pē fi hã vê, inh jãvy pē ag hã vê," he mÿ, ã mré mÿ tÿ ag to.

⁵⁰ "Û tÿ inh panh tÿ kanhkã tá nÿ ên vÿ ki króm mÿ vÿ tÿ inh jãvy pē ag nÿtÿnh mÿ, inh ve pē fag ke ge, inh mÿnh pē fi ke gé," he tóg, Jesus ti.

13

Nén fy to comparação

(Mc 4.1-9; Lc 8.4-8)

¹ Kurã ên kã Jesus tóg ïn tá kãkutê mÿ, kÿ tóg goj nig ra tÿ mÿ. Tá tóg nÿ nÿ sir.

² Kÿ ù tÿ hên ri ke ag vÿ tá vênh mãn mÿ sir, ti rã hã, kÿ tóg canoa kãkã nÿ mÿ sir, jo ùn e ên ag tóg nig fyr tá nÿtÿ.

³ Kÿ tóg ag kanhrãn mÿ sir. Ag mÿ tóg comparação tÿ hên ri ke hÿn han mÿ. Kÿ tóg ag mÿ: "Û tÿ Topê vÿ tó mÿ vÿ ge nÿtÿnh mÿ, ha mē," he mÿ. "Kejên ù tóg nén ù fy vãvãm tÿ mÿ," he tóg.

⁴ "Ti tÿ vãvãm kÿ ti fy ù tóg êpry kri, êmÿn kri kutê mÿ, kÿ sēsÿ tóg ti ko mÿ sir.

⁵ Ti fy ũ tóg pãrô kri kutê mũ, ga e tũ ki. Kÿ tóg kãnhmar mur mũ vê, ga sã ãn ki.

⁶ Hã ra rã tóg ã tÿ ãg nĩno kã sa kÿ (tóg) ti pũn mũ. Ti jãre han tũ nĩn kÿ tóg tóg mũ.

⁷ Ti fy ũ tóg sónh kãki kutê mũ, kÿ sónh tóg ti mré mur mũ, kÿ tóg ti kri rũm mũ. Kÿ tóg tũ' he mũ sir.

⁸ Ti fy ũ tóg ga há kri kutê mũ, kÿ tóg mur há han mũ, mog há han tóg mũ, kanê há han tóg mũ gé. Ũ tóg kanê tÿ 100 (ke) han, jo ũ vÿ tóg kanê tÿ 60 (ke) han, jo ũ vÿ tóg kanê tÿ 30 (ke) han.

⁹ Ũn nĩgrêg nÿtĩ tÿ tÿ jêmê jé," he tóg, Jesus ti.

*Ëg tÿ comparação to vênh kanhrãn ke
(Mc 4.10-12; Lc 8.9-10)*

¹⁰ Kÿ ti mré mũ tĩ ag tóg ti to kãmũ mũ, kÿ ag tóg ti mÿ: "ã tÿ ne tó nê?" he mũ.

¹¹ Kÿ Jesus tóg ag mÿ: "ãjag hã ne ũ tÿ kanhkã tá nĩ ãn tÿ tÿ ãg pã'i nĩ ãn ki kanhrô nÿtĩnh mũ," he mũ, "ũ tÿ inh jo nén tó ja tũ ãn ti," he tóg mũ. "Hã ra ũn e ãn ag vÿ ki kanhrãn kãn ke tũ nĩ," he tóg.

¹² "Hã kÿ tóg ge nĩ. Ũ tÿ nén to jykrén há han kÿ tóg ũ to jykrén mãn', ũ to jykrén mãn' he mũ. Komêr hã tóg to jykrén kãn ke mũ. Ũ tÿ nén to jykrén tũ nĩn kÿ tóg ti mÿ tũ' he mũ, ti tÿ to jykrén sĩ han kÿ.

¹³ Hã kÿ sóg ũn e ãn ag mÿ comparação han mũ, ag tÿ mē há han sór tũ nÿtĩn kÿ. Kÿ ag tóg ón kÿ mēg mũ ra ki kagtĩg nÿtĩ, to jykrén tũ ag nÿtĩ sir.

¹⁴ Hã ra tóg rán kÿ nĩ gé. Isaiás tÿ vãsÿ Topê vĩ tó kÿ tóg tag tó ja nĩ, ha mē. "Mē jé ãjag tóg ke mũ ón kÿ, hã ra ãjag tóg to jykrén tũ nĩnh mũ, kÿ ãjag tóg ki kagtĩg nÿtĩnh mũ.

¹⁵ Povo tag ag vÿ krĩ tũ nÿtĩ, nĩgrêg kutu ag tóg nÿtĩ gé, kanê kyvó ag tóg nÿtĩ gé, ag tÿ nén ũ ve sór tũ nÿtĩn kÿ, ag tÿ jêmê sór tũ nÿtĩn kÿ, ag tÿ to jykrén sór tũ nÿtĩn kÿ ke gé. Hã kÿ ag tóg inh ki ge sór tũ nÿtĩ gé, kÿ sóg ag tÿ há' henh ke tũ nĩ gé," he ja tóg nĩ, Isaiás ti, povo tag to," he tóg, Jesus ti.

¹⁶ "Ag jãvo ãjag hã vÿ nĩgrêg há nÿtĩ, hã kÿ ãjag tóg ag jãvo jêmê há han mũ.

¹⁷ Ha mē, ũ tÿ hên ri ke ag vÿ inh ve sór e ja nĩgtĩ, vãsÿ, ãjag tÿ ũri vég mũ tag ti. Hã ra ag tóg inh kãtĩg ke jo kãgter. Topê vĩ tó ti ag vê. Jykre kuryj ag nÿtĩ ja nĩ, hã kÿ ag tóg ãjag tÿ nén vég mũ tag ve sór e ja nĩgtĩ. Hã ra ag tóg ve ja tũ nĩgtĩ, mē ja tũ ag nĩgtĩ, ãjag tÿ ũri nén mēg mũ ti. Ag tÿ vég tũ ra ag tóg kãgter. Æjag hã ne mēg mũ', inhhã'," he tóg, Jesus ti. Ti mré mũ tĩ ag mÿ tóg ke mũ.

*Jesus tÿ nén fy to comparação kãmén
(Mc 4.13-20; Lc 8.11-15)*

¹⁸ "Kÿ sóg ãjag mÿ kãmén mũ, nén fy kanê tag ti, ha mē.

¹⁹ Ũ tóg kejên ón kÿ Topê vĩ mēg mũ, ti tÿ tÿ ãg pã'i nĩ ti. Hã ra tóg to jykrén tũ nĩ, ã tÿ ón kÿ mēn kÿ. Kÿ Nén-Kórég vÿ ti mÿ tÿ tũ' he mũ sir, ti tÿ mē ja ti tÿ. Kã jatũ tóg nĩ sir. Ëpny kri, êmĩn kri kutê mũ ãn hã vê.

²⁰ Kÿ ti fy ũ tóg pãrô kri kutê mũ. Ũ vê gé. Topê vĩ mēg tóg mũ gé. Kÿ tóg kãnhmar: "hej," he mũ sir. Ti mÿ tóg sér tĩ.

²¹ Hã ra tóg tÿ nén kré jãre tũ ri ke nĩ mÿr. Kÿ tóg tĩg sĩ han mũ, Topê mré. Nén ũ jagy kutê kÿ tóg Topê tovãnh mũ sir, ũ tÿ Topê vĩ tugrĩn ti kato tē kÿ. Kãnhmar tóg tovãnh mũ.

²² Ti fy ù tóg sónh kãki kutê mũ. Û vê gé. Topê vĩ mễg tóg mũ gé. Hã ra tóg ã rãnhrãj hã mũ êkrég mũ sir. Nén kar to én tóg mũ sir, ón kỹ rico nĩ sór jé. Hã kỹ Topê vĩ tóg ti mỹ katy tĩ sir. Kỹ tóg han tù nĩ sir, kanê ti.

²³ Ti fy ù tóg ga há kri kutê mũ. Û vê gé. Topê vĩ mễg tóg mũ gé. Mễ kỹ tóg to jykren mũ sir. Kỹ tóg kanê han mũ sir. Kỹ ù vĩ tóg kanê tỹ 100 (ke) han, jo ù vĩ tóg kanê tỹ 60 (ke) han, jo ù vĩ tóg kanê tỹ 30 (ke) han,” he tóg, Jesus ti.

Vãnh to comparação

²⁴ Kỹ tóg comparación ù han kỹ: “Nén-Kórég tỹ inh rãnhrãj kókén sór mũ vĩ ge nĩnh mũ, ha mễ,” he mũ. Kỹ tóg: “Ù tỹ kanhkã tá nĩ ên tỹ tỹ êg pã'i nĩ vĩ ge nĩ, ha mễ,” he mũ. “Kejên ù tóg nén fy vãvãm mũ, ti japỹ tá, tỹ ti jakré nỹ jé.

²⁵ Kỹ tóg nũr tĩ mũ, ti camarada ag ke gé. Kỹ ti kato tẽ mũ ên tóg kutyg kỹ ra tĩ mũ, ti japỹ ên ra, kỹ tóg vãnh fy vãvãm mũ, trigo fy ên kãmĩ. Kỹ tóg tĩ mũ sir, vãnh fy ên vãvãm kar kỹ.

²⁶ Kỹ trigo tóg mur mũ, mog tóg mũ, kanê han tóg mũ sir. Hã ra vãnh tóg ti mré mur mũ gé.

²⁷ Kỹ ti camarada ag tóg ãjag patrão mỹ tónh mũ mũ. “Trigo fy vãvãm êg tóg mũ vê, hã ra vãnh tóg ti mré mur mũ. Ne nẽ hỹn?” he ag tóg ti mỹ.

²⁸ Kỹ tóg ag mỹ: “Êg kato tẽ mũ ên rãnhrãj hã vê,” he mũ. “Ên hã ne isũ kókég’,” he tóg. Kỹ ag tóg ti mỹ: “kỹ êg mỹ vãnh ên kunũnh ke tù nĩ?” he mũ.

²⁹ Kỹ tóg ag mỹ: “hỹ,” he mũ. “Ájag tỹ vãnh ù kunũnh kỹ tóg ãjag tỹ ti pẽn ù kunũnh ha mễ tĩ, vãnh mré. Kỹ kunũnh tũg nĩ.

³⁰ Vãnh hỹn tóg trigo mré mog mũ gé. Kỹ êg tỹ kre kỹ sóg ù tỹ krég mũ mỹ tónh ke mũ. “Vãnh kre vén nĩ,” he jé sóg ke mũ. “Ti kre kar kỹ ti tógĩ, êg tỹ ti pũn jé. Kar kỹ ãjag tóg trigo krenh ke mũ, sỹ pãjô krêm vin han jé,” he jé sóg ke mũ,” he tóg, ag patrão ti,” he tóg, Jesus ti. Tĩ tỹ ù tỹ ón kỹ Topê ki ge kỹ nỹtĩ ên ag tó jan hã vê.

Mostarda fy to comparação (Mc 4.30-32; Lc 13.18-19)

³¹ Kỹ tóg ag mỹ nén ù tó mũ gé sir. “Ù tỹ kanhkã tá nĩ tỹ tỹ êg pã'i nĩ vĩ ge nĩnh mũ, ha mễ,” he tóg. “Ka tỹ mostarda fy ri ke tóg nĩ. Ti krãn êg tóg tĩ, êg japỹ ki, ka tỹ mostarda fy ti.

³² Kãsir ti nỹtĩ, ti fy ti. Û fy vĩ ti sĩ ri ke tù nĩ. Ti krãn kar kỹ tóg mog mũ. Kỹ tóg êgôho ag kãfór nĩ. Pẽ mág ti nỹtĩ, hã kỹ sễsĩ ag vĩ kri krég tĩ, ti pẽ kri,” he tóg, Jesus ti. Tĩ tỹ êg tỹ ti vĩ tó vén kar kỹ vãnh kar kri rùm ke mũ kãmén hã vê.

Fermento to comparação (Lc 13.20-21)

³³ Kỹ tóg ag mỹ comparación ù tó mũ gé sir, kỹ tóg: “Topê tỹ tỹ êg pã'i nĩ vĩ tag ri ke nĩnh mũ, ha mễ,” he mũ. “Ûn tỹtã fag tóg pão han tĩ. Pão han jé fag tóg pão jêgja jafã tỹ fermento ên tỹ farĩnh mré jêgĩag tĩ. Fermento sĩ ên tỹ pão kar ên tóg són ke kãn tĩ,” he tóg, Jesus ti. Tĩ vĩ tỹ vãnh kar kri rùm ke kãmén hã vê.

Jesus tỹ comparación tỹ êg kanhrãn (Mc 4.33-34)

³⁴ Comparação tỹ ge han tóg tĩ, Jesus ti, vãnh kar mỹ. “Topê tỹ tỹ êg pã'i nĩnh ke mũ vĩ ge nĩnh mũ,” he tãvĩ han tóg tĩ ag mỹ.

³⁵ Hã ra tóg rãn kỹ nĩ gé, Jesus tỹ comparación han ke mũ ti. Vãsỹ Topê vĩ tó tĩ ù tóg Jesus kãmén kỹ tag tó ja nĩ ti to, ha mễ. “Comparação han jé sóg ke mũ.

Inh jo tó ja tũ ên tó jé sóg ke mũ. Ủ vỹ tag mẽ ja tũ nĩ ver, sỹ tónh ke mũ tag,” he ja tóg nĩ, Topê vĩ tó tĩ ên, Jesus to. Hã ra tóg hã tó tĩ, Jesus ti.

Jesus tỹ vãnh to comparação kãmén

³⁶ Ag mỹ kãmén kãn kar Jesus tóg vãnh e ên ré ký ãn kãra rã mũ. Ký ti mré mũ tĩ ag tóg ti to kãmũ mũ, ti ki jẽmẽ jé. “Êg mỹ ã tỹ ag mỹ kãmén ja ên ti tó mãn nĩ, ã tỹ ag mỹ trigo mré vãnh tó ja ên ti. Êg tỹ ver to jykrén tũ tóg tĩ,” he ag tóg mũ, Jesus mỹ.

³⁷ Ký tóg ag mỹ kãmén mũ. “Êprã ke fi kósin vỹ trigo fy vãvãm mũ. Inh hã vỹ,” he tóg mũ.

³⁸ “Ga hã to sóg: êpỹ, he mũ. Ký trigo ên vỹ Topê krẽ ag ri ke nỹtĩ, ký vãnh vỹ Nén-Kórég krẽ ag ri ke nỹtĩ.

³⁹ Ủ tỹ ag han mũ vỹ tỹ Japo ti nĩ, Nén-Kórég ên krẽ ag. Ti colher ke kurã hã vỹ: kurã tỹ êgno, he mũ. Ủ tỹ trigo colher ke mũ ag vỹ tỹ Topê tỹ jẽgnẽ jafã ag nỹtĩ.

⁴⁰ Kurã tỹ êgno ki ag tóg êg tỹ vãnh pũn ên ri ke han ke mũ, Japo tũ ag tỹ.

⁴¹ Êprã ke fi kósin ên, inh hã vỹ isỹ jẽgnẽ jafã ên ag jẽgnẽnh ke mũ sir, ký ag tóg ù tỹ vãnh jykre pãno han mũ kar ag génh kãn ke mũ, ù tỹ ù ag mỹ: “ha jatun mỹ Topê vỹ mranh,” he mũ kar ag ke gé.

⁴² Ag génh ký ag tóg pĩ gru mág ên ki ag vãm ke mũ sir. Tá ag tóg vỹsỹrénh tãvĩ han tĩ. Ájag jã tỹ ag tóg gyngyn henh ke mũ, gangan ke jé ag tóg ke mũ, jũ ký, vỹsỹrénh ký ke gé.

⁴³ Ký ùn jykre kuryj ag vỹ há pẽ nỹtĩnh mũ, sĩnvĩ, kókov, rã gru ri ke, ag tỹ ájag jóg tá nỹtĩnh ken ký sir, ag tỹ ù tỹ kanhkã tá nĩ ên tỹ tỹ êg pã'i nĩ ven ký. Ûn nĩgrêg nỹtĩ tỹ tỹ jẽmẽ jé,” he tóg, Jesus ti.

Êpỹ ki jãnkamy to comparação

⁴⁴ “Kỹ êg tỹ ù tỹ kanhkã tá tỹ êg pã'i nĩ venh ke vỹ tag ri ke nĩ gé, ha mẽ. Ủ tỹ ã patrão japỹ tá jãnkamy ne kunũnh ký pēju mãn ký nĩm ri ke tóg nĩ. Ti pēju mãn ký tóg ã tỹ nén kar fón kãn mũ sir, ti kaja to êpỹ ên vyn jé sir. Êpỹ ên vyn kar ký jãnkamy ên vỹ tỹ ti tũ nĩ sir,” he tóg, Jesus ti. Ti tỹ êg mỹ êg tỹ ti ki rã sór ký êg tũ fón kãn tón hã vỹ.

Pérõla to comparação

⁴⁵ “Êg tỹ ù tỹ kanhkã tá nĩ ên tỹ tỹ êg pã'i nĩ venh ke vỹ tag ri ke nĩ gé, ha mẽ,” he tóg mũ gé. “Negociante ù tóg jãnka han jafã tỹ negociar he tĩ, pérõla tỹ. Hã ký tóg ùn há kuprêg tĩgtĩ.

⁴⁶ Kejẽn tóg ùn há pẽ ù vég mũ sir, ùn kaja e. Ký tóg ã tũ vãm kãn mũ sir, ã tỹ ùn sĩnvĩ pẽ ên kajãm jé, ti tỹ tỹ tũ nĩ jé,” he tóg, Jesus ti. Ti tỹ êg mỹ êg tỹ ti ki rã sór ký êg tũ vãm kãn tó mãn hã vỹ gé.

Rede to comparação

⁴⁷ “Êg tỹ ù tỹ kanhkã tá nĩ ên tỹ tỹ êg pã'i nĩ venh ke to comparação vỹ gé, ha mẽ,” he tóg mũ gé. “Rede ri ke tóg nĩ, êg tỹ tỹ pirã kugmĩ jafã ên. Ti fig êg tóg tĩ, goj kãkã, êg tỹ pirã kugmĩ jé, kãkofár ke gé.

⁴⁸ Ki ti fón kar ký êg tóg nỹgnỹn mũ sir, goj ki êg tóg pirã mré kãkofár gég tĩ. Génh ký êg tóg ùn mág ag hã kuprêg tĩ, ma mũ jé. Ûn kãsir ên togvãnh êg tóg tĩ.

⁴⁹ Ge ti nĩgtĩ, kurã tỹ êgno ki. Topê tỹ jẽgnẽ jafã ag tóg ùn jykre kuryj ag kuprêg ke mũ, Topê mỹ.

⁵⁰ Ûn jykre pãno ag vãvãm jé ag tóg ke mũ, pĩ gru mág ên ki. Tá ag vêsýrénh vê sir. Ájag já tỹ ag tóg gyngyn henh ke mũ, tỹ ag gangan kej ke mũ, jũ ký, vêsýrénh ký,” he tóg, Jesus ti. Ti tỹ ag mỹ êg tỹ ti ki rã sór jé kãmén hã vê.

Êg panh to comparação

⁵¹ Ký tóg ã mré mũ tí ag mỹ: “ãjag mỹ tag to jykrén kãn mũ, sỹ ãjag mỹ nén kãmén mũ tag ti?” he mũ. Ký ag tóg ti mỹ: “hỹ,” he mũ sir.

⁵² Ký tóg ag mỹ: “ký tóg há tí,” he mũ. “Û tỹ Topê vĩ to professor ên, ti tỹ kanhkã tá nĩ ên jykre ki rãn ký tóg ge nĩ, ha mẽ,” he tóg. “Êg panh ri ke tóg nĩ, ti tỹ tỹ nén ù mág nĩn ký. Êg panh tóg kejên êg mỹ ã tỹ nén sĩnvĩ ven tí, ti tỹ ùri mág mũ ti, ti tỹ vãsý mãn ja ên ke gé,” he tóg, Jesus ti. Ti tỹ êg mỹ êg tỹ Topê vĩ ki kanhrãn ke tó vê. Êg tỹ to estudo han ký êg tóg vãsý rãn ký nĩ ên tónh ke mũ, ký êg tóg ù tỹ ùri tó mũ tag tónh ke mũ gé. Jesus tỹ tag to êg mỹ comparação han hã vê.

Jesus tỹ Nazaré ra vỹn ke (Mc 6.1-6; Lc 4.16-30)

⁵³ Ag mỹ kãmén kãn kar ký tóg tá kãkutê mũ sir.

⁵⁴ Ký tóg ã jamã ra tí mũ sir. Tá jun ký tóg êg vênh kanhrãn jafã ki ag kanhrãn mũ. Ký tóg ag mỹ e tí, ti vĩ ti. Ký ag tóg ti to vĩ kónãn mũ. “Hên tán hỹn ki kanhrãn, vênh jykre tag ki? Û nỹ hỹn ti kanhrãn, ti tỹ nén han vãn h tag hyn han jé?” he ag tóg ti to.

⁵⁵ “Ïn han tí ên kósín vê mỹr,” he ag tóg. “Ti mỹnh fi vỹ tỹ Maria fi nĩ, ký ti jãvy ag vỹ ki nỹtĩ, Tiago, José, Simão, Judas.

⁵⁶ Ký ti ve fag vỹ tag ki nỹtĩ gé, êg mré. Ti tỹ ne jé êg kãfór nĩ sór nê hỹn?” he ag tóg mũ sir, Jesus to.

⁵⁷ Ký tóg ag mỹ tỹ ù nỹ. Ký Jesus tóg ag mỹ: “êmã ù tá ke ag tóg Topê vĩ tó tí to é he tũ nĩgtĩ mỹr,” he mũ. “Ti jamã tá ke ag tóg ti to é he tí jãvo, ti mré ke ag, ti kanhkã ag,” he tóg.

⁵⁸ Ký tóg tá milagre e hyn han tũ nĩ. Ûn kaga nỹtĩ pir ag tỹ há’ he tóg, ùn e tỹ há’ he tũ ti nĩ, ag tỹ ti ki ge jãvãn h nỹtĩn ký.

14

João Batista ter (Mc 6.14-29; Lc 9.7-9)

¹ Ký kejên pã’i mág tỹ governador tỹ Herodes vỹ mēg mũ, Jesus kãme ti.

² Ký tóg ã camarada ag mỹ: “João Batista vê hỹn, ãjag tỹ inh mỹ ù tó mũ ti,” he mũ. “Ti hỹn tóg rĩr mãn, sỹ ti tén kar ký, hã ký tóg milagre tỹ hên ri ke hyn han tĩgtĩ,” he tóg, Herodes ti, ã camarada ag mỹ, Jesus to.

³ Herodes vỹ João se ja nĩ, vêse ja kãki tóg ti fón ja nĩ, Herodias fi tugnĩn. Ti jãvy tỹ Filipe prũ fi ja vê, hã ra tóg fi kunũnh ký fi tỹ prũg mũ, Herodes ti. Ký João tóg ti mỹ.

⁴ “ã hã ne tóg ã mrê ke prũ fi tỹ prũg mũ;” he ja nĩ. “Fi ki ã tóg Topê vĩ mranh mũ,” he tóg, João ti, Herodes mỹ.

⁵ Ký Herodes tóg ti tén sór mũ, hã ra tóg vênh kar kamēg mũ. Vênh kar tóg João to: “Topê vĩ tó tí ù vê;” he tí. Ký Herodes vỹ ag kamēg mũ.

⁶ Hã ra tóg kejên Herodes mur ja kurã tá krỹg mũ. Ký festa ên kã Herodias fi kósín fi vỹ ag jo vênh grén mũ sir, ti mré jēg mũ ag jo. Ký tóg Herodes mỹ sĩnvĩ tí.

⁷ Kÿ tóg fi mÿ: “ã tÿ nén to vÿ kar nÿm jé sóg ke mü ã mÿ, sÿ ke há vë,” he mü, Herodes ti.

⁸ Kÿ fi tóg ã mÿnh fi mÿ ke mü. Kÿ fi mÿnh fi tóg fi krÿn mü, fi tÿ João krÿ to vÿ jé. Kÿ fi tóg to vÿ mü sir. “Inh mÿ ùri João Batista krÿ tÿ pénky kãkã nÿm,” he fi tóg mü, Herodes mÿ.

⁹ Kÿ tóg ti mÿ e tÿ sir, ti tÿ ti tén jé. Hã ra tóg fi mÿ: “sÿ ke há vë,” he ja nÿ, kÿ ti mré jëg mü ag vÿ më kãn ja nÿ. Kÿ tóg fi mÿ: “hej,” he mü sir.

¹⁰ Kÿ tóg soldado jënëg mü sir, ti tÿ João krÿ kym jé. Hã ra João tóg vëse ja kãkã nÿ nÿ.

¹¹ Kÿ tóg ti krÿ kym mü sir. Pénky kãkã nÿm kÿ tóg fi mÿ nÿm mü, tátãg fi mÿ, ti krÿ ti. Kÿ fi tóg fi mÿnh fi mÿ ma tÿ mü.

¹² Kÿ ti mré mü tÿ ag tóg më kÿ ti vyn kãmü mü, vënh kej tá ti fón jé. Ti fón kar kÿ ag tóg Jesus mÿ tónh kãmü mü.

Jesus tÿ ùn e jën

(Mc 6.30-44; Lc 9.10-17; Jo 6.1-14)

¹³ Jesus tÿ João ter më kÿ tóg tá kãkutë mü, canoa kãmÿ. Kÿ tóg ëmã tÿg ja ra tÿ mü sir, ã pir mÿ nÿ jé. Hã ra vënh e ën tóg ti tÿg mëg mü. Kÿ ag tóg ti nón mü mü, ãjag pën kã, ëmã kar tá kãmü kÿ.

¹⁴ Kÿ Jesus tóg kafã ù tá vag ke mü, kÿ tóg tá ùn e ën ag vëg mü sir, ti nón kãmü mü ag. Kÿ ag tóg ti mÿ jagãgtar nÿtÿ. Ag jagãgtãn kÿ tóg ùn kagyga ag tÿ há' he mü sir.

¹⁵ Tÿ tÿ ùn e tÿ hághá' hen kÿ tóg rãké nÿ sir, ti tÿ ag kanhrãn ki. Kÿ ti mré mü tÿ ag tóg ti mÿ tó jé kãmü mü. “Rãké ti nÿ ha,” he ag tóg mü, ti mÿ. “Tag mÿ tóg ëmã tÿ tÿ. Kÿ tóg ã tÿ ag jëgnënh há tÿ, ag tÿ ëmã ù ra mü jé, vëjën comprar he jé,” he ag tóg mü, Jesus mÿ.

¹⁶ Hã ra Jesus tóg ag mÿ: “ha inhhã ag jën, kÿ ag tóg hë ra mÿnh ke tÿ nÿ.” he mü.

¹⁷ Kÿ ag tóg ti mÿ: “hã ra tóg tÿ tÿ, vëjën tÿ,” he mü. “Pão tÿ 5 (ke) vÿ ki nÿtÿ, pirã régre ke gé,” he ag tóg.

¹⁸ Kÿ tóg ag mÿ: “inh mÿ ma kãmü jëg ge,” he mü.

¹⁹ Kÿ tóg ùn e ën ag mÿ tó mü, ag tÿ re tá nÿgnÿ kÿ nÿtÿ jé. Kÿ tóg pão tÿ 5 (ke) ën mäg mü, pirã régre ën ke gé. Kÿ tóg kanhkã ki ëvãnh mü sir, vëjën ën to tóg Topë mré vÿ mü sir. Kÿ tóg pão kénh kÿ ã mré mü tÿ ag mÿ vin mü sir, ag tÿ vënh ken jé sir, ùn e ën ag mÿ.

²⁰ Kÿ vënh kar tóg ko kãn kÿ funfór mü sir. Hã ra tóg kén mü. Këj tÿ 12 (ke) fãn ag tóg mü, ti ke tÿ.

²¹ Pão ko mü ën ag tóg tÿ mil tÿ 5 (ke) nÿtÿ, ùn tÿtã mré tó tÿ, fag krë mré tó tÿ, hã ra fag tóg tá e nÿtÿ gé mÿr, ha më.

Jesus tÿ goj kri tÿg

(Mc 6.45-52; Jo 6.15-21)

²² Kÿ tóg ã mré mü tÿ ag mÿ tó mü, ag tÿ canoa kãmÿ mü jé, ag tÿ ti jo kafã ù ra mü jé. “Isÿ ver ùn e tag ag mÿ: ha müjëg, henh ke vë,” he tóg ag mÿ.

²³ Kÿ tóg ùn e ag mÿ: “ha müjëg,” he mü sir. Kÿ tóg pãnónh to tãpÿ mü, Topë mré vÿ jé. ã pir mÿ tóg tá nÿ nÿ. Kÿ tóg kutyg mü sir. Hã ra Jesus tóg pãnónh tá nÿ nÿ.

²⁴ Kÿ canoa tóg nig kãmÿ tÿ mü sir, kafã ù ra. Nig fyr tóg kór gy nÿ sir, kuvar gy ti nÿ ha. Kÿ goj tóg krém krém ke sa nÿ, kÿ tóg ag kutãn kÿ nÿ nÿ, goj ti. Kãka vÿ ag kato tē mü, hã kÿ ag tóg mü kónãn mü.

²⁵ Kÿ kurã ke ra Jesus tóg ag to kãtĩ mũ, goj kri tĩg kÿ, ã pẽn kã.

²⁶ Kÿ ti mré mũ tĩ ag tóg ti vég mũ, ti tÿ goj kri tĩg kÿ, kÿ ag fe tóg jürũn ke mũ. “Vẽnh kuprĩg vè,” he ag tóg mũ. Kamêg kÿ ag tóg vèkrênkrêr mũ sir.

²⁷ Hã ra Jesus tóg ag mré vémén mũ sir. “Kamêg tũg nĩ, inh hã vè,” he tóg. “Jürũn ke tũg nĩ,” he tóg.

²⁸ Kÿ Pedro tóg ti mÿ: “ã hã mÿ?” he mũ. “Kÿ inh mÿ tó, isÿ ã to tĩg jé, goj kri tĩg kÿ,” he tóg, Pedro ti, Jesus mÿ.

²⁹ Kÿ Jesus tóg ti mÿ: “kunĩg ge,” he mũ. Kÿ Pedro tóg canoa ki kutê kÿ goj kri tĩ mũ sir, Jesus to.

³⁰ Gøj kri tĩg kÿ tóg vãhã kãka ki êvãnh mũ, kÿ tóg kamêg mũ sir. Kamêg kÿ tóg goj ki pun ke mũ. Kÿ tóg prêr mũ. “Senhor, inh kren han nĩ,” he tóg mũ, prêr kÿ.

³¹ Kÿ Jesus tóg vêsÿmér ti kãgmĩg mũ. Kÿ tóg ti mÿ: “inh ki rã há han tũ ã tóg nĩ, vÿ,” he mũ. “Ã hã ne tóg: inh mÿ tá jun mũ vÿ? he mũ', hã kÿ ã tóg ki pun ke kren mũ,” he tóg, Jesus ti, Pedro mÿ.

³² Kÿ ag tóg canoa kãki ge mũ sir. Ag tÿ ki ge kÿ kãka tóg tũ' he mũ, kóho ên.

³³ Kÿ tóg ag mÿ há tĩ, canoa kãki nÿtĩ ag mÿ. Kÿ ag tóg Jesus ki ge há han kÿ ti mÿ vĩ há han mũ sir. “Topê kósin vÿ tÿ ã nĩ, mÿr,” he ag tóg mũ sir ti mÿ.

Jesus tÿ Genesaré tá jun (Mc 6.53-56)

³⁴ Kÿ ag tóg kafã ù tá junjun kÿ (ag tóg) vag ke mũ sir, êmã tÿ Genesaré tá.

³⁵ Tá ke ag tóg ãjag tÿ Jesus ve kÿ ti ki kanhrãn mũ. Kÿ ag tóg ti to vẽnh vĩ jẽnêg mũ sir, vẽnh kar mÿ, ga kar ên mĩ hã. Kÿ ag tóg ùn kagyga ag tatĩ kãmũ mũ, Jesus to.

³⁶ Kÿ ag tóg Jesus mÿ to vĩ mũ, ag tÿ hên ri ke mũn ti kur mráj mē jé. Kÿ ag tóg há' há' he kãn mũ sir, ag tÿ ti kur mên kÿ.

15

Judeu ag jÿkre si (Mc 7.1-13)

¹ Kÿ kejên Fariseu ù ag tóg Jerusalém tá junjun mũ, Jesus tá, Topê vĩ to professor ag mré hã. Jesus mÿ ag tóg vĩ mũ.

² “Ã mré mũ tĩ ag ne tóg êg jÿkre si mranh tĩ,” he ag tóg. “Êg jÿkre si ki êg tóg nĩgpég tĩ, êg jên ke jo, hã ra ag tóg nĩgpég tũ ra jêg tĩ,” he ag tóg.

³ Kÿ Jesus tóg ag mÿ: “ãjag hã vÿ Topê vĩ mranh tĩ, ãjag tÿ ãjag jÿkre si han kÿ,” he mũ.

⁴ “Topê tÿ êg mÿ tón hã vè, ha mē: “ã mÿnh fi mré ã panh kamêg nĩ, fag jagãgtãn nĩ,” he ja tóg nĩ. Kÿ tóg tag tó gé, ha mē: “ũ tÿ ã han mũ fag mÿ vĩ kónãn mũ ên tén jé ã tóg ke mũ,” he ja tóg nĩ gé, Topê ti.

⁵ Ti jãvo ãjag tóg tag tó tĩ, ha mē: “ã panh mÿ nén ù nĩm tũg nĩ, ã mÿnh fi mÿ nén ù nĩm tũg nĩ, ã tÿ fag mÿ: “sÿ ãjag mÿ nén ù nĩm ke vè vè, hã ra sóg Topê mÿ nĩm sór mũ,” hen kÿ. Û tÿ tag han kÿ tóg há tĩ,” he ãjag tóg tĩ.

⁶ Hã kÿ ãjag tóg Topê vĩ tÿ tũ' he tĩ, ãjag tÿ ãjag jÿkre si hã han kÿ,” he tóg, Jesus ti.

⁷ “Krĩ régre ãjag nÿtĩ, ha mē. Hã kÿ Isaías vÿ ãjag to vĩ ja nĩgtĩ, ti tÿ tag tó kÿ, ha mē.

⁸ “Povo tag vÿ ãjag nũnê hã tÿ inh mÿ vĩ há han tĩ, hã ra ag jÿkre pi(jé) tÿ inh jÿkre nÿ’,” he ja tóg nĩ.

9 “Fagrīnh mǝ ag tóg iso grīnh ke tī, hã ra ag tóg ãprã ke ag jykre to: Topê tǝ tón hã vê, he tǝ,” he ja tóg nǝgtǝ, Isaías ti,” he tóg, Jesus ti. “Ki hã tó ja tóg nǝ, ãjag to, ãjag krǝ régre nǝtǝn kǝ,” he tóg, Jesus ti.

Ne tǝ ãg kavénh

(Mc 7.14-23)

10 Kǝ tóg vênh kar jé prêr mǝ sir, ag tǝ ti rã hã nǝtǝ jé, ti vǝ jêmê há han jé. Kǝ tóg ag mǝ: “ha mê, sǝ nén tó mǝ ti, kǝ to jykrén nǝ gé,” he mǝ.

11 “Ëg jên pi(jé) ãg kavénh tǝ,” he tóg. “Ëg jênky kã ra ãg tóg rãg tǝ, vêjên ti. Nén ù tǝ ãg ki kãpa hã vǝ ãg kavénh tǝ, ha mê,” he tóg.

12 Kǝ ti mré mǝ tǝ ag ti to kãmũ kǝ ti mǝ: “ha mê,” he mǝ. “Fariseu ag vǝ ã to jũ nǝtǝ, ã tǝ ag mǝ: vêjên pi(jé) ãg kavénh tǝ, hen kǝ,” he ag tóg ti mǝ.

13 Kǝ tóg ag mǝ: “ãg jóg mág tǝ nén krãn ja tũ vãm kǝ nǝ kãn ke vê, ãg jóg tǝ kanhkã tá nǝ tǝ nén krãn ja tũ ên ti,” he mǝ. “Ag pi(jé) tǝ Topê krê nǝtǝ, Fariseu ên ag, hã kǝ tóg ag vãm ke mǝ,” he tóg.

14 “Hã kǝ ag to jykrén tũg nǝ. Ûn kyvó ag mǝ ag tóg: “sǝ ã jãmǝ tũg ke vê,” he tǝ, hã ra ag tóg ti kóm kyvó nǝtǝ gé, kǝ ùn kyvó tǝ ùn kyvó jãmǝ tũg kǝ ag tóg kãgnó ki vár ke mǝ, ha vemnǝ,” he tóg, Jesus ti. Ag tǝ nũgme ki vár to ken hã vê, hã vǝ: kãgnó ki vár ke mǝ, he mǝ.

15 Kǝ Pedro tóg ti mǝ: “ãg mǝ kãmén há han nǝ, ã vǝ tag,” he mǝ.

16 Kǝ Jesus tóg ti mǝ: “kǝ ãjag mǝ ver ki kanhrãn tũ nǝtǝ?” he mǝ.

17 “Mǝ ãjag tǝ to jykrén tũ tǝ?” he tóg. “Ha vê, ãg tǝ ãg jên tǝ ãg jênky kãra rãg kǝ tóg ãg nug kãra rã mǝ, kar ãg tóg gón mǝ sir.

18 Nén ù tǝ ãg ki kãpa vǝ tǝ ãg jykre nǝ, hã kǝ tóg ãg kavénh tǝ.

19 Nén ù tǝ ãg ki kãpa hã vê, ha mê: jykrén kónãn, ù tén, ã prũ tũ fi mré nǝ, ã mén tũ mré nǝ, ùn mén tũ fag to én, nén ù péju, ù to ón, ù to vǝ kónãn.

20 Nén ù tǝ ãg ki kãpa hã vê, ãg kavénh tǝn hã vê. Ëg tǝ nǝgpég tũ ra jên kǝ ti pi(jé) ãg kavénh tǝ,” he tóg, Jesus ti.

Canaã tá ke fi tǝ Jesus mré vêmén

(Mc 7.24-30)

21 Kǝ Jesus tóg tá kutê kǝ (tóg) ga ù ra tǝ mǝ, cidade tǝ Tiro ra, cidade tǝ Sidom ra.

22 Ti tǝ tá jun kǝ ù fi tóg ti venh kãtǝ mǝ. Ga tǝ Canaã tá ke fi vê. Kǝ fi tóg Jesus tá jun mǝ, kǝ fi tóg prêr mǝ. “!..Senhor, Davi kósin..!” he fi tóg. “!..Inh jagãgtãn ra..!” he fi tóg. “!..Inh kósin fi vǝ jagrê kórég tãvǝ nǝ, ã tǝ inh mǝ ti kutêm há tóg te..!” he fi tóg, prêr kǝ.

23 Hã ra Jesus tóg fi mǝ vǝ tũ nǝ. Kǝ ti mré mǝ tǝ ag tóg ti to kãmũ kǝ ti mǝ: “ã mǝ fi ve sór tũ nǝ, fi tǝ kar kǝ ã ãn ra tũg jé?” he mǝ. “Ëg nón fi tóg ãg jé prêr mǝ, kǝ tóg ãg mǝ e tǝ,” he ag tóg, Jesus mǝ.

24 Hã ra tóg ag mǝ: “vó,” he mǝ. “Topê vǝ inh jênê, sǝ Israel ag tǝ há’ he jé inhã, ù tǝ Israel kãmǝ Topê vǝ mranh mǝ ag tǝ,” he tóg, Jesus ti. Hã ra fi tóg tǝ fóg nǝ, hã kǝ tóg ti ve sór tũ nǝ.

25 Kǝ fi tóg ti tá jun mǝ sir. Ti krêm fi tóg grīnh ke mǝ. Kǝ fi tóg ti mǝ: “Senhor,” he mǝ. “ã mǝ inh jagãgtãn ke tũ?” he fi tóg.

26 Hã ra Jesus tóg fi mǝ: “há tũ tóg nǝ, ã tǝ nén to vǝ mǝ ti,” he mǝ. “Ëg krê jãmǝ vǝ tǝ ãg krê tũ nǝ, kǝ ãg tóg cachorro mǝ fón vãnh nǝgtǝ, ãg krê jãmǝ tǝ,” he tóg, Jesus ti.

²⁷ Kÿ fi tóg ti mÿ: “hÿ,” he mÿ. “Hã ra cachorro sÿ ag tóg ãmÿ mru ãn ko tÿ, mesa krãm,” he fi tóg, Jesus mÿ. “Hã kÿ inh kósin fi tÿ há’ hemnÿ, ãg tÿ tÿ cachorro ãn ri ke nÿtÿ kÿ,” he fi tóg, Jesus mÿ.

²⁸ Kÿ tóg ãn tÿtá ãn fi mÿ: “inh ki rã tâvÿ han ja ã tóg nÿ,” he mÿ. “Hã kÿ sóg ã mÿ han mÿ, ã tÿ inh mÿ nãn to vÿ mÿ tag,” he tóg fi mÿ. Ti tÿ tag tó kÿ fi kósin fi tóg há’ he mÿ, hora ãn kã.

Jesus tÿ ãn e ag tÿ há’ he

²⁹ Kÿ Jesus tóg cidade tá kãkutẽ kÿ (tóg) goj nig fyr jagma tÿ mÿ, nig tÿ Galiléia ãn fyr jagma. Kÿ tóg pãnónh to tâpÿ mÿ, kÿ tóg nÿ mÿ.

³⁰ Kÿ ãn tÿ hãn ri ke ag vÿ junjun mÿ, ãn kagyga ag ke gé, ãn kãnhgrÿ ag ke gé, ãn tÿg vãnh ag ke gé, ãn kaga ù ag ke gé. Ti ki ag tóg junjun mÿ, kÿ tóg ag tÿ hághá’ he kãn mÿ.

³¹ Kÿ tóg vãnh kar ãn mÿ e tÿ, ag tÿ tag ven kÿ. ãn vÿ vãnh ag tóg vÿ há nÿtÿ, ãn kónhgrÿ ag tóg mÿ há nÿtÿ, ãn kyvó ag tóg ãvãnh há nÿtÿ. Kÿ ag tóg Topẽ mÿ vÿ há han mÿ sir, Israel ag.

Jesus tÿ ãn e ù jãn mãn (Mc 8.1-10)

³² Kÿ Jesus tóg ã mré mÿ tÿ ag jé prãr mÿ. Kÿ tóg ag mÿ: “inh mÿ ag tóg jagãgtar nÿtÿ, ãn e tag ag,” he mÿ. “Kurã tágtÿ han ag tóg mÿ ãg mré. Hã ra ag tóg vãnã ve ja tÿ nÿgtÿ. Kÿ tóg sÿ ag jãg tÿ ra ag jãgnã jãvãnh tÿ, ag jamã ra. Ag mÿn kÿ ù ag hÿn kãgter ke mÿ, kókãnkÿr kÿ,” he tóg.

³³ Kÿ ti mré mÿ tÿ ag tóg ti mÿ: “ki ti ãmã tÿ nÿ, ki ti ga kórég nÿ,” he mÿ. “ãg hÿn hã tá vãnã venh mÿ, ãg tÿ ãn e tag ag jãn jé?” he ag tóg ti mÿ.

³⁴ Kÿ Jesus tóg ag mÿ: “ãmÿ tÿ hã ri ke nÿ ki nÿtÿ ge?” he mÿ. Kÿ ag tóg: “ù tÿ 7 (ke) vã, kãkufãr pipir ke gé,” he mÿ.

³⁵ Kÿ tóg ãn e ag mÿ tó, ag tÿ nÿgnÿ kÿ nÿtÿ jé, ga kri.

³⁶ Kÿ tóg ãmÿ tÿ 7 (ke) mãg mÿ, pirã mré, kÿ tóg to Topẽ mré vÿ mÿ. Kÿ tóg vãnh kãkãnh mÿ, ãmÿ tÿ. Kÿ tóg ã mré mÿ tÿ ag mÿ vin mÿ, ag tÿ vãnh kar mÿ kã vãnh ken jé. Kÿ ag tóg kã vãnh ken mÿ mÿ.

³⁷ Kÿ ag tóg ko kãn mÿ, funfór ag tóg mÿ, hã ra tóg kãn mÿ. Kre tÿ 7 (ke) ãn fãn tóg mÿ sir, ãmÿ kãn tÿ, Jesus mré mÿ tÿ ag tÿ gãnãh kÿ.

³⁸ ù tÿ ko mÿ ag vÿ ù tÿ 4 mil (ke) nÿtÿ, ag tâvÿ, ãn tÿtá mré tó tÿ, ag krã mré tó tÿ. Hã ra fag tóg tá e nÿtÿ gé.

³⁹ Kÿ Jesus tóg ag jãgnãg mÿ sir, ag jamã ra. Kÿ tóg canoa ki rã mÿ sir, ãmã tÿ Magadã tá ga ra tÿg jé, ã mré mÿ tÿ ag mré.

16

Ag tÿ Jesus mÿ milagre to vÿ (Mc 8.11-13; Lc 12.54-56)

¹ Kÿ Fariseu ù ag tóg Jesus tá junjun mÿ, Saduceu ag mré hã. Ag tÿ ón kÿ ti ki jãmã sór vã, ag tÿ kar ti kato vÿ jé. Kÿ ag tóg ti mÿ milagre to vÿ mÿ. Ag tÿ ti jÿkre to: “Topẽ jÿkre mÿ vÿ?” he sór vã.

² Hã ra Jesus tóg ag mÿ: “ta to jÿkrãn há ãjag nÿtÿ, ãmã to ke gé,” he mÿ. “Rãkãnh kÿ ãjag tóg kãnhkã ki ãvãnh tÿ. Rãren kÿ ãjag tóg: “ãmã ke vã,” he tÿ.

³ Kÿ kusã ki ãjag tóg kãnhkã ki ãvãnh tÿ gé. Kãnhkã pÿr kÿ ãjag tóg sir: “ta vÿ kutãnã mÿ, kãnhkã vÿ pÿr mÿ,” he tÿ. Tó há han ãjag tóg tÿ, rãre ve kÿ, kãnhkã

pūr ven k̄y ke gé. Hã ra ãjag tóg inh ki kagt̄g n̄yt̄i, ãjag t̄y s̄y nén han m̄ũ vэг m̄ũ ra. Hã k̄y ãjag tóg: “Topê jykre m̄y v̄y?” he t̄i.

⁴ Kórég ãjag n̄yt̄i, ãjag t̄y Topê ki ge jãvãnh n̄yt̄in k̄y. Ūri ke kar v̄y ãjag ri ke kórég n̄yt̄i. Milagre venh ke tũ ãjag tóg n̄i. Vãs̄y Topê v̄i tó t̄i ù tóg n̄gt̄i, hã v̄y: Jonas, he m̄ũ. Jonas t̄y nén ve ja ri ke hã ve jé ãjag tóg ke m̄ũ, ūri,” he tóg, Jesus ti. K̄y tóg ag ré k̄y t̄i m̄ũ sir.

Fermento to comparação ù
(Mc 8.14-21)

⁵ K̄y tóg ã mré m̄ũ t̄i ag mré t̄i m̄ũ, goj nig kafã ù ra. Ag t̄y kafã ù tá junjun k̄y ag tóg êm̄i to jykrén m̄ũ sir, Jesus mré m̄ũ t̄i ag. Kã jatun k̄y ag tóg n̄yt̄i ja n̄i, k̄y tóg tũ t̄i sir, êm̄i ti.

⁶ K̄y Jesus tóg ag kanhrãn m̄ũ. “Fariseu ag t̄y fermento há(r) kamêg n̄i, Saduceu ag t̄y fermento há(r) ke gé,” he tóg m̄ũ, Jesus ti.

⁷ K̄y ag tóg jagnê mré v̄i m̄ũ sir, Jesus v̄i tag to. “Ti t̄y êg t̄y pão mãg tũ ên tó h̄yn,” he ag tóg m̄ũ, jagnê m̄y.

⁸ Hã ra Jesus tóg ki kanhró n̄i, ag t̄y nén tó m̄ũn ki. K̄y tóg ag m̄y tó mãn m̄ũ. “Inh ki ge há han tũ ãjag tóg n̄i ver,” he tóg. “Hã k̄y ãjag tóg jagnê m̄y: pão tũ, he m̄ũ.

⁹ Ver tóg ãjag t̄y to jykrén tũ t̄i!. Pão t̄y 5 (ke) ên m̄i êkrén n̄i. Ū t̄y mil t̄y 5 (ke) ag tóg ko kãn, hã ra tóg kén, ag kar t̄y ko m̄ũ ra. Ti ke h̄yn k̄ej t̄y h̄e ri ke fãn?” he tóg. K̄y ag tóg ti m̄y tó m̄ũ sir.

¹⁰ K̄y tóg ag m̄y: “jo pão t̄y 7 (ke) ên ti. Ū t̄y mil t̄y 4 (ke) ag v̄y kó, hã ra tóg kén, ag kar t̄y ko m̄ũ ra. Ti ke h̄yn k̄ej t̄y h̄e ri ke fãn?” he tóg. K̄y ag tóg ti m̄y tó m̄ũ gé sir.

¹¹ K̄y tóg ag m̄y: “k̄y inh v̄i to jykrén n̄i,” he m̄ũ. “Pão tó tũ sóg n̄i. Fermento p̄e tó tũ sóg n̄i. To jykrén há han n̄i, ha m̄e. Fariseu ag t̄y fermento há(r) kamêg n̄i, Saduceu ag t̄y fermento há(r) kamêg n̄i gé, he sóg m̄ũ ãjag m̄y,” he tóg, Jesus ti.

¹² K̄y ag tóg to jykrén há han m̄ũ sir vãhã. Ti t̄y fermento p̄e tó pijé!. Ti t̄y Fariseu ag jykre tó ja v̄e, Saduceu ag jykre ke gé. Ag jykre hã to tóg: “ên kamêg n̄i,” he ja n̄i, Jesus ti.

Pedro t̄y Jesus kãmén
(Mc 8.27-30; Lc 9.18-21)

¹³ K̄y Jesus tóg cidade t̄y Cesaréia Filipe tá ga ra t̄i m̄ũ, ti mré m̄ũ t̄i ag mré. K̄y tóg ag m̄y: “t̄y sóg êprã ke fi kósin n̄i,” he m̄ũ. “K̄y ag iso h̄e ri ke t̄i?” he tóg m̄ũ, ag m̄y.

¹⁴ K̄y ag tóg ti m̄y. “ũ ag tóg ã to: João Batista v̄e, he t̄i,” he m̄ũ. “Jãvo ù ag tóg: Elias v̄e, he t̄i, ã to. Jãvo ù ag tóg: Jeremias v̄e, he t̄i gé, jãvo ù ag tóg: Topê v̄i tó t̄i ù v̄e, he t̄i gé, ã to,” he ag tóg, Jesus m̄y.

¹⁵ K̄y tóg ag m̄y: “ag jãvo ãjag h̄e ri ke t̄i, iso?” he m̄ũ.

¹⁶ K̄y Simão Pedro tóg ti m̄y: “t̄y ã Cristo n̄i,” he m̄ũ. “Topê kósin v̄y t̄y ã n̄i. Topê v̄y r̄ir n̄i, k̄y ã hã v̄y t̄y t̄i kósin n̄i,” he tóg, Pedro ti, Jesus m̄y.

¹⁷ K̄y Jesus tóg ti m̄y: “Simão!,” he m̄ũ, “João kósin!,” he tóg. “Êprã ke t̄y ã m̄y tó pijé!,” he tóg. “Inh jóg t̄y kanhkã tá n̄i ên t̄y ã m̄y tó v̄e, is̄y t̄y t̄i kósin n̄i ti. Hã k̄y tóg ã ve há han m̄ũ, Topê ti,” he tóg, Pedro m̄y.

¹⁸ “Ha m̄e, t̄y ã Pedro n̄i, hã v̄y: pó, he m̄ũ. Pãró tag kri sóg is̄u han m̄ũ, t̄y ïn ri ke ên, hã v̄y: ã t̄y ag m̄y inh v̄i tó tugr̄in ag tóg inh ki genh ke m̄ũ, he m̄ũ.

Kỹ ù tỹ inh ki ge kỹ nỹtĩ ag vỹ tỹ igreja ri ke nỹtĩ. Ag fár tỹ tũ' he mũ ra ag tóg rĩnrĩr mãn ke mũ. Tũ' henh ke tũ ag nĩ.

¹⁹ Ēprã ke ag vỹ kanhkã ra mũnh mũ, ã vĩ ki. Jãnkã ri ke ti nĩ, kanhkã ra ge jafã ti, kỹ sóg ã hã mỹ ti nón jafã ti fig mũ sir, ti chave ti. Kỹ ã tỹ ù mỹ: “kanhkã ra tĩg ke tũ ã tóg nĩ,” hen kỹ tóg ra tĩg ke tũ nĩ. Kỹ ã tỹ ù mỹ: “kanhkã ra ã tóg tĩg ke mũ,” hen kỹ tóg ra tĩg ke mũ,” he tóg, Jesus ti, Pedro mỹ.

²⁰ Kỹ tóg ã mré mũ tĩ ag mỹ tóg mũ, ag tỹ ti kãmén tũ nĩ jé ver. “Ker ù mỹ sỹ tỹ Cristo nĩ tó hẽ” he tóg mũ ag mỹ.

*Jesus tỹ ã ter ke tó vén
(Mc 8.31-9.1; Lc 9.22-27)*

²¹ Kỹ tóg ag mỹ ã jagtar ke kãmén nĩ nĩ. Ā mré mũ tĩ ag mỹ tóg komēr hã tóg mũ. “Kãnhmar sóg Jerusalém ra tĩg mũ ha,” he tóg mũ. “Tã sóg hã ra jagtar ke mũ. Kófa ag vỹ iso kórég nỹtĩnh mũ, ha vemnĩ, Topê tũ ki rĩr ti to pã'i ag, Topê vĩ to professor ag ke gé. Ag tỹ isén ke vê, kỹ sỹ kurã tãgtũ ki rĩr mãn ke vê,” he tóg, Jesus ti.

²² Kỹ Pedro tóg ti pin kỹ ti mré vĩ mũ, ti tỹ tag to jykrén tũ nĩ jé. “Senhor,” he tóg, “Topê jé ã jy nĩgãñ, ã tỹ ã jagtar ke tag vég tũ nĩ jé,” he tóg, Pedro ti, Jesus mỹ.

²³ Hã ra Jesus tóg vêsỹjãm êvãnh kỹ ti mỹ vĩ tar han mũ sir, ti to jũ kỹ. “Kutĩg, Satanás,” he tóg, Pedro mỹ. “Isỹ Topê vĩ mranh han sór ã tóg mũ,” he tóg. “Ā pi(jé) Topê jykre tó mũ'. Ēprã ke jykre vê, ã tỹ inh mỹ nén tó mũ tag ti,” he tóg, Jesus ti, Pedro mỹ.

²⁴ Kỹ tóg ã mré mũ tĩ ag mỹ vĩ mãn mũ. “Ājag tỹ inh mré kãmũ kỹ tóg há tĩnh mũ,” he tóg. “Kỹ ãjag jykre tovãnh nĩ, ãjag tỹ isũ tãvĩ hã han jé. Ha vé, ag tỹ inh cruz tỹ inh kri fi kỹ sóg tĩg ke mũ, ag tỹ to isa kỹ isén jé, ha vemnĩ. Vẽnh nenh ke tũ sóg nĩ. Isỹ tag han ri ke han nĩ, ãjag tỹ inh mré mũ sór nỹtĩnh kỹ,” he tóg.

²⁵ “Ājag tỹ ãjag jykre hã han kỹ ãjag tỹ nũgme ki vár ke vê. Jãvo ãjag tỹ isugrĩn ãjag jykre tovãnh kỹ ãjag krenkren ke vê, ãjag kãgter ke mũ (hã) ra.

²⁶ Hẽn ri ke mũn ãjag hỹñ mundo ki nén ù kar ganhar henh ke mũ, hã ra ãjag kuprĩg vỹ vãfor ke mũ. Kỹ tóg kórég nỹ. Ēg tỹ ne tỹ ěg kuprĩg kajãm ke tóg tũ tĩ, ěg tỹ ti ve mãn jé,” he tóg.

²⁷ “Tỹ sóg ěprã ke fi kósin nĩ. Kãtĩg mãn jé sóg ke mũ, kanhkã tá, isỹ jěgně jafã ag mré, inh jóg tỹ isỹ ùn mág han ti kỹ. Kỹ sóg vẽnũ kar mỹ ãjag tỹ nén han ja kaja ên ven ke mũ.

²⁸ Ha vé, ki hã sóg tóg mũ. Ājag kãmĩ ù ag tóg Topê tỹ tỹ ěg pã'i nĩ venh ke mũ, ãjag ter ke to hã, tag ki ěg mré nỹtĩ ù ag. Ēprã ke fi kósin ên ve jé ag tóg ke mũ, ti tỹ tỹ pã'i nĩ ti. Inh hã vê,” he tóg, Jesus ti.

17

*Jesus tỹ Moisés mré Elias mré vēmén
(Mc 9.2-13; Lc 9.28-36)*

¹ Kar kurã tỹ 6 (ke) tũg kỹ Jesus tóg ag mỹ: “mũ nỹ, vyr mỹ,” he mũ. Pedro mỹ tóg ke mũ. Tiago mỹ ke gé, ti jãvy tỹ João mỹ ke gé. Ag hã mré tóg tĩ mũ, pãnóñh ra.

² Kỹ tóg ag jo vẽnũ ve ù han mũ sir, kỹ ti kakã tóg kókov nĩ. Rã ri ke tóg nĩ, ti kakã ti. Ti kur vỹ kópréj nĩ gé, jěngrẽ ri ke.

³ Kỹ vãhã Moisés tóg ag mỹ vẽnũ ven mũ sir, Elias ti ke gé. Jesus mré ag tóg vēmén mũ.

4 Kŷ Pedro tóg Jesus mŷ: “Senhor,” he mŷ. “Tag ki tóg sér tí,” he tóg. “Ēg mŷ pājō tāgtŷ han mŷ, ā mŷ, Moisés mŷ, Elias mŷ ke gé?” he tóg, Pedro ti, Jesus mŷ.

5 Pedro tŷ ver vēmén mŷ ra kanhkā góg kókov tóg ag kri rŷm ke mŷ. Kŷ vėnh vŷ tóg mē há’ he mŷ, kanhkā góg kátá, kŷ tóg: “inh kósin pir hā vē,” he mŷ. “Ti vŷ jēmē ra,” he tóg, Topē ti.

6 Kŷ Jesus mré mŷ tŷ ag tóg mēg mŷ, kŷ tóg ag mŷ e tí. Ag mŷ e tŷn kŷ ag tóg mŷg ke mŷ sir.

7 Kŷ Jesus tóg ag to kátŷg kŷ ag mēg mŷ sir, ā nŷgé tŷ, kŷ tóg ag mŷ: “nŷgnŷ ra,” he mŷ. “Mŷmēg tŷg nŷ,” he tóg mŷ.

8 Kŷ ag tóg mŷ ěvānh mŷ, hā ra ag tóg Jesus hā vég mŷ. Ti mré vēmén mŷ ag ve mǎn tŷ ag tóg nŷ, kanhkā tá kāmŷ ěn ag.

9 Kŷ ag tóg pǎnónh tá kǎre mŷ sir. Ag mŷn kŷ Jesus tóg ag mŷ: “ker ŷ mŷ tó hē,” he mŷ. “Ājag tŷ ŷri nén vég mŷ tag tó tŷg nŷ ver,” he tóg. “Sŷ iser ja tá vŷn ke kar hā kāmén nŷ,” he tóg, Jesus ti.

10 Kŷ ti mré mŷ tŷ ag tóg ti mŷ: “hā ra Topē vŷ to professor ag tóg Elias tó tí,” he mŷ. “Kátŷg jé tóg ke mŷ nēji, Cristo kátŷg ke to hā, Elias ti. Hā mŷ?” he ag tóg mŷ, Jesus mŷ.

11 Kŷ tóg ag mŷ: “hŷ,” he mŷ. “Kátŷg jé tóg ke mŷ mŷr, nén kar han mǎn jé, Elias ti.

12 Ha mē, kátŷg ti huri. Hā ra ag tóg ti ki kagŷg ja nŷtŷgtŷ. Hā kŷ ag tóg ti vóg kónǎn ja nŷgtŷ, ag tŷ ti vóg kónǎn sór kŷ. Hā kŷ ěprǎ ke fi kósin ěn tóg, inh hā tóg ag tŷgrŷn jagtar ke mŷ gé, ag tŷ inh vóg kónǎn ken kŷ,” he tóg, Jesus ti.

13 Kŷ ag tóg vǎhā ti tŷ nén tó mŷ to jŷkrén mŷ, ti mré mŷ tŷ ag. “João Batista to ke ja vē, ěg kygpég tŷ ěn to ke ja vē, hā vŷ: Elias, he mŷ, ti tŷ Elias ěn ri ke ja nŷn kŷ,” he ag tóg mŷ sir, Jesus mré mŷ tŷ ag.

Jesus tŷ kyrŷ tŷ há’ he

(Mc 9.14-29; Lc 9.37-43a)

14 Kŷ ag tóg vėnh e ěn tá junjun mŷ sir. Kŷ ŷ tóg Jesus to kátŷ mŷ, ag kāmŷ ŷ. Ti krēm tóg grŷnh ke mŷ, ā jakrŷ tŷ, kŷ tóg ti mŷ:

15 “Senhor,” he mŷ. “Inh kósin jagǎgtǎn nŷ,” he tóg. “Ter tí tóg nŷgtŷ, to tóg jagtar tǎvŷn tí. Kejėn tóg pŷ ki kutė tí, ter tí ěn han kŷ, kejėn tóg goj ki kutė tí,” he tóg.

16 “Kŷ sóg ā mré mŷ tŷ ag mŷ ti ven ja nŷgtŷ, ag tŷ ti tŷ há’ he jé, hā ra ag tóg ti tŷ hē ri ke tŷ nŷ,” he tóg, Jesus mŷ.

17 Kŷ Jesus tóg ti mŷ: “ājag ne tóg inh ki rǎ há han tŷ nŷgtŷ,” he mŷ. “Jŷkre pǎno ājag tóg nŷtŷ,” he tóg. “Kŷsǎ tŷ hėn ri ke ki inh hŷn ājag mré tŷnh ke mŷ? Kŷsǎ tŷ hėn ri ke ki inh hŷn ājag to fe tŷnh mŷ?” he tóg. “Inh mŷ ti pėre kátŷg,” he tóg, Jesus ti, ti panh mŷ.

18 Ag tŷ ti mré kāmŷ kŷ Jesus tóg ti jagrė mŷ vŷ jŷ han mŷ sir, ti tŷ ti tovǎnh jé. Kŷ tóg vėšmėr ti ki kǎkutė mŷ sir, kŷ tóg há’ he mŷ vǎhā, kyrŷ ti.

19 Kŷ Jesus mré mŷ tŷ ag tóg ti ki jēmē sór mŷ. Vŷr mŷ ag tóg Jesus mŷ: “ěg ne tóg ti tŷ há’ he ja tŷ nŷ,” he mŷ. “Hē ri ken kŷ hŷn?” he ag tóg mŷ, Jesus mŷ.

20 Kŷ tóg ag mŷ: “ājag tŷ inh ki ge tŷ nŷtŷ tŷgnŷn ke vē, ājag tŷ inh vŷ kri fig tŷ tŷgrŷn ke vē,” he mŷ. “Ha mē, ājag tŷ inh ki ge sŷ han kŷ nŷtŷ ra ājag tóg pǎnónh tag mŷ: “ha tag ra tŷg,” he há nŷtŷnh mŷ vē. Ājag tŷ pǎnónh mré vŷ kŷ tóg tŷg ke mŷ vē, ha mē, ājag tŷ inh ki ge sŷ nŷtŷ ra. Ka tŷ mostarda fy vŷ sŷ tǎvŷ nŷ. Ājag tŷ inh ki ge sŷ nŷtŷ ra, ka tŷ mostarda fy sŷ ěn ri ke nŷtŷ ra tóg há tŷnh mŷ vē. Kŷ

ājag tóg pānónh tīn há nýtīnh mū vē. Nén kar han há ājag nýtīnh mū vē, ājag tỳ inh ki ge kýt nýtī ra.

²¹ Hā ra vēnh jagrē kórég tỳ ge kutēm tóg jagy nī. Topē mré ēg tóg vīnh ke mū, kýt ēg tóg ti mré vī kýt vākrenh ke mū gé, nén ũ ko tū jé ēg tóg ke mū, kýt tóg vāhā kutēnh mū, vēnh jagrē kórég tỳ ge ti,” he tóg, Jesus ti.

Jesus tỳ ā ter ke tó mǎn
(Mc 9.30-32; Lc 9.43b-45)

²² Tag kar kýt ag tóg ga tỳ Galilēia tá nýtī. Kýt Jesus tóg ag mý: “ēprā ke fi kósin výt jagtar nīnh mū. Inh hā vē,” he mǎn mū. “Ēprā ke ag výt ājag tỳ isýt nén han sór mū ēn han ke mū.

²³ Ag tỳ isén ke vē. Ag tỳ isén kar kýt sóg hā ra rīr mǎn mū, kurā tāgtū tūg kýt,” he tóg, Jesus ti. Ag tỳ ti vīt tag mē kýt tóg ag mý e tāvī tī sir. Fe kaj ag tóg mū sir, ti mré mū tī ag.

Jesus tỳ imposto kajām

²⁴ Kýt ag tóg mū mǎn kýt (ag tóg) cidade tỳ Cafarnaum tá junjun mū sir. Kýt imposto kaja mǎg tī ag tóg Pedro mý vī mū, Topē jo ĩn jé imposto mǎg tī ag. Imposto ēn kaja hā výt: jānkamy régre, he mū. Pedro mý ag tóg: “ājag Senhor mý kajām tū nīgtī?” he mū.

²⁵ Kýt tóg ag mý: “vó, kajām ti tī,” he mū. Kýt tóg ā ĩn tá jun mū sir, Pedro ti. Kýt Jesus tóg ti mý vī mū, imposto to, hā ra Pedro tóg ti mý nén ũ to ja tū nī ver. Kýt Jesus tóg ti mý: “Simão!,” he mū. “Pā'i ag mý ā mý: “ha imposto kajām,” he ja tū nī?” he tóg, Jesus ti. “Tag to jykrén, ha mē. Ag mý ājag krē mý: “kajām nī,” hēnh ke mū, ājag mré ke tū ag mý, vó?” he tóg, Jesus ti, Pedro mý.

²⁶ Kýt Pedro tóg ti mý: “ājag mré ke tū ag mý ag tóg: “kajām nī,” he tī,” he mū. Kýt Jesus tóg ti mý: “hýt, hā vē,” he mū. “Kýt ag krē hýt kajām ke tū nī vē.

²⁷ Hā ra ag tóg ēg to jykrén kónān sór mū, ēg tỳ kajām tū to, ēg tỳ tỳ Topē mré ke nýtī ra. Ag tỳ ēg to jykrén kónān sór kýt ēg hýt tóg kajām ke mū, Topē jo ĩn jé imposto ēn, ēg tỳ tỳ Topē krē nýtī ra, Israel krē ke gé. Hā kýt pirā sygsam tīg, nig ēn tá. Sygsam kýt jé kýt ā tóg pirā kāgmīnh mū. Ā tỳ ũn kāgmī vén mū ēn jēnky tugným nī. Jānkamy výt kākā nī, ti jēnky kākā, ā tỳ ēg jo kajām jé, ā jo, ijo ke gé,” he tóg, Jesus ti. Kýt Pedro tóg tī mū sir. Jānkamy vég tóg mū sir. Kýt tóg tỳ imposto kajām tī mū, Pedro ti.

18

Ū tỳ ēg kāfór nī
(Mc 9.33-37; Lc 9.46-48)

¹ Kejēn Jesus mré mū tī ag tóg ti mý vī mū, kýt ag tóg: “kejēn ēg tóg Topē tỳ tỳ ēg pā'i nī venh ke mū,” he mū. “Ēg tỳ ti ve kýt ũ tỳ hē nýt hýt ēg kāfór kar nī?” he ag tóg, Jesus mý.

² Kýt Jesus tóg gír ũ jé prēr mū, kýt tóg ag kaju kǎ ti fēg mū, gír ti.

³ Kýt tóg ag mý tag to mū, ha mē. “Gír ri ke han nī, ājag tỳ Topē tỳ tỳ ēg pā'i nī ve sór kýt, ke tū nī (mū) ra ājag tóg venh ke tū nī. Hā kýt ājag jykre tovānh nī, gír jykre han jé,” he tóg.

⁴ “Gír pi(jé) ũn sanh kāfór sór nī! Kýt ti ri ke han nī. Jagnē kāfór nī sór tūg nī. “Ūn sī výt tỳ inh nī, gír ri ke výt tỳ inh nī,” hemnī, ājag tỳ kar kýt tỳ ũn mág kāfór kar nýtī jé, Topē tỳ tỳ ēg pā'i nīn kýt,” he tóg.

⁵ “Ājag hā vỹ tỹ inh mré ke nỹtĩ. Ājag tỹ inh mré ke nỹtĩn tugñĩn gĩr tỹ ge jě'ỹn nĩ, to há nỹtĩmñĩ, isugrĩn. Ājag tỹ isugrĩn ũ tỹ ge to há nỹtĩn kỹ ājag tóg iso há nỹtĩ gé,” he tóg, Jesus ti.

Inferno ki kutě mũ vỹ jagy pě nĩ
(Mc 9.42-48; Lc 17.1-2)

⁶ “Ũn sĩ tag tóg inh ki rā kỹ jě. Kejěn ũ tóg ũn sĩ tỹ inh vĩ mranh han sór mũ. Ĕn jykre vỹ kórég távĩ nĩ. Ĕn hā mỹ tóg há nỹnh mũ vē, ũ tỹ pó mág tỹ ti nunh to sa kỹ goj nig ki ti fón jé, ti tỹ goj ki ter jé. Jagy távĩ tóg tí, ũ tỹ gĩr tỹ isovānh han kỹ,” he tóg, Jesus ti.

⁷ “Topě vỹ ag ve kónān pě han ke mũ, ag tỹ ũ tỹ iso há nỹtĩ ag krĩn kónān kỹ. Ag tỹ ag krĩn kónān kỹ tóg ag tỹ inh vĩ mranh ha mẽ tí. Ũ tỹ hěn ri ke ag tóg ag krĩn kónān tí. Hā ra ag tóg to jagāgtar távĩ han ke mũ gé. Topě vỹ ag ve kónān pě han ke mũ, ag tỹ ũ krĩn kónān kỹ,” he tóg, Jesus ti.

⁸ “Ā tỹ nén ũ vóg kỹ Topě vĩ mranh kỹ ā nĩgnó kym nĩ, ā tỹ ke mǎn tũg jé. Ā tỹ hē kǎ tá tũg kỹ Topě vĩ mranh kỹ ā pěn kym nĩ, ā tỹ ke mǎn tũg jé. Jagy ti nỹ, ā nĩgnó pir ti, ā tũg vānh ti ke gé. Ā tỹ nĩgnó régre ra nũgme ki kutě kỹ tóg jagy kǎfór nĩ, ā tỹ pěn régre ra inferno ki kutěn kỹ, pĩ nhyr vānh ěn ki kutěn kỹ mỹr. Ā tỹ rĩr krỹg ja tũ venh ke tóg hā ra há tí,” he tóg.

⁹ “Ā tỹ nén ũ ki vē'ĩ kỹ Topě vĩ mranh kỹ ā kaně ũ nám nĩ, ā tỹ ke mǎn tũg jé. Jagy ti nỹ, ā kyvó ti. Ā tỹ kaně régre ra nũgme ki kutě kỹ tóg jagy kǎfór nĩ, ā tỹ inferno ki kutěn kỹ, ā tỹ pĩ nhyr vānh ěn ki kutěn kỹ. Ā tỹ rĩr krỹg ja tũ ěn ve kỹ tóg hā ra há tí,” he tóg, Jesus ti.

Carneiro vāfor to comparaçāo
(Lc 15.3-7)

¹⁰ “Hā kỹ gĩr to é he tũg nĩ. Ũ tỹ ag ki rĩr mũ ag vỹ kanhkā tá nỹtĩ, mỹr, ha mẽ. Topě tỹ jěñě jafā ũ ag vē, ũ tỹ gĩr ag ki rĩr mũ ag. Inh jóg mré ag tóg nỹtĩ, ti vég ag tóg nỹtĩ, ũ tỹ gĩr ag ki rĩr mũ ag. Hā kỹ gĩr ag to é he tũg nĩ.

¹¹ Tỹ sóg ěprā ke fi kósin nĩ. Ũn vāgfor mũ ěn ag krenkren han hā jé sóg jun ja nĩ, mỹr, ha mẽ,” he tóg, Jesus ti.

¹² “Tag to jykrén nĩ. Ũ tóg carneiro tỹ 100 (ke) tỹ mễg nĩ. Kejěn ti mễg pir tóg vāfor ja nĩ. Kỹ tóg ũn pir ěn kaněnh tí mũ sir, ti jāvānh tí tóg mũ sir. Ti mễg e ěn tóg pānónh tá nỹtĩ. Ag ré kỹ tóg tí mũ sir, ũn vāfor mũ ěn jāvānh jé, ũn pir ěn ti.

¹³ Kỹ tóg ti vég mũ sir. Kỹ tóg ti mỹ sér pě tí sir, ha mẽ. Ti mễg e ěn tóg ti mỹ há nỹtĩ, ũ tỹ 99 (ke) ěn. Hā ra ti tỹ ũn pir ěn ve mǎn kỹ tóg ti mỹ há távĩ nĩ sir, ũn e ěn tỹ ti mỹ há nỹtĩ kǎfór. Kỹ ti fe tóg mrin ke mũ.

¹⁴ Hā kỹ tóg Topě mỹ kórég nĩ, ũn sĩ pir vāfor kỹ, ti kren tũ nĩn kỹ, gĩr sĩ pir mỹr. Topě pi(jé) tag to há nĩ', inh jóg tỹ kanhkā tá nĩ ti,” he tóg, Jesus ti.

Ĕg mré ke ũ tỹ Topě vĩ mranh

¹⁵ “Kejěn ā régre vỹ Topě vĩ mranh mũ. Kỹ ti venh tũg nĩ, ā tỹ ti mré vēmén jé, to. Vyrmỹ ti mré vēmén vén nĩ. Hěn ri ke mũn tóg ā vỹ jēměnh mũ, kỹ ā tóg ti kren han mũ sir, ā régre ti.

¹⁶ Ti tỹ ā vỹ jēmě sór tũ nĩn kỹ ũ mỹ: inh mré ti jyvěn tũg, hemnĩ, ũn pir mỹ, ke tũ nĩ kỹ ũn régre ag mỹ. Kỹ ti mré vēmén mǎn nĩ, ag rĩnve, ag tỹ ā tỹ ti mré vĩ mẽ jé.

¹⁷ Ti tỹ ājag vĩ mẽ sór tũ nĩn kỹ věnh kar mỹ tómnĩ sir, inh mré ke kar ag mỹ. Ti tỹ věnh kar vĩ mẽ sór tũ nĩn kỹ ti mré vĩ mǎn tũg nĩ sir. “Topě vĩ ki kagtĩg ti

nĩ, fóg kórég ag ri ke ti nĩ,” hemnĩ ti to. “Topê vĩ mranh sór ti mũ, governo mĩ jänkamy mäg tĩ ag ri ke,” hemnĩ ti to.

18 Ki hã sóg tó mũ, hã kũ sóg ãjag mĩ ke mũ, ha mẽ. ãjag tũ tag ki ũ mĩ: “kankhã venh ke tũ ã tóg nĩ,” hen kũ tóg venh ke tũ nĩ. ãjag tũ ũ mĩ: “kankhã ve jẽ ã tóg ke mũ,” hen kũ tóg venh ke mũ,” he tóg, Jesus ti.

19 “Ha mẽ, sũ ãjag mĩ nén tónh ke mũ ti. Kejẽn ãjag kãmĩ ũn régre ag tóg nén ũ to jykrén, ag tũ Topê mĩ nén to vĩ jẽ. Kũ ag tóg ti mĩ nén to vĩ mũ sir. Tũ ag êprã ke nĩtĩ, hã ra ag tóg Topê mĩ nén ũ to vĩ mũ. Kũ inh jóg tũ kankhã tá nĩ tóg ag mĩ han ke mũ, ag tũ nén to vĩ mũ ên ti,” he tóg.

20 “Kejẽn ãjag kãmĩ ũn régre ag vỹ iso vēmén tĩ, kejẽn ũn tãgtũ ag. Inh jiji tó jẽ ag tóg vènhmãn kũ nĩtĩ. Kũ sóg ag mré nĩ nĩ sir, ag tũ inh vég tũ ra. Hã kũ Topê tóg ag mĩ han ke mũ, ag tũ ti mĩ nén to vĩ mũ ti,” he tóg, Jesus ti.

Ũ camarada kórég to comparação

21 Kũ Pedro tóg ti to kãtĩg kũ ti mĩ: “Senhor,” he mũ. “Kejẽn inh régre tóg vènh jykre pãno han ja nĩ. Kũ inh mĩ ti mĩ vènh pãte fón e han mũ? Vènh pãte fón tũ hẽ ri ke nũ hỹn há nĩnh mũ? Ke tũ 7 (ke) mĩ há nĩ?” he tóg, Pedro ti, Jesus mĩ.

22 Kũ Jesus tóg ti mĩ: “vó,” he mũ. “Vènh pãte fón tũ 7 (ke) vỹ pir nĩ,” he tóg. “Vènh pãte fón tũ 70 tũ 7 (ke) vỹ pãgsĩ nĩ,” he tóg.

23 “Ha vé, ũ tũ kankhã tá nĩ ên tũ tũ ãg pã'i nĩ to comparación ũ vẽ, sũ tónh ke tag, ha mẽ. Pã'i mág ri ke ti nĩ. Camarada e ti nĩ, pã'i mág ên ti. Kũ tóg kejẽn ag tũ ve sór mũ, ag tũ ti mĩ név(e) ti.

24 Kũ tóg vég mũ. Hã ra ti camarada ũ tóg ti mĩ név(e) mág jẽ, hã vỹ: 10 mil (ke), he mũ.

25 Hã ra ti tũ ne tũ kajãm ke tóg tũ tũ, kũ ti patrão vỹ ti fón sór mũ, jänkamy to, ti prũ fi ke gé, ti krẽ ke gé, ti tũ kar mĩr, ti tũ ã kaja to ã név(e) kajãm jẽ.

26 Hã ra tóg ti mĩ jagy ti, kũ tóg ti krẽm grĩnh ke kũ ã jakrĩ tũ jẽ mũ. Ti krẽm grĩnh ke kũ tóg ti mĩ: “Senhor,” he mũ. “Ver isovãnh sĩ han, kajãm jẽ sóg (ke) mũ vãhã,” he tóg.

27 Kũ ti patrão tóg ti jagãgtãn mũ sir, ã camarada ti, kũ tóg ti tovãnh mũ. Ti mĩ tóg ti név(e) tũ tũ! he mũ. “Ha tũg, jatun mĩ,” he tóg mũ sir.

28 Kũ ti camarada ên tóg tũ mũ sir. Kũ tóg ã mré camarada ũ vég mũ sir. Ti ki tóg név(e) sũ jẽ, cruzeiro pir mĩr. Kũ tóg ti mäg mũ sir. Ti nunh kã tóg ti kãgũg mũ, kũ tóg ti mĩ: “inh mĩ kajãm, ã név(e) ti,” he mũ, ũn név(e) mág ja ên ti, ũ tũ ã mĩ név(e) sũ ên mĩ.

29 Kũ tóg ti krẽm grĩnh ke kũ ã jakrĩ tũ jẽ mũ. Kũ tóg ti mĩ: “ver isovãnh, vãhã sóg kajãm kãn ke mũ ha,” he mũ.

30 Hã ra tóg mẽ jãvãnh nĩ. Kũ tóg vese jafã kãtã ti fón mũ sir, ti tũ ti mĩ kajãm jẽ, ti név(e) ti.

31 Hã ra ti mré camarada ũ ag vỹ vég mũ, kũ tóg ag mĩ e tĩ. Kũ ag tóg ãjag patrão mĩ tó kãn mũ sir, ti tũ nèn han mũ ti.

32 Kũ ti patrão tóg ti jẽ prẽr mũ sir. Kũ tóg ti to jũ mũ. “Jykre kórég pẽ han ã,” he tóg. “Ã név(e) mág tũ sóg tũ! he vẽ, ã tũ inh mĩ to vĩn kũ.

33 Kũ ã tũ ã mré camarada ên jagãgtãn ke vẽ vẽ, isỹ ã jagãgtãn ri ke,” he tóg.

34 Kũ tóg ti to jũ mág han mũ sir, ti patrão ti. Kũ tóg ti ség mũ. Ag mĩ tóg: “ha ti vóg kónãn,” he mũ gé, ti tũ ã patrão mĩ kajãm kãn jẽ, ti név(e) mág ên ti,” he tóg, Jesus ti.

35 “Hã han jé tóg ke mũ, inh jóg tỹ kanhkã tá nĩ ti, ãjag tỹ ãjag régre ag mỹ vãnh pãte fón pẽ han sór tũ nĩn kỹ, ag tỹ kygnẽ ja ti,” he tóg, Jesus ti.

19

Ĕg tỹ ĕg prũ fón ke tũ
(Mc 10.1-12)

1 Kỹ Jesus tóg tó kãn ja nĩ, ti tỹ ag mỹ nén tó sór mũ ti. Kỹ tóg Galiléia tá kãkutẽ kỹ goj tỹ Jordão mãra tĩ mũ sir. Israel ag jamã ù vễ gé.

2 Kỹ ùn e ag tóg ti nón mũ mũ. Kỹ tóg tá ag kygtãg kãn mũ sir.

3 Kỹ Fariseu ag tóg ti tá junjun mũ gé sir. Ag tỹ ón kỹ ti vễme mẽ sór vễ, vãnh prũ ke fón to. Kỹ ag tóg ti mỹ: “mỹ ĕg tỹ nén ù ù to ĕg prũ fag fón jé há nĩ?” he mũ.

4-5 Kỹ tóg ag mỹ kãmén mũ. “Topẽ vĩ rá ki vemnĩ,” he tóg. “Tá tóg rãn kỹ nĩ, Topẽ tỹ nén han mũ ti. Ti tỹ nén kar han ve ki tóg ti mré fi han. Hã kỹ tóg tag tó mũ, ha mẽ. “Hã kỹ ùn gré tóg ã prũ fi to ã panh ré kỹ tĩnh mũ, ã mỹnh fi ré kỹ ke gé. Á prũ fi mré tóg tĩnh mũ. Fi mré tóg tỹ ùn pir nĩ sir, ã prũ fi mré,” he tóg, Topẽ ti.

6 Hã kỹ fag tóg tỹ ùn pir nỹtĩ. Fag pi(jé) tỹ ùn régre nỹtĩ. Hã kỹ fag tỹ vãnh kãpãm tũg nĩ. Topẽ tỹ fag tỹ ùn pir han vễ mỹr,” he tóg, Jesus ti.

7 Kỹ ag tóg ti mỹ ke mãn mũ. “Hã ra Moisés tóg ĕg mỹ: “fi mỹ vãnh rá nĩn kar kỹ fi fón nĩ,” he ja nĩ. Ti tỹ ne jé ĕg mỹ tag tó ja nẽ?” he ag tóg mũ, Jesus mỹ.

8 Kỹ tóg ag mỹ: “hỹ,” he mũ. “Tag tó ja ti nĩ, ãjag mỹ, ãjag tỹ vãnh kanhrãn sór tũ nỹtĩn kỹ, hã kỹ tóg ãjag mỹ: ha fi fón ge, he ja nĩ. Hã ra Topẽ tóg tag han ja tũ nĩ, ti tỹ nén kar han ve ki.

9 Hã kỹ sóg ãjag mỹ ke mũ. ãjag tỹ ãjag prũ fi fón kỹ ù fi tỹ prũg mãn kỹ ãjag prũ tũ fi vễ sir, ha mẽ. ãjag tỹ fi tỹ ù mré nỹ tugrĩn fi fón kỹ tag hã ne pãgsĩ nỹ,” he tóg, Jesus ti.

10 Kỹ ti mré mũ tĩ ag mỹ tóg e tĩ, ti vĩ tag, hã kỹ ag tóg ti mỹ: “ge nĩn kỹ tóg tỹ ù nỹ, ĕg prũg kỹ,” he mũ. “Ĕg tỹ ĕg prũ fi fón sór mũ ra fi fón tũ nĩn kỹ tóg vẽnhmỹ nỹ, kỹ ĕg hỹn prũg sór tũ nĩ,” he ag tóg.

11 Kỹ tóg ag mỹ: “ũn pipir ag tóg tag han ke mũ,” he mũ. “Topẽ tóg ù ag mỹ: ha prũg tũg, henh ke mũ, ĕn ag hã vỹ prũg ke tũ nĩ,” he tóg.

12 “Ũ ag tóg kurĩ nỹtĩ, ag mur mũ kã. Kỹ ù ag tóg kurĩ nỹtĩ gé, ag tỹ ag grãfy kym kỹ. Kỹ ù ag tóg kurĩ ri ke nỹtĩ gé, ag tỹ Topẽ to jykrén kỹ, ag tỹ ù tỹ kanhkã tá nĩ ĕn tugrĩn prũg sór tũ nỹtĩn kỹ. Ũ tỹ to jykrén mũ ĕn jé to jykrén,” he tóg, Jesus ti.

Jesus tỹ gĩr ag to há nĩ
(Mc 10.13-16; Lc 18.15-17)

13 Kỹ fag tóg gĩr tatĩ kãmũ mũ, ti tỹ ã nĩgé tỹ ag mẽ jé, ti tỹ ag to Topẽ mré vĩ jé. Hã ra Jesus mré mũ tĩ ag tóg fag to jũ mũ, ù tỹ ag tatĩ kãmũ mũ fag to.

14 Hã ra Jesus tóg ag mỹ: “vĩ tũg nĩ, gĩr ag mỹ,” he mũ, “gĩr ag tỹ iso kãmũ kamẽ tũg nĩ,” he tóg. “Ũ tỹ ge hã vỹ ù tỹ kanhkã tá nĩ ĕn tỹ tỹ pãĩ nĩ ĕn krêm nỹtĩ nĩ,” he tóg.

15 Kỹ tóg ag mẽgmẽ kãn mũ sir, ã nĩgé tỹ. Ag mẽgmẽ kãn kỹ tóg tá kãkutẽ mũ sir.

Kyrũ rico kãme
(Mc 10.17-31; Lc 18.18-30)

16 Kÿ vāhā ũ tóg ti tá jun mū sir. Kÿ tóg ti mÿ: “Senhor,” he mū. “Há ã tóg jê,” he tóg. “Sÿ inh rÿr krÿg ja tū venh há tóg tí. Ti ve jé inh hÿn vènh jykre há tÿ hê ri ke han ke mū?” he tóg.

17 Kÿ Jesus tóg ti mÿ: “ã tÿ ne jé inh ki vènh jykre há jêmê sór nê?” he mū. “Ûn pir tóg há nÿ, ha mē. Ti tÿ êg jyvèn ên ki króm nÿ, ã tÿ rÿr krÿg ja tū ve sór kÿ,” he tóg.

18 Kÿ tóg ti mÿ: “ti tÿ êg jyvèn tÿ hê ri ke nê?” he mū. Kÿ Jesus tóg ti mÿ: “ti tÿ êg jyvèn tag há vê, ha mē: ũ tén tūg nÿ, ã prū tū fi mré nÿ tūg nÿ, nén ũ péju(g) tūg nÿ, ũ to ón tūg nÿ,

19 ã nÿ mré ã jóg kamêg nÿ, ã régre ki rÿr há han nÿ, ã tÿ vènh ki rÿr há ri ke han nÿ, ã régre ki,” he tóg, Jesus ti.

20 Kÿ kyrū tóg ti mÿ: “tag kar ki sóg króm tí,” he mū. “Kÿ ne nÿ hÿn ver inh mÿ tū tí?” he tóg.

21 Kÿ Jesus tóg ti mÿ: “ã tÿ vènh jykre há han sór kÿ tag han nÿ, ha mē,” he mū. “Á tū kar vām tÿg. Kÿ ũn jagāgtar ag mÿ vin, jānkamy tí, kÿ ã tóg kanhkā tá tū mág nÿ sir. Kar kâtÿg nÿ, ã tÿ inh mré tÿg jé,” he tóg, Jesus ti.

22 Kÿrū ên tÿ ti vÿ tag mē kÿ tóg fe kaj han kÿ tí mū sir. Ti tū vÿ e nÿtÿ, há kÿ tóg ti mÿ vènhmÿ tí.

23 Kÿ Jesus tóg ã mré mū tí ag mÿ kāmén mū sir. “Sÿ ke há vê, há kÿ sóg ke mū. Jagy ti nÿ, ũn rico tÿ ũ tÿ kanhkā tá nÿ ên tÿ tÿ êg pã'i nÿ venh ke ti,” he tóg.

24 “Há kÿ sóg ājag mÿ ke mǎn mū. Cavallo pãñ sór vÿ préj nor fÿn kutē tū nÿ mÿ,” he tóg. “Ti tÿ fÿn kutē há nÿ ra tóg ver jagy tí vê, ũn rico tÿ ũ tÿ kanhkā tá nÿ ên tÿ tÿ êg pã'i nÿ venh ke ti,” he tóg, Jesus ti.

25 Kÿ tóg ti mré mū tí ag mÿ e tí, ti vÿ tag. Kÿ ag kanē tóg jur mū. “Kÿ ũ hÿn kren ke tū nÿ,” he ag tóg.

26 Kÿ Jesus tóg ag ki êvānh mū, kÿ tóg ag mÿ: “êprā ke ag vÿ vēsóg ki tá jun ke tū nÿ,” he mū. “Topê há tóg ājag tÿ tá jun han ki kanhró nÿ, ti tÿ nén ũ kar tÿ hê ri ken há nÿn kÿ,” he tóg, Jesus ti.

27 Kÿ Pedro tóg ti mÿ: “ha vé,” he mū. “Nén kar ré kÿ êg mū mū, ã mré. Tag to êg hÿn ne venh ke mū?” he tóg.

28 Kÿ Jesus tóg ag mÿ: “sÿ ke há vê, há kÿ sóg tó mū,” he mū. “Inh mré ājag tóg mū mū. Tÿ sóg êprā ke fi kósín nÿ. Kejên sóg inh nÿgja kri nÿnh mū, isÿ vènh kar jykre tugnÿm jé. Sÿnvÿ inh nÿnh mū, kurā ên kã. Nén kar han mǎn jé sóg ke mū, kurā ên kã. Kÿ ājag tóg ājag nÿgja kri nÿgnÿg kÿ nÿtÿnh mū gé, nÿgja tÿ 12 (ke) kri, ājag tÿ povo tÿ Israel kar jykre tugnÿm jé, povo tÿ 12 (ke) tag ag jykre,” he tóg.

29 “Jó ũ tóg isugrÿn ã jamã ré kÿ tí mū, ã kãke, ã jāvy, ã ve, ã panh, ã mÿnh, ã japÿ ré kÿ tóg tí mū, inh jykre tugrÿn. Ên vÿ tóg vènh kato ã tÿ êprā ré kÿ tÿg ja ên e ri ke venh ke mū, tag kÿ, êprā. Kÿ tóg rÿr krÿg ja tū ên venh ke mū gé,” he tóg.

30 “Jāvo tag ki ũn mág ũ ag kāsir nÿtÿnh ke vê, tá tére kÿ, kÿ tag ki ũn kāsir ũ ag tÿ tÿ ũn mág nÿtÿnh ke vê, tá tÿ pã'i nÿnh ke vê,” he tóg, Jesus ti. Ti tÿ ag mÿ kanhkā jykre tó vê.

20

¹ Kÿ Jesus tóg ag mÿ: “û tÿ kanhkã tá nÿ ên tÿ tÿ êg pâ'i nÿ vÿ ge nÿ, ha mē,” he mÿ, to comparação han kÿ. “Patrão ri ke tóg nÿ. Kusã ki tóg tÿ mÿ, 6 horas ki, camarada ag jãvãnh jé, ag tÿ ti jakré ki rÿr jé.

² Kÿ tóg ù ag vég mÿ sir. Ag mré tóg vènh rãnrãj kaja to jykrén mÿ, hã vÿ: jãnkamy pir, he mÿ, por dia kaja ti. Kÿ tóg ag mÿ: “ha ki rÿr mÿjêg,” he mÿ sir.

³ Kÿ ag tóg mÿ mÿ. Hora tâgtÿ tÿg kÿ, 9 horas ki tóg tÿg mãn mÿ, ù ag jãvãnh jé gé. Kÿ tóg ù ag vég mÿ gé sir. Véké ag tóg êmã kuju tá nÿtÿ, rãnrãj tÿ kÿ.

⁴ Kÿ tóg ag mÿ: “inh mÿ inh jakré ki rÿr mÿjêg,” he mÿ gé. “Kajãm jé sóg ke mÿ, ti kaja tÿ,” he tóg.

⁵ Kÿ ag tóg mÿ mÿ.

Hora tâgtÿ ù tÿg kÿ, meio dia ki tóg ù ag jãvãnh tÿg mãn mÿ, 3 horas ki tóg tÿg mãn mÿ gé. Ag ve kÿ tóg ag mÿ ke mÿ gé, kÿ ag tóg mÿ mÿ gé, ti jakré ki rÿr jé.

⁶ Vãhã tóg rãkãnh mÿ sir. 5 horas ki tÿg mãn kÿ tóg ù ag vég mÿ gé, véké jêgjê kÿ nÿtÿ ag. Kÿ tóg ag mÿ: “ãjag tÿ ne jé rãnrãj tÿ nÿ nê?” he mÿ. “Kurã kar ki ãjag tóg ki nÿtÿ, rãnrãj tÿ nÿtÿ ra,” he tóg ag mÿ.

⁷ Kÿ ag tóg ti mÿ: “hã ra ù tóg êg mÿ: ha inh rãnrãj han, he ja tÿ nÿ,” he mÿ. Kÿ tóg ag mÿ: “ha inh jakré ki rÿr mÿjêg ge,” he mÿ sir. Kÿ ag tóg mÿ mÿ gé.

⁸ Kutÿ kÿ ag patrão tóg ã tÿ ki rÿr tÿ ên mÿ: “ha ag jé prêr,” he mÿ, 6 horas da tarde ki. “Ag mÿ ti kaja ti nÿm,” he tóg. “Ûn tÿ rãkãnh kÿ kãmÿ mÿ ag mÿ nÿm vén, kar kÿ ù tÿ kusã ki kãmÿ mÿ ag mÿ nÿm rén,” he tóg ti mÿ. Kÿ tóg ke mÿ, ti tÿ ki rÿr tÿ ti.

⁹ Kÿ ù tÿ rãkãnh kÿ junjun mÿ ag vÿ ãjag kaja ti mãn mÿ, hã vÿ: jãnkamy pir, he mÿ. Ag rãnrãj sí ra ag tóg por dia kaja vég mÿ sir.

¹⁰ Kÿ ù tÿ kusã ki rãnrãj mÿ ag tóg to jykrén mÿ. “Ti hÿn êg mÿ ti kaja kãfór han ke mÿ, êg tÿ kurã kar ki rãnrãj kÿ,” he ag tóg mÿ, to jykrén kÿ. Hã ra tóg ag mÿ jãnkamy pir ên nÿm mÿ gé sir, por dia kaja ên.

¹¹ Ag tÿ jãnkamy ên mãn kÿ ag tóg ti to jÿ mÿ, ãjag patrão to.

¹² Kÿ ag tóg ti mÿ vÿ mÿ. “Tag ag vÿ hora pir ki rãnrãj, jãvo ã tóg ag mÿ êg kaja ri ke han. Kurã kar ki êg tóg rãnrãj mÿr, to êg ron, ti rÿ jagÿ ra êg tóg to krónh ke ja tÿ nÿ,” he ag tóg, ãjag patrão mÿ.

¹³ Kÿ tóg ag kãmÿ ù mÿ ke mÿ, ag patrão ti. “Sÿ ã ki kygnê pijé!,” he tóg. “Inh mré ã tóg jãnkamy pir to jykrén ja nÿ, hã kÿ sóg ã mÿ nÿm mÿ, jãnkamy pir ti.

¹⁴ Kÿ ã tÿ mãn kÿ tÿg. Hã ra sóg ag mÿ nÿm sór mÿ gé, sÿ ã mÿ nÿm ja ên ri ke.

¹⁵ Isÿ vê mÿr, jãnkamy ti, kÿ sóg sÿ tÿ nén han sór mÿ ên han mÿ. ã mÿ jÿ!, isÿ ag mÿ vÿ há han to?” he tóg ti mÿ, patrão ti.

¹⁶ Hã kÿ êgno tá kãmÿ ag vÿ ùn kãmÿ vén mÿ ag ri ke nÿtÿnh mÿ, tâprÿ kÿ, jãvo ùn kãmÿ vén mÿ ag vÿ êgno tá kãmÿ mÿ ag ri ke nÿtÿnh mÿ gé,” he tóg, Jesus ti.

Jesus tÿ ã ter ke tó mãn

(Mc 10.32-34; Lc 18.31-34)

¹⁷ Kÿ Jesus tóg Jerusalém ra tÿg sór mÿ. Kÿ tóg vyrmÿ ù tÿ 12 (ke) ên ag mré vēmén mÿ. Ag tÿ ã mré êprÿ jagma mÿn kÿ tóg ag mré vēmén mÿ, ag tÿ êmÿn jagma mÿn kÿ.

¹⁸ “Ha vé,” he tóg. “Jerusalém ra êg tóg mÿ mÿ,” he tóg. “Êprã ke fi kósín ên vÿ jagtar ke mÿ. Inh hã vê. Topê tÿ ki rÿr tÿ to pâ'i ag tóg ãjag tÿ isÿ nén han sór mÿ ên han ke mÿ, Topê vÿ to professor ag ke gé. Ag tÿ iso: “ter jé tóg ke mÿ,” henh ke vê.

19 Kÿ ag tóg fóg ag mÿ inh fêg ke mÿ sir, ên ag tÿ iso é he jé, ag tÿ inh mrânmrân jé, ag tÿ ka to isa jé. Kurã tâgtÿ ki sóg hã ra rÿr mãn ke mÿ,” he tóg, Jesus ti.

*Ûn régre ag tÿ tÿ ùn mág nÿtÿ sór
(Mc 10.35-45)*

20 Kÿ Zebedeu krê ag mÿnh fi tóg Jesus venh kãtÿ mÿ, fi krê ag mrê. Ti krêm fi tóg mÿg ke mÿ, fi tÿ ti mÿ nén (ù) to vÿ sór kÿ.

21 Kÿ tóg fi mÿ: “ã tÿ ne to vÿ sór nê?” he mÿ. Kÿ fi tóg ti mÿ: “kejên ã tóg tÿ pã'i nÿnh mÿ,” he mÿ. “Kÿ inh krê tag ag tÿ ã rã hã nÿtÿnh há tóg tÿ, ù tÿ ã pêgia tá nÿ jé, kÿ ù tÿ ã jakãnh tá nÿ jé,” he fi tóg, ti mÿ.

22 Kÿ Jesus tóg ag mÿ: “ãjag tÿ nén to vÿ mÿ ki kagtÿg ãjag tóg nÿtÿ,” he mÿ. “Jagy ti nÿ. ãjag mÿ inh ri kén jagtar sór mÿ? ãjag mÿ tovãnh ke tÿ nÿ?” he tóg. Kÿ ag tóg ti mÿ: “hÿ,” he mÿ. “Tovãnh ke tÿ êg nÿ,” he ag tóg, ti mÿ.

23 Kÿ tóg ag mÿ: “hÿ, jagãgtar jé ãjag tóg ke mÿ, inh ri kén,” he mÿ. “Hã ra isÿ tÿ vê, sÿ ãjag mÿ: hej, he ti,” he tóg. “Ha inh pêgia tá nÿ, henh ke tÿ sóg nÿ. Ha inh jakãnh tá nÿ, henh ke tÿ sóg nÿ gé, isÿ tÿ vê. Topê tÿ ùn mÿ: ha ti rã hã nÿtÿ, henh ke mÿ ên ag hã tÿ inh rã hã nÿtÿnh ke vê,” he tóg, Jesus ti.

24 Hã ra ù tÿ 10 (ke) ag tóg mêg mÿ, ùn régre ag tÿ Jesus mÿ tag to vÿ ja ti. Kÿ ag tóg ag to jÿ mÿ.

25 Hã ra Jesus tóg ag jé prêr kãn mÿ, kÿ tóg ag mÿ: “fóg ag pã'i ag jykre ki kanhró ãjag tóg nÿtÿ,” he mÿ. “Vênh kar jêgnêg ag tóg tÿ mÿr, kÿ ag mág ag tóg vênh kar mÿ: gemnÿ, ge tÿg nÿ, he tÿ, vÿ tar han kÿ,” he tóg.

26 “Ag ri ke han tÿg nÿ. ãjag mÿ tÿ ùn mág nÿtÿ sór mÿ? Kÿ tÿ jagnê camarada ri ke nÿtÿmñ, jagnê tÿ ki rÿr kÿ.

27 ãjag mÿ tÿ pã'i nÿtÿ sór mÿ? Kÿ tÿ jagnê krêm ke nÿtÿmñ, tÿ ùn kãsir nÿtÿmñ.

28 Hã kÿ sóg camarada tÿ nÿ gé. Sÿ tÿ camarada nÿ jé sóg kãtÿg, sÿ ãjag ki rÿr jé. Tÿ sóg êprã ke fi kósin nÿ. Hã kÿ sóg vênh kar jagfy ter ke mÿ, sÿ ag krenkren han jé,” he tóg, Jesus ti.

*Jesus tÿ ùn kyvó ag tÿ há' he
(Mc 10.46-52; Lc 18.35-43)*

29 Hã ki ag tóg Jerusalém ra mÿ mÿ. Kejên ag tóg cidade tÿ Jericó fÿn rãm kÿ ag tóg tá pa mÿ, hã ra ù tÿ hên ri ke ag tóg Jesus nón mÿ mÿ.

30 Êpyr ên tá, êmÿn ên tá ùn kyvó ag tóg nÿgnÿ kÿ nÿtÿ nÿ, ùn régre ag. Vãhã ag tóg Jesus tÿ jagma tÿg mêg mÿ. Kÿ ag tóg ti jé prêr mÿ. “!..Senhor..!” he ag tóg. “!..Davi kósin', êg jagãgtãn ra..!” he ag tóg.

31 Kÿ ag tóg ag to jÿgÿ mÿ, ti nón mÿ ù ag. “Mê kã nÿtÿ,” he ag tóg mÿ. Hã ra ag tóg prêr mãn', prêr mãn' he mÿ, jamã hár(a). “!..Senhor, Davi kósin', êg jagãgtãn ra..!” he ag tóg mÿ.

32 Kÿ Jesus tóg krÿg he mÿ, kÿ tóg ag jé prêr mÿ. Kÿ tóg ag mÿ: “ne to ãjag vÿ, sÿ ãjag mÿ han jé?” he mÿ.

33 Kÿ ag tóg ti mÿ: “êg tÿ êvãnh há tóg tÿ,” he mÿ.

34 Kÿ Jesus tóg ag jagãgtãn mÿ sir. Ag kanê mêgmêg tóg mÿ sir. Kÿ ag tóg êvãnh há han mÿ sir. Ti nón ag tóg mÿ mÿ sir.

21

*Jesus tÿ Jerusalém tá jun
(Mc 11.1-11; Lc 19.28-40; Jo 12.12-19)*

¹ Ag mün ky ag tóg Jerusalém kakó tá junjun mü, emã tÿ Betfagé tá, krî tÿ Oliveiras tá. Ky Jesus tóg ã mré mü tÿ régre ag jëgnëg mü, emã ên ra.

² Ky tóg ag mÿ: “emã ên ra müjëg, êg jo emã nÿ ên ra,” he mü. “Tá ãjag tóg burrica fi venh mü. Se ky fi jë. Fi kósin vÿ fi mré jë nÿ. Ên fi kavân ky fi pére kãmümnÿ.

³ Hën ri ke mün ag tóg ãjag mÿ vÿ sór mü, fi to. Ky ag mÿ: “êg Senhor vÿ fi ve sÿ han sór mü. Kãnhmar tóg fi jënë mãn mü,” hemnÿ,” he tóg, Jesus ti.

⁴ Hã ra tóg rán ky nÿ gé, tag. Topë vÿ tó tÿ tóg tag rán ja nÿ, ha mē.

⁵ “Sião tá ke fag mÿ tag tómnÿ, ha mē. Hã vé, ã pã'i tÿ rei tóg ã ki jun ke mü, hemnÿ. Vënh kar to tóg fe há nÿ, jü vanh nÿn ky, ã Senhor ti. Burrica kri tóg nÿ nÿ, fi kósin kri, êg tu tÿ ên fi kósin kri mÿr,” he tóg, Topë vÿ tÿ rán ky nÿ ki. Hã ra tóg ge nÿ.

⁶ Ky ti mré mü tÿ ag tóg mü mü, burrica fi mãn jé.

⁷ Fi pére ag tóg kãmü mü, fi kósin mré. Ky ag tóg ãjag kur tÿ kri vãm mü, ky tóg kri nÿ mü.

⁸ Ky vënh e ên ag tóg ãjag kur tÿ êpÿ kri kugién mü, emÿn kri. Ky ü ag tóg ka féj kre ky êpÿ kri vãvãm mü sir. Ag tÿ ti jamÿn sÿnvÿ han sór vë.

⁹ Ky ü ag tóg ti jãmÿ mü mü, jo ü ag ti nón mü mü. Ên ag tóg prënrënr mü sir. “!..Viva, Davi kósin..!” he ag tóg mü. “!..Sér tóg tÿ, pã'i vÿ êg tá jun, êg Senhor mág tÿ ti jënën ky..! !..Topë tá tóg kãtëg, ü tÿ kynhmÿ nÿ ên tá, viva..!” he ag tóg, prënrënr ky.

¹⁰ Hã ki ag tóg Jerusalém tá junjun mü. Ky tá ke kar ag vÿ ti venh kãmü mü. Ag mÿ tóg e tÿ, ky ag tóg ti to: “ü nê?” he mü.

¹¹ Ky ti mré kãmü mü ag vÿ ag mÿ: “Topë vÿ tó tÿ ên vë,” he mü. “Jesus vë, Nazaré tá ke ên vë, Galiléia tá ke ên,” he ag tóg mü sir.

*Jesus tÿ Topë jo ïn krëm ag pan
(Mc 11.15-19; Lc 19.45-48; Jo 2.13-22)*

¹² Ky Jesus tóg Topë jo ïn kãra rã mü. Ky tóg tá ke ag pan kãn mü sir, nén vender he tÿ ag, nén comprar he tÿ ag ke gé. Topë jo ïn krëm ag tóg negociar he tÿ, jãnkamy trocar he ag tóg tÿ gé. Ag tÿ nén kri vin jafã tÿ tóg vÿryn ke mü sir. Sórãg vender he tÿ ag nÿgnÿ jafã tÿ tóg vÿryn ke mü gé sir.

¹³ Ag mÿ tóg: “Topë vÿ rá to jykrén nÿ,” he mü. “Tag vÿ rán ky nÿ, ha mē. “Inh ïn jiji vÿ tÿ Topë mré vÿ jafã nÿ,” he tóg, Topë vÿ rá ki. Hã ra ãjag tóg Topë mré vÿ jafã tag krëm nén kar pigu(g) mügtÿ, ky tóg bandido ag jamã ri ke nÿ sir,” he tóg, Jesus ti. Ag pan ky tóg ke mü, Jesus ti.

¹⁴ Ky ïn kyvó ag tóg ti to junjun mü sir, ïn kónhgrÿ ag ke gé, ti tÿ Topë jo ïn krëm jën ky. Ky tóg ag tÿ há' he kãn mü sir.

¹⁵ Hã ra Topë tÿ ki rÿr tÿ ag tóg tá nÿtÿ, Topë vÿ to professor ag ke gé. Ti tÿ ag tÿ há' he vég ag tóg mü. Gÿr ag vÿ mëg ag tóg mü gé. Topë jo ïn krëm ag tóg nÿtÿ, gÿr ag, ky ag tóg Jesus mÿ prënrënr mü. “!..Viva, Davi kósin..!” he ag tóg mü, prënrënr ky. Ky pã'i ag tóg jÿgÿ mü, Jesus to.

¹⁶ Hã ky ag tóg ti mÿ vÿ mü. “Á mÿ ag prënrënr mëg tÿ?” he ag tóg. Ky Jesus tóg ag mÿ: “vó,” he mü. “Hã ra Topë vÿ rá to jykrén nÿ,” he tóg. “Ûn kãsir ag vÿ iso vÿ há han tÿ,” he tóg, Topë vÿ ki. “Ûn pafa mü ag vÿ inh mÿ vÿ há pë han tÿ. Á hã ne tag han', ïn kãsir ag tÿ inh mÿ vÿ há han jé,” he tóg, Topë mÿ, Topë vÿ tÿ rán ky nÿ ki,” he tóg, Jesus ti.

¹⁷ Tag tó ky tóg ag ré ky tÿ mü sir. Cidade tá tóg kãkutë mü, emã tÿ Betfagé ra tÿg jé. Tá tóg sir nÿr mü.

Ka tŷ figueira tóg
(Mc 11.12-14, 20-24)

¹⁸ Tŷ vaj kŷ kusã ki tóg cidade ra tŷg mãn mũ. Ā tŷg kŷ tóg kókĩr mũ.

¹⁹ Kŷ tóg ka tŷ figueira vég mũ sir, kŷ tóg ra tŷ mũ, tŷ kanē ko jé. Hã ra tóg kanē tũ nĩ. Féj tãvĩ tóg jé, kŷ tóg tŷ mŷ vŷ mũ. “Kanē han mãn ke tũ ã nĩ ha,” he tóg mũ. Kŷ tóg tóg mũ sir vēsŷmér, ka ti.

²⁰ Kŷ ti mré mũ tŷ ag tóg vég mũ sir, tŷ tóg mũ ti. Kŷ tóg ag mŷ e tŷ. “Vēsŷmér tóg tóg ja nĩ,” he ag tóg. “Tŷ hē ri ké?” he ag tóg.

²¹ Kŷ Jesus tóg ag mŷ kãmén mũ sir. “Ki hã sóg tó mũ, hã kŷ sóg ke mũ,” he tóg. “Inh ri ke han jé ājag tóg ke mũ. Isŷ ka tŷ figueira mŷ: “tóg ra,” hen kŷ tóg tóg ja nĩ. Inh vŷ tag ri ke han jé ājag tóg ke mũ, ājag tŷ inh ki ge há han kŷ. Hã ra to: “Topē mŷ inh vŷ mēg mũ vŷ?” he tŷg nĩ. “Hŷ mŷ vŷ?” he tŷg nĩ. Kŷ ājag tŷ kejēn pãnoh mŷ: ha kutē, goj nig ki, hen kŷ tóg kutē mũ, ājag tŷ ti kutēh ke to: “hŷ mŷ vŷ?” he tũ nŷn kŷ.

²² Kŷ ājag tŷ Topē mŷ nén ũ to vŷn kŷ to: “han jé tóg ke mũ,” hemnĩ. Kŷ tóg ājag mŷ han mũ, ājag tŷ ti mŷ nén to vŷ mũ ěn ti,” he tóg, Jesus ti.

Jesus tŷ ũ tŷ ã jēnēg mũ tó tŷg
(Mc 11.27-33; Lc 20.1-8)

²³ Kŷ tóg cidade tá jun kŷ (tóg) Topē jo ĩn kãra rã mãn mũ sir. Kŷ Topē tũ ki rŷr tŷ to pã'i ag vŷ ti to kãmũ mũ, kófa ag mré hã. Ag tŷ ti ki jēmē sór vē, hã kŷ ag tóg ti mŷ: “ũ nŷ ã mŷ: tag han nĩ, hé?” he mũ. “Ũ nŷ ã jēnē?” he ag tóg mũ, Jesus mŷ.

²⁴ Kŷ Jesus tóg ag mŷ: “ājag ki sóg jēmēnh ke mũ gé, vēnh kato,” he mũ. “Ājag tŷ inh mŷ tó há han kŷ sóg ājag mŷ ũ tŷ inh jēnēg mũ tónh ke mũ gé,” he tóg.

²⁵ “João vŷ ag kygpég tŷ ja nŷgtŷ. Kŷ ti mŷ kanhkã tá vēnh jykre han ja nŷgtŷ”, ěprã vēnh jykre vó? Ũ nŷ ti jēnē?” he tóg, Jesus ti.

Kŷ ag tóg ti vŷ to jykrén mũ jagnē mré. “Ēg tŷ ti mŷ: Topē tŷ ti jēnē ja vē, hen kŷ tóg ěg mŷ: kŷ ājag tŷ ne jé ti vŷ kri fig tũ nĩ nē? henh ke mũ.

²⁶ Ēg tŷ hã ra ti mŷ: ěprã ke jykre ja vē, hen kŷ ěg tóg vēnh kar kato tē mũ sir. Ag kar vŷ João to: Topē vŷ tó tŷ pē ja vē, he tŷ. Kŷ ěg tóg ag kamēg mũ, vēnh e ěn,” he ag tóg mũ, jagnē mŷ, pã'i ag.

²⁷ To jykrén kŷ ag tóg Jesus mŷ: “ěg pi(jé) João jykre ki kanhró nŷtŷ,” he mũ. Ón kŷ ag tóg ke mũ. Kŷ tóg ag mŷ: “kŷ sóg ājag mŷ tónh ke tũ nĩ gé, ũ tŷ inh jēnēg mũ ti,” he mũ. Ā kato tē mũ ag mŷ tóg ke mũ, Jesus ti.

Ũn krē régre to comparação

²⁸ Kŷ tóg ag kanhrãn kŷ ag mŷ: “tag to jykrén nĩ, ha mē,” he mũ sir. “Ũ tóg kósin régre nĩ. Kejēn tóg ũn sanh to tŷg kŷ ti mŷ: “inh kósin,” he mũ. “Ũri inh jakré tugnŷgnŷm tŷg,” he tóg.

²⁹ Kŷ tóg ã panh ti mŷ: “vó,” he mũ. Kar kŷ tóg to jykrén mãn kŷ (tóg) tŷ mũ sir, ěpŷ ra.

³⁰ Kŷ ti panh tóg ti jāvy mŷ ke mũ gé sir. “Ũri inh jakré tugnŷgnŷm tŷg,” he tóg mũ gé. Kŷ ti jāvy tóg: “hej,” he mũ, ã panh ti mŷ. Hã ra tóg tŷ tũ nĩ.

³¹ Kŷ ũ tŷ hē nŷ ti panh vŷ ki króm hŷn?” he tóg, Jesus ti. Kŷ ag tóg ti mŷ: “ũn sanh ti,” he mũ. Kŷ Jesus tóg ag mŷ: “hŷ, hã vē,” he mũ. “Hã kŷ sóg ājag mŷ ke mũ. Ũ tŷ governo mŷ jānkamy mäg tŷ ũ ag vŷ Topē vŷ mranh, hã ra ag tóg to jykrén mãn kŷ (ag tóg) ājag jykre tovãnh. Kŷ ũn mén e ũ fag vŷ ājag jykre kórég tovãnh gé. Hã kŷ ag tóg Topē tŷ tŷ ěg pã'i nĩ venh ke mũ, fag ke gé. Ti kósin

sanh ri ke ag hã vê. Ag jãvo ãjag tóg kanhkã venh ke tũ nĩ, ãjag tỹ ón ký Topê mỹ: “hej,” he mũ ra.

³² João vỹ ãjag mỹ Topê vĩ tó ja nĩgtĩ, ãjag tỹ ti jykre kuryj jagma mũ jé. Hã ra ãjag tóg ti vĩ kri nĩm ja tũ nĩ. ãjag jãvo ù tỹ governo mỹ jãnkamy mâng tí ag vỹ ti vĩ kri fi ja nĩ, ùn mén e fag ke gé. Tag ve ãjag mỹr. Ge ra ãjag tóg ãjag jykre tovãnh tũ nĩ, João vĩ kri nĩm tũ ãjag nĩ,” he tóg, Jesus ti.

Ûn camarada kórég ag to comparaçãu
(Mc 12.1-12; Lc 20.9-19)

³³ Ký Jesus tóg ag mỹ: “sỹ ãjag mỹ ãjag tỹ Topê tovãnh to comparaçãu han mãn ke vê, ha mẽ,” he mũ. “Kejẽn ù tóg nĩgtĩ. Uva krãn tóg nĩgtĩ, nén kanê tỹ vinho han jafã ên. Æ jakré tag to tóg rón mũ. Ký tóg kũm ký uva jẽgmĩ jafã han mũ. Ký tóg ki pájõ han mũ gé. Ký tóg ù tỹ ki rĩr tí ag mỹ tovãnh mũ, ag tỹ ti mré ti kanê vẽnũ kãpãm jé. Ký tóg tí mũ, ga ù ra.

³⁴ Ti kanên ký tóg ã camarada ag jẽgnẽg mũ, ag tỹ ag mỹ ti tũ vin jé, uva kanê ti.

³⁵ Hã ra ag tóg ag vóg kónãn mũ sir, ti camarada ag. Û mrãnmrãn ag tóg mũ, ù tén ag tóg mũ, ù pin ag tóg mũ, pó tỹ.

³⁶ Ký tóg ag mỹ ã camarada ù ag jẽgnẽ mãn mũ gé sir, ùn e ag sir, hã ra ag tóg ag vóg kónãn kãn mũ.

³⁷ Vãhã tóg ag mỹ ã kósin jẽnẽg mũ. “Ag hỹn ti kamẽg mũ, inh kósin ti,” he tóg, hã ký tóg ti jẽnẽg mũ.

³⁸ Ký ag tóg ti vég mũ, ti kósin ti. Ký ag tóg jagnẽ mỹ: “kejẽn êkré tag vỹ tỹ ti tũ nĩnh ke mũ,” he mũ. “Mũ nỹ, ti tén jé, ti tũ tag tỹ tỹ ãg tũ nỹnh jé,” he ag tóg mũ, patrãu kósin to.

³⁹ Ký ag tóg ti kãgmĩg mũ sir. Ró pãte ag tóg ti kutẽm ký (ag tóg) ti tén mũ sir.

⁴⁰ Kejẽn ag patrãu vỹ kãtĩg ke mũ, ù tỹ nén krãn ja ên. Kỹn hỹn hẽ ri kenh mũ, ã camarada ag tỹ?” he tóg, Jesus ti.

⁴¹ Ký ù tỹ ti vỹ mẽg mũ ag tóg ti mỹ: “vẽnũ jykre pãno han ag tóg mũ mỹr, uva ki rĩr tí ag,” he mũ. “Ag kãgtén jé tóg ke mũ, jũ ký, ag patrãu ti, ký tóg uva kré ên tỹ ù mỹ tovãnh ke mũ, ag tỹ ti mré vẽnũ kãpãm jé, ti kanê ti,” he ag tóg ti mỹ. Û tỹ ti vỹ mẽg mũ ag tóg ke mũ, Jesus mỹ.

⁴² Ký tóg ag mỹ: “hỹ,” he mũ. “Kỹ Topê vĩ rá tag to jykrén nĩ gé, ha mẽ: pó tỹ ãn han jafã fón ag tóg, pó tỹ ãn han tí ag. Ag mỹ tóg kórég ja nĩ, pó ên ti. Hã ra Topê tóg pó ên hã tỹ ãn nũna han mũ. Ëg Senhor mág tỹ há vê mỹr, hã ký tóg ãg mỹ e tí, ãg tỹ ve ký,” he ja tóg nĩ, Topê vĩ rá ki,” he tóg, Jesus ti, veso pó tỹ comparaçãu ù han ký.

⁴³ “Hã ký sóg ãjag mỹ ke mũ. ãjag tỹ Topê tỹ tỹ ãg pã'i nĩ venh ke vê vê, hã ra ãjag tóg venh ke tũ nĩ. Û ag vỹ venh ke mũ, povo ù ag, ag tỹ inh vĩ kri fi ký,” he tóg.

⁴⁴ “Û tỹ hẽn ri ke ag vỹ pó tag kri vár ke mũ, ký ag tóg kri vár ký tũ' henh ke mũ. Ký pó tag vỹ ù tỹ hẽn ri ke ag kri kutẽnh ke mũ gé, ký tóg ag tỹ námnam ke kãn mũ, ag kri kutê ký,” he tóg, Jesus ti. Ti tỹ ag tỹ ti ki rá tũ tũgrĩn nũgme ki vár ke tón hã vê.

⁴⁵ Ký ag tóg mẽg mũ sir, Jesus vĩ ti. Topê tũ ki rĩr tí to pã'i ag vỹ mẽg mũ, Fariseu ag ke gé. Mẽ ký ag tóg vãhã to jykrén mũ sir. “Ëg hã to tóg uva ki rĩr tí kórég ag to comparaçãu tag han ja nĩ,” he ag tóg mũ sir, ki kanhrãn ký.

⁴⁶ Hã kÿ ag tóg ti se sór mû. Hã ra ag tóg vënh e ên kamëg mû. “Topë vî tó tî pë vë,” he ag tóg, Jesus to, vënh e ên, hã kÿ pã'i ag tóg povo ên ag kamëg kÿ ti ség tû nî ver.

22

Vënh prûg to comparaçã

(Lc 14.15-24)

¹ Kÿ Jesus tóg ag mÿ comparação ù han mãn mû sir.

² “Û tÿ kanhkã tá nî ên tÿ tÿ êg pã'i nî vÿ ge nî, ha mē,” he tóg. “Tÿ tóg pã'i mág ri ke nî. Ti kósin prûg ken kÿ tóg to festa mág han sór mû, pã'i mág ti.

³ Hã kÿ tóg ã camarada ag jëgnëg mû, ag tÿ ti tÿ ùn mÿ tó ja ag mÿ: “ha kãmü jëg, festa kon jé,” he jé. Hã ra ag tóg kãmü jãvãnh nÿtî.

⁴ Kÿ tóg ag mÿ ã camarada ù ag jëgnë mãn mû. “Ag mÿ: “kãn inh huri, vëjën ti, he ti, êg patrão ti,” hemnî,” he tóg. “Boi kãgtén inh huri, boi tãgy ên mré hã. Nén kar vÿ kynkar kÿ nÿtî. Kãmü jëg ra, inh festa to, he ti, êg patrão ti,” hemnî ag mÿ,” he tóg, pã'i mág ti, ã camarada ag mÿ. Kÿ ag tóg mû mû.

⁵ Hã ra ag tóg kãmü sór tû nî, kÿ ag tóg ti camarada ag to é he mû. Û tóg ã japÿ ra tî mû, ù tóg ã negócio nón tî mû.

⁶ Û ag tóg hã ra ti camarada ag kugmî kÿ (ag tóg) ag vóg kónãnh mû gé sir, ag kãtën ag tóg mû sir.

⁷ Kÿ pã'i mág tóg ag to jü mû. Kÿ tóg ã krëm pã'i ag jëgnë kÿ ag kãgtén mû gé sir, ù tÿ ti camarada kãgtén ja ên ag. Ag ìn kugprûg ag tóg mû sir.

⁸ Kÿ tóg ã camrada ag mÿ: “inh festa vÿ kar kÿ nî ha,” he mû. “Hã ra ag tóg kãmü jãvãnh nÿtî, isÿ ùn mÿ vënh vî jënë ja ag, ag kórég nÿtînh kÿ.

⁹ Ha mÿjëg, êpÿ ra, êmîn vënh kãpóv (ja) ra ke gé. Ajag tÿ ù ve kÿ ti mÿ: “ha festa venh kãtîg,” hemnî,” he tóg, pã'i mág ti, ã camarada ag mÿ.

¹⁰ Kÿ ag tóg mû mû. Ajag tÿ êpÿ tá ù ve kÿ ag tóg ag mÿ ke mû. Vënh kar mÿ ag tóg tó mû sir, ùn jykre há ag mÿ, ùn jykre kórég ag mÿ ke gé. Hã kÿ tóg fór mû sir, clube ti.

¹¹ Kÿ pã'i mág tóg kãrã mû sir, ag vigve jé, ù tÿ festa to kãmü ag. Kÿ ù tóg tá jë nî, hã ra tóg festa to kur tu tû nî.

¹² Kÿ tóg ti mÿ: “festa to kur tu tû ã tóg nî, vÿ,” he mû. “Ã hã ne tóg kur kórég tu sór mû', inh festa ki',” he tóg, ti mÿ. Hã ra tóg vî tû nî sir.

¹³ Kÿ pã'i mág tóg ã camarada ag mÿ: “ha ti mrînh, ti pën, ti nîgé, ha ti fón, re tá,” he mû. Re tán kuty nî. Tá ag tóg jagtar tî. Ajag jã tÿ ag tóg gyngyn ke tî sir, gangan ke ag tóg tî sir, vëso jügjü kÿ.

¹⁴ Ge ti nî. Û tÿ hën ri ke jé sóg prër tî, hã ra ti pipir nÿtî, ùn kuprëg kÿ nÿtî ag,” he tóg, Jesus ti. Ti tÿ êg tÿ kanhkã tá festa venh ke tón hã vë.

Ag tÿ imposto to ti ki jëmë

(Mc 12.13-17; Lc 20.20-26)

¹⁵ Kÿ Farise ag tóg jagnë mré Jesus to jykrén mû sir. Ag tÿ ti vî to ti se sór vë. Hã kÿ ag tóg: “ti vî tÿ hë to êg hÿn ti senh mû?” he mû.

¹⁶ Tag to jykrén kÿ ag tóg sir Jesus mÿ ajag mré ke ù ag jëgnëg mû, Herodes mré ke ù ag mré hã, ag tÿ ón kÿ ti ki jëmë jé, ag tÿ ti vî to ti se jé. Ên ag tÿ Jesus tá junjun kÿ ag tóg ti mÿ: “Senhor,” he mû. “Ã jykre kuryj nînh ki kanhró êg tóg nÿtî,” he ag tóg. “Hã kÿ ã tóg Topë to êmîn ki êg kanhrãnh há han tî. Vënh

jykre pir hã han ã tóg tí. Û tý vènh jykre há hã han ve nĩ mũ ra ã tóg ti jykre ki kanhró kar nĩ,” he ag tóg mũ, ón kÿ, Jesus mÿ.

17 “Hã kÿ, ãg mÿ ã tý nén to jykrén mũ tómmĩ. Mÿ ha nÿ!, ãg tý pã'i mág tý imperador mÿ jãnkamy ên nĩm tí, imposto kajãm jé’? ãg mÿ hÿn nĩm mũ!, vó mÿ vó?” he ag tóg mũ, ón kÿ ti ki jëmèñ kÿ.

18 Hã ra Jesus tóg ag jykre pãno ki kanhró nĩ. Hã kÿ tóg ag mÿ: “ãjag ne tóg ón kÿ inh ki jëmè sór mũ!” he mũ. “Jykre régre ãjag nÿtĩ mÿr,” he tóg.

19 “Inh mÿ jãnkamy jun, imposto kajãm jafã ên tí,” he tóg. Kÿ ag tóg ti mÿ ù jun mũ sir, jãnkamy tí.

20 Kÿ tóg ag mÿ: “ù jiji nÿ kã nĩ, ù kãgrã nÿ kã nĩ?” he mũ.

21 Kÿ ag tóg ti mÿ: “pã'i mág tý imperador kãgrã vè,” he mũ. Kÿ tóg ag mÿ: “kÿ pã'i mág mÿ ti tú nĩm nĩ, hã ra Topè mÿ ti tú nĩm nĩ gé,” he mũ sir.

22 Ag tý ti vĩ mẽ kÿ ti jykre tóg ag mÿ e tí sir. Kÿ ag tóg ti tovãnh kÿ mũ mũ sir.

*Ëg tý ãg ter ja tá vÿn kenh ke
(Mc 12.28-34; Lc 10.25-28)*

23 Kÿ kejèn Saduceu ag tóg Jesus tá junjun mũ gé, kurã ên kã. Ag tý ón kÿ ti ki jëmè sór vè gé. Hã ra Saduceu ag tóg: “ãg ter ja tá ãg vÿnvÿn kenh ke tú nĩ,” he tí. “Rĩr mãn ke tú ãg tóg nĩ,” he ag tóg tí. Ên ag vÿ ón kÿ Jesus ki jëmè sór mũ gé.

24 “Senhor,” he ag tóg mũ gé. “Moisés tý ãg mÿ vènh jykre nĩm kÿ tóg ãg mÿ: “ã régre tý ã krè tú ra ter kÿ ã tý ti prũ fi tý prũg ke vè,” he mũ. “Ã tý ã régre mÿ ã krè han ke vè, fi ki,” he ja tóg nĩgtĩ, Moisés tí,” he ag tóg mũ, Saduceu ag, Jesus mÿ.

25 “Kÿ ù tý jagnè mré pafa ja tý 7 (ke) vÿ nÿtĩgtĩ. Ag kãke tóg prũg mũ, hã ra tóg ã kósın tú ra ter mũ. Kÿ ti jãvy tóg fi tý prũg mũ sir. Hã ra tóg ã kósın tú ra ter mũ gé. Kÿ ti jãvy ù tóg fi tý prũg mũ gé sir.

26 Hã ra tóg ã kósın tú ra ter mũ gé, ti jãvy ù ke gé, hã ki ag kar vÿ kósın tú ra kãgter kãn mũ sir.

27 Kÿ vãhã ag kar prũ fi tóg ter mũ gé sir.

28 Kÿ fag kãgter ja tá rĩnrĩr mãn kÿ fi hÿn mén tý 7 (ke) nĩnh mũ vè. Ag kar vÿ fi tý prũg ja nĩ mÿr. Hã kÿ tóg vènhmÿ nÿ, ag tý: rĩr mãn jé ãg tóg ke mũ, hen kÿ,” he ag tóg, Saduceu ag, Jesus mÿ.

29 Hã ra Jesus tóg ag mÿ: “kygnè ãjag huri,” he mũ. “ãjag pi(jé) Topè vĩ tý rán kÿ nĩ ki kanhró nÿtĩ, ãjag pi(jé) Topè jykre ki kanhró nÿtĩ,” he tóg.

30 “Ëg rĩnrĩr mãn kÿ ãg tóg prũg mãn ke tú nĩ sir, kÿ ãg mén mãn ke tú nĩ gé. Topè tý jëgnè jafã ri ke ãg nÿtĩ, kanhkã tá,” he tóg.

31 “Kÿ Topè vĩ rá ù to jykrén nĩ, ti tý ãg ter ja tá vÿn ke tó ti. Topè hã ne tý vëmén ja nĩ mÿr, hã kÿ tóg tag tó ja nĩ, ha mẽ.

32 “Abraão vÿ iso: Topè, he tí, Isaque ke gé, Jacó ke gé,” he ja tóg nĩ, Topè tí. Kãgter ag huri, Abraão, Isaque, Jacó. Hã ra Topè tóg: “tý inh ag Topè nĩ,” he ja nĩgtĩ, ag ter kar kÿ. Hã kÿ ag tóg rĩnrĩr nÿtĩ, Topè tý ùn rĩnrĩr nÿtĩ ag hã kri ke nĩn kÿ,” he tóg, Jesus tí.

33 Kÿ ag tóg ti vĩ mẽg mũ sir, kÿ ti jykre tóg ag mÿ e pè tí, ti vĩ tí.

*Topè tý ãg jyvèn kãfór
(Mc 12.28-34; Lc 10.25-28)*

³⁴ Kÿ Fariseu ag tóg mēg mū, Jesus tÿ Saduceu ag mÿ vī há han ja ti. Ti tÿ ag mÿ vī há han kÿ ag tÿ ti mÿ hē ri ken kÿ kafān ke tóg tū tī sir. Hā mēg ag tóg mū, Fariseu ag. Kÿ ag tóg Jesus to vēnhmān mū sir.

³⁵ Kÿ ag kā ū tóg ti mré vī mū. Topē vī to professor vē, ū tÿ Jesus mré vī mū ti. Kÿ tóg Jesus mÿ:

³⁶ “Senhor,” he mū. “Topē tÿ ěg jyvēn tÿ hē nÿ hÿn ti tÿ ěg jyvēn kar káfór nÿnh mū?” he tóg mū sir.

³⁷ Kÿ Jesus tóg ti mÿ: “Topē to, ěg jóg mág to há tāvī nÿtīmñī, ti ki ge há han nī, ti to jykre pir nÿtīmñī,” he mū.

³⁸ “Topē tÿ ěg jyvēn káfór kar há vē.

³⁹ Kÿ ti tÿ ěg jyvēn ū tóg há ri ke nī gé, há vÿ: ājag régre ki rīr nÿtīmñī, ājag tÿ vēnh ki rīr há han ri ke, he mū,” he tóg.

⁴⁰ “Vēnh jyvēn tag vÿ vēnh jyvēn kar káfór nÿtī. Régre ti nÿtī, Topē tÿ ěg jyvēn káfór nÿtī ti. ěg tÿ tag ki króm kÿ ěg tóg Topē jykre ki króm kām mū. Ti tÿ ěg jyvēn mū han kām ěg tóg mū, Topē vī tó ti tÿ ěg jyvēn mū mré há, ěg tÿ tag ki króm kÿ,” he tóg, Jesus ti.

Cristo tÿ tÿ Davi kósin nī
(Mc 12.35-37; Lc 20.41-44)

⁴¹ Hā ra Fariseu ag vÿ vēnh mām kÿ nÿtī, kÿ Jesus tóg ag ki jēmē sór mū gé sir.

⁴² Kÿ tóg ag mÿ: “Cristo to ājag hē ri ke tī?” he mū. “Ū kósin nē hÿn, Cristo tī?” he tóg, Jesus ti. Kÿ ag tóg ti mÿ: “Davi kósin vē,” he mū.

⁴³ Kÿ tóg ag mÿ: “há ra Davi tóg ti to: inh Senhor, he ja nī,” he mū. “Topē kuprīg tÿ ti krīn kÿ tóg tag tó ja nī, ha mē:

⁴⁴ “ěg jóg tÿ Topē vÿ inh Senhor mÿ: “nī ra ver, inh pēgja tá,” he mū, “sÿ ā kato vāsānsān mū ag tÿ ā krēm vin ke vē, kÿ ag sigse vē sir. Tag jāvānh nī ver,” he tóg mū, Topē ti, inh Senhor mÿ,” he ja tóg nīgī, Davi ti,” he tóg mū, Jesus ti.

⁴⁵ “Hā kÿ Davi tóg Cristo to: “inh Senhor,” he ja nī. Ti tÿ tÿ ti kósin nī ra ti kósin mÿ tÿ ti kri ke nīnh mū vē?” he tóg, Jesus ti. Ti tÿ Fariseu ag ki jēmēg mūn há vē.

⁴⁶ Hā ra ag tÿ ti mÿ ne tónh ke tóg tū tī, ag tÿ ti vī kafān sór mū ra. Vāhā ag tóg ti ki jēmē sór mām tū nī. Ti kamēg ag tóg mū, há kÿ ag tóg ti ki jēmē sór mām tū nī.

23

Ōn kÿ Topē vī to professor ag jykre
(Mc 12.38-39; Lc 11.43-46; 20.45-46)

¹ Kÿ Jesus tóg vēnh kar kanhrān mū sir, ti mré mū tī ag mré há. Kÿ tóg ag mÿ:

² “Moisés vÿ ěg jóg ag kanhrān ja nīgī,” he mū. “Ti nón Topē vī to professor ag tóg ěg kanhrān sór mū, Fariseu ag ke gé,” he tóg.

³ “Ag tÿ ājag mÿ nén tó mū ěn ki króm nī. Ag vī kri fimñī. Ag tÿ nén han mū ri ke han tūg nī jāvo, ag jykre kórég ěn han tūg nī. Ājag kanhrān há han ag tóg tī, há ra ag tóg ki króm sór tū nīgī, ājag vī há ěn ki.

⁴ Ājag mÿ ag tóg vēnh jykre kufy vin tī, há ra ag há tóg han sór tū nīgī, vēnh jykre kufy ěn ti.

⁵ Ag tÿ nén ū há han kÿ ag tóg tÿ ūn mág nÿtī sór mū sir, vēnh kar tÿ ag vigve jé. Ag tÿ Topē mré vī jé ag tóg ti vī rá tÿ ājag nīgē tógfīg tī, ājag kakā ke gé.

Vēsōgfīn ja tāpér tŷ ag tóg vēsōgfīg tī. Topē jykre han jé ag tóg kur tóv mág tu tī gé.

⁶ Festa ki ag tóg jēn vén sór tī. Vēnh kanhrān jafā krēm ag tóg vēnh kāpov kŷ nŷtī.

⁷ Cidade kaju ki vēnh kar tóg ag mŷ: “ā mŷ há?” he tī, kŷ tóg ag mŷ sér tī. Kŷ ag tóg ag to: “Senhor,” he tī gé, kŷ tóg ag mŷ sér tī.

⁸ Ag jāvo jagnē mŷ: “Senhor,” he sór tūg nī, kŷ ag tŷ ājag mŷ: “Senhor,” he mŷ ra ag mŷ: “inh pi(jé) tŷ ūn mág nī,” hemnī. Ūn pir vŷ tŷ ājag kri ke nī, hā vŷ: Topē, he mŷ, jó ājag tóg tŷ jagnē mré ke nŷtī.

⁹ Kŷ ū mŷ: “ēg jóg,” he tūg nī gé, ēprā. Ūn pir vŷ tŷ ājag jóg nī, hā vŷ: Topē, he mŷ, kanhkā tā nī ēn tī.

¹⁰ Kŷ ū tŷ ājag mŷ: “ēg kri tŷ ūn mág nīmnī,” he kŷ ag mŷ: “vó, kenh ke tū inh nī,” hemnī gé. Ūn pir vŷ ājag kri tŷ ūn mág nī, hā vŷ: Cristo, he mŷ.

¹¹ Ājag kāmī ūn mág ag jé ājag ki rīr há han, ājag camarada tŷ ājag ki rīr há han tī ēn ri ke.

¹² Ājag tŷ tag ki vēšŷ tŷ ūn mág han sór nŷtīn kŷ ājag tóg tá térenh ke mŷ, ha vemnī. Ājag tŷ hā ra: “tŷ inh ūn sī nī,” hen kŷ ājag tóg tá jāpryn̄h ke mŷ, tŷ ūn mág ājag nŷtīnh mŷ, ha vemnī,” he tóg, Jesus ti.

*Topē vī to professor ag jagtar ke
(Mc 12.40; Lc 11.39-42, 52; 20.47)*

¹³ “Ōn kŷ Topē vī to professor,” he tóg. “Fariseu,” he tóg. “Jykre régre ājag nŷtī,” he tóg. “Topē vŷ ājag ve kónān,” he tóg. “Ū ag tóg ū tŷ kanhkā tā nī ēn tŷ tŷ ēg pā'i nī ve sór nŷtī, hā ra ājag tóg ag mŷ kanhkā tī nenh tī. Ag jāvo ājag tóg ve sór tū nŷtī. Ājag tŷ kanhkā ve sór tū nŷn kŷ ājag tóg ū ag mŷ nenh tī gé, ag tŷ vēg tū nī jé, ājag ri ke,” he tóg, Jesus ti.

¹⁴ “Ōn kŷ Topē vī to professor,” he tóg. “Fariseu,” he tóg. “Jykre régre ājag nŷtī,” he tóg. “Topē vŷ ājag ve kónān,” he tóg. “Ājag ne tóg ūn mén ter ja fag tū mán kán tī. Kar kŷ ājag tóg ón kŷ Topē mré vī téj han mŷgtī, ēg tŷ ājag to: “há ag nŷtī,” he jé. Hā kŷ Topē vŷ ājag vóg kónān kāfór han ke mŷ,” he tóg, Jesus ti.

¹⁵ “Ōn kŷ Topē vī to professor,” he tóg. “Fariseu,” he tóg. “Jykre régre ājag nŷtī,” he tóg. “Topē vŷ ājag ve kónān,” he tóg. “Ājag ne tóg kuvar há ra mŷ tī, ga mī, goj mī ke gé, ājag tŷ ū tŷ Israel ag jykre han sór mŷ ū jāvānh jé. Hā jé ājag tóg mŷ mág han tī. Kŷ ājag tŷ ū ven kŷ ājag tóg tī tŷ Japo krē han mŷ sir, tī tŷ ón kŷ Topē vī mē jé, ājag ri kén, tī tŷ nŷgme ki kutē jé, inferno ēn ki. Kŷ tī jykre pāno vŷ ājag jykre pāno kāfór nŷ sir,” he tóg, Jesus ti.

¹⁶ “Topē vŷ ājag ve kónān mŷr,” he tóg. “Kyvó ājag nŷtī, hā ra ājag tóg ū tŷ ki kagtīg ag tatīn mŷ sór mŷ. Hā kŷ ājag tóg kygnēg tī. Kŷ ājag tóg ag kanhrān kónān tī. “Ēg tŷ ón kŷ: tag han jé sóg ke mŷ, he sór kŷ ēg tóg: “Topē jo ĩn krēm nī ēn vŷ ki kanhró nī,” henh ke mŷ,” he ājag tóg tī. “Ēg tŷ hā ra: Topē jo ĩn krēm ouro tātēn vŷ ki kanhró nī, hen kŷ ēg tóg ón ke tū nī,” he ājag tóg tī gé.

¹⁷ Vēnhmŷ tī nī, ājag vŷ tag. Krī tū ājag tóg nŷtī, kyvó ājag tóg nŷtī. Ouro mŷ Topē jo ĩn kāfór nī? Vó'. Ouro vŷ tŷ Topē tū nī, tī tŷ Topē jo ĩn krēm nŷn kŷ. Hā kŷ tóg tŷ Topē tū kar nī sir, ouro tī, tī jo ĩn tī ke gé. Ón kŷ: “Topē hā vŷ ki kanhró nī,” he tūg nī,” he tóg, Jesus ti.

¹⁸ “Ājag vī vēnhmŷ ū vŷ nī gé. “Ōn kŷ ēg tóg: ēg tŷ mesa kri ūn mŷ nén ū pŷn mŷ ēn vŷ ki kanhró nī, henh ke mŷ,” he ājag tóg tī gé. “Ēg tŷ hā ra: ēg tŷ ūn mŷ ēg mēg pŷn tī ēn vŷ ki kanhró nī, hen kŷ ēg ón ke tū nī,” he ājag tóg tī gé.

19 Věnhmỹ ti nĩ gé, ājag vĩ tag ti. Kyvó ājag nỹtĩ mỹr. Ěg tỹ Topě mỹ ěg měg pũn mũ mỹ mesa kǎfór nĩ? Vó! Topě jo ĩn krēm mesa kri ěg tóg ěg měg ti pũn tĩ, hã kỹ tóg Topě mỹ há tĩ, ěg měg ti, ěg tỹ ti jo ĩn tá ti mỹ mesa kri ti pũn tũgrĩn.

20 Ājag tỹ Topě jo ĩn krēm mesa tón kỹ, kỹ ājag tóg ěg tỹ ěg měg tỹ mesa ěn kri pũn mũ ěn tó tĩ gé.

21 Ājag tỹ Topě jo ĩn tón kỹ, kỹ ājag tóg Topě ti tó tĩ gé.

22 Ājag tỹ kanhkā tón kỹ, kỹ ājag tóg Topě nĩgja tó tĩ gé, kỹ ājag tóg Topě ti tó tĩ gé sir. Nén ũ pir vē, ti kar ti. Hã kỹ ón kỹ: Topě hã vỹ ki kanhró nĩ,” he tũg nĩ,” he tóg, Jesus ti.

23 “Ón kỹ Topě vĩ to professor,” he tóg. “Fariseu,” he tóg. “Krĩ régre ājag nỹtĩ, kỹ Topě vỹ ājag ve kónān,” he tóg. “Ón kỹ ājag tóg Topě mỹ ājag jakré ki dízimo vin tĩ. Ājag jakré tỹ hortelā tỹ 10 (ke) nỹtĩn kỹ ājag tóg Topě mỹ ũn pir nĩm tĩ, ājag jakré tỹ erva doce tỹ ke gé, ājag jakré tỹ cominho tỹ ke gé. Há ti nĩnh mũ vē. Hã ra ājag tóg ti tỹ ěg jyvĕn mũ ěn han tũ nĩgtĩ. Vĕnh jykre kuryj han tũ ājag tóg nĩgtĩ. ũn jagāgtar ag jagāgtān tũ ājag tóg nĩgtĩ. Topě vĩ kri fig tũ ājag tóg nĩgtĩ. Ājag tỹ ti vĩ ki króm tag tóg inh mỹ há nĩnh mũ vē, ha mẽ. Ājag tỹ ti tỹ ěg jyvĕn ki króm mré hã ājag jakré ki dízimo vin (hã) ra tóg inh mỹ há nĩnh mũ vē, ha mẽ. Hã ra ājag tóg ki króm sór tũ nĩgtĩ.

24 Kyvó ājag nỹtĩ, hã ra ājag tóg ag tatĩn mũ sór nỹtĩ. Topě vĩ ũ ki króm sór ājag tóg tĩ, ti tỹ Topě mỹ tỹ nén ũ sĩ (hã) ra, kỹ ājag tóg ti vĩ ũ mrynhmranh tĩ, ti tỹ Topě mỹ kórég pĕ (hã) ra. Kỹ tóg goj ki ka ri ke nĩ. Ājag tỹ ka gón tũ nĩ jé ājag tóg kur ki kujĕg tĩ, kỹ tóg pan tĩ, goj ti. Hã ra ājag tóg cavalo tỹ goj ki ter mũ ra (ājag tóg) goj kórég ěn kron tĩ,” he tóg, Jesus ti.

25 “Ón kỹ Topě vĩ to professor,” he tóg. “Fariseu,” he tóg. “Krĩ régre ājag nỹtĩ, kỹ Topě vỹ ājag ve kónān,” he tóg. “Copo venja kupég ājag tóg tĩ, pĕnky venja, hã ra ti kátá tóg kavĕj nĩ. Kỹ ājag vỹ ge nỹgtĩ gé. Jykre há nĩ ve ājag tóg nỹgtĩ gé, hã ra ājag tóg věnh jykre pāno han tĩ, hã vỹ: jānkamy to ag lograr he tĩ, he mũ, ājag prũ tũ fag mré nỹ tĩ, he mũ gé.

26 Kyvó ājag nỹtĩ, ājag tỹ tỹ Fariseu nỹtĩ ra. Ājag jykre pāno tovānh nĩ, ājag jānhkri nỹtĩ jé. Kỹ vāhā věnh kar vỹ ājag jykre há vég mũ,” he tóg, Jesus ti.

27 “Ón kỹ Topě vĩ to professor,” he tóg. “Fariseu,” he tóg. “Krĩ régre ājag nỹtĩ, kỹ Topě vỹ ājag ve kónān,” he tóg. “Vĕnh kej sĩnvĩ ri ke ājag nỹtĩ. Sĩnvĩ nĩ ve ti nĩ, věnh kej ti, ěg tỹ pó tỹ kri tam kỹ, kar tinta tỹ pó to tĩn kỹ. Tĩ sĩnvĩ nĩ ve nĩ ra ti kátá tóg kórég nĩ. Vĕser vỹ krēm nỹ nĩ, vĕser vag mũ ti, ti kuka.

28 Tag ri ke ājag nỹtĩ. Há nĩ ve ājag nỹtĩ. Jykre kuryj nĩ ve ājag nỹtĩ, hã ra ājag kátá tóg kórég nĩ, ājag jykre régre nỹtĩn kỹ, ājag tỹ Topě vĩ ki króm sór tũ nỹtĩn kỹ mỹr, ha mẽ,” he tóg, Jesus ti.

Ŭn jykre régre ag jagāgtar ke (Lc 11.47-51)

29 “Ón kỹ Topě vĩ to professor,” he tóg. “Fariseu,” he tóg. “Krĩ régre ājag nỹtĩ, kỹ Topě vỹ ājag ve kónān,” he tóg. “Ājag jóg'jóg ag vỹ Topě vĩ tó ti ag kǎgtĕn ja nĩgtĩ. Jāvo ājag tóg ag kej sĩnvĩ han tĩ, ũn jykre kuryj han ja ag kej ti.

30 Kỹ ājag tóg ag to: “ěg tỹ ěg jóg'jóg ag mré ga kri mũ hã ra ěg tóg ag kǎgtĕn ke tũ nĩ vē,” he ti. “Ag mré ěg ag vóg ke tũ nĩ vē,” he ājag tóg tĩ, ón kỹ.

31 Hã ki ājag tóg ājag jóg'jóg ag tó tĩ. “Ěg jóg'jóg ag vỹ ag kǎgtĕn, Topě vĩ tó tĩ ag,” he ājag tóg tĩ. “Ŭ tỹ ag kǎgtĕn mũ ag krĕ'krĕ vỹ tỹ ěg nỹtĩ,” he ājag tóg tĩ.

³² Kuri ājag jóg'jóg ag ri ke han nī, kuri ājag jóg'jóg ag tỹ ũn kãgtén ja tũ ên ag kãgtén nī, ājag tỹ tỹ ājag jóg'jóg ag krē'krē nýtĩn kỹ," he tóg, Jesus ti.

³³ "Pỹn ri ke ājag nýtĩ, mĩg ri ke ājag nýtĩ. Ājag pi(jé) nũgme ki vár ke tũ nĩnh ke mũ', inferno ki'," he tóg.

³⁴ "Hã kỹ sóg ājag mỹ Topê vĩ tó tĩ ag jěgněnh ke mũ, věnh vĩ há tó mũ ag, Topê vĩ rán tĩ ag. Ag jěgně jé sóg ke mũ, ag tỹ ājag jyvěn jé. Kỹ ājag tóg ag kãgtén ke mũ gé, ha vemnĩ. Ka to ājag tóg ag sanh ke mũ. Ag mrãnmrãn jé ājag tóg ke mũ, ājag tỹ věnh kanhrãn jafã krēm. Cidade kar ki ājag tóg ag nón mũnh mũ, ājag tỹ ag vóg kónãn jé.

³⁵ Hã kỹ tóg ājag tỹ ũn jykre kuryj kar kãgtén mũ ri ke nĩ. Ũn tỹ hěn ri ke ag kãgtén ag tóg huri, êprã ke ag, hã ra tóg ājag tỹ ag kãgtén kãn ri ke nĩ sir, Abel, Abel nón ke ag mré hã, Zacarias ên mré hã, Baraquias kósin ên. Ěn tỹ ājag tóg Topê jo ĩn jo ti tén ja nĩ, Topê mỹ nén ũ pũn jafã ên tá ājag tóg ti tén ja nĩ, Zacarias ên.

³⁶ Ājag mỹ sóg tó mũ, ha mẽ. Ājag hã to ti jũnh ke mũ, Topê ti, ājag jóg'jóg ag tỹ ag kãgtén tigrĩn, ājag tỹ ag kãgtén tigrĩn ke gé," he tóg, Jesus ti.

Jesus tỹ Jerusalém tá ke ag to há nĩ

(Lc 13.34-35)

³⁷ Kỹ tóg Jerusalém ki ke ag to vēmén mũ. Fe kaj han tóg, ag to, kỹ tóg: "Jerusalém tá ke ag mỹ sóg tag tó sór mũ, ha mẽ," he mũ. "Topê vĩ tó tĩ ag kãgtén ag tóg tĩ. Topê tỹ ag mỹ ũn jěgněg tĩ ag pin ag tóg tĩ, pó tỹ, ag tỹ ag kãgtén jé. Isy ag věnh mãn há tóg tĩ vė, isy ag ki rĩr jé, Jerusalém tá ke ag, hã kỹ sóg ag jé prěr tỹ hěn ri ke han mũ. Garĩnh fi jykre ri ke han sór isóg mũ vė, ag mỹ. Garĩnh fi vỹ á krē kri jé nĩ, fi tỹ ag vėsyrěnh tũ nĩ jé ke vė. Ěn ri ke han sór sóg mũ vė, hã ra ag tóg ke jãvãnh nýtĩ.

³⁸ Hã kỹ ag tóg ag jamã pũn kãn ke mũ, kỹ vãpũr vė sir. Ũ vỹ kãnhmar tá nĩg mãn ke tũ nĩ ha, ag tỹ cidade kókén ja tá.

³⁹ Hã kỹ sóg ag mỹ ke mũ. Inh ve mãn ke tũ ag nĩ ha (mỹr). Kejěn ag tóg iso: "Topê tỹ ti jěně ja vė," henh ke mũ. "Topê vỹ ti ve há han, ti tỹ ti jiji tó kãtĩg kỹ," he jé ag tóg ke mũ iso, kejěn. Ěn kã ag tóg inh ve mãn ke mũ," he tóg, Jesus ti.

24

Topê jo ĩn kókén kỹ nĩnh ke

(Mc 13.1-2; Lc 21.5-6)

¹ Kỹ Jesus tóg Topê jo ĩn tá kãkutě kỹ tĩ mũ sir. Kỹ ti mré mũ tĩ ag tóg ti tá junjun mũ, kỹ ag tóg ti mỹ Topê jo ĩn ên ag venven mũ sir.

² Kỹ Jesus tóg ag mỹ: "ājag mỹ pó tỹ ĩn mág tag ag vıgvég mũ?" he mũ. "Kejěn pó tóg jagně kri nýtĩ mãn ke tũ nĩ ha. Ag tỹ gũm ke kãn ke vė. Ki hã sóg tó mũ," he tóg, Jesus ti.

Ěg jagtar ke

(Mc 13.3-13; Lc 21.7-19)

³ Kar kỹ tóg krĩ tỹ Oliveiras ra tĩ mũ sir. Ti tỹ tá nĩ kỹ ti mré mũ tĩ ag tóg vyr mỹ ti ki jēměnh kãmũ mũ. Kỹ ag tóg ti mỹ: "Ěg mỹ ti kurã ti tó," he mũ. "Ěg tỹ ne ve kỹ ěg ti kurã ki kanhró nýtĩnh mũ, á kãtĩg mãn ke kurã ên ti, nén kar tũg ke kurã ên ti?" he ag tóg ti mỹ.

⁴ Kỹ tóg ag mỹ: "ker ũ ājag lograr hé hě'," he mũ.

5 “Cristo vỹ tỹ inh nĩ,” he jé ag tóg ke mũ, inh jyjy tó kỹ. Ủ tỹ hẽn ri ke ag tóg tag tónh ke mũ, kỹ ù tỹ hẽn ri ke ag tóg ag vĩ kri nĩm ke mũ.

6 Vẽnh gẻnh to vẻme mẽ jẻ ãjag tóg ke mũ, tag ki vẻnh gẻnh to, kuvar há tá vẻnh gẻnh to ke gẻ. To jũrũn ke tũg nĩ, hã ra. Vẻnh gẻnh enh ke vẻ. Hã ra kurã tỹ ẻgno to hã ke vẻ ver.

7 Naçao ag tỹ jagnẻ kato tẻgtẻnh ke vẻ, pã'i krẻm ke ag tỹ pã'i ù krẻm ke ag to jũnh ke vẻ. Kỹ ga tỹ ragra ke tỹ hẽn ri ke han ke vẻ, ẻmã tỹ hẽn ri ke ki. Vẻjẻn tỹ tũ' henh ke vẻ gẻ.

8 Hã ra ãjag jagãgtar ke vẻnh ven vẻn vẻ ver,” he tóg, Jesus ti.

9 “Kar kỹ ãjag jagtar ke mũ, ãjag tỹ inh ki ge kỹ nỹtĩ tugrĩn. ãjag vóg kónãn jẻ ag tóg ke mũ, ãjag kãgtẻn jẻ ag tóg ke mũ gẻ. Naçao kar vỹ ãjag to vĩ kónãn ke mũ gẻ, ãjag tỹ inh jiji tó tugrĩn.

10 Kỹ ù tỹ hẽn ri ke ag vỹ isogvãnh ke mũ sir, ẻn kã. ãjag mrẻ ke fag tó jẻ ag tóg ke mũ, inh kato vẫsẫsẫn mũ ag mỹ, kỹ ag tóg jagnẻ to vĩ kónãn tãvĩ han ke mũ gẻ.

11 Ớn kỹ inh vĩ tó tí ag vỹ junjun ke mũ gẻ, kỹ ag tóg ùn e krĩnkrĩn ke mũ sir, ag tỹ isogvãnh jẻ.

12 Kỹ vẻnh kar vỹ vẻnh jykre pãno to há nỹtĩnh mũ, hã kỹ ù tỹ ớn kỹ iso há sĩ nỹtĩ ẻn ag tóg isogvãnh ke mũ gẻ, ùn e ag.

13 Hã ra ù tỹ isovãnh tũ pẻ ẻn ag tóg krenkren ke mũ.

14 Kỹ naçao kar vỹ vẻnh vĩ sér mẽnh mũ, ga kar mĩ hã, kỹ ag tóg Topẻ tỹ tỹ ẻg pã'i nĩnh ke ẻn mẽnh mũ ha. Ag tỹ mẽ kãn kỹ kurã tỹ ẻgno vẻ sir,” he tóg, Jesus ti.

Ễg jagãgtar mág pẻ ti

(Mc 13.14-23; Lc 21.20-24)

15 “Kejẻn ãjag tóg vẫhã sir ãjag tỹ nẻn (ủ) kamẻg tĩ ẻn venh ke mũ, ẻg kavẻnh mũ ẻn ti,” he tóg. “Topẻ vĩ tó tĩ tỹ Daniel vỹ ti tó ja nĩgtĩ. Topẻ jo ỉn tá tóg jẻnh mũ, ẻg kavẻnh mũ ẻn ti,” he tóg, Jesus ti. (Ủ tỹ vẻnh rá tag to ke mũ ẻn jẻ ki kanhró nĩ.)

16 ãjag tỹ ti ve kỹ ga tỹ Judẻia ki ke kar ag jẻ vẻnh pigjunh mũjẻg, pãnónh ra, fag mrẻ hã.

17 Ủ tỹ re tá nĩ ẻn jẻ kãra rã tũg nĩ, ti ỉn ki, ti tũ mẫn jẻ.

18 Kỹ ù tỹ ã japy tá jẻ ẻn jẻ vỹn ke tũg nĩ gẻ, ti kur mẫn jẻ.

19 Ủn kufy fag jagtar mág ke vẻ, kurã ẻn kã, ù tỹ gĩr pygfãm mũ fag ke gẻ.

20 Topẻ mrẻ vĩmĩnĩ, ti tỹ kusa kã vẻnh ven tũ nĩ jẻ, ti tỹ vẻnhkãn ke kurã kã vẻnh ven tũ nĩ jẻ.

21 Jagtar mág tỹ ge han ja tũ ẻg tóg nỹtĩ, Topẻ tỹ mundo han jãn ki. Kỹ ẻg ge han mẫn ke tũ nĩ gẻ, kar kỹ.

22 Ễg tỹ kurã ki jagtar ke mũ ẻn vỹ e nỹtĩnh mũ vẻ, hã ra tóg tẻrem kỹ nỹtĩ nĩ, Topẻ tỹ ùn kuprẻg ja ẻn ag tugrĩn. Ti tỹ tẻrem tũ nĩ (mũ) ra ù vỹ kren ke tũ nĩ vẻ, ag jagtar mág ẻn to,” he tóg, Jesus ti.

23 “ẻn kã ù tỹ ãjag mỹ: Cristo vỹ tag kã jẻ nĩ, he mũ ra kri nĩm tũg nĩ, ag tỹ: tãtã ti jẻ nĩ, he mũ ra.

24 Ớn kỹ Cristo ag vỹ vẻnh venven ke mũ, ớn kỹ Topẻ vĩ tó tĩ ag ke gẻ. Ễg tỹ nẻn han vẫnh hyn han jẻ ag tóg ke mũ, milagre tỹ hẽn ri ke ti, ớn kỹ Cristo ẻn ag. Ag tỹ vẻnh kar krĩn kónãn sỏr vẻ, ag tỹ kygnẻ jẻ, Topẻ tỹ ùn kuprẻg ja ẻn ag mrẻ hã, hẽn ri ke mũn.

²⁵ Ājag mý sóg tó kãn mũ, ti kutẽnh ke to hã,” he tóg, Jesus ti.

²⁶ “Kejẽn ag tóg ājag mý: ěmã kórég tá tóg jẽ, Cristo ti, henh ke mũ. Ra ti venh mũ tũg. Ag tỹ ājag mý: ĩn kãtã tóg nĩ nĩ, he mũ ra kri fi tũg nĩ.

²⁷ ĩnh kãtĩg mãn ke vỹ ta tỹ kóm kóm ke ri ke nĩ. Ti tỹ kóm kóm ke kỹ ěg tóg nẽn kar vэг tĩ, rã jur ja tá, rã pur ja tá ke gé. ĩnh kãtĩg mãn ke vỹ ri ke nĩnh mũ. Tỹ sóg ěprã ke fi kósin nĩ,” he tóg, Jesus ti.

²⁸ “Nẽn ũ ter nỹgja ri ke ti nĩ gé. Hã tá tóg vẽn h mãn tĩ, jãtã ti. Tag ri ke ti nĩnh mũ, ĩnh kãtĩg mãn ke ti,” he tóg, Jesus ti.

Topẽ kósin kãtĩg mãn ke

(Mc 13.24-27; Lc 21.25-28)

²⁹ “Jagtar ěn kar kỹ rã vỹ nhyr ke mũ, kỹ kysã vỹ jẽngrẽ he mãn ke tũ nĩ gé. Krĩg vỹ vãr ke mũ gé, kanhkã krẽm. ěg tỹ kanhkã tá nẽn vэг tũ kar ěn vỹ ragra ke kãn mũ gé.

³⁰ Kỹ vãhã ěprã ke fi kósin vỹ vẽn h ven ke mũ, kanhkã tá. Kỹ ga kri mũ kar ag vỹ kygfỹ kãn ke mũ sir, povo kar ti, ag tỹ ĩnh kãtĩg ven kỹ. Kanhkã góg kãmĩ sóg tẻnh ke mũ. Kỹ sóg tar pẽ nĩnh mũ, ha vemnĩ, kỹ ĩnh ve vỹ kókov pẽ nĩnh mũ gé.

³¹ Kỹ sóg isỹ jẻgnẽ jafã ag jẻgnẻnh mũ, ag tỹ tẻntẻtẻn kynkyn jẻ, kỹ ag tóg isỹ ũn kuprẻg mũ ag jẻ prẻnprẻr kãn ke mũ sir, ga kar mĩ hã, kanhkã fyr mĩ hã,” he tóg, Jesus ti.

Ka tỹ figueira to comparação

(Mc 13.28-31; Lc 21.29-33)

³² “Ka tỹ figueira to ki kanhrãn nĩ, to comparação han kỹ. Ka tỹ figueira pẽ tánh kỹ, ti fẻj tãg han kỹ tóg kakó tĩ sir, ěkrẻ tygtãnh kurã ti.

³³ Ri ke ti nĩ, ājag tỹ ĩnh kãtĩg mãn ke kurã ki kanhrỏ nỹtĩnh ke mũ ti. Ājag tỹ isỹ ājag mý nẽn tó mũ tag ve kỹ tóg sir kakó tĩnh ha, kakó tãvĩ tóg tĩnh ha, ĩnh kãtĩg mãn ke ti, ěn kã.

³⁴ Sỹ ke há vẻ, hã kỹ sóg tag tó mũ, ha mẽ: ũri ũn rĩnrĩr mũ ag tỹ nẽn kar ěn venh ke vẻ, ag kãgter ke to hã.

³⁵ Kanhkã vỹ tũ' henh ke mũ, ga ti ke gé. Jãvo ĩnh vỹ vỹ tũ' henh ke tũ nĩ,” he tóg, Jesus ti.

Jesus kãtĩg mãn ke kurã

(Mc 13.32-37; Lc 17.26-30, 34-36)

³⁶ “Hã ra ũ pi(jẻ) isỹ kurã ki kãtĩg mãn ke mũ ki kanhrỏ nĩ', hora ki ke gé. Topẽ tỹ jẻgnẻ jafã ag pi(jẻ) ki kanhrỏ nỹtĩ'. ĩnh pi(jẻ) ki kanhrỏ nĩ gé. ěg jóg mág hã vỹ ã pin kỹ ki kanhrỏ nĩ, kurã kã nẽn kutẻnh ke mũ ěn ki.

³⁷ ĩnh kãtĩg mãn ke kurã vỹ Noẻ tỹ ga mĩ tũg ja ěn ri ke nĩnh mũ.

³⁸ Ta kutẻ to hã ag tóg jẻn ja nĩgtĩ, kron ja nĩgtĩ, jagnẻ tỹ prũg ja nĩgtĩ, jagnẻ tỹ mẻn ja nĩgtĩ, Noẻ mrẻ ke ag. ěn kã kejẽn Noẻ tóg barco tỹ ĩn kãra rã mũ.

³⁹ Hã ra tóg ag mý tỹ nẽn ũ tũ tĩ, ti tỹ barco kãra rã mũ ti. Kejẽn ta tóg kutẻ mũ, kỹ goj tóg var mũ sir. Kỹ ag tóg kãgter kãn mũ sir vãhã. Ge ti nĩnh mũ, ěprã ke fi kósin kãtĩg mãn kỹ, ĩnh kãtĩg mãn kỹ mỹr.

⁴⁰ ěn kã ũn rẻgre ag vỹ ājag japy ki rãnrãj ke mũ. ĩnh kãtĩg mãn kỹ sóg ũn pir jẻ prẻr ke mũ, jãvo ti rẻgre vỹ tá jẻnh mũ sir.

⁴¹ ũn rẻgre fag vỹ ěgtynyn nỹtĩnh mũ, jagnẻ mrẻ, kurã ěn kã. Kỹ sóg ũn pir fi jẻ prẻr ke mũ, jãvo fi rẻgre fi vỹ tá jẻnh mũ gé sir.

⁴² Vēnh ki ěměmnĩ, nũr tũ ri ke han nĩ. Inh kãtĩg ke hora ki kagtĩg ãjag tóg nỹtĩ. Ājag Senhor vỹ tỹ inh nĩ,” he tóg.

⁴³ “Kỹ tag to jykrén nĩ, ha mẽ. Ēg pi(jé) ũ tỹ ěg tỹ nén péju sór mũ kãtĩg ke ki kanhró nỹtĩ! Ēg tỹ ti kãtĩg ke tỹ hora ki kanhró nỹtĩ ra ěg tóg to ěg tỹ nén ki rĩr mũ vĕ, kỹ ũ pi(jé) ěg ĩn kãra rãnh ke mũ vĕ. Hã ra ěg tóg ki kagtĩg nỹtĩ.

⁴⁴ Ge ti nĩ, inh kãtĩg mãn ke ti. Ha vĕnh kãn, ha vĕnh ki ěmĕ. Ēprã ke fi kósin vỹ kãtĩg ke mũ, ãjag tỹ inh kãtĩg ke to jykrén tũ ra,” he tóg, Jesus ti.

Ũn camarada ag to comparação (Lc 12.41-48)

⁴⁵ Kỹ tóg ag mỹ ã kãtĩg mãn ke tó mãn mũ. “Kejĕn patrão ũ tóg hĕ ra tĩg sór mũ,” he tóg. “Kỹ tóg ã camarada ag kã ũ tỹ pã'i han mũ, ti tỹ ti jo ã mré camarada ag ki rĩr jé. Ũ tỹ ã rãnhrãj ki rĩr há han tĩ ěn kuprĕg tóg mũ, ti tỹ ag mỹ vĕjĕn ven jé, vĕjĕn ke horan ki.

⁴⁶ Ti tỹ ag ki rĩr há han kỹ ti patrão vỹ ti mỹ vĩ há han ke mũ, ti kãtĩg mãn ken kã.

⁴⁷ Ti tỹ pã'i han jé tóg ke mũ, ti tỹ ti tũ ki rĩr kãn jé sir. Ki hã sóg tó mũ, ha mẽ.

⁴⁸ Kejĕn ti camarada ũ tóg hã ra jykre pãno nĩ. Kỹ tóg tag to jykrén mũ. “Ēg patrão vỹ kãtĩg vãnh han mũ,” he tóg mũ sir, ũn jykre pãno ěn.

⁴⁹ Kỹ tóg ã mré camarada ag vóg kónãn mũ sir, ag mrãnmrãn kỹ. Kỹ tóg ũn kronkron tĩ ag mré kron mũ gé sir, jĕn mág han tóg mũ gé sir.

⁵⁰ Kỹ ti patrão vỹ ti kãnhmỹ kãtĩg ke mũ sir, ti tỹ ti kãtĩg ke kurã ki kagtĩg nĩn kỹ, ti horan ke gé, ũn jykre kórĕg ěn ti.

⁵¹ Ā kãtĩg kỹ tóg ti kapãn ri ke han ke mũ sir, kỹ tóg ti fón ke mũ gé sir, ũn jykre régre ag mré. Tá ag tóg jagtar ke mũ, ãjag jã tỹ ag tóg gyngyn ke mũ, tỹ ag tóg gangan ke mũ, jũ kỹ, ũn jykre kórĕg ěn ag,” he tóg, Jesus ti. Ti tỹ ũ tỹ ti rãnhrãj han kónãn mũ kãmén hã vĕ.

25

Tátãg tỹ 10 (ke) fag to comparação

¹ Kỹ Jesus tóg ag mỹ ã kãtĩg mãn ke ěn kãmén mãn mũ, kỹ tóg ag mỹ: “ěn kã ũ tỹ kanhkã tá nĩ ěn tỹ tỹ ěg pã'i nĩnh ke vỹ ge nĩnh mũ, ha mẽ,” he mũ. “Tátãg fag ri ke ti nĩnh mũ. Ũ tỹ 10 (ke) fag vỹ nỹtĩ, tátãg fag. Vĕnh kyprũg ve jé fag tóg lampião vyn kỹ mũ mũ, ũn prũg mũ ěn kato.

² Fag tỹ 5 (ke) fag vỹ jykre kórĕg nỹtĩ, jãvo ũ fag vỹ jykre há nỹtĩ, ũ tỹ 5 (ke) ũ fag.

³ Kỹ ũn jykre kórĕg fag vỹ vyrmỹ azeite ma mũ ja tũ nĩ, hã ra tóg sĩn kỹ lampião kãkã nĩ nĩ.

⁴ Fag jãvo ũn jykre há fag vỹ azeite ma mũ mũ, vyrmỹ.

⁵ Hã ra tóg kãtĩg vãnh han mũ, ũn prũg mũ ti. Kỹ tóg kejĕn fag nũgnũr há tĩ sir, ti jun tũg ki, kỹ fag tóg nũgnũr kãn mũ sir.

⁶ Meia noite ki vĕnh vĩ tóg mẽ há tĩ, kỹ tóg: “!..nĩgnĩ ra..!” he mũ. “!..Ũn prũg mũ vỹ kãteg..!” he tóg. “!..Ha ti venh kãmũ jeg..!” he tóg.

⁷ Kỹ tátãg ěn fag vỹ nĩgnĩg kỹ fag lampião gruggrug mũ sir.

⁸ Kỹ ũn jykre kórĕg fag vỹ ũn jykre há fag mỹ azeite to vĩ mũ. “Ēg mỹ ãjag azeite vĕnh kãpãm. Nhyn ke ti nỹtĩ ha, ěg lampião ti,” he fag tóg mũ.

⁹ Hã ra ùn jykre há fag tóg fag mý: “vó’,” he mû. “Ēg tÿ ājag mÿ vĕnh kãpãm kÿ tóg ěg mÿ kã kyn ke mû gé, ājag ri kĕn. Negócio ra mÿjĕg, ājag tÿ azeite ven jé,” he fag tóg mû.

¹⁰ Kÿ fag tóg mû mû. Fag gunja tá tóg jun mû sir, ùn prÿg mû ti. Kÿ fag tóg ti mré mû mû sir, ùn lampião gru nÿtĭ fag. Vĕnh kyprÿg ve jé fag tóg mû mû, kÿ ag tóg jãnkã ti nĭfĕnh mû sir, ùn jykre kórĕg fag jy.

¹¹ Kÿ vãhã tátãg ù fag vÿ tá junjun mû gé sir, kÿ fag tóg ti mÿ: “Senhor’, Senhor’,” he mû sir. “Ēg mÿ nón’,” he fag tóg.

¹² Hã ra tóg fag mÿ: “ājag ki kagtĭg sóg nĭ, mÿr, ha mĕ,” he mû,” he tóg, Jesus ti.

¹³ “Hã kÿ sóg ājag mÿ: vĕnh ki rĭr, nÿr tÿ ri ke han kÿ, he mû. Kãtĭg jé sóg ke mû. Hã ra ājag tóg inh kãtĭg ke kurã ki kagtĭg nÿtĭ, inh hora ki ke gé. Hã kÿ inh jãvãnh to krónh ke tÿg nĭ,” he tóg, Jesus ti.

Û camarada ag to comparação (Lc 19.11-27)

¹⁴ Kÿ Jesus tóg: “inh kãtĭg mãn ke vÿ tag ri ke nĭnh mû gé, ha mĕ,” he mû. “Kejĕn ù tóg ga ù venh tĭg sór mû, kÿ tóg ã camarada ag jé prĕr mû, ti tÿ ag mÿ ã tÿ nĕn kar vĕnh kãpãm jé, ã jãnkamy kar.

¹⁵ Û mÿ tóg jãnkamy kãmur tÿ 5 (ke) vin mû, ù mÿ tóg ti kãmur régre vin mû, ù mÿ tóg ti kãmur pir nĭm mû. Ûn krĭ há ěn mÿ tóg ti kãmur e vin mû, ùn krĭ pãgsĭ ěn mÿ tóg ti kãmur pir nĭm mû.

¹⁶ Kÿ ù tÿ ti kãmur tÿ 5 (ke) mãg mû ěn vÿ tĭ mû. Jãnkamy ěn tÿ rãnhřãj mág han kÿ tóg kejĕn ù tÿ 5 (ke) ù mãg mû, kÿ ti tÿ vÿ tÿ ti kãmur tÿ 10 (ke) nÿtĭ sir.

¹⁷ Kÿ ù tÿ ti kãmur régre mãg mû ěn vÿ tÿ rãnhřãj mû gé. Ti kãmur régre ù mãg tóg mû sir, ã rãnhřãj to, kÿ tóg tÿ 4 (ke) nÿtĭ.

¹⁸ Ag jãvo ù tÿ ti kãmur pir mãg mû ěn vÿ ã tÿ nĕg tĭ mû sir. Ā patrão tÿ ti mÿ jãnkamy nĭm ěn nĕg tóg mû, mÿr, ha mĕ.

¹⁹ Kejĕn ag patrão vÿ vÿn ke mû sir, si há tĭ kÿ.

²⁰ Kÿ ti camarada tóg ti venh kãtĭ mû, ù tÿ ti kãmur tÿ 5 (ke) mãn ja ěn ti. Kÿ tóg ti mÿ ù tÿ 5 (ke) ù ěn ven mû sir, ti ganho ti, kÿ tóg ã patrão mÿ: “ù tÿ 5 (ke) vin ã tóg inh mÿ,” he mû, “hã ra sóg tÿ rãnhřãj kÿ ù tÿ 5 (ke) ù mãn ja nĭ,” he tóg.

²¹ Kÿ ti patrão tóg ti mÿ: “jykre há ã tóg nĭ,” he mû. “Ā tÿ ki rĭr há han ã tóg nĭ mÿr. Nĕn sĭ ki rĭr há han ja ã tóg nĭgtĭ, kÿ sóg ã mÿ nĕn ù e vin sór mû, ã tÿ ki rĭr jé. Ā patrão fe tÿ mrin ke ã mÿr. Hã inh mré kãtĭg,” he tóg, ti patrão ti.

²² Kÿ ti camarada ù tóg jun mû gé, ù tÿ ti kãmur régre mãn ja ěn ti. Kÿ tóg ti mÿ: “inh mÿ ã tóg ti kãmur régre vin ja nĭ,” he mû. “Tÿ rãnhřãj kÿ sóg ùn régre ù mã. Hã vĕ ha,” he tóg.

²³ Kÿ ti patrão tóg ti mÿ: “jykre há ã tóg nĭ,” he mû gé. “Ā tÿ ki rĭr há han ã tóg nĭ mÿr. Nĕn sĭ ki rĭr há han ja ã tóg nĭgtĭ, kÿ sóg ã mÿ nĕn ù e vin sór mû, ã tÿ ki rĭr jé. Ā patrão fe tÿ mrin ke ã mÿr. Ha inh mré kãtĭg,” he tóg, ti patrão ti.

²⁴ Kÿ ti camarada ù tóg jun mû gé sir, ù tÿ ti kãmur pir mãn ja ěn ti. Kÿ tóg ti mÿ: “Senhor’,” he mû. “Vĭ tar han ã tóg tĭgtĭ, ki kanhró sóg nĭ. Ā tÿ nĕn krãn ja tÿ ěn mãg ã tóg tĭgtĭ, ã tÿ ti fy vãm tÿ ra ã tóg ti kanĕ ve sór tĭgtĭ.

²⁵ Hã kÿ sóg mÿmĕg kÿ ti kãmur né. Ā tÿ ti há vĕ ha,” he tóg, ti patrão mÿ.

26 Kÿ ti patrão tóg ti mÿ: “jykre kórég ã tóg nÿ,” he mÿ. “Ã tũ ki rÿr kónãn ã tóg nÿ mÿr. Inh mÿ isÿ nén krãn ja tũ mág tÿgtÿ? Inh mÿ isÿ nén ù fy vãm tũ ra ti kanê ve sór tÿgtÿ? Hã ki kanhró ã mÿ nÿ?”

27 Æ tÿ ne jé inh jãnkamy tÿ banco ki rãnrhãj tÿ ag mÿ vin ja tũ nÿ nê? Kÿ sÿ ti juro ven kÿ sóg isũ kãfór mãn ke vê vê.

28 Ti tũ ma ra,” he tóg mÿ sir, polícia ag mÿ. “Inh camarada ù mÿ nÿm, sÿ ti mÿ nÿm ja ên ti. Û tÿ ti kãmur tÿ 10 (ke) mág mÿ ên mÿ nÿm, ti kãmur pir tÿ, sÿ ùn jykre kórég tag mÿ nén nÿm ja ên ti,” he tóg, ag patrão ti, polícia ag mÿ,” he tóg, Jesus ti.

29 “Ge ti nÿ. Ûn tũ mág vÿ mãn mãn mÿ, kÿ tóg ti mÿ tũ' henh ke tũ pê nÿ. Ûn tũ tũ ên tũ sÿ mãn jé ag tóg ke mÿ, kÿ tóg tÿ tũ tũ nÿ sir,” he tóg, patrão ti.

30 “Kÿ inh camarada kórég tag fón, kuty ja ên kãkã. Tá ag tóg jagtar tÿ, ãjag jã tÿ ag gyngyn ke tÿ, vêso jũ kÿ,” he tóg, patrão ti,” he tóg, Jesus ti, ã tÿ ã kãtÿg mãn ke kãmén kÿ.

Jesus tÿ vênh kar jykre tugnÿm ke

31 Kÿ Jesus tóg ag mÿ: “êprã ke fi kósin ên kãtÿg mãn kÿn ge nÿnh mÿ, ha mē,” he mÿ. “Inh kãtÿg mãn kÿ sóg tar pê kãtÿ mÿ, sinvÿ. Isÿ jêgnê jafã ag vÿ inh mré kãmũnh ke mÿ. Kÿ sóg inh nÿgja kri nÿnh ke mÿ sir, kÿ inh jykre tar vÿ vênh ven ke mÿ.

32 Kÿ êprã ke kar vÿ inh jo vênh mãn kãn ke mÿ sir. Kÿ sóg vênh kar vênh kãpãm ke mÿ sir, ha mē. Carneiro mré cabrito ki rÿr tÿ ên vÿ kejên ã mæg vênh kãpãm tÿ. Carneiro ag tÿ tóg vyrmÿ vin tÿ, cabrito ag tÿ ke gé.

33 Kÿ tóg carneiro ag tÿ ã pægja tá vin tÿ, jó tóg cabrito ag tÿ ã jakãnh tá vin tÿ. Tag ri ke han jé sóg ke mÿ.

34 Tÿ sóg vênh kar kri pã'i mág nÿnh mÿ, kurã ên kã. Kÿ sóg inh pægja tá nÿtÿnh ke mÿ ag mÿ: “ha inh mré kãmũ jêg,” henh ke mÿ. “Inh panh vÿ ãjag to vÿ há han mÿ mÿr. Topê tÿ ga tãg mré kanhkã tãg venh kãmũ jêg. Topê tÿ ga han kurã ên kã tóg ãjag hã kuprêg ja nÿ, ãjag tÿ ti tÿ ga tãg mré kanhkã tãg tag ve jé.

35 Kejên sóg kókÿr nÿ ja nÿgtÿ, kÿ ãjag tóg inh jên. Isÿ kron há nÿn kÿ ãjag tóg inh mÿ goj jun. Isÿ ãjag ãn tá jun kÿ ãjag tóg inh mÿ: “ha kãrã, êg mré nÿ,” he ja nÿgtÿ gé.

36 Inh kur tũ nÿn kÿ ãjag tóg inh mÿ kur vin. Inh kaga nÿn kÿ ãjag tóg inh venh kãmũ ja nÿgtÿ. Ise kÿ jê kÿ ãjag tóg inh venh kãmũ ja nÿgtÿ gé,” he jé sóg ke mÿ ag mÿ,” he tóg.

37 “Kÿ ùn jykre kuryj tag ag vÿ inh mÿ: “Senhor,” henh ke mÿ. “Êg hê kã ã kókÿr vé, êg tÿ ã mÿ vjêjên ven jé? Êg hê kã ã kron há tÿ vé, êg tÿ ã mÿ goj ven jé?”

38 Æ hê kã êg ãn tá jun, êg tÿ ã mÿ: “ha kãrã,” he jé? Êg hê kã ã kur tũ vé, êg tÿ ã mÿ kur vin jé?”

39 Êg hê kã ã kaga vé, êg hê kã ã se vé, êg tÿ ã venh kãmũ jé? Ki kagtÿg êg nÿtÿ,” he jé ag tóg ke mÿ, inh mÿ.

40 Kÿ sóg ag mÿ: “Ûn jagãgtar ag jagãgtãn ja ãjag tóg nÿgtÿ, inh mré ke ag, hã ra tóg ãjag tÿ inh jagãgtãn ri ke nÿ, ãjag tÿ ag jagãgtãn ja ti, ki hã sóg tó mÿ,” he jé sóg ke mÿ, isÿ tÿ pã'i mág nÿn kÿ,” he tóg, Jesus ti.

41 “Kÿ sóg inh jakãnh tá nÿtÿ ag mÿ: “ha mÿjêg, tãra,” henh ke mÿ gé. “Inh panh vÿ ãjag mÿ vÿ kónãn. Pÿ nhyr vãnh ra mÿjêg. Nén-Kórég mÿ tóg kar kÿ nÿ, pÿ nhyr vãnh ên ti, Nén-Kórég tÿ jêgnê jafã ag mÿ tóg kar kÿ nÿ gé. Ên ra mÿjêg.

⁴² Inh kókír ra ājag pi(jé) inh mý vĕjĕn ven'. Isý kron há ra ājag pi(jé) inh mý goj jun'.

⁴³ Isý ājag ĩn tá jun mŭ ra ājag pi(jé) inh mý: “ha kārā,” he ja nĭgtĭ'. Isý kur tŭ ra ājag pi(jé) inh mý ũ vin'. Inh kaga ný ra, ise kŷ jĕ ra ājag pi(jé) inh venh kāmŭ ja nĭgtĭ',” he jé sóg ke mŭ,” he tóg.

⁴⁴ “Kŷ ag tóg inh mý kenh ke mŭ gé. “Senhor',” he jé ag tóg ke mŭ gé. “Ēg hĕ kā ā kókír vé, ā kron ha ti? Ā hĕ kā ĕg ĩn tá jun'? Ēg hĕ kā ā kur tŭ vé', ā kaga ti', ā se ti', ĕg tŷ ā ki rĭr jé? Ki kagtŭg ĕg nŷtĭ',” he jé ag tóg ke mŭ gé.

⁴⁵ Kŷ sóg ag mý: “ŭn jagāgtar ag jagāgtān ja tŭ ājag tóg nĭgtĭ',” henh ke mŭ, “hā kŷ tóg ājag tŷ inh jagāgtān tŭ ri ke nĭ, ki hā sóg tó mŭ, mŷr, ha mĕ,” he jé sóg ke mŭ.

⁴⁶ Kŷ ag tóg jagāgtar kenh ke mŭ, hā ra tóg tŭ' henh ke tŭ nĭ, ag jagtar ke ti. Ag jāvo ŭn jykre há ag vŷ rĭr krŷg ja tŭ venh ke mŭ,” he tóg, Jesus ti.

26

Ag tŷ Jesus tén sór

(Mc 14.1-2; Lc 22.1-2; Jo 11.45-53)

¹ Vāhā tóg tó kān ja nĭgtĭ, ti tŷ nĕn tónh ke ja ti, Jesus ti. Kŷ tóg ā mré mŭ tĭ ag mý:

² “kurā régre tŭg kŷ tóg ĕg festa mág tŷ Páscoa nĭ,” he mŭ. “Ēn kā ag tóg ĕprā ke fi kósĭn ti senh ke mŭ, kŷ ag tóg ti fĕg ke mŭ, ka to ti sa jé. Inh hā vē,” he tóg, Jesus ti.

³ Hā ra Topĕ tŭ ki rĭr tĭ to pā'i mág ag vŷ vēnh mǎn mŭ sir, Topĕ vĭ to professor ag mré hā, kófa ag mré ke gé. Pā'i mág ĩn tá ag tóg vēnh mǎn mŭ sir, pā'i ĕn jĭĭn hā vŷ: Caifás, he mŭ.

⁴ Kŷ ag tóg Jesus se to jykren mŭ sir. Ag tŷ ti vatánh tá ti kǎgmĭ sór vē, ti se jé, ti tén jé.

⁵ Kŷ ag tóg to jykren kŷ: “festa tag to mĕ jé ĕg tóg ke mŭ ver,” he mŭ. “Ēg tŷ festa kā ti se kŷ vēnh génh mág hŷn tóg kutĕnh mŭ, ha vemnĭ,” he ag tóg mŭ sir jagnĕ mŷ.

Jesus tŷ Betânia tá nĭ

(Mc 14.3-9; Jo 12.1-8)

⁶ Ēn kā Jesus tóg kejĕn ĕmā tŷ Betânia tá nĭ nĭ, Simāo ĩn krĕm, vēnh kaga kren vānh han ja ĕn ĩn krĕm.

⁷ Ti jĕg nĭ ra ũ fi tóg tá jun mŭ, garrafa mǎn kŷ. Pó kupri tǎnāj tŷ tóg há nĭ, garrafa ti. Ti ki nĭ vŷ tŷ nĕn kar tǎg nĭ, ger há ĕn, ŭn kaja e ĕn. Ti gǎnh tǎg fi tóg mŭ, ger há ĕn tŷ.

⁸ Kŷ ti mré mŭ tĭ ag tóg fi vég mŭ, hā ra tóg ag mŷ kórég nĭ. Fi to jŭ kŷ ag tóg: “fi tŷ ne jé nĕn kaja e kókĕn nĕ?” he mŭ.

⁹ “Ēg tŷ ger há tag fón ke vē vē, kaja há to, ĕg tŷ ŭn jagāgtar ag mŷ vin jé,” he ag tóg mŭ.

¹⁰ Kŷ Jesus tóg mĕg mŭ, ag vĭ ti, kŷ tóg ag mŷ: “ājag tŷ ne jé fi mŷ kaga han nĕ?” he mŭ. “Inh jykre ki króm fi tóg.

¹¹ Inh hā tóg ver nĭ sĭ han mŭ, ājag mré, jāvo ŭn jagāgtar ag vŷ kurā kar ki ājag mré nŷtĭ nĭ.

¹² Fi tŷ inh kǎn vē, ag tŷ vēnh kej tá inh fón jé hā jé fi tóg ger há tag tŷ inh kri kujĕg.

13 Ag t̄y v̄enh v̄i sér tugtón k̄y ag tóg fi t̄y n̄en han m̄ũ tag tónh ke m̄ũ gé, ga kar m̄i h̄a, k̄y v̄enh kar v̄y fi t̄y n̄en han m̄ũ m̄enh ke m̄ũ, ha vemn̄i. Ki h̄a sóg tó m̄ũ,” he tóg, Jesus ti.

*Judas t̄y p̄a'i ag m̄y Jesus ven ke
(Mc 14.10-11; Lc 22.3-6)*

14 Kar k̄y ũ t̄y 12 (ke) ag k̄a ũ tóg Top̄e tũ ki r̄ir t̄i to p̄a'i ag venh t̄i m̄ũ. Ũn t̄ig m̄ũ j̄jyn h̄a v̄y: Judas Iscariotes, he m̄ũ.

15 Tá jun k̄y tóg ag m̄y: “s̄y ājag m̄y Jesus ven ke v̄e, ājag t̄y ti se jé,” he m̄ũ. “Ājag m̄y inh m̄y kajām ke tũ, s̄y ājag m̄y ti ven ke ti?” he tóg. K̄y ag tóg ti m̄y: “vó,” he k̄y j̄ankamy t̄y 30 (ke) t̄y kajām m̄ũ sir.

16 Ti t̄y j̄ankamy ěn m̄an kar k̄y tóg to j̄ykr̄en m̄ũ. “Inh h̄yn h̄e ri kenh m̄ũ, is̄y v̄enh kar vatánh tá ag m̄y Jesus ven jé?” he tóg m̄ũ sir, Judas ti, ón k̄y Jesus mr̄e t̄i m̄ũ ěn ti.

*Jesus t̄y Páscoa ko
(Mc 14.12-21; Lc 22.7-14, 21-23; Jo 13.21-30)*

17 Kej̄en tóg p̄ao j̄egja tũ konh ke kur̄a tá kr̄yg m̄ũ, k̄y Jesus mr̄e m̄ũ t̄i ag tóg ti m̄y: “ěg h̄yn h̄e tá ā m̄y carneiro s̄i t̄anh m̄ũ, ěg t̄y kon jé?” he m̄ũ.

18 K̄y tóg ag m̄y: “ěm̄a m̄ag tag ra m̄ũj̄eg,” he m̄ũ. “Tá ũ tóg n̄i n̄i. Ti m̄y: “ěg Senhor v̄y ā m̄y v̄enh v̄i j̄en̄eg m̄ũ,” hemn̄i. “Inh kur̄a v̄y kakó t̄i ha, k̄y s̄y ā ĩn kr̄em Páscoa konh há tóg t̄i, inh mr̄e m̄ũ t̄i ag mr̄e,” he tóg m̄ũ,” hemn̄i ti m̄y,” he tóg, Jesus ti.

19 K̄y ag tóg m̄ũ m̄ũ sir, ti mr̄e m̄ũ t̄i ag. Ti t̄y ag m̄y tó m̄ũ han ag tóg m̄ũ sir. Cordeiro t̄anh ag tóg m̄ũ sir, ag t̄y Páscoa k̄a ko t̄i ěn.

20 R̄a pur kar k̄y tóg tá jun k̄y ũ t̄y 12 (ke) ag mr̄e n̄i m̄ũ sir, j̄en jé.

21 Ag j̄en k̄a tóg ag m̄y: “ājag k̄am̄i ũ tóg p̄a'i ag m̄y inh ven ke m̄ũ, ag t̄y ise jé, ki h̄a sóg tó m̄ũ,” he m̄ũ.

22 K̄y tóg ag fe kaj t̄i sir, k̄y ag tóg ti m̄y: “inh m̄y vó? Inh m̄y vó?” he k̄an m̄ũ sir.

23 K̄y tóg ag m̄y: “ũ t̄y inh mr̄e p̄ao t̄y k̄a punpun m̄ũ ěn h̄a v̄e,” he m̄ũ. “Ũ t̄y ā n̄iḡe t̄y p̄enky k̄aki p̄ao t̄y k̄a punpun m̄ũ ěn h̄a v̄e. ěn h̄a v̄y ag m̄y inh ven ke m̄ũ,” he tóg.

24 “T̄ig jé sóg ke m̄ũ, is̄y t̄y ěpr̄a ke fi kósin n̄in k̄y. H̄a k̄y tóg rán k̄y n̄i, is̄ig ke ti. H̄a ra ũ t̄y ag m̄y inh ven ke m̄ũ ěn m̄y tóg v̄i kón̄an t̄av̄i han ke m̄ũ, Top̄e ti. Ti t̄y mur ja tũ n̄i ra tóg ti m̄y há t̄i v̄e,” he tóg, Jesus ti.

25 K̄y Judas tóg ti m̄y ke m̄ũ gé sir, ũ t̄y p̄a'i ag m̄y ti ven ke m̄ũ ěn ti. ěn tóg ti m̄y: “Senhor', inh h̄a m̄y?” he m̄ũ gé. K̄y tóg ti m̄y: “ki h̄a ā tóg tó m̄ũ,” he m̄ũ, Jesus ti.

*Santa Ceia
(Mc 14.22-26; Lc 22.15-20; 1Co 11.23-25)*

26 K̄y ag tóg j̄eg m̄ũ. Ag j̄en n̄ȳti ra Jesus tóg ěm̄i m̄ag m̄ũ sir. Top̄e mr̄e tóg v̄i m̄ũ sir, ěm̄i to, k̄y tóg v̄enh k̄a kugp̄an k̄y ag m̄y v̄enh k̄ap̄am m̄ũ sir, ti mr̄e m̄ũ t̄i ag m̄y. K̄y tóg: “té, ha kó,” he m̄ũ. “Inh h̄a v̄e,” he tóg, ěm̄i to.

27 Kar k̄y tóg copo v̄ag m̄ũ gé sir, vinho t̄y ki j̄en k̄y. To tóg Top̄e mr̄e v̄i m̄ũ gé. Ag m̄y copo jun k̄y tóg: “ha kronkron,” he m̄ũ.

28 “Inh kyv̄enh h̄a v̄e,” he tóg, vinho to. “Inh kyv̄enh t̄y v̄enh kar jagfy kut̄en h̄a v̄e. S̄y v̄enh e mr̄e v̄enh j̄ykre t̄ag han to ke h̄a v̄e, h̄a v̄y t̄y inh kyv̄enh ti n̄i. Inh kyv̄enh tag to Top̄e v̄y ājag m̄y v̄enh p̄ate fón ke m̄ũ, ājag t̄y ti v̄i mranh ja ti,” he tóg.

29 “Ha mẽ, uva me kron măn ke tũ inh nĩ ha. Kejẽn sóg kron măn ke mũ, inh panh tỹ tỹ ẽg pã'i nĩnh ke kurã ẽn kã. Kỹ sóg ajag mré kron măn ke mũ, ha vemnĩ,” he tóg, Jesus ti.

30 Kĩ ag tóg jãn mũ gé sir, ag jẽn kar kỹ. Ag tỹ Topẽ jé tó kar kỹ ag tóg krĩ tỹ Oliveiras ra mũ mũ sir.

Jesus tỹ Pedro mỹ tó

(Mc 14.27-31; Lc 22.31-34; Jo 13.36-38)

31 Ag tỹ ra mũn kỹ Jesus tóg ag mỹ kãmén mũ. “Kuty tag kã ajag tóg inh fón kỹ mũ kãn ke mũ,” he tóg mũ, ã mré mũ tĩ ag mỹ. “Hã kỹ tóg rãn kỹ nĩ. “Ũ tỹ carneiro ki rĩr tĩ ẽn tãnh jé sóg ke mũ, kỹ ti mẽg ag vỹ krig ke kãn ke mũ,” he tóg, Topẽ vi tỹ rãn kỹ nĩ ki,” he tóg, Jesus ti. “Hã ve jé ajag tóg ke mũ.

32 Hã ra sóg iser kar kỹ rĩr măn ke mũ. Ẽn kã sóg ajag jo tĩg ke mũ, ga tỹ Galiléia ra,” he tóg, Jesus ti.

33 Kỹ Pedro tóg ti mỹ: “inh pi(jé) ã fón kỹ tĩg ke mũ', ag kar tỹ ã ré kỹ mũ mũ ra,” he mũ.

34 Hã ra Jesus tóg ti mỹ: “ha vé,” he mũ. “Ũri, kuty tag kã ã tóg iso: ti ki kagtĩg sóg nĩ, he tãgtũ han ke mũ, galo kyr to hã. Ki hã sóg tó mũ,” he tóg, Jesus ti.

35 Hã ra Pedro tóg ti mỹ: “sỹ ã mré ter ke mũ ra sóg ã to: ti ki kagtĩg sóg nĩ, henh ke tũ pẽ nĩ,” he mũ. Kỹ ti mré mũ tĩ ag tóg hã tó kãn mũ gé sir.

Getsêmani tá

(Mc 14.32-42; Lc 22.39-46)

36 Kỹ Jesus tóg ka krãn ja tá jun mũ sir, ag mré, ka krãn ja ẽn jijin hã vỹ: Getsêmani, he mũ. Kỹ tóg ã mré mũ tĩ ag mỹ: “ha ver nĩgnĩ, tag ki,” he mũ. “Sỹ ver Topẽ mré vĩnh ke vẽ, tãtã,” he tóg.

37 Kỹ tóg Pedro mré Zebedeu krẽ ag mỹ: “inh mré kãmũ jẽg,” he mũ. Kỹ tóg fe kaj nĩ sir. Mũmẽg tóg mũ sir.

38 Kỹ tóg ag mỹ: “inh fe kaj mág tóg tĩ,” he mũ, “kỹ inh fe kaj tóg inh mỹ iser ri ke nĩ,” he tóg. “Tag ki nỹtĩmĩ, nũgnũr tũg nĩ, inh ri kén,” he tóg, Jesus ti.

39 Kỹ tóg tũg sĩ han mãn kỹ mũg ke mũ sir, Jesus ti, kỹ tóg ga kri nỹ mũ. Topẽ mré tóg vi mũ. “Panh’,” he tóg mũ. “Mỹ ã tỹ inh jagtar ke tag tỹ tũ' he jãvãnh?” he tóg. “Hã ra isỹ ã mỹ nẽn to vi mũ tag han tũg nĩ. ã tỹ nẽn han ke mũ ẽn hã han nĩ,” he tóg, Jesus ti.

40 Kar kỹ tóg ã mré mũ tĩ ag venh tĩ mũ sir, hã ra ag kar tóg nũgnũr ja nĩ. Kỹ tóg Pedro mỹ: “mỹ ajag mỹ hora pir ki nũr tũ kórég?” he mũ.

41 “Nũr tũg nĩ, Topẽ mré vĩmĩ, ajag tỹ ti vi mranh tũ nĩ jé, ù tỹ ajag kutãn mũ ra. Ajag tỹ mranh sór tũ vẽ vẽ, hã ra ajag tóg to krój nỹtĩ, hã kỹ ajag tóg mranh ke mũ,” he tóg, Jesus ti.

42 Kỹ tóg tũg mãn mũ sir, kỹ tóg Topẽ mré vi mãn mũ. Kỹ tóg: “panh’,” he mãn mũ. “ã tỹ inh jagtar ke tag tỹ tũ' henh jãvãnh nĩn kỹ sóg jagtar ke mũ. ã tỹ isỹ nẽn han ke mũ ẽn han nĩ,” he tóg.

43 Kỹ tóg ag venh tũg mãn mũ gé sir, hã ra ag tóg nũgnũr mãn nỹtĩ, ag nũr há pẽ tĩn kỹ.

44 Kỹ tóg ag mỹ vi tũ ra tĩ mũ sir, Topẽ mré vi mãn jé. Ti mỹ tóg ã tỹ tó ja ẽn tó mãn mũ.

45 Kỹ tóg ã mré mũ tĩ ag venh tũg mãn mũ gé sir, kỹ tóg ag mỹ: “ajag ne tóg nũgnũr ja nĩ” he mũ, “vẽnkhãn ja ajag tóg nĩ,” he tóg mũ. “Pêtẽm ti huri, hora ti. Ti tỹ ag mỹ inh fẽg ke nẽ ha, Topẽ vi mranh tĩ ag mỹ, isỹ tỹ ẽprã ke fi kósĩn nĩn kỹ,” he tóg.

46 “Niġnī ra, mū jé ha. Ū tŷ ag mŷ inh ven mū vŷ jun ke mū ha,” he tóg, Jesus ti.

Ag tŷ Jesus se

(Mc 14.43-50; Lc 22.47-53; Jo 18.3-12)

47 Ti tŷ ver tŷ vémén jé ra Judas tóg jun mū sir. Ū tŷ 12 (ke) ag kā ū ên vē, Judas ti. Ti mré polícia ag tóg kāmū mū. Rógro génh kŷ ag tóg kāmū mū, ka kykyv génh kŷ ke gé. Topē tū ki rŷr tŷ to pā'i ag tŷ ag jēgnē vē, kófa ag tŷ ke gé.

48 Hā ra ū tŷ ag mŷ Jesus ven ke mū ên tóg ag mŷ: “ti ki sóg nhun kenh mū,” he ja nī. “Sŷ ūn ki nhun ke mū ên hā semnī,” he ja tóg nī ag mŷ.

49 Hā kŷ tóg vēsŷmér Jesus to grēn ke kŷ ti mŷ: “ā mŷ há, Senhor?” he mū. Kŷ tóg ti ki nhun ke mū, Judas ti.

50 Hā ra Jesus tóg ti mŷ: “régre!,” he mū. “Ā tŷ nén han ke mū ên han nī,” he tóg.

Kŷ polícia ag tóg vēsŷmér ti to ge kŷ ti ség mū sir, Jesus ti.

51 Kŷ Jesus mré tŷ tŷ ū tóg rógro kunūnh kŷ polícia ū nŷrēg kym mū sir. Topē tū ki rŷr tŷ to pā'i mág camarada vē, ti tŷ ūn nŷrēg kym mū ên ti.

52 Hā ra Jesus tóg ti mŷ: “ā rógro fēg han ra,” he mū. “Ēg tŷ rógro tŷ ke kŷ ag tóg rógro tŷ ēg tén ke mū gé, ha vemnī,” he tóg.

53 “Isŷ inh panh mŷ to ví mū ra tóg inh mŷ ā tŷ jēgnē jafā ag jēgnēnh ke mū vē, ūn e ên, 12 mil (ke) káfór, ag tŷ iŷy nŷgān jé.

54 Hā ra sóg ve sór mū, nén tŷ iso rán kŷ nī ên ti, hā kŷ sóg ti mŷ tag to ví tū nī. Ve jé sóg ke mū ha, inh jagtar ke ti,” he tóg, Jesus ti.

55 Ên kā tóg polícia ag mŷ: “ājag ne tóg rógro génh kŷ kāmū mū', ka kykyv mré', ājag tŷ ise jé!,” he mū. “Inh pí(jé) tŷ bandido nī'. Kurā kar ki sóg ājag mré jé ja nŷgtŷ, Topē jo ĩn krēm. Vēnh kar kanhrān kŷ sóg tá nī ja nŷgtŷ, hā ra ājag tóg tá iség tū nī vē mŷr,” he tóg.

56 “Hā ra sóg nén tŷ iso rán kŷ nī ên vég mū, Topē ví tŷ ag tŷ iso nén rán ja ên ti, hā kŷ ājag tóg ke mū,” he tóg, Jesus ti.

Kŷ ti mré mū tŷ ag tóg ti ré kŷ pétē kán mū sir, vēnh pigju jé, mŷr, ha mē.

Pā'i ag tŷ Jesus ki jēmē

(Mc 14.53-65; Lc 22.54-55, 63-71; Jo 18.12-14, 19-24)

57 Kŷ ū tŷ ti ség mū ag tóg ti pére mū mū, Topē tū ki rŷr tŷ to pā'i mág ra, hā vŷ: Caifás, he mū. Tá ag tóg vēnh mán kŷ nŷtŷ, Topē ví to professor ag, kófa ag ke gé.

58 Hā ra Pedro tóg Jesus nón kātŷ mū, kuvar há tá, kŷ tóg Topē tū ki rŷr tŷ to pā'i mág ĩn kára rá mū sir. Polícia ag mré tóg tá nī nī. Ti tŷ ag tŷ Jesus tŷ hēn ri kenh ke mū ên ve sór vē.

59 Kŷ Topē tū ki rŷr tŷ to pā'i ag tóg ū ag jāvānhvānh mū, ag tŷ Jesus jykre kórég tóg jé. Ti ví to ag tóg ti tén sór mū, kófa ag, vēnh jyvēn tŷ kar ag.

60 Hā ra ag tóg ū tŷ ki hā tóg mū vég tū nī. Ū tŷ hēn ri ke ag tóg ón kŷ ti jykre kórég tóg mū, hā ra tóg ag mŷ ki krov tū nī. Kŷ vāhā ūn régre ag tóg tá junjun kŷ ón kŷ ti to ví mū.

61 Ên ag vŷ tóg sir: “ti ví vēnhmŷ mē ēg,” he mū. “Topē jo ĩn kókén há inh nŷgtŷ, he ja tóg nī. Kókén kar sóg ū han mán ke mū. Kurā tāgtŷ ki tóg kar kŷ nī, ĩn ti, ha vemnī, he ja tóg nī, Jesus ti,” he ag tóg mū, ón kŷ ti to ví kŷ.

62 Kŷ Topē tū ki rŷr tŷ to pā'i mág vŷ jēgnē mū sir, kŷ tóg ti mŷ: “ā tŷ nén tónh ke mŷ tŷ?” he mū. “Ag hā ne ā ví kónān tag to ja nī gé!” he tóg.

⁶³ Hã ra Jesus tóg hun ke mũ, nén ù tó mẽ kã. Kÿ pã'i mág tóg ti mÿ: “Topê vÿ rÿr nĩ,” he mũ. “Ûn rÿr nĩ vÿ ãg vég mũ. Ti rÿnve sóg ã ki jëmég mũ. ã mÿ tÿ Cristo nĩ, ã mÿ tÿ Topê kósín nĩ? Ha ãg mÿ tó,” he tóg, pã'i mág ti.

⁶⁴ Kÿ Jesus tóg ti mÿ: “ki hã ã tóg tó mũ,” he mũ. “Kÿ sóg ãjag mÿ tag tó mũ gé, ha mẽ. Êprã ke fi kósín ãn vÿ tÿ inh nĩ,” he tóg. “Kÿ ãjag tóg ù tÿ nén (ũ) kar han mũ ãn pëgja tá inh venh ke mũ. Kÿ sóg kanhkã góg kãmĩ kátérenh ke mũ gé,” he tóg, Jesus ti.

⁶⁵ Kÿ pã'i mág ãn tóg ã kur tÿ jaran' ke mũ sir, jũ kÿ. Kÿ tóg: “Topê kato vÿ kónãn ti huri,” he mũ. “Mẽ kãn ãg mÿr, kÿ ãg tóg ù tÿ ti jykre kórég tónh ke ù jãvãnh mãn ke tũ nĩ ha,” he tóg.

⁶⁶ “Ëg hÿn ti tÿ hẽ ri kenh mũ ha?” he tóg. Kÿ ag tóg ti mÿ: “ter jé tóg ke mũ, ti vÿ tag to,” he kãn mũ sir.

⁶⁷ Kÿ ag tóg ti kakã to sugrug mũ sir, ti kakã ki tânã ag tóg mũ gé sir. Ag kã ù tóg ti vatãnh tá ti tânã kÿ ti mÿ:

⁶⁸ “Cristo nẽji tÿ ã jẽ, kÿ ã nẽji nén kar ki kanhró nĩ,” he mũ. “Û nÿ ã tânã?” he tóg mũ gé. Ti tânã kÿ tóg ke mũ. Gen kÿ ag tóg ti to é he mũ.

Pedro tÿ Jesus to ón

(Mc 14.66-72; Lc 22.56-62; Jo 18.15-18, 25-27)

⁶⁹ Hã ra Pedro vÿ re tá nĩ nĩ, ãn vãso kã. Kÿ pã'i camarada ù fi tóg ti ve jé kãkutẽ mũ, kÿ fi tóg ti mÿ: “Jesus mré ã tóg tÿg mũ gé, Galiléia tá ke ãn mré,” he mũ.

⁷⁰ Hã ra tóg: “vó,” he mũ. “Á tÿ ne tó nẽ hÿn?” he tóg mũ, Pedro ti. Kÿ ag kar vÿ ti vÿ mẽg mũ.

⁷¹ Kÿ tóg jãnkã fÿn rãm sór mũ. Hã ra ù fi tóg ti vég mũ gé, kÿ fi tóg tá ke ag mÿ: “Jesus mré ke ù vẽ, Nazaré tá ke ãn mré ke ù vẽ,” he mũ gé.

⁷² Hã ra tóg: “vó,” he mãn mũ. “Ti ki kagtÿg sóg nĩ, Topê vÿ ki kanhró nĩ,” he tóg, Pedro ti.

⁷³ Si há ke tũ ra ù tÿ tá nÿtÿ ag kã ù ag tóg ti venh kãmũ kÿ ti mÿ hã tó mãn mũ gé. Kÿ ag tóg Pedro mÿ: “ha mẽ, ag kã ù vÿ tÿ ã nĩ,” he mũ. “Á vÿ ki ãg tóg ã ki kanhrãn mũ,” he ag tóg mũ.

⁷⁴ Hã ra tóg: “vó!,” he mãn mũ. “Inh pi(jé) ti ki kanhró nĩ! Inh ón mũ ra Topê vÿ inh vóg kónãn mũ vẽ,” he tóg, Pedro ti. Hã ra vësÿmér galo tóg kyr mũ.

⁷⁵ Kÿ Pedro tóg Jesus vÿ to jykrén mũ, ti tÿ ti mÿ: “iso ã tóg: ti ki kagtÿg sóg nĩ, he tãgtũ han ke mũ, galo kyr ke to hã,” he ja ãn mĩ. Tag mĩ êkrén kÿ tóg tá kãkutẽ mũ sir, hã ra tóg fÿy jagy han mũ sir, Pedro ti.

27

Ag tÿ Pilatos mÿ Jesus ven

(Mc 15.1; Lc 23.1-2; Jo 18.28-32)

¹ Tÿ vaj kÿ kusã ki ag tóg Jesus to jykrén mũ sir, Topê tũ ki rÿr tÿ to pã'i ag, kófa ag mré hã. Ag tÿ ti tén sór vẽ.

² Kÿ ag tóg ti mrÿnh mũ sir. Ti përe mũn kÿ ag tóg pã'i mág tÿ governador mÿ ti fëg mũ sir, Pilatos ãn mÿ.

Judas ter

(Hk 1.16-19)

³ Hã ra Judas tóg vég mũ. Pã'i ag mÿ tóg Jesus ti ven ja nĩ, ag tÿ ti se jé. Kÿ tóg ag tÿ ti tén sór mũ tag vég mũ, Judas ti. Kÿ tóg to jykrén mãn mũ sir. Vãhã tóg

ti m̄y e t̄i. K̄y tóg jánkamy t̄y prata ěn ma k̄at̄i m̄u sir, ũ t̄y 30 (ke) ěn. Ma k̄at̄ig k̄y tóg Topē t̄u ki r̄ir t̄i to p̄a'i ag m̄y ven m̄u, kófa ag m̄y.

⁴ K̄y tóg ag m̄y: “ti kórég han inh,” he m̄u. “Ti pi(jé) nén ũ kórég han ja n̄gt̄i, h̄a k̄y tóg vĕnhm̄y n̄i, ti t̄y inh v̄i to ter k̄y,” he tóg.

⁵ H̄a ra ag tóg ti m̄y: “ěg t̄u pijé,” he m̄u. “Ā t̄u h̄a n̄e’,” he ag tóg m̄u. K̄y tóg jánkamy ěn v̄am m̄u sir, Topē jo ĩn krĕm, k̄y tóg hĕn ra t̄i m̄u sir. Tá tóg ā nunh k̄a vĕnh j̄aj̄an m̄u sir, k̄y tóg ter m̄u sir.

⁶ K̄y Topē t̄u ki r̄ir t̄i to p̄a'i ag v̄y jánkamy ěn m̄an k̄y to jykrĕn m̄u. “Ěg t̄y Topē m̄y jánkamy tag vin k̄y tóg vĕnhm̄y t̄i. Vĕnh kyvĕnh kaj̄am ja ti n̄i, h̄a k̄y ěg tóg Topē m̄y vin sór t̄u n̄i,” he ag tóg m̄u sir, jánkamy ěn to.

⁷ K̄y ag tóg to vĕnh m̄an k̄y to jykrĕn m̄u. To jykrĕn k̄y ag tóg t̄y ěp̄y kaj̄am m̄u, ag t̄y tá go'or vég t̄i ěn. Tá ag tóg fóg ag kej han sór m̄u, fóg t̄y Jerusalém ra pasa t̄i ag m̄y.

⁸ H̄a k̄y ěg tóg ěp̄y ěn to: “ěp̄y kyvĕnh,” he t̄i.

⁹ H̄a ra Topē v̄i to t̄i t̄y Jeremias v̄y Judas to tag rán ja n̄i, ha mĕ: “jánkamy t̄y 30 (ke) t̄y ag tóg ěp̄y kaj̄am ke m̄u. Jánkamy ěn t̄y ag tóg ěpr̄a ke ũ kaj̄am vén ke m̄u, Israel ag, ti kaja tag t̄y ag m̄y há n̄yn k̄y.

¹⁰ Ěpr̄a ke ěn t̄y kaj̄am kar k̄y ag tóg t̄y ěp̄y kaj̄am m̄u sir, ag t̄y tá go'or vég t̄i ěn. H̄a to ja tóg n̄i, inh m̄y, ěg jóg t̄y Topē ti,” he ja tóg n̄gt̄i, Jeremias ti. H̄a ra tóg ge n̄i.

Pilatos t̄y Jesus ve

(Mc 15.2-5; Lc 23.3-5; Jo 18.33-38)

¹¹ H̄a ra Jesus tóg fóg t̄y p̄a'i mág r̄j ě n̄i. K̄y p̄a'i mág tóg ti ki jĕmĕ sór m̄u, k̄y tóg: “ā m̄y t̄y Judeu ag p̄a'i n̄i?” he m̄u. K̄y Jesus tóg ti m̄y: “ki h̄a ā tóg to m̄u,” he m̄u.

¹² K̄y Topē t̄u ki r̄ir t̄i to p̄a'i ag tóg ti kato v̄i mág han m̄u, kófa ag ke gé, h̄a ra tóg hun ke k̄y ě n̄i.

¹³ K̄y Pilatos tóg ti m̄y: “m̄y ā m̄y t̄y nén ũ t̄u n̄i, ag t̄y ā kato v̄i mág han m̄u tag ti?” he m̄u.

¹⁴ H̄a ra Jesus tóg v̄i m̄an t̄u n̄i, k̄y tóg Pilatos m̄y e t̄i sir.

Ag t̄y Jesus to: ter jé tóg ke m̄u, he

(Mc 15.6-15; Lc 23.13-25; Jo 18.39-19.16)

¹⁵ H̄a ra Pilatos tóg ag m̄y vése ag kar k̄a ũn pir kavãg t̄i, festar t̄y Páscoa kar ki. Ti jykre vĕ. Ag t̄y ũn to v̄i m̄u ěn kyvãg tóg t̄i.

¹⁶ K̄y ũ tóg se k̄y ě n̄i, ěn k̄a. Ũn vĕnhm̄y vĕ, ũ t̄y ag ri ke t̄u, ti j̄ijin h̄a v̄y: Barrabás, he m̄u.

¹⁷ J̄avo ag tóg tá vĕnhm̄an k̄y n̄yt̄i, Judeu kar ag. K̄y Pilatos tóg ag m̄y: “inh h̄yn ũ kavãn ha?” he m̄u. “Ũ n̄y ājag m̄y há n̄i? Barrabás m̄y, Jesus m̄y vó, ag t̄y ũ to: “Cristo v̄y t̄y ti n̄i,” he t̄i ěn?” he tóg, Pilatos ti.

¹⁸ P̄a'i ag t̄y véké Jesus to j̄u n̄yt̄in ki kanhró tóg n̄i, Pilatos ti. Ti há n̄in h̄a k̄y ag tóg ti to j̄u m̄u, h̄a k̄y tóg ti kavãn sór m̄u, Pilatos ti.

¹⁹ Fóg t̄y p̄a'i ěn t̄y vĕnh j̄yvĕn jaf̄a tá n̄in k̄y ti pr̄u fi tóg ti m̄y vĕnh v̄i jĕnĕg m̄u, k̄y fi tóg ti m̄y: “vĕnh jykre kuryj han ti t̄i,” he m̄u, Jesus to. “H̄a k̄y ti vóg sór t̄ug n̄i. Kuty tag k̄a sóg ti to vĕnh péti kónãn, ěg jagtar ke ti ve inh, inh vĕnh péti ki,” he fi tóg, Pilatos m̄y vĕnh v̄i jĕnĕn k̄y, h̄a k̄y tóg ti kavãn sór t̄av̄i han m̄u, Pilatos ti.

²⁰ H̄a ra Topē t̄u ki r̄ir t̄i to p̄a'i ag tóg vĕnh kar kr̄in m̄u sir, kófa ag mré, vĕnh kar ag t̄y Barrabás kav̄ar k̄y ě ve sór jé, ag t̄y Jesus ter ve sór jé.

21 Kÿ fóg tÿ pâ'i tóg ag ki jëmẽ mãn mũ. “Inh hÿn ùn régre tag ag kã ù tÿ hẽ kavãn mũ ha?” he tóg. Kÿ ag tóg ti mÿ: “Barrabás ti,” he mũ.

22 Kÿ Pilatos tóg ag mÿ: “kÿ inh Jesus tÿ hẽ ri kenh mũ?” he mũ. “Ag tÿ ù to: “Cristo vÿ tÿ ti nĩ,” he tĩ ãn tÿ inh hẽ ri kenh mũ?” he tóg. Kÿ ag tóg ti mÿ: “cruz to ti sã,” he kãn mũ sir.

23 Kÿ fóg tÿ pâ'i tóg ag mÿ: “ti kórég tÿ ne han ti?” he mũ. Hã ra ag tóg prẽnprẽr mũ sir: “!..Cruz to ti sã..!” he ag tóg mũ sir, prẽnprẽr kÿ.

24 Ag tÿ hẽ ri ke tũ tóg nĩ, Pilatos ti, hã kÿ tóg ag mÿ hã han sór mũ. Vẽnh génh kutẽ nĩ ve tóg nĩ, hã kÿ tóg goj jé prẽr mũ. Kÿ tóg kã nĩgpég mũ sir, vẽn kar rĩnve, Pilatos ti, kÿ tóg ag mÿ: “inh jykre pijé!,” he mũ. “Inh nĩgé kavẽn ke tũ ti nĩ, ti kyvẽn ti. Ùn jykre kuryj vè, kÿ sóg ti tén jãvãn nĩ. Ajag jykre vè,” he tóg, Pilatos ti.

25 Kÿ vẽn kar ag tóg ti mÿ: “ẽg jykre vè,” he kãn mũ. “Ëg hã ne ti tén sór mũ! Kÿ Topẽ ẽg hã vóg kónãn ke mũ, ẽg krẽ ag ke gé, ti tÿ ti ter to ù vóg kónãn ken kÿ,” he ag tóg, vẽn kar ãn ag.

26 Kÿ Pilatos tóg Barrabás kavãn mũ sir. Jesus to tóg soldado ag mÿ: “ha ti mrãnmrãn,” he mũ sir. Ag tÿ ti mrãnmrãn kar kÿ Pilatos tóg ag mÿ ti fẽg, soldado ag tÿ ka to ti sa jé.

*Soldado ag tÿ Jesus vóg kónãn
(Mc 15.16-20; Jo 19.2-3)*

27 Kÿ fóg tÿ pâ'i krẽm soldado ag tóg Jesus pére mũ mũ, pâ'i ãn ra, ãn tÿ Palácio do Governador ãn ra. Kÿ ag tóg soldado ù ag jé prẽr kãn mũ.

28 Ti kur kunũg ag tóg mũ, kÿ ag tóg kur kusũg tÿ ti kri fón mũ.

29 Sónh pirĩn kÿ ag tóg tÿ ti krĩ tógfĩg mũ sir, krĩ tógfĩn ja rẽr tÿ. Vãn tÿ ag tóg ti nĩgé kã fẽg mũ, ti pẽgja tá. Kÿ ag tóg ti krẽm grĩnhgrĩnh ke mũ sir, ón kÿ. Ti to é he ag tóg mũ, hã kÿ ag tóg: “viva, Judeu ag pâ'i!,” he mũ.

30 Kÿ ag tóg ti to sugsgũ mũ gé. Vãn ãn tÿ ag tóg ti krĩ mũ mrãnmrãn mũ sir.

31 Ag tÿ ti nyg kar kÿ ag tóg ti ki kunũg mũ, kur ãn ti. Kÿ ag tóg ti tũ pẽ tÿ ti kãra rãg mãn mũ sir. Kÿ ag tóg ti pére mũ mũ, ag tÿ cruz to ti san jé sir.

*Jesus tÿ cruz to sa
(Mc 15.21-32; Lc 23.26-43; Jo 19.17-27)*

32 Ag mũn kã ag tóg ù kato tẽ mũ, Cirene tá ke ù, ti jijin hã vÿ: Simão, he mũ. Ën mÿ ag tóg vĩ tar han mũ, ti tÿ Jesus cruz vyn jé ti jo, hã kÿ tóg vyn kÿ tĩ mũ.

33 Gen kÿ ag tóg Gólgota tá junjun mũ sir. Gólgota to ẽg tóg: vẽn krĩ kuka, he ti, ẽg vĩ ki.

34 Tá junjun kÿ ag tóg ti mÿ vinagre ven mũ, nén ù tÿmẽ jÿnh mré ha. Kÿ tóg kron sĩ han mũ, hã ra tóg kron sór tũ nĩ, vẽnhkagta tag.

35 Kÿ ag tóg cruz to ti sãg mũ sir. Ti kur tÿ ag tóg jagnẽ mÿ vẽn kãpãm mũ sir, to ag tóg jogar he mũ gé, ti kur to, soldado ag.

36 Kÿ ag tóg nĩgnĩg kÿ nÿtĩ, ti ki rĩr jé, soldado ag.

37 Ag tÿ nén tÿ ti kato vĩ mũ vÿ rán kÿ nĩ, hã vÿ: “Jesus, Judeu ag pâ'i tÿ rei vè,” he mũ. Ti kri tóg sa, vẽn rán ti. Ti tÿ nẽji vèsÿ pâ'i tÿ rei han mũ to ag tóg ti tén mũ.

38 Ti kóm ag tóg ùn régre ag tÿ cruz to sãg mũ gé, bandido ag. Kÿ ù tóg ti pẽgja tá sa, jó ù tóg ti jakãn tá sa.

39 Kÿ ù tÿ mũ mũ mũ ag tóg ti nyg' he mũ gé, vÿn vÿn hen kÿ.

40 “Ä mÿ Topë jo ïn kókén sór mü’?” he ag tóg mü. “Ä mÿ kurã tägtü ki ù han mãn sór mü’? Vënh kren han ra kema’, cruz to kãtére kema’, ä tÿ tÿ Topë kósin nÿn kÿ,” he ag tóg ti mÿ.

41 Ge ag tóg mü gé. Topë tÿ ki rÿr tÿ to pã’i ag, Topë vÿ to professor ag mré hä, kófa ag mré hä. Ti nyg ag tóg mü gé, kÿ ag tóg jagnë mÿ:

42 “Û ag krenkren han tóg, hä ra tóg vënh hä kren han ki kagtÿg nÿ,” he mü. “Israel pã’i tÿ rei je cruz to kãtére kema’, êg tÿ ve je, êg tÿ ti ki ge jé,” he ag tóg.

43 “Topë ki ti nÿji rã kÿ jë, kÿ Topë jé ti kren han, ti tÿ ti to há nÿn kÿ. “Topë kósin vÿ tÿ inh nÿ,” he ti mÿr,” he ag tóg ti to, ti nyg kÿ, Judeu pã’i ag.

44 Kÿ bandido ag, ù tÿ ti kóm cruz to nÿtÿ ên ag tóg ti nyg mü gé.

Jesus ter

(Mc 15.33-41; Lc 23.44-49; Jo 19.28-30)

45 Rã tÿ êg nÿno kã sa ra tóg kuty’ he mü sir, ga kar mÿ hä. Kuty ên tóg hora tägtü tÿg mü.

46 3 hora ki Jesus tóg prër mü sir, kÿ tóg: “Eli, Eli, lemá sabactani?” he mü. Êg vÿ ki êg tóg tag to: “Topë, Topë, ä tÿ ne jé isovãnh nÿ?” he mü.

47 Kÿ ù tÿ tá nÿtÿ ag tóg mëg kÿ (ag tóg) jagnë mÿ: “Elias jé tóg prër mü,” he mü.

48 Kÿ ù tóg vënhvãg mü sir, kÿ tóg esponja tÿ vinho prãg mü, vinho kaja pir tÿ. Ka jurÿn kÿ tóg tÿ kusón kÿ vinho kãra rãg kÿ ti mÿ ven mü sir, ti tÿ ki ùnh’ ùnh’ ke jé.

49 Hã ra ù ag tóg: “toreg’,” he mü. “Hën ri ke mÿn Elias kãtÿg mü, ti kren han jé,” he ag tóg.

50 Hã ra Jesus tóg prër mág han mãn kÿ hun ke mü sir.

51 Hã ra Topë jo ïn krëm kur tÿ jãnkã nÿfe tóg jaran ke mü, ha më, ti jar tóg vënh kãkym ke kãn mü sir, ha më.

52 Kÿ ga tóg ragra ke mü gé sir, pãró vÿ gÿm ke mü, vënh kej tÿ hën ri ke vÿ nugnor mü, kÿ ù tÿ Topë ki ge kÿ nÿtÿ tÿ hën ri ke ag tóg rÿnrÿr mãn mü gé, ùn kãgter ja ag. Äjag kej tá ag kãpa mü.

53 Ên ag vÿ Jesus rÿr mãn kar kÿ tá kãpa kÿ cidade tÿ Jerusalém kãra ge mü, kÿ ag tóg ùn mÿ vënh venven mü sir, kÿ ù tÿ hën ri ke ag tóg ag vigvég mü, Jerusalém tá ke ag.

54 Hã ra capitão tóg soldado ag mré Jesus ki rÿr jë nÿ. Ga tÿ ragra ke ên vég ag tóg mü, nén kar ti, Jesus ter ên kã. Kÿ tóg ag mÿ e tÿ. Kÿ ag tóg: “hã ja vë,” he mü. “Topë kósin ja vë mÿr,” he ag tóg mü, capitão ag.

55 Kÿ ùn tÿtã fag vÿ tá nÿtÿ gé, ù tÿ hën ri ke fag. Kuvar há tá nÿtÿ kÿ fag tóg ti vég nÿtÿ nÿ. Ti mré fag tóg kãmü ja nÿ, ga tÿ Galiléia tá. Ti ki fag rÿr ja ñgtÿ.

56 Fag kã ù fi vÿ tóg tÿ Maria Madalena fi nÿ, kÿ ù fi tóg tÿ Maria fi nÿ gé, José mré Tiago mÿnh tag fi. Kÿ ù fi vÿ tÿ Zebedeu krë ag mÿnh fi nÿ gé. Fag mré ke ù fag vÿ tá nÿtÿ gé.

Ag tÿ vënh kej kãkã Jesus fi

(Mc 15.42-47; Lc 23.50-56; Jo 19.38-42)

57 Rãké tóg nÿ ha, kÿ ùn há tóg tá jun mü. Arimatéia tá tóg kãtÿg ja nÿ. Ti jÿjin hä vÿ: José, he mü. Jesus mré ke ù vë gé.

58 Ên vÿ tóg Pilatos venh tÿ mü, kÿ tóg ti mÿ Jesus to vÿ mü, ti ter kar kÿ. Kÿ Pilatos tóg soldado ag mÿ: “ha ti mÿ ti fi,” he mü.

59 Kÿ José tóg Jesus va tÿg kÿ ti pãg mü sir, kur jãnhkri tÿ.

⁶⁰ Kŷ tóg ã kej kãkã ti fig mũ sir. Pó kãkã tóg han ja nĩgtĩ, vènh kej ti, hã ra tóg tãg nĩ. José tũ vè, vènh kej èn ti. Èn kãkã tóg ti fig mũ sir, kŷ tóg pó tãpér tĩn mũ, vènh kej jãnkã to, pó èn tũ tóg ti kej nĩfénh mũ sir, José ti. Kŷ tóg tĩ mũ.

⁶¹ Hã ra Maria Madalena fi vỹ tá nĩ nĩ, Maria ù èn fi ke gé. Ti kej rã fag tóg nĩgnĩ kŷ nỹtĩ nĩ.

Ag tỹ ti kej ki rĩr

⁶² Tỹ vaj kŷ, festa kurã kã Topè tũ ki rĩr tĩ to pã'i ag tóg vènh mãn mãn mũ sir, Fariseu ag mré hã. Kŷ ag tóg Pilatos venh mũjèg.

⁶³ Ti mỹ ag tóg: “governador,” he mũ. “Vènh kar krĩn kónãn tĩ èn tóg tag to ja nĩ, ha mè: “kurã tãgtũ ki sóg rĩr mãn ke mũ,” he ja ti nĩ. Èg tỹ tag to jyrkén kŷ èg tóg ã mỹ nén ù to vĩ sór mũ gé ver.

⁶⁴ Soldado ag tỹ ti kej ki rĩr há tóg tĩ, kurã tãgtũ ki. Èg mỹ tóg ti mré mũ ti ag tỹ ti to nón kŷ ti péjunh ha mè tĩ. Èg mỹ tóg ag tỹ ti péju kar vènh kar mỹ: “rĩr mãn ti, ã ter kar kŷ,” henh ha mè tĩ gé. Kŷ vènh ó tãg tag vỹ ti ón ja èn kãfór pè nỹnh ke mũ. Hã kŷ soldado ag jègnè, ag tỹ ti kej ki rĩr jé,” he ag tóg, Pilatos mỹ.

⁶⁵ Kŷ Pilatos tóg ag mỹ: “hej,” he mũ. “Vỹ nỹtĩ, ti kej ki rĩr ke mũ ag,” he tóg, soldado ù ag to. “Ti kej ki rĩr há han nĩ, ge kŷ,” he tóg.

⁶⁶ Kŷ ag tóg mũ kŷ ti kej to ag vin mũ, ti kej ki rĩr ti èn ag. Ti kej nĩfénh mũ èn ség ag tóg mũ gé, vãfe tỹ, pãró to. Kŷ ag tóg go'or tỹ vãfe èn kri tỹ tam ke mũ, ù tỹ ti kej nife kunũg tũ nĩ jé.

28

Jesus rĩr mãn

(Mc 16.1-10; Lc 24.1-12; Jo 20.1-10)

¹ Vènhkán ke kurã tỹ vaj kŷ, semana tỹ kurã ve tag ki Maria Madalena fi tóg ti kej venh tĩ mũ, kusã ki, Maria ù èn fi mré hã.

² Hã ra ga tóg ragra ke tar han mũ sir. Kŷ Topè tỹ jènè jafã tóg kanhkã tá kãtère mũ. Ti kej tá jun kŷ tóg pó tỹ jãnkã nĩfe èn tĩn mũ, kŷ tóg kri nĩ mũ sir, pó èn kri.

³ Hã ra tóg tỹ ta tỹ kóm kóm ke ve nĩ, anjo èn ti. Ti kur vỹ kópréj nĩ, kukryr kó kupri ri ke.

⁴ Kŷ soldado ag tóg jũrũn ke mũ, kamèg kŷ ag tóg kãgter nỹtĩ ve nĩ.

⁵ Kŷ Topè tỹ jènè jafã tóg ùn tỹtã fag mỹ vĩ mũ, kŷ tóg: “kamèg tũg nĩ,” he mũ. “Jesus jãvãnh ãjag nỹtĩ, ag tỹ cruz to ùn sãg mũ èn ti.

⁶ Ki ti tũ nĩ, rĩr ti huri, hã kŷ tóg ãjag mỹ tó ja nĩgtĩ. Ki ti nỹ ja nĩgtĩ, ha kãge jèg, ãjag tỹ ti nỹgia ve jé,” he tóg mũ, fag mỹ, anjo ti.

⁷ “Kuri, ti mré mũ tĩ ag mỹ tónh mũjèg, ti rĩr mãn ti, ti ter kar kŷ. Ha vé, ãjag jo tóg tĩg mũ, Galiléia ra. Tá ãjag tóg ti venh mũ, ha vemnĩ. Inh vĩ kã jatũ he tũg nĩ,” he tóg, Topè tỹ jènè jafã ti.

⁸ Kŷ fag tóg ti kej tá kãpa mũ sir, to fũrũn kŷ. Fag mỹ tóg e tĩ. Fag mỹ tóg sér pè tĩ, hã kŷ fag tóg pétè mũ sir, fag tỹ Jesus mré mũ tĩ ag mỹ tó jé.

⁹ Fag mũ ra Jesus hã ne fag kato jun ke mũ, kŷ tóg fag mỹ: “mỹ sér nỹtĩmĩ,” he mũ. Kŷ fag tóg ti to grèn ke mũ, ti pèn kãgmĩg fag tóg mũ sir. Ti krèm fag tóg mũg ke mũ gé.

¹⁰ Kŷ Jesus tóg fag mỹ: “kamèg tũg nĩ,” he mũ. “Ha mũjèg, inh régre ag mỹ tónh mũjèg, ag tỹ ga tỹ Galiléia ra mũ jé. Tá ag tóg inh venh ke mũ,” he tóg, Jesus ti. Kŷ fag tóg mũ mũ.

Soldado ag ón

11 Fag mún kŷ soldado ěn ag tóg cidade ra mŷ mŷ, soldado tŷ Jesus kej ki rŷr mŷ ěn ag. Tá junjun kŷ ag tóg Topĕ tŷ ki rŷr tŷ to pã'i ag mŷ tó kãn mŷ, ag tŷ nĕn vĕg mŷ ěn ti. Kŷ tóg ag mŷ e tŷ.

12 Kŷ ag tóg kófa ag mrĕ vĕnh mãn mŷ sir, ag tŷ to jykrĕn jĕ. “Ěg hŷn hĕ ri kenh mŷ, vĕnh kar tŷ ti rŷr mãn tag to: ag ón vĕ, he jĕ?” he ag tóg mŷ jagnĕ mŷ. Ag tŷ to jykrĕn kar kŷ ag tóg soldado ag mŷ jãnkamy e ven mŷ sir.

13 “Jãnkamy tag to vĕnh kar mŷ un'ón,” he ag tóg mŷ, pã'i ag, soldado ag mŷ. “Un'ón kŷ vĕnh kar mŷ: ěg nŷgnŷr mŷ jãvo Jesus mrĕ mŷ tŷ ag tóg ti péju ja nŷ, kuty si há tá, há kŷ tóg ki tŷ nŷ ha, hemnŷ,” he ag tóg, pã'i ag, soldado ag mŷ.

14 “Hĕn ri ke mŷn ãjag pã'i tŷ governador tóg mĕnh mŷ, ãjag nŷgnŷr ja ti. Kŷ ěg tóg ti mrĕ vĕmĕn ke mŷ, ti tŷ ãjag vóg kónãn tŷ nŷ jĕ,” he ag tóg, Topĕ tŷ ki rŷr tŷ to pã'i ag, soldado ag mŷ.

15 Kŷ soldado ag tóg jãnkamy ěn mãn kŷ mŷ mŷ sir. Vĕnh kar mŷ ag tóg un'ón mŷ mŷ sir, Jesus mrĕ mŷ tŷ ag to. Há kŷ Judeu ag tóg ver tag tó tŷ, ŷnri.

Jesus tŷ ã mrĕ mŷ tŷ ag mŷ vĕnh ven (Mc 16.14-18; Lc 24.36-49; Jo 20.19-23; Hk 1.6-8)

16 Há ra ti mrĕ mŷ tŷ ag tóg ga tŷ Galiléia ra mŷ mŷ, pãnónh ŷ ra, Jesus tŷ ag mŷ: “ěn ra mŷjĕg,” he ja ěn ra.

17 Kŷ ag tóg tá ti vĕg mŷ sir, kŷ ag tóg ti krĕm mŷgmŷg ke mŷ sir. Há ra ag kãmŷ ŷ ag mŷ tóg vĕnhmŷ tŷ, ag tŷ ti vĕg mŷ ra, kŷ tóg ag mŷ ki há ke tŷ nŷ.

18 Kŷ Jesus tóg ag rã há jun mŷ, kŷ tóg ag mrĕ vĕmĕn mŷ sir. “Nĕn kar vŷ tŷ inh krĕm ke nŷ ha, kanhkã tá ke kar, ga tá ke kar ke gé,” he tóg, Jesus ti.

19 “Hã kŷ mŷjĕg, povo kar kanhrãn jĕ, ag tŷ inh ki ge jĕ. Ag tŷ inh ki ge kŷ nŷtŷn kŷ ag kygpemnŷ gé. Inh panh jiji tómnŷ, ag kygpe kŷ, kŷ ti kósin jyjy tómnŷ gé, kŷ Topĕ kuprŷg jiji tómnŷ gé, ãjag tŷ ag kygpe kŷ.

20 Kŷ isŷ ãjag mŷ nĕn tó mŷ kãmĕn kãn nŷ gé, ag tŷ ki króm jĕ. Ha mĕ, ãjag mrĕ sóg jĕ nŷ, kurã kar ki, ga tŷg ke kurã ki ke gé. ãjag tovãnh ke tŷ sóg nŷ ha,” he tóg, Jesus ti. Ti tŷ ã mrĕ mŷ tŷ ag jĕgnĕg mŷn há vĕ.

MARCOS TÏ RÁ

João Batista tÏ Jesus tó
(Mt 3.1-12; Lc 3.1-18; Jo 1.19-28)

¹ SÏ Jesus Cristo kãme sér tónh ke vë, Topë kósin ti.

² VãsÏ Jesus tóg rán kÏ nÏ, João ke gé, Jesus jo tÏnh ke ti. Topë vÏ tó tÏ tÏ Isaiás vÏ Jesus rán ja nÏ, kÏ tóg: “ha vë, ã jo sóg ù jënënh mü, ti tÏ vënh kar kãn jé, ã tÏg ken jo,” he ja nÏ. “Ag jyvën jé tóg ke mü, kÏ tóg ëpry prun ri ke nÏ, ëmÏn kurynh ri ke.

³ Êmã tÏg ja tá tóg jënh ke mü, ga kórég tá. Tá tóg ag mÏ kãmén ke mü. “Ëg Senhor kãtÏg ke jo vënh jãnhkrigkri nÏ,” he tóg mü. “Ëpry kurég ãjag tóg tÏ, ëmÏn kurynh ãjag tóg tÏ, ãjag chefe jun ken kÏ. KÏ tag ri ke han nÏ, ãjag jykre pãno togvãnh kÏ, ëg Senhor kãtÏg ken jo,” he tóg, ã jo tÏnh ke ti,” he ja tóg nÏ, Isaiás ti, João to.

⁴ KÏ João tóg jë mü, ëmã tÏg ja ki, ag kygpég tÏ ti. Ag jyvën tóg jëgtÏ, kÏ tóg: “ã kype jé sóg ke mü, ã tÏ ã jykre kórég tovãnh kÏ, Topë tÏ ã tÏ ti vÏ mranh tÏ ã mÏ vënh pãte fón jé,” he tóg mü sir, vënh kar mÏ.

⁵ KÏ ag tóg ti to kãmü kãn mü sir, ga tÏ Judéia tá, cidade tÏ Jerusalém tá ke gé. KÏ tóg ag kygpég mü sir, goj tÏ Jordão ki, ag tÏ: “Topë vÏ mranh sóg nÏgtÏ, tag han kÏ,” hen kÏ.

⁶ Jó João kur tóg cavalo pãnÏ sór kyki tÏ há nÏ. Nén ù fãr tÏ tóg vësógfÏn ja han tÏ gé. Ópã hã ko ti tÏ, mÏg mré, João ti.

⁷ KÏ tóg Jesus kãmén kÏ (tóg) ag mÏ: “ù tóg inh nón kãtÏ mü, ha më,” he mü. “Inh kãfór ti nÏ. SÏ tÏ ti camrada nÏnh ke vë vë, sÏ ti pën né kunÏnh ke vë vë, ti pën to ró ti, hã ra sóg tÏ ti krëm ke pë jë.

⁸ Goj hã tÏ sóg ãjag kygpenh ke mü. Û tÏ inh nón kãtÏg ke ën tóg sir Topë kuprÏg tÏ ãjag jagrë han ke mü. Ti tÏ ãjag kygpenh ken hã vë,” he tóg, João ti, vënh kar mÏ.

João tÏ Jesus kype
(Mt 3.13-17; Lc 3.21-22)

⁹ KÏ kejën Jesus tóg João tá jun mü gé. Cidade tÏ Nazaré tá tóg kãtÏ mü, ga tÏ Galiléia tá. Tá jun kÏ João tóg ti kypég mü sir, goj tÏ Jordão ki.

¹⁰ Ti tÏ goj kãtã kãkutë kÏ kanhkã vÏ nor mü sir vësÏmër. Hã ra Jesus tóg vég jë nÏ. KÏ tóg Topë kuprÏg vég mü. Sórag ri ke ti nÏ, ti kãtére ti. Kãtére kÏ tóg Jesus kri nÏ nÏ sir.

¹¹ KÏ tóg kanhkã tá vënh vÏ mëg mü gé sir, kÏ tóg: “tÏ ã inh kósin pir jë, tÏ ã inh fe pë jëgtÏ,” he mü, vënh vÏ tÏ më há ën ki.

Satanás tÏ Jesus krÏn kónãn sór
(Mt 4.1-11; Lc 4.1-13)

¹² KÏ vësÏmër Topë kuprÏg tóg Jesus krÏn mü, ti tÏ ëmã tÏg ja ra tÏg jé.

¹³ Kurã tÏ 40 (ke) tÏg tóg mü, ëmã tÏg ja ki, Jesus ti. Tá nÏn kÏ Satanás tóg ti tÏ ã jóg vÏ mranh han sór mü, hã ra tóg ke tÏ nÏ. Nën kãmÏ bicho ag vÏ tá mügtÏ gé, ëmã tÏg ja ki. Hã ra Topë tÏ jënë jafã ag tóg ti ki rÏr mü sir, tá.

Jesus tÏ Galiléia ra vÏn ke
(Mt 4.12-22; Lc 4.14-15; 5.1-11)

¹⁴ Kejĕn ag tóg João ség mŭ. Ag tŷ ti se kar kŷ Jesus tóg ga tŷ Galiléia ra tŷ mŭ. Tá tóg ag mŷ Topĕ tŷ tŷ ěg pā'i nŷnh ke kāmén mŭ, vĕnh kāme sér ěn ti.

¹⁵ Kŷ tóg: “Topĕ vŷ tŷ pā'i nŷ,” he mŭ. “Pĕtĕm ti huri, ti kurā ti, ěg tŷ ti tŷ tŷ ěg pā'i nŷ ěn ve jé. Kŷ ājag jykre kórég tovānh nŷ. Ti vŷ kri fimnŷ, ājag tŷ ti tŷ tŷ ěg pā'i nŷ ěn ve jé,” he tóg ag mŷ, Jesus ti.

¹⁶ Kejĕn Jesus tóg nig fyr tŷ Galiléia he mŭ ěn jagma tŷ mŭ. Ā tŷ ti fyr mŷ tŷ ra tóg Simāo Pedro vĕg mŭ, ti jāvy tŷ André ke gé. Kur tŷ pirā kugmŷ jafā tŷ ag tóg goj kākŷ fón mŭ, rede tŷ, pirā kugmŷ jé. Ag rānhrāj hā vĕ.

¹⁷ Kŷ Jesus tóg ag ve kŷ ag mŷ: “inh mré kāmŭmnŷ,” he mŭ. “Pirā kugmŷ hā ājag nŷtŷ,” he tóg. “Ājag kanhrān jé sóg ke mŭ, ājag tŷ ěprā ke ag tŷ inh ki ge han jé,” he tóg ag mŷ, Jesus ti.

¹⁸ Vĕsŷmĕr ag tóg ti mré mŭ mŭ, ājag rede tovānh kŷ, Pedro ti, André ti ke gé.

¹⁹ Kŷ ag tóg mŭ mŭ, goj fyr jagma. Ag mŭ sŷ han mŭ ra ag tóg ũn régre ũ ag vĕg mŭ gé. Ũ vŷ tŷ Tiago nŷ, kŷ ũ vŷ tŷ João nŷ, ti jāvy. Zebedeu krĕ ag vĕ. Canoa kākŷ ag nŷtŷ, pirā kugmŷ jafā ki han kŷ.

²⁰ Ag ve kŷ tóg vĕsŷmĕr ag jé prĕr mŭ, Jesus ti. Kŷ ag tóg ājag panh ré kŷ mŭ mŭ, Zebedeu ti. Ag camarada ag vŷ ag panh mré canoa kākŷ nŷtŷ nŷ. Ag ré kŷ ag Jesus mré mŭ mŭ sir, Tiago ti, João ti ke gé.

*Jesus tŷ vĕnh jagrĕ kórég kutĕm
(Lc 4.31-37)*

²¹ Kŷ ag tóg cidade tŷ Cafarnaum ki ge mŭ sir. Vĕnhkán ke kurā ki tóg vĕsŷmĕr Judeu ag vĕnh kanhrān jafā kāra rā mŭ, ag kanhrān jé, Jesus ti.

²² Ti tŷ ag kanhrān kŷ tóg ag mŷ e tŷ, ti vŷ ti. Vĕnh kar vŷ káfór ti nŷ. Topĕ vŷ to professor ag vŷ káfór ti nŷ gé. Hā kŷ tóg ki hā tó mŭ. Kŷ tóg ag mŷ e tŷ.

²³ Hā ra ũ tóg tá nŷ nŷ, Judeu ag vĕnh kanhrān jafā tá. Jagrĕ kórég ti nŷ.

²⁴ Ā tŷ Jesus ve kŷ tóg prĕr mŭ. “Ā tŷ ěg tŷ hĕ ri ke nĕ, Nazaré tá Jesus?” he tóg. “Ā mŷ ěg kókén sór tŷ? Ā ki kanhró sóg nŷ. Tŷ Ā tóg Ā pir mŷ Topĕ mré ke nŷ, ti tŷ pĕ vŷ tŷ Ā nŷ,” he tóg, ũn jagrĕ kórég ti.

²⁵ Hā ra Jesus tóg ti mŷ vŷ tar han mŭ, kŷ tóg: “vŷ tŷŷ ra,” he mŭ. “Ti tovānh ra,” he tóg.

²⁶ Kŷ ti jagrĕ kórég ěn tóg ti ter tŷ han mŭ sir, prĕr tóg mŭ sir. Kŷ tóg ti tovānh mŭ.

²⁷ Kŷ tóg vĕnh kar mŷ e tŷ mŷr sir. Jagnĕ mŷ ag tóg: “ne nĕ vé?” he mŭ. “Vĕnh vŷ tág mŷ vó?” he ag tóg mŭ. “Vĕnh jagrĕ kórég ag mŷ tóg vŷ tŷ, kŷ ag tóg ki ke tŷ, ti kamĕg kŷ. Ag kri ke hŷn,” he ag tóg mŭ, Jesus to.

²⁸ Kŷ ti vĕme tóg vĕnh kar kri rŭm mŭ, Galiléia tá ke kar kri.

*Jesus tŷ Pedro má fi tŷ há' he
(Mt 8.14-15; Lc 4.38-39)*

²⁹ Kar tóg Judeu ag vĕnh kanhrān jafā ki kutĕ mŭ, Jesus ti, kŷ tóg Simāo Pedro ĩn ra rā mŭ sir. André mré ti ĩn vĕ. Tiago vŷ João mré ra rā mŭ gé.

³⁰ Hā ra Pedro prŭ fi mŷnh fi vŷ kaga nŷ nŷ, rŷg nŷ fi nŷ. Kŷ ag tóg Jesus mŷ fi tó mŭ.

³¹ Kŷ tóg fi venh tŷ mŭ. Fi nŷgé kāmŷ kŷ tóg fi nŷm mŭ. Kŷ fi rŷg ěn tóg tŷ' he mŭ sir. Ag ki rŷr fi tóg mŭ sir, Pedro má fi.

*Jesus tŷ ũn kagyga ag tŷ há' he
(Mt 8.16-17; Lc 4.40-41)*

³² Kurã ěn kã kuty tá ag tóg ũn kagyga ag tatĩ kãmũ mũ, ũn jagrẽ kórég ag mré hã.

³³ Cidade ěn ki ke kar ag vỹ ti ĩn jãnkã tá nỹtĩ mũ.

³⁴ Kĩ Jesus tóg ag tỹ há' he kãn mũ sir, fag tỹ ke gé. Vẽnh jagrẽ kórég pan kãn tóg mũ gé. Kĩ ag tóg ti to sór mũ, ag tỹ ti ki kanhró nỹtĩ kỹ. Hã ra tóg ag mỹ: "vĩ tũg nĩ," he mũ.

Jesus tỹ ã jóg mré vĩ

(Lc 4.42-44)

³⁵ Tỹ vaj kỹ tóg kurã ke ra (tóg) rĩr mũ, Jesus ti. Kĩ tóg ěmã tũ ra tĩ mũ sir, Topẽ mré vĩ jé.

³⁶ Kĩ Simão tóg ti kanẽg tĩ mũ, ti jãvãnh kỹ. Ti mré ke ag mré tóg tĩ mũ.

³⁷ Kĩ ag ti vég mũ sir. Kĩ ag tóg ti mỹ: "vẽnh kar vỹ ã kanẽgnẽg mũ, ã jãvãnhvãnh kỹ," he mũ.

³⁸ Kĩ Jesus tóg ag mỹ: "mũ nỹ, cidade ũ ra," he mũ, "sỹ ag mỹ Topẽ vĩ tó jé gé. Hã jé sóg kãtĩg," he tóg mũ ag mỹ, Jesus ti.

³⁹ Kĩ tóg ga tỹ Galilėia kar mĩ tĩ mũ. Vẽnh kanhrãn jafã krẽm tóg ag mỹ Topẽ vĩ tó mũ sir. Ag jagrẽ kórég pan tóg mũ gé sir.

Jesus tỹ ũn kaga kren vãnh tỹ há' he

(Mt 8.1-4; Lc 5.12-16)

⁴⁰ Kĩ kejẽn ũn kaga kren vãnh vỹ ti to kãtĩ mũ, vẽnh kaga tỹ lepra he mũ ěn han mũ ěn. Kĩ tóg ti krẽm grĩnh ke mũ, ti mỹ nẽn ũ to vĩ jé. Kĩ tóg: "ã mỹ isỹ há' he sór tũ nĩ?" he mũ. "Á hã tóg isỹ há' henh mũ, ã tỹ isỹ há' he sór kỹ," he tóg ti mỹ.

⁴¹ Kĩ tóg Jesus mỹ jagtar tĩ. Kĩ tóg ã nĩgé tỹ ti mẽg kỹ ti mỹ: "hej," he mũ. "To sóg há nĩ. Há' he ja há ã tóg nĩ," he tóg ti mỹ.

⁴² Kĩ tóg ti kaga kren vãnh ěn kren han mũ sir vėsỹmér. Kĩ tóg jãnhkri nĩ sir, ti fár tĩ.

⁴³ Kĩ Jesus tóg ti mỹ vĩ tar han mũ, ti tũg jé.

⁴⁴ Kĩ tóg ti mỹ: "ker ũ mỹ tó hẽ'," he mũ. "Ha tũg, Topẽ tũ ki rĩr tĩ to. Ti hã mỹ tómnĩ, kỹ Topẽ mỹ nĩm nĩ, Moisés tỹ vãsỹ ěg mỹ nẽn tó ja ti, ã jãnhkri to. Hã tũgrĩn vẽn kar vỹ ã tỹ há' he mũ tag ki kanhrãn mũ," he tóg ti mỹ, Jesus ti.

⁴⁵ Hã ra tóg vẽn kar mỹ tó mũ sir. Kĩ vẽme ěn vỹ vẽn kar kri rũm mũ. Hã kỹ Jesus tóg ěmã ũ ki rã tũ nĩgtĩ, vẽn ven jé. ěmã tũ mĩ tóg tũgtĩ, hã ra ag tóg ěmã kar tá ti to kãmũ tĩ.

2

Jesus tỹ ũn grĩngrĩn kỹ nỹ tỹ há' he

(Mt 9.1-8; Lc 5.17-26)

¹ Kãnhmar Jesus tóg kejẽn cidade tỹ Cafarnaum tá jun mãn, kỹ ag tóg mẽg mũ sir, ti tỹ tá nĩn ki, ti tỹ hẽ tá nĩ ěn tá.

² Kỹ ũn e ag vỹ ti to vẽn mãn, kỹ tóg fór nĩ, jãnkãn mĩ hã. Kỹ Jesus tóg ag mỹ Topẽ vĩ tó jẽ nĩ.

³ Hã ra ũ ag tóg tá junjun mũ gé sir, ũn grĩngrĩn kỹ nỹ vyn kỹ, ũ tỹ 4 (ke) ag vẽ.

⁴ Hã ra ag tóg ti pětẽm tũ nĩ sir, ti tỹ ag jy fór tũn kỹ. Kỹ ag tóg ĩn kunũg mũ, ti kri. Nor ěn ki ag tóg ũn grĩngrĩn kỹ nỹ ěn ti tereem mũ, kur kãkã nỹ ti.

⁵ Kÿ Jesus tóg ag jykre vég mû sir, ag tÿ ti ki ge kÿ nÿtÿ ti. Kÿ tóg ùn grÿngrÿn kÿ nÿ ên mÿ: “inh kósin,” he mû. “Á tÿ Topê vÿ mranh ja tÿ tÿ' he vê ha,” he tóg ti mÿ, Jesus ti.

⁶ Hã ra Topê vÿ to professor ù ag vÿ tá nÿtÿ gé. Ti vÿ to ag tóg jykrén mû sir.

⁷ “Ne nê hÿn', ti tÿ tó tag ti?” he ag tóg mû, komêr hã. “Topê to vÿ kónân vê,” he ag tóg. “Topê hã ne ã pin kÿ êg tÿ Topê vÿ mranh ên tÿ tÿ' he há nÿnh mû. Ti hÿn vêsÿ Topê han mû,” he ag tóg mû, ti to jykrén kÿ.

⁸ Hã ra Jesus tóg ki kanhró nÿ, ã fe tÿ, ag jykrén ki. Kÿ tóg ag mÿ: “ãjag tÿ ne to jykrén kónân nê?” he mû.

⁹ “Ne nÿ ãjag mÿ vènhmÿ nÿ?” he tóg. “Ûn grÿngrÿn kÿ nÿ tag mÿ sóg: ã tÿ Topê vÿ mranh ja ên tÿ tÿ' he vê ha, hé,” he tóg. “Kÿn mÿ ãjag mÿ vènhmÿ?” he tóg. “Sÿ ti mÿ: nÿ ra, ã kur gé(g) tÿg, henh ke nê ha,” he tóg. “Kÿn mÿ ãjag mÿ vènhmÿ ke gé?” he tóg.

¹⁰ “Hã ra isÿ ãjag mÿ inh jykre ven sór vê ha. Tÿ sóg êprã ke fi kósin nÿ. Tá sóg krÿg ke mû, Topê vÿ mranh tÿ vènh pãte fón ke tá. Sÿ tá krÿg mû ven jé sóg ke mû, ãjag mÿ,” he tóg. Hã kÿ tóg ùn grÿngrÿn kÿ nÿ ên mÿ:

¹¹ “nÿ ra, ã kur gé(g) tÿg,” he mû, Jesus ti.

¹² Kÿ tóg jègnê mû sir, ã kur gég tóg mû sir vãhã, kÿ tóg ag rÿnve tÿ mû sir, ùn grÿngrÿn kÿ nÿ ja ên ti.

Vènh kar mÿ tóg e tÿ, kÿ ag tóg Topê to: “êg jykre kãfór ti nÿ,” he mû. “Ge ve ja tÿ êg nÿtÿ,” he ag tóg mû sir.

Jesus tÿ Levi jé prêr

(Mt 9.9-13; Lc 5.27-32)

¹³ Kÿ Jesus tóg tÿg mãn mû, goj nig tÿ Galiléia ra. Kÿ vènh kar ag tóg ti pénÿn vènh mãn mãn mû sir. Kÿ tóg ag kanhrãn mû gé.

¹⁴ Á tÿg mãn kÿ tóg Levi vég mû, Alfeu kósin. Governo mÿ imposto kaja mãg ti tÿ, hã ra tóg ã rãnrãj han nÿ nÿ. Kÿ Jesus tóg ti mÿ: “inh mré kãtÿg,” he mû. Kÿ tóg jègnê kÿ ti mré tÿ mû sir.

¹⁵ Kÿ tóg kejên ti ïn krêm jèg mû, Jesus ti, Levi ïn krêm. Hã ra ti mré ag e nÿtÿ, governo mÿ jãnkamy mãg tÿ ag, Topê vÿ mranh tÿ ag ke gé. Jesus mré ag nÿgnÿg kÿ nÿtÿ, ti mré mû tÿ ag mré ke gé. E tãvÿ ag nÿtÿ, ti nón mû ag.

¹⁶ Hã ra Topê vÿ to professor ù ag vÿ tÿ Fariseu nÿtÿ gé. Jesus vég ag tóg mû, ti tÿ Topê vÿ mranh tÿ ag mré jèn kÿ. Kÿ ag tóg Jesus mré mû tÿ ag mÿ vÿ mû. “Ti hã ne tóg ag mré jèg mû!” he ag tóg. “Governo mÿ jãnkamy mãg tÿ ag mré tóg jèg mû!” he ag tóg, “Topê vÿ mranh tÿ ag mré ke gé!” he ag tóg.

¹⁷ Hã ra Jesus tóg mæg mû, ag veme ên ti. Kÿ tóg ag mÿ: “ùn kagyga tÿ ag vÿ médoc vènh mû tÿ nÿg tÿ!” he mû. “Hã ra ùn kagyga ag hã vÿ ti vènh mû tÿ,” he tóg ag mÿ, Jesus ti. “Inh pi(jé) ù tÿ vènh jykre kuryj han mû ag mÿ: “ãjag jykre tovãnh nÿ,” he sór tÿ! Û tÿ Topê vÿ mranh ja nÿ ên ag hã mÿ sóg: “ãjag jykre kórég tovãnh nÿ,” he sór tÿ. Hã jé sóg ãjag mÿ vènh ven,” he tóg ag mÿ, Jesus ti.

Vãkre

(Mt 9.14-17; Lc 5.33-39)

¹⁸ Hã ra João mré mû tÿ ag tóg kejên vãkrég mû, jèg tÿ ag nÿ, ag tÿ Topê mÿ há nÿtÿ jé. Kÿ Fariseu ag vãkrég mû gé. Kÿ ag tóg Jesus mÿ: “João mré mû tÿ ag vÿ tóg vãkrég mû, Fariseu mré mû tÿ ag ke gé,” he mû. “Jo ã mré mû tÿ ag ne tóg vãkrég tÿ nÿ! Vãkre kurã vê mÿr,” he ag tóg ti mÿ, tá nÿtÿ ù ag.

¹⁹ Kÿ Jesus tóg ag mÿ comparação han mû. “Vènh kyprüg to kãm ùn ag pi(jé) vãkrég tÿ!” he tóg. “Festa vê mÿr, vènh prügprüg ti, kÿ ti mré ke ag tóg ùn

prũg mũ ěn venh kãmũ tĩ," he tóg. "Ge ti nĩ, inh mré mũ ag mĩ. Isỹ ag mré nĩn kỹ tóg ver ag mĩ sér tĩ," he tóg ag mĩ, Jesus ti.

²⁰ "Vãhã tóg jun mũ, inh kurã ti, kỹ ag tóg inh pére mũnh mũ, ěn kã hã ag tóg ajag vãkrenh ke venh mũ, kurã ěn kã, inh mré mũ tĩ ag," he tóg.

²¹ "Ti si fag pi(jé) vãfe kygnej tũ tỹ kur si jar ki hyn han tĩ ja nỹtĩgtĩ'. Ũn kygnej tũ tỹ ki hyn han mũ ra tóg jaran kenh mũ. Kỹ kur si jar ěn tóg mág mũ. Ũn kygnej hã tỹ fag tóg ki han han tĩ, kỹ tóg jaran ke tũ nĩ," he tóg, Jesus ti. Ti tỹ ã jykre tãg tón hã vë, hã ra tóg kur kygnej tũ ri ke nĩ.

²² Kỹ tóg ag mĩ: "Kỹ vinho vỹ ge nĩgtĩ gé," he mũ gé. "Ěg pi(jé) vinho kajãg mũ tỹ ti fãr si tỹ sacco ki kujẽg tũ mỹr'," he tóg. "Ke tũ nĩ (mũ) ra tóg kugnãj kỹ jar mũ, kógnãj kỹ. Kỹ vinho tóg tũ' he mũ, sacco ti ke gé mỹr. Vinho kajã tỹ ti fãr tãg tỹ ki kujẽn ke vë mỹr," he tóg, Jesus tỹ ã jykre tãg tón hã vë.

Vẽnhkãn ke kurã

(Mt 12.1-8; Lc 6.1-5)

²³ Kejẽn Jesus tóg ěpỹ mĩ tĩ mũ, trigo kré mĩ. Ti mré mũ tĩ ag tóg ti mré mũ mũ. Vẽnhkãn ke kurã vë. Ag mũ kỹ ti mré mũ tĩ ag vỹ trigo mugmó tỹ kam ke mũ, ko jé.

²⁴ Kỹ Fariseu ag tóg Jesus mỹ: "hã vé," he mũ. "Ag tỹ ne jé ajãg tỹ nén han ke tũ han nẽ, vẽnkhãn ke kurã ki?" he ag tóg mũ. "Vẽnh rãnhraj vë mỹr, ag tỹ trigo tỹ kam ke ti," he ag tóg, Jesus mỹ.

²⁵ Kỹ tóg ag mĩ: "vó," he mũ. "Davi tỹ nén han mũ to jykrén nĩ," he tóg. "Ti kókĩr nĩn kỹ tóg ã tỹ nén han ke tũ han gé, ã mré mũ tĩ ag mré, hã ra Topẽ pi(jé) ti to jũ mũ", tag han tugrĩn, ha mẽ.

²⁶ Topẽ jo ĩn kãra tóg rã, Davi ti, Abiatar tỹ Topẽ tũ ki rĩr tĩ to pã'i nĩn kỹ. Tá tóg Topẽ jamĩ ěn kó, tỹ ti tỹ konh ke tũ ra, Topẽ tũ ki rĩr tĩ ag hã tỹ konh ke vë vë. Hã ra tóg kó, ti mré mũ ag mỹ tóg vẽnh ken gé, Davi ti," he tóg, Jesus ti. "Rãn kỹ tóg nĩ nĩ," he tóg.

²⁷ Kỹ Jesus tóg ag mỹ: "Topẽ vỹ ěg mỹ vẽnkhãn ke kurã nĩm, ěg tỹ ki vẽnkhãn jé," he mũ. "Hã ra tóg tỹ kurã kórég han tũ nĩ, vẽnkhãn ke kurã tỹ," he tóg.

²⁸ "Hã kỹ sóg tỹ vẽnkhãn ke kurã to pã'i nĩ gé. Tỹ sóg ěprã ke fi kósin nĩ mỹr," he tóg ag mỹ, Jesus ti.

3

Jesus tỹ ũn nĩgé tóg tỹ há' he

(Mt 12.9-14; Lc 6.6-11)

¹ Kejẽn Jesus tóg vẽnh kanhrãn jafã ra rã mãn mũ. Tá ũ tóg jẽ nĩ, ti nĩgé tóg tóg ja nĩ.

² Kỹ ag tóg ti tugnỹm mũ sir, "kema ěg tỹ ti tỹ vẽnkhãn ke kurã kã ti tỹ há' he ve jé," he ag tóg mũ sir. Hã ra ag tóg pã'i ag mỹ ti tó sór mũ, ti tỹ vẽnkhãn ke kurã to Topẽ vĩ mranh kỹ.

³ Hã ra Jesus tóg ũn nĩgé kórég ěn mỹ: "kunĩg," he mũ.

⁴ Kỹ tóg ag mỹ: "vẽnkhãn ke kurã ki ěg hỹn ne han mũ'?" he mũ, "ěg tỹ Topẽ vĩ ki króm jé," he tóg. "Ěg mỹ hỹn nén ũ há han mũ'?" he tóg. "Ěg tỹ ũ tũ kókén kỹn mỹ kórég tũ nĩnh mũ'?" he tóg ag mỹ. "Ěg mỹ ũ kren han mũ hỹn'?" he tóg. "Ěg tỹ ũ tén kỹn mỹ há nĩnh mũ hỹn'?" he tóg. Hã ra ag tóg ti mỹ katy tĩ sir.

⁵ Kỹ tóg ag ki ěvãnh kỹ jũ mũ sir, fe kaj tóg nĩ sir, ag krĩ tũ nỹtĩn kỹ. "Ã nĩgé tỹ krỹg' hé," he tóg ti mỹ, ũn nĩgé tóg ěn mỹ. Kỹ tóg tỹ krỹg' he mũ sir, há' he tóg mũ sir, vãhã, ũn nĩgé tóg ja ěn ti.

⁶ Kÿ vâhã Fariseu ag mû mû sir, jagnê mré ti to jykrén jé, pâ'i mág tÿ Herodes mré ke ag mré ke gé. “Ëg hÿn hê ri ken kÿ ti tÿg mû?” he ag tóg mû, Jesus ti to.

Jesus tÿ goj nig fyr tá ag kanhrân

⁷ Hã ra Jesus tóg ti mré mû tÿ ag mré goj nig tÿ Galiléia ra tÿ mû, vènh e tÿg ja ra. Hã ra vènh e ag tóg ti nón mû mû. Ga tÿ Galiléia tá ag tóg kãmû mû, ga tÿ Judéia tá ke gé,

⁸ cidade tÿ Jerusalém tá, ga tÿ Iduméia tá, goj tÿ Jordão mã tá, cidade tÿ Tiro tá, cidade tÿ Sidom tá ke gé. E tâvÿ ag nÿtÿ, e pê. Ti tÿ nén hyn han kar mē kÿ ag tóg ti to kãmû mû.

⁹ Kÿ Jesus tóg ti mré mû tÿ ag mÿ tó mû, ag tÿ ti mÿ canoa jáján jé. Ti kutân ag tóg, vènh kar ên ti, hã kÿ tóg canoa to vÿ mû.

¹⁰ Û tÿ hên ri ke tÿ há' he ja tóg nÿ, ùn kagyga ag tÿ, fag tÿ ke gé. Hã kÿ ag tóg ti kutân mû. Ag tÿ ti mē sór vè, ãjag nÿgê tÿ.

¹¹ Kÿ ùn jagrê kórég ag vÿ tá nÿtÿ gé. Ag tÿ Jesus ve kÿ ag tóg prênprêr mû sir. “!..Tÿ ã Topê kósín ne..!” he ag tóg mû, prênprêr kÿ.

¹² Kÿ Jesus tóg ag mÿ vÿ tar han tÿ. “Ker inh kãmén hê!,” he tóg tÿ, ag mÿ.

Jesus tÿ ù tÿ 12 (ke) ag vin

(Mt 10.1-4; Lc 6.12-16)

¹³ Kejên tóg pãnónh ra tÿ mû, Jesus ti. Kÿ tóg ag jé prêr mû, ag kuprêg kÿ. Kÿ ag tóg ti to mû mû.

¹⁴ Kÿ tóg ù tÿ 12 (ke) ag vin mû sir, ag tÿ tÿ ti mré mû tÿ nÿtÿ jé, ti tÿ ag jègnê jé ke gé, “Topê vÿ tó jé,” he tóg.

¹⁵ Ag mÿ tóg vènh jykre nÿm mû, ag tÿ vènh jagrê kórég pan jé.

¹⁶ Û tÿ 12 (ke) ag hã vè, ha mē: Simão, Jesus tÿ ti jyjy ù hã vÿ: Pedro, he mû,

¹⁷ Tiago ke gé, ti jãvy tÿ João mré, Zebedeu krê tag ag. Jesus tÿ ag jiji ù hã vÿ: Boanerges, he mû, ãg vÿ ki ke hã vÿ: ta tÿ tÿrÿrÿ he ri ke ag, he mû,

¹⁸ André ke gé, Filipe ke gé, Bartolomeu ke gé, Mateus ke gé, Tomé ke gé, Tiago ke gé, Alfeu kósín tag ti, Tadeu ke gé, Simão ke gé, ag tÿ ù to: Zelote, he mû tag ti,

¹⁹ Judas Iscariotes ke gé, ù tÿ pâ'i ag mÿ Jesus ven ke ti.

Topê vÿ to professor ag tÿ Jesus to vÿ kónân

(Mt 12.22-32; Lc 11.14-23; 12.10)

²⁰ Kÿ Jesus tóg ag mré ã jamã tá jun mû. Kÿ vènh kar tóg sir tá vènh mãn mû, kÿ tóg ag jên ke mû ra vènhmÿ tÿ, Jesus mré mû ag.

²¹ Kÿ Jesus kanhkã fag vÿ ti vème mē kÿ ti kãgmÿnh kãmû mû. “Krÿ vènhmÿ nÿ ve ti nÿ,” he fag tóg, hã kÿ fag tóg ti kãgmÿ sór mû. Hã ra tóg fag mré tÿ tÿ nÿ.

²² Kÿ Topê vÿ to professor ag tóg tá junjun mû gé. Jerusalém tá ag tóg kãmû jèg, ti ve jé. Kÿ ag tóg ti to: “jagrê kórég ti hÿn nÿ,” he mû. “Hã kÿ tóg vènh jagrê kórég ag pâ'i ên jykre han mû, vènh jagrê kórég ag pan jé,” he ag tóg. “Belzebu jykre tÿ tóg ag pan mû, Nén-Kórég jykre tÿ,” he ag tóg, Jesus to, Topê vÿ to professor ag.

²³ Kÿ Jesus tóg ag jé prêr kÿ ag mÿ comparação han mû, kÿ tóg: “Satanás vÿ vènh jagrê kórég pan tÿ nÿgtÿ mÿr,” he mû, Jesus ti.

²⁴ “Pã'i pir krêm ke ag tÿ jagnê kato tegtên kÿ ag tóg jagnê kãgtén kãn ke mû,” he tóg.

²⁵ “Ïn pir kã ki ke ên fag tÿ jagnê kato tē kÿ fag tóg jagnê kãgtén kãn ke mû gé,” he tóg.

²⁶ “Satanás krēm ke ag tŷ jagnē kato tē kŷ ag tóg jagnē tŷ tū' henh ke mŷ gé, kŷ tóg tū' he mŷ sir, Satanás ti,” he tóg.

²⁷ “Ēg tŷ ū tŷ nén ū mǎn sór kŷ, ti ĩn tá, kŷ ěg tóg ti se vén tŷ, ke tū nŷ (mŷ) ra tóg ā tū ki rŷr ke mŷ, kŷ ěg tóg ti tū mǎn tŷ hē ri kenh ke tū nŷgŷ, ti tar nŷn kŷ. Ēg tŷ ti se kar kŷ ěg tóg ti tū mǎg mŷ sir,” he tóg. “Ge ti nŷgŷ, sŷ nén han mŷ ti. Tar ti nŷ, Japo ti, hǎ ra sóg hur ti sé, hǎ kŷ sóg ti tū ag kygvǎg mŷ sir, ag jagrē kórég pan sóg mŷ sir,” he tóg, Jesus ti.

²⁸ “Sŷ ke há vē, hǎ kŷ sóg tó mŷ,” he tóg. “Topē vŷ ājag mŷ vēnh pǎte fón kǎn mŷ, ājag tŷ ti vŷ mranh kar ěn tŷ, ājag tŷ ti kato vŷ kónǎn mré hǎ,” he tóg.

²⁹ “Jǎvo ājag tŷ Topē kuprŷg kato vŷ kónǎn kŷ tóg ājag mŷ vēnh pǎte fón mǎn ke tū nŷ ha, Topē ti,” he tóg. “Ājag tŷ Topē vŷ mranh ěn vŷ ājag hǎ kǎ nŷ nŷ, kurǎ tū ti nŷ,” he tóg, Jesus ti.

³⁰ Ag mŷ tóg ke mŷ, Jesus ti, ag tŷ ti to: “jagrē kórég ti hŷn nŷ,” hen kŷ.

Jesus mré ke pē fag

(Mt 12.46-50; Lc 8.19-21)

³¹ Kŷ ti mŷnh fi tóg ti jǎvy ag mré ti venh kǎtŷ mŷ. Re kǎ fi jē ag mré, kŷ ag tóg ū jēnég mŷ, ti jé prēr jé.

³² Jesus pénŷn vēnh e vŷ tóg nŷtŷ, nŷgnŷg kŷ, kŷ ag tóg: “ha mē, ā mŷnh fi vŷ re kǎ jē, ā jǎvy ag mré,” he mŷ. “Fag tŷ ā mré vēmén sór vē. Ā jé prēr fag tóg mŷ,” he ag tóg ti mŷ.

³³ Hǎ ra Jesus tóg: “inh mŷnh fi mŷ inh ve sór mŷ', inh jǎvy ag mré'?” he mŷ. “Inh mŷnh fi vē vē, inh jǎvy ag vē vē, hǎ ra ag tóg tŷ inh mré ke pē tū nŷtŷ,” he tóg.

³⁴ Kŷ tóg ūn nŷgnŷg kŷ nŷtŷ ag ki ěvǎnh kŷ tóg: “inh mŷnh fi há vē, inh jǎvy ag há vē gé,” he mŷ.

³⁵ “Ū tŷ Topē vŷ han mŷ ěn ag vŷ tŷ inh jǎvy nŷtŷ, inh ve fag ke gé, inh mŷnh ke gé,” he tóg ag mŷ, Jesus ti.

4

Nén fy to comparaçāo

(Mt 13.1-9; Lc 8.4-8)

¹ Kejēn Jesus tóg goj nig tŷ Galilēia fyr tá ag kanhrǎn mǎn mŷ. Hǎ ra vēnh e vŷ ti pénŷn nŷtŷ, vēnh e tǎvŷ, hǎ kŷ tóg canoa kǎra rǎ mŷ, goj kǎki, kŷ tóg canoa kǎkǎ nŷ mŷ, hǎ ra ag kar vŷ tar tá vēnh mǎn kŷ nŷtŷ, nig fyr tá.

² Ag mŷ tóg vēnh vŷ e tó mŷ, comparaçāo han kŷ.

³ Kŷ tóg kejēn ag mŷ: “ha mē,” he mŷ. “Ū tóg nén ū fy krigkrig tŷ mŷ,” he tóg.

⁴ “Ti tŷ krigkrig kŷ ti fy ū tóg ěmŷn kri kutē mŷ, ěpy kri. Kŷ sēsŷ tóg ti ko mŷ sir.

⁵ Ti fy ū tóg pǎrō kri kutē mŷ, ga e tū ki, kŷ tóg kǎnhmar mur mŷ vē, ga sŷ ěn ki.

⁶ Hǎ ra rǎ tóg ā tŷ ěg nŷno kǎ sa kŷ (tóg) ti pŷn mŷ. Ti jǎre han tū nŷn kŷ tóg tóg mŷ.

⁷ Ti fy ū tóg sónh kǎki kutē mŷ, kŷ sónh tóg ti mré mur mŷ, ti kri rŷm tóg mŷ sir kŷ tóg kanē han tū nŷ.

⁸ Ti fy ū tóg ga há kri kutē mŷ kŷ tóg mur há han mŷ, mog há han tóg mŷ, kanēn ha han tóg mŷ gé, ū tóg kanē tŷ 30 (ke) han, jo ū vŷ kanē tŷ 60 (ke) han, jo ū vŷ kanē tŷ 100 (ke) han.

⁹ Ū nŷgrēg nŷtŷ tŷ tŷ jēmē jé,” he tóg, Jesus ti.

Jesus tỳ nén fy to comparação kāmén
(Mt 13.10-23; Lc 8.9-15)

10 Ûn e ên ag mûn kar kÿ ti mré nÿtí ag tóg ti ki jēmēnh kāmũ mũ, nén fy kāmén ti. Kÿ ag tóg ti mÿ: “ã tÿ êg mÿ ne tó nê?” he mũ.

11 Kÿ tóg ag mÿ: “ãjag hã tóg Topê tÿ tÿ êg pa'i nĩ ki kanhró nÿtĩnh mũ, ijo tó ja tũ ên ki,” he mũ. “Hã ra sóg ên ag mÿ comparação tãvĩ han mũ.

12 Ag mÿ sóg tó há han ke tũ nĩ, ón kÿ mēg mũ ag mÿ, kÿ ag tóg ãjag tÿ vég mũ ra ki kagtĩg nÿtĩ, ãjag tÿ mēg mũ ra ag tóg to jykrén tũ nÿtĩ, kÿ ag tóg Topê ki ge tũ nÿtĩ gé, kÿ Topê tóg ag mÿ vēnh pãte fón ke tũ nĩ gé,” he tóg, Jesus ti, ù ag to.

13 Kÿ tóg ag mÿ: “ãjag tÿ to jykrén tũ tóg tĩ,” he mũ, “sÿ ãjag mÿ nén fy kāmén kÿ,” he tóg. “Kÿ ti mÿ ãjag tÿ ù to jykrén há nĩnh mũ', sÿ ãjag mÿ comparação ù han kÿ?” he tóg.

14 Kÿ tóg jamã hár(a) ag mÿ kāmén mũ. “Û tóg nén fy vāvãm tĩ, kÿ ti tÿ Topê vĩ tó vē, hã vÿ: vāvãm, he mũ, nén fy ri ke vē,” he tóg.

15 “Ti fy ù vÿ êmĩn kri kutē mũ. Kÿ Topê vĩ mēg mũ ù ag vÿ êpÿy ri ke nÿtĩ,” he tóg. “Ag tÿ Topê vĩ mēg mũ ra tóg ag mÿ tÿ tũ' he mũ, Satanás ti, Topê vĩ tÿ. Vēsÿmér tóg ag mÿ tÿ tũ' he mũ, ag mÿ Topê vĩ tó tÿ. Kÿ êmĩn ri ke vē sir.

16 Hã ri ken hã vē gé, ti tÿ pãró kri vāvãm ên ti. Ag tÿ Topê vĩ mē kÿ ag tóg vēsÿmér: hej, he mũ sir. Ag mÿ tóg sér tĩ.

17 Hã ra ag tóg nén kré jãre tũ ri ke nÿtĩ, kÿ ag tóg mũ sĩ han mũ, Topê mré. Nén ù jagy kutē kÿ ag tóg sir Topê tovãnh mũ vēsÿmér, ù tÿ Topê tugrĩn ag kato tē kÿ.

18 Ti tÿ sónh kãki vãm ên hã vē gé, hã vÿ tÿ Topê vĩ mēg mũ ag nÿtĩ gé.

19 Hã ra ag tóg ãjag rãnhraĩ hã mĩ êkrég mũ, ón kÿ rico nĩ sór jé. Nén ù kar to ag ên, hã kÿ Topê vĩ tóg ag mÿ katy' he mũ sir. Kÿ ag tóg kanē há han tũ nĩ.

20 Hã ra ti tÿ ga há kri vāvãm mũ ên vÿ tÿ Topê vĩ mēg mũ ag nÿtĩ gé. Hej, he ag tóg mũ sir, kanē há han ag tóg mũ, ù tóg kanē tÿ 30 (ke) han mũ, ù tóg kanē tÿ 60 (ke) han mũ, ù tóg kanē tÿ 100 (ke) han mũ,” he tóg, Jesus ti, ag mÿ.

Jēngrē to comparação
(Lc 8.16-18)

21 Kÿ Jesus tóg ag mÿ: “êg pi(jé) néj gru ma kāmũ kÿ kěj krēm fēg tĩ', êg pi(jé) cama krēm fēg tĩ',” he mũ. “Ti fēg jafã kri êg tóg fēg tĩ.

22 Hã kÿ êg tÿ nén vég tũ ên vēnh ven kãn ke vē, hã jé tóg ver péju kÿ nĩ. Êg tÿ nén ki kagtĩg ên vēnh ven kãn ke vē,” he tóg.

23 “Ûn nĩgrēg nÿtĩ tÿ tÿ jēmē jé,” he tóg.

24 “Hã kÿ jēmē há han,” he tóg. “Ãjag mré ke ag jykre tugnÿm ãjag tóg tĩ, kÿ ãjag tóg ag mÿ vĩ tar han tĩ. Kÿ Topê vÿ ãjag mÿ vĩ tar han ke mũ gé, ãjag tÿ ãjag mré ke ag jykre ri ke nÿtĩnh kÿ. Hã ra tóg ãjag mÿ vĩ tar kãfór han ke mũ, ha vemnĩ,” he tóg.

25 “Û tÿ nén ù to jykrén há han kÿ tóg ù to jykrén mãn', ù to jykrén mãn', he mũ sir. Û tÿ nén ù to jykrén há han tũ nĩnh kÿ tóg ti mÿ tũ' he mũ sir, ti tÿ nén to jykrén sĩ han mũ ra,” he tóg, Jesus ti.

Nén kré to comparação

26 Kÿ Jesus tóg ag mÿ: “Topê tÿ tÿ êg pã'i nĩ vÿ ge nÿnh mũ, ha mē,” he mũ. “Û vÿ nén ù fy vāvãm tĩg mũ, êpÿy ki,” he tóg.

27 “Ũ tỹ vāvãm mũ vỹ nũr mũ sir, kutyg kỹ, tỹ vaj kỹ tóg rĩr mãn mũ sir. Hã ra ti fy ên vỹ mur mũ, mog tóg mũ, jo ù tỹ vāvãm mũ tóg ki kagtĩg nĩ. “Ti hẽ ri ken kỹ mur?” he tóg.

28 Jãvo tóg vėsóg ki mog, kar tóg mó han, kỹ vãhã ti kanẽ vẽ sir, ti mó kãki.

29 Ti kanẽn kar kỹ tóg ag mỹ: “ha kre jafã va kãmũ jẽg,” he mũ sir. Kỹ ti krenh ke kurã vẽ sir. Topẽ tỹ tỹ êg pã'i nĩ ri ken hã vẽ,” he tóg, Jesus ti, ã kãtĩg mãn ke tón kỹ.

Ka tỹ mostarda fy to comparação

(Mt 13.31-32, 35; Lc 13.18-19)

30 Kỹ Jesus tóg: “inh hỹn tóg tag tónh mũ ha, sỹ Topẽ tỹ tỹ êg pã'i nĩ kãmén jé,” he mũ.

31 “Ka tỹ mostarda fy ri ke ti nĩ, Topẽ tỹ tỹ êg pã'i nĩ ti,” he tóg. “Ti krãn êg tóg tĩ, êg japỹ ki. Kãsir ti nĩ, ti fy ti. Ũ fy vỹ ti sĩ ri ke tũ nỹtĩ.

32 Ti krãn kar kỹ tóg mog mũ, kỹ tóg êgóho kar kãfór nĩ. Pẽ mág ti nỹtĩ, hã kỹ sēsĩ ag vỹ kãki krêg tĩ, ti fẽnja ki,” he tóg, Jesus ti.

33 Comparação tỹ hẽn ri ke hyn han tóg, ag mỹ Topẽ vĩ tón ki, ag tỹ to jykrén sór kỹ.

34 “Tag vỹ ge nỹnh mũ,” he hã han tóg ag mỹ, Jesus ti. Ag mỹ tóg jamã hár(a) nén ù tó tú nĩ, ùn e ag mỹ. Hã ra tóg ã mré mũ tĩ ag mỹ kãmén há han mũ, ag pĩn kỹ.

Jesus tỹ kóho tỹ tũ' he

(Mt 8.23-27; Lc 8.22-25)

35 Hã tỹ kuty tá tóg ag mỹ: “mũ nỹ, goj nig kafã ù ra,” he mũ.

36 Hã kỹ ag tóg vẽnh e ên ré kỹ mũ mũ sir, canoa kãmĩ, Jesus tỹ kãkã nĩn kỹ. Hã ra ù ag tóg ti mré mũ mũ gé, canoa ù kãmĩ.

37 Hã ra kãka tar tãvĩ vỹ tóg vãhã krog he mũ, kóho ti. Kỹ goj tóg canoa kãki krém krém ke mũ. Ti fãn sór tóg mũ sir.

38 Hã ra Jesus tóg nũr nỹ, fakrĩnh kỹ, canoa nér tá. Kỹ ag tóg ti rĩn kỹ ti mỹ: “Senhor,” he mũ. “Êg mỹ êg kãgter ha mẽ tóg tĩ. Mỹ ã mỹ tỹ nén ù tũ?” he ag tóg ti mỹ.

39 Kỹ tóg rĩr mũ sir, kỹ tóg kóho mỹ vĩ tar han mũ, ti mỹ: “krỹg he ra,” hen kỹ. Kỹ kóho tóg tũ' he mũ, katy' he tóg mũ.

40 Kỹ tóg ag mỹ: “ãjag tỹ ne jé kanẽ jur nẽ?” he mũ. “Ãjag mỹ inh ki rã há han tũ?” he tóg ag mỹ.

41 Kỹ tóg ag mỹ e (pẽ) tãvĩ tĩ sir. Jagnẽ mỹ ag tóg: “ti jykre tóg êg mỹ e tĩ,” he mũ. “Kóho vỹ ti vĩ han, goj ti ke gé,” he ag tóg.

5

Jesus tỹ vẽnh jagrẽ kórég tỹ mil ag pan

(Mt 8.28-34; Lc 8.26-39)

1 Kỹ ag tóg goj nig kafã ù tá junjun mũ sir, Gerasa tá ke ag tá.

2 Jesus tỹ canoa ki vag ke mũ ra ù tóg ti kato tẽ mũ. Jagrẽ kórég ti nĩ. Vẽnh kej tá tóg kãkutẽ mũ.

3 Tá tóg êmã nĩ, vẽnh kej tá. Ag tỹ ti ség mũ ra tóg vẽnh mỹ nĩ, ferro mré hã.

4 Ti se tỹ hẽn ri ke han ja ag tóg nĩgtĩ vẽ, ti nĩgé, ti pẽn ke gé, ferro tỹ. Hã ra tóg ferro tỹ kam ke ja nĩgtĩ, ã pẽn se ja ti mrynhmranh kãn ja tóg nĩgtĩ. Ag tỹ ti kanhrãn ke mũ ra ag tóg ti tỹ hẽ ri ke ja tũ nĩgtĩ.

⁵ Kutý ki kurã mré tóg prēr tǔgtǐ, vĕnh kej ki. Pãró ěn ki pó génh ký tóg vĕsãnh tǔgtǐ.

⁶ Ti tý kuvar há tá Jesus ve ký tóg ti to vĕnhvãg tí mũ, ký tóg ti krĕm grĭnh ke mũ.

⁷ Jamã hár(a) tóg prĕr mũ, ký tóg: “!..ã isý hĕ ri kenh mũ, Jesus'..!” he mũ, “!.kynhmý Topĕ kósín'..!” he tóg. “!..Ã mý sóg to vĭnh mũ, ã tý inh vóg kónãnh tũ nĭnh jé, ký Topĕ vý inh vĭ mĕg mo..!” he tóg.

⁸ Hã ra Jesus tóg ti mý: “ti tovãnh ra, Nén-Kórég’,” he ja nĭ.

⁹ Ký Jesus tóg ti mý: “ã jyjy hĕ ri ke tí,” he mũ. Ký tóg: “Mil,” he mũ. “E tãvĭ ěg nýtǐ,” he tóg, Nén-Kórég tí.

¹⁰ Ký tóg to vĭ', to vĭ', he mũ, Jesus tý ěmã ěn ki ti kutĕm tũ nĭ jé.

¹¹ Hã ra ag mĕg tý porco ag tóg jĕg nýtǐ, pãnónh ěn kri.

¹² Ký Nén-Kórég ag tóg Jesus mý: “ag mĕg to ěg jĕgnĕ, ěg tý ag kãki ge jé,” he mũ.

¹³ Ký tóg ag mý: “hej,” he mũ. Ký Nén-Kórég ag tóg ěn ti tovãnh mũ sir, porco ag ki ge ag tóg mũ sir. Ký ag tóg re mũ sir, porco ag. Rãn ki ag tóg re mũ, ký ag tóg nýgnýr kãn mũ sir, goj nig ki. Kãgter kãn ag tóg mũ. Porco tý mil régre ag vĕ, hýn.

¹⁴ Ký porco ki rĭr tí ag tóg sir pétĕ mũ, cidade ra. Tá ag tóg kãmén kãn mũ, Nén-Kórég tý jagrĕ ja ěn ti. Ký ag tóg Jesus to mũ kãn mũ sir, nĕn ěn ve jé.

¹⁵ Jesus tá ag tóg junjun mũ sir, ký ag tóg ũn jagrĕ kórég ja ěn vég mũ, kur tu ký. Krĭ há' he tóg mũ, ũ tý mil tý jagrĕ kórég ja ěn ti. Ký ag fe tóg jŭrũn ke mũ.

¹⁶ Ký ũ tý vég mũ ag tóg kãmén mũ sir ag mý Ũn jagrĕ kórég ja ti, porco ag.

¹⁷ Hã ký ag tóg Jesus mý to vĭ mũ, ti tý tá kutĕ jé, ag rã hã nĭ tũ nĭ jé.

¹⁸ Ti tý canoa kãki rã ký ũn jagrĕ kórég ja tóg: “nhý ã mré tǔg mũ,” he mũ, Jesus mý.

¹⁹ Hã ra tóg ti mý nenh. “Ha tǔg, ã ĩn ra, ã tý ã mré ke ag mré nĭ jé,” he tóg ti mý. “Ag mý kãmén nĭ, ěg jóg mág tý ã tý há' he mũ ti, ti tý ã jagãgtãn mũ ti,” he tóg ti mý.

²⁰ Ký tóg tí mũ. Ěmã tý 10 (ke) ki ga tá tóg kãmén mũ, Jesus tý ã tý há' he ti. Ký tóg ag kar mý e tí.

Jairo tý Jesus mý ã kósín fi to vĭ

(Mt 9.18-19; Lc 8.40-42)

²¹ Ký Jesus tóg kafã ra tǔg mãn mũ, canoa kãmĭ. Ký vĕnh e tóg ti jo vĕnh mãn mũ. Hã ra tóg goj nig fyr tá jĕ nĭ.

²² Ký ũ tóg kãtǐ mũ, ti jiji há vý: Jairo, he mũ. Judeu ag vĕnh kanhrãn jafã to tóg tý pã'i nĭ. Ti tý Jesus ve ký tóg ti krĕm mũg ke mũ.

²³ Ti mý tóg: “inh kósín sĭ fi vý tǔg sór mũ,” he mũ. “Kunĭg, ã tý ã nĭgé tý fi mĕ jé, fi tý há' he jé, fi kren jé,” he tóg.

²⁴ Ký tóg ti mré tí mũ. Hã ra ũn e ag tóg ti nón mũ ký ti kutãn mũ.

Ũn týtã kaga fi

(Mt 9.20-22; Lc 8.43-48)

²⁵ Jo ũn týtã ũ fi tóg tá nĭgtǐ. Kyvĕnh krýg tũ han ký fi tóg nĭ, prýg tý 12 (ke) ki.

²⁶ Médico ag tý fi vĕsýrĕnh mág han, to fi tóg ã tý nĕn vãm kãn, hã ra fi tóg há' he tũ nĭ, ke han han fi tóg.

²⁷ Hã ra fi tóg Jesus kãme mĕ ja nĭgtǐ, ký fi tóg vĕnh e kãmĭ tǔg ký ti nón ti kur mĕg mũ sir.

²⁸ “Sỹ hên ri ke mũn ti kur mẽ kỹ inh hỹn han mũ,” he fi tóg.

²⁹ Fi tỹ ti kur mẽ kỹ fi kyvénh tóg gym ke mũ sir vāhā, kỹ fi tóg ki kanhró nĩ, fi kaga tỹ há’ he ên ki.

³⁰ Hā ra Jesus tóg ã fe tỹ ki kanhró nĩ, ã jykre kutê ên ki. Kỹ tóg vênh e kākĩ vĩrĩn ke mũ sir. “Ủ nỹ inh kur mẽ?” he tóg.

³¹ Kỹ ti mré mũ tĩ ag tóg ti mỹ: “vênh kar tỹ ã kutān vê,” he mũ. “Jo ã tóg: ù nỹ inh kur mẽ? he mũ,” he ag tóg ti mỹ.

³² Kỹ tóg tāmĩ êvānh mũ, ù tỹ ã mẽg mũ fi ve jé.

³³ Hā ra ùn tỹtá fi tóg ki kanhró nĩ, fi han mũn ki. Kỹ fi tóg kamêg kỹ, jũrũn ke kỹ mũg ke mũ, ti krêm. Kỹ fi tóg ti mỹ kāmén kãn mũ sir.

³⁴ Hā ra tóg fi mỹ: “inh kósĩn,” he mũ. “Ā tỹ inh ki rā kỹ ã tóg há’ hé,” he tóg. “Ha tũg, jatun mỹ, ã han vê ha,” he tóg, fi mỹ.

Jairo kósĩn fi rĩr mǎn

(Mt 9.23-26; Lc 8.49-56)

³⁵ Ti tỹ ver fi mré vēmén jê ra ù ag tóg tá junjun mũ, pǎ’i tỹ Jairo ên ĩn tá. “Ā kósĩn fi vỹ hur ter,” he ag tóg. “Tũg ja fi tóg nĩ ha,” he ag tóg. “Hā kỹ ti mỹ: kunĩg, he mǎn tũg nĩ, ti kutān mǎn tũg nĩ,” he ag tóg, Jairon mỹ.

³⁶ Hā ra Jesus tóg mẽg mũ, kỹ tóg: “kamêg tũg nĩ, inh vĩ hā kri nĩmĩnĩ,” he mũ, pǎ’i ên mỹ.

³⁷ Kỹ tóg ùn e ag tỹ ti ĩn ra mũ kamêg. “Pedro vỹ tũg mũ inh mré, Tiago ke gé,” he tóg, “Tiago jǎvy tỹ João ke gé,” he tóg.

³⁸ Ag tỹ Jairo ĩn tá junjun mũ ra Jesus tóg vênh e vэг mũ sir, kygfỹ mũ fag, vêsỹrénh jagy han mũ fag.

³⁹ Kỹ tóg kǎ rǎ kỹ fag mỹ: “ǎjag tỹ ne jé kygfỹ nê, ǎjag tỹ ne jé vêsỹrénh nê?” he mũ. “Ter tũ fi nĩ, nũr fi nỹ nĩ,” he tóg.

⁴⁰ Hā ra fag tóg ti nyg mũ. Hā ra tóg fag pan mũ sir, kỹ tóg fi panh mré, fi mỹnh fi mré fi venh tĩ mũ, ti mré kāmũ mũ ag mré.

⁴¹ Fi nĩgê kǎgmĩ kỹ tóg ti mỹ: “talitá cumi,” he mũ. Ēg vĩ ki ke vê, hǎ vỹ: nĩ ra, jỹ, he mũ.

⁴² Kỹ vāhā gĩr fi tóg nĩ mũ sir, kǎnê tĩ fi nĩ sir. Kri prỹg tỹ 12 (ke) fi nĩ. Kỹ tóg ag mỹ e tǎvĩ tĩ.

⁴³ Hā ra tóg ag mỹ vĩ tar han, ag tỹ ù mỹ tó tũg jé. “Ha fi mỹ vėjên ven,” he tóg. Hā ra tóg fi ter kỹ nỹ ra fi rĩn mǎn.

6

Jesus jamǎ tá ke ag tỹ ti to é he

(Mt 13.53-58; Lc 4.16-30)

¹ Kỹ Jesus tóg tá kǎkutê kỹ ã jamǎ tá jun mũ sir. Ti mré mũ tĩ ag tóg ti mré mũ mũ gé.

² Vênhkán ke kurǎ ki tóg ag vênh kanhrān jafǎ ki ag kanhrān mũ. Ag tỹ ti vĩ mẽ kỹ tóg ag mỹ e tĩ. “Hê tán hỹn ki kanhrān, vênh jykre tag ti ki? Ủ nỹ hỹn ti kanhrān?” he ag tóg, ti jamǎ tá ke ag. “Ēg tỹ nén han vānh hyn han tóg tĩgtĩ,” he ag tóg.

³ “Īn han tĩ ên vê mỹr,” he ag tóg. “Maria fi kósĩn vê mỹr, Tiago kǎke, José, Judas, Simão kǎke, kỹ ti ve fag vỹ ěg mré nỹtĩ gé mỹr. Ti tỹ ne jé tỹ ěg kǎfór nĩ sór nê?” he ag tóg. Kỹ tóg ag mỹ tỹ ù nỹ.

⁴ Kỹ Jesus tóg ag mỹ: “êmā ù tá ke ag tóg Topê vĩ tó tĩ to é he tũ nĩgtĩ mỹr,” he mũ. “Ti jamǎ tá ke ag tóg ti to é he tĩ jǎvo, ti mré ke ag, ti kanhkǎ ag,” he tóg.

⁵ Kŷ Jesus tóg tá nén ũ han tũ nĩ sir. Ũn kaga pipir ag hã tŷ há' he tóg, ã nĩgé tŷ ag mẽ kŷ.

⁶ Ag tŷ ti ki ge tũ tóg ti mŷ e tĩ, ti jamãn ki. Kŷ tóg ěmã kãsir mũ tĩg kŷ ag kanhrãn tĩ nĩ sir.

Jesus tŷ ũ tŷ 12 (ke) ag jĕgnĕ
(Mt 10.5-15; Lc 9.1-6)

⁷ Kŷ Jesus tóg ũ tŷ 12 (ke) ag jé prĕr mũ. Kŷ tóg ag mũn mũ, ũn régre tĩn', ũn régre tĩn' he tóg. Ag mŷ tóg vĕnh jykre nĩm mũ, ag tŷ vĕnh jagrĕ kórég pan mũ jé.

⁸ Kŷ tóg ag mŷ: “ãjag mũn kŷ pão ma mũ tũg nĩ,” he mũ, “bolsa ke gé, jãnkamy ke gé,” he tóg.

⁹ “Vátó hã va mũmnĩ, kãtó ti, pĕ né ke gé, pĕn to ró ti,” he tóg.

¹⁰ Kŷ tóg ag mŷ: “ãjag tŷ ěmã ũ tá jun kŷ, ãjag tŷ ĩn ra rã mũ hã ki nũgnũr hemnĩ,” he mũ, “hã ki ãjag tŷ kurã ki panh ke mũ ěn tá krŷgkrŷg nĩ,” he tóg.

¹¹ “Ěmã ũ tá ke ag tóg kejĕn ãjag mŷ: kãgemnĩ, henh ke tũ nĩ, ag tŷ ãjag vĩ mẽ jãvãnh nŷtĩn kŷ. Kŷ ãjag pĕn hã kŷkũnh nĩ, ãjag tŷ tá pa kŷ,” he tóg, “ag tŷ ve kŷ to ki kanhró nŷtĩ jé, Topĕ tŷ ag mŷ: vó', he ti,” he tóg ag mŷ. “Ha mẽ, ki hã sóg tó mũ. Kurã tŷ ěgno ki, isŷ vĕnh kar jykre tũgnŷm ke kurã ěn ki ag tóg jagãgtar nŷtĩnh mũ, ag tŷ ãjag vĩ jĕmĕ jãvãnh nŷtĩn kŷ,” he tóg, Jesus ti.

¹² Kŷ ag tóg mũ mũ sir, ũ tŷ 12 (ke) ag. “ãjag jykre tovãnh nĩ,” he ag tóg mũ, vĕnh kar mŷ.

¹³ Vĕnh jagrĕ kórég pan ag tóg mũ, ha mẽ. Ũn kagyga ag to tĩn ag tóg mũ, azeite tŷ, kŷ ag tóg tŷ há' he kãn mũ sir.

João Batista ter
(Mt 14.1-12; Lc 9.7-9)

¹⁴ Kŷ pã'i mág tŷ rei tóg Jesus kãme mẽg mũ sir. Vĕnh kar vŷ ti kãmén tĩ, hã kŷ tóg mẽg mũ. Pã'i mág tŷ rei ěn jijin hã vŷ: Herodes, he mũ. Kŷ tóg: “João hŷn (tóg),” he mũ, “ũ tŷ ag kygpég tĩ ěn ti,” he tóg. “ã ter jan tán hŷn vŷn ké,” he tóg. “Hã kŷ tóg ěg tŷ nén han vãnh kar ěn hyn han tĩ,” he tóg, Jesus to, Herodes ti.

¹⁵ Hã ra ũ tóg Jesus to: “Elias vĕ,” he mũ. Kŷ ũ tóg: “Topĕ vĩ tó tĩ vĕ, vãsŷ Topĕ vĩ tó tĩ ag ri ke vĕ,” he mũ gé.

¹⁶ Hã ra Herodes tóg ti kãme mẽ kŷ: “João hŷn ã ter ja tá vŷn ké, sŷ ũn krĩ kym ja ěn ti,” he mũ.

¹⁷ Herodes vŷ João se ja nĩ, vĕse jafã kãki tóg ti fón ja nĩ, Herodias fi tũgrĩn. Tŷ fi Filipe prũ fi nĩ, ti jãvy, hã ra tóg fi tŷ prũg mũ, Herodes ti.

¹⁸ Kŷ João tóg Herodes mŷ: “ã hã ne tóg ã mré ke prũ fi tŷ prũg mũ!,” he ja nĩ. “Fi ki ã tóg Topĕ vĩ mranh mũ,” he ja tóg nĩ, João ti, Herodes mŷ.

¹⁹ Tag to Herodias fi tóg ti to kórég nĩ, ti tén ke to fi tóg jykren nũgtĩ, hã ra fi tóg ti tŷ hĕ ri ke tũ nĩ,

²⁰ Herodes tŷ ti kamĕg kŷ. João vŷ tóg tŷ ũn jykre kuryj nĩ. Topĕ jykre hã han tóg tĩ. Hã kŷ Herodes tóg ti jy nĩgãn tĩ, ti tŷ ti jykre há ki kanhró nĩn kŷ. João vĩ tóg ti mŷ vĕnhmŷ tĩ, ge ra tóg ti mŷ mẽ há ti, Herodes mŷ.

²¹ Kejĕn tóg fi mŷ ti tén ke ki króm ke mũ. Herodes tóg ã mur ja kurã ěn ki festa mág han mũ, tenente ag mŷ, soldado ag pã'i ag mŷ ke gé, ũn rico ag mŷ ke gé, Galilĕia tá ke ag mŷ.

22 Kŷ Herodias fi kósin fi tóg ag jo vènh gringrén mŷ, hã ra tóg ag mŷ sĭ tãvĭ tĭ, Herodes mŷ, ti mré nŷtĭ ag mŷ ke gé, ti mré jég mŷ ag mŷ. Kŷ tóg fi mŷ: “ã tŷ nén to vĭ mŷ tŷ sóg ã mŷ nĭm mŷ,” he mŷ.

23 Fi mŷ tóg: “sŷ ke há vè,” he mŷ. “Ã tŷ nén to vĭ mŷ kar nĭm jé sóg ke mŷ, isŷ nén kar kaju mré hã,” he tóg, tátãg fi mŷ.

24 Hã ra fi tóg ã mŷnh fi to tĭ mŷ sir: “Inh hŷn ne to vĭnh mŷ?” he fi tóg mŷ, ã mŷnh fi mŷ. Kŷ fi tóg: “João krĭ to vĭmni,” he mŷ, “ũ tŷ ag kygpég tĭ ên krĭ to,” he fi tóg, ã kósin fi mŷ, Herodias fi.

25 Kŷ fi tóg vèsŷmér pã'i mág ên to vènhvãg tĭ mŷ. “Inh mŷ ŷri João Batista krĭ nĭm, pénky kãkã,” he fi tóg mŷ.

26 Kŷ Herodes tóg fe kaj mág han mŷ sir. Hã ra tóg fi mŷ: “sŷ ke há vè,” he ja nĭ, hã kŷ tóg fi mŷ han sór mŷ, ti mré nŷtĭ ag tŷ mē kãn ja nĭn kŷ.

27 Hã kŷ tóg polĭcia ŷ jènég mŷ, ti tŷ ti krĭ ma kãtĭg jé. Kŷ tóg ti krĭ kym mŷ sir, vèse ja kãtã.

28 Kŷ tóg ti krĭ ma kãtĭ mŷ sir, pénky kãkã nĭm kŷ. Kŷ tóg fi mŷ nĭm mŷ, tátãg fi mŷ. Kŷ fi tóg ã mŷnh fi mŷ ma kãtĭ mŷ, Herodias fi mŷ.

29 Kŷ João mré mŷ tĭ ag tóg ti venh mŷ mŷ, ti ter mē kŷ. Kŷ ag tóg ti há va mŷ mŷ, vènh kej ra. Tá ag tóg ti péju mŷ sir.

*Jesus tŷ ŷ tŷ 5 mĭl (ke) ag jĕn
(Mt 14.13-21; Lc 9.10-17; Jo 6.1-14)*

30 Kejĕn Jesus tŷ ŷn vin mŷ ag tóg Jesus to vŷnvŷn ke mŷ, ti mŷ kãmén jé, ag tŷ vènh kar mŷ nén tó ja ên ti, ag tŷ nén ŷ han mŷ kar ên ke gé.

31 Kŷ tóg ag mŷ: “mŷ nŷ, êg pir mŷ êmã tŷg ja ra mŷ jé, êg vènhkãn sĭ han jé,” he mŷ. Kãmŷ ag tóg nŷ nĭ, e ag tóg tĭ ha, kŷ tóg ag jĕn ke mŷ ra vènhmŷ tĭ sir.

32 Kŷ ag tóg canoa kãmĭ mŷ mŷ sir, êmã tŷg ja ra, ãjag pir mŷ.

33 Hã ra ŷn e ag tóg ag mŷ ve kŷ ag ki kanhrãn mŷ, kŷ ag tóg ãjag pĕn kã ag jy pĕtĕ mŷ, êmã kar tá kãmŷ kŷ. Ag jo ag tóg tá junjun mŷ sir, vènh e ên ti.

34 Jesus tŷ tá jun kŷ tóg sir ŷn e ag vég mŷ, kŷ ag tóg ti mŷ jagtar nŷtĭ. Ti mŷ ag tóg tŷ êg mĕg tŷ mé, êg mĕg tŷ carneiro ri ke nŷtĭ. ŷ tŷ êg mĕg ki rĭr tŷ nĭn kŷ tóg jagãgtar nŷtĭgtĭ, êg mĕg ti. Tag ri ke ag nŷtĭ, ŷn e ên ag, Jesus mŷ, ag tŷ Topĕ vĭ ki kagtĭg nŷtĭn kŷ.

35 Hã ra tóg rãké nŷ sir, kŷ ti mré mŷ tĭ ag tóg ti mŷ: “ki ti êmã tŷ nĭ, rãké ti nŷ ha,” he mŷ.

36 “Ã tŷ ag mŷn kŷ tóg há tĭ vè. Kŷ ag tóg êmã kar mĭ mŷnh mŷ, vĕjĕn jãvãnh jé,” he ag tóg ti mŷ.

37 Hã ra tóg ag mŷ: “ha inhhã ag jĕn ge,” he mŷ. Hã ra ag tóg: “kŷ êg mŷ jãnkamy tŷ hĕn ri ke tŷ pão kajãm mŷ?” he mŷ, “êg tŷ ag jĕn jé?” he ag tóg ti mŷ.

38 Kŷ tóg ag mŷ: “pão tŷ hĕ ri ke nŷ ki nŷtĭ?” he mŷ. “Ha venh mŷ jég,” he tóg. Ag tŷ ve kŷ ag tóg: “ũ tŷ 5 (ke) vè,” he mŷ, “pirã régre ke gé,” he ag tóg.

39 Kŷ tóg ag mŷ: “nĭgnĭ ra, re gŷnh tánh kri, mrugmru kri,” he mŷ, “vènhmãn kŷ,” he tóg, vènh kar ên mŷ.

40 Kŷ ag tóg vènhmãn kŷ nĭ', vènhmãn kŷ nĭ' he mŷ, ŷ vŷ tóg 100 (ke) nĭ' he mŷ, jo ŷ tóg 50 (ke) nĭ' he mŷ, ag vènhmãn ŷ.

41 Kŷ tóg pão tŷ 5 (ke) génh kŷ, pirã régre génh kŷ kanhkã ki êvãnh mŷ, kŷ tóg Topĕ mré vĭ mŷ sir, kŷ tóg pão kĕnh mŷ sir, ã mré mŷ tĭ ag mŷ tóg vin mŷ, ag tŷ ŷn e ên mŷ vènh kãpãpãm jé. Pirã régre tŷ tóg vènh kãpãpãm mŷ gé sir.

42 Kŷ vènh kar vŷ ko kãn kŷ funfór mŷ sir.

⁴³ Kēj tỳ 12 (ke) fān ag tóg mū sir, pāo ke tỳ, pirā ke tỳ.

⁴⁴ Pāo ēn ko mū ag tóg tỳ 5 mil (ke) nýtī, ũn týtá fag tó tū.

Jesus tỳ goj kri tīg

(Mt 14.22-33; Jo 6.15-21)

⁴⁵ Kỳ Jesus tóg vēsýmér ā mré mū tī ag mỳ tó mū, ag tỳ canoa kāmī mū jé, ag tỳ ti jo kafā ũ ra mū jé, ěmā tỳ Betsaida ra. “Isỹ ũn e tag ag mỳ: ha mǔjĕg, henh ke vĕ ver,” he tóg ag mỳ.

⁴⁶ Kỳ tóg ag mỳ: “ha mǔjĕg,” he mū sir. Ag mūn kar tóg pānónh to tāpny mū, Topĕ mré vī jé.

⁴⁷ Kutý ěn kỳ canoa tóg ver tī nĩ, goj kāmī. Jo Jesus tóg tar tá jĕ nĩ ver, ā pir mỳ.

⁴⁸ Hā ra ag tóg canoa vóg kỳ ronron mū sir, mū kónān ag tóg mū sir, kāka tỳ ag kato tĕn kỳ. Hā ra tóg ag ronron vég mū sir, Jesus ti. Kỳ tóg kurā ke ra ag to kātī mū, goj kri tīg kỳ, ā pĕn kā mỳr. Hā ra tóg ag tá jun mū sir, kỳ tóg ag pātĕn sór nĩ ve nĩ.

⁴⁹ Ag tỳ goj kri ti tīg ve kỳ ag tóg: “vĕnh kuprīg vĕ,” he mū. Kỳ ag tóg vĕkrĕnrĕr mū,

⁵⁰ ag tỳ jūrĭn ken kỳ, ag kar tỳ ti ve kỳ. Hā ra tóg vēsýmér ag mré vī mū, kỳ tóg ag mỳ: “kamĕg tǔg nĩ,” he mū. “Inh hā vĕ, jūrĭn ke tǔg nĩ,” he tóg.

⁵¹ Kỳ tóg canoa kākī rā mū sir ag mré, Jesus ti. Kỳ kāka tóg tū' he mū sir. Kỳ tóg ag mỳ e (pĕ) tāvī tī.

⁵² Hā kỳ tóg ag tỳ to jykrĕn tū tī. Ver ag tóg krī tū nýtī, hā kỳ ag tóg Jesus jykre ki kagtīg nýtī ver, ti tỳ pāo pir tỳ ũn e jĕn ja ra.

Jesus tỳ Genesaré mĩ tīg

(Mt 14.34-36)

⁵³ Ag tỳ canoa kāmī pa kỳ ag tóg ga tỳ Genesaré tá junjun ja nĩ. Kỳ ag tóg canoa nỹgnỹn mū sir.

⁵⁴ Ag tỳ canoa kāmī pa kar kỳ tá ke ag tóg vēsýmér ti ki kanhrān mū, Jesus ki.

⁵⁵ Kỳ ag tóg ĩn kar mĩ pétĕ mū sir, kỳ ag tóg ũn kagyga ag gé kāmū mū ti to. Kur ká ag tóg ag gé kāmū mū. Ti jĕg jan ra ag tóg ti nón mū mū, ag tỳ ti jĕg ja mĕ kỳ.

⁵⁶ Ti tỳ ěmā ũ tá jun kỳ ag tóg vĕnh kaga gé kāmū tī, kỳ ag tóg ĩn prur ki ag vin tī, ěmā kāsir ki, ěmā mág ki ke gé, vānh kāmī ke gé. “Mỳ ā mỳ há, ěg tỳ hĕn ri ke mūn ā kur mráj mĕ jé?” he ag tóg ti mỳ. Kỳ ag tóg há' há' he kān mū sir, ag tỳ ti kur mĕn kỳ.

7

Ti si ag jykre ti

(Mt 15.1-9)

¹ Kejĕn Fariseu ag tóg Jesus to vĕnhmān mū, Topĕ vī to professor ag mré. Jerusalém tá ag kāmū ja nĩ.

² Hā ra ag tóg Jesus mré mū tī ũ ag jĕn vég mū. Nĩgpég tū ja ag tóg nĩ, hā kỳ tóg Fariseu ag mỳ jĕggryg tī.

³ Fariseu ag tóg nĩgpe kar kỳ tỳ jĕg tī, Israel kar ag ke gé, ag tỳ ti si ag jykre han kỳ.

4 Ag tÿ negocio tá kãmũ ký ag tóg vëso tÿ kó he tí, goj tÿ, vëso tÿ kó he kar hã ag tóg ko tí. Vënh jykre si tÿ hën ri ke hyn han ag tóg tí, caneca kupég tí, kukrũ kupég tí, lata kupég tí ke gé.

5 Ký Fariseu ag tóg Jesus mÿ ke mũ, Topẽ ví to professor ag mré hã. “Ã mré mũ tí ag tÿ hë ri ke jé ti si ag jykre han tũ nĩ nê?” he ag tóg mũ. “Ag tÿ ne jé ajag nĩgê jëggry ra jën nê?” he ag tóg mũ.

6 Hã ra tóg ag mÿ: “Isaiás vÿ ajag to ví ja nĩ, vãsÿ,” he mũ, “kÿ tóg rán kÿ nĩ,” he tóg. “Tĩ vïn hã vë, ha mē: povo tag vÿ ajag nũnê hã tÿ inh mÿ ví há han tí, hã ra ag jykre pí(jé) tÿ inh jykre nÿ’.

7 Fagrĩnh mÿ ag tóg iso grĩnh ke tí, hã ra ag tóg ëprã ke ag jykre to: Topẽ tÿ tón hã vë, he tí, he ja tóg nĩgtĩ, Isaiás tí,” he tóg, Jesus tí. “Hã ký tóg ajag to kí hã tó ja nĩ, ajag jykre régre nÿtĩn kÿ,” he tóg, Jesus tí.

8 “Topẽ ví tovãnh ajag tóg mũ,” he tóg. “Hã ra ajag tóg ëprã ke jykre han tí,” he tóg, Jesus tí.

9 Ký tóg ag mÿ: “ajag hã ne tóg Topẽ ví mranh tí’,” he mũ, “ajag tÿ ajag jykre si há han jé,” he tóg. “Hã ra tóg ajag mÿ há nÿ, ajag jykre si ên tí,” he tóg, ag mÿ.

10 “Moisés tÿ ajag mÿ Topẽ ví tó ký tóg ajag mÿ: “ã mÿnh fi mré ã panh kamêg nĩ, fag jagãgtãn nĩ,” he ja nĩgtĩ. “Û tÿ ã han mũ fag mÿ ví kónãnh mũ ên tén jé ã tóg ke mũ,” he ja tóg nĩgtĩ, Moisés tí,” he tóg, Jesus tí.

11-12 “Moisés jãvo ajag jykre vÿ ge nĩ, ha mē. Û tóg kejën ã han mũ fag jagãgtãn sór tũ nĩ. Ký tóg fag mÿ ón kÿ: “Topẽ tũ vë,” he tí, ti tÿ fag mÿ nĩm jafã ên to. Ký tóg fag kí rĩr ke tũ nĩ, ký tóg fag to é he mũ sir. Ajag jykre kórég hã vë,” he tóg, Jesus tí.

13 Ký Jesus tóg ag mÿ: “Topẽ ví mranh ajag tóg tí, ti jëgja kã ajag tóg ëprã ke ag jykre hã kí króm sór tí. Ge tÿ hën ri ke han ajag tóg tí,” he tóg ag mÿ, Jesus tí.

Nén tÿ ëg kavénh mũ (Mt 15.10-20)

14 Ký tóg vënh kar jé prër mãnh ký ag mÿ: “inh ví jëmê ra,” he mũ, “ajag kar tÿ kí kanhrãn jé,” he tóg.

15 “Vëjën pí(jé) ëg kavénh tí’,” he tóg, “ëg tÿn ko kÿ,” he tóg. “Nén tÿ ëg kí kãpa vÿ ëg kavénh tí, ëg tÿ nén ù vënhmÿ han ên vÿ ëg kavénh tí,” he tóg.

16 “Û nĩgrêg nÿtĩ tÿ tÿ jëmê jé,” he tóg, Jesus tí.

17 Tĩ tÿ ã pírh mÿ ĩn kãra rá ký tí mré mũ tí ag tóg tí kí jëmêg mũ. “Ëg mÿ kãmén há han nĩ, ã ví tag,” he ag tóg tí mÿ.

18 Ký tóg ag mÿ: “kÿ ajag mÿ kí kanhró tũ nÿtĩ ver?” he mũ. “Ëg jën tÿ ëg jënky kãra rá ký tóg ëg kavénh tũ nĩgtĩ mÿr,” he tóg.

19 “Ëg nug kãra tóg rá mũ, kar ëg fón mũ. Ëg krĩ kãra tóg rá tũ nĩgtĩ,” he tóg. Hã ký Jesus tóg vëjën kar to: “há tí nĩ,” he mũ.

20 Ký tóg: “nén tÿ ëg kí kãpa vÿ ëg kavénh tí,” he mũ.

21 “Nén tÿ ëg kí kãpan hã vë, hã vÿ: jykrén kónãnh, he mũ, ùn mén tũ fag to én, he mũ, nén ù péju, he mũ, ù tén, he mũ, ã prũ tũ fi mré nÿ, he mũ, ã mén tũ mré nÿ, he mũ.

22 nén kar to én, he mũ, vënh jykre pãno han, he mũ, ã tÿ nén ù nenh (ka)mê, he mũ, ù kato ví kónãnh, he mũ, vënhmÿ inh ag kãfór kar nĩ, he tí, he mũ, krĩ tũ, he mũ.

23 Nén kar kórég ên tóg ëg kí kãpa tí, hã ký tóg ëg kavénh tí,” he tóg, Jesus tí.

*Jesus tỳ tátãg sĩ fi jagrẽ kórég kutẽm
(Mt 15.21-28)*

²⁴ KỠ Jesus tóg tá kãkutẽ mũ sir, ga ù ra tĩg jé, cidade tỳ Tiro ra, cidade tỳ Sidom ra ke gé. Tá tóg ãn ù krẽm nĩ mũ, hã ra tóg: “ker ù ãnh nĩgia ki kanhrãh hẽ,” he mũ. Ge ra ag tóg ki kanhrãh mũ.

²⁵ KỠ vễsỹmẽr ùn tỳtã ù fi tóg kãtĩ mũ. Fi kósĩn fi vỹ jagrẽ kórég nĩ. Fi tỳ ti kãme mẽ kỠ fi tóg kãtĩ mũ. KỠ fi tóg ti krẽm mũg ke mũ sir, ùn tỳtã fi.

²⁶ Hã ra fi vỹ vỹ tỳ Grego nĩ, ù tỳ Siro-Fenício krẽ vỹ tỳ fi nĩ. KỠ fi tóg to vỹ mãn', to vỹ mãn', he mũ, ti tỳ fi kósĩn fi jagrẽ kórég ẽn kutẽm jé.

²⁷ KỠ Jesus tóg fi mỹ: “ẽg jẽn vỹ tỳ ẽg krẽ tỳ ko jafã nĩ,” he mũ. “Vẽnhmỹ ti nĩ, ẽg tỳ ẽg krẽ pão tỳ cachorro mỹ fón kỠ,” he tóg, fi mỹ.

²⁸ Hã ra fi tóg Jesus ti mỹ: “hỹ,” he mũ. “Hã ra cachorro sĩ ag tóg ẽg krẽ pão vãr ẽn ko tĩ, mesa krẽm,” he fi tóg ti mỹ.

²⁹ KỠ Jesus tóg fi mỹ: “tó há han ã tóg,” he mũ. “Ha tĩg, fi jagrẽ kórég tóg hur kutẽ, ã kósĩn fi ki,” he tóg mũ.

³⁰ KỠ fi tóg ã ãn ra tĩ mũ sir. Fi tỳ tá jun kỠ fi kósĩn fi tóg nỹ mũ, cama kri, hã ra fi jagrẽ kórég ẽn vỹ kutẽ ja nĩ.

Jesus tỳ ùn vỹ vãnh vỹn

³¹ KỠ Jesus tóg cidade tỳ Tiro ki ga ki kutẽ mũ, kỠ tóg cidade tỳ Sidom ãn rãm mũ gé sir, kỠ tóg ga tỳ Galiléia ki goj nig ra tĩ mũ sir, cidade tỳ 10 (ke) ãn rãm kỠ.

³² KỠ ag tóg ù pére kãmũ mũ, ti to, ùn kutu, ùn vỹ kar vãnh. KỠ ag tóg ti mỹ ti tóg mũ, ti tỳ ã nĩgẽ tỳ ti mẽ jé.

³³ Hã ra Jesus tóg ti pére tĩ mũ, ti pin kỠ, kỠ tóg ã nĩgẽ juféj tỳ ti nĩgrẽg nor nĩgfẽnh mũ, kỠ tóg ti nũnẽ to sug mũ sir.

³⁴ KỠ tóg kãnhkã ki ẽvãnh kỠ ynh' ynh' he mũ sir, kỠ tóg ti mỹ: “efatã,” he mũ. Ẽg vỹ ki ke hã vỹ: “ti nĩgrẽg jé nor hé,” he mũ.

³⁵ KỠ ti nĩgrẽg tóg nor' he mũ sir, ti nũnẽ tóg kavãr mũ sir. Vỹ tóg mũ sir, há' he tóg mũ sir.

³⁶ KỠ Jesus tóg ag tỳ tóg kamẽg, hã ra ag tóg tugtóg kãn mũ, ti tỳ: “ker tóg hẽ', ker tóg hẽ',” he mũ ra.

³⁷ KỠ ag fe tóg hẽn ri ke mũ. “Ti tỳ nẽn kar há vỹ tóg há tãvĩ nỹtĩ,” he ag tóg, Jesus to. “Ùn kutu ag ẽmẽ hyn han tóg, ùn vỹ vãnh ag vỹ hyn han tóg ke gé,” he ag tóg, Jesus to.

8

*Jesus tỳ ù tỳ 4 mil (ke) ag jẽn
(Mt 15.32-39)*

¹ Kejẽn ùn e ag tóg vẽnhmãmãm mũ, hã ra ag tỳ nẽn ù konh ke tóg tũ tĩ. KỠ Jesus tóg ã mrẽ mũ tĩ ag jé prẽr mũ sir, kỠ tóg ag mỹ:

² “ãnh mỹ ag tóg jagtar nỹtĩ, ùn e tag ag,” he mũ. “Kurã tãgtũ han ag tóg huri, ẽg mrẽ, hã ra ag tóg vễjẽn ve ja tũ nĩgtĩ,” he tóg.

³ “Sỹ ag kókĩr ra ag mỹ: ha mũjẽg, hen kỠ ãnh mỹ ù ag kãgter ha mẽ tóg tĩ, ẽmĩn kri, ẽpỹ kri, ag tỳ ãjag jamã ra vỹnvỹn ke jé,” he tóg. “Kuvar gy tóg nĩ, ù ag jamã ti,” he tóg, Jesus ti.

⁴ KỠ ti mrẽ mũ tĩ ag tóg ti mỹ: “ẽg hẽ ri ken kỠ pão venh mũ, ẽmã tũg ja tag ti ki, ẽg tỳ ag jẽn jé?” he mũ.

⁵ Hã ra tóg ag mý: “pão tỹ hē ri ke nỹ ki nỹti gē?” he mũ. Kỹ ag tóg ti mý: “ũ tỹ 7 (ke) vỹ nĩ,” he mũ.

⁶ Kỹ tóg vênh kar mý: “nĩgnĩ ra, ga kri,” he mũ. Kỹ tóg pão tỹ 7 (ke) ěn mǎn kỹ (tóg) Topē mré vĩ mũ. “Inh mý tóg há tĩ,” he tóg. Kỹ tóg kupãg' he mũ sir, pão ti, ã mré mũ tĩ ag mý tóg vin mũ sir, ag tỹ vênh kar ken jé. Kỹ ag tóg vênh kar ken mũ sir.

⁷ Kākufár pipir vỹ ki nỹti gē. Kỹ tóg to Topē mré vĩ mũ gē, kỹ tóg ag mý: “ha vênh ken,” he mũ gē, ã mré mũ tĩ ag mý.

⁸ Kỹ ag tóg ko kǎn mũ sir, funfór ag tóg mũ, hã ra tóg kén mũ sir. Kre tỹ 7 (ke) ěn fǎn tóg mũ, ti kén ti, Jesus mré mũ tĩ ag tỹ génh kỹ.

⁹ Ũ tỹ 4 (ke) ag vē, hēn ri ke mũn, pão ko mũ ag.

¹⁰ Kar kỹ Jesus tóg ag mý: “ha mũjēg,” he mũ. Kỹ tóg vēsýmér canoa kǎki rǎ mũ, ti mré mũ tĩ ag mré, kỹ ag tóg Dalmanuta tá ga ra mũ mũ.

Fariseu ag tỹ milagre ve sór

(Mt 16.1-4)

¹¹ Kỹ Fariseu ag tóg ti tá junjun mũ. Ag tỹ ón kỹ ti ki jēmē sór vē, ag tỹ kar ti kato vĩ jé. Kỹ ag tóg ti mý to vĩ mũ, ti tỹ ag mý kanhkǎ tá vênh jykre ven jé, ti tỹ ag mý ěg tỹ nén han vǎnh han jé. Ag tỹ ti jykre to: “Topē jykre mý vỹ?” he sór vē.

¹² Kỹ Jesus tóg jēnger jagy han, ã fe tỹ, kỹ tóg ag mý: “ājag ne tóg ěg tỹ nén han vǎnh hã ve sór mũ,” he mũ. “Sỹ ke há vē, hã kỹ sóg ke mũ: venh ke tũ ājag nĩ. Ũri ke ag vỹ ěg tỹ nén han vǎnh venh ke tũ pē nĩ,” he tóg, ag mý, Jesus ti.

¹³ Kỹ tóg ag ré kỹ tĩ mũ sir, canoa kǎki tóg rǎ mǎn mũ, kỹ tóg kafǎ ũ ra tĩ mũ sir.

Fermento to comparação

(Mt 16.5-12)

¹⁴ Hã ra ti mré mũ tĩ ag tóg pão mĩ ěkrén ja tũ nĩ. Pão pir hã vỹ kǎ nĩ nĩ, canoa kǎkǎ.

¹⁵ Hã ra Jesus tóg ag kanhrǎn kỹ ag mý: “ha mē,” he mũ. “Fariseu tỹ fermento há(r) kamēg nĩ,” he tóg, “Herodes tỹ fermento há(r) kamēg nĩ gē,” he tóg.

¹⁶ Kỹ ag tóg jagnē mý: “pão kǎ ěg jatun,” he mũ, “hã kỹ tóg tag tó mũ,” he ag tóg mũ.

¹⁷ Hã ra Jesus tóg ki kanhró nĩ, kỹ tóg ag mý: “pão tũ ti tĩ, he tũg nĩ,” he mũ. “Inh vĩ ki kagtĩg nỹti ve ājag tóg nỹti, sỹ nén han mũ to jykrén tũ nỹti ve ājag tóg nỹti,” he tóg. “Krĩ tũ nỹti ve ājag tóg nỹti,” he tóg.

¹⁸ “Ājag kanē ra ājag kyvó nỹti ve nỹti,” he tóg. “Ājag nĩgrēg ra ājag tóg kutu nỹti ve nỹti,” he tóg. “Mĩ ěkrén nĩ,

¹⁹ sỹ pão tỹ 5 (ke) tỹ ũn e jēn ja ěn mĩ. Ũ tỹ 5 mil (ke) ag vỹ kó, mýr, hã ra tóg kén,” he tóg. “Ājag kēj tỹ hēn ri ke fǎn ti, pão ke ti?” he tóg ag mý. Kỹ ag tóg: “kēj tỹ 12 (ke),” he mũ.

²⁰ Kỹ tóg: “kỹ pão tỹ 7 (ke) to jykrén nĩ gē,” he mũ. “Ũ tỹ 4 mil (ke) ag vỹ kó,” he tóg, “hã ra kre tỹ hē ri ke nỹ fór, ti ke tỹ?” he tóg. Kỹ ag tóg: “kre tỹ 7 (ke),” he mũ.

²¹ Kỹ tóg ag mý: “ge ra ājag tóg ki kagtĩg nỹti,” he mũ. Ti tỹ ag mý Fariseu ag jykre tó jan hã vē, Herodes jykre ti. Ag jykre hã to tóg: ag tỹ fermento há(r), he ja nĩ.

Jesus tỹ ũn kyvó tỹ há' he

²² Kÿ tóg kafã ù tá jun mũ sir, êmã tÿ Betsaida tá, ti mré mũ tĩ ag mré. Kÿ tá ke ag tóg ùn kyvó pére kãmũ mũ. Jesus mÿ ag tóg to vĩ mũ, ti tÿ ti mẽ jé, ã nĩgé tÿ.

²³ Kÿ tóg ùn kyvó nĩgé kãgmĩ kÿ ti pére kuté mũ, êmã ki. Kÿ tóg ti mÿ: “ã mÿ nén ù vég mũ?” he mũ.

²⁴ Kÿ tóg êvãnh kÿ ti mÿ: “ag ve inh,” he mũ, “hã ra ag tóg inh mÿ tÿ ka mũ ên ve nÿtĩ,” he tóg.

²⁵ Kÿ tóg ã nĩgé tÿ ti kanẽ mẽ mãn mũ, kÿ tóg êvãnh há han mũ sir. Há' he tóg mũ. Tãmĩ tóg ve há han kãn mũ, ùn kyvó ja ti.

²⁶ Kÿ Jesus tóg ti mÿ: “ha vêsÿmér ã jamã ra tũg,” he mũ. “Êmã tag ki rã tũg nĩ,” he tóg ti mÿ, Jesus ti. Kÿ tóg tĩ mũ sir.

Pedro tÿ Jesus tó

(Mt 16.13-20; Lc 9.18-21)

²⁷ Kÿ Jesus tóg ã mré mũ tĩ ag mré tũg mãn mũ gé sir, êmã tÿ Cesaréia Filipe tá ga ra. Êmĩn jagma tũg kÿ, êpÿ jagma tũg kÿ tóg ã mré mũ tĩ ag ki jêmẽg mũ, Jesus ti. “Ag iso hẽ ri ke tĩ?” he tóg.

²⁸ Kÿ ag tóg ti mÿ ke mũ. “João Batista vẽ, he ag tóg tĩ ã to,” he ag tóg mũ sir. “Jãvo ù ag tóg: Elias vẽ, he tĩ. Jãvo ù ag tóg: Topẽ vĩ tó tĩ ù vẽ, he tĩ, ã to,” he ag tóg ti mÿ.

²⁹ Kÿ tóg ag mÿ: “ag jãvo ãjag iso hẽ ri ke tĩ?” he mũ. Kÿ Pedro tóg ti mÿ: “tÿ ã Cristo nĩ,” he mũ.

³⁰ Kÿ tóg ag jÿvẽn mũ, ag tÿ ù mÿ kãmén tũ nĩ jé.

Jesus tÿ ã jagtar ke tó

(Mt 16.21-28; Lc 9.22-27)

³¹ Kÿ tóg ag kanhrãn mũ sir. “Tÿ sóg êprã ke fi kósın nĩ,” he tóg. “Ijagtar jagy han ke vẽ,” he tóg. “Kófa ag tÿ iso: kórég ti nĩ, henh ke vẽ, Topẽ tũ ki rĩr tĩ ag ke gé, Topẽ vĩ to professor ag ke gé,” he tóg. “Ag tÿ isén ke vẽ, kurã tágtũ tũg mũ ra sóg rĩr mãn mũ hã ra,” he tóg mũ, ã mré mũ tĩ ag mÿ.

³² Kÿ ag tóg ki kanhrãn kãn mũ, ti tÿ ag mÿ nén tó mũn ki.

Hã ra Pedro tóg ti pin kÿ ti mré vĩ mũ, kÿ tóg: “vĩ tÿ ge han tũg nĩ,” he mũ.

³³ Hã ra Jesus tóg vêsÿjãm êvãnh kÿ ti mré mũ tĩ ag ki êvãnh mũ. Kÿ tóg Pedro to jũ mũ. “Kutũg, Satanás!” he tóg. “Ã pi(jé) Topẽ jykre tó mũ!” he tóg. “Êprã ke jykre vẽ, ã tÿ inh mÿ nén tó mũ tag ti,” he tóg, Pedro mÿ.

³⁴ Kÿ Jesus tóg ã mré mũ tĩ ag mré vẽn kar jé prẽr mũ, kÿ tóg ag mÿ kãmén mũ. “Ãjag tÿ inh mré kãmũ kÿ tóg há tĩnh mũ,” he tóg. “Kÿ ãjag jykre tovãnh nĩ, ãjag tÿ isũ tãvĩ han jé. Ha vé, ag tÿ inh cruz tÿ inh kri fi kÿ sóg tũg ke mũ, ag tÿ to isa kÿ isén jé, ha vemnĩ. Vẽn nhenh ke tũ sóg nĩ. Isÿ tag han ri ke han nĩ, kurã kar ki, ãjag tÿ inh mré mũ sór nÿtĩn kÿ,” he tóg.

³⁵ “Ãjag tÿ ãjag jykre hã han sór kÿ ãjag tÿ nũgme ki vár ke vẽ,” he tóg. “Jãvo ãjag tÿ isugrĩn ãjag jykre toyãnh kÿ ãjag krenkren ke vẽ,” he tóg, “ãjag tÿ vẽn vĩ sér tugrĩn kãgter ke mũ (hã) ra,” he tóg.

³⁶ “Hẽn ri ke mũn ãjag hÿn mundo ki nén ù kar ganhar henh ke mũ, hã ra ãjag kuprĩg tóg vãfor ke mũ. Kÿ tóg kórég nÿ.

³⁷ Êg tÿ ne tÿ êg kuprĩg kajãm ke tóg tũ tĩ, êg tÿ ti ve mãn jé,” he tóg, Jesus ti.

³⁸ “Uri ke ag tóg vyr mÿ Topẽ ù hÿn han tĩ, kÿ ag tóg Topẽ vĩ mranh tĩ gé,” he tóg. “Ag kãmĩ iso mÿ'ãg tũg nĩ, inh vĩ to. ãjag tÿ ùri iso mÿ'ãg kÿ sóg ãjag to mÿ'ãg ke mũ gé, inh kãtũg mãn kÿ,” he tóg. “Ãjag to sóg mÿ'ãg ke mũ, sÿ Topẽ

tý jěně mág ag mré kătĩg ken kŷ. Ijóg vŷ tóg isŷ ũn mág han ke mũ, inh kătĩg măn ti kŷ,” he tóg. “Tŷ sóg ěpră ke fi kósin nĩ,” he tóg, Jesus ti.

9

¹ Kŷ tóg ag mŷ: “ha vé, ki hă sóg tó mũ,” he mũ. “Ăjag kămĩ ũ ag vŷ Topě tŷ tŷ ěg pă'i nĩ venh ke mũ, ăjag ter ke to hă, tag ki ěg mré nŷtĩ ũ ag. Topě vŷ tar nĩ. Tĩ tar nĩ ve jé ag tóg ke mũ, ăjag ter ke to hă,” he tóg, Jesus ti.

Jesus tŷ vĕnh ve ũ han (Mt 17.1-13; Lc 9.28-36)

² Kar kură tŷ 6 (ke) tũg kŷ Jesus tóg ag mŷ: “mũ nŷ, vyr mŷ,” he mũ. Pedro mŷ tóg ke mũ, Tiago mŷ ke gé, João mŷ ke gé. Ag hă mré tóg pănónh ra tĩ mũ. Kŷ tóg ag jo vĕnh ve ũ han mũ.

³ Ti kur vŷ tóg kókov tăvĩ nĩ sir, kóprėj tăvĩ, fag tŷ kur kupri făg mũ ěn kupri kăfór tóg nĩ, ga kar mũ hă.

⁴ Kŷ Elias tóg sir vĕnh ven mũ, Moisés ke gé. Jesus mré ag tóg vĕmĕn mũ.

⁵ Kŷ Pedro tóg Jesus mŷ: “Senhor,” he mũ. “Tag ki tóg ha nĩ,” he tóg. “Ěg tŷ tag ki păjó tăgtũ han kŷn hŷn ha nĩnh mũ, ă mŷ, Moisés mŷ, Elias mŷ ke gé,” he tóg. Pedro ti.

⁶ Hă ra ag fe tŷ jũrũn ke kŷ tóg ti tŷ nĕn tónh ke ki kagtĩg nĩ, Pedro ti.

⁷ Kŷ kanhkă góg vŷ sir ag kri rũm ke mũ, kŷ, vĕnh vŷ tóg mĕ há' he mũ, kanhkă góg kătă, kŷ tóg: “inh kósin hă vĕ,” he mũ. “Inh fe pĕ vĕ,” he tóg. “Tĩ vŷ jĕmĕ ra,” he tóg, vĕnh vŷ ti, Topě ti.

⁸ Kŷ văhă ti mré mũ ti ag tóg ki ěvănh măn mũ sir, kŷ ag tóg Jesus hă vĕg mũ sir, ti mrĕ nŷtĩ ag ve măn tũ ag tóg nĩ.

⁹ Kŷ ag tóg pănónh tá kăre mũ sir. Kŷ Jesus tóg: “ker ũ mŷ ăjag tŷ ũri nĕn vĕg mũ tó hĕ,” he mũ. “Ěpră ke fi kósin tŷ ă ter ja tá vŷn ke kar hă inh kămĕn nĩ,” he tóg, Jesus ti.

¹⁰ Hă kŷ ag tóg ti vŷ han mũ sir. “Ne nĕ hŷn, ti tŷ: iser ja tá vŷn ke, he mũ tag ti?” he ag tóg mũ, jagnĕ mŷ.

¹¹ Kŷ ag tóg Jesus mŷ: “hă ra Topě vŷ to professor ag tóg Elias kătĩg măn ke tó tũ. “Kătĩg jé tóg ke mũ, Cristo kătĩg ke to hă,” he ag tóg tũ, Elias to. Hă mŷ?” he ag tóg mũ, Jesus mŷ.

¹² Kŷ tóg ag mŷ: “hŷ,” he mũ, “kătĩg jé tóg ke mũ, Elias ti, nĕn kar han măn jé,” he tóg. “Hă ra sóg răn kŷ nĩ gé. Tŷ sóg ěpră ke fi kósin nĩ mŷr,” he tóg. “Jagtar jagy mĕ jé sóg ke mũ. Ag tŷ iso é henh ke,” he tóg.

¹³ “Kŷ Elias vŷ hur kătĩg gé, kŷ ag tóg ti tŷ han, ag tŷ nĕn han sór mũ ěn ti,” he tóg. “Hă kŷ tóg răn kŷ nĩ,” he tóg, Jesus ti.

Jesus tŷ kyrũ jagrĕ kórég kutĕm (Mt 17.14-21; Lc 9.37-43a)

¹⁴ Kŷ ag tóg mũ mũ sir. Kŷ ag tóg văhă Jesus mré mũ tĩ ũ ag tá junjun mũ sir. Kŷ ag tóg vĕnh e vĕg mũ, ag pĕnĩn, kŷ Topě vŷ to professor ag tóg ag vŷ kato vŷ ũ han mũ, Jesus mré mũ tĩ ag mŷ.

¹⁵ Kŷ tóg văhă vĕnh e ěn ag mŷ e tĩ, ag tŷ ti ven kŷ. Kŷ ag tóg ti to pĕtĕ kămũ mũ sir, ti mŷ: “ă mŷ há?” he jĕ.

¹⁶ Kŷ Jesus tóg ag mŷ: “ăjag tŷ ne tŷ vĕmĕn nĕ?” he mũ.

¹⁷ Kŷ ag kă ũ tóg ti mŷ: “Senhor,” he mũ. “Inh kósin pĕre sóg kătĩ, ă to,” he tóg. “Jagrĕ kórég ti nĩ, hă kŷ tóg vŷ vănh (pĕ) nĩ,” he tóg.

18 “Ti jagrē kórég tỳ ti kã vyryn ke kỳ tóg kutē tĩ, kỳ tóg jārãn tĩ, ã jã tỳ tóg gyngyn ke tĩ, tar' he tóg,” he tóg. “Ă mré mũ tĩ ag mỳ sóg to vĩ vễ, ag tỳ ti jagrē kórég kutēm jé, hã ra ag tóg tỳ hễ ri ke tũ nĩ,” he tóg, Jesus mỳ.

19 Kỳ Jesus tóg ag mỳ: “ăjag ne tóg inh ki rã há han tũ nĩgtĩ,” he mũ. “Jykre pãno ăjag nỹtĩ,” he tóg. “Kysã tỳ hễ ri ke ki inh hỹn ăjag mré tĩ nĩ? Kysã tỳ hễ ri ke ki inh hỹn ăjag to fe tũ nĩ?” he tóg. “Inh mỳ ti pére kãmũjẽg,” he tóg.

20 Kỳ ag tóg ti mỳ ti pére kãmũ mũ sir. Jesus tỳ ti jagrē kórég vég mũ ra tóg kyrũ kã vyryn ke mãn mũ gé, kỳ tóg kutē mãn mũ gé sir, vĩrĩn', vĩrĩn' ke tóg mũ gé sir, jārãn tóg mũ gé sir.

21 Kỳ Jesus tóg ti panh ti mỳ: “mỳ si há tĩ ha?” he mũ. Kỳ tóg: “ã sĩ kã tóg ge nĩ,” he mũ, ti panh ti.

22 “Kejẽn ti jagrē kórég tóg pĩ ki ti fón mũ, goj ki ke gé, ti tỳ ti tén jé,” he tóg. “Ă tỳ hễ ri ken há nĩn kỳ ẽg jagãgtãn nĩ, ti tỳ há' hemnĩ,” he tóg.

23 Kỳ Jesus tóg ti mỳ: “ã tỳ hễ ri ken há nĩn kỳ, he tũg nĩ, inh mỳ,” he mũ. “Ũ tỳ Topê ki rã mũ ẽn tỳ hễ ri ken há han mũ, nén kar tỳ,” he tóg, Jesus ti.

24 Kỳ vễsỹmér kyrũ panh tóg: “ti ki sóg rãnh mũ,” he mũ, jamã hár(a). “Isỹ ti ki rã tũ ẽn ti tỳ inh ki tỳ tũ' hemnĩ,” he tóg.

25 Hã ra Jesus tóg ũ tỳ hễ ri ke vẽnhmãn vég mũ, kỳ tóg ti jagrē kórég to jũ mũ. “Vẽnh jagrē vĩ vãnħ,” he tóg, “vẽnh jagrē kutu’,” he tóg, “ha kãkutē, ti ki rã mãn tũg,” he tóg, Jesus ti.

26 Kỳ tóg prěr mũ sir, ti tỳ jũrũn ke han tóg mũ sir. Kỳ tóg kyrũ ki kãkutē mũ sir. Kỳ kyrũ tóg ter ve nĩ, kỳ ag tóg ti to: “tũg ja ti nĩ,” he mũ.

27 Hã ra Jesus tóg ti nĩgẽ kãgmĩ kỳ ti nĩm mũ sir, kỳ tóg jẽgnẽ mũ sir.

28 Kỳ Jesus tóg ti mũ. Ti tỳ ĩn kãra rã kỳ ti mré mũ tĩ ag tóg ti pin kỳ ti mỳ vĩ mũ. “Ĕg ne tóg ti tỳ há' he ja tũ nĩ'. Hễ ri ken kỳ, hỹn?” he ag tóg, Jesus mỳ.

29 Kỳ tóg ag mỳ: “vẽnh jagrē kórég tỳ ge kutēm tóg jagy nỹ ẽg mỳ,” he mũ. “Topê mré ẽg vĩ tĩ, kỳ ẽg tóg mrẽ vãkrég tĩ gé sir. Kỳ tóg vãhã kãkutē tĩ,” he tóg, Jesus ti.

Jesus tỳ ã ter ke tó mãn

(Mt 17.22-23; Lc 9.43b-45)

30 Kỳ ag tóg tá kãpa kỳ Galiléia mũ mũ mũ. Hã ra tóg: “ker ũ ẽg tỳ mũ mũ ki kanhrãn hễ’,” he mũ.

31 Ti tỳ ti mré mũ tĩ ag kanhrãn sór vễ, hã kỳ tóg ke mũ. Kỳ tóg ag mỳ: “ẽprã ke fi kósĩn ẽn vỹ jagtar nĩnh mũ,” he mũ. “Inh hã vễ. Ĕprã ke ag vỹ ag tỳ isỹ nén han sór mũ ẽn han ke mũ,” he tóg. “Ag tỳ isén ke vễ. Ag tỳ isén kar kỳ sóg hã ra rĩr mãn mũ, kurã tãgtũ tũg kỳ,” he tóg, Jesus ti.

32 Kỳ tóg ag tỳ ti tỳ nén tó mũ tag to jykrén tũ tĩ, hã ra tóg ag tỳ ti ki jẽmẽg tũ nỹtĩ, ag tỳ ti kamẽg kỳ.

Ũ tỳ tỳ ĩn mág nĩ

(Mt 18.1-5; Lc 9.46-48)

33 Kỳ ag tóg mũ mãn kỳ cidade tỳ Cafarnaum tá junjun mũ sir. Tá ag tóg ĩn ũ krēm nỹtĩ. ĩn ẽn tá junjun kỳ Jesus tóg ag mỳ: “ăjag tỳ ne tó mũ nẽ, ẽpyr jagma?” he mũ.

34 Hã ra ag tóg ti mỳ tó tũ nĩ. Ĕmĩn jagma mũ kỳ ag tóg jagnẽ mỳ: “ũ nỹ hỹn ẽg kãfór kar jẽ?” he ja nỹtĩ.

35 Kỳ Jesus tóg nĩ mũ, kỳ tóg ũ tỳ 12 (ke) ag jé prěr mũ sir, kỳ tóg ag mỳ: “ăjag mỳ tỳ ĩn mág nỹtĩ sór mũ?” he mũ. “Kỳ vễsỹ ĩn sĩ ri ke nỹtĩmĩn’,” he tóg.

36 Kŷ tóg gŷr sŷ mŷ: “kunŷg,” he mŷ. Ag kuju kã tóg ti fĕg mŷ, kŷ tóg ti jagma ã pĕ fón mŷ sir, kŷ tóg ũ tŷ 12 (ke) ag mŷ: “ãjag hã vŷ tŷ inh mré ke nŷtŷ,” he mŷ.

37 “Ăjag tŷ tŷ inh mré ke nŷtŷ kŷ gŷr tŷ ge jĕ'ŷn nŷ, ti to há nŷtŷmnŷ, isugrŷn. Ăjag tŷ isugrŷn ti to há nŷtŷn kŷ ãjag tóg iso há nŷtŷ gé,” he tóg. “Ăjag tŷ iso há nŷtŷ kŷ ãjag tóg ũ tŷ ijĕnĕg mŷ ĕn to há nŷtŷ gé sir,” he tóg, Jesus ti.

*Ũ tŷ Jesus kato tĕ tŷ nŷ kŷ ti mré ke
(Lc 9.49-50)*

38 Kŷ João tóg Jesus mŷ: “Senhor,” he mŷ. “Ũ ve ĕg tóg, kŷ ĕn tóg ã jyjy tó kŷ vĕnh jagrĕ kórĕg pan tŷ, ĕg tŷ ũn vég mŷ ĕn ti,” he tóg mŷ, Jesus mŷ. “Hã ra tóg ĕg mré tŷ tŷ nŷgŷtŷ, kŷ ĕg tóg ti mŷ: “vĕnh jagrĕ kórĕg pan sór tŷg nŷ,” hĕ,” he tóg, João tŷ, Jesus mŷ.

39 Hã ra Jesus tóg ti mŷ: “ti tŷ vĕnh jagrĕ kórĕg pan kamĕg tŷg nŷ,” he mŷ. “Ũ tŷ inh jiji tó kŷ nĕn han vãnh han kŷ tóg kar kŷ iso vŷ kónãn ke tŷ nŷ,” he tóg.

40 “Ũ tŷ ĕg kato tĕ nŷ tŷ nŷn kŷ ĕg mré ke vĕ sir,” he tóg.

41 “Sŷ ke há vĕ, hã kŷ sóg tó mŷ: kejĕn ũ tóg ãjag mŷ goj fĕg mŷ, isugrŷn, ãjag tŷ tŷ inh mré ke nŷtŷ tŷgrŷn. ĕn tóg vĕnh kato nĕn ũ há venh ke mŷ ge,” he tóg, Jesus ti.

*Ĕg tŷ Topĕ vŷ mranh
(Mt 18.6-9; Lc 17.1-2)*

42 Kŷ tóg ag mŷ ke mãn mŷ. “Ũn sŷ tag vŷ inh ki rã kŷ jĕ. Kejĕn ũ tóg ti tŷ inh vŷ mranh han sór mŷ. ĕn jykre vŷ kórĕg tãvŷ nŷ,” he tóg. “ĕn hã mŷ tóg há nŷnh mŷ vĕ, ũ tŷ pó mág tŷ ti nunh to sa kŷ goj nig ki ti fón jĕ, ti tŷ goj ki ter jĕ. Jagy tãvŷ tóg tŷ, ũ tŷ gŷr tŷ isovãnh han kŷ,” he tóg.

43 “Ă tŷ nĕn ũ vóg kŷ Topĕ vŷ mranh kŷ ã nŷgnó kym nŷ, ã tŷ ke mãn tŷ nŷ jĕ. Jagy tóg nŷ, ã nŷgnó pir ti. Jãvo tóg há nŷ, ã tŷ rŷr krŷg ja tŷ venh ke mŷ ti. Ă tŷ ã nŷgnó régre ra nŷgme ki kutĕn kŷ tóg jagy kãfór tŷnh mŷ, inferno ki kutĕn kŷ, pŷ nhyr vãnh ki kutĕn kŷ.

44 Tá ga ga tóg ã konh mŷ gé, hã ra tóg tŷ tŷ' henh ke tŷ nŷ. Tá pŷ ĕn nhyr ke tŷ nŷ gé.

45 Ă tŷ hĕ kãtã tŷg kŷ Topĕ vŷ mranh kŷ ã pĕn kym nŷ, ã tŷ ke mãn tŷ nŷ jĕ. Jagy ti nŷ, ã tŷg vãnh ti. Hã ra tóg há nŷ, ã tŷ rŷr krŷg ja tŷ venh ke mŷ ti. Ă tŷ ã pĕn régre ra nŷgme ki kutĕn kŷ tóg jagy kãfór tŷnh mŷ, inferno ki kutĕn kŷ.

46 Tá ga (ga) tóg ã konh mŷ gé, hã ra tóg tŷ tŷ' henh ke tŷ nŷ. Tá pŷ ĕn nhyr ke tŷ nŷ gé.

47 Ă tŷ nĕn ũ ki vĕ'ŷ kŷ Topĕ vŷ mranh kŷ ã kanĕ tŷ nám kemnŷ, ã tŷ ke mãn tŷ nŷn jĕ. Jagy ti nŷ, ã kyvó ti. Jãvo tóg há nŷ, ã tŷ Topĕ tŷ tŷ ĕg pã'i nŷ ven kŷ. Ă tŷ ã kanĕ régre ra nŷgme ki kutĕn kŷ tóg jagy kãfór tŷnh mŷ, inferno ki kutĕn.

48 Tá ga (ga) tóg ã konh mŷ, hã ra tóg tŷ tŷ' henh ke tŷ nŷ. Tá pŷ ĕn nhyr ke tŷ nŷ gé,” he tóg, Jesus ti.

*Sa to comparação
(Mt 5.13-16; Lc 14.34-35)*

49 “Pŷ tŷ ĕg pŷn ri ke ti nŷ, ĕg jagãgtar ti. Kŷ ãjag jagãgtar nŷtŷn kŷ isugrŷn, kŷ ãjag jagãgtar ĕn ki ãjag jykre tóg kuryj nŷ sir. Kŷ tóg sa ri ke nŷ,” he tóg.

50 “Sa vŷ há nŷ. Hã ra sa kãhór nŷn kŷ tóg hã ra kórĕg nŷ, kŷ ĕg tŷ ne tŷ ti tŷ kajã' henh ke tóg tŷ tŷ, tŷ sa' he mãn ke tóg tŷ tŷ,” he tóg. “Kŷ sa há ri ke nŷtŷmnŷ. Jagnĕ to krŷ kusa nŷtŷmnŷ,” he tóg, Jesus ti.

10

Ĕg tỹ ĕg prũ fi fón ke tũ
(Mt 19.1-12; Lc 16.18)

¹ Kĩ Jesus tóg tá kutě mũ, kĩ tóg ga tỹ Judéia ra tĩ mũ sir, goj tỹ Jordão m̄ara. Kĩ vėnh e ag tóg ti to vėnhm̄anm̄an mũ sir, kĩ tóg ag kanhr̄an m̄an mũ gé. Ti tỹ nén han tĩ ĕn han m̄an tóg mũ.

² Kĩ Fariseu ag tóg ti tá junjun mũ gé sir. Ag tỹ ón kĩ ti ki jēmě sór vė, vėnh prũ fón ke to. Kĩ ag tóg ti m̄y: “ĕg tỹ ĕg prũ fi m̄y: ha tĩg, he tag m̄y kuryj nỹ?” he mũ. Ag tỹ ón kĩ ti vĩ m̄e sór vė h̄a ra.

³ Kĩ tóg ag m̄y: “Moisés ājag m̄y h̄e ri ké?” he mũ.

⁴ Kĩ ag tóg ti m̄y: “Moisés h̄a tóg ĕg m̄y: ā tỹ ā prũ fi fón sór kĩ fi m̄y vėnh rán kĩ nĩm, fi tỹ kar kĩ tĩg jé, he ja nĩ, Moisés ti,” he ag tóg.

⁵ H̄a ra Jesus tóg ag m̄y: “ājag fe kórég n̄tĩn kĩ, h̄a kĩ tóg ājag m̄y tag tó ja nĩ, vėnh rán ki, Moisés ti,” he mũ.

⁶ “Topě tỹ nén kar han ve ki tóg ti mré fi han,” he tóg.

⁷ “H̄a kĩ ũn gré tóg ā prũ fi to ā panh re kĩ tĩnh mũ, ā m̄nh fi ré kĩ ke gé. Ā prũ fi mré tóg tĩnh mũ.

⁸ Fi mré tóg tỹ ũn pir nĩ sir, ā prũ fi mré, he tóg. Topě ti. H̄a kĩ fag tóg tỹ ũn pir n̄tĩ. Fag pi(jé) tỹ ũn régre n̄tĩ’.

⁹ H̄a kĩ fag tỹ vėnh k̄ap̄am tũg nĩ. Topě tỹ fag tỹ ũn pir há(r) vė m̄y;” he tóg, Jesus ti.

¹⁰ Ag tỹ ĩn k̄atá n̄tĩn kĩ ti mré mũ tĩ ag tóg ti ki jēmě m̄an mũ, vėnh prũ fón to.

¹¹ Kĩ Jesus tóg ag m̄y: “ājag tỹ ājag prũ fi fón kar kĩ ũ fi tỹ prũg m̄an kĩ ājag prũ tũ fi vė, ha m̄e,” he mũ.

¹² “Kĩ fi tỹ ā mén fón kar ũ tỹ mén m̄an kĩ fi mén tũ vė gé,” he tóg, Jesus ti.

Jesus tỹ ģĩr m̄y vĩ há han
(Mt 19.13-15; Lc 18.15-17)

¹³ Jo fag tóg ģĩr tatĩ k̄amũ mũ, Jesus tỹ ā nĩgé tỹ ag m̄e jé. H̄a ra ti mré mũ tĩ ag tóg fag to jũ mũ, ũ tỹ ag tatĩ k̄amũ mũ fag to.

¹⁴ H̄a ra Jesus tóg vėg mũ, kĩ tóg ā mré mũ tĩ ag to jũ mũ. Kĩ tóg ag m̄y: “vĩ tũg nĩ, ģĩr ag m̄y,” he mũ, “ģĩr ag tỹ iso k̄amũ kamĕg tũg nĩ,” he tóg. “Ū tỹ ge h̄a vỹ ĕg Senhor tỹ Topě krĕm n̄tĩ nĩ,” he tóg.

¹⁵ “Sỹ ke há vė, h̄a kĩ sóg tó mũ: ģĩr ag vỹ iso há pĕ n̄tĩ. Ūn k̄asir tag ag ri ke n̄tĩm̄nĩ, ke tũ nĩ (mũ) ra ājag tóg venh ke tũ (pĕ) nĩ, Topě tỹ tỹ ĕg p̄a’i nĩ ti,” he tóg.

¹⁶ Kĩ tóg ģĩr jagma ā pĕ fón mũ sir, ā nĩgé tỹ tóg ag m̄e k̄an mũ sir, ag to tóg Topě mré vĩ mũ sir.

Ūn rico k̄ame
(Mt 19.16-30; Lc 18.18-30)

¹⁷ Kĩ Jesus tóg tĩg m̄an mũ gé sir. Ti tỹ tĩg ke jĕ ra ũ tóg ti to vėnhv̄ag k̄atĩ mũ, kĩ tóg ā jakrĩ tỹ jĕ mũ, kĩ tóg ti m̄y: “Senhor,” he mũ. “H̄a pĕ ā tóg nĩ,” he tóg. “Sỹ ĩnh rĩr krỹg ja tũ venh há tóg tĩ. Sỹ ti ve jé ĩnh h̄yn vėnh jykre há tỹ h̄e ri ke han mũ?” he tóg.

¹⁸ Kĩ Jesus tóg ti m̄y: “ā tỹ ne jé iso: há ā nĩ, he nĕ?” he mũ. “Ĕg pi(jé) há n̄tĩ” he tóg. “Topě h̄a ne ā pir m̄y há nĩ,” he tóg.

¹⁹ “Topě tỹ nén to ĕg jyvĕn ki kanhró ā tóg nĩ, h̄a vỹ: ũ tén tũg nĩ, he mũ, ā prũ tũ fi mré nỹ tũg nĩ, he mũ, nén ũ péju(g) tũg nĩ, he mũ, ũ to ón tũg nĩ, he

mũ, vênh mỷ mẽ nĩ tũg nĩ, he mũ, ã nỹ mré ã jóg kamêg nĩ, he mũ,” he tóg ti mỷ, Jesus ti.

²⁰ Hã ra tóg Jesus ti mỷ: “tag kar ki sóg króm kãn, isĩn kã,” he mũ, kyrũ ti.

²¹ Kỷ Jesus tóg ti ki êvãnh mũ, kỷ tóg tỹ ti fe jê. Kỷ tóg ti mỷ: “nén ù pir vỹ tũ nĩ ver,” he mũ. “Á tũ kar vãm tĩg, ã tỹ ùn jagãgtar ag mỷ vin jé, jãnkamy ti. Kỷ ã tóg kanhkã tá tũ mág nĩ sir. Kar kãtĩg nĩ, ã tỹ inh mré tĩg jé,” he tóg, Jesus ti.

²² Kỷ tóg ti mỷ vênhmỷ tĩ, Jesus vĩ ti. Kỷ tóg fe kaj tĩ mũ sir, ti tũ e nĩn kỷ.

²³ Kỷ Jesus tóg vênh pênĩn êvãnh kỷ ã mré mũ ti ag mỷ ke mũ sir. “Jagy ti nỹ, ùn rico tỹ Topê tỹ tỹ êg pã'i nĩ venh ke ti,” he tóg.

²⁴ Kỷ ti vĩ tóg ti mré mũ ti ag mỷ e tĩ. Hã ra Jesus tóg ag mỷ ke mãn mũ. “Inh krê!,” he tóg. “Jagy tãvĩ ti nỹ mỷr, Topê tỹ tỹ êg pã'i nĩ venh ke ti,” he tóg.

²⁵ “Cavalo pãnĩ sór vỹ préj nor fĩn kutê tũ nĩ,” he tóg. “Ti tỹ fĩn kutê há nĩn ra tóg ver jagy ti vê, ùn rico tỹ Topê tỹ tỹ êg pã'i nĩ venh ke ti,” he tóg.

²⁶ Kỷ tóg ag mỷ e (pê) tãvĩ tĩ. “Kỷ ù hỹn kren ke tũ pẽ nĩ,” he ag tóg, jagnê mỷ.

²⁷ Kỷ Jesus tóg ag ki êvãnh kỷ ag mỷ: “êprã ke ag vỹ vênh krenkren han ki kagtĩg nỹtĩ,” he mũ. “Ag jãvo Topê tóg êg krenkren han ki kanhró nĩ inhã,” he tóg, Jesus ti.

²⁸ Kỷ Pedro tóg ti mỷ: “ha vé,” he mũ. “Êg tỹ nén ù kar ré kỷ êg tóg ã mré mũ mũ,” he tóg ti mỷ.

²⁹ Kỷ Jesus tóg ag mỷ ke mãn mũ. “Sỹ ke há vê, hã kỹ sóg tó mũ,” he tóg mũ. “Ủ tóg kejên isugrĩn ã jamã ré kỹ tĩ mũ, ã jãvy ré kỹ tĩ mũ, ti kãke, ti ve, ti mỷnh, ti panh, ti krê, ti japỹ ré kỹ tĩ mũ gé, isugrĩn, vênh vĩ sér tũgrĩn,” he tóg.

³⁰ “Ên vỹ tóg sir vênh kato ù tỹ 100 (ke) venh ke mũ, ùri hã ra, hã vỹ: êmã kar, he mũ, jãvy kar, kãke kar, ve kar, mỷnh kar, êpỹ kar ve jé tóg ke mũ. Hã ra ag tóg ti vóg kónãn ke mũ gé. Kar kỹ tóg vãhã sir rĩr krỹg ja tũ venh ke mũ gé,” he tóg.

³¹ “Jãvo tag ki ùn mág ù tỹ tá tỹ ùn kãsir nỹtĩnh ke vê, tére kỹ, kỹ tag ki ùn kãsir ù tỹ tá tỹ ùn mág nỹtĩnh ke vê,” he tóg, Jesus ti.

Jesus tỹ ã jagtar ke tó mãn (Mt 20.17-19; Lc 18.31-34)

³² Kar kỹ ag tóg mũ nĩ sir, Jerusalém ra, Jesus mré mũ tĩ ag, kỹ Jesus tóg ag jãmĩ tĩ nĩ. Hã ra tóg ag mỷ e tĩ, ti nón mũ ag tóg mũmêg mũ sir, ag tỹ Jerusalém ra mũn kỹ. Kỷ Jesus tóg ù tỹ 12 (ke) ag mỷ vênh kãmén mãn mũ, vyr mỷ. Ti tỹ ag mỷ ã tỹ nén venh ke ên tó mãn sór vê.

³³ Kỷ tóg ag mỷ: “ha vé, Jerusalém ra êg tóg mũ mũ,” he mũ. “Êprã ke fi kósin ên vỹ jagtar ke mũ. Inh hã vê. Ón kỹ Topê tũ ki rĩr tĩ to pã'i ag tóg ag tỹ isỹ nén han sór mũ ên han ke mũ, Topê vĩ to professor ag ke gé,” he tóg. “Ag tỹ iso: ter jé tóg ke mũ, henh ke vê,” he tóg. “Kar kỹ ag tóg fóg ag mỷ inh fêg ke mũ,” he tóg.

³⁴ “Kỷ ên ag tỹ iso é henh ke vê, iso sug ke vê, inh mrãnmrãn ke vê gé, isén ke vê gé. Kar kurã tãgtũ ki sóg hã ra rĩr mãn mũ sir,” he tóg, Jesus ti.

Tiago mré João tỹ tỹ pã'i jê sór (Mt 20.20-28)

³⁵ Kỷ Tiago mré João ag tóg ti kukãm mũ mũ, Zebedeu krê ag. “Senhor,” he ag tóg ti mỷ. “Êg mỷ êg tỹ nén to vĩ tag ti han,” he ag tóg, Jesus mỷ.

³⁶ Kỷ tóg ag mỷ: “ne nê, sỹ ãjag mỷ han ke ti?” he mũ.

³⁷ Kÿ ag tóg ti mÿ: “kejën ã tóg tÿ pâ'i nÿnh mÿ,” he mÿ. “Kÿ sÿ ã pÿgia tá nÿnh há tóg tÿ vÿ,” he tóg, jo ù tóg: “sÿ ã jakãnh tá nÿnh há tóg tÿ vÿ,” he mÿ gé. “Ëg tÿ ã rã hã nÿtÿnh há tóg tÿ vÿ, ã tÿ tÿ pâ'i nÿnh kÿ,” he ag tóg ti mÿ.

³⁸ Hã ra Jesus tóg ag mÿ: “ãjag tÿ nÿn to vÿ mÿ ki kagtÿg ãjag tóg nÿtÿ,” he mÿ. “ãjag mÿ inh ri kÿn jagtar sór mÿ?” he tóg. “ãjag mÿ ãjag jagtar jagy tag to krónh kÿnh ke tÿ nÿ vÿ?” he tóg.

³⁹ Kÿ ag tóg ti mÿ: “hÿ, ke jé ãg tóg ke mÿ,” he mÿ. Hã ra Jesus tóg ag mÿ: “hÿ, jagtar jé ãjag tóg ke mÿ, inh ri kÿn,” he mÿ. “Vÿsÿrÿnh jé ãjag tóg ke mÿ, inh ri kÿn,” he tóg.

⁴⁰ “Hã ra isÿ tÿ vÿ, sÿ ãjag mÿ: hej, he ti,” he tóg. “Ha inh pÿgia tá nÿ, hÿnh ke tÿ sóg nÿ,” he tóg. “Ha inh jakãnh tá nÿ, hÿnh ke tÿ sóg nÿ gé,” he tóg. “Isÿ tÿ vÿ. Û tÿ inh rã nÿtÿnh ke ãn ag tÿ inh rã nÿtÿnh ke vÿ,” he tóg.

⁴¹ Hã ra ù tÿ 10 (ke) ag tóg mÿg mÿ, kÿ ag tóg ag to jÿ mÿ, João mré Tiago to.

⁴² Kÿ Jesus tóg ag jé prÿr kãnh mÿ, kÿ tóg ag mÿ kãmÿn mÿ. “Fóg ag pâ'i ag jÿkre ki kanhrÿ ãjag tóg nÿtÿ,” he tóg. “Vÿnh kar jÿgnÿg ag tóg tÿ, kÿ ag mág ag tóg vÿnh kar mÿ: kÿmni, ke tÿg nÿ, he tÿ, vÿ tar han kÿ,” he tóg.

⁴³ “Ag ri ke han tÿg nÿ. ãjag mÿ tÿ ùn mág nÿtÿ sór mÿ?” Kÿ tÿ jagnÿ camarada ri ke nÿtÿmni, jagnÿ tÿ ki rÿr kÿ.

⁴⁴ ãjag mÿ tÿ pâ'i nÿtÿ sór mÿ? Kÿ jagnÿ krÿm ke nÿtÿmni, tÿ ùn kãsir nÿtÿmni.

⁴⁵ Hã kÿ sóg camarada tÿ nÿ gé,” he tóg. “Sÿ tÿ camarada nÿ jé sóg kãtÿg, sÿ ãjag ki rÿr jé. Tÿ sóg ãprã ke fi kósin nÿ. Hã kÿ sóg vÿnh kar jagfy ter ke mÿ, sÿ ag krenkren han jé,” he tóg, Jesus ti.

Ûn kyvó tÿ há' he

(Mt 20.29-34; Lc 18.35-43)

⁴⁶ Kejën ag tóg ãmã tÿ Jericó tá junjun mÿ. Ag tÿ Jerusalém ra mÿ vÿ. Kar kÿ tóg Jericó ki kutÿ mÿ gé, Jesus ti. Ti mré mÿ tÿ ag tóg ti mré mÿ mÿ, vÿnh e kar ag ke gé. Hã ra Bartimeu tóg ãprÿ kri nÿ nÿ. Kyvó ti nÿ, hã kÿ tóg ãmÿn fyr kri nÿ kÿ: “inh mÿ nÿn ù nÿm,” he nÿgtÿ, Timeu kósin tag ti.

⁴⁷ Ën tóg Jesus tÿ ãprÿ jagma tÿg mÿg mÿ sir, Nazaré tá Jesus ti. Kÿ tóg prÿr mÿ sir. “!..Jesus'..!” he tóg. “!..Davi kósin'..! !..Ijagãgtãn ra..!” he tóg.

⁴⁸ Hã ra ag tóg ti to jÿgÿ mÿ. “Mê kã nÿ nÿ,” he ag tóg ti mÿ. Hã ra tóg prÿr mãn', prÿr mãn', he mÿ. “!..Davi kósin'..!” he tóg. “!..Ijagãgtãn ra..!” he tóg.

⁴⁹ Kÿ Jesus tóg ti to krÿg he mÿ. Kÿ tóg ti jé prÿr' he mÿ sir. Kÿ ag tóg ùn kyvó ãn jé prÿr mÿ sir. “ã fe tÿ há' hé, jÿg ra, ã jé prÿr tóg mÿ,” he ag tóg ti mÿ.

⁵⁰ Kÿ tóg ã palitó fón kÿ jÿgnÿ mÿ sir, Jesus to tóg ti mÿ sir.

⁵¹ Kÿ Jesus tóg ti mÿ: “inh ã tÿ hÿ ri kÿnh ke?” he mÿ. Kÿ ùn kyvó tóg: “Senhor,” he mÿ. “Sÿ vÿnh há tóg tÿ,” he tóg.

⁵² Kÿ Jesus tóg ti mÿ: “hej,” he mÿ. “ã tÿ há' hÿnh ke nÿ ha,” he tóg. “ã tÿ inh ki rã kÿ ã há' hÿnh ke mÿ,” he tóg. Kÿ tóg vÿsÿmér ãvãnh há' he mÿ sir, kÿ tóg ti nón tÿ mÿ sir, ãprÿ jagma.

11

Jesus tÿ Jerusalém tá jun

(Mt 21.1-11; Lc 19.28-40; Jo 12.12-19)

¹ Vãhã ag tóg cidade tÿ Jerusalém kakó tá nÿtÿ. Kÿ ag tóg ãmã tÿ Betãnia tá junjun vÿn mÿ, ãmã tÿ Betfagé tá, krÿ tÿ Oliveiras tá ke gé. Kÿ Jesus tóg ã mré mÿ tÿ rÿgre ag jÿgnÿg mÿ, ag tÿ ãmã ãn ra mÿ jé.

² “Ha ěmā ěn ra mŭjĕg,” he tóg, “ĕg jo ěmā nĭ ěn ra. Ājag tŷ tá jun kŷ ājag tóg burrica fi krĕ venh ke mŭ. Se kŷ tóg jĕ,” he tóg. “Ū vŷ ver ti kri nĭ ja tŭ nĭ,” he tóg. “Ti kavān kŷ ti pére kāmŭmĭ,” he tóg.

³ “Hĕn ri ke mŭn ag tóg ājag mŷ: ājag tŷ ne jé ti kyvān nĕ? henh mŭ. Kŷ ag mŷ: ĕg Senhor tóg ti ve sĭ han sór mŭ, hemnĭ. Kānhmar tóg ti jĕnĕ mǎn mŭ, hemnĭ,” he tóg ag mŷ, Jesus ti.

⁴ Kŷ ag tóg mŭ mŭ sir. Burrica krĕ vég ag tóg mŭ, jānkā rā tóg se kŷ jĕ, ěmĭn kri. Kŷ ag tóg ti kavāg mŭ sir.

⁵ Kŷ ag tóg ag mŷ ke mŭ. “Ājag tŷ ne jé burrica sĭ kyvān nĕ?” he ag tóg ag mŷ.

⁶ Kŷ ag tóg Jesus tŷ ājag mŷ nĕn tó ja ěn ti tó mŭ, kŷ ag tóg: “ha ma mŭjĕg ge,” he mŭ.

⁷ Kŷ ag tóg burrica krĕ ma mŭ mŭ sir, Jesus to. Ājag kur tŷ ag tóg ti kri kugjĕn mŭ sir, jumento sĭ ěn kri, kŷ tóg kri nĭ mŭ sir, Jesus ti.

⁸ Kŷ vĕnh kar tóg ājag kur kugjĕn mŭ sir, ĕpŷy kri, jo ũ ag tóg ka féj krég mŭ gé, ĕpŷy tá, ti jo vāvām jĕ.

⁹ Kŷ ũ ag tóg ti jāmĭ mŭ mŭ, jo ũ ag tóg ti nón mŭ mŭ. ěn ag tóg prĕnprĕr mŭ sir. “!.Viva..!” he ag tóg, “!.pā'i vŷ ĕg tá jun, ĕg Senhor mág tŷ ti jĕnĕn kŷ..!”

¹⁰ !.Sér tāvĭ tóg tĭ..! !.ĕg pā'i vĕ mŷr, ĕg jóg'jóg tŷ Davi ri kĕn..! !..Topĕ tá tóg kātĭg, ũ tŷ kynhmŷ nĭ ěn tá, viva..!” he ag tóg mŭ, prĕnprĕr kŷ.

¹¹ Kŷ tóg Jerusalém ra rā mŭ sir, Jesus ti. Topĕ jo ĩn ra tóg rā mŭ sir. Nĕn kar ki ĕvānh kar tóg Betânia ra tĭg mǎn mŭ, ũ tŷ 12 (ke) ag mré, rāké ra.

Ka tŷ figueira

(Mt 21.18-19)

¹² Tŷ vaj kŷ, ag tŷ Betânia tá kāmŭ kŷ tóg kókĭr mŭ, Jesus ti.

¹³ Hā ra tóg ka tŷ figueira féj vég mŭ sir, tátá. Kŷ tóg to tĭ mŭ sir, ti kanĕ ko jĕ. Tá jun kŷ tóg vég mŭ, hā ra tóg féj tāvĭ jĕ. Ti kanĕn ke pétĕm tŭ tóg nĭ ver.

¹⁴ Kŷ tóg ka tŷ figueira mŷ: “ŭ tóg ā kanĕ ko mǎn ke tŭ nĭ ha,” he mŭ. Hā ra ti mré mŭ tĭ ag tóg ti vĭ mĕg mŭ.

Jesus tŷ Topĕ jo ĩn krĕm ag pan

(Mt 21.12-17; Lc 19.45-48; Jo 2.13-22)

¹⁵ Kŷ ag tóg mŭ mǎn kŷ Jerusalém tá junjun mŭ sir. Topĕ jo ĩn ra tóg rā mŭ sir, Jesus ti, kŷ tóg tá ag pan kǎn mŭ sir, nĕn ũ vender he tĭ ag, nĕn ũ comprar he tĭ ag ke gé. Topĕ jo ĩn krĕm ag tóg negociar he tĭ, jānkamy trocar he tĭ ag ke gé. Ag mesa tŷ tóg vyryn ke mŭ, Jesus ti. Sórāg vender he tĭ ag nĭgnĭ jafá tŷ tóg vyryn ke mŭ gé sir.

¹⁶ Kŷ tóg ag tŷ Topĕ jo ĩn ĩn nĕn gé mŭ kamĕg mŭ gé sir.

¹⁷ Kŷ tóg ag kanhrān kŷ ag mŷ: “Topĕ vĭ rá to jykrĕn nĭ,” he mŭ. “Inh ĩn jiji vŷ: nação kar mŷ Topĕ mré vĭ jafá, he mŭ, he tóg, Topĕ vĭ rá ki,” he tóg, Jesus ti. “Hā ra ājag tóg Topĕ mré vĭ jafá tag krĕm nĕn kar pigju(g) mŭgtĭ, kŷ tóg bandido ag jamā ri ke nĭ,” he tóg. Ag pan kŷ tóg ke mŭ, Jesus ti.

¹⁸ Hā ra Topĕ tŭ ki rĭr tĭ to pā'i ag vŷ Jesus vĭ mĕg mŭ, Topĕ vĭ to professor ag ke gé. Kŷ ag tóg: “ĕg hŷn ti tŷ hĕn ri kĕnh ke mŭ?” he mŭ, “ĕg tŷ ti tŷ tŷ he jĕ?” he ag tóg mŭ. Hā ra ag tóg ti kamĕg mŭ. Vĕnh kar mŷ tóg há tĭ, ti tŷ ag kanhrān kŷ. Hā kŷ ag tóg ti vóg tŭ nĭ.

¹⁹ Kutŷy kŷ ag tóg cidade mág ki pa mǎn mŭ sir, Jesus ti, ti mré mŭ tĭ ag ke gé.

*Ka tỹ figueira tóg**(Mt 21.20-22)*

²⁰ Tỹ vaj ký ag tóg cidade ra mũ mãn mũ sir. Mũ ký ag tóg sir ka tỹ figueira ên vég mũ, hã ra tóg tóg ja nĩ, ti jãre mré hã.

²¹ Ký Pedro tóg Jesus vĩ ki jykrén ký ti mỹ: “ha vé, Senhor,” he mũ. “Á vĩ ja ên hã vê,” he tóg. “Á tỹ ka to vĩ kónãn ên vỹ tóg ja nĩ, ka tỹ figueira ên ti,” he tóg.

²² Ký Jesus tóg ag mỹ: “Topê ki ge pẽ han nĩ,” he mũ.

²³ “Sỹ ke há vê, hã ký sóg tó mũ: kejẽn ãjag tóg krĩ tag ti mỹ: ha goj nig ki kutẽ, henh ke mũ. Ký tóg ki kutẽnh mũ, pãnónh ti, ãjag tỹ ãjag fe tỹ: ti mỹ ki kutẽnh mũ vỹ? he tũ nĩn ký,” he tóg. “Inh vĩ han jé tóg ke mũ, pãnónh ti, hemnĩ, ký tóg kutẽnh ke mũ, ha vemnĩ,” he tóg, Jesus ti.

²⁴ “Hã ký sóg ãjag mỹ ke mũ,” he tóg. “Ãjag tỹ Topẽ mỹ nén ù to vĩ ký to: han jé tóg ke mũ, Topẽ ti, hemnĩ, ký ãjag tóg venh ke mũ sir, ãjag tỹ ti mỹ nén ù to vĩ mũ ti,” he tóg.

²⁵ “Ãjag tỹ kejẽn Topẽ mré vĩ jẽ ra ù tỹ ãjag to jũ mũ ên tỹ ti mỹ vẽnẽh pãte fón nĩ,” he tóg. “Ãjag tỹ gen ký tóg ãjag mỹ vẽnẽh pãte fón ke mũ gé, êg jóg mág ti,” he tóg. “Ãjag tỹ ti vĩ mranh mũ ra tóg vẽnẽh kato ãjag mỹ vẽnẽh pãte fón ke mũ, ù tỹ kanhkã tá nĩ ti, ãjag tỹ ãjag mré ke ag mỹ vẽnẽh pãte fón ký,” he tóg.

²⁶ “Ãjag tỹ hã ra ag mỹ vẽnẽh pãte fón tũ nĩn ký êg jóg mág vỹ vẽnẽh kato ãjag mỹ vẽnẽh pãte fón ke tũ nĩ gé, ù tỹ kanhkã tá nĩ ti,” he tóg, Jesus ti.

*Jesus tỹ ù tỹ ãjẽnẽg mũ tó tũg**(Mt 21.23-27; Lc 20.1-8)*

²⁷ Ký ag tóg mũ mãn ký Jerusalém tá junjun mãn mũ sir. Topẽ jo ìn tá tóg êvãnh tí mũ, Jesus ti. Ký Topẽ tũ ki rĩr tí to pã'i ag tóg ti venh kãmũ mũ, Topẽ vĩ to professor ag ke gé, kófa ag ke gé.

²⁸ “Û nỹ ã mỹ: tag han nĩ, hé?” he ag tóg, ti mỹ. “Û nỹ ã jẽnẽ?” he ag tóg.

²⁹ Ký Jesus tóg ag mỹ: “ãjag ki sóg jẽmẽnẽh ke mũ gé, vẽnẽh kato,” he mũ. “Ãjag tỹ inh mỹ tó há han ký sóg ãjag mỹ ù tỹ inh jẽnẽg mũ tónh ke mũ gé,” he tóg.

³⁰ “João vỹ ag kygpég tí ja nĩgtĩ. Ti mỹ kanhkã tá vẽnẽh jykre han, ãjag mỹ, êprã ke jykre vó? Û nỹ ti jẽnẽ?” he tóg ag mỹ, Jesus ti. “Inh mỹ tó,” he tóg.

³¹ Ký ag tóg jagnẽ mré to jykrén mũ. “Êg tỹ ti mỹ: Topẽ tỹ ti jẽnẽ ja vê, hen ký tóg êg mỹ: ãjag tỹ ne jé ti vĩ kri fig tũ ja nĩ nẽ? henh ke mũ,” he ag tóg jagnẽ mỹ.

³² “Êg tỹ hã ra ti mỹ: êprã ke jykre ja vê, hen ký tóg vẽnẽhmỹ nỹ gé,” he ag tóg, ag tỹ vẽnẽh kar kamẽg ký. Vẽnẽh kar tóg João to: “Topẽ vĩ tó tí pẽ vê,” he tí.

³³ Hã ký ag tóg Jesus mỹ: “êg pi(jé) ki kanhró nỹtĩ,” he mũ. Ón ký ag tóg ke mũ. Ký Jesus tóg ag mỹ: “ký sóg ãjag mỹ tónh ke tũ nĩ gé, ù tỹ inh jẽnẽg mũ ti,” he mũ. Á kato tẽ mũ ag mỹ tóg ke mũ.

12*Ûn camarada kórég ag to comparação**(Mt 21.33-46; Lc 20.9-19)*

¹ Ký Jesus tóg ag kanhrãn ký (tóg) ag mỹ comparação ù han mũ sir, ký tóg: “kejẽn ù tóg nĩgtĩ,” he mũ. “Nén kanẽ tỹ uva krãn ja tóg nĩgtĩ,” he tóg. “Pẽnĩn tóg rón ja nĩ, kãki tóg kũm ja nĩgtĩ, uva jẽgmĩ jafã han jé. Ki tóg pãjõ han ja nĩ

gé, ký tóg ù tỳ ki rĩr tĩ ag mỳ ré ký tũg ja nĩ, ga ù ra. Ag mré tóg jykrén ja nĩ, ag tỳ ti mré êkré ên kanê vènh kãpãm jé," he tóg, Jesus ti.

² "Ti tỳ kejèn kanên ký tóg ag mỳ ã camarada ù jènêg mũ, ti tũ ki rĩr tĩ ag mỳ, ag tỳ ti mỳ vènh kãpãm jé, uva ti.

³ Hã ra ag tóg ti kãgmĩg mũ sir, ti mrãnmrãn ag tóg mũ sir, ký ag tóg ti mỳ: "ha tũg," he mũ sir, ti mỳ nén ù nĩm mẽ kã.

⁴ Ký tóg ag mỳ ã camarada ù jènê mãn mũ gé sir, ký ag tóg ti krĩ ki tânħ mũ sir, ti to é he ag tóg mũ sir.

⁵ Ký tóg ag mỳ ù jènê mãn mũ gé sir, hã ra ag tóg ti tén mũ gé sir. Ti camarada kar to ag tóg jũ mũ, ù mrãnmrãn ag tóg, ù tén ag tóg.

⁶ Ký hã ra ù tóg kén mũ, hã ra ti kósin vè, ti fe pè vè hã ra. Ký tóg vãhã ag mỳ ti jènêg mũ sir. "Hên ri ke mũn ag inh kósin kamêg mũ," he tóg, hã ký tóg ti jènêg mũ.

⁷ Ti tỳ tá jun ký ag tóg ti to jykrén mũ, jagnê mré. "Kejèn êkré kar vỹ tỳ ti tũ nĩnh mũ, ha vemnĩ," he ag tóg ti to. "Mũ nỹ, ti tén jé, ti tũ tag tỳ tỹ êg tũ nỹnh jé," he ag tóg, jagnê mỳ.

⁸ Ký ag tóg ti kãgmĩ ký ti tén mũ sir, ró mãtá ag tóg ti fón mũ sir," he tóg, Jesus ti.

⁹ "Kỹ êkré tỳ tũn mũ ên hê ri kenh ke mũ?" he tóg. "Jun jé tóg ke mũ, ã camarada ag kãgtén jé. Ký tóg êkré ki rĩr tĩ ù ag mỳ finh ke mũ, ti tũ ti," he tóg. Jesus ti, ag mỳ comparação han ký.

¹⁰ Ký tóg ag mỳ: "Topê vĩ rá tag to jykrén nĩ, ha mẽ," he mũ. "Pó tỹ ìn han jafã fón ag tóg, pó tỹ ìn han tĩ ag. Ag mỳ tóg kórég ja nĩ, pó ên ti. Hã ra Topê tóg po ên hã tỹ ìn nũna han mũ.

¹¹ Êg Senhor mág tỹ há vè, hã ký tóg êg mỳ e tĩ, êg tỹ ven ký, he tóg, Topê vĩ tỹ rãn ký nĩ ki," he tóg ag mỳ, Jesus ti. Ti tỹ ã kato vãsãnsãn mũ ag mỳ vènh kãmén hã vè.

¹² Ký ag tóg ki kanhró nỹtĩ, ti tỹ ag kato vĩ mũ ti. Hã ký ag tóg ti se sór mũ, hã ra ag tóg vènh e ên kamêg mũ, ký ag tóg ti ség tũ nĩ ha. Ký ag tóg sir mũ mũ, ti ré ký.

Êg tỹ imposto kajãm ke

(Mt 22.15-22; Lc 20.20-26)

¹³ Hã ra ag tóg ti to ù ag jègnêg mũ sir, Fariseu ù ag, Herodes mré ke ù ag ke gé, ag tỳ ti vĩ to ti se jé, Jesus ti.

¹⁴ Ag tỳ ti tá junjun ký ag tóg ti mỳ: "Senhor," he mũ. "Ã jykre kuryj nĩn ki kanhró êg tóg nỹtĩ," he ag tóg, ón ký. "Vènh jykre pir hã han ã tóg tĩ, vènh kar mỳ. Ký ag ve tóg ã mỳ tỹ nén ù tũ nĩ. Hã ký ã tóg Topê jamĩn to, Topê japry to ã tóg êg kanhrãn há han tĩ," he ag tóg, ón ký, Jesus mỳ. "Mỹ há nỹ", êg tỹ governo mỹ jãnkamy nĩm ke ti', imposto kajãm ke ti'?

¹⁵ Êg mỳ hỹn nĩm mũ', vó mỳ vó?" he ag tóg.

Hã ra Jesus tóg ki kanhró nĩ, ag jykre régre nỹtĩn ki. Ký tóg ag mỳ: "ãjag ne tóg ón ký inh ki jêmê sór mũ'," he mũ. "Inh mỳ jãnkamy jun, sỹ ve jé," he tóg.

¹⁶ Ký ag tóg ti mỳ ù jun mũ sir. Ký tóg: "ũ jiji nỹ kã nĩ?" he mũ. "Ủ kãggrá nỹ kã nĩ?" he tóg. Ký ag tóg ti mỳ: "pã'i mág tỹ imperador kãggrá vè," he mũ.

¹⁷ Ký Jesus tóg ag mỳ: "kỹ pã'i mág mỳ ti tũ nĩmnĩ, hã ra Topê mỳ ti tũ nĩmnĩ gé," he mũ. Ký tỹ vĩ tóg ag mỳ e tĩ. Ag tỹ nén ù to ti se sór mũ vég tũ ag tóg nĩ.

Ĕg tŷ ěg ter ja tá vŷn kenh ke

(Mt 22.23-33; Lc 20.27-40)

¹⁸ Kŷ Saduceu ag tóg ti tá junjun mŷ gé, ti ki jēmē jé. Hã ra Saduceu ag tóg: ěg ter ja tá ěg vŷn kenh ke tũ nĩ,” he tĩ. Kŷ ag tóg Jesus tá jun kŷ ti mŷ:

¹⁹ “Senhor,” he mŷ gé. “Moisés tóg ěg mŷ tag tó ja nĩ, ěg tŷ tŷ jykre nŷtĩ jé,” he ag tóg. “Ĕg mŷ tóg: ã régre tŷ ã krē tũ ra ter kŷ, ã tŷ ti prũ fi tŷ prũg ke vē, he mŷ. Á tŷ ã régre mŷ ã krē han ke vē, fi ki, he ja tóg nĩ, Moisés ti,” he ag tóg, Jesus mŷ, Saduceu ag.

²⁰ “Kŷ ũ tŷ jagnē mré pafa ja tŷ 7 (ke) ag vŷ nŷtĩ ja nŷgtĩ,” he ag tóg. “Ag kãke tóg prũg mŷ, hã ra tóg ã kósin tũ ra ter mŷ sir,” he ag tóg.

²¹ “Kŷ ti jãvy tóg fi tŷ prũg mŷ, hã ra tóg ã kósin tũ ra ter mŷ gé sir. Kŷ ti jãvy ũ vŷ fi tŷ prũg mŷ gé,” he ag tóg.

²² “Hã ra ag kar tóg fi kósin tũ ra kãgter kãn mŷ sir, ag kãke ti nón, ũ tŷ 7 (ke) ěn ag. Kejĕn fi tóg vãhã ter mŷ gé sir,” he ag tóg.

²³ “Kŷ fag kãgter ja tá vŷnvŷn ke kŷ fi hŷn mén tŷ 7 (ke) nŷnh mŷ vē. Ag kar vŷ fi tŷ prũg ja nŷtĩgtĩ. Hã kŷ tóg vēnhmŷ nŷ, ag tŷ: rĩr mãn jé ěg tóg ke mŷ, hen kŷ,” he ag tóg, Jesus ti mŷ, Saduceu ag.

²⁴ Hã ra Jesus tóg ag mŷ: “ãjag pi(jé) Topē vĩ tŷ rãn kŷ nĩ ki kanhró nŷtĩ,” he mŷ, “Topē jykre ki kagtĩg ãjag nŷtĩ,” he tóg. “Hã kŷ ãjag tóg kygnē ja nĩ,” he tóg ag mŷ.

²⁵ “Ĕg tŷ ěg ter ja tá vŷn ke kŷ ěg prũg ke tũ nĩ, kŷ ěg mén ke tũ nĩ gé,” he tóg. “Topē tŷ jĕgnē jafã ri ke ěg nŷtĩ, kanhkã tá,” he tóg.

²⁶ “Topē vĩ ũ to jykren nĩ, ti tŷ ěg tŷ ěg ter ja tá vŷn ke kãmén kŷ. Moisés tŷ rãn ki tag tóg rãn kŷ nĩ, Topē tŷ Moisés mŷ nén tó ja tag ti, vãnh pũr kãmén jan ki,” he tóg. “Topē tóg ti mŷ: Abraão vŷ iso: Topē, he tũ, he ja nĩ, Isaque ke gé, Jacó ke gé, he ja tóg nĩ, Topē ti. Kãgter ag huri, Abraão, Isaque, Jacó. Hã ra Topē tóg: tŷ inh ag Topē nĩ, he ja nĩ, ag ter kar kŷ.

²⁷ Hã kŷ ag tóg rĩnrĩr nŷtĩ mŷr, Topē tŷ ũn rĩnrĩr nŷtĩ ag hã kri ke nŷn kŷ,” he tóg, Jesus ti. “Hã kŷ ãjag tóg kygnē tãvĩn mŷ,” he tóg, Jesus ti, Saduceu ag mŷ.

Topē tŷ ěg jyvĕn kãfór

(Mt 22.34-40; Lc 10.25-28)

²⁸ Hã ra Topē vĩ to professor ũ tóg tá jun mŷ gé sir. Kŷ tóg ag tŷ jagnē mré vĩ mĕg mŷ, Jesus tŷ Saduceu ag mŷ tó há han ja ěn ti. Hã kŷ tóg: “Topē tŷ ěg jyvĕn tŷ hĕ nŷ hŷn ti tŷ ěg jyvĕn kar kãfór nŷnh mŷ?” he mŷ, Jesus mŷ.

²⁹ Kŷ Jesus tóg ti mŷ: “ũ tŷ kãfór nŷn hã vē, hã mĕ,” he mŷ. “Hã mĕ, povo tŷ Israel,” he tóg mŷ. “Ĕg pã'i vŷ tŷ Topē nĩ, ěg pã'i vŷ tŷ ũn pir nĩ,” he tóg.

³⁰ “Topē to, ěg jóg mág to há tãvĩ nŷtĩmnĩ,” he tóg, “ti ki ge há han nĩ, ti to jykre pir nŷtĩmnĩ, krĩ pir, ti to tar nŷtĩmnĩ,” he tóg.

³¹ “Kŷ ti tŷ ěg jyvĕn ũ tóg hã ri ke nĩ gé, hã vŷ: ãjag régre ki rĩr nŷtĩmnĩ, ãjag tŷ vēnh ki rĩr hã han ri ke, he mŷ,” he tóg. “Ti tŷ ěg jyvĕn ũ pi(jé) tag kãfór nĩ,” he tóg, Jesus ti, Topē vĩ to professor ěn mŷ.

³² Kŷ Topē vĩ to professor ěn tóg ti mŷ: “ke tóg tũ,” he mŷ. “Á tŷ ke há vē. Pir ti nĩ, Topē ti, ũ pi(jé) ti ri ke nĩ,” he tóg.

³³ “Ĕg jé ti to fe há nŷtĩgtĩ, ěg jé ti to krĩ há nŷtĩgtĩ gé, jykre pir ke gé. Ĕg jé ti to tar nŷtĩ gé. Ĕg jé ěg régre ki rĩr nŷtĩ gé, ěg tŷ vēnh ki rĩr há han ri ke. Hã vŷ tóg nén kar kãfór nĩ,” he tóg. “Ĕg tŷ Topē mŷ nén ũ pũn kãfór tóg nĩ, ěg tŷ ti to há nŷtĩ ěn ti, ěg tŷ ti mŷ nén ũ tãnh kãfór tóg nĩ gé,” he tóg, Topē vĩ to professor ěn ti.

³⁴ Kĩ Jesus tóg ti tỹ tó há nĩ ve kũ (tóg) ti mĩ: “nén ũ sĩ tóg tũ nĩ ver,” he mũ, “ã tỹ Topẽ tỹ tỹ ěg pã'i nĩ venh ke jé,” he tóg. Kar kũ ũ tóg Jesus ki jẽmẽ mǎn tũ nĩ sir. Ti kamẽg ag tóg mũ sir, há kũ ag tóg ti ki jẽmẽ mǎn tũ nĩ sir.

Cristo tỹ tỹ Davi kósin nĩ
(Mt 22.41-46; Lc 20.41-44)

³⁵ Kĩ Jesus tóg Topẽ jo ĩn krẽm ag kanhrǎn jé ag ki jẽmẽg mũ. “Topẽ vĩ to professor ag tỹ ne jé: Cristo vỹ tỹ Davi kósin nĩ, he nẽ?” he tóg ag mỹ.

³⁶ “Davi vỹ Cristo tó ja nĩ, Topẽ kuprĩg tỹ ti krĩn kũ, kũ tóg: ěg jóg mág tỹ Topẽ vỹ ĩnh Senhor mỹ tag tó ja nĩ, há kũ tóg: “nĩ ra ver, ĩnh pẽgja tá,” he ja nĩ. “Sỹ ģ kato vǎsǎnsǎn mũ ag tỹ ģ krẽm vin ke vẽ, kũ ag sigse vẽ sir. Tag jǎvǎnh nĩ ver,” he ja ti nĩ, Topẽ ti, ĩnh Senhor mỹ, he ja tóg nĩ, Davi ti,” he tóg ag mỹ, Jesus ti.

³⁷ “Hǎ kũ Davi tóg Cristo to: ĩnh Senhor vẽ, he tĩ. Ti tỹ tỹ ti kósin nĩ ra ti kósin mỹ tỹ ti kri ke nĩnh mũ vẽ?” he tóg, Jesus ti. Hǎ ra ag tóg ti mỹ tó tũg. Ag tỹ ne tónh ke tóg tũ tĩ, ti kato vǎsǎnsǎn mũ ag mỹ. Hǎ ra vẽnh kar mỹ ti vĩ tag tóg há nỹ.

Ón kũ Topẽ vĩ to professor ag tỹ jagtar ke
(Mt 23.1-36; Lc 20.45-47)

³⁸ Kĩ Jesus tóg ag kanhrǎn kũ: “ón kũ Topẽ vĩ to professor ag kamẽg nĩ,” he mũ. “Kur téj rĩnh ka(mẽ) ag nỹtĩ,” he tóg. “Kũ vẽnh kar tỹ ag mỹ: ģ mỹ há? he kũ tóg ag mỹ sér tĩ, ag tỹ cidade kaju kǎmĩ mũn kũ,” he tóg.

³⁹ “Ěg tỹ vẽnh kanhrǎn jafǎ krẽm ag tóg vẽnh kǎpǎm kũ nỹtĩgtĩ, festa ki ag tóg jẽn vén tĩ, ag tỹ tỹ pǎ'i nỹtĩn kũ,” he tóg.

⁴⁰ “Hǎ ra ag tóg ũn mén ter ja fag tũ mǎn kǎn tĩ. Fag tũ mǎn kǎn kũ ag tóg ón kũ Topẽ mré vĩ mág han mũgtĩ, ěg tỹ ag to: ũn há vỹ tỹ ag nỹtĩ, he jé,” he tóg. “Hǎ to ag vẽsỹrẽnh mág tǎvĩ han ke mũ,” he tóg, Jesus ti.

Ũn jagtar fi tỹ ģ tũ vin kǎn
(Lc 21.1-4)

⁴¹ Kĩ Jesus tóg kejẽn Topẽ mỹ jǎnkamy vin jafǎ kato nĩ mũ. Kũ tóg ag tỹ kǎki nén vin mũ vég mũ sir. Ũn rico ag tóg jǎnkamy mág tỹ kǎki vin mũ.

⁴² Kũ ũn jagtar fi tá jun mũ gé, ũn mén ter ja fi. Hǎ ra fi tóg jǎnkamy kǎsir régre hǎ vin mũ sir, hǎ vỹ: 1 centavo, he mũ.

⁴³ Kũ Jesus tóg ģ mré mũ tĩ ag jé prẽr mũ sir, kũ tóg ag mỹ: “ve ra ha,” he mũ. “Ũn rico tỹ vin kǎfór han fi tóg, fi tũ sĩ (hǎ) ra. Tỹ nén ũ tũ fi tóg nĩ, fi mén vỹ hur ter.

⁴⁴ Kũ fi tóg ģ tũ vin kǎn ja nĩ, fi jẽn mré hǎ. Jǎvo ũn rico ag vỹ ģtag tũ ke hǎ tỹ Topẽ mỹ vin mág tĩ. Hǎ ki fi tóg ag tỹ nĩm kǎfór han, fi tỹ nĩm sĩ pẽ han mũ ra. Ki hǎ sóg tó mũ mỹr,” he tóg, Jesus ti.

13

Ag tỹ Topẽ jo ĩn kókén ke
(Mt 24.1-2; Lc 21.5-6)

¹ Kũ Jesus tóg Topẽ jo ĩn tá kǎkutẽ mũ sir. Re tá ti mré tĩ ũ tóg ti mỹ: “ve ra ha, Senhor,” he mũ. “Pó sĩnvĩ tỹ tóg há nỹtĩ, kũ tóg sĩ(nvĩ) tǎvĩ nỹtĩ, ĩn tĩ,” he tóg, Topẽ jo ĩn to.

² Hǎ ra Jesus tóg ti mỹ: “ģ mỹ ĩn mág tag ti vigvég mũ?” he mũ. “Kejẽn ũ pó tỹ jagnẽ kafǎn mǎn ke tũ nĩ,” he tóg. “Ag rǎnhráj kǎn ke vẽ,” he tóg Jesus ti.

Vēnh jagāgtar to rā
(Mt 24.3-14; Lc 21.7-19)

³ Kar kŷ Jesus tóg krī tŷ Oliveiras ra tīg kŷ tá nī nī sir, Topē jo ĩn kakām. Kŷ ag tóg ag pin kŷ ti mŷ ke mŷ, Pedro, Tiago, João, André ke gé.

⁴ “Ēg mŷ ti kurā ti tó,” he ag tóg ti mŷ. “Ēg ne ve kŷ ti kurā ki kanhró nŷtĩnh mŷ? Kurā tŷ hē ki ěg hŷn nén kar tag venh ke mŷ?” he ag tóg ti mŷ.

⁵ Kŷ Jesus tóg ag mŷ kāmén mŷ sir. “Ker ū ājag lograr hé hē!,” he tóg.

⁶ “Cristo vŷ tŷ ĩnh nī,” he jé ag tóg ke mŷ, ijiji tó kŷ. Ū tŷ hēn ri ke ag tóg tag tónh mŷ, kŷ ū tŷ hēn ri ke ag tóg ag vī kri nĩm ke mŷ,” he tóg.

⁷ “Vēnh génh to vême mē jé ājag tóg ke mŷ, tag ki vēnh génh ke to, kuvar há tá vēnh génh to ke gé. To jŷrũn ke tŷg nī hā ra. Vēnh génh enh ke vē. Hā ra kurā tŷ ěgno to hā ke vē ver,” he tóg.

⁸ “Nação ag tŷ jagnē kato tēgtēnh ke vē. Pā'i krēm ke ag tŷ pā'i ū krēm ke ag to jũnh ke vē gé. Kŷ ga tŷ ragrag ke tŷ hēn ri ke han ke vē gé, ěmā tŷ hēn ri ke ki. Vējēn tŷ tŷ' henh ke vē gé. Hā ra ājag jagāgtar ke vēnh ven vén vē ver,” he tóg, Jesus ti.

⁹ “Ājag kanē nĩm nī,” he tóg. “Ājag jyvēn tar han jé ag tóg ke mŷ, pā'i ag, vēnh kanhrān jafā krēm. Ājag mrānmrān jé ag tóg ke mŷ. Ājag jé prēr jé ag tóg ke mŷ, pā'i mág tŷ ājag ve jé, pā'i mág kar ti, isugrĩn, ājag tŷ pā'i ag mŷ ĩnh vī tugtó jé,” he tóg.

¹⁰ “Kŷ ĩnh kātīg ke to hā povo kar vŷ ĩnh vī sér mēnh ke mŷ,” he tóg.

¹¹ “Ag tŷ vāhā sir ājag sigse kŷ, ājag gé kāmŷ jé, kŷ ājag tŷ nén tónh ke mŷ to jykrén tŷg nī, kā jatu' hemnī. Ag tŷ ājag ki jēmēn kŷ ājag tóg tónh ke mŷ, Topē kuprīg tŷ ājag nĩgrēg ki vī mŷ ěn ti,” he tóg. “Ājag tŷ tó tŷ vē sir, ti tŷ tó vē sir,” he tóg.

¹² “Ū vŷ tóg ā régre senh ke mŷ, ti ter jé, ěn kā,” he tóg. “Kŷ ū panh tóg ā kósin senh ke mŷ gé, ti ter jé,” he tóg. “Kŷ ū krē ěn tóg ā han mŷ fag sigsenh ke mŷ gé, fag kāgtén jé,” he tóg.

¹³ “Vēnh kar vŷ tóg ājag to vī kónān ke mŷ gé, ĩnh jiji tugrĩn,” he tóg. “Hā ra ū tŷ isovānh ke tŷ (pē) ěn kren ke vē,” he tóg.

Vēsŷrēnh mág ke
(Mt 24.15-28; Lc 21.20-24)

¹⁴ Kŷ Jesus tóg ag mŷ: “kejēn ājag tóg vāhā ājag tŷ nén ū kamēg tĩ ěn venh ke mŷ,” he mŷ, “ěg kavénh mŷ ěn ti,” he tóg. “Topē vī tó tĩ tŷ Daniēl vŷ ti tó ja nĩgtĩ. Ti jēnh ke tŷ tá tóg jēnh mŷ,” he tóg. Ū tŷ to ke mŷ ěn jé ki kanhró nī. “Kŷ Judéia ki ke kar ag jé vēnh pigjunh mŷjēg, pānónh ra, fag mré hā,” he tóg.

¹⁵ “Ū tŷ re tá nī ěn jé kára rā tŷg nī, ti ĩn ki, ti tŷ mān jé.

¹⁶ Kŷ ū tŷ ā japŷ tá jē ěn jé vŷn ke tŷg nī gé, ti kur mān jé,” he tóg.

¹⁷ “Ūn kufy fag tŷ vēsŷrēnh ke vē, kurā ěn kā, ū tŷ gĩr pygfām mŷ fag ke gé,” he tóg.

¹⁸ “Topē mré vĩmnĩ, ti tŷ kusa kā vēnh ven tŷ nī jé.

¹⁹ Vēsŷrēnh tŷ ge ve ja tŷ ěg nŷtĩ, Topē tŷ ěg mundo han jan ki. Kŷ ěg ge venh ke tŷ nī gé, kar kŷ,” he tóg.

²⁰ “Ēg tŷ kurā ki vēsŷrēnh ke mŷ ěn vŷ e nŷtĩnh mŷ vē, hā ra tóg térem kŷ nŷtĩ nī, Topē tŷ ūn kuprēg ja ěn ag tugrĩn. Ti tŷ térem tŷ nī (mŷ) ra ū vŷ kren ke tŷ nī vē, ag vēsŷrēnh ěn to,” he tóg.

21 “Ký ũ tỳ ājag mý: ha vé, Cristo vỹ tag kã jẽ nĩ, he mũ ra kri fig tũg nĩ, ti tỳ: tãtã ti jẽ nĩ, he mũ ra,” he tóg.

22 “Ón ký Cristo vỹ vẽnĥ venven ke mũ, ón ký Topẽ vĩ tó tĩ ag ke gé. Ón ký milagre hyn han jé ag tóg ke mũ, milagre tỳ hẽn ri ke ti, ón ký Cristo ẽn ag. Ag tỳ vẽnĥ kar krĩn kónãn sór vẽ, ag tỳ kygnẽ jé, Topẽ tỳ ũn kuprẽg ja ẽn ag mrẽ hã, hẽn ri ke mũn.

23 Ha vé, sỹ ājag mý tó kãn vẽ, ti kutẽnĥ ke to hã,” he tóg, Jesus ti.

Topẽ kósin kãtĩg mãn ke

(Mt 24.29-31; Lc 21.25-28)

24 “Hã ra kurã ẽn kã, vẽnỹrẻnĥ ẽn kar ký rã vỹ nhyr ke mũ, ký kysã vỹ jẻngrẻĥ he mãn ke tũ nĩ gé.

25 Ký krĩg vỹ vár ke mũ gé, kanhkã krẻm. Ẽg tỳ kanhkã tá nẻn vẻg tũ kar ẽn vỹ ragrag ke kãn mũ gé.

26 Ký vãhã vẽnĥ kar vỹ inh kãtẻre venh ke mũ sir, kanhkã góg jagma, inh jykre tar (pẻ) nĩn ký,” he tóg. “Tỳ sóg ẻprã ke fi kósin nĩ mỷr,” he tóg. “Inh ve vỹ kókov (pẻ) kãtĩ mũ,” he tóg.

27 “Ký sóg sỹ jẻgnẻ jafã ag mỷ: ha mũjẻg, hẻnh ke mũ, ag tỳ sỹ ũn kuprẻg ja ag vẻnhmãn jé, ga kar tá, kanhkã fyr mĩ hã,” he tóg, Jesus ti.

Ka tỳ figueira to comparação

(Mt 24.32-35; Lc 21.29-33)

28 “Ka tỳ figueira to ki kanhrãn nĩ, to comparação han ký,” he tóg. “Ti pẻ tánh ký, ti fẻj tãg han ký tóg kakó tĩ sir, ẻkrẻ tygtánh kurã ti.

29 Ri ke ti nĩ, ājag tỳ inh kãtẻg mãn ke kurã ki kanhró nỹtĩnĥ ke mũ ti. Ājag tỳ sỹ ājag mỷ nẻn tó mũ tag ve ký tóg kakó tãvĩ tĩ ha, inh kãtẻg mãn ke ti,” he tóg.

30 “Sỹ ke há vẽ, hã ký sóg tag tó mũ, ha mẽ. Ủri ũn rĩnrĩr mũ ag tỳ nẻn kar ẽn venh ke vẽ, ag kãgter ke to hã,” he tóg.

31 “Kanhkã vỹ tũ’ hẻnh ke mũ, ga ti ke gé. Jãvo inh vỹ vỹ tũ’ hẻnh ke tũ nĩ,” he tóg, Jesus ti.

Jesus kãtẻg mãn ke kurã

(Mt 24.36-44)

32 “Hã ra ù pi(jẻ) isỹ kurã ki kãtẻg mãn ke ki kanhró nĩ, hora ẽn ki ke gé’,” he tóg. “Topẽ tỳ jẻgnẻ jafã ag pi(jẻ) ki kanhró nỹtĩ’. Inh pi(jẻ) ki kanhró nĩ gé’, isỹ tỳ Topẽ kósin ra,” he tóg. “Ẽg jóg mág hã vỹ ã pin ký ki kanhró nĩ, kurã kã nẻn kutẽnĥ ke mũ ẽn ki,” he tóg.

33 “Ājag kanẻ vin han nĩ, vẻnh rinfig nĩ,” he tóg. “Topẻ mrẻ vĩ, ājag tỳ ti kurã ki kãtẻg nỹtĩnĥ ký,” he tóg.

34 “Ủ pasa ri ke vẻ,” he tóg. “Ā tỳ ã ĩn ki kutẻ ký tóg ã camarada ag mỷ: ‘ijo ki rĩr,’ he mũ, ‘inh rãnrãj ki,’ he tóg. Ký tóg ũ tỳ jãnkã ki rĩr tĩ ẽn mỷ: ‘ã kanẻ nĩm han nĩ,’ he mũ gé.

35 Hã ký sóg ājag mỷ: “ājag kanẻ nĩm han nĩ,” he mũ gé,” he tóg. “Ājag pi(jẻ) ti jun ke ki kanhró nỹtĩ’, ĩn tãn ti’,” he tóg. “Hẽn ri ke mũn tóg kutyg ke ra jun mũ, hẽn ri ke mũn tóg kuty kuju ki jun mũ, hẽn ri ke mũn tóg galo kyr mũ ra jun mũ, hẽn ri ke mũn tóg kusã ki jun mũ,” he tóg.

36 “Vẻnh ki ẻmẻmĩnĩ, nửr tũg nĩ. Ājag tỳ ijãvãnh tũ ra sóg jun mũ, vẻsỹmẻr,” he tóg, Jesus ti.

37 “Vẻnh kar mỷ sóg tó mũ, sỹ ājag mỷ tó mũ tag, hã vỹ: vẻnh ki ẻmẻmĩnĩ, he mũ,” he tóg, Jesus ti.

14

*Ag tÿ Jesus tén sór**(Mt 26.1-5; Lc 22.1-2; Jo 11.45-53)*

¹ Hã ra festa tÿ Páscoa kurã kãtã kurã tãgtũ vë sir, pão jëgja tũ konh ke kãtã. Kÿ Topë tũ ki rÿr tÿ ag tóg Jesus vatãnh tá ti se sór mũ, vënh kar tÿ ti se vëg tũ nĩ jé. Topë vÿ to professor mré ag tóg ti se sór mũ gé, ti tén jé.

² Hã ra ag tóg: “festa tag to mẽ jé ãg tóg ke mũ ver,” he mũ. “Ëg tÿ festa kã ti se kÿ vënh génh mág hÿn tóg kutënh mũ, ha vemñĩ,” he ag tóg.

*Maria fi tÿ Jesus gãnh tãg**(Mt 26.6-13; Jo 12.1-8)*

³ Ën kã Jesus tóg kejën ãmã tÿ Betãnia tá nĩ nĩ, Simão Ìn krëm, vënh kaga tÿ lepra han ja ãn Ìn krëm. Ti jëg nĩ ra ù fi tóg tá jun mũ, garrafa vyn kÿ. Pó tÿ alabastro tÿ tóg há(r) nĩ, garrafa ti. Ti ki jë vÿ tóg tÿ nén kar tãg nĩ, hã vÿ: nardo, he mũ. Nardo pë vë, kaja e pë ti nĩ, ger há ãn ti. Garrafa ãn mranh fi tóg mũ, kÿ fi tóg ti ki jë ãn tÿ Jesus gãnh kri kugjëg mũ sir.

⁴ Hã ra ù tÿ tá nÿtÿ ag kã ù ag tóg jagnë mÿ: “fi tÿ ne jé nén kaja e tag kókén në?” he mũ.

⁵ “Ëg tÿ nén ger há tag fón ke vë vë, kaja há to, jãnkamy tÿ hën ri ke to,” he ag tóg. “Ëg tÿ ùn jagãgtar ag mÿ vin ke vë vë,” he ag tóg. Kÿ ag tóg fi mÿ vÿ tar han mũ sir.

⁶ Hã ra Jesus tóg ag mÿ: “fi mÿ vÿ tũg,” he mũ. “Ãjag tÿ ne jé fi fe kaj han në?” he tóg. “Ình ki fi krov nĩ, ình jykre ki,” he tóg.

⁷ “Ãjag mré sóg nÿg sÿ han mũ, jãvo ùn jagãgtar mũ ag vÿ ãjag mré nÿtÿg mág han tÿ,” he tóg. “Ìsÿg kar kÿ ag mÿ nÿmñĩ, ãjag tÿ ag mÿ nén nÿm ke ti,” he tóg.

⁸ “Ã tÿ nén han ke mũn han fi tóg huri,” he tóg. “Ình kãn fi tóg huri, vënh kej tá ình fón ke to,” he tóg.

⁹ “Ag tÿ vënh vÿ sér tugtó kÿ ag tóg fi tÿ nén han mũ tag ti tónh ke mũ gé, kÿ vënh kar vÿ fi tÿ nén han mũ tag mẽgmënh mũ sir, ha vemñĩ. Ki hã sóg tó mũ,” he tóg, Jesus ti.

*Ag tÿ Jesus vatãnh tá ti kãgmÿnh ke to jykrén**(Mt 26.14-16; Lc 22.3-6)*

¹⁰ Kar kÿ Judas Iscariotes tóg tÿ mũ, Topë tũ ki rÿr tÿ ag ra, ag mré Jesus jënjën ke to jykrén jé. Hã ra ù tÿ 12 (ke) ag kã ù vë, Judas ti.

¹¹ Ag tÿ ti vÿ mẽ kÿ tóg ag mÿ sér tÿ sir. “Ã mÿ ãg to jãnkamy vin mũ,” he ag tóg ti mÿ. Hã kÿ tóg: “ình hÿn hë ri kenh mũ, ag tÿ ti kãgmÿ jé?” he mũ, Judas ti.

*Ag tÿ Páscoa ko mũ**(Mt 26.17-25; Lc 22.7-14, 21-23; Jo 13.21-30)*

¹² Pão jëgja tũ konh ke kurã ve vë sir, cordeiro tãnh ke kurã vë sir, Páscoa kã. Kÿ ti mré mũ tÿ ag tóg Jesus mÿ: “ãg hÿn hë tá ã mÿ carneiro sÿ tãnh mũ, ãg tÿ kon jé?” he mũ.

¹³ Kÿ tóg ùn régre ag jëgnëg mũ, ti mré mũ tÿ ag. Kÿ tóg ag mÿ: “ha ãmã mág ra mũjëg,” he mũ. “Tã ãjag tóg ù venh ke mũ, goj vyn kÿ jë ù. Ën nón mũmñĩ,” he tóg.

¹⁴ “Ti tÿ Ìn kãra rã kÿ Ìn tãn ãn mré vÿmñĩ,” he tóg. “Ti mÿ tag tómnĩ,” he tóg. “Ëg Senhor vÿ ã mÿ vënh vÿ jënëg mũ, hemñĩ. Ti tÿ ã Ìn krëm Páscoa konh há tóg tÿ, ti mré mũ tÿ ag mré, hemñĩ ti mÿ,” he tóg, Jesus ti.

15 “Kỹ tóg ãjag mÿ ven ke mÿ, kroggrog tÿ kynhmÿ nÿ ên ti,” he tóg. “Éhé ti nÿ. Tá nén kar vÿ kynkar kÿ nÿtÿ. Êg nÿgja vÿ tá nÿtÿ gé. Tá êg mÿ han nÿ,” he tóg, ti mré mÿ tÿ régre ag mÿ.

16 Kÿ ag tóg mÿ mÿ sir, êmã mág ra, kÿ ag tóg sir vég mÿ, Jesus tÿ ag mÿ nén to ja ti. Kÿ ag tóg vÿêjên kân mÿ sir, ag tÿ cordeiro ên ko jé.

17 Rã pur kar kÿ Jesus tóg ù tÿ 12 (ke) ag mré tá jun mÿ sir.

18 Ag jêg mÿ jãvo Jesus tóg ag mÿ: “ãjag kãki ù tóg inh vatánh tá inh kato vãsãnsãn mÿ ag mÿ inh ven ke mÿ,” he mÿ. “Inh mré jêg mÿ ù vÿ, ki hã sóg tó mÿ,” he tóg.

19 Kÿ ag tóg fe kaj' he mÿ sir. Ti mÿ ag tóg: “inh mÿ vó'? Inh mÿ vó'?” he kân mÿ sir.

20 Hã ra tóg ag mÿ: “ãjag kã ù vÿ,” he mÿ. “Inh mré pão tÿ kã punpun mÿ vÿ, pênky kãki,” he tóg. “Ên vÿ mÿr,” he tóg.

21 “Ter jé sóg ke mÿ, isÿ tÿ êprã ke fi kósín nÿn kÿ. Hã kÿ iser ke vÿ rán kÿ nÿ,” he tóg. “Vãsÿ sóg to rán kÿ nÿ,” he tóg. “Hã ra ù tÿ pã'i ag mÿ inh ven ke ên mÿ tóg vÿ kónãn tãvÿ han ke mÿ. Ti mur tÿ nÿn ran há tÿ vÿ,” he tóg, Jesus ti.

Santa Ceia

(Mt 26.26-30; Lc 22.15-20; 1Co 11.23-25)

22 Ag jêg nÿtÿ ra Jesus tóg êmÿ mäg mÿ sir, kÿ tóg Topê mré vÿ mÿ sir, êmÿ to. Kÿ tóg vÿnh kã kugpãn kÿ ag mÿ vÿnh kãpãm mÿ sir, ti mré mÿ tÿ ag mÿ. “Inh hã vÿ,” he tóg, êmÿ to.

23 Kar kÿ tóg copo vãg mÿ gé sir, vinho tÿ ki jên kÿ. To tóg Topê mré vÿ mÿ gé sir, kÿ tóg ùn pÿr mÿ ven', ven', he mÿ sir. Kÿ ag tóg kãmê kân mÿ sir.

24 Kÿ tóg ag mÿ: “inh kyvénh hã vÿ,” he mÿ. “Vÿnh kar jagfÿ tóg inh ki kãkutênh ke mÿ, inh kyvénh ti,” he tóg. “Topê vÿ vÿnh kar to há nÿ sór mÿ, inh kyvénh tugrÿn,” he tóg.

25 “Ha mÿ,” he tóg. “Inh pi(jé) vinho kron mãn ha'. Kejên sóg kron mãn ke mÿ, Topê tÿ tÿ êg pã'i nÿ ên kã sóg kron mãn mÿ,” he tóg.

26 Ag jên kar kÿ ag tóg Topê mÿ jãn mÿ sir. Jãn kar kÿ ag tóg sir krÿ tÿ Oliveiras ra mÿ mÿ.

Jesus tÿ Pedro mÿ tó

(Mt 26.31-35; Lc 22.31-34; Jo 13.36-38)

27 Kÿ Jesus tóg ag mÿ: “ãjag kar vÿ inh ré kÿ mÿ kân ke mÿ,” he mÿ. “Hã kÿ tóg rán kÿ nÿ, hã mÿ. “Û tÿ carneiro ki rÿr tÿ ên tãnh jé sóg ke mÿ, kÿ ti mÿg vÿ krig ke kân ke mÿ,” he tóg, iso, Topê ti, ti vÿ rá ki,” he tóg, Jesus ti. “Hã ve jé ãjag tóg ke mÿ.

28 Hã ra sóg iser kar kÿ rÿr mãn ke mÿ. Ên kã sóg ãjag jo tÿnh ke mÿ, ga tÿ Galiléia ra,” he tóg, Jesus ti.

29 Kÿ Pedro tóg ti mÿ: “ag kar tÿ ã ré kÿ mÿ mÿ ra isóg ã ré kÿ tÿg ke tÿ nÿ,” he mÿ, Pedro ti.

30 Hã ra Jesus tóg ti mÿ: “ha vé,” he mÿ. “Ûri, kuty tag kã ã tóg iso: ti ki kagtÿg sóg nÿ, he tãgtÿ han ke mÿ, galo kyr régre han ke to hã. Ki hã sóg tó mÿ,” he tóg.

31 Hã ra Pedro tóg vÿ tar han. “Sÿ ã mré ter ke mÿ ra sóg ã to: ti ki kagtÿg sóg nÿ, henh ke tÿ pÿ nÿ,” he tóg, Pedro ti. Kÿ ti mré mÿ tÿ ag tóg hã tó kân mÿ gé sir.

Getsêmani tá

(Mt 26.36-46; Lc 22.39-46)

³² Kÿ ag tóg ka kré ra mû mû sir. Ka kré ên jijin hã vÿ: Getsêmani, he mû. Kÿ tóg ã mré mû tĩ ag mÿ: “nĩgnĩ ra ver, tag ki,” he mû. “Sÿ ver Topê mré vémén ke vê,” he tóg, Jesus ti.

³³ Kÿ tóg Pedro, Tiago, João ag mÿ: “inh mré kãmũ jêg,” he mû. Kÿ tóg ti mÿ e tĩ sir, jürün ke tóg mû sir, Jesus ti.

³⁴ Kÿ tóg ag mÿ: “inh fe kaj mág tóg tĩ,” he mû, “kÿ inh fe kaj tóg inh mÿ tÿ iser ri ke nĩ,” he tóg. “Tag ki nÿtĩmnĩ, nũgnür tũg nĩ,” he tóg.

³⁵ Kÿ tóg tũg sĩ han mãn kÿ mũg ke mû, ga kri nÿ tóg mû sir. ã jóg mré tóg vĩ mû sir, “isÿ hên ri ke mũn nén venh ke mû ên vég tũ nĩ jé, hora ên ki,” he tóg.

³⁶ Kÿ tóg: “Aba!, panh!,” he mû. “Nén kar han ki kanhró ã tóg nĩ,” he tóg. “Inh jagtar ke tag tÿ tũg! hemnĩ,” he tóg. “Hã ra isÿ ã mÿ nén to vĩ mû tag han tũg nĩ, ã tÿ nén han ke mû ên hã han nĩ,” he tóg.

³⁷ Kÿ tóg ã mré mû tĩ ag venh tĩ mû, hã ra ag tóg nũgnür ja nĩ, kÿ tóg Pedro mÿ: “Simão, ã mÿ nür?” he mû, “ã mÿ hora pir hã ki nür tũ kórég?” he tóg ti mÿ.

³⁸ “Nür tũg nĩ,” he tóg. “Topê mré vĩmnĩ, ãjag tÿ ti vĩ mranh tũ nĩ jé, ù tÿ ãjag kutân mû ra. ãjag tÿ mranh sór tũ vê vê, hã ra ãjag tóg krój nÿtĩ, hã kÿ ãjag tóg mranh ke mû,” he tóg.

³⁹ Kÿ tóg tũg mãn mû sir, Topê mÿ tó mãn jé. Ti vĩ ên hã tó mãn tóg mû.

⁴⁰ Kÿ tóg ag tá jun mãn mû gé sir, hã ra ag tóg nũgnür mãn nÿtĩ, ag kanê krój nÿtĩn kÿ. Hã kÿ ag tÿ ti mÿ vĩnh ke ên tóg tũ tĩ.

⁴¹ Kÿ tóg tá jun tãgtũ han mãn mû. Kÿ tóg ag mÿ: “ãjag ne tóg nũgnür ja nĩ, vênhkán ja ãjag tóg nĩ,” he mû. “Gen kÿ,” he tóg. “Pétêm ti huri, hora ti,” he tóg. “Û tÿ Topê vĩ mranh tĩ ag tÿ isenh ke nê ha,” he tóg. “Tÿ sóg êprã ke fi kósin nĩ mÿr,” he tóg.

⁴² “Nĩgnĩ ra, mû jé ha. Û tÿ ag mÿ inh ven mû tóg jun ke kãtĩg ha,” he tóg.

Ag tÿ Jesus se

(Mt 26.47-56; Lc 22.47-53; Jo 18.3-12)

⁴³ Jesus tÿ ver tÿ vémén jê ra Judas tóg vêsÿmér jun mû sir. Û tÿ 12 (ke) ag kã ù vê, Judas ti. Ti mré polícia ag tóg kãmũ mû gé. Rógro génh kÿ ag kãmũ mû, ka kykyv génh kÿ ke gé. Topê tũ ki rĩr tĩ ag pã'i ag vÿ ag jêgnê, Topê vĩ to professor ag ke gé, kófa ag ke gé.

⁴⁴ Judas ên, ù tÿ ag mÿ Jesus ven mû ên vÿ ag mÿ vênh jykre nĩm ja nĩ. “Sÿ ùn ki nhun ke mû ên hã semnĩ. Ên hã pére mũmnĩ,” he ja tóg nĩ, Judas ti.

⁴⁵ ã tÿ tá jun kÿ tóg vêsÿmér Jesus to grên ke kÿ ti mÿ: “Senhor,” he mû. Kÿ tóg ti ki nhun ke mû sir, Judas ti, ón kÿ.

⁴⁶ Kÿ ag tóg ti kãgmĩ kÿ ti ség mû sir.

⁴⁷ Jesus mré tĩ tĩ ù tóg rógro kunũnh kÿ polícia ù nĩgrêg kym mû sir. Topê tũ ki rĩr tĩ to pã'i mág camarada vê, ti tÿ ùn nĩgrêg kym mû ên ti.

⁴⁸ Kÿ Jesus tóg ag mÿ: “ãjag ne tóg rógro génh kãmũ mû!,” he mû, “ka kykyv génh kÿ ke gé!” he tóg. “Inh pi(jé) tÿ bandido nĩ,” he tóg.

⁴⁹ “Kurã kar ki sóg ãjag mré jê ja nĩgtĩ, mÿr, Topê jo ìn krêm,” he tóg. “Vênh kanhrãn kÿ isóg tá nĩ ja nĩgtĩ, hã ra ãjag tóg tá iség tũ nĩ vê mÿr,” he tóg. “Hã ra vãsÿ iso nén rán kÿ nĩ ên ki kenh ke hÿn,” he tóg.

⁵⁰ Kÿ ti mré mû tĩ ag tóg ti ré kÿ pétê kãn mû, vênh pigju jé, mÿr, ha mē.

⁵¹ Hã ra kyrũ ù tóg ti nón tĩ mû. Vênh kãtor tãvi ti nĩ. Ti kãgmĩg ag tóg mû gé.

⁵² Hã ra tóg kamêg kÿ ã kur ré kÿ vênhvãg mû, ti kator ra.

Pā'i tŷ Jesus mré vī

(Mt 26.57-68; Lc 22.54-55, 63-71; Jo 18.13-14, 19-24)

⁵³ Kŷ ag tóg Jesus pére mŷ mŷ, Topē tŷ ki rŷr tŷ to pā'i mŷ. Ti ĩn tá ag tóg vĕnhmān kān kŷ nŷtŷ, Topē tŷ ki rŷr tŷ to pā'i ag, kófa ag mré hā, Topē vŷ to professor ag mré hā.

⁵⁴ Hā ra Pedro tóg Jesus nón kātŷ mŷ, kuvar há tá. Kŷ tóg Topē tŷ ki rŷr tŷ to pā'i ĩn vāso ra rā mŷ gé. Kŷ tóg policia ag mré pŷ to tón nŷ nŷ, Pedro ti.

⁵⁵ Kŷ Topē tŷ ki rŷr tŷ to pā'i ag tóg ŷ jāvānhvānh mŷ, ŷ tŷ ón kŷ Jesus jykre kórég tó mŷ ěn. Ti vŷ tugrŷn ag tóg Jesus ti tén sór mŷ. Hā ra tóg ag mŷ ki krov tŷ nŷ. Vĕnh jyvĕn tŷ kar ag tóg ŷ jāvānhvānh mŷ, hā ra tóg ag mŷ ki krov tŷ nŷ gé.

⁵⁶ ŷ tŷ hĕn ri ke ag tóg ón kŷ Jesus jykre kórég tó mŷ, hā ra tóg ag mŷ ki krov tŷ pĕ nŷ sir, ag tŷ vĕnh jykre ŷ tó', vĕnh jykre ŷ tó' he mŷ ra.

⁵⁷ Kŷ ŷ ag tóg vāhā jĕgĕg kŷ nŷtŷn kŷ (ag tóg) ón kŷ ti jykre kórég ŷ kāmĕn mŷ sir.

⁵⁸ “Ti tŷ tó mĕ ĕg,” he ag tóg. “Topē jo ĩn tag kókĕn jĕ sóg ke mŷ, he ja tóg nŷ, vĕnh nĭgĕ tŷ há tag ti, he ja tóg nŷ, hā ra sóg kurā tāgtŷ ki ŷ han mān ke mŷ, ĕg tŷ ĕg nĭgĕ tŷ han vānh ěn han jĕ sóg ke mŷ, he ja tóg nŷ,” he ag tóg, Jesus to.

⁵⁹ Ge ra tóg ag mŷ ki krov tŷ nŷ, ti jykre kórég ěn vĕg tŷ ag tóg nŷ.

⁶⁰ Kŷ Topē tŷ ki rŷr tŷ to pā'i mág tóg jĕgnĕ kŷ (tóg) ag kuju kā jĕ mŷ sir. “Ā tŷ nĕn ŷ tónh ke mŷ mŷ ā mŷ tŷ?” he tóg mŷ. “Ag hā ne tóg ā vŷ kónān tag tó ja nŷ gĕ!” he tóg, Jesus mŷ.

⁶¹ Hā ra tóg hun ke mŷ, nĕn ŷ tó tŷ tóg nŷ. Kŷ pā'i mág ěn tóg ti mŷ ke mān mŷ. “Ā mŷ tŷ Cristo nŷ?” he tóg, “ĕg tŷ ŷ to: há ti nŷ, he mŷ ěn kósin mŷ tŷ ā nŷ? Ā mŷ tŷ Topē kósin nŷ?” he tóg.

⁶² Kŷ Jesus tóg ti mŷ: “hŷ, ĩnh hā vĕ,” he mŷ. “Ĕprā ke fi kósin ěn vŷ tŷ ĩnh nŷ. ĩnh ve jĕ āĵag tóg ke mŷ ha. ŷ tŷ nĕn kar han mŷ ěn pĕgja tá sóg nŷnh ke mŷ. Kanhká góg kāmŷ sóg kātĕrenh ke mŷ gé,” he tóg.

⁶³ Kŷ pā'i mág ěn tóg ā kur tŷ jaran' ke mŷ sir, jŷ kŷ. Kŷ tóg: “ŷ tŷ ti jykre kórég tónh ke ŷ jāvānh mān ke tŷ ĕg nŷ ha,” he mŷ.

⁶⁴ “Ti tŷ Topē kato vŷ kónān ja ěn mĕ ĕg huri,” he tóg. “Ĕg hŷn ti tŷ hĕ ri kĕnh mŷ ha?” he tóg.

“Ter jĕ tóg ke mŷ, ti vŷ tag tugrŷn,” he ag tóg, ag kar ěn.

⁶⁵ Kŷ ŷ ag tóg ti to sugrug mŷ sir. Ti kanĕ pāg ag tóg mŷ gé sir, kŷ ag tóg ti tānh kŷ ti mŷ: “ŷ nŷ ā tānh?” he mŷ. Kar kŷ policia ag tóg ti tānh mŷ gé sir, ti kakā ki.

Pedro tŷ Jesus to ón

(Mt 26.69-75; Lc 22.56-62; Jo 18.15-18, 25-27)

⁶⁶ Hā ra Pedro tóg ĩn vāso kā nŷ nŷ, Topē tŷ ki rŷr tŷ to pā'i ěn ĩn tá. Hā ra pā'i ěn camarada fag vŷ tá nŷtŷ gé, kŷ fag kā ŷn pir fi tóg Pedro to kātŷ mŷ.

⁶⁷ Kŷ fi tóg ti vĕg mŷ sir, ti tŷ pŷ to tón nŷ ra. Kŷ fi tóg ti tugnŷm kŷ ti mŷ: “Jesus mré ā tóg tŷ mŷ gé,” he mŷ, “Nazaré tá ke ěn mré,” he fi tóg ti mŷ.

⁶⁸ Hā ra Pedro tóg: “vó,” he mŷ. “ĩnh pi(jĕ) ti ki kanhró nŷ,” he tóg. “Ā tŷ ne tó nĕ?” he tóg. Kŷ tóg ĩn jānkā ra tŷ mŷ sir, ĩn kāra rā jĕ. Hā ra galo tóg kyr mŷ.

⁶⁹ Hā ra fi tóg tá ti vĕg mŷ gé. Kŷ fi tóg tá nŷtŷ ag mŷ ke mān mŷ sir. “Tá jĕ ěn tóg tŷ ag kā ŷ jĕ gé,” he fi tóg, Pedro to.

⁷⁰ Hã ra tóg: “vó!,” he mǎn mǔ. Kar kǵ tá nǵtĩ ag tóg Pedro mǵ ke mǎn mǔ. “Ǽ hǵn tǵ ag kǎ ũ nĩ,” he ag tóg ti mǵ. “Tǵ Ǽ Galiléia tá ke nĩ mǵr,” he ag tóg. “Ǽ vĩ vǵ tá ke ag vĩ ri ke nĩ,” he ag tóg.

⁷¹ Hã ra Pedro tóg ag mǵ: “Ǽjag tǵ nén tó mǔ ẽn ki kagtǵ sóg nĩ mǵr,” he mǔ. “Inh ón mǔ ra Topẽ tóg inh vóg kónǎn ke mǔ vẽ, hã kǵ sóg ón ke tũ pé nĩ,” he tóg.

⁷² Hã ra vêsǵmér galo tóg kyr mǎn mǔ. Kǵ Pedro tóg Jesus vĩ to jykrén mǔ sir, Jesus tǵ ti mǵ nén tó ja ẽn to, hã vǵ: “iso Ǽ tóg: ti ki kagtǵ sóg nĩ, he tǵgtũ han ke mǔ, galo kyr régre han to hã,” he mǔ. Tag mĩ ẽkrén kǵ tóg vẽn hã péju kǵ nĩ kǵ fǵ nĩ nĩ sir, Pedro ti. Vǎhã tóg ti mǵ e tĩ.

15

Pilatos tǵ Jesus mré vĩ

(Mt 27.1-2, 11-14; Lc 23.1-5; Jo 18.28-38)

¹ Tǵ vaj kǵ ag tóg kusã ki Jesus ti jykrén mǔ jagnẽ mré, Topẽ tũ ki rĩr tĩ to pǎ'i ag, kófa ag mré hã, Topẽ vĩ to professor ag mré hã ke gẽ, vẽn jyvẽn tĩ kar ẽn ag. Kǵ ag tóg Jesus mrĩn kǵ ti pére mǔ mǔ, Pilatos mǵ ti fẽg jé.

² Kǵ Pilatos tóg ti mǵ: “Ǽ mǵ tǵ Judeu ag pǎ'i nĩ?” he mǔ. Kǵ tóg: “ki hã Ǽ tóg tó mǔ,” he mǔ, Jesus ti.

³ Hã ra Topẽ tũ ki rĩr tĩ to pǎ'i ag tóg ti kato vĩ tǵ hẽn ri ke han mǔ sir.

⁴ Kǵ Pilatos tóg ti mǵ ke mǎn mǔ. “Mǵ Ǽ tǵ ag mǵ nén ũ tó jǎvǎn,” he tóg. “Ha mẽ, Ǽ to ag tóg vĩ kónǎn mág kǵ nǵtĩ,” he tóg, Pilatos ti.

⁵ Hã ra Jesus tóg vĩ mǎn tũ nĩ, kǵ tóg Pilatos mǵ e tĩ sir.

Ag tǵ Jesus to: ter jé tóg ke mǔ, he

(Mt 27.15-26; Lc 23.13-25; Jo 18.39-19.16)

⁶ Hã ra Pilatos tóg ag mǵ Vese ag kar kǎ ũn pir kavãg tĩ, festa tǵ Páscoa kar ki. Ti jykre vẽ. Ag tǵ ũ to vĩ mǔ ẽn kavãg tóg tĩ.

⁷ Hã ra ũ tóg se kǵ nĩ, ti jijin hã vǵ: Barrabás, he mǔ. Vẽn génh kutẽm ti ag mré tóg se kǵ jẽ nĩ, vẽn génh kǵ ag tóg ũ tén ja nĩ, hã kǵ ag tóg nĩgfénh kǵ nǵtĩ.

⁸ Kǵ vẽn kar ẽn ag tóg Pilatos to mǔ mǔ sir, ti mǵ: “ẽg mǵ Ǽ tǵ nén han tĩ ẽn han nĩ,” he jé.

⁹ Kǵ Pilatos tóg ag mǵ: “mǵ Ǽjag mǵ sǵ Judeu ag pǎ'i kyvǎn há?” he mǔ.

¹⁰ Topẽ tũ ki rĩr tĩ to pǎ'i ag tóg véké Jesus to jũ nǵtĩ, hã kǵ ag tóg nén (ũ) tũ to ti se ja nĩ. Hã ra Pilatos tóg ki kanhró nĩ, hã kǵ tóg ti kavǎn sór mǔ.

¹¹ Hã ra Topẽ tũ ki rĩr tĩ to pǎ'i ag tóg vẽn kar ag krĩn ja nĩ, ag tǵ Pilatos mǵ: “Barrabás hã kava ra,” he jé.

¹² Kǵ Pilatos tóg ag mǵ ke mǎn mǔ. “Kǵ sóg ti tǵ hẽ ri kenh mǔ, Ǽjag tǵ ũ to: Judeu ag pǎ'i, he mǔ ẽn tǵ?” he tóg.

¹³ Kǵ ag tóg prẽnprẽr mǔ sir. “!..Cruz to ti sǎ..!” he ag tóg mǔ sir, prẽnprẽr kǵ.

¹⁴ Kǵ Pilatos tóg ag mǵ: “e ri ken kǵ?” he mǔ. “Ti kórég tǵ ne han ti?” he tóg ag mǵ. Hã ra ag tóg prẽr mǎn', prẽr mǎn' he mǔ sir. “!..Cruz to ti sǎ..!” he ag tóg, prẽnprẽr kǵ.

¹⁵ Kǵ Pilatos tóg ag mǵ hã han sór mǔ sir, kǵ tóg ag mǵ Barrabás kyvãg mǔ sir. Jesus mrǎnmrǎn tóg mǔ sir, mrǎn ke jafã tǵ, kǵ tóg ag mǵ ti fẽg mǔ sir, ag tǵ ka to ti sa jé.

Soldado ag tǵ Jesus vóg kónǎn

(Mt 27.27-31; Jo 19.2-3)

16 Kŷ soldado ag tóg pã'i mág ĩn kãra Jesus pére mũ mũ sir, ag vènh jyvèn jafã ěn kãra. Kŷ ag tóg soldado kar ag jé prër mũ sir.

17 Ti kri ag tóg kur fón mũ, kur kusũg tŷ. Sónh pirĩn kŷ ag tóg ti krĩ tógfĩg mũ sir.

18 Kŷ ag tóg ti mŷ: “viva, Judeu ag pã'i,” he mũ sir, ti nyg kŷ.

19 Kŷ ag tóg vãn tŷ ti krĩ mũ mrãmrãn mũ sir, ti to ag tóg sugsgũ mũ sir, kŷ ag tóg ti jo grĩnhgrĩnh ke mũ sir, ag tŷ ón kŷ ti to: “Senhor;” hen kŷ.

20 Ag tŷ ti nyg kar ag tóg ti ki kunũg mũ, kur kusũg ěn ti. Kŷ ag tóg ti kur pẽ tŷ ti kãra rãg mũ sir. Kŷ ag tóg ti pére mũ mũ, ag tŷ cruz to ti san jé.

Jesus tŷ cruz to sa

(Mt 27.32-34; Lc 23.26-43; Jo 19.17-27)

21 Hã ra ũ tóg vãn kãtã kãtĩ mũ, hã vŷ: Cirene tá Simão, he mũ. Alexandre panh vẽ, Rufo panh vẽ gé. Ti tŷ mũ mũ ra ag tóg ti mŷ vĩ tar han mũ, ti tŷ Jesus cruz vyn jé.

22 Kŷ ag tóg Gólgota tá junjun mũ sir ti mré. Gólgota to ken hã vẽ, hã vŷ: vènh krĩ kuka, he mũ ěg vĩ ki.

23 Kŷ ag tóg ti mŷ vinho ven mũ, Jesus mŷ, ka tŷ mirra jẽnjo grór mré hã, hã ra tóg kron jãvãnh nĩ, vènh kagta ti.

24 Kŷ ag tóg cruz to ti sãg mũ sir. Ti kur tŷ ag tóg jagnẽ mŷ vènh kãpãm mũ sir, to ag tóg jogar he mũ gé, ti kur to, soldado ag.

25 Kusã ki 9 hora vẽ sir, kŷ tóg cruz to ti sãg mũ.

26 Ag tŷ nén tŷ kato vĩ tóg rán kŷ nĩ, hã vŷ: “Judeu ag pã'i tŷ rei vẽ,” he mũ. Ti kri tóg sa, vènh rán ti. Ti tŷ nẽji vèsŷ pã'i tŷ rei han mũ to ag tóg ti tén mũ.

27 Ti kóm ag tóg ũn régre ag tŷ cruz to sãg mũ gé, bandido ag. Ũ vŷ ti pẽgia tá sa, jó ũ vŷ ti jakãnh tá sa.

28 Hã kŷ tóg nén tŷ ã to rán kŷ nĩ ěn vẽ, hã vŷ: “ag mŷ tóg tŷ ũn jykre pãno ag mré ke nĩ,” he mũ, Topẽ vĩ rán ki. Hã ra tóg ge nĩ.

29 Kŷ ũ tŷ mũ mũ mũ ag tóg ti nyg' he mũ gé, vŷn vŷn he kŷ. “Ó,” he ag tóg mŷ. “ã hã ne tóg: Topẽ jo ĩn kókén jé sóg ke mũ, he gé,” he ag tóg. “Kurã tãgtũ ki sóg ũ han mũ, he ã tóg mũ gé,” he ag tóg.

30 “Vènh kren han ra kema'. Cruz to kãtère kema',” he ag tóg ti mŷ.

31 Ge ag tóg mũ gé, Topẽ tũ ki rĩr tĩ to pã'i ag, Topẽ vĩ to professor ag mré. Ti nyg ag tóg mũ gé, kŷ ag tóg jagnẽ mŷ: “ũ krenkren han tóg, hã ra tóg vènh hã kren han ki kagtĩg nĩ,” he mũ.

32 “Cristo jé cruz to kãtère kema', Judeu ag pã'i ti', ěg tŷ ve jé, ěg tŷ ti vĩ kri nĩm jé,” he ag tóg. Kŷ bandido ag, ũ tŷ ti kóm cruz to nŷtĩ ěn ag tóg ti nyg mũ gé.

Jesus ter

(Mt 27.45-56; Lc 23.44-49; Jo 19.28-30)

33 Rã tŷ ěg nĩno kã sa ra tóg kuty' he mũ sir, ga kar mũ hã. Kŷ kuty ěn tóg hora tãgtũ tũg mũ.

34 3 hora ki Jesus tóg prër mũ sir, jamã hár(a), kŷ tóg: “Eloí, Eloí, lemã sabactani?” he mũ. ěg vĩ ki ěg tóg tag to: “Topẽ, Topẽ, ã tŷ ne jé isovãnh nẽ?” he mũ.

35 Kŷ tá nŷtĩ ũ ag tóg jẽmẽ kŷ (ag tóg) jagnẽ mŷ: “ha vé, Elias jé tóg prër mũ,” he mũ.

³⁶ Kõ ü tóg vènhvåg mü sir, kõ tóg esponja tÿ vinho pråg mü, vinho kaja pir tÿ. Ka jurÿn kõ tóg tÿ kusón kõ vinho kâra råg kõ ti mõ ven mü sir, ti tÿ ki ùnh' ùnh' ke jé. "Toreg'," he tóg. "Hën ri ke mün Elias kätï mü, ti kätërem jé," he tóg.

³⁷ Hã ra Jesus tóg prër mág (pè) han kõ hun ke mü sir.

³⁸ Hã ra Topè jo ïn krëm kur tÿ jänkã nife tóg jaran ke mü, ti jar tóg vènh käkym ke kân mü sir.

³⁹ Hã ra capitão tóg ti vég jè nï. Ti prër mëg tóg mü, ti tÿ hun ke èn mëg tóg mü, kõ tóg: "vènh vi há ja vè," he mü. "Topè kósin ja vè" he tóg.

⁴⁰ Kõ ùn tÿtá fag tóg tá nÿtï gé. Kuvar há tá nÿtï kõ fag tóg ti vég nÿtï nï. Fag kã ü fi vÿ tóg tÿ Maria Madalena fi nï, kõ ü fi tóg tÿ Salomé fi nï gé, kõ ü fi tóg tÿ Maria fi nï gé, José mré Tiago sï mõnh tag fi.

⁴¹ Ùn tÿtá èn fag tóg ti nón mü ja nÿgtï, ti tÿ Galiléia mï tï mün kõ. Tá fag tóg ti ki rÿr ja nÿgtï gé. Kõ ùn tÿtá tÿ hën ri ke fag tóg ti ve kõ nÿtï gé, ti tÿ cruz to sa kõ, ti mré Jerusalem ra mü ja èn fag.

Ag tÿ vènh kej tá ti fi

(Mt 27.57-61; Lc 23.50-56; Jo 19.38-42)

⁴² Räkè tóg nÿ ha, nén kar han jé kurã vè sir, hã vÿ: vènhkân ke jo kurã èn, he mü.

⁴³ Hã ki Arimatéia tá José tóg Pilatos mõ ke mü, ti tÿ ti mõ Jesus fár fi jé. Arimatéia tá José tóg tÿ vènh jyvèn tï ag kã ü nï. Jykre kuryj tóg nï. Topè tÿ tÿ èg pã'i nï ve sór tóg tï gé. Èn hã vÿ tóg mümëg vánh kõ Pilatos mõ Jesus fár to vi mü.

⁴⁴ Kõ Pilatos tóg: "kõ ti mõ ter huri?" he mü. Kõ tóg capitão jé prër kõ ti mõ: "ti mõ ter huri?" he mü, "mõ vãsÿ?" he tóg.

⁴⁵ Kõ capitão tóg: "hÿ," he mü. "Ter ti huri," he tóg. Kõ Pilatos tóg José mõ Jesus fár ti fig mü sir.

⁴⁶ Kõ tóg sir kur kupri kym mü, ùn há tãvi. Kõ tóg Jesus kätërem mü. Kur èn tÿr tóg ti påg mü. Kõ tóg vènh kej kätá ti finh tï mü sir, pãró nor kãkã. ag tÿ pãró nor han ja kãkã. Kõ tóg pó tÿ nífèh mü sir, ti jy.

⁴⁷ Hã ra Maria Madalena fi tóg vég mü sir, ag tÿ ti fi ti, Maria fi mré hã, José mõnh fi.

16

Jesus rÿr mãn

(Mt 28.1-8; Lc 24.1-12; Jo 20.1-10)

¹ Vènhkân ke kurã tüg kõ Maria Madalena fi tóg nén ger há mäg mü, Salomé fi ke gé, Maria fi ke gé, Tiago mõnh èn fi. Fag tÿ ti fár ger há han sór vè.

² Kõ semana kurã ve ki fag tóg kusã (pè) ki ti kej ra mü mü, rã tÿ jun ke kõ sa ra.

³ Mün kõ fag tóg jagnè mõ: "ü nÿ hÿn èg mõ ti kej ti nón mü, tá', pó tÿ nife èn ti?" he mü.

⁴ Hã ra fag tóg vènh jo vég mü, ti kej tá, hã ra tóg nor nÿ nï, pó mág èn tóg tÿn kõ nï nï sir.

⁵ Tá junjun kõ fag tóg ti kej kâra ge mü sir, kõ fag tóg kätá kyrü vég mü, hã ra tóg ti nÿgia pègia tá nï nï, kur kupri tu kõ. Kõ tóg fag mõ e tï, mõr, ha më.

⁶ Kõ kyrü èn tóg fag mõ: "vènhmÿ" he tüg," he mü. "Äjag hÿn Jesus jãvánh mü, Nazaré tá ke ti," he tóg, "ag tÿ cruz to ùn säg mü èn ti," he tóg. "Rÿr ti jè nï, tag ki ti tũ nï ha," he tóg. "Ag tÿ ti fi ja hã vè ha," he tóg.

⁷ “Kur Pedro m̄y tónh m̄ jĕg, ti mré m̄ tĩ kar ag m̄y ke gé,” he tóg. “Ag m̄y: ājag jāmi tóg tĩg m̄ nĕji, hemni, Galiléia ra, hemni. Tá ājag ti venh m̄, hā k̄y tóg ājag m̄y to ja ni, hemni,” he tóg, fag m̄y, kyrũ ti.

⁸ K̄y fag tóg ti kej tá fũrũrũn k̄y pa m̄. Pĕtĕ fag tóg sir m̄ m̄, fag m̄y e tĩn k̄y, fag t̄y jũrũn ke k̄y. K̄y fag pi(jé) ũ m̄ nĕn ũ tó m̄ m̄yʹ, fag kanĕ jur k̄y.

Maria Madalena fi t̄y ti ve
(Mt 28.9-10; Jo 20.11-18)

⁹ Jesus t̄y kusā ki rĩr m̄n k̄y, ti t̄y semana ki kurā ve ĕn ki rĩr m̄n k̄y tóg Maria Madalena fi m̄y vĕnh ven vĕn m̄, ti t̄y ũn ki vĕjagrĕ kórĕg t̄y 7 (ke) pan ja ĕn fi m̄y.

¹⁰ K̄y fi tóg tĩ m̄, ti mré n̄yĩ ag m̄y tó jé, ag fe kaj n̄yĩn k̄y, ag kygf̄yʹ hen k̄y.

¹¹ Hā ra ag tóg kri nĩm tũ ni, fi t̄y ag m̄y kāmĕn m̄ ra, ti t̄y rĩr ni ĕn ti, fi t̄y ā t̄y ti ve ja ĕn kāmĕn m̄ ra.

Ũn régre ag t̄y ti ve
(Lc 24.13-35)

¹² Kar k̄y tóg ũn régre ag m̄y vĕnh ven m̄ gé sir. Ag m̄y tóg vĕs̄y ũn k̄y tĩ ni. Ag m̄ ra ag tóg ĕpyr kri ti vég m̄.

¹³ K̄y ag tóg v̄ȳhv̄yn ke k̄y (ag tóg) ũ t̄y tá n̄yĩ ag m̄y tó m̄ gé sir, Jesus mré m̄ tĩ ũ ag m̄y, hā ra ag tóg ag v̄i kri fig tũ ni gé.

Jesus t̄y ā mré m̄ tĩ ag m̄y vĕnh ven
(Mt 28.16-20; Lc 24.36-49; Jo 20.19-23; Hk 1.6-8)

¹⁴ Vāhā tóg ũ t̄y 11 (ke) ag m̄y vĕnh ven m̄ gé, ag pin k̄y, ag jĕg n̄yĩ ra. K̄y tóg ag m̄y v̄i tar han m̄, ag t̄y kri nĩm jāvānh n̄yĩn k̄y, ag t̄y to jykrĕn tũ n̄yĩn k̄y. “Ājag hā ne tóg ũ t̄y inh vég m̄ ĕn fi v̄i kri fi ja tũ ni, ũ t̄y inh vég m̄ ĕn ag v̄i kri nĩm ja tũ ājag ni gé,” he tóg. “Ag t̄y inh rĩr m̄n vég m̄ ra ājag tóg kri fi ja tũ ni,” he tóg.

¹⁵ K̄y tóg ag m̄y: “ga kri m̄ k̄y ĕmā kar m̄ vĕnh v̄i sér kāmĕn ni, Topĕ t̄y há(r) ag kar m̄y,” he m̄.

¹⁶ “Ũ t̄y ājag v̄i kri fig m̄ ĕn ag v̄y krenkren ke m̄, ũ t̄y inh ki ge k̄y kygpe k̄y n̄yĩ ĕn ag v̄y krenkren ke m̄,” he tóg. “Hā ra ũ t̄y kri fig tũ ĕn v̄y kren ke tũ ni, ũ t̄y inh ki rā tũ ĕn v̄y kren ke tũ ni,” he tóg, Jesus ti.

¹⁷ “Ũ t̄y inh ki ge m̄ ĕn ag v̄y milagre venh ke m̄ inhhā,” he tóg. “Tag ve jé ag tóg ke m̄, ha mĕ. Vĕnh jagrĕ kórĕg pan jé ag tóg ke m̄, ijkre t̄y,” he tóg. “Ũn v̄i ũ ag v̄i tó jé ag tóg ke m̄,” he tóg.

¹⁸ “Ag t̄y kejĕn p̄yn k̄gm̄g m̄ ra, ag t̄y kejĕn veneno kron m̄ ra tóg ag t̄y hĕ ri kenh ke tũ ni,” he tóg. “Ũn kaga ag mĕgmĕ jé ag tóg ke m̄ gé, ag nĩgé t̄y, k̄y ag tóg sir ag t̄y háʹ henh ke m̄,” he tóg, Jesus ti.

Jesus t̄y ā jóg ra t̄y
(Lc 24.50-53; Hk 1.9-11)

¹⁹ Jesus t̄y ā mré m̄ tĩ ag m̄y tag tó kar k̄y tóg kanhkā ra tāpyr m̄ sir, k̄y tóg tá jun k̄y (tóg) Topĕ pĕgja tá ni m̄.

²⁰ K̄y ag tóg m̄ m̄ sir, ĕmā kar m̄ hā, ti mré m̄ tĩ ag. K̄y ag tóg tugtó m̄, vĕnh v̄i sér ĕn ti, k̄y ĕg Senhor tóg ag mré han tĩ ni, ag v̄i kóm tóg vĕnh kar t̄y nĕn han vānh ĕn hyn han m̄. Hā vĕ.

LUCAS TÛ RÁ

¹ Lucas tÛ rá vë. Sÿ ã mÿ rán vë, Teófilo'. Û tÛ hën ri ke ag vÿ to jykrén, ag tÛ kãmén jé, ãg tÛ Jesus to nén ki kanhró nÿtÿ ên ti, Topê tÛ ti jënê ja ên ti, kÿ ag tóg rán huri.

² Û tÛ ti vég mÿ ag tóg ãg mÿ kãmén ja nÿgtÿ, ù tÛ ti ví tó tí ag, ù tÛ ti mré mÿ ja ên ag. Ên ag tÛ nén tó rán ag tóg huri, ù ag.

³ Kÿ sóg vãhã rán to jykrén mÿ gé sir, ha mē. Jesus kãme mē kãn ja inh nÿ ha, ti mur mré hã, kÿ sóg ti tÛ nén han mÿ mē kãn gé. Hã kÿ sóg ã mÿ Jesus kãme rán mÿ sir. Komêr hã sóg rán kãn sór mÿ.

TÛ ã tóg pã'i mág nÿ, Teófilo'.

⁴ Mē ã huri, Jesus kãme ti. Sÿ ã mÿ rán vë, ã tÛ ti tÛ ki hã tó ja mën jé sir.

João Batista mur ke tó

⁵ Kejën Herodes tóg tÛ Israel ag pã'i mág tÛ rei nÿ, ga tÛ Judéia tá. Kÿ Topê tÛ ki rÿr tí ù tóg nÿ nÿ, ti jiji hã vÿ: Zacarias, he mÿ. Ti jóg'jóg ve jyjyn hã vÿ: Abias, he mÿ. Arão krê'krê ù vë, Abias tí. Semana pir ki tóg Topê tÛ ki rÿr tÿgtÿ, Abias tí. Ti semana ki ti krê'krê tÛ Zacarias ên tÛ ki rÿr vë, ti tÛ tÛ Abias krê'krê nÿn kÿ.

Prù ti nÿ, Zacarias ti, kÿ ti prÿ fi jiji hã vÿ: Isabel, he mÿ. Arão krê'krê fi vë gé, Isabel fi.

⁶ Ên fag vÿ vënh jykre kuryj han tí, kÿ fag jykre vÿ kuryj nÿtÿ, Topê mÿ. Ti ví ki króm fag tóg tí, ãg Senhor vÿn ki. Ti tÛ ãg jyvën han fag tóg tí, kygnê sór tÛ fag tóg nÿgtÿ.

⁷ Hã ra fag krê tóg tÛ tí. Kurÿ fi tóg nÿ, Isabel fi, hã kÿ fag tóg krê tÛ nÿtÿ. Krê tÛ nÿtÿ ki fag tóg kófa nÿtÿ ha.

⁸ Kejën Zacarias tóg ã semana pétêm mÿ sir, ti tÛ Topê tÛ ki rÿr jé. Kÿ tóg cidade tÛ Jerusalém ra tí mÿ, Topê tÛ ki rÿr jé. Tá jun kÿ ag tóg jogar he mÿ, ag tÛ ù tÛ Topê mÿ ger há pÿn ke mÿ ên ve jé, incenso ên ti.

⁹ Ag jykre vë, ag tÛ to jogar he sór ti. Ag tÛ to jogar hen kÿ tóg tÛ Zacarias nÿ sir, kÿ tóg Topê jo ãn kãra rá mÿ sir, ti mÿ pÿn jé, ger há ên ti.

¹⁰ Ti tÛ Topê jo ãn krêm pÿn kÿ vënh kar tóg re tá nÿtÿ nÿ, Topê mré vÿn kÿ. Zacarias tÛ Topê mÿ pÿn kÿ ag tóg Topê mré ví nÿtÿ nÿ, re ki, ùn e ên ag.

¹¹ Kÿ tóg ti mÿ pÿn mÿ sir. Kÿ Topê tÛ jënê jafã vÿ ti mÿ vënh ven mÿ. Topê mÿ ger há pÿn jafã vÿ tá jê nÿ, ãn kãtã. Mesa ên pëgia tá tóg jê nÿ, Topê tÛ jënê jafã ti.

¹² Zacarias tÛ ti ve kÿ tóg jÿrÿn ke mÿ. Ti mÿ tóg e tí, ti tÛ ti ven kÿ.

¹³ Hã ra tóg ti mré ví mÿ, Topê tÛ jënê jafã ti. Kÿ tóg ti mÿ: "Zacarias'," he mÿ. "Kamêg tÿg nÿ," he tóg. "Topê vÿ ã tÛ ti mÿ nén to ví mÿ ên mē, kÿ tóg ã mÿ han ke mÿ ha. Fi kufyg jé ã tóg ke mÿ, ã prÿ fi, Isabel fi. Fi tÛ ti ve kÿ tóg gré nÿnh mÿ, ã kósin tí, ha vemnÿ," he tóg, Topê tÛ jënê jafã ti. "Kÿ ã tÛ ti jyjyn han kÿ: João, hemnÿ," he tóg mÿ.

¹⁴ "Kÿ tóg ã mÿ sér tÿnh mÿ. ã fe tóg mrin kenh mÿ. Û tÛ hën ri ke ag mÿ tóg há tÿnh mÿ, fi tÛ ti ven kÿ.

¹⁵ Topê vÿ ti tÛ ùn mág han ke mÿ. Vinho vóg ke tÛ tóg nÿ, goj fa vóg ke tÛ tóg nÿ gé. Ti vãkre vë. Topê kuprÿg vÿ tÛ ti jagrê nÿnh mÿ, fi tÛ ver ti vég tÛ ki.

¹⁶ Israel ag mÿ tóg Topë vÿ tónh mÿ, ký ù tÿ hën ri ke ag vÿ ti vÿ mē ký kri fi ký ājag jykre tovānh ke mÿ. Topë jykre hā han jé.

¹⁷ Ēg Senhor jo tóg tīg ke mÿ gé. Vāsÿ Topë vÿ tó tÿ tÿ Elias jykre han jé tóg ke mÿ. Elias vÿ Topë kuprīg tÿ jagrē ja nīgti, ký tóg jykre tar han ja nīgti. Ēn jykre han jé tóg ke mÿ. Ā kósin tag tÿ ag jyvën ký ag panh tóg ājag krē mré vënh jykre pir han ke mÿ. Ū tÿ Topë vÿ mranh tÿ ěn tóg vënh jykre kuryj han sór ke mÿ gé, ũ tÿ Topë vÿ ki króm tÿ ěn ri ke. Hā ki tóg vënh kar jykre tÿ há' henh ke mÿ, ag kugrynh ký, ā kósin tag ti. Topë mÿ tóg ag jykre tÿ há' henh mÿ, Cristo tÿ kātīg ken jo, ag tÿ ti jāvānh jé," he tóg mÿ, Topë tÿ jēnē jafā ti, Zacarias mÿ.

¹⁸ Ký Zacarias tóg ti mÿ: "hā ra sóg kófa nÿ ha," he mÿ. "Kar inh prÿ fi vÿ kófa nÿ gé, inh mré. Ký inh hÿn hē ri kenh mÿ? Inh mÿ tá krÿg mÿ vÿ?" he tóg.

¹⁹ Ký Topë tÿ jēnē jafā tóg ti mÿ: "tÿ sóg Gabriel nÿ," he mÿ. "Topë nīgja tá inh jēgti. Hā ra tóg inh jēnē, sÿ ā mré vÿ jé, sÿ ā mÿ vënh vÿ sér tag tó jé," he tóg.

²⁰ "Ha vé, vÿ vānh nÿ jé ā tóg ke mÿ ha, ha vemni. Vÿ vānh nÿ ki ā tóg isÿ ā mÿ nén tó mÿ kurā ěn pétēm ke mÿ. Ā hā ne tóg sÿ ā mÿ vÿ kri nÿm tÿ nÿ. Ti kurā ki ā tóg venh mÿ, sÿ ā mÿ nén tó ja ti. Ā tÿ inh vÿ kri fig tÿ nÿn ký ā tóg vÿ vānh nÿn mÿ ha," he tóg, Topë tÿ jēnē jafā ti.

²¹ Hā ra vënh kar ěn tóg re tá nÿti nÿ, Zacarias jāvānh ký. Ag mÿ tóg e tÿ, ti kākutē vānh han ký, Topë jo ĩn kátá.

²² Vāhā tóg kākutē mÿ, hā ra tóg sir vÿ vānh jē. Ký tóg ag mÿ ven mÿ, ā nīgē tÿ. Hā ki ag tóg ki kanhrān mÿ sir, ti tÿ nén nē ve ja ěn ti, Topë jo ĩn kátá.

²³ Ti vÿ vānh nÿn ki ti rānhrāj tóg kejēn tÿ' he mÿ sir, ti tÿ Topë tÿ ki rÿr ěn ti. Ký tóg ā ĩn ra tÿ mÿ sir.

²⁴ Ti tÿ ā ĩn tá jun kar ký ti prÿ fi tóg kejēn kufyg mÿ sir, Isabel fi. Ký fi tóg vënh péju ký nÿ nÿ sir, fi mÿ sér tÿn ký. Kysā tÿ 5 (ke) han fi tóg, vënh péju ký nÿ ki.

²⁵ "Topë hā ne inh jagāgtān'," he fi tóg mÿ. "Inh ve tóg, ký tóg inh mÿ'āg tÿ tÿg' hé. Inh kurÿ to fag tóg: "Topë hÿn fi to kórég nÿ," he ja nīgti. Hā ra tóg fag vÿ tÿ tÿg' hé, Topë ti," he fi tóg mÿ. Hā ký fi tóg kufyg mÿ sir, ā kósin vānh (hā) ra.

Jesus mur ke tó

²⁶ Fi kufy nÿ ki kysā tÿ 6 vē sir, ký Topë vÿ ā tÿ jēnē jafā jēnēg mÿ, ti tÿ Jesus mur ke tónh tīg jé, Gabriel ěn ti. Ký tóg ga tÿ Galiléia ra tÿ mÿ, cidade tÿ Nazaré ra.

²⁷ Tá tátāg ũ fi tóg nÿ nÿ. Ūn mén ja tÿ fi vē. Fi jijin hā vÿ: Maria, he mÿ. Fi mén ken hā vÿ: José, he mÿ. Davi krē'krē ũ vē, José ti, fi mén ke ěn ti.

²⁸ Fi hā mÿ tóg vënh ven mÿ sir, Gabriel ti, ký tóg fi mÿ: "ā mÿ há?" he mÿ. "Topë vÿ ā jagāgtān, ký tóg ā vég mÿ," he tóg mÿ.

²⁹ Fi tÿ ti ve ký fi tóg jÿrÿn ke mÿ. Ti vÿ tóg fi mÿ e tÿ, ký fi tóg to jykren mÿ sir, ti vÿ to. "Ti tÿ ne tó nē, hÿn?" he fi tóg mÿ, to jykren ký.

³⁰ Ký Topë tÿ jēnē jafā tóg fi mÿ: "kamēg tÿg ra," he mÿ. "Topë vÿ ā jagāgtān mÿr," he tóg.

³¹ "Ha vé, kufyg jé ā tóg ke mÿ," he tóg. "Kÿ ā tóg kósin ke mÿ. Ā tÿ ti jÿjÿn ký ti mÿ: Jesus, hemni," he tóg, Topë tÿ jēnē jafā ti, fi mÿ.

³² "Tÿn ũn mág jēnh ke mÿ, ā kósin tag ti, ký ag tóg ti to: ũ tÿ kynhmÿ nÿ ěn kósin, henh ke mÿ. Ký ěg jóg tÿ Topë vÿ ti tÿ pā'i mág han ke mÿ, vāsÿ ti jóg'jóg ve tÿ Davi jēgia ká.

³³ Kÿ tóg tÿ pã'i nĩ sir, Jacó krê kar to pã'i. Ti tÿ tÿ pã'i nĩ tag vÿ tũ' henh ke tũ nĩ. Tÿ pã'i han kÿ tóg nĩ nĩ," he tóg, Gabriel ti.

³⁴ Kÿ fi tóg ti mÿ: "hã ra sóg ù mré nÿ ja tũ nĩ ver," he mũ. "Kÿ inh hẽ ri kenh mũ?" he fi tóg ti mÿ.

³⁵ Kÿ tóg fi mÿ: "Topê kuprĩg vÿ ã kri tĩnh mũ," he mũ, "kÿ ti kãnhvég vÿ ã kri tĩnh mũ gé, kÿ tóg ã jykre tÿ ã kósin ti han ke mũ, Topê ti. Hã kÿ ag tóg ti to: Topê tũ, henh ke mũ, ã tÿ ùn venh ke ên to. Topê kósin, he jé ag tóg ke mũ, ti to.

³⁶ Ha vé, ã mré ke fi vÿ kufy nĩ, Isabel fi. Ûn gré ve jé fi tóg ke mũ. ã kófa (hã) ra fi tog kufy nĩ. Kysã tÿ 6 (ke) han fi tóg huri, kufy nĩ ki. Fi to ãjag tóg: kurĩ fi tóg nĩ, he tĩ vẽ, hã ra fi tóg kufy nĩ ha.

³⁷ Topê hã ne nén kar han há nĩ', hã kÿ tóg fi mÿ han. Kÿ tóg ã mÿ han ke mũ gé, sÿ ã mÿ tó mũ tag ti," he tóg, Gabriel ti.

³⁸ Kÿ fi tóg ti mÿ: "há ti nĩ," he mũ. "Tÿ sóg Topê camarada nĩ mÿr, ti tũ pẽ. Kÿ tóg inh mÿ há tĩ, ã tÿ inh mÿ tó mũ tag ti," he fi tóg ti mÿ. Kÿ tóg tĩ mũ sir, Topê tÿ jênẽ jafã ti.

Maria fi tÿ Isabel fi venh tĩ

³⁹ Ti tĩg kar kÿ Maria fi tóg tĩ mũ gé sir, Isabel fi jamã ra. Pãnónh e tá tóg nĩ, fi jamã ti, ga tÿ Judéia tá. Fi tÿ ra tĩg kÿ fi tóg fũrũn tĩ mũ.

⁴⁰ Fi tÿ Zacarias ãn tá jun kÿ fi tóg Isabel fi mÿ: "ã mÿ há?" he mũ.

⁴¹ Kÿ Isabel fi tóg fi vĩ mẽg mũ, kÿ fi kósin tóg vo mũ, fi kãki. Kÿ Topê kuprĩg vÿ fi krĩn mũ.

⁴² Kÿ fi tóg prẽr mũ. "Topê tóg ã ve há han, fag kar kãmĩ tóg ã kuprẽg," he fi tóg fi mÿ. "Kÿ Topê vÿ ã kósin ve há han mũ gé, ã tÿ ùn venh ke ti.

⁴³ Inh Senhor mÿnh fi hã ne tóg inh venh kãtĩ mũ', kÿ tóg inh mÿ e tĩ," he fi tóg fi mÿ.

⁴⁴ "Ha vé, isÿ ã vĩ mẽ kÿ inh kósin tóg vo ja nĩ, inh kãki. Ti mÿ tóg sér tĩ, ã vĩ ti.

⁴⁵ ã hã ne tóg Topê vĩ kri fi', ti tÿ ã mÿ vẽnĩ vĩ jênẽn kÿ. Hã kÿ tóg ã ve há han, Topê ti. ã tÿ ti vĩ kri nĩm kÿ ã tóg venh ke mũ, ti tÿ ã mÿ nén tó ja ti," he fi tóg, Isabel fi, Maria fi mÿ.

Maria fi jãn

⁴⁶ Kÿ Maria fi tóg ke mũ gé. "Topê mÿ sóg vĩ há han sór mũ," he fi tóg. "Inh mÿ tóg tÿ ùn mág nĩ, êg Senhor ti.

⁴⁷ Kÿ inh fe tóg mrin ke mũ, isÿ tÿ Topê tũ nĩn kÿ, isÿ tÿ êg kren han tĩ ên tũ nĩn kÿ.

⁴⁸ Inh ki tóg êvãnh mÿr. Tÿ sóg ti camarada nĩ. Tÿ sóg ùn sĩ nĩ, hã ra tóg inh ki êvãnh. Kÿ vẽnĩ kar tóg iso: "Topê vÿ fi ve há han," henh ke mũ, inh krê'krê kar ke gé, êprã ke krê kar ke gé.

⁴⁹ Topê hã ne inh mÿ êg tÿ nén han vãnĩ han'. Tar ti nĩ, Topê ti, hã kÿ tóg han, inh mÿ. Jykre kurj ti nĩ, Topê ti, kÿ ti jiji tóg êg mÿ mẽ há tĩ.

⁵⁰ Êg jagãgtãn tóg nĩgtĩ, êg jóg'jóg ve ag ke gé, êg panh ag ke gé, êg ke gé, êg krê kar ke gé. Û tÿ ti kamẽg mũ kar jagãgtãn tóg nĩgtĩ mÿr, ha mẽ.

⁵¹ Jykre (ka)mẽ tóg nĩ, kÿ tóg êg tÿ nén han vãnĩ hyn han tĩ. Û tÿ: "vẽsóg ki inh nén kar han tĩ," he mũ ên ag jykre tÿ tóg tũg' henh ke mũ," he fi tóg.

⁵² "Pã'i mág ag tÿ tóg ùn kãsir han, Topê ti. Kÿ tóg ùn kãsir ag tÿ ùn mág han.

⁵³ Ûn jagägtar ag fónfan tóg mü, nén ù há tÿ, ù tÿ ti ví mẽ sór mü ag. Ûn rico ag mÿ tóg: “ha mü jëg,” hé, kÿ tóg ag mÿ nén ù nÿm tũ nÿ, kÿ ag tóg jagägtar nÿtÿ ha, ù tÿ ti ví mẽ jävãnh ên ag.

⁵⁴ Israel ag jagägtãn tóg mü, ã camarada ag, ã tÿ vãsÿ ag jagägtãn tÿ ên to jykrén kÿ. Êg hã vë, êg jagägtãn tóg.

⁵⁵ Êg jóg'jóg ve ag mÿ tóg tó ja nÿ, Abraão mÿ, ti krê ag mÿ ke gé, ti tÿ êg jagägtãn ke ti. Kÿ tóg ã ví ên to jykrén kÿ han, ti tÿ vãsÿ nén tó ja ti. Ti tÿ êg jagägtãn ke ên tóg tũg' he jävãnh nÿ,” he fi tóg, Maria fi. Fi tÿ Topê mÿ ví há han hã vë.

⁵⁶ Kar fi tóg kÿsã tãgtũ han mü sir, Isabel fi mré, kÿ fi tóg ã jamã ra vÿn ke mü sir.

João Batista mur

⁵⁷ Fi tÿg kar Isabel fi vÿ fi kósin venh ke kurã pétẽm mü sir, kÿ fi tóg vég mü. Hã ra tóg gré nÿ, fi kósin ti.

⁵⁸ Kÿ fi rã nÿtÿ fag vÿ vég mü, fi kanhkã fag ke gé. Topê tÿ fi jagägtãn mëg fag tóg mü. Kÿ tóg fag mÿ sér tÿ sir, fi mré, fi kósin to.

⁵⁹ Kurã tÿ 8 (ke) ki ag tóg fi tá junjun mü, ag tÿ ti gré junun fár kym jé. Kÿ ag tóg ti jyjy to jykrén mü gé, hã vÿ: Zacarias, he mü. Ti panh jiji tó sór ag tóg mü, ti mÿ.

⁶⁰ Hã ra ti mÿnh fi tóg: “vó,” he mü. “João, he jé tóg ke mü, ti jyjy ti,” he fi tóg mü.

⁶¹ Kÿ ag tóg fi mÿ: “ã kanhkã jiji tũ vë hã ra,” he mü.

⁶² Kÿ ag tóg ti panh ki jëmẽ sór mü. ãjag nÿgé tÿ ag tóg ti mÿ: “ti jyjy hÿn hẽ ri kenh mü?” he mü, ti panh mÿ, ag nÿgé tÿ.

⁶³ Kÿ tóg ki rán jafã to ví mü, Zacarias ti, kÿ tóg rán mü. “Ti jÿin hã vÿ: João, he mü,” he tóg, vënh rán ki. Kÿ tóg ag mÿ e tÿ sir.

⁶⁴ Kÿ vãhã ti ví tóg punh ke mü. Ti nũnẽ tóg krónh ke mü, kÿ tóg ví mü sir, Topê mÿ ví há han tóg mü, ti mÿ sér tÿn kÿ.

⁶⁵ Kÿ fag rã nÿtÿ kar vÿ kamëg mü. Kÿ vënh ví ên tóg vënh kar kri rũm mü, ga tÿ Judéia kar mÿ hã. Vënh kar tóg tÿ vëmén kãn mü.

⁶⁶ Kÿ ù tÿ mëg mü fag vÿ to jykrén mü. “Gÿr tag hÿn hẽ ri kenh mü,” he fag tóg mü. Topê vÿ ti ki rÿr há han, hã kÿ tóg fag mÿ e tÿ.

Zacarias tÿ Topê mÿ ví há han

⁶⁷ Kÿ Topê kuprÿg vÿ ti panh tÿ Zacarias krÿn mü, kÿ tóg tag tó mü, ha mẽ.

⁶⁸ “Tÿ ti ùn mág jẽ, êg povo tÿ Israel kri, êg Senhor ti, hã vÿ: Topê, he mü. Êg ki tóg êvãnh nÿgtÿ, Topê ti, ti tÿ ti tũ ag krenkren han jé. Êg hã vÿ tÿ ti tũ nÿtÿ,” he tóg.

⁶⁹ “Ti camarada tÿ Davi krê'krê ên vÿ êg krenkren han ke mü, êg tÿ ti ví jëmẽn kÿ. Ûn mág pë vë, Davi krê'krê ên ti. Topê tÿ êg mÿ nén han hã vë.

⁷⁰ Hã kÿ tóg tó ja nÿ, vãsÿ. Ti ví tó tÿ ag vÿ tugtó ja nÿ, vãsÿ, êg si ag, ti tũ ag.

⁷¹ Û tÿ hẽn ri ke ag vÿ êg kato tẽgtẽ mügtÿ, hã ra tóg êg krenkren han mü, ag to, ù tÿ êg to kórég tãví nÿtÿ ag to.

⁷² Ti tÿ êg jóg'jóg ve ag mÿ tó ja ên han ja tóg nÿ, êg jagägtãn kÿ, Topê ti. Ag mré jykrén ja tóg nÿ, Topê ti. Ên to jykrén ja tóg nÿ, kÿ tóg ki króm ja nÿ sir, Topê ti.

⁷³ Êg jóg'jóg ve tÿ Abraão mÿ tóg vënh ví mág han ja nÿ, Topê ti.

⁷⁴ Kŷ tóg ti mŷ: “ag krenkren han jé sóg ke mŷ, ã krê ag, ag kato tēgtē mŷ ag to, ha vemnī,” he ja nī. “Sŷ ke há vē. Sŷ ag krenkren han kŷ ag tóg sir jatun mŷ isŷ han ke mŷ, mŷmēg tŷ nŷn kŷ,” he ja tóg nŷgtī, Topē ti.

⁷⁵ “Nén ŷ vēnhmŷ han ke tŷ ag tóg nŷgtī, kurã kãtig ke mŷ ên kã. Vēnh jykre kuryj tãvī han jé ag tóg ke mŷ, isŷ han kŷ. Ag tŷ ga kri mŷn kŷ ag tóg han ke mŷ, isŷ ti. Kurã kar ki ag tóg sir inh jykre hã han ke mŷ,” he ja tóg nŷgtī, Topē ti, Abraão mŷ,” he tóg, Zacarias ti.

⁷⁶ Kŷ tóg ã kósin mŷ: “ha vé, vŷ,” he mŷ. “Sī ã tóg nŷ ver. Ū tŷ kynhmŷ nŷ ên vī tó jé ã tóg ke mŷ, kŷ ag tóg ã to: “Topē vī tó ti tŷ,” henh ke mŷ. “Ēg Senhor jo ã tóg tŷnh mŷ, ã tŷ ti japry kure ri ke han jé, ã tŷ ti jamŷn kurynh ri ke han jé, ã tŷ vēnh kar mŷ Topē vī tón kŷ,” he tóg.

⁷⁷ “Ag kanhrãn jé ã tóg ke mŷ, Topē tŷ ěg krenkren han sór ên to. Ēg tŷ ti vī mranh tŷ tóg ěg mŷ vēnh pãte fón ke mŷ, hã ki tóg ěg krenkren han ke mŷ, Topē ti,” he tóg, Zacarias ti.

⁷⁸ “Topē tŷ ěg jagãgtãn hã vē, ti tŷ ěg to há tãvī nŷn kŷ. Ēg ve jé tóg kãtig ke mŷ, kŷ tóg rã tŷ jun ke ri ke nŷ, Cristo mur ke ti.

⁷⁹ Kutry ri ke ti nŷ, ěg mŷ, ěg tŷ ti ki kagtŷ nŷtŷn kŷ. Ti kãtig kŷ tóg ěg mŷ kurã ri ke nŷ sir. Kãgter jé ěg tóg ke mŷ, kŷ tóg ěg mŷ kutry ri ke nŷ sir. Hã ra tóg ěg mŷ ã japry ven ke mŷ, ã jamŷn ti. Jagma mŷn kŷ ěg tóg ti jykre kusa venh ke mŷ,” he tóg, Zacarias ti. Ti tŷ ã kósin mŷ tón hã vē.

⁸⁰ Hã kŷ fi tóg João ve ja nŷ, ti han mŷ fag tŷ kófa (hã) ra. Kŷ tóg mog mŷ sir, kŷ tóg tar jē sir. Krŷ há tóg nŷ gé. Ēmã tŷ mŷ tóg tŷ mŷ ver, ã kurã tŷ tá krŷg ki. Ā kurã ki tóg Israel ag mŷ vēnh ven mŷ, ag mŷ Topē vī kãmén jé.

2

Jesus Mur (Mt 1.18-25)

¹ João mur kar kŷ ga kri pã'i mág tŷ imperador tŷ Augusto vŷ kejēn vēnh vī jēnēg mŷ, vēnh kar ag tŷ ãjag jyjy rán mŷ jé. Ga kri mŷ kar ag mŷ tóg vēnh vī ên jēgnēg mŷ, pã'i mág tŷ Augusto ti.

² Vēnh jiji rá ve vē, ge han ja tŷ ag nŷtŷ. Cŷrênio vŷ tŷ ga tŷ Síria kri pã'i tŷ governador nŷ, Augusto tŷ vēnh vī ên jēnēg mŷn kã. Tŷ tóg Augusto krēm ke nŷ, Cŷrênio ti. Ti tŷ tŷ pã'i nŷn kŷ ag tóg sir ãjag jyjy ránrán ven mŷ.

³ Kŷ ag tóg mŷ kãn mŷ, ãjag jóg'jóg ve ag jamã ja ra. Tá ag tóg ãjag jiji rá vin mŷ sir.

⁴⁻⁵ Kŷ José tóg ti mŷ gé, ã prŷnh ke fi mré, hã vŷ: Maria, he mŷ. Cidade tŷ Nazaré tá fag tóg pa mŷ, ga tŷ Galiléia tá. Kŷ fag tóg ga tŷ Judéia ra mŷ mŷ, cidade tŷ Belém ra. Davi krê'krê vē, José ti, hã kŷ tóg Belém ra tŷ mŷ, ã jyjy rá nŷm jé. Davi jamã ja vē, Belém ti. Hã kŷ tóg ra tŷ mŷ. Kŷ ti prŷnh ke fi vŷ ti mré tŷ mŷ, hã ra fi tóg kufy jagy nŷ.

⁶ Fag tŷ tá nŷtŷ ki fi tóg ã kurã pétēm mŷ.

⁷ Kŷ fi tóg ã kósin vég mŷ sir. Gré ti nŷ, fi kósin ve tag ti. Kŷ fi tóg ti pãg kŷ koso kãkã ti fig mŷ. Īn vŷ funfór nŷtŷ, hã kŷ fag tóg vēnh mēg jo Īn krēm nŷtŷ ja nŷgtŷ.

Mé ki rŷr tŷ ag

⁸ Kŷ ŷ tŷ mé ki rŷr tŷ ag vŷ tá nŷtŷ gé, carneiro ki rŷr tŷ ag. Ag japŷ ja tá ag nŷtŷ, ãjag mēg ki rŷr jé, kutry ên kã.

⁹ Kŷ vāhā Topē tŷ jēnē jafā vŷ ag mŷ vēnh ven mŷ, kanhkā tá. Topē tŷ jēngrē vŷ ag kri rūm ke mŷ. Kŷ ag tóg kamēg kŷ jūrūn ke mŷ sir.

¹⁰ Kŷ Topē tŷ jēnē jafā tóg ag mŷ: “kamēg tŷg ra,” he mŷ. “Sŷ ājag mŷ nén ū tónh ke vē. Vēnh vī há tó jé sóg ke mŷ, kŷ tóg ājag mŷ sér tŷnh mŷ. Vēnh kar vŷ mēnh mŷ, inh vī ti, povo kar, kŷ ag fe tóg mrin ke mŷ sir.

¹¹ Ājag krenkren han tŷ vŷ ūri mur, hā vŷ: Cristo, he mŷ. Ēg Senhor vē ha mŷr. Davi jamā ja tá tóg mur mŷ.

¹² Ha mŷ jēg, ājag tŷ gŷr ěn ve jé. Koso kākā tóg pāg kŷ nŷ nŷ. Hā ki ājag tóg ti ki kanhró nŷtŷnh mŷ,” he tóg ag mŷ, Topē tŷ jēnē jafā ti.

¹³ Kŷ vāhā ū tŷ hēn ri ke ag tóg vēnh ven mŷ sir. Topē tŷ jēnē jafā ag, kanhkā tān ag. Ēn ag vŷ Topē mŷ vī há han mŷ.

¹⁴ “Topē vŷ tŷ ūn mág pē nŷ,” he ag tóg mŷ. “Kynhmŷ ti nŷ, vēnh kar káfór ti nŷ, kŷ ěprā ke ag vŷ jatun mŷ nŷtŷ, ājag krŷ kusa tŷn kŷ, Topē tŷ ū tó há ag,” he ag tóg mŷ.

¹⁵ Kar ag tóg tŷg' he mŷ sir, ag tŷ kanhkā ra mŷn kŷ.

Ag tŷ tŷg' hen kŷ ū tŷ carneiro ki rŷr tŷ ag vŷ jagnē mŷ: “mŷ nŷ, Belém ra, ěg tŷ ve jé, Topē tŷ nén han ja ti, ěg Senhor tŷ ěg mŷ vēnh vī jēnē ja ěn ti,” he mŷ.

¹⁶ Kŷ ag tóg fŷrŷnrŷn mŷ mŷ sir. Tá ag tóg junjun mŷ. Kŷ ag tóg vėg mŷ, Maria fi, José ti ke gé, gŷr ti ke gé. Koso kākā tóg nŷ nŷ, Maria fi kósin ěn ti.

¹⁷ Hā kŷ ag tóg vėg mŷ. Hā kŷ ag tóg kāmén mŷ, vēnh kar mŷ. Topē tŷ ag mŷ vēnh vī jēnē ja ěn kāmén ag tóg mŷ, gŷr ěn to.

¹⁸ Kŷ tóg ū tŷ mēg mŷ ag mŷ e ti sir. Ū tŷ mé ki rŷr tŷ ag vŷ mēg ag tóg mŷ, kŷ tóg ag mŷ sér ti.

¹⁹ Kŷ Maria fi tóg vēnh vī tag to jykren mŷ gé sir. Fi pi(jé) kā jatun mŷ', ag tŷ nén tó ja ěn ti. To jykren kŷ fi tóg nŷ nŷ, Maria fi.

²⁰ Kŷ carneiro ki rŷr tŷ ag tóg sir ājag mēg to vŷnŷvŷn ke mŷ gé. Topē mŷ ag tóg vŷ há han mŷ. “Ti hā ne tóg ěg mŷ vēnh vī jēnē ja nŷ', ā tŷ jēgnē jafā ag tŷ', kŷ ěg tóg vé,” he ag tóg mŷ sir, Topē to.

Fag tŷ Jesus jŷin

²¹ Kar kurā tŷ 8 (ke) vŷ tŷg mŷ. Kŷ tóg ti gré junun fār kym ke kurā pētēm mŷ sir, gŷr sŷ ěn ti. Kŷ fag tóg ti jŷin kŷ ti mŷ: “Jesus,” he mŷ. Topē tŷ jēnē jafā vŷ ti jŷy tag tó ja nŷ, ti mŷnh fi tŷ ver ti tŷ kufyg tŷ ra. Hā kŷ fag tóg sir tŷ ti jŷin mŷ.

Fag tŷ Topē mŷ Jesus ven

²² Kejēn fag vākre tóg tá krŷg mŷ, kŷ fag tóg vēnh kykŷnh sór mŷ. Moisés vŷ tag rán ja nŷ, gŷr mur kar kŷ fag tŷ vēnh kykŷnh ke ti. Judeu ag jykre hā vē. Fag tŷ vēnh kykŷnh jé fag tóg cidade tŷ Jerusalém ra mŷ mŷ, fi tŷ Topē mŷ ā kósin ven jé, tá. “Ā tŷ vē,” he sór fag tóg mŷ, Topē mŷ, fi kósin ěn to.

²³ Topē vŷ ki tag vŷ rán kŷ nŷ, hā vŷ: “fi kósin ve tŷ gré nŷn kŷ tóg tŷ ěg jóg mág tŷ Topē tŷ nŷ,” he mŷ, Topē vŷ tŷ rán kŷ nŷ ki.

²⁴ Hā kŷ fag tóg Topē jo ĩn ra mŷ mŷ, Topē mŷ nén ū pŷn jé. Rán kŷ tóg nŷ nŷ, ěg jóg mág vŷn ki, fag tŷ ne tŷ ti mŷ pŷn ke ti, hā vŷ: sórāg régre, ke tŷ nŷ kŷ ton régre, he mŷ gé. Ēn ma fag tóg mŷ mŷ, fag tŷ Topē mŷ pŷn jé. Topē tŷ ki rŷr tŷ ag mŷ fag tóg vŷn ti, sórāg ti, kŷ ag tóg tānh kŷ Topē mŷ pŷn ti.

²⁵ Kŷ Jerusalém tá ū tóg nŷ nŷ, ti jŷy hā vŷ: Simeão, he mŷ. Ūn jykre kuryj vē, Simeão ti. Topē kamēg tóg tŷgtŷ, Topē kuprŷg tŷ tóg jagrē nŷ. Topē tŷ Israel ag krenkren han mŷ ěn jāvānh tóg nŷgtŷ, Simeão ti.

²⁶ Kÿ Topê kuprîg vÿ ti mÿ: “Cristo ve jé ã tóg ke mÿ, ã ter ke to hã, êg Senhor tÿ ti jênên kÿ,” he ja nÿgti ti mÿ.

²⁷ Topê kuprîg tÿ ti krîn kÿ tóg kejên Topê jo ìn kãra tĩ mÿ. Kÿ tóg tá jê nĩ, hã ra fag tóg Jesus ma kãmũ mÿ, fag tÿ Topê mÿ sórãg pũn jé, Moisés tÿ Judeu ag mÿ nèn tó ja ti.

²⁸ Æ tÿ Jesus ve kÿ tóg ti vãg mÿ sir, kÿ tóg ti to Topê mÿ vĩ há han mÿ, Simeão ti.

²⁹ “Êg jóg mág,” he tóg, Topê mÿ. “Vãhã ã tóg inh jé prêr ke mÿ, kÿ sóg jatun mÿ tũg mÿ ha,” he tóg. “Æ tÿ inh mÿ nèn tó jan han ã tóg huri,” he tóg.

³⁰ “Ve inh huri, ã tÿ êg krenkren han ke mÿ ti. Cristo ve inh huri,” he tóg, Simeão ti.

³¹ “Vênh kar rĩnve ã tóg han, ã tÿ êg krenkren han ke mÿ ti.

³² Kÿ tóg êg mÿ jêngre ri ke nĩ, Cristo mur ti. Kÿ povo kar vÿ vég mÿ, fóg ag kar, kanhgág ag kar ke gé, ã tÿ ag krenkren han ke mÿ ti. Êg povo tÿ Israel tÿ ã tóg ùn mág han huri, vênh kar rĩnve, Cristo tÿ êg mré ke nĩn kÿ,” he tóg, Simeão ti, Topê mÿ.

³³ Kÿ Jesus jóg vÿ ti vĩ mēg mÿ, Jesus mÿnh fi ke gé, kÿ tóg fag mÿ e tĩ, ti tÿ Jesus to nèn tó mÿ ên ti.

³⁴ Kÿ Simeão vÿ fag mÿ vênh vĩ há tó mÿ gé. “Topê vÿ ãjag ve há han mÿ,” he tóg mÿ fag mÿ, Simeão ti. Kÿ tóg Maria fi mÿ: “ha vé,” he mÿ. “Israel tÿ hên ri ke ag vÿ ti tugrĩn mÿ há han ke mÿ, jãvo ù tÿ hên ri ke ag vÿ ti tugrĩn mÿ kónãn ke mÿ gé. Kÿ ag tóg ti kato vĩnh ke mÿ gé, Topê tÿ ti jênê ja ra.

³⁵ Kÿ ã tóg ti tugrĩn vêsÿrénh kenh ke mÿ, jÿ, kÿ tóg rógo tÿ ã fe tÿ gynh ke ri ke nĩnh ke mÿ, ã vêsÿrénh ke ti. Kÿ êg tóg venh ke mÿ, ag tÿ nèn to ti to jykrén mÿ ti,” he tóg, Maria fi mÿ, Simeão ti.

³⁶ Kÿ ù fi tóg tá nĩ gé, Topê jo ìn krêm, fi jiji há vÿ: Ana, he mÿ. Topê vĩ tó tĩ fi vê gé. Faniel kósin fi vê. Kÿ fi jóg'jóg ve vÿ tÿ Aser nĩ. Kófa fi nĩ ha, kófa távĩ. Æ mén kÿ fi tóg 7 anos han, fi mén mré, kar tóg ter ja nĩ, fi mén ti, fi mré 7 anos han kar.

³⁷ Kar fi tóg mén tũ tĩ nĩ sir. 84 anos han fi tóg, mén tũ tĩ ki. Ên fi vÿ Topê jo ìn krêm nĩ nĩ, kurã kar ki fi tóg tá nĩ nĩ sir. Tá fi tóg Topê tũ han nÿgti, ti mré vĩ kÿ. Jêg tũ fi nÿgti, fi tÿ Topê mré vĩ jé. Kuty tá fi tóg ke tĩ, kurã tá ke gé.

³⁸ Ên fi vÿ hora ên kã Topê jo ìn krêm jê mÿ, Simeão tÿ Jesus ven kÿ. Kÿ fi tóg Jesus vég mÿ gé sir, Ana fi. Ti ve kÿ fi tóg Topê mÿ vĩ há han mÿ. “Inh mÿ tóg há tĩ, sÿ ti ven kÿ,” he fi tóg mÿ, Topê mÿ. Vênh kar mÿ fi tóg tó mÿ, ùn krenkren sór mÿ ag mÿ, Jerusalém tá.

Fag tÿ Nazaré ra vÿn ke

³⁹ Kÿ fag tóg sir Moisés tÿ vênh kykũnh to nèn rán ja ên han kãn mÿ sir, Jesus mÿnh fi, Topê tÿ Judeu fag mÿ vênh jykre nĩm ja ên ti. Kar kÿ fag tóg sir cidade tÿ Nazaré ra vÿnvÿn ke mÿ, ga tÿ Galiléia ra, fag jamã ra ke vê sir.

⁴⁰ Kÿ gĩr sĩ ên tóg mog mÿ sir, komêr hã tóg tar jê sir. Kÿ tóg vênh kanhrãn há han mÿ, kÿ Topê vÿ ti ve há han mÿ gé, hã kÿ tóg vênh kanhrãn mág mÿ sir, ùn sĩ ên ti.

Jesus tÿ ã pir mÿ Topê jo ìn tá nĩ

⁴¹ Jesus mÿnh fag tóg prÿg kar ki Jerusalém ra mÿ tĩ, fag tÿ festa tÿ Páscoa venh mÿ jé. Fag jykre hã vê.

⁴² Jesus tÿ 12 anos han kÿ tóg fag mré tĩ mÿ gé, fag tÿ festa ên venh mÿn kÿ, Jerusalém ra.

⁴³ Festa tÿ tũ ken kÿ fag tóg vÿnvÿn ke mũ, hã ra Jesus tóg Jerusalém tá nĩ nĩ. Hã ra fag tóg ki kagtĩg nÿtĩ, ti tÿ Jerusalém tá nĩ ên ki.

⁴⁴ Kÿ fag tóg: “ti hÿn ù tÿ êg mré kãmũ mũ fag mré vyr, êg jo,” he mũ. Kÿ fag tóg kurã pir ki mũ mũ, fag jamã ra vÿnvÿn ke kÿ. Fag tÿ ãjag mré ke fag tá junjun kÿ fag tóg ti jãvãnh mũ, ãjag to há kar fag kãmĩ.

⁴⁵ Hã ra fag tóg tá Jesus vég tũ nĩ. Kÿ fag tóg Jerusalém ra vÿnvÿn ke mãn mũ gé, ti jãvãnh jé.

⁴⁶ Vãhã fag tóg ti vég mũ, kurã tãgtũ tũ kÿ. Topê jo Ìn krêm tóg nĩ nĩ, professor ag mré. Ag vĩ mēg tóg nĩ nĩ, kÿ tóg ag ki jēmēg mũ gé, “ne nē?” hen kÿ.

⁴⁷ Û tÿ ti vĩ mēg mũ ag mÿ tóg e tí. To jykrén há han tóg, Jesus ti, kÿ tóg ag mÿ tó há han mũ. Ag tÿ ti vĩ mē kÿ tóg ag mÿ e tí, professor ag mÿ.

⁴⁸ Ti mÿnh fag tÿ ti ve kÿ tóg fag mÿ e tí gé sir. Kÿ ti mÿnh fi tóg ti mÿ: “inh kósin’,” he mũ. “Á tÿ tag kã ne han nĩ nē’? Á jóg mré sóg ã jãvãnh jagy han. Á jãvãnh to êg tóg kanê jur, êg tÿ ã vég tũ nĩn kÿ,” he fi tóg ti mÿ.

⁴⁹ Hã ra tóg fi mÿ: “á tÿ ne jé inh jãvãnh ja nē?” he mũ. “Hẽ ri ken kÿ hÿn’?” he tóg. “Inh panh pē Ìn krêm sóg nĩ nĩ mÿr, kÿn mÿ ãjag mÿ vēnhmÿ?” he tóg, ã mÿnh fag mÿ.

⁵⁰ Hã ra tóg fag tÿ to jykrén tũ tí, fag kósin vĩ to.

⁵¹ Kÿ tóg fag mré tí mũ, cidade tÿ Nazaré ra. Tá tóg fag mré nĩ nĩ sir, ti tÿ fag vĩ jēmēn kÿ. Kÿ ti mÿnh fi pí(jé) vēnh vĩ kar tag kã jatun nĩ’.

⁵² Kÿ Jesus tóg mog mũ sir. Krĩ há tãvĩ tóg nĩ. Topê vÿ ti ve há han mũ gé. Kÿ tóg vēnh kar mÿ há tí sir, ag tÿ ti jykre ven kÿ.

3

João Batista ti

(Mt 3.1-12; Mc 1.1-8; Jo 1.19-28)

¹ Kejēn tóg Tibério tÿ pã'i mág tÿ imperador nĩ kri 15 anos han mũ. Ti tÿ Roma tá tÿ pã'i mág nĩ ên kã Pôncio Pilatos vÿ tÿ ga tÿ Judéia kri pã'i tÿ governador nĩ, Tibério krēm. Ên kã Herodes vÿ tÿ Galiléia kri pã'i tÿ governador nĩ gé, Tibério krēm. Herodes jãvy tÿ Filipe vÿ tÿ ga tÿ Ituréia tá pã'i tÿ governador nĩ gé, ga tÿ Traconites tá ke gé, Tibério krēm. Jãvo Lisânicas vÿ tÿ ga tÿ Abilene tá pã'i tÿ governador nĩ, Tibério krēm.

² Ên kã Caifás vÿ tÿ Topê tũ ki rĩr tí ag pã'i mág nĩ, Anás mré hã. Kÿ vãhã Topê vÿ João mré vĩ mũ sir, Zacarias kósin ên mré. Êmã tũg ja mũ tóg tí mũ, João ti. Kÿ Topê tóg ti mÿ: “ha Israel ag mÿ vēnh ven tũg,” he mũ.

³ Kÿ tóg sir tí mũ. Goj tÿ Jordão jagma tóg tí mũ. Tĩg kÿ tóg vēnh kar jyvēn mũ, kÿ tóg ag mÿ: “á kype jé sóg ke mũ, ã tÿ ã jykre kórég tovãnh sór kÿ, Topê tÿ ã tÿ ti vĩ mranh tÿ ã mÿ vēnh pãte fón jé,” he tóg mũ sir, vēnh kar mÿ.

⁴ João tóg rán kÿ nĩ, vãsÿ. Topê vĩ tó tí tÿ Isaías vÿ João to tag rán ja nĩ, ha mē: “êmã tũg ja tá tóg jēnh ke mũ, ga kórég tá,” he ja tóg nĩ, Isaías ti. “Tá tóg ag mÿ tónh ke mũ. “Êg Senhor kãtĩg ke jo vēnh jãnhkrigkrig nĩ,” he jé tóg ke mũ. “Ëpÿr kurég ãjag tóg tí, êmĩn kuryñh ãjag tóg tí, ãjag chefe jun ken kÿ. Kÿ tag ri ke han nĩ, ãjag jykre pãno togvãnh kÿ, êg Senhor kãtĩg ken jo.

⁵ Ti kãgnó tÿ ãjag tóg kyjer' he tí, kar ãjag tóg Ëpÿr sór kar kũm ke tí gé, êmĩn sór ti. Ti jonjor kugryñh kãn ãjag tóg tí, ti sunsór vãvãm kãn ãjag tóg tí gé, ãjag tÿ Ëpÿr han kÿ, êmĩn han kÿ. Kÿ tag ri ke han nĩ, ãjag jykre kórég to.

⁶ Hã kÿ Ëpÿrã ke kar vÿ venh ke mũ, Topê tÿ êg krenkren han ke ti,” he jé tóg ke mũ, kÿ vēnh kar vÿ ti vĩ mēnh mũ,” he ja tóg nĩ, Isaías ti, João to.

7 Hã kÿ João tóg sir ag jyvĕn mũ sir, ag tÿ ti venh kãmũn kÿ, ti tÿ ag kygpe jé. E tãvi ag nÿtĩ, ù tÿ ti venh kãmũ mũ ag. Ag jyvĕn kÿ tóg ag mÿ: “pÿn ri ke ãjag tóg nÿtĩ, ãjag jykre pãno tãvi nĩn kÿ,” he mũ. “Û nÿ ãjag mÿ: “Topĕ jũ venh ke tũ ãjag nĩ,” he tĩ’?

8 ãjag jykre si togvãnh ra, ãjag tÿ ti jũ ve jãvãnh tĩn kÿ. Vĕnh jykre há han ra, ĕg tÿ ãjag jykre tãg ve jé. Hã ra ãjag tóg jagnĕ mÿ: “Abraão vÿ tÿ ĕg jóg’jóg ve nĩ,” he mũ, “kÿ Topĕ hÿn ĕg to jũnh ke tũ nĩ, ĕg tÿ tÿ Abraão krĕ’krĕ nÿtĩn tugrĩn,” he ãjag tóg tĩ. Hã tũ vĕ hã ra. ãjag jykre kórĕg ĕn to ãjag tóg jagtar ke mũ, ha vemnĩ. Topĕ vÿ Abraão krĕ’krĕ hyn han ki kanhró nĩ, pó tag tÿ mÿ, ti tÿ Abraão krĕ’krĕ ve sór kÿ, Topĕ ti.

9 Hã ra tóg ãjag tÿ tũ’ henh ke mũ, ãjag tÿ ãjag jykre kórĕg to vãnh tũ nĩn kÿ,” he tóg, João ti.

“Ĕg tÿ ka gÿn ri ke tóg nĩ. Ti kanĕn vãnh nĩn kÿ ĕg tóg ti gÿn tĩ, tÿ pĩ han jé. Tag ri ke han jé tóg ke mũ, Topĕ ti, ãjag mÿ, ãjag tÿ vĕnh jykre há han tũ nĩn kÿ. Kÿ tóg pĩ ki ãjag vãm ke mũ, Topĕ ti,” he tóg ag mÿ, João ti.

10 Kÿ ùn e ag tóg ti ki jĕmĕnh kãmũ mũ sir, João ki. Kÿ ag tóg ti mÿ: “kÿ ĕg hÿn hĕ ri kenh mũ ha, Topĕ jykre han jé?” he mũ.

11 Kÿ tóg ag mÿ: “ã kur rĕgre nĩn kÿ ã kur pir nĩmnĩ, ùn kur tũ ĕn mÿ,” he mũ. “ã jĕn tÿ ùn kókĩnkĩr ag mÿ vĕnh kãpópãm nĩ gé,” he tóg.

12 Kÿ ù tÿ governo mÿ imposto kaja mãg tĩ ag vÿ João to kãmũ mũ gé, ti tÿ ag kygpe jé. Kÿ ag tóg ti mÿ: “professor,” he mũ. “Ĕg hÿn hĕ ri kenh mũ?” he ag tóg mũ gé.

13 Kÿ João tóg ag mÿ: “pã’i mág tÿ ãjag mÿ nĕn tó mũ ĕn hã ri ke mãn nĩ, jãnkamy ti,” he mũ. “Ker ti kãfór mãn sór hĕ!” he tóg ag mÿ.

14 Kÿ soldado ag vÿ tá junjun mũ gé. “Kÿ ĕg hÿn hĕ ri kenh mũ?” he ag tóg mũ gé sir, soldado ag. Kÿ tóg ag mÿ: “ag tũ mãn sór tũg nĩ,” he mũ. “Ag to vãsã ãjag tóg tĩ, ù to ón ãjag tóg tĩ gé, ãjag tÿ ag jãnkamy ve jé. Ke tũg nĩ. ãjag rãnrhãj to ãjag tóg jãnkamy vĕg tĩ. Ti kãfór mãn sór tũg nĩ,” he tóg, João ti, soldado ag mÿ.

15 Kÿ vĕnh kar ag tóg ti to jykrĕn mũ, João to. “Ti mÿ tÿ Cristo tũ nĩ vÿ?” he ag tóg mũ sir ti to. João to ag tóg ke mũ, ag tÿ Cristo kãtĩg jãvãnh kÿ.

16 Kÿ João tóg ag mÿ: “inh pi(jé) tÿ Cristo nĩ,” he mũ. “Goj hã tÿ sóg ãjag kygpĕg tĩ. Inh nón tóg kãtĩg mũ, Cristo ti, ha mĕ. Inh kãfór ti nĩ. Sÿ tÿ ti camarada nĩnh ke vĕ vĕ, sÿ ti pĕn né kunũ jé, ti pĕn to ró ti. Hã ra sóg tÿ ti krĕm pĕ jĕ. Ĕn vÿ tóg Topĕ kuprĩg jĕnĕnh ke mũ, ti tÿ tÿ ãjag jagrĕ nĩ jé, kÿ tóg pĩ jĕngrĕ ri ke nĩ. Ti tÿ ãjag kygpenh ken hã vĕ,” he tóg, João ti. mũ, ti tÿ tÿ ãjag jagrĕ nĩ jé, kÿ tóg pĩ jĕngrĕ ri ke nĩ. Ti tÿ ãjag kygpenh ken hã vĕ,” he tóg, João ti.

17 “Ti kãtĩg vÿ tÿ ĕg tÿ rãgró rĕn ri ke nĩ. Ti rĕn kar kÿ ĕg tóg ti fãr vãm tĩ, ĕg tÿ pãjó kuprãg jé. Ti kanĕ há vin han ĕg tóg tũ. Ti fãr pũn ĕg tóg tĩ. Cristo kãtĩg kÿ tóg ri ke nÿ. Û tÿ ã to há ag mÿ tóg: “ha kãmũ jĕg,” henh ke mũ. Û tÿ ã to kórĕg ag vãm jé tóg ke mũ, pĩ ki, hã ra tóg nhyn kenh ke tũ pĕ nĩ,” he tóg, João ti.

18 Hã kÿ tóg vĕnh kar mÿ Topĕ vĩ sér tó mũ, ag jyvĕn kÿ, João ti.

19 Kÿ tóg pã’i mág tÿ Herodes jyvĕn mũ gé, ti prũ fi to, hã vÿ: Herodias fi, he mũ. Tÿ fi ti jãvy prũ ja nĩ, hã ra tóg fi pĕju kÿ fi tÿ prũg mũ, Herodes ti. Nĕn ù vĕnhmÿ e han tóg tĩ, hã kÿ João tóg ti jyvĕn mũ.

²⁰ Kar tóg sir nén ũ věnhmỹ ũ han mǎn mũ gé, Herodes ti. Joã ség tóg mũ, ti tỹ ti jyvĕn to.

*Joã tỹ Jesus kype
(Mt 3.13-17; Mc 1.9-11)*

²¹ Hã ra tóg kãgmĩ kỹ jĕ tũ nĩ ver, Joã ti. Kỹ tóg ag kygpe kãn mũ. Kỹ tóg kejĕn Jesus kypĕg mũ gé. Kỹ Jesus tóg jĕ nĩ, ti tỹ Topĕ mrĕ vĩn kỹ, Joã tỹ ti kype kar kỹ. Kỹ vãhã kanhkã tóg nor' he mũ.

²² Kỹ Topĕ kuprĩg vỹ kanhkã tá kãtĕre mũ, ti kri. Tỹ sórág ve ti nĩ, Topĕ kuprĩg ti. Kỹ kanhkã tá věnh vĩ tóg mĕ há tĩ, kỹ tóg: "tỹ ă inh kósın pir jĕ, tỹ ă tóg inh fe pĕ jĕgtĩ," he mũ, věnh vĩ ti, Topĕ ti.

*Jesus jóg'jóg ve ag
(Mt 1.1-17)*

²³ Jesus vỹ 30 anos han mũ, ti tỹ věnh kar mỹ Topĕ kãmĕn ve kí. "José kósın vĕ," he ag tóg tĩ ti to, hã ra tóg tỹ ti kósın tũ nĩgtĩ. Eli kósın vĕ, Jesus tí, kỹ Eli ĕn vỹ tỹ ti vovó nĩ.

²⁴ Eli vỹ tỹ Matate kósın nĩ. Matate vỹ tỹ Levi kósın nĩ. Levi vỹ tỹ Malqui kósın nĩ. Malqui vỹ tỹ Janai kósın nĩ. Janai vỹ tỹ José kósın nĩ.

²⁵ José vỹ tỹ Matatias kósın nĩ. Matatias vỹ tỹ Amós kósın nĩ. Amós vỹ tỹ Naum kósın nĩ. Naum vỹ tỹ Esli kósın nĩ. Esli vỹ tỹ Nagai kósın nĩ.

²⁶ Nagai vỹ tỹ Maate kósın nĩ. Maate vỹ tỹ Matatias kósın nĩ. Matatias vỹ tỹ Semei kósın nĩ. Semei vỹ tỹ José kósın nĩ. José vỹ tỹ Joda kósın nĩ.

²⁷ Joda vỹ tỹ Joanã kósın nĩ. Joanã vỹ tỹ Resa kósın nĩ. Resa vỹ tỹ Zorobabel kósın nĩ. Zorobabel vỹ tỹ Salatiel kósın nĩ. Salatiel vỹ tỹ Neri kósın nĩ.

²⁸ Neri vỹ tỹ Melqui kósın nĩ. Melqui vỹ tỹ Adi kósın nĩ. Adi vỹ tỹ Cosã kósın nĩ. Cosã vỹ tỹ Elmadão kósın nĩ. Elmadão vỹ tỹ Er kósın nĩ.

²⁹ Er vỹ tỹ Josué kósın nĩ. Josué vỹ tỹ Eliĕzer kósın nĩ. Eliĕzer vỹ tỹ Jorim kósın nĩ. Jorim vỹ tỹ Matate kósın nĩ. Matate vỹ tỹ Levi kósın nĩ.

³⁰ Levi vỹ tỹ Simeão kósın nĩ. Simeão vỹ tỹ Judá kósın nĩ. Judá vỹ tỹ José kósın nĩ. José vỹ tỹ Jonã kósın nĩ. Jonã vỹ tỹ Eliaquim kósın nĩ.

³¹ Eliaquim vỹ tỹ Meleá kósın nĩ. Meleá vỹ tỹ Mena kósın nĩ. Mena vỹ tỹ Matata kósın nĩ. Matata vỹ tỹ Natã kósın nĩ. Natã vỹ tỹ Davi kósın nĩ.

³² Davi vỹ tỹ Jessé kósın nĩ. Jessé vỹ tỹ Obede kósın nĩ. Obede vỹ tỹ Boaz kósın nĩ. Boaz vỹ tỹ Sala kósın nĩ. Sala vỹ tỹ Nassom kósın nĩ.

³³ Nassom vỹ tỹ Aminadabe kósın nĩ. Aminadabe vỹ tỹ Admim kósın nĩ. Admim vỹ tỹ Arni kósın nĩ. Arni vỹ tỹ Esrom kósın nĩ. Esrom vỹ tỹ Peres kósın nĩ. Peres vỹ tỹ Judá kósın nĩ.

³⁴ Judá vỹ tỹ Jacó kósın nĩ. Jacó vỹ tỹ Isaque kósın nĩ. Isaque vỹ tỹ Abraão kósın nĩ. Abraão vỹ tỹ Tera kósın nĩ. Tera vỹ tỹ Nacor kósın nĩ.

³⁵ Nacor vỹ tỹ Seruque kósın nĩ. Seruque vỹ tỹ Ragaú kósın nĩ. Ragaú vỹ tỹ Faleque kósın nĩ. Faleque vỹ tỹ Éber kósın nĩ. Éber vỹ tỹ Sala kósın nĩ.

³⁶ Sala vỹ tỹ Cainã kósın nĩ. Cainã vỹ tỹ Arfaxade kósın nĩ. Arfaxade vỹ tỹ Sem kósın nĩ. Sem vỹ tỹ Noé kósın nĩ. Noé vỹ tỹ Lameque kósın nĩ.

³⁷ Lameque vỹ tỹ Metusalém kósın nĩ. Metusalém vỹ tỹ Enoque kósın nĩ. Enoque vỹ tỹ Jarete kósın nĩ. Jarete vỹ tỹ Maleleel kósın nĩ. Maleleel vỹ tỹ Cainã kósın nĩ.

³⁸ Cainã vỹ tỹ Enos kósın nĩ. Enos vỹ tỹ Sete kósın nĩ. Sete vỹ tỹ Adão kósın nĩ. Adão vỹ tỹ Topĕ tỹ há nĩ. Jesus jóg'jóg ve ag hã vĕ.

4

*Jesus tỳ Topê vỹ mranh tũ
(Mt 4.1-11; Mc 1.12-13)*

¹ KỶ Topê kuprĩg vỹ tỳ Jesus jagrê nĩ. KỶ Jesus vỹ goj tỳ Jordão tá vỹn ke mũ, ã kype kỶ jẽn kỶ. Tĩ tũg kỶ Topê kuprĩg vỹ ti krĩn mũ.

² KỶ tóg ti tỳ ti krĩn kỶ êmã tũg ja ra tĩ mũ sir, ga kórég ra. Tá tóg kurã tỳ 40 (ke) han mũ, êmã tũg ja ki. KỶ Japo vỹ ti tỳ ã jóg vỹ mranh han sór mũ, tá, hã ra Jesus tóg ke tũ nĩ. Êmã tũg ja tá nĩn kỶ tóg jêg tũ nĩ, kurã tỳ 40 ên ki. Kar kỶ tóg sir kókĩr mũ.

³ Tĩ kókĩr nĩn kỶ Japo vỹ ti mỹ vỹ mũ. “Tỳ ã Topê kósĩn nĩ mỹr,” he tóg. “Ã tỳ tỳ Topê kósĩn nĩn kỶ pó tag tỳ êmĩ han nĩ, ã tỳ kon jé,” he tóg ti mỹ, Nén-Kórég ên ti, Jesus mỹ.

⁴ KỶ Jesus tóg ti mỹ: “hã ra tag tóg rán kỶ nĩ, ha mẽ,” he mũ. “Êmĩ tãvĩ jamẽn kỶ êg rĩnrĩr tũ nỹtĩ, Topê vỹ jamẽn kỶ êg rĩnrĩr nỹtĩ. Hã kỶ tóg sỹ ti vỹ mranh jãvãnh tĩ, êmĩ to,” he tóg, Jesus ti, Nén-Kórég ên mỹ.

⁵ KỶ Japo vỹ ti mrê tâpry mũ. KỶ tóg ti mỹ mundo ven kãn mũ, ù tỳ kri ke kar ag ke gé. Ven pĩr ki tóg ti mỹ ven kãn mũ.

⁶ KỶ tóg ti mỹ: “isũ vễ mỹr,” he mũ, Japo ti. “Ã mỹ sóg tovãnh kãn sór mũ, ã tỳ tỳ vẽnhan kar tag ag pã'i jê jé. KỶ ti sĩnvĩ tag kar vỹ tỳ ã tũ nĩnh mũ. Isũ vễ mỹr, ù tỳn han ja ên tỳ inh mỹ: “té,” hen kỶ. KỶ sóg sỹ ùn kuprêg mũ ên mỹ vin tĩ sir.

⁷ ã hã mỹ sóg tovãnh sór mũ ha, ã tỳ inh krêm grĩnhen ken kỶ, ã tỳ iso: “Topê vỹ tỳ ã nĩ,” hen kỶ,” he tóg, Nén-Kórég ti, Jesus mỹ.

⁸ KỶ Jesus tóg ti mỹ: “tag vỹ rán kỶ nĩ, ha mẽ,” he mũ. “Êg pã'i tỳ Topê hã krêm êg tóg êg jakrĩ tỳ kry' he tĩ, ti hã to êg tóg: Topê vễ, he tĩ,” he tóg, Topê vỹ tỳ rán kỶ nĩn ki. Hã kỶ sóg mranh jãvãnh nĩ,” he tóg, Jesus ti, Nén-Kórég mỹ.

⁹ KỶ Japo tóg ti mrê tũg mãn mũ, cidade tỳ Jerusalem ra. Tá tóg ti mỹ: “Topê jo ãn kri jẽmnĩ, ti krĩ kri,” he mũ. KỶ tóg ke mũ. Hã ra kãgnó tóg tá nĩ, Topê jo ãn jo. Japo tóg Jesus mỹ: “Topê kósĩn vỹ tỳ ã nĩ,” he mũ. “KỶ hũm hemnĩ.

¹⁰ Tag vỹ rán kỶ nĩ, ha mẽ: “ã tỳ jẽnê jafã ag mỹ tóg tónh mũ, Topê ti, kỶ ag tóg ã ki rĩr ke mũ.

¹¹ ã jag nĩgê tỳ ag tóg ã vyn ke mũ, kỶ ã tóg rỹj ke tũ nĩ. ã pẽn vỹ rỹj ke tũ nĩ gé, hã jé ag tóg ã ki rĩr ke mũ,” he tóg, Topê vỹ tỳ rán kỶ nĩ ên ki. KỶ jatun mỹ hũm nĩ,” he tóg, Nén-Kórég ti, Jesus mỹ.

¹² KỶ Jesus vỹ ti mỹ ke mũ gé. “KỶ tag vỹ rán kỶ nĩ gé, ha mẽ,” he tóg. “Topê mỹ: ã mỹ ã tỳ nén tó ja ên han mũ vỹ? he tũg nĩ,” he tóg mũ gé, Topê vỹ tỳ rán kỶ nĩ ên ki. Hã kỶ sóg Topê hã tỳ inh mỹ nén tó mũ ên han ke mũ, kỶ sóg hũm ke tũ nĩ, ti tỳ inh mỹ tó tũ nĩn kỶ,” he tóg, Jesus ti, Nén-Kórég mỹ.

¹³ KỶ Japo vỹ ã tỳ nén tónh ke ên tó kãn ja nĩ, hã kỶ tóg Jesus tovãnh mũ ver, ti tỳ kurã ù kã ti mrê vỹ mãn jé, kejẽn, ti tỳ ti mỹ há tĩ ve nĩn kỶ, Japo mỹ.

*Jesus tỳ Galiléia tá ag kanhrãn
(Mt 4.12-17; Mc 1.14-15)*

¹⁴ KỶ Jesus tóg ti mũ sir, Topê kuprĩg tỳ ti krĩn kỶ. Ga tỳ Galiléia ra tóg tĩ mũ. KỶ vẽnhan kar ti kãmê mẽ kãn mũ sir, ga ên tá ke kar ag.

¹⁵ KỶ tóg ag kanhrãn mũ sir, Jesus ti, ag vẽnhan kanhrãn jafã krêm. Krêm ag tóg Topê vỹ tó tĩ, Judeu ag. Jesus tỳ ag kanhrãn kỶ tóg ag mỹ e tĩ, ti vỹ ti. Hã kỶ ag tóg ti to vỹ há han mũ sir.

*Jesus tŷ Nazaré ra vŷn ke
(Mt 13.53-58; Mc 6.1-6)*

16 Kŷ Jesus tóg Nazaré tá jun mũ gé, ã jamã tá. Tá tóg mog ja nĩ, cidade tŷ Nazaré tá. Kŷ tóg ã tŷ nén han tí ên han mũ. Ag vènh kanhrân jafã ra tóg tí mũ, vènh kán ke kurã ki. Tá tóg sir jègnê mũ, culto ki, ag vènh mãn kŷ nŷtĩ ên ki. Ti tŷ Topê vĩ to ke sór vê, hã kŷ tóg jègnê mũ, Jesus ti.

17 Ti jê kŷ ag tóg ti mũ livro nĩm mũ, Isaías tŷ rán ja ên ti, vãsŷ Topê vĩ to tí tŷ rán ja ên ti. Kŷ tóg livro tŷ vym ke mũ. Kŷ tóg ã tŷ to ke sór mũ ên vég mũ, Isaías tŷ tó ja ti, ha mẽ.

18 “Topê kuprĩg vŷ inh krĩn mũ,” he tóg. “Inh jagrê vê mŷr, hã kŷ tóg inh krĩn mũ. “Ûn jagãgtar ag mŷ inh vĩ tómmĩ,” he tóg inh mŷ. Inh jènêg tóg mũ, isŷ ùn sigse kŷ nŷtĩ ag kygvãn jé, isŷ ùn kyvó ag tŷ êvãnh (há) han jé, isŷ ag tŷ ùn vóg kónãn mũ ag ki rĩr há han jé, ag jatu nŷtĩ jé,

19 isŷ vènh kar mŷ: “Ûri êg jóg mág vŷ êg kren han sór mũ,” he jé,” he tóg, Isaías ti, vènh rá ki. Hã to ke tóg mũ, Jesus ti.

20 Tag to ke kar kŷ tóg livro ên kri tŷ tam ke mãn mũ. Livro ki rĩr tí ên mũ tóg jun mũ, livro ti. Kŷ tóg nĩ mũ sir.

Hã ra vènh kar ag tóg ti ki êvãnh mũ.

21 Kŷ tóg ag mŷ kãmén mũ, kŷ tóg: “vãsŷ rán kŷ nĩ ja tag mẽ ãjag tóg,” he mũ. “Ûri ke vê, ùri ãjag tóg vég mũ, vãsŷ rán kŷ nĩ ja ên ti,” he tóg. “Inh hã to tóg tag tó ja nĩ, Isaías ti,” he tóg, Jesus ti.

22 Ag tŷ ti vĩ mẽ kŷ tóg ag mŷ e tí sir. “Ki hã tóg tó mũ, hã kŷ tóg êg mŷ e tí,” he ag tóg mũ. Kŷ ag tóg ti to vĩ mũ gé. “José kósin vê mŷr, êg mré ke ên, hã ra tóg êg vĩ kãfór han sór mũ,” he ag tóg mũ ti to.

23 Kŷ Jesus tóg ag mŷ: “ãjag hŷn iso jykrén sór mũ,” he mũ. “Médico mŷ êg tóg: “kur vêsŷ há’ hé, ã tŷ tŷ médico nĩ sór nĩn kŷ,” he tí. ãjag hŷn tag tó sór mũ inh mŷ. ãjag hŷn inh mŷ: “cidade tŷ Cafarnaum tá ã tóg ag tŷ há’ hé, ùn kagyga ag tŷ, kŷ kur tag ki êg tŷ há’ hemnĩ gé, ã jamã tag ki, ã tŷ vènh kar tŷ há’ he sór nĩn kŷ,” he sór ãjag hŷn mũ inh mŷ,” he tóg, Jesus ti.

24 Kŷ tóg ag mŷ: “ti jamã tá ke ag ne tóg Topê vĩ to tí ên to é he tí,” he mũ. “Ti tŷ ke há vê. Hã kŷ ãjag tóg iso é he tí,” he tóg ag mŷ, Jesus ti.

25-26 “Ha mẽ, sŷ nén tó mũ ti. Elias to jykrén nĩ. Ti tŷ ga kri tí mũ kŷ tóg ta kutê vãnh han ja nĩgtĩ, prŷg tâgtũ kri kysã tŷ 6 (ke) ki. Kŷ tóg prŷg tí sir, ga ên mĩ, vèjên tóg tũ’ he mũ sir. Kŷ Topê tóg Elias mŷ tó, ti tŷ cidade tŷ Sarepta ra tŷg jé, cidade tŷ Sidom kakó ra. Tá fóg fi tóg nĩ nĩ, ùn mén ter ja fi. Fi mré tóg jêg tí sir, Elias ti, fi tŷ ti mŷ vèjên tŷ vènh kãpãm kŷ, prŷg ra. Topê pi(jé) Israel fi to ti jènê ja nĩgtĩ’. Ti pi(jé) ti jamã ra ti jènê ja nĩgtĩ’. Tá fag tóg e nŷtĩ ja nĩgtĩ gé, ùn mén ter ja fag. Hã ra Topê tóg fóg ên fi to ti jènê ja nĩgtĩ, fi tŷ ti ki rĩr jé,” he tóg, Jesus ti.

27 “Kŷ Eliseu to jykrén nĩ gé, vãsŷ Topê vĩ to tí ên to. Ti tŷ ga kri tí nĩn kŷ ùn kagyga ag tóg e ja nŷtĩgtĩ gé, êg povo tŷ Israel kãmĩ, vènh kaga kren vãnh han mũ ag, vènh kaga tŷ lepra han mũ ag. Hã ra ag tóg ti mũ to vĩ ja tũ nĩgtĩ, ti tŷ ag tŷ há’ hen jé. Kuvar há tá tóg kãtig ja nĩgtĩ, fóg ti, Naamã ti, ga tŷ Síria tá ke ên ti. Kŷ ti hã ne tóg Eliseu mŷ to vĩn kŷ há’ he mũ sir inhã. Ti kaga kren vãnh ên tóg tũ’ he mũ sir. Ge ãjag tóg nĩgtĩ iso. Kuvar há tá ke fag vŷ inh ki ge tí, jãvo ãjag tóg inh ki ge jãvãnh nŷtĩ, ãjag tŷ tŷ inh jamã tá ke nŷtĩ ra,” he tóg ag mŷ, Jesus ti.

²⁸ Kĩ ù tỹ ti vĩ mẽg mũ ag fe tóg gỹm ke mũ sir, Jesus to, ù tỹ vãnh kanhrăn jafã ên krêm nỹtĩ ag.

²⁹ Jẽgiẽg nẽgnẽ ag tóg mũ sir. Kãpa ag tóg mũ sir. Ti vóg ag tóg mũ sir, pãnónh ra. Nazaré vỹ pãnónh tá nĩ, ag jamã ti. Pãnónh ên to jãpry kỹ ag tóg tá ti kutêm sór mũ, kãgnó ki ti ter jé.

³⁰ Hã ra Jesus tóg ag rế kỹ tỉ mũ, ag jãmĩ. Ti tỹ hẽ ri ke tũ ag tóg nĩ sir, kỹ tóg ag fĩn rãm kỹ ag rế kỹ tỉ mũ.

Hã ra ag tóg tỉ vĩ kri fi jãvãnh nỹtĩ, ti jamã tá ke ag.

Jesus tỹ vãnh jagrẽ kórég kutêm
(Mc 1.21-28)

³¹ Kỹ Jesus tóg cidade tỹ Cafarnaum ra tỉ mũ. Ga tỹ Galilêia tá ti nĩ, Cafarnaum ti. Tá jun kỹ tóg ag kanhrăn mũ, vãnh kán ke kurã ki.

³² Kỹ tóg ag mỹ e tí, ag tỹ ti vĩ mẽn kỹ. Ti vĩ vỹ vãnh kar vĩ kãfór nĩ, hã kỹ tóg ag mỹ e tí.

³³ Kỹ vãnh kanhrăn jafã ên krêm ù tóg nĩ nĩ. Jagrẽ kórég ti nĩ. Kỹ tóg prẽr mũ, kỹ tóg:

³⁴ “ha mẽ, ã tỹ ẽg tỹ hẽ ri kenh ke nẽ, Nazaré tá Jesus?” he mũ. “Ã mỹ ẽg tũg sór mũ?” he tóg. “Ã ki kanhró sóg nĩ. Tỹ ã tóg ã pir mỹ Topẽ mré ke nĩ, ti tũ pẽ vỹ tỹ ã nĩ,” he tóg, ùn jagrẽ kórég ti.

³⁵ Hã ra Jesus tóg tỉ mỹ vĩ tar han mũ, kỹ tóg: “vĩ tũg ra,” he mũ. “Ti tovãnh ra,” he tóg. Kỹ ti jagrẽ kórég ên tóg ti ter tỉ han mũ, vãnh kar rĩave, kỹ tóg tỉ ki kutê mũ sir. Ti kókég tũ tóg nĩ, ti jagrẽ kórég ti.

³⁶ Kỹ tóg vãnh kar mỹ e pẽ tãvĩ tỉ sir. Jagnẽ mỹ ag tóg: “ne nẽ hỹn vé?” he mũ. “Vãnh jagrẽ kórég ag mỹ tóg vĩ tỉ, Jesus ti, kỹ ag tóg sir ki króm tỉ, ti vĩ ki, ti kamẽg kỹ, ti tỹ ag pan kỹ. Ti hỹn tỹ ag kri ke nĩ,” he ag tóg mũ sir, Jesus to.

³⁷ Kỹ ti kãme tóg vãnh kar kri rũm ke kãn mũ sir, ga ên tá.

Jesus tỹ ùn kagyga e ag tỹ há' he
(Mt 8.14-17; Mc 1.29-34)

³⁸ Kỹ Jesus tóg vãnh kanhrăn jafã ên ki kutê kỹ Simão ãn ra tỉ mũ. Hã ra Simão prũ fi mỹnh fi tóg kaga nỹ nĩ. Rỹ jagy fi nỹ nĩ. Kỹ ag tóg Jesus mỹ fi tóg mũ.

³⁹ Kỹ tóg fi vãnh tỉ mũ. Fi krĩ tá jẽ kỹ tóg fi mỹ: “rỹg mãn tũg nĩ,” he mũ. Kỹ fi rỹ ên tóg tũ' he mũ sir. Kỹ fi tóg vễsỹmér nĩ nĩ. Ag ki rĩr fi tóg mũ sir, Simão má fi.

⁴⁰ Kỹ tóg sir kutyg mũ, rã tỹ pun ke kỹ. Kỹ ag tóg ùn kagyga ag tatĩn kãmũ kãn mũ. Kỹ tóg ã nĩgẽ tỹ ag mẽ kãn mũ, Jesus ti, kỹ ag tóg hághá' he kãn mũ.

⁴¹ Vãnh jagrẽ kórég pan kãn tóg mũ gé, ag to jũ kỹ. Ag panh ke to hã ag tóg prẽr mũ, kỹ ag tóg: “Topẽ kósin vỹ tỹ ã nĩ,” he tỉ. Hã ra tóg ag mỹ: “vĩ tũg ra,” he mũ. Ti ki kanhró ag tóg nỹtĩ, ti tỹ tỹ Cristo nĩ ti. Hã kỹ tóg ag mỹ: “vĩ tũg ra,” he mũ, Jesus ti.

Jesus tỹ Topẽ vĩ tó
(Mc 1.35-39)

⁴² Tỹ vaj kỹ Jesus tóg tá kutê kỹ ẽmã tũg ja ra tỉ mũ. Kỹ vãnh kar ag tóg tỉ jãvãnh kãn mũ. Hã ra ag tóg tỉ vég mũ. Ti ve kỹ ag tóg tỉ mỹ: “ẽg rế kỹ tỉ tũg nĩ,” he mũ.

⁴³ Hã ra tóg ag mỹ: “vó,” he mũ. “Cidade ù ra sóg tĩg mũ, sỹ ag mỹ Topẽ vĩ tó jé gé, Topẽ tỹ tỹ ẽg pã'i nĩnh ke ti. Hã jé Topẽ tóg inh mỹ: “ha ag mỹ vãnh ven,” he ja nĩ,” he tóg ag mỹ, Jesus ti.

44 Kÿ tóg tĩ mũ sir. Ga tÿ Judéia mũ tóg tĩ mũ. Vênh kanhrân jafã krêm tóg ag mÿ Topê vĩ tó tĩ mũ sir, Jesus ti.

5

Jesus tÿ Pedro kanhrân (Mt 4.18-22; Mc 1.16-20)

1 Kejên Jesus tóg goj nig tÿ Genesaré fyr tá jê nĩ, Topê vĩ kãmén kÿ. Kÿ vênh kar vÿ ti pênĩn nÿtĩ nĩ, kÿ ag tóg ti kutân mũ sir, ag e tâvĩ nÿtĩn kÿ, ag tÿ Topê vĩ mẽ sór kÿ.

2 Ag tÿ ti kutân kÿ tóg canoa régre vigvég mũ, nig fyr tá. Pirã kugmĩg tĩ ag vÿ tá kãpa kÿ nÿtĩ nĩ. Goj kãki jêgĩg kÿ ag tóg pirã kugmĩ jafã kunũnh kÿ kupég nÿtĩ nĩ.

3 Kÿ Jesus tóg canoa kãra rã mũ. Simão tũ vê, canoa ên ti. Kÿ tóg Simão mÿ: “tĩg sĩ han ra, canoa kãmĩ, goj kuju ra,” he mũ. Kÿ Simão tóg tĩ mũ. Hã ra Jesus tóg canoa kãkã nĩ nĩ, ti mré. Kãkã nĩ kÿ tóg ag kanhrân mũ sir, vênh kar ên ag, ù tÿ ti kutân ja ên ag. Goj fyr tá ag tóg nÿtĩ.

4 Ti tÿ ag kanhrân kãn kÿ tóg Simão mÿ: “goj kuju ra tĩg, ti nig ja ra,” he mũ. “Tã ã rede tÿ goj kãki fón, ã tÿ pirã kugmĩ jé,” he tóg.

5 Kÿ Simão tóg êg Senhor mÿ: “hã ra êg tóg kuty tag kã goj ki ti fón', fón' he ja nigti, fagrĩnh mÿ,” he mũ. “Nén ù kãgmĩg tũ êg tóg nĩ mÿ,” he tóg. “Hã ra sóg ã vĩ tugrĩn ki fón sór mũ ha,” he tóg, Simão ti.

6 Kÿ tóg ke mũ sir. Kÿ tóg kugmĩ mág mũ. Fór tóg nĩ, rede ti, kÿ tóg jaran ke mũ, ti kufy jagy tâvĩ nĩn kÿ, pirã e tugnĩn.

7 Kÿ ag tóg ãjag régre ag mÿ ven mũ, ag tÿ canoa ù kãki kãmũ jé. Ag tÿ tá junjun kÿ ag tóg canoa régre ên fãn mũ, pirã tÿ. Funfór ti nÿtĩ, hã kÿ tóg ki punpun ke kren mũ sir, canoa régre ên ti.

8 Kÿ Simão tóg Jesus krêm grĩnh ke mũ. Ti mÿ tóg e tĩ, pirã e ên to, kÿ tóg Jesus krêm grĩnh ke mũ. Kÿ tóg ti mÿ: “Senhor’,” he mũ. “Ã hÿn inh ré kÿ tĩg mũ ha. Topê vĩ mranh ja inh nigti, kÿ inh hÿn ã mÿ kórég nĩ ha,” he tóg, Simão ti, Jesus mÿ.

9 Ti mÿ tóg e pẽ tâvĩ tĩ, ti tÿ pirã e ên ven kÿ, ti tÿ Jesus jykre ven kÿ. Ti mré ke ag mÿ tóg e tĩ gé,

10 Tiago mÿ ke gé, João mÿ ke gé, Zebedeu krê tag ag mÿ. Simão régre ag vê, Zebedeu krê tag ag, ti companheiro ag vê.

Kÿ Simão tóg Jesus mÿ: “ã hÿn inh ré kÿ tĩg mũ ha,” he mũ. Hã ra Jesus tóg ti mÿ: “kamêg tũg nĩ,” he mũ. “Pirã kugmĩ há ã tóg jê. Á kanhrân jé sóg ke mũ, ã tÿ êprã ke ag tÿ inh ki ge han jé,” he tóg, Simão mÿ, Jesus ti.

11 Kÿ ag tóg ãjag canoa vóg mũ, goj fyr ra. Tá junjun kÿ ag tóg ãjag tũ kar ré kÿ mũ mũ sir, Jesus mré.

Jesus tÿ ùn kaga kren vãnħ tÿ há' he (Mt 8.1-4; Mc 1.40-45)

12 Kÿ tóg kejên cidade ù tá nĩ nĩ. Kÿ ù tóg ti tá jun mũ, ù tÿ vênh kaga kren vãnħ han kÿ nĩ ti, vênh kaga tÿ lepra he mũ ên. Ti kri tóg rũm ke kãn ja nĩ, vênh kaga ti. Ên tóg Jesus tá jun kÿ ti krêm mũg ke mũ, kÿ tóg ti mÿ: “Senhor’,” he mũ. “Ã mÿ isÿ há' he sór tũ nĩ?” he tóg. “Ã hã tóg isÿ há' henħ mũ, ã tÿ isÿ há' he sór kÿ,” he tóg ti mÿ.

¹³ Kŷ Jesus tóg ã nĭgĕ tŷ ti mĕg mŷ, kŷ tóg ti mŷ: “hej,” he mŷ. “To sóg há nĭ, há’ he ja há ã tóg nĭ,” he tóg ti mŷ. Kŷ tóg ti kaga kren vānh tŷ há’ he mŷ sir vĕsŷmĕr. Jānhkri’ he tóg mŷ, ti fār ti.

¹⁴ Kŷ Jesus tóg ti mŷ ke mŷ, ti tŷ ũ mŷ tó tŷg jĕ, ti tŷ há’ he tag ti. “Ha tŷg,” he tóg. “Topĕ tŷ ki rĭr tĭ to tŷg. Ti hā mŷ tómnĭ, kŷ ti mŷ nĕn ũ nĭm nĭ, ti tŷ Topĕ mŷ pŷn jĕ, Moĭsĕs tŷ vāsŷ ĕg mŷ nĕn tó ja ĕn ti, ã jānhkri to. Hā tŷgrĭn vĕnh kar vŷ ã tŷ há’ he mŷ tag ki kanhrān mŷ,” he tóg ti mŷ, Jesus ti.

¹⁵ Ge ra ti kāme tóg vĕnh kar kri rŷm ke mŷ, kŷ ũ tŷ hĕn ri ke ag tóg vĕnh mān mŷ sir. Ag tŷ ti vĭ mĕ sór vĕ, ag tŷ ājag tŷ há’ he ĕn ve sór vĕ gé. Hā jĕ ag tóg sir vĕnh mān mŷ.

¹⁶ Hā ra Jesus tóg ĕmā tŷg ja ra tĭ mŷ, Topĕ mrĕ vĕmĕn jĕ.

Jesus tŷ ũn tŷg vānh tŷ há’ he

(Mt 9.1-8; Mc 2.1-12)

¹⁷ Kejĕn tóg ag kanhrānrān mān mŷ. Kŷ Fariseu ũ ag tóg ti vĭ mĕgmĕg mŷ gé sir, Topĕ vĭ to professor ag mrĕ hā. Kór há tá ag tóg kāmŷ ja nĭ, ga tŷ Galilĕia tá, ga tŷ Judĕia tá ke gé, cidade tŷ Jerusalĕm tá ke gé. Jesus pĕnĭn ag tóg nĭgnĭ kŷ nŷtĭ nĭ. Hā ra Topĕ tóg ti tar han ja nĭ, hā kŷ tóg ũ tŷ hĕn ri ke ag tŷ há’ he mŷ, ũn kagyga ag tŷ, Jesus ti.

¹⁸ Kŷ vāhā ũ ag tóg tá junjun mŷ gé. Ũ va ag tóg kāmŷ jĕg, kur kā, ũn kānhgrĭ, ũn kónhgrĭ. Ag tŷ Jesus mŷ ti ven sór vĕ, ag tŷ ti krĕm ti fi sór vĕ.

¹⁹ Hā ra tóg fór tāvĭ nĭ, tá, kŷ ag tóg ti tá junjun tŷ nĭ sir, Jesus tá. Kŷ ag tóg ĩn to jāpŷrŷ kŷ ti kri ĩn kunŷg mŷ. Tĭ nor ĕn kĭ ag tóg ti tĕrem mŷ, Jesus jĕ ĕn kukām.

²⁰ Kŷ Jesus tóg ag tŷ ti ki ge kŷ nŷtĭ tag vĕg mŷ. Hā kŷ tóg ũn kānhgrĭ mŷ: “ã tŷ Topĕ vĭ mranh ja ĕn tŷ tŷ’ he vĕ ha, vŷ,” he mŷ.

²¹ Hā ra ti vĭ tag tóg Topĕ vĭ to professor ag mŷ ĕ tĭ, Fariseu ag mŷ ke gé. Kŷ ag tóg ti vĭ tag to jykrĕn kónān mŷ. “Tĭ tŷ ne tó nĕ hŷn’?” he ag tóg mŷ. “Topĕ to vĭ kónān vĕ mŷr, ti vĭ tag to,” he ag tóg. “Topĕ hā ne ã pin kŷ Topĕ vĭ mranh ĕn tŷ tŷg’ he há nĭnh mŷ’, kŷ ti tŷ vĕsŷ tŷ Topĕ han vĕ sir, ti mŷ vĕnh pāte fón sór kŷ,” he ag tóg mŷ, to jykrĕn kónān kŷ.

²² Hā ra Jesus tóg ag tŷ nĕn to jykrĕn mŷ vĕg mŷ. Kŷ tóg ag mŷ: “ājag tŷ ne jĕ to jykrĕn kónān nĕ?” he mŷ.

²³ “Ne nŷ ājag mŷ vĕnhmŷ nŷ?” he tóg. “Ũn tŷg vānh mŷ sóg: “ã tŷ Topĕ vĭ mranh ja ĕn tŷ tŷ’ he vĕ ha,” hé. Kŷn mŷ ājag mŷ vĕnhmŷ?” he tóg. “Sŷ ti mŷ: “nĭ ra, tŷg ra,” hĕnh ke vĕ gé. Kŷn mŷ ājag mŷ vĕnhmŷ ke gé?” he tóg, tag to.

²⁴ “Hā ra sŷ ājag mŷ ĩnh jykrĕ ven sór vĕ ha. Tŷ sóg ĕprā ke fi kósĭn nĭ. Tá sóg krŷg ke mŷ, Topĕ vĭ mranh tŷ vĕnh pāte fón ke tá. Sŷ tá krŷg mŷ ven jĕ sóg ke mŷ ājag mŷ,” he tóg. Hā kŷ tóg ũn kónhgrĭ mŷ: “nĭ ra, ã kur gég tŷg, ã ĩn ra,” he mŷ, Jesus ti.

²⁵ Kŷ tóg vĕsŷmĕr jĕgnĕ mŷ sir. Ā kur gég tóg mŷ vāhā, ag rĭnve. Ā ĩn ra tóg tĭ mŷ, Topĕ mŷ vĭ há han kŷ, ũn kānhgrĭ ja ĕn ti.

²⁶ Kŷ tóg vĕnh kar mŷ ĕ tāvĭ tĭ. Topĕ mŷ ag tóg vĭ há han mŷ gé, ti to: “ĕg káfór ti nĭ,” hĕn kŷ. “Ge ve ja tŷ ĕg nŷtĭ, kŷ ĕg tŷ ne to jykrĕn ke tóg tŷ tĭ,” he ag tóg mŷ sir, Jesus tŷ ũn kānhgrĭ ja ĕn tŷ há’ hĕn kŷ.

Jesus tŷ Levi jĕ prĕ

(Mt 9.9-13; Mc 2.13-17)

²⁷ Kar kŷ Jesus tóg tġg mǎn mŷ. Kŷ tóg ũ tŷ governo mŷ jǎnkamy mǎg tġ ũ vĕg mŷ, imposto mǎg tġ ěn ti. Ti jġġin hǎ vŷ: Levi, he mŷ. Ā rǎnhrǎj han kŷ tóg nġ nġ, ti rǎnhrǎj jafǎ krĕm, Jesus tŷ ti ve kŷ. Kŷ tóg ti mŷ: "inh mré kǎtġg," he mŷ.

²⁸ Kŷ tóg jĕgnĕ mŷ sir. Ti mré tóg tġ mŷ sir, ā tŷ kar ré kŷ.

²⁹ Kŷ Levi tóg ti mŷ festa mǎg han mŷ, ti ĩn tá. Kŷ ti tŷ festa to ũn jĕ prĕr mŷ ag vŷ tŷ ũ tŷ hĕn ri ke nŷtġ, festa venh kǎmŷ mŷ ěn ag. Governo mŷ jǎnkamy mǎg tġ ũ ag vĕ, ag mré ke ũ ag mré hǎ. Jesus mré ag tóg jĕg mŷ.

³⁰ Kŷ Fariseu ag tóg vĕg mŷ, Topĕ vġ to professor ag ke gé, kŷ tóg ag mŷ kórĕg tġ. Kŷ ag tóg ũ tŷ Jesus mré mŷ tġ ag to vġ mŷ gé. Ag mŷ ag tóg: "ǎjag hǎ ne tóg governo mŷ jǎnkamy mǎg tġ ag mré jĕg mŷ," he mŷ. "Topĕ vġ mranh tġ ag mré ǎjag tóg jĕg mŷ," he ag tóg, ũ tŷ Jesus mré mŷ tġ ag mŷ.

³¹ Hǎ ra Jesus tóg ag mŷ kǎmĕn mŷ. "Hŷ, ag mré sóg jĕg mŷ," he tóg. "Hǎ ra ũn kagyga tŷ ag vŷ mĕdico venh mŷ tŷ nġgtġ," he tóg mŷ. "Ũn kagyga ag hǎ vŷ ti venh mŷ tġ," he tóg.

³² "Inh pi(jĕ) ũ tŷ vĕnh jykre kuryj han mŷ ag mŷ: "ǎjag jykre tovǎnh ra," he sór tġ. Ũ tŷ Topĕ vġ mranh ja ěn ag hǎ mŷ sóg: "ǎjag jykre kórĕg tovǎnh ra," he sór tġ. Hǎ jĕ sóg ǎjag mŷ vĕnh ven," he tóg, Jesus ti.

Vǎkre

(Mt 9.14-17; Mc 2.18-22)

³³ Kŷ Fariseu ag tóg ti mŷ ke mǎn mŷ. "Joǎo mré mŷ tġ ag vŷ vǎkre (ka)mĕ nŷtġgtġ, vĕjĕn ki, kŷ ag tóg Topĕ mré vġ (ka)mĕ han tġ gé, ag vǎkre kŷ. Kŷ Fariseu mré ke ag tóg ge nŷtġgtġ gé. Hǎ ra ā mré mŷ tġ ag tóg ge tŷ nŷtġ. Jĕg ag tóg mŷgtġ, kurǎ kar ki. Vǎkre vǎnh ag nŷtġ, ĕg vǎkre kurǎ ki," he ag tóg mŷ sir, Jesus mŷ.

³⁴ Kŷ tóg ag mŷ: "hŷ," he mŷ. "Hǎ ra vĕnh prŷg tŷ festa to kǎmŷ ag pi(jĕ) vǎkrĕg tġ," he tóg. "Festa vĕ mŷr, vĕnh prŷg tġ, kŷ ti mré ke ag tóg ũn prŷg mŷ ěn venh kǎmŷ tġ. Hǎ ra sóg tŷ ũn prŷg mŷ ěn ri ke nġ, hǎ kŷ tóg inh mré mŷ tġ ag mŷ sér tġ," he tóg.

³⁵ "Vǎhǎ tóg jun mŷ, inh kurǎ ti. ěn kǎ ag tóg inh pĕre mŷnh mŷ. ěn kǎ hǎ ag tóg ǎjag vǎkrenh ke venh mŷ, kurǎ ěn kǎ, inh mré mŷ tġ ag," he tóg, Jesus ti.

³⁶ Kŷ tóg ag mŷ comparaçǎo han mŷ, kŷ tóg: "inh jykre tǎg vŷ ge nŷnh mŷ," he mŷ. "ĕg pi(jĕ) ĕg kur tǎg kókĕg tġ, ĕg tŷ ĕg kur si jar kǎ nġm jĕ," he tóg. "Ke tŷ nġ mŷ ra ĕg tóg ĕg kur hǎ ěn kókĕg mŷ, hǎ ra tóg ĕg kur si ěn ki par tŷ nġgtġ gé, ũn hǎ ti. Kŷ ĕg kur tóg kórĕg kar nŷtġ nġ sir," he tóg. Ti tŷ ā jykre tǎg tó vĕ, hǎ ra tóg kur tǎg ri ke nġ.

³⁷ Kŷ tóg ag mŷ: "vinho vŷ ge nġgtġ gé," he mŷ gé. "ĕg pi(jĕ) vinho kajǎg mŷ tŷ ti fǎr si tŷ saco ki kujĕg tġ, vinho tǎg ěn ti'. Ke tŷ nġ mŷ ra tóg kunǎnh kŷ jar mŷ. Kŷ vinho ěn tóg tŷ tġ he mŷ, bolsa ke gé sir.

³⁸ Vinho kajǎg mŷ tŷ ti fǎr tǎg tŷ bolsa ki kujĕn ke vĕ mŷr," he tóg. Ti tŷ ā jykre tǎg tó vĕ, hǎ ra tóg vinho kajǎg mŷ ri ke nġ.

³⁹ Kŷ tóg ag mŷ: "ĕg pi(jĕ) vinho si kron kŷ ũn kajǎg kron sór tġ, ũn tǎg ěn ti'," he mŷ gé. "Ti si hǎ tóg ĕg mŷ hǎ nġ," he ĕg tóg tġ," he tóg, Jesus ti. Ti tŷ ā jykre tǎg tó vĕ, hǎ ra ag jykre si tóg ag mŷ hǎ tġ, ũ tŷ ti vġ mĕg mŷ ag mŷ.

6

Vĕnhkǎn ke kurǎ ki vĕnh jykre
(Mt 12.1-8; Mc 2.23-28)

¹ Kejëñ tóg vènhkán ke kurá tá krÿg mũ. Kÿ Jesus tóg ãpÿ mũ tí mũ, trigo jo ãpÿ mũ. Ti mré mũ tí ag tóg ti mré mũ mũ. Hã ra ag tóg sir trigo mó ãn tÿ kam ke mũ sir. Ajag nĩgê tÿ ag tóg rynhranh mũ, ag tÿ ti kanê ko jé.

² Hã ra Fariseu ù ag tóg ag vég mũ. Ag mũ vènh rãnrãj vè, ag tÿ trigo rynhranh mũ ti. Hã ki ag tóg ag mũ Topê vĩ mranh mũ, ag tÿ vènhkán ke kurá ki rãnrãj kÿ. Hã kÿ ag tóg ag mũ: “ãjag ne tóg nén han ke tũ han mũ nĩ, vènhkán ke kurá ki,” he mũ. “Vènh rãnrãj vè mÿr’, ajag tÿ nén han mũ ti,” he ag tóg, Jesus mré mũ tí ag mũ.

³ Hã ra Jesus tóg ag mũ: “vó,” he mũ. “Ag kókĩkĩr vè mÿr,” he tóg. “Davi to jykrén nĩ, ti mré mũ tí ag to ke gé. Ti kókĩr kÿ tóg ã tÿ nén han ke tũ han gé, hã ra Topê pí(jé) ti to jũ mũ,” he tóg.

⁴ “Topê jo ãn kã ra tóg rã, Davi ti. Tá tóg Topê jamĩ ãn kó. Ti tÿ konh ke tũ vè vè, Topê tũ ki rĩr tí ag hã tÿ konh ke vè vè. Hã ra tóg kó, ã mré mũ tí ag mũ tóg vènh kãpópãm gé, Davi ti. Rãn kÿ tóg nĩ nĩ mÿr,” he tóg, Jesus ti.

⁵ Kÿ tóg ag mũ: “tÿ sóg vènhkán ke kurá to pã'i nĩ mÿr,” he mũ. “Tÿ sóg ãprã ke fi kósín nĩ,” he tóg ag mũ, Jesus ti.

Jesus tÿ vènhkán ke kurá kã ù tÿ há' he
(Mt 12.9-14; Mc 3.1-6)

⁶ Vènhkán ke kurá ù kã Jesus tóg Israel ag tÿ vènh kanhrãñ jafã kãra rã mũ, ag kanhrãñ jé. Tá ù tóg jè nĩ. Ti nĩgê vÿ tóg ja nĩ.

⁷ Kÿ Topê vĩ to professor ag tóg Jesus tugnÿm mũ, Fariseu ag ke gé, ag tÿ ti tÿ há' he mũ ãn ven jé. “Ti mũ tí tÿ há' he sór tũ, tÿ ãg vènhkán ke kurá (hã) ra?” he ag tóg. “Ti tÿ tí tÿ há' he kÿ ãg tóg ti kãmén mũ, pã'i ag mũ, ti tÿ vènhkán ke kurá kã rãnrãj mũ ti,” he ag tóg. Hã kÿ ag tóg ti tugnÿm mũ.

⁸ Hã ra Jesus tóg ag tÿ nén to jykrén vég jè nĩ. Kÿ tóg ùn nĩgê tóg ãn mũ: “kunĩg,” he mũ. “Tag kã jèñh nĩ,” he tóg ti mũ. Kÿ tóg kãtĩg kÿ kã jè mũ sir.

⁹ Kÿ tóg ag mũ: “sÿ ajag ki jèmènh há tóg tí,” he mũ. “Vènhkán ke kurá ki ãg hÿñ ne han mũ?” he tóg, “ãg tÿ Topê vĩ ki króm jé?” he tóg. “ãg mũ nén ù há han mũ? ãg tÿ ù tũ kókén kÿñ mũ kórég tũ nÿñh mũ hÿñ?” he tóg. “ãg mũ ù kren han mũ hÿñ? ãg tÿ ù tén kÿñ mũ kórég tũ nĩñh mũ hÿñ?” he tóg. Hã ra ag tóg ti mũ nén ù tó tũ nĩ.

¹⁰ Kÿ tóg ag ki ãvãñh kãn kÿ ùn nĩgê tóg ãn mũ: “ã nĩgê tÿ krÿg hé,” he mũ. Kÿ tóg tÿ krÿg he mũ sir. Ti tÿ tÿ krÿg he kÿ tóg há' he mũ, ti nĩgê tóg ãn ti.

¹¹ Kÿ tóg vènh kar mũ e tí. Ag fè tóg gÿm ke mũ, kÿ ag tóg jagnê mré vèmén mũ. “ãg hÿñ ti tÿ hẽ ri kenh mũ hÿñ, ti kãgmĩnh mũ vó?” he ag tóg, Jesus to. Hã ra tóg ùn nĩgê tóg ãn tÿ há' he ja nĩ sir.

Jesus tÿ apóstolo ag kuprêg
(Mt 10.1-4; Mc 3.13-19)

¹² ãn kã Jesus tóg kejëñ pãnóñh ra tí mũ, ti tÿ Topê mré vèmén jé. Kuty ãn kã tóg Topê mré vĩ nĩ ki kurãg mũ.

¹³ Tÿ vaj kÿ tóg ã mré mũ tí ag jé prèr kãn mũ, kÿ tóg ag kãmĩ ù tÿ 12 (ke) ãn ag kuprêg mũ. Ag to tóg: “sÿ ùn vin mũ ãn ag,” he mũ, hã vÿ: apóstolo, he mũ.

¹⁴ Ag hã vè, ha mẽ: Simão, Jesus tÿ ti jyjÿ ù hã vÿ: Pedro, he mũ, ti jãvy tÿ André ke gé, Tiago ke gé, ti jãvy tÿ João mré, Filipe ke gé, Bartolomeu ke gé,

¹⁵ Mateus ke gé, Tomé ke gé, Tiago ke gé, Alfeu kósín tag ti, Simão ke gé, ag tÿ ù to: Zelote, he mũ tag ti,

16 Judas ke gé, Tiago kósin tag ti, Judas Iscariotes ke gé, ù tý Jesus vatánh tá pã'i ag mý ti kámén ke tag ti.

Jesus tý ùn e ag ki rir
(Mt 4.23-25)

17 Ký Jesus tóg ag mré pánónh ên to tére mü sir, ký tóg kyjer tá jê ní. Ký ti mré mü tý hên ri ke ag vý tá nýtí gé. Û tý hên ri ke ag vý ti ki junjun ja nigtí, ga tý Judéia tá kãmü ký, cidade tý Jerusalém tá ke gé, goj kafã tü fyr tá ke gé, hã výt: cidade tý Tiro, he mü, cidade tý Sidom, he mü gé. Ên kar výt ti ki junjun ja nigtí, ti tý ag tý há' he jé. Ký tóg fór pë ní, tá, ag tý e pë tävi nýtín ký.

18 Ûn jagrë kórég ag tý tóg há' he mü gé, ag jagrë pan tóg mü, Jesus ti, fag mré hã.

19 Ký vënh kar výt ti kã krý' he sór mü sir, hã jé ag tóg ti ki junjun mü. Ký ù tý ti kã krý' he mü ên ag výt há' he kãn mü, ti tý ä jykre tar tý ag tý hághá' hen ký. Hã jé ag tóg vënh mân ja ní. Hã ký ag tóg ti pënn e tí sir.

Jesus tý ag kanhrän
(Mt 5.1-12)

20 Ký tóg ä mré mü tí ag ki ëvãnh mü, ký tóg ag mýt kámén mü, Jesus ti, ký tóg: "Topë výt äjag ve há han mü, äjag tý: "kórég eg tóg nýtí," hen ký," he mü. "Ký äjag tóg Topë tý tý ëg pã'i ní venh ke mü," he tóg.

21 "Topë výt äjag ve há han mü, äjag tý: "inh kókír ri ke tóg tí, sý vënh jykre kuryj ve sór tí ên ti," hen ký. Ký äjag tóg venh ke mü," he tóg. "Topë výt äjag ve há han mü, äjag vësýrénh mün ký, ëprä. Äjag mýt sér ní jé tóg ke mü, tá," he tóg.

22 "Topë výt äjag ve há han mü, ag tý äjag to kórég nýtín ký isugnín, ag tý äjag mýt: "ha mü jëg," hen ký, isugrín. Ag tý isugnín äjag mýt ví kónãn ký tóg há tí, ag tý ón ký äjag jykre kórég tó ký. Tý sóg ëprä ke fi kósín ní mýt," he tóg, Jesus ti.

23 "Mýt sér nýtímní, äjag fe tý mrin kemní, ag tý isugrín äjag vóg kónãn mü ra. Ký äjag tóg kanhkã tá nén ù há kar venh ke mü, vënh kaja jé, isugnín. Ge ja ag tóg nýtí ja nigtí, ù tý äjag vóg mü ag jóg'jóg ag, vãsý Topë ví to tí ag mýt. Ag vóg kónãn ja ag tóg ní gé. Vãsý Topë ví to tí ên ag ri ke äjag tóg nýtí, ag krë'krë tý äjag vóg kónãn ký," he tóg, Jesus ti.

24 "Hã ra Topë výt äjag ve kónãn mü, äjag tý: "há ëg tóg nýtí," hen ký. Ga kri mün ký äjag tóg nén ù há vég tí, ký äjag tóg kanhkã tá jun ke tü ní," he tóg.

25 "Topë výt äjag ve kónãn mü, äjag tý vënh jykre kuryj ve sór tü nýtín ký, ti tý äjag mýt äjag kókínkir ri ke tü nín ký, ëprä. Ký äjag tóg venh ke tü ní. Ký tóg äjag kókínkir ri ke tñh mü, tá," he tóg. "Topë výt äjag ve kónãn mü, ti tý äjag mýt sér tñn ký, ëprä. Vësýrénh jé äjag tóg ke mü, kygfý jé äjag tóg ke mü, tá," he tóg.

26 "Topë výt äjag ve kónãn mü, vënh kar tý äjag to ví há han mün ký. Äjag mýt ti há tí, vënh kar tý äjag to ví há han mün ký, hã ra tóg Topë mýt kórég ní. Ge ja ag tóg nýtígtí, ù tý äjag mýt ví há han mü ên jóg'jóg ag, ón ký Topë ví to (ka)më ên ag mýt, vãsý. Ag mýt ag tóg ví há han ja ní gé. Ag ri ke äjag tóg nýtí, ón ký Topë ví to (ka)më ên ri ke äjag tóg nýtí, vënh kar tý äjag mýt ví há han ký. Hã ký tóg äjag ve kónãn mü, Topë ti," he tóg, Jesus ti, ag mýt.

Ëg tý ëg kato tẽ mü ag to há nýtính ke
(Mt 5.38-48)

27 "Äjag jyvën sóg mü, äjag tý inh ví jëmën ký, ha më. Û tý äjag kato vãsãnsãn mü ên ag to fe nýtímní jávo. Û tý äjag to jü mü ag mýt nén ù há han ní jávo.

28 Û tỹ ãjag mỹ vĩ kónãn mũ ag mỹ vĩ há han nĩ gé. Û tỹ ãjag mỹ féfén mũ ag to Topẽ mré vĩmĩnĩ gé.

29 Û ag tỹ ãjag jamẽ ki tânk kỹ ag mỹ ãjag jamẽ ù ti ven nĩ gé, ag tỹ ãjag mỹ ki tânk jé gé. Û ag tỹ ãjag capa mãn sór mũ ãn ag mỹ ãjag camisa nĩm nĩ gé.

30 Û ag tỹ ãjag mỹ nén ù to: “inh mỹ nĩm,” he kỹ ag mỹ nĩmĩnĩ. Û ag tỹ ãjag tỹ nén ù mãn kỹ ag mỹ: “inh mỹ isũ nĩm,” he tũg nĩ.

31 ãjag tỹ ãjag mré ke ù to: “ti tỹ ãg mỹ tag han há tóg tí vễ,” he mũ ra ãg hã tóg ti mỹ han ke mũ,” he tóg.

32 Û ag tóg ãjag to há nỹtĩ. ãjag tỹ tag ag hã to há nỹtĩn kỹ tóg tỹ nén ù tũ ti ver. Vẽnh kar ag vỹ ge nỹtĩ gé. Û tỹ ãjag to há nỹtĩ ãn ag to ag tóg há nỹtĩ gé, vễnh kato, ù tỹ Topẽ vĩ mranh mũ ag vỹ tag han tĩ. Tag vỹ há nĩ, hã ra tóg tỹ nén ù tũ nĩ ver.

33 Û ag tóg ãjag mỹ vĩ há han tĩ. ãjag tỹ ãn ag hã mỹ vĩ há han kỹ tóg tỹ nén ù tũ nĩ ver. Ge ag tóg nỹtĩ gé, Topẽ vĩ mranh tĩ ag. ãjag tỹ ag mỹ vĩ há han kỹ ag tóg ãjag mỹ vĩ há han mũ gé, vễnh kato. Há ti nĩ, hã ra tóg tỹ nén ù tũ nĩ ver.

34 Û ag vỹ, ãjag tỹ ag mỹ prestar hen kỹ ag tóg ãjag mỹ nĩm mãn mũ, ãjag tũ ti. ãjag tỹ ag hã mỹ prestar he mãn kỹ tóg tỹ nén ù tũ nĩ ver. Topẽ vĩ mranh tĩ ag vỹ ge nỹtĩ gé. ãjag tỹ ag mỹ nĩm mãn kỹ ag tóg ãjag mỹ prestar he mãn mũ sir, ãjag tũ ti. Há ti nĩ, hã ra tóg tỹ nén ù tũ nĩ ver.

35 Ag jãvo ù tỹ ãjag kato vãsãnsãn mũ ag to há nỹtĩmĩnĩ, ha mẽ. Vễnh kar mỹ vĩ há han kãn nĩ. Vễnh kar mỹ prestar he kãn nĩ, ag tỹ ãjag mỹ ãjag tũ nĩm tũ (hã) ra. Kỹ ãjag tóg kanhkã tá venh ke mũ, ãjag tỹ ùri nén han mũ tag ri ke ti. Hã ki ãjag tóg tỹ ù tỹ kynhmỹ nĩ ãn krẽ nỹtĩ, ãjag tỹ ti ri ke han kỹ. Ti hã ne vễnh kar mỹ vĩ há han kãn tĩ ver', ùn jykre kórég kar ag mré hã, ag tỹ ti mỹ: “ãg mỹ tóg há tí,” he tũ (hã) ra, ag tỹ vễnh hã ki rĩr há han mũ (hã) ra tóg ag mỹ vĩ há han tĩ ver, Topẽ ti.

36 Vễnh kar jagãgtãn kãn nĩ, ãg jóg ri ke. ãg jóg tỹ vễnh kar jagãgtãn kóm vễnh kar jagãgtãn nĩ gé,” he tóg, Jesus ti.

*ãg tỹ kãnhmar ù to vĩ kónãn ke tũ
(Mt 7.1-5)*

37 “Kãnhmar ù to vĩ kónãn tũg nĩ, kỹ Topẽ vỹ ãjag to vĩ kónãn ke tũ nĩ gé. Kãnhmar ù to: “kórég ti nĩ,” he tũg nĩ, kỹ Topẽ vỹ ãjag to: “kórég ti nĩ,” henh ke tũ nĩ gé. Vễnh kar mỹ vễnh pãte fón nĩ, ke tũ nĩ mũ ra Topẽ vỹ ãjag mỹ vễnh pãte fón ke tũ nĩ gé.

38 Ag mỹ nén ù há kar nĩmĩnĩ, kỹ Topẽ vỹ ãjag mỹ nén ù há kar nĩm ke mũ gé sir, hã ra tóg ãjag mỹ ãn kãfór nĩm ke mũ. ãjag mỹ nĩm mág han jé tóg ke mũ, Topẽ ti. Nĩm mág pẽ han jé tóg ke mũ, nén ù há kar tỹ. Hỹ, ge ti nĩ. ãjag tỹ ag mỹ nén ù há han kỹ Topẽ vỹ ãjag mỹ nén ù há han ke mũ gé. ãjag tỹ ag mỹ nén ù kórég han kỹ tóg ãjag mỹ hã ri ke han ke mũ gé,” he tóg, Jesus ti.

39 Kỹ tóg ag mỹ: “ù tỹ ki kagtũg ra tỹ ãjag pã'i nỹtĩ sór mũ tag vỹ ge nỹnh mũ, ha mẽ,” he mũ gé. Kỹ tóg: “ùn kyvó tỹ ùn kyvó ù mỹ: “sỹ ã pẽre tũg ke vễ,” hen kỹ ag tóg ag mũn kỹ kãgnó ki vár kãn ke mũ. Ge ag tóg tĩ, ãjag pã'i ag. ãjag tỹ ùn ki kagtũg ag mré mũn kỹ ãjag tóg mũ kónãn kãn ke mũ.

40 Aluno pi(jé) ã professor kãfór nĩnh mũ'. Ti tỹ kanhrãn há han kỹ tóg kejẽn ã professor ri ke nĩnh mũ, hã ra ti pi(jé) ti kãfór nĩnh mũ'.

41 Jykre kórég mág ãjag tóg nỹtĩ, hã ra ãjag régre jykre pãno sĩ ãn ãjag mỹ kórég nỹ'.

⁴² Kŷ ājag hā ne tóg ājag régre ag mŷ: “sŷ ā mŷ ā jykre kórég kurynh há tóg tí,” he tí, ājag tŷ ājag jykre pāno tāvī ēn kurynh jāvānh (hā) ra. Ke tūg ra mŷr, ke tū nī mū ra ājag tóg jykre régre nŷtī. Ājag jykre kurynh vén nī, kar ājag tóg ājag régre ag jykre kurynh há han mū,” he tóg, Jesus tí.

Ka to comparação
(Mt 7.16-20; 12.33-35)

⁴³ “Ha vé, ka há pi(jé) kanē kórég han tí. Kŷ ka kórég pi(jé) kanē há han tí gé’.

⁴⁴ Ēg tŷ ti kanē ve kŷ ēg tóg: “ūn kanē ko há ja vē,” henh ke mū, ke tū nīn kŷ ēg tóg: “ūn kanē ko vānh ja vē,” henh ke mū. Sónh to ēg tóg pēnva vég tū nīgtī mŷr’, kar ēg tóg vānh tŷ jóhó to uva vég tū nīgtī gé, ha mē.

⁴⁵ Ge tóg nŷgtī, ēprā ke ag jykre ti. Ūn jykre há vŷ nén ū há kar to jykrén tí, ti jykre kuryj nīn kŷ. Kŷ tóg ēg mŷ tó há han tí gé sir. Kŷ ūn jykre kórég vŷ ū kórég kar to jykrén tí, ti jykre pāno nīn kŷ. Kŷ tóg ēg mŷ tó kónān tí gé sir. Hŷ, ge ti nŷgtī. Ēg tŷ nén to jykrén tí ēn kāmén ēg tóg tí mŷr,” he tóg, Jesus tí.

Īn to comparação
(Mt 7.24-27)

⁴⁶ “Ājag ne tóg inh mŷ: “Senhor’, Senhor’,” he tí. Hā ra ājag tóg isŷ ājag mŷ nén tó mū ēn han vānh nŷtīgtī. Kŷ tóg vēnhmŷ nŷ.

⁴⁷ Inh ki ge kŷ ājag nŷtī. Inh vī ki kanhró ājag tóg nŷtī. Ājag tŷ ki króm kŷ ājag tóg sir tag ri ke nŷtīnh mū, ha mē.

⁴⁸ Īn han mū ri ke vē. Ū tóg, ti tŷ ĩn han jé tóg kŷm tí, kā há tá. Kŷm kŷ tóg pāro kri ĩn han mū sir, pāro kri tóg ti nūna gunhgunh mū sir. Kŷ vāhā goj tóg var mū, kŷ tóg ĩn kri rŷm ke mū, goj var ti. Hā ra ĩn tóg jē nī. Ti kókég tū tóg nī, goj var ti. Ti tŷ pāro kri jē hā kŷ tóg tar jē. Ge ti nī, ājag tŷ inh vī ki króm kŷ.

⁴⁹ Ājag tŷ inh vī ki króm tū nīn kŷ ājag tóg sir tag ri ke nŷtīnh mū, ha mē. Ū tóg ĩn han mū gé, hā ra tóg jo kŷm tū nī, ti nūna vŷ jāvo krīgmŷ nŷtī. Kŷ vāhā goj var vŷ ĩn kri rŷm ke mū sir, kŷ tóg kutē mū sir, ĩn ti. Kŷ tóg mráj mū sir, ha mē, ti nūna tŷ krīgmŷ nŷtīn kŷ. Ge ti nī, ū tŷ inh vī jēmē jāvānh ēn tí,” he tóg, Jesus tí.

7

Fóg tŷ capitão tŷ Jesus ki rā
(Mt 8.5-13)

¹ Jesus tŷ ag kar kanhrān kān kar tóg cidade tŷ Cafarnaum ra tí mū.

² Tá fóg tŷ capitão tóg nī nī. Ti camarada tóg kaga nŷ nī. Vēnhmŷ tóg nŷ, kŷ capitão tóg: “ti hŷn ter mū ha,” he mū. Hā ra tóg ti mŷ tí fe ri ke nī, ti camarada tí, capitão ēn mŷ.

³ Hā kŷ tóg Jesus kāme mē kŷ Israel kófa ag jēgnēg mū, Jesus to, ag tŷ ti mŷ: “ti venh kātīg,” he jé. Jesus tŷ ti camarada tŷ há’ he jé tóg ti mŷ vēnh vī jēnēg mū, fóg tŷ capitão ēn ti.

⁴ Kŷ ag tóg Jesus tá junjun mū, Israel kófa ēn ag. Kŷ ag tóg Jesus mŷ tó mū. “Ā mŷ ti venh tīg ke tū nī?” he ag tóg mū, Jesus mŷ. “Ūn há vē.

⁵ Ēg povo to tóg há tāvī nī, ti tŷ tŷ fóg (hā) ra. Ēg mŷ tóg ĩn han ja nī, ēg tŷ krēm Topē vī tó jafā tí, ti tŷ tŷ fóg (hā) ra,” he ag tóg mū, Jesus mŷ, fóg tŷ capitão ēn to.

⁶ Kŷ Jesus tóg: “hej,” he mŷ. Kŷ tóg ag mré tĩ mŷ. Kŷ tóg ti ĩn kakó ki jun mŷ. Kŷ capitão tóg ti mŷ vĕnh vĩ jĕnĕ mĕn mŷ gé. Ā mré ke ag jĕgnĕg tóg mŷ, Jesus to. Kŷ ag tóg ti mŷ: “Senhor,” he mŷ. “Ti venh kārānh ke tũ Ā nĕji nĩ, ti tŷ tŷ fóg nĭn kŷ,” he ag tóg. “Ā mŷn hŷn jagy nŷ, Ā tŷ fóg ĩn kĕki sĕn ken kŷ, Judeu ag tŷ fóg ĩn sĕn jĕvĕnh nŷĭn kŷ,” he ag tóg.

⁷ “Hĕ kŷ ti nĕji Ā venh kĕtĭg tũ nĩ gé, hĕ ra tóg Ā mŷ vĕnh vĩ jĕnĕg mŷ. Ā vĩ pir ki ti camarada nĕji há' hĕnh mŷ, Ā tŷ Ā vĩ tŷ ti tŷ há' hĕnh há nĭn kŷ,” he ag tóg.

⁸ “Ha vé, tŷn ji pĕi' krĕm ke nĩ gé, kŷ soldado ag nĕji tŷ ti krĕm ke nŷtĩ gé. Hĕ kŷn ji tóg pĕi' jykre ki kanhró nĩ. Ti tŷ soldado ũ mŷ: “kutĭg,” hĕn kŷn ji tĩ mŷ, ti tŷ ti mŷ: “kunĭg,” hĕn kŷn ji kĕtĩ mŷ gé. Ti tŷ Ā camarada mŷ: “tag han ra,” hĕn kŷn ji han mŷ. Ti vĩ tŷn ji ag jĕgnĕg tĩ. Hĕ kŷn ji ki kanhró nĩ. Ā vĩ tŷ Ā nĕji ti camarada tŷ há' he há nĩ,” he ag tóg mŷ, Jesus mŷ, capitão mré ke ag.

⁹ Kŷ tóg Jesus mŷ e tĩ, ti vĩ tag ti. Kŷ tóg Ā mré mŷ tĩ ag mŷ ke mŷ, ũn a ag mŷ, ti nón kĕmŷ ĕn ag mŷ. Kŷ tóg ag mŷ: “Israel ũ pi(jé) ti ri ke nĩ, ti tŷ tŷ fóg (hĕ) ra,” he mŷ. “Ki kanhró tóg nĩ mŷr, kŷ tóg ĩnh ki rĕ kŷ jĕ. Ge ve ja tũ sóg nĩ. Há' he kŷ ti nĩ ha, ti camarada ti,” he tóg, Jesus ti.

¹⁰ Kŷ ag tóg vŷnvŷn ke mŷ, capitão ĩn ra, capitão tŷ ũn jĕgnĕg mŷ ag. Hĕ ra ti camarada ĕn tóg há' he ja nĩ sir, ag tŷ tá junjun mŷ ra.

Jesus tŷ ũn ter mŷ rĭn mĕn

¹¹ Kĕnhmar Jesus tóg tĩ mŷ gé sir, ĕn ki. Kŷ tóg cidade tŷ Naim ra tĩ mŷ. Ti mré mŷ tĩ ag tóg ti mré mŷ mŷ, ũn e a g ke gé. Ti nón ag tóg mŷ mŷ.

¹² Kŷ tóg cidade ĕn fyr ki jun mŷ, cidade to ró jĕnkĕ ki. Kŷ ag tóg vĕser va kĕmŷ nĩ, ha mĕ. Ti mŷnh fi kósin pir vĕ mŷr. TI panh tóg ter ja nĩ. Kŷ ũ tŷ hĕn ri ke fag vŷ fi mré mŷ nĩ, cidade tá kĕmŷn kŷ. ag tŷ ti pĕjunh mŷ vĕ, vĕnh kejtá.

¹³ Kŷ Jesus tóg fi vég mŷ, kŷ fi tóg ti mŷ jagtar nĩ. Kŷ tóg fi mŷ: “fŷ tŷg nĩ,” he mŷ.

¹⁴ Kŷ tóg vĕser venh tĩ mŷ, kŷ tóg tá jun kŷ ti mĕg mŷ. Kŷ ũ tŷ ti va mŷ ĕn ag vŷ krŷg'krŷg' he mŷ. Kŷ Jesus tóg vĕser mŷ: “kyrũ,” he mŷ. “Nĩ ra, he sóg mŷ Ā mŷ,” he tóg mŷ, vĕser mŷ, Jesus ti.

¹⁵ Kŷ tóg nĩ mŷ (mŷr) sir, ha mĕ, vĕser ĕn ti, kŷ tóg vĩ mŷ sir, ũn ter ja ĕn ti. Kŷ Jesus tóg ti mŷnh fi mŷ ti fĕg mŷ.

¹⁶ Kŷ tóg vĕnh kar mŷ e tĩ, kŷ ag tóg Topĕ to vĩ há han mŷ sir. “Topĕ vĩ tó tĩ kĕfór vŷ ĕg ki jun,” he ag tóg mŷ, “Topĕ vŷ ĕg ve há han, hĕ kŷ tóg ti jĕnĕ,” he ag tóg mŷ, Jesus to.

¹⁷ Kŷ ti vĕme tóg vĕnh kar kri rŷm ke mŷ sir, ga tŷ Judĕia kar tá, ga kar ĕn kĕmĩ ke gé, Jesus tŷ ũn ter ja ĕn rĭn mĕn ja ti.

João Batista tŷ Jesus mŷ vĕnh vĩ jĕnĕ (Mt 11.2-19)

¹⁸ ĕn kĕ João vŷ se kŷ jĕ nĩ, João Batista ti, ũ tŷ ag kygpĕg tĩ ti. Kŷ João mré mŷ tĩ ag tóg ti mŷ tó kĕn mŷ sir, Jesus tŷ nĕn han mŷ ti.

¹⁹ Kŷ tóg ti mŷ e tĩ. Kŷ tóg Jesus to: “Topĕ tŷ ũn jĕnĕg mŷ hĕ mŷ vŷ?” he mŷ. Hĕ kŷ tóg Ā mré mŷ tĩ régre ag jĕgnĕg mŷ, ag tŷ Jesus venh mŷ jĕ, ag tŷ ti ki jĕmĕ jĕ, ti mŷ: “Ā hĕ mŷ?” he jĕ. “ĕg tŷ ũn jĕvĕnh mŷ mŷ tŷ Ā nĩ? Topĕ tŷ ũn jĕnĕg mŷ hĕ mŷ tŷ Ā nĩ? ĕg mŷ ũ jĕvĕnh mĕn ke tũ nĩ ha', Ā pĕte?” he sór ag tóg mŷ, Jesus mŷ.

²⁰ Kŷ ag tóg Jesus tá junjun mŷ. Kŷ ag tóg ti mŷ: “João Batista vŷ ěg jĕgnĕ, ěg tŷ ā ki jĕmĕ jĕ,” he mŷ. “Ā hā mŷ?” he tóg. ěg tŷ ūn jāvānh mŷ ěn hā mŷ tŷ ā nŷ? ěg mŷ ū jāvānh mān ke tŷ nŷ ha', ā pāte? he tóg, João ti, ā mŷ,” he ag tóg mŷ, Jesus mŷ.

²¹ Hā ra Jesus tóg ūn kaga ag tŷ há' he mŷ, ag tŷ ti mrĕ vĭnh kāmŷ kŷ. Vĕnh jagrĕ kórĕg pan tóg mŷ gé, kurā ěn kā. Ūn kyvó ag tŷ há' he tóg mŷ gé, ag kanĕ tŷ.

²² Kŷ tóg João mrĕ mŷ ti ag mŷ: “Ha João mŷ tag tómnĭ, ha mĕ,” he mŷ. “Ā jag tŷ nĕn vĕg mŷ ta g tómnĭ, ā jag tŷ nĕn mĕg mŷ ti ke gé,” he tóg. “Tag han inh tĭ, ha mĕ: ūn kyvó ag vŷ isugrĭn ěvānh há nŷtĭ ha. Ūn kānhgrĭ ag vŷ mŷ há han mŷ ha, ūn kónhgrĭ ěn ag. Ū tŷ vĕnh kaga kren vānh han mŷ ag krenkren han inh tĭ, ū tŷ lepra han mŷ ag. Ūn kutu ag vŷ ěmĕ há nŷtĭ ha. Ūn kāgter mŷ ag vŷ rĭnrĭr mān gé. Ūn jagāgtar e ag vŷ Topĕ vĭ sér mĕg mŷ ha ke gé, Topĕ tŷ tŷ ěg pā'i nĭnh ke to.

²³ Kŷ tóg ti tŷ iso jykrĕn kónān tŷ nĭnh kŷ há' he mŷ. Kŷ Topĕ tóg ti ve há han mŷ sir. Tag tómnĭ, João mŷ,” he tóg, Jesus ti.

²⁴ Kŷ João tŷ ūn jĕgnĕg mŷ ag tóg mŷ mŷ sir, João mŷ tó jĕ, mŷr, ha mĕ.

João tŷ ūn jĕgnĕg mŷ ěn ag mŷ kar kŷ Jesus tóg ūn e ěn ag kanhrān mŷ sir, kŷ tóg ag mŷ João kāmĕn mŷ. “Ēmā tŷ ja ra ā jag tóg mŷ ja nĭgtĭ, João ve jĕ,” he tóg. “Kŷ ti jykre hŷn ne ri ke nŷ, ā jag mŷ? Kejĕn kākā tóg goj jagma krā tŷ man man ke tŷ. João jykre mŷ ā jag mŷ tag ri ke tŷ nŷ? Hŷ, ri ke tŷ ti nŷ.

²⁵ Kŷ ti jykre hŷn ne ri ke nŷ ā jag mŷ? Ti mŷ ā jag mŷ ūn kur sĭnvĭ ag jykre ri ke nŷ? Vó. Ūn kur sĭnvĭ ag vŷ cidade mág tá nŷtĭ, pā'i mág ĩn krĕm, ūn jĕn mág mŷ ag. Ag pi(jĕ) ěmā tŷg ja mŷ mŷ tŷ.

²⁶ Kŷ ti jykre hŷn ne ri ke nŷ ā jag mŷ? Ti jykre mŷ ā jag mŷ Topĕ vĭ tó tĭ ag jykre ri ke nŷ? Hŷ, ri ke ti nŷ. Topĕ vĭ tó tĭ vĕ mŷr, hā ra tóg Topĕ vĭ tó tĭ ag káfór kar nŷ, João ti.

²⁷ Topĕ vŷ João jĕnĕ, ti tŷ ijo tĭg jĕ. Hā kŷ tag tóg ti to rán kŷ nŷ, Topĕ vĭ ki, ha mĕ. “Ha vé, ā jo sóg ū jĕnĕnh mŷ, ti tŷ vĕnh kar tŷ há' he jĕ, ā tĭg ken jo. Ag jyvĕn jĕ tóg ke mŷ, kŷ tóg ěpy kure ri ke nŷ, ěmĭn kurynh ri ke,” he tóg, Topĕ vĭ tŷ rán kŷ nŷ ki, João to, ti tŷ ijo tĭg ke tag to,” he tóg, Jesus ti, ag mŷ.

²⁸ “Ki hā sóg tó mŷ, hā kŷ sóg ke mŷ, ha mŷ. Ēprā ke ag káfór kar ti nŷ, João ti, Topĕ vĭ tón ki. Ū tŷ ga kri mŷ káfór kar ti nŷ. Hā ra ū tŷ hĕn ri ke ag tóg Topĕ tŷ tŷ ěg pā'i nŷ venh ke mŷ mŷr. Ag tŷ venh ke mŷ (hā) ra ag tóg kāsir nŷtĭ. Kŷ ūn kāsir ěn ag tŷ ěgno pĕ ěn tóg João mág káfór nĭnh mŷ hā ra,” he tóg, Jesus ti, João to.

²⁹ “Jo João vĭ mĕg mŷ e ěn ag tóg João vĭ mĕ há han ja nĭgtĭ, hā kŷ ag tóg Topĕ vĭ tag ti to: “ki hā ā tóg tó mŷ,” he ja nĭgtĭ, João tŷ ag mŷ nĕn tó ja to. Hā kŷ tóg ag kygpe ja nĭgtĭ, João ti, ū tŷ governo mŷ imposto tŷ jānkamy mĕg tĭ ag mrĕ hā.

³⁰ Hā ra Fariseu ag tóg João vĭ jĕmĕ jāvānh ja nŷtĭgtĭ, Topĕ vĭ to professor ag ke gé. Hā kŷ ag tóg Topĕ tŷ ag mŷ nĕn han sór mŷ ěn tŷ ti mŷ nenh ja nĭgtĭ gé. Hā kŷ João tóg ag kygpe ja tŷ nĭgtĭ gé,” he tóg, Jesus ti.

³¹ “Ūri ke ag vŷ ge nŷtĭ gé, ha mĕ.

³² Ĝr ag ri ke ag tóg nŷtĭ. Ĝr ag vŷ jagnĕ mrĕ kanhinnhir mŷgtĭ. Kŷ ag tóg ā jag mrĕ ke ag jĕ prĕr tĭgtĭ, ag mrĕ kanhinnhir jĕ. Kŷ ag tóg kejĕn jŷ tŷ. “Ā jag mŷ ěg tóg vākyn, kanhinnhir kŷ, hā ra ā jag ne tóg vĕnh gringrĕn jāvānh nŷtĭ,”

he ag tóg tí, gír ag, jagně mý. “Ájag tý věnh gringrén jávánh nýtín ký ěg tóg ón ký vēsýrénh mũ sir, ěg kanhinnhir ký, hã ra ájag ne tóg ěg mré fý jávánh nýtígtí gé’,” he ag tóg tí gé, ón ký jagně to jü ký, gír ag.

³³ Gír tag ag ri ke ájag tóg nýtí, João to, iso ke gé,” he tóg, Jesus ti. “João vỹ vãkre ja nĩgtí, jěn mág tú, kron tú. Ký ájag tóg ti to: “jagrě kórég tóg nĩ,” he ja nĩgtí, ti vãkre to.

³⁴ Ti jávo sóg vãkrég tú nĩgtí. Jĕg sóg nĩgtí, kron sóg nĩgtí. Ký ájag tóg iso: “ti hã ne jěn mág tí’,” he tí. “Ti hã ne kronkron tí’, ti hã ne governo mý imposto tý jánkamy mág tí ag to há nĩ’, ti hã ne Topě vỹ mranh tí ag to há nĩ’,” he ájag tóg tí iso, ěprã ke fi kósín to. Ký João jykre tóg ájag mý kórég nĩ, ti vãkre to, jávo inh jykre tóg ájag mý kórég nĩ gé, inh vãkrég tú to.

³⁵ Hã ra ěg tý ũ jykre tugnỹm ký ěg tóg ti jykre há ěn ki kanhró nýtí sir. Ký tóg tý Topě krě nĩ sir, ký ěg tóg ti ki Topě jykre ki kanhró nýtí sir, ti jykre há ěn tugrĩ’,” he tóg, Jesus ti. Ti tý ag mý João kãmén hã vē.

Jesus tý Simão ĩn krĕm jĕg

³⁶ Kejĕn Fariseu ũ tóg Jesus mý tó mũ, ti tý ti mré jĕn jé. Ký tóg tí mũ, Fariseu ěn ĩn ra. Tá tóg ti mré jĕg mũ sir.

³⁷ Ti tý mré jĕg nĩ ra ũ fi tóg ti ki jun mũ, cidade tá ke ũ fi. Hã ra fi tóg mén ja e nĩ, Topě vỹ mranh ký. Jesus tý Fariseu ěn ĩn krĕm jĕ mĕg fi tóg mũ, hã ký fi tóg garrafa va kãtí mũ. Garrafa kãki tóg ěg tãg jafã nĩ, nén ger há tý. Pó kupri tý tóg han ký nĩ nĩ, garrafa ěn, pó tãnjã tý.

³⁸ ěn va kãtĕg ký fi tóg ti pĕn to jĕ nĩ sir. Hã ra Jesus tóg cama kri nỹ ký jĕg mũ. Ag jykre vē, ag tý nỹ ký jĕn ke mũ ěn ti. Ký fi tóg ti pĕn to jĕ ký fý mũ. Fi tý Topě vỹ mranh ja ěn tugrĩn fi tóg fý mũ. Ký fi tóg ģ kanĕ var tý ti pĕn kupég mũ, ký fi tóg ģ gãnh tý ti pĕn kykũg mũ gé. Ti pĕn ki nhun ke fi tóg mũ gé. Ký fi tóg ti pĕn tãg mũ sir, garrafa ki jĕ ěn tý.

³⁹ Ký Fariseu ěn tóg vég mũ, ũ tý Jesus mý: “inh mré jĕn kãtĕg,” he ja ěn ti. Ký tóg to jykrén mũ, ũn týtã fi to, Jesus to ke gé. “Ti tý tý Topě vỹ tó tí nĩ ra tóg fi ki kanhró nĩnh mũ vē,” he tóg. “Hã ra tóg ki kagtũg nĩ ve nĩ. ũn mén ja e fi vē mýr, Topě vỹ mranh fi tóg tĩgtí mýr, hã ra tóg fi tý ģ pĕn mĕ ěn kamĕg tú nĩ, Jesus í,” he tóg, to jykrén ký, Fariseu ěn ti.

⁴⁰ Hã ra Jesus tóg ki kanhró nĩ. Ký tóg ti mý: “Simão!” he mũ. “Sý ģ mré vēmĕn ke vē,” he tóg. Ký tóg ti mý: “ha tó,” he mũ sir, Jesus mý.

⁴¹ Ký tóg: “kejĕn patrão ũ tóg nĩgtí,” he mũ. “Ti camarada rĕgre ag tóg ti mý név(e) nýtí. ũn név(e) ěn vỹ tý 500 (ke) nĩ, kar ũn név(e) vỹ tý 50 (ke) nĩ gé.

⁴² Hã ra ag tý ne tý kajãm ke tóg tú tí, ký tóg ag mý tý tũg’ he mũ, ag név(e) tý, ag patrão tí. Ký ti camarada tý hĕ nỹ hỹn ti to há kãfór nĩ?” he tóg, Jesus ti, ti tý Simão ki jĕmĕn ký.

⁴³ Ký Simão tóg ti mý: “ũn név(e) mág ja ěn hỹn tóg ti to há kãfór nĩ,” he mũ. Ký Jesus tóg ti mý: “ki hã ģ tóg tó mũ,” he mũ.

⁴⁴ Ký tóg fi jé vĩrĩn ke mũ sir, ũn týtã kórég ěn fi jé, ký tóg Simão mý: “ã mý fi vég mũ?” he mũ. “Á kanĕ var tý fi tóg inh pĕn kugpég mũ, kar fi tóg ģ gãnh tý inh pĕn kykũg mũ gé,” he tóg. “Fi jávo ģ tóg inh mý goj ven tú nĩ, isý inh pĕn kugpe jé, sý ģ ĩn kãra rã ký,” he tóg.

⁴⁵ “Inh ki nhun ke ja tú ģ tóg nĩ, ģ jávo fi tóg inh pĕn ki nhun ke mũ, to fi krónh ke tú nĩ jávo,” he tóg.

⁴⁶ “Á pi(jé) inh gãnh tãg ja nĩ’, ģ jávo fi tóg inh pĕn tãg,” he tóg.

⁴⁷ “Hã kÿ sóg ã mÿ tó mũ. Topê vĩ mranh tÿ hên ri ke han fi tóg. Hã ra tóg fi mÿ vênh pãte fón kãn mũ sir, Topê ti, fi tÿ iso há tâvĩ nĩn kÿ, sÿ tÿ fi fe nĩn kÿ. Û mÿ tóg kejên vênh pãte fón pir han tĩ, Topê ti, ù tÿ patrão ki név(e) sĩ ên ri ke mÿ. Kÿ ên tóg ti to há sĩ nĩ gé sir, fi tÿ iso há tâvĩ jãvo,” he tóg.

⁴⁸ Kÿ tóg fi mÿ: “ã tÿ Topê vĩ mranh ja ên tÿ sóg vênh pãte fón mũ,” he mũ, Jesus ti.

⁴⁹ Kÿ ti mré jêg mũ ag tóg to jykrén mũ sir, ti vĩ to. Kÿ ag tóg jagnê mÿ ke mũ. “Ti hã mÿ êg tÿ Topê vĩ mranh kÿ vênh pãte fón ke mũ vÿ?” he ag tóg mũ. “Topê hã ne vênh pãte fón há nĩ’, hã kÿ tóg êg mÿ vênhmÿ tĩ,” he ag tóg.

⁵⁰ Hã ra Jesus tóg fi mÿ ke mãn mũ. “Á tÿ inh ki rã kÿ sóg ã kren han mũ,” he tóg. “Ha jatun mÿ tĩg,” he tóg, Jesus ti, ùn tÿtã kórég ja ên fi mÿ.

8

Ûn tÿtã fag tÿ Jesus ki rĩr

¹ Tag pãte Jesus vÿ cidade kar mĩ tĩg kãn mũ, êmã kãsir mĩ ke gé. Topê vĩ tó tóg tĩ mũ. Ag mÿ tóg: “Topê tÿ tÿ ãjag pã'i nĩ sór vê,” he mũ. Kÿ ù tÿ 12 (ke) ag tóg ti mré mũ mũ.

² Kÿ ùn tÿtã fag tóg ti mré mũ mũ gé sir. Jesus tóg fag tÿ há' he ja nĩ. Û fag tóg kaga ja nÿtĩgtĩ, kÿ ù fag tóg jagrê kórég ja nÿtĩgtĩ gé. Hã ra Jesus tóg fag tÿ hághá' he kãn ja nĩ. Û fi vÿ tÿ Maria fi nĩ, Madalena he mũ tag fi. Jesus vÿ fi jagrê kórég pan ja nĩ, ù tÿ 7 (ke) vê, ha mê, fi jagrê kórég ag.

³ Kar ù fi vÿ tÿ Joana fi nĩ gé, Cuza prũ fi vê, pã'i mág tÿ Herodes tũ vég nĩ ên prũ fi vê. Kar ù fi vÿ tÿ Suzana fi nĩ gé. Kar ù fag vÿ ti mré mũ mũ gé, ti mÿ vễjên han jé. ãjag tũ tÿ fag tóg ti mÿ vễjên han tĩ, kar ti mré mũ tĩ ag mré hã.

Nén fy to comparação (Mt 13.1-9; Mc 4.1-9)

⁴ Kejên ùn e ag vÿ vênh mãn mũ sir, êmã tÿ hên ri ke tá kãmũ kÿ. Jesus to ag tóg vênh mãn mũ. Kÿ tóg ag kanhrãnrãn kÿ ag mÿ: “ù tÿ Topê vĩ tó tĩ vÿ ge nÿnh mũ, ha mê,” he mũ.

⁵ “Kejên ù tóg trigo fy vãvãm tĩ mũ. Ti tÿ vãvãm kÿ ti fy ù tóg êpÿy kri, êmĩn kri vár mũ, kÿ ag tóg ti sãn mũ, kÿ sêsĩ ag vÿ ko mũ gé sir, jêsĩ tóg tÿ tũg' ke mũ sir.

⁶ Ti fy ù tóg pãró kri vár mũ. Kÿ tóg mur mũ vê, hã ra tóg tóg mũ sir. Ga tÿ sĩ nĩn kÿ tóg goj ve ja tũ nĩ, hã kÿ tóg tóg mũ sir.

⁷ Ti fy ù tóg sónh kãki vár mũ. Kÿ sónh tóg ti mré mur mũ, ti kri tóg rũm ke mũ sir. Kÿ tóg ter mũ sir, sónh kãki.

⁸ Ti fy ù tóg ga há kri vár mũ. Kÿ tóg mur há han mũ, kanê há ke gé. Kanê tÿ 100 (ke) han tóg mũ sir, ga há kri,” he tóg, Jesus ti. Kÿ tóg tag tó kar kÿ prêr mũ. “!..Û nigrêg nÿtĩ ag tÿ ki êmên jé..!” he tóg, prêr kÿ, Jesus ti.

Jesus tÿ nén fy to comparação kãmén (Mt 13.10-23; Mc 4.10-20)

⁹ Kÿ ti mré mũ tĩ ag tóg ti ki jêmêg mũ. “Ne to ke nê, trigo fy kãmê tag ti?” he ag tóg mũ, Jesus mÿ.

¹⁰ Kÿ tóg ag mÿ: “ãjag hã mÿ sóg Topê tÿ tÿ êg pã'i nĩ ên kãmén há han ke mũ, ijo tó ja tũ ên ti,” he mũ. “Hã ra sóg ù ag mÿ comparação tâvĩ han mũ. Ag mÿ sóg tó há han ke tũ nĩ, ù tÿ ón kÿ mễg mũ ag mÿ, kÿ ag tóg ãjag tÿ vég mũ ra ki

kagtīg nýtī, ājag tỹ mēg mū ra ag tóg to jykrén tũ nýtī, kỹ tóg ag tỹ to jykrén ke tũ tĩ,” he tóg.

11 Kỹ tóg ag mỹ kāmén mū. “Nén fy kāme vỹ ge nỹnh mū, ha mē,” he tóg. “Topē vỹ vỹ trigo fy ri ke nĩ.

12 Û ag tóg Topē vỹ jēmēg tĩ. Jēmē kar kỹ Japo tóg ag mỹ tỹ tũg' he tĩ, Topē vỹ tỹ. Kỹ ag tóg sir ti ki ge tũ nĩgtĩ, krenkren ke tũ ag nĩgtĩ sir. Kỹ tóg ěpy ěn, ěmĩn kri vār mū ěn ri ke nĩ, ěn ti.

13 Kar ù ag tóg pāro kri vār mū ěn ri ke nýtī gé. Mēg ag tóg tĩ vē, Topē vỹ ti. Kỹ ag tóg: “hej,” he mū. Ag mỹ tóg sér tĩ sir. Hã ra ag tóg tỹ nén kré jãre tũ ri ke nýtī mỹr, ha mē. Mũ sĩ han ag tóg mū, Topē mré. Nén ù jagy kutē kỹ ag tóg Topē tovãnh mū sir, ag tỹ Topē vỹ mranh sór kỹ.

14 Kar ti tỹ sónh kãki vār mū vỹ ge nýtĩgtĩ gé. Topē vỹ mēg ag tóg tĩ gé. Hã ra ag tóg mū mū sir, ājag rãnrãj nón. Ón kỹ ag tóg rico nýtĩ sór mū, ājag rãnrãj to. Hã to ag tóg krĩ kufy nýtĩ. Nén kar to ěn ag tóg tĩ, kỹ tag hã ne ag mỹ há tĩ'. Hã kỹ ag tóg Topē vỹ to jykrén mãn tũ nĩgtĩ sir. Hã kỹ ag tóg kanē há han tũ nĩ gé sir.

15 Kar ga há kri vār mū vỹ ge nĩ gé. Jēmēg ag tóg tĩ gé, Topē vỹ ti. Kỹ ag tóg ājag fe tỹ ti ki rãg mū sir, ag tỹ ti vỹ ki króm jé. Kỹ ag tóg kanē há han mū sir. Komēr hã ag tóg kanē há han', han', he mū, ag tỹ nén ù jagy vég mū ra,” he tóg. Tĩ tỹ ag mỹ ěg tỹ Topē tovãnh ke tũ kāmén hã vē, Jesus ti.

Lampião to comparação (Mc 4.21-25)

16 Kỹ tóg ag mỹ: ěg tỹ lampião grug kỹ ěg pi(jé) kěj krēm fēg tĩ’” he mū. “Ěg pi(jé) cama krēm fēg tĩ gé', néj gru ti. Tĩ fēg jafã kri ěg tóg ti fēg tĩ. Kỹ vēnh kar tóg vég mū sir, ag tỹ ěg ĩn kãra kãgen kỹ.

17 Ge ti nỹ, sỹ ājag mỹ nén tó mū kar ti. Ver ājag tóg to jykrén tũ nĩgtĩ. Ājag tỹ vãhã to jykrén kãn ke vē. Ver ājag tóg ki kagtīg nýtĩ. Ājag tỹ vãhã ki kanhrãn kãn ke vē,” he tóg.

18 “Hã kỹ jēmē há han nĩ. Û tỹ to jykrén há han kỹ tóg ù to jykrén mãn', ù to jykrén mãn', henh ke mū. Û tỹ inh vỹ to jykrén há han tũ nĩn kỹ tóg ti mỹ tũg' he kãn mū, ti tỹ nén ù to jykrén mū kar ěn mré hã,” he tóg. Tĩ tỹ ag mỹ ěg tỹ ti vỹ to jykrén há han ke kāmén hã vē, Jesus ti.

Jesus mré ke pẽ fag (Mt 12.46-50; Mc 3.31-35)

19 Kejẽn Jesus mỹnh fi vỹ ti venh kãtĩ mū, ti jãvy ag mré. Hã ra fag tóg ti ki junjun tũ nĩ. Tĩ pẽnĩn tóg fór tãvĩ tĩ, hã kỹ ag tóg ti ki junjun tũ nĩ, ti mỹnh fi mré hã.

20 Kỹ ù tóg ti mỹ: “ã mỹnh fi vỹ re tá jē, ã jãvy ag mré,” he mū. “Fag tỹ ã venh kãmũ vē,” he tóg, Jesus mỹ.

21 Hã ra Jesus tóg ti mỹ: “mē!,” he mū. “Hã ra ù tỹ Topē vỹ jēmēg mū fag vỹ inh mỹnh pẽ ri ke nýtĩ, inh jãvy pẽ ri ke ke gé, ù tỹ Topē vỹ ki króm mū ag,” he tóg, Jesus ti.

Jesus tỹ kóho tỹ tũg' he (Mt 8.23-27; Mc 4.35-41)

22 Kejẽn tóg canoa kãra rã mū, ti mré mū tĩ ag mré. Kỹ tóg ag mỹ: “mũ nỹ, goj nĩg kafã ù ra,” he mū. Kỹ ag tóg mū mū, canoa kãmĩ.

²³ Ag mŭn ki Jesus tóg nŭr mŭ sir. Kŷ vāhā kóho jŭ tóg kraug he mŭ sir. Króg ke tóg mŭ sir, kóho ti. Kŷ goj tóg canoa kākī krém ke mŭ. Ti fān sór tóg mŭ sir. Kŷ tóg ag mŷ ag kǎgter ha mē tí.

²⁴ Kŷ ag tóg ti rĭn mŭ mŭ. Ti mŷ ag tóg: “Senhor', Senhor',” he mŭ. “Ēg mŷ ěg kǎgter ha mē tóg tí,” he ag tóg ti mŷ. Kŷ tóg rĭr mŭ sir. Kŷ tóg kóho mŷ ví mŭ, goj mŷ ke gé, goj vóg nén ěn mŷ. Kŷ tóg krŷg' he mŭ sir, kóho ti. Katy' he tóg mŭ sir.

²⁵ Kŷ tóg ag mŷ ke mŭ. “Ajag tŷ ne jé inh ki ge há han tŭ nĭ nē?” he tóg. Kŷ ag tóg kanē jur nŷtĭ nĭ. Ag mŷ tóg e tí, kŷ ag tóg jagnē mŷ: “ti jykre tóg ěg mŷ e tí,” he mŭ. “Kóho mŷ tóg ví mŭ, Kŷ tóg ki hā ke mŭ, kóho ti, goj ti ke gé,” he ag tóg mŭ, jagnē mŷ.

Jesus tŷ ũn jagrē kórég tŷ há' he

(Mt 8.28-34; Mc 5.1-20)

²⁶ Kóho tŷ tŭg' hen kŷ ag tóg Gerasa ag jamā tá junjun mŭ sir. Goj nig kafā ũ tá tóg nĭ, ga tŷ Galiléia to há.

²⁷ Kŷ tóg canoa kākī kǎkutē mŭ, Jesus ti. Kŷ ũ tóg ti kato tē mŭ, cidade tá ke ũ, há ra tóg jagrē kórég tŷ hēn ri ke nĭ. Si há tóg tí ha, ti jagrē e nĭ ti. Kŷ tóg kur tŭ nĭ. Kato r tóg nĭ. Īn tŭ ti nĭ gé. Vēnh kej tá tóg jĕgtĭ, pǎrō tŷ vēnh kej tá.

²⁸ Ēn tóg Jesus kato tē mŭ. Kŷ tóg ti krēm mŭg ke mŭ. Prēr kŷ tóg: “!..ā isŷ hē ri kenh mŭ, Jesus'..!” he mŭ. “!..Kynhmŷ Topē kósĭn'..!” he tóg. “!..Ā mŷ sóg to vĭnh mŭ, ā tŷ inh vóg kónān tŭ nĭ jé..!” he tóg, prēr kŷ, ũn jagrē kórég ěn ti.

²⁹ Hā ra Jesus tóg Nén-Kórég mŷ: “ti ki pa jĕg,” he ja nĭ, há kŷ tóg prēr mŭ. Ti ki vĭrĭn ke', ti ki vĭrĭn ke' tŷ hēn ri ke han ja ag tóg nĭgtĭ, Nén-Kórég ag. Kŷ ti mré ke ag tóg ti se ja nĭgtĭ gé, ti mrĭnh kŷ, ferro tŷ, ti nĭgé, ti pĕn ke gé. Hā ra tóg ā se ja kykym kǎn ja nĭgtĭ. Kŷ Nén-Kórég ag tóg ěmā tŭg ja ra ti tŭn ja nĭgtĭ. Hā kŷ tóg vēnh kej mĭ tŭgtĭ, ũn jagrē kórég ěn ti.

³⁰ Kŷ Jesus tóg ti mŷ: “ā jĭji hē ri ke tí?” he mŭ. Kŷ tóg: “Mil,” he mŭ. Nén-Kórég tŷ hēn ri ke ag tŷ tóg jagrē nĭ, há kŷ tóg: “Mil,” he mŭ.

³¹ Kŷ ag tóg Jesus mŷ to ví mŭ, Nén-Kórég ag, ti tŷ nŭgme ra ag jĕgnĕg tŭ nĭ jĕ, inferno ra.

³² Hā ra porco tŷ hēn ri ke tóg tá jĕg nŷtĭ nĭ, pānónh tá. Kŷ Nén-Kórég ag tóg Jesus mŷ to ví e han, ti tŷ ag mŷ: “ha porco ki ge jĕg, ge kŷ,” he jé. Kŷ tóg ag mŷ ke mŭ.

³³ Kŷ ag tóg ěn ki kǎpa mŭ sir, Nén-Kórég ag. Porco ag ki ag tóg ge mŭ sir. Kŷ porco ag tóg mer ki re mŭ, rán ki, goj nig ra. Goj ki ag tóg vár mŭ sir. Nǎgnār kŷ ag tóg tŭ' he kǎn mŭ sir.

³⁴ Kŷ ũ tŷ porco ki rĭr tí ag tóg vég mŭ. Kŷ ag tóg pétē mŭ, cidade ra. Tá ag tóg kāmén mŭ, ěmā kǎsir mĭ há ke gé.

³⁵ Kŷ tá ke ag tóg ra mŭ kǎn mŭ, ag ví mĕg mŭ ag. Ag tŷ nén ěn ve sór vē. Ra mŭ kŷ ag tóg Jesus tá junjun mŭ. Kŷ ag tóg ti vég mŭ sir, ũn jagrē kórég ja ti. Nĭ tóg mŭ ha, Jesus rā há. Kur tóg nĭ ha, krĭ há tóg nĭ ha. Kŷ ag fe tóg jŭrŭn ke mŭ sir.

³⁶ Ũ tŷ Jesus tŷ ti tŷ há' he mŭ vég mŭ ěn ag tóg kāmén kǎn mŭ sir, ũ tŷ ũri ti venh kāmŭ mŷ ěn ag mŷ. Ũn jagrē kórég tó ag tóg mŭ, ag mŷ, Jesus tŷ ti han ja ti, porco kǎgter ja ti ke gé.

³⁷ Kŷ tá ke ag tóg ti mŷ to ví mŭ, Jesus mŷ, ti tŷ tá kǎkutē jé. Gerasa tá ke kar ag tóg kanē jur nŷtĭ, há kŷ ag tóg ti mŷ: “ā tŭg kŷ tóg ěg mŷ há tĭnh mŭ,” he mŭ. Kŷ tóg canoa kǎra rā kŷ tŭg sór mŭ, ti mré mŭ tí ag mré.

³⁸ Kÿ ùn jagrê kórég ja tóg ti mÿ to vî e han mÿ, “nhÿ ã mré tÿg mÿ,” hen kÿ, Jesus mÿ. Hã ra Jesus tóg ti përe tÿg jãvãnh nÿ.

³⁹ “Ã jamã ra vÿn ké,” he tóg ti mÿ. “Tá ag mÿ kãmén nÿ, Topê tÿ ã tÿ há’ he ja tag ti,” he tóg, Jesus ti. Kÿ tóg ti mÿ sir, ùn jagrê kórég ja ti. Cidade kar mÿ tóg tÿ mÿ. Ag mÿ tóg kãmén mÿ sir, Jesus tÿ ti tÿ há’ he ja ên ti.

*Jesus tÿ Jairo kósin fi rÿn mãn
(Mt 9.18-26; Mc 5.21-43)*

⁴⁰ Kÿ Jesus tóg vÿn ke mÿ, nig kafã ù ra. Kÿ tóg vënh e ên mÿ sér tÿ, ag tÿ ti ven kÿ. Ti jãvãnh ja ag tóg nÿ, hã kÿ tóg ag mÿ sér tÿ, ag tÿ ti ven kÿ.

⁴¹ Kÿ vãhã ù tóg ti ki jun mÿ, Jesus ki. Israel ag vënh kanhrãn jafã to pã’i vë, ti jyjyn hã vÿ: Jairo, he mÿ. Ên tóg Jesus krêm mÿg ke mÿ, ã jakrÿ tÿ tóg jê mÿ, kÿ tóg ti mÿ vî mÿ, ti tÿ ti Ìn ra tÿg jé, Jesus ti.

⁴² Ti kósin pir fi vÿ kaga tãvî nÿ, kÿ fi kaga tãvî ên vÿ fi tén sór mÿ. Kri prÿg tÿ 12 (ke) fi nÿ, Jairo kósin pir ên fi. Kÿ tóg ti mré tÿ mÿ, Jesus ti.

Ti tÿg kÿ ùn e ag tóg ti nón mÿ mÿ.

⁴³ Kÿ ag kã ù fi tóg ag pëtëm mÿ. Kyvénh krÿg tÿ han kÿ fi tóg nÿ, prÿg tÿ 12 (ke) ki. Hã ra ag tóg fi kaga tÿ hê ri ke ja tÿ nÿ, ag tÿ fi kygtãg mÿ ra, médoco ag.

⁴⁴ Ên fi tóg ti nón ti kur mráj vóg mÿ. Kÿ vësÿmér fi kyvénh tóg tÿ’ he mÿ.

⁴⁵ Kÿ Jesus tóg: “ù nÿ inh kur vóg?” he mÿ. Hã ra vënh kar tóg: “inh hã tÿ vë, inh hã tÿ vë,” he mÿ. Kÿ Pedro tóg ti mÿ vî mÿ, Jesus mré mÿ tÿ ag kar ke gé. Ti mÿ ag tóg: “ã kur mē kãn êg tóg, hã ra ã tóg: “ù nÿ inh kur vóg?” he mÿ,” he tóg, Pedro ti, Jesus mÿ.

⁴⁶ Hã ra Jesus tóg: “vó,” he mÿ. “Û tóg inh kur vóg,” he tóg. “Inh kuprÿg tóg inh ki kãtére, hã kÿ sóg ki kanhrãn mÿ,” he tóg.

⁴⁷ Kÿ ùn tÿtã ên fi tóg to jykrén mÿ sir. “Ti hÿn tóg inh vé,” he fi tóg. Hã kÿ fi tóg jÿrÿn ke kÿ kãtÿ mÿ. Jesus krêm fi tóg mÿg ke mÿ. Kÿ fi tóg ti mÿ tó kãn mÿ, vënh kar rÿnve. Ti mÿ fi tóg ã kaga ja ên kãmén kãn mÿ, fi tÿ ti kur vóg ja ên ti ke gé, fi tÿ há’ he ja ti ke gé. “Isÿ ã kur vóg kÿ sóg vësÿmér há’ hé,” he fi tóg, Jesus mÿ.

⁴⁸ Kÿ tóg fi mÿ vî há han mÿ, Jesus ti. “Inh kósin!,” he tóg. “Ã tÿ inh ki rã kÿ ã tóg há’ hé. Ha tÿg, jatun mÿ. Há ã tóg nÿ ha,” he tóg fi mÿ, fi han kar kÿ, Jesus ti.

⁴⁹ Ti tÿ ver fi mré vëmén jê ra ù tóg jun mÿ, pã’i tÿ Jairo ên Ìn tá. “Ã kósin fi hur ter,” he tóg, pã’i mÿ. “Tÿg ja fi tóg nÿ ha,” he tóg, Jairon mÿ. “Hã kÿ ti mÿ: kunÿg, he mãn tÿg nÿ, ti kutãn mãn tÿg nÿ,” he tóg.

⁵⁰ Hã ra Jesus tóg mēg mÿ, kÿ tóg ti mÿ: “mÿmēg tÿg nÿ,” he mÿ. “Inh vî hã kri finnÿ, kÿ ã kósin fi tóg há’ henh mÿ,” he tóg.

⁵¹ Kÿ ag tóg mÿ kÿ ti Ìn tá junjun mÿ sir, Jairo Ìn tá. Kÿ Jesus tóg ag tÿ Ìn kãra ge kamēg mÿ. “Pedro vÿ Ìn ra rãnh mÿ, inh mré, João ke gé, João kãke tÿ Tiago ke gé, gÿr fi panh ke gé, fi mÿnh fi ke gé,” he tóg, Jesus ti.

⁵² Hã ra ùn e fag vÿ tá nÿtÿ nÿ gé, kygfÿ fag nÿtÿ nÿ, vësÿrénh kÿ, Kÿ Jesus tóg fag mÿ: “kygfÿ tÿg ra,” he mÿ. “Fi pí(jé) ter mÿ! Fi nÿr vë,” he tóg.

⁵³ Hã ra fag tóg ti nÿg mÿ. Fi ter ki kanhró fag tóg nÿtÿ, hã kÿ fag tóg ti nÿg mÿ. Hã ra Jesus tóg fag mÿ: “ha mÿjēg,” he mÿ.

⁵⁴ Fag mÿn kar kÿ Jesus tóg fi nÿg kãgmÿg mÿ, kÿ tóg prër mÿ sir. “!..Nÿ ra, já..!” he tóg, jamã hár(a).

⁵⁵ Kÿ fi kuprÿg tóg fi to vÿn ke mÿ. Nÿ fi tóg mÿ sir, mÿr, ha mē, ùn ter mÿ ên fi. Kÿ Jesus tóg fag mÿ tó mÿ, fag tÿ fi mÿ vëjēn ven jé.

⁵⁶ Kŷ tóg fi han mũ fag mŷ e tãvĩ tĩ sir. Hã ra Jesus tóg fag mŷ tó mũ, fag tŷ ù mŷ tó tũg jé, fi rĩr mãn ja tag ti. Hã ra tóg fi ter mũ ra fi rĩn, Jesus ti.

9

Jesus tŷ ã mré mũ tĩ ag jěgně (Mt 10.5-15; Mc 6.7-13)

¹ Kŷ Jesus tóg ù tŷ 12 (ke) ag jé prěr mũ, ti tŷ ùn vin mũ ěn ag, ag vėnh mãn jé. Ag vėnh mãn kŷ tóg ag tar han mũ sir, ag tŷ vėnh jagrě kórég pan jé, ag tŷ ùn kagyga ag tŷ há' he jé gé.

² Kŷ tóg ag jěgněg mũ sir, ag tŷ Topě tŷ tŷ ěg pã'i nĩ ěn kãmén jé, vėnh kar mŷ, ag tŷ ùn kagyga ag tŷ há' he kãn jé gé.

³ Hã kŷ tóg ag mŷ ke mũ sir. “Ăjag mũn kŷ nén ù ma mũ tũg nĩ, vátó va mũ tũg nĩ, sacon ke gé, bolsa ěn, pão ke gé, jãnkamy ke gé. Kur régre rĩnh tũg nĩ gé,” he tóg.

⁴ “Ăjag tŷ ĩn ra ge mũ hã ki nũgnũr' hemnĩ, hã ki ajag tŷ kurã ki kãpanh ke tá krŷg nĩ,” he tóg.

⁵ “Ag tŷ ajag mŷ: “kãge jěg ra,” he jãvãnh nĩn kŷ tá kãpamnĩ. Tá kãpa kŷ ajag pėn hã kykũnhkũnh nĩ, ag tŷ to ki kanhró nŷtĩ jé sir, Topě tŷ ag tovãnh ken ki,” he tóg, Jesus ti.

⁶ Ti tŷ ag jěgněh kŷ ag tóg mũ sir, ù tŷ 12 (ke) ag. Ěmã kar mĩ ag tóg mũ sir. Topě kãmén ag tóg mũ mũ sir. Ûn kagyga ag tŷ há' he kãn ag tóg mũ gé sir, fag ke gé.

Jesus kãme tŷ pã'i tŷ Herodes mŷ e (Mt 14.1-12; Mc 6.14-29)

⁷ Kŷ pã'i mág tŷ governador tŷ Herodes vŷ měg mũ sir, Jesus tŷ nén han mũ ti. Kŷ tóg ti mŷ e tĩ. Kŷ ti tŷ ne to jykrén ke tóg tũ tĩ. Hã ra ù ag tóg Jesus to: “João Batista vė,” he tĩ. “João hŷn tóg ã ter kŷ rĩr mãn,” he ag tóg tĩ, Jesus to.

⁸ Jo ù ag tóg ti to: “Elias vė,” he tĩ gé. “Ti hŷn vėnh ven mãn, vãsŷ Topě vĩ tó tĩ ěn, Elias ti,” he ag tóg tĩ gé, Jesus to. Kŷ ù ag tóg ti to: “vãsŷ Topě vĩ tó tĩ ù hŷn rĩr mãn,” he tĩ gé.

⁹ Hã jěmě tóg, Herodes ti, kŷ tóg to jykrén kŷ: “João mŷ vó?” he mũ, Jesus to. “Hã ra sóg João krĩ kym, kŷ tóg tũ’ he mũ. Kŷ ù ně, hŷn’?” he tóg. “Nén han vãnh tŷ hėn ri ke hyn han tóg huri. Û ně, hŷn’?” he tóg. Herodes ti. Kŷ tóg kejėn ti ve sór mũ, ti tŷ ti mŷ e tĩn kŷ, hã ra Jesus vŷ ti venh tĩ tũ nĩ.

Jesus tŷ ù tŷ 5 mũl (ke) ag jěh (Mt 14.13-21; Mc 6.30-44; Jo 6.1-14)

¹⁰ Kejėn Jesus tŷ ùn vin mũ ag vŷ Jesus to vŷnvŷn ke mũ, ti tŷ ag jěgně ja ěn tá. Ti mŷ ag tóg kãmén mũ sir, ag tŷ nén han ja ěn kar ti. Kŷ tóg ag mré vėnh pėju kŷ tĩ mũ, ěmã tŷ Betsaida ra, vyr mŷ ag mré vėmėn jé.

¹¹ Hã ra ùn e ěn ag tóg měg mũ, Jesus tũg ti, kŷ ag tóg ti nón mũ mũ. Ag tŷ ti pėtėm kŷ tóg ag mŷ vĩ há han mũ, Jesus ti. Ag mŷ tóg kãmén mũ, Topě tŷ tŷ ěg pã'i nĩ sór ti. Ag kãmĩ ùn kagyga tŷ há' he tóg mũ gé, fag mré há.

¹² Ti tŷ ag mŷ tó jě ki tóg rãkě nŷ sir, kŷ ù tŷ 12 (ke) ag tóg Jesus to kãmũ mũ. Ti mŷ ag tóg: “ã tŷ ag jěgněnh há tóg tĩ,” he mũ, “ag tŷ ěmã kar mĩ mũ jé, pão comprar he jé, tá nũgnũr jé ke gé. Tag ki tóg ěmã tũ nĩ,” he ag tóg, Jesus mŷ.

13 Hã ra Jesus tóg ag mý: “vó,” he mû. “Ha inhhã ag jên,” he tóg. Kÿ ag tóg ti mý: “hã ra vëjên tóg êg mý tũ tĩ,” he mû. “Pão tÿ 5 (ke) hã vÿ ki nÿtĩ, pirã régre mré ke gé. Êg mý ag jo comprar henh mû vÿ, vëjên ti?” he ag tóg, Jesus mý.

14 Û tÿ mil tÿ 5 (ke) ag vë, ag tâvĩ, fag mré to tũ ra. Hã ra fag tóg tá e nÿtĩ gé, gÿr mré ke gé.

Ag tÿ ti mý ke kÿ Jesus tóg ã mré mû tĩ ag mý: “ag mý tugtó, ag nÿgnĩ jé,” he mû, “ag tÿ vënh nÿkrén jé, ù tÿ 50 (ke) pãte ù tÿ 50 (ke) ù pãte nÿgnĩ jé,” he tóg, Jesus ti, ã mré mû tĩ ag mý.

15 Kÿ ag tóg ke mû sir. Kÿ vënh kar tóg nÿgnĩ mû sir.

16 Kÿ tóg pão tÿ 5 (ke) in gég mû, pirã régre ên mré. Kÿ tóg kanhkã ki êvãnh mû, kÿ tóg Topê mré vÿ mû sir. Kÿ tóg pão vënh kãpópãm mû sir. Kÿ tóg ã mré mû tĩ ag mý vin mû, ag tÿ ùn e ên mý vënh kãpópãm jé, pirã ên mré hã.

17 Kÿ vënh kar tóg ko kãn kÿ funfór mû sir. Kÿ ag tóg ti ke ên gég mû. Kêj tÿ 12 (ke) fãn tóg, vëjên mru ên ti. Hã kÿ Jesus tóg pão tÿ 5 (ke) tÿ ùn e ag fónfãn ja nÿgtĩ.

Pedro tÿ Jesus tó
(Mt 16.13-19; Mc 8.27-29)

18 Kejên Jesus tóg Topê mré vÿ mû, ã pin kÿ. Hã ra ti mré mû tĩ ag tóg ti mré nÿtĩ nĩ. Kÿ tóg ag mý ke mû. “Ag iso hê ri ke tí?” he tóg ag mý, Jesus ti.

19 Kÿ ag tóg ti mý: “ù ag vÿ: João Batista vë, he tí, jãvo ù ag vÿ: Elias vë, he tí gé, jãvo ù ag vÿ: vãsÿ Topê vÿ to tũ ù vÿ rÿr mãn, he tí gé, ã to,” he ag tóg, Jesus mý.

20 Kÿ tóg ag mý: “ag jãvo ãjag hê ri ke tí, iso?” he mû. Kÿ Pedro vÿ ti mý kãmén mû. “Tÿ ã Cristo nĩ, Topê tÿ êg mý ùn jënêg mû ên vÿ tÿ ã nĩ,” he tóg, Pedro ti, Jesus mý.

21 Kÿ tóg ti mý vÿ tar han mû, Jesus ti, ag tÿ ù mý to tũ nĩ jé ver, ti tÿ tÿ Cristo nĩ ên.

Jesus tÿ ã jagtar ke tó vén
(Mt 16.20-28; Mc 8.30-9.1)

22 Kÿ tóg ag mý kãmén mû. “Tÿ sóg êprã ke fi kósin ên nĩ,” he tóg. “Ijagtar jagy han ke vë,” he tóg. “Kófa ag tÿ iso: kórég ti nĩ, henh ke vë, Topê tũ ki rÿr tĩ to pã'i ag ke gé, Topê vÿ to professor ag ke gé. Ag tÿ isén ke vë. Kurã tâgtũ tũg mû ra sóg rÿr mãn mû hã ra,” he tóg, Jesus ti.

23 Kÿ Jesus tóg vënh kar mý tó mû. “Ãjag tÿ inh mré kãmũ kÿ tóg há tÿnh mû,” he tóg. “Kÿ ãjag jykre tovãnh nĩ, ãjag tÿ isũ tâvĩ han jé. Ha vé, ag tÿ inh cruz tÿ inh kri fi kÿ sóg tũg ke mû, ag tÿ to isa kÿ isén jé, ha vemnĩ. Vënh nenh ke tũ sóg nĩ. Isÿ tag han ri ke han nĩ, kurã kar ki, ãjag tÿ inh mré mû sór nÿtÿn kÿ,” he tóg.

24 “Ãjag tÿ ãjag jykre hã han sór kÿ ãjag tÿ nũgme ki vár ke vë. Jãvo ãjag tÿ isugrÿn ãjag jykre tovãnh kÿ ãjag krenkren ke vë, ãjag kãgter ke mû (hã) ra.

25 ãjag tÿ ga kri mũn kÿ ãjag tóg nén kar ganhar he sór mû. Kÿ ãjag kuprÿg vÿ vãfor ke mû. Kÿ tóg kórég nÿ sir, ãjag rico tâvĩ nÿtĩ ra. Ganho há venh ke tũ ãjag tóg ke mû, gen kÿ.

26 Iso mÿ'ãg tũg nĩ, inh vÿ to. ãjag tÿ ùri iso mÿ'ãg kÿ sóg ãjag to mÿ'ãg ke mû gé, inh kãtÿg mãn ken kÿ. Tÿ sóg êprã ke fi kósin ên nĩ. Sÿnvĩ ti nÿnh mû, inh kãtÿg mãn kÿ, inh jóg tÿ inh jënên kÿ, ti tÿ isÿ ùn mág han kÿ. Kÿ ti tÿ jëgnê jafã ag vÿ inh mré kãmũnh mû gé, Topê tũ ag. Ên kã sóg ãjag to mÿ'ãg ke mû, ãjag tÿ ùri iso mÿ'ãg kÿ,” he tóg.

27 “Ki hã sóg tó mũ, ha mẽ. Ājag kãmĩ ù ag vỹ Topẽ tỹ tỹ ěg pã'i nĩ venh ke mũ, ag ter ke to hã, tag ki ěg mré nỹtĩ ù ag,” he tóg, Jesus ti.

*Jesus tỹ vẽn ven ù han
(Mt 17.1-13; Mc 9.2-8)*

28 Jesus tỹ tag tó kar kỹ kurã tỹ 8 (ke) vỹ tũg mũ. Kỹ tóg kejẽn ag mỹ: “mũ nỹ, vỹrmỹ,” he mũ. Pedro mỹ tóg ke mũ, João mỹ ke gé, Tiago mỹ ke gé. Ag hã mré tóg tĩ mũ, pãnónh ra, Topẽ mré vēmén jé.

29 Tá jun kỹ tóg Topẽ mré vỹ mũ sir. Kỹ tóg vãhã vẽn ven ù han mũ, vẽn ven kupri han tóg mũ. Ti kur tóg kópřej nĩ, kókov tóg nĩ, ti kur ěn ti.

30 Kỹ ùn régre ag tóg vãhã tá vẽn ven mũ sir. Kỹ ag tóg Jesus mré vēmén mũ sir. Moisés vẽ, Elias mré hã, ùn régre ěn ag.

31 Ag ve vỹ ti ve ri ke nĩ gé, Moisés mré Elias ti. Jesus mré ag tóg vēmén mũ, ti ter ken kãmén ag tóg mũ sir, ti tỹ Jerusalém tá ter ke mũ ěn ti.

32 Pedro ag mỹ tóg nũr há tãvĩ tĩ, ge ra ag tóg ag vég mũ sir, ag mỹ nũgnũr há (hã) ra. Hã kỹ ag tóg Jesus tỹ ag mỹ vẽn ven ù han mũ ěn vég mũ sir, ti kókov ěn ti, ti mré vēmén mũ ag ke gé.

33 Kỹ ù tỹ Jesus mré vēmén kỹ nỹtĩ ag tóg mũ sór mũ sir. Kỹ Pedro tóg Jesus mỹ: “Senhor,” he mũ. “Tag ki tóg há nĩ,” he tóg. “Ěg tỹ tag ki pãjó tãgtũ han kỹn hỹn há nĩnh mũ, ã mỹ, Moisés mỹ, Elias mỹ ke gé,” he tóg, Pedro ti. Hã ra tóg krĩ tũ nĩ, hã kỹ tóg pãjó tó mũ.

34 Pedro tỹ ver ti mỹ vēmén kỹ kanhkã góg vỹ ag kri rũm ke mũ sir. Kỹ ag tóg kamẽgmẽg mũ, kanhkã góg ěn ti.

35 Kỹ vẽn vỹ tóg mẽ há' he mũ, kanhkã góg ěn kãtã, kỹ tóg: “inh kósin hã vẽ,” he mũ. “Inh fe pẽ hã vẽ,” he tóg. “Ti vỹ jẽmẽ ra,” he tóg, vẽn vỹ ti, Topẽ ti.

36 Ag tỹ tag mẽ kar kỹ Jesus tóg ã pir mỹ tá jẽ nĩ sir. Ti mré vēmén ja ěn ag ve mãn tũ ag tóg nĩ sir, Pedro ag. Kỹ ag tóg mũ mũ. Hã ra ag tóg ù mỹ tó tũ nĩ ver, ag tỹ nẽn ve ja ti. Tỹ vēmén tũ ag tóg nĩ ver, ag tỹ kanhkã tá vẽn jykre ve ja ěn ti.

*Jesus tỹ kyrũ jagrẽ kórég kutẽm
(Mt 17.14-21; Mc 9.14-29)*

37 Tỹ vaj kỹ ag tóg pãnónh ěn tá kãre mũ, Jesus mré. Kỹ ag tóg ù tỹ hẽn ri ke ag vigvég mũ sir. Jesus kato ag tóg kãmũ mũ.

38 Kỹ vãhã ù tóg ag kãmĩ prẽr mũ, ha mẽ. “!..Senhor..!” he tóg. “!..Inh kósin ve ra..! Inh kósin pir vẽ.

39 Jagrẽ kórég ti nĩ, ha mẽ. Kỹ tóg kejẽn ti kã vỹryn ke tĩ, kỹ tóg prẽr tĩ, kỹ tóg ti ter ti han tĩ gé, kỹ tóg jãrãn mũ. Jãrãn kỹ tóg jũrũn' jũrũn' ke tĩ gé, kỹ tóg kejẽn ti tovãnh mũ sir, komẽr hã, ti rỹj kar kỹ.

40 Ā mré mũ tỹ ag mỹ sóg to vỹ mũ vẽ, ag tỹ ti jagrẽ kórég tag kutẽm jé, hã ra ag tóg ti tỹ hẽ ri ke tũ nĩ,” he tóg, ti panh ti, Jesus mỹ.

41 Kỹ Jesus tóg ti mỹ: “ãjag ne tóg inh ki ge há han tũ nĩgtĩ,” he mũ. “Jykre pãno ãjag nỹtĩ,” he tóg. “Kysã tỹ hẽn ri ke ki inh hỹn ãjag mré tĩ nĩ? Kysã tỹ hẽn ri ke ki inh hỹn ãjag to fe tĩg nĩ?” he tóg. “Inh mỹ ti pére kãtĩg nĩ,” he tóg, Jesus ti, ti panh mỹ.

42 Kỹ ag tóg ti pére kãmũ mũ. Ti jun kỹ ti jagrẽ tóg ti kã vỹryn ke mũ. Ti tỹ jũrũn', jũrũn' ke han tóg mũ sir. Kỹ Jesus tóg ti jagrẽ mỹ vỹ jũ han mũ, ti tỹ ti ki kãkutẽ jé. Hã ki tóg kyrũ ěn tỹ há' he mũ sir. Kỹ tóg ti panh mỹ: “té,” he mũ sir.

43 Kỹ tóg vẽn kar mỹ e tãvĩ tĩ. “Topẽ ne tóg tỹ ùn mág tãvĩ nĩ, ti jykre tóg há tãvĩ nĩ,” he ag tóg mũ sir, ag tỹ Jesus tỹ nẽn han mũ to jykren kỹ.

*Jesus tÿ ã jagtar ke tó mǎn
(Mt 17.22-23; Mc 9.30-32)*

Kÿ Jesus tóg ã mré mü ti ag mÿ:

⁴⁴ “ha mẽ há han,” he mü. “Ëprã ke fi kósin ên vÿ jagtar nÿnh ke mü. Inh hã vë,” he tóg. “Ëprã ke ag vÿ ãjag tÿ inh ki nén han sór mü ên han ke mü,” he tóg, Jesus ti.

⁴⁵ Hã ra tóg ag tÿ ti tÿ ã ter ke kãmén tag to jykrén tũ nÿgtÿ. Ag tÿ to jykrén mü ra ag tóg ki kagtÿg nÿtÿ. Kÿ ag tóg ãjag tÿ ti ki jëmê sór mü ra ti kamêg mü gé, hã kÿ ag tóg ti mÿ: “ã tÿ ne tó nê?” he tũ nÿ, Jesus mÿ.

Ûn mág

(Mt 18.1-5; Mc 9.33-37)

⁴⁶ Kejën Jesus mré mü ag vÿ jagnê mÿ vÿ jũ han mü. “Ëg kã ù tÿ hẽ nÿ jagnê kãfór nÿ?” he ag tóg jagnê mÿ. Tag to ag tóg jagnê mÿ vÿ jũ han mü.

⁴⁷ Hã ra Jesus tóg vég mü, ag tÿ nén to jykrén mü ti. Kÿ tóg gÿr jé prêr mü, ti tÿ ti mré jê jé.

⁴⁸ Kÿ tóg ag mÿ tag tó mü, ha mẽ. “Gÿr tÿ ge jê'ÿn nÿ, ti to há nÿtÿmnÿ, isugnÿn,” he tóg. “Ãjag tÿ isugrÿn ti to há nÿtÿn kÿ ãjag tóg iso há nÿtÿ gé sir. ãjag tÿ iso há nÿtÿn kÿ ãjag tóg ù tÿ inh jênêg mü to há nÿtÿ gé sir. Kÿ ãjag tÿ êgno kar vÿ tÿ ãjag mág kãfór kar nÿnh mü, ha mẽ, ãjag tÿ tÿ ùn mág nÿtÿ sór kÿ. Tag to jykrén nÿ,” he tóg, Jesus ti, ag mÿ.

Û tÿ êg kato tê tũ ag

(Mc 9.38-40)

⁴⁹ Kÿ João tóg Jesus mÿ: “Senhor’,” he mü. “Û ve êg tóg vënh jagrê pan tÿ, ã jiji tó kÿ, êg tÿ ùn vég mü ên ti,” he tóg, Jesus mÿ. “Hã ra tóg êg mré ti tũ nÿgtÿ, hã kÿ êg tóg ti mÿ: “vënh jagrê kórég pan sór tũg nÿ,” hé,” he tóg, João ti, Jesus mÿ.

⁵⁰ Kÿ Jesus tóg ti mÿ: “ù mÿ: “vënh jagrê kórég pan tũg nÿ,” he tũg nÿ,” he mü. “Û tÿ êg kato tê tũ nÿn kÿ êg mré ke vë sir,” he tóg, Jesus ti, João mÿ.

Samaria tá ke ag tÿ Jesus mÿ: “kãrã ra,” he sór tũ

⁵¹ Kejën Jesus ter ke kurã tóg kakó nÿ sir. Kÿ tóg to jykrén kÿ Jerusalém ra tÿg sór mü, ag tÿ tá ti tén jé. Kÿ tóg tÿg kÿ ù ag jëgnêg mü, vënh jo, ag tÿ ti jun ke tó jé, cidade kãsir tá.

⁵² Kÿ ag tóg mü mü, ag tÿ tón jé. Kÿ ag tóg cidade sÿ ù ki jun mü. Samaria tá ke ag jamã ù vë. Tá ag tóg ti nÿr ke ve sór mü.

⁵³ Hã ra tá ke ag tóg ag mÿ nenh mü. Ag mÿ ag tóg: “ãjag tÿ hẽ ra mü nê?” he mü. Kÿ ag tóg: “Jerusalém ra,” he mü. Kÿ tóg ag mÿ kórég nÿ, hã kÿ ag tóg ag mÿ cama ven sór tũ nÿ.

⁵⁴ Kÿ Tiago tóg jũ mü, João ke gé, Jesus mré mü ti ag. Kÿ ag tóg Jesus mÿ: “Senhor’,” he mü. “Ëg mÿ tóg há nÿnh mü, êg tÿ Topê mÿ: “kanhkã tá pÿ tÿ ag pÿn nÿ,” hen kÿ. Mÿ ã mÿ há nÿnh mü?” he ag tóg. “Ëg tÿ Elias tÿ nén han ja ên han há tóg tÿ,” he ag tóg, Jesus mÿ.

⁵⁵ Hã ra Jesus tóg ag jé vÿrÿn ke kÿ ag mÿ: “vÿ tũg ra,” he mü. “Topê jykre pijé’, ãjag tÿ nén han sór mü tag ti. Inh pi(jé) ag tũg sór mü’. Isÿ ag kren han sór vë jãvo, hã jé sóg kãtÿ mü, inh, hã vÿ: tÿ sóg êprã ke fi kósin ên nÿ, he mü,” he tóg, Jesus ti, ag mÿ.

⁵⁶ Kÿ ag tóg cidade ù ra mü mü, tá nũgnÿr jé sir.

*Ĕg tŷ Jesus mré mũnh ke
(Mt 8.18-22)*

⁵⁷ Ag mũnh kŷ ù tóg Jesus mŷ: “sŷ ã mré tŷg há tóg tĩ,” he mũ. “Ă tŷ hên ra tŷg kŷ sóg ã mré tŷg ke mũ,” he tóg.

⁵⁸ Kŷ Jesus tóg ti mŷ: “hã ra tóg jagy tĩ,” he mũ. “Īn tũ sóg nĩ. Mĩg vŷ kré nŷtĩgtĩ, jēsĩ vŷ jagfe nŷtĩgtĩ gé, ag jãvo isŷ hê tá nŷr ke tóg tũ tĩ. Tŷ sóg ěprã ke fi kósĩn ěn nĩ,” he tóg, Jesus ti.

⁵⁹ Kŷ Jesus tóg kejěn ù mŷ: “mũ nŷ, inh mré,” he mũ. Hã ra tóg ti mŷ: “inh hŷn ver tŷg mũ ha, sŷ inh panh ter kŷ ga ki ti fón jé ver,” he mũ.

⁶⁰ Hã ra Jesus tóg ti mŷ: “vó,” he mũ. “Inh ki ge tũ ag vŷ ã panh kej han mũnh mũ. Ă tŷ inhã inh mré tŷg há tóg tĩ, ã tŷ Topě tŷ tŷ ěg pã'i nŷnh ke ěn kãmén jé,” he tóg ti mŷ, Jesus ti.

⁶¹ Kŷ ù tóg ti mŷ ke mũ gé sir, Jesus mŷ. “Sŷ ã mré tŷg há tóg tĩ,” he tóg. “Hã ra sóg inh jamã ra tŷg sór mũ ver, sŷ inh mré ke fag mŷ isŷg ke tó jé,” he tóg, Jesus mŷ.

⁶² Kŷ Jesus tóg ti mŷ: “vó,” he mũ gé. “Ĕg tŷ arado tŷ ga kũm kŷ ěg pi(jé) vĕsŷjãm ěvãnh tĩ,” he tóg. “Ge ti nĩ, ã tŷ inh mré tŷg sór kŷ. Inh mré ã tóg tŷg mũ. Ă tŷ ã tũ han sór tŷn kŷ ã tóg Topě tŷ tŷ ěg pã'i nĩ tá krŷg ke tũ nĩ,” he tóg, Jesus ti, ù tŷ ti mré tŷg sór mũ mŷ.

10

Ũ tŷ 70 (ke) ag tŷ Jesus vĩ kãmén mũ

¹ Kŷ Jesus tóg ù ag vin mũ gé sir, ù tŷ 70 (ke) ag. Kŷ tóg ag jĕgnĕg mũ sir, ag tŷ ti jo mũ jé. Ũn régre tŷn', ũn régre tŷn' he tóg. Ag mŷ tóg ke mũ, ag tŷ ěmã kar mĩ Topě kãmén mũn jé, cidade kar mĩ ke gé. Ag nón tóg ra tŷg sór mũ gé, Jesus ti.

² Kŷ tóg ag mŷ: “inh mŷ ag tóg ěkré ri ke nŷtĩ, ãjag tŷ ùn mŷ tónh ke mũ ag,” he mũ. “Kejěn ěg jakré tóg éhé nŷgtĩ, hã ra ag pipir nŷtĩ, ù tŷ krenh ke mũ ag. Kŷ ag tóg ãjag tŷ krég mũ (hã) ra kre kãn tũ nŷgtĩ sir. Ge ti nŷgtĩ, inh vĩ ti. Ũn e ag tóg inh ki ge sór mũ nĩ, hã ra ù tŷ ag mŷ tónh ke tóg tũ tĩ,” he tóg. “Hã kŷ Topě mré vĩmnĩ, ti tŷ ù ag jĕgnĕn jé, ag tŷ ag mŷ tugtón jé, ti vĩ ti,” he tóg, Jesus ti, ã mré mũ ti ag mŷ.

³ “Ha mũjĕg. Ha vé, carneiro krĕ vŷ vĕnh jy nĩgãn ki kagtŷg nŷtĩ, mĩg tŷ ag mãn sór kŷ. Mé krĕ ěn ri ke ãjag nŷtĩ, hã ra sóg ãjag jĕgnĕg mũ, kŷ Topě vŷ ãjag jy nĩgãn mũ,” he tóg.

⁴ “Kŷ ãjag mũn kŷ sacco ma mũ tũg nĩ, bolso ěn, jãnkamy tũ ke gé, pĕn né vĕnh kafã gé(g) mũ tũg nĩ gé, pĕn to ró ěn. Kŷ ãjag tŷ ù ven kŷ ti mŷ: “ã mŷ há?” he tũg nĩ gé. Jatun mŷ mũmnĩ,” he tóg.

⁵ “Kejěn ãjag tóg ěmã ù tá junjun ke mũ. Kŷ ãjag tŷ ĩn ù ra ge kŷ tá ke fag mŷ: “Topě jé ãjag ki rĩr, kŷ ãjag jé jatun mŷ nŷtĩ nĩ,” hemnĩ fag mŷ,” he tóg, Jesus ti, ag mŷ.

⁶ “Kŷ tá ke ù tŷ inh ki rã kŷ tóg jatũ' he mũ sir, ti tŷ tŷ Topě kósĩn nŷn kŷ. Tá ke ù tŷ inh ki rã jãvãnh nŷn kŷ tóg jatũ' he tũ nĩ sir. Ti jãvo ãjag tóg jatũ' he mũ sir inhã.

⁷ Īn ěn krĕm nũgnũrnmnĩ, ãjag tŷ kãra ge ja ěn krĕm. Fag tŷ ãjag mŷ nĕn nĩm mũ ěn komnĩ gé. Ũn rãnrhãj han mũ ěn tóg ti kaja venh ke mũ, ti rãnrhãj kaja ti, hã kŷ ag tóg ãjag jĕn ke mũ sir, vĕnh kaja jé. Īn ù kãra ge tũg nĩ, ěmã ěn tá.

⁸ Ājag t̄y ěmā ũ tá junjun k̄y ĩn pir krēm n̄yťimnĩ, tá ke ag t̄y ājag m̄y: “kāge ra,” hen k̄y. Ag v̄ějĕn hā komnĩ.

⁹ Ūn kagyga ag t̄y há' hemnĩ. Ag m̄y: “Topĕ v̄y t̄y ājag pā'i n̄nh m̄, ũn ri,” hemnĩ.

¹⁰ Kejĕn ěmā ũ tá ke ag tóg ājag m̄y: “kāge ra,” he jāvānh n̄yťinh m̄. K̄y ěmā ěn f̄in rām k̄y ag m̄y tag tómnĩ, ha mĕ:

¹¹ “ha vé, ěg pĕn nug hā kykũnh ěg tóg m̄, ājag t̄y ěg kavĕnh tũ nĩ jé,” hemnĩ. “Ge ra ěg tóg ājag m̄ tó m̄, ěg t̄y ājag m̄ nĕn tónh kāmũ jan ki, hā v̄y: “Topĕ v̄y t̄y ěg pā'i n̄nh m̄, ũn ri,” he m̄,” hemnĩ ag m̄y,” he tóg, Jesus ti.

¹² “Ha mĕ, kurā t̄y ěgno ki ag tóg vĕs̄yřĕnh ke m̄, ag t̄y ājag v̄i mĕ jāvānh k̄y. Cidade t̄y Sodoma tá ke ag vĕs̄yřĕnh k̄áfór han jé ag tóg ke m̄, kurā ěn k̄ā, ha vemnĩ,” he tóg, Jesus ti, ag m̄y.

*Jesus t̄y ũ ag m̄y v̄i kónān
(Mt 11.20-24)*

¹³ K̄y tóg: “s̄y cidade t̄y Corazim ki ke ag m̄y tag tó sór m̄, ha mĕ,” he m̄. “Kórég ve jé ājag tóg ke m̄,” he tóg. “S̄y cidade t̄y Betsaida ki ke ag m̄y tag tó sór m̄ gé, ha mĕ. Kórég ve jé ājag tóg ke m̄ gé,” he tóg. “Ěg t̄y nĕn han vānh t̄y ěn ri ke hyn han isóg ājag m̄, milagre t̄y ěn ri ke, hā ra ājag tóg ājag jykre tovānh sór tũ n̄gtĩ,” he tóg. “Cidade t̄y Tiro tá, cidade t̄y Sidom tá sóg ěg t̄y nĕn han vānh ěn hyn han tũ nĩ. S̄y tá milagre hyn han m̄ ra ag tóg ājag jykre kórég tovānh m̄ vĕ, vās̄y,” he tóg. “Ājag jykre pāno to ag jykřĕn ke m̄ vĕ, kygf̄y ag m̄ vĕ, ag m̄y ti e t̄nh m̄ vĕ, s̄y ag m̄y tó m̄ ra. Ag jāvo ājag tóg tovānh sór tũ nĩ, to jykřĕn sór tũ pĕ nĩ!” he tóg, Jesus ti.

¹⁴ “Tiro tá ke ag v̄y vĕs̄yřĕnh k̄ān ke m̄, kurā t̄y ěgno ěn ki, Sidom tá ke ag ke gé, ag jykre pāno to. Ag vĕs̄yřĕnh k̄áfór han jé ājag tóg ke m̄ jāvo, ha mĕ,” he tóg, Corazim tá ke ag to, Betsaida tá ke ag to ke gé.

¹⁵ K̄y tóg: “s̄y cidade t̄y Cafarnaum ki ke ag m̄y tag tó sór vĕ, ha mĕ,” he m̄. “Ūri tóg ver ājag m̄ sér ti,” he tóg. “Kanhk̄ā ve jé ěg tóg ke m̄,” he ājag tóg t̄i, ón k̄y. Hā ra ājag tóg nũgme ki vār ke m̄ jāvo, inferno ki,” he tóg, Jesus ti. Ti t̄y ā v̄i jĕmĕ jāvānh m̄ ag m̄y v̄i kónān hā vĕ.

¹⁶ K̄y tóg ā mrĕ ke ag m̄y tag tó m̄. “Ū tóg ājag v̄i mĕ sór m̄, ha vemnĩ,” he tóg. “K̄y tóg sir inh v̄i mĕg m̄ gé, ti t̄y ājag v̄i mĕn k̄y. Ū tóg ājag v̄i mĕ sór tũ nĩ, ha vemnĩ. K̄y tóg inh v̄i mĕnh ke tũ nĩ gé. Ti t̄y inh v̄i mĕnh ke tũ n̄n k̄y tóg ũ t̄y inh jĕnĕg m̄ ěn v̄i mĕnh ke tũ nĩ gé sir, Topĕ v̄i ti,” he tóg, Jesus ti. Ti t̄y ā mrĕ m̄ t̄i ag m̄y tón hā vĕ, ag t̄y ti v̄i kāmĕn m̄ jé, kór há m̄, kuvar há m̄.

K̄y ag tóg sir m̄ m̄, ũ t̄y 70 (ke) ěn ag.

Ū t̄y 70 (ke) ag t̄y Jesus to v̄ynv̄yn ke

¹⁷ Kejĕn ag tóg ti to v̄ynv̄yn ke m̄, k̄y ag tóg ti m̄y v̄i sér han m̄ sir. “Senhor' ,” he ag tóg m̄. “Vĕnh jagřĕ kórég ag v̄y ěg v̄i ki han ti. Ā jiji tó k̄y ěg tóg ag m̄y v̄i ti, k̄y ag tóg ki hā han ti,” he ag tóg m̄, Jesus m̄y.

¹⁸ K̄y tóg ag m̄y: “vās̄y inh Japo vé, ti t̄y kanhk̄ā tá k̄átĕre k̄y,” he m̄. “Ti f̄in rām sóg, hā k̄y sóg ti fón. Ta t̄y kómkóm ke ri ke nĩ ja ti nĩ, ti kutĕ ja ěn ti.

¹⁹ Ti kri ke v̄y t̄y inh nĩ. Ha vé, ājag to sóg vās̄ān m̄, p̄yn t̄y ājag kókĕn tũ nĩ jé, ājag t̄y ti s̄ān m̄ ra, p̄yn kakřā ke gé, Nĕn-Kórég kar ag ke gé. Ū v̄y ājag kókĕn ke tũ pĕ nĩ gé.

²⁰ Hā ra tag to m̄y há n̄yťi tũg nĩ ver. Tag v̄y t̄y nĕn ũ tũ nĩ ver. Vĕnh jagřĕ kórég v̄y ājag v̄i han, vĕnh kupřĕg ke gé. Hā ra tag to m̄y sér n̄yťi tũg nĩ. Nĕn

ũ vỹ há pẽ nĩ, kỹ tag hã to mỹ sér nỹtĩmnĩ. Ājag jyjy vỹ ránrán kỹ nỹtĩ, Topẽ livron kĩ, kanhkã tá, ājag tỹ kanhkã tá junjun jé. Kỹ tag hã to mỹ sér nỹtĩmnĩ," he tóg, Jesus ti.

*Jesus tỹ ùn kãsir ag to há
(Mt 11.25-27; 13.16-17)*

²¹ Kỹ tóg Jesus mỹ sér tĩ, hora ên kã. Topẽ kuprĩg tỹ ti krĩn kỹ tóg ti mỹ sér tĩ: "jóg!", he mũ. "Tỹ ã tóg kanhkã tân ag kãfór kar nĩ, kar ã tóg tỹ êpra ke ag kãfór nĩ gé," he tóg. "Inh mỹ tóg há tĩ, ã tỹ nén han mũ ti. Ủ tỹ: "ki kanhró mág inh nĩ," he mũ ag mỹ ã tóg ã jykre ven ja tũ nĩ. Ag mỹ ã tóg kãmén ja tũ nĩ. Ủ tỹ gĩr ri ke ki kagtĩg ag hã mỹ ã tóg ven ja nĩ, ã jykre ti," he tóg. "Hỹ, hã vè. Á tỹ nén to jykrén mũn hã vè, hã kỹ ã tóg ag hã mỹ ã jykre ti nĩm. Hã ra tóg há tãvĩ nĩ, jóg!" he tóg, Jesus ti.

²² Kỹ tóg ã mré mũ tĩ ag mỹ: "inh jóg tóg inh mỹ tovãnh kãn, ã tỹ nén han ja kar ti," he mũ. "Kỹ ù pi(jé) ti kósin ki kanhró nĩ'. Inh jóg ne inh ki kanhró nĩ'. Kỹ ù pi(jé) inh jóg ki kanhró nĩ gé'. Inh hã ne ti ki kanhró nĩ', isỹ tỹ ti kósin nĩn kỹ. Hã ra sóg ājag mỹ ti kãmén jé kãtĩ mũ, inh jóg ti. Isỹ tag to ùn kuprẽg mũ ag hã mỹ sóg ti kãmén tĩ, inh jóg ti," he tóg, Jesus ti.

²³ Kỹ tóg ã mré mũ tĩ ag mỹ nén ù kãmén mũ gé. Vyrmỹ tóg ag mỹ ke mũ, kỹ tóg: "ājag hã ne vég mũ', Topẽ jykre ti, hã kỹ Topẽ tóg ājag ve há han mũ," he mũ. "Sér pẽ ti tĩ, ù tỹ ti jykre vég mũ ag mỹ," he tóg, Jesus ti.

²⁴ "Ki hã sóg tó mũ, ha mẽ. Ủ tỹ hèn ri ke ag vỹ inh ve sór tãvĩ ja nỹtĩgtĩ, vãsỹ, ājag tỹ ùri nén vég mũ tag ti. Hã ra ag tóg inh mur ken jo kãgter kãn. Topẽ vĩ tó tĩ ag ja vè, pã'i mág ag ja vè, hã kỹ ag tóg ājag tỹ nén vég mũ ve sór tãvĩ ja nỹtĩgtĩ. Hã ra ag tóg ve ja tũ nĩ, mẽ ja tũ ag tóg nĩ gé, ājag tỹ ùri nén mẽg mũ ti. Ājag hã ne mẽg mũ inhhã," he tóg, Jesus ti, ti mré mũ tĩ ag mỹ.

Samaria tá ke to comparação

²⁵ Kỹ vãhã Topẽ vĩ to professor ù vỹ ag kãmĩ jẽgnẽ mũ, kỹ tóg Jesus ki jẽmẽ sór mũ. Ti tỹ ón kỹ ti vĩ mẽ sór vè, hã kỹ tóg ti mỹ: "Senhor'," he mũ. "Inh hỹn hẽ ri kenh mũ, isỹ rĩr krỹg ja tũ ve jé?" he tóg, Jesus mỹ.

²⁶ Kỹ Jesus tóg ti mỹ: "ne nỹ hỹn rán kỹ nĩ, Topẽ vĩ ki?" he mũ. "Topẽ jykre tỹ ne han jé ã ke mũ hỹn?" he tóg. "To ke há ã tóg nĩ, ha inh mỹ tó," he tóg.

²⁷ Kỹ tóg ti mỹ: "Topẽ vỹ tỹ ã kri ke nĩ, kỹ ti hã to há nĩmnĩ, ti ki rã há han nĩ, ti to jykre pĩr nĩmnĩ, ti to tar nĩmnĩ, ti mỹ ã tỹ nén han mũ kar ên han nĩ, ha mẽ. Kỹ ã régre kar ki rĩr nĩmnĩ gé, ã tỹ vènh ki rĩr há han ri ke. Topẽ tỹ nén tón hã vè," he tóg, Topẽ vĩ to professor ti.

²⁸ Kỹ Jesus tóg: "hỹ," he mũ. "Ki hã ã tóg tó mũ," he tóg. "Tag han ra, kỹ ã tóg rĩr krỹg ja tũ venh ke mũ," he tóg.

²⁹ Hã ra tóg ti mỹ há tũ nĩ, Jesus vĩ tag ti, hã kỹ tóg ti mỹ: "kỹ ù nỹ tỹ inh régre nĩ?" he mũ.

³⁰ Kỹ Jesus tóg ti mỹ tag tó mũ, ha mẽ. "Kejẽn ù tóg nĩgtĩ. Hã ra tóg Jerusalém tá kãtĩg kỹ Jericó ra tĩ mũ. Êpřy jagma, êmĩn jagma ùn jykre kórég ag tóg ti jo vãjig mũ, bandido ag. Kỹ ag tóg ti kãgmĩ kỹ ti kur kunũg mũ. Ti mrãnmrãn ag tóg mũ. Ti tén kren ag tóg mũ, kỹ ag tóg hã ki ti tovãnh kar mũ mũ sir, ti tũ mãn kãn kỹ. Kỹ tóg tá nỹ nĩ sir.

³¹ Ti tỹ tá nỹ ra ù tóg êpřy ên jagma kãtĩ mũ gé. Topẽ tũ ki rĩr tĩ ù vè. Ti vég tóg mũ, ùn vèsỹrènh kỹ nỹ ên ti, hã ra tóg ti venh rã tũ nĩ. Êmĩn jagma tóg tĩ mũ.

³² Kĩ vāhā Levi krē ũ tóg ĕpɾy jagma kātī mũ gé. Tá jun kĩ tóg ti vég mũ gé, hã ra tóg ti venh rã tũ nĩ gé. Ĕmĩn jagma tóg tĩ mũ gé sir.

³³ Kĩ vāhā Samaria tá ke ũ tóg ĕpɾy jagma kātī mũ gé. Kĩ tóg tá jun mũ, kĩ tóg ti vég mũ.

³⁴ Kĩ tóg ti venh rã mũ inhhã. Ti kɾygtãg tóg mũ sir, azeite tỹ, vinho tỹ ke gé, ti mỹ to tũn kĩ. Ā kur tỹ tóg ti pãg mũ sir. Kĩ tóg ã mēg kri ti nĩm mũ, ã tỹ ti ma tĩg jé. Hã kĩ tóg ag tỹ ĩn krēm nũr jafã tá jun mũ sir. Kĩ tóg tá ti ki rĩr mũ.

³⁵ Tỹ vaj kĩ tóg tĩg mãn sór mũ, hã kĩ tóg ũ tỹ ĩn ki rĩr mũ ĕn mỹ jãnkamy régre vin mũ, kĩ tóg ti mỹ: “ti ki rĩr há han,” he mũ. “Jãnkamy tag tỹ ã mỹ tá krỹg tũn kĩ sóg ã mỹ kajãm mãn mũ, sỹ vỹn ken kĩ,” he tóg. “Kajãm kãn jé sóg ke mũ, sỹ vỹn ken kĩ,” he tóg, Samaria tá ke ĕn ti. Ti tỹ ũn kaga ki rĩr mũn hã vĕ,” he tóg, Jesus ti.

³⁶ Kĩ tóg: “kỹ ũn tãgtũ ag vỹ ti ve ja nĩ. Ag kã ũ tỹ hĕ nỹ tỹ ti régre ja nĩ, ag tỹ ũn vóg kónãn ja ĕn régre? Ha to jykrĕn (ke)ma’,” he tóg, Jesus ti, Topĕ vĩ to professor ĕn mỹ.

³⁷ Kĩ ũ tỹ ti ki jĕmĕg mũ ĕn tóg ti mỹ: “ũ tỹ ti jagãgtãn mũ ĕn vỹ tỹ ti régre ja nĩ,” he mũ.

Kĩ Jesus tóg ti mỹ: “hỹ, tó há han ã,” he mũ. “Kỹ ĕn ri ke han nĩ. Ũn vĕsỹrénh mũ ag jagãgtãn kãn nĩ, ti ri kĕn,” he tóg, Jesus ti. Ti tỹ ũ tỹ ón kĩ ti ki jĕmĕg mũ mỹ tón hã vĕ.

Jesus tỹ Maria mré Marta fag venh tĩg

³⁸ Kejĕn ag tóg mũ mũ, Jesus ag, kĩ ag tóg ĕmã sĩ ũ ki junjun mũ. Tá ũ fi tóg nĩ nĩ, fi jĩjin hã vỹ: Marta, he mũ. Ĕn fi vỹ Jesus mỹ: “inh ĩn kãra ge jĕg, ajag tỹ ĕg mré nỹtĩ jé,” he mũ.

³⁹ Kĩ fi jãvy fi vỹ nĩ gé, hã vỹ: Maria, he mũ. Kĩ Maria fi vỹ Jesus mré nĩ nĩ, ti vĩ jĕmĕ jé.

⁴⁰ Hã ra Marta fi vỹ rãnrhãj (ka)mĕ nĩ, Jesus ag mỹ vĕjĕn han jé. Jãvo Maria fi tóg nĩ nĩ.

Kĩ Marta fi tóg Jesus mỹ: “Senhor’,” he mũ. “Rãnrhãj mág han tĩ sóg nĩ, hã ra fi tóg nĩ nĩ. Fi mỹ ké, fi tỹ inh mré vĕjĕn ki rĩr jé,” he fi tóg mũ.

⁴¹ Hã ra Jesus tóg fi mỹ: “krĩ kufy ã tóg nĩ, nĕn ũ tũ to, hã ra fi tóg inh vĩ jĕmĕg nĩ nĩ,” he mũ, Marta fi mỹ. “Vĕjĕn to vĕnh kutãn tũg nĩ.

⁴² Nĕn ũ pir hã ne há nĩ’, hã vỹ: inh vĩ, he mũ. Maria fi vỹ inh vĩ hã jĕmĕ sór mũ, kĩ sóg fi mỹ: “ha nĕn ũ han,” he jãvãnh nĩ. Nĕn ũ há kuprĕg fi tóg, fi tỹ inh vĩ mĕ sór kĩ,” he tóg, Jesus ti, Marta fi mỹ.

11

Ĕg tỹ Topĕ mré vĕmĕn

(Mt 6.9-15; 7.7-11)

¹ Kejĕn tóg Topĕ mré vĩ mũ, Jesus ti, ĕmã ũ tá nĩ kĩ. Ti tỹ Topĕ mré vĕmĕn kar kĩ ti mré mũ tĩ ag tóg ti mré vĩnh kãmũ mũ. Kĩ ag tóg ti mỹ: “Senhor’,” he mũ. “Ĕg kanhrãn nĩ, ĕg tỹ Topĕ mré vĩ há han jé. João vỹ ã mré mũ tĩ ag kanhrãn. Ge ki ĕg kanhrãn nĩ gé,” he ag tóg, Jesus mỹ.

² Kĩ tóg ag kanhrãn kĩ ag mỹ:

“Topĕ mré vĩ kĩ tag tómnĩ, ha mĕ,” he mũ.

“Ĕg jóg mág, ã jyjy tó ĕg tóg tĩ.

Kĩ vĕnh kar jé ã tỹ tỹ ũn mág nĩ vé.

Ĕg jé kãnhmar ã tỹ tỹ ĕg pã'i nĩ vé.

³ Ĕg mỹ ĕg jẽn ti nĩm, kurã kar ki, ĕg tỹ kurã kar ki ko tĩ ĕn.

⁴ Kỹ ĕg mỹ vẽn h pãte fón nĩ, ĕg tỹ ã vĩ mranh ja ti, hã jé ĕg tóg ĕg tỹ jagnẽ to jũ tỹ jagnẽ mỹ vẽn h pãte fón ke mũ gé.

Kỹ ĕg tỹ ã vĩ mranh sór kỹ ĕg kren han nĩ, ĕg tỹ mranh tũ nĩ jé," hemnĩ," he tóg, Jesus ti.

⁵ Kỹ tóg ag mỹ ĕg tỹ Topẽ mré vēmén tĩ ĕn kãmén mãn mũ. Kỹ tóg ag mỹ: "kejẽn ù tóg nĩgtĩ," he mũ. "Kuty si há tá tóg ã régre ĩn ki jun mũ. Kỹ tóg ti mỹ: "régre'," he mũ. "Inh mỹ ĕmĩ tãgtũ nĩm, sỹ kar ã mỹ ti ri kén kỹ nĩm jé," he tóg.

⁶ "Inh mré ke ù vỹ jun. Kór há tá tóg kãtĩg, kuvar há tá. Hã ra sỹ ti mỹ ne han ke tóg tũ tĩ," he tóg, ã régre mỹ.

⁷ Kỹ ti régre tóg ti mỹ: "hã ra sóg nũr nỹ nĩ," he mũ. "Kar inh krẽ tóg inh mré nũgnũr nỹtĩ gé. Jãnkã vỹ nĩfénh kỹ jẽ nĩ. Hã kỹ tóg inh mỹ vẽnhmỹ tĩ, inh nĩnh ke mũ ra, sỹ ã mỹ ĕmĩ nĩm jé. Û ki jãvãnh," he tóg ti mỹ.

⁸ Hã ra tóg sir to vĩ mãn', to vĩ mãn' he mũ. Hã kỹ tóg nĩ kỹ ti mỹ nĩm mũ sir, ti tỹ ti mỹ ĕmĩ to vĩ mũ ti. Ti régre vẽ, ù tỹ ti mỹ to vĩnh kãtĩ mũ ti. Ge ra tóg ti mỹ nĩm ke tũ nĩ vẽ, ti tỹ tỹ ti régre ra. Ti tỹ ti mỹ to vĩ mãn', to vĩ mãn' he tugrĩn tóg sir ti mỹ nĩm mũ jãvo. Ĕg tỹ Topẽ mré vĩ ri ken hã vẽ," he tóg, Jesus ti.

⁹ "Ha mẽ, sỹ ãjag mỹ nén tó mũ tag ti. Topẽ mỹ nén kar to vĩmnĩ, kỹ tóg ãjag mỹ han mũ sir. Ājag tỹ ti mỹ nén ù to vĩ mũ ĕn jãvãnh nĩ, kỹ ãjag tóg venh ke mũ sir. Ti mré vĩ kỹ ĕg tỹ ti jãnkã tỹ tórón tórón ke ri ke han nĩ, kỹ tóg ãjag mỹ ti róm ri ke han mũ, ti tỹ ãjag mỹ ãjag tỹ nén to vĩ mũ ĕn han kỹ.

¹⁰ Hỹ, hã vẽ. Ājag tỹ ti mỹ nén to vĩn kỹ tóg ãjag mỹ han mũ. Ājag tỹ ti jãvãnh kỹ ãjag tóg venh ke mũ. Ājag tỹ ĕg tỹ jãnkã tỹ tórón tórón ke ri ke han kỹ tóg ãjag mỹ ti róm ri ke han mũ.

¹¹ Kejẽn ãjag kósin tóg ãjag mỹ pirã to vĩ mũ. Kỹ ãjag pi(jé) ti mỹ pỹn nĩm ke mũ'. Pirã hã nĩm jé ãjag tóg ke mũ.

¹² Kejẽn tóg ãjag mỹ garĩnh ovo to vĩ mũ, ãjag kósin ti. Kỹ ãjag pi(jé) ti mỹ pỹn kakrã nĩm ke mũ'. Garĩnh ovo hã nĩm jé ãjag tóg ke mũ.

¹³ Jykre pãno ãjag nỹtĩ. Ājag jykre pãno (hã) ra ãjag tóg ãjag krẽ mỹ nén ù há nĩm tĩ. Ge ti nĩ gé, ãjag tỹ Topẽ mỹ nén ù to vĩn kỹ. Nén ù há hã nĩm jé tóg ke mũ. Hã ra tóg ãjag kãfór han tĩ, ĕg jóg tỹ kanhkã tá nĩ ti. Ājag tỹ ti mỹ to vĩn kỹ tóg ã kuprĩg tỹ ãjag jagrẽ han ke mũ mỹr, Topẽ ti," he tóg, Jesus ti.

*Jesus tỹ Topẽ jykre hã han kỹ tar nĩ
(Mt 12.22-30; Mc 3.20-27)*

¹⁴ Kejẽn tóg ùn jagrẽ kórég mỹ ti jagrẽ kutẽm mũ. Ti vĩ vãnh han ja tóg nĩ, ti jagrẽ ti. Jesus tỹ ti kutẽm kar tóg vĩ há nĩ sir. Kỹ tóg vẽn h kar mỹ e tĩ sir, ag mỹ tóg sér tĩ sir.

¹⁵ Hã ra ù ag tóg ti to: "jagrẽ kórég ti nĩ," he mũ. "Nén-Kórég ag pã'i vỹ tỹ ti jagrẽ nĩ, Satanás ĕn, Belzebu he mũ ĕn," he ag tóg mũ, ón kỹ. "Hã kỹ tóg Nén-Kórég ag pan tĩ, ag jagrẽ kórég ag. Nén-Kórég ag pã'i jykre tỹ tóg ag pan tĩ," he ag tóg ón kỹ, Jesus to.

¹⁶ Hã ra ù ag tóg ón kỹ ti jykre ve sór mũ gé, kỹ ag tóg ti tỹ ĕg tỹ nén han vãnh han mũ ve sór mũ sir, ti tỹ ag mỹ kanhkã jykre ven jé.

¹⁷ Hã ra Jesus tóg ki kanhró nĩ, ag tỹ nén to jykrén mũn ki. Hã kỹ tóg ag mỹ: "pã'i pir krẽm ke ag tỹ jagnẽ kato tẽn kỹ ag tóg jagnẽ kãgtén kãn ke mũ," he

mũ. “Īn pir krēm ke fag tỹ jagnē kato tēn kỹ fag tóg jagnē kãgtén kãn ke mũ gé sir.

¹⁸ Ge ti nĩ, Nén-Kórég ag jykre ti. Nén-Kórég ag tỹ jagnē kato tēn kỹ ag tóg jagnē tỹ tũ' henh mũ gé vė, Satanás ag. Hã kỹ tóg vėnhmỹ nĩ, ājag vĩ ti, ājag tỹ iso: “Satanás jykre tỹ, Belzebu ěn jykre tỹ tóg Nén-Kórég ag pan tĩ,” he mũ ti. Ag tỹ jagnē kato tēgtē to ken hã vė sir, ha mẽ,” he tóg, Jesus ti.

¹⁹ “Belzebu jykre tỹ tóg ag pan mũ, Nén-Kórég ag,” he ājag tóg tĩ iso. Ājag mré ke ag to jykrén nĩ. Nén-Kórég ag pan ag tóg tĩ gé, ājag mré ke ag. Ag pi(jé) Satanás jykre ki ag pan tĩ'. Topē jykre ki ag tóg ag pan tĩ (mỹr') Ājag tỹ tag to jykrén kỹ ājag tóg inh jykre há ki kanhrãn ke mũ vė,” he tóg ag mỹ, Jesus ti.

²⁰ “Topē kuprĩg jykre tỹ sóg Japo ag pan tĩ mỹr, ha mẽ. Topē kuprĩg tỹ Japo ag pan kãn kỹ Topē tóg tỹ ěg pã'i nĩ vė, mỹr. Tag to jykrén nĩ,” he tóg, Jesus ti.

²¹ “Ū tỹ é he (ka)mě ag tóg ājag tũ ki rĩr há han ti. Ag rógro vỹ jēgtĩ, kỹ ag tóg ājag ĩn ki rĩr tĩ sir, ũ tỹ ag tũ mãg tũ nĩn jé. Kỹ ũ tóg ag tũ vóg ke tũ nĩ gé, ag tỹ ki rĩr há han kỹ.

²² Kejēn ũ tóg ũ tóg ũ tỹ é he (ka)mě ěn in tá jun mũ, ũ tỹ ti tar kãfór nĩ ti. Ti rárã kãfór nĩn kỹ tóg ti tỹ hēn ri kenh mũ sir. Kỹ tóg ti rógro vãg mũ. Ti tỹ ũn kãgtén jafã vãg tóg mũ, kỹ tóg ti tũ mãn kãn mũ gé sir. Ge ti nĩ, isỹ nén han mũ ěn ti. Ū tỹ é he (ka)mě ri ke ti nĩ, Japo ti, hã ra sóg ũn tar ěn ri ke nĩ,” he tóg.

²³ “Ājag tỹ tỹ inh mré ke tũ nỹtĩn hã kỹ ājag tóg inh kato tēgtē mũ. Ājag tỹ inh mré ěprã ke ag tỹ Topē to kãmũ han tũ nĩn kỹ ājag tóg ag kãmũ kaměg mũ,” he tóg.

Vėnh jagrē kórég vỹn kenh ke (Mt 12.43-45)

²⁴ “Kejēn sóg vėnh jagrē kórég ũ kutēm mũ. Kỹ tóg ga kórég mĩ tĩ mũ, ti jagrē ěn ti. Goj venh ke tũ tóg nĩ, tá. Vėnhkãn ke tũ tóg nĩ gé, ti tỹ hē ri ken kỹ vėnhkãn ke tũ tĩn kỹ. Kỹ tóg vãhã to jykrén mũ sir. “Inh hỹn ěn ra tĩg mãn ha, sỹ ũ tá kãkutē ja ěn ra. Inh mỹ tóg tỹ ĩn ri ke ja nĩ, kỹ inh jé hỹn ti kãra rã mãn ha,” he tóg mũ, ti jagrē ěn ti.

²⁵ Kỹ tóg ti venh kãtĩ mũ. Hã ra tóg sir krĩ há nĩ. Kỹ tóg ti mỹ ĩn há ri ke nĩ sir, ĩn prur, ĩn sĩnvĩ ri ke.

²⁶ Kỹ tóg Nén-Kórég tỹ 7 (ke) ag mỹ tónh tĩ mũ sir. “Ha kãmũ jēg,” he jé tóg ke mũ. Hã ra ag jykre pãno tóg ti jykre pãno kãfór nĩ. Kỹ ag tóg sir ũ ěn kãge ge mũ, tỹ ag tóg ti jagrē nỹtĩ sir, isỹ ũn mỹ ti jagrē pir kutēm ja ěn ti. Hã kỹ tóg kórég tãvĩ nĩ sir. Ti jagrē kórég pir kutēm inh nĩ vė, hã ra ũ tỹ 8 (ke) ag tóg tỹ ti jagrē nỹtĩ, ti tỹ inh ki rã tũ nĩn kỹ,” he tóg, Jesus ti. Ti tỹ ag mỹ vėnh jagrē jykre tón hã vė.

Topē tỹ ěg ve há han ke

²⁷ Kỹ ũ tỹ ti vĩ mēg mũ ũ fi tóg prēr mũ sir, fi tỹ ti vĩ tag mẽ kỹ. Ūn e ěn kãmĩ fi tóg jē nĩ, kỹ fi tóg ti mỹ ke mũ. “!..Topē vỹ ā mỹnh fi ve há han, fi tỹ ā han tugrĩn, fi tỹ ā pãfãm tugnen..!” he fi tóg, prēr kỹ.

²⁸ Kỹ Jesus tóg fi mỹ: “hỹ,” he mũ. “Hã ra Topē vỹ ā ve há han ke mũ gé, ā tỹ ti vĩ jēmēn kỹ. Hã kỹ ā tỹ ti vĩ mẽ kỹ ke króm nĩ, kỹ tóg ā ve há tãvĩ han ke mũ,” he tóg, Jesus ti, ũ tỹ prēr mũ ěn fi mỹ.

Jesus tỹ ón kỹ milagre han ke tũ (Mt 12.38-42)

²⁹ Hã ra ũ tỹ hën ri ke ag tóg sir tá junjun mũ, ti vĩ mẽ jé. Kỹ tóg fór távĩ tĩ. Kỹ Jesus tóg ag mỹ: “kórég ãjag nỹtĩ,” he mũ. “Ón kỹ ãjag tóg nén han vãnh ve sór mũ. Venh ke tũ ãjag tóg nĩ. Nén ũ pir hã ve jé ãjag tóg ke mũ, hã vỹ: Jonas tỹ nén ve ja ên ri ke, he mũ,” he tóg.

³⁰ “Jonas vỹ cidade tỹ Nínive tá ke ag mỹ Topẽ vĩ tó ja nĩ, kỹ ag tóg ti vĩ mẽ há han ja nĩ. Ên ri ke han jé sóg ke mũ, ãjag mỹ. Tỹ sóg êprã ke fi kósin ên nĩ,” he tóg.

³¹ “Kỹ pã'i mág ên fi, kanhkã tâpér tỹ sul tá kãtĩg ja ên fi, tâ tá kãtĩg ja ên fi vỹ nĩnh ke mũ gé, kurã tỹ êgno ki, sỹ vãnh kar jykre venh ke kurã ên ki. ãjag mré fi tóg jênh mũ, kỹ Topẽ tóg ãjag mỹ vĩ kónãn ke mũ, fi ve kỹ. Kanhkã fyr ja tá fi tóg kãtĩg ja nĩ, vãsỹ, fi tỹ pã'i mág tỹ Salomão vĩ mẽ jé. Salomão kãfór vỹ tỹ inh nĩ, hã ra ãjag tóg inh vĩ mẽ jãvãnh nỹtĩ fi jãvo,” he tóg.

³² “Kỹ Topẽ vỹ Nínive tá ke ag ve kỹ ãjag mỹ vĩ kónãn ke mũ gé, kurã tỹ êgno ên ki, ha vemnĩ. Nínive tá ke ag tỹ Jonas vĩ mẽ kỹ ag tóg ãjag jykre togvãnh ja nĩ. Tỹ sóg Jonas kãfór nĩ, hã ra ãjag tóg ãjag jykre tovãnh jãvãnh nỹtĩ, sỹ ãjag mỹ tó tĩ (hã) ra,” he tóg, Jesus ti.

Jêngrê ri ke êg nỹtĩ
(Mt 5.15; 6.22-23)

³³ “Êg tỹ lampião grug kỹ êg pi(jé) ãn krêm pēju kỹn fêg tĩ', êg pi(jé) kěj krêm fêg tĩ'. Tĩ fêg jafã kri êg tóg fêg tĩ, lampião gru ti. Kỹ êg tóg ti gru tỹ ve há jêgtĩ, êg tỹ ãn kãtã kãmũ kỹ,” he tóg, Jesus ti.

³⁴ “Êg kanê hã tóg tỹ êg tỹ ve jafã nĩ. Kỹ tóg êg jo kurã han tĩ, êg kanê ti, ti há nĩnh kỹ. Kỹ tóg êg jo kurã kar nĩ sir, êg kanê há nĩnh kỹ. Êg kanê kórég nĩnh kỹ tóg êg jo kuty ke kãn mũ sir. Kỹ tóg ge nĩ, êg jykre kórég ti. Êg kanê kórég ri ke ti nĩ, êg jo kuty han tóg tĩ.

³⁵ Kỹ vãnh kanhrãn nĩ. Ke tũ nĩ mũ ra tóg ãjag jo kuty ri ke nĩ. Vãnh jykre kórég hã vê. Kỹ vãnh jykre kórég han sór tũg nĩ.

³⁶ ãjag jo kurã nĩnh kỹ tóg há távĩ nĩ, ãjag jo kuty tũ nĩnh kỹ, ãjag jo kuty sĩ tũ nĩnh kỹ ke gé. ãjag jykre há távĩ nĩnh kỹ tóg ãjag jo kurã ri ke nĩ. Kỹ ãjag tóg sir lampião gru ri ke nỹtĩ gé. Lampião gru mág nĩnh kỹ tóg kómkóm ke tĩ, êg kanê jo, kỹ tóg êg mỹ jêngrê há han tĩ. Ge êg nỹtĩ, êg jykre há távĩ nĩnh kỹ, ti kórég sĩ tũ nĩnh kỹ,” he tóg, Jesus ti. Ti tỹ ag mỹ Topẽ jykre há tón hã vê.

Jesus tỹ ãn jykre régre ag mỹ vĩ kónãn
(Mt 23.1-36; Mc 12.38-40)

³⁷ Ti tỹ ag mré vêmén kar Fariseu ũ tóg ti mỹ: “inh mré jên kãtĩg,” he mũ. Kỹ tóg ti mré tĩ mũ, ti mré jên jé, Jesus ti.

³⁸ Hã ra Jesus tóg Judeu ag jykre han ja tũ nĩ, ag jên jé ag tóg vãnh nĩgpég tĩ. Kỹ tóg Fariseu ên mỹ e tĩ. Kỹ tóg to jykrén kónãn mũ sir.

³⁹ Kỹ Jesus tóg ki kanhró nĩ, kỹ tóg ti mỹ kãmén mũ. “Fariseu vỹ tỹ ãjag nỹtĩ,” he tóg. “Kỹ ãjag tóg copo ven ja kugpég tĩ, pénky ven ja ke gé, hã ra ti kãtã ke tóg kavéj nĩ. Kỹ ãjag jykre vỹ ge nỹtĩ gé. Jykre há nĩ ve ãjag tóg nỹtĩ, hã ra ãjag tóg vãnh jykre pãno han tĩ, hã vỹ: jãnkamy to ag lograr he tĩ, he mũ, ãjag prũ tũ fag mré nỹ, he mũ gé.

⁴⁰ Krĩ tũ pẽ ãjag nỹtĩ. Ũ tỹ êg ven ja han mũ vỹ êg jykre han mũ gé mỹr. Êg jykre há nĩnh kỹ êg ven ja vỹ há nĩ gé.

⁴¹ Ũ jagãgtãn ra, ãjag tỹ nén ũ tỹ. Vãnh jykre há kar han ra, kỹ tóg ãjag tỹ nén ũ kar jãnhkri nĩ ri ke nĩ sir,” he tóg.

42 “Fariseu’, Topê vỹ ãjag ve kónãn. Ón ký ãjag tóg Topê mỹ ãjag jakré tỹ dízimo han kãn tí. ãjag jakré tỹ hortelã tỹ 10 (ke) nĩn ký ãjag tóg Topê mỹ ùn pir nĩm tí, dízimo han ký. ãjag jakré tỹ arruda tỹ ãjag tóg dízimo nĩm tí gé, ãjag jakré tỹ vènh kagta kar tỹ mỹr, ãjag tỹ nèn ù kar mré hã. Nèn ù kar tỹ ãjag tóg dízimo vin tí, Topê mỹ. Hã ra ãjag tóg vènh jykre kuryj han tũ nĩ jãvo. Topê to há tũ ãjag tóg nỹtĩ, ti vỹ jẽmẽ jãvãnh ãjag tóg nỹtĩ. ãjag tỹ ti tỹ ẽg jyvẽn ki króm mré hã ãjag jakré tỹ dízimo vin ra tóg há tãvĩ nĩnh mũ vè, ha mẽ. Hã ra ãjag tóg ki króm sór tũ nĩgtĩ,” he tóg.

43 “Fariseu’, Topê vỹ ãjag ve kónãn. Vènh kanhrãn jafã krêm ãjag tóg vènh kãpãm ký nỹtĩ, vènh kar tỹ ãjag ve jé. Cidade kaju tá ãjag tóg mũgtĩ, ký vènh kar tỹ ãjag mỹ: “Senhor, ã mỹ há?” hen ký tóg ãjag mỹ sér tí.

44 Topê vỹ ãjag ve kónãn mỹr. Vènh kej si ri ke ãjag nỹtĩ, vènh kej to ró tũ ri ke. Kri mũ ag tóg tí, vènh kar, ký ag tóg ki kagtũg nỹtĩ, ti tỹ tỹ vènh kej nĩ ti. Ký ag tóg vènh vatãnh tá vènh kavènh tí. Tag ri ke ãjag tóg nỹtĩ. Ký ãjag krêm ke ag vỹ Topê vỹ mranh tí, ãjag ven ký,” he tóg, Jesus ti, Fariseu ag mỹ.

45 Ký Topê vỹ to professor ù tóg Jesus mỹ: “ã tỹ Fariseu ag mỹ tag tó ký ã tóg ẽg to vỹ kónãn tí nĩ gé, ag mré,” he mũ, ẽg Senhor mỹ.

46 Ký tóg: “ón ký Topê vỹ to professor,” he mũ. “Hỹ, Topê vỹ ãjag ve kónãn gé,” he tóg. “Vènh kar mỹ ãjag tóg vènh jykre kufy nĩm tí. Kufy jagy ti nỹ, vènh jykre ẽn tí, ký ãjag tóg han sór tũ nĩgtĩ. Ge ra ãjag tóg ag mỹ: “ha ki króm,” he tí.

47 Topê vỹ ãjag ve kónãn mỹr. ãjag jóg’jóg ve ag vỹ Topê vỹ tó tí ag kãgtén. Jãvo ãjag tóg ag kej ki rĩr há han tí.

48 Hã ki ãjag tóg ãjag jóg’jóg ve ag tỹ ag kãgtén to: “há ti nĩ,” he tí. Hã ki tóg ãjag mỹ há nĩ mỹr, ag tỹ ag kãgtén ja tugrĩn. Ag hã vỹ ag kãgtén ja nĩ, ký ãjag há nỹ ag kej ki rĩr há han tí,” he tóg.

49 “Hã ký Topê vỹ ãjag to vỹ ja nĩ. Ki kanhró ti nĩ, Topê ti, hã ký tóg ãjag to vỹ kónãn ja nĩ, ha mẽ. “Inh vỹ tó tí ag jẽgnẽ jé sóg ke mũ ag mỹ, isỹ ùn vin mũ ag ke gé, ag tỹ ag mỹ inh vỹ tó jé. Hã ra ag tóg ag vóg kónãn ke mũ, ag kãgtén jé ag tóg ke mũ,” he ja tóg nĩ, Topê ti.

50 ãjag jóg’jóg ve ag vỹ ag kygrẽn kãn, hã ra tóg ãjag mỹ há tí, hã ký Topê vỹ to ãjag vóg kónãn ke mũ. Û tỹ hẽn ri ke ag kygrẽn ag tóg, ãjag jóg’jóg ve ag, Topê tỹ ẽprã ke ag han kar ký.

51 Ti kãke tóg Abel tén. Ti nón ke ag kãgtén ja ag tóg nĩ gé, ãjag jóg’jóg ve ag, Zacarias mré hã. Topê ãn jãnkã krêm ag tóg tí tãnh, Topê mỹ nèn ù pũn jafã ẽn ki, Zacarias ti. Topê tỹ jẽgnẽg mũ ag kãgtén tovãnh tũ pẽ ag nỹtĩ, ãjag jóg’jóg ve ag. Hã ra tóg ãjag mỹ há tí. ãjag tỹ ag kygrẽn kãn ri ke ti nĩ. Ûn kãgter mũ tag jagfy kajãm kãn jé ãjag tóg ke mũ, ha vemnĩ. ãjag mỹ sóg tó mũ mỹr,” he tóg, Jesus ti.

52 “Ón ký Topê vỹ to professor’, Topê vỹ ãjag ve kónãn. Topê vỹ tỹ ẽg kanhrãn mũ ẽn ki ge jãvãnh ãjag tóg nỹtĩ mỹr’. Ký ù tỹ ki rã sór mũn ký ãjag tóg ti mỹ tó kónãn tí, ti tỹ ki vènh fón tũ nĩn jé. Ký tóg ẽg tỹ ù jo ãn nĩfenh ẽn ri ke nĩ, ãjag tỹ ag tỹ Topê ki ge kamẽg ti,” he tóg, Jesus ti. Ti tỹ ù tỹ ón ký Topê vỹ to professor ag mỹ vỹ kónãn há vè.

53 Ti tỹ tag tó kar ký tóg hẽn ra tí mũ sir. Tag pãte Topê vỹ to professor ag tóg ti mré mũ ký ti tugnỹm tí, Fariseu ag ke gé. Ag tỹ ti vỹ to ti se sór vè. Hã ký ag tóg ón ký ti ki jẽmẽgmẽg mũ.

54 Ón ký ag tóg ti vỹ jẽmẽg tí gé sir, ag tỹ ti vỹ to ti kãgmĩn jé.

12

*Ūn jykre régre ag
(Mt 10.26-27)*

¹ Hã ra ũ tỹ hên ri ke ag vỹ vênh măn kỹ nýtĩ nĩ. E tãvĩ ag tóg tĩ ha, mĩl tỹ hên ri ke ag. Kỹ ag tóg jagnê sãnsãn mũ sir, ag e nýtĩn kỹ. Kỹ Jesus tóg ag kanhrãn mũ. Ā mré mũ tĩ ag kanhrãn vén tóg mũ, kỹ tóg ag mỹ: “Fariseu ag jykre han sór tũg nĩ,” he mũ. “Pão jêgja jafã ri ke ti nĩ, ag jykre ti, hã kỹ tóg Topê mỹ kórég nĩ. Ag jykre hã vê, ha mẽ: jykre régre ag nýtĩ. Kỹ tag tóg Topê mỹ kórég tãvĩ nĩ,” he tóg.

² “Ēg tỹ péju kỹ nén han mũ vỹ vênh ven kãn ke mũ, ěg tỹ vênh kar vatánh tá nén to jykren mũ vỹ vênh ven kãn ke mũ, kurã tỹ ěgno kĩ,” he tóg.

³ “Ājag tỹ vênh kar vatánh tá vémén ja ěn mẽ kãn jé ag tóg ke mũ, vênh kar. Ājag tỹ kékén kỹ nén tó ja ěn tó kãn jé ag tóg ke mũ, jamã hár(a), ājag tỹ ĩn kãtã nén tó ja ěn. Hã kỹ vênh jykre régre han tũg nĩ,” he tóg.

*Ēg tỹ ěprã pã'i ag kamêg ke tũ
(Mt 10.28-31)*

⁴ “Ha mẽ, iso há ājag nýtĩ. Ag kamêg tũg nĩ, ũ tỹ ěg tén tĩ ag, pã'i ag. Ag tỹ ěg tén kar kỹ ag tóg ěg tỹ hê ri kenh ke tũ nĩ sir. Hã kỹ ag kamêg tũg nĩ.

⁵ Ājag mỹ sóg tónh mũ ha, ājag tỹ ũn kamêg ke ti, hã vỹ: Topê, he mũ. Ti hã ne ěg tén kar nũgme ki ěg vãm ki kanhró nĩ', mỹr ha mẽ'. Kỹ ti hã kamêg nĩ.

⁶ Sêsi vãm ag tóg tĩ, jãnkamy kato, ěg tỹ ko jé. Jêsi tỹ 5 (ke) kato ěg tóg jãnkamy pir mǎg tĩ. Hã ra Topê pi(jé) ag kã jatun mũ'. Ag ki rĩr nĩ tóg nĩ, sêsi ěn ag ki.

⁷ Ēg ki rĩr tóg nĩ gé, Topê ti. Ēg tỹ nén vég mũ kar ki kanhró tóg nĩ. Hã kỹ tóg ěg gãnh ki kanhró nĩ gé. Nĩkrén kãn ja tóg nĩ, Topê ti, ěg gãnh ti. Jêsi kãfór ājag tóg nýtĩ, Topê mỹ. Ājag kãmĩ ũn pir tóg sêsi e kãfór nĩ, ti mỹ. Hã kỹ ag kamêg tũg nĩ, ũ tỹ ěg tén sór mũ ag,” he tóg.

*Ēg tỹ Jesus kãmén ke
(Mt 10.32-33; 12.32; 10.19-20)*

⁸ “Hã kỹ sóg ājag mỹ tag tó mũ. Ēprã ke ag mỹ: “tỹ sóg ti mré ke nĩ,” hemnĩ, iso. Ag kamêg tũg nĩ. Kỹ sóg ājag tónh ke mũ gé, Topê tỹ jêñê jafã ag mỹ, kurã ěn kã, ājag tỹ tỹ inh mré ke nýtĩ ti. Tỹ sóg ěprã ke fi kósĩn ěn nĩ, ha mẽ.

⁹ Ājag tỹ ěprã ke ag mỹ inh kãmén tũ nĩn kỹ sóg ājag tónh ke tũ nĩ gé, Topê tỹ jêñê jafã ag mỹ, ājag tỹ iso: “ti ki kagtũg sóg nĩ,” hen kỹ,” he tóg.

¹⁰ “Tỹ sóg ěprã ke fi kósĩn ěn nĩ. Ag tỹ iso vême jũ han kỹ sóg ag mỹ vênh pãte fón sór mũ. Ag tỹ hã ra Topê kuprĩg to vême jũ han kỹ Topê tóg ag mỹ vênh pãte fón măn ke tũ nĩ ha,” he tóg.

¹¹ “Ājag vin jé ag tóg ke mũ, pã'i ag mỹ, governador ag mỹ ke gé, ag tỹ ājag sigse jé. Ēg vênh kanhrãn jafã krêm ag tóg ājag ki jêmê sór ke mũ, ājag tỹ inh ki ge kỹ nýtĩ ti, ha vemnĩ. Hã ra to krĩ kufy han tũg nĩ, ājag tỹ ag mỹ inh kãmén ke ěn to.

¹² Topê kuprĩg hã ne ājag kanhrãn ke mũ', kurã ěn kã. Hã kỹ ājag tóg tónh ke mũ sir,” he tóg, Jesus ti, Ā mré mũ tĩ ag mỹ.

Ēg tỹ nén ũ to ěn ke tũ

¹³ Kỹ ũn e ag kãmĩ ũ tóg Jesus mỹ: “Senhor,” he mũ. “Inh jo inh kãke mré vĩmĩ, ěg tỹ ěg panh ter ja tỹ nén kar vênh kãpãm jé, ti kuge ti,” he tóg, Jesus mỹ.

14 Hã ra Jesus tóg ti mý: “vó,” he mû. “Isû pijé,” he tóg. “Inh pi(jé) ã mý ã kuge ve sór mû. Inh pi(jé) ã tũ tý vènh kãpãm sór mû,” he tóg.

15 Kÿ tóg ag kar mý: “ker nén ù to én hẽ,” he mû. “Ëg tý nén kar pi(jé) ãg rÿr han ke mû. Ëg tũ mág nÿ ra ãg pi(jé) mû há han ke mû,” he tóg.

16 Kÿ tóg ag mý: “vènh jykre há vÿ ge nÿnh mû, ha mẽ,” he mû. “Ûn rico tóg nÿ ja nÿgtÿ mÿr,” he tóg. “Tÿ japÿ vÿ nén kar kanẽ e han ja nÿgtÿ.

17 Kÿ tóg to jykrén mû sir, ùn rico ti. “Inh hÿn ne han mû ha?” he tóg. “Inh pãjó mág vó, ình pãjó kãsa vó, sÿ krêm isû kar rãg jé?” he tóg.

18 “Inh pãjó kókén jé sóg ke mû, sÿ ti jëgja ki ùn mág han jé, kÿ sóg krêm isû kar vin mû, ình jakré kanẽ kar ti,” he tóg mû, to jykrén kÿ.

19 “Kÿ sóg jatu nÿ sir. Isû vÿ prÿg tý hèn ri ke pétèm mû, kÿ sóg rãnhràj mãn ke tũ nÿ ha. Jatun mý sóg jëg nÿnh ke mû, kron nÿ jé ình ke mû gé. Ình mÿn sér tÿ sir, sÿ jatu nÿn kÿ,” he tóg, to jykrén kÿ, ùn rico ti.

20 Hã ra Topẽ tóg ti mý vÿ mû. “Krÿ tũ ã nÿ,” he tóg ti mý. “Kuty tag kã ã tóg ter ke mû ha, kÿ ã tũ mág tag tý tý ù tũ nÿnh ke mû ha ke gé. Ma tÿg ke tũ ã tóg nÿ. ã ter ke vè,” he tóg ti mý, Topẽ ti,” he tóg, Jesus ti, ù tý ã panh tũ mãn sór mû ãn mý.

21 “Ge tóg tÿ, ãg tý ga kri nén ù há ve sór kÿ, ãg tý kanhkã tá tý nén ù tũ nÿn kÿ, Topẽ mré. Ëg pi(jé) ga kri ãg tũ mág ãn ma mÿnh mû. Ëg tý kanhkã tá tũ mág nÿtÿn kÿ tag há tóg há nÿ,” he tóg, Jesus ti.

Ëg tý nén ù to krÿ kufy han ke tũ (Mt 6.25-34)

22 Kÿ tóg ã mré mû tÿ ag mý: “ha vé,” he mû. “Vëjën to jykrén kÿ krÿ kufy tÿg nÿ,” he tóg. “Inh hÿn ùri ne konh mû? Ình hÿn ne tunh mû?” he tÿg nÿ.

23 Topẽ tý ãg han ja vè, ãg tý ga kri mû jé. Hã kÿ tóg ãg jën ki rÿr ke mû gé, ãg kur ki ke gé.

24 Sësi to jykrén nÿ. Ag mý êkrãn tÿ? Vó. Ag mý ãjag jakré kunÿg tÿ? Vó. Ag mý pãjó han tÿ? Vó, ke tũ ag tóg nÿgtÿ, ge ra Topẽ tóg ag jën tÿ. Jësi kãfór ãjag tóg nÿtÿ, Topẽ mý, hã kÿ tóg ãjag jën ke mû gé.

25 Kÿ, Topẽ tý ãg jé prër kÿ ãg tóg mÿnh mû gé. Ëg pi(jé) mÿnh ke tũ nÿ, ti tý ãg jé prër kÿ. Ëg tý to krÿ kufy han mû ra ãg tóg tÿg mû.

26 Ëg pi(jé) ãg krÿ kufy tugrÿn, ãg krÿ há tugnÿn mÿnh ke tũ nÿ. Mû jé ãg tóg ke mû, ti tý ãg jé prër kÿ. Hã kÿ nén ù ù to krÿ kufy han tÿg nÿ.

27 Ka fej to jykrén nÿ gé. Jatun mý tóg mog tÿ. Rãnhràj tũ tóg nÿgtÿ, kur han tũ tóg nÿgtÿ. Hã ra tóg sÿnvÿ nÿtÿgtÿ, ka fej ti, kÿ pã' ã mág tý Salomão ãn kur tóg ri ke tũ nÿtÿ ja nÿgtÿ, tÿ sÿnvÿ ja ra, vènh kar kur sÿnvÿ kãfór ti nÿ, Salomão kur ti. Kÿ hã sóg tó mû mÿr.

28 Topẽ hã ne ka fej sÿnvÿ han tÿ. Hã ra tóg kãnhmar kãgter tÿ, ka fej ti, ti sÿnvÿ ra. Ùri tóg há nÿtÿ, tý vaj kÿ tóg kógungun tÿ. Topẽ tý ka fej sÿnvÿ han kÿ tóg ãjag kur ki rÿr ke mû gé, ha vemnÿ. Kÿ ti to: “ti mý ãg mÿ kur nÿm mû vÿ?” he tÿg nÿ.

29 “Ình hÿn ne konh mû, ùri?” he tÿg nÿ gé. To krÿ kufy han tÿg nÿ.

30 Topẽ ki ge tũ ag vÿ tag to jykrén mág tÿ. Hã ra ãg jóg tý Topẽ vÿ ãg ki kanhró nÿ, ãg tý nén konh ke mû ti, ãg kur ti ke gé. Kÿ to krÿ kufy han tÿg nÿ.

31 Topẽ tý tý ãg pã' ã nÿ ãn hã ve jé vãsãnsãn nÿ. Kÿ tag há to jykrén nÿ. Kÿ Topẽ vÿ ãjag mý ãjag tý nén ve sór mág ãn vin ke mû sir,” he tóg, Jesus ti.

*Kanhkã tá ěg tũ
(Mt 6.19-21)*

32 “Kaměg tũg nĩ, ājag pipir nỹtĩ ra. Ěg jóg tỹ Topě vỹ ājag to há nĩ, hã kỹ tóg ājag mỹ kanhkã ti ven sór mũ, ha mẽ.

33 Ājag tỹ nén kar vin nĩ, ũn věsyrénh mũ ag mỹ. Hã kỹ ājag tóg kanhkã tá tỹ nén ũ mág nỹtĩnh mũ. Tá ājag kuge tóg tũ' henh ke tũ nĩ. Tag ki ěg tóg ěg jánkamy fón tĩ, nén ũ kar to. Tá tóg tũ' he jāvānh nĩ, ěg kuge ti. Tá ũ tóg péjunh kātĩg ke tũ nĩ gé, tá ti ga tóg kaggranh ke tũ nĩ gé. Kanhkã tá ěg tũ vỹ ge nĩ. Tũg jāvānh ti nĩ.

34 Ājag tỹ ga kri tỹ nén ũ mág nỹtĩn kỹ ājag tóg ga kri mũ mág sór mũ. Ājag tỹ hã ra kanhkã tá tỹ nén ũ mág nỹtĩn kỹ ājag tóg kanhkã ra mũ sór mũ, kỹ tag hã ne há nĩ,” he tóg, Jesus ti.

Ěg tỹ Jesus kātĩg mǎn jāvānh ke

35 “Ěg kur tỹ ěg tóg věsógfĩg tĩ, ěg tỹ rānhraj há han jé. Ěg lampião grug ěg tóg tĩ, kuty kã, ěg tỹ ve há han jé. Ěn ri ke han nĩ, ājag tỹ inh kātĩg mǎn ke jāvānh kỹ.

36 Kỹ ājag tóg ũn camarada ri ke nỹtĩ. Kejěn ag patrão vỹ hěn ra tĩg mũ, ã prũ ke festa mág han jé. Kỹ ti camarada ag vỹ ti tỹ tá vỹn ke jāvānh nỹtĩ. Ag tỹ ti jāvānh há han kỹ tóg há tĩ, ag nũgnũr tũ nĩn kỹ. Kỹ ag tóg kǎnhmar ti tỹ jánkã tỹ tórón tórón ke kỹ měnh mũ, kỹ ag tóg ti mỹ róm ke mũ sir, ti jun kỹ.

37 Kỹ tóg kejěn jun mũ sir, ag patrão ti. Kỹ tóg sér tĩ, ti camarada ag tỹ ti jāvānh nỹtĩn kỹ. Kỹ tóg ag mỹ vĩ há han ke mũ sir. Kỹ tóg věsóg fĩn kỹ ag mỹ: “nĩgnĩ ra ver, mesa to,” henh ke mũ sir. Kỹ tóg ag mỹ vějěn ven ke mũ. Ag patrão hã ne ã camarada ag mỹ vějěn ven ke mũ', ha vemnĩ. Ki hã sóg tó mũ,” he tóg, Jesus ti.

38 “Hěn ri ke mũn tóg meia noite ki jun ke mũ, hěn ri ke mũn tóg galo kyr han ra jun ke mũ. Ti camarada ag tỹ ti jāvānh kỹ nỹtĩn kỹ tóg ag mỹ vĩ há tǎvĩ han ke mũ sir, ha vemnĩ,” he tóg, Jesus ti.

39 “Kỹ tag to jykrén nĩ, ha mẽ. Inh kātĩg mǎn ke vỹ ũ tỹ nén ũ pigju(g) tĩ kātĩg ri ke nĩnh mũ. Ũ tỹ ti ĩn krěm nĩ ěn pi(jé) ki kanhró nĩ', hora kã ti kātĩg ke mũ ti. Ũ tỹ ti tỹ nén ũ péju sór mũ tóg ěn ge nĩ, ha mẽ. Ti tỹ ti kātĩg ke hora ki kanhró nĩ (hã) ra tóg ã kaně fǎn mũ vě, ti tỹ ti ĩn kǎra rã tũ nĩ jé. Hã ra tóg ki kagtĩg nĩ.

40 Ge ti nĩ, inh kātĩg mǎn ke ti. Věnh ki rĩr, věnh ki ěmě. Ěprã ke fi kósin vỹ kātĩg ke mũ, ājag tỹ ti kātĩg ke to jykrén tũ (hã) ra,” he tóg, Jesus ti.

*Ũn camarada to comparação
(Mt 24.45-51)*

41 Kỹ Pedro vỹ ti mỹ: “Senhor',” he mũ. “Ā tỹ ũ mỹ ke ně, ã tỹ tó ja tag ti? Ā tỹ ũ tỹ ã ki ge tũ ag mỹ ke mỹ, ěg mỹ ke mỹ vó?” he tóg, Pedro ti, Jesus mỹ.

42 Kỹ ěg Senhor tóg ti mỹ: “hỹ,” he mũ. “Kejěn patrão tóg hěn ra tĩg sór mũ, kỹ tóg ã camarada ag kã ũ tỹ pã'i han mũ, ti tỹ ti jo ã mré camarada ag ki rĩr jé. Ũ tỹ ã rānhraj ki rĩr há han tĩ ěn kuprěg tóg mũ, ti tỹ ag mỹ vějěn ven jé, vějěn ke horan ki.

43 Ti tỹ ag ki rĩr há han kỹ ti patrão vỹ ti mỹ vĩ há han ke mũ, ti kātĩg mǎn kỹ, ũ tỹ ag ki rĩr há han mũ ěn mỹ.

44 Tỹ pã'i mág han jé tóg ke mũ, ti tỹ ti tũ ki rĩr kǎn jé sir. Ki hã sóg ke mũ, ha mẽ.

⁴⁵ Ti camarada ěn jykre kórég nĩn kŷ tóg vĕnhmŷ nĩ jãvo, ha mĕ. To jykrĕn kŷ tóg: “ĕg patrão vŷ kãtĭg vãnh han mŷ,” he mŷ. Kŷ tóg ã mrĕ camarada ag vóg kónãn kŷ ag mrãnmrãn mŷ sir, fag ke gé. Kŷ tóg jatun mŷ jĕn mág han mŷ, ũn kronkron tĩ ag mrĕ tóg kronkron kŷ pĕpĕv tĩ nĩ gé sir.

⁴⁶ Kŷ ti patrão vŷ ti kãnhmŷ jun ke mŷ, ha vemnĩ, ti tŷ ti jun ke kurã ki kagtŷg nĩn kŷ, ti hora ti ke gé, kŷ tóg ti vóg kónãn ke mŷ gé sir, ti patrão ti, kŷ tóg ti fón ke mŷ, Topĕ vĩ mranh tĩ ag mrĕ hã,” he tóg.

⁴⁷ “Topĕ camarada ũ vŷ ã patrão kãtĭg ken jo ki rĩr há han tũ nĩgtĩ, ti patrão tŷ ti mŷ tó mŷ ra. Æ patrão vĩ ki króm tũ ti nĩgtĩ. Ti mrãnmrãn mág jé tóg ke mŷ, ti patrão ti, Topĕ ti.

⁴⁸ Ũ tóg ã tŷ nĕn han ke mĕ ja tũ nĩ, ti patrão vĩ ti, ti camarada ũ ti. Hã ra tóg kórég han mŷ gé. Kŷ ti patrão tóg ti mrãnmrãn ke mŷ gé. Ti mrãnmrãn sĩ han jé tóg ke mŷ jãvo. Ũ tóg vĕnh kanhrãn mág han tĩ. Kŷ Topĕ tóg vĕnh jykre há tãvĩ ve sór mŷ sir, ti tŷ ki kanhrãn mág han mŷ ěn to. Ũ mŷ ti vĩ mág tĩ, Topĕ ti, kŷ tóg ti tŷ ki króm há han ve sór mŷ gé sir,” he tóg, Jesus ti.

Ũ tŷ Jesus tugrĩn ĕg kato tĕnh ke

(Mt 10.34-36)

⁴⁹ “Ga kri inh mur, isŷ re pŷr tĭg ri ke han jé, hã vŷ: ũn e tŷ inh ki ge mŷ, he mŷ. Sŷ re pŷr tĭg ri ke ěn venh há tóg tĩ, hã ra tóg ver gru tũ nĩ.

⁵⁰ Ti grug to hã sóg vĕsŷrĕnh ke mŷ. Iser ke vĕ, kŷ tóg inh mŷ e tĩ. Sŷ ve jãvãnh tóg tĩ, inh vĕsŷrĕnh ke tĩ,” he tóg, Jesus ti.

⁵¹ “Æjag hŷn iso: “vĕnh kar tŷ jagnĕ to há han jé tóg ke mŷ,” he tĩ. Hã tũ vĕ. Ũ tŷ hĕn ri ke tŷ jagnĕ kato tĕ han jé sóg ke mŷ, ha vemnĩ.

⁵² Ha vé, ĩn pir krĕm ke fag vŷ jagnĕ kato tĕnh ke mŷ. Ũn tãgtũ fag vŷ ũn régre fag kato tĕgtĕnh mŷ ha. Kar ũn régre ěn fag vŷ ũn tãgtũ fag kato tĕgtĕnh mŷ gé sir.

⁵³ Jagnĕ kato fag jagnĕ to jŷgũnh mŷ. Ũ tóg ã kósin kato tĕnh ke mŷ, kŷ ũ tóg kejĕn ã panh kato tĕnh ke mŷ gé. Ũ fi vŷ ã kósin fi kato tĕnh ke mŷ, kŷ fi vŷ ã mŷnh fi kato tĕnh ke mŷ gé. Kŷ ũ tóg ã má fi kato tĕnh ke mŷ, kŷ fi tóg ã jamré kato tĕnh ke mŷ gé sir. Ge ti nĩgtĩ,” he tóg, Jesus ti.

Jesus jykre ki kanhrãn

(Mt 16.2-3)

⁵⁴ Kŷ tóg vĕnh kar mŷ tó mãn mŷ gé, kŷ tóg ag mŷ: “kanhkã ve kŷ ãjag tóg ta ki kanhró nŷtĩ,” he mŷ. “Kanhkã góg tŷ tãtã kãtĭn kŷ ãjag tóg: “ta vŷ kutĕnh mŷ,” he tĩ. Ki kanhró ãjag tóg nŷtĭgtĩ.

⁵⁵ Kar ãjag tóg kãka ki kanhró nŷtĩ gé. “Tag tán kãtĩ mŷ, kãka ti, kŷn hŷn jũ jagy nĩnh mŷ, ha vemnĩ,” he ãjag tóg tĩ gé.

⁵⁶ Ki kanhró ãjag tóg nŷtĩ, ta jykre ti, kãka jykre ti, ga jykre ti ke gé. Hã ra ãjag tóg inh jykre ki kanhrãnrãn sór tũ nĩ, sŷ ũri ãjag mŷ tó mŷ tag ti. Kutu ãjag nŷtĩ, ha mĕ, hã kŷ ãjag tóg ki kanhrãnrãn sór tũ nĩ,” he tóg, Jesus ti.

Ĕg tŷ jagnĕ mŷ vĕnh pãte fón

(Mt 5.25-26)

⁵⁷ “Kŷ ãjag tóg vĕnh jykre kuryj to jykrĕn tũ nĩ gé, ãjag tŷ jagnĕ mŷ vĕnh pãte fón jé, ãjag tŷ ver ga kri mŷn kŷ.

⁵⁸ Kejĕn ãjag tóg jagnĕ mŷ vĕnh jykre vĕnhmŷ tó tĩ. Kŷ ãjag tóg pã'i mŷ tónh mŷ sir. Æ tŷ ũ to jũ mŷ ěn vŷ ã tónh tĭg sór mŷ. Ti tŷ pã'i tá jun ke to hã ti mrĕ vĭmĩ. Ti mŷ: “inh mŷ vĕnh pãte fón,” hemnĩ. Ke tũ nĩ mŷ ra pã'i vŷ ã jykre

pãno venh ke mũ, kÿ tóg polícia mÿ: “ti se ra,” henh ke mũ. Kÿ tóg ã senh ke mũ sir.

⁵⁹ Ha mẽ, tá ã kãnhmar kãkutẽ mãn ke tũ nĩ. ã tÿ kajãm kãn kar kÿ ã hẽn ri ke mũn tá kãkutẽ mãn ke mũ sir,” he tóg. Jesus tÿ ẽg tÿ jagnẽ mÿ vẽn h pãte fón kãmén hã vẽ.

13

Ëg tÿ ẽg jykre tovãnh ke

¹ Kejẽn ù ag tóg Jesus tá junjun mũ, hã ra ag tóg ti vĩ mẽ kÿ nÿtĩ. Kurã ẽn kã ù ag tóg ti mÿ Galiléia tá ke ag tó ja nĩ, fóg tÿ pã'i tÿ Pilatos tÿ ùn kãgtén ja ẽn ag. Topẽ mÿ ag tóg ãjag mẽg tãnh ja nĩ, ti mÿ pũn jé, hã ki Pilatos tóg ag kygrẽn ja nĩ, hã kÿ ag kyvénh tóg ãjag mẽg kyvénh mré kutẽ ja nĩ. Hã kãmén ag tóg, Jesus mÿ, ti tÿ ag mÿ e tĩn kÿ, ag tÿ ùn kãgter mũ ag to: “ag hÿn Topẽ vĩ mranh mág,” hen kÿ.

² Kÿ Jesus tóg ag mÿ: “ãjag hÿn Galiléia tá ke ẽn to jykren sór mũ, ùn kãgter mũ ẽn ag to,” he mũ. “Topẽ vĩ mranh mág tĩ ag vẽ,” he ãjag tóg mũ ag to. “Ag hÿn vẽn h jykre pãno han mũ nĩ, ag hÿn Galiléia tá ke ag jykre pãno kãfór han mũ nĩ, hã kÿ Topẽ hÿn tóg ag vóg kónãnh mág,” he ãjag tóg tĩ ag to.

³ Ke tũ vẽ hã ra. ãjag ri ke ag tóg nÿtĩ, mÿr, ha mẽ. ãjag tÿ ãjag jykre tovãnh tũ nĩn kÿ ãjag tóg nũgme ki vár ke mũ, ha vemnĩ,” he tóg.

⁴ “Û tÿ 18 (ke) ẽn ag to jykren nĩ, ù tÿ goj tÿ Siloé tá kãgter mũ ẽn ag. Ìn téj ẽn tóg ag kri kutẽ, Ìn vag jẽ ẽn ti, hã kÿ ag kãgter mũ. Jerusalém tá ke kar ag jykre ri ke ja ag tóg nÿtĩ. Ag pi(jé) ag jykre pãno ẽn kãfór ja nÿtĩ'. Ag ri ke han ja ag nÿtĩ, ha mẽ.

⁵ Kÿ sóg ãjag mÿ ke mũ. ãjag tÿ ãjag jykre pãno tovãnh tũn kÿ ãjag tóg nũgme ki vár ke mũ,” he tóg, Jesus ti.

Ka tÿ figueira to comparaçã

⁶ Kÿ tóg ag mÿ: “ù tÿ Topẽ jykre han sór tũ ag vÿ ge nÿtĩnh mũ, ha mẽ,” he mũ. “Kejẽn ù tóg nĩgtĩ. Ka há krãn ja tóg nĩgtĩ, ka tÿ figueira. Ka kanẽ ù vẽ, ko há ti jẽ. Ẽn krãn ja tóg nĩ. Uva kãmĩ tóg ti krãn ja nĩ. Kÿ tóg kejẽn ti kanẽ ko sór mũ, kÿ tóg venh kãtĩ mũ. Hã ra tóg kanẽ ja tũ nĩ.

⁷ Kÿ tóg uva ki rĩr tĩ mÿ: “ti gÿn ra,” he mũ. “Prÿg tãgtũ tóg nĩ ha, sÿ ti kanẽ vég tũ ki. Kanẽnh vãn h ti hÿn jẽ. Ti gÿn ra, ti tÿ ga kókég tũ nĩn jé,” he tóg.

⁸ Hã ra tóg ã patrão mÿ: “ti tovãnh ra ver,” he mũ, uva ki rĩr tĩ ti. “Tĩ pẽnĩn sóg kũm mũ ver, sÿ ti krẽm ga jẽgja han jé ver.

⁹ Hẽn ri ke mũn tóg kanẽ há hÿn han ke mũ ha. Ke tũ nĩn kÿ sóg ã mÿ ti gÿn ke mũ vãhã,” he tóg mũ, uva ki rĩr tĩ ti,” he tóg, Jesus ti. Ti tÿ ù tÿ ã jykre kórég tovãnh sór tũ tón hã vẽ.

Jesus tÿ vẽn h kãn ke kurã ki ùn kaga tÿ há' he

¹⁰ Kejẽn tóg ag vẽn h kanhrãn jafã krẽm ag kanhrãn mũ, Jesus ti, vẽn h kãn ke kurã ki.

¹¹ Kÿ ù fi tóg tá jẽ nĩ. Jagrẽ kórég fi nĩ, hã kÿ fi tóg pãnh ke kÿ jẽ nĩ. Vẽn h ra hã jẽ kórég fi tóg nĩ, fi jagrẽ tũgnĩn. Prÿg tÿ 18 (ke) han fi tóg, fi jagrẽ tÿ fi kagag tĩ ki.

¹² Kÿ Jesus tóg fi vég mũ, kÿ tóg fi jé prẽr mũ. “Kunĩg, jÿ,” he tóg. “ã kaga tÿ sóg tũ' henh mũ,” he tóg fi mÿ.

¹³ Kÿ tóg ã nĩgé tÿ fi kri fig mũ. Kÿ fi tóg vẽn h ra hã jẽg há han mũ, ha mẽ. Kÿ fi tóg Topẽ to vĩ há han mũ sir.

14 Hã ra vënh kanhrãn jafã to pã'i tóg Jesus to jũ mũ, ti tỹ vënhkãn ke kurã ki fi tỹ há' hen kỹ. Ti mỹ tóg tỹ vënh rãnrãj nĩ, fi tỹ há' he mũ tag ti, hã kỹ tóg Jesus to jũ mũ. Kỹ tóg vĩ mũ sir. Vënh kar jyvën kỹ tóg ag mỹ: "kurã tỹ 6 (ke) hã ki ãg tóg rãnrãj ke mũ ha," he mũ. "Hã kỹ kurã tỹ 6 (ke) ên ki kãmũmni, ti tỹ ãjag tỹ há' hen jé. Vënhkãn ke kurã ki vënh kygtãg kãmũ tũg nĩ," he tóg mũ, pã'i ti.

15 Hã ra Jesus tóg ti vĩ kãfãn mũ, kỹ tóg: "jykre régre ã nĩ (mỹr)," he mũ. "Vënhkãn ke kurã kã ãjag tóg ãjag mễg ki rĩr tĩ gé, monh ki, cavalo ki ke gé, ha mẽ. ãjag mễg kygvãn ãjag tóg tĩ, ãjag tỹ ti kron mũn jé, ti tỹ ãn kãkã se kỹ jẽ kỹ, cocho to.

16 Kỹ tag fi vĩ se kỹ jẽ ên ri ke jẽ ja nĩ gé, ha mẽ. Satanás hã vĩ fi sé', prỹg tỹ 18 (ke) ki. Ëg jóg'jóg ve tỹ Abraão kósin ù fi vễ, ãg mễg kãfór fi tóg jẽ, hã ra ã tóg jũ sór mũ, isỹ vënh kãn ke kurã ki fi tỹ há' hen kỹ, isỹ fi kavãn ri ke han kỹ. Vënh jykre vënhmỹ han sór ã tóg nĩ," he tóg, Jesus ti, pã'i ti mỹ.

17 Ti vĩ tag to ag tóg mỹ'ãg'ãg mũ sir, ti kato tẽ mũ ag. Hã ra tóg vënh e ên mỹ sér tĩ sir. Ag mỹ tóg nén ù kar há han tĩ, hã kỹ tóg ag mỹ sér tĩ sir.

Mostarda fy to comparação (Mt 13.31-32; Mc 4.30-32)

18 Kỹ Jesus tóg ag mỹ: "Topẽ tỹ tỹ ãg pã'i nĩnh ke vĩ ge nĩ, ha mẽ," he mũ.

19 "Vãnh tỹ mostarda fy ri ke ti nĩ. Sĩ ti nĩ, ti fy ti. Ëg japy ki ãg tóg krãn tĩ, kỹ tóg mog tĩ. Kỹ tóg ka ri ke nĩ, ti tỹ pẽ téj nĩn kỹ. Hã kỹ sêsĩ tóg kri jagfénh ke mũ, ti pẽ kri, ti pẽ mág nĩn kỹ. Topẽ tỹ tỹ ãg pã'i nĩ kãme tỹ vënh kar kri rùm ke to ken hã vễ," he tóg, Jesus ti.

Fermento to comparação (Mt 13.33)

20 Kỹ tóg ag mỹ: "Topẽ tỹ tỹ ãg pã'i nĩn kỹ tóg tag ri ke nĩnh mũ, ha mẽ," he mũn mũ.

21 "Ûn tỹtã fag vĩ pão han tĩ, farĩnh tỹ. Pão han jé fag tóg pão jẽgja jafã tỹ fermento ên tỹ farĩnh mré jẽgãg tĩ. Kejẽn ù fi tóg farĩnh e kãki ti jãgja jafã pir tỹ kãki vãm ja nĩ, hã ra tóg tỹ sòn ke kãn," he tóg, Jesus ti. Ti vĩ tỹ vënh kar kri rùm ke kãmén hã vễ.

Jãnkã sĩ to comparação (Mt 7.13-14, 21-23)

22 Kỹ Jesus tóg ti mũ. Cidade e fĩn rãm tóg mũ, ãmã kãsir fĩn ke gé. Tĩg kỹ tóg ag kanhrãn rãn mũ sir. Ge kỹ tóg koměr hã cidade tỹ Jerusalém kukãm tĩ mũ.

23 Kỹ ù tóg ti mỹ: "Senhor'," he mũ. "Ûn krenkren mũ ag mỹ pipir nỹtĩ, e nỹtĩ vó?" he tóg ti mỹ. Kỹ tóg ti mỹ:

24 "hỹ," he mũ. "Inh ki rã vĩ jãnkã sĩ ra rã ri ke nĩ," he tóg. "Vãsãn nĩ, ã tỹ ra rã jé. Kejẽn ù tóg ra rã mãn ke tũ nĩ ha. Ên kã ù tỹ hẽn ri ke ag vĩ ra ge sór mũ, hã ra ag tóg tỹ hẽ ri kenh ke tũ nĩ ha sir.

25 Ìn ki rĩr tĩ ên tỹ nĩfénh ja vễ mỹr, hã kỹ ag tóg ãn kãra genh ke tũ nĩ ha. Kanhkã to ken hã vễ, ãn ti. Ìn ki rĩr tĩ ên hã ne nĩfénh ke mũ', kỹ ãjag tóg sir re tá nỹtĩnh kỹ tỹ tórón' tórón' kenh ke mũ. "Senhor', ãg mỹ róm, ãg mỹ nón, jãnkã ti," he jé ãjag tóg ke mũ. Hã ra tóg sir ãjag mỹ: "ãjag ki kagtĩg sóg nĩ," henh ke mũ, ãn ki rĩr tĩ ti. "ãjag tỹ ù nỹtĩ?" he jé tóg ke mũ.

26 Kỹ ãjag tóg ti mỹ: "ã mỹ ãg ki kagtĩg?" henh ke mũ. "Ëg hã vĩ ã mré jẽn ja nĩ, ãg hã vĩ ã mré kron ja nĩ, ãg kanhrãn ja ã tóg nĩ, ãg jamã tá. Ëg hã vễ," he jé ãjag tóg ke mũ, ãjag tỹ re tá nỹtĩnh kỹ.

²⁷ Hã ra tóg ãjag mÿ: “inh pi(jé) ãjag ki kanhró nĩ;” henh ke mÿ. “Ãjag pi(jé) tÿ inh mré ke nÿtĩ. Ha mÿjêg. Vênh jykre pãno han ãjag tóg mÿgtĩ,” he jé tóg ke mÿ, Ìn ki rĩr tí ti, ãjag mÿ.

²⁸ ãjag tÿ ra mÿnh ke tá ãjag tóg vêsÿrênh ke mÿ, tá ãjag jã tóg gyngyn ke mÿ, gangan ke jé ãjag tóg ke mÿ, tá. Kór há tá ãjag tóg Abraão venh ke mÿ, tá, Isaque ke gé, Jacó ke gé, Topê ví tó tí ag kar ke gé. Ên ag kar vÿ Topê tÿ tÿ êg pã'i nĩ venh mÿ sir, ãjag jãvo.

²⁹ Ên kã Topê ki ge kÿ nÿtĩ kar ag tóg kãmÿnh mÿ, rã jur ja tá, rã pur ja tá, kanhkã fyr tá, rã krêm tĩg ja tá. Kãmÿ kÿ ag tóg Topê tÿ tÿ êg pã'i nĩ venh ke mÿ, ti tÿ ag ki rĩr nĩ ti, kÿ ag tóg tá jêg nÿtĩnh mÿ ãjag jãvo.

³⁰ Kÿ tag ki ùn kãsir ù ag tóg mág nÿtĩnh mÿ, tá pã'i nÿtĩnh mÿ. Kÿ tag ki ùn mág ù ag tóg kãsir nÿtĩnh mÿ gé, tá, tere kÿ,” he tóg, Jesus ti.

*Jesus tÿ Jerusalém tá ke ag to há nĩ
(Mt 23.37-39)*

³¹ Kurã ên kã Fariseu ù ag tóg tá junjun mÿ, Jesus mré vémén jé. Ti mÿ ag tóg: “há mē,” he mÿ. “Pã'i mág tÿ Herodes vÿ ã tén sór mÿ. Hã kÿ vênh péju tĩg, êmã ù ra,” he ag tóg mÿ sir, Jesus mÿ.

³² Kÿ tóg ag mÿ: “mĩg sĩ ri ke ti nĩ, Herodes ti,” he mÿ. “Hã kÿ tóg ke mÿ. Ver sóg vênh jagrê kórég pan mÿ, ùn kagyga ag tÿ há' he jé sóg ke mÿ, ùri, vaj kÿ ke gé, kurã tÿ hên ri ke ki. Kãnhmar sóg ter ke mÿ, inh kurã ki, ha vemní.

³³ Ûri sóg ver tĩg mÿ, vaj kÿ ke gé, vaj ùn kÿ ke gé. Iser ken kÿ sóg Jerusalém tá ter ke mÿ. Tag ki ke pijé'. Topê ví tó tí vÿ tÿ inh nĩ, jo Jerusalém tá ke ag tóg ag kãgtén tí, Topê ví tó tí ag. Hã kÿ sóg Jerusalém tá ter tĩg ke mÿ gé. Tag tómnĩ, Herodes mÿ,” he tóg, Jesus ti.

³⁴ Kÿ tóg Jerusalém ki ke ag to vémén mÿ. Fe kaj han tóg, ag to, kÿ tóg: “Jerusalém tá ke ag mÿ sóg tag tó sór mÿ, há mē,” he mÿ. “Topê ví tó tí ag kãgtén ag tóg tí. Topê tÿ ag mÿ ùn jêgnêg tí ag pin ag tóg tí, pó tÿ, ag tÿ ag kãgtén jé. Isÿ ag vênh mãn há tóg tí vê, isÿ ag ki rĩr jé, Jerusalém tá ke ag, há kÿ sóg ag jé prêr tÿ hên ri ke han mÿ. Garĩnh fi jykre ri ke han sór isóg mÿ vê, ag mÿ. Garĩnh fi vÿ ã krê kri jê nĩ, fi tÿ ag vêsÿrênh tí nĩ jé ke vê. Ên ri ke han sór sóg mÿ vê, há ra ag tóg ke jãvãnh nÿtĩ.

³⁵ Hã kÿ ag tóg ag jamã pũn kãn ke mÿ, kÿ vãpũr vê sir. Û vÿ kãnhmar tá nĩg mãn ke tú nĩ ha, ag tÿ cidade kókén ja tá. Hã kÿ sóg ag mÿ ke mÿ. Inh ve mãn ke tú ag nĩ ha (mÿr). Kejên ag tóg iso: “Topê tÿ ti jênê ja vê,” henh ke mÿ. “Topê vÿ ti ve há han, ti tÿ ti jiji tó kãtĩg kÿ,” he jé ag tóg ke mÿ iso. Ên hã kã ag tóg inh ve mãn ke mÿ,” he tóg, Jesus ti.

14

Jesus tÿ vênhkán ke kurã ki ù tÿ há' he

¹ Kejên tóg vênhkán ke kurã tá krÿg mÿ. Kÿ tóg pã'i ù Ìn krêm nĩ nĩ. Fariseu ag pã'i vê. Ti tÿ ti Ìn krêm jên ke vê. Hã ra ag tóg tá ti tÿ rĩr mÿ, “ti mÿ vênhkán ke kurã ki rãnhraj ke tú?” he ag tóg mÿ.

² Hã ra ù tóg tá nĩ gé, ùn kaga ù. Kãnhpar kãn kÿ tóg jê. Jesus rĩn ja tá tóg jê nĩ.

³ Kÿ Jesus tóg Topê ví to professor ag mÿ ke mÿ, Fariseu ag mÿ ke gé. Ag mÿ tóg: “êg tÿ vênhkán ke kurã kã ù tÿ há' hen mÿ há nĩ, mÿ kórég nĩ vó?” he mÿ.

⁴ Hã ra ag tóg ti mÿ nén ù tó tú nĩ. Kÿ Jesus tóg ùn kaga ên kri ã nĩgé fi kÿ ti tÿ há' he mÿ sir. Kÿ tóg ti mÿ: “há tĩg ge,” he mÿ.

⁵ Kŷ tóg ag mŷ: “kejĕn ājag kósın ũ tóg goj ki kutĕnh mŷ,” he mŷ, “goj nig ki, ke tŷ nĭn kŷ ājag mėg tŷ monh. Vĕnhkán ke kurā ki tóg goj ki kutĕnh mŷ, hĕn ri ke mŷn. Kŷ ājag tóg ti kunŷg tĭ gé, ti tŷ vĕnhkán ke kurā ká ki kutĕn kŷ. Kŷ ājag tŷ ne jé iso jŷ sór nĕ?” he tóg.

⁶ Kŷ tóg ag tŷ ti mŷ nĕn tónh ke tóg tŷ tŷ sir.

Festa to comparaçã

⁷ Kŷ Jesus tóg vĕnh kar kanhrĕn jé tag tó mŷ sir, ha mĕ. Ti mré jĕgĭĕn kŷ nŷtĭ ag mŷ tóg kāmĕn mŷ. Ag jĕn vĕn sór vĕ, ag tŷ tŷ ũn mág nŷtĭ jé. Hā vĕg tóg mŷ, hā kŷ tóg ag kanhrĕnrĕn sór mŷ, Jesus ti.

⁸ Kŷ tóg ag mŷ: “kejĕn ũ tóg ājag mŷ: “kurā ĕn ká sóg vĕnh prŷg ke to festa han ke mŷ. Ha inh mré jĕn kátĭg,” hĕnh ke mŷ. Kŷ ti festa ká jĕn vĕn sór tŷg nĭ. Hĕn ri ke mŷn ā káfór nĭ ũ tóg ki jun mŷ.

⁹ Kŷ festa ki rĭr mŷ tóg ā mŷ: “toreg ver’,” hĕnh ke mŷ. “Ti jĕn kar kŷ ā tóg jĕn ke mŷ. Mĕ kŷ jĕ nĭ ver,” he jé tóg ke mŷ ā mŷ, ũ tŷ festa ki rĭr tĭ ti. Kŷ tóg ā mŷ’ a tĭnh mŷ sir, ha mĕ.

¹⁰ Kŷ ā tŷ festa venh tĭg kŷ mĕ kŷ nĭmnĭ ver, vĕjĕn jāvĕnh kŷ. Kŷ festa ki rĭr mŷ vŷ ā mŷ: “ha jĕn vĕn, fag mré,” hĕnh ke mŷ. Kŷ ā pi(jé) mŷ’ āg ke mŷ’,” he tóg ag mŷ, Jesus ti.

¹¹ Hā kŷ tóg ũ tŷ ag káfór nĭ sór mŷ tĕrem ke mŷ, vĕsŷkā, Topĕ ti, ha vemnĭ. Jāvo tóg ũ tŷ: “tŷ inh ũn sĭ nĭ,” he mŷ ĕn jĕnfyn ke mŷ, ha vemnĭ,” he tóg, Jesus ti.

Ĕg tŷ ũn jagtar ag jagāgtĕn

¹² Kŷ tóg ũ tŷ ā kógfyn mŷ ĕn mŷ kāmĕn mŷ gé. Ti mŷ tóg: “ā tŷ festa han sór kŷ ũn rico ag mŷ tó sór tŷg nĭ, ā mré ke fag mŷ, ā káke ag mŷ, ā jāvy ag mŷ, ā rā nŷtĭ ag mŷ tó tŷg nĭ gé,” he mŷ. “Ā tŷ ũn rico ag mŷ tó mŷ ra ag tóg vĕnh kaja jé ā mŷ festa han sór mŷ gé. Kŷ ā tóg ā festa kaja ti vĕg mŷ sir, ĕprā.

¹³ Ā tŷ festa han sór kŷ ũn kaga kŷ rĕnhrĕj vĕnh ag mŷ tómnĭ, ũn kĕnhgrĭ ag mŷ, ũn kyvó ag mŷ.

¹⁴ Ā tŷ tag han kŷ Topĕ vŷ ā ve há han ke mŷ, ha vemnĭ. Ā mŷ ag tóg festa han ke tŷ nĭ, ag tŷ nĕn ũ tŷ nĭn kŷ. Kŷ ā tóg ā rĭr mĕn ken kŷ ti kaja venh ke mŷ, Topĕ tŷ ũn jykre kuryj kar rĭnrĭr mĕn ke kurā ĕn ká,” he tóg, Jesus ti.

Festa mág to comparaçã

(Mt 22.1-10)

¹⁵ Kŷ tóg tá nĭ ũ mŷ mĕ há tĭ, Jesus vĭ tag ti. Tá nĭg kŷ tóg ag mré jĕg mŷ gé, hā kŷ tóg Jesus vĭ mėg mŷ. Kŷ tóg ti mŷ: “ũ tŷ Topĕ tŷ tŷ ĕg pā’ i nĭ vĕg mŷ mŷn hŷn sér pĕ tĭnh mŷ, ũ tŷ tá festa vĕg mŷ ĕn mŷ,” he mŷ.

¹⁶ Kŷ Jesus tóg ti kanhrĕn kŷ ti mŷ: “kanhkā tá festa vŷ ge nĭnh mŷ, ha mĕ,” he mŷ. “Kejĕn ũ tóg nĭgtĭ. Festa mág han sór tóg mŷ, kŷ tóg ũ tŷ hĕn ri ke ag mŷ tó ja nĭ, ti tŷ festa han ke to hā.

¹⁷ Ti festa kurĕn ká tóg ā camarada jĕnĕg mŷ, ti tŷ ũn kógfyn kŷ nŷtĭ ag mŷ: “ha kāmŷjĕg,” he jé. “Kar kŷ tóg nĭ ha, inh festa ti,” hemnĭ,” he tóg, ā camarada mŷ. Kŷ tóg ag mŷ tónh tĭ mŷ sir.

¹⁸ Hā ra ag tóg ve sór tŷ nĭ, ag kar ti, hā kŷ ag tóg ti mŷ vĭ mŷ. Ũ tóg ti mŷ: “ga kajĕm inh,” he mŷ. “Hā kŷ sóg ijapŷ venh tĭ mŷ ver. Ũri tóg inh mŷ vĕnhmŷ tĭ. Sŷ festa venh tĭg ke vĕ vĕ, hā ra tóg vĕnhmŷ tĭ,” he tóg mŷ.

19 Kĩ ù tóg ti mĩ: “monh génh sóg, monh tỹ 5 (ke) régre,” he mũ gé. “Kỹ sóg ag venh tí mũ ver. Sỹ festa venh tĩg ke vễ vễ, hã ra tóg vễnhmỹ ti,” he tóg mũ gé sir, ù ti.

20 Kĩ ù tóg ti mĩ: “ũri sóg prũg mũ ha, hã kỹ tóg vễnhmỹ tí,” he mũ gé.

21 Kĩ ti camarada tóg ti mĩ tónh kãtĩ mũ, ã patrão mỹ. Kĩ tóg jũ mũ. Ti mỹ tóg: “êpry ra tĩg, êmĩn mág ra, êpry kãsir ra ke gé, êmã kar ki,” he mũ. “Kỹ ùn jagtar ag taťĩ kãtĩg, ùn kónhgrĩ ag, ùn kyvó ag, ùn tĩg vãnh ag ke gé,” he tóg. ã camarada mỹ tóg ke mũ.

22 Kĩ tóg tĩg mãn mũ, ti camarada ti. Kĩ tóg tá vỹn ke kỹ ã patrão mỹ: “ke kãn inh huri,” he mũ. “Ag taťĩ kãtĩg inh huri, hã ra tóg fór tũ nĩ ver, festa jo ãn ti,” he tóg mũ, ti camarada ti, ti patrão mỹ.

23 Kĩ ti patrão tóg ti mỹ: “vễsỹkã tĩg mãn ge,” he mũ. “Vãnh kãmĩ tĩg, êmã kãsir pễ kãmĩ ke gé, êpry ra, êmĩn jagma,” he tóg. “Tã ag mỹ tugtónh tĩg. Ag kutãn nĩ, ag kãmũ jé, festa jo ãn fór jé,” he tóg, patrão ti, ã camarada mỹ,” he tóg, Jesus ti.

24 “Hã kỹ sóg ãjag mỹ ke mũ,” he tóg. “Ủ mỹ sóg tó vén ja nĩ, hã ra ag tóg inh festa venh ke tũ pễ nĩ, sỹ ù mỹ tó vén ja ag,” he tóg. Jesus tỹ Fariseu ag mré jên kỹ ag mỹ kãmén hã vễ.

Ĕg tỹ Ĕg jykre tovãnh (Mt 10.37-38)

25 Kejên ùn e ag tóg Jesus nón mũ mũ. Kĩ tóg ag jé vĩrĩn ke kỹ ag mỹ:

26 “ha mẽ,” he mũ. “Ủ tỹ inh mré tĩg pễ han sór mũ jé inh hã to há kãfór nĩ, ã han mũ fag kri, ti prũ fi kri, ti krê kri, ti kãke ag kri, ti jãvy ag kri, ti ve fag kri, vễnh kri ke gé, mỹr, ha mẽ,” he tóg. “Ke tũ nĩ mũ ra tóg inh mré kãtĩg ke tũ nĩ, kỹ tóg tỹ inh mré ke nĩnh ke tũ nĩ gé.

27 Ha vé, ag tỹ inh cruz tỹ inh kri fi kỹ sóg tĩg ke mũ, ag tỹ to isa kỹ isén jé, ha vemnĩ. Vễnh nenh ke tũ sóg nĩ. Ủ tỹ inh ri ke han sór tũ nĩn kỹ tóg inh mré kãtĩg ke tũ nĩ, kỹ tóg tỹ inh mré ke nĩnh ke tũ nĩ gé,” he tóg, Jesus ti,

28 “To jykrén, ù tỹ ãn tẻj han sór mũ ẻn to. Ti tỹ ãn tẻj han sór kỹ tóg ã jãnkamy nĩkrén vén ke mũ. Kĩ tóg ãn kaja to jykrén ke mũ gé sir. Kar kỹ tóg ãn han sór ke mũ vãnh.

29 Ti tỹ to hã to jykrén há han tũ ra tóg vễnhmỹ tí. Kĩ tóg ãn jẻg ken ki kũm kỹ ti krógróg han ke mũ sir. Ti krógróg han kỹ ti jãnkamy tóg tũ' henh ke mũ, kỹ tóg tovãnh ke mũ sir, ti tỹ ãn han ti. Kĩ ti mré ke ag tóg ti to vĩ kỹ ti nynh mũ sir.

30 Ti to ag tóg: “ha mẽ, ãn tẻj han sór tóg mũ vễ, hã ra tóg to jykrén há han ja tũ nĩ, hã kỹ tóg kar tũ nĩ,” henh ke mũ, ti régre ag,” he tóg.

31 “Kar pã'i mág to jykrén nĩ gé. Pã'i ù tỹ ti mré vễnh génh sór kỹ tóg ã krêm ke ag nĩkrén ke mũ gé sir, vễnh génh ke to hã. “10 mìl (ke) ẻg nỹtĩ,” he jé tóg ke mũ. “Ĕg mỹ ag tỹ hẻn ri kenh mũ vỹ?” he jé tóg ke mũ. “20 mìl (ke) ag nỹtĩ. Ag mỹ ẻg tỹ tũ' he kãn ke tũ nĩ vỹ? Ĕg kãfór ag tóg nỹtĩ. Ĕg hỹn hẻ ri kenh mũ, ag tỹ ẻg tovãnh jé?” he jé tóg ke mũ, pã'i ti.

32 Ti tỹ tag to jykrén kỹ tóg pã'i ù ẻn mỹ vễnh vĩ jẻnẻn mũ, ti tỹ kór há tá nĩ (hã) ra, kuvar há tá. Ti mỹ vễnh vĩ jẻnẻn kỹ tóg ti mỹ: “ã mỹ ẻg tovãnh ke tũ nĩ?” he mũ. “Inh ã mỹ ne nĩm mũ, ã tỹ isovãnh jé?” he jé tóg ke mũ, pã'i ẻn mỹ,” he tóg, Jesus ti.

³³ “Hã ký to jykrén nĩ, ãjag tý inh mré mũ pẽ han ke to. Iso há kãfór nýtĩmnĩ, ãjag tú kar kri. Ke tú nĩ mũ ra ãjag pi(jé) inh mré mũ pẽ han mũ;” he tóg, Jesus tí.

Sa to comparaçãõ
(Mt 5.13; Mc 9.50)

³⁴ “Sa vỹ há nĩ. Hã ra sa kãhór tĩn ký ãg tý ne tý ti tý kajã' henh ke tóg tú tĩ, tý sa' he mãn ke tú tóg tí,” he tóg.

³⁵ “Ti kãhór tĩn ký tóg kórég nĩ, ký ãg tóg fón tí. ãg pi(jé) ãg japỹ ki ti fón tí', ti tý ãg jakré tý há' he tú nĩn ký, sa kãhór tí. Ti fón pẽ han jé ãg tóg ke mũ. Ri ke ãjag nýtĩ, ãjag tý inh mré mũ pẽ han tú nĩn ký. Jẽmẽ há han nĩ, sỹ ãjag mỹ nén tó mũ tag tí,” he tóg, Jesus ti.

15

Ovelha vãfor to comparaçãõ
(Mt 18.12-14)

¹ Kejẽn ù tỹ imposto mãg tí ag tóg ti to kãmũ mũ, Topẽ vỹ mranh tí ag ke gé. Ag tý ti vỹ mẽ sór vẽ.

² Ký tóg Fariseu ag mỹ kórég nỹ, Topẽ vỹ to professor ag mỹ ke gé. Ký ag tóg ti to vỹ vỹ he mũ sir. “Topẽ vỹ mranh tí ag to tóg há nĩgtĩ, tag tí,” he ag tóg mũ. “Ag mré tóg jẽg tí mỹr,” he ag tóg mũ, Jesus to.

³ Ký tóg ag kanhrãn jé ag mỹ: “ù tý Topẽ vỹ mranh mũ tý ã jykre kórég tovãnh ký tóg ge nỹnh mũ, ha mẽ,” he mũ.

⁴ “Ù tóg nĩ ja nĩgtĩ,” he tóg. “Ti mæg tý mé vỹ tý 100 (ke) nýtĩ, ti mæg tý ovelha ti. Ký ti mæg pir tóg vãfor mũ. Hã ra tóg ti kanẽg tí mũ, ti jãvãnh tí tóg mũ, ha mẽ. Ûn e ãn tovãnh ký tóg ùn pir ãn nón tí mũ. Ga kórég tá ag nýtĩ, ti mæg kar ãn ag. Ag togvãnh ký tóg ùn pir ãn nón tí mũ, ha mẽ.

⁵ Ký tóg ti vég mũ sir, ti mæg vãfor ja ãn tí. Ký tóg ã nunh kri ti fi ký ma tí mũ. Ti fe tóg mrin ke mũ sir.

⁶ Ký tóg ã ãn tá jun mũ. Tá tóg ã kanhkã fag jé prẽr mũ, ti rã hã nýtĩ fag kar. Ký tóg fag mỹ tó mũ. “Inh mré ti to mỹ sér;” he tóg. “Inh mæg vỹ vãfor ja nĩ, hã ra sóg ti ve mãn mũ ha,” he tóg mũ, ã mæg to,” he tóg, Jesus tí.

⁷ “Hã ra tóg ge nĩ, ha mẽ. Û tý 99 (ke) ag tý vẽnũ jykre kuryj han ký tóg há tí sir, ký tóg mỹ sér tí sir, kanhkã tá ke ag mỹ. Hã ra tóg mỹ sér kãfór tí, ùn pir tý ã jykre kórég tovãnh ký, ti tý ã tý Topẽ vỹ mranh mũ ãn tovãnh ký, ha mẽ. Ký isũ ag vỹ e nýtĩ,” he tóg, Jesus ti.

Jãnkamy vãfor to comparaçãõ

⁸ “Kỹ ùn týtã to vême vỹ ge nĩ, ha mẽ,” he tóg. “Jãnkamy tý 10 (ke) tý fi tú nĩ, jãnkamy tý por dia kaja tý 10 (ke) tý. Kejẽn ùn pir tóg fi mỹ vãfor mũ, ký fi tóg lampiãõ grug mũ sir. Fi ãn kãmĩ fi tóg prun kãn mũ. Ve há han fi tóg mũ, jãnkamy ãn kanẽg jé, ãn pẽnũ kar mĩ hã.

⁹ Vãhã fi tóg kejẽn ve mãn mũ sir. Ký fi tóg ã mré ke kar fag jé prẽr mũ, fi rã hã nýtĩ fag kar ke gé. Ký fi tóg fag mỹ: “inh mré to mỹ sér;” he mũ. “Inh jãnkamy vỹ vãfor ja nĩ, hã ra sóg ve mãn mũ ha,” he fi tóg mũ.

¹⁰ Hã ra tóg ge nĩ, kanhkã tá, ha mẽ. Topẽ tý jẽnẽ jafã ag mỹ tóg sér tãvĩ tí, ù tý ã jykre kórég to jũn ký, ti tý ã tý Topẽ vỹ mranh ãn tovãnh ký, ha mẽ,” he tóg, Jesus ti.

Ûn kósĩn vãfor to comparaçãõ

11 Kÿ tóg ag mÿ tag tó mÿ gé sir, ha mẽ. “Û vÿ tóg kósin régre ja nÿgtĩ,” he tóg.

12 “Kÿ ti kósin tÿ êgno tóg ã panh mÿ: “panh’,” he mÿ. “Inh mÿ ùri isũ nĩm, ã tÿ inh mÿ nèn nĩm ke mÿ ên tí,” he tóg, ã panh mÿ. Ti tÿ to vĩnh ke tũ vè vè, hã ra tóg to vĩ mÿ. Ge ra ti panh tóg ã krè mÿ ã tũ vènh kãpãm mÿ sir.

13 Kãnhmar ti kósin kyrũ tóg ã tũ mãn kÿ kór há ra, kuvar há ra tĩ mÿ, ga ù ra. Tá tóg ã tũ vãm kãn mÿ, nèn ù kórég kar to.

14 Vãm kãn ja tóg nÿgtĩ, ti jãnkamÿ ti. Kÿ tóg kejèn tá prÿg han mÿ sir, ga ên tá. Kÿ kyrũ ên tóg kókĩr mÿ gé.

15 Kÿ tóg tá ke ù mré vèmén tĩ mÿ, ti tÿ ti mÿ vènh rãnhràj nĩm jé. Kÿ tóg ti jènég mÿ, ti tÿ ti porco ki rĩr jé sir, ti safra tá.

16 Kÿ tóg porco jèn ko sór mÿ, ti kókĩr nĩn kÿ. Hã ra ag tóg ti mÿ nèn ù nĩm tũg mÿ, ti tÿ ko jé. Hã kÿ tóg kókĩr tãvĩ nĩ sir.

17 Kÿ tóg kejèn krĩ há han mÿ. To jykrén tóg mÿ sir. “Inh panh mÿ rãnhràj tĩ ag vÿ pão mág ko tĩ. Ag mÿ tóg kén tĩ, ag jén tĩ. Jo sóg kókĩr kÿ ter ke mÿ,” he tóg, kyrũ ti, ã pir mÿ nĩn kÿ.

18 “Inh jé hÿn inh panh kukãm tĩg ha,” he tóg. “Kÿ sóg ti mÿ: “panh’,” henh ke mÿ. “Kãnhkã tá nĩ ên vĩ mranh inh, ã vĩ ti ke gé.

19 Kÿ sóg vènhmÿ tÿ ã kósin tũ nĩ. Sÿ tÿ ã camarada nĩnh há tóg tĩ,” he jé sóg ke mÿ, inh panh mÿ,” he tóg mÿ, kyrũ ti.

20 Kÿ tóg tĩ mÿ sir, ã panh kukãm.

Hã ra ti panh tóg kór há tá, kuvar há tá ti vég mÿ, kÿ tóg ti kato tẽ mÿ. Ti kato tẽ kÿ tóg ti ki póm ke mÿ sir, ti ki nhun ke tóg mÿ gé sir.

21 Kÿ ti kósin tóg ti mÿ: “panh’,” he mÿ. “Kãnhkã tá nĩ ên vĩ mranh inh, ã vĩ ke gé. Hã kÿ sóg vènhmÿ tÿ ã kósin tũ nĩ ha,” he tóg, ti panh mÿ.

22 Hã ra ti panh tóg ti mÿ: “vó, vènh pãte fón kÿ tóg nĩ,” he mÿ. Kÿ tóg ã camarada ag mÿ: “kur há tãvĩ ên ma kãmũjég,” he mÿ, “ti tÿ kur tãg ra rã jé. Ti mÿ nĩg kãnĩm ja nĩm gé. Pẽn né ên tÿ, pẽn to ró ên tÿ ti mÿ jun gé.

23 Monh tãgy ên venh mũjég. Ti tãnh ra, êg tÿ ko jé, êg fe tÿ mrin ke jé.

24 Inh kósin vÿ inh mÿ ter ja ri ke han, hã ra tóg rĩr mãn ri ke han. Vãfor ti vè vè, hã ra tóg kãtĩg mãn huri,” he tóg, ti panh ti. Kÿ tóg ag mÿ sér tĩ sir, ag tÿ festa han kÿ.

25 Hã ra ti kósin sanh tóg ti japÿ tá rãnhràj jé. Kÿ tóg vãhã tá kãtĩg kÿ ã ïn tá jun mÿ. Tá jun kÿ tóg vãkyr mæg mÿ, fag vènh gringrén ên ti.

26 Kÿ tóg ã camarada jé prèr mÿ. Ti mÿ tóg: “festa tÿ ne nẽ?” he mÿ.

27 Kÿ tóg ti mÿ: “ã jãvy vÿ jun, kÿ ã panh vÿ monh tãgy ên tãnh,” he mÿ. “Ti mÿ tóg sér tĩ, ti tÿ ti ve mãn kÿ. Kaga tũ tóg jé, há tóg jé, hã kÿ tóg ã panh mÿ sér tĩ,” he tóg, ti camarada ti.

28 Kÿ tóg jũ mÿ sir. Kÿ tóg ïn kãra rã tũg mÿ, jũ kÿ.

Kÿ ti panh tóg ti mré vèmén tĩ mÿ. Ti mÿ tóg: “êg mré festa venh kãrã,” he mÿ.

29 Hã ra tóg ti mÿ: “vó,” he mÿ. “Prÿg tÿ hèn ri ke ki sóg ã rãnhràj ti han, ha mẽ. Inh pi(jé) ã vĩ mranh ja nÿgtĩ. Ge ra ã tóg inh mÿ nèn ù nĩm ja tũ nĩ. Æ pi(jé) inh mÿ cabrito fêg tĩ, sÿ inh mré ke ag mÿ festa han jé.

30 Hã ra ã kósin ên tóg jun mÿ sir, jo ã tóg ti mÿ monh tãgy ên tãnh. Kórég ti nĩ, ã kósin ên ti. Æ tũ fón kãn tóg mÿr, ùn tÿtã kórég fag to, hã ra ã tóg festa mág han mÿ, ti kãtĩg kÿ,” he tóg, ti kósin sanh ti, ã panh mÿ.

31 Hã ra ti panh tóg ti mÿ: “vó,” he mÿ. “Inh mré ã tóg jé nĩ, kÿ tóg inh mÿ sér tĩ. Kÿ isũ kar vÿ tÿ ã tũ nÿtĩ, mÿr, ha mẽ.

³² Hã ra festa tag vỹ há nĩ, ha mẽ. Ēg mỹ tóg sér tãvĩ tí. Ā jāvy vỹ inh mỹ ter ja ri ke han, hã ra tóg rĩr mãn ri ke han. Vãfor ti vẽ vẽ, hã ra tóg kãtig mãn huri,” he tóg, ti panh ti, ā kósın sanh mỹ,” he tóg, Jesus ti. Ti tỹ Topê kãmén hã vẽ.

16

Ēg tỹ ěg tũ vẽnĥ kãpãm ke

¹ Kĩ Jesus tóg ā mré mũ tí ag mỹ tag tó mũ, ha mẽ. “Kejĕn ěprã ke ù tóg nĩgtĩ, ùn rico. Kĩ ti tũ ki rĩr tí tóg nĩgtĩ gé. Ti patrão mỹ név(e) nỹtĩ ag vэг ti tí, ti mỹ, ti tũ ki rĩr tí ti. Kejĕn ag tóg ti camarada ěn to vỹ mũ, ti tũ ki rĩr tí ěn to. Ti lograr ke (ka) mẽ ti nĕji nĩ, ti tũ to, ti camarada ti.

² Kĩ tóg ti jé prĕr mũ, kĩ tóg ti mỹ: “ã tỹ han mũ mẽ inh,” he mũ. “Sỹ ā rãnrãj tugnỹm ke vẽ. Ki rĩr mãn ke tũ ā tóg nĩ ha,” he tóg mũ ti mỹ.

³ Kĩ tóg to jykrén mũ sir, ti camarada ti. “Inh hỹn hĕ ri kenh mũ ha?” he tóg mũ. “Inh patrão vỹ inh kutĕm, inh rãnrãj ki. Kĩ inh hỹn ne konh ke mũ ha? Inh ěpỹ jé sóg krój nĩ. Kĩ sóg vẽnĥ kar mỹ: “inh mỹ nĕn ù nĩm, inh mỹ jãnkamy nĩm,” he sór tũ nĩ gé. Inh mỹ a tóg tũ, sỹ ag mỹ tónh ke ti,” he tóg.

⁴ Kejĕn tóg: “ũri hã sóg ki kanhró nĩ ha, sỹ nĕn han ke ti,” he mũ. “Sỹ tag han kĩ ag tóg iso há nỹtĩnh mũ, kĩ ag tóg inh mỹ: “inh mré nĩnh kãtig,” henh ke mũ, inh patrão tỹ inh fón kar kĩ,” he tóg mũ, ti camarada kórég ti.

⁵ Kĩ tóg ù tỹ ā patrão mỹ név(e) nỹtĩ ěn ag jé prĕr kãn mũ sir. Kĩ tóg ù mỹ: “ã név(e) hĕ ri ke nĩ?” he mũ.

⁶ Kĩ tóg ti mỹ: “azeite tỹ lata tỹ 100 (ke) ki inh név(e) jĕ,” he mũ. Kĩ tóg ti mỹ: “hỹn, ā vẽnĥ rãn ti, sỹ ā mỹ ā név(e) tĕrem kĩ 50 (ke) rãn jé,” he mũ. Kĩ tóg rãn mũ sir.

⁷ Kĩ tóg ù ù mỹ: “jo ã?” he mũ gé. “Ā név(e) hĕ ri ke nĩ?” he tóg mũ gé. Kĩ tóg ti mỹ: “trigo tỹ saco tỹ 100 (ke) ki inh név(e) jĕ,” he mũ. Kĩ tóg ti mỹ: “hỹn, ā vẽnĥ rãn ti, sỹ ā mỹ ā név(e) tĕrem kĩ 80 (ke) rãn jé,” he mũ gé. Kĩ tóg rãn mũ gé sir.

⁸ Kĩ ti patrão tóg mĕg mũ, ti camarada tỹ nĕn han mũ ti. Kĩ tóg ti mỹ: “jykre (ka)mĕ ā tóg nĩ, kĩ ā tóg ù tỹ hĕn ri ke tỹ ā to há nĩ han, ā tỹ ag mỹ ag név(e) rem kĩ,” he mũ, ti patrão ti,” he tóg, Jesus ti.

“Kỹ hã vẽ. Û tỹ inh ki ge tũ ag vỹ ājag tũ to jykrén há han tí, inhhã, ha mẽ. Ājag krĩ há kãfór han ag tóg tũ ag tũ to jykrén ki. Ājag tỹ inh ki ge mũ ra ag tóg ājag krĩ há kãfór han tí. Tỹ ag ěprã ke nỹtĩ, hã kĩ ag tóg tag ki nĕn to jykrén há han tí,” he tóg.

⁹ “Hã kĩ sóg ājag mỹ tó mũ. Ti camarada ěn ri ke han nĩ, ājag tũ tỹ ùn mỹ vẽnĥ kãpãm nĩ, ājag tỹ ga kri mũn kĩ. Kĩ ag tóg ājag to há nỹtĩnh mũ. Kejĕn ājag tóg ājag tũ ré kĩ mũnh mũ. Ēn kã ājag tóg mũ há han ke mũ gé. Kĩ ājag tóg kanhkã tá junjun ke mũ sir, ājag tỹ ag mỹ ājag tũ tỹ vẽnĥ kãpãm kĩ.

¹⁰ Û tỹ nĕn ù sĩ ki rĩr há han kĩ tóg nĕn ù ki rĩr há han kãn ke mũ gé. Jãvo ù tỹ nĕn ù sĩ ki rĩr kónãn kĩ tóg nĕn ù ki rĩr kónãn kãn ke mũ gé sir.

¹¹ Ēg tỹ ga kri nĕn vэг mũ vỹ kãnhmar tũ' he mũ. Ājag tỹ hã ra ga kri ājag tũ ki rĩr há han tí kĩ ājag tóg kanhkã tá tỹ nĕn ùn to nỹtĩnh mũ gé.

¹² Ājag tỹ ěprã nĕn vэг mũ vỹ tỹ Topê tũ nĩ. Ti hã mỹ ājag tóg ki rĩr ke mũ. Ājag tỹ ti tũ ki rĩr há han tũ kĩ tóg sir ājag mỹ ājag tũ pĕ ěn nĩm ke tũ nĩ gé, kanhkã tá,” he tóg.

¹³ “Ā jagrĕ régre nĩn kĩ tóg vẽnĥmỹ tí. Ā tỹ Topê hã tỹ jagrĕ nĩn kĩ jãnkamy tãn ěn tỹ jagrĕ nĩ sór tũg nĩ. Ā tỹ jãnkamy e ve sór kĩ ti hã mĩ ěkrén kĩ ti hã vỹ

tý ã jagrê nĩnh mũ. Kỳ ãg tóg Topê tý ãg mũ nén tó mũ ãn to jykrén há han ke tũ nĩgtĩ. Á tý Topê to há nĩnh kỳ ã tóg sir ga kri rico to vãsãn sór ke tũ nĩ. Á tý ga kri rico nĩ sór kỳ ã tóg Topê mũ êkrég tũ nĩ, ha vemni,” he tóg, Jesus ti. Ti tý ãg tý ti tũ há to jykrén há to jykrén há han ke tón há vê.

Topê jykre

(Mt 11.12-13; 5.31-32; Mc 10.11-12)

¹⁴ Hã ra Fariseu ag tóg mæg mũ, ti tý nén tó mũ ti. Jãnkamy mág hã to ag tóg há nĩtĩ, rico ke sór ag nĩtĩ, Fariseu ag. Kỳ ag tóg Jesus vĩ tag mẽ kỳ ag tóg ti to é he mũ.

¹⁵ Hã ra Jesus tóg ag mũ: “êprã ke ag mũ ãjag tóg há nĩtĩ ve nĩtĩ,” he mũ. “Hã ra Topê vĩ ãjag tý nén to jykrén mũ ãn vэг nĩ. Ón kỳ ãjag tóg há nĩtĩ. Êprã ke kãmĩ ãjag tóg tý ãn mág nĩtĩ. Topê mũ ãjag tóg kórég nĩtĩ jãvo, ti mũ kavéj ãjag tóg nĩtĩ,” he tóg.

¹⁶ “Moisés tý ãg mũ Topê vĩ to ja ãn vĩ João tá krỹg, vãsỹ Topê vĩ tó tĩ ag tý ãg mũ nén tó ja kar ãn ti. João tá ti krỹg, ãg kygpég tĩ ãn tá. João tá jun kỳ vènh ù tý hèn ri ke ag tóg vãsãnsãn tĩ, ag tý ve jé.

¹⁷ Hã ra Topê jykre si ãn tóg tũ' henh ke tũ nĩ gé, Moisés tý ãg mũ nén tó mũ ãn ti. Ga vĩ tũ' henh ke tũ nĩ. Ki króm kãn kỳ tóg nĩnh mũ,” he tóg.

¹⁸ “Êg prũg kỳ tóg ge nĩ, ha mẽ. Á tý ã prũ fi fón kar kỳ ù fi tý prũg mãn kỳ ã prũ tũ fi vè sir. Kỳ fi mén tý fi fón kỳ ù tý fi tý prũg mãn kỳ fi mén tũ vè gé sir,” he tóg, Jesus ti. Ti tý Topê jykre kãmén há vê.

Ũ tý Topê vĩ mẽ jãvãnh ag tý nũgme ki vár

¹⁹ Kỳ Jesus tóg ag mũ: “kejẽn ù tóg nĩgtĩ, ãn rico pẽ,” he mũ. “Kur kaja e tu ti tũgtĩ, ãn tánh sá, kur ha pẽ. Kurã kar ki tóg vèjẽn há ko tĩ. Festa ri ke han tóg tĩ, kurã kar ki.

²⁰ Kỳ ãn jagtar tóg nĩgtĩ gé. Ti jiji hã vĩ: Lázaro, he mũ. Vènh kaga fugfo han vãnh han tóg tĩ, kỳ tóg nỹ nĩ, ãn rico jãnkã ki.

²¹ ãn vĩ kókĩr tũgtĩ, ã kaga to. Kỳ tóg ãn rico jẽn vár ko sór tũgtĩ, ti jẽn mru, hã ra tóg ti mũ nĩm tũgtĩ. Cachorro hã ne ti pénĩn e nĩtĩ. Vènh fugfo han vãnh ãn tugmãn ag tóg tĩ.

²² Kejẽn tóg ter mũ, ãn jagtar ãn ti. Kỳ Topê tý jẽnẽ jafã ag vĩ ti va mũ mũ, ti kuprĩg ti, kãnhkã ra. Tá Abraão tóg nĩ nĩ, ãg jóg' jóg ve ti, kỳ tóg ti mré nĩ nĩ sir, ti tý ti krê'krê nĩn kỳ.

Kar ãn rico tóg ter mũ gé sir. Kỳ ag tóg ga kãtã ti péju(g) mũ.

²³ Hã ra tóg nũgme ki kutê mũ, ti kuprĩg ti. Inferno tá ti vèsỹrènh jagy han mũ sir. Kejẽn tóg kãnhkã ki èvãnh mũ, kỳ tóg tá Abraão vэг mũ, Lázaro ke gé, ti tý Abraão mré nĩn kỳ, kuvar há tá.

²⁴ Kỳ tóg ag mũ prèr mũ. Kỳ tóg Abraão mũ: “!..Ijóg!..!” he mũ. “!..Abraão..!” he tóg “!..Ijagãgtãn ra..!” he tóg. “Lázaro jẽnẽ ra, ti tý ã nĩ(gé) juja junun mrãn kỳ ãnh nũnẽ mrãn sĩ han jé. ãnh mũ tóg rỹjgy tãvĩ tĩ, pĩ kãki,” he tóg, Abraão mũ, ãn rico ja ãn ti.

²⁵ Kỳ Abraão tóg ti mũ: “ãnh kósĩn,” he mũ. “Á tý ga kri tũg ja ãn ki êkré. Tá ã tóg há tĩ ja nĩgtĩ, jãvo Lázaro tóg jagtar ja nĩgtĩ. Kỳ tóg tag ki há han tĩ nĩ, jo ã tóg vèsỹrènh jẽ nĩ, ã tý ti jagãgtãn ja tũ nĩn kỳ.

²⁶ Kỳ ãg kuju ki tóg tý kãgnó nĩ, kỳ ù tóg pãte rãnh ke tũ nĩ. Tag ki ke pi(jé) ãn ra tũg mũ', ãn tá ke pi(jé) tag ra kãtũg mũ gé', kãgnó tag tugrĩn',” he tóg, Abraão ti, ãn rico ja ãn mũ.

²⁷ Kŷ ũn rico ja tóg ã jóg tŷ Abraão mŷ: “kŷ sóg ã mŷ nén ũ tó sór mŷ, ha mē,” he mŷ. “Á mŷ inh jóg ĩn ra ti jēnēnh ke tŷ? Tá inh mré ke ag vŷ nŷtĭ.

²⁸ 5(ke) ag nŷtĭ, inh mré pafa ja ag. Ti tŷ ag mŷ tónh tĭg jé, ag tŷ tag ki junjun tŷ nĭ jé, ag tŷ inh mré vēsŷrénh tŷ nĭn jé,” he tóg, ũn rico ja ti, Abraão mŷ.

²⁹ Kŷ Abraão tóg ti mŷ: “tá ag tóg Moisés tŷ ěg mŷ nén tó ja ěn mēnh mŷ, Topē vĭ tó tĭ kar ag vĭ ke gé. Hã kŷ ag tóg Topē vĭ jēmēnh mŷ, ag tŷ mē sór kŷ,” he tóg.

³⁰ Hã ra tóg ã jóg tŷ Abraão ti mŷ: “vó” he mŷ. “Vēser tŷ ag tá jun mŷ ra ag jēmē há han ke mŷ vē, kŷ ag tóg ājag jykre pāno ěn tovānh ke mŷ vē, vēser tŷ ag mŷ tó mŷ ěn ti,” he tóg.

³¹ Hã ra tóg: “vó,” he mŷ gé. “Ag tŷ Moisés vĭ jēmē sór tŷ nĭn kŷ ag tóg vēser vĭ mēnh ke tŷ nĭ gé, ag tŷ Topē vĭ tó tĭ ag vĭ mē jāvānh nŷtĭn kŷ,” he tóg, Abraão ti, ũn rico ja ěn mŷ,” he tóg, Jesus ti. Ti tŷ ag mŷ ěg tŷ Topē vĭ jēmē jāvānh nŷtĭn kŷ vēsŷrénh ke ěn tón hã vē.

17

Topē vĭ mranh tŷ jagy nĭ (Mt 18.6-7, 21-22; Mc 9.42)

¹ Kŷ Jesus tóg ã mré mŷ tĭ ag mŷ: “ũ tŷ hēn ri ke ag vŷ ũ tŷ iso há ěn tŷ isovānh han sór mŷ, ha mē,” he mŷ. “Vēsŷrénh tāvĭn mŷ jé ag tóg ke mŷ, tag to. Topē vŷ ag ve kónān tāvĭn mŷ, ag tŷ ũn krĭn kónān mŷ tag to.

² Ũ tŷ ag krĭn kónān mŷ mŷ tóg há nŷnh mŷ vē, ěg tŷ pó tŷ kra mág tŷ ag nunh to sa kŷ goj nig kuju ki ag vām jé. Tag vŷ ag mŷ jagy tĭ vē. Hã ra ag tóg ti jagy tag kãfór venh ke mŷ, ag tŷ ũn sĭ tŷ inh ki rã kŷ nĭ (hã) ra ti tŷ inh vĭ mranh han sór kŷ.

³ To jykren, vēnh ki rĭr kŷ.

Kejēn ã ěgre vŷ Topē vĭ mranh mŷ. Kŷ ti mŷ tómnĭ, ti tŷ kygnē ti. Ti tŷ tovānh sór kŷ ti mŷ vēnh pāte fón nĭ.

⁴ Hēn ri ke mŷn tóg ã tŷ Topē vĭ mranh han sór mŷ han mǎn', han mǎn' he mŷ, kejēn. Kurã pir ki tóg ã jŷ tŷ hēn ri ke han sór mŷ, hēn ri ke mŷn. Hã ra tóg ã jŷ han kar kŷ: “inh pi(jé) ke mǎn mŷ ha’,” henh ke mŷ gé. Á jŷn kŷ tóg tónh kãtĭg mǎn', tónh kãtĭg mǎn' he mŷ gé. Kŷ ti mŷ vēnh pāte fón to krónh ke tŷg nĭ,” he tóg, Jesus ti.

Ěg tŷ Topē ki rã há han ke

⁵ Kŷ Jesus tŷ ũn vin mŷ ag tóg ti mŷ: “ěg tŷ Topē ki rã há pē han há tóg tĭ,” he mŷ. “Kŷ to ěg tar han nĭ,” he ag tóg, Jesus mŷ.

⁶ Kŷ tóg ag mŷ: “ājag tŷ Topē ki rã kŷ tóg há tĭ,” he mŷ. “Ka tŷ mostarda fy mĭ ěkren nĭ,” he tóg. “Sĭ ti nĭ, hã ra tóg mog tĭ. Tag ri ke han nĭ, Topē ki rã kŷ. Ti ki rã kŷ ājag tóg nén ũ kar to tar nŷtĭnh mŷ. Ka tag ve ra, ka krén tag ti. Ājag tŷ ti mŷ: “ã jāre tŷ ga tá kãkutē, kŷ goj nig ki vēnh krān,” hen kŷ tóg kenh mŷ, ājag tŷ Topē ki rãn kŷ,” he tóg, Jesus ti.

Tŷ ěg Topē camarada nŷtĭ

⁷ “Ājag camarada jykre to jykren nĭ,” he tóg. “Ājag japŷ ki tóg rĭr tĭ, ga tŷ vĭrĭn ken kŷ, ke tŷ nĭn kŷ tóg ājag mēg ki rĭr tĭ gé. Rãkānh kŷ tóg ã rãnrhãj ja tá kãtĭ tĭ. Kŷ ājag pi(jé) ti mŷ: “kunĭg, jēn jé,” he tĭ’.

8 Ti mý ājag tóg: “inh mý vējēn han, ijēn jé,” he tī. “Kuri ā kur tānfyn kŷ tógfīn, ā tŷ inh mý vējēn jun jé, ijēn jé, kron jé, kar kŷ ā tóg jēn ke mū gé sir, kron ke mū gé sir, ijēn kar kŷ,” he ājag tóg tī, ājag camarada mŷ.

9 Kŷ ājag tóg ti mŷ vī há han tū nī gé, ti tŷ ājag vī ki króm mū ra. Ājag camarada vē mŷr, ti rānhrāj vē, hā kŷ tóg ājag vī ēn han ke mū.

10 Kŷ ājag camarada ag ri ke han nī, Topē mŷ, ha mē. Ājag tŷ Topē vī ki króm kān kŷ jagnē mŷ: “ti camarada vŷ tŷ ēg nŷtī,” hemnī. “Ti tŷ ēg mŷ nēn tó mūn hā han ēg tóg, kŷ tóg tŷ nēn ū tū nī,” hemnī jagnē mŷ. “Ti vī han kān tigrīn ēg tóg há nŷtī,” he tūg nī,” he tóg, Jesus ti.

Jesus tŷ ūn kaga tŷ 10 (ke) ag tŷ há' he

11 Kŷ Jesus tóg Jerusalém ra tīg sór mū. Hā kŷ tóg ga tŷ Samaria fyr mī tī mū. Ga tŷ Galiléia mré ti fyr vē.

12 Tá tóg ēmā ū ki rā mū, kŷ ū tŷ 10 (ke) ag tóg ti kato tēgtē mū sir. Vēnh kaga kren vānh hyn han ag tóg mū, lepra han kŷ. Hā kŷ ag tóg kór há tá nŷtī, kuvar há tá.

13 Jamā hár(a) ag tóg prēnprēr mū, kŷ ag tóg: “!..Jesus'..!” he mū. “!..Senhor'..!” he ag tóg mū. “!..Ēg jagāgtān ra..!” he ag tóg mū.

14 Kŷ tóg ag ki ēvānh mū, kŷ tóg ag mŷ: “Topē tū ki rīr tī ag mŷ vēnh ven mŷjēg,” he mū. Kŷ ag tóg mū mū.

Ag mūn kā ag tóg jānhkri' he mū sir, ag fār ti, tá junjun to hā. Háhá' he ag tóg mū sir.

15 Kŷ ag kāmī ūn pir tóg kyrā mū, Jesus to. Topē mŷ tóg vī há han mū, ā tŷ há' hen kŷ. Kŷ vēnh kar vŷ ti vī mēg mū.

16 Ti tŷ Jesus tá jun kŷ tóg ti krēm mŷg ke mū. Ti mŷ tóg: “inh mŷ tóg há tī, ā tŷ isŷ há' hen kŷ,” he mū. Samaria tá fóg ū vē, Jesus to ūn kyrā mū ēn ti.

17 Kŷ Jesus tóg: “ū tŷ 10 (ke) tŷ mŷ', hā vŷ: há', he mŷ?” he mū. “Hā ra ūn pir ne kātīg ja nī'. Hŷn, ū ag, ū tŷ 9 (ke) ēn ag?” he tóg.

18 “Fóg tag hā vŷ ā pir mŷ kyrā, Topē to: “ūn mág vŷ tŷ ti nī,” he jé,” he tóg, Jesus ti.

19 Kŷ tóg fóg ēn mŷ: “jēgnē ra,” he mū. “Ha tīg,” he tóg. “Ā tŷ inh ki rā kŷ, hā kŷ ā tóg há' he mū,” he tóg, Jesus ti.

Topē tŷ tŷ ēg pā'i nī to vēnh jykre (Mt 24.23-28, 37-41)

20 Kejēn Fariseu ag tóg ti ki jēmēnh kāmū mū. “Topē tŷ tŷ ēg pā'i nī ēn mŷ ver kór gy nī, mŷ kuvar gy?” he ag tóg ti mŷ. Kŷ tóg ag mŷ kāmēn mū sir. “Ti vég tŷ ēg tóg nī, ēg kanē tŷ, Topē tŷ tŷ ēg pā'i nī ti,” he tóg.

21 “Hā kŷ ēg tóg to: “tag kā ti nī, tātá ti nī,” henh ke tū nī gé. Ha mē, ājag kāmī ti huri vēnh ven, ti tŷ tŷ ēg pā'i nī ti, ājag tŷ ti vég tū (hā) ra,” he tóg.

22 Kŷ tóg ā mré mū tī ag mŷ: “tŷ sóg ēprā ke fi kósin nī,” he mū. “Kejēn tóg ājag tŷ Topē tŷ tŷ ēg pā'i nī venh ha pē tīnh mū. Ti tŷ kurā pir ki vēnh ven mū vŷ ājag mŷ há tīnh mū vē, hā ra ājag tóg venh ke tū nī ver,” he tóg.

23 “Kŷ ag tóg ājag mŷ: “tag ki ti jun ja nī,” henh ke mū. “Ēn tá tóg jē nī,” he jé ag tóg ke mū gé. Kŷ venh mū tūg nī hā ra. Ag vī jēmē sór tūg nī.

24 Inh kātīg mān ke vŷ ta tŷ kóm kóm ke ri ke nī. Ti tŷ kóm kóm ke kŷ ēg tóg nēn kar vég tī, kanhkā krēm. Kŷ vēnh kar vŷ ti tŷ kóm kóm ke ēn vég tī gé. Inh kātīg mān ke vŷ ri ke nīnh mū, inh kurā ēn kā. Vēnh kar vŷ inh ve kān mū. Tŷ sóg ēprā ke fi kósin nī,” he tóg.

²⁵ “Inh kätīg măn ke to hã sóg hã ra vësÿrénh mág han ke mŭ ver. Ũri ke ag vÿ iso é henh ke mŭ ver,” he tóg.

²⁶ “Kÿ inh kätīg măn ke kurā ên kã êprä ke ag tóg han kãn ke mŭ, ag tÿ Noé tÿ ga mĩ tĩ mŭ kã nén han ja ên ti.

²⁷ Ta kutê to hã ag tóg jên ja nĩgtĩ, jên kar kÿ ag tóg kron ja nĩgtĩ gé, vënh prŭ kutêm ja ag nĩgtĩ gé. Ên kã Noé tóg kejên barco tÿ in kãra rã ja nĩ. Ti tÿ kãra rã kar kÿ ta tóg sir kutê ja nĩ, kÿ ag tóg goj var ki kãgter kãn ja nĩ.

²⁸ Kÿ tóg ri ke pë ja nĩ gé, Ló tÿ ga mĩ tīg ki. Ên kã ag tóg jên ja nĩgtĩ gé, jên kar kÿ ag tóg kronkron ja nĩgtĩ gé. Vender ke mŭ ja ag nĩgtĩ gé, kygĵam ke mŭ ja ag nĩgtĩ gé. Êkrãn ja ag nĩgtĩ gé, in hyn han ja ag nĩgtĩ gé.

²⁹ Ên kã Ló tóg kejên cidade tÿ Sodoma tá kãkutê ja nĩ, kÿ pĩ tóg kanhkã tá kátère ja nĩ, cidade kri, pó tÿ enxofre nĵa ên ke gé. Kÿ ên tóg ag kãgtén kãn ja nĩ. Topê tÿ ag vóg kónãn ke to jykrén sór tũ ja ag nÿtĩgtĩ.

³⁰ Ge ti nĩnh mŭ gé, êprä ke fi kósın tÿ vënh ven măn ke kurā ên kã. Mĩ êkrén ke tũ ag nĩgtĩ gé, ti to há tũ ag.

³¹ Ũ tÿ kurā ên kã ã in rã hã tĩn kÿn jé ã tũ măn rã sór tũg, ti tũ tÿ ti in krêm nÿtĩ ti. Ũ tÿ êpÿ tá ti ên jé ã tũ to vÿn ke tũg.

³² Ló prŭ fi to jykrén.

³³ Ājag tÿ ājag jykre hã han sór kÿ ājag nŭgme ki vár ke mŭ, ha vemnĩ. Ājag tÿ isugrĩn ājag jykre fi măn kÿ ājag krenkren ke vë, ha vemnĩ,” he tóg.

³⁴ “Hã kÿ sóg tag tó mŭ, ha mẽ. Kutÿ ên kã, inh kätīg măn ke kutÿ ên kã ũn régre ag vÿ jagnê mré nŭgnŭr nÿtĩnh mŭ. Ag kãmĩ ũn pir jé prër sóg ke mŭ, kÿ tóg inh mré tĩnh mŭ, ĵavo ti régre vÿ kã nÿnh mŭ, ha vemnĩ.

³⁵ ũn régre fag vÿ êgtynyn nÿtĩnh mŭ, jagnê mré, ên kã. Kÿ sóg ũn pir fi jé prër ke mŭ, kÿ fi tóg inh mré tĩnh mŭ, ĵavo fi régre fi vÿ kã jënh mŭ, ha vemnĩ.

³⁶ ũn régre ag vÿ êpÿ ki rãnhrãj mŭnh mŭ, ên kã. Kÿ sóg ũn pir jé prër ke mŭ, kÿ tóg inh mré tĩnh mŭ. Ĵavo ti régre vÿ tá tĩnh mŭ gé, ha vemnĩ,” he tóg, Jesus ti.

³⁷ Kÿ ti mré mŭ tĩ ag tóg êg Senhor mÿ: “tag hẽ tá ke nĩnh mŭ hÿn?” he mŭ. Kÿ tóg ag mÿ: “kurā ên kã ājag ki kanhró nÿtĩnh mŭ,” he mŭ. “Nén ũ ter nÿg ja ri ke ti nĩ. Hã tá tóg vënh măn tĩ, ĵãtã ti, he êg tóg tĩ. Tag ri ke ti nĩnh mŭ, ha vemnĩ,” he tóg, Jesus ti. Ti tÿ ã kätīg măn ke tón hã vë.

18

Ēg tÿ Topê mré vĩ to krónh ke tũ

¹ Kÿ Jesus tóg ag mÿ: “ājag tÿ Topê mré vëmén ke vÿ ge nÿnh mŭ, ha mẽ,” he mŭ. Ēg tÿ kurā kar ki Topê mré vëmén kÿ tóg há tĩnh mŭ, êg tÿ to krónh ke tũ nĩn kÿ. Tag tÿ tóg ag kanhrãnrãn sór mŭ, ã mré mŭ tĩ ag, hã kÿ tóg tag tó mŭ, ha mẽ.

² “Kejën pã'i tóg nĩgtĩ, êmã ũ tá,” he tóg. “Ag tÿ jagnê to jũ vég ti tĩ. Ti rãnhrãj hã vë. Hã ra tóg Topê kamëg vãnĵ nĩ, ti jykre pãno nĩn kÿ. Kÿ tóg ã mré ke ag kamëg vãnĵ pë nĩgtĩ gé. Kórég pë ti nĩgtĩ.

³ Ti jamã tá ũ fi tóg nĩgtĩ gé, ũn mën ter ja fi. Ên fi vÿ kejën ti to kätīg kÿ ti mré vëmén mŭ. Kÿ fi tóg ti mÿ: “inh lograr ke sór mŭ ên ag jo inh vemnĩ,” he mŭ.

⁴ Hã ra tóg mẽ ĵãvãnĵ nĩ. Jatu tóg nĩ nĩ, kÿsã tÿ hën ri ke ki. Kÿ fi tóg ti tá jun tÿ hën ri ke han mŭ, to krónh ke tũ fi nĩ. Kÿ tóg kejën to jykrén mŭ. “Topê kamëg vãnĵ inh nĩgtĩ,” he tóg. “Ũ kamëg vãnĵ inh nĩgtĩ gé.

⁵ Hã ra fi tóg isovãnh tũ pẽ nĩ, ùn mén ter ja ên fi. Kurã kar ki fi tóg inh mý to vĩnh kãtĩ tĩ. Ký inh hỹn fi jy rãnh mũ ha, ke tũ nĩ mũ ra fi tóg ijũ han ke mũ, fi tỹ inh venh kãtĩ to krónh ke tũ nĩn ký, ha vemnĩ,” he tóg, pã'i kórég ti,” he tóg, ěg Senhor tỹ Jesus ti.

⁶ Ký tóg ag mý: “ti vĩ jẽmẽ ra,” he mũ. “Jykre pãno ti nĩ, pã'i kórég ên ti, hã ra tóg fi tỹ ti mý vĩ e ên to fi kren han sór mũ,” he tóg.

⁷ “Hã ký Topẽ vỹ ãjag krenkren han ke mũ gé. Ājag kuprẽg ja tóg nĩ mýr, ký ti mré vēmén nĩ. Kurã ki ti mý vĩmnĩ, kuty tá ke gé. Ājag kren han vãnh nĩ ve ti nĩ, kejẽn.

⁸ Hã ra tóg ãjag krenkren han ke mũ, kãnhmar, ha vemnĩ. Ki hã sóg tó mũ,” he tóg. “Hã ra ěprã ke fi kósin ên tỹ kãtĩg mãn ký ag mý ti ki ge sór mũ vỹ?” he tóg, Jesus ti.

Ěg tỹ: “tỹ inh ùn há nĩ,” henh ke tũ

⁹ Ký Jesus tóg ag kanhrãn mãn mũ gé. Ũ tóg ù tỹ ti vĩ mẽg mũ ên ag kãmĩ nýtĩ, hã ra ag tóg vëso: “tỹ ěg tóg ùn há nýtĩ,” he tĩ. “Kórég tũ ěg nýtĩ, jo ù ag ne kórég nýtĩ,” he ag tóg tĩ, vëso, Jesus vĩ mẽg mũ ù ag. Ĕn ag kanhrãnran sór tóg mũ, Jesus ti. Ký tóg ag mý: “ãjag jykre vỹ ge nỹnh mũ, ha mẽ,” he mũ.

¹⁰ “Kejẽn Fariseu ù tóg nĩgtĩ. Topẽ jo ùn ra tóg tĩ mũ, tá Topẽ mré vĩ jé. Ti mré ù tóg ra tĩ mũ gé, ù tỹ governo mý jãnkamy mãg tĩ ti. Topẽ mré vĩ sór tóg mũ gé.

¹¹ Ký Fariseu tóg Topẽ mré vēmén jẽ nĩ. “Topẽ,” he tóg. “Inh mý tóg há tĩ, isỹ jykre kórég tũ nĩn ký, ag jãvo. Ũ ag tóg nén ù pēju(g) tĩ, hã ra sóg han tũ nĩgtĩ. Ũ ag tóg nén ù vènhmý han tĩ inhhã, jãvo inh pi(jé) han tĩ. Ājag prũ tũ fag mré ag tóg nỹgtĩ inhhã. Ký governo mý jãnkamy mãg tĩ tag ti vỹ kórég nĩ gé inhhã.

¹² Ag jãvo sóg vènh jykre há han tĩ. Semana kar ki sóg vãkre régre han tĩ, jẽg mẽ tĩ ki. Hã ki sóg ã jykre ki króm tĩ. Isũ tỹ sóg dízimo kajãm tĩ, ã mý. Sỹ nén ù tỹ 10 (ke) ki sóg ùn pĩr nĩm tĩ, ã mý dízimo han ký,” he tóg, Fariseu tĩ, Topé mý.

¹³ Hã ra governo mý jãnkamy mãg tĩ ên tóg kór há tá jẽ nĩ, kuvar há tá, mý'ãg ký. Ký tóg kanhkã ki ěvãnh tũ nĩ gé. Ā fe kri tóg kãgmĩg mũ, ti tỹ mý'ãg mág ký. Ký tóg Topẽ mré vĩ mũ. “Topẽ,” he tóg mũ gé. “Ā vĩ mranh inh mýr,” he tóg. “Ā mý inh jagãgtãn ke tũ hã ra,” he tóg, Topẽ vĩ mranh tĩ ên ti,” he tóg, Jesus ti.

¹⁴ “Ha mẽ, Topẽ vỹ ti mý vènh pãte fón, hã ký tóg jatun mý vyr. Jãvo tóg Fariseu ên mý vènh pãte fón tũ nĩ. Ge ti nĩgtĩ. Ěg tỹ vëso: “há inh nĩ,” hen ký Topẽ tóg ěg to kórég nĩ. Ký tóg ěg térem mũ sir. Ěg tỹ hã ra vëso: “kórég inh nĩ,” hen ký Topẽ vỹ ěg to há nĩ, ký tóg ěg tỹ ùn mág han ke mũ gé sir,” he tóg, Jesus ti.

*Jesus tỹ ùn kãsir ag to há
(Mt 19.13-15; Mc 10.13-16)*

¹⁵ Ký fag tóg gĩr tatĩ kãmũ mũ ti to, ti tỹ gĩr kri ã nĩgẽ fi jé. Hã ra ti mré mũ tĩ ag tóg vég mũ, ký ag tóg fag to jũ mũ, ù tỹ ag tatĩ kãmũ mũ fag to.

¹⁶ Hã ra Jesus tóg fag jé prẽr ký ag mý: “vĩ tũg nĩ, gĩr ag mý,” he mũ. “Gĩr ag tỹ iso kãmũ kamẽg tũg nĩ,” he tóg. “Ũ tỹ ge hã vỹ ěg Senhor tỹ Topẽ krẽm nýtĩnh mũ,” he tóg.

¹⁷ “Sỹ ke há vẽ, hã ký sóg tó mũ. Gĩr ag vỹ iso há pẽ nýtĩ. Ũn kãsir tag ag ri ke nýtĩmnĩ, ke tũ nĩ mũ ra ãjag tóg Topẽ tỹ tỹ ěg pã'i nĩ venh ke tũ nĩ mýr,” he tóg, Jesus ti.

*Ūn rico ag**(Mt 19.16-30; Mc 10.17-31)*

18 Kŷ kejĕn ũ tóg Jesus ki jĕmĕnh kätĭ mũ, pã'i ũ. Kŷ tóg ti mŷ: "Senhor," he mũ. "Há ã tóg nĩ," he tóg. "Sŷ rĭr krŷg ja tũ venh há tóg tĩ. Sŷ ti ve jé inh hŷn vĕnh jykre há tŷ ne han ke mũ?" he tóg.

19 Kŷ Jesus tóg ti mŷ: "iso: "há ã nĩ," he sór tũg nĩ," he mũ. "Ĕg pí(jé) há nŷtĩ," he tóg. "Topĕ há ne ã pir mŷ há nĩ," he tóg.

20 "Topĕ tŷ nĕn ũ to ĕg jyvĕn ja ĕn ki kanhró ã tóg nĩ, há vŷ: ã prũ tũ fi mrĕ nŷ tũg nĩ, he mũ, ũ tĕn tũg nĩ, he mũ, nĕn ũ péju(g) tũg nĩ, he mũ, ũ to ón tũg nĩ, he mũ, ã nŷ mrĕ ã jóg kamĕg nĩ, he mũ," he tóg ti mŷ, Jesus ti.

21 Hã ra tóg: "ki króm kãn sóg, isĭn kã," he mũ.

22 Kŷ Jesus tóg ti mŷ: "nĕn ũ pir vŷ tũ nĩ ver," he mũ. "Ă tũ vãm kãn nĩ, ã tŷ ũn vĕsŷrĕnh mũ ag mŷ vin jé, jãnkamy ti. Kŷ ã tóg kanhkã tá tũ mág nĩ sir. Kar kätĭg nĩ, ã tŷ inh mrĕ tĭg jé," he tóg ti mŷ, Jesus ti.

23 Kŷ tóg ti mŷ vĕnhmŷ tĩ, Jesus vĩ ti, ti rico pĕ nĭn kŷ.

24 Hã ra Jesus tóg ti mŷ vĕnhmŷ ĕn ki kanhrãn mũ. Kŷ tóg ã mrĕ mũ tĩ ag mŷ: "jagy ti nŷ, ũn rico tŷ Topĕ tŷ tŷ ĕg pã'i nĩ venh ke ti," he mũ.

25 "Cavalo pãnĩ sór vŷ prĕj nor fĭn rãm ke tũ nĩ," he tóg. "Ti tŷ fĭn rãm ke ra tóg jagy tĩ vĕ, ũn rico tŷ Topĕ tŷ tŷ ĕg pã'i nĩ venh ke ti," he tóg.

26 Kŷ ti vĩ mĕg mũ ag mŷ vin jé, jãnkamy mũ. "Kŷ ũ hŷn kren ke tũ pĕ nĩ," he ag tóg.

27 Kŷ Jesus tóg ag mŷ: "ĕprã ke ag vŷ tá junjun ke tũ nĩ vĕ," he mũ. "Hã ra Topĕ há tóg ĕg tŷ tá junjun han ke mũ," he tóg.

28 Kŷ Pedro vŷ: "ha vé," he mũ. "Ĕg tŷ nĕn ũ kar ré jé ĕg tóg mũ mũ, ĕg tŷ ã mrĕ mũ jé," he tóg.

29 Kŷ Jesus tóg ag mŷ: "sŷ ke há vĕ, há kŷ sóg tó mũ," he mũ. "Ū tóg kejĕn ã jamã ré kŷ tĩ mũ, ti prũ fi, ti kãke, ti jãvy, ti han mũ fag, ti krĕ ré kŷ tóg tĩ mũ, Topĕ tŷ tŷ ĕg pã'i nĩ tugrĭn, ti tŷ ti vĩ ki króm jé," he tóg.

30 "Ĕn vŷ tóg sir vĕnh kaja jé nĕn kar ĕn tŷ ũn e venh ke mũ, ag jĕgja kã, ga kri, kar kŷ tóg vãhã sir ĕg rĭr krŷg ja tũ venh ke mũ gé sir, kanhkã tá," he tóg, Jesus ti.

*Jesus tŷ ã ter ke tó mãn**(Mt 20.17-19; Mc 10.32-34)*

31 Kŷ tóg ũ tŷ 12 (ke) ag jé prĕr mũ, vyrmŷ, ag mŷ kãmĕn jé. "Ha vé," he tóg. "Jerusalém ra ĕg mũ mũ, kŷ sóg tá ve kãn ke mũ, vãsŷ Topĕ vĩ tó tĩ ag tŷ iso nĕn rán ja ĕn ti," he tóg. "Tŷ sóg ĕprã ke fi kósin ĕn nĩ, há kŷ ag tóg inh kãmĕn ja nĩ ki. Topĕ vĩ ki.

32 Fóg ag mŷ ag tóg inh fĕg ke mũ, pã'i ag, Jerusalém tá, ha vemnĩ, ag tŷ iso é he jé, ag tŷ inh vóg kónãn jé, ag tŷ iso sug ke jé gé,

33 ag tŷ inh mrãnmrãn jé. Ag tŷ isĕn ke vĕ. Hã ra sóg kurã tãgtũ tũg kŷ rĭr mãn ke mũ, ha vemnĩ," he tóg, ti mrĕ mũ tĩ ag mŷ, Jesus ti.

34 Hã ra ag tóg ti vĩ tag to jykrĕn tũ nĩ, ũ tŷ 12 (ke) ĕn ag. Ti vĩ tóg ag mŷ vĕnhmŷ tĩ. Kŷ ag tóg ki kagtũg nŷtĩ. "Ti tŷ ne tó nĕ hŷn?" he ag tóg mũ sir.

*Jesus tŷ ũn kyvó tŷ há' he**(Mt 20.29-34; Mc 10.46-52)*

35 Ag mũn kŷ ag tóg Jericó to há mũ mũ. Tá ũn kyvó vŷ ĕpŷy kri nĩ nĩ, ĕmĭn kri. "Inh mŷ jãnkamy nĭm," he tóg tĩ, vĕnh kar mŷ, ti kyvó nĭn kŷ.

36 Ĕn vŷ vĕnh kar tŷ ĕpŷy jagma mũ mĕg tĩ. Kŷ tóg ag mŷ: "ũ nĕ?" he mũ.

37 Kŷ ag tóg ti mŷ: "Jesus vĕ, Nazaré tá ke ĕn vĕ," he mũ.

38 Kŷ tóg prēr mũ sir. “!..Jesus'..., Davi kósin'..., ijagãgtãn ra..!” he tóg mũ, prēr kŷ.

39 Kŷ Jesus jo mũ ag vŷ ti mŷ vŷ jũ han mũ. “Ëmẽ kã nĩ nĩ,” he ag tóg ti mŷ. Hã ra tóg prēr mân', prēr mân' he mũ. “!..Davi kósin'..., ijagãgtãn ra..!” he tóg.

40 Kŷ Jesus tóg krŷg he mũ, kŷ tóg: “ti jé prēr,” he mũ. Kŷ ag tóg ti pére kãmũ mũ. Ti ki jun kŷ tóg ti mŷ:

41 “inh ã tŷ hẽ ri kenh ke?” he mũ. Kŷ tóg ẽg Senhor mŷ: “sŷ venh há tóg tĩ,” he mũ.

42 Kŷ Jesus tóg ti mŷ: “kŷ tŷ vé,” he mũ. “Ã tŷ inh ki rã kŷ ã há' henh ke mũ,” he tóg.

43 Kŷ tóg vễỹmér ẽvãnh há' he mũ sir. Kŷ tóg ti mré tĩ mũ. Topẽ mŷ tóg vŷ há han mũ. Kŷ tóg vễnh kar mŷ há tí, ag tŷ ti tŷ há' he mũ ẽn ven kŷ. Kŷ ag tóg Topẽ mŷ vŷ há han mũ gé sir.

19

Jesus tŷ Zaqueu venh tĩg

1 Kŷ Jesus tóg cidade tŷ Jericó ki rã mũ sir, kŷ tóg fĩn rãm kŷ tĩg sór mũ.

2 Hã ra ù tóg tá nĩ nĩ, ti jyjy hã vŷ: Zaqueu, he mũ. Governo mŷ jãnkamy mãg ti ag pã'i vễ. Rico pẽ ti nĩ, rico tãvĩ.

3 Ẽn tóg Jesus ve sór mũ, ti tŷ Jericó fĩn rãm kŷ. Hã ra tóg rur jẽ, hã kŷ tóg ti vég tũ nĩ, vễnh e ag tŷ ti pẽnĩn mũn kŷ.

4 Hã kŷ tóg ti jo vễnhvãg tĩ mũ, kŷ tóg ka tŷ krén to tãpry mũ, ti tŷ Jesus ve jé, ti tŷ jagma tũg kŷ.

5 Kŷ Jesus tóg ka ẽn tá jun mũ. Hã ra tóg krĩg mŷ ẽvãnh kŷ ka kri ti vég mũ. Kŷ tóg ti mŷ: “Zaqueu,” he mũ. “Kur kãtẽre to fũrũn ké. Isŷ ã ãn krẽm nũr ke vễ,” he tóg, Jesus tĩ.

6 Kŷ tóg tẽre tŷ mrãnh ke mũ sir. Jesus mŷ tóg: “mũ jé ha,” he mũ. Ti mŷ tóg sér tĩ, Jesus tŷ ti ãn krẽm nũr sór kŷ.

7 Hã ra vễnh e ẽn tóg Jesus to vŷ mũ sir, ti to jũ kŷ. “Topẽ vŷ mranh tĩ vễ, ẽn ti, hã ra tóg ti ãn krẽm nũr sór mũ, vễnh jykre pãno han tĩ ẽn mré,” he ag tóg mũ.

8 Kŷ Jesus tóg ti ãn krẽm nĩ nĩ. Kŷ Zaqueu vŷ ti mŷ vễnh kãmén kãtĩ mũ, ã jykre to jykrén kŷ. Kŷ tóg ẽg Senhor mŷ: “ha vé,” he mũ. “Isũ kujy vin jé sóg ke mũ, ãn jagtar ag mŷ. Û ag lograr he ja sóg nĩgtĩ, ag tũ ki, hã ra sóg ag mŷ ti kãfór nĩm sór mũ ha. Sŷ jãnkamy pir ki ù lograr he jan ki sóg ti mŷ ù tŷ 4 (ke) vin sór mũ,” he tóg, Zaqueu ti.

9 Kŷ Jesus tóg ti mŷ: “há ti nĩ,” he mũ. “Ûri ã tóg kren mũ, ã mré ke fag mré hã,” he tóg. “Abraão kósin vŷ tŷ ã nĩ gé,” he tóg.

10 “Tŷ sóg ẽprã ke fi kósin nĩ. Ûn vãfor mũ ẽn jãvãnh jé sóg kãtĩg, sŷ ag krenkren han jé, ãn jykre pãno han mũ ẽn,” he tóg, Jesus ti.

Jãnkamy to comparação

(Mt 25.14-30)

11 Hã ra ag tóg ti vŷ mẽ há han mũ, kŷ tóg ag mŷ Topẽ tŷ tŷ ẽg pã'i nĩnh ke ti kãmén sór mũ. Jerusalém to hã tóg nĩ, hã kŷ ag tóg ti to: “Topẽ tŷ tŷ ẽg pã'i nĩ hŷn vễnh ven ke mũ, ti tŷ tá jun kŷ,” he mũ.

12 Kŷ Jesus tóg ag mŷ kãmén mũ, Topẽ tŷ tŷ ẽg pã'i nĩnh ke tŷ ver vễnh ven ke tũ nĩ. Kŷ tóg tag tó mũ, ha mẽ. “Kejẽn pã'i tóg nĩgtĩ,” he tóg. “Ẽn tóg ga ù ra tĩg sór mũ, tá ã tũ ve jé, ga ẽn tá ã tũ han jé. Tag han kar tóg tá vŷn ke sór mũ.

13 Pã'i ên vỹ ã camarada tỹ 10 (ke) ag jé prêr mũ, kỹ tóg ag mỹ jänkamy prestar he mũ sir. Ag kar mỹ tóg ti kãmur pir nĩm mũ, jänkamy tỹ, ù tỹ 10 (ke) ag mỹ. Kỹ tóg ag mỹ: “ha inh mỹ tỹ rãnrãj,” he mũ. “Kejên sóg vỹn kenh ke mũ, kỹ sóg tugnỹm ke mũ, ãjag rãnrãj ti,” he tóg. Kar tóg ti mũ sir.

14 Hã ra ti krêm ke ù ag vỹ ti to há tũ nỹtĩ, kỹ ag tóg ti nón vênh vỹ jênêg mũ. Kỹ ag tóg: “ã tỹ êg kri tỹ pã'i nĩn kỹ tóg vênhmỹ nĩ,” he mũ, “êg tỹ tag ve jãvãnh tóg tĩ,” he ja ag tóg nĩgtĩ, ag tỹ ti mỹ vênh vỹ jênêg mũn kã.

15 Hã ra tóg tỹ pã'i nĩn kỹ kějên vỹn ke mũ, ga ên ve kar kỹ, tá ti rãnrãj han kãn kar. Kỹ tóg tỹ pã'i mág jê. Vỹn ke kỹ tóg ã camarada ag jé prêr mũ sir, ti tỹ ùn mỹ jänkamy vin ja ên ag. Ti tỹ ag rãnrãj tugnỹm sór vê, ag ganho ve sór vê gé.

16 Kỹ ù tóg ti tá jun kỹ ti mỹ: “pã'i,” he mũ. “Ti kãmur pir nĩm ã tóg mỹr. Hã ra sóg kri ù tỹ 10 (ke) ganhar ké,” he tóg.

17 Kỹ ti patrão tóg ã camarada mỹ: “jykre há tâvĩ ã tóg nĩ,” he mũ. “Nén sĩ ki rĩr há han ã tóg, hã kỹ ã tóg cidade tỹ 10 (ke) ki rĩr mũ ha,” he tóg, pã'i ti, ã camarada mỹ.

18 Kỹ ù tóg ti tá jun mũ gé. Kỹ tóg ti mỹ: “pã'i,” he mũ gé. “Ti kãmur pir nĩm ã tóg mỹr. Hã ra sóg kri ù tỹ 5 (ke) ganhar ké,” he tóg.

19 Kỹ ti patrão tóg ti mỹ: “cidade tỹ 5 (ke) ki rĩr jé ã tóg ke mũ ha,” he mũ gé.

20 Kỹ ù tóg tá jun mũ gé. Kỹ tóg ti mỹ: “pã'i,” he mũ gé. “Ha vé, ã tũ ti,” he tóg. “Inh kri pãgja ki sóg tógfĩn kỹ nĩm han.

21 ã kamêg ja inh nĩ, ã vĩ tar to. ã tỹ nén vin ja tũ ên mãn sór ã tóg tĩ, ã tỹ nén krãn ja tũ kunũnh sór ã tóg tĩ,” he tóg, ti camarada ti, pã'i ti mỹ.

22 Kỹ ti patrão tóg ti mỹ: “ã vỹ tóg ã jykre pãno han mũ, ha mẽ,” he mũ. “Inh mỹ vỹ tar han tí? Inh mỹ sỹ nén vin ja tũ mãn sór tí? Inh mỹ sỹ nén krãn ja tũ kunũnh sór tí? Hã ki kanhró ã mỹ nĩ?”

23 Kỹ ã tỹ ne jé inh jänkamy tỹ banco ki rãnrãj ti ag mỹ vin ja tũ nĩ nê? ã tỹ ag mỹ vin mũ ra sóg ti juro venh mũ vê, kỹ sóg isũ kãfór mãn ke mũ vê,” he tóg, ti patrão ti, ã camarada mỹ.

24 Kỹ tóg tá nỹtĩ ag mỹ: “ti nĩgã ti tũ mã,” he mũ. “Û tỹ ti kãmur tỹ 10 (ke) mãn ja ên mỹ nĩm, ti tũ pir ti,” he tóg mũ sir.

25 Kỹ ag tóg ti mỹ: “pã'i,” he mũ. “Ti kãmur tỹ 10 (ke) vỹ tỹ ti tũ nỹtĩ. Tũ mág ve ti huri,” he ag tóg, pã'i mỹ.

26 Kỹ tóg: “hỹ,” he mũ. “Hã kỹ sóg tó mũ. Ûn tũ mág vỹ mãn mãn ke mũ. Û tỹ tũ sĩ nĩ ên tũ kunũnh kãn jé ag tóg ke mũ gé,” he tóg.

27 “Kỹ inh kato tẽ mũ ag pèrè kãmũmnĩ, ù tỹ iso: “ti tỹ êg kri tỹ pã'i jên kỹ tóg êg mỹ kórég nĩ,” he mũ ên ag. Ag kãgtén ra, inh rĩnve,” he tóg, pã'i ti,” he tóg, Jesus ti. Ti tỹ êg tỹ ti rãnrãj ki rĩr há han ke kãmén hã vê.

28 Tag tó kãn kỹ tóg tá kãkutẽ mũ sir, kỹ tóg cidade tỹ Jerusalém ra tĩ mũ.

Jesus tỹ Jerusalém tá jun

(Mt 21.1-11; Mc 11.1-11; Jo 12.12-19)

29 Ti tỹ Jerusalém ra tĩg kỹ tóg êmã tỹ Betfagé to há jun mũ, êmã tỹ Betânia tá, pãnónh tỹ Oliveiras he mũ ên tá. Tá jun kỹ tóg ã mré mũ tĩ régre ag jênêg mũ, ag tỹ ti mỹ ag męg tỹ burrica ve jé.

30 Hã kỹ tóg ag mỹ: “êmã ên ra mũmni, êg jo êmã ên ra,” he mũ. “Tá junjun kỹ ãjag tóg burrica fi kósın venh mũ. Kri nĩ ja tũ ja tóg jê ver. Ên kavãn kỹ ti pèrè kãmũmnĩ, ti kyvãn kỹ,” he tóg.

31 “Hēn ri ke mūn ag tóg ājag mý: “ājag tý ne jé ti kavān nē?” henh mū. Ký ag mý: “ĕg Senhor vỹ ti ve sór mū,” hemnĩ,” he tóg, Jesus ti.

32 Ký ag tóg mū mū, Jesus tý ag jēgnēn ký. Ti tý ag mý tó mū ve kān ag tóg mū sir.

33 Ký ag tóg ti kyvāg mū. Ký ti tý tý ũn mēg mū ag tóg ag mý vĩ mū. “Ājag tý ne jé burrica kósın tag kavān nē?” he ag tóg.

34 Ký ag tóg: “ĕg Senhor vỹ ti ve sór mū,” he mū.

35 Ký ag tóg Jesus mý ti pére kāmū mū. Ājag kur kugjén ag tóg mū sir ti kri. Ký Jesus tóg kri nĩ mū sir.

36 Ký tóg tĩ mū. Ký ag tóg ājag kur kugjén mū sir, ĕpry jagma, ĕmĩn jagma.

37 Ge ký ag tóg Jerusalém to hā junjun mū sir, pānónh tý Oliveiras to re ký.

Ag tý pānónh ĕn to re ký vāhā ag kar ĕn tóg Topē mý vĩ há han mū sir, Jesus mré mū kar ĕn ag. Ag mý tóg sér tĩ. Jesus tý nén han mū ve ja ag tóg nĩgtĩ, ti tý nén han vānh hyn han mū ti. Ēn mĩ ĕkrén ký ag tóg Topē mý vĩ há han mū, jamā hár(a).

38 Ký ag tóg: “!..sér tóg tĩ ĕg mý..!” he mū. “!..Ēg Senhor vỹ ĕg ki jun..., ĕg jóg mág tý ti jēnēn ký..!” he ag tóg. “!..Kanhkā tá ke ag tóg jatu nýtĩ..! Topē mý ĕg tóg vĩ há han sór mū, kynhmý nĩ ĕn mý..!” he ag tóg, prēnprēr ký.

39 Hā ra Fariseu ũ ag tóg tá nýtĩ gé, vēnh e ĕn kāmĩ. Ký ag tóg Jesus mý: “Senhor;” he mū. “Ā mré mū tĩ ag mý: “prēnprēr tũg ra,” hé,” he ag tóg, Jesus mý.

40 Hā ra Jesus tóg ag mý: “vó,” he mū. “Ha mē, ag prēnprēr tũ nĩ ra pó hỹn prēnprēr mū vē, ag mý sinsér mū vē,” he tóg ag mý.

Jesus tý Jerusalém to fý

41 Ge ký ag tóg cidade tá junjun mū sir. Cidade ĕn ve ký tóg to fỹ mū, Jesus ti.

42 “Jerusalém tá ke ag vỹ ki kanhrānrān sór tũ nýtĩ,” he tóg. “Ag tý ũri ki kanhrānrān há tóg tĩ vē, hā ra ag tóg ke jāvānh nýtĩ. Ājag tý ki kanhrānrān' he mū ra ājag tóg jatu kenh ke mū vē, mýr, ha mē, hā ra ājag tóg jēmē sór tũ nĩ. Kutu ājag tóg nýtĩ.

43 Hā ký ājag tóg vāhā kurā kórég pē venh ke mū. Ājag kato tēgtē mū ag vỹ ājag to rāránh ke mū. Kūm'kūm ke jé ag tóg ke mū, ājag cidade jy ró pēnĩn. Komēr hā ag tóg ājag to grēngrēn kenh ke mū, ký ag tóg ājag mān vỹrỹn kenh ke mū sir.

44 Ājag tý tũg' he kān jé ag tóg ke mū, ājag krē ke gé. Ājag ĩn kókén kān jé ag tóg ke mū gé. Ký ĩn tý pó pi(jé) jagnē kri nýtĩnh mū'. Kurā há ki ājag tóg Topē vĩ mē jāvānh nýtĩ, ũri. Topē vỹ ũri ājag mý vĩ há han mū ver, hā ra ājag tóg mē jāvānh nýtĩ. Hā ký ājag tóg ti kórég venh ke mū,” he tóg, Jesus ti. Fỹ pē han ký tóg tó mū, cidade mĩ tũg ký.

Jesus tý Topē jo ĩn tá jun

(Mt 21.12-17; Mc 11.15-19; Jo 2.13-22)

45 Ký tóg Topē jo ĩn tá jun ký kāra rā mū sir. Ký tóg ũ tý tá nén ũ vender he tĩ ag pan mū sir.

46 Ag mý tóg tag tó mū, ha mē. “Topē vĩ rá to jykrén nĩ,” he tóg. “Tag vỹ rán ký nĩ, ha mē. ĩnh ĩn jiji vỹ tý Topē mré vĩ jafā nĩ, he tóg, Topē vĩ tý rán ký nĩ ki. Hā ra ājag tóg Topē mré vĩ jafā tag krēm nén kar pigju mũgtĩ, ký tóg bandido ag jamā ri ke nĩ sir,” he tóg, Jesus ti. Ag pan ký tóg ag mý tó mū.

⁴⁷ Hã ki tóg kurã kar ki ag kanhrãnrãn mũ, Topê jo ìn krêm. Hã ra Topê tũ ki rĩr tĩ to pã'i ag mĩ tóg kórég nĩ, Topê vĩ rán tĩ ag mĩ ke gé, pã'i kar ag mĩ. Hã kũ ag tóg ti tén ke to jykrén mũ sir.

⁴⁸ Hã ra tóg ag mĩ ki króm sór tũ nĩ. Vênh kar mĩ tóg mẽ sér tĩ, ti vĩ ti, hã kũ pã'i ag tũ ti tén sór mũ ra tóg vênhmũ tĩ sir ag mĩ.

20

Ûn nũ hũn Jesus jênê

(Mt 21.23-27; Mc 11.27-33)

¹ Kurã kar ki Jesus tóg Topê vĩ tó jê nĩ, vênh vĩ sér ên, Topê jo ìn krêm. Kũ tóg kejên tá jê nĩ. Kũ Topê tũ ki rĩr tĩ to pã'i ag tóg ti to kãmũ mũ, Topê vĩ to professor ag ke gé, kófa ag ke gé.

² Ti mĩ ag tóg: “êg tũ ã ki jêmênh há tóg tũ,” he mũ. Kũ tóg ag mĩ: “hej,” he mũ. Kũ ag tóg: “ã vênh jykre tũ ne tũ tag han mũ?” he mũ. “Û nũ ã jênê?” he ag tóg.

³ Kũ tóg ag mĩ: “ãjag ki sóg jêmênh ke mũ gé, vênh kato,” he mũ. “Ha mẽ.

⁴ João vỹ ag kygpég tĩ ja nĩgtĩ. Kũ ti mĩ kanhkã tá vênh jykre han mũ, êprã jykre vó?” he tóg. “Û nũ ti jênê?” he tóg. “Inh mĩ tó,” he tóg, Jesus ti, ag mĩ.

⁵ Kũ ag tóg jagnê mré to jykrén mũ sir. “Êg tũ ti mĩ: “Topê tũ ti jênê vê,” hen kũ tóg êg mĩ: “ãjag tũ ne jé ti vĩ kri fig tũ ja nĩ nê?” henh ke mũ,” he ag tóg jagnê mĩ.

⁶ “Êg tũ hã ra ti mĩ: “êprã ke jykre ja vê,” hen kũ vênh kar vỹ êg pin sór ke mũ, pó tũ, ha vemnĩ. João to ag tóg: “Topê vĩ tó tĩ pẽ ja vê,” he tĩ, hã kũ ag tóg êg to jũnh ke mũ, êg tũ: “hã tũ vê,” hen kũ,” he ag tóg mũ jagnê mĩ.

⁷ “Topê jykre han ja ti nĩ,” he sór tũ ag nũtĩ, kũ ag tóg: “êprã ke jykre han ja ti nĩ,” he sór tũ nũtĩ gé. Hã kũ ag tóg Jesus mĩ: “êg pi(jé) ki kanhró nũtĩ,” he mũ, João jykre to.

⁸ Kũ Jesus tóg ag mĩ: “kũ sóg ãjag mĩ ù tũ inh jênêg mũ ên tónh ke tũ nĩ gé,” he mũ. Á kato tẽ mũ ag mĩ tóg ke mũ.

Ûn camarada kórég ag to comparação

(Mt 21.33-46; Mc 12.1-12)

⁹ Kũ tóg vênh kar kanhrãnrãn kũ ag mĩ: “êg tũ Topê kato tẽ kũ tóg ge nũnh mũ, ha mẽ,” he mũ. “Kejên ù tóg nĩgtĩ. Uva krãn ja tóg nĩ, nén kanê tũ vinho han jafã ên. Kũ tóg ù tũ ki rĩr tĩ ag mré to jykrén kũ ag mĩ tovãnh mũ sir. Ag mĩ tovãnh kũ tóg ga ù ra ti mũ. Hã ra tóg kãtũg vãnh han mũ.

¹⁰ Ti uva kanên kũ tóg ag mĩ ã camarada jênêg mũ, ù tũ ki rĩr tĩ ag mĩ, ag tũ ti mĩ ti tũ nĩm jé, êkré kanê ên ti. Hã ra ag tóg ti mĩ vin tũg mũ. Ti mrãnrãn ag tóg mũ. Kũ ag tóg ti mĩ: “ha tũg,” he mũ. Nén ù tũ ra tóg tũ mũ sir.

¹¹ Kũ tóg ã camarada ù jênêg mũ gé sir. Hã ra ag tóg ti mrãnrãn mũ gé. Ti mĩ féfén kar kũ ag tóg ti mĩ: “ha tũg,” he mũ gé sir. Nén ù tũ ra tóg tũg mũ gé.

¹² Kũ tóg ag mĩ ù jênê mãn mũ gé sir, hã ra ag tóg ti mrãnrãn kũ ti rãnh kũ ti tũn mũ sir.

¹³ Kũ uva kré tũ ùn tũn mũ tóg to jykrén mũ. “Inh hũn hên ri kenh ha,” he tóg, to jykrén kũ. “Inh kósín jênê jé sóg ke mũ, inh fe pẽ ên, hên ri ke mũn ag ti kamêg mũ,” he tóg.

¹⁴ Ti kósín tũ ag tá jun kũ nén kré ki rĩr tĩ ag tóg ti vég mũ. Kũ ag tóg ti to jykrén mũ, jagnê mré. “Kejên êkré tag vỹ tũ ti tũ nũnh mũ,” he ag tóg. “Mũ nũ, ti tén jé, ti tũ tag tũ tũ êg tũ nũnh jé,” he ag tóg.

15 Kÿ ag tóg ró mã ra ti pére mũ kÿ tá ti tén mũ sir. Kÿn hÿn hê ri kenh ke mũ', êkré tÿ ùn tũn mũ ên ti?" he tóg, Jesus ti.

16 "Kâtig jé tóg ke mũ, êkré ki rÿr tÿ ag kâgtén jé. Kÿ tóg camarada ù ag mÿ finh mũ sir, ã jakré ti," he tóg, Jesus ti.

Kÿ ag tóg mễg mũ, ti vĩ ti, ti pênĩn nÿtĩ ên ag. Kÿ tóg ag mÿ e tĩ. "Êg jé tag venh ke tũ nĩ," he ag tóg mũ, ù tÿ Jesus vĩ mễg mũ ag.

17 Hã ra Jesus tóg ag ki êvãnh kÿ ag mÿ: "Topê vĩ rá tag to jykrén nĩ, ha mễ," he mũ. "Pó tÿ Ìn han jafã fón ag tóg, pó tÿ Ìn han tĩ ag. Ag mÿ tóg kórég ja nĩ, pó ên ti. Hã ra Topê tóg pó ên hã tÿ Ìn nũna han mũ," he tóg, Topê vĩ tÿ rãn kÿ nĩ ki," he tóg, Jesus ti. Ti tÿ ã kato vãsãnsãn mũ ag mÿ vễnh kãmén hã vễ.

18 Kÿ tóg ag mÿ: "ù tÿ hên ri ke ag vÿ pó tag kri vár ke mũ, kÿ ag tóg kri vár kÿ tũ' henh ke mũ," he mũ. "Kÿ pó tag vÿ ù tÿ hên ri ke ag kri kutênh ke mũ gé. kÿ tóg ag tÿ nám nám ke kãn mũ sir, ag kri kutê kÿ," he tóg, Topê vĩ tÿ rãn kÿ nĩ ki," he tóg, Jesus ti. Ti tÿ ag tÿ ti ki rã tũ tigrĩn nũgme ki vár ke tón hã vễ.

Êg tÿ imposto kajãm

(Mt 22.15-22; Mc 12.13-17)

19 Kÿ Topê vĩ to professor ag vÿ ti vĩ mễg mũ, Topê tũ ki rÿr tÿ to pã'i ag ke gé. Ag hã to tóg kãmén ja nĩ, "êg tÿ Topê kato vãsãn tag vÿ ge nÿnh mũ," he mũ ên ti. Kÿ ag tóg ki kanhró nÿtĩ sir, hã kÿ ag tóg ti se sór mũ. Hã ra ag tóg ùn e ên kamễg mũ. Ti vĩ vÿ vễnh kar mÿ mễ há tĩ, hã kÿ pã'i ag tóg ti ség tũ nĩ ver, ag tÿ ti se sór mũ (hã) ra.

20 Kÿ ag tóg hã ra ti tugnÿm mũ. Ti vĩ to ag tóg vãjig mũ, ag tÿ ti vĩ to fóg tÿ pã'i mÿ ti fêg jé. Ag tÿ ti vĩ tugnĩn fóg tÿ pã'i mág mÿ: "ha ti vóg kónãn," he sór vễ. Hã je ag tóg ùn jykre kuryj nÿ ve ag jêgnêg mũ, ag tÿ ón kÿ Jesus ki jêmê jé.

21 Kÿ ên ag tóg sir Jesus mÿ: "Senhor'," he mũ. "Vễnh jykre kuryj hã tó ã tóg tĩ, hã kãmén ã tóg tĩ. Hã kÿ êprã ke ag ve tóg ã mÿ tÿ nén ù tũ nĩ. Hã kÿ ã tóg Topê japyro, Topê jamĩn to êg kanhrãn há han tĩ," he ag tóg mũ.

22 "Kÿn mÿ há nÿ, êg tÿ fóg tÿ pã'i mág tÿ imperador mÿ jãnkamy ên nĩm ti, imposto kajãm jé? Êg mÿ hÿn nĩm mũ', nĩm ke tũ nĩ vó?" he ag tóg.

23 Hã ra Jesus tóg ki kanhró nĩ, ag jykre régre ti. Hã kÿ tóg ag mÿ: "ãjag ne tóg ón kÿ ình ki jêmê sór mũ'," he mũ.

24 "Ình mÿ jãnkamy ven. Û jiji nÿ kã nĩ? Û kãggrá nÿ kã nĩ?" he tóg. Kÿ ag tóg ti mÿ: "pã'i mág kãggrá vễ," he mũ.

25 Kÿ tóg ag mÿ: "kÿ pã'i mág mÿ ti tũ nĩm, jo Topê mÿ ti tũ nĩm gé," he mũ, Jesus ti.

26 Hã kÿ tóg ag tÿ ti vĩ to ti senh ke tóg tũ tĩ, ti vĩ há han kÿ. Kÿ tóg ag mÿ e tĩ, ti vĩ há tãvĩ ên ti. Kÿ ag tóg ti mÿ vĩ mãn tũ nĩ sir. Hã ra vễnh kar vÿ ti vĩ mễg nÿtĩ nĩ.

Ûn kãgter mũ ag tÿ rÿnrÿr mãn ke

(Mt 22.23-33; Mc 12.18-27)

27 Kÿ Saduceu ag tóg ti tá junjun mũ gé, ti ki jêmê jé. Hã ra Saduceu ag tóg: "êg ter ja tá êg tóg vÿn ke mãn ke tũ nĩ, rÿr mãn ke tũ êg tóg nĩ," he tĩ.

28 Ên ag vÿ Jesus ki jêmê sór mũ gé, ón kÿ. Kÿ ag tóg ti mÿ: "Senhor'," he mũ gé. "Moisés vÿ êg mÿ vễnh jykre tag nĩm, hã vÿ: ã régre tÿ ã krê tũ ra ter kÿ ã tÿ ti prũ fi tÿ prũg ke vễ, he mũ. ã tÿ ã régre mÿ ã krê han ke vễ, fi ki, he tóg mũ gé. Moisés tÿ êg mÿ tó jan hã vễ," he ag tóg mũ, Saduceu ag.

29 “Kỹ ù tỹ jagnê mré pafa ja tỹ 7 (ke) ag vỹ nỹgtĩ. Ag kãke vỹ prũg mũ, hã ra tóg ã kósín tũ ra ter mũ.

30 Kĩ ti jãvy vỹ fi tỹ prũg mũ sir, hã ra tóg ã kósín tũ ra ter mũ gé.

31 Kĩ ti jãvy ù tóg fi tỹ prũg mũ gé, hã ra tóg ter mũ gé, ti kósín tũ ra. Gen kỹ ag tóg kãgter kãn mũ kejên, ù tỹ 7 (ke) ên ag.

32 Kỹ vãhã ag prũ fi vỹ ter mũ gé sir.

33 Kỹ fag kãgter ja tá rĩnrĩr mãn kỹ fi hỹn mén tỹ 7 (ke) nĩnh mũ vê. Ag kar vỹ fi tỹ prũg ja nỹtĩgtĩ. Hã kỹ tóg vẽnhmỹ nỹ, ag tỹ: “rĩnrĩr mãn jé êg tóg ke mũ,” hen kỹ,” he ag tóg. Saduceu ag tỹ Jesus mỹ ken hã vê.

34 Kỹ Jesus tóg ag mỹ kãmén mũ. “Êprã ke ag vỹ prũgprũg tĩ, kỹ fag vỹ ag tỹ mén tí gé.

35 Ag kãmĩ ù ag tóg ãjag kãgter ja tá rĩnrĩr mãn ke mũ, ti kurã tá krỹg kỹ. Ên ag vỹ prũg mãn ke tũ nĩ sir, mén mãn ke tũ fag tóg nĩ gé sir, ãjag rĩnrĩr mãn kỹ.

36 Ter mãn ke tũ ag tóg nĩ gé, mỹr, ha mẽ, hã kỹ ag prũg mãn ke tũ nĩ, kỹ fag mén mãn ke tũ nĩ gé. Kanhkã tân ri ke ag nỹtĩ, Topê tỹ jêgnê jafã ag ri ke mỹr, ùn rĩnrĩr mãn mũ ag. Topê krê vỹ tỹ ag nỹtĩ sir, ag tỹ ãjag kãgter tá rĩnrĩr mãn ken kỹ.

37 Rĩnrĩr mãn jé ag tóg ke mũ, ùn kãgter mũ ag, ha vemnĩ. Hã kỹ Moisés tóg Topê to tag tó ja nĩ, ha mẽ. Ti tỹ vãnħ pũr nĩ ên tá ti mré vêmén kar kỹ tóg Topê to: “Abraão tỹ ùn to: Topê, he mũ ên vê, Isaque tỹ ùn to: Topê, he mũ ên, Jacó tỹ ùn to: Topê, he mũ ên,” he ja nĩ, Moisés ti.

38 Kãgter ag huri, Abraão, Isaque, Jacó, hã ra Moisés tóg Topê to: “Abraão tỹ ùn to: Topê, he mũ ên vê,” he ja nĩ. Ti tỹ tỹ ag Topê nĩn kỹ ag tóg rĩnrĩr nỹtĩ, ha mẽ, ag kãgter mũ ra. Ûn kãgter kar ag vỹ Topê mỹ rĩnrĩr nỹtĩ,” he tóg, Jesus ti.

39 Kỹ ù tỹ Topê vĩ rán tí ù ag tóg êg Senhor tỹ Jesus mỹ: “vĩ há han ã, êg ter ja tá vỹn kenh ke mũ tag to,” he mũ, ti mỹ.

40 Kỹ ù tóg ti ki jêmê mãn sór tũ nĩ sir. Ti kamêgmêg ag tóg mũ, hã kỹ ag tóg ti ki jêmê mãn sór tũ nĩ ha.

Cristo mỹ tỹ Davi kósín nĩ, Topê kósín mỹ vò

(Mt 22.41-46; Mc 12.35-37)

41 Kỹ Jesus tóg ag ki jêmêg mũ gé sir. Kỹ tóg ag mỹ: “Topê vĩ rán tí ag ne tóg: “Cristo vỹ tỹ Davi kósín nĩ,” he tĩ,” he mũ.

42 “Hã ra Davi tóg Cristo tó ja nĩ, ti tỹ Topê jé rán kỹ. Kỹ tóg: “êg jóg mág tỹ Topê vỹ inh Senhor mỹ tag tó ja nĩ, ha mẽ: “nĩ ra ver, inh pẽgja tá,” he ja ti nĩ.

43 “Isỹ ã kato vãsãnsãn mũ ag tỹ ã krêm vin ke vê, kỹ ag sigse ri ke vê sir. Tag jãvãnħ nĩ ver,” he ja ti nĩ, Topê ti,” he ja tóg nĩgtĩ, Davi ti,” he tóg, Jesus ti.

44 “Hã kỹ Davi tóg Cristo to: “inh Senhor,” he ja nĩ. Kỹ ti kósín mỹ tỹ ti kri ke nĩ?” he tóg mũ, Jesus ti.

Hã ra ag tóg ti mỹ tó tũg mũ. Ag tỹ ne tónħ ke tóg tũ tĩ, ti kato tẽgtê mũ ag mỹ.

Ón kỹ Topê vĩ to professor ag kamêg jé êg ke mũ

(Mt 23.1-36; Mc 12.38-40)

45 Vẽnħ kar tóg mêg mũ, Jesus vĩ ti. Kỹ tóg ã mré mũ tí ag mỹ:

46 “ón kỹ Topê vĩ to professor ag kamêg nĩ,” he mũ. “Kur téj rĩnh ka(mê) ag nỹtĩ,” he tóg. “Kỹ vẽnħ kar tỹ ag mỹ: “ã mỹ há?” hen kỹ tóg ag mỹ sér tí, ag tỹ cidade kuju kãmĩ mũn kỹ. Vẽnħ kanhrãn jafã krêm ag tóg vẽnħ kãpãm kỹ nỹtĩgtĩ. Festa ki ag tóg jên vén tí, ag tỹ tỹ pã'i nỹtĩn kỹ,” he tóg.

47 “Hã ra ag tóg ùn mén ter ja fag tũ mãn kãn tĩ. Fag tũ mãn kãn kũ ag tóg ón kũ Topẽ m̀rẽ vĩ mág han mũgtĩ, ẽg tũ ag to: “ùn há vỹ tũ ag nỹtĩ,” he jé. Hã to ag vỹsrẽnh mág tãvĩ han ke mũ,” he tóg, Jesus ti. Ti tũ ù tũ ón kũ Topẽ to há nỹtĩ ag kãmén há vỹ.

21

*Ùn mén ter ja fi tũ ã tũ vìn kãn
(Mc 12.41-44)*

1 Kũ Jesus tóg Topẽ jo ìn tá jẽ kũ tãmĩ ẽvãnh kũ ùn rico ag vigvæg mũ. Jãnkamy vìn jafã ki ag tóg ãjag tũ vìn tĩ, Topẽ mỹ, jãnkamy ti. Vìn mág ag tóg mũ.

2 Kũ ùn mén ter ja fi vỹ tá jun mũ gé sir. Tỹ nén ù tũ fi tóg nĩ, hã ra fi tóg jãnkamy kãsir régre vìn mũ, Topẽ mỹ.

3 Kũ Jesus tóg fi to: “ve ra ha,” he mũ. “Ùn rico tỹ vìn kãfór han fi tóg, fi tũ sĩ (hã) ra. Tỹ nén ù tũ fi tóg nĩ, fi mén vỹ hur ter.

4 Kũ fi tóg ã tũ vìn kãn ja nĩ, fi jẽn m̀rẽ hã. Jãvo ùn rico ag vỹ ãjag tũ ke hã tỹ Topẽ mỹ vìn mág tĩ. Hã ki fi tóg ag tỹ nĩm kãfór han, fi tỹ nĩm sĩ pẽ han mũ ra. Ki hã sóg tó mũ m̀y;” he tóg, Jesus ti.

*Topẽ jo ìn kókén kũ nĩnh ke
(Mt 24.1-2; Mc 13.1-2)*

5 Ẽn kã ù ag tóg Topẽ jo ìn to vĩ há han mũ. “Sĩnvĩ pẽ ti jẽ,” he ag tóg mũ. “Ti pó ve ra ha, mág ti nỹtĩ. Ti sĩnvĩ han jafã vỹ e nỹtĩ gé,” he ag tóg.

6 Kũ Jesus tóg ke mũ. “Mỹ ãjag mỹ sĩ?” he tóg. “Kẽjẽn tóg kókén kãn kũ nỹnh mũ, ha vemnĩ, kũ pó vỹ jagnẽ kri nỹtĩ mãn ke tũ nĩ ha. Gũm ke kãn jé tóg ke mũ, tag ti,” he tóg, Jesus ti.

*Vẽnh jagãgtar to rã
(Mt 24.3-14; Mc 13.3-13)*

7 Kũ ag tóg ẽg Senhor ti m̀y: “kurã tỹ ne kã ke nẽ hỹn’?” he mũ. “Ẽg hỹn hẽn ri ken kũ ti kurã ki kanhró nỹtĩnh mũ hỹn’? Topẽ hỹn ne han ke mũ, ẽg tỹ kurã ẽn ki kanhró nỹtĩ jé?” he ag tóg.

8 Kũ tóg ag m̀y: “ker ù vỹ jẽmẽ hẽ!,” he mũ. “Ủ tỹ hẽn ri ke ag vỹ inh jiji tó kãmũnh mũ. “Cristo vỹ tỹ inh nĩ,” he jé ag tóg ke mũ. “Inh kurã vỹ hur jun,” he jé ag tóg ke mũ. Ag nón mũ tũg nĩ.

9 Vẽnh gẻnh mẽgmẽ jé ãjag tóg ke mũ, jagnẽ kato vãsãnsãn mũ ag. Kamẽg tũg nĩ hã ra. Vẽnh gẻnh tỹ hẽn ri ke han jé ag tóg ke mũ, kurã tỹ ẽgno to hã. Ti kurã kã ke pijé!,” he tóg.

10 Kũ tóg ag m̀y: “povo ag tỹ jagnẽ kato vãsãnsãn ke vỹ, pã’i krẽm ke ag tỹ pã’i ù krẽm ke ag to jũnh ke vỹ,” he mũ.

11 “Ga tỹ ragrag ke jagy tỹ hẽn ri ke han ke vỹ gé, ẽn kã. Kũ vỹjẽn tóg tũ’ henh ke mũ gé. Vẽnh kaga kórég (ka)mẽ vỹ vẽn vìnven ke mũ, ẽn kã sir. Nén ù vẽnhmỹ vỹ vẽn vìnven ke mũ gé, kanhkã tá, kũ vẽn kar vỹ kanẽ junjur ke mũ,” he tóg, Jesus ti.

12 “Tag to hã ag tóg ãjag sigsenh ke mũ gé, ãjag vóg kónãn jé ag tóg ke mũ gé, vẽn kanhrãn jafã krẽm ag tóg ãjag jykre vigvenh ke mũ gé, vẽn se ja kãki ag tóg ãjag vìn ke mũ gé. Pã’i mág tỹ rei ag m̀y ag tóg ãjag venven ke mũ, pã’i tỹ governador ag m̀y ke gé, ãjag tỹ inh jyty tó ja tugnĩn.

13 ãjag tỹ inh vĩ tó jé, hã jé ag tóg ãjag tỹ genh ke mũ.

14 Ẽn kã ãjag tỹ nén ù tónh ke to jykrẽn tũg nĩ, to krĩ kufy han tũg nĩ gé.

15 Inh hã vỹ ãjag vỹ han ke mũ, inh jykre nĩm jé sóg ke mũ ãjag mỹ, ãjag tỹ ag mỹ tón jé," he tóg. "Kỹ ag tỹ ãjag vỹ kafãn sór mũ ra tóg ag mỹ vẽnhmỹ tĩnh mũ, ha vemnĩ, ãjag kato tẽgtẽ mũ ag mỹ. Ag tỹ ne tónh ke tóg tũ tĩnh mũ, ha vemnĩ," he tóg, Jesus ti.

16 "Ën kã ãjag han mũ ãn vỹ ãjag senh mũ, ãjag mré pafa mũ ag ke gé, ãjag mré ke ag ke gé, ãjag to há kar ag mỹr," he tóg. "Ãjag kãmĩ ù ag kãgtén jé ag tóg ke mũ gé, ha vemnĩ.

17 Vẽnh kar vỹ ãjag to kórég tãvĩ nỹtĩnh mũ, inh jiji tugrĩn.

18 Hã ra ãjag véké vẽnỹrénh ke tũ nĩ, ãjag gãnh pir vỹ fagrĩnh mỹ kuténh ke tũ nĩ, ha vemnĩ.

19 To tar nỹtĩmĩ, ãjag vẽnỹrénh ke to, kỹ ãjag tóg rĩr krỹg ja tũ ãn venh ke mũ," he tóg, Jesus ti.

*Jerusalém kókén kỹ nỹnh ke
(Mt 24.15-21; Mc 13.14-19)*

20 "Kejèn ag tóg Jerusalém jy nỹtĩnh mũ, soldado ag, ag tỹ cidade ãn kókén jé. ãjag tỹ tag ve kỹ ãjag tóg ki kanhró nỹtĩnh mũ. Ag tỹ ti kókén kãn ke kurã vỹ jun ke mũ, kurã ãn kã.

21 Kỹ vẽnh pigju mũmĩnĩ, pãnónh ra, ãjag tỹ Judéia ki nỹtĩn kỹ. ãjag tỹ cidade mág tá nỹtĩn kỹ pétigtẽmĩ, vãn hãra. ãjag tỹ vãn hãmĩ ãmã kãsir ki nỹtĩn kỹ cidade ra mũ tũg nĩ.

22 Topẽ tỹ ag vóg kónãn ke kurã vẽn sir, ag jykre kórég to, hã kỹ tóg vãsỹ rán kỹ nĩ. Vẽnh rá ãn ve jé ãjag tóg ke mũ, kurã ãn kã.

23 Kỹ ùn kufy fag vỹ vẽnỹrénh mág ke mũ, kurã ãn kã, gĩr pygfãm mũ fag ke gé. Ëprã ke ag vẽnỹrénh mág tãvĩ han ke vẽn, Topẽ tỹ povo tag to jũ jagy han ke vẽn, kurã ãn kã.

24 ãjag kãmĩ ùn e tãvĩ kãgtẽr ke vẽn, rógro tỹ. Kỹ ãjag kãmĩ ù ag vỹ sigse kỹ mũnh mũ, povo kar kãmĩ. Kỹ Jerusalém vỹ kókén kãn kỹ nĩnh ke mũ. Fóg ag vỹ sãnsãn ke mũ, ãjag cidade mág ti. Kejèn fóg ag tỹ tũ' henh ke kurã vỹ jun ke mũ gé hã ra," he tóg, Jesus ti.

Topẽ kósin kãtĩg mãn ke

(Mt 24.29-31; Mc 13.24-27)

25 "Kurã ãn kã rã vẽnhmỹn ke vẽn, kysã ti ke gé, krĩg ti ke gé. Kỹ ga kri mũ ag vỹ kamẽgmẽg kãn ke mũ. Kanẽ junjur mág jé ag tóg ke mũ, povo kar ãn ag. Kỹ goj vỹ krẽm ke mũ, goj kafã tũ vỹ jũnh ke mũ, ti kurã jun kỹ.

26 Kỹ ãprã ke ag fe vỹ vo kónãn ke mũ, ag tỹ jũrũn ke vỹ ag kãgtén ke mũ, ag tỹ ãjag tỹ nẽn venh ke to jũrũn ken kỹ. Ëg tỹ kanhkã tá nẽn vég tũ kar ãn vỹ ragrag ke kãn mũ mỹr, ha mẽ.

27 Kỹ vãhã vẽnh kar vỹ ti kãtĩg ãn venh ke mũ, ãprã ke fi kósin ãn ti. Kanhkã góg kãmĩ sóg kãtĩg ke mũ vãhã sir. Inh ve vỹ tar nĩnh mũ, inh kãtĩg mãn kỹ. Kókov kãtĩg jé sóg ke mũ vãhã sir," he tóg, Jesus ti.

Ka tỹ figueira to comparação

(Mt 24.32-35; Mc 13.28-31)

28 "ãjag tỹ isỹ ãjag mỹ nẽn tó mũ ãn ve sĩ han kỹ ãjag kanẽ nĩm nĩ, ãjag krĩ ti ke gé, ti tỹ ãjag mỹ sér gy tĩn kỹ. Isỹ ãjag krenkren han ken vẽn ha, isỹ kurã ãn hã kã jun kỹ," he tóg.

29 Kỹ tóg ag mỹ: "inh kãtĩg mãn ke vỹ ge nỹnh mũ, ha mẽ," he mũ. "Ka tỹ figueira to ki kanhrãn nĩ, ka ù to ke gé, to comparação han kỹ," he tóg.

30 “Ti pē tánh kŷ, ti féj tǎg han kŷ tóg kakó tĩ sir, ěkré tygtánh kurā ti.

31 Ěn ri ke ti nĩ, ājag tŷ inh kǎtŷg mǎn ke kurā ki kanhró nŷtĩ ti. Ājag tŷ sŷ ājag mŷ nén tó ja ěn ve kŷ tóg kakó tǎvĩ tĩ ha, inh kǎtŷg ke ti,” he tóg. “Ěn kǎ Topē tŷ tŷ ěg pǎ'i nĩ kenh ke vē sir.

32 Sŷ ke há vē, hǎ kŷ sóg tag tó mŷ, ha mē. Ũ tŷ nén kar ěn vég mŷ ag vŷ inh kǎtŷg mǎn ke tag venh ke mŷ, ũri, ag kǎgter ke to hǎ,” he tóg.

33 “Kanhkǎ vŷ tũ' he mŷ, ga ti ke gé. Jǎvo inh vŷ vŷ tũ' henh ke tũ nĩ,” he tóg, Jesus ti.

Ěg tŷ vēnh ki ěmēnh ke

34 “Vēnh ki ěmē, ājag tŷ vējēn e to nug kaga tũ nĩ jé, tógá nŷnh to, ājag tŷ kronkron to krĩ vēnhmŷ tũ nĩ jé gé. Kŷ vējēn to krĩ kufy han tũg nĩ gé, kur to, tag ki nén ũ kar to. Ge tũ nĩ mŷ ra kurā ěn vŷ ājag vatánh tá jun ke mŷ, inh kǎtŷg mǎn ke kurā ěn ti.

35 Ājag tŷ to vēnh kǎn kŷ nŷtĩ tũ nŷn kŷ tóg ājag mŷ sēsĩ tŷ ěgie ki kutē ri ke nĩ. Vēnh vatánh tá tóg ki kutē tĩ, jēsĩ ti. Ge ti nŷnh mŷ, inh kǎtŷg mǎn ke ti, ga kri mŷ ag kar mŷ. Ag vatánh tá sóg jun ke mŷ.

36 Hǎ kŷ ājag kanē nŷn nĩ, nŷr sór tũg nĩ. Inh kǎtŷg kǎ jatu to ken hǎ vē, hǎ vŷ: nŷr, he mŷ. Topē mrē vŷ tovǎnh tũg nĩ, ājag tar nŷtĩ jé, nén ũ jagy ěn ve kŷ. Kŷ ājag tóg ěprǎ ke fi kósın rŷnja tá jēnh ke mŷ sir, mŷ'ǎg tũ nŷn kŷ, isŷ vēnh kar jŷkre tugnŷm kurā ěn kǎ,” he tóg, Jesus ti. Ti tŷ ag mŷ kurā tŷ ěgno kǎmēn hǎ vē.

37 Hǎ ki tóg kurā kar ki Topē jo ĩn krēm ag kanhrǎnrǎn tĩ, Jesus ti. Kutyg kŷ tóg cidade tá kǎkutē kŷ pǎnónh ra tĩ tĩ, tá nŷr jé. To ag tóg: Oliveiras, he tĩ, pǎnónh ěn to.

38 Ti tŷ kusǎ ki Topē jo ĩn tá jun kŷ ag tóg tá ti vŷ jēmēnh kǎmŷ tĩ, ũ tŷ hēn ri ke ag.

22

Ag tŷ Jesus se sór

(Mt 26.1-5; Mc 14.1-2; Jo 11.45-53)

1 Ěn kǎ festa tóg kakó tĩ sir. Festa ěn ki ag tóg pǎo ũ ko tĩ, hǎ ra tóg jǎgia tũ ja nŷgtĩ. Festa ěn jŷjın hǎ vŷ: Páscoa, he mŷ.

2 Kŷ Topē tũ ki rŷr tĩ to pǎ'i ag vŷ Jesus to jŷkrén mŷ. Ag tŷ ti tén sór vē. Topē vŷ to professor ag vŷ ti tén sór mŷ gé. Hǎ ra ag tóg povo kamēg mŷ, kŷ ag tóg to jŷkrén kŷ nŷtĩ nĩ.

Judas tŷ pǎ'i ag mŷ Jesus ven sór

(Mt 26.14-16; Mc 14.10-11)

3 Ěn kǎ Judas ěn, ũ tŷ Iscariotes he mŷ ěn vŷ jagrē vég mŷ sir, Satanás tŷ. Hǎ ra tóg tŷ ũ tŷ 12 (ke) ag kǎ ũ nĩ, Jesus tŷ ũn vin mŷ ag kǎ ũ vŷ tŷ ti nĩ.

4 Tĩ tŷ Satanás tŷ jagrē nŷn kŷ tóg Topē tũ ki rŷr tĩ to pǎ'i ag venh tĩ mŷ sir, soldado to pǎ'i ag ke gé. Tĩ tŷ ag mŷ Jesus ven sór vē, ag tŷ ti se jé.

Kŷ tóg tá jun kŷ ag mŷ tó mŷ.

5 Kŷ tóg ag mŷ sér pē tĩ sir. Kŷ ag tóg ti mŷ jǎnkamy tó mŷ. Ag tŷ ti mŷ vin sór vē, ti tŷ ag mŷ Jesus ven kar kŷ.

6 Kŷ tóg ag mŷ: “hej,” he mŷ sir. Kŷ tóg to jŷkrén mŷ, ti tŷ ě mŷ ki króm ke to, ag mŷ: “ha ti kǎgmĩ ha,” he jé, Judas ti. Ag tŷ vēnh kar vatánh tá ti se sór vē. Hǎ kŷ Judas tóg ti tó sór mŷ.

*Pedro tÿ João mré festa tÿ Páscoa han
(Mt 26.17-25; Mc 14.12-21; Jo 13.21-30)*

⁷ Kÿ tóg pão jãgia tũ ên konh ke kurã tá krÿg mũ sir. Kurã ên ki ag tóg mé tãg tãnh tĩ, ovelha tãg ên, ag tÿ kurã tÿ Páscoa kã ko tĩ ên.

⁸ Kÿ Jesus tóg Pedro jênêg mũ sir, João mré. Kÿ tóg ag mũ: “ha mũjêg, mé tãnh jé, ovelha ên, êg tÿ kon jé,” he mũ.

⁹ Kÿ ag tóg ti mũ: “êg hê tá ti tãnh mũ hÿn'?” he mũ.

¹⁰ Kÿ tóg ag mũ: “ha vé,” he mũ. “Êmã mág tag ra mũjêg. Tá ãjag tóg ù venh mũ. Goj vyn kÿ tóg tĩ mũ. Ên nón mũmnĩ. Kÿ ti ãn tá junjun kÿ ti nón gemnĩ.

¹¹ Kÿ ãn ki rĩr tĩ mũ: “êg Senhor vÿ ã mũ vênh vĩ jênêg mũ,” hemnĩ. “Inh hÿn hê tá ovelha konh ke mũ, inh mré mũ tĩ ag mré?” he ti, êg Senhor ti,” hemnĩ. “Mÿ ki vênh kánkán jafã tũ?” hemnĩ.

¹² Kÿ tóg ãjag mũ ven ke mũ sir, krogrog tÿ kynhmÿ nÿ ên ti, assoalho tÿ kynhmÿ nÿ ên ti. Êhé ti nĩ, kÿ mesa to nÿtĩ jafã vÿ tá nÿtĩ gé. Ên tá ti kãn nĩ êg mũ,” he tóg, Jesus ti.

¹³ Kÿ ag tóg mũ mũ sir. Jesus tÿ ag mũ tó ja ên ve kãn ag tóg mũ, kÿ ag tóg mé tãnh mũ sir, tá.

*Santa Ceia
(Mt 26.26-30; Mc 14.22-26; 1Co 11.23-25)*

¹⁴ Kÿ tóg ag tÿ konh ke hora tá krÿg mũ sir. Kÿ Jesus tóg tá nĩ nĩ, ti tÿ ùn vin ja ag mré hã, apóstolo ên ag.

¹⁵ Kÿ tóg ag mũ vémén mũ sir. “Sÿ ovelha tag konh ha pê tóg tĩ vê ãjag mré,” he tóg. “Sÿ ãnh vêsÿrênh ke to hã ãjag mré ko sór ja vê,” he tóg, Jesus ti, ã mré mũ tĩ ag mũ.

¹⁶ “Ti ko mãn ke tũ ãnh nĩ ha, ha vemnĩ. Topê tÿ tÿ êg pã'i nĩ vÿ vênh ven ke mũ. Ti tÿ vênh ven ja ên kã sóg ko mãn ke mũ, kejên,” he tóg.

¹⁷ Kÿ tóg copa mäg mũ sir. To tóg Topê mré vĩ mũ, kÿ tóg ag mũ: “ha kron,” he mũ. “Ha vênh kãpãm,” he tóg.

¹⁸ “Tag kron mãn ke tũ ãnh nĩ ha, ke gé, ha vemnĩ. Topê tÿ tÿ êg pã'i nĩnh ken kÿ sóg kejên kron mãn ke mũ, ha vemnĩ,” he tóg.

¹⁹ Kÿ tóg êmĩ mäg mũ sir. To tóg Topê mré vĩ mũ. Kupãn kÿ tóg ag mũ vênh pipin mũ. Kÿ tóg ag mũ: “inh hã vê,” he mũ. “Ãjag jagfy sóg vênh fêg ke mũ. Kÿ ãnh mĩ êkrén nĩ, ãjag tÿ pão tag konh ken kÿ,” he tóg, Jesus ti.

²⁰ Ag tÿ ko kar kÿ tóg copa mäg mũ gé. Kÿ tóg ag mũ: “copa ki jê tag vÿ ãnh kyvénh ri ke nĩ,” he mũ. “Ãjag jagfy tóg ãnh ki kãkútênh mũ, ãnh kyvénh ti. ãnh jykre tãg to ken hã vê, isÿ ãnh kyvénh tugrĩn ãjag mũ vênh pãte fón jé,” he tóg.

²¹ “Hã ra ãjag kãmĩ ù tóg ãnh vatãnh tá isónh ke mũ, ãnh kato tẽ ag mũ. ãnh mré tóg mesa tag to nĩ nĩ.

²² Tĩg jé sóg ke mũ, sÿ tÿ êprã ke fi kósín nĩn kÿ. Vãsÿ Topê tóg to jykrén ja nĩ, hã kÿ sóg tĩ mũ. Hã ra ù tÿ isónh ke ên mũ tóg vĩ kónãn tãvĩ han ke mũ, Topê ti,” he tóg.

²³ Kÿ ag tóg jagnê mũ ke mũ. “Êg kãmĩ ù tÿ hê nê hÿn'?” he ag tóg mũ sir jagnê mũ, ù tÿ ti tónh ke ên to.

Û tÿ hê nê tÿ ùn mág nĩ

²⁴ Ên kã ag tóg jagnê kãfór nĩ sór mũ. Hã kÿ ag tóg jagnê to jũ mũ.

²⁵ Kÿ Jesus tóg ag mũ ke mũ. “Fóg ag pã'i ag vÿ ãjag krêm ke ag mũ vĩ tar han tĩ, kÿ ag tóg ag kri ke ag mũ: “êg jóg,” he ti, ag tÿ ag mũ vĩ tar han mũ ra.

26 Ag ri ke han tũg nĩ. Ājag m̃y t̃y ũn mág ñyĩ sór mũ? K̃y t̃y ũn kāsir ri ke ñyĩmnĩ jagnē mré,” he tóg, Jesus ti. “Ū t̃y inh jykre ki t̃y pã'i ñin k̃y tóg ā krēm ke ag camarada ri ke ñinh ke mũ, ag ki rĩr k̃y.

27 Kejēn ēg tóg mesa to ñyĩ, k̃y ũ tóg mesa ki rĩr t̃igtĩ. Ū t̃y hē ñy h̃yn mesa ki rĩr t̃i? Ag patrão m̃y', ti camarada m̃y vó? Ti camarada ṽy ki rĩr t̃igtĩ. Jo sóg ājag ki rĩr t̃igtĩ, ājag camarada ri ke.

28 Ājag hã ne inh mré m̃ugtĩ'. Isovãnh ja tũ pē ājag tóg ñyĩ. Is̃y nén ũ jagy vэг mũ ěn ve kãn ājag tóg t̃i, inh mré.

29 Inh panh ṽy is̃y pã'i han ke mũ, k̃y sóg ājag t̃y pã'i han ke mũ gé, ti t̃y is̃y pã'i han kóm,

30 ājag t̃y inh mré jēn jé tá, inh mré kron jé tá, is̃y t̃y pã'i ñin k̃y. K̃y ājag tóg ājag ñija kri ñignĩ k̃y ñyĩnh mũ, ājag t̃y povo t̃y Israel ag jykre vigve jé, povo t̃y 12 (ke) ěn ag,” he tóg, Jesus ti.

Jesus t̃y Pedro m̃y tó

(Mt 26.31-35; Mc 14.27-31; Jo 13.36-38)

31 K̃y ēg Senhor ṽy Pedro m̃y: “Simão', Simão',” he mũ. “Ha vé, Satanás ṽy ājag to vĩ, Topē m̃y. Ti t̃y ājag jykre ve sór vē. Trigo t̃y ēg tóg gren ki kākag t̃i, ēg t̃y ti fár pan jé. ěn ri ke han jé tóg ke mũ, ājag t̃y, Satanás ti.

32 Hã ra sóg hur ā jagfy ṽi, ā t̃y inh ki rã tovãnh pē han tũ nĩ jé. K̃y ā tóg kejēn ā jykre to jykren mãn ke mũ, ā t̃y inh jykre hã han jé. ěn kã ā tóg ā mré ke ag jyṽen k̃y ag t̃y tar' he mũ.

33 Hã ra Pedro tóg ti m̃y: “Senhor',” he mũ. “Ā mré sóg se k̃y jēnh mũ, ā mré sóg ter ke mũ gé,” he tóg.

34 Hã ra Jesus tóg Pedro m̃y: “vó,” he mũ. “Ha vé, ũri ā tóg iso: “ti ki kagt̃ig sóg nĩ,” he tãgtũ han ke mũ, galo kyr to hã, ha vemni,” he tóg mũ, Jesus ti.

Jesus t̃y ā mré mũ t̃i ag m̃y tó

35 K̃y tóg ag kar m̃y: “ājag jēgnē ja inh nĩ, vās̃y,” he mũ. “K̃y ājag tóg nén ũ ma mũ ja tũ ñigtĩ, sacco tũ, bolsa tũ, pēn né tũ, pēn to ró ěn. ěn kã ājag m̃y jagãgtar ja ñyĩt̃igtĩ?” he tóg. K̃y ag tóg ti m̃y: “vó,” he mũ.

36 K̃y tóg ag m̃y: “hã ra tóg ũri ke tũ ñigtĩ,” he mũ. “Hã k̃y ājag jãnkamy ma m̃ujēg, ājag sacon ma m̃ujēg, ājag bolsa ma m̃ujēg. Ājag t̃y nén ũ tũ ñyĩn k̃y ājag kur vender hemni, rógro kajãm jé sir.

37 Nén ũ tóg iso rán k̃y nĩ, hã ṽy: ag m̃y tóg t̃y ũn jykre pãno nĩ, he mũ. S̃y vãhã tag venh ke vē ha. Is̃y iso nén rán k̃y nĩ ěn ve kãn ke vē ha, vãhã,” he tóg, Jesus ti.

38 K̃y ag tóg ti m̃y: “Senhor',” he mũ. “Rógro régre ṽy ki ñyĩ,” he ag tóg mũ. Hã ra tóg ag m̃y: “gen k̃y,” he mũ.

Jesus t̃y ā panh mré ṽi

(Mt 26.36-46; Mc 14.32-42)

39 K̃y tóg ā t̃y t̃i jafã ra t̃i mũ sir, hã ṽy: pãnónh t̃y Oliveira, he mũ ěn ra. Ti mré mũ t̃i ag ṽy t̃i nón mũ mũ sir.

40 Tá jun k̃y tóg ag m̃y: “Topē mré ṽi, ājag t̃y ti ṽi mranh tũ nĩ jé, ājag t̃y nén ũ jagy ve k̃y,” he mũ, Jesus ti, ā mré mũ t̃i ag m̃y.

41 K̃y tóg t̃ig s̃i han mũ, k̃y tóg ā jakrĩ t̃y jég mũ. K̃y tóg Topē mré ṽi mũ sir.

42 K̃y tóg: “panh',” he mũ. “M̃y ā t̃y inh vēs̃yrenh ke tag t̃y tũ' he mũ jãvãnh? Hã ra is̃y ā m̃y nén to ṽi mũ tag han tũg nĩ. Ā t̃y nén han ke mũ ěn hã han nĩ,” he tóg, Jesus ti, Topē m̃y.

43 Kŷ Topě tŷ jěně jafã ũ vŷ ti mŷ vĕnh ven mŷ sir, kanhkã tá, kŷ tóg ti tar han mŷ.

44 Hã ra tóg ã ter ke to kaně jur mŷ, kŷ tóg Topě mré vĭ măn', vĭ măn', he mŷ. Kŷ ti kãrãn vŷ kyvĕnh nĭ sir, kŷ tóg ga kri vĕnh kugjĕg mŷ.

45 Kŷ tóg Topě mré vĭ kar ã mré mŷ tĭ ag to kãtĭ mŷ. Hã ra ag tóg nŷgnŷr nŷtĭ nĭ. Krónh' krónh' he ja ag tóg nĭ, ag fe kaj tugrĭn.

46 Kŷ tóg ag mŷ: “ãjag ne tóg nŷgnŷr nŷtĭ nĭ!” he mŷ. “Nĭgnĭ ra, Topě mré vĭ, ãjag tŷ ti vĭ mranh tŷ nĭ jé, ãjag tŷ nĕn ũ jagy ve kŷ,” he tóg, ti mré mŷ tĭ ag mŷ.

Ag tŷ Jesus se

(Mt 26.47-56; Mc 14.43-50; Jo 18.3-11)

47 Ti tŷ ver tŷ vĕmén jĕ ra ag tóg junjun mŷ sir, Judas mré hã, ũ tŷ 12 (ke) ag kã ũ ĕn ti. Ti tŷ ag tafĭn kãtĭg hã vĕ, ũ tŷ ti senh ke mŷ ag. Ũ tŷ ag jo tĭ mŷ ĕn tóg sir Jesus to grĕn ke kŷ ti ki nhun ke mŷ.

48 Kŷ Jesus tóg ti mŷ: “Judas,” he mŷ. “Ã ne tóg inh ki nhun ke kŷ iso: “ti hã vĕ,” he mŷ', inh kato tĕ ag mŷ, inh, hã vŷ: ĕprã ke fi kósin, he mŷ,” he tóg, Jesus ti.

49 Kŷ ti mré mŷ ag tóg ag tŷ ti senh ke vĕg mŷ. Kŷ ag tóg ti mŷ: “Senhor’,” he mŷ. “Ĕg mŷ rógro tŷ ag fynh ke tŷ?” he ag tóg.

50 Kŷ ag kã ũ tóg policia ũ fynh mŷ, ti nĭgrĕg tŷ rãm ke tóg mŷ, ti pĕgja tá. Topě tŷ ki rĭr tĭ to pã'i krĕm ke ũ vĕ, policia ĕn ti.

51 Hã ra Jesus tóg ag mŷ: “ag vóg tŷg ra, há ti nĭ,” he mŷ. Kŷ tóg ti nĭgrĕg mãn kŷ to tŷ grĕn ke mŷ sir.

52 Kŷ Jesus vŷ pã'i ag mré vĕmén mŷ, Topě tŷ ki rĭr tĭ to pã'i ag mré, Topě jo ĩn ki rĭr tĭ to pã'i ag mré ke gé, kófa ag mré ke gé. Ag kar vŷ ti se kãmŷ mŷ. Kŷ tóg ag mŷ: “ãjag ne tóg rógro génh kŷ iso kãmŷ mŷ', ka kyv génh kŷ ke gé,” he mŷ. “Inh pi(jé) tŷ bandido nĭ!” he tóg.

53 “Kurã kar ki sóg Topě jo ĩn krĕm ãjag mré nĭ ja nĭgtĭ, hã ra ãjag tóg tá ise sór ja tŷ nĭ, ãjag tŷ ag kamĕg kŷ,” he tóg. “Hã ra tóg ũri jun, ãjag kurã ti, Japo tŷ ã tŷ nĕn han sór tĭ ĕn han jé, ãjag tŷ. Jykre ki kuty ti nĭ, Japo ti,” he tóg, Jesus ti.

Pedro tŷ Jesus to ón

(Mt 26.57-58, 69-75; Mc 14.53-54, 66-72; Jo 18.12-18, 25-27)

54 Kŷ ag tóg ti ség mŷ sir. Ag tŷ ti pére mŷ kŷ ag tóg Topě tŷ ki rĭr tĭ to pã'i mág ĩn tá junjun mŷ sir.

Hã ra Pedro vŷ kuvar há tá ag nón tĭ mŷ.

55 ĩn vãso tá ag tóg pĭ grug mŷ, soldado ag, kŷ ag tóg tugtón nŷtĭ nĭ. Kŷ Pedro vŷ ag mré tón nĭ nĭ sir.

56 Kŷ pã'i camarada ũ fi vŷ tá ti vĕg mŷ, pĭ grun ki. Kŷ fi tóg ti tugnŷm mŷ. Kŷ fi tóg ag mŷ: “ti mré tĭ ũ vĕ inh mŷ!” he mŷ.

57 Hã ra Pedro tóg: “vó,” he mŷ. “Tĭ ki kagtĭg sóg nĭ, jŷ,” he tóg.

58 Kar kŷ ũ tóg ti tugnŷm mŷ gé, kŷ tóg ti mŷ: “ag kã ũ vŷ tŷ ã nĭ,” he mŷ. Hã ra Pedro tóg ti mŷ: “inh hã tŷ vĕ, vŷ,” he mŷ gé.

59 Tag kar kŷ, hora pir tŷg kŷ ĕn ri ke mŷn ũ tóg ti tugnŷm mŷ gé. Kŷ tóg tá nŷtĭ ag mŷ: “ha vĕ, Galilĕia tá ke vŷ tŷ ti nĭ,” he mŷ. “Inh mŷ tóg tŷ ti mré ke nĭ,” he tóg mŷ gé sir.

60 Hã ra Pedro tóg ti mŷ: “inh pi(jé) ti ki kanhró nĭ, vŷ!” he mŷ. “Ã tŷ ne tó nĕ?” he tóg mŷ sir. Ti tŷ ver tó nĭ ra galo vŷ kyr mŷ.

⁶¹ Kŷ ěg Senhor vŷ vĕsŷjãm ěvãnh kŷ Pedro tugnŷm mũ. Kŷ Pedro vŷ to jykren mũ sir, ěg Senhor tŷ ti mŷ nĕn tó ja to, hã vŷ: “iso ã tóg: “ti ki kagtŷg sóg nŷ,” he tãgtũ han ke mũ, galo kyr to hã,” he ja ěn mŷ.

⁶² Kŷ Pedro vŷ tá kãkutĕ mũ, kŷ tóg fŷ mág han mũ sir.

Ag tŷ Jesus vóg kónãn

(Mt 26.67-68; Mc 14.65)

⁶³ Kŷ ù tŷ Jesus ség mũ ag vŷ ti to é he mũ sir. Ti tãnh ag tóg mũ gé sir.

⁶⁴ Ti kanĕ pãg kŷ ag tóg ti kakã ki tãnh kŷ ti mŷ: “ù nŷ ã tãnh?” he mũ. “Ã tŷ nĕn kar ki kanhró nŷn kŷ ã hŷn ki kanhró nŷ,” he ag tóg ti mŷ.

⁶⁵ Gen kŷ ag tóg ti mŷ vŷ kónãn tŷ hĕn ri ke han mũ, ti to é he kŷ.

Pã'i ag tŷ Jesus ki jĕmĕ

(Mt 26.59-66; Mc 14.55-64; Jo 18.19-24)

⁶⁶ Tŷ vaj kŷ kófa kar ag tóg vĕnh mãn mũ, Topĕ tũ ki rŷr tũ to pã'i ag mrĕ hã, Topĕ vŷ to professor ag mrĕ hã. Ag vĕnh mãn kŷ ag tóg ti jé prĕr kŷ ag rŷnja tá ti fĕg mũ sir, ag tŷ ón kŷ ti jykre ve jé. Ag tŷ ti tĕn sór vĕ, hã ra ag tóg ón kŷ ti jykre ve vĕn sór mũ.

⁶⁷ Hã kŷ ag tóg ti mŷ: “ã mŷ tŷ Cristo nŷ?” he mũ. “Ha ěg mŷ tó,” he ag tóg. Kŷ tóg ag mŷ: “ãjag pi(jé) inh vŷ kri fig tí', isŷ ãjag mŷ tó tí (hã) ra,” he mũ.

⁶⁸ “Isŷ ãjag ki jĕmĕ sór mũ ra ãjag tóg inh mŷ tó tũ nŷ gé. Kŷ ãjag tóg isovãnh tũ nŷ gé,” he tóg.

⁶⁹ “Hã kŷ ěprã ke fi kósĭn vŷ Topĕ pĕgja tá nŷnh ke mũ ha. Topĕ vŷ tar nŷ. Sŷ ti pĕgja tá nŷnh ken vĕ ha,” he tóg.

⁷⁰ Kŷ ag tóg ti mŷ ke kãn mũ. “Kŷ ã mŷ tŷ Topĕ kósĭn nŷ?” he ag tóg mũ ti mŷ. Kŷ tóg ag mŷ: “ki hã ãjag tóg tó mũ,” he mũ. “Inh hã vĕ,” he tóg ag mŷ, Jesus tí.

⁷¹ Kŷ ag tóg: “ti kato vŷ ù jĕmĕ mãn ke tũ ěg nŷ ha,” he mũ, jagnĕ mŷ. “Ti jĕnky ki kutĕ mĕ ěg tóg huri. Topĕ to vŷ kónãn ti huri. Ti ter ke vĕ,” he ag tóg mũ sir, pã'i ag, Jesus to.

23

Pilatós tŷ Jesus ki jĕmĕ

(Mt 27.1-2, 11-14; Mc 15.1-5; Jo 18.28-38)

¹ Hã ra tá ke kar ag vŷ Jesus pére mũ mũ, fóg tŷ pã'i tŷ Pilatós mŷ.

² Tá ag tóg ti kato vŷ mũ sir, kŷ ag tóg Pilatós mŷ: “vĕnh kar krŷn kónãn han tóg tí, ag tŷ vĕnh jykre há tovãnh jé,” he mũ. “Kŷ tóg ag mŷ: “pã'i mág tŷ imperador mŷ imposto nŷm tũg nŷ,” he tí gé. Kŷ tóg vĕso: “tŷ inh Cristo nŷ, pã'i mág tŷ rei tí,” he tí gé,” he ag tóg mũ, Jesus to.

³ Kŷ Pilatós tóg ti mŷ: “ã mŷ tŷ Judeu ag pã'i tŷ rei nŷ?” he mũ. Kŷ tóg ti mŷ: “ki hã ã tóg tó mũ,” he mũ, Jesus ti.

⁴ Kŷ Pilatós vŷ ag mŷ kãmĕn mũ, Topĕ tũ ki rŷr tũ to pã'i ag mŷ, povo kar mŷ ke gé, kŷ tóg: “ti tŷ nĕn ù kórég han ja vĕg tũ sóg nŷ, ti ki,” he mũ.

⁵ Hã ra ag tóg ti tovãnh jãvãnh pĕ nŷtŷ. Kŷ ag tóg ti mŷ: “hã ra tóg vĕnh kar krŷ rŷg tŷgtŷ,” he mũ. “Ga tŷ Judĕia kar mŷ tóg tŷg ja nŷ, ga tŷ Galilĕia mŷ ke gé, tag mŷ ke gé. Tŷg kŷ tóg vĕnh kar krŷn kónãn tí,” he ag tóg ti mŷ, pã'i ag.

Herodes tŷ Jesus ki jĕmĕ

⁶ Kŷ Pilatós vŷ ga tŷ Galilĕia tag to jykrĕn mũ, kŷ tóg: “ti mŷ tŷ Galilĕia tá ke nŷ?” he mũ.

⁷ Kŷ ag tóg ti mŷ: “hŷ,” he mŷ. Hã ra Herodes vŷ tŷ ga tŷ Galiléia tá pã'i mág nĩ. Hã kŷ Pilatos tóg ti hã mŷ ti jĕnĕg mŷ. Ēn kã tóg Jerusalém tá nĩ gé, Herodes ti.

⁸ Kŷ tóg Herodes tá jun mŷ sir. Ti tŷ ti ve kŷ tóg ti mŷ sér tĩ. Ti tŷ ti ve sór ja vē. Ti kãme mē ja tóg nĩ, hã kŷ tóg ti ve sór ja nĩgtĩ, Herodes ti. “Hĕn ri ke mŷn tóg nĕn ũ han vãnh han ke mŷ, sŷ ve jé,” he tóg.

⁹ Jesus tŷ ti ki jun kŷ Herodes tóg ti ki jĕmĕ sór mŷ, nĕn tŷ hĕn ri ke ki, hã ra tóg ti mŷ vĩ tŷg mŷ.

¹⁰ Hã ra pã'i ag vŷ tá nŷtĩ nĩ, kŷ ag tóg ti kato vĩ mág han mŷ sir, Topĕ vĩ to professor ag ke gé. Hã ra Jesus tóg ag mŷ vĩ tŷg mŷ gé.

¹¹ Kŷ Herodes vŷ ti to é he mŷ gé, ti mrĕ ke kar ag ke gé, kŷ ag tóg ti nyg mŷ sir. Kur kupri pĕ tŷ tóg ti kri fón mŷ, ón kŷ. Kŷ tóg Pilatos mŷ ti jĕnĕ mãn mŷ sir.

¹² Kurã ĕn kã Pilatos vŷ Herodes mŷ vĩ há han mŷ. Jagnĕ to há' he mãn ag tóg mŷ ha. Ag tŷ Jesus ve jo ag tóg jagnĕ kato tĕ ja nĩgtĩ.

Ag tŷ Jesus tén sór

(Mt 27.15-26; Mc 15.6-15; Jo 18.39-19.6)

¹³ Kŷ Pilatos vŷ Topĕ tũ ki rĩr tĩ to pã'i ag jĕ prĕr mŷ sir, pã'i kar ag ke gé.

¹⁴ Kar tóg ag mŷ: “ãjag ne inh mŷ ti fĕg!,” he mŷ, “kŷ ãjag ne ti to: “vĕnh kar krĩn kónãn tóg tĩ,” he mŷ'. ãjag rĩnve sóg ti ki jĕmĕ huri, hã ra sóg ve ja tũ nĩ, ãjag tŷ ti to nĕn tó ja ti. Nĕn ũ kórĕg han ja tũ tóg nĩ.

¹⁵ Kŷ Herodes vŷ vég tũ nĩ gé. Sŷ ti mŷ ti jĕnĕ ja vē, ãjag ke gé. Hã ra tóg inh mŷ ti jĕnĕ mãn mŷ gé. Ēg hĕ ri ken kŷ ti tĕn mŷ hŷn'? Sŷ ki kagtĭg tóg tĩ.

¹⁶ Hã kŷ sóg ti mrãnmrãn kar ti tovãnh ke mŷ,” he tóg, Pilatos ti.

¹⁷ Festa tŷ Páscoa ki tóg ag mŷ vĕse pir tovãnh tĩ, prŷg kar ki. Ti jykren hã vē. Hã kŷ tóg: “Jesus tovãnh jé sóg ke mŷ,” he mŷ.

¹⁸ Hã ra vĕnh kar ag tóg vãhã prĕnprĕr mŷ sir. “!..Ti tĕn ra..!” he ag tóg mŷ. “!..Barrabás tovãnh ra..!” he ag tóg.

¹⁹ Barrabás vŷ vĕnh génh to se kŷ jĕ nĩ. Cidade tá tóg vĕnh génh han ja nĩgtĩ, ĕn kã tóg ũ tĕn ja nĩgtĩ, hã to tóg se kŷ jĕ nĩ.

²⁰ Kŷ Pilatos vŷ ag mŷ vĩ mãn mŷ. Ti tŷ Jesus tovãnh sór vē, hã kŷ tóg ag mŷ vĩ mãn mŷ.

²¹ Hã ra ag tóg prĕnprĕr kŷ: “!..cruz to ti sã, cruz to ti sã..!” he mŷ.

²² Kŷ tóg ag mŷ vĩ tãgtũ han mŷ gé, Pilatos ti. “Ti kórĕg tŷ ne han ti? Sŷ vég tũ tóg tĩ. Ti tŷ ne to ter ke nĕ? Sŷ ki kagtĭg tóg tĩ. Hã kŷ sóg ti mrãnmrãn kar kŷ ti tovãnh ke mŷ,” he tóg.

²³ Hã ra ag tóg prĕnprĕr tãvĩ han mŷ sir, hã kŷ ag tóg ti kutãn mŷ. Ti mŷ ag tóg: “!..cruz to ti sã..!” he tãvĩ han mŷ. Kŷ tóg ag prĕnprĕr to ag mŷ han sór mŷ sir.

²⁴ To tóg jykren mŷ, kŷ tóg ag mŷ: “hej,” he mŷ, ag tŷ ti kutãn to.

²⁵ Kŷ tóg ũ ĕn tovãnh mŷ sir, ũ tŷ vĕnh génh to se kŷ jĕ ĕn ti, ũ tŷ ũ tĕn ja ĕn ti. Ag tŷ ũ to vĩ mŷ ĕn tovãnh tóg mŷ sir. Kŷ tóg ag mŷ Jesus ti fĕg mŷ sir, ag tŷ ti ki han sór mŷ ĕn han jé.

²⁶ Kŷ ag tóg ti pére mŷ mŷ, cruz to ti sa jé.

Jesus tŷ cruz to sa

(Mt 27.32-44; Mc 15.21-32; Jo 19.17-27)

Ag mŷn kŷ ag tóg ũ kãtĭg vég mŷ. Ēpŷ tá tóg kãtĩ mŷ, ti jijin hã vŷ: Cirene tá Simão, he mŷ. Ti kri ag tóg Jesus cruz ti fig mŷ, ti tŷ ti jo va tĭg jé, ti nón.

27 Kŷ ũ tŷ hēn ri ke ag vŷ Jesus nón mŷ mŷ, ũn tŷtá fag ke gé. Ēn fag vŷ vēšŷrēnh mŷ, kygfŷ mág han fag tóg mŷ sir.

28 Hā ra Jesus tóg vēšŷjām ēvānh kŷ fag mŷ vī mŷ. "Jerusalém tá ke'," he tóg. "Ijé kygfŷ tŷg nī," he tóg. "Vēnh jé kygfŷmŷnī, ājag krē jé kygfŷmŷnī," he tóg fag mŷ.

29 "Ha vé, kurā kórég pē vŷ jun ke mŷ ājag mŷ. Ēn kā ag tóg tag tónh ke mŷ, ha mē: "ũn kurī fag mŷn pāgsī nīnh mŷ, fag tŷ ājag krē ter vég tŷ nīn kŷ. Ũn krē tŷ fag mŷn pāgsī nīnh mŷ, ũ tŷ gŷr pafām tŷ fag mŷ ke gé," he jé ag tóg ke mŷ.

30 Ēn kā ag tóg pānónh mŷ: "inh kri tŷ tam ké," hēnh ke mŷ gé, kŷ ag tóg sór mŷ: "inh péju ra, vēnh krēm," hēnh ke mŷ gé.

31 Ēg kato tē ag tŷ ka tánh gŷn kŷ ag hŷn ka tóg tovānh ke tŷ pē nī. Ka tánh ēn ri ke sóg nī, jo ājag vŷ ka tóg ri ke nŷtī. Hā kŷ ājag tóg inh vēšŷrēnh káfór venh ke mŷ, ha vemnī," he tóg, Jesus ti. Jerusalém fīn rām kŷ tóg ke mŷ.

32 Ag tŷ Jesus pére mŷn kŷ ag tóg ũn régre ag pére mŷ mŷ gé, ũn jykre pāno ag. Ag tŷ ka to ag sanh ke vē gé.

33 Kŷ ag tóg pānónh tá junjun mŷ sir, ti jyjyn hā vŷ: Krī Kuka, he mŷ. Tá ag tóg cruz to ti ság mŷ sir. Ũn jykre pāno tŷ ag tóg cruz to ság mŷ gé, ti kóm, kŷ ũ vŷ ti pēgja tá sa, jo ũ vŷ ti jakānh tá sa.

34 Kŷ Jesus vŷ: "panh'," he mŷ. "Ag mŷ vēnh pāte fón nī," he tóg. "Ag pi(jé) ki kanhró nŷtī", ag tŷ nén han mŷ tag tī," he tóg.

Kŷ soldado ag tóg ti kur tŷ jagnē mŷ tŷ vēnh ken jé to jogar he mŷ sir.

35 Kŷ vēnh e ag vŷ tá vég nŷtī. Hā ra pā'i ag tóg ti nyg mŷ. Kŷ ag tóg jagnē mŷ: "ũ ag krenkren han ja tóg nŷgtī," he mŷ. "Cristo jé vēnh kren han, Topē tŷ ti fēg ja nīn kŷ, ti tŷ ti kuprēg ja nīn kŷ, hā ra tóg vēnh kren han ki kagtŷg nī," he ag tóg mŷ, Jesus to é he kŷ.

36 Kŷ soldado ag vŷ ti nyg mŷ gé. Ti rā hā nŷtīn kŷ ag tóg ti mŷ vinagre ven mŷ sir.

37 Kŷ ag tóg: "ā mŷ tŷ Judeu ag pā'i mág nī'?" he mŷ. "Vēnh kren han ra, ā tŷ tŷ pā'i nīn kŷ," he ag tóg mŷ ti mŷ, ti to é he kŷ.

38 Hā ra ag tóg rán ja nī gé, ti tŷ cruz to sa kŷ jē ēn ti. Ti to rán hā vē, hā vŷ: "Judeu ag pā'i mág tŷ rei hā vē," he mŷ. Ti kri tóg cruz to sa gé, ēn rá ti.

39 Kŷ ti kóm cruz to sa ũ tóg ti mŷ vī mŷ gé, ũn jykre pāno ēn. Ti to tóg é he mŷ gé. Kŷ tóg ti mŷ: "ā mŷ tŷ Cristo nī'?" he mŷ. "Vēnh kren han ra, kŷ ēg krenkren han gé," he tóg mŷ gé.

40 Hā ra ti kóm cruz to sa ũ ũ tóg ti mŷ vī jŷ han mŷ, ũ tŷ Jesus mŷ vī kónān mŷ ēn mŷ. Kŷ tóg ti mŷ: "kŷ ā mŷ Topē kamēg tŷ?" he mŷ. "Vēšŷrēnh ā tóg mŷ gé, ti kóm.

41 Ēg tŷ ēg tŷ nén han ja kajām vē jāvo, ēg jykre pāno to ēg vēšŷrēnh nŷtī nī. Ēg jāvo tóg jykre kuryj nī. Ti pi(jé) nén ũ kórég han ja nī'," he tóg.

42 Kŷ tóg Jesus mŷ: "Senhor'," he mŷ. "Inh ki ēkrén nī, ā tŷ tŷ pā'i ki rān kŷ," he tóg mŷ, Jesus mŷ.

43 Kŷ Jesus tóg ti mŷ: "ha mē, ũri ā tóg inh mré nīnh mŷ, ēmā há ēn tá, Paraíso he mŷ ēn tá, kanhkā tá. Ki hā sóg tó mŷ," he tóg, Jesus ti.

Jesus ter

(Mt 27.45-56; Mc 15.33-41; Jo 19.28-30)

44 Kejēn rā tóg ēg nīno kā sa mŷ sir. Hā ra tóg kuty' he mŷ sir, ga kar mī hā. Kuty ēn tóg hora tāgtŷ han mŷ.

⁴⁵ Kÿ rã vÿ nhyn ke mÿ sir. Topê jo ïn krêm kur tÿ jãnkã mág pë vÿ kã sa nÿ. Ën vÿ jaran ke mÿ. Kuju mÿ tóg jaran ke kãtére mÿ sir, fÿn rãm kãn tóg mÿ.

⁴⁶ Kÿ Jesus vÿ prër mág pë han mÿ. Kÿ tóg: “!..panh'!” he mÿ. “!..Sÿ ã mÿ vënh fëg vë, ïnh kuprÿg ti..!” he tóg. Tag tó kar tóg hun ke mÿ sir.

⁴⁷ Hã ra fóg tÿ capitão tóg ti ter vég mÿ. Kÿ tóg Topê mÿ vÿ há han mÿ. “Vënh vÿ há ja vë, ïn há ja vë,” he tóg mÿ.

⁴⁸ Kÿ vënh e ãn vÿ ti ter vég mÿ gé. Kÿ ag tóg ãjag tÿ nén han ja to jykrén mÿ sir. Vãhã tóg ag mÿ e tÿ. “Topê hÿn ãg tÿ hë ri kenh mÿ, ãg tÿ ti tén kÿ?” he ag tóg mÿ sir. Tag tó kÿ ag tóg ãjag ïn ra vÿnvÿn ke mÿ.

⁴⁹ Hã ra ti to há kar ag vÿ ti vég nÿtÿ nÿ, kakó ki, ïn tãtã fag ke gé. Galiléia tá ke fag tóg ti mré kãmÿ ja nÿgtÿ gé. Ti ter ve kãn fag tóg mÿ sir.

*Ag tÿ vënh kej tá Jesus fi
(Mt 27.57-61; Mc 15.42-47; Jo 19.38-42)*

⁵⁰ Kÿ ù tóg tá nÿ gé, vënh jyvën tÿ ù, ha mē, ti jÿjin hã vÿ: José, he mÿ. Judeu ag tÿ cidade tÿ Arimatéia tá ke ti nÿ. Jykre kuryj tóg nÿ, jykre há.

⁵¹ Ti pi(jé) ag tÿ Jesus tén ke to: “hej,” he ja nÿgtÿ, ag tÿ Jesus to jykrén kÿ. Topê tÿ tÿ ãg pã'i nÿnh ke ve sór tóg mÿ gé.

⁵² Ën vÿ Pilatos venh tÿ mÿ. Kÿ tóg ti mÿ Jesus to vÿ mÿ, ti ter kar kÿ.

⁵³ Kÿ tóg cruz to ti kãtérem mÿ, kÿ tóg kur há tÿ ti pãg mÿ sir. Kÿ tóg pãró nor kãki vënh kej kãkã ti fig mÿ. Vënh kej tãg vë, ag pi(jé) kãkã ù fi ja nÿgtÿ ver'.

⁵⁴ Hã ra sexta-feira vë sir, vënhkãn ke kurã ki rã tóg nÿ ha, sãbado ki.

⁵⁵ Kÿ ïn tÿtã fag vÿ ag nón mÿ mÿ, ti kej ve jé, ag tÿ ti fÿnh mÿ ja tá. Ti mré Galiléia tá kãmÿ ja ãn fag vë, ù tÿ ti fi han vég mÿ fag.

⁵⁶ Ve kar kÿ fag tóg kyrãgrã kÿ nén ger há han mÿ sir; ti tãg jafã ti, ti to tÿn jé. Hã ra fag tóg vënhkãn mÿ ver, vënhkãn ke kurã kã, Topê vÿ ki króm jé.

24

*Jesus rÿr mãn
(Mt 28.1-10; Mc 16.1-8; Jo 20.1-10)*

¹ Kÿ semana kurã ve tóg tá krÿg mÿ sir. Kÿ fag tóg kusã pë ki ti kej tá venh mÿ mÿ. Vëser ger há han jafã ãn ma fag tóg mÿ mÿ, fag tÿ han ja ãn ti, ti kej ra mÿn kÿ.

² Hã ra pó ãn tÿ ti kej nÿfénh kã nÿ ãn vÿ kunÿnh kÿ nÿ nÿ. Hã vég fag tóg mÿ.

³ Kÿ fag tóg ti kej tá junjun kÿ ra ge mÿ, hã ra fag tóg vég tÿ nÿ, vëser ti, Jesus ti, ãg Senhor ti.

⁴ Kÿ tóg fag fe kaj tÿ sir, fag tÿ ti vég tÿ nÿn kÿ. Kÿ vãhã ïn régre ag vÿ kãge mÿ, kur kupri rÿnh kÿ, kur kókov, Topê tÿ jënê jafã ag.

⁵ Kÿ fag tóg kanê junjur mÿ sir, kÿ fag tóg êprã ãvãnh mÿ. Hã ra ag tóg fag mÿ: “ãjag ne tóg vëser jãvãnh mÿ, ti rÿr ja (hã) ra,” he mÿ.

⁶ “Kÿ ti tÿ nÿ, rÿr ti jë ha. Hã kÿ tóg ãjag mÿ tó ja nÿgtÿ, ãjag tÿ Galiléia tá nÿtÿ ãn kã.

⁷ Kÿ tóg ãjag mÿ: “êprã ke fi kósin ãn fëg jé ag tóg ke mÿ, ù tÿ Topê vÿ mranh tÿ ag mÿ,” he ja nÿ. “Ka to ag ti sanh ke mÿ, hã ra tóg kurã tãgtÿ ki rÿr mãn ke mÿ,” he ja tóg nÿgtÿ, Jesus ti, vëso,” he ag tóg mÿ, Topê tÿ jënê jafã ag.

⁸ Kÿ fag tóg Jesus tÿ nén tó ja ãn mÿ ãkrén mãn mÿ sir.

⁹ Kÿ fag vÿ ti kej tá kãpa kÿ mÿ mÿ sir, ù tÿ 11 (ke) ag mÿ tó jé, ti mré mÿ tÿ kar ag mÿ ke gé.

10 Maria Madalena fi vē, kar k̄y Joana fi ke gé, Maria ũ fi ke gé, Tiago m̄yñh tag fi, ũ fag ke gé, fag mré. Fag hã ne Jesus t̄y ũn vin m̄u ag m̄y kãmén m̄u, apóstolo ag m̄y.

11 Hã ra tóg ag m̄y t̄y vēñh ó n̄y ve n̄i, hã k̄y ag tóg kri fi ja tũ n̄igt̄i, fag v̄in kri.

12 K̄y Pedro v̄y j̄e k̄y ti kej ra vēñh v̄ag t̄i m̄u. Pãnh ke tóg, k̄y tóg ki ěvãñh m̄u, k̄y tóg ti kur tãv̄i vég m̄u sir, ti pãg ja ti. K̄y tóg ti m̄y e t̄i. Ti t̄y to jykrén tũ tóg ti sir. K̄y tóg t̄ig mãn m̄u.

*Ag t̄y Emaús ra m̄u
(Mc 16.12-13)*

13 K̄y vãhã ag kã ũ ag tóg m̄u m̄u, kurã ěn kã, ũn régre ag. Ěmã s̄i ra ag tóg m̄u m̄u. Jerusalém tán kakó n̄i, 10 (ke) quilômetros h̄yn. Ěmã ěn jyjyn hã v̄y: Emaús, he m̄u.

14 Ag m̄un k̄y ag tóg jagnē mré vēmén m̄u sir, ãjag t̄y nén ve ja kar ěn to.

15 Ag t̄y vēmén n̄yt̄i ra, ag t̄y jagnē mré t̄y vēmén mág han n̄yt̄i ra Jesus tóg ag tá jun k̄y ag mré t̄i m̄u.

16 Hã ra ag tóg ti ki kagt̄ig m̄u, ag t̄y ti vég m̄u (hã) ra.

17 K̄y Jesus tóg ag m̄y: “ãjag t̄y ne tó nē?” he m̄u. “Vēmén mág ãjag tóg m̄u n̄i,” he tóg. K̄y ag tóg kr̄yg he m̄u sir, ve ũ han ag tóg m̄u, ãjag fe kaj tugñin.

18 K̄y ũ tóg ti m̄y tó m̄u. Cleopas he m̄u ěn tóg ti m̄y: “k̄y ã m̄y mēg tũ?” he m̄u. “Ū t̄y festa venh kãmũ ja ag v̄y mē kãn. Ā hã m̄y ã pir m̄y mēg tũ, ěg t̄y nén ve ja ti, ã t̄y Jerusalém kã n̄i (hã) ra?” he tóg ti m̄y.

19 K̄y tóg ag m̄y: “ne nē?” he m̄u. K̄y ag tóg ti m̄y: “Jesus ti,” he m̄u. “Nazaré tá ke vē. Topē v̄i tó t̄i vē. Ěg t̄y nén han vãñh hyn han ja tóg n̄igt̄i. Topē v̄i tó há han ja tóg n̄igt̄i, k̄y Topē v̄y ti mré han t̄i, milagre kar ti. K̄y povo kar ag v̄y vég t̄i, k̄y tóg ěg kar m̄y e t̄i.

20 K̄y Topē tũ ki r̄ir t̄i ag v̄y ti fēg, ěg pã'i kar ag, fóg t̄y pã'i t̄y ti tén jé, cruz to ti sa jé, hã k̄y tóg t̄ig m̄u.

21 Ěg t̄y ti ve k̄y ěg tóg ti to: “ti h̄yn ěg povo t̄y Israel ag krenkren han ke m̄u,” he m̄u vē. Hã ra tóg ter ja n̄i. Ūri tóg kurã tagtũ han, ti ter kri,” he ag tóg, Jesus m̄y.

22 “K̄y ěg kã ũ fag v̄y ěg m̄y nén ũ tó gé, k̄y tóg ěg m̄y e t̄i gé. Kusã pē ki fag tóg ti kej ra m̄jěg.

23 Hã ra fag ti vég tũ n̄i, ti t̄y tá n̄y tũ n̄in k̄y. K̄y fag tóg: “nén nē ve ěg,” he m̄u gé. Topē t̄y j̄enē jafã n̄eji, k̄y tóg n̄eji fag m̄y: “r̄ir ti j̄e n̄i,” hé.

24 K̄y ěg kã ũ ag v̄y ra m̄u m̄u, ti kej ra, k̄y ag tóg vég m̄u gé, fag t̄y nén tó ja ti. Hã ra ag tóg ti vég tũ pē n̄i,” he ag tóg, Jesus m̄y, ag t̄y ti ki kagt̄ig n̄yt̄in k̄y.

25 K̄y ũ t̄y ag mré t̄i m̄u ěn tóg ag m̄y: “ãjag t̄y ne jé vãs̄y Topē v̄i tó t̄i ag v̄i kri fi ja tũ n̄i nē?” he m̄u. “Kr̄i tũ ãjag n̄yt̄i, to jykrén há han tũ ãjag tóg n̄yt̄i,” he tóg.

26 “Cristo vēs̄yrénh ke vē, vēs̄yrénh kar k̄y tóg t̄y ũn mág n̄inh m̄u vãhã,” he tóg.

27 K̄y tóg ag m̄y vēñh rá kãmén kãn m̄u sir, Moisés t̄y rá ti, Topē v̄i tó t̄i ag kar t̄y rá ti, ag t̄y Jesus to rán ja ti.

28 Ag m̄y kãmén t̄i ki tóg ěmã ěn tá jun m̄u sir. Ag mré tá jun k̄y tóg mã ra t̄ig m̄u ve n̄i.

29 K̄y ag tóg ti kógfyn m̄u sir, k̄y ag tóg: “ěg mré n̄i,” he m̄u. “Rãké tóg n̄y ha, kutyg ke rã tóg n̄y ha,” he ag tóg m̄u sir. K̄y tóg ag mré kãra rã m̄u, ag mré n̄i jé.

³⁰ Kÿ tóg ag mré jën ke mü gé sir. Ag mré jën ke kÿ tóg pão mäg mü, êmĩ ti. Kÿ tóg Topê mré ví mü, kar tóg kupãn kÿ tÿ vënh ken mü.

³¹ Kÿ ag tóg ti ki kanhrãn mü sir vãhã. Ti ve há han ag tóg mü sir. Hã ra tóg ki tũ nĩ ha, ti ve mãn tũ ag tóg nĩ sir.

³² Kÿ ag tóg jagnê mÿ: “ti tÿ êg mré vëmén kÿ tóg êg fe ki rã,” he mü. “Êg mÿ tóg ã to rán ja ên kãmén kãn, êg mün kÿ. Hã ja vë,” he ag tóg mü jagnê mÿ.

³³ Kÿ ag tóg vësÿmêr Jerusalém ra vÿnvÿn ke mü sir. Tá ag tóg ù tÿ 11 (ke) ag vëg mü, ag mré ke ù ag mré hã.

³⁴ Hã ra ên ag tóg ag mÿ: “êg Senhor vÿ rÿr mãn,” he vén mü. “Simão Pedro mÿ tóg vënh ven, mÿr, ha mẽ,” he ag tóg mü sir.

³⁵ Kÿ ag tóg ag mÿ: “hÿ, ti ve êg ke gé,” he mü gé. Kÿ ag tóg ag mÿ ãjag tÿ nén ve ja ên tó mü sir, ag tÿ ãjag mü ki ti ve ja ti, ti tÿ ag mÿ êmĩ kupãn ja ti ke gé. “Hã ki êg tóg ti ki kanhrõ nÿtĩ, êmĩ kupãn ja ki,” he ag tóg mü.

Jesus tÿ vënh kar ên mÿ vënh ven

(Mt 28.16-20; Mc 16.14-18; Jo 20.19-23; Hk 1.6-8)

³⁶ Ag tÿ ver tÿ vëmén nÿtĩ ra Jesus tóg ag mré jê mü vãhã, ti tÿ hê tá kãrãnh ke tũ nĩ ra. Kÿ tóg ag mÿ: “mÿ sér nÿtĩmñĩ,” he mü.

³⁷ Hã ra ag tóg jÿrÿnrÿn ke mü sir. Ti kamêg ag tóg mü. “Vënh kuprÿg hÿn,” he ag tóg mü, Jesus to.

³⁸ Kÿ tóg ag mÿ: “ãjag ne tóg jÿrÿnrÿn ke mü,” he mü. ãjag tÿ ne jé: “vënh kuprÿg hÿn,” he nê?” he tóg.

³⁹ “Inh nĩgé ve ra, inh pën ve ra, inh hã vë,” he tóg. “Inh mæg mē ra, ve há han ra. Vënh kuprÿg pi(jé) fãr nĩ, ti pi(jé) kuka nĩ. Inh fãr ve ra, inh kuka ti,” he tóg.

⁴⁰ Vĩ kÿ tóg ag mÿ ã nĩgé ven mü, ã pën ke gé.

⁴¹ Hã ra tóg ver ag mÿ e tĩ, ag fe tÿ mrin ke pë han kÿ, kÿ tóg ver ag tÿ ki kagtig tĩ. Hã kÿ tóg ag mÿ: “mÿ ki vëjën tũ?” he mü.

⁴² Kÿ ag tóg ti mÿ pirã nĩm mü, mÿg mré.

⁴³ Kÿ tóg mãn kÿ ko mü, ag rÿnve.

⁴⁴ Kÿ tóg ag mÿ: “hã tó ja inh nĩ, ãjag mÿ, iser to hã, isÿ ãjag mré nĩgnĩn kã,” he mü. “Vãhã sóg ve kãn ja nĩgtĩ, ag tÿ iso nén rán ja ti, Moisés ti, ti tÿ ãjag mÿ vënh jykre nĩm jan ki, kar kÿ Topê ví tó tĩ ag kar tÿ nén rán ja ki ke gé, Topê to jãn ki ke gé. Sÿ nén ven jan hã vë,” he tóg, ã mré mü tĩ ag mÿ.

⁴⁵ Kÿ tóg ag mÿ kãmén há han mü sir, hã kÿ ag tóg ti to nén rán ja ki kanhrãn kãn mü sir, to jykren há han ag tóg mü sir, ti tÿ ag nĩgrêg róm kÿ.

⁴⁶ Kÿ tóg ag mÿ: “tag vÿ rán kÿ nĩ, ha mẽ,” he mü. “Hã kÿ Cristo vÿ vësÿrénh, kÿ tóg rÿr mãn gé, ã ter kar kÿ, kurã tâgtũ tũg kÿ. Tag ve kãn sóg huri,” he tóg.

⁴⁷ “Kÿ tóg rán kÿ nĩ gé, ù ag tÿ vënh kar mÿ inh kãmén ke ti. Inh jijn tó jé ag tóg ke mü, ag tÿ vënh kar mÿ: “ãjag jykre si tovãnh ra,” henh ken kÿ, ù tÿ inh ví tó tĩ ag. “Tovãnh kÿ Topê tóg ãjag mÿ vënh pãte fón ke mü, ãjag tÿ ti ví mranh ja ti,” he jé ag tóg ke gé. Povo kar mÿ ag tóg tónh ke mü, hã ra ag tóg tag ki tó vén ke mü, Jerusalém ki. ãjag to ken hã vë. Inh kãmén jé ãjag tóg ke mü.

⁴⁸ Ve kãn ãjag tóg mÿr, hã kÿ ãjag tóg tónh ke mü.

⁴⁹ Ha mẽ, inh panh vÿ ãjag mÿ nén ù tó ja nĩ, ãjag tÿ venh ken jé. Ên jënê jé sóg ke mü ãjag mÿ. Hã kÿ tag ki nÿtĩmñĩ ver, cidade tÿ Jerusalém tag ki. Hên ra mü tũg nĩ. Vãhã ãjag tóg venh ke mü, inh panh tÿ ãjag mÿ ùn tó ja ti, hã vÿ: ti kuprÿg, he mü. Kanhkã tá tóg kãtÿg ke mü, ù tÿ ãjag tar han ke ti,” he tóg, Jesus ti.

Jesus tỹ kanhkã ra tĩg

(Mc 16.19-20; Hk 1.9-11)

⁵⁰ Kĩ tóg ag jãmĩ tĩ mũ, êmã tỹ Betânia ra. Tá tóg ã nĩgẽ tỹ ag kri ven mũ. Kĩ tóg ag mỹ vĩ há han mũ sir.

⁵¹ Ag mỹ vĩ há han kũ tóg ag ré kũ tĩ mũ, kanhkã ra tãpřy tóg mũ.

⁵² Kĩ ag tóg ti to: “Topẽ vỹ tỹ ti nĩ,” he mũ sir. Kĩ ag tóg Jerusalém ra kãmũ mãn mũ, vêsỹkã. Ag mỹ tóg sér pẽ tĩ vãhã.

⁵³ Kurã kar ki ag tóg Topẽ jo ãn ra mũ tĩ, tá Topẽ to vĩ há han jé, ti mỹ nén ù há kar tó jé, ti tỹ ag mỹ sér tĩn kũ.

Hã vễ.

JOÃO TÝ RÁ

Topě tý ā vī tý nén ũ kar han

¹ Topě tý nén ũ kar han ja tũg ki tóg nĩ ja nĩ, ěg tý ũ to: “Topě vĩ,” he mũ ěn ti, hã to ěg: Jesus, he mũ. Topě mré tóg nĩ. Topě vỹ tý ti nĩ gé.

² Topě tý nén (ũ) kar han tũg ki tóg Topě mrě nĩ nĩ.

³ Ti hã tũgrĩn tóg nén ũ kar han, Topě ti, ěg tý ũ to: “Topě vĩ,” he mũ ěn tũgrĩn. Ā pir mũ Topě tóg nén ũ han tũ nĩ, ti hã mrě tóg nén kar han kãn.

⁴ Ěg tý ũ to: “Topě vĩ,” he mu ěn vỹ rĩr nĩ, hã kỹ tóg ěg rĩnrĩr han mũ gé. Jěngrě ri ke ti nĩ, ũ tý ěg rĩnrĩr han mũ ěn ti. Ti tý ěg kanhrãn to ken hã vē.

⁵ Ũn jykre pãno ag vỹ ũ tý kuty mũ mũ ěn ag ri ke nỹtĩ. Hã ra tóg ěg mũ jěngrě ri ke nĩ, ěg tý ũ to: “Topě vĩ,” he mũ ěn ti. Kỹ Nén-Kórég vỹ ti tý tũ' he han sór ja nĩ, hã ra tóg ti tý hě ri ke ja tũ nĩ.

⁶ Kỹ kejěn Topě tóg ěprã ke ũ jěně, ti jiji hã vỹ: João, he mũ.

⁷ Ti mũ tóg: “ag mũ ũ tý ag mũ jěngrě hen mũ ěn kãmén” he ja nĩ, hã kỹ tóg ke mũ, ag kar tý ti vĩ mẽ jě, ag tý ti vĩ kri fi jě.

⁸ João pi(jé) ěg mũ jěngrě han ja nĩ'. Ti tý ěg mũ: “ěn hã vē,” henh kãtĩg ja vē, ũ tý ěg mũ jěngrě han mũ ěn to, hã vỹ: Jesus, he mũ.

⁹ Jěngrě pě ěn hã vē. ěprã tóg jun, ti tý ěg kanhrãn jě, ěprã ke kar, ũ tý ěg ki jěngrěg pě han mũ ěn ti.

¹⁰ Ga han tóg, ũ tý ěg mũ jěngrě han mũ ěn ti, kỹ tóg ěg mré ga kri tĩnh kãtĩg gé, ga han kar kỹ. Hã ra ag tóg ti ki kanhrãn ja tũ nĩ, ěprã ke ag.

¹¹ Ā povo kar mũ tóg tĩg ja nĩ, hã ra ti mrě ke ag pi(jě) ti ki ge sór ja nĩgtĩ'.

¹² ũ ag tóg hã ra ti ki ge mũ. En ag to tóg: “Topě krě,” he mũ, ũ tý ti ki ge kỹ nỹtĩ tãvi ag to.

¹³ Ti ki ge kỹ nỹtĩ tũgrĩn ěg hã vỹ tý ti krě nỹtĩ. Ěg mur tũgrĩn ěg tóg ver tý ti krě tũ nỹtĩ. Ěg panh tý ěg mũnh fi mrě nỹ tũgrĩn ěg tóg mur mũ gé. Topě tý ěg han mũn tũgrĩn ěg tóg tý ti krě nỹtĩ jãvo.

¹⁴ Ěg tý ũ to: “Topě vĩ,” he mũ ěn vỹ ěg ri ke mur, kỹ tóg tý ěprã ke jě sir. Ěg mrě tóg tĩg ja nĩgtĩ. Há kỹ sóg ti vē. Pã'i mág vỹ tý ti nĩ, ũn tar, tag ve inh. Ěg to há pě tãvi ti nĩ, kỹ tóg ki hã to ti gé. Topě kósin pir vē, kỹ Topě vỹ ti mũ: “ũn mág vỹ tý ā nĩ,” hě, ti jóg ti.

¹⁵ João vỹ ti kãmén ja nĩ gé. Ti kãmén há han tóg, kỹ tóg: “inh nón kãtĩ mũ ěn vỹ inh kãfór nĩ,” he ja nĩ. “Inh nón kãtĩg jě tóg ke mũ, hã ra tóg tý ijo ke nĩ. Ěn to inh huri ājag mũ. Ti hã vē,” he ja tóg nĩ, João ti, Jesus to.

¹⁶ Ěg to há tãvi tóg nĩ, hã kỹ tóg mũ nén ũ ha kar han, ěg jagãgtãn kỹ. Ěg jagãgtãn tag tovãnh ke tũ pě tóg nĩ.

¹⁷ Moisés vỹ ěg mũ Topě tý ěg jyvěn mũ ěn to ja nĩgtĩ, ěg tý ti vĩ ki króm jě, kỹ Jesus tóg ěg mũ: “Topě vỹ ājag mũ vėnh pãte fón sór mũ, ti tý ājag to há mũn kỹ,” he mũ. Ti hã ne ěg mũ vėnh ví sěr ěn to mũ'.

¹⁸ Ěg pi(jě) Topě vég tĩ'. Kỹ ěg kãmĩ ũ vỹ ti ve ja tũ nĩ gé. Ti kósin pir hã vỹ ěg mũ ti kãmén tĩ, ti hã vỹ ā jóg mrě nĩ nĩ, Topě mrě. Ti hã vỹ Topě ri ke nĩ. Kỹ tóg ěg mũ ā panh ti kãmén tĩ, Topě kósin ti, Jesus ti.

*João Batista tý Jesus kãmén.
(Mt 3.1-12; Mc 1.1-8; Lc 3.1-18)*

19 Kejën Judeu ag pã'i ag vỹ João mỹ vënh vĩ jënëg mũ. Jerusalém tá ag nỹtĩ, pã'i ag, Topẽ tũ ki rĩr tĩ, Levi krẽ'krẽ ag ke gé. Ag João mỹ vënh vĩ jënë kỹ ag tóg mỹ: "ũ nỹ tỹ nĩ?" he mũ.

20 Kỹ tóg ag mỹ: "inh pi(jé) tỹ Cristo nĩ," he mũ. Tó há han tóg, ag mỹ.

21 Kỹ ag tóg ti mỹ: "kỹ ã hỹn tỹ ù nĩ?" he mũ. "Ã mỹ tỹ Elias nĩ?" he ag tóg ti mỹ. Hã ra tóg ag mỹ: "vó," he mũ gé.

Kỹ ag tóg ti mỹ: "Topẽ vĩ tó tí ù nẽji kãtĩg ke mũ gé. Ti hã mỹ tỹ ã nĩ?" he mũ. Hã ra tóg: "vó," he mũ gé.

22 Kỹ ag tóg ti mỹ: "ũ nỹ tỹ ã nĩ, ge kỹ?" he mũ. "Pã'i ag vỹ ãg jëgnẽ, ãg tỹ ã ki jëmẽ jë. ãg hỹn ne tónh ke mũ, ag mỹ?" he ag tóg mũ. "Vëso ã hëri ke tí?" he ag tóg mũ, João mỹ.

23 Kỹ João vỹ ag mỹ vënh kãmén mũ. ã to nén rán kỹ nĩ ãn tó tóg mũ, hã vỹ: "ũ tỹ ãmã tũg ja tá jë kỹ vënh kar mỹ Topẽ jykre kãmén mũ ãn vỹ tỹ inh nĩ," he mũ. "Û tỹ vënh kar mỹ: "ãg Senhor japry kure ra, ti jamĩn kurynh ra, ti tỹ jagma tũg há han jé, he tí ãn vỹ tỹ inh nĩ. Isaias tỹ inh kãmén há vë," he tóg, João ti.

24 Jãvo ù tỹ ti ki jëmëg mũ ag vỹ tỹ Fariseu ag mrẽ ke nỹtĩ.

25 Kỹ ag tóg ti mỹ: "ã tỹ hë ri ken kỹ ag kygpe sór nẽ, ã tỹ tỹ Cristo tũ hã ra?" he mũ. "Inh pi(jé) tỹ Elias nĩ, he ã tóg tí. Inh pi(jé) tỹ Topẽ vĩ tó tí ãn nĩ, ãg tỹ ùn kãtĩg jãvãnh mũ ãn, he ã tóg tí, hã ra ã tóg ag kygpég tí," he ag tóg mũ, João mỹ.

26 Kỹ tóg ag mỹ: "goj tỹ sóg ag kygpég tí," he mũ. "Hã ra ù tóg ãjag kãmĩ tũ mũ ha, ãjag tỹ ùn ki kagtĩg ù.

27 ãn vỹ inh nón kãtĩg ke mũ, hã ra tóg inh kãfór nĩ. Sỹ ti camarada nĩnh ke vë vë, sỹ ti pën nẽ kunũnh ke vë vë, ti pën to ró ti. Hã ra sóg tỹ ti krẽm ke pë jë," he tóg, João ti

28 Kỹ ag tóg mũ mũ, ti vĩ mẽ kar kỹ. Cidade tỹ Betânia tá ag tóg ti venh kãmũ ja nĩgtĩ, Fariseu ag, João ti, Jordão mã tá. Tá tóg ag kygpég jë nĩ, João ti.

Jesus tỹ tỹ ãg tỹ Topẽ mỹ ãg mëg tânh ãn ri ke

29 Tỹ vaj kỹ João vỹ Jesus vëg mũ sir. João tá tóg jun mũ, Jesus ti. Kỹ João tóg ti to: "ti hã vë," he mũ. "ãg tỹ Topẽ mỹ ãg mëg tỹ carneiro krẽ tânh ãn ri ke ti nĩ, cordeiro ãn ti. Ti hã vỹ ãg kar tỹ Topẽ vĩ mranh jagfy ter ke mũ," he tóg.

30 "Sỹ ùn kãmén mũ ãn hã vë. Û tỹ ijo jë mũ vỹ inh nón kãtĩg ke mũ, he ja inh nĩ ti to. Inh kãfór ti nĩ, ti tỹ inh jo ke nĩn kỹ, he ja inh nĩ.

31 Inh pi(jé) ti ki kanhró ja nĩ', hã ra sóg goj tỹ vënh kar ag kygpé, ag tỹ ti ki kanhrãn kãn jé, povo tỹ Israel ag kar," he tóg, João ti

32 Kỹ tóg: "Topẽ kuprĩg ve inh," he mũ gé. "Kanhkã tá kãkutẽ kỹ tóg ti krĩ kri nĩ nĩ. Tỹ sórãg ve ti nĩ, Topẽ kuprĩg ti, ti tỹ ti krĩ kri nĩn kỹ.

33 Inh pi(jé) Jesus ki kanhró nĩ vë'. Hã ra Topẽ tóg inh mỹ: ha ag kygpenh tũg," he ja nĩgtĩ, kỹ tóg inh mỹ: "ã tỹ inh kuprĩg ve kỹ ã tóg ti ki kanhró nĩnh mũ," he ja nĩ gé. "Kanhkã tá kãkutẽ kỹ tóg ag kã ùn pir kri nĩnh mũ. Ti tỹ ùn kri nĩ mũ ãn vỹ inh kuprĩg tỹ ag kygpenh ke mũ," he ja tóg nĩ inh mỹ, Topẽ ti.

34 Tag ve inh, hã kỹ sóg ãjag mỹ: ti hã vỹ tỹ Topẽ kósin nĩ, he mũ" he tóg, João ti. Ti tỹ Jesus kãmén hã vë.

Jesus tỹ ã mrẽ mũ tí ag jé prẽr

35 Tỹ vaj kỹ João vỹ ã mrẽ mũ tí rëgre ag mré vëmén jë nĩ.

³⁶ Kŷ tóg Jesus tŷ mĩ tĩg vég mũ, kŷ tóg ag mŷ: “Topê tũ vŷ tŷ ti nĩ,” he mũ. “Ĕg tŷ Topê mŷ ěg mĕg tŷ cordeiro tãnh tĩ ěn ri ke ti nĩ,” he tóg, João ti.

³⁷ Ag tŷ ti vĩ tag mĕ kŷ ag tóg Jesus nón mũ mũ.

³⁸ Kŷ Jesus vŷ ag vég mũ, ag tŷ ti nón mũ ti. Kŷ tóg ag mŷ: “ne nĕ?” he mũ. Kŷ ag tóg ti mŷ: “ã hĕ tá ěmã nĩ?” he mũ.

³⁹ Kŷ tóg ag mŷ: “mũ jé ha, inh mrĕ, ajag tŷ inh jamã ven jé,” he mũ. Kŷ ag tóg ti mrĕ mũ mũ sŷr. Ti mrĕ ag kurã ěn tũg mũ. Rã ké ti nŷ ha, ag tŷ ti mrĕ mũ kri, 4 horas hŷn hĕn ri ke mũn.

⁴⁰ Ti mrĕ mũ ag kã ũ vŷ tŷ André nĩ, ũ tŷ João tŷ Jesus tó ja ěn mĕg mũ ag kã ũ, hã vŷ: Simão Pedro jãvy, he mũ, André tí, Jesus mrĕ vĕmén tĩ ěn ag kã ũ ti.

⁴¹ Ĕn tóg tá kãtĩg, kŷ tóg vĕsŷmĕr ã kãke tŷ Simão Pedro venh tĩ mũ, kŷ tóg ti mŷ: “Messias ve inh,” he mũ. “Messias,” he ag tóg tí, Topê tŷ ũn jĕnĕnh ke ěn to, Cristo to.

⁴² André tŷ ti mŷ Jesus tó kŷ tóg ti mrĕ ti venh tĩ mũ. Kŷ Jesus vŷ ti ki ěvãnh mũ, kŷ tóg ti mŷ: “Simão vŷ tŷ ã nĩ, João kósin,” he mũ. “Sŷ ã jŷjŷn mãn ke vĕ, hã vŷ: Cefas, he mũ,” he tóg, Jesus ti. Cefas to ken hã vĕ, hã vŷ: Pedro, he mũ, hã vŷ: pãró, he mũ, ěg vĩ ki.

Jesus tŷ Filipe mrĕ Natanael jé přĕr

⁴³ Tŷ vaj kŷ Jesus vŷ ga tŷ Galiléia ra tĩg sór mũ. Ā tĩg ke jo tóg Filipe kato tĕ mũ. Kŷ tóg ti mŷ: “inh mrĕ kãtĩg,” he mũ. Kŷ tóg tí mũ.

⁴⁴ Hã ra Filipe vŷ tŷ Betsaida tá ke nĩ, André mrĕ Pedro jamã ěn tá ke.

⁴⁵ Kŷ Filipe vŷ Natanael venh tĩ mũ, ti mŷ Jesus kãmĕn jé. Kŷ tóg ti mŷ: “Cristo ve inh huri,” he mũ. “Moisés vŷ ti kãtĩg ke rán ja nĩ, Topê vĩ tó tí ag ke gé. Jesus to ken hã vĕ, Nazaré tá ke ěn to ken hã vĕ, José kósin ěn ti. Ti hã vŷ tŷ Cristo nĩ,” he tóg, Filipe tí, Natanael mŷ.

⁴⁶ Kŷ tóg ti mŷ: “hã ra sóg Nazaré tá ũn há ve ja tũ nĩ ver,” he mũ. Hã ra Filipe tóg ti mŷ: “ge ra ti venh kãtĩg,” he mũ. Kŷ tóg ti mrĕ tí mũ.

⁴⁷ Ag tŷ Jesus tá junjun mũ ra Jesus tóg Natanael kãmĕn mũ, ũ tŷ tá nŷtĩ ag mŷ. “Ū tŷ tá kãtĩ mũ ěn ve ra,” he tóg. “Israel krĕ'krĕ pĕ vĕ,” he tóg. “ũn há vŷ tŷ ti nĩ, ón vãnh ti nĩ,” he tóg.

⁴⁸ Hã ra Natanael vŷ Jesus tŷ ã to vĩ tag mĕg mũ. Kŷ tóg ti mŷ: “kŷ ã mŷ inh ki kanhró nĩ?” he mũ. Kŷ Jesus tóg ti mŷ: “Filipe tŷ ã jé přĕr to hã sóg ã vé,” he mũ. “Ā tŷ ka krĕm jĕ kŷ sóg ã vé, ka tŷ figueira ěn krĕm,” he tóg,” he tóg. Jesus ti.

⁴⁹ Kŷ Natanael tóg Jesus mŷ: “mĕ!,” he mũ. “Topê kósin vŷ tŷ ã nĩ,” he tóg. “Ĕg povo tŷ Israel kri pã'i vŷ tŷ ã nĩ,” he tóg.

⁵⁰ Kŷ Jesus tóg: “isŷ ã mŷ: ã ve ja inh nĩ, ã tŷ ka krĕm jĕ ra, hen kŷ tóg ã mŷ e tí, kŷ ã tóg inh vĩ kri fi sór mũ,” he mũ. “Hã ra tóg ver tŷ nĕn ũ tũ nĩ, sŷ ã ve ja tag tí. Isŷ kar kŷ nĕn han ke vŷ ã mŷ e pĕ tãvĩ tĩnh mũ, ha vemní,” he tóg, Jesus ti.

⁵¹ “Ha vé, ki hã sóg tónh ke mũ, ha mĕ. Kanhkã nor kŷ nĩ ve jé ajag tóg ke mũ. Tá ajag tóg Topê tŷ jĕgnĕ jafã ag venh ke mũ gé. Kanhkã tá ag kãrenh ke mũ, iso, kŷ ag ra mũ mãn ke mũ gé. Tŷ sóg ěprã ke fi kósin nĩ mŷr,” he tóg, Jesus ti.

2

¹ Kurā tāgtū tūg kŷ ũ tóg vėnh prūg han mŷ ěmā tŷ Caná tá, ga tŷ Galiléia tá. Jesus mŷnh fi vŷ venh tŷg ja nŷ.

² Kŷ ag tóg Jesus mŷ tó mŷ gé, ti tŷ festa venh kātŷg jé, ti mré mŷ tŷ ag mré.

³ Ag tŷ tá nŷtŷ ra vāhā vinho tóg tŷ' he mŷ. Kŷ Jesus mŷnh fi tóg ti mŷ: "vinho hur tŷg," he mŷ.

⁴ Hā ra Jesus tóg fi mŷ: "toreg', mŷnh'," he mŷ. "Inh mré ke tŷ vē, ā tŷ inh mŷ nén tó mŷ tag tŷ," he tóg, Jesus tŷ, ā mŷnh fi mŷ.

⁵ Hā ra fi tóg ũ tŷ festa ki rŷr tŷ ag mŷ: "ti tŷ ājag mŷ nén ũ tó kŷ han nŷ," he mŷ.

⁶ Hā ra goj né mág tŷ 6 (ke) vŷ tá nŷtŷ, pó tŷ goj hé mág. Éhé ti nŷtŷ, balde fór tŷ 10 (ke) tŷ ěg tóg ũn pir fān tŷ. Judeu ag vŷ vėnh kygpe e han tŷ, ag tŷ Topē mŷ há nŷtŷ je. Ag jykre hā vē. Ag tŷ vėnh kygpe hā jé tóg tá nŷtŷ, goj nén ti.

⁷ Kŷ Jesus tóg festa ki rŷr tŷ ag mŷ: "goj né ěn fónfān, goj run kŷ," he mŷ. Kŷ ag tóg ke mŷ. Fónfān kān ag tóg mŷ.

⁸ Kŷ tóg ag mŷ: "goj tag tŷ festa to pā'i mŷ ven," he mŷ. Kŷ ag tóg ke mŷ.

⁹ Kŷ tóg kron mŷ, festa to pā'i ěn tŷ. Hā ra tóg tŷ vinho nŷ sir, ag tŷ run ja ti. Hā ra tóg ki kagtŷg nŷ, festa to pā'i ti. Ũ tŷ festa ki rŷr tŷ ag hā vŷ ki kanhró nŷtŷ, pā'i ěn krēm ke ag.

Pā'i tŷ vinho hā ěn kron kŷ tóg ũn prūg mŷ ěn jé prēr mŷ. Kŷ tóg ti mŷ:

¹⁰ "vėnh jykre vėnhmŷ han ā," he mŷ. "Ag tŷ kronkron vén kŷ ā tóg ag mŷ vinho há tāvŷ nŷm ke mŷ vē, kar kŷ vinho pāgsŷ vŷ há nŷ vē. Jāvo ā tóg ag mŷ vinho pāgsŷ ěn nŷm vén, kŷ ā tóg vinho há pē tag nŷm sór mŷ ha vāhā," he tóg, festa to pā'i ti, ũn prūg mŷ ěn mŷ. Hā ra tóg ki kagtŷg nŷ, Jesus tŷ goj tŷ vinho há ěn han mŷ ti, há kŷ tóg ti mŷ e tŷ, ti tŷ festa kuju ki vinho há ven sór kŷ.

¹¹ Jesus tŷ ěmā tŷ Caná tá nén han mŷn hā vē, Galiléia tá. ěg tŷ nén han ki kagtŷg hyn han tóg tŷ, kŷ tóg tag han vén. Ti tŷ nén han mŷ ki ěg tóg ti jykre tar ki kanhró nŷtŷ sir. Hā kŷ ag tóg ti ki ge mŷ sir, ti mré mŷ tŷ ag, ag tŷ ti jykre tar ěn ven kŷ.

¹² Kar kŷ Jesus vŷ cidade tŷ Cafarnaum ra tŷ mŷ, ti mŷnh fi mrē, ti jāvy ag mré hā, ti mrē mŷ tŷ ag mré ke gé. Tá ag tóg nŷtŷg mág sŷ han.

*Jesus tŷ Topē jo ĩn ra tŷ
(Mt 21.12-13; Mc 11.15-17; Lc 19.45-46)*

¹³ ěn kā Judeu ag festa tŷ Páscoa vŷ kakó nŷ ha Kŷ Jesus vŷ cidade tŷ Jerusalém ra tŷ mŷ, ti mré mŷ ti ag mré.

¹⁴ Ti tŷ Topē jo ĩn tá jun kŷ tóg ũ tŷ boi vender he tŷ ag vég mŷ, carneiro vender he tŷ ag ke gé sórág vender he tŷ ag ke gé. Topē jo ĩn krēm ag tóg ājag negócio hyn han tŷ. Kar kŷ ũ ag tóg tá nŷtŷ gé jānkamy trocar he tŷ ag.

¹⁵ Jesus tŷ ag ve kŷ tóg ti mŷ e tŷ, ag tŷ Topē jo ĩn kavėnh mŷn kŷ. Hā kŷ tóg mrān ke jafā fy tŷ ag mrānmrān jafā han mŷ. ěn vyn kŷ tóg ag pan mŷ, Topē jo ĩn kātā, carneiro ti ke gé, boi ti ke gé. Ũ tŷ jānkamy trocar he tŷ ag jānkamy ěn vām tóg mŷ gé, ěprā, kŷ tóg ag mesa tŷ kréj ke mŷ gé.

¹⁶ Ũ tŷ sórág vender he tŷ ag mŷ tóg: "ājag tŷ ma mŷjěg," he mŷ. "Inh panh jo ĩn krēm negócio han sór tŷg nŷ. Bodega pijě', inh panh jo ĩn ti," he tóg, Jesus tŷ.

¹⁷ Ti mré mŷ tŷ ag tŷ tag ve kŷ ag tóg ti to rán kŷ nŷ ěn mŷ ěkrég mŷ, ha mē: "ā ĩn tóg inh mŷ sŷnvŷ jě, kŷ tóg inh mŷ e tŷ, ag tŷn kavėnh kŷ. Tag tugrŷn ag tóg inh krŷ rŷ han mŷ, kŷ tóg kejěn isén ke mŷ sir, inh kri rŷ ti, ha vemnŷ," he tóg, Topē vŷ tŷ rán kŷ nŷ ki, Jesus to.

18 Kÿ Judeu ag pã'i ag vÿ Jesus tÿ ag pan mÿ vég mÿ gé. Kÿ ag tóg ti mÿ: “ã tÿ hë ri ke nê?” he mÿ. “Û nÿ hÿn ã mÿ: tag han nÿ, hé? Milagre ù han nÿ, êg tÿ ù tÿ ã jênêg mÿ ki kanhrân jé,” he ag tóg mÿ, pã'i ag, Jesus mÿ.

19 Hã ra Jesus tóg ag mÿ: “ã jag tÿ Topê jo Ìn tag kókén kÿ sóg ti jêgia ki ù han mãn ke mÿ, kurã tágtÿ kí, ha vemní,” he mÿ.

20 Kÿ tóg ag mÿ e tí. “Û tÿ Topê jo Ìn tag han mÿ ag vÿ ano tÿ 46 (ke) ki rãnrãj kÿ ti han. Jãvo ã mÿ kurã tágtÿ kí ti han sór mÿ, in ti?” he ag tóg mÿ, Jesus mÿ, pã'i ag.

21 Hã ra Jesus tóg ag mÿ ã ter ke tó ja nÿgtÿ, vènh kãmén ja ti nÿgtÿ, ti tÿ vëso: “Topê jo Ìn ri ke inh nÿ,” hen kÿ.

22 Ti tÿ kejên ã ter kar kÿ rÿr mãn kÿ ti mré mÿ tí ag tóg ti vÿ tag ki êkrén kÿ ki kanhrân mÿ, kÿ ag tóg Topê vÿ ki rán kÿ nÿ ên to jÿkrén há han mÿ vãhã, Jesus vÿ to ke gé, kÿ ag tóg ti ki ge há han mÿ ha.

Jesus tÿ vènh kar ki kanhró

23 Kÿ ù tÿ hën ri ke ag vÿ Jesus ki ge mÿ, ti tÿ Jerusalém tá nÿn kÿ, festa tÿ Páscoa ên kã. Ag tÿ ti tÿ nén han mÿ ve kÿ ag tóg ti ki ge mÿ. Milagre hÿn han tóg tí.

24 Hã ra tóg ag jÿkre ki kanhró nÿ, ù tÿ ón kÿ ti ki ge mÿ ag jÿkre ki. Ón kÿ ag tóg ti ki ge mÿ, hã kÿ ag tóg ti ki fe tÿ nÿtÿ sir.

25 Kÿ ù tÿ ti mÿ: “ù ên jÿkre vÿ ge nÿ,” hen kÿ tóg: “hÿ, ki kanhró inh nÿ,” he tí. Vësóg ki tóg ag jÿkre ki kanhró nÿgtÿ.

3

Nicodemos tÿ Jesus mré vémén

1 Ên kã ù tóg nÿgtÿ, ti jÿjin hã vÿ: Nicodemos, he mÿ. Judeu ag pã'i ù vë, Fariseu ù vë.

2 Ên vÿ Jesus ve sór mÿ, kÿ tóg kutÿ ra ti venh tí mÿ, ti mré vémén jé. Kÿ tóg ti mÿ: “Topê vÿ ã jênê, tag ki kanhró êg tóg nÿtÿ,” he mÿ. “Topê tÿ êg mÿ ùn jênê vÿ tÿ ã nÿ, hã kÿ ã tóg êg tÿ nén han vãnh ên hÿn han tí. Topê tÿ ã mré han tÿ nÿ ra ã tóg ã tÿ han mÿ tag ki kagtÿg nÿnh mÿ vë,” he tóg, Nicodemos ti, Jesus mÿ.

3 Kÿ Jesus tóg ti mÿ: “sÿ ã mÿ tag kãmén ke vë, ha mÿ,” he mÿ. “Ûn mur mãn kÿ nÿtÿ ag hã vÿ Topê tÿ tÿ êg pã'i nÿ venh ke mÿ, ag tâvÿ. Kí hã sóg tó mÿ mÿr,” he tóg, Jesus ti, Nicodemos mÿ.

4 Kÿ Nicodemos tóg ti mÿ: “kÿ ùn sanh hÿn hë ri kenh mÿ, ti mur mãn jé?” he mÿ. “Ti mÿ vësÿ han ki kanhró nÿ, kÿn mÿ ã mÿnh fi nug ki rã mãn kÿ mur mãn ke mÿ?” he tóg, Nicodemos ti.

5-6 Hã ra Jesus tóg ti mÿ: “vó,” he mÿ. “Êprã ke ag krê vÿ tÿ êprã ke nÿtÿ, ag mÿnh fag ri ke, Jãvo Topê kuprÿg tÿ ù han kÿ tóg Topê kuprÿg tÿ jagrê nÿ. Mur mãn to ken hã vë, hã vÿ: inh ki rã, he mÿ, hã vÿ: mur mãn, he mÿ. Goj tÿ ke vë, Topê kuprÿg tÿ ke vë gé. Û tÿ gen kÿ mur mãn ja tÿ nÿn kÿ tóg Topê tÿ tÿ êg pã'i nÿ venh ke tÿ pë nÿ.

7 Hã ra tóg ã mÿ e tí, sÿ ã mÿ: “mur mãn jé ã tóg ke mÿ,” hen kÿ.

8 Kãka to jÿkrén nÿ. Ti tÿ mÿ tÿg sór mÿ ên mÿ tóg tí tí kãka tí. Ti tÿ krog he mÿ ên hã mÿg êg tóg tí, hã ra êg tóg tí vég tÿ nÿ, kÿ êg tí tÿ hë ra tÿg ke mÿ ki kagtÿg nÿtÿ, ti tÿ hë tá kãtÿg ên ti ke gé. Ge tí nÿgtÿ, Topê kuprÿg tÿ ùn han mãn mÿ ag mré,” he tóg, Jesus ti, Nicodemos mÿ. (Topê kuprÿg vég tÿ êg tóg nÿgtÿ. Ha ra

tóg ãg mÿ ã jykre tãg nÿm, ti tÿ ãg han mãn kÿ. Hã kÿ Jesus tóg Nicodemos mÿ: “kãka ri ke nÿ,” he mÿ)

⁹ Kÿ Nicodemos tóg: “tag hÿn hẽ ri ke tÿ?” he mÿ.

¹⁰ Kÿ Jesus tóg ti mÿ: “Israel ag kanhrãn ã tóg tÿ, hã ra ã tóg sÿ ã mÿ nén tó mÿ tag ki kagtÿg nÿ,” he mÿ.

¹¹ “Ki hã sóg tó mÿ, hã kÿ sóg ã mÿ kãmén mÿ. Sÿ nén ù ki kanhrãn mÿ ãn hã tó sóg tÿ. Isÿ nén ù ve ja ãn hã kãmén sóg tÿ, hã ra ãjag tóg mẽ jãvãnh nÿtÿ.

¹² Isÿ ãjag mÿ ga kri vãnh jykre kãmén mÿ ra ãjag tóg jẽmẽ sór tÿ nÿgtÿ. Kÿ ãjag hÿn hẽ ri kenh ke mÿ’, sÿ ãjag mÿ kanhkã tá vãnh jykre kãmén kÿ?” he tóg.

¹³ “Ha vé, ãjag kãmÿ ù vÿ kanhkã ra tãpÿrÿ tÿ nÿ, tá vãnh jykre ãn ve jé. ãjag jãvo isóg tá kãkutẽ ja nÿ, hã kÿ sóg tó tÿ. Inh jamãn hã vẽ. Tÿ sóg ãprã ke fi kósín nÿ,” he tóg, Jesus ti.

¹⁴ “Moisés vÿ pÿn tÿ ka to sa ja nÿgtÿ, ga kórég ãn tá. Pÿn tÿ ferro kusÿg tÿ há ãn tÿ tóg ka to sa ja nÿgtÿ. Tag ri ke han jé ag tóg ke mÿ, isÿ, isÿ tÿ ãprã ke fi kósín nÿn kÿ.

¹⁵ Kÿ ù tÿ inh ki rãnh ke mÿ ãn vÿ kren ke mÿ. Rÿr krÿg ja tÿ ve jé tóg ke mÿ. Hã jé ag tóg ka to isanh ke mÿ.

¹⁶ Topẽ vÿ ga kri mÿ ag to há nÿ, hã kÿ tóg ã kósín pir fẽg, vãnh kar tÿ ti ki ge jé, ag tÿ tÿ’ he tÿ nÿ jé, ag tÿ ãg rÿr krÿg ja tÿ ãn ven jé.

¹⁷ Topẽ vÿ ã kósín jẽnẽ, ti tÿ ãprã ke ag krenkren han jé. Ti pi(jé) sÿ ãjag vóg kónãn jé inh jẽnẽ!,” he tóg, Jesus ti, Nicodemos mÿ.

¹⁸ “Û tÿ inh ki rãnh ke mÿ to tóg jÿnh ke tÿ nÿ, Topẽ ti. Jãvo tóg ù tÿ inh ki ge tÿ ãn ag hã to jÿ nÿ isÿ tÿ ti kósín pir nÿn kÿ,” he tóg.

¹⁹ “Topẽ tÿ ù tÿ inh ki ge tÿ ag to jÿ vÿ ge nÿ, ha mẽ. Ga kri mÿ ag kanhrãn sóg tÿ, hã ki sóg ag mÿ jẽngrẽ ri ke nÿ. Hã ra ag tóg mẽ sór tÿ nÿgtÿ. Kutÿ mÿ ag tóg mÿ sór mÿ, jẽngrẽ tóg ag mÿ kórég nÿ, ag jykre pãno nÿn kÿ.

²⁰ Û tÿ vãnh jykre pãno han mÿ kar vÿ kurã to kórég nÿtÿ, kÿ ag tóg kurã ki vãnh ven sór tÿ nÿ, vãnh kar tÿ ag jykre pãno venh ha mẽ tÿn kÿ.

²¹ Û tÿ Topẽ vÿ ki króm mÿ ag vÿ kurã ki vãnh ven sór tÿ. Kurã tóg ag mÿ sér tÿ, vãnh kar tÿ ag jykre hã ven jé. Topẽ vÿ ag tar han tÿ, ag tÿ nén ù há han jé. Hã ve jé ag tóg ke mÿ, vãnh kar ag,” he tóg, Jesus ti, Nicodemos mÿ. Ti tÿ ti mÿ Topẽ jykre kãmén ja hã vẽ.

João Batista tÿ Jesus kãmén mãn

²² ãn kã kejẽn Jesus tóg ã mré mÿ tÿ ag mré ga tÿ Judéia ra tÿ mÿ, kÿ ag tóg tá nÿtÿ, vãnh kar kygge kÿ.

²³ Hã ra João vÿ ag kygpég mÿ gé, ãn kã, vãnh tÿ Enom tá, Salim tóg tá kakó nÿ. Tá goj vÿ ehẽ nÿ, hã kÿ tóg ag tÿ tá vãnhmãn kÿ ag kygpég mÿ, João ti.

²⁴ ãn kã tóg ver se kÿ jẽ tÿ nÿ, João ti.

²⁵ Kejẽn Judeu ù tóg tá nÿ gé, hã ra tóg João mré mÿ tÿ ag vÿ kafãn mÿ. “Gøj tÿ ãg tóg Topẽ mÿ jãnhkri kÿ nÿgtÿ!,” he tóg mÿ, ag mÿ, Judeu ãn ti. Hã to ag tóg jagñẽ vÿ kafãn mÿ.

²⁶ Kÿ João mré mÿ ag tóg João mÿ tag tó mÿ, ha mẽ. “Û tÿ Jordão mãtã ã mré nÿ ja ãn vÿ ag kygpég jẽ nÿ, ã tÿ ãg mÿ ùn kãmén ja ãn ti. Hã ra vãnh kar vÿ ti mré mÿ mÿ ha, hã kÿ ag tóg ã venh kãmÿ mãn tÿ nÿ ha,” he ag tóg mÿ, João mÿ, Jesus to.

²⁷ Hã ra tóg ag mÿ: “há ti nÿ,” he mÿ. “Topẽ tÿ ãg mÿ ùn nÿm mÿ ãn hã vэг ãg tóg tÿ,” he tóg.

28 “Mĩ êkrén nĩ, sỹ ãjag mỹ nén tó ja ti, hã vỹ: inh pi (jé) tỹ Cristo nĩ, he mũ. Sỹ ti jãmĩ tĩg ke hã jé tóg inh jẽnê, Topê ti, he ja sóg nĩ ãjag mỹ,” he tóg, João ti.

29 “Vênh prũg to jykrén nĩ. Ûn prũg mũ hã vỹ ã prũ ke fi mré nĩ nĩ. Ti régre tóg hã ra ti rã hã jê, ùn prũg mũ ên rã hã, ký tóg ti vỹ mēg mũ, hã ra tóg ti mỹ mē sér pē tĩ, ti, vĩ ti. Ge ti nĩ, inh mré. Inh mỹ tóg sér tĩ, vênh kar tỹ ti mré mũn ký, ti tỹ ùn prũg mũ ri ke nĩn ký, Jesus ti.

30 Ûn e tỹ ti mré mũn ký tóg há tĩ, ký tóg tỹ ùn mág nĩnh mũ ha. Hã ra sóg tỹ nén ù tũ nĩnh ha,” he tóg, João ti.

Jesus tỹ kynhmỹ kãtĩ

31 “Ûn tỹ kynhmỹ kãtĩ mũ ên vỹ vênh kar kafór nĩ. Êprã ke ag vỹ tỹ êprã ke nỹtĩ, ký ag tóg êprã ke jykre tỹ vēmén tĩ. Û tỹ kanhkã tá kãtĩ mũ ên vỹ tỹ vênh kar kri ke jê.

32 Ký tóg ã tỹ tá nén ve ja ên hã tó mũ, ã tỹ tá nén mē ja ên, hã ra ag tóg ti vỹ mē sór tũ nĩ.

33 Û tỹ ti vỹ mēg mũ ag hã ra Topê to: “ki hã tóg tó ti,” he mũ.

34 Topê tỹ ùn jẽnêg mũ ên vỹ ti vỹ kãmén mũ. Topê kuprĩg vỹ Jesus tar han mũ, ti tỹ tỹ ti jagrê pē nĩn ký, ti tỹ ti ve mág han ký.

35 Topê vỹ ã kósĩn to há távĩ nĩ, ký tóg ti mỹ nén (ũ) kar tovãnh, ti hã tỹ ki rĩr jê.

36 Hã ký ù tỹ ti kósĩn ki rã mũ vỹ ter mãn ke tũ nĩ. Rĩr krỹg ja tũ ve jé tóg ke mũ. Û tỹ ti vỹ han sór tũ ên vỹ tag venh ke tũ pē nĩ, rĩr krỹg ja tũ tag ti. Topê vỹ ti vóg kónãnh ke mũ, ký tóg tũg' henh ke tũ nĩ, Topê tỹ ti vóg kónãnh ke ti,” he tóg, João ti. Ti tỹ ã mré mũ tĩ ag mỹ Jesus kãmén jan hã vê.

4

Jesus tỹ Samaria tá fi mré vēmén mũ

1 Ký Fariseu ag vỹ mēg mũ, ùn tỹ hên ri ke ag tỹ Jesus mré mũ ên ti. Ûn e ag kygpég tóg mũ gé, Jesus ti, João tỹ ùn kygpe ja ag kãfór.

2 Hã ra Jesus vỹ ag kygpe ja tũ nĩ. Ti mré mũ tĩ ag hã vỹ ag kygpe ja nĩgtĩ.

3 Ký Jesus tóg mēg mũ, Fariseu ag tỹ ti tỹ tỹ ùn mág nĩ mē ja ti, hã ký tóg ga tỹ Judéia tá kãkutê ký ga tỹ Galiléia ra tĩ mũ, ti mré mũ tĩ ag mré.

4 Galiléia ra tĩg jé tóg ver ga tỹ Samaria fĩn rãm mũ.

5 Fĩn rãm ký tóg Samaria tá cidade ù tá jun mũ, hã vỹ: Sicar, he mũ. Tán kakó nĩ, Israel jóg'jóg ve tỹ Jacó japỹ ja ti. Êpỹ ên fi ja tóg nĩ, ã kósĩn tỹ José mỹ, Jacó ti.

6 Ký Jacó tỹ poço vỹ tá nĩ gé. Jesus tỹ poço ên tá jun ký tóg tá vênhkãnh ký nĩ nĩ, poço ên rã hã. Rã tỹ êg nĩno kã sa ra ke ja vê.

7 Jesus tỹ tá nĩn ký ùn tỹtã fi vỹ tá jun mũ, Samaria tá ke ù fi. Goj run jé fi tóg kãtĩ mũ. Ký Jesus vỹ fi mỹ: “inh mỹ goj jun, sỹ kron jé,” he mũ.

8 Ti mré mũ tĩ ag vỹ tá tũgtũ nỹtĩ, ã pir mỹ tóg tá nĩ nĩ, Jesus ti. Cidade ra ag kagáv, vějên compr ar he jê.

9 Jesus tỹ fi mỹ goj to vĩn ký fi tóg ti mỹ: “Judeu vỹ tỹ ã nĩ, hã ra ã tóg inh mỹ goj to vỹ mũ!” he mũ, “isỹ tỹ Samaria tá ke nĩ ra,” he fi tóg mũ, Jesus mỹ. Judeu ag vỹ Samaria tá ke ag to é he tĩ, hã ký fi tóg ti mỹ ke mũ.

10 Ký Jesus tóg fi mỹ: “Topê tỹ ã mỹ nén han sór mũ tag ki kagtĩg ã nĩ ver,” he mũ. “Kỹ ã tóg inh ki kagtĩg nĩ gé. Ke tũ nĩ mũ ra ã tóg inh mỹ: “inh mỹ goj

nĩm,” henh ke mũ vễ, kỹ sóg ã mỹ goj ror tỹ goj nĩm ke mũ vễ,” he tóg fi mỹ, Jesus ti.

¹¹ Kỹ fi tóg Jesus mỹ: “runja tũ ã nĩ,” he mũ, “kỹ ã hỹn hẽ ri kenh mũ, ã tỹ goj ror tỹ goj ên run jé? Téj jagy ti nĩ, poço ti,” he fi tóg ti mỹ.

¹² “Êg jóg'jóg ve tỹ Jacó vỹ poço tag han, kỹ ag tóg ti goj kron, ti krê ke gé, ti mễg ke gé. ã mỹ ti kãfór nĩ, hã kỹ ã mỹ goj ror tỹ goj run sór mũ?” he fi tóg mũ, Jesus mỹ.

¹³ Kỹ Jesus tóg fi mỹ: “ã tỹ goj tag kron kỹ ã tóg kãnhmar kron mãn sór mũ,” he mũ.

¹⁴ “Isỹ ã mỹ goj nĩm kỹ ã tóg kron pir han kar kỹ há nĩ ha, kron mãn sór ke tũ ã nĩ sir. ã kãki tóg goj ror han ke mũ, sỹ ã mỹ goj nĩm ke ti. Kỹ goj tag vỹ ã ter ke tũ han ke mũ, ha vemnĩ,” he tóg, Jesus ti.

¹⁵ Kỹ fi tóg ti mỹ: “inh mỹ nĩm gé, goj tag ti,” he mũ. “Kỹ sóg tag ki run mãn ke tũ nĩ ha, kỹ sóg kron sór mãn ke tũ nĩ ha,” he fi tóg.

¹⁶ Hã ra Jesus tóg fi mỹ: “kỹ ã mén jé prẽrnĩ ge, ti mré inh venh kãtĩg nĩ,” he mũ fi mỹ.

¹⁷ “Hã ra sóg mén tũ nĩ,” he fi tóg. “Hỹ,” he tóg, Jesus ti. “Mẽn tũ ã nĩ, ki hã ã tóg tó mũ.

¹⁸ ã mén ag vỹ ù tỹ 5 (ke) ja nĩgtĩ, kỹ ã tỹ ùri ùn mré nĩ ên pi(jé) tỹ ã mén nĩ. Ki hã ã tóg tó mũ,” he tóg, Jesus ti.

¹⁹ Kỹ fi tóg Jesus mỹ: “Topẽ vĩ tó jafã vỹ tỹ ã nĩ, vég isóg nĩ nĩ,” he mũ. “Kỹ inh mỹ tag tó, ha mẽ. Êg jóg'jóg ve ag vỹ tag ki Topẽ mré vēmén tĩ ja nĩgtĩ, pãnónh tag kri, kỹ êg tóg ùri ke tĩ gé.

²⁰ Hã ra tóg ãjag mỹ há tũ nĩ, tag, ãjag tỹ tỹ Judeu nỹtĩn kỹ. “Jerusalém tá êg Topẽ mré vēmén ke mũ, Jerusalém tá êg tóg ti mỹ: ùn mág vỹ tỹ ã nĩ, henh ke mũ,” he ãjag tóg tĩ. Ti hỹn hẽ tá há nĩ, êg tỹ Topẽ mré vēmén ke ti?” he fi tóg, Jesus mỹ

²¹ Hã ra Jesus tóg fi mỹ: “ha mẽ, sỹ ã mỹ nén kãmén ke ti,” he mũ. “Kãnhmar ãjag tóg pãnónh tag kri êg jóg tỹ Topẽ mré vēmén mãn ke tũ nĩ, kỹ êg Jerusalém tá ti mré vēmén mãn ke tũ nĩ gé.

²² Topẽ mré ãjag tóg vēmén sór ti, hã ra ãjag tóg ãjag tỹ ùn mré vēmén mũ ki kagtĩg nỹtĩ. ãjag jãvo êg tóg ti ki kanhró nỹtĩ, ù tỹ vẽn kar krenkren han ke ên tỹ tỹ Judeu krê'krê ag kã ù nũn kỹ.

²³ Kãnhmar vẽn kar vỹ Topẽ mré vēmén há han ke mũ. Kakó ti nĩ ha, kurã tag. Kỹ ù tỹ ti mré vēmén mũ ag vỹ Topẽ kuprĩg tỹ jagrẽ nỹtĩ, hã kỹ ag tóg ti mré vēmén há han ke mũ, êg jóg mág mré. ù tỹ ge hã jãvãnh ti mũ, êg jóg mág ti, ag tỹ ti mré vēmén jé, ti mỹ: “ùn mág vỹ tỹ ã nĩ,” he jé,” he tóg.

²⁴ “Êg pi(jé) Topẽ vég tĩ, hã ra tóg êg mré nĩ nĩ. Kỹ, êg tỹ ti mré vēmén sór kỹ êg tóg ti kuprĩg tỹ jagrẽ nỹtĩnh mũ, êg tỹ ti mré vēmén há han jé, êg tỹ ti vég tũ ra. Êg tỹ ti mỹ: “ùn mág vỹ tỹ ã nĩ,” hen kỹ êg tóg ti mỹ ón ke tũ nĩ, vẽn vĩ há há tó jé êg tóg ke mũ,” he tóg mũ, Jesus ti, fi mỹ.

²⁵ Kỹ fi tóg ti mỹ: “hỹ,” he mũ. “Messias ên vỹ kãtĩg ke mũ, êg tỹ ù to: Cristo, he mũ ên. Ên vỹ êg mỹ kãmén kãn ke mũ, tag kar ti,” he fi tóg ti mỹ.

²⁶ Kỹ Jesus tóg fi mỹ: “inh hã vễ,” he mũ. “Û tỹ ã mré vēmén jẽn hã vễ,” he tóg.

²⁷ Ti tỹ fi mỹ tag tó kỹ ti mré mũ tĩ ag tóg ti tá junjun mũ. Kỹ ag tóg ti tỹ fi mré vēmén vég mũ, kỹ tóg ag mỹ e tãvĩ tĩ. Hã ra ag tóg ti mỹ nén ù tó tũ nĩgtĩ.

“Ā t̄y ne mẽ s̄or n̄ē, fi ki?” he t̄u ag t̄og n̄igt̄i. “Ā t̄y ne t̄o n̄ē, fi m̄y?” he t̄u ag t̄og n̄igt̄i gé.

²⁸ Hã ra fi t̄og ã runja ré k̄y ti m̄ũ, ã jamã ra. K̄y fi t̄og ã n̄igja tá ke ag m̄y:

²⁹ “m̄ũ n̄y, ù ve jé,” he m̄ũ. “Inh m̄y t̄og s̄y n̄én han ja t̄o kãn. Ti m̄y t̄y Cristo t̄u n̄i v̄y?” he fi t̄og ag m̄y.

³⁰ K̄y ag t̄og fi mré kãmũ m̄ũ sir, ti ve jé.

³¹ Fi t̄og kar k̄y ti mré m̄ũ t̄i ag t̄og Jesus m̄y “v̄ējēn ti ko ra,” he m̄ũ.

³² Hã ra t̄og ag m̄y: “ijēn v̄y n̄i n̄i, hã ra t̄og ãjag jēn ri ke t̄u n̄i,” he m̄ũ.

³³ K̄y ag t̄og jagnē m̄y: “ũ n̄y ti m̄y v̄ējēn n̄im h̄yñ?” he m̄ũ.

³⁴ Hã ra Jesus t̄og: “ijēn to ken hã v̄ē, hã v̄y: t̄y is̄y Topē rãnrãj han kãn ke, he m̄ũ, is̄y ù t̄y inh jēnēg m̄ũ ěn v̄i han ke, he m̄ũ gé,” he t̄og, Jesus ti.

³⁵ “Ājag m̄y ti kysã t̄y 4 (ke) n̄i ver, ěg t̄y ěg jakré kanē venh ke ti. Ha Sicar tá kãmũ m̄ũ ag vigv̄ē. Ūri ag t̄og inh ke ge s̄or m̄ũ, k̄y ag t̄og inh m̄y ěg jakré t̄og n̄y ěn ri ke n̄yt̄i.

³⁶⁻³⁸ Fi m̄y s̄og Topē v̄i t̄o, k̄y fi t̄og ã mré ke ag m̄y t̄o. Hã ra s̄og ãjag m̄y: “ha ag m̄y t̄o mãn, ag t̄y inh ki ge jé,” he m̄ũ. K̄y ãjag t̄og ù jakré kym ri ke han m̄ũ, ãjag t̄y Sicar tá ke ag t̄y inh ki ge m̄ũ ven k̄y. “Ū v̄y krãn t̄i, kar k̄y ù v̄y ti kanē m̄ag t̄i,” he ěg t̄og t̄i. Ki hã t̄o v̄ē, tag, ěg t̄y ěprã ke ag t̄y inh ki genh ke to jykren k̄y. K̄y ù t̄y ag m̄y t̄o mãn m̄ũ m̄y t̄og sér t̄i, ti t̄y ag t̄y inh ki ge m̄ũ ven k̄y. Ā rãnrãj kaja vég t̄og m̄ũ sir. Hã ra ù t̄y ag m̄y t̄o ven ja ěn m̄y t̄og sér t̄i gé, ag t̄y inh ki ge m̄ũ ti. Ā rãnrãj kaja vég ti t̄i gé,” he t̄og, Jesus ti, ã mré m̄ũ t̄i ag m̄y.

³⁹ Hã ra ũn t̄ytã ěn fi t̄og ã mré ke kar ag m̄y: “inh m̄y t̄og s̄y n̄én han ja t̄o kãn,” he ja n̄i, Jesus to. K̄y ag t̄og Jesus ki ge m̄ũ, fi v̄i to.

⁴⁰ K̄y ag t̄og Jesus tá junjun m̄ũ sir. K̄y ag t̄og ti m̄y: “t̄ig t̄ug n̄i. ěg mré n̄imn̄i,” he m̄ũ. K̄y t̄og ag mré kurã régre t̄ug m̄ũ.

⁴¹ K̄y ù t̄y h̄en ri ke ag t̄og ti ki ge m̄ũ sir, ti v̄i to.

⁴² Ūn t̄ytã ěn fi m̄y ag t̄og: “ã v̄i tugr̄in ěg t̄og ti ki ge m̄ũ,” he m̄ũ, “hã k̄y ěg t̄og ũri ti v̄i m̄ēg m̄ũ, k̄y ěg t̄og ti v̄i tugn̄in ti ki ge p̄ē han k̄y n̄yt̄i, ũri. Ti ki kanhr̄o ěg t̄og n̄yt̄i ha. V̄ēnh kar kren han t̄i ěn v̄ē m̄y,” he ag t̄og m̄ũ, ũn t̄ytã ěn fi m̄y. Hã k̄y Samaria tá ke t̄y h̄en ri ke ag v̄y Jesus ki ge k̄y n̄yt̄i.

Jesus t̄y pã'i k̄osin t̄y há' he

⁴³ Jesus t̄y Samaria tá ke ag mré kurã régre t̄ug kar t̄og ga t̄y Galiléia ra t̄i m̄ũ sir.

⁴⁴ “Ū t̄y Topē v̄i t̄o ti ěn jamã tá ke ag ne t̄og Topē v̄i t̄o t̄i ěn to é he t̄i,” he ja t̄og n̄i, Jesus ti, hã k̄y t̄og kór há ra t̄i m̄ũ, Galiléia ra.

⁴⁵ Hã ra ag t̄og, ti t̄y tá jun k̄y (ag t̄og) ti m̄y v̄i há han m̄ũ. Ti ve ja ag t̄og n̄i, Jerusalém tá, festa t̄y Páscoa ěn tá, k̄y ag t̄og ti t̄y tá n̄én hyn han ja ěn ve kãn. Hã k̄y ag t̄og ti m̄y v̄i há han m̄ũ.

⁴⁶ K̄y Jesus t̄og ěmã t̄y Canã ra t̄ig mãn m̄ũ, ga t̄y Galiléia tá ěmã t̄y Canã ěn ra. Tá t̄og goj t̄y vinho han ja n̄igt̄i. ěn tá cidade t̄y Cafarnaum v̄y kakó n̄i.

Cafarnaum tá pã'i m̄ag t̄og n̄igt̄i. Ti k̄osin v̄y kaga n̄y n̄i.

⁴⁷ K̄y t̄og m̄ēg m̄ũ, Jesus t̄y Judéia tá kãt̄ig ja ti, ti t̄y Galiléia tá jun ja ti, pã'i m̄ag ěn ti. K̄y t̄og ti venh kãt̄i m̄ũ. “Inh mré inh k̄osin venh kãt̄ig,” he t̄og m̄ũ, Jesus m̄y. “Kaga jagy t̄og n̄y, k̄y t̄og inh m̄y ti ter ha mẽ ti. Ā m̄y ti t̄y há' henh ke t̄u?” he t̄og, pã'i m̄ag ti Jesus m̄y.

⁴⁸ Hã ra Jesus t̄og ti m̄y: “is̄y ěg t̄y n̄én han v̄anh han m̄ũ ve s̄or ãjag t̄og m̄ũ, ãjag t̄y h̄en ri ke m̄un inh ki ge jé,” he t̄og, Jesus ti.

49 Hã ra pã'i ên tóg Jesus ti mÿ: “vó,” he mû. “Kuri inh mré tÿg, ti ter tũ nĩ jé,” he tóg.

50 Kÿ Jesus tóg ti mÿ: “ha ã hã tÿg,” he mû. “Há tóg nĩ ha, ã kósin ti,” he tóg. Kÿ tóg Jesus vĩ tag kri fi kÿ tĩ mû sir, pã'i ên ti.

51 Ti tÿg kÿ tóg ã camarada ag kato tẽ mû. Tÿ vaj kÿ ke vë. Ti ãn tá ag tóg kãmũ mû, kÿ ag tóg ti mÿ: “ã kósin tóg há' hé huri,” he mû sir.

52 Kÿ tóg ag mÿ: “ti rã tÿ hẽ kã sa ra há' hé?” he mû. Kÿ ag tóg ti mÿ: “rãké tá, meio dia pãte ke sĩ,” he mû. “Ën kã ti rÿg tóg tũ' he mû,” he ag tóg ti mÿ.

53 Hora ên kã Jesus tóg ti mÿ: “ã kósin vÿ há nĩ,” he ja nĩ. Kÿ tóg to jykrén há han mû sir, pã'i ên ti, kÿ tóg Jesus ki rã mû, ti prũ fi ke gé, ti krẽ kar ag ke gé, ti camarada kar ag ke gé.

54 Jesus vÿ ga tÿ Judéia tá kãtÿg kÿ ga tÿ Galiléia ra tÿg ja nĩ. Ën kã tóg milagre ên han, kÿ tóg tÿ régre nÿtĩ, ti tÿ ãg tÿ nén ù han vãn hÿn han mû ti.

5

Jesus tÿ ùn grĩn grĩn kÿ nÿ tÿ há' he

1 Tag pãte Judeu ag tÿ festa há ù tóg kejẽn kutẽ mû, kÿ Jesus vÿ Jerusalém ra tĩ mû.

2 Tá goj nig tóg nÿgtĩ, cidade jy ró jãnkã rã hã, jãnkã ên jijin hã vÿ: carneiro jo jãnkã, he mû. Goj pénin tóg ãn tÿ 5 (ke) nÿtĩ, vënh kaga jo ãn. Goj ên jyjy hã vÿ: Betesda, he mû.

3 Ën tá vënh kaga tÿ hën ri ke ag vÿ nÿtÿgtĩ, ùn kyvó ag, ùn tÿg vãn h ag, ùn grĩn grĩn kÿ nÿtĩ ag ke gé.

4 Goj vãn vãn he mû jãvãn h kÿ ag tóg nÿtĩ. Kejẽn Topẽ tÿ jënẽ jafã vÿ goj ki rã kÿ tÿ vãn vãn he han mû. Ën kã ù tÿ kãrãn vén mû ên tóg há' he tĩ. Vënh kaga kar tÿ há' he ti tĩ, goj vãnvor mû ên, ù tÿ ki ge vén mû ag kar tÿ.

5 Ën tá ù tóg nÿgtĩ, ùn kaga ù. Kaga nĩ ki tóg 38 (ke) anos han mû.

6 Kÿ Jesus tóg tá jun kÿ ti vég mû, ti tÿ tá nÿn kÿ. Hã ra tóg ki kanhró nĩ, ti tÿ vãsÿ tá kaga nÿ ki. Kÿ tóg ti mÿ: “ã mÿ há' he sór tũ?” he mû.

7 Hã ra tóg ti mÿ: “vó,” he mû. “Hã ra tóg tũ tĩ, ù tÿ goj kãkã inh fẽg ke ti,” he tóg, ùn kaga ti. “Goj tÿ vãn vãn he kÿ ag tóg inh jo kã ra ge tĩ, ijo tá jun kÿ,” he tóg, ùn kaga si ên ti.

8 Kÿ Jesus tóg ti mÿ: “jẽg ra,” he mû. “Ã cama va tÿg,” he tóg, Jesus ti, ùn kaga si ên mÿ.

9 Vësÿmér tóg há' he mû, kÿ tóg ã cama va tĩ mû sir. Vënhkãn ke kurã ki ke vë, Jesus tÿ ti han mû ti.

10 Ti tÿ vënhkãn ke kurã ki ã cama va tÿg kÿ pã'i ag tóg ti mÿ: “vënhkãn ke kurã ki ãg tóg nén ù va tÿg ke tũ nĩ vë,” he mû. “Ã tÿ nén han ke tũ han ã tóg mû,” he ag tóg ti mÿ.

11 Kÿ tóg ag mÿ: “ù tÿ isÿ há' he mû ên vÿ inh mÿ: “ã cama va tÿg,” he ja nĩ, hã kÿ sóg va tĩ mû,” he tóg.

12 Kÿ ag tóg ti mÿ: “ù nÿ ã mÿ: “ã cama va tÿg,” hé?” he mû.

13 Hã ra tóg ki kagtÿg nĩ, ù tÿ ti tÿ há' he mû ên ti. Jesus vÿ ti tÿ há' he kar tÿg ja nĩ, vësÿmér. E ag nÿtĩ, goj ên tá, vënh kaga ag, hã kÿ Jesus tóg ag ré kÿ tÿg ja nĩ. Kÿ ùn kaga ja ên tóg ti jiji mẽ ja tũ nĩ.

14 Kar kÿ Jesus tóg ti ve mãn mû, Topẽ jo ãn tá. Kÿ tóg ti mÿ: “ha vé,” he mû. “Ã tÿ inh há' hé. Topẽ vĩ mranh mãn sór tÿg nĩ, ã tÿ ti vÿ mranh mãn mû ra ã

tóg ã kaga kãfór venh ke mũ, ha vemní,” he tóg ti mý, Jesus ti, ã tỹ ù tỹ há' he ja ên mý.

15 Hã ra tóg tí mũ, pã'i ag mý Jesus ti tó jé.

16 Ký ag tóg ti tén sór mũ sir, ti tỹ vènhkán ke kurã ki ùn kaga ên tỹ há' hen ký.

17 Hã ra Jesus tóg pã'i ag mý: “inh panh vỹ rãnrhãj ký nĩ nĩ, êg jóg mág ti,” he mũ. “Ký sóg ver ti kóm isũ han ke mũ gé,” he tóg, Jesus ti, pã'i ag mý.

18 Ký ag tóg ti to jũ jagy han mũ. “Ti tén jé êg tóg ke mũ,” he ag tóg mũ sir jagnê mý. Vènhkán ke kurã ên ki tóg ã tỹ nén han ke tũ ên han ja nĩ, Jesus ti, Judeu ag jykre tovãnh ký. Hã ra tóg Topê to: “inh panh vỹ tỹ ti nĩ,” he mũ gé. Ti tỹ veso: “Topê ri ke inh nĩ,” he vè. Hã ký ag tóg ti to jũ mũ, pã'i ag.

Jesus tỹ ã tỹ tỹ Topê kósin nĩ kãmén

19 Ký Jesus tóg ag mý vènh kãmén mũ. “Ki hã sóg tó mũ, ha mẽ,” he tóg. “Êg jóg mág kósin vỹ ã pir mý nén ù han ki kagtũg nĩ. Á panh vég ti tí, êg jóg mág kósin tí, ký tóg ã tỹ ã panh ki nén vég mũ ên hã han tí. Êg jóg mág tỹ nén han mũ ên hã han tóg tí gé, ti kósin tí.

20 Êg jóg mág vỹ ã kósin to há távĩ nĩgtĩ, hã ký tóg ti mý ã tỹ nén han mũ ên ven kãn mũ. Ti tỹ nén han mũ ù ve ãjag huri, hã ra ãjag tóg ti kãfór venh ke mũ ver, ha vemní, ký tóg ãjag mý e tũnh mũ.

21 Tag ve jé ãjag tóg ke mũ, ha mẽ. Êg jóg mág tóg ùn kãgter mũ ag rĩnrĩn mãn tí, ag rĩnrĩn nỹtĩ jé. Ên ri ke han jé tóg ke mũ gé, ti kósin tí. Á tỹ ùn rĩn mãn mũ ên rĩn mãn jé tóg ke mũ.

22 Ký êg jóg mág vỹ vènh kar jykre tugnyĩm ke mũ, hã ra tóg ã kósin mý tag tovãnh.

23 Ti mý tóg tag tovãnh, vènh kar tỹ ti to: “ùn mág vỹ tỹ ti nĩ,” he jé, ag tỹ êg jóg mág to: “ùn mág vỹ tỹ ti nĩ,” he mũ tag ri ke. Û tỹ ti kósin mý: “ùn mág vỹ tỹ ã nĩ,” he jãvãnh ký tóg êg jóg mág mý tag tónh ke tũ nĩ gé. Ti hã vỹ ã kósin jêñê ja nĩgtĩ. Inh hã vè, ti kósin tí,” he tóg, Jesus ti.

24 “Ájag mý sóg tag tó mũ, ha mẽ. Ki hã sóg tó mũ, ha mẽ. Û tỹ inh vỹ jëmëg mũ ên vỹ ter ke tũ nĩ, rĩr krỹg ja tũ ve jé tóg ke mũ, ti tỹ ù tỹ inh jêñêg mũ ên ki rã ký jên ký. Ên to tóg jũnh ke tũ nĩ, Topê tí. Ti ter ke vè vè, hã ra tóg ter ke tũ nĩ.

25 Ki hã sóg tó mũ, ha mẽ. Kãnhmar ùn kãgter ký nỹtĩ ag vỹ Topê kósin vỹ mẽnh ke mũ, ký ùn tỹ ti vỹ mëg mũ ag vỹ rĩnrĩr mãn ke mũ. Kakó távĩ ti nĩ ha, ag rĩnrĩr mãn ke kurã tí.

26 Inh panh vỹ ã pir mý vènh kar rĩnrĩr han ki kanhró nĩ, hã ra tóg inh mý ã jykre tag nĩm gé, sỹ vènh kar rĩnrĩr han mãn jé gé, isỹ tỹ ti kósin nĩn ký.

27 Ký tóg inh mý: “êprã ke kar jykre tugnyĩm nĩ,” he ja nĩgtĩ, isỹ tỹ êprã ke fi kósin nĩn ký.

28 Tag hỹn tóg ãjag mý e tí, sỹ ãjag mý: “vènh kar rĩnrĩr han jé sóg ke mũ,” hen ký. Sỹ ke há vè, hã ra. Kejên ùn kãgter mũ kar ag vỹ inh vỹ mẽnh ke mũ, ký ag tóg ãjag kej tá kãpa kãn ke mũ.

29 Ký ùn tỹ vènh jykre há han mũ ag vỹ rĩnrĩr mãn ký rĩr krỹg ja tũ ên venh ke mũ, jãvo ùn tỹ vènh jykre pãno han mũ ag rĩnrĩr mãn sĩ han ký nũgme kí vár kãn ke mũ,” he tóg, Jesus ti.

Jesus tỹ vènh kãmén mũ

30 Kĩ tóg ag mĩ: “inh pi(jé) isỹ vėsóg ki nén to jykrén mũ ên han tĩ,” he mũ, Jesus ti. “Inh panh tỹ inh mỹ nén tó mũ ên hã tó sóg tĩ, isỹ vênh kar jykre tugnỹm ken kỹ. Hã kỹ sóg ki hã tó tĩ, isỹ vėsóg ki to jykrén tũ nĩn kỹ. Ủ tỹ inh jênêg mũ ên tỹ inh mỹ nén tó mũ ên hã tó sóg tĩ, hã kỹ tóg há kar nĩ,” he tóg.

31 “Kỹ isỹ vėsó: “êg jóg mág vỹ inh jênê, inh panh ti,” henh mũ ra ãjag tóg inh mỹ: “ã ón nê,” henh ke mũ vê.

32 Ủ vỹ iso: “Topê vỹ ti jênê,” he mũ. Hã ra tóg ki hã tó mũ, ủ tỹ iso tag tó mũ ti.

33 Kỹ ãjag tóg João ki jêmê sór ja nĩ gé, hã kỹ ãjag tóg ti mỹ vênh vĩ jênê ja nĩgtĩ. Kỹ tóg ãjag mỹ inh kãmén há han ja nĩgtĩ gé.

34 Hã ra tóg inh mỹ tỹ nén ù tũ nĩ, êprã ke tỹ iso: “Topê vỹ ti jênê,” henh kỹ. Hã ra sóg ãjag mỹ João vĩ tó mũ, ãjag tỹ ti vĩ kri fi jé, ãjag tỹ inh ki ge jé, ãjag krenkren jé,” he tóg, Jesus ti.

35 “João vỹ ãjag mỹ lampião gru ri ke ja nĩ, ãjag mỹ kurã sĩ han kỹ, ti tỹ ãjag mỹ Topê vĩ kãmén ja nĩn kỹ. Kỹ tóg ãjag mỹ sér tí ja nĩ, hã ra tóg kurã e han tũ nĩ.

36 João vỹ ãjag mỹ inh kãmén ja nĩ, hã ra nén ủ vỹ inh kãmén tí gé, kỹ tóg João vĩ kãfór nĩ. Inh panh vỹ inh mỹ: “êprã ke ag tỹ nén han vãnh hyn han nĩ, milagre ti,” he ja nĩ, hã kỹ sóg hyn han tĩ. Isỹ milagre hyn han mũ tag vỹ inh kãmén há han tí gé. ãjag tỹ milagre tag vigven kỹ ãjag tóg ki kanhrãn ke mũ vê, êg jóg mág tỹ inh jênê jan ki, inh panh ti.

37 Kar kỹ êg jóg mág vỹ, ủ tỹ inh jênêg mũ ên vỹ inh kãmén tí gé. Ti vĩ jêmêg tũ ãjag nỹtĩ, kỹ ãjag tóg ti vég tũ nĩ gé.

38 Kỹ ãjag tóg ti vĩ to jykrén há han tũ nĩ gé, ãjag tỹ inh ki ge sór tũ nỹtĩn kỹ. Ti hã vỹ inh jênê.

39 Topê vĩ to ke ãjag tóg tĩ. Há ti nĩ, tag ti. “Êg tỹ Topê vĩ rá to ken kỹ êg hỹn rĩr krỹg ja tũ venh ke mũ,” he ãjag tóg tĩ. Inh hã vỹ ki rán kỹ nĩ, ha mẽ, hã kỹ ki ve há han nĩ, vênh rán ki,” he tóg.

40 “Hã ra ãjag tóg inh ki ge sór tũ nĩ. ãjag tỹ inh ki ge kỹ nỹtĩ ra ãjag rĩnrĩr kỹ nỹtĩnh mũ vê,” he tóg, Jesus ti.

41 “Êprã ke ag tỹ inh mỹ vĩ há han tũ ra tóg inh mỹ tỹ nén ù tũ nĩ.

42 Hã ra sóg ãjag jykre ki kanhró nĩ. ãjag pi(jé) Topê to há nỹtĩ’.

43 ãjag mỹ sóg: “êg jóg mág vỹ inh jênê,” henh kãtĩg ja nĩ, hã ra ãjag tóg inh vĩ mẽ sór tũ nỹtĩ. Ủ tóg kejên ãjag mré vēmén kãtĩg ke mũ, Topê tỹ ti jênêg tũ (hã) ra. Ên vĩ jêmê jé ãjag ke mũ, ha vemnĩ.

44 Inh ki ge sór tũ ãjag nỹtĩ, ãjag tỹ êprã ke ag vĩ jêmên kỹ. Êprã ke ag tỹ ãjag mỹ vĩ há han kỹ tóg ãjag mỹ sér tí. Kỹ ãjag tóg Topê tỹ ãjag mỹ nén tónh ke mũ mũ êkrêg tũ nĩgtĩ. “Inh jykre mỹ ti mỹ há nĩ vỹ?” he sór tũ ãjag nĩ.

45 ãjag hỹn iso: “ti hỹn êg to vĩ kónãn sór mũ, êg jóg mág mỹ,” he tí. Hã tũ vê. Ủ tỹ ãjag to vĩ kónãn ke mũ hã vỹ tỹ Moisés nĩ, ãjag tỹ ù to: “ti hỹn êg to há tãvĩ nĩ,” he mũ ên ti.

46 ãjag tỹ Moisés vĩ kri fi (hã) ra ãjag tóg inh vĩ kri nĩm ke mũ gé vê vê. Moisés vỹ iso livro han ja nĩ, ha mẽ.

47 Hã ra ãjag tóg ti vĩ rá kri fi sór tũ nĩ, hã kỹ ãjag tóg inh vĩ kri nĩm sór tũ nĩ gé,” he tóg, Jesus ti. Ti tỹ pã'i ag mỹ vênh kãmén hã vê.

6

Jesus tÿ ùn e jÿn

(Mt 14.13-21; Mc 6.30-44; Lc 9.10-17)

1 Tag pãte Jesus tóg kejÿn ga tÿ Galiléia tá goj nig fÿn rãm mũ. Goj ãn jiji hã vÿ: Tiberiades, he mũ.

2 Kÿ ù tÿ hÿn ri ke ag vÿ ti venh kãmũ mũ, ti nón, ùn e tãvĩ ag. Ti tÿ nén han vãn hÿn han mũ ãn ve ja ag tóg nĩ, ti tÿ ùn kagyga ag tÿ há' he mũ ti.

3 Kÿ Jesus tóg pãnóh tá ã mré mũ ti ag mré nĩ nĩ.

4 Festa tÿ Páscoa ãn vÿ kakó nĩ ha, Judeu ag tÿ festa han tĩ ãn ti.

5 Kÿ Jesus vÿ ùn e ãn ki ãvãnh mũ, ù tÿ ti vĩ mÿnh kãmũ mũ ag ki. Kÿ tóg Filipe mÿ: “Ëg hÿn hÿ tá vÿjÿn venh ke mũ, Ëg tÿ ùn e tag ag mÿ ven jé?” he mũ, Jesus ti.

6 Filipe mÿ tóg ke mũ, ti tÿ to ti jykre ve jé. Jãvo Jesus vÿ to jykrén há han huri, ti tÿ nén han ke mũ ãn to.

7 Kÿ Filipe tóg ti mÿ: “Ëg tÿ ùn e tag ag mÿ nén ù sĩ ven jé Ëg hÿn jãnkamy tÿ hÿn ri ke to comprar henh ke mũ, hã ran kãkyn kenh ke mũ, ha vemnĩ,” he tóg, Filipe ti.

8 Kÿ ag mré tĩ ù tóg, André he mũ ãn tóg, Simão Pedro jãvy ãn tóg Jesus mÿ:

9 “kyrũ ù tóg cevada tÿ ãmĩ tÿ 5 (ke) ma kãtĩg ja nĩ, kãkufár régre mré,” he mũ. “Hã ra tóg tÿ nén ù tũ pÿ nĩ, vÿjÿn sĩ tag. E tãvĩ ag nÿtĩ,” he tóg mũ, André ti.

10 Hã ra Jesus tóg: “ag mÿ: “nĩgnĩ ra,” hé,” he mũ. Kÿ ag tóg nĩgnĩ mũ. Tá tóg re gÿnh nĩ, hã kÿ ag tóg tá nĩgnĩ kÿ nÿtĩ. Ûn tÿ 5 mil (ke) ag hÿn tá nÿtĩ, Ëg tÿ ag tãvĩ tón kÿ, hã ra fag tóg tá nÿtĩ gé, gĩr tÿ hÿn ri ke ke gé.

11 Ag nĩgnĩ kÿ Jesus tóg ãmĩ ãn mãg mũ, kÿ tóg Topê mÿ: “há ti nĩ,” he mũ. Kÿ tóg ag mÿ vÿnh kãpópãm mũ sir, kãkufár ãn ke gé. Kÿ vÿnh kar vÿ ag tÿ nén ko sór mũ ãn ko mũ sir. Sĩ tũ tóg nĩ, vÿjÿn ti.

12 Ag funfór nÿtĩn kÿ Jesus tóg ã mré mũ ti ag mÿ: “ag tÿ ko ja tũ ãn génh mÿjÿg, ti vãgfor tũ nĩ jé,” he mũ.

13 Kÿ ag tóg kÿj tÿ 12 (ke) fãn mũ, cevada tÿ ãmĩ tÿ 5 (ke) ãn ke tÿ, vÿnh e ãn tÿ ko kar kÿ.

14 Kÿ tóg ag mÿ e tĩ, ag tÿ Jesus tÿ milagre tag han mũ ven kÿ. Kÿ ag tóg ti to: “Topê vĩ tó tĩ ãn hã vÿ,” he mũ. “Ëg tÿ ùn jãvãnh mũ ãn hÿn tóg,” he ag tóg, Jesus to.

15 Hã ra Jesus vÿ ki kanhró nĩ, ag tÿ nén han sór mũ ti. Ag tÿ Jesus tÿ pã'i mág tÿ rei han sór vÿ. Tag ki kanhró tóg nĩ, Jesus ti. Hã kÿ tóg ã pĩr mÿ tĩ mũ, pãnóh ra, vÿnh péju jé.

Jesus tÿ goj nig kri tĩ (Mt 1422-33; Mc 645-52)

16 Kutyg ke mũ ra ti mré mũ ti ag tóg goj nig ra mũ mũ.

17 Barco kãra ge kÿ ag tóg goj fÿn rãm sór kÿ Cafarnaum ra mũ sór mũ. Kejÿn tóg kuty pÿ nÿ ha, hã ra Jesus tóg ag to vÿn ke ja tũ nĩ ver.

18 Kÿ vãhã kóho jũ vÿ kãtĩ mũ, kÿ goj vÿ krém ke mũ.

19 Mũ sĩ han ja ag nĩ, 5 (ke) quilômetros, hÿn, ke tũ nĩ kÿ 6 (ke) quilômetros, goj kri. Vãhã ag tóg Jesus vëg mũ sir, ti tÿ goj kri tĩg kÿ. Ag barco ki tóg jun mũ. Kÿ ag kanê tóg jÿrũn ke mũ.

20 Hã ra Jesus tóg ag mÿ: “inhã hã vÿ, mũmÿg tũg nĩ,” he mũ.

21 Kÿ tóg ag mÿ sér tĩ, kÿ tóg barco kãra rã mũ sir, ag mré. Ti tÿ ag mré nĩn kÿ ag tóg kãnhmar junjun mũ, kafã ù tá.

Vēnh kar t̄y Jesus ve sór

22 Hã ra vēnh e ēn v̄y kafã ù tá n̄yt̄i ver. T̄y vaj k̄y ag tóg Jesus jãvãnh m̄ũ, tá. Ti jãvãnh k̄y ag tóg: “barco pir v̄y kã n̄y ja n̄i, kuty k̄y,” he m̄ũ. “K̄y ti mré m̄ũ t̄i ag v̄y barco ēn kãra ge k̄y m̄ũ ja n̄i, hã ra tóg ag mré t̄ig ja tũ n̄i,” he ag tóg m̄ũ sir jagnē m̄y, ùn e ēn ag. Tag tó m̄ũ ra ag tóg Jesus vég tũ n̄i gé.

23 K̄y barco ù tóg ki junjun m̄ũ, cidade t̄y Tiberiades tá kãmũ ù. Vēnh e ēn tá ag tóg junjun m̄ũ. Tá Jesus v̄y ěm̄i to Topē mré v̄i ja n̄i, kar k̄y tóg vēnh e ēn m̄y vēnh kãpópãm ja n̄i.

24 Barco t̄y tá junjun m̄ũ ra ag tóg kãra ge k̄y m̄ũ m̄ũ sir, Cafarnaum ra, ti ve jé. “Ki ti tũ n̄i, ti mré m̄ũ t̄i ag v̄y ki tũgtũ n̄i gé. M̄ũ n̄y, ti nón,” he ag tóg m̄ũ sir, ùn e ag, hã k̄y ag tóg ti nón m̄ũ m̄ũ.

Kanhkã tá pão

25 Ag t̄y Cafarnaum tá junjun k̄y ag tóg tá ti vég m̄ũ sir, goj nig kafã ù tá, ùn e ēn ag. K̄y ag tóg ti m̄y: “hē ri ken k̄y ã ki jun?” he m̄ũ.

26 K̄y Jesus tóg ag m̄y: “ha mē, ki hã sóg tó m̄ũ,” he m̄ũ. “Ājag t̄y ěm̄i ko ja tigr̄in ājag tóg inh ve sór m̄ũ,” he tóg. “S̄y milagre hyn han t̄i ēn vég ājag tóg t̄i, hã ra ājag tóg to jykren há han tũ n̄igt̄i,” he tóg. “Ājag tógá n̄yt̄i tag hã ve sór ājag tóg m̄ũ.

27 Ēg t̄y tag ki vējēn vég m̄ũ ēn v̄y kãnhmar tũ' henh ke m̄ũ, k̄y tag tãv̄i to vãsãn sór tũg n̄i. Vējēn ù jé vãsãn n̄i, ěm̄i t̄y ājag r̄inr̄ir pē han m̄ũ ēn jé, ěm̄i kórég vãnh ēn jé. S̄y ājag m̄y ěm̄i ēn n̄im sór vē. Ēg jóg t̄y Topē t̄y inh m̄y vēnh rãnrãj n̄im ja hã vē. Ti t̄y inh m̄y tag tó hã k̄y sóg ājag m̄y n̄im sór m̄ũ, ěm̄i ti. T̄y sóg ěprã ke fi kósin n̄i m̄y;” he tóg ag m̄y, Jesus ti.

28 K̄y ag tóg ti m̄y: “k̄y ěg h̄yn hē ri kenh ke m̄ũ, ěg t̄y Topē jykre han jé?” he m̄ũ.

29 K̄y Jesus tóg ag m̄y: “Topē t̄y ùn jēnēg m̄ũ ēn ki gemn̄i,” he m̄ũ.

30 K̄y ag tóg ti m̄y: “k̄y ã h̄yn ne han ke m̄ũ, ěg t̄y ve k̄y ã ki gen jé?” he m̄ũ. “Ā h̄yn ne han há n̄igt̄i?

31 Ēg jóg'jóg ve ag v̄y kanhkã tá pão ēn kó, maná he m̄ũ ēn, ag t̄y ga kórég ēn m̄i m̄un k̄y. Ag to tag v̄y rán k̄y n̄i, ha mē: “kanhkã tá tóg ag m̄y pão jēnē, ag t̄y ko jé,” he ja tóg n̄i, Topē v̄i t̄y rán k̄y n̄i ki. Jãvo ã h̄yn ěg m̄y ne han ke m̄ũ?” he ag tóg, Jesus m̄y, ti v̄i kãfãn k̄y.

32 K̄y Jesus tóg ag m̄y: “Moisés pi(jé) ājag m̄y kanhkã tá pão pē n̄im ja n̄i,” he m̄ũ. “Ki hã sóg tó m̄ũ, ha mē,” he tóg. “Ū t̄y ājag m̄y kanhkã tá pão pē n̄im m̄ũ ēn v̄y t̄y inh panh n̄i.

33 Topē jam̄i v̄y kanhkã tá kãtére m̄ũ. Ēn v̄y ěprã ke kar r̄inr̄ir han m̄ũ,” he tóg, Jesus ti.

34 K̄y ag tóg ti m̄y: “ěg m̄y ěm̄i ēn n̄im, kurã kar ki,” he m̄ũ.

35 K̄y Jesus tóg ag m̄y vēnh kãmén m̄ũ sir. “Inh hã v̄y t̄y ěm̄i ēn ri ke n̄i, inh hã v̄y ājag r̄inr̄ir han ke m̄ũ,” he tóg. “Ēg t̄y vējēn ko m̄ũ ra ěg tóg kãnhmar kók̄ir mãn' he t̄i, goj kron mãn sór ěg t̄i gé. Ū t̄y iso kãt̄ig m̄ũ ēn m̄y tóg hã ra sér t̄inh m̄ũ, ti t̄y inh ki rá k̄y. Ti m̄y sér t̄i ēn v̄y tũg' henh ke tũ pē n̄i. Is̄y ti m̄y vēnh jykre n̄im ke m̄ũ ēn v̄y vējēn kãfór n̄i,” he tóg, Jesus ti.

36 “Hã ra ājag tóg ājag t̄y inh vég m̄ũ ra inh ki ge sór tũ n̄i.

37 Inh panh v̄y ù ag kuprēg m̄ũ, ag t̄y t̄y is̄u n̄yt̄i jé. Ēn ag v̄y iso kãmũ t̄i. Ū t̄y iso kãmũ t̄i kar ag v̄y inh m̄y há n̄yt̄i. Inh pi(jé) ù m̄y: “inh mré kãt̄i tũg,” henh ke m̄ũ'.

³⁸ Kanhkã tá sóg kátère ja nĩ. Inh pi(jé) isỹ vėsóg ki nén to jykrén mũ ên han sór mũ'. Ủ tỹ inh jêněg mũ tỹ inh mỹ nén tó mũ ên hã han sóg tĩ, hã jé sóg tá kátère ja nĩ.

³⁹ Ti tỹ inh mỹ nén tó mũn hã vễ, ha mẽ. “Isỹ ã mỹ ủa jêněnh ke mũ ên ki rĩr há han nĩ, ag vãgfor tũ nĩ jé,” he ja tóg nĩ, inh mỹ, inh panh ti. Hã kỹ sóg ke mũ. Kỹ sóg ag rĩnrĩn mãn ke mũ, kurã tỹ ẻgno ki.

⁴⁰ Hỹ, tag vỹ inh panh mỹ há nĩ. Ủ tỹ ti kósin to kãmũ mũ ên mỹ tóg rĩr krỹg ja tũ ven ke mũ, inh panh ti, ủ tỹ inh ki ge kỹ nỹtĩ ag kar mỹ. Kỹ sóg kurã tỹ ẻgno ki ag rĩnrĩn mãn kãn ke mũ, ha vemnĩ,” he tóg, Jesus ti. Tĩ tỹ Judeu ag mỹ vễnh kãmén hã vễ.

Ễg tỹ Jesus nĩ konh ke

⁴¹ Kỹ Judeu ag tóg Jesus kato vĩ mũ, ti vĩ to, ti tỹ ag mỹ: “ẻmĩ tỹ kanhkã tá kátère mũ ên ri ke inh nĩ,” hen kỹ.

⁴² “Ti ki kanhró ẻg nỹtĩ,” he ag tóg mũ. “José kósin vễ, Jesus tag ti. Ti han mũ fag ki kanhró ẻg nỹtĩ. Hã ra tóg vếso: “kanhkã tá sóg kátère,” he sór mũ’,” he ag tóg mũ, Jesus to.

⁴³ Hã ra tóg ag mỹ: “iso vĩ kónãn tũg nĩ, jagně mỹ,” he mũ.

⁴⁴ “Inh panh tỹ ủa krĩn mũ ag hã vỹ iso kãmũnh mũ. Ủ tỹ iso kãmũ mũ ag rĩnrĩn mãn jé sóg ke mũ, kurã tỹ ẻgno ki.

⁴⁵ Topẻ vĩ tó tĩ ủ vỹ tag rãn ja nĩ, ha mẽ: “Topẻ vỹ vễnh kar kanhrãn ke mũ,” he ja ti nĩ. Hã kỹ ủ tỹ inh panh vỹ mẻg mũ ag hã tóg iso kãmũnh ke mũ, inh panh tỹ ủa kanhrãn mũ ag.

⁴⁶ Ễprã ke ủ pi(jé) inh panh ve ja nĩ'. Ủ tỹ Topẻ tá kãtĩ mũ ên hã vỹ ti ve ja nĩ, inh,” he tóg, Jesus ti.

⁴⁷ “Sỹ ảjag mỹ ki hã tó mũn hã vễ. Ủ tỹ inh ki rã mũ ên vỹ rĩr krỹg ja tũ ên venh ke mũ.

⁴⁸ Inh hã vỹ ẻmĩ pẻ ri ke nĩ, inh hã vỹ ảjag rĩnrĩr han ke mũ.

⁴⁹ ảjag jóg'jóg ve ag vỹ, ag tỹ ga kórég mĩ mũn kỹ ag tóg kanhkã tá ẻmĩ ên ko ja nĩgtĩ, maná he mũ ên, ag tỹ ko mũ (hã) ra ag tóg kãgter kãn.

⁵⁰ Ủ tỹ ẻmĩ tỹ ẻg rĩnrĩr han mũ ên ko kỹ, ủ tỹ kanhkã tá kátère ja ên ki rã kỹ tóg ter ke tũ pẻ nĩ.

⁵¹ ẻmĩ ên hã vỹ tỹ inh nĩ, inh hã vỹ kanhkã tá kátère, inh hã vỹ ảjag rĩnrĩr han ke mũ. ảjag tỹ ẻmĩ tag ko kỹ ảjag ter ke tũ pẻ nĩ. Isỹ vễnh kar mỹ vẻjẻn nĩm ke hã vễ, hã vỹ: inh nĩ, he mũ. ảjag tỹ inh nĩ kon kỹ ảjag rĩnrĩr nỹtĩnh mũ,” he tóg, Jesus ti.

⁵² Kỹ Judeu ag vỹ jagně mỹ: “ti mỹ ẻg mỹ ã nĩ nĩm ke mũ, ẻg tỹ ti nĩ ko jé?” he mũ. “Vễnhmỹ ti nĩ, tag,” he ag tóg mũ.

⁵³ Kỹ Jesus tóg ag mỹ: “isỹ ảjag mỹ ke há vễ,” he mũ. “ảjag tỹ inh nĩ ko sór tũ nĩn kỹ, ảjag tỹ inh kyvẻnh kron sór tũ nĩn kỹ, ảjag rĩnrĩr ke tũ pẻ nĩ. Tỹ sóg ẻprã ke fi kósin nĩ,” he tóg, Jesus ti.

⁵⁴ “Ủ tỹ inh nĩ ko kỹ, ủ tỹ inh kyvẻnh kron kỹ tóg rĩr krỹg ja tũ venh ke mũ, kỹ sóg ti rĩn mãn ke mũ, kurã tỹ ẻgno ki.

⁵⁵ Inh nĩ vỹ tỹ vẻjẻn pẻ nĩ, inh kyvẻnh vỹ tỹ ẻg tỹ kron jafã pẻ nĩ gé.

⁵⁶ Ủ tỹ inh nĩ kon kỹ, ti tỹ inh kyvẻnh kron kỹ tóg inh ki rã kỹ jẻ nĩ, kỹ sóg ti kãki nĩ gé. Jagně mrẻ ke vỹ tỹ ẻg nỹtĩ.

⁵⁷ Inh panh vỹ rĩr nĩ. Tĩ hã vỹ inh jẻnẻ, ti tũgrĩn sóg rĩr jẻ. Kỹ ủ tỹ inh ki rã mũ ên vỹ isugnĩn rĩr ke mũ gé.

58 Ēmī tȳ kanhkā tá kātére jan hā vē. Ājag jóg'jóg ve ag tȳ ěmī ko ja ěn ri ke tũ ti nĩ. Ag hā vȳ ājag tȳ ko mũ ra kągter kãn ja nĩgtĩ. Ũ tȳ ěmī pẽ tag ko kȳ tóg ter mãn ke tũ nĩ. Inh ki rã to ken hā vē," he tóg, Jesus ti.

59 Cafarnaum tá tóg ag kanhrãn mũ, kȳ tóg ag mȳ vėnh kãmén kãn mũ, Jesus ti, ag tȳ vėnh kanhrãn jafã ěn krēm.

Ũ tȳ ón kȳ Jesus mré mũ tĩ ag tȳ ti tovãnh

60 Kȳ tóg ti mré mũ tĩ ũ ag mȳ e tĩ, ti vĩ ti. Kȳ ag tóg: "ti vĩ vȳ ěg mȳ mẽ jagy tĩ," he mũ. "Mẽ jãvãnh ěg tóg nȳtĩ, ti tȳ ũri ěg mȳ nén tó mũ tag ti," he ag tóg mũ.

61 Hã ra Jesus tóg ki kanhró nĩ, ag tȳ ti vĩ tag to vĩ kónãn mũ ti. Hã kȳ tóg ag mȳ: "tag mȳ ājag mȳ há tũ nĩ?" he mũ.

62 "Kȳ ājag hȳn hẽ ri kenh ke mũ, ājag tȳ hẽn ri ke mũn isȳ kanhkā ra tĩg mãn ven kȳ, isȳ hẽ tá kātére ja ěn ra tĩg mãn kȳ, isȳ tȳ ěpra ke fi kósin nĩn kȳ?" he tóg.

63 "Ũ tȳ ěg rĩnrĩr han mũ vȳ tȳ Topẽ kuprĩg ti nĩ. Isȳ ājag mȳ inh nĩ ko mũ tag to ken hā vē, hā vȳ: inh ki rã, he mũ. Inh vĩ tag ki króm tugrĩn ājag rĩnrĩr nȳtĩnh ke mũ.

64 Hã ra ājag tóg inh vĩ kri fi sór tũ nȳtĩ," he tóg, Jesus ti. Ag jykre ki kanhró tóg nĩ, vėsóg ki, Jesus ti, hã kȳ tóg ke mũ. Ũ tȳ ón kȳ ā ki ge mũ ěn ki kanhró tóg nĩ. Kȳ tóg ũ tȳ pã'i ag mȳ ti tónh ke mũ ěn ki kanhró nĩ gé.

65 Kȳ tóg ag mȳ: "hã kȳ sóg ājag mȳ: "inh panh tȳ ũn krĩn mũ ag hā vȳ iso kãmũnh ke mũ," he ja nĩ," he mũ, Jesus ti.

66 Jesus vĩ tag tugrĩn ti mré mũ tĩ ũ ag tóg ti tovãnh mũ sir, ti mré ag mũ mãn tũ nĩ.

67 Kȳ Jesus tóg ũ tȳ 12 (ke) ag mȳ: "ājag hȳn isovãnh sór mũ gé," he mũ.

68 Kȳ Simão Pedro tóg ti mȳ: "ěg tȳ ā tovãnh mũ ra ěg hȳn ũ mré mũnh ke mũ?" he mũ. "Ā hā vȳ ěg mȳ Topẽ vĩ tó tĩ, kȳ ěg tóg rĩr krȳg ja tũ vėnh ke mũ, ěg tȳ ā vĩ kri fi kȳ.

69 Ā ki ěg ge kȳ nȳtĩ, kȳ ěg tóg ā ki kanhró nȳtĩ. Cristo vȳ tȳ ā nĩ, Topẽ vȳ ěg mȳ ā jėnẽ," he tóg, Pedro ti, Jesus mȳ.

70 Kȳ Jesus tóg ũ tȳ 12 (ke) ag mȳ: "ājag kuprėg inh," he mũ, "hã kȳ ājag tóg tȳ ũ tȳ 12 (ke) nȳtĩ," he tóg. "Hã ra ājag kãmĩ ũn pir vȳ tȳ Japo tũ nĩ jãvo," he tóg, Jesus ti.

71 Ti tȳ Judas ěn tó vē, Simão Iscariotes kósin ěn. ěn vȳ kejėn Jesus tovãnh kȳ pã'i ag mȳ ti ven, ag tȳ ti se jé. Ũ tȳ 12 (ke) ag kã ũ ja vē, Judas ti. Hã ra Jesus tóg ti tȳ nén han ke mũ ěn ki kanhró ja nĩ.

7

1 Tag pãte Jesus tóg ga tȳ Galilėia mĩ tĩ mũ. Ga tȳ Judėia ra tĩg sór tũ ti nĩ ver, ag tȳ Judėia tá ti tén sór nȳtĩn kȳ, Judeu ag pã'i ag.

2 Kejėn tóg Judeu ag tȳ festa há ũ tá krȳg mũ. Festa ěn kurã ki ag tóg pãjõ krēm nȳtĩ, Jerusalém tá.

3 Kȳ Jesus jãvy ag tóg ti mȳ: "ga tȳ Judėia ra tĩg nĩ, Jerusalém ra," he mũ. "Ā tȳ tag hã ki milagre hyn han kȳ tá ā mré ke ag tóg vėg tũ nĩgtĩ, hã kȳ cidade mág ra tĩg nĩ.

4 Vėnh kar tȳ ěg jykre ve jé ěg tóg vėnh kar rĩnve ěg tȳ nén han ke mũ ěn han tĩ. Hã ra ā tóg ag vatãnh tá milagre ti hyn han tĩ. Ag rĩnve han nĩ, ā tȳ nén han ke ti," he ag tóg mũ, Jesus mȳ, ti jãvy ag.

⁵ Ag pi(jé) ti ki ge kŷ nŷtĩ', ti jāvŷ ag, hã kŷ ag tóg ti to é he mŷ.

⁶ Hã ra Jesus tóg ag mŷ: "inh kurã vŷ jun ja tũ nĩ ver, hã kŷ sóg tŷg sór tũ nĩ ver," he mŷ. "Ājag hŷn kurã tũ nŷtĩ, kurã kar hŷn ājag mŷ há nŷtĩ, hã ra sóg kurã nĩ.

⁷ Ū tŷ iso jũ mŷ ag pi(jé) ājag to kórég nŷtĩ', hã ra ag tóg iso kórég nŷtĩ, isŷ ag mŷ: "ājag jykre vŷ kórég pē nĩ," hen kŷ.

⁸ Ha festa venh mŷjēg inhhã. Inh pi(jé) tŷg sór mŷ', ver'. Inh kurã vŷ jun ja tũ nĩ ver," he tóg, Jesus ti, ā jāvŷ ag mŷ.

⁹ Tag tó kar kŷ tóg ver ga tŷ Galiléia mĩ tĩ mŷ.

Jesus tŷ festa venh tĩ

¹⁰ Ti jāvŷ ag mŷ kar kŷ kejēn Jesus tóg tĩ mŷ gé, Jerusalém ra, festa ēn ve je. Hã ra tóg vēnh kar vatánh tá tĩ mŷ, vēnh péju kŷ.

¹¹ Kŷ Judeu ag tóg festa ki ti jāvānh mŷ. Jagnē mŷ ag tóg: "ti hē kā nĩ?" he mŷ.

¹² Vēnh kar vŷ ti to vĩ mŷ. Ū ag tóg ti to: "ūn há vŷ tŷ ti nĩ," he mŷ. Jāvo ū ag tóg: "vó, ēg mŷ tóg ón tĩ," he mŷ gé.

¹³ Hã ra ag tóg jamã hár(a) ti to vēmén tũ nŷgtĩ, pã'i ag kamēg kŷ.

¹⁴ Festa kuju ki Jesus kejēn Topē jo ĩn ra tĩ mŷ, ag kanhrān jé.

¹⁵ Kŷ ti vĩ tóg vēnh kar mŷ e tĩ. "Estudo mág han ja tũ ti nĩ, hã ra tóg ki kanhró pē nĩ," he ag tóg mŷ ti to, pã'i ag.

¹⁶ Kŷ Jesus tóg ag mŷ: "isŷ ājag mŷ Topē vĩ tó vē," he mŷ. "Inh jykre pijé'. Ū tŷ inh jēnēg mŷ ēn jykre hã vē," he tóg.

¹⁷ "Ū tŷ Topē vĩ ki króm sór mŷ ag vŷ ki kanhró nŷtĩnh mŷ, sŷ ājag mŷ ti jykre tó mŷ tag ti ki. Isŷ vēsóg ki sŷ nén tónh ke to jykrén mŷ pijé'," he tóg.

¹⁸ "Ū tŷ ā tŷ vēsóg ki nén to jykrén mŷ ēn tó kŷ tóg tŷ ūn mág nĩ sór mŷ. Hã ra sóg ū tŷ inh jēnēg mŷ ēn to: "ūn mág vŷ tŷ ti nĩ," he mŷ. Hã kŷ ājag tóg ki kanhró nŷtĩ, isŷ ki hã tó mŷn ki. Inh pi(jé) vēnh jykre vēnhmŷ tó tĩ'.

¹⁹ Moisés vŷ ājag jyvēn ja nŷgtĩ. Topē jykre to. Ājag tŷ ne je ti vĩ han tũ nĩ nē? Isŷ ti vĩ ki króm mŷ ra ājag tóg isén sór mŷ'," he tóg, Jesus ti.

²⁰ Kŷ ūn e ēn ag tóg ti mŷ: "krĩ vēnhmŷ ā tóg nĩ." he mŷ. "Ā tén sór tũ ēg nŷtĩ," he ag tóg mŷ, Jesus mŷ.

²¹ Hã ra Jesus tóg ag mŷ: "milagre pir han ja inh nĩ, vēnhkán ke kurã ēn ki, kŷ tóg ājag mŷ e tĩ," he mŷ.

²² "Vēnhkán ke kurã ki ājag tóg gŷr ag gré junun fár kym tĩ gé, Moisés tŷ ājag mŷ: "ti mur pãte kurã tŷ 8 (ke) ki ti kym nĩ," he ja nĩ ēn kŷ. Hã ra ū tŷ ā krē fár kym vén pi(jé) tŷ Moisés nĩ ja nĩ'. Ti jo ke ū ja vē, ū tŷ kym vén ja ti.

²³ Ājag tŷ Moisés vĩ ki króm jé ājag tóg vēnhkán ke kurã ki gŷr fár kym tĩ. Hã ra ājag tóg iso jũ sór mŷ, isŷ vēnhkán ke kurã ki ūn kaga pir tŷ há' hen kŷ.

²⁴ Ōn kŷ ājag tóg iso jũ sór mŷ. Inh jykre vŷ ājag mŷ kórég nĩ ve nĩ. Ājag tŷ to jykrén há han mŷ ra ājag tóg inh jykre há nĩ venh mŷ vē," he tóg, Jesus ti.

Ag tŷ Jesus to: "ti mŷ tŷ Cristo nĩ vŷ?" he

²⁵ Kŷ Jerusalém tá ke ag tóg Jesus to: "ti tén sór ja ag tóg nĩ," he mŷ.

²⁶ "Hã ra tóg jatun mŷ vēnh kar mré vēmén jē nĩ. Ti mŷ ag tóg vĩ tũ nĩ, pã'i ag. Ag mŷ hēn ri ke mŷn ti to: "Cristo vŷ tŷ ti nĩ, Topē tŷ ūn jēnēg mŷ vŷ tŷ ti nĩ," he mŷ vŷ, ēg pã'i ag?" he ag tóg mŷ, Jesus to.

27 “Hã ra ãg tóg ti tỹ hẽn tá kãtĩ mũ ki kanhró nỹtĩ. Cristo ãn kãtĩg kỹ ãg tóg ti tỹ hẽn tá kãtĩg mũ ki kagtĩg nỹtĩnh mũ, kỹ ti hỹn tỹ Cristo tũ nĩ,” he ag tóg mũ, Jesus to.

28 Hã ra Jesus tóg Topẽ jo ãn tá jẽ nĩ, vẽn kar kanhrãn kỹ. Kỹ tóg jamã hár(a) ag kanhrãn mũ. “Ti ki kanhró ãg nỹtĩ, he ãjag tóg ti iso, ón kỹ,” he tóg. “Ti tỹ hẽn tá kãtĩ mũ ki kanhró ãg tóg nỹtĩ gé, he ãjag tóg ti, ón kỹ. ãnh pi(jé) vêsóg ki: ãnh hỹn tĩg mũ, hé! Û tỹ ãnh jẽnẽg mũ ãn vỹ ki hã tó ti. Hã ra ãjag tóg ti ki kagtĩg nỹtĩ, ã tỹ ãnh jẽnẽg mũ ãn ti ki.

29 ãnh hã vỹ ti ki kanhró nĩ. Ti hã tá sóg kãtẽre, ãjag ve jé, ti tỹ ãnh mỹ: “ha ag venh tĩg,” hen kỹ,” he tóg, Jesus ti.

30 Kỹ ag tóg ti se sór mũ, hã ra ag tóg ti vóg tũ pẽ nĩ ver. Ti ter ke kurã vỹ jun ja tũ nĩ ver, hã kỹ ag tóg ag tỹ ti se sór mũ ra ti ség tũ nĩ.

31 Ag jãvo ãn e ag tóg Jesus ki ge mũ. Ti to ag tóg: “ãg mỹ tóg tỹ Cristo nĩ ve nĩ,” he mũ. “Cristo kãtĩg kỹ ti nẽji mũlagre hyn han ke mũ. Jesus tỹ mũlagre hyn han vỹ e nỹtĩ. ãg mỹ tóg tỹ Cristo nĩ,” he ag tóg, Jesus to. Tag tó kỹ ag tóg ti ki ge mũ.

Pã'i ag tỹ Jesus se sór

32 Kỹ Fariseu ag tóg mẽg mũ, ãn e ag tỹ Jesus to nén (ũ) tó mũ ti. Kỹ ag tóg Topẽ tũ ki rĩr ti to pã'i ag mrẽ vẽnẽn mũ, ag tỹ Jesus senh ke to. Kỹ ag tóg polícia ag jẽnẽg mũ, ag tỹ ti se jé.

33 Hã ra Jesus tóg: “ãjag mrẽ sóg nĩ sĩ han ke mũ ver,” he mũ. “Tag pãte sóg tĩg ke mũ, isỹ ã tỹ ãnh jẽnẽg mũ ãn ve jé.

34 ãn kã tóg ãjag tỹ ãnh venh há tĩnh mũ, hã ra ãjag tóg ãnh venh ke tũ nĩ. ãn tá junjun ke tũ ãjag tóg nĩ, isỹ hẽn ra tĩg ke ãn tá,” he tóg.

35 Kỹ Judeu ag tóg jagnẽ mỹ: “ti hỹn hẽ ra tĩg sór mũ?” he mũ. “ãg hỹn hẽ tá ti venh ke tũ nĩ? Ti hỹn hẽn ri ke mũn ga tỹ Grécia ra tĩg sór mũ, tá ãg mrẽ ke ag kanhrãn jé.

36 Ne to ke nẽ, hỹn, hã vỹ: “ãjag tỹ ãnh venh há tóg tĩnh mũ, hã ra ãjag tóg ãnh venh ke tũ nĩ, he mũ tag ti?” he ag tóg, Judeu ag. Jesus vỹ vỹ ag mỹ e ti, hã kỹ ag tóg ki kagtĩg nỹtĩ, ti tỹ nẽn tó mũn ki.

Topẽ kuprĩg tỹ goj ri ke nĩ

37 Vãhã tóg festa tỹ kurã tỹ ãgno tá krỹg mũ. Festa to kurã mág pẽ vẽ, kurã tỹ ãgno ãn ti, hã kỹ ag e tãvĩ nỹtĩ, Jerusalém tá. Kurã ãn kã Jesus tóg jẽ kỹ vẽn kar mỹ prẽr mũ sir. “!..ãjag tỹ goj kron sór kỹ ãnh mỹ to vĩ, isỹ ãjag mỹ goj há ven jẽ..!” he tóg, prẽr kỹ.

38 “!..Topẽ vĩ ki tag vỹ rán kỹ nĩ, ha mẽ: !..ãjag tỹ ãnh ki ge kỹ tóg ãjag kãki goj ror han ke mũ, isỹ ãjag mỹ goj nĩm ke ti..!” he tóg. “!..Kỹ goj tag vỹ ãjag rĩnrĩr pẽ han ke mo..!” he tóg, Jesus ti. Ti tỹ ag mỹ prẽr jan hã vẽ.

39 Jesus tỹ ag mỹ Topẽ kuprĩg tón hã vẽ, hã to tóg: goj, he mũ. Topẽ kuprĩg tỹ tóg ag jagrẽn ke mũ, ã tỹ ti ki ge mũ ag. Festa ãn kã tóg ag mỹ ti jẽnẽ ja tũ nĩ ver, Topẽ kuprĩg ti, ti tỹ ver ã ter kar kỹ rĩr mãn ja tũ nĩn kỹ, ti tỹ ã panh ra tĩg mãn ja tũ nĩn kỹ ver.

Ag tỹ Jesus ki kagtĩg

40 Kỹ Jesus vỹ mẽg mũ ã ag tóg ti to: “Topẽ vĩ tó ti pẽ ãn vẽ,” he mũ.

41 Kỹ ã ag tóg ti to: “Cristo vỹ tỹ ti nĩ, Topẽ tỹ ãg mỹ ãn jẽnẽg mũ ãn vỹ tỹ ti nĩ,” he ti gé. Hã ra ã ag tóg: “Cristo mỹ hỹn ga tỹ Galiléia tá kãtĩ mũ vỹ?” he mũ.

⁴² “Topê vî rá ki tóg: “Davi kósín vỹ tỹ ti nĩ, Cristo ti,” he mũ, “ẽmã tỹ Belém tá ke vỹ tỹ ti nĩ, Davi jamã ẽn tá ke,” he tóg, Topê vî tỹ rán kỹ nĩ ki. Hã kỹ tóg ẽg mũ tỹ Cristo tũ nĩ, Jesus ti, ti tỹ tỹ Galiléia tá ke nĩn kỹ,” he ag tóg.

⁴³ Hã kỹ ag tóg vẽnĥ kãpãm kỹ nỹtĩ, ti tugnĩn.

⁴⁴ Kỹ ag kãmĩ ù ag vỹ ti se sór mũ, hã ra ag tóg ti kãgmĩg tũ nĩgtĩ, ti kamẽg kỹ.

Pã'i ag tỹ Jesus ki ge sór tũ

⁴⁵ Kỹ polícia ag tóg Topê tũ ki rĩr tĩ to pã'i ag to vỹnvỹn ke mũ, Fariseu ag to ke gé, ù tỹ ag jẽgnẽ ja ag to. Kỹ ag tóg ag mỹ: “hỹn, ti?” he mũ.

⁴⁶ Kỹ ag tóg: “hã ra tóg vĩ há tãvĩ han mũ,” he mũ. “Vẽnĥ vĩ tỹ ge mẽ ja tũ ẽg nỹtĩ, hã kỹ ẽg tóg ti kãgmĩ ja tũ nĩ,” he ag tóg mũ, polícia ag.

⁴⁷ Kỹ Fariseu ag tóg ag mỹ: “kỹ ãjag mỹ ti vĩ kri nĩm sór mũ', ti ón mũ ra?” he mũ.

⁴⁸ “Pã'i ù mỹ ti vĩ kri fig mũ'? Vó, ke tũ ẽg nỹtĩ. Fariseu ù tỹ ti vĩ kri nĩm tũ nĩ gé.

⁴⁹ Hã ra ag tóg ki kagtũg nỹtĩ, ù tỹ ti vĩ kri fig mũ ag. Topê vĩ rán ki kagtũg ag nỹtĩ, kỹ Topê vỹ ag mỹ vĩ kónãn ke mũ, ha vemni,” he ag tóg mũ, Fariseu ag.

⁵⁰ Hã ra Nicodemos vỹ ag mré nĩ gé, ù tỹ kuty tá Jesus mré vêmén ja ẽn ti. Ẽn tóg ag mỹ:

⁵¹ “ẽg tỹ ti vóg kónãn sór kỹ ẽg tóg ti ki jẽmẽ vén ke mũ,” he mũ. “Ti tỹ nén han ja to jykren há han jé ẽg tóg ke mũ, ẽg tỹ kar kỹ ti vóg kónãn jé. Topê tỹ ẽg mỹ vẽnĥ jykre nĩm jan hã vẽ,” he tóg, Nicodemos ti.

⁵²⁻⁵³ Hã ra ag tóg ti mỹ: “ã hỹn tỹ Galiléia tá ke nĩ gé', hã kỹ ã tóg ti jy nĩgãn sór mũ,” he mũ. “Topê vĩ ki ve há han nĩ, kỹ ã tóg venh ke mũ. Galiléia tá ke ù vỹ Topê vĩ tónh ke tũ pẽ nĩ, Topê vỹ tá ke ù jẽnẽnĥ ke tũ pẽ nĩ,” he ag tóg, Nicodemos mỹ. Kỹ ag tóg ãjag jamã ra mũ mũ sir, pã'i kar ag.

8

Jesus tỹ ùn tỹtã kórég fi mỹ vẽnĥ pãte fón

¹ Hã ra Jesus tóg pãnónh tỹ Oliveiras ra tĩ mũ, tá nũr jé.

² Kurã ke ra tóg Jerusalém ra tũg mãn kỹ (tóg) Topê jo ìn tá nĩ mãn mũ sir, kỹ vẽnĥ kar ag tóg ti vĩ mẽnh kãmũ mũ. Tá nĩ kỹ tóg ag kanhrãn mũ.

³ Kỹ Topê vĩ to professor ag vỹ ùn tỹtã fi pére kãmũ mũ, Fariseu ag ke gé. Ûn tỹtã ẽn fi ve ja ag tóg nĩ, fi tỹ fi mén tũ mré nỹn kỹ. Vẽnĥ kuju kã ag tóg fi fẽg mũ.

⁴ Kỹ ag tóg Jesus mỹ: “Senhor,” he mũ. “Fi ve ẽg tóg, fi tỹ fi mén tũ mré nỹn kỹ,” he ag tóg, Jesus mỹ.

⁵ “Moisés vỹ ẽg mỹ: “ãjag kãmĩ ù fi tỹ fi mén tũ mré nỹn kỹ fi tén nĩ, pó tỹ fi pin kỹ,” he ja nĩ. Jo ã hỹn hẽ ri ke tĩ?” he ag tóg, Jesus mỹ.

⁶ Ag tỹ ón kỹ ti vĩ mẽ sór vẽ, ag tỹ ti vĩ to ti se jé. Hã ra Jesus tóg pãnh ke kỹ nĩ kỹ ga kri rán mũ, ã nĩgé tỹ. Vĩ tũ tóg nĩ.

⁷ Hã ra ag tóg ti tovãnh sór tũ nĩ. Kỹ tóg vãhã ag ki ẽvãnh kỹ ag mỹ: “ãjag kãmĩ ù hỹn Topê vĩ mranh ja tũ nĩ ver,” he mũ. “Ẽn hỹn fi pin vén ke mũ, pó tỹ,” he tóg mũ.

⁸ Kỹ tóg pãnh ke mãn kỹ ga kri rán mãn mũ.

⁹ Kỹ ti vĩ tóg ag mỹ e tũ. Ag kar vỹ ãjag tỹ Topê vĩ mranh ja ẽn mĩ ẽkrég mũ sir, hã kỹ ag tóg mũ mũ sir. Ûn si há ag vỹ mũ vén mũ, kar kỹ vẽnĥ kar ag. Komẽr hã ag tóg mũ kãn mũ. Vãhã Jesus vỹ ã pir mỹ nĩ, fi mré. Fi hã vỹ tá jẽ nĩ, ti mré.

10 Kŷ tóg fi ki êvãnh kŷ fi mŷ: “ag hê ra kagáv, ù tŷ ã kato ví mŷ ag?” he mŷ. “Ag mŷ ã vóg kónãnh tũ?” he tóg. Ag mŷ kar kŷ tóg fi mŷ ke mŷ.

11 Hã ra fi tóg ti mŷ: “hŷ,” he mŷ. Kŷ tóg fi mŷ: “kŷ inh hŷn ã vóg kónãnh ke tũ nĩ gé,” he mŷ. “Ha tŷg, jatun mŷ. Hã ra Topê ví mranh mân sór tũg nĩ,” he tóg, Jesus ti. Ûn tŷtá kórég ên fi vóg kónãnh sór ja tũ ti nĩ, Jesus ti.

Jesus tŷ jêngrê ri ke nĩ

12 Kŷ Jesus tóg Topê jo ãn krêm nĩ kŷ vênh kar kanhrãnh mân mŷ. “Jêngrê ri ke inh nĩ,” he tóg, “Ãjag tŷ inh mré mŷn kŷ ãjag tóg kuty mŷ mŷ tũ nŷgtĩ. Jêngrê mŷ ãjag tóg mŷgtĩ, kurã mŷ. ãjag tŷ vênh jykre tãg han ke to ken hã vê,” he tóg.

13 Hã ra Fariseu ag tóg ti ví kafãnh mŷ, kŷ ag tóg ti mŷ: “vênh kãmén ã tóg mŷ ha,” he mŷ. “Êg tŷ vênh kãmén kŷ êg tóg ón kŷ ví tí,” he ag tóg mŷ sir.

14 Hã ra Jesus tóg ag mŷ: “hŷ,” he mŷ. “Vênh kãmén inh tí, hã ra sóg ki hã tó tí,” he tóg mŷ. “Isŷ hê tá kãtŷg mŷ ên ki kanhró inh nĩ, isŷ hê ra tŷg ke mŷ ti ke gé,” he tóg. “Hã ra ãjag tóg inh ki kagtŷg nŷtĩ, isŷ hê tá kãtŷg mŷn ki, isŷ hê ra tŷg ken ki ke gé. Êprã ke ãjag nŷtĩ.

15 Kãnhmar ãjag tóg ù to: “jykre kórég ti nĩ,” henh ke mŷ. ãjag jãvo sóg vênh kar jykre to nênh ù tó tũ nĩ ver.

16 Isŷ hã ra ù jykre to nênh ù tó sór mŷ ra sóg tó há han ke mŷ vê. Inh pi(jé) inh pir mŷ nênh ù to jykrén tí. Û tŷ inh jêñêg mŷ vŷ inh mré nênh ù kar to jykrén tí.

17 Kŷ ùn régre ag tŷ vênh ví pir han kŷ tóg ãjag mŷ tŷ ki hã ke nĩ. Hã kŷ tóg rán kŷ nĩ, Topê ví tŷ rán kŷ nĩ ki.

18 Hã kŷ sóg vênh kãmén mŷ, hã ra inh panh tóg, ù tŷ inh jêñêg mŷ tóg inh kãmén mŷ gé. Régre êg nŷtĩ, ù tŷ inh kãmén mŷ ti,” he tóg, Jesus ti.

19 Kŷ ag tóg ti mŷ: “hŷn, ã panh ti?” he mŷ. Kŷ Jesus tóg ag mŷ: “ãjag pi(jé) inh ki kanhró nŷtĩ,” he mŷ. “Hã kŷ ãjag tóg inh panh ki kagtŷg nŷtĩ gé,” he tóg. “Ãjag tŷ inh ki kanhró nŷtĩ ra ãjag tóg inh panh ki kanhró nŷtĩnh mŷ vê gé,” he tóg, Jesus ti.

20 Ti tŷ ag mŷ vênh kãmén hã vê. Topê jo ãn krêm nĩ kŷ tóg ag mŷ vênh kãmén mŷ, ti tŷ jãnkamy vin jafã rá hã nŷn kŷ. Kŷ pã'i ag tóg ti se sór mŷ, hã ra ag tóg ti kãgmŷg tũ nŷgtĩ, ag tŷ ti kamêg kŷ. Ti ter ke kurã vŷ jun ja tũ nĩ ver, hã kŷ ag tóg ti tŷ hê ri ke tũ nĩ ver.

Jesus tŷ hên ra tŷg ke

21 Kŷ tóg ag mŷ kãmén mân mŷ. “Tŷg jé sóg ke mŷ, kŷ ãjag tóg inh ve sór ke mŷ, hã ra ãjag tóg inh venh ke tũ nĩ. Inh vég tũ ki ãjag tóg kãgter ke mŷ, kŷ ãjag tŷ Topê ví mranh ja ên vŷ ãjag kãkã nĩ nĩ. ãjag pi(jé) isŷ hên ra tŷg ke mŷ ên ki kanhró nŷtĩ. Isŷ hên ra tŷg ke mŷ ên ki kagtŷg ãjag nŷtĩ,” he tóg, Jesus ti.

22 Kŷ ag tóg jagnê mŷ: “ti mŷ hên ri ke mŷn vêsén sór mŷ, hã kŷn mŷ: “ãjag pi(jé) isŷ hên ra tŷg ke mŷ ên ki kanhró nŷtĩ,” he mŷ?” he ag tóg, Jesus to.

23 Hã ra Jesus tóg ag mŷ: “êprã ke vŷ tŷ ãjag nŷtĩ,” he mŷ. “Jãvo sóg tŷ kanhkã tá ke nĩ. Ga tag ki ke tŷ ãjag nŷtĩ, jãvo inh pi(jé) tŷ ga tag ki ke nĩ.”

24 Hã kŷ sóg ãjag mŷ: “kãgter jé ãjag tóg ke mŷ, kŷ ãjag tŷ Topê ví mranh ja ên vŷ ãjag kãkã nĩ nĩ,” he ja nĩ. Ha vé, ãjag tŷ inh ki ge sór tũ nŷn kŷ tóg ãjag kãkã nŷnh ke mŷ, ãjag tŷ Topê ví mranh ja ên ti. “Û ên vŷ tŷ inh nĩ,” he ja inh nĩ ãjag mŷ. Tag to: hŷ, hemnĩ,” he tóg, Jesus ti.

25 Kŷ ag tóg ti mŷ: “tŷ ã ù nĩ?” he mŷ. Kŷ Jesus tóg: “vãsŷ sóg ãjag mŷ tó huri, isŷ ãjag mré vêmén vén kŷ,” he mŷ. “Ãjag mŷ sóg vênh kãmén tŷgtĩ.

²⁶ Hã ra sóg ãjag mý tó kãn ja tũ nĩ ver, sý ãjag mý vĩ kónãn ke vỹ kã nĩ gé ver. Hã ra sóg ù tỹ inh jẽnẽg mũ ên vĩ hã tó tĩ, ti tỹ inh mý tó ja kar ên ti. Ki hã tóg tó tĩ, ù tỹ inh jẽnẽg mũ ti,” he tóg, Jesus ti.

²⁷ Hã ra tóg ag tỹ to jykrén tũ nĩgtĩ, ti tỹ ag mý ã panh tó mũ ra.

²⁸ Kĩ Jesus tóg ag mý ke mãn mũ. “Ãjag tỹ ka to isa kũ, kũ ãjag tóg inh ki kanhrãn ke mũ,” he tóg. “Tỹ sóg êpra ke fi kósin nĩ. Kurã ên kã ãjag tóg ki kanhró nýtĩnh ke mũ, isý tỹ ùn ên nĩ ti. Inh pi(jé) vêsóg ki nén ù to jykrén tĩ’. Inh panh tỹ inh mý nén tó mũ ên hã tó sóg tĩ. Hã ki kanhró ãjag nýtĩnh ke mũ, kurã ên kã, ãjag tỹ ka to isa kũ.

²⁹ Kĩ ù tỹ inh jẽnẽg mũ vỹ inh mré nĩ nĩ. Ti mý nén há nĩ ên hã han sóg tĩ, hã kũ tóg inh mré nĩ nĩ,” he tóg, Jesus ti.

³⁰ Ag tỹ ti vỹ tag mẽ kũ ùn e ag vỹ ti ki ge mũ, kurã ên kã.

Jesus tỹ êg tar han ke

³¹ Kĩ Jesus tóg ù tỹ ti ki ge kũ nýtĩ ag kanhrãn mũ. “Inh vỹ tovãnh tũg nĩ,” he tóg. “Kũ ãjag tóg tỹ inh mré ke pẽ nýtĩ.

³² Kĩ ãjag tóg Topẽ vỹ pẽ ki kanhró nýtĩnh mũ. Topẽ vỹ pẽ ki kanhró tugrĩn ãjag tóg patrão kórég ve mãn ke tũ nĩ,” he tóg.

³³ Kĩ ag tóg ti mý: “Abraão krẽkrẽ vỹ tỹ êg nýtĩ,” he mũ. “Êg pi(jé) tỹ ù camarada nýtĩ’, ùri, vãsý ke gé. Ne to ke nẽ, hã vỹ: patrão kórég ve mãn ke tũ ãjag nĩ, he mũ tag ti?” he ag tóg mũ, Jesus mý.

³⁴ Hã ra Jesus tóg ag mý: “ki hã sóg ke mũ, hã kũ sóg tó mũ,” he mũ. “Ãjag tỹ Topẽ vỹ mranh kũ ãjag tóg tỹ ti vỹ mranh jafã nýtĩ, kũ tóg êg tỹ ùn kórég tỹ patrão vég mũ ri ke nĩ.

³⁵ Ti camarada ag pi(jé) ti ãn krẽm êmã nýtĩgtĩ’. Ti kósin hã vỹ ti ãn krẽm nĩgtĩ jãvo.

³⁶ Kũ, Topẽ kósin tỹ ãjag tỹ Topẽ krẽ han kũ ãjag tóg patrão kórég ve mãn ke tũ nĩ ha.

³⁷ Abraão krẽ vỹ tỹ ãjag nýtĩ. Ki kanhró inh nĩ. Hã ra ãjag tóg isén sór mũ, ãjag tỹ inh vỹ to há tũ nýtĩnh kũ.

³⁸ Inh panh tỹ inh mý nén tó mũ ên hã tó sóg tĩ. Inh jãvo ãjag tóg ãjag panh tỹ ãjag mý nén tó mũ ên hã tó tĩ,” he tóg, Jesus ti.

³⁹ Kĩ ag tóg ti mý: “hỹ, Abraão vỹ tỹ êg panh nĩ,” he mũ.

Kĩ Jesus tóg ag mý: “ãjag tỹ tỹ Abraão krẽ nýtĩnh kũ ti jykre han nĩ ge,” he mũ.

⁴⁰ “Hã ra ãjag tóg isén sór mũ. ãjag mý sóg Topẽ vỹ pẽ tó ja nĩ, Topẽ tỹ inh mý nén tó mũ ên ti, hã ra ãjag tóg isén sór mũ. Abraão vỹ tag han ja tũ nĩ.

⁴¹ Vyrmý ãjag panh ù tũ hã han ãjag tóg tĩ,” he tóg.

Kĩ ag tóg Jesus mý: “panh êg nýtĩ, hã vỹ: Topẽ, he mũ. Êg pi(jé) panh tũ nýtĩ,” he ag tóg mũ.

⁴² Hã ra Jesus tóg ag mý: “Topẽ tỹ tỹ ãjag panh nĩ ra ãjag tóg iso há nýtĩnh mũ vẽ,” he mũ. “Inh panh tá sóg kãtère, hã kũ sóg ãjag mré nĩ nĩ. Inh pi(jé) vêsóg ki nén to jykrén kũ kãtère mũ’. Ti hã vỹ inh jẽnẽ.

⁴³ Hã ra ãjag tóg inh vỹ ki kagtũg nýtĩ. Mẽ sór tũ ãjag nýtĩ, hã kũ ãjag tóg ki kagtũg nýtĩ.

⁴⁴ Japo krẽ vỹ tỹ ãjag nýtĩ, kũ ãjag tóg ti tỹ nén to jykrén mũ ên han tĩ. Topẽ tỹ êpra ke ag han ên kã tóg ag kãgtén sór tũgtĩ, Japo ti. Vãsý ti jykre vẽ, kũ tóg ùri tỹ ti jykre nĩ gé ver. Ti pi(jé) ki hã tó tĩ’. Ki hã tó to ti kórég pẽ nĩ, Japo ti. Vẽnh ó vỹ tỹ ti tũ pẽ nĩ. Ón mẽ ti nĩgtĩ, vẽnẽh ón né vẽ. Ti hã vỹ tỹ ùn ón mũ ag panh kar nĩ.

⁴⁵ Ti jāvo sóg ki hã tó tí. Hã ra ājag tóg inh vī kri nīm sór tū nīgtī.

⁴⁶ Inh hỹ ne ki Topē vī mranh? Ha inh mỹ tó. Mranh ja tū sóg nĩ. Hã ra sóg ājag mỹ Topē vī pē tó tí. Ājag hẽ ri ken kỹ inh vī kri fi sór tū nĩ?

⁴⁷ Topē krẽ ag vỹ Topē vī mēg tí. Ājag pi(jé) inh vī jēmẽ sór tí', ājag tỹ tỹ Topē krẽ tū nỹtĩn kỹ," he tóg, Jesus tí, ag mỹ.

Jesus tỹ Abraão kãfór nĩ

⁴⁸ Kỹ Judeu ag tóg ti mỹ: "Samaria tá ke ri ke ã tóg nĩ, ã tỹ ki kagtĩg nĩn kỹ, kỹ ã jagrẽ kórég nĩ gé," he mũ.

⁴⁹ Hã ra Jesus tóg ag mỹ: "inh pi(jé) jagrẽ kórég nĩ'," he mũ. "Inh panh to sóg: ùn mág vỹ tỹ ti nĩ, he tí. Hã ra ājag tóg iso é he tí.

⁵⁰ Inh pi(jé) vēsỹ ùn mág han sór mũ'. Ũ tỹ isỹ ùn mág han ke mũ vỹ nĩ nĩ, ẽn vỹ vẽn kar jykre tugnỹm ke mũ.

⁵¹ Ki hã sóg ke mũ, hã kỹ sóg tó mũ, ha mẽ. Ājag tỹ inh vī kri fi kỹ ājag ter ke tū pē nĩ," he tóg, Jesus tí.

⁵² Kỹ Judeu ag tóg ti mỹ: "jagrẽ kórég ã tóg nĩ," he mũ. "Vãhã tóg ve há tí, ã jagrẽ kórég tí," he ag tóg mũ ti mỹ. "Abraão vỹ ter, kỹ Topē vī tó tí ag kar vỹ kãgter. Hã ra ã tóg ón kỹ: "ājag tỹ inh vī kri nīm kỹ ājag kãgter ke tū pē nĩ," he mũ.

⁵³ Ā mỹ vēsỹ ěg jóg'jóg ve tỹ Abraão kãfór han sór mũ', ã tỹ ěg mỹ: kãgter ke tū ājag nĩ, hen kỹ? Ter ja ti nĩ, Abraão ti, kỹ Topē vī tó tí ag kar vỹ kãgter kãn gé. Vēsỹ ùn mág han kỹ nĩ ve ã tóg nĩ," he ag tóg, Jesus mỹ, Judeu ag.

⁵⁴ Kỹ Jesus tóg ag mỹ: "isỹ vēsỹ ùn mág han kỹ sóg ón kỹ ke mũ ve nĩ," he mũ. "Hã ra inh panh hã vỹ isỹ ùn mág han ke mũ, ājag tỹ ũ to: ěg jóg mág, he mũ ẽn tí.

⁵⁵ Hã ra ājag tóg ti ki kagtĩg nỹtĩ, ājag jāvo sóg ti ki kanhró nĩ. Isỹ ājag mỹ: "ti ki kagtĩg inh nĩ," he mũ ra sóg ājag ón tag ri ke han mũ vẽ, hã ra sóg ti ki kanhró nĩ, kỹ sóg ti vī ki króm tí gé.

⁵⁶ Ājag jóg'jóg ve tỹ Abraão vỹ inh kurã ve sór ja nĩ, kỹ tóg kejẽn vé, kỹ tóg ti mỹ sér pē tí, ti tỹ inh kurã ve kỹ," he tóg, Jesus tí.

⁵⁷ Kỹ Judeu ag tóg ti mỹ: "50 (ke) anos han tū ã nĩ ver, hã ra ã tóg: "Abraão ve inh," he mũ. Vĩ vẽnhmỹ han ã tóg," he ag tóg mũ, Jesus mỹ.

⁵⁸ Hã ra Jesus tóg ag mỹ: "ki hã sóg ke mũ, hã kỹ sóg tó mũ, ha mẽ," he mũ. "Abraão mur tū ra sóg nĩ nĩ," he tóg, Jesus tí.

⁵⁹ Kỹ ag tóg jũgũ mũ, ti tỹ vēsõ: "Topē ri ke inh nĩ," hen kỹ. Hã kỹ ag tóg pó mãn kỹ ti pin sór mũ. Hã ra Jesus tóg Topē jo ĩn kãtã kãkutẽ mũ sir, kỹ tóg tí mũ, vẽnh pēju jé.

9

Jesus tỹ ùn kyvó tỹ há' he

¹ Kejẽn Jesus tóg tĩg kỹ ùn kyvó vég mũ. Ā mur mũn kã tóg kyvó nĩ sir.

² Kỹ ti mré mũ tí ag tóg ti mré ti vég mũ gé. Kỹ ag tóg Jesus mỹ: "ti han mũ fag hỹn Topē vī mranh'," he mũ, "ha kỹ tóg kyvó nĩ'," he ag tóg. "Ti tỹ vēsóg ki Topē vī mranh kỹn mỹ kyvó nĩ vó?" he ag tóg mũ.

³ Kỹ Jesus tóg ag mỹ: "ti tỹ Topē vī mranh to ke pijé'," he mũ. "Ti han mũ fag tỹ Topē vī mranh to ke pijé'," he tóg. "Topē tỹ vẽn kar mỹ ã tỹ nén han sór mũ ẽn ven sór vẽ, ti ki.

4 Isy ũ tỹ inh jēnēg mũ ěn tỹ inh mỹ nén tó mũ ěn han sór vĕ. Ver tóg inh mỹ kurā nĩ, sỹ rānrāj jé. Kānhmar tóg kuty nỹnh mũ, kỹ ũ tóg rānrāj mǎn ke tũ nĩ, iser ke kurā ěn kǎ,” he tóg.

5 “Ver sóg ājag mré tĩg mũ, kỹ sóg ājag mỹ jēngre ri ke nĩ ver,” he tóg, Jesus ti.

6 Tag tó kar kỹ tóg sug mũ, ga kri, kỹ tóg óré sĩ han mũ. Óré ěn tỹ tóg ũn kyvó kanĕ to tĩn mũ.

7 Kỹ tóg ti mỹ: “ha tĩg, goj tỹ Siloé ki vĕnh kype jé,” he mũ. Goj tỹ Siloé to ke hǎ vỹ: “ũ tỹ inh jēnĕ ja,” he mũ, ěg vĩ ki. Kỹ tóg tĩ mũ, ũn kyvó ti. Kỹ tóg tá kǎtĩg kỹ ěvǎnh há han tĩ nĩ sir.

8 Ti tỹ ěvǎnh há han kỹ tóg ti rǎ hǎ nỹtĩ kar ag mỹ e tĩ. Vĕnh kar vỹ ti ki kanhró nỹtĩ, vĕnh kar mỹ tóg: “inh mỹ nén ũ nĩm,” he tĩ ja nĩgtĩ. Kỹ ag tóg, ag tỹ ti ěvǎnh há tag ve kỹ (ag tóg) ti to: “ũ tỹ ěg mỹ: inh mỹ nén ũ nĩm, he tĩ ěn hǎ tũ mỹ?” he mũ.

9 Kỹ ag kǎmĩ ũ tóg: “ti hǎ vĕ,” he mũ. Hǎ ra ũ ag tóg: “ěn ri ke nĩ ve ti nĩ, hǎ ra tóg ěg mỹ tỹ hǎ tũ nĩ,” he mũ gé. Hǎ ra tóg vĕso: “inh hǎ vĕ,” he mũ.

10 Kỹ ag tóg ti mỹ: “kỹ ģ hĕ ri ké, ģ tỹ ěvǎnh há' he jé?” he mũ.

11 Kỹ tóg ag mỹ: “ag tỹ ũ to: Jesus, he mũ ěn vỹ óré han, kỹ tóg inh kanĕ to tĩn, kỹ tóg inh mỹ: “goj tỹ Siloé ra tĩg nĩ, tá vĕnh kupemni,” hé. Kỹ sóg vyr. Vĕnh kupe sóg, kỹ sóg ěvǎnh há' he mũ sir,” he tóg, ũn kyvó ja ti.

12 Kỹ ag tóg ti mỹ: “ti hĕ kǎ jĕ?” he mũ. Hǎ ra tóg ag mỹ: “ha?” he mũ.

Fariseu ag tỹ ũn kyvó ja ki jĕmĕ

13 Kỹ ag tóg Fariseu ag mỹ ti pére mũ mũ, ũn kyvó ja ěn ti.

14 Hǎ ra tóg tỹ vĕnhkǎn ke kurā nĩ. ěn kǎ Jesus tóg óré han kỹ ti tỹ há' he.

15 Kỹ Fariseu ag tóg ti ki jĕmĕ sór mũ gé. “Ą hĕ ri ké, ģ tỹ ěvǎnh há' he jé?” he ag tóg mũ gé. Kỹ tóg ag mỹ: “óré tỹ tóg inh kanĕ to tĩn, kỹ sóg vĕnh kupenh vyr, kỹ sóg ěvǎnh há' he mũ sir,” he mũ, ag mỹ, ũn kyvó ja ti.

16 Kỹ Fariseu ũ ag tóg Jesus to: “Topĕ pi(jĕ) ti jĕnĕ,” he mũ. “Vĕnhkǎn ke kurā ki tóg vĕnhkǎn vǎnh nĩgtĩ, kỹ tóg kórég nĩ,” he ag tóg mũ. Jesus to, Fariseu ũ ag. Hǎ ra ũ ag tóg ti to: “hǎ ra tóg nén ũ há tǎvi han,” he mũ gé. “Ti kórég nĩ ran hỹn tag han ki kagtĩg nĩnh mũ vĕ,” he ag tóg, Fariseu ũ ag. Hǎ kỹ ag vĕnh kǎpǎm kỹ nỹtĩ.

17 Kỹ ag tóg ũn kyvó ja ěn ki jĕmĕ mǎn mũ. “Ti mỹ tỹ ũn há nĩ', ũn kórég mỹ vó?” he ag tóg mũ. “Ą tỹ tóg há' hé mỹr,” he ag tóg.

Kỹ tóg ag mỹ: “inh mỹ tóg tỹ Topĕ vĩ tó jafǎ nĩ,” he mũ, ũn kyvó ja ti.

18 Hǎ ra ag tóg ti vĩ kri nĩm sór tũ nĩ. “Ti mỹ kyvó ja nĩ vỹ?” he ag tóg mũ. Kỹ ag tóg ti han mũ fag jé prĕr mũ.

19 Kỹ ag tóg fag mỹ: “ājag kósin hǎ mỹ?” he mũ. “Ti mỹ ģ mur mũn hǎ kǎ kyvó ja nĩ? Kỹn hỹn hĕ ri ké, ti tỹ ũri ěvǎnh há nĩn jé?” he ag tóg mũ, ti han mũ fag mỹ.

20 Kỹ fag tóg: “hỹ, ěg kósin hǎ vĕ,” he mũ. “Ą mur mũn hǎ kǎ tóg kyvó ja nĩ.

21 Hǎ ra tóg ũri ěvǎnh há nĩ. Hĕ ri ken kỹ? Ha? Ũ nỹ ti han? Ha ti ki jĕmĕmnĩ. Sanh há ti nĩ ha. Ąjag mỹ ti tónh mũ,” he fag tóg, ti han mũ fag.

22 Hǎ ra fag tóg pǎ'i ag kamĕg mũ, hǎ kỹ fag tóg: “ha ti ki jĕmĕmnĩ,” he mũ. Pǎ'i ag vỹ tag tó ja nĩ, Jesus to: “ājag kǎmĩ ũ tỹ ti to: “Cristo vỹ tỹ ti nĩ,” hen kỹ ěg ti kutĕm ke mũ,” he mũ, “ti tỹ tỹ ěg mré ke tũ nĩ jé, ti tỹ ěg mré vĕnhmǎn tũ nĩ jé, ěg vĕnh kanhrǎn jafǎ krĕm,” he ja ag tóg nĩgtĩ.

23 Hã kŷ ũn kyvó ja ěn han mŭ fag vŷ Jesus to nén ũ tó sór tŭ nĩ, hã kŷ fag tóg pã'i ag mŷ: "sanh há ti nĩ ha, ãjag mŷ ti tónh mŭ," he mŭ, fag kósin kyvó ja ěn to.

24 Kŷ ag tóg ũn kyvó ja ěn jé prĕr mǎn mŭ. Kŷ ag tóg ti mŷ: "ker ón hĕ', Topĕ vŷ ã vŷ mĕg mŭ," he mŭ. "Ũ tŷ ã tŷ há' he mŭ ěn vŷ kórég nĩ, Topĕ vŷ mranh ti tĩ," he ag tóg mŭ ti mŷ.

25 Kŷ tóg: "mĕ'," he mŭ. "Ti mŷ Topĕ vŷ mranh tĩ'? Sŷ ki kagtŷg tóg tĩ. Nén ũ pir hã ki kanhró sóg nĩ. Kyvó inh vĕ vĕ, hã ra sóg ěvǎnh há nĩ ha," he tóg, ũn kyvó ja ěn ti.

26 Kŷ ag tóg ti mŷ: "ti hĕ ri ké, ã tŷ há' he jé?" he mǎn mŭ.

27 Hã ra tóg ag mŷ: "ãjag mŷ inh hur tó, hã ra ãjag tóg mĕ sór tŭ nĩ," he mŭ. "Ãjag tŷ ne jé mĕ mǎn sór nĕ? ãjag mŷ ti mré mŭ sór mŭ gé?" he tóg.

28 Kŷ ag tóg ti nyg mŭ. "Ã hã vŷ tŷ ti mré ke nĩ," he ag tóg mŭ. "Jǎvo ěg tóg tŷ Moisés mré ke nŷtĩ," he ag tóg, pã'i ag, ũn kyvó ja ěn mŷ.

29 "Topĕ vŷ Moisés mré vĕmĕn ja nĩ, tag ki kanhró ěg tóg nŷtĩ. Hã ra ěg pi(jé) ěn ki kanhró nŷtĩ'. Ti hŷn tŷ hĕ tá ke nĩ?" he ag tóg, pã'i ag.

30 Kŷ ũn kyvó ja ěn tóg ag mŷ: "mĕ'," he mǎn mŭ. "Ãjag mŷ ti ki kagtŷg nŷtĩ, ti tŷ tŷ hĕ tá ke nŷn ki? Isŷ tóg há' hé mŷr, inh kanĕ tŷ.

31 Hã ra Topĕ tóg ěg vŷ mĕg tŭ nŷgtĩ, ěg tŷ tŷ ti vŷ mranh jafǎ nŷtŷn kŷ. Ũ tŷ Topĕ kamĕg mŭ ěn vŷ hã mĕg ti tĩ. Ũ tŷ ti vŷ ki króm mŭ ěn vŷ hã mĕg ti tĩ, Topĕ ti.

32 Inh mur mŭ kǎ inh kyvó nĩ ja nĩ. Ũ tŷ ge tŷ há' he mŭ tag ve ja tŭ inh nĩ ver. Hã ra tóg isŷ há' hé.

33 Ti tŷ Topĕ tá kǎtŷg tŭ ra tóg nén ũ há han ki kagtŷg nĩ vĕ," he tóg, ũn kyvó ja ti, pã'i ag mŷ.

34 Hã ra ag tóg ti mŷ: "Topĕ vŷ mranh kŷ ã tóg mur, hã ra ã tóg ěg kanhrǎn sór mŭ," he mŭ. Kŷ ag tóg ti kutĕm mŭ, vĕnh kanhrǎn jafǎ krĕm.

Ũn kyvó to comparação

35 Hã ra Jesus tóg mĕg mŭ, ag tŷ ti kutĕm ja ti. Kŷ tóg ti venh tĩ mŭ. Kŷ tóg ti mŷ: "ã mŷ ěprǎ ke fi kósin ěn ki rǎ sór tŭ?" he mŭ.

36 Kŷ tóg Jesus mŷ: "kŷ ũn nĕ ge?" he mŭ. "Sŷ ti ki rǎ sór vĕ," he tóg.

37 Kŷ Jesus tóg ti mŷ: "ti ve ã huri," he mŭ. "Ũ tŷ ã mré vĕmĕn jĕ mŭ hã vŷ tŷ ti nĩ, inh hã vŷ tŷ ti nĩ," he tóg.

38 Kŷ ũn kyvó ja tóg ti mŷ: "Senhor," he mŭ. "Ã ki rǎ kŷ inh jĕ nĩ," he tóg. Kŷ tóg ti krĕm mŷg ke mŭ, Jesus krĕm, ti mŷ: "Topĕ kósin vŷ tŷ ã nĩ," he jé.

39 Kŷ Jesus tóg ti mŷ: "ga tag ki sóg jun, sŷ vĕnh kar jykre tugnŷm jé," he mŭ. "Ũn kyvó ag tŷ ěvǎnh há han jé sóg ke mŭ. Ag tŷ iso jykrén há han ke to ken hã vĕ. Kŷ sóg ũ tŷ ve há han mŭ ag kyvó han ke mŭ gé. Ag tŷ iso jykrén há han ki kagtŷg to ken hã vĕ," he tóg, Jesus ti, ũn kyvó ja ěn mŷ.

40 Hã ra Fariseu ũ ag tóg ti vŷ mĕg mŭ. Kŷ ag tóg ti mŷ: "kŷ ěg mŷ kyvó nŷtĩ gé?" he mŭ.

41 Kŷ Jesus tóg ag mŷ: "ãjag tŷ: kyvó ěg nŷtĩ, ki kagtŷg ěg nŷtĩ," he mŭ hã ra Topĕ tóg ãjag to jŷ tŭ nĩ ver. Hã ra ãjag tóg vĕso: "ěvǎnh há ěg nŷtĩ, ki kanhró ěg nŷtĩ," he tĩ. Hã kŷ ãjag tŷ Topĕ vŷ mranh ja vŷ ãjag kǎkǎ nĩ nĩ," he tóg, Jesus ti, Fariseu ag mŷ.

10

Vēnh mēg tỳ carneiro to comparação

¹ Kĩ Jesus tóg ag mỹ vēnh kāmén mǎn mǔ. “Ki hǎ sóg ke mǔ, hǎ kỹ sóg tó mǔ,” he tóg. “Ēg tỳ ěg mēg tỳ carneiro jy ró han kỹ ěg tóg ti jǎnkā ra rǎ tĩ. Jǎvo ũ tóg kejĕn ró to tǎpny kỹ pǎte rǎ sór tĩ. Ti tỳ carneiro péju sór vē, hǎ kỹ tóg ró to tǎpny kỹ pǎte rǎ sór mǔ.

² Ti jǎvo ũ tỳ carneiro ki rĩr tĩ vỹ jǎnkā ra rǎ mǔ.

³ Jǎnkā ki rĩr tĩ ěn vỹ ti mỹ ró nón tĩ, jǎnkā ti. Kỹ tóg carneiro jygji tó kǎn mǔ sir. Ti vĩ ki kanhró fag nỹtĩ, ti mēg tỳ carneiro fag.

⁴ Kỹ tóg fag jo tĩ mǔ, re ra. Kỹ tóg ǎ mēg fag jé prĕr kǎn mǔ sir, kỹ fag tóg pa kǎn mǔ, ũ tỳ carneiro ki rĩr tĩ ěn mēg fag. Kỹ tóg fag jo tĩ mǔ, kỹ fag tóg ti nón mǔ mǔ sir, ti mēg fag, fag tỳ ti vĩ ki kanhró nỹtĩn kỹ.

⁵ Fag pi(jé) ũ nón mǔnh ke mǔ', fag tỳ ũn ki kagtĩg nón. Ũ jo fag vēnh pigjunh ke mǔ, fag tỳ ũn ki kagtĩg ěn jo. Fag pi(jé) ti vĩ ki kanhró nỹtĩ', hǎ kỹ fag tóg ti jo vēnh pigjunh ke mǔ,” he tóg, Jesus ti.

⁶ Jesus tỳ ag mỹ comparação han vē. Ti mỹ ěg tóg vēnh mēg tỳ carneiro ri ke nỹtĩ, ěg tỳ ti nón mǔnh kỹ. Hǎ ra Fariseu ag tóg ti vĩ to jykrĕn tũ nỹtĩ.

Vēnh mēg to comparação ũ

⁷ Hǎ ra Jesus tóg ag mỹ kāmén mǎn mǔ. “Ki hǎ sóg tó mǔ, hǎ kỹ sóg ke mǔ,” he tóg. “Carneiro jy ró jǎnkā ri ke inh nĩ,” he tóg.

⁸ “Ũ tỳ inh jo kǎmũ ag vỹ tỳ carneiro pigju(g) tĩ ag nỹtĩ ja nĩgtĩ, ũn jũ (ka)mĕ ag nỹtĩ ja nĩgtĩ. Hǎ ra carneiro fag vỹ ag vĩ mĕ ja tũ nỹtĩ.

⁹ Inh hǎ vỹ fag mỹ jǎnkā ri ke nĩ. Ũ tỳ inh ki rǎ mǔ vỹ kren ke mǔ, kỹ tóg ti tỳ jǎnkā ra rǎ ri ke nĩ. Kỹ tóg kǎra rǎ tĩ, kar kỹ tóg kǎkutĕ tĩ gé, ti tỳ vējĕn ve kỹ.

¹⁰ Vēnh mēg tỳ carneiro pigju(g) tĩ ěn vỹ carneiro pigju hǎ jé kǎtĩ tĩ, fag kǎgtĕn jé, fag kókĕn jé. Ti jǎvo sóg fag ki rĩnrĩr há han hǎ jé kǎtĩg, fag tỳ jagtar tũ nỹtĩ jé, fag mỹ sér tĩ jé,” he tóg, Jesus ti.

¹¹ “Ũ tỳ carneiro ki rĩr tĩ ri ke inh nĩ gé, ũn tỳ ki rĩr há ri ke inh nĩ. Ũ tỳ carneiro ki rĩr há han mǔ vỹ ǎ mēg jagfy ter ke mǔ, fag krenkren jé.

¹² Kỹ ũ camarada vỹ tag ri ke tũ nĩgtĩ. Mĩg kamĕg jé tóg ke mǔ, kỹ tóg mĩg ve kỹ vēnhvǎg tĩnh ke mǔ, ǎ patrǎo mēg tovǎnh kỹ, ti camarada ti. Kỹ mĩg vỹ fag kugmĩnh ke mǔ, kỹ fag tóg vēnh kǎpugpón ke mǔ gé, mĩg tugrĩn, carneiro fag. Ti camarada mēg pi(jé)', ti patrǎo mēg vē, hǎ kỹ tóg fag jy nĩgǎn há han tũ nĩ.

¹³ Mĩg ve kỹ tóg vēnh vǎg tĩ mǔ. Jǎnkamy hǎ to tóg rǎnhrǎj jĕ nĩ, hǎ kỹ tóg mĩg kamĕg mǔ.

¹⁴ Ti jǎvo sóg carneiro ki rĩr há han tĩ. Inh mēg ki kanhró sóg nĩ, kỹ fag tóg inh ki kanhró nỹtĩ gé.

¹⁵ Ri ke ti nĩ gé, inh panh mré. Inh ki kanhró tóg nĩ, kỹ sóg ti ki kanhró nĩ gé. Kỹ sóg inh mēg jagfy ter ke mǔ.

¹⁶ Inh mēg ũ vỹ nỹtĩgtĩ gé ver, inh mēg tỳ hĕ tá ke fag. Ājag povo kǎmĩ ke pi(jé)'. Ēn jé prĕr jé sóg ke mǔ gé, kỹ fag tóg inh mré kǎmũnh ke mǔ gé. Inh vĩ mĕ jé fag ke mǔ gé. Inh mēg tỳ tag ki fag mré ke vỹ tỳ fag nỹtĩnh mǔ. Fag kar jy sóg ró pir han ke mǔ, inh mēg kar jy, kỹ sóg inh pir mỹ fag ki rĩr ke mǔ,” he tóg, Jesus ti.

¹⁷ “Inh panh vỹ iso há nĩ, isỹ inh mēg jagfy ter ken kỹ, kar kỹ sóg rĩr mǎn ke mǔ.

18 Iser sór tũ ra ù pi(jé) isén ke mũ vê!. Hã ra sóg fag jagfy ter sór mũ. Iser sór kÿ sóg ter ke mũ. Inh rĩr mǎn sór kÿ sóg rĩr mǎn ke mũ gé, iser kar kÿ. Inh panh tÿ inh mÿ nén tó mũn hã vê,” he tóg, Jesus ti.

19 Judeu ag tÿ ti vĩ tag mẽ kÿ ag tóg vènh kǎpǎm kÿ nÿtĩ mǎn mũ gé.

20 Ûn e tóg ti to: “jagrê kórég ti nĩ, krĩ vènhmÿ ti nĩ, ti vĩ mẽ sór tũg nĩ,” he mũ.

21 Hã ra ù ag tóg: “ũn pi(jé) ã jagrê kórég hã ra vènh vĩ há tó tĩ,” he mũ. “Ûn kyvó tÿ há’ he ki kagtĩg tóg nĩ gé, ùn jagrê kórég ti,” he ag tóg mũ, Judeu ù ag, ù tÿ Jesus to há nÿtĩ ag.

Judeu ag tÿ Jesus tén mǎn sór

22 Kejèn tóg Judeu ag tÿ festa há’ ù tá krÿg mũ. Vǎsÿ ù tÿ Judeu ag kato vǎsǎnsǎn mũ ag vÿ Topê jo ìn kókén ja nĩgtĩ, hã ra Judeu ag tóg kejèn ti ìn han mǎn. Ag tÿ ìn han mǎn to festa hã vê sir. Prÿg kar ki ag tóg festa ên han tĩ. Kusǎg mũ ên kǎ ke ja vê, festa ên ti.

23 Hã ra Jesus tóg venh tũg ja nĩ, kÿ tóg Topê jo ìn mĩ pasa ke tĩ nĩ, Salomǎo tÿ jǎnkǎ ên tá.

24 Kÿ Judeu ag tóg ti venh kǎmũ mũ, ag tÿ ón kÿ ti ki jêmê jé. “ǎ hẽ ri ke kǎ êg mÿ vènh kǎmén há han ke mũ?” he ag tóg mũ. “ǎ mÿ tÿ Cristo nĩ? Topê tÿ êg mÿ ùn jènènh ke mũ ên mÿ tÿ ã nĩ? Ha êg mÿ tó há han,” he ag tóg mũ, ón kÿ.

25 Hã ra Jesus tóg ag mÿ: “ǎjag mÿ sóg hur tó, hã ra ãjag tóg kri nĩm sór tũ nĩ,” he mũ. “Milagre hyn han sóg tĩ gé, inh panh tÿ inh mÿ nén tó ja ên. Ên ve kÿ ãjag tóg inh ki kanhró nÿtĩnh mũ vê.

26 Hã ra ãjag tóg kri fi sór tũ nÿtĩ. ǎjag pi(jé) inh mēg tÿ carneiro ri ke nÿtĩ’, hã kÿ ãjag tóg kri nĩm sór tũ nÿtĩ.

27 Inh mēg fag vÿ inh vĩ mēg tĩ, fag ki kanhró sóg nĩ, hã kÿ fag tóg inh mré mũgtĩ.

28 Fag jagfy sóg ter ke mũ, kÿ fag tóg kǎgter ke tũ nĩ. Mĩg vÿ fag kugmĩnh ke tũ pẽ nĩ gé, isÿ fag jy nĩgǎn kÿ.

29 Inh panh tÿ inh mÿ fag vin mũn hã vê, inh mēg fag. Hã ra tóg vènh kar kǎfór nĩ, inh panh ti. Kÿ ù pi(jé) inh panh tũ ag péju(g) tĩ’, ti tÿ tÿ vènh kar kri ke nĩn kÿ.

30 Inh panh mré sóg tÿ ùn pir nĩ,” he tóg, Jesus ti.

31 Ag tÿ ti vĩ tag mẽ kÿ ag tóg pó tÿ hèn ri ke mǎg mũ sir, Judeu ag, ag tÿ tÿ ti pin kÿ ti tén jé.

32 Hã ra Jesus tóg ag mÿ: “nén ù há hã hyn han ja inh nĩ,” he mũ. “Inh panh tÿ inh mÿ: “tag han ra,” he ja ên hã han inh tĩ. Sÿ nén han ja tÿ hẽ nÿ hÿn ãjag mÿ kórég nĩ’, hã kÿ ãjag tóg isén sór mũ?” he tóg.

33 Hã ra ag tóg ti mÿ: “êg pi(jé) nén ù há to ã tén sór mũ!,” he mũ. “Êprǎ ke vÿ tÿ ã nĩ, êg mré ke vÿ tÿ ã nĩ, hã ra ã tóg veso: “Topê kósin vÿ tÿ inh nĩ,” he mũ. ǎ tÿ Topê to vĩ kónǎn hã vê. Tag to êg tóg ã tén ke mũ, pó tÿ ã pin kÿ,” he ag tóg mũ, Judeu ag.

34 Kÿ Jesus tóg ag mÿ: “Topê vĩ tÿ rán kÿ nĩ ki tag vÿ rán kÿ nĩ, ha mẽ,” he mũ. “Topê vÿ êprǎ ke ag to: “Topê ri ke ãjag nÿtĩ,” he tĩ,” he tóg, Topê vĩ rá ki.

35 Kÿ tóg ù tÿ ti vĩ mēg mũ ên ag mÿ: “Topê ri ke ãjag nÿtĩ,” he ja nĩ, Topê ti. Hã ra tóg ón tũ nĩgtĩ, Topê ti.

³⁶ Hã kÿ tóg vënhmÿ tũ nĩ gé, sÿ ãjag mÿ: Topê kósin vÿ tÿ inh nĩ, hen kÿ. Inh panh vÿ inh kuprêg, kÿ tóg inh jënê gé, isÿ ãjag tá jun jé. Topê to vÿ kónãn pijé', sÿ nén tó mũ tag ti.

³⁷ Isÿ inh panh vÿ ki króm tũ nĩ ra tóg há nĩnh mũ vë, ãjag tÿ inh vÿ kri nĩm sór tũ nÿtí ti.

³⁸ Hã ra sóg ti vÿ ki króm tĩ. Kÿ inh vÿ tÿ ãjag mÿ kórég nĩn kÿ isÿ milagre hyn han mũ ên vemní. Isÿ milagre hyn han mũ ki tóg ve há tĩ, isÿ inh panh ri ke nĩ ti, kÿ inh panh vÿ inh ri ke nĩ gé," he tóg, Jesus ti.

³⁹ Kÿ ag tóg ti vÿ to ti se sór mãn mũ sir, hã ra tóg kren mãn mũ gé.

⁴⁰ Kÿ tóg vënh péju kÿ tĩ mũ, goj tÿ Jordão mãra, Jesus ti. João vÿ ên tá vënh kar kygpég jê ja nĩgti, ti tÿ ag kygpe vén kÿ. Ên ra tóg tĩ mũ sir, Jesus ti, kÿ tóg tá nĩ nĩ, ã mré mũ tĩ ag mré.

⁴¹ Kÿ ù tÿ hën ri ke ag vÿ tá ti venh kãmũ mũ. Jesus to ag tóg jagnê mÿ: "há vé, João vÿ milagre han ja tũ nĩ," he mũ. "Hã ra tóg Jesus kãmén. Tó há han ja tóg nĩ, João tĩ. Ki hã tóg tá ja nĩ, ti tÿ êg mÿ Jesus to nén tó mũ ti," he ag tóg.

⁴² Kÿ tá ù tÿ hën ri ke ag tóg ti ki ge mũ sir.

11

Lázaro ter

¹ Kejën ù tÿ Jesus to há ù tóg kaga nÿ nĩ, cidade tÿ Betânia tá. Ûn kaga ên jÿjÿn hã vÿ: Lázaro, he mũ. Ti ve fi vÿ tÿ Maria fi nĩ, Marta fi ke gé. Betânia tá fag êmã nÿtí gé.

² Maria ên fi vÿ kar kÿ kejën Jesus pën kri nén ger há kujê, kÿ fi tóg fi gãnh tÿ ti pën kykũg mũ gé. Ên fi mré pafa mũ vÿ kaga nÿ.

³ Kÿ ti ve fag vÿ Jesus mÿ vënh vÿ jënêg mũ. Ti mÿ fag tóg: "ã tÿ ù to há nĩ ên vÿ kaga nÿ," he mũ.

⁴ Kÿ Jesus tóg męg mũ. Hã ra tóg ã mré mũ tĩ ag mÿ: "ti pi(jé) vënh kaga tag to ter ke mũ!" he mũ. "Topê vÿ tÿ ùn mág nĩ. Tag vÿ vënh ven ke mũ, ti kaga tugrĩn. Kÿ Topê kósin vÿ tÿ ùn mág nĩ gé. Tag vÿ vënh ven ke mũ gé, ti kaga tugnĩn," he tóg, Jesus ti.

⁵ Jesus vÿ Marta fi to há tãvĩ nĩ, fi jãvy fi to ke gé, Lázaro to ke gé.

⁶ Hã ra Jesus tóg, ti tÿ Lázaro kaga męg mũ ra (tóg ver) ti venh tĩ tũ nĩ. ã tÿ hê tá nĩ ên tá tóg ver kurã régre han.

⁷ Tag pãte tóg ã mré mũ tĩ ag mÿ: "mũ nÿ, ga tÿ Judéia ra," he mũ.

⁸ Kÿ ag tóg ti mÿ: "Senhor," he mũ. "Êg tÿ Judéia tá nÿtĩn kÿ Judeu ag tóg ã pin sór ja nĩ, pó tÿ. Ra tĩ tũg nĩ," he ag tóg ti mÿ.

⁹ Hã ra Jesus tóg ag mÿ comparação han mũ, ti ter ke kurã jun ja tũ to. "Kurã pir vÿ tÿ 12 (ke) hora ke nĩ," he tóg. "Êg tÿ kurã ên ki hën ra mũn kÿ êg tóg krĩm kenh ke tũ nĩ, êg tÿ kurã ve há han kÿ.

¹⁰ Êg tÿ hã ra kuty ra hën ra mũn kÿ êg tóg krĩm ke tĩ, êg tÿ kuty ki nén ù vég tũ nĩn kÿ," he tóg, Jesus ti.

¹¹ Kÿ tóg ag mÿ: "ù tÿ êg to há nĩ ên, Lázaro ên vÿ nũr nÿ," he mũ. "Isÿ ti tÿ mrin ke han tĩg ke nê ha," he tóg.

¹² Kÿ ag tóg ti mÿ: "ti nũr nÿn kÿn kren ke mũ," he mũ.

¹³ Hã ra Jesus tóg ti ter ja tó ja nĩ. Jó ag tóg: "ti nũr vë, ti vënhkán vë," he mũ, ag tÿ ti vÿ mën kÿ.

¹⁴ Kÿ Jesus tóg jamã hár(a) ag mÿ kãmén mũ. "Lázaro vÿ ter huri," he tóg.

15 “Ājag tugrīn tóg inh mǝ sér tǝ, isǝ ti ter ve ja tǝ nǝn kǝ. Ājag tǝ isǝ nén han mǝ ven kǝ ājag tóg inh ki ge há han ke mǝ. Mǝ jé ha, ti ve jé,” he tóg.

16 Kǝ Tomé he mǝ ên, ag tǝ ũ to: “Ũn vēgnig mǝ,” he tǝ ên vǝ ti mré mǝ tǝ ag mǝ: “mǝ jé ha, ti mré, êg tǝ ti mré kǝgter jé,” he mǝ. Kǝ ag tóg mǝ mǝ sir.

Jesus tǝ vēnh kar rǝnrǝ han ke

17 Kǝ ag tóg Betânia tá junjun mǝ. Hǝ ra Lázaro vǝ vēnh kej tá nǝ nǝ. Kurǝ tǝ 4 (ke) vē sir, ag tǝ vēnh kej tá ti fón ja kri.

18 Hǝ ra ag tóg Jerusalém kakó ki nǝtǝ, 3 quilômetros hǝn, êmǝ tǝ Betânia ki.

19 Kǝ Judeu tǝ hén ri ke fag vǝ Marta fi venh kǝmǝ ja nǝ, Maria fi ke gé, fag mré vēser kri fǝ jé.

20 Kǝ Marta fi tóg mēg mǝ, Jesus kǝtǝg ti. Kǝ fi tóg tim ke kǝ ti venh tǝ mǝ. Hǝ ra Maria fi tóg ā ĩn krēm nǝ nǝ.

21 Kǝ Marta fi tóg Jesus kato tē mǝ. “Senhor,” he fi tóg. “Ā tǝ kǝnǝ ra ti ter ke tǝ nǝ vē,” he fi tóg.

22 “Hǝ ra sóg ā ki kanhró nǝ. Ā tǝ Topē mǝ nén ũ to vǝn kǝ tóg ā mǝ nǝm ke mǝ, Topē ti,” he fi tóg, Marta fi, Jesus mǝ.

23 Kǝ tóg fi mǝ: “ā mré ke vǝ rǝr mǝn ke mǝ,” he mǝ.

24 “Hǝ,” he fi tóg. “Vēnh kar rǝnrǝ mǝn ken kǝ tóg rǝr mǝn ke mǝ gé, ki kanhró sóg nǝ. Kurǝ tǝ êgno ki ke vē,” he fi tóg.

25 Hǝ ra Jesus tóg fi mǝ: “inh hǝ vǝ vēnh kar rǝnrǝ mǝn han tǝ,” he mǝ. “Vēnh kar rǝnrǝn mǝ vǝ tǝ inh nǝ,” he tóg. “Ũ tǝ inh ki rǝ mǝ ên vǝ rǝr ke mǝ, ti ter kǝ nǝ (hǝ) ra.

26 Kǝ ũn rǝr jē tóg, ti tǝ inh ki rǝ kǝ (tóg) ter mǝn ke tǝ pē nǝ. Ā mǝ inh vǝ tag kri fig mǝ?” he tóg, Jesus ti.

27 “Hǝ,” he fi tóg. “Cristo vǝ tǝ ā nǝ, Topē kósin ti, ũ tǝ ga kri jun ke mǝ ên ti. Tag vǝ inh mǝ tǝ hǝ nǝ,” he fi tóg, Jesus ti mǝ.

28 Kǝ fi tóg tǝ mǝ, fi jǝvy fi jé prēr jé, Maria fi.

Jesus fǝ

Kǝ Marta fi tóg Maria fi tá jun kǝ fi mǝ: “êg Senhor vǝ jun, kǝ tóg ā ve sór mǝ,” he mǝ.

29 Fi tǝ tag mē kǝ fi tóg tim ke kǝ tǝ mǝ, Jesus ve jé.

30 Hǝ ra tóg êmǝ ên ra rǝ ja tǝ nǝ ver. Ver tóg tá nǝ nǝ, Marta fi tǝ hē tá ti mré vēmén ja ên tá.

31 Kǝ Judeu fag vǝ vég mǝ, Maria fi tǝ tim ke kǝ tǝg mǝ ti. Fi mré kygfǝ jé fag kǝmǝ ja nǝ, Judeu fag. Fag tǝ fi tǝg ve kǝ fag tóg fi nón kǝmǝ mǝ gé. “Fi hǝn ti kej ra tǝg sór mǝ, tá fǝ jé,” he fag tóg mǝ, hǝ kǝ fag tóg fi nón kǝmǝ mǝ.

32 Kǝ Maria fi tóg Jesus tá jun mǝ. Fi tǝ ti ve kǝ fi tóg ti pēn krēm mǝg ke mǝ. Ti mǝ fi tóg: “Senhor,” he mǝ. “Ā tǝ kǝnǝ ra ti ter ke tǝ nǝ vē,” he fi tóg mǝ gé.

33 Kǝ Jesus tóg fi fǝ mǝ vég mǝ, kǝ tóg Judeu tǝ hén ri ke fag vég mǝ gé, fi nón kǝmǝ mǝ fag. Kǝ tóg ti mǝ e tǝvǝ tǝ.

34 “Ti hē kǝ nǝ?” he tóg mǝ sir. Kǝ ag tóg ti mǝ: “mǝ nǝ, ti ve jé,” he mǝ.

35 Kǝ Jesus tóg fǝ mǝ.

36 Kǝ Judeu ag tóg: “ha vé,” he mǝ. “Ti to há tǝvǝ tóg nǝ, hǝ kǝ tóg fǝ mǝ,” he ag tóg.

37 Hǝ ra ag kǝmǝ ũ tóg: “ti tǝ há' he ja tǝ tóg nǝ,” he mǝ. “Ũn kyvó kanē tǝ há' he ja tóg nǝ, ti tǝ hē ri ken kǝ ti tǝ há' he ja tǝ nǝ nē, ti ter tǝ nǝ jé? Ti mǝ tǝ hē ri ke tǝ nǝ vǝ, ti kaga tǝ?” he ag tóg, Jesus to.

Jesus tý Lázaro rĩn mǎn

³⁸ Kĩ tóg Jesus mý e tǎvĩ tí. Kĩ tóg ti tý vènh kej kũ nĩ ãn ra tí mũ. Hã ra ti kej vỹ tý pǎro nor nĩ, kũ tóg pó mág tý nĩfénh kũ nĩ, ti kej nor ti.

³⁹ Kĩ Jesus tóg ag mý: “ha pó tag kunũ,” he mũ. Kĩ Marta fi, ùn ter kũ nĩ ãn ve fi vỹ ti mý: “Senhor,” he mũ. “Ti hỹn ger nỹ ha. Kurã tý 4 (ke) vè ha, ãg tý ti fón ja kri,” he fi tóg mũ.

⁴⁰ Hã ra Jesus tóg fi mý: “ã mý sóg: ã tý inh ki rã há han kũ ã tóg venh ke mũ, Topè tý tý ùn mág nĩ ti, he ja nĩ,” he mũ.

⁴¹ Kĩ ag tóg pó ãn kunũg mũ.

Kĩ Jesus tóg kanhkã ki ãvǎnh mũ. Kĩ tóg: “panh’,” he mũ. “Inh mý tóg há tí. Inh vỹ tag jẽmẽg ã tóg mũ.

⁴² Jẽmẽg ã tóg tí, inh vỹ tí, hã kũ ã tóg sỹ ã mý vỹ tag jẽmẽg mũ gé. Hã ra sóg jamã hár(a) ã mré vỹ mũ, ù tý ki nỹtĩ kar fag tý inh vỹ mẽ jé, fag tý inh ki ge jé, fag tý iso: “Topè tý ti jẽnè vè,” he jé,” he tóg, Jesus ti.

⁴³ Tag tó kar kũ tóg jamã hár(a) prẽr mũ. “!..Lázaro, kuneg..!” he tóg.

⁴⁴ Kĩ ùn ter ja ãn tóg kãtĩg mũ sir, ã kej kãki tóg kãkutẽ mũ sir, mýr, ha mẽ. Ti pẽn vỹ sigse kũ nỹtĩ, ti nĩgé ke gé, kũ ti kakã vỹ pãg kũ nĩ gé. Kĩ Jesus tóg ag mý: “ha ti kava,” he mũ, “ti tĩg jé,” he tóg. Kĩ ag tóg ti kyvǎn kǎn mũ sir.

⁴⁵ Kĩ ù tý Maria fi mré kygfỹ jé kãmũ tý hẽn ri ke fag vỹ Jesus ki ge mũ sir, fag tý Jesus tý ti rĩn mǎn mũ ãn ven kũ.

⁴⁶ Hã ra ù ag tóg Fariseu ag mý tónh mũ mũ, Jesus tý ti rĩn mǎn ja ti.

Ag tý Jesus tén ke to jykrén

(Mt 26.1-5; Mc 14.1-2; Lc 22.1-2)

⁴⁷ Kĩ Fariseu ag tóg mẽg mũ, Jesus tý Lázaro rĩn mǎn ja ti. Topè tũ ki rĩr tí to pǎ'i ag vỹ mẽ kǎn mũ gé. Kĩ ag tóg vènh jyvèn tí kar ag jé prẽr mũ. “Èg hỹn ti tý hẽ ri kenh ke mũ?” he ag tóg mũ, Jesus to. “Milagre tý hẽn ri ke hyn han tóg tí.

⁴⁸ Èg tý ti kato vǎsǎn tũ nĩn kũ tóg ãg mý vènh kar tý ti ki genh ha mẽ tí. Kĩ ãg fóg tý Romano ag vỹ ãg kato vǎsǎnsǎn ke mũ. Topè jo ãn kókén jé ag tóg ke mũ, kũ ag tóg ãg kãgtén kǎn ke mũ gé, ãg fóg tý Romano ag, ha vemnĩ,” he ag tóg, vènh jyvèn tí ag.

⁴⁹ Kĩ pǎ'i ag kãmĩ ù vỹ tý Caifás nĩ. Prỹg ãn kã tóg tý Topè tũ ki rĩr tí to pǎ'i mág nĩ, Caifás ti. ãn vỹ tóg ag mý: “to jykrén há han tũ ãjag nỹtĩ,” he mũ.

⁵⁰ “Tag to jykrén nĩ, ha mẽ. ùn pir ter ke tóg kórég nĩ, hã ra tóg povo kãgter kǎn kórég jakrêm nĩ. Kĩ ti hỹn ãg povo jagfy ter ke mũ, Jesus ti,” he tóg, Caifás ti.

⁵¹ Hã ra tóg vèsóg ki tag to jykrén ja tũ nĩ. Prỹg ãn ki tóg tý Topè tũ ki rĩr tí to pǎ'i mág nĩ, hã kũ Topè kuprĩg vỹ ti krĩn ja nĩ, ti tý Jesus to: “ãg povo jagfy tóg ter ke mũ,” he jé, Caifás ti.

⁵² Hã ra Judeu ag tǎvĩ jagfy ke pijé'. Topè krẽ kar jagfy ke ja vè. Ti tý vènh kar tý ùn pir han sór ja vè, Jesus ti, hã jé tóg ãg jagfy ter ja nĩ, ù tý povo kar kãmĩ ti ki genh ke mũ ag kar jagfy.

⁵³ Pǎ'i ag tý tý vèmén kar kũ ag tóg ti tén ke to jykrén mũ sir.

⁵⁴ Hã kũ Jesus tóg vènh pèju kũ tí mũ, ga kórég ra, ãmã tý Efraim ra. Judeu ag mĩ tóg tĩg mǎn tũ nĩ sir. Efraim hã tá tóg nĩ nĩ ver, kũ ti mré mũ tí ag vỹ ti mré tá nỹtĩ gé.

⁵⁵ Hã ra Judeu ag tỹ festa tỹ Páscoa há ù vỹ kakó tí ha. Kỹ ù tỹ hẽn ri ke ag tóg Jerusalém ra mũ mũ, Páscoa ên ve jé. To há ag tóg ra mũ mũ, vênh jãnhkrigkrig jé, Judeu ag jykre ki.

⁵⁶ Tá ag tóg Jesus jãvãnh mũ, Topê jo ãn tá nỹtĩ ký. Kỹ ag tóg jagnẽ mỹ: “ti ã mỹ hỹn hẽ ri ke mũ?” he mũ. “Ti mỹ hỹn festa to kãtĩg ke mũ vỹ?” he ag tóg mũ, jagnẽ mỹ.

⁵⁷ Hã ra Topê tũ ki rĩr tí to pã'i ag vỹ vênh kar mỹ vênh vĩ jẽnẽ ja nĩgtĩ, Fariseu ag mré hã. “Ajag tỹ ti ve ký êg mỹ tónh kãmũmũ,” he ja ag tóg nĩ, vênh kar mỹ. Ag tỹ ti se sór vẽ, hã ký ag tóg ke mũ.

12

Betânia tá

(Mt 26.6-13; Mc 14.3-9)

¹ Festa tỹ Páscoa to hã ke vẽ sir, kurã tỹ 6 (ke) vỹ jun nỹ ha. Kỹ Jesus tóg Betânia ra tĩg mãn mũ, Lázaro jamã ra, ùn rĩr mãn mũ ên jamã ra.

² Tá fag tóg Jesus mỹ festa han mũ. Kỹ Marta fi tóg vễjẽn ki rĩr mũ. Lázaro vỹ Jesus mré nĩ nĩ, mesa to.

³ Kỹ Maria fi tóg nén ger há ma kãtĩ mũ, garrafa fór, ùn kaja e. Ên tỹ fi tóg Jesus pẽn kri kujẽg mũ, ký fi tóg ã gãnh tỹ kykũg mũ, ti pẽn ti. Kỹ ger há ên tóg ãn kar ên kri rũm ke mũ.

⁴ Kỹ tóg Judas Iscariotes mỹ e tĩ, ù tỹ Jesus mré mũ ên ag kã ù tag mỹ, ù tỹ pã'i ag mỹ Jesus ven ke mũ tag mỹ. Fi tỹ ger há tỹ ti pẽn to tĩn ký tóg ti mỹ e tĩ, ký tóg fi to:

⁵ “fi tỹ ger há ên fón ke vẽ vẽ, jãnkamy tỹ hẽn ri ke to,” he mũ. “Fi tỹ ùn jagãgtar ag mỹ jãnkamy ên kã vênh kãpópãm jé vẽ vẽ,” he tóg mũ, Judas ti.

⁶ Hã ra tóg tag tó, ti tỹ Jesus mỹ jãnkamy ki rĩr ký. Hã ra tóg ti jãnkamy pēju(g) tí. Hã ký tóg fi to tag tó ja nĩ, Judas ti. Ti tỹ ùn jagãgtar ag to jykrẽn ja pijé'. Ti tỹ jãnkamy ên mãn sór ja vẽ.

⁷ Hã ra Jesus tóg ti mỹ: “fi to vỹ tũg,” he mũ. “Fi tỹ nén ger há ên nĩm han ja vẽ, fi tỹ iser jé ãnh kri kujẽn jé, isỹ ãnh kej kãkã nỹ jé. Ki hã fi tóg han ja nĩ.

⁸ Ûn jagãgtar ag vỹ ajag mré nỹtĩ, tũ' henh ke tũ ag tóg nỹtĩ. Ag jãvo sóg kãnhmar ajag mré nĩ mãn ke tũ nĩ,” he tóg, Jesus ti.

Ag tỹ Lázaro tén sór

⁹ Kỹ Judeu tỹ hẽn ri ke ag vỹ mẽg mũ, Jesus tỹ Betânia tá nĩ ti, ký ag tóg ti venh kãmũ mũ. Hã ra ag tóg Lázaro ve sór mũ gé, ùn rĩr mãn mũ ên ti.

¹⁰ Pã'i ag tóg Lázaro tén sór mũ gé sir.

¹¹ Judeu tỹ hẽn ri ke ag vỹ Jesus ki ge ký nỹtĩ, ti tỹ Lázaro rĩn mãn ja tugrĩn, hã ký ag tóg Lázaro tén sór mũ.

Jesus tỹ Jerusalém ra tĩg

(Mt 21.1-11; Mc 11.1-11; Lc 19.28-40)

¹² Tỹ vaj ký Jesus tóg Jerusalém ra tĩ mũ. Kỹ ùn e ag tóg Jesus tỹ Jerusalém ra tĩ mẽg mũ sir, ù tỹ festa venh kãmũ mũ ên ag.

¹³ Kỹ ag tóg ti ve jé kãpa mũ, Jerusalém tá. Tãnh fěj génh ký ag tóg ti venh kãmũ mũ. Kỹ ag tóg: “!..Viva..!” he mũ. “!..Sér tóg tí êg mỹ..! !..Êg jóg mág vỹ ti jẽnẽ..! !..Israel kri pã'i mág pẽ vẽ..!” he ag tóg, prẽnprẽn ký.

¹⁴ Hã ra Jesus vỹ burrico sĩ ve ja nĩ, ký tóg kri nĩ ký Jerusalém ra tĩ mũ. Hã ra tóg rán ký nĩ, Topê vỹ tỹ rán ký nĩ ki, ti tỹ burrico sĩ kri tĩg ke ti, ha mẽ:

15 “kamēg tūg nī, Siāo tá ke kar’,” he tóg. “Ājag pā’i mág vỹ ũri jun ke mũ ha. Burrico sī kri tóg jun ke mũ ha,” he ja tóg nī, Topē vī rán ki, Jesus to.

16 Kurā ěn kã ag tóg ti rá tag to jykrén ja tũ nī ver, Jesus mré mũ tĩ ag. Jesus tỹ kanhkã ra vỹn ke kar kỹ ag tóg kejēn to jykrén mũ ha, ti to rán kỹ nĩ ěn to, hã ra tóg ge ja nĩ.

17 Ũ tỹ Jesus mỹ prēnprēr mũ ag kãmĩ ũ ag tóg Lázaro ve ja nĩ, Jesus tỹ ti rĩn mãn kỹ. Lázaro tỹ vėnh kej kãkã nỹ ra Jesus tóg ti jé prēr kỹ ti rĩn mãn ja nĩ. Ũ tỹ tag vėg mũ ěn ag vỹ jagnē mỹ kãmén mũ sir.

18 Hã kỹ ũn e ěn ag tóg Jesus kato pétē mũ, ti tỹ jun ke kỹ. Ũ ter kỹ nỹ rĩn mãn ěn ve ja tũ ag tóg nỹtĩ, kỹ tóg ag mỹ e tĩ.

19 Kỹ Fariseu ag tóg jagnē mỹ: “ha vé, ag pi(jé) ěg vĩ jēmē sór mũ!” he mũ. “Ti hã mré ag tóg mũ mũ,” he ag tóg, ti to jũgũ kỹ, pã’i ag.

Fóg tỹ Grego ag tỹ Jesus ve sór

20 Festa venh kãmũ mũ ag vỹ e nỹtĩ. Ag kãmĩ ũ vỹ tỹ ga tỹ Grécia tá ke nỹtĩ gé.

21 Ěn ag vỹ Jesus ve sór mũ. Hã kỹ ag tóg Filipe mré vĩ mũ. Ga tỹ Galilėia tá ěmã tỹ Betsaida tá ke vỹ tỹ ti nĩ, Filipe ti. Kỹ fóg tỹ Grego ěn ag tóg Filipe mỹ: “ěg tỹ Jesus venh há tóg tĩ,” he mũ.

22 Kỹ Filipe tóg André mỹ tónh tĩ mũ, kỹ ag tóg Jesus mỹ tónh mũ mũ, Filipe ti, André ti ke gé.

23 Hã ra Jesus tóg ag mỹ: “inh kurã vỹ hur jun,” he mũ. “Topē vỹ isỹ ũn mág han ke mũ ha. Tỹ sóg ěprã ke fi kósin nĩ,” he tóg.

24 “Ki hã sóg ājag mỹ tó mũ, hã kỹ sóg tó mũ. Isén jé ag tóg ke mũ, ũn e ag tỹ isugrĩn rĩnrĩr nỹtĩ jé. Ěg tỹ nén ũ fy krãn ri ke ti nĩ. Ti péju(g) ěg tóg tĩ, ga ki, kỹ tóg vag tĩ, nén ũ fy fár ti. Hã ra ti fy ěn tóg rĩr mãn kỹ mur mũ, kỹ tóg mog kỹ kanē e han mũ. Ěg tỹ ti krãn tũ nĩ ra tóg kanēn ke tũ nĩ vē.

25 Ěn ri ke tóg nĩ, ěg mré hã. Ěg hã vỹ tỹ nén ũ fy ri ke nỹtĩ gé. Ěg tỹ ěg jykre si tovãnh kỹ ěg tóg ěg rĩr krỹg ja tũ ěn venh ke mũ. Jãvo ěg tỹ ěg jykre si tovãnh pē han tũ nĩn kỹ ěg rĩnrĩr ke ěn tóg krỹ’ he mũ sir. Kỹ ěg kanhkã tá vėg tũ nĩ sir.

26 Ājag tỹ inh rãnrãj han sór kỹ inh ri ke han nĩ, kỹ ājag tóg tỹ inh mré ke nỹtĩnh mũ, kỹ ājag tóg inh mré kanhkã tá nỹtĩnh ke mũ gé, ājag tỹ inh rãnrãj han kỹ. Kỹ inh panh vỹ ājag tỹ ũn mág han ke mũ gé, inh ri ke han jé tóg ke mũ, ājag tỹ,” he tóg, Jesus ti.

Jesus tỹ ã ter ke tó

27 “Ũri tóg inh mỹ e tĩ,” he tóg. “Krĩ kufy jagy isóg nĩ. Ge ra sóg inh panh mỹ: “inh kren han nĩ, inh jagtar tũ nĩ jé,” he sór tũ nĩ. Inh vėsỹrėnh hã jé sóg kãtĩg, ti tỹ inh mỹ jagy pē (hã) ra.

28 Tag tó jé sóg ke mũ, inh panh mỹ, hã vỹ: “vėnh kar mỹ ven nĩ, ã tỹ tỹ ũn mág nĩ tag ti,” he mũ,” he tóg, Jesus ti.

Ti tỹ tag tó kỹ vãhã Topē tóg ti mỹ vĩ mũ, kanhkã tá nĩ kỹ. Kỹ tóg jamã hár(a) ti mỹ: “ag mỹ sóg ven huri,” he mũ. “Hã ra sóg ag mỹ ven mãn ke mũ gé, isỹ tỹ ũn mág nĩ ti,” he tóg, Topē ti. Kanhkã tá nĩg kỹ tóg ti mỹ tó mũ.

29 Kỹ ũn e ag tóg mēg mũ, Topē vĩ ti, ag tỹ ěprã nỹtĩ ra. Kỹ ag tóg ti vĩ to: “ta tỹ tỹrỹr he hỹn,” he mũ. Ag tỹ ki kagtĩg nỹtĩn kỹ ag tóg Topē vĩ to: “ta hỹn,” he mũ. Hã ra ũ ag tóg: “Topē tỹ jēnē jafã ũ hỹn ti mré vēmén,” he mũ gé, ag tỹ ki kagtĩg nỹtĩn kỹ.

³⁰ Hã ra Jesus tóg ag mÿ: “Topê pi(jé) isugrĭn vĭ ja nĭ,” he mÿ. “Ājag tugnĭn ke ja vē,” he tóg.

³¹⁻³² “Hã kÿ ājag tóg ka to isanh ke mÿ, kynhmÿ. Topê tÿ ěprã ke ag jykre to: “kórég ti nĭ,” he vē, ti tÿ tag ki ũn mág tÿ Japo he mÿ ěn to: ti kutê jé, he vē, hã kÿ ag tóg cruz to isãg mÿ. Ěn kã vēnh kar ag vÿ inh ki genh ke mÿ, isÿ ag krĭn kÿ, ha vemnĭ,” he tóg, Jesus ti.

³³ Tag tó tóg, ā mré mÿ tĭ ag mÿ, ā ter ke kãmén kÿ, ag tÿ cruz to ti sanh ke ti.

³⁴ Kÿ vēnh kar ag tóg ti mÿ: “hã ra ag tóg ěg mÿ: “Cristo vÿ ter ke tũ nĭ,” he tĭ. Topê vĭ ki ti něji rán kÿ nĭ,” he ag tóg mÿ. “Jãvo ā tóg ěg mÿ: ěprã ke fi kósin ěn tÿ ag tóg cruz to ti sanh ke mÿ, kynhmÿ, he mÿ. Ũ to ke ně, hÿn, ěprã ke fi kósin ěn?” he ag tóg, Jesus mÿ.

³⁵ Kÿ tóg ag mÿ: “ver sóg ājag mré nĭ nĭ, sÿ ājag mÿ kurã han jé,” he mÿ. “Kurã ki inh japry jagma mÿmnĭ. Kãnhmar ti kuty nĭnh mÿ. Ājag tÿ kuty ra inh jamĭn jagma mÿ sór mÿ ra ājag tóg vãgfor mÿnh ke mÿ.

³⁶ Isÿ ver ājag mré nĭn kÿ inh ki ge sórmnĭ, ājag tÿ tÿ inh mré ke nÿtĭ jé. Kÿ ājag tóg kurã ki nÿtĭ, isÿ tÿ jĕngrĕ ri ke nĭn kÿ,” he tóg, Jesus ti. Ā tÿ tag tó kar kÿ tóg tĭ mÿ, ag ré kÿ. Vĕnh péju kÿ tóg tĭ mÿ.

Judeu ag tÿ Jesus ki ge sór tũ

³⁷ Jesus vÿ ag rĭnve něn tÿ hěn ri ke hyn han ja nĭgtĭ, ěg tÿ něn han vãnh tÿ hěn ri ke, mĭlagre tÿ hěn ri ke, hã ra ag tóg ti ki ge sór tũ nĭgtĭ.

³⁸ Hã ra Isaías vÿ tag rán ja nĭ gé. “Ěg jóg mág,” he ja tóg nĭ. “Isÿ ag mÿ ā kãmén mÿ ra ag tóg inh vĭ kri nĭm sór tũ nÿtĭ,” he ja tóg nĭ. “Ag tÿ ā tÿ něn han mÿ ěn vég mÿ ra ag tóg: “Topê jykre vÿ tar nĭ,” he ja tũ nĭ,” he ja tóg nĭ, Isaías ti. Hã ra tóg ge nĭgtĭ, Jesus tÿ ag mÿ Topê vĭ tón kÿ, ti tÿ ag mÿ mĭlagre hyn han kÿ.

³⁹⁻⁴⁰ Kÿ Isaías vÿ ag to tag tó gé, ha mě. “Topê vÿ ag kyvó han, nĭgrĕg kutu, hã kÿ ag tóg mĕg tũ nĭgtĭ, kÿ ag tóg to jykren sór tũ nĭgtĭ gé, kÿ ag tóg inh ki ge sór tũ nĭgtĭ gé, kÿ sóg ag tÿ há' henh ke tũ nĭ gé,” he ja tóg nĭ gé, Isaías ti, ti tÿ Topê vĭ tó kÿ. Jesus to tóg ke mÿ. Hã kÿ ag tóg Jesus ki ge sór tũ nĭgtĭ.

⁴¹ Isaías vÿ Jesus ve ja nĭ, ti tÿ tÿ ũn mág nĭ ti, ũn tar ti. Jesus mur to hã ke ja vē, vãsÿ. Ti tÿ ti ve hã kÿ tóg tag tó ja nĭ, ti to, Isaías ti.

⁴² Hã ra ũ ag tóg ti ki ge kÿ nÿtĭ gé, pã'i ũ ag mré hã. Hã ra ag tóg tó sór tũ nĭgtĭ. Fariseu ag kamĕg ag tóg tĭ, hã kÿ ag tóg tó sór tũ nĭ. “Fariseu ag vÿ ěg pan ke mÿ, ěg tÿ ěg vēnh kanhrãn jafã ra mÿ tũ nĭ jé, ěg tÿ ěg mré ke ag mré tá vēnh mãn kÿ nÿtĭ tũ nĭn jé,” he ag tóg mÿ, hã kÿ ag tóg Jesus tó tũ nĭgtĭ.

⁴³ Ěprã ke ag tÿ ag to vĭ há han mÿ tag vÿ ag mÿ sér tĭ, kÿ Topê tÿ ag mÿ vĭ há han mÿ vÿ ag mÿ pãgsĭ tĭ. Há ti nĭ gé vē vē, hã ra ag tóg ěprã pã'i ag hã kamĕg mÿ.

Ag jykre kórég vēnh ven ke

⁴⁴ Kÿ Jesus vÿ jamã hár(a) ke mÿ, vēnh kar tÿ ti vĭ mě jé. Kÿ tóg: “ājag tÿ inh ki ge kÿ ājag tóg ũ tÿ inh jĕnĕg mÿ ěn ki ge mÿ gé,” he mÿ.

⁴⁵ “Ājag tÿ inh ve kÿ ājag tóg ti vég mÿ gé, ũ tÿ inh jĕnĕg mÿ ěn ti.

⁴⁶ Sÿ ājag mÿ kurã han hã jé sóg kãtĭg. Ājag tÿ inh ki ge kÿ sóg ājag mÿ kuty ěn tÿ tũ' he mÿ.

⁴⁷ Ājag tÿ ón kÿ inh vĭ mĕg mÿ ra sóg ājag to: “kórég ājag nÿtĭ,” henh ke tũ nĭ. Inh pi(jé) ājag mÿ: “kórég ājag nÿtĭ,” he jé kãtĭg'. Sÿ ājag krenkren han hã jé sóg kãtĭg.

⁴⁸ Ājag tỹ iso é he kỹ, ājag tỹ inh vĩ to é he kỹ tóg vènh ven mũ, ājag jykre kórég ên ti, ha vemñĩ. Isỹ ājag mỹ inh vĩ to mũ ra ājag tóg inh vĩ kri nĩm jāvãnh nỹtĩ. Hã tugrĩn tóg vènh ven ke mũ, ājag jykre kórég ti, kurã tỹ êgno tá há.

⁴⁹ Inh pi(jé) isỹ vėsóg ki nén to jykren ja ên tó tí'. Inh panh vĩ há tó ja inh nĩgtĩ, ù tỹ inh jènêg mũ ên vĩ ti. Ên vỹ inh mỹ: “tag tómnĩ, tag tó tũg nĩ,” he tí.

⁵⁰ Ti tỹ inh mỹ nén tó mũ vỹ ājag rĩnrĩr han ke mũ, ki kanhró sóg nĩ. Hã kỹ sóg inh panh tỹ inh mỹ nén tó mũ ên há tó tí, tag tãvĩ,” he tóg, Jesus ti.

13

Jesus tỹ ã mré mũ tĩ ag pẽn kugpe

¹ Hã ra festa tỹ Páscoa vỹ kakó tãvĩ tí sir, há ra tóg tá krỹg tũ nĩ ver. Kỹ Jesus vỹ ki kanhró nĩ, ti tỹ ùri ter ke ên ti. Ti kurã vỹ jun ja nĩ, ti tỹ ã panh ra tĩg jé. Āmré mũ tĩ ag to tóg há tãvĩ ja nĩgtĩ, ag tỹ tỹ ti tũ nỹtĩn kỹ. Kỹ tóg ã ter ke kurã ên kã ag to há tãvĩ nĩ gé, tag ki, êprã, ti mré mũ tĩ ag to.

² Kỹ tóg rãkãnh kỹ ag mré jêg mũ. Hã ra Japo vỹ Judas krĩn huri, ti tỹ pã'i ag mỹ Jesus ven tĩg jé, ag tỹ ti se jé. Judas Iscariotes ên vê, Simão kósin ên.

³ Hã ra Jesus tóg ki kanhró nĩ, ã tỹ Topê tá kãtĩg ja ên ki, kỹ tóg ki kanhró nĩ gé, ã tỹ ra tĩg mãn ken ki. Kỹ Topê tóg ti tar han mũ gé, ti tỹ nén ù kar ki ag mỹ tỹ ùn mág jê jé. Ên ki kanhró tóg nĩ gé, Jesus ti.

⁴ Tag kar to jykren kỹ tóg vãhã jêgnê mũ sir, jên kar kỹ. Jêgnê kỹ tóg ã capa kunũnh kỹ vènh pẽfĩ jafã tỹ vènh pẽfĩg mũ.

⁵ Goj tỹ tóg pênky kãki kujêg mũ, kỹ tóg ã mré mũ tĩ ag pẽn kugpég mũ. Vènh pẽfĩ jafã ên tỹ tóg ag pẽn kykũg mũ.

⁶ Kỹ tóg Simão Pedro tá jun mũ gé, ti pẽn kugpe jé. Hã ra Pedro tóg ti mỹ: ã pi(jé) inh pẽn kugpenh ke mũ',” he mũ.

⁷ Hã ra Jesus tóg ti mỹ: “ã pi(jé) ki kanhró nĩ', sỹ ã mỹ nén han mũ ti',” he mũ. “Kar kỹ ã tóg kejên to jykren ke mũ,” he tóg.

⁸ Hã ra Pedro tóg ti mỹ: “vó,” he mãn mũ. “Inh pẽn kugpenh ke tũ ã tóg nĩ,” he tóg. Kỹ Jesus tóg ti mỹ: “isỹ ã pẽn kupég tũ nĩn kỹ ã tóg tỹ isũ tũ nĩnh ke mũ,” he mũ.

⁹ Kỹ Pedro tóg ti mỹ: “inh kupe kãn nĩ, ge kỹ, inh pẽn, inh krĩ, inh nĩgê ke gé,” he mũ.

¹⁰ Hã ra Jesus tóg ti mỹ: “mro ã huri,” he mũ. “Ā mro kar kỹ sóg ã pẽn há kugpenh ke mũ. Jãnhkri ã nĩ, ã mro kar kỹ. Jãnhkri ājag nỹtĩ, há ra ājag kãmĩ ùn pĩr vỹ jãnhkri tũ nĩ,” he tóg, Jesus ti.

¹¹ Û tỹ pã'i ag mỹ ã ven ke mũ ên ki kanhró tóg nĩ, Jesus ti, há kỹ tóg ag mỹ: “ājag kãmĩ ùn pĩr vỹ jãnhkri tũ nĩ,” he mũ.

¹² Kỹ tóg ag pẽn kugpe kãn mũ. Ag pẽn kugpe kar kỹ tóg ã kur rĩnh mãn mũ, kỹ tóg nĩ mãn mũ. Kỹ tóg ag mỹ: “ājag mỹ sỹ nén han ja ki kanhró nỹtĩ?” he mũ.

¹³ “Iso ājag tóg: Senhor, he tí. Tó há han ājag tí. Tỹ sóg ājag Senhor nĩ.

¹⁴ Kỹ sóg tỹ ājag professor nĩ gé. Hã ra sóg ājag pẽn kugpé. Hã kỹ tóg há tí, ājag tỹ jagnê mỹ jagnê pẽn kugpe kỹ, inh ri ke han kỹ.

¹⁵ Sỹ ājag kanhrãn sór vê, há kỹ sóg ājag mỹ ājag pẽn kugpé. Inh ri ke han nĩ.

¹⁶ Ki há sóg tó mũ, há kỹ sóg ke mũ. Êg camarada pi(jé) ājag patrão kãfór nỹtĩ'. Kỹ êg tỹ ù jènên kỹ tóg ù tỹ ti jènêg mũ ên kãfór tũ nĩ gé.

¹⁷ Tag ki kanhró ājag nỹtĩ, kỹ tóg há tí, ājag tỹ inh ri ke han kỹ.

18 Ājag kāmī ũ tóg tag han ke tũ nĩ, ki kanhró sóg nĩ. Ājag kuprēg inh, kŷ sóg ājag ki kanhró nĩ. Tag vŷ ājag kāmī ũ to rán kŷ nĩ, ha mē: “ũ tŷ inh mré inh jamĩ ko mũ ěn vŷ isovānh ke mũ ha,” he ti nĩ, Topē vŷ tŷ rán kŷ nĩ ki. Isŷ tag ve jé sóg ājag kuprēg.

19 Ūri sóg ājag mŷ tó mũ, ti tŷ isovānh ke to hã, ājag tŷ ěn ve kŷ inh ki ěkrén' he jé. ěn ve kŷ inh ki ge kŷ nŷtĩmĩ jāvo.

20 Ki hã sóg tó mũ, hã kŷ sóg ke mũ. Isŷ ājag jēgnēnh ke vē. Kŷ ũ tŷ ājag mŷ vŷ há han kŷ tóg inh mŷ vŷ há han ke mũ gé, hã ra tóg ũ tŷ inh jēnēg mũ ěn mŷ vŷ há han ke mũ gé, ājag mŷ vŷ há han kŷ,” he tóg, Jesus ti, ti mré mũ tŷ ag mŷ.

Ū tŷ pã'i ag mŷ Jesus ven ke

(Mt 26.20-25; Mc 14.17-21; Lc 22.21-23)

21 Jesus tŷ tag tó kar kŷ tóg ti mŷ e tĩ. Krĩ kufy jagy ti nĩ, kŷ tóg ā mré mũ tŷ ag mŷ: “ki hã sóg tó mũ, hã kŷ sóg ke mũ,” he mũ. “Ājag kāmī ũ vŷ pã'i ag mŷ inh ven ke mũ,” he tóg.

22 Kŷ tóg ag mŷ e tĩ. Ki kagtĩg ag nŷtĩ, kŷ ag tóg véké jagnē ki ěvānh mũ.

23 Hã ra ũ tóg Jesus rã hã nĩ nĩ, ěn kã, ti tŷ ti to há nŷn kŷ.

24 Kŷ Pedro tóg ti mŷ ā nŷgē ven mũ, kŷ tóg ti mŷ: “ti ki jēmē há han,” he mũ, ũ tŷ Jesus rã hã nĩ ěn mŷ.

25 Kŷ tóg ti to grēn ke kŷ ti mŷ: “Senhor,” he mũ. “Ū tŷ hē nē?” he tóg ti mŷ.

26 Kŷ Jesus tóg ti mŷ: “ēmĩ tŷ sóg ti kume kã tŷ pun ke mũ,” he mũ, “kŷ sóg ti mŷ nŷm ke mũ sir. ěn hã vē,” he tóg mũ, Jesus ti. Tag tó kŷ tóg ěmĩ māg mũ, kŷ tóg ti kume kã tŷ pun ke mũ sir, kŷ tóg Judas mŷ nŷm mũ, Simão Iscariotes kósin ěn mŷ.

27 Kŷ Judas tóg ko mũ. Ti tŷ ko kar mũ ra vēsŷmēr Satanás tóg ti kãra rã ja nĩ sir. Kŷ Jesus tóg ti mŷ: “ã tŷ nén han sór mũ ěn han tŷg nĩ, to fũrũn nĩ,” he mũ.

28 Hã ra ũ ag tóg ki kagtĩg nŷtĩ, Jesus tŷ ti mŷ nén tó mũ ěn ki.

29 Judas vŷ ag jānkamy ki rŷr tũ. Hã kŷ ag kāmī ũ tóg: “ti hŷn ti mŷ: “ěg mŷ festa to compra ũ han tŷg,” he sór mũ, ke tũ nĩ kŷ ti tŷ ũn jagãgtar ag mŷ nén ũ nŷm ke hŷn,” he ag tóg mũ.

30 Hã ra Judas tóg ěmĩ ěn ko kar kŷ (tóg) króm ke kãkutē mũ, re ra. Hã ra tóg kuty nŷ.

Vēnh jykre tãg

31 Judas tŷg kar kŷ Jesus tóg ā mré mũ tŷ ag mŷ: “vãhã tóg vēnh ven ke mũ, isŷ tŷ ũn mág nĩ ti,” he mũ. “Tŷ sóg ěprã ke fi kósin nĩ. Hã ra sóg vēnh kar mŷ Topē tŷ tŷ ũn mág nĩ tag ven ke mũ gé.

32 Isŷ vēnh kar mŷ Topē tŷ tŷ ũn mág nĩ ven kŷ Topē tóg vēnh kar mŷ ven ke mũ gé, isŷ tŷ ũn mág nĩ ti. Vēsŷmēr tóg tag han ke mũ, Topē ti, ha vemnĩ,” he tóg, Jesus ti.

33 “Inh jāvy', ājag mré sóg nĩ sŷ pē han mũ ver,” he tóg. “Inh jāvānh jé ājag tóg ke mũ, hã ra ājag tóg inh venh ke tũ nĩ. Tag tó inh, Judeu ag mŷ, hã ra sóg ājag mŷ tag hã tó mũ gé, hã vŷ: ājag pi(jé) isŷ hēn ra tŷg ke mũ ěn ki kanhró nŷtĩ', he mũ.

34 Kŷ sóg ājag mŷ vēnh jykre tãg nŷm sór mũ, hã vŷ: jagnē to há tãvĩ nŷtĩmĩ, he mũ. Ājag to há tãvĩ sóg nĩ gé. Tag ri ke han nĩ, jagnē mŷ. Vēnh jykre tãg hã vē.

³⁵ Ājag tỹ jagnē to há nýtĩn kỹ vēnh kar vỹ ājag jykre ki kanhrān ke mũ. “Ti mré ke vỹ tỹ ag nýtĩ,” he jé ag tóg ke mũ ājag to, ag tỹ ājag jykre há ve kỹ,” he tóg, Jesus ti.

Jesus tỹ Pedro mỹ nén tó mũ
(Mt 26.31-35; Mc 14.27-31; Lc 22.31-34)

³⁶ Kỹ Simão Pedro tóg Jesus mỹ: “Senhor,” he mũ. “Ā tỹ hē ra tĩg sór nē?” he tóg. Kỹ Jesus tóg: “ēn ra ā tĩg ke tũ nĩ ver, inh mré,” he mũ. “Kar kỹ ā tóg kejēn ēn ra tĩg ke mũ gé, inh nón,” he tóg.

³⁷ Kỹ Pedro tóg ti mỹ: “isỹ ā mré tĩg há tóg tĩ,” he mũ. “Isỹ ā tigrĩn ter ken kỹ tóg inh mỹ tỹ nén ũ tũ tĩnh mũ,” he tóg.

³⁸ Hã ra Jesus tóg ti mỹ: “vó,” he mũ. “Ūri ā tóg ón kỹ iso: “ti ki kagtĩg sóg nĩ,” henh ke mũ. “Ti ki kagtĩg sóg nĩ,” he tãgtũ han jé ā tóg ke mũ, galo kynkyr to hã. Ki hã sóg tó mũ, ha vemnĩ,” he tóg, Jesus ti. Ti tỹ Pedro mỹ tón hã vē.

14

Kanhkã to ěmĩn

¹ Kỹ Jesus tóg ā mré mũ tĩ ag mỹ: “krĩ kufy han tũg nĩ,” he mũ. “Inh ki rã há han nĩ, kỹ Topē ki rã há han nĩ gé.

² Inh panh jamã tá ājag ĩn vỹ e nýtĩ, ki hã sóg tó mũ. Ti tỹ tá tũ nýtĩ ra sóg tónh ke tũ nĩ vē. Ra tĩg jé sóg ke mũ, isỹ ājag mỹ ājag ĩn kãnkãn jé.

³ Isỹ kãnkãn kar kỹ sóg tá kãtĩg mãn ke mũ gé, sỹ ājag tatĩn tĩg jé, kỹ ājag tóg inh mré tá nýtĩnh mũ.

⁴ Ti to ěpry ki kanhró ājag nýtĩ, sỹ hē ra tĩg ke to ěmĩn ti,” he tóg.

⁵ Kỹ Tomé tóg ti mỹ: “ěg pi(jé) ki kanhró nýtĩ, ā tỹ hē ra tĩg ke ti,” he mũ. “Hã kỹ ěg tóg ti to ěpry ki kagtĩg nýtĩ gé,” he tóg.

⁶ Kỹ Jesus tóg ag mỹ: “ti to ěmĩn vỹ tỹ inh nĩ,” he mũ. “Vēnh vĩ há hã tó sóg tĩ. Inh hã vỹ ājag rĩnrĩr han ke mũ. Ū tỹ inh ki ge mũ ag vỹ inh panh venh ke mũ.

⁷ Ājag tỹ inh ki kanhró nýtĩn kỹ ājag tóg inh panh ki kanhró nýtĩ gé. Inh ki kanhrān ājag tóg huri, inh ve ājag tóg huri,” he tóg, Jesus ti.

⁸ Kỹ Filipe tóg ti mỹ: “ěg mỹ ěg jóg mág ti ven nĩ,” he mũ. “ěg tỹ ti venh há tóg tĩ,” he tóg.

⁹ Kỹ Jesus tóg Filipe mỹ: “ā mỹ inh ki kagtĩg nĩ ver”, isỹ ājag mré tĩg mág ja ra?” he mũ. “Ā tỹ inh ve kỹ ā tóg inh panh ti vég mũ gé. Hã ra ā tóg inh mỹ: ěg mỹ ti ven nĩ, he mũ.

¹⁰ Inh panh mré sóg tỹ ũn pir nĩ, kỹ tóg inh mré tỹ ũn pir nĩ gé. Ā mỹ tag kri fig tũ? Inh pi(jé) isỹ vēsóg ki nén to jykren mũ tó tĩ. Inh panh tũ hã tó sóg tĩ, ti tũ hã han sóg tĩ, inh mré tỹ ũn pir nĩ ěn tũ ti. Kỹ tóg inh mré nén kar han mũ, inh panh ti.

¹¹ Inh vĩ kri nĩmĩ, isỹ ā mỹ: “inh panh mré sóg tỹ ũn pir nĩ,” henh kỹ. Ā tỹ hã ra inh vĩ kri fi sór tũ nĩn kỹ isỹ nén han mũ ěn ki ěvãnh nĩ, ā tỹ to jykren há han jé.

¹² Ki hã sóg tó mũ, hã kỹ sóg ke mũ. Ū tỹ inh ki rã há han mũ ěn vỹ isỹ nén han mũ ri ke han ke mũ gé, hã ra tóg isỹ nén han mũ kãfór han ke mũ, ha vemnĩ, isỹ ũri inh panh venh tĩg ken kỹ.

¹³ Kỹ sóg ājag tỹ inh mỹ nén ũ to vĩ mũ ěn hyn han kãn ke mũ, isỹ tỹ ājag kãke nĩn kỹ. Isỹ vēnh kar mỹ inh panh tỹ tỹ ũn mág nĩ ven ke vē, hã jé sóg ājag mỹ ājag tỹ nén to vĩ mũ ěn hyn han ke mũ.

14 Kŷ, ājag tŷ inh mŷ nén ũ to vĭnh ken kŷ sóg ěn hyn han kĕn ke mŷ, isŷ tŷ ājag kĕke nĭn kŷ, ha vemnĭ,” he tóg, Jesus ti.

Jesus tŷ Topĕ kuprĭg jĕnĕnh ke

15 “Ājag tŷ iso há nŷtĭn kŷ han nĭ, isŷ ājag mŷ nén tó mŷ ti.

16 Kŷ isóg inh panh mŷ ti kuprĭg to vĭnh ke mŷ, ti tŷ ājag mŷ ti jĕnĕ jé, ti tŷ tŷ ājag jagrĕ nĭ jé, ti tŷ ājag tar han jé, kŷ tóg ājag tovĕnh mĕn ke tŷ nĭ. Ājag mŷ tóg ki hĕ tónh ke mŷ.

17 Hĕ ra tóg ũ tŷ inh ki ge jĕvĕnh ěn ag mŷ nén ũ tónh ke tŷ nĭ, ag tŷ ti ki kagtĭg nŷtĭn kŷ. Ag jĕvo ājag tóg ti ki kanhró nŷtĭ. Ājag kĕtá tóg ājag mrĕ nĭ nĭ, Topĕ kuprĭg ti,” he tóg, Jesus ti.

18 “Inh pi(jé) ājag tovĕnh ke mŷ! Isĭg mŷ ra sóg vŷn kenh ke mŷ, ājag to.

19 Kĕnhmar ũ tŷ inh ki ge jĕvĕnh ěn ag tóg inh ve mĕn ke tŷ nĭ. Ag jĕvo ājag tóg inh ve mĕn ke mŷ. Rĭr inh nĭ nĭ, kŷ ājag tóg inh ri kĕn rĭr mĕn ke mŷ gé.

20 Ājag tŷ Topĕ kuprĭg tŷ ājag jagrĕ venh ke kurĕ ěn ki ājag tóg inh ki kanhrĕn há han ke mŷ, isŷ inh panh mrĕ tŷ ũn pir nĭ ěn ti. Kŷ ājag tóg inh mrĕ tŷ ũn pir nŷtĭn mŷ gé, ha mĕ,” he tóg, Jesus ti.

21 “Ũ tŷ inh vĭ hĕ ki kanhrĕn mŷ ěn, ũ tŷ inh vĭ hĕ ki króm mŷ ěn hĕ vŷ iso há nĭ. Kŷ ũ tŷ iso há nĭ ěn to inh panh tóg há tĕvĭ nĭ. ěn to sóg há tĕvĭ nĭ gé. ěn vŷ inh venh ke mŷ,” he tóg, Jesus ti.

22 Kŷ Judas tóg ti ki jĕmĕg mŷ. Judas Iscariotes pijé!, Judas ũ vē. ěn vŷ Jesus mŷ: “ĕg mŷ ĕ tóg vēnh ven sór mŷ,” he mŷ, “há ra ĕ tóg ũ tŷ ĕ ki ge sór tŷ ag mŷ vēnh ven sór tŷ nĭ. Ā hĕ ri kenh ke mŷ?” he tóg mŷ.

23 Kŷ Jesus tóg ti mŷ: “ũ tŷ iso há nŷtĭ kar ag vŷ inh vĭ ki króm ke mŷ,” he mŷ. “Ũ tŷ inh vĭ ki króm mŷ to inh panh tóg há nĭ, kŷ tóg ti mrĕ ĕmĕn ke mŷ. Kŷ sóg ti mrĕ ĕmĕn ke mŷ gé.

24 Ũ tŷ iso há tŷ ěn vŷ inh vĭ han sór ke tŷ nĭ gé. Inh pi(jé) inh vĭ hĕ tó tĭ. Ũ tŷ inh jĕnĕg mŷ ěn vĭ hĕ tó sóg tĭ, inh panh vĭ ti,” he tóg.

25 “Ājag mrĕ sóg nĭ nĭ ver, kŷ sóg ājag mŷ tag kĕmĕn mŷ.

26 Isĭg kar kŷ sóg ājag mŷ vēsŷmĕr ũ tŷ ājag tar han ke mŷ ěn jĕnĕnh ke mŷ, hĕ vŷ: Topĕ kuprĭg, he mŷ. Inh panh vŷ ājag mŷ ti jĕnĕnh ke mŷ. ěn vŷ nén ũ kar to ājag kanhrĕn há han ke mŷ. Kŷ tóg ājag mŷ tó mĕn ke mŷ gé, sŷ ājag mŷ nén tó mŷ kar ti, ājag tŷ kĕ jatun tŷ nĭ jé,” he tóg, Jesus ti.

27 “Ājag krĭ kĕnhvy han jé sóg ke mŷ. Sŷ ājag mŷ nĕn nĭm ke mŷ hĕ vŷ: krĭ kĕnhvy, he mŷ. Hĕ ra tóg ũ tŷ inh ki ge jĕvĕnh ag krĭ kĕnhvy sĭ ěn ri ke tŷ nĭ, sŷ ājag mŷ ājag krĭ kĕnhvy han mŷ ti. Krĭ kĕnhvy pĕ ājag nŷtĭnh ha. Hĕ kŷ krĭ kufy han tŷg nĭ. Kanĕ jur han tŷg nĭ gé.

28 Inh vĭ tag mĕ ājag tóg huri, isŷ ājag mŷ: “tĭg jé sóg ke mŷ, kar kŷ sóg ājag to vŷn kenh ke mŷ gé,” he mŷ ti. Ājag tŷ iso há nŷtĭ ra tóg ājag mŷ sér tĭnh mŷ vē, isŷ inh panh venh tĭg ke ti. Inh panh vŷ inh kĕfór nĭ.

29 Ũri sóg ājag mŷ tag kĕmĕn mŷ, ājag tŷ ěn venh ke to hĕ. Kŷ inh mĭ ĕkrĕn nĭ, ājag tŷ ěn venh ken kŷ. ěn kĕ inh ki ge kŷ nŷtĭmĭnĭ.

30 Isŷ ājag mrĕ vēmĕn tag vŷ rur nĭ ha. ěprĕ pĕ'i mág jun ke nĕ ha. Hĕ ra ti pi(jé) tŷ inh krĭg mŷ ke nĭ!.

31 Hĕ ra sóg sŷ nĕn han ke mŷ ěn han sór mŷ, ĕprĕ ke kar ag tŷ inh jykre ve jé, isŷ inh panh to há tĕvĭ nĭ ti. Kŷ sóg inh panh tŷ inh mŷ nĕn tó mŷ ěn han

kãn tí. Hã ven sór inh mũ, êprã ke kar ag mý. Mũ já ha, re ra,” he tóg, Jesus tí. Tí tỹ ã mré mũ tí ag mý ag tỹ nén venh ke kãmén hã vê.

15

Jesus tỹ uva fa ri ke nĩ

¹ Ag mũn kỹ Jesus tóg ag mý: “uva fa ri ke inh nĩ,” he mũ. “Inh panh vỹ ù tỹ uva ki rĩr mũ ên ri ke nĩ.

² Kỹ ãjag uva pẽ ri ke nỹtĩ,” he tóg. “Û tỹ inh vĩ han sór tũ ên ag hã vỹ uva pẽ kanẽn vãn ên ri ke nỹtĩ. Ên kym kỹ tóg fón tí, inh panh tí, uva pẽ kanẽn vãn ên tí. Ûn kanẽ há han mũ ên ki rĩr há han tóg tí, ên fėj rógrãm tóg tí, tí pẽ kãsir nẽgnẽm tóg tí gé, tí tỹ kanẽ e han já.

³ Tag ri ke han tí, inh panh tí, ãjag tỹ. ãjag tỹ há' he tóg huri, inh panh tí, ãjag tỹ inh vĩ kri nĩm tũgrĩn.

⁴ Isovãnh tũg nĩ, kỹ sóg ãjag tovãnh ke tũ pẽ nĩ gé. Uva pẽ ên ri ke tí nĩ. Tí tỹ tí pẽ rógrãm kỹ tóg tóg mũ. Jãvo tí pẽ tỹ uva fa ên to nỹgtĩn kỹ tóg kanẽ há han tí. Ên ri ke tí nĩ, ãjag tỹ inh kí ge kỹ nỹtĩ tag tí. ãjag tỹ inh kí ge kỹ nỹtĩn kỹ ãjag tóg vãn jykre há hã han kỹ nỹtĩ nĩ, jãvo ãjag tỹ isovãnh kỹ ãjag tóg vãn jykre há tovãnh ke mũ gé,” he tóg, Jesus tí.

⁵ “Uva fa ri ke inh nĩ, kỹ ãjag tóg uva pẽ ri ke nỹtĩ gé. ãjag tỹ inh kí ge kỹ nỹtĩn kỹ ãjag tóg kanẽ e han ke mũ, ãjag tỹ isovãnh tũ nĩn kỹ. ãjag pi(jé) ãjag pí mý nén ù há han kí kanhró nỹtĩ'. Inh hã ne ãjag tar han tí'.

⁶ Û tỹ isovãnh ke mũ ên fón já tóg ke mũ, inh panh tí. Êg tỹ uva pẽ kórég kym kỹ vãm ên ri ke tóg nĩ. Êg tỹ tí pẽ kym kỹ fón kỹ tóg tóg mũ, kỹ êg tóg tí pũn tí sir. Ên ri ke han já tóg ke mũ, inh panh tí, ù tỹ isovãnh mũ ên tỹ.

⁷ ãjag tỹ isovãnh tũ nĩn kỹ, ãjag tỹ isỹ ãjag mý nén tó mũ ên to jykren kỹ nỹtĩn kỹ, kỹ inh mý nén kar to vĩmĩ. Han já sóg ke mũ, ãjag mý, ãjag tỹ inh mý nén to vĩ mũ ên tí, ha vemnĩ.

⁸ ãjag tỹ vãn jykre há han kỹ tóg uva pẽ tỹ kanẽ e han ri ke nĩ. Kỹ vãn kar ag tóg ãjag jykre ve kỹ Topẽ to: “ũn há vỹ tỹ tí nĩ,” henh ke mũ. Hã kí ag tóg kí kanhró nỹtĩn mũ, ãjag tỹ tỹ inh mré ke nỹtĩ tí.

⁹ Inh panh vỹ iso há tãvĩ nĩ. Ge inh nĩgtĩ gé, ãjag to. ãjag to ha pẽ sóg nĩ gé. Inh kí ge kỹ nỹtĩmĩ, sỹ ãjag to há tãvĩ nĩ já.

¹⁰ ãjag tỹ isỹ ãjag mý nén tó mũ kí króm kỹ ãjag tóg inh kí ge kỹ nỹtĩn mũ, kỹ sóg ãjag to há nĩ gé. Hã kỹ sóg inh panh vĩ hã kí króm kãn mũ, kỹ tóg iso há tãvĩ nĩ.

¹¹ Inh mý tóg sér tí. Kỹ sóg ãjag mý tag tó mũ, tí tỹ ãjag mý sér tĩn já gé, tí tỹ inh mý sér ên ri ke tĩn já gé, ãjag mý. Tí tỹ ãjag mý sér tí hã já sóg ãjag mý inh jykre kãmén mũ.

¹² Sỹ ãjag mý vãn jykre nĩm mũn hã vê, ha mẽ. Jagnẽ to há pẽ nỹtĩmĩ, sỹ ãjag to há nĩ ên ri ke han nĩ, he sóg mũ.

¹³ Û tỹ ã mré ke ù ag jagfỹ ter sór mũ ên vỹ ag to há ja nĩgtĩ. Û tỹ êg to há kãfór pẽ ên venh ke tũ êg tóg nĩ, êprã.

¹⁴ Inh mré ke pẽ vỹ tỹ ãjag nỹtĩ, ãjag tỹ inh vĩ kí króm kỹ.

¹⁵ Hã kỹ sóg ãjag to: “inh camarada ag,” he tũ nĩgtĩ gé. Êg pi(jé) êg camarada ên ag mý êg tỹ nén to jykren mũ ên kãmén tí'. Êg mré ke ag hã mý êg tóg kãmén tí. ãjag mý sóg inh panh tỹ inh mý nén tó mũ ên kãmén kãn huri, hã kỹ sóg ãjag to: “inh mré ke ag,” he mũ.

¹⁶ Ājag pi(jé) inh kuprēg'. Inh hã ne ājag kuprēg'. Kŷ sóg ājag mŷ: “kanē e han nĩ,” he mŷ ha, hã vŷ: vēnh jykre há, he mŷ. Vēnh jykre há hã vŷ tũ' henh ke tũ nĩ. Ājag tŷ ěn han kŷ jatun mŷ Topē mŷ nén kar to vĩmnĩ, inh jyjy tó kŷ. Ājag tŷ ti mŷ nén ũ to vĩ mŷ ěn han jé tóg ke mŷ, Topē ti, ājag tŷ vēnh jykre há han kŷ nŷtĩn kŷ.

¹⁷ Sŷ ājag mŷ nén tó mŷn hã vē, hã vŷ: jagnē to há nŷtĩmnĩ, sŷ ājag to há nĩ ěn ri ke, he mŷ,” he tóg, Jesus ti.

Ū tŷ ěg to jũnh ke ag

¹⁸ Ū tŷ inh ki ge tũ ag vŷ iso jũ vén ja nĩgtĩ, kŷ ag tóg ājag to jũ nŷtĩ gé. Tag mĩ ěkrén nĩ, ag tŷ ājag to jũnh ken kŷ.

¹⁹ Ājag pi(jé) tŷ ag mré ke nŷtĩ'. Ājag tŷ tŷ ag mré ke nŷtĩ ra ag tóg ājag to há nŷtĩnh ke mŷ vē, hã ra ājag tóg tŷ ag mré ke tũ nŷtĩ. Ājag kuprēg inh, ag kãmĩ, ājag tŷ tŷ inh mré ke nŷtĩ jé, hã kŷ ag tóg ājag to jũ nŷtĩ.

²⁰ Vãsŷ sóg ājag mŷ: “ājag pi(jé) inh kãfór nŷtĩ',” he ja nĩgtĩ. Tag mĩ ěkrén nĩ. Inh camarada ri ke ājag nŷtĩ, jãvo sóg tŷ ājag patrão ri ke nĩ. Ag kãmĩ ũ tóg inh vóg kónãn ke mŷ. ěn vŷ ājag vóg kónãn ke mŷ gé. Ag kãmĩ ũ tóg inh vĩ ki króm ti. ěn ag vŷ ājag vĩ ki króm ke mŷ gé.

²¹ Hã ra ag tóg ājag vóg kónãn ke mŷ gé, ājag tŷ tŷ inh mré ke nŷtĩn kŷ. Ag pi(jé) ũ tŷ inh jēnēg mŷ ěn ki kanhró nŷtĩ'.

²² Inh kãtĩ tũ ra, isŷ ag mŷ inh vĩ tó tũ ra ag tóg: “hã ra ěg tóg ki kagtĩg nŷtĩ,” henh ke mŷ vē. Hã ra sóg ag mŷ tó, hã kŷ ag tóg ki kanhró nŷtĩ.

²³ Ū tŷ iso jũ nŷtĩ ěn ag vŷ inh panh to jũ nŷtĩ gé.

²⁴ Nén ũ han vãnħ hyn han sóg ti, ag rĩnve, kŷ ũ vŷ tag han ja tũ pē nĩ ijo. Isŷ tag han tũ nĩ ra ag tóg: “vėg tũ ěg nĩ,” henh ke mŷ vē. Hã ra ag tóg vē, ag tŷ vėg mŷ ra ag tóg ge ra iso jũ nŷtĩ, kŷ ag tóg inh panh to jũ nŷtĩ gé.

²⁵ Hã ra ag tóg rán kŷ nŷtĩ, Topē vĩ tŷ rán kŷ nĩ ki. “Nén ũ tũ to ag tóg iso jũ sór mŷ,” he tóg, Topē vĩ rá ki. Hã kŷ ag tóg ke ti,” he tóg, Jesus ti.

²⁶ “Hã ra tóg kãtĩg ke mŷ, ũ tŷ ājag tar han ke ti. Topē kuprĩg to ken hã vē. Ti hã vŷ ki hã tónh ke mŷ, inh panh kuprĩg ti. ěn hã vŷ ājag mŷ inh kãmén ke mŷ.

²⁷ Kŷ ājag tóg vēnh kar mŷ inh kãmén ke mŷ gé, ěn kã. Inh mré ājag tóg mŷ ja nĩ, isŷ ājag mŷ tó vén mŷn kã,” he tóg.

16

¹ “Ājag mŷ sóg tag kãmén kãn mŷ, ājag tŷ ki kanhró nŷtĩ jé, ājag tŷ isovãnħ sór tũ pē nĩ jé, ājag jagtar ke kurã ěn kã.

² Ājag pan jé ag tóg ke mŷ, pã'i ag, ājag tŷ vēnh kanhrãn jafã ra mŷ mãn tũ nĩ jé. Kŷ ag tóg ājag kãgtén ke mŷ gé. Ājag kãgtén kŷ ag tóg ón kŷ: “Topē vŷ ěg mŷ tó, hã kŷ ěg tóg ag kãgtén,” henh ke mŷ.

³ Ag tŷ ěg jóg mág ki kagtĩg nŷtĩ hã kŷ ag tóg tag han ke mŷ. Inh ki kagtĩg ag tóg nŷtĩ gé.

⁴ Ūri sóg ājag mŷ tó mŷ. Kŷ ājag tóg, ājag tŷ tag ve kŷ (ājag tóg): “ěg mŷ tóg tó ja nĩ, ěg tŷ ũri nén vėg mŷ tag ti,” henh ke mŷ,” he tóg, Jesus ti.

Topē kuprĩg kãtĩg ke

Vãsŷ sóg ājag mŷ tag tó ja tũ nĩ ver. Vãsŷ sóg ājag mré tĩg nĩ vē, hã ra sóg ājag mŷ tag tó ja tũ nĩ, sŷ ũri ājag mŷ nén tó mŷ tag ti.

⁵ Ūri sóg tīg ke mū, isy ũ tỹ inh jēnēg mū ěn ve jé. Kỹ ājag pi(jé) inh mỹ: “ā tỹ hē ra tīg ke nē?” henh ke mū’.

⁶ Ājag mỹ tóg e tĩ, sỹ ājag mỹ isig ke tag tó ja nĩn kỹ, kỹ ājag tóg fe kaj nỹtĩ.

⁷ Há ti nĩ hā ra, isig ke ti, ha mē. Isig tũ nĩn kỹ ũ tỹ ājag tar han mū ěn vỹ kātīg ke tũ nĩ vē, Topē kuprīg ti. Isīg kỹ sóg ājag mỹ ti jēnēnh ke mū.

⁸ Ěn vỹ, ā kātīg kỹ (tóg) vēnh kar mỹ: “Topē vỹ mranh ā huri,” henh ke mū, kỹ tóg ag mỹ vēnh jykre kuryj tónh ke mū gé, kỹ tóg ag mỹ Topē tỹ ag vóg kónān ke ěn tónh ke mū gé.

⁹ “Jesus ki ā tóg rā tũ nĩ, hā kỹ ā tóg Topē vỹ mranh tĩ,” he jé tóg ke mū, vēnh kar mỹ.

¹⁰ Kỹ tóg ag mỹ vēnh jykre kuryj tónh ke mū gé, Topē kuprīg ti. Jāvo sóg tīg ke mū, inh panh kukām, kỹ ag tóg inh venh ke tũ nĩ.

¹¹ Kỹ Topē kuprīg tóg ag mỹ Topē tỹ ag vóg kónān ke ěn tónh ke mū gé. Tag ki ũn tỹ tỹ ũn mág pē tỹ Nén-Kórég ěn to tóg: “kórég ti nĩ,” hé huri, Topē ti. Hā to ěg tóg ti tỹ ũn vóg kónān ke mū ěn ag ki kanhró nỹtĩ,” he tóg, Jesus ti.

¹² “Sỹ ājag mỹ nén tónh ke mū vỹ ver e nỹtĩ, hā ra tóg ver ājag mỹ mē jagy tĩ, hā kỹ sóg tónh ke tũ nĩ.

¹³ Topē kuprīg tỹ ājag ki jun kỹ, ũ tỹ ki hā tó tĩ ěn kātīg kỹ tóg komēr hā ājag mỹ tó kān ke mū, nén tỹ ki hā tó mū ěn ti. Ti pi(jé) ā tỹ nén to jykrén mū ěn tónh ke mū’, Topē kuprīg ti. Inh panh tỹ inh mré nén to jykrén mū ěn hā tó jé tóg ke mū. Kỹ tóg ājag mỹ ājag tỹ kar kỹ nén venh ke ěn tónh ke mū gé.

¹⁴ Ti hā vỹ iso: “ũn mág vỹ tỹ ti nĩ,” henh ke mū gé. Inh vỹ hā tó jé tóg ke mū ājag mỹ, hā kỹ tóg isy tỹ ũn mág nĩ tónh ke mū.

¹⁵ Inh panh tỹ nén tó mū ěn hā tó sóg tĩ gé. Kỹ tóg ěn hā tónh ke mū gé, ti kuprīg ti. Hā kỹ sóg ājag mỹ: inh vỹ hā tó jé tóg ke mū,” he mū,” he tóg, Jesus ti.

Jesus tỹ ter kar kỹ rĩr mǎn ke

¹⁶ “Kānhmar ājag tóg inh ve mǎn ke tũ nĩ ha, kejēn ājag tóg kurā ũ ki inh ve mǎn ke mū gé,” he tóg, Jesus ti.

¹⁷ Kỹ ti mré mū tĩ ag tóg jagnē mỹ: “ti hỹn ne tó sór mū, hā kỹ tóg: kānhmar ājag tóg inh ve mǎn ke tũ nĩ ha, he mū, hā kỹ tóg: kejēn ājag tóg kurā ũ ki inh ve mǎn ke mū gé, he mū?” he ag tóg. “Ti tỹ ne tónh ke nē hỹn, hā kỹ tóg: inh panh kukām sóg tīg mū ha, he mū?” he ag tóg.

¹⁸ “Ne to ke nē hỹn, hā vỹ: kānhmar, he mū? Ěg pi(jé) ti tỹ nén tó mū ěn ki kanhró nỹtĩ,” he ag tóg, jagnē mỹ.

¹⁹ Hā ra Jesus tóg ki kanhró nĩ, ag tỹ ti ki nén jēmē sór mū ěn ki. Hā kỹ tóg ag mỹ: “inh vỹ mỹ ājag mỹ e?” he mū. “Kānhmar ājag tóg inh ve mǎn ke tũ nĩ ha, kejēn hā ājag tóg kurā ũ ki inh ve mǎn ke mū.

²⁰ Ki hā sóg tó mū, hā kỹ sóg ke mū. Kygfỹ jé ājag tóg ke mū. Vēsỹrénh jé ājag tóg ke mū. Hā ra tóg ũ tỹ inh ki ge tũ ag hā mỹ sér tĩnh mū. Fe kaj han jé ājag tóg ke mū, tag pāte tóg ājag mỹ sér tĩnh mǎn ke mū gé.

²¹ Ūn tỹtá fi tỹ gĩr venh ken kỹ tóg fi mỹ jagy tĩ, fi kaga jagy ěn ti. Fi kósin tỹ fi ki mur kar kỹ tóg hā ra fi mỹ sér tĩ, kỹ fi tóg ā kaga ěn mĩ ěkrén mǎn tũ nĩgtĩ. Fi tỹ ā kósin ve kỹ tóg fi mỹ sér tĩ.

²² Ge ve jé ājag tóg ke mū. Ūri tóg ājag mỹ jagy tĩ, hā ra sóg ājag ve mǎn ke mū, kỹ ājag fe tóg mrin kenh ke mū, ājag tỹ inh ven kỹ. Kỹ ũ tóg ājag fe kaj han mǎn ke tũ nĩ ha, inh kātīg mǎn kỹ.

²³ Ĕn kã ājag tóg inh mý nén ũ to vī mǎn ke tũ nĩ ha, isý ājag mré nĩn ký. Ki hã sóg tó mũ, hã ký sóg ke mũ. Ājag tỹ inh panh mý nén ũ to vĩn ký tóg ājag mý vin kǎn ke mũ, ājag tỹ ti mý nén ũ to vī mũ ěn tỹ, ājag tỹ tỹ inh mré ke nýtĩn ký.

²⁴ Ver ājag tóg ti mý nén ũ to vĩ ja tũ nĩ, ājag tỹ ti mý: “ti mré ke vỹ tỹ ěg nýtĩ,” hen ký. Ti mý nén ũ to vĩmĩ, ký tóg ājag mý hyn han kǎn ke mũ, ājag tỹ nén to vī mũ ěn ti, ký tóg ājag mý sér tǎvĩ tĩnh mũ,” he tóg, Jesus ti.

Jesus tỹ tỹ ěprǎ ke kar kri ke nĩ

²⁵ “Ājag mý sóg comparação han ký inh panh kǎmén tĩ, kǎnhmar sóg jamǎ hár(a) ājag mý inh panh kǎmén ke mũ, ký sóg ājag mý comparação han mǎn ke tũ nĩ sir.

²⁶ Kurǎ ěn kã ājag tóg vėsóg ki inh panh mý nén ũ kar to vĩnh ke mũ, ājag tỹ tỹ inh mré ke nýtĩn ký. Ký sóg ājag jagfỹ vī mǎn ke tũ nĩ ha, ājag tỹ vėsóg ki ti mré vēmén ký. Ājag hã vỹ ti mré vēmén ke mũ ha.

²⁷ Inh panh vỹ ājag to há tǎvĩ nĩgtĩ, ājag tỹ iso há nýtĩn ký, ājag tỹ iso: “Topě vỹ ti jěně,” hen ký.

²⁸ Inh panh tỹ inh jěněn hã ký sóg ga tag ki jun mũ. Hã ra sóg ũri inh mur ja ré ký tĩg ke mũ ha, inh panh kukǎm,” he tóg, Jesus ti.

²⁹ Ký ti mré mũ tĩ ag tóg ti mý: “vǎhǎ ģ tóg ěg mý kǎmén há han mũ ha,” he mũ. “Vǎhǎ ģ tóg ěg mý comparação tó tũ nĩ ha.

³⁰ Nén ũ kar ki kanhró ģ tóg nĩ, vég ěg tóg mũ. Ĕg tỹ ģ ki nén ũ jěmě sór ký ģ tóg ki kanhró nĩ. Ĕg tỹ ģ mý nén ũ tó tũ ra ģ tóg ki kanhró nĩ. Hã ki ěg tóg vég mũ, ģ tỹ Topě tá kǎtĩg ja ti,” he ag tóg mũ, Jesus mý.

³¹ Ký tóg ag mý: “vǎhǎ ājag tóg inh ki ge ký nýtĩ ha,” he mũ.

³² “Hã ra ājag tóg kǎnhmar inh ré ký mũ kǎn mũ ha, ājag ĩn ra. Věnh kã pugpóv kǎn jé ājag tóg ke mũ, ũri. Hã ra sóg pir pě tũ nĩ, ājag tỹ inh ré ký mũ kǎn mũ (hã) ra. Inh panh vỹ ěgno kã inh mré jě nĩ.

³³ Tag kǎmén sóg ājag mý, ājag tỹ krĩ kǎnhvy nýtĩ jé, ājag tỹ inh ki ge ký nýtĩ tugrĩn. Tag ki ājag tóg nén ũ jagy kar vég ti ver. Hã ra to krĩ kufy han tũg nĩ. Ĕprǎ ke kar kri ke vỹ tỹ inh nĩ, ěprǎ ke kri pǎĩ ěn, Japo ěn kutěm inh huri,” he tóg, Jesus ti.

17

Jesus tỹ Topě mré vēmén

¹ Jesus tỹ ģ mré mũ tĩ ag mý tag kǎmén kǎn kar ký tóg kanhkǎ ki ěvǎnh mũ, ký tóg: “panh’,” he mũ. “Inh hora tán krýg huri,” he tóg. “Ag mý isý tỹ ũn mág nĩ ven nĩ, isý tỹ ģ kósin nĩn ký. Ký sóg ag mý ģ tỹ tỹ ũn mág nĩ ven ke mũ gé.

² Ĕprǎ ke kar kri ģ tóg inh fěg, isý ag mý rĩr krýg ja tũ ven jé, ģ tỹ inh mý ũn vin mũ kar ěn ag mý, fag mý ke gé.

³ ũ tỹ ģ ki kanhrǎn mũ ěn vỹ rĩr krýg ja tũ venh ke mũ, ũ tỹ ģ to: “Topě vě,” he mũ kar ag, ũ tỹ ģ to: “Topě ũ vỹ tũ nĩ,” he mũ kar ag, fag kar ke gé. Ký ag tóg inh ki kanhró nýtĩ gé, isý tỹ Jesus Cristo nĩn ki, ģ hã tỹ inh jěně ěn ki.

⁴ Ag hã mý sóg ģ tỹ tỹ ũn mág nĩ tag ven, ěprǎ ke ag mý, fag mý ke gé. ģ tỹ inh mý nén tó mũ ěn han kǎn inh.

⁵ Vǎsỹ, ěg tỹ ga tag han tũg ki sóg ģ mré nĩ ja nĩgtĩ, ěn kã sóg tỹ ũn mág pě nĩ ja nĩgtĩ, ģ mré. Ĕn han mǎn nĩ, inh mý. Isý tỹ ũn mág pě nĩ han mǎn nĩ, panh’.

6 Û ag kuprêg ja ã nĩ, ag tỹ inh ki ge jé, fag ke gé. Ên ag mỹ sóg ã kãmén ja nĩgtĩ. Á tù ag vê, hã ra ã tóg inh mỹ ag vin, fag ke gé. Á vĩ ki króm ag tóg tĩ, fag ke gé.

7 Ûri ag tóg ki kanhró nỹtĩ, isỹ ã tù hã han mũ ên ki, fag ke gé. Á hã ne inh mỹ nén kar ên tó tĩ'. Tag vég ag tóg tĩ.

8 Ag mỹ sóg ã vĩ ti tó tĩ, kỹ tóg ag mỹ sér tĩ, fag mỹ ke gé. Kỹ ag tóg vég mũ, ã tỹ inh jêñê ên ti. Kỹ ag tóg iso: "Topê tỹ ùn jêñêg mũ ên vê," he mũ, fag ke gé.

9 Á tỹ inh mỹ ùn vin mũ ên ag hã jagfy sóg vĩ tĩ, fag ke gé. Û tỹ inh ki ge tù ên ag jagfy sóg vĩnh ke tù nĩ. Á tù ag hã jagfy sóg vĩ tĩ.

10 Ha vé, isũ kar vỹ tỹ ã tù nỹtĩ, kỹ ã tù kar vỹ tỹ isũ nỹtĩ gé. Ag hã tugrĩn sóg tỹ ùn mág nĩ, ù tỹ inh ki ge kỹ nỹtĩ ên ag hã tugrĩn, fag ke gé.

11 Inh mur ja ré kỹ sóg tĩg mũ, ijãvo ag tóg êgno mĩ mũ nĩ sir, isũ mré ã tù ag. Ag jãvo sóg ã venh kãtĩg mũ ha. Inh panh mág, há távĩ ã tóg nĩ. Ag jy nĩgãn nĩ, ã jykre ki. Á hã ne inh mỹ ag vin'. Á mré sóg tỹ ùn pir nĩ. Ag tỹ jagnê mré tỹ ùn pir nỹtĩ han nĩ, isỹ ã mré tỹ ùn pir nĩ tag ri ke han nĩ, ag tỹ, fag tỹ ke gé.

12 Isỹ ag mré nĩn kỹ sóg ag jy nĩgãn tĩ, ã jykre ki, ã tỹ inh mỹ ùn vin mũ ên ag kar jy, fag jy ke gé. Ag ki rĩr há han inh, kỹ ag kã ù tóg vãfor ja tù nĩ. Ûn pir tóg há ra vãfor kỹ nĩ inhhã, hã ra tóg ti to rán kỹ nĩ, ti tỹ nũgme ki kutênh ke ti, há kỹ ti tỹ ki kutênh ke nê ha.

13 Ûri sóg ã kukãm kãtĩg mũ, hã ra sóg ver tag ki ag mỹ kãmén mũ, ti tỹ ag mỹ sér tĩ jé, ti tỹ inh mỹ sér tĩ tag ri ke tĩ jé, ag mỹ.

14 Ag mỹ sóg hur ã vĩ kãmén. Kỹ ù tỹ inh ki ge tù ag vỹ ag to jũ mũ, ag tỹ tỹ ag mré ke tù nỹtĩn kỹ. Inh pi(jé) tỹ ag mré ke nĩ gé', ù tỹ ag to jũ mũ ên mré.

15 Hã ra sóg ã mỹ: "ha ag jé prêr," he tù nĩ, "ag tỹ ga tovãnh jé," he tù sóg nĩ. "Nén-Kórég jo ag jy nĩgãn nĩ," he sóg mũ ã mỹ.

16 Ag pi(jé) tỹ inh ki ge tù ag mré ke nỹtĩ'. Tỹ sóg ag mré ke tù nĩ gé, ù tỹ inh ki ge jãvãnh ên ag mré.

17 Á vĩ há ki ag kanhrãn nĩ, ã tỹ ùn kuprêg mũ ên ag, ag tỹ komêr hã ã ri ke nỹtĩ jé. Á vĩ ên vỹ tỹ vênh vĩ há távĩ nĩ.

18 Inh jêñê ã tóg, sỹ ga kri mur jé. Kỹ sóg ã kóm ag jêgnênh mũ, ag tỹ êprã ke kar ên ag mỹ inh kãmén jé.

19 Ag jagfy sóg ã mỹ vênh fêg ke mũ, ag tỹ inh mré ã mỹ vênh vin kỹ nỹtĩ jé.

20 Hã ra sóg nén ù to vĩ sór mũ gé, sỹ ã mỹ ag kãmén kar kỹ. Û ag tóg ag vĩ mẽ kỹ inh ki genh ke mũ. Ên ag to sóg vĩ sór mũ gé.

21 Ag kar tỹ tỹ ùn pir nỹtĩnh ken kỹ tóg há tĩ, ã tỹ inh mré tỹ ùn pir nĩ ên ri ke, isỹ ã mré tỹ ùn pir nĩ ên ri ke. Ag tỹ êg mré tỹ ùn pir nỹtĩn kỹ tóg há tĩ. Kỹ vênh kar vỹ venh ke mũ, ã tỹ nén to inh jêñêg mũ ti.

22 Isỹ ã tóg ùn mág han. Kỹ sóg ag tỹ ùn mág han ke mũ gé, ag tỹ jagnê mré tỹ ùn pir nỹtĩ jé, ã tỹ inh mré tỹ ùn pir nĩ tag ri ke.

23 Inh mré ke vỹ tỹ ag nỹtĩ, kỹ sóg tỹ ag mré ke nĩ gé, kỹ êg kar vỹ tỹ ùn pir ri ke nỹtĩ. Êg tỹ tỹ ùn pir nỹtĩ tugrĩn vênh kar tóg venh ke mũ, ã tỹ inh jêñê ên ti. Ûn tỹ inh ki ge kỹ nỹtĩ ên ag to há távĩ ã tóg nĩ, ã tỹ iso há nĩ tag ri ke. Tag ve jé ag tóg ke mũ, êprã ke ag, ag tỹ êg tỹ tỹ ùn pir nỹtĩ tag ven kỹ.

24 Panh', vãsỹ ã tóg iso há nĩgtĩ vê, êg tỹ ga tag han tũg ki. Hã kỹ ã tóg isỹ ùn mág pê han. Kỹ tóg inh mỹ há tĩnh mũ, ag tỹ inh mré nỹtĩn kỹ, ã tỹ inh mỹ ùn vin mũ ên ag. Ag tỹ inh mré nỹtĩn kỹ ag tóg venh ke mũ, ã tỹ isỹ ùn mág han ja ti.

²⁵ Panh', jykre kuryj ã tóg nĩ. Û tỹ inh ki ge tũ ag vỹ ã ki kagtĩg nỹtĩ, ag jãvo sóg ã ki kanhró nĩ. Kỹ tag ki inh mré nỹtĩ ag vỹ ki kanhró nỹtĩ gé, ã tỹ nén to inh jẽnẽg mũ ti.

²⁶ Ag mỹ sóg ã kãmén huri, kỹ sóg ag mỹ ã kãmén mãn ke mũ gé, ag tỹ jagnẽ to há nỹtĩ jé, ag tỹ ã tỹ iso há tag ri ke nỹtĩ jé. Kỹ sóg ag mré ẽmãn ke mũ gé," he tóg, Jesus ti, ã panh mré vēmén kỹ.

18

Ag tỹ Jesus se

(Mt 26.47-56; Mc 14.43-50; Lc 22.47-53)

¹ Jesus tỹ tag tó kar kỹ tóg ã mré mũ tĩ ag mré tĩ mũ sir. Goj tỹ Cedrom kafã ù ra ag tóg pa mũ sir. Tá ka tóg krãkrãn kỹ nỹtĩ. Ka kré ẽn krẽm ag tóg nĩgnĩ mũ sir.

² Hã ra Judas tóg ti tĩg ẽn ki kanhró nĩ gé. Tã tóg ã mré mũ tĩ ag mré vēmén tỹ hẽn ri ke han huri, Jesus ti, hã kỹ Judas tóg ag tỹ ra mũnh ke ki kanhró nĩ, ù tỹ pã'i ag mỹ Jesus ve ke mũ ẽn ti.

³ Kỹ tóg ag nón tá jun mũ sir, Judas ti, soldado ag mré, polícia ag mré hã ke gé, pã'i ag tỹ ag jẽgnẽn kỹ. Fariseu ag vỹ pã'i ag mré polícia ag jẽgnẽ ja nĩ gé. Lampião e gég ag tóg kãmũ mũ, pĩ jónhkó ke gé, ka kykyv mré hã.

⁴ Hã ra Jesus tóg ki kanhró nĩ, ã jagtar ken ki, kỹ tóg ag kato tẽ mũ sir. Kỹ tóg ag mỹ: "ãjag tỹ ù tỹ hẽ ve sór nẽ?" he mũ.

⁵ Kỹ ag tóg ti mỹ: "Nazaré tá ke ẽn ve sór ẽg tóg mũ," he mũ. "Jesus vẽ mỹr," he ag tóg mũ. Kỹ Jesus tóg ag mỹ: "inh hã vẽ," he mũ. Hã ra Judas tóg ag mré kãtĩg ja nĩ gé, ù tỹ pã'i ag mỹ Jesus ven mũ ẽn ti.

⁶ Jesus tỹ ag mỹ: "inh hã vẽ," hen kỹ ag tóg ti jo ranh ke mũ. Rom ke ag tóg mũ sir, ẽprã.

⁷ Kỹ Jesus tóg ag mỹ vĩ mãn mũ. "ãjag tỹ ù ve sór nẽ?" he tóg. Kỹ ag tóg ti mỹ: "Jesus, Nazaré tá ke ẽn," he mãn mũ.

⁸ Kỹ Jesus tóg ag mỹ: "ãjag mỹ sóg: inh hã vẽ, hé huri. Kỹ ãjag tỹ ise sór kỹ inh mré ke tag ag togvãnh nĩ sir," he tóg.

⁹ Hã ra tóg tag tó, ã tỹ to hã ã panh mỹ: "ã tỹ inh mỹ ùn vin ja ẽn ag vỹ ki nỹtĩ, ag kãki ù vỹ vãfor ja tũ nĩ," he jan kỹ. ã tỹ ag jy nĩgãn jé tóg polícia ag mỹ: "ag togvãnh ra," he mũ, ã mré mũ tĩ ag to.

¹⁰ Hã ra Simão Pedro tóg ã rógro ẽn vyn kỹ tóg polícia ag kãki ù nĩgrẽg kym ke mũ. Ti pẽgia tá ti nĩgrẽg jẽ ẽn tỹ tóg kym ke mũ. Topẽ tũ ki rĩr tĩ to pã'i mág camarada ja vẽ, ti tỹ ù nĩgrẽg kym mũ ẽn ti, ti jijin hã vỹ: Malco, he mũ.

¹¹ Kỹ Jesus tóg Pedro mỹ: "ã rógro tỹ ti pãg ja tá fẽg," he mũ. "Inh panh tỹ inh mỹ: "vẽsỹrẽnh jé ã tóg ke mũ," he ja vẽ, hã kỹ sóg ag mỹ vẽn hẽg ke mũ ha. Vẽn nenh ke tũ sóg nĩ," he tóg, Jesus ti.

Pã'i tỹ Anás tỹ Jesus ve

¹² Kỹ soldado ag tóg, ãjag pã'i mré (ag tóg) Jesus mrĩnh mũ sir, vãfe tỹ. Polícia ag vỹ ag mré ti mrĩnh mũ gé.

¹³ Kỹ ag tóg ti pére mũ mũ, Anás ãn ra. Caifás kakrã vẽ, Anás ti, hã ra Caifás vỹ tỹ Topẽ tũ ki rĩr tĩ ag to pã'i mág nĩ, prỹg ẽn kã.

¹⁴ Hã ra Caifás ẽn vỹ pã'i ag mỹ: "ùn pir tỹ ẽg povo jagfỹ ter kỹ tóg pãgsĩ nĩ," he ja nĩ. Ẽn kakrã ãn ra ag tóg Jesus pére mũ mũ.

Pedro tỹ Jesus to: "ti ki kagtĩg sóg nĩ," he vén

(Mt 26.57-58, 69-70; Mc 14.53-54, 66-80; Lc 22.54-57)

15 Kŷ Simão Pedro tóg Jesus nón tĩ mũ, Jesus mré ke ù mré. Hã ra Jesus mré ke ù ên tóg Topê tũ ki rĩr tĩ ag to pã'i mág ên ki kanhró nĩ, hã kŷ tóg Jesus nón Anás ìn kãra rã mũ, ìn vãso ra.

16 Hã ra Pedro tóg re tá jẽ nĩ, ìn jãnkã rã hã. Kŷ Jesus mré ke ù ên tóg ver ù tŷ jãnkã ki rĩr mũ ên fi mré vëmén mũ, kŷ fi tóg Pedro ti mŷ: “ha kãrã,” he mũ, ti mré ke ù ên tŷ pã'i mág ki kanhró nũn kŷ.

17 Kŷ fi tóg ti mŷ: “ã hŷn tŷ Jesus mré ke nĩ,” he mũ, Pedro ti mŷ, ù tŷ jãnkã ki rĩr jẽ ên fi. Hã ra tóg fi mŷ ón kŷ: “vó,” he mũ.

18 Hã ra Anás camarada ù ag vŷ tá nŷtĩ gé, polícia ag mré. ìn vãso ki ag tóg pĩ han kŷ nŷtĩ, ti tŷ kusa jagy tũn kŷ. Pĩ to ag tóg tugtón nŷtĩ. Kŷ Pedro tóg ag mré tón nĩ gé, pĩ ên ti to.

Anás tŷ Jesus ki jëmẽ sór

(Mt 26.59-66; Mc 14.55-64; Lc 22.66-71)

19 Kŷ pã'i mág tóg Jesus mŷ: “ình mŷ ã mré mũ tĩ ag kãmén,” he mũ. “Ã tŷ nén kãmén tĩ ên ti kãmén nĩ gé, ình mŷ,” he tóg, Anás ti.

20 Kŷ Jesus tóg ti mŷ: “vẽnh kar mŷ sóg jamã hár(a) tó tĩ,” he mũ. “Vẽnh kanhrãn jafã krêm sóg tó tĩ, Topê jo ìn krêm ke gé. Judeu kar tŷ vẽnhmãn kŷ nŷtĩn kŷ sóg ag mŷ kãmén tĩ. Ình pi(jé) vẽn pèju kŷ tó tĩ, kŷ vẽn kar vŷ ki kanhró nŷtĩ.

21 Hã ra ã tóg ình ki jëmẽ sór mũ! Ình vĩ jëmẽg mũ ên ag ki jëmẽmnĩ. Ki kanhró ag tóg nŷtĩ, isŷ ag mŷ nén tó ja ên ki,” he tóg, Jesus ti.

22 Jesus tŷ tag tó kŷ polícia ù tóg Jesus tânũ mũ, kŷ tóg ti mŷ: “pã'i mág vẽ mŷr,” he mũ. “Hã ra ã tóg ti mŷ vĩ mũ,” he tóg mũ.

23 Kŷ Jesus tóg ti mŷ: “kŷ ình hŷn vẽn vĩ kórég tŷ ne tó?” he mũ. “Ha ình mŷ sŷ vẽn vĩ kórég tó mũ ên tó,” he tóg. “Vĩ há han ình, ã tŷ hã ra ne tugnĩn isãnh nê?” he tóg.

24 Tag pãte Anás tóg Jesus jënẽg mũ sir, ti tŷ Caifás venh tũg jé, Topê tũ ki rĩr ti ag to pã'i mág ên mŷ. Ti mrĩnh kŷ jẽ kŷ tóg ti jënẽg mũ.

Pedro tŷ Jesus to: “ti ki kagtĩg sóg nĩ,” he mãn

(Mt 26.71-75; Mc 14.69-72; Lc 22.58-62)

25 Hã ra Simão Pedro tóg tón nĩ nĩ, pĩ to. Kŷ tá nŷtĩ ag tóg ti mŷ: “ã hŷn tŷ ti mré ke nĩ gé,” he mũ. Hã ra tóg ón kŷ: “vó,” he mãn mũ.

26 Kŷ pã'i mág mŷ rãnrhãj tĩ ù vŷ tá nĩ gé. Pedro tŷ ù nĩgrẽg kym ja ên kanhkã ù vẽ. Ên vŷ Pedro mŷ: “ã ve ình, ka kré krêm,” he mũ. Tá ã tóg ti mré jẽ ja nĩ,” he tóg mũ.

27 Hã ra Pedro tóg ón kŷ ti mŷ: “vó,” he mãn mũ. Ên kã galo vŷ kynkыр mũ ha.

Pilatos tŷ Jesus ki jëmẽ

(Mt 27.1-2, 11-14; Mc 15.1-5; Lc 23.1-5)

28 Kusã pẽ ki ag tóg Jesus pére mũ mũ, pã'i tŷ governador ìn ra, ti vëmén jafã ra, palácio ên ra. Caifás ìn tá ag tóg ti pére kãpa mũ. Hã ra ag tóg pã'i tŷ governador ìn kã ra ge sór tũ nĩ. Ag tŷ festa tŷ Páscoa han ke vŷ kakó tĩ ha, kŷ ù tŷ pã'i tŷ governador ìn kã ra ge mũ vŷ festa tŷ Páscoa ên ki jẽn ke tũ nĩ. Ag jykre vẽ. Hã ra ag tóg ko sór mũ, hã kŷ ag tóg kã ra ge ja tũ nĩ sir.

29 Kŷ Pilatos tóg re ra kãkutẽ mũ, ag mré vëmén jé. Kŷ tóg ag mŷ: “ti hẽ ri ké?” he mũ. “Ti vẽn jykre kórég tŷ ne han?” he tóg, Pilatos ti, Jesus to.

30 Kŷ ag tóg ti mŷ: “vẽn jykre kórég han ti tĩ,” he mũ. “Ti há nĩ ra êg tóg ã mŷ ti ven ke tũ nĩ vẽ,” he ag tóg, Pilatos mŷ.

³¹ Kŷ Pilatos tóg ag mŷ: “ha mŷjĕg,” he mŷ. “Ājag jykre ki ājag tóg ti jykre kórĕg ěn to jykren kŷ tónh ke mŷ, ti jykre ti,” he tóg. Hã ra ag tóg ti mŷ: “ti ter ke vē,” he mŷ. “Kŷ ā hã vŷ ěg mŷ: “ha ti tén,” henh ke mŷ,” he ag tóg, pã'i ag, Pilatos mŷ.

³² Hã ra Jesus tóg ag tŷ fóg tŷ pã'i mŷ ā fĕg ke tag tó ja nŷ, fóg ag tŷ cruz to ti sa kŷ ti tén jĕ. Hã kŷ ag tóg Pilatos mŷ ti ven mŷ.

³³ Kŷ Pilatos tóg ā ĩn kãra rã mân mŷ, Jesus mrĕ vĕmĕn jĕ. Kŷ tóg ti mŷ: “ā mŷ tŷ Judeu ag pã'i mág nŷ?” he mŷ.

³⁴ Kŷ Jesus tóg ti mŷ: “ũ nŷ ā mŷ tag tó?” he mŷ. “Ā tŷ vĕsóg ki to jykren mŷ vó, pã'i ag tŷ ā mŷ tó mŷ vó?” he tóg.

³⁵ Kŷ Pilatos tóg: “inh pi(jĕ) tŷ Judeu nŷ,” he mŷ. “Ā kanhkã ag vŷ inh mŷ ā fĕg, ā povo to pã'i ag. Ā hĕ ri kĕ?” he tóg.

³⁶ Kŷ Jesus tóg ti mŷ: “inh pi(jĕ) tŷ ga tag kri pã'i mág nŷ,” he mŷ. “Isŷ tŷ tag ki ũn mág nŷ ra inh krĕm ke ag tóg Judeu ag mrĕ jagnĕ génh ke mŷ vē. kŷ ag tóg isenh ke tũ nŷ vē. Hã ra sóg tag ki tŷ ũn mág tũ nŷ, hã kŷ ag tóg isĕ, Judeu ag,” he tóg, Jesus ti.

³⁷ Kŷ Pilatos tóg ti mŷ: “kŷ ā mŷ hã ra tŷ pã'i mág nŷ?” he mŷ. Kŷ Jesus tóg: “ki hã ā tóg tó mŷ,” he mŷ. “Isŷ ki hã tó jĕ, hã jĕ sóg ga kri mur ja nŷ, hã jĕ sóg ga kri tũ mŷ gé. Kŷ ũ tŷ ki hã tó to há nŷtĭ ěn ag kar vŷ inh vŷ jĕmĕg mŷ,” he tóg, Jesus ti.

³⁸ Kŷ Pilatos tóg ti mŷ: “ne nŷ tŷ ki hã ke nŷ?” he mŷ. “Sŷ ki kanhrãn jãvãnh mĕ tóg tŷ,” he tóg, Pilatos ti.

Jesus ter ke

(Mt 27.15-31; Mc 15.6-20; Lc 23.13-25)

Kŷ tóg re ra tŷg mân mŷ, pã'i ag mrĕ vĕmĕn jĕ, kŷ tóg ag mŷ: “ti pi(jĕ) vĕnh jykre kórĕg han tŷ,” he mŷ.

³⁹ “Pãsoa kar ki sóg ājag mŷ vĕse ũ kavãg tŷ. Kŷ inh hŷn ājag mŷ ājag tŷ ũ to: “Judeu ag pã'i,” he mŷ ěn kyvãn ke mŷ,” he tóg, Pilatos ti.

⁴⁰ Hã ra ag kar tóg prĕnprĕr mŷ sir. “!..Jesus pijĕ!..! Barrabás kava ra..!” he ag tóg mŷ sir, prĕnprĕr kŷ. Hã ra Barrabás ěn vŷ tŷ ũn jykre kórĕg pĕ nŷ.

19

¹ Kŷ Pilatos tóg soldado ag mŷ: “ti mrãnmrãn ra, ge kŷ,” he mŷ.

² Kŷ ag tóg ti mrãnmrãn mŷ. Ti mrãnmrãn kar kŷ ag tóg sónh pŷrĭn kŷ ti krĭ tógfĭg mŷ sir. Kŷ ag tóg kur kusŷg tŷ ti kri fón mŷ gé sir.

³ Ti ki junjun kŷ ag tóg ti mŷ: “viva, Judeu ag pã'i!,” he mŷ, ti nyg kŷ. Kar ag tóg ti tãnh mŷ gé sir.

⁴ Kŷ Pilatos tóg re ra kutĕ mân mŷ gé sir. Kŷ tóg vĕnh kar mŷ: “ha vé ha,” he mŷ. “Ti jykre kórĕg mĕ ja tũ sóg nŷ vē. Kŷ sóg ājag mŷ ti ven mŷ. Nĕn ũ vĕnhmŷ han tũ ti nŷ vē,” he tóg, Pilatos ti, ag mŷ.

⁵ Kŷ Jesus tóg kãkutĕ mŷ, hã ra tóg sónh tŷ ā krĭ tógfĭn kŷ kãkutĕ mŷ, kur kusŷg ěn tu kŷ ke gé. Kŷ Pilatos tóg vĕnh kar mŷ: “ti ve ra,” he mŷ, ag tŷ hĕn ri ke mŷn ti tovãnh jĕ, ag tŷ ti jagtar ěn ve kŷ.

⁶ Pã'i ag tŷ ti ve kŷ, policĭa ag tŷ ti ve kŷ ag tóg prĕnprĕr mŷ gé sir. “!..Ka to ti sã..! !..Ka to ti sã..!” he ag tóg mŷ sir, prĕnprĕr kŷ. Kŷ Pilatos tóg ag mŷ: “kŷ ājag hŷn inhã ka to ti sa sór mŷ,” he mŷ. “Ti pi(jĕ) nĕn ũ kórĕg han mŷ,” he tóg.

⁷ Kÿ ag tóg ti mÿ: “hã ra tóg: “tÿ inh Topê kósin nĩ,” he tĩ êg mÿ,” he mũ. “Êg tÿ ù tÿ ge tén ke vê. Hã tó ja ti nĩ, êg mÿ, Topê ti, hã kÿ tóg rán kÿ nĩ,” he ag tóg mũ sir, Pilatos mÿ.

⁸ Kÿ Pilatos tÿ ti tÿ tÿ Topê kósin nĩ mẽ kÿ tóg ti mÿ e tãvĩ tĩ.

⁹ Kÿ tóg ã ãn kãra rã mân kÿ Jesus mÿ: “tÿ ã hẽ tá ke nĩ?” he mũ. Hã ra Jesus tóg ti mré vēmén mân sór tũ nĩ.

¹⁰ Kÿ Pilatos tóg ti mÿ: “ã mÿ inh mré vēmén ke tũ?” he mũ. “Isÿ ã kavãn sór nĩ kÿ sóg ã kyvãg mũ. Isÿ ka to ã sa sór kÿ sóg to ã sãg mũ gé. Tag to jykrén,” he tóg, Pilatos ti, Jesus mÿ.

¹¹ Hã ra Jesus tóg ti mÿ: “Topê tÿ ã tÿ pã'i han tũ nĩ ra ã tóg tag han ki kagtũg nĩnh mũ vê,” he mũ. “Hã kÿ ù tÿ ã mÿ inh fêg mũ ên vÿ ã tÿ Topê vĩ mranh mũ tag kãfór nĩ ha,” he tóg, Jesus ti.

¹² Kÿ tóg Pilatos mÿ e pẽ tãvĩ tĩ, kÿ tóg ti kavãn sór mũ sir. Hã ra Judeu ag tóg ti mÿ: “ã tÿ tag kyvãn kÿ ã pi(jé) tÿ êg kar kri pã'i mág pẽ tÿ Imperador ên mré ke nĩ,” he mũ. “Û tÿ vêsÿ pã'i mág han mũ ên vÿ Imperador kato tẽ mũ,” he ag tóg.

¹³ Kÿ Pilatos tóg ag vĩ tag mẽ kÿ mũmêg mũ, kÿ tóg Jesus jé prêr mũ, ti tÿ ti mré re tá jênh kutê jé. Kÿ tóg ã nĩgja ên kri nĩ nĩ, ã tÿ hẽ tá vênh kar jykre vég tĩ ên ki. Tá ag tóg pó nê ja nĩgtĩ, hã kÿ ag tóg to: “Pó Nê,” he tĩ, hã vÿ: “Gabatá,” he mũ, Hebreu vĩ ki.

¹⁴ Meio dia ki ke vê. Tÿ vaj kÿ ag tóg festa tÿ Páscoa ên han sór mũ, hã kÿ ag tóg ùri vêjên tÿ hên ri ke kãn mũ. Ên kã meio dia ki Pilatos tóg ã nĩgja kri nĩ nĩ, ag mÿ ag tÿ vênh jykre han ke mũ ên tó jé. Kÿ tóg Judeu ag mÿ: “ãjag pã'i mág hã vê ha,” he mũ.

¹⁵ Hã ra ag tóg prênprêr kÿ: “!..ti tén ra, ti tén ra, ka to ti sã..!” he mũ sir.

“Kÿ inh mÿ ãjag pã'i mág tÿ cruz to sanh mũ?” he tóg, Pilatos ti. Kÿ pã'i ag tóg ti mÿ: “pã'i mág êg nÿtĩ, hã vÿ: Imperador, he mũ,” he mũ.

¹⁶ Kÿ Pilatos tóg ag mÿ: “ha cruz to ti sanh mũjêg gé,” he mũ sir.

Ag tÿ Jesus tÿ cruz to sanh ke

(Mt 27.32-44; Mc 15.21-32; Lc 23.26-43)

¹⁷ Kÿ ag tóg Jesus mÿ cruz fig mũ, ti tÿ vyn kÿ pãnónh tÿ Calvário ra tĩg jé, ag tÿ Hebreu vĩ ki to: Gólgota, he mũ ên ra.

¹⁸ Tá ag tóg cruz to ti sãg mũ sir. Ti mré ag tóg ùn régre ag tÿ cruz to ag sãg mũ gé, kÿ ù vÿ ti pègja tá cruz to sa, jãvo ù vÿ ti jakãnh tá cruz to sa gé. Jãvo Jesus vÿ ag kaju kã cruz ti to sa gé.

¹⁹ Hã ra Pilatos tóg Jesus to vênh rá han ja nĩ, kÿ ag tóg ti krĩg mÿ vênhrá ên sa ja nĩ, hã vÿ: “Nazaré tá Jesus vê, Judeu ag pã'i tÿ rei vê,” he mũ, vênh rán ki. Hebreu vĩ ki tóg rán kÿ nĩ, Latim vĩ ki ke gé, Grego vĩ ki ke gé.

²⁰ Kÿ Judeu tÿ hên ri ke ag tóg vég mũ sir, vênh rá ti. Jerusalém vÿ tá kakó nĩ, Jesus tÿ hẽ tá cruz to sa kÿ jê ên ti tá, hã kÿ ù tÿ hên ri ke ag tóg ti venh kãmũjêg sir.

²¹ Kÿ tóg pã'i ag mÿ há tũ nĩ. Hã kÿ ag tóg Pilatos mÿ: “Judeu ag pã'i tÿ rei vê, he ja ã nĩ, vênh rán ki,” he mũ. “Hã ra tóg ki krov ja tũ nĩ. Vêso tóg: “tÿ sóg Judeu ag pã'i tÿ rei nĩ,” he ja nĩ. Kÿ: Judeu ag pã'i mág vÿ tÿ inh nĩ, he rán nĩ,” he ag tóg, Pilatos mÿ.

²² Hã ra Pilatos tóg ag mÿ: “vó,” he mũ. “Rán inh huri, kÿ tóg rán kÿ nĩ ha,” he tóg mũ.

²³ Kĩ soldado ag tóg Jesus tỹ ka to sãg mũ. Kĩ ag tóg ti kur mãn kĩ vênh kãpãm mũ. Ủ tỹ 4 (ke) ag vê, soldado ag, hã kĩ ag tóg ti kur tỹ vênh kãpãm tỹ 4 (ke) han mũ. Hã ra ti vênh kri fêg ja vỹ kur pir tỹ há nĩ. Kurÿr tũ ti nĩ.

²⁴ Kĩ ag tóg ti capa há ve kĩ jagnê mỹ: “êg hỹn tag kym ke tũ nĩ,” he mũ. “Ti capa to jogar he jê êg tóg ke mũ. Ủ tỹ mãng mũ ên hã vỹ tóg tunh mũ,” he ag tóg mũ. Kĩ ag tóg to jogar he mũ sir. Hã ra ag tỹ ti kur to jogar he mũ ên tóg rãn kĩ nĩ gé, Topê vĩ rá ki, ha mẽ. “Inh kur tỹ vênh kãpãm ag tóg, hã ra ag tóg inh kur tỹ vênh kri fêg ja to jogar he mũ,” he ja tóg nĩ, Topê vĩ rá ki, hã kĩ ag tóg ke mũ.

²⁵ Hã ra Jesus mỹnh fi vỹ tá jê nĩ, cruz rã hã, fi jãvy fi mré. Kar kĩ Maria Madalena fi vỹ tá jê nĩ gé, kar kĩ Maria ủ fi ke gé, Clopas prũ fi.

²⁶ Kĩ Jesus tóg ã mỹnh fi vég mũ sir. Ti mré tĩ mũ ủ vỹ fi to grên ke kĩ jê nĩ, Jesus tỹ ủ to há pê ên ti. Kĩ Jesus tóg ã mỹnh fi mỹ: “tag vỹ tỹ ã kósín nĩnh mũ ha,” he mũ, ã mré tĩ mũ ên to.

²⁷ Jãvo tóg ti mỹ: “fi hã vỹ tỹ ã mỹnh nĩnh mũ ha,” he mũ gé, fi to. Hã kĩ ti mré tĩ mũ ên tóg fi mỹ: “inh mré nĩnh kãtĩg,” he mũ, kĩ fi tóg ti ìn krêm nĩ nĩ, ti tỹ Jesus jêgja ki fi jê'yn jê.

Jesus ter

(Mt 27.45-56; Mc 15.33-41; Lc 23.44-49)

²⁸ Jesus tỹ ã mỹnh fi mỹ tag tó kar kĩ tóg sir ã tỹ nén hyn han ke mũ ên hyn han kãn ja nĩ. Hã to jykren kĩ tóg hã ra nén tỹ ã to rãn kĩ nĩ ên hyn han kãn sór mũ, hã kĩ tóg: “inh og há tóg tĩ,” he mũ sir.

²⁹ Tá runja ủ vỹ nĩ nĩ, hã ra vinho kaja pir vỹ ki nĩ, runja ên ki. Kĩ ag tóg esponja tỹ vinho ki tỹ pun ke mũ, kĩ ag tóg ka tỹ hissopo jurÿn kĩ (ag tóg) nén kugpe jafã ên kusón mũ, kusón kĩ ag tóg vinho kãra rãg kĩ ti mỹ jun mũ sir, vinho ti.

³⁰ Kĩ tóg ki ùnh ùnh ge mũ sir, vinho ên ki. Kĩ tóg: “ke kãn inh huri,” he mũ. Kĩ ti krĩ tóg héré! he mũ, kĩ tóg hun ke mũ. Kĩ tóg hur ter.

Soldado ủ tỹ Jesus kusón

³¹ Kĩ Judeu ag tóg Pilatos mỹ to vĩ mũ, soldado ag tỹ ủ tỹ ka to sa kĩ nỹtĩ ag fa mrynhmranh jé, ag tỹ kãnhmar kãgter jê. Tỹ vaj kĩ ag mỹ festa mág vê, kĩ ag tóg ùri festa ên to nén kar kãnkãn tĩ gé. Hã ra tóg ag mỹ kórég nĩ, ủ tỹ ag festa kurã ki cruz to sa kĩ ter mũ ti. Hã kĩ ag tóg Pilatos mỹ ag kãgtén ke to vĩ mũ, ag tỹ ka to ag kãrem jê.

³² Kĩ soldado ag tóg ủ tỹ Jesus mré cruz to vin kĩ nỹtĩ ag fa mrynhmranh mũ mũ.

³³ Kĩ ag tóg Jesus fa mrynhmranh sór mũ gé, hã ra tóg hur ter, hã kĩ ag tóg mrynhmranh tũ nĩ sir.

³⁴ Kĩ soldado ủ tóg ã rógro tỹ ti jên'yr ki kusón mũ, kĩ ti kyvénh tóg ki kãkutê mũ, kyvénh jãpri mré.

³⁵ Tag ve inh, mỹr, ha mẽ, hã kĩ sóg ãjag mỹ tó mũ. Sỹ ki hã tó vê. Sỹ ãjag mỹ tag kãmén vê, ãjag tỹ inh vĩ tag kri fi jê, ãjag tỹ ti ki ge sór jê.

³⁶ Hã ra tóg rãn kĩ nĩ gé, ag tỹ ti kusón ke tag ti. “Ag pí(jé) ti kuka mrynhmranh ke mũ,” he tóg, Topê vĩ tỹ rãn kĩ nĩ ki.

³⁷ Kĩ tag tóg rãn kĩ nĩ gé, hã mẽ. “Ag tỹ ùn kusón mũ ên ve jê ag tóg ke mũ,” he tóg mũ gé, Topê vĩ ki, Jesus to.

Ag tỹ vênh kej ra ti va mũ

(Mt 27.57-61; Mc 15.42-47; Lc 23.50-56)

³⁸ Kŷ Jesus to há ũ tóg nŷgtŷ, Arimatéia tá José. Ěn vŷ ti mré tŷg ja tũ nŷgtŷ, ti tŷ pã'i ag kamĕg kŷ, hã ra tóg Jesus to há nŷ. Ěn vŷ tóg sir Pilatos venh tŷ mŷ, kŷ tóg ti mŷ: "sŷ Jesus tŷ ka to ti kãtérem há tóg tŷ," he mŷ. Kŷ Pilatos tóg ti mŷ: "há ti nŷ," he mŷ. Kŷ Arimatéia tá José ěn tóg Jesus tŷ cruz to ti kãtérem tŷ mŷ.

³⁹ Kŷ Nicodemos vŷ kãti mŷ gé, ũ tŷ kuty tá Jesus mré vĕmén mŷ ěn ti. Ěn vŷ ger há ma kãti mŷ, 45 (ke) quilos vĕ mŷr. Ka tŷ mirra jĕnjo ger há vĕ, kar ka tŷ aloés jĕnjo ger há mré. Ěn ma kãtŷg tóg mŷ, Nicodemos ti.

⁴⁰ Kŷ ag tóg Jesus ti kãtérem mŷ sir, cruz to, José mré Nicodemos ti. Ti pãg ag tóg mŷ sir, kur tŷ, hã ra ag tóg nĕn ger há ěn tŷ ti pãg ke ěn kãkã nŷm mŷ gé. Judeu ag jykre hã vĕ, ag tŷ vĕnh kej tá ũ fi kŷ.

⁴¹ Ka kré ũ vŷ Gólgota tá kakó nŷ, kŷ tóg tá vĕnh kej tãg nŷ, pãró nor ti, ka kré ěn tá. Kuprã ti nŷ.

⁴² Ěn kãkã ag tóg ti fig mŷ, ti kakó nŷn kŷ. Hã ra tóg rãkĕ nŷ ha, kŷ ag festa tóg kakó' he mŷ ha, hã kŷ ag tóg vĕnh kej tãg ěn kãkã Jesus fig mŷ sir.

20

Jesus rŷr mãn

(Mt 28.1-8; Mc 16.1-8; Lc 24.1-12)

¹ Tŷ vaj ũn kŷ, semana ki kurã ve ki Maria Madalena fi tóg Jesus venh tŷg sór mŷ, ti kej tá. Kusã pĕ ki fi tóg ra tŷ mŷ, kurã sŷ hã ra. Hã ra fi tóg tá jun kŷ (fi tóg) pó ěn vég mŷ, ti kej nŷfe ěn ti. Kunŷnh kŷ tóg jĕ nŷ, kŷ tóg sir nor kŷ nŷ nŷ, ti kej ti.

² Kŷ fi tóg Simão Pedro to vĕnhvãg tŷ mŷ sir, Jesus mré tŷ tŷ ũ to ke gé, ũ tŷ Jesus to há tãvi ěn to. Kŷ fi tóg ag mŷ: "ĕg Senhor va ag tóg mŷ ja nŷ," he mŷ. "Ā kej kãki tóg tũ nŷ," he fi tóg mŷ. "Ag hŷn hĕ ra ti va kagáv," he fi tóg mŷ ag mŷ.

³ Kŷ ag tóg venh mŷ mŷ gé, Pedro ti, Jesus mré tŷ tŷ ũ ěn ke gé.

⁴ Péte ag tóg mŷ mŷ, hã ra ũ ěn tóg Pedro kã raran ke mŷ, kŷ tóg tá jun vén mŷ.

⁵ Kŷ tóg pãró nor ěn ki pãnh ke kŷ kãtã kur ěn vég mŷ, ti pãg ja ti, hã ra tóg kãra rã ja tũ nŷ.

⁶ Kŷ Simão Pedro tóg ti nón tá jun mŷ gé, hã ra tóg inhhã kãra rã mŷ, ti kej kãra, Pedro ti. Kŷ tóg kur ěn vég mŷ gé sir.

⁷ Ti krŷ pãg ja vŷ vyr mŷ nŷ nŷ, kónhpĕn kŷ.

⁸ Kŷ ũ ěn tóg ti nón kãra rã mŷ gé sir, kŷ tóg Ā tŷ ven kŷ: "hã ja vĕ," he mŷ.

⁹ Vãhã ag tóg ki kanhró nŷtŷ. Tag to há ag tóg ti vŷ to jykren há han ja tũ nŷ ver, ti to nĕn rãn kŷ nŷ ěn to, ti tŷ Ā ter kar kŷ rŷr mãn ke ěn to. Vãhã ag tóg ki kanhró nŷtŷ.

¹⁰ Ag tŷ ti kej tŷ kuprã nŷ ve kar kŷ ag tóg vŷnvŷn ke mŷ, Ājag ĩn ra.

Jesus tŷ Maria Madalena fi mŷ vĕnh ven

(Mt 28.9-10; Mc 16.9-11)

¹¹ Hã ra Maria Madalena fi tóg tá jĕ nŷ, ti kej nor nŷ ěn tá. Fŷ fi tóg jĕ nŷ. Fi fŷ kŷ fi tóg ti kej to pãnh ke kŷ (fi tóg) kãtã ěvãnh mŷ sir.

¹² Kŷ fi tóg ũn régre ag vigvég mŷ. Topĕ tŷ jĕgnĕ jafã ag vĕ. Kur kupri rŷnh kŷ ag nŷgnŷg kŷ nŷtŷ, Jesus nŷgja tá, ti kej kãtã. Ũ tóg ti krŷ nŷgja tá nŷ, kŷ ũ tóg ti pĕn nŷtŷgja tá nŷ gé.

¹³ Kÿ ag tóg fi mÿ: “ã tÿ ù jãvãnh kÿ fÿ nê, jÿ?” he mÿ. Kÿ fi tóg ag mÿ: “inh Senhor va ag tóg mÿ ja nÿ, hã ra sóg ag tÿ hê ra ti va mÿ ja ên ki kagtÿg nÿ,” he mÿ.

¹⁴ Kÿ fi tóg vësykã êvãnh mÿ, hã ra Jesus tóg tá jê nÿ. Hã ra fi tóg ti ki kagtÿg nÿ.

¹⁵ Kÿ tóg fi mÿ: “ã tÿ ù jãvãnh kÿ fÿ nê, jÿ?” he mÿ gé. Hã ra fi tóg ti to: “ti hÿn tÿ ka krê tag ki rÿr tÿ jê, he sóg mÿ,” he mÿ. Hã kÿ fi tóg ti mÿ: “ã mÿ ag tÿ hên ra ti va mÿ vég tÿ, vÿ?” he mÿ.

¹⁶ Kÿ Jesus tóg fi mÿ: “Maria’,” he mÿ, fi jiji tó kÿ. Kÿ fi tóg ti tÿ fi mÿ fi jÿy tó kÿ (fi tóg) vãhã ti ki kanhrãn mÿ sir. Kÿ fi tóg ti mÿ: “Raboni’, ã hã mÿ?” he mÿ. Hebreu vÿ ki fi tóg tó mÿ, hã kÿ fi tóg: “Raboni’,” he mÿ. Êg vÿ ki êg tóg tag to: “Senhor,” he tÿ. Fi tÿ vãhã Jesus ki kanhrãn kÿ nÿn kÿ fi tóg ti mÿ ke mÿ.

¹⁷ Hã ra Jesus tóg fi mÿ: “inh vóg tÿg nÿ ver,” he mÿ. “Isÿ ver inh panh ra tâpÿrnh ke vê. Inh kanhkã ag mÿ tónh tÿg nÿ hã ra. Ag mÿ: “isÿ ver inh panh venh tÿg ke vê, hã ra tóg tÿ ãjag panh nÿ gé, he tóg,” hemnÿ. “Isÿ ver inh Topê to tâpÿrnh ke vê, kÿ tóg tÿ ãjag Topê nÿ gé, he ti,” hemnÿ ag mÿ,” he tóg Jesus ti, Maria Madalena fi mÿ.

¹⁸ Kÿ fi tóg ti mÿ, ti mré mÿgtÿ ag mÿ tó jé. “Êg Senhor ve inh,” he fi tóg mÿ. Kÿ fi tóg ag mÿ tó kãn mÿ sir, ti tÿ fi mÿ nén tó mÿ ên ti.

*Jesus tÿ ã mré mÿ tÿ ag mÿ vënh ven
(Mt 28.16-20; Mc 16.14-18; Lc 24.36-49)*

¹⁹ Kurã ên kã, semana tÿ kurã ve ên tÿ rãkãnh kÿ ag tóg vënhmãnh kÿ nÿtÿ, Ìn ù krêm, ti mré mÿ tÿ ag. Hã ra ag tóg jãnkã nífénh ja nÿ, chave tÿ, ag tÿ êprã pã'i ag kamêg kÿ. Hã ra Jesus tóg vãhã vënh ven mÿ, ag kãki, kÿ tóg ag mÿ: “mÿ sér nÿtÿmni,” he mÿ.

²⁰ Tag tó kÿ tóg ag mÿ ã nÿgê nug ven mÿ, ã jên'yr ti ke gé. Kÿ tóg ag mÿ sér tÿ sir, ag tÿ êg Senhor ven kÿ.

²¹ Kÿ tóg ag mÿ ke mãn mÿ. “Mÿ sér nÿtÿmni,” he tóg. “Inh panh tÿ inh jênê vê. Kÿ sóg ùri ãjag jênêg mÿ gé, ti tÿ inh jênê ri ke,” he tóg.

²² Tag tó kar tóg ag ki hu he mÿ, ag kar ki, kÿ tóg ag mÿ: “Topê kuprÿg vÿ tÿ ãjag jagrê nÿtÿ ha,” he mÿ.

²³ “Ãjag tÿ ù mÿ: “ã tÿ Topê vÿ mranh ja ên tÿ tóg vënh pãte fón mÿ,” hen kÿ tóg vënh pãte fón kÿ nÿ nÿ. ãjag tÿ ù mÿ: “ã mÿ ti vënh pãte fón ke tÿ nÿ,” hen kÿ tóg vënh pãte fón ke tÿ nÿ,” he tóg, Jesus ti, ti tÿ ag mÿ vënh ven ven kÿ.

Tomé tÿ vãhã Jesus ve

²⁴ Hã ra Tomé vÿ ag mré nÿ ja tÿ nÿ, ag tÿ Jesus vég mÿ ên kã. Tomé ên vê, ag tÿ ù to: “ùn vëgni,” he mÿ ên vê, Jesus mré tÿ tÿ ù ên ti.

²⁵ Ag tÿ Tomé ên ve kÿ ag tóg ti mÿ: “êg Senhor ve êg,” he mÿ. Hã ra tóg ag mÿ: “ti nÿgê nug ve sór inh mÿ,” he mÿ, “isÿ ag tÿ prego tÿ ti nÿgê nugnón ja ên mê jé, inh nÿgê tÿ,” he tóg mÿ. “Kÿ sóg ti jên'yr ki mênh ke mÿ gé, sÿ ki ti kusón ja ên mê jé. Ke tÿ nÿ (mÿ) ra isóg kri nÿm ke tÿ pê nÿ, ti rÿr mãn kri,” he tóg, Tomé ti.

²⁶ Kurã tÿ 8 (ke) tÿg kÿ ag tóg vënh mãn kÿ nÿtÿ gé, kÿ Tomé vÿ ag mré nÿ gé. Ìn jãnkã vÿ ki chaven kÿ nÿtÿ. Kÿ Jesus tóg ag mÿ vënh ven mãn mÿ, ag mré jên kÿ. Kÿ tóg ag mÿ: “mÿ sér nÿtÿmni,” he mÿ.

²⁷ Kÿ tóg vësÿmér Tomé mÿ: “ã nÿgê tÿ inh nÿgê nugnor mê,” he mÿ. “Ã nÿgê tÿ inh jên'yr kusón ja ên ti mê gé. Kri nÿmni, to: “vënh ó vê,” he mãn tÿg nÿ,” he tóg, Jesus ti.

²⁸ Kÿ Tomé tóg ti mÿ: “inh Senhor,” he mÿ. “Topê!,” he tóg.

²⁹ Kÿ Jesus tóg ti mÿ: “vãhã ã tóg kri nĩm sór mÿ ha, ã tÿ inh ve kÿ,” he mÿ. “Û tÿ ã tÿ inh vég tũ ra kri nĩm mÿ ên mÿ tóg ví há pê han ke mÿ, Topê ti,” he tóg, Jesus ti, ti tÿ ag mÿ vènh ven mãn kÿ.

Êg tÿ Jesus ki ge jé livro tag tóg rán kÿ nĩ

³⁰ Jesus vÿ ag rĩnve êg tÿ nèn han vãn hyn han kãn ja nĩgtĩ, nèn tÿ hèn ri ke, hã ra sóg rán kãn ja tũ nĩ.

³¹ Sÿ livro tag rán vè, ù tÿ vènh rá tag vég mÿ kar ên ag tÿ Jesus ki ge sór jé, ag tÿ ti to: “Cristo vÿ tÿ ti nĩ, Topê kósın vÿ tÿ ti nĩ,” he jé. Kÿ ãjag tÿ ti ki ge kÿ ãjag tóg rĩr krÿg ja tũ ên venh ke mÿ, ti tugrĩn, mÿr, ha mẽ.

21

Jesus tÿ ã mré mÿ tĩ ù ag mÿ vènh ven mãn

¹ Tag pãte Jesus tóg kejên goj tÿ Tiberíades tá ag mÿ vènh ven mãn mÿ, kÿ tóg ge tĩ, ha mẽ.

² Simão Pedro vÿ tá nĩ, Tomé ti ke gé, ag tÿ ù to: “ün vègni,” he mÿ ên ti, kar kÿ Natanael ti ke gé, êmã tÿ Caná tá ke ên, ga tÿ Galiléia tá ke ên, kar kÿ Zebedeu krê ag vÿ tá nÿtĩ gé, ù tÿ Jesus mré mÿ tĩ régre ù ag ke gé.

³ Kÿ Simão Pedro vÿ ag mÿ: isÿ pirã kugmĩnh tĩg vè,” he mÿ. Kÿ ag tóg ti mÿ: “ã mré êg mũnh mÿ,” he mÿ gé. Kÿ ag tóg barco ki ge mÿ, goj kri mÿ jé. Hã ra ag tóg nèn ù kãgmĩg tũ pê nĩ, kuty ên kã.

⁴ Tÿ vaj kÿ kusã pê ki, rã tÿ jun ke mÿ ra Jesus vÿ ga fyr tá jẽ nĩ, hã ra ag tóg ti ki kagtĩg nÿtĩ ver.

⁵ Kÿ tóg ag mÿ: “ãjag mÿ pirã ù kãgmĩg tũ?” he mÿ. Kÿ ag tóg ti mÿ: “hÿ,” he mÿ.

⁶ Kÿ tóg ag mÿ: “rede tÿ barco pègja tá fón,” he mÿ, “kÿ ãjag tóg kugmĩnh ke mÿ, pirã ti,” he tóg mÿ. Kÿ ag tóg ke mÿ. Kÿ tóg fór mÿ, rede ti, kÿ ag tóg kãtãnfyn kórég nÿtĩ, ti kufy tĩn kÿ, pirã e nÿtĩn kÿ.

⁷ Kÿ ù tóg Pedro mÿ: “êg Senhor hã vè,” he mÿ. Jesus tÿ ù to há pê ên vÿ Pedro mÿ ke mÿ. Kÿ Pedro tóg ti ví tag to ã kur rĩnh mãn mÿ. Kunũnh ja ti nĩ, ti kur ti. Æ kur rĩnh kÿ tóg barco ki kãkutẽ kÿ (tóg) goj kãmĩ tĩ mÿ sir, ti tÿ Jesus kukãm tĩg jé, goj kãmĩ.

⁸ Hã ra ag tóg ti nòn barco kãmĩ mÿ mÿ gé, rede ên raran ag tóg mÿ mÿ. Kakó ti nĩ ha, goj fyr ti, 100 (ke) metros hÿn.

⁹ Ag tÿ vagvag ke pa kÿ ag tóg Jesus jãká vég mÿ sir. Pirã kugin tóg nĩ nĩ, kÿ êmĩ tóg tá ti rã nĩ gé.

¹⁰ Kÿ Jesus tóg ag mÿ: “ãjag pirã gé kãmũjèg,” he mÿ.

¹¹ Kÿ Simão Pedro tóg barco kãra rã kÿ rede ên raran mÿ. Goj fyr kukãm tóg ma tĩ mÿ, kÿ tóg vag ke mÿ sir, tar tá. Hã ra tóg fór nĩ, rede ti, pirã tÿ, 150 (ke) hÿn, pirã mág tãví. Hã ra rede tóg jar ja tũ nĩ, ti e tãví nÿtĩ ra.

¹² Kÿ Jesus tóg ag mÿ: “konh kãmũjèg,” he mÿ. Hã ra ag tóg ti mÿ: “tÿ ã ù nĩ?” he jãvãn h nÿtĩgtĩ. Ti ki kanhró ag tóg nÿtĩ, ti tÿ tÿ êg Senhor nĩn ki.

¹³ Kÿ Jesus tóg ag mÿ êmĩ ên kã vènh ken mÿ sir, pirã ti ke gé.

¹⁴ Jesus tÿ ag mÿ vènh ven tãgtũ vè ha, ên kã, ti ter kar kÿ rĩr mãn kar kÿ.

Jesus tÿ Pedro mré vèmén

¹⁵ Ag jên kar kÿ Jesus tóg Simão Pedro mÿ: “Simão!,” he mÿ. “João kósın!,” he tóg. “Æ mÿ iso há tãví nĩ, ã mré ke ag tÿ iso há nÿtĩ ên kãfór?” he tóg, Jesus ti,

Pedro m̄y. K̄y tóg ti m̄y: “h̄y, h̄a v̄e,” he m̄u. “Ki kanhró ã tóg n̄i, is̄y ã to há p̄e n̄n ki,” he tóg, Pedro ti, Jesus m̄y. K̄y Jesus tóg ti m̄y: “k̄y ù t̄y inh ki ge k̄y n̄y t̄i ag m̄y inh v̄i tómn̄i,” he m̄u.

¹⁶ K̄y tóg ti m̄y v̄i m̄an m̄u, Jesus ti, Pedro m̄y. “Simão!,” he m̄an tóg. “João kósin!,” he tóg. “Á m̄y iso há n̄i?” he tóg. K̄y tóg ti m̄y: “h̄y, h̄a v̄e,” he m̄an m̄u. “Ki kanhró ã tóg n̄i, is̄y ã to há n̄n ki,” he m̄an tóg. K̄y Jesus tóg ti m̄y: “k̄y ù t̄y inh ki ge k̄y n̄y t̄i ag m̄y inh v̄i tómn̄i,” he m̄an m̄u gé.

¹⁷ K̄y Jesus tóg ti m̄y v̄i m̄an m̄u gé, v̄i t̄agt̄u han k̄y. “Simão!,” he tóg. “João kósin!,” he tóg. “Á m̄y iso há n̄i?” he tóg. K̄y tóg Pedro m̄y e t̄i, ti t̄y ti m̄y ke t̄agt̄u han k̄y. Ti ki j̄em̄e t̄agt̄u han tóg, h̄a k̄y tóg ti m̄y e t̄i. K̄y tóg ti m̄y: “n̄en kar ki kanhró ã tóg n̄i,” he m̄u. “Ki kanhró ã tóg n̄i, is̄y ã to há n̄n ki,” he tóg, Jesus m̄y, Pedro ti. K̄y Jesus tóg ti m̄y: “k̄y ù t̄y inh ki ge k̄y n̄y t̄i ag m̄y inh v̄i tómn̄i,” he m̄an m̄u.

¹⁸ “Á m̄y sóg ki h̄a tó m̄u, ha m̄e,” he tóg m̄u. “Á kyrũ k̄a ã tóg ã kur r̄inh k̄y ã t̄y h̄en ra t̄ig sór m̄u ên ra t̄ig ja n̄igt̄i. Kej̄en ã kófa n̄inh ke v̄e. Ên k̄a ã tóg ag m̄y ã n̄igé t̄y v̄enh kri t̄y tam kenh m̄u, k̄y ag tóg ã senh m̄u, ha vem̄n̄i, k̄y ag tóg ã pére m̄unh m̄u, ã t̄y h̄e ra t̄ig sór t̄u ên ra,” he tóg, Jesus ti, Pedro m̄y.

¹⁹ Ti t̄y ti m̄y ag t̄y ti t̄en ke tó v̄e. H̄a ra ag tóg Top̄e t̄y t̄y ùn mág n̄i venh ke m̄u, ag t̄y Pedro t̄en ke tugr̄in. Tag tó ti, Jesus ti, Pedro m̄y. Tag p̄ate tóg ti m̄y: “m̄u j̄e ha, inh mr̄é,” he m̄u gé sir, Jesus ti.

Jesus t̄y João to Pedro m̄y v̄i

²⁰ Ag m̄un k̄y Pedro tóg v̄es̄ȳj̄am̄ êv̄anh k̄y (tóg) ù t̄y Jesus nón k̄at̄ig m̄u ên v̄ég m̄u gé, Jesus t̄y ù to há t̄av̄i ên. Ag j̄en r̄en ja ên tá tóg Jesus r̄ã h̄a n̄i ja n̄i, ti mr̄é tóg j̄agn̄e to gr̄en ke k̄y n̄i ja n̄i, Jesus t̄y ù to há t̄av̄i ên. Ên k̄a tóg Jesus ti m̄y: “ù n̄y h̄ȳn ã ven ke m̄u, p̄a' i ag m̄y?” he ja n̄i. Ên h̄a v̄y Jesus nón t̄ig m̄u, Pedro t̄y ti mr̄é t̄ig k̄y.

²¹ Pedro t̄y ti t̄y ag nón k̄at̄i m̄u ve k̄y tóg Jesus m̄y: “j̄ãvo ù t̄y êg nón k̄at̄ig m̄u tag ti?” he m̄u.

²² K̄y Jesus tóg ti m̄y: “s̄y ti m̄y n̄en tó m̄u v̄y vyr m̄y n̄i,” he m̄u. “K̄y s̄y ã m̄y n̄en tó m̄u v̄y vyr m̄y n̄i gé,” he tóg m̄u. “S̄y ti m̄y: “ter ke t̄u ã tóg n̄i, is̄y v̄ȳn ke ve j̄é ã tóg ke m̄u,” he sór m̄u ra sóg ti m̄y tónh ke m̄u v̄e,” he tóg. “Á h̄a m̄y sóg ã tó tónh ke m̄u, h̄a k̄y sóg ã m̄y: m̄u j̄e ha, inh mr̄é, he m̄u,” he tóg, Jesus ti, Pedro m̄y. Ti t̄y ù t̄y ag mr̄é k̄at̄i m̄u ên to ken h̄a v̄e.

²³ Jesus v̄i tag tugr̄in v̄enh kar tóg ti to: “ter ke t̄u ti n̄i,” he t̄i, Jesus ki ge k̄y n̄y t̄i kar ag. H̄a ra Jesus pí(j̄é) ti to: “ter ke t̄u ti n̄i,” he ja n̄igt̄i. Ti to tóg: “s̄y ti m̄y: ter ke t̄u ã tóg n̄i, is̄y v̄ȳn ke ve j̄é ã tóg ke m̄u, he sór m̄u ra sóg ti m̄y tag tónh ke m̄u v̄e,” he ja n̄i, Pedro m̄y, ù ên to. H̄a k̄y ti to: “ter ke t̄u ti n̄i,” he t̄ig n̄i.

João t̄y v̄enh k̄am̄én

²⁴ João v̄y t̄y inh n̄i. Inh h̄a v̄y tag ve k̄an ja n̄i, h̄a k̄y sóg r̄an. Ki h̄a tó sóg t̄i, v̄enh kar v̄y tag ki kanhró n̄y t̄i.

²⁵ H̄a ra sóg Jesus t̄y n̄en hyn han m̄u ên r̄an k̄an ja t̄u n̄i. Ti t̄y n̄en hyn han m̄u ên v̄y e t̄av̄i n̄y t̄i, e t̄av̄i. Êg t̄y tag r̄an k̄an sór m̄u ra êg tóg livro t̄y h̄en ri ke hyn han ke m̄u v̄e. K̄y êg h̄ȳn h̄e tá livro kar tag vin han ke m̄u? S̄i ti n̄i, êg ga ti, k̄y êg t̄y h̄e tá livro tag vin han ke tóg t̄u t̄inh m̄u, êg t̄y Jesus t̄y n̄en hyn han ja ên r̄an k̄an sór m̄u ra.

H̄a v̄e.

APÓSTOLO AG TỸ NÉN HAN KĀME

¹ Teófilo, inh livro ve ki sóg ã mỹ Jesus tỹ nén han kar tó ja nĩ, ti tỹ nén han vén mũ ên ti, ti tỹ nén han rên ên ti ke gé. Ti tỹ êg kanhrân mũ ên rán sóg huri ke gé.

² Kỹ sóg ti tỹ kanhkã ra tãpry mũ rán huri ke gé. ã tỹ kanhkã ra tãpry to hã tóg apóstolo ag mré vēmén ja nĩ ver, ã tỹ ùn kuprêg mũ ag mré. Topê kuprĩg tỹ ti mỹ nén tó mũ ên tó tóg mũ ag mỹ, ag tỹ ki hã han jé.

³ ã ter kar kỹ Jesus tóg ag mỹ vènh ven tỹ hên ri ke han ja nĩ, kurã tỹ 40 (ke) ki. Rĩr măn kỹ tóg ag mỹ vènh ven ja nĩ, ti tỹ ùn kuprêg ja ên ag mỹ. Ag tỹ ti ve kỹ, ag tỹ ti mré vēmén kỹ ag tóg ti rĩr jê ki kanhró nỹti, apóstolo ag. Ag mỹ tóg Topê tỹ tỹ êg pã'i nĩ kãmén mũ, Jesus ti.

⁴ Kejên tóg ag mré nĩ nĩ. Kỹ tóg ag mỹ: “ver cidade tỹ Jerusalém tá kãpa tũg nĩ,” he mũ. “Tá nỹti kỹ Topê tỹ ãjag mỹ nén tó ja jãvãnh nĩ,” he tóg, “isỹ ãjag mỹ nén tó ja ên ti,” he tóg.

⁵ “João vỹ goj tỹ êg kygpe ja nĩgtĩ,” he tóg. “Hã ra kãnhmar ãjag tóg Topê kuprĩg tỹ jagrê venh ke mũ. Sỹ ãjag kypenh ken hã vê,” he tóg, Jesus ti. Kỹ tóg tĩ mũ sir.

Jesus tỹ kanhkã ra tĩg

⁶ Kejên ag tóg vènh măn măn mũ sir, Jesus tỹ ùn vin mũ ag. Kỹ tóg ag mré nĩ nĩ, Jesus ti. Kỹ ag tóg ti mỹ: “Senhor,” he mũ. “ã mỹ ù ri êg pã'i mág fêg măn mũ”, êg povo tỹ Israel tỹ pã'i mág?” he ag tóg ti mỹ.

⁷ Hã ra tóg ag mỹ: “vó,” he mũ. “Topê hã ki kanhro nĩ,” he tóg. “ãjag tũ pijé,” he tóg. “Kurã ên ki kanhrân ke tũ ãjag tóg nĩ, Topê tỹ ãjag pã'i mág fêg măn ke kurã ti. Topê hã ne kurã tag tónh ke mũ,” he tóg.

⁸ “Hã ra Topê kuprĩg vỹ tỹ ãjag jagrê nĩnh ke mũ. Kỹ ti hã vỹ ãjag tar han ke mũ, ãjag tỹ inh kãmén jé. Cidade tỹ Jerusalém tá ãjag tóg inh kãmén ke mũ, ga tỹ Judéia tá ke gé, ga tỹ Samaria tá ke gé, ga fyn ja tá hã ke gé mỹr,” he tóg, Jesus ti.

⁹ ã tỹ tag tó kar kỹ tóg vãhã kynh mỹ tãpry mũ sir ag rĩnve, kỹ kanhkã góg vỹ ti kri rũm ke mũ sir, ti ve măn tũ ag tóg nĩ sir.

¹⁰ Hã ra ag tóg kanhkã tagnỹm mũ, ag tỹ ti tĩg ven kỹ, ti tỹ ùn vin mũ ag.

Kỹ vãhã ùn régre ag tóg tá nỹti, kur kupri rĩnh kỹ. Topê tỹ jênê jafã ag vê, ùn régre ên ag.

¹¹ Kỹ ag tóg ag mỹ: “ha vé, Galiléia tá ke',” he mũ. “ãjag hã ne tóg kanhkã tá êvãnh nỹti nĩ,” he ag tóg. “Jesus vỹ vỹn kenh mũ, ti tĩg ja ên ri ke han jé tóg ke mũ. Ti tỹ kanhkã ra tãpry vê, hã ra tóg tá kátère măn ke mũ gé,” he ag tóg, Topê tỹ jênê jafã ag, Jesus tỹ ùn vin mũ ag mỹ.

Ag tỹ Matias fêg

¹² Kỹ Jesus tỹ ùn vin mũ ag tóg vỹnvỹn ke mũ sir, Jerusalém ra, krĩ tỹ Oliveiras tá kãmũ kỹ. Jerusalém kakó kã ti nĩ, 1 quilômetro tá ti nĩ hỹn, krĩ tỹ Oliveiras ti.

¹³ Ag tỹ Jerusalém tá junjun kỹ ag tóg ãn to jãpry jafã to jãpry mũ, tá nỹti jé, ãn kri. Û tỹ tá nỹti ag hã vê: Pedro, João, Tiago, André, Filipe, Tomé, Bartolomeu,

Mateus, Tiago ũ hã vỹ: Alfeu kósin, he mũ, Simão ke gé, vỹ tar han tĩ tag ti, Judas ke gé, Tiago kósin tag ti.

¹⁴ Ag kar ên tóg Topê mré vỹ mũ, jagnê mré, ùn týtá fag mré hã, Maria fi mré hã, Jesus mỹnh ên fi, Jesus jãvy ag mré hã ke gé, ha mẽ.

¹⁵ Kejên Jesus mré ke tỹ hên ri ke ag vỹ tá nýtĩ nĩ, ãn to jãpry jafã ên tá, ũ tỹ 100 kri 20 (ke) hỹn.

¹⁶ Kỹ Pedro vỹ tóg jêg nê mũ, kỹ tóg: “ha vé, inh kanhkã;” he mũ. “Vãsỹ tóg rán kỹ nĩ, Judas to,” he tóg. “Topê kuprĩg tóg Davi krĩn ja nĩgtĩ, ti tỹ Judas to rán jé,” he tóg. “Hã ra tóg ki hã tó ja nĩ, vênh rán ki,” he tóg. “Ag jãmĩ tóg kãtĩg ja nĩ, Judas ti, ũ tỹ Jesus kãgmĩnh ke mũ ag jãmĩ.

¹⁷ Hã ra tóg tỹ êg mré ke ja nĩ, kỹ ti tỹ nén han mũ tóg êg tỹ nén han mũ ri ke ja nĩ gé,” he tóg, Pedro ti.

¹⁸ “Hã ra tóg Jesus kato jãnkamy mãn ja nĩ, kỹ tóg jãnkamy ên tỹ êpỹ kajãm ja nĩgtĩ. Hã ra tóg ã nunh kã vênh jãján ja nĩ, kỹ tóg tam ke kỹ kutê ja nĩ, kỹ ti nug tóg jar ja nĩ, kỹ ti nug tóg kãkutê ja nĩ, kỹ tóg ter ja nĩ, Judas ti,” he tóg, Pedro ti.

¹⁹ “Kỹ Jerusalém tá ke kar ag tóg mêg mũ sir, hã kỹ ag tóg ti japỹ to: Acedama, he mũ, hã vỹ: êpỹ kyvénh, he mũ, êg vỹ ki,” he tóg, Pedro ti.

²⁰ “Êg tỹ Topê mỹ jãn jãn jafã ki tag tóg rán kỹ nĩ, hã mẽ: ên jamã vỹ vag ke mũ, ũ pi(jé) ki êmãn mãn mũ’, he tóg, vênh rán ki, Judas to,” he tóg, Pedro ti. “Kỹ ũ vỹ ge nĩ gé, hã mẽ: ũ ũ tỹ ti jêg ja kã jênh ke kỹ ti rãnhraj han ke vê, he tóg mũ gé, vênh rán ki,” he tóg, Pedro ti.

²¹ “Hã kỹ êg tỹ êg mré mũ ti ũ jãvãnh ke vê. Jesus mré tóg tĩg ja nĩgtĩ, êg tỹ ùn jãvãnh ke mũ ti, kỹ tóg Jesus tỹ ga mĩ tĩ ên ve ja nĩgtĩ gé.

²² João tỹ Jesus kype ve ja tóg nĩ gé. Jesus tỹ kanhkã ra tãpry ve ja tóg nĩ gé. Jesus tỹ nén han mũ kar ve ja tóg nĩ, êg tỹ ùn jãvãnh ke mũ ti. Kỹ tóg sir Jesus rĩr mãn tónh ke mũ êg mré,” he tóg, Pedro ti.

²³ Kỹ ag tóg ùn régre ag vin mũ, hã vỹ: José, he mũ, ti jyjy ũ hã vỹ: Barsabás, he mũ. Fóg tỹ ti jiji hã vỹ: Justo, he mũ. Ti mré ag tóg Matias fêg mũ gé.

²⁴ Kỹ ag tóg Topê mré vỹ mũ, kỹ ag tóg tag tó mũ, ha mẽ. “Êg jóg;” he ag tóg ti mỹ. “Êg tỹ nén to jykrén mũ ki kanhró ã tóg nĩ,” he ag tóg mũ. “Á hỹn ũ tỹ hê kuprêg, ùn régre tag ag kã,

²⁵ ti tỹ êg mré ã rãnhraj tag han jé, ti tỹ tỹ êg mré apóstolo jê jé? Judas vỹ ã rãnhraj tovãnh, kỹ tóg ã tỹ ra tĩg ke ên ra vyr. Kỹ ũ tỹ hê nỹ ti jêg ja kã jênh mũ ha?” he ag tóg mũ, Topê mỹ.

²⁶ Kỹ ag tóg to jogar he mũ sir, hã ra Matias tóg Judas jêgia kã jê nĩ. Hã kỹ tóg tỹ ũ tỹ 11 (ke) ag mré ke nĩ sir, tỹ tóg apóstolo jê sir.

2

Topê kuprĩg tỹ tỹ êg jagrê

¹ Vãhã tóg festa tỹ Pentecostes kurã tá krỹg mũ. Kỹ vênh kar vỹ vênh mãn kỹ nýtĩ nĩ, Jesus ki ge kỹ nýtĩ kar ên ag.

² Kỹ vãhã kanhkã tá kóho ri ke tóg mẽ há ti, króg he mũ ên ti. Kỹ ãn tóg kóho ri ke ên tỹ fór mũ. Hã ra ag tóg ãn ên ki nýtĩ, Jesus ki ge kỹ nýtĩ ag.

³ Kỹ ag tóg nén nê vég mũ, hã ra tóg tỹ pĩ gru hã pẽ nĩ, nén nê ên ti. Vênh kãpópãm kỹ tóg nĩ nĩ, pĩ gru hã pẽ ên ti. Kỹ tóg ag kri nĩ' nĩ' he kãn mũ, pĩ gru hã pẽ ên ti.

4 Kŷ Topē kuprīg tóg ag ki ge kân mŭ, kŷ ag tóg vĕnh vĭ ũ tugtó mŭ, Topē kuprīg tŷ ag krĭn kŷ, ti tŷ tŷ ag jagrĕ nĭn kŷ.

5 Hā ra Jerusalém tá ke ũ ag tóg Topē to há nŷtĭ gé. Israel ag vĕ gé, hā ra ag tóg povo tŷ hĕn ri ke mĭ mogmog ja nĭ. Hā kŷ ag vĭ tóg tó tŷ hĕn ri ke nĭ.

6 Ag tŷ kóho ri ke ĕn mĕ kŷ ag tóg vĕnh mĕn mŭ. Kŷ ag tóg ājag vĭ e ĕn ki Pedro ag tŷ nĕn tó mŭ mĕg mŭ.

7 Kŷ tóg ag mŷ e tĭ. Ag fe tŷ hĕn ri ke nĭn kŷ ag tóg: “ha vé, Galiléia tá ke ag vĕ mŷr,” he mŭ. “Galiléia tá ke ag vŷ vyr mŷ vĭ nŷtĭ.

8 Hā ra ĕg tóg ĕg vĭ pĕ ki ag vĭ jĕmĕg mŭ,” he ag tóg.

9 “Ēg kĀ ũ ag tóg Pártia tá kāmŭ mŭ, kŷ ũ ag tóg Média tá kāmŭ mŭ gé, ũ ag tóg ga tŷ Elāo tá kāmŭ mŭ, ũ ag tóg ga tŷ Mesopotâmia tá kāmŭ mŭ, ũ ag tóg Judéia tá kāmŭ mŭ, ũ ag tóg Capadócia tá kāmŭ mŭ, kar kŷ Ponto tá, Ásia tá,

10 Frígia tá, Panfília tá, Egito tá, ga tŷ Líbia tá, cidade tŷ Cirene ĕn mā tá. Ũ ag tóg cidade tŷ Roma tá kāmŭ mŭ gé.

11 Ũ ag tóg tŷ Israel nŷtĭ, kar kŷ ũ ag tóg tŷ fóg tŷ Israel jykre han mŭ nŷtĭ gé. Ũ ag tóg goj vāso tŷ Creta tá kāmŭ mŭ, ũ ag tóg ga tŷ Arábia tá kāmŭ mŭ gé. Ēg kar tóg ĕg vĭ pĕ ki ag tŷ Topē kāmĕn mŭ mĕg mŭ, ag tŷ Topē tŷ nĕn han ja kāmĕn mŭ ti, Topē tŷ milagre hyn han ja ĕn ti,” he ag tóg.

12 Ājag mŷ e tĭn kŷ ag tóg jagnĕ mŷ: “ne nĕ hŷn’?” he mŭ. Ag fe tóg jŭrŭn ke mŭ, ag tŷ ge ve ja tŭ nŷtĭn kŷ.

13 Ũ ag tóg hā ra nŷg mŭ. “Kronkron kŷ ag kĀgter mŭ mŷr,” he ag tóg.

Pedro tŷ ag mŷ Topē vĭ tó

14 Kŷ Pedro tóg ũ tŷ 11 (ke) ag mrĕ jĕgnĕ mŭ, kŷ tóg jamā hár(a) ag mŷ: “inh kanhkĀ’,” he mŭ. “Jerusalém tá ke’,” he tóg. “Jĕmĕ há han ra, sŷ ājag mŷ nĕn tó mŭ ti,” he tóg.

15 “Ājag hā tóg ĕg to: kronkron kŷ ag kĀgter mŭ, he mŭ. Hā tŭ vĕ hā ra. 9 horas vĕ ver, meio dia to hĕn sa mŷr,” he tóg. “Ag kronkron kŷ ag tóg rĀkĕnh kŷ kronkron kŷ kĀgter mŭgtĭ, ũn kronkron mŭ ĕn ag,” he tóg. “Hā kŷ ĕg tóg kron ja tŭ nĭ,” he tóg, Pedro ti.

16 “Hā ra tóg vāsŷ rĕn kŷ nĭ, ĕg tŷ ũri nĕn vĕg mŭ ti. Topē vĭ tó tĭ tŷ Joel tóg vāsŷ tag tó ja nĭ, ha mĕ:

17 “kurĀ tŷ ĕgno to hā sóg inh kuprīg jĕnĕnh mŭ, vĕnh kar mŷ, ti tŷ tŷ ājag jagrĕ nĭ jĕ,” he ja tóg nĭ, Topē ti. “Kŷ ājag krĕ ag tŷ fag mrĕ Topē vĭ mĕ kŷ tónh ke vĕ. Kŷrŭ ag tŷ nĕn nĕ venh ke vĕ. Kófa ag tŷ vĕnh pĕtinh ke vĕ.

18 Sŷ inh camarada ag mŷ inh kuprīg jĕnĕnh ke vĕ gé, fag mŷ ke gé. Kŷ fag tóg inh vĭ tónh ke mŭ gé,” he tóg, Topē ti.

19 “Ājag tŷ nĕn han vĕnh han jĕ sóg ke mŭ gé, ājag mŷ, kanhkĀ tá, ga tá ke gé, ĕprĀ, kyvénh mŷr, pĭ mŷr, nĭja mŷr.

20 Kŷ rĀ tŷ kutŷg ke vĕ, kŷsĀ kyvénh ke vĕ gé. Kar kŷ Topē kurĀ vĕ sir, kurĀ mág ĕn ti.

21 Kŷ ũ tŷ Topē mŷ nĕn kar to vĭ mŭ ĕn kren ke vĕ sir,” he tóg, Topē ti. Joel tŷ tón hā vĕ, vāsŷ,” he tóg, Pedro ti.

22 “Inh kanhkĀ’, inh vĭ jĕmĕ ra,” he tóg. “Nazaré tá Jesus vĕ mŷr,” he tóg. “Ti hā tóg nĕn han vĕnh hyn han ja nĭgtĭ, Topē jykre hyn han ja tóg nĭgtĭ. Topē tŷ ti jĕnĕn kŷ. Hā ra Topē tóg Jesus mŷ tó ja nĭ, ti tŷ milagre ĕn hyn han jĕ. Kŷ tóg ājag rĭnve hyn han, ājag tŷ ve jĕ, Jesus to jykren jĕ. Hā kŷ ājag tóg vé,” he tóg, Pedro ti.

23 “Hã ra Topê tóg ãjag mý ti fêg sór ja nĩ, Jesus ti. Ký tóg to jykrén ký ãjag mý ti fêg ja nĩ. Jãvo ãjag tóg ka to ti sa ja nĩ, ti tén ja ãjag tóg nĩ. Ký ù tý ka to ti sãg mũ ên ag jykre vỹ pãno távi nĩ.

24 Hã ra Topê tóg ti rĩn mãn ja nĩ, hã ký tóg vêser jagêgtar ên tỹ tũ' he ja nĩ ti mý. Hã ký tóg vêser jamã tá nĩg mág ja tũ nĩ, Jesus ti,” he tóg, Pedro ti.

25 “Hã ký Davi tóg Jesus jo tag tó ja nĩ, ký tóg Jesus tỹ ã jóg mré vĩ ri ke nĩ. Ti to tóg: “êg jóg,” he ja nĩ. “Á vég isóg nĩ nĩ,” he ja tóg nĩ. “Inh pêgja tá ã tóg nĩ nĩ, hã ký sóg krónh ke tũ nĩ,” he ja tóg nĩ, Davi ti.

26 “Hã ký inh fe tóg mrin ke mũ. Vĩ sér han isóg nĩ nĩ. Iser ký inh fár tóg nỹnh ke mũ, hã ra sóg to krĩ kufy tũ nĩ.

27 Inh kuprĩg vỹ vênh kuprĩg jamã tá nĩnh ke tũ nĩ. Inh fár vỹ vag ke tũ nĩ gé, sỹ tỹ ã tỹ kuprêg ja nĩn ký,” he ja tóg nĩ, Davi ti, Topê mý.

28 “Inh kanhrãn ã tóg nĩ nĩ, isỹ kanhkã to êpřy ên ve há han jé, kanhkã to êmĩn ên ti. Isỹ ã mré nĩn ký tóg inh mý sér távi tũ,” he ja tóg nĩ. Davi tỹ Jesus tón hã vê,” he tóg, Pedro ti.

29 “Inh kanhkã,” he tóg. “Êg jóg'jóg tỹ Davi kãmén há han jé sóg ke mũ ãjag mý,” he tóg. “Vãsỹ ti ter mýr, ký ag tóg vênh kej tá ti péju, hã ra êg tóg vég tĩ, ti kej ti, Davi kej ti,” he tóg.

30 “Á tỹ ga mĩ tĩg ký tóg hã ra Topê vĩ tó ti ja nĩgtĩ, Davi ti. Topê tóg ti mý: “ã krê'krê ag kã ù vỹ tỹ pã'i tỹ rei nĩnh mũ,” he ja nĩgtĩ, Topê ti.

31 Topê vỹ tag kri fi ký tóg Cristo rĩr mãn ke tó ja nĩgtĩ gé, Davi ti. Hã ký tóg ã vỹ ên tó ja nĩgtĩ. Cristo pi(jé) vêser jamã tá nĩg mág han', ký ti fár vỹ vag ja tũ nĩ gé,” he tóg, Pedro ti.

32 “Cristo vê, hã vỹ: Jesus, he mũ. Topê vỹ ti rĩn mãn, ký êg kar tóg ti ve ja nĩgtĩ,” he tóg.

33 “Topê tóg ti mý: “kunĩg, inh pêgja tá nĩ,” he ja nĩ, Jesus ti mý. Ký êg jóg tóg ti mý ã tỹ êg mý nén tó ja fêg, hã vỹ: Topê kuprĩg, he mũ. Hã ký tóg êg mý tỹ jagrê han mũ, Topê kuprĩg tỹ, Jesus ti. Hã ký ãjag tóg ùri tag vég mũ, tag mêg mũ,” he tóg, Pedro ti.

34 “Davi hã tóg rĩr mãn ja tũ nĩ ver, kanhkã ra tóg tãpřy ja tũ nĩ ver, ge ra tóg tag tó ja nĩ, ha mê: “êg jóg mág vỹ inh Senhor mý tag tó ja nĩ, hã vỹ: “nĩ ra ver, inh pêgja tá,” he ja tóg nĩ,

35 “sỹ ã kato vãsãnsãn mũ ag tỹ ã jakrêm vin jé, ag sigse jé,” he ja tóg nĩ. Davi tỹ tón hã vê,” he tóg, Pedro ti.

36 “Jesus tag hã vỹ, ãjag tỹ ka to ùn sãg mũ tag hã vỹ: tỹ êg Senhor nĩ, he mũ,” he tóg. “Topê vỹ ti to: “tỹ tóg Cristo nĩ,” he mũ. “Tỹ tóg vênh kar Senhor nĩ,” he tóg. Êg tỹ vênh vỹ tag kri finh ke vê. Êg povo tỹ Israel tỹ ti ki kanhrãn ke vê, êg vỹ tag kri nĩm ke vê,” he tóg, Pedro ti, ù tỹ vênh mãn ký nỹti kar ag mý.

37 Ag tỹ ti vỹ jêmê ký ti jykre tóg ag kãra rã mũ sir. Ký ag tóg ti mý: “ký êg hỹn hẽ ri kenh mũ, vỹ?” he mũ, Jesus tỹ ùn vin mũ kar ag mý ke gé.

38 Ký Pedro tóg ag mý: “ãjag jykre tovãnh ra,” he mũ. “Ký êg tóg ãjag kygpenh ke mũ, Jesus Cristo jiji tó ký,” he tóg. “Ký Topê tóg ãjag mý ãjag tỹ ti vỹ mranh ja ên tỹ vênh pãte fón ke mũ. Ký ãjag tóg Topê kuprĩg tỹ jagrê nỹtĩnh mũ gé, Topê tỹ ãjag mý ti jênên ký.

39 Ti tỹ ãjag hã mý ti nĩm ke vê inhhã, ãjag krê mré hã ke gé. Ti tỹ ùn mý vênh vỹ jênêg mũ kar ag mý tóg nĩm tĩ, Topê ti, êg jóg mág ti, ag tỹ ver kuvar há tá mũ hã ra,” he tóg, Pedro ti.

⁴⁰ Vī tỳ hēn ri ke han tóg, Jesus kāmén kǵ. Ag jyvēn tóg mǵ gé, kǵ tóg ag mǵ: “Jesus mǵ: “inh kren han nǵ,” hemnǵ,” he mǵ. “Ēg kar vǵ vēnh jykre pāno han kǵn, ā jykre han vānh nǵtǵn kǵ. Kǵ inh kren han nǵ, hemnǵ, Jesus mǵ,” he tóg, Pedro tǵ.

⁴¹ Ū tỳ ti vǵ han mǵ ag kygpég ag tóg mǵ sir. Kurā ēn kǵ ūn kygpe kǵ nǵtǵ ag vǵ tỳ ū tỳ 3 mil nǵtǵ hǵn, hēn ri ke mǵn.

⁴² Ēn ag vǵ kurā kar ki Jesus tỳ ūn vin mǵ ag vǵ jēmē jé vēnh mǵn tǵ, jagnē ve jé ke gé. Kǵ ag tóg Jesus jamǵ ko mǵ sir. Kǵ ag tóg ti mré vǵ mǵ gé, kurā kar ki.

Jesus ki ge mǵ ag jykre ti

⁴³ Kǵ Jesus tỳ ūn vin mǵ ag tóg ēg tỳ nén han vānh tỳ hēn ri ke han tǵ nǵtǵgtǵ. Hǵ kǵ vēnh kar tóg Topē kamēg tǵ.

⁴⁴ Jǵvo ū tỳ Jesus ki ge kǵ nǵtǵ ag tóg jagnē mré vēnh jykre pir han mǵgtǵ. Kǵ ag kuge vǵ jagnē tǵ ri ke nǵtǵ.

⁴⁵ Ū ag tóg ājag kuge ū vāvām mǵ gé, jǵnkamy kato, kǵ ag tóg ūn jǵnkamy tǵ ag mǵ vēnh kǵpópām mǵ.

⁴⁶ Kurā kar ki ag kar tóg Topē jo ĩn ra mǵ tǵ, ag tỳ ti mré vǵ jé. Ājag ĩn kǵki ag tóg Jesus jamǵ ko mǵgtǵ gé. Jatun mǵ ag tóg sir jēgēg mǵ. Kǵ tóg ag mǵ sér tǵ sir.

⁴⁷ Kǵ ag tóg Topē mǵ: “há ti nǵ,” he ti gé. Jó vēnh kar tóg ag to há nǵtǵ gé. Kǵ Topē tóg kurā kar ki ū ag mǵ krǵ há nǵm tǵ gé, kǵ ag tóg ti ki ge mǵ, ag krenkren jé. Hǵ kǵ ag tóg komēr hǵ e nǵtǵ.

3

Ūn grǵ tỳ há' he

¹ Kejēn Pedro tóg João mré Topē jo ĩn ra mǵ mǵ, meio dia pǵte 3 horas ki. Israel ag tỳ Topē mré vǵ jafǵ vē, hǵ vǵ: 3 horas, he mǵ.

² Topē jo ĩn tá ū tóg nǵ nǵ, ūn grǵ. Ā mǵr mǵ kǵ tóg ge nǵ. Topē jo ĩn jǵnkǵ tá tóg nǵ nǵ, jǵnkǵ sǵnvǵ he mǵ ēn tá. Tá tóg: “inh mǵ nén ū nǵm,” he nǵgtǵ, ū tỳ Topē jo ĩn kǵra ge mǵ ag mǵ.

Ēn va ag tóg kǵmǵ mǵ, jǵnkǵ tá ti nǵm jé. Kǵ João mré Pedro tóg Topē jo ĩn tá junjun mǵ.

³ Ūn grǵ tỳ Pedro ag ve kǵ tóg ag mǵ nén ū to vǵ mǵ.

⁴ Kǵ Pedro ag tóg ti tugnǵm mǵ. Kǵ Pedro tóg ti mǵ: “ēg ki ēvānh ra,” he mǵ.

⁵ Kǵ tóg ag ki ēvānh mǵ. “Ag hǵn inh mǵ jǵnkamy nǵm ke mǵ,” he tóg.

⁶ Hǵ ra Pedro tóg ti mǵ: “jǵnkamy tóg inh mǵ tǵ tǵ,” he mǵ. “Sǵ nén ma tǵ hǵ tỳ sóg ā mǵ nǵm mǵ, hǵ vǵ: Jesus Cristo jyjy hǵ tó kǵ, Nazaré tá ke ēn jǵji tó kǵ sóg ā mǵ: ha jēg, he mǵ, ha mǵ tǵg, he sóg ā mǵ,” he tóg, Pedro ti, ūn grǵ mǵ.

⁷ Kǵ tóg ti pēgia tá ti kǵgmǵ kǵ tǵ fēg mǵ.

Kǵ vǵhǵ ti pēn tóg tar' he mǵ sir, tǵ pēn nǵgnǵn ti.

⁸ Hǵm hen kǵ tóg jē nǵ sir. Jēg há' he tóg mǵ sir. Mǵ tóg tǵ mǵ sir. Ag mré tóg Topē jo ĩn kǵra rǵ mǵ sir. Tá tóg mǵ tǵ kǵ hǵm hǵm he mǵ. Topē mǵ tóg vǵ há han mǵ sir.

⁹ Kǵ vēnh kar tóg ti vég mǵ, ti tỳ mǵ tǵg kǵ, ti tỳ Topē mǵ vǵ há han kǵ.

¹⁰ Ag tỳ ti ve kǵ ag tóg ti ki kanhró nǵtǵ. “Topē jo ĩn jǵnkǵ tá nǵ ēn hǵ vē mǵr,” he ag tóg mǵ. “Jǵnkǵ sǵnvǵ he mǵ ēn tá nǵ mǵn hǵ vē mǵr,” he ag tóg mǵ. “Vēnh kar mǵ: inh mǵ nǵm, he tǵ ēn hǵ vē mǵr,” he ag tóg ti to. Kǵ tóg ag mǵ e tǵ sir. Ag fe tóg jǵrǵn ke mǵ sir, ag tỳ ti ven kǵ.

Pedro tȳ Topē jykre kāmén mū

11 Hā ra tóg Pedro mré João mré tī mū, ūn grī ja ěn ti. Hā kȳ vĕnh kar tóg ag to vĕnh mĕn mū, Topē jo ĩn krĕm, pā'i tȳ Salomāo he mū ěn sala tá. Vĕnh kar ag mȳ tóg e tī, ūn grī ěn tȳ há' hen kȳ.

12 Ā tȳ ūn e ěn ag ve kȳ Pedro tóg ag mȳ: “inh kanhkā,” he mū. “Ājag fe hā ne tóg jūrĭn ke mū,” he tóg. “Ĕg tȳ vĕsóg ki ti tȳ há' he tū vĕ. Topē tȳ ti tȳ tĭg há' he vĕ mȳr. Ĕg tȳ vĕnh jykre kuryj han mū ra ěg tóg ge han ki kagtĭg nȳtĭ vĕ,” he tóg, Pedro ti, ūn e ěn ag mȳ.

13 “Ĕg jóg'jóg ve ag vȳ Topē to há ja nȳtĭgtĭ, Abraāo ti, Isaque ti, Jacó ti ke gé. Topē ěn vĕ mȳr, ū tȳ ti tȳ há' he mū ti,” he tóg. “Topē ěn vȳ ā kósĭn tȳ ūn mág han. Ti kósĭn hā vĕ, hā vȳ: Jesus, he mū. Hā ra ājag tóg fóg ag mȳ ti fĕg ja nĭgtĭ. Fóg tȳ pā'i tȳ Pilatos vȳ: “tī kavĕn jé sóg ke mū,” he mū vĕ. Hā ra ājag tóg ti mȳ: “nejé,” he ja nĭgtĭ.

14 Ū tȳ vĕnh jykre kuryj han mū to ājag tóg: “nejé,” he ja nĭgtĭ, Topē tȳ ūn kuprĕg mū ěn to, Jesus ěn to. Hā ra ājag tóg ū tȳ ūn tĕn mū to: “tī kyvĕn ra,” he ja nĭgtĭ.

15 Ū tȳ ěg rĭnrĭr han tī ěn tĕn ja ājag tóg nĭgtĭ mȳr. Topē tóg hā ra ti rĭn mĕn ja nĭ, ti ter mū hā ra, kȳ ěg tóg ti ve ja nĭgtĭ,” he tóg, Pedro ti, ūn e ěn ag mȳ.

16 “Kȳ ěg tóg Jesus ki ge mū. Hā kȳ Jesus tóg ūn grī ja tag tȳ tar' he mū, ājag tȳ ūn vĕg mū tag ti, ājag tȳ ūn ki kanhrĕn mū tag ti. Jesus vȳ ti tȳ ā ki rā han. Kȳ ti tȳ Jesus ki rā kȳ tóg há' he mū sir, ājag rĭnve,” he tóg, Pedro ti.

17 “Inh kanhkā,” he tóg. “Ājag tȳ ki kagtĭg nȳtĭn kȳ, hā kȳ ājag tóg Jesus tĕn ja nĭgtĭ. Hā kȳ ājag pā'i ag tóg ti tĕn ja nĭgtĭ,” he tóg.

18 “Hā kȳ Topē tóg vĕsȳ rán kȳ nĭ ěn han. Topē vĭ tó tĭ ag kar tóg vĕsȳ Jesus jagtar ke ti tó ja nĭgtĭ, Topē tȳ ag mȳ: ha tó, hen kȳ. “Topē tȳ ūn jĕnĕg mū ěn tȳ jagtar ke vĕ, Cristo tī,” he ja ag tóg nĭgtĭ, Topē vĭ tó tĭ ag,” he tóg, Pedro ti.

19 “Kȳ ājag jykre tovĕnh nĭ. Topē jykre ki gemnĭ, Topē tȳ ājag tȳ ti vĭ mranh tȳ tū' he jé.

20 Hā kȳ ājag tóg tȳ Topē mré ke nȳtĭ, kȳ tóg ājag krĭ tȳ kĕnhvy' hĕnh ke mū, Topē ti. Kar kȳ tóg ājag mȳ ti jĕnĕ mĕn mū gé, tī tȳ ājag mȳ ūn jĕnĕnh ke ěn ti, Cristo ti, hā vȳ: Jesus, he mū,” he tóg, Pedro ti.

21 “Tī tȳ kanhkā tá nĭ vĕ ver. Tī tȳ ā kurā pétĕm kȳ tóg vĕhā tá vȳn kĕnh mū, Topē tȳ nĕn kar han mĕn ke kurā ěn kĕ,” he tóg.

“Hā kȳ Topē tóg vĕsȳ ā vĭ tó tĭ ag mȳ tó ja nĭgtĭ, ag tȳ vĕnh kar mȳ ti vĭ tó jé, ti tū ag kar mȳ.

22 Hā kȳ Moisés vȳ tag tó ja nĭ, ha mĕ: “Topē vȳ ājag mȳ ā vĭ tó tĭ ū jĕnĕnh ke mū, ājag mré ke ū, ti tȳ ājag mȳ Topē vĭ tó jé, inh ri kĕn. Ĕn ti vĭ jĕmĕmnĭ,” he ja tóg nĭgtĭ, Moisés ti,” he tóg, Pedro ti.

23 “Ū tȳ ti vĭ jĕmĕ jĕvĕnh ěn ter ke vĕ,” he ja tóg nĭgtĭ, “ěn pi(jé) tȳ Topē tū nĭ,” he ja tóg nĭgtĭ, Moisés ti,” he tóg, Pedro ti.

24 “Topē vĭ tó tĭ ag kar vȳ tó ja nĭgtĭ, ěg tȳ ūri vĕg mū tag ti. Samuel vȳ tag tó vĕn ja nĭgtĭ, kar ti nón ke ag kar tóg tag tó ja nĭ gé vĕhā,” he tóg, Pedro ti.

25 “Topē vĭ tó tĭ ěn krĕ vȳ tȳ ājag nȳtĭ,” he tóg. “Ājag jóg'jóg ve ag hā mré tóg jykřĕn ja nĭgtĭ, Topē ti, Abraāo hā mré. Hā kȳ tóg Abraāo mȳ: “ā kósĭn ū hā tugrĭn sóg vĕnh kar to há nĭnh mū,” he ja nĭgtĭ, Topē ti,” he tóg, Pedro ti.

26 “Ājag hā mȳ tóg ā kósĭn jĕnĕ, ti rĭn mĕn kȳ, Topē ti. Ājag hā mȳ tóg tó vĕn, ājag tȳ tȳ Israel nȳtĭn kȳ. Ājag hā mȳ tóg tó, ājag tȳ ājag jykre pĕno tovĕnh jé. Ti

tỹ ājag krīn sór vē, ājag tỹ tovānh jé, ājag jykre pāno ěn ti,” he tóg, Pedro ti, ũ tỹ Topē jo ĩn krēm vēnh mǎn kỹ nỹtĩ ěn ag mỹ.

4

Pǎ'i ag tỹ Pedro mré Joāo to jũ

1 Ag tỹ ver vēmén kỹ nỹtĩ ra Topē tũ ki rĩr tĩ ag tóg tá junjun mũ. Topē jo ĩn to capitão vỹ ag mré tá jun mũ gé, Saduceu ag ke gé, ũ tỹ: “ĕg hỹn rĩnrĩr mǎn ke tũ nĩ ha, ĕg ter kar kỹ,” he mũ ěn ag.

2 Pedro ag to ag tóg jũgũ mũ, ag tỹ: “Jesus vỹ rĩr mǎn,” hen kỹ. “Kỹ ĕg tóg ti ri kén rĩr mǎn mũ gé, ĕg ter kỹ,” he ag tóg, Pedro ag. Hǎ kỹ pǎ'i ag tóg ag to jũgũ mũ.

3 Hǎ kỹ ag tóg Pedro ag sigség mũ, vēse jafǎ kǎtá ag tóg ag vǎm mũ, ag tỹ kǎtá nũgnũr pir han jé. Rǎké ti nỹ ha, hǎ kỹ ag tóg: “ha ver kǎtá nũgnũr,” he mũ.

4 Hǎ ra ũ tỹ hēn ri ke ag tóg Pedro ag vĩ mē ja nĩgtĩ, kỹ ag tóg sir ti vĩ kri fig mũ. Ũ tỹ 5 mĩl (ke) ag vē, Jesus ki ge kỹ nỹtĩ ag, ĕg tỹ ũn tỹtǎ fag mré tó tũ hǎ ra.

5 Tỹ vaj kỹ pǎ'i ag tóg vēnh mǎn mũ, kófa ag mré hǎ, Topē vĩ to professor ag mré hǎ. Jerusalém tá ag tóg vēnh mǎn mũ.

6 Topē tũ ki rĩr tĩ to pǎ'i mág jyjy hǎ vỹ: Anás, he mũ. Ag pǎ'i mág ũ jijin hǎ vỹ: Caifás, he mũ. Pǎ'i mág kanhkǎ ũ jyjy hǎ vỹ: Joāo, he mũ, kỹ ũ jijin hǎ vỹ: Alexandre, he mũ. Pǎ'i mág mré ke kar ag vỹ tá vēnh mǎn kỹ nỹtĩ.

7 Vēnh kuju ki ag tóg Pedro ag vin mũ, kỹ ag tóg: “ũ nỹ ājag mỹ vēnh jykre tag nĩm, ājag tỹ ũn grĩ ěn tỹ há' he jé?” he mũ. “Ũ jykre tỹ ājag ti tỹ há' hé?” he ag tóg mũ, Pedro ag mỹ.

8 Kỹ vǎhǎ Topē kuprĩg tóg Pedro krĩn mũ. Kỹ tóg: “ha vé,” he mũ.

9 “Nén ũ há to ājag tóg ĕg kugmĩg mũ, ĕg tỹ ũn grĩ tỹ há' he mũ ěn to,” he tóg. “Kỹ ājag tóg vǎhǎ ĕg jykre jēmē sór mũ ha,” he tóg.

10 “Ājag mỹ sóg ĕg jykre tónh mũ, Israel kar tỹ ki kanhró nỹtĩ jé,” he tóg. “Jesus tugrĩn tóg há' hé, Nazaré tá ke ěn tugrĩn tóg tar jē nĩ, ājag tỹ ũ tỹ ka to sǎg mũ ěn hǎ tugrĩn. Topē tóg ti rĩn mǎn ja nĩ, ũ tỹ cruz to ter mũ ěn ti. ěn vỹ ti tỹ há' hé, ũn grĩ ja ěn ti,” he tóg, Pedro ti.

11 “Jesus ěn hǎ to tag tóg rán kỹ nĩ, Topē vĩ tỹ rán kỹ nĩ ěn ki, ha mē: ājag tỹ pó tỹ ĩn han kỹ ājag tóg pó ũ fón, ti tỹ ājag mỹ kórég nĩn kỹ. Hǎ ra Topē tóg pó ěn hǎ tỹ ĩn nũna han mũ,” he ja tóg nĩ, Topē vĩ ki, Jesus to,” he tóg, Pedro ti.

12 “Ũ pi(jé) ĕg kren han ke mũ'. Topē tóg Jesus fēg inhhǎ, ti hǎ tỹ ĕg kren han jé, ti hǎ tỹ ĕprǎ ke ag krenkren han kǎn jé, kanhkǎ krēm ke kar ěn ag. ĕg kren han ke mũ ũ venh ke tũ ĕg nĩ mỹr,” he tóg, Pedro ti, pǎ'i ag mỹ.

13 Pǎ'i ag tỹ Pedro vĩ mē kỹ tóg ag mỹ e tĩ. “ĕg kamēg tũ ag tóg nĩgtĩ mỹr,” he ag tóg, Pedro to, Joāo to ke gé. “Vēnh rán sĩ ag nỹtĩ vē mỹr, escola ki ge mág ja tũ ag nỹtĩ vē,” he ag tóg. To jykrén kỹ ag tóg ag ki kanhró nỹtĩ. “Jesus mré ke ag vē,” he ag tóg mũ, Pedro ag to. Kỹ tóg ag mỹ e tĩ.

14 Hǎ ra ũn grĩ ja tóg tá jē ag mré. Kỹ ag tỹ ne tỹ ag kato vĩnh ke tóg tũ tĩ sir.

15 Kỹ ag tóg Pedro ag mỹ: “ha ver kǎpa jēg,” he mũ. Kỹ pǎ'i ěn ag tóg ver jagnē mré to jykrén mũ.

16 Kỹ ag tóg: “ĕg hỹn ag tỹ hē ri kenh mũ ha?” he mũ. “Jerusalém tá ke kar vỹ ag tỹ nén han mũ ki kanhró kar nỹtĩ. Kỹ ag jykre tóg vēnh kar mỹ há nỹ. Kỹ ĕg tỹ ag to: ag ón vē, hen kỹ tóg tỹ ũn nỹ sir,” he ag tóg jagnē mỹ.

17 “Ag tŷ hā ra vēnh kar mŷ Jesus tó kŷ tóg tŷ ū nŷ gé,” he ag tóg. “Kŷ ěg tŷ ag mŷ: ha tó mǎn tŷg, henh ke vē,” he ag tóg. “Ājag tŷ ti tó mǎn kŷ ěg tóg ājag vóg kónān ke mŷ ha, he jé ěg tóg ke mŷ ag mŷ,” he ag tóg jagnē mŷ.

18 Kŷ ag tóg Pedro ag jé prēr mǎn mŷ. Kŷ ag tóg: “Ker ū mŷ tó mǎn hē,” he mŷ. “Ker Jesus tŷ vī mǎn hē,” he ag tóg mŷ ag mŷ.

19 Hā ra Pedro tóg João mré ag mŷ ke mŷ. “Topē tóg ěg mŷ: “ha vēnh kar mŷ tó,” he ja nī. Ājag tóg hā ra: “ker tó hē,” he mŷ. ěg hŷn ū tŷ hē vī han mŷ, Topē vī vó, ājag vī vó?” he tóg ag mŷ. “Ne nŷ hŷn Topē mŷ há nŷnh mŷ?” he tóg. “Ěg mŷ tó,” he tóg.

20 “Ěg pi(jé) tó tŷg mŷ, ěg tŷ nén vég mŷ ti, Jesus tŷ ěg mŷ nén tó ja ěn ti,” he tóg ag mŷ, Pedro ti.

21 Hā ra pā'i ag tóg: “ker tó hē, ker tó hē,” he mǎn mŷ gé. Kŷ ag tóg ag kygvāg mŷ sir. Ājag tŷ ag vóg kónān há ra ag tóg ag vóg kónān tŷ nī, vēnh kar tŷ ag to há nŷtŷn kŷ, vēnh kar tŷ Topē to: “há ti nī, ti hā ne tóg ūn grī ěn tŷ há' he mŷ,” hen kŷ.

22 Hā ra ūn grī ja ěn tóg tŷ nī sir. 40 anos kāfór han tóg, kŷ Topē tóg ti tŷ há' hé.

Jesus mré ke ag tŷ Topē mré vī

23 Pedro ag tŷ kygvar kŷ mŷ kŷ ag tóg ājag mré ke ag to mŷ mŷ. Kŷ ag tóg pā'i tŷ ājag mŷ nén tó ěn kāmén mŷ, kófa ag tŷ: “ker Jesus tó hē,” he mŷ ěn ti.

24 Kŷ vēnh kar ag tóg tag jēmē kŷ Topē mŷ vī há han mŷ, jagnē mré. Kŷ ag tóg: “ěg jóg mág,” he mŷ. “Tŷ ā tóg vēnh kar kri ke nī,” he ag tóg mŷ. “Kanhkā han ā mŷ, ga ti, goj ti ke gé, mŷ mŷ ag kar ke gé,” he ag tóg.

25 “Ěg jóg'jóg tŷ Davi krŷn ja ā tóg nŷgtŷ, ā camarada ěn ti. Ā kuprŷg tŷ ā tóg ti krŷn ja nī. Kŷ tóg Jesus tó ja nŷgtŷ, kŷ tóg: “fóg kar ag ne tóg jŷgŷ mŷ, kanhgág ag ke gé,” he ja nī. “Inh kanhkā tŷ Israel ag ne tóg nén ū tŷ to jykrén!” he ja tóg nī.

26 “Nação kar ag pā'i ag vŷ vēnh génh kŷ nŷtŷ, ěg pā'i ag ke gé, Topē kato tēgtē jé, Topē tŷ ūn kuprēg mŷ ěn ag kato,” he ja tóg nŷgtŷ, Davi ti,” he ag tóg, Topē mŷ.

27 “Hā ra tóg ki hā tó ja nī. Ěmā tag ki ag tóg vēnh génh kŷ nŷtŷ, ā kósin kato, ā tŷ ūn kuprēg mŷ ěn kato, ūn kuryj nī ěn kato, hā vŷ: Jesus, he mŷ,” he ag tóg. “Pāi mág tŷ Herodes vŷ ti kato tē mŷ gé, pā'i tŷ Pilatos ke gé, ag tŷ ū to: Pôncio, he mŷ ěn, fóg ag kar, Israel ag kar ke gé,” he ag tóg. “Tag ag kar vŷ vēnh génh kŷ nŷtŷ, ā kósin kato,” he ag tóg.

28 “Ā tŷ nén to jykrén mŷ han ag tóg mŷ sir, ā kato tēgtē mŷ tag ag. Vāsŷ ā tóg to: ge tŷ jé tóg ke mŷ, he ja nŷgtŷ,” he ag tóg, Topē mŷ.

29 “Pā'i ag tŷ ěg mŷ nén tó mē ā tóg, ag tŷ ěg mŷ: ker tó hē, he mŷ tag ti. Kŷ ěg tŷ tar' hemnŷ, ěg tŷ ag kamēg tŷ nŷn jé, ěg tŷ ā vī tó jé, ěg tŷ tŷ ā camarada nŷtŷn kŷ,” he ag tóg, Topē mŷ.

30 “Kŷ ěg mré milagre hŷn han nī gé. Ūn kagyga ag tŷ há' hemnŷ, ěg tŷ nén han vānh han nī, ěg tŷ ā mŷ to vŷn kŷ, ěg tŷ ā kósin tŷ Jesus jyjy tó kŷ, ěg tŷ ūn kuryj nī ěn tó kŷ,” he ag tóg, Topē mŷ.

31 Ag tŷ ti mré vī kar kŷ ga tóg jŷrŷn ke mŷ sir, ag tŷ tá nŷtŷ hā ra. Kŷ Topē kuprŷg tóg ag krŷn mŷ gé. Kŷ ag tóg mŷmēg vānh kŷ Topē vī kāmén mŷ sir.

Jesus ki ge kŷ nŷtŷ ag jykre pir

³² Ū tŷ Jesus ki ge kŷ nŷtī ag tóg jykre pir han kŷ nŷtī. Ū pi(jé) ā kuge to: “isū vē,” he tī. Ājag kuge kar to ag tóg: “ēg tū vē,” he tī.

³³ Jesus tŷ ūn vin mū ag tóg ēg Senhor tŷ Jesus rīr mǎn tugtó mū, to tar pē nŷtīn kŷ. Kŷ Topē tóg ag ki rīr há han mū gé sir.

³⁴ Ag mré ke ū pi(jé) jagāgtar nŷtī! Ag kāmī ū tóg ēpŷ nŷtī, kar ū tóg ĩn nŷtī gé. Ājag tū ēn funfón ag tóg mū, kŷ ag tóg ti kaja ma kāmū mū.

³⁵ Jesus tŷ ūn vin mū ag mŷ nīm jé, jānkamy ti. Kŷ ūn jagāgtar ag tóg jānkamy ēn to ājag tŷ nēn ve sór mū ēn mǎn mū sir.

³⁶ Kŷ ū tóg nī gé, ti jiji há vŷ: José, he mū. Jesus tŷ ūn vin mū ag tóg ti to: Barnabé, he tī, há vŷ: vēnh jyvēn krē, he mū, há vŷ: Barnabé, he mū. Levi kósin'kósin ū vē. Goj vāso tŷ Chipre tá ke vē.

³⁷ Ēn há vŷ ēpŷ nī, kŷ tóg ā japŷ fón mū, kŷ tóg Jesus tŷ ūn vin mū ag mŷ ti kaja ma kātī mū. Kŷ ag tóg jagnē mŷ kǎnhkrég mū sir.

5

Ananias fag tŷ Topē mŷ ón

¹ Kŷ ū tóg nī gé, ti jjy há vŷ: Ananias, he mū. Jāvo ti prū fi jiji há vŷ: Safira, he mū. Ēn vŷ tóg ā japŷ fón mū gé.

² Kŷ tóg ā prū fi mŷ: “ti kaja vēnh kǎpón péju kŷ ēg tóg nīm mū,” he mū. Ti vēnh kǎpón ū tŷ tóg Jesus tŷ ūn vin mū ag mŷ nīm mū. “Ēg japŷ kaja kar há vē,” he tóg mū ag mŷ, ón kŷ.

³ Kŷ Pedro tóg ti mŷ: “Satanás há ne tóg ā krīn ja nī,” he mū. “Hā kŷ ā tóg Topē kuprīg mŷ ón. Hā kŷ ā tóg ti kaja vēnh kǎpón péju kŷ nīm ja nī,” he tóg. “Hā ra ā tóg ti tŷ ā krīn mū ra: “nejé,” he ja tū nī, Satanás mŷ,” he tóg.

⁴ “Ā japŷ vē (mŷr), ha mē,” he tóg. “Kŷ ti kaja vŷ tóg tŷ ā tū nī gé sir,” he tóg. “Kŷ ā tŷ ma kātī tū nī há ra tóg tŷ nēn ū tū nī vē,” he tóg. “Hā ra ā tóg ā ón ke to jykren ja nŷgtī, ā tŷ ti kaja to ón jé,” he tóg. “Hā kŷ ā tóg ēg mŷ ón, há ra ā tóg Topē há mŷ ón mū,” he tóg, Pedro ti.

⁵ Ananias tŷ ti vī mē kŷ tóg kutē mū, ti ter vē sir. Ū tŷ mēg mū ag kar mŷ tóg e tī, kŷ ag fe tóg jūrūn ke mū.

⁶ Kŷ kyrū ag tóg jēgēg nēgnē kŷ ag tóg ti fi han mū. Kŷ ag tóg ti va mū mū, kŷ ag tóg ti kēnh mū sir.

⁷ 3 horas tūg kŷ ti prū fi tóg mī kātī mū gé. Hā ra fi tóg ā mén ter mē ja tū nī ver.

⁸ Kŷ Pedro tóg fi mŷ: “ājag mŷ ti kaja tag to fón, ājag japŷ ti?” he mū fi mŷ.

Kŷ fi tóg: “hŷ, ti kaja tag to ēg tóg fón,” he mū, ón kŷ.

⁹ Kŷ Pedro tóg fi mŷ: “ājag ne tóg jagnē mré to jykren ja nī gé,” he mū. “Topē kuprīg mŷ ājag ón mŷr. Ū tŷ ā mén kēnh mū ag vŷ mī kāmū jēg. Ā va ag tóg mūnh mū gé,” he tóg fi mŷ, Pedro ti.

¹⁰ Kŷ fi tóg kutē kŷ hun ke mū gé sir. Kyrū ag tŷ junjun kŷ ag tóg fi ter vég mū gé, kŷ ag tóg fi kēnh mū mū gé, fi mén mré.

¹¹ Kŷ Jesus ki ge kŷ nŷtī kar ag fe tóg jūrūn ke mū, ū tŷ mēg mū kar ag ke gé. Hā kŷ Ananias fag tóg Topē mŷ ón tugrīn kǎgter mū. Kŷ tóg vēnh kar mŷ e tī sir.

Ag tŷ Jesus tŷ ūn vin mū ag vóg kónān

12 Jesus tŷ ūn vin mŷ ag tóg nén ve vānh tŷ hēn ri ke hyn han mŷgtī, vēnh kar mŷ. Jesus ki ge kŷ nŷtī kar ag vŷ kurā kar ki vēnh mǎn tī, pā'i tŷ Salomāo he mŷ ēn sala tá, Topē jo ĩn krēm.

13 Jesus ki ge tŷ ag tóg venh kāmŷ tŷ nŷgtī, ag tŷ ag kamēg kŷ. Hā ra tóg vēnh kar mŷ há tī sir, Jesus ki ge kŷ nŷtī ag jykre ti.

14 Kurā kar ki ū tóg to jyrén ke mŷ, Jesus ki rā jé, ū tŷ hēn ri ke ag, fag ke gé. Hā ki ag tóg e nŷtī sir, Jesus ki ge mŷ ēn ag.

15 Kejēn ag tóg ūn kagyga gé kāmŷ mŷ gé vāhā, ēpryn kri, ēmīn kri. Tá ag tóg cama kri nŷtī, nŷg jafān ki. Kŷ ag tóg Pedro jāvānh mŷ. “Tī kǎnhvég tŷ ēg mŷ tŷg kŷ ū tóg hēn ri ke mŷn tŷ há' henh ke,” he ag tóg.

16 Ū tŷ hēn ri ke ag tóg Jerusalém tá vēnh mǎn mŷ, ēmā kar tá kāmŷ ēn ag. Ūn kagyga ag gé(g) ag tóg kāmŷ mŷ, ūn jagrē kórég ag ke gé. Kŷ ag tóg há' he kǎn mŷ sir.

17 Kŷ Topē tŷ ki rīr tī to pā'i mág tóg jŷ tāvī nī, ti mré ke kar ag ke gé, Saduceu he mŷ ēn ag kar.

18 Kŷ ag tóg Jesus tŷ ūn vin mŷ ag sigség mŷ, vēse ja mág tá.

19 Hā ra kuty tá Topē tŷ jēnē jafā tóg tere kŷ vēse ja jānkān nugnón mŷ, rugróm tóg mŷ. Ag gé(g) tóg tī mŷ, ag kygvān kŷ, kŷ tóg ag mŷ:

20 “ha mŷ jēg, Topē jo ĩn ra, ājag tŷ vēnh kar mŷ Topē vī tó jé, Topē tŷ ēg rīnrīn mǎn ke ēn tī,” he mŷ, Topē tŷ jēnē jafā ti, ag mŷ.

21 Ag tŷ ti vī mē kŷ ag tóg kusā pē ki Topē jo ĩn ra mŷ mŷ, tá Topē vī tó jé. Hā ra Topē tŷ ki rīr tī to pā'i mág tóg ā mré ke ag jēgnēg mŷ, ag tŷ kófa ag jé prēr jé, vēnh jyvēn tī kar ēn ag, povo tŷ Israel to pā'i ag ke gé. Kŷ ag tóg vēse ja ra ū jēgnēg mŷ, ag tŷ vēsigse ag tatī kāmŷ jé.

22 Polícia ag tŷ tá junjun mŷ ra ag tóg vēse ja kātá tŷgtŷ nŷtī. Kŷ ag tóg vŷnvŷn ke mŷ.

23 Kŷ ag tóg: “vēse ja tóg nīfēnh kŷ jē nī, nīfēnh jāfa tŷ,” he mŷ. “Kŷ ū tŷ ki rīr mŷ ag tóg tá nŷtī gé, ti jānkān tá. Ēg tŷ nón mŷ ra tóg kuprā jē nī,” he ag tóg mŷ, pā'i ag mŷ.

24 Topē jo ĩn to capitāo tŷ mē kŷ tóg ti mŷ e tī, Topē tŷ ki rīr tī to pā'i mág ag mŷ ke gé. Kŷ tóg ag krī tŷ tī sir.

25 Kŷ ū tóg tá jun kŷ: “Topē jo ĩn krēm ag nŷtī, ājag tŷ ūn sigség mŷ ag,” he mŷ. “Tá ag tóg vēnh kar mŷ Topē vī tó nŷtī,” he tóg.

26 Kŷ capitāo tóg polícia ag mré tī mŷ, ag tatī kāmŷ jé. Komēr hā ag tóg vī mŷ, ag mré. “Ēg vāsānsān kŷ ū tŷ ag vī mēg mŷ ag tóg hēn ri ke mŷn ēg pin ke mŷ, pó tŷ,” he ag tóg, polícia ag.

27 Apóstolo ag tŷ ag mré junjun kŷ ag tóg pā'i ag jo ag vin mŷ. Kŷ Topē tŷ ki rīr tī to pā'i mág tóg ag mŷ.

28 “ājag mŷ ēg tóg: ker ēn jiji tó mǎn hē', he ja nŷgtī,” he mŷ. “Ge ra ājag tóg Jerusalém tá ke kar ag mŷ tugtó ja nŷgtī, ēn vī ti,” he ag tóg, Jesus vī to. “Ājag hŷn ti ter to ēg jagāgtar han sór mŷ,” he ag tóg, pā'i ag.

29 Kŷ Jesus tŷ ūn vin mŷ ag kar tóg ag mŷ tag tó mŷ, ha mē. Pedro tóg ag mŷ tag tó mŷ, ha mē: “Topē tŷ ēg mŷ nén tó mŷ ēn han jé ēg tóg ke mŷ (mŷr),” he tóg. “Ēprā ke ag tŷ ēg mŷ: “ke tŷg nī,” he mŷ hā ra ēg tóg ti tŷ ēg mŷ nén tó mŷ ēn han mŷ,” he tóg.

30 “Ēg jóg'jóg ag vŷ Topē to há nŷtīgtī. Ag tŷ ū to há nŷtī ēn vŷ Jesus ti rīn mǎn ja nŷgtī, ājag tŷ ūn tén mŷ ēn ti, ka to ūn sāg mŷ ēn ti,” he tóg.

³¹ “Kỹ Topē tóg ti tỹ pã'i mág han mũ, ti tỹ ěg kren han tĩ han kỹ, ti tỹ ti mỹ: “kunĩg, inh pĕgia tá nĩ,” hen kỹ. Jesus tỹ tóg ěg kar krĩn sór mũ, ěg povo tỹ Israel kar tỹ vĕnh jykre pãno tovãnh jé, ti tỹ ag tỹ ã vĩ mranh tỹ vĕnh pãte fón jé,” he tóg.

³² “Nĕn kar ěn ve ja ěg tóg nĩgtĩ, hã kỹ ěg tóg ti vĩ tó mũ sir. Kỹ Topē kuprĩg tóg ěg kanhrãn mũ gé. Topē vỹ ù tỹ ti vĩ han mũ kar ag mỹ ã kuprĩg jĕnĕg mũ,” he tóg, Pedro ti.

³³ Pã'i ag tỹ ti vĩ mẽ kỹ ag fe tóg gỹm ke mũ, kỹ ag tóg ag kãgtĕn ke to jykrĕn mũ, Jesus tỹ ùn vin mũ ěn ag.

³⁴ Kỹ vãhã ù tóg jĕg nĕ mũ, Fariseu ù, ti jygy hã vỹ: Gamaliel, he mũ. Topē vĩ to professor ù vĕ, kỹ vĕnh kar mỹ tóg há nỹ, ti jykre ti. Kỹ tóg: “ver ag kãpan nĩ,” he mũ.

³⁵ Ag mũ kar tóg ag mỹ: “inh kanhkã,” he mũ. “To jykrĕn nĩ ver, ãjag tỹ han tũ jé,” he tóg.

³⁶ “Pedro ag jo ke ù tóg jĕ ja nĩ gé, ti jiji hã vỹ: Teudas, he mũ. Ti hã ne tóg vĕsỹ tỹ pã'i mág han ja nĩ, kỹ ù tỹ 100 tỹ 4 ag vỹ ti nón mũ ja nĩgtĩ sir. Ti tén ja ag tóg nĩ jãvo, pã'i ag, kỹ ù tỹ ti vĩ han mũ ag tóg tãmĩ mũ ja nĩ, kỹ tóg tũ' he mũ,” he tóg.

³⁷ “Kar kỹ ù vỹ jĕ ja nĩ gé, ti jygy hã vỹ: Judas, he mũ. Galiléia tá ke ěn vĕ. Ag tỹ vĕnh kar jygyi ránrãn mũ ra tóg tá jĕ ja nĩ, Judas ěn ti, kỹ ù tỹ hĕn ri ke ag tóg ti nón mũ ja nĩgtĩ gé. ěn tén ja ag tóg nĩ gé, pã'i ag, kỹ ù tỹ ti vĩ han mũ ag tóg krig' ke ja nĩ, vĕnh pipin kỹ,” he tóg.

³⁸ “Isỹ nĕn to jykrĕn hã vĕ, ha mẽ: Pedro ag tovãnh nĩ ver,” he tóg. “Ag mỹ: ha mũ jĕg, hemnĩ ver,” he tóg. “Ag tũ tỹ tỹ ěprã ke ag jykre nĩn kỹ tóg tũ' henh ke mũ (mỹr), vĕsóg ki, ha mẽ,” he tóg.

³⁹ “Ti tỹ hã ra tỹ Topē jykre nĩn kỹ ãjag tóg tỹ tũ' henh ke tũ nĩ,” he tóg. “Ãjag tỹ ge ra ag to jũ nỹtĩn kỹ ãjag tóg vãhã Topē kato tĕ mũ,” he tóg, Gamaliel ti.

⁴⁰ Kỹ ag tóg ti mỹ: “hej,” he mũ. Kỹ ag tóg Jesus tỹ ùn vin mũ ag jé prĕr mãn mũ. Ag mrãnmrãn ag tóg mũ. Kỹ ag tóg: “ker Jesus tó mãn hĕ!,” he mãn mũ ag mỹ. Kỹ ag tóg: “ha mũ jĕg ge,” he mũ.

⁴¹ Kỹ ag tóg mũ mũ, Jesus tỹ ùn vin mũ ag. Ag mỹ tóg sér tĩ, ha mẽ. Ag tỹ Jesus ri ke jagĕgtar mũ ra tóg ag mỹ sér tĩ, ag tỹ Jesus ri kĕn jagãgtar ke ki krỹg kỹ.

⁴² Kurã kar ki ag tóg Topē jo ĩn tá Jesus tó tĩ, ti to: “Topē vỹ ti jĕnĕ,” hen kỹ. Vĕnh kar ĩn tá ag tóg ti kãmĕn mũ gé, ù tỹ ag kógfyn kỹ. To ag tóg krónh ke tũ nĩgtĩ sir.

6

Ag tỹ ù tỹ 7 (ke) ag vin

¹ Kỹ ù tỹ hĕn ri ke ag tóg Jesus ki ge mũ. ù ag tóg Grego vĩ tó tĩ, Jesus mré mũ ù ag. Kỹ ù ag tóg Hebreu vĩ tó tĩ gé, ti mré mũ ù ag. Ag e nỹtĩn kỹ ù tỹ Grego vĩ tó mũ ag tóg kejĕn vĩ kónãn mũ, Hebreu vĩ tó tĩ ag kato. “Ù tỹ Hebreu vĩ tó mũ ag vỹ ěg ki króm tũ nỹtĩ (mỹr),” he ag tóg. “Ag kã ùn mĕn ter ja fag vỹ kurã kar ki vĕjĕn há vĕg tĩ, ag tỹ fag mỹ vin kỹ,” he ag tóg. “Hã ra ěg kã ùn mĕn ter ja ěn fag kã ag tóg jatun nỹtĩ, fag tỹ ag vĩ tó tũ nĩn kỹ. Hã kỹ fag tóg jagãgtar nỹtĩ, ěg mré ke fag,” he ag tóg.

² Kỹ ù tỹ 12 ag tóg mĕg mũ, Jesus tỹ ùn vin mũ ag. Kỹ ag tóg Jesus mré mũ kar ag jé prĕr mũ. Kỹ ag tóg: “Ĕg tũ hã vĕ, hã vỹ ěg tỹ tỹ Topē vĩ tó ti nỹ,” he

mũ. “Ēg tỹ vĕjĕn ki rĩr kỹ ĕg tóg kutar nỹtĩ, kỹ ĕg tóg ĕg tỹ nĕn han ke ki rĩr há han ke tũ nĩ gé,” he ag tóg.

³ “Kỹ ũ tỹ 7 (ke) ag vin nĩ, ũn kĀme kórĕg tũ ag, ũn jykre há ag, ũ tỹ Topĕ kuprĩg tỹ jagrĕ nĩ ĕn ag,” he ag tóg. “Ēn mỹ ĕg tóg vĕnh rĀnhrĀj ĕn nĩm mũ, ag tỹ vĕjĕn ki rĩr jé,” he ag tóg.

⁴ “Ēg hĀ tóg hĀ ra Topĕ mrĕ vĩ kỹ nỹtĩ, ti vĩ tó kỹ nỹtĩ. Ēg tỹ nĕn han ken hĀ vĕ,” he ag tóg, Pedro ag.

⁵ Ag vĩ vỹ vĕnh kar mỹ há nĩ ha, kỹ ag tóg Estĕvão fĕg mũ sir, ũ tỹ Jesus ki rĀ kỹ ĕn ti, kỹ Topĕ kuprĩg vỹ tỹ ti jagrĕ nĩ. Ti mrĕ ag tóg Filipe fĕg mũ gé, Prócoro ke gé, Nicanor ke gé, Timom ke gé, Pármenas ke gé, Nicolau ke gé, cidade tỹ Antioquia tá ke tag ti, fóg tỹ Israel jykre han mũ tag ti.

⁶ Ēn ag vin ag tóg mũ, Jesus tỹ ũn vin mũ ag jo. Kỹ ag tóg ag to Topĕ mrĕ vĩ mũ, ag nĩgĕ tỹ ag mĕ kỹ. HĀ kỹ ag tóg ag mỹ vĕnh rĀnhrĀj ĕn nĩm mũ, ag tỹ vĕjĕn ki rĩr jé.

⁷ Kỹ Topĕ vĩ tóg vĕnh kar kri rũm ke mũ sir. Ũ tỹ Jesus mrĕ mũ ag vỹ tóg ĕn ri ke nỹtĩ, Jerusalém tá. Kỹ Topĕ tũ ki rĩr tĩ ũ ag tóg Jesus vĩ kri fi kỹ ti ki ge mũ sir.

Ag tỹ Estĕvão se

⁸ Estĕvão vỹ hĀ ra krĩ há nĩ, Topĕ tỹ ti mỹ vĕnh jykre nĩm kỹ. Kỹ tóg ĕg tỹ nĕn han vĀnh tỹ ĕn ri ke hyn han mũ, vĕnh kar mỹ.

⁹ Kỹ Israel ag vĕnh kanhrĀn jafĀ ũ tá ag tóg ti vĩ kafĀn mũ, ũn kygvĀn kỹ nỹtĩ he mũ ĕn ag, cidade tỹ Cirene tá ke ag ke gé, cidade tỹ Alexandria tá ke ag ke gé, ga tỹ Cilícia tá ke ag ke gé, ga tỹ Āsia tá ke ag ke gé. Ēn ag kar vỹ Ājag tỹ Estĕvão mrĕ vĩn kỹ ti vĩ kafĀn mũ.

¹⁰ HĀ ra ag tỹ ti vĩ kafĀn ke tóg tũ tĩ, ti krĩ há nĩn kỹ, ti tỹ Topĕ kuprĩg tỹ jagrĕ nĩn kỹ.

¹¹ Kỹ ag tóg ũ ag krĩn mũ, ag tỹ ti kato vĩ jé, Estĕvão kato. Kỹ ag tóg: “ti vĩ mĕ ĕg (mỹr),” he mũ. “Moisĕs kato vĩ kónĀn tóg (mỹr), Topĕ kato ke gé,” he ag tóg ón kỹ, Estĕvão to.

¹² HĀ kỹ vĕnh kar tóg ti to jũgũ mũ, Estĕvão to, kófa ag mrĕ hĀ, Topĕ vĩ to professor ag mrĕ hĀ. Kỹ ag tóg ti kĀgmĩ kỹ ti ség mũ. Kỹ ag tóg pĀ'i ag jo ti pére kĀmũ mũ.

¹³ Ũ tỹ ón kỹ ti kato vĩnh ke mũ ag jé ag tóg prĕr mũ gé, pĀ'i ag. Kỹ ag tóg ti kato: “Topĕ jo ĩn kato tóg vĩ kónĀn tĩ, Topĕ tỹ ĕg mỹ nĕn tó ja ti kato ke gé,” he mũ ón kỹ. “HĀ ra tóg Ā vĩ kónĀn to krónh ke tũ nĩgtĩ,” he ag tóg ón kỹ, Estĕvão to.

¹⁴ “Ti vĩ mĕ ĕg (mỹr),” he ag tóg. “Jesus kĀmén tóg tĩgtĩ, Nazaré tá ke ĕn ti,” he ag tóg. “Topĕ jo ĩn kókĕn jé tóg ke mũ, Jesus ti,” he tóg nĩgtĩ, Estĕvão ti, kỹ tóg Moisĕs tỹ ĕg mỹ vĕnh jykre nĩm mũ ĕn tỹ tũ' he sór mũ gé, ĕg mỹ vĕnh jykre ũ nĩm kỹ,” he ag tóg. Ag tỹ Estĕvão to ón hĀ vĕ.

¹⁵ Kỹ pĀ'i kar ag tóg ti tugnỹm mũ, hĀ ra ti ve tóg sir Topĕ tỹ jĕnĕ jafĀ ve ri ke nĩ, Estĕvão ti.

7

Estĕvão tỹ vĕnh kĀmén

¹ Kỹ Topĕ tũ ki rĩr tĩ to pĀ'i mág tóg ti mỹ: “Ki hĀ ke mỹ?” he mũ.

² Kŷ Estêvão tóg ag mŷ: “ijóg’;” he mŷ. “Inh kanhkā’;” he tóg. “Ēg jóg tŷ Topê vŷ tóg vênh kar kâfór nŷ,” he tóg. “Ti hã ne ěg jóg’jóg tŷ Abraão mré vŷ ja nŷgtŷ, ti tŷ ver ga tŷ Mesopotâmia tá nŷ ki, ti tŷ ver ěmã tŷ Harã ra tŷ tŷ ki.

³ Kŷ tóg ti mŷ: “ã jamã tá kutê;” he ja nŷ. “Ã kanhkã ag kar ré kŷ tŷg;” he ja tóg nŷ ti mŷ. “Ga ù ra tŷg, isŷ tá ã mŷ: tag kã nŷmnŷ, he jé;” he ja tóg nŷ ti mŷ, Topê ti.

⁴ Hã kŷ tóg ga tŷ Caldéia tá kãkutê mŷ, Hãra tá ěmãn jé, Abraão ti. Ti panh ter kar kŷ Topê tóg ti mŷ: “ga tag ra tŷg sir;” he mŷ.

Ēg jamãn hã vê, Abraão jamã ja ti;” he tóg, Estêvão ti, pã’i ag mŷ.

⁵ “Ge ra Topê tóg Abraão mŷ ga ěn nŷm ja tŷ nŷ, ěpŷ pir mré tó kŷ. Ti mŷ tóg hã ra: “ã tŷnh ke vê, kar kŷ, ã krê tŷnh ke vê gé;” he ja nŷ, Topê ti. Hã ra tóg ver kósŷn ja tŷ nŷ, Topê tŷ ti mŷ: “ã krê tŷnh ke vê;” he mŷ ra.

⁶ Kŷ Topê tóg ti mŷ: “ã krê ag tŷ fóg ù ag mré mŷnh ke vê, fóg ěn jamã tá;” he mŷ. “Fóg ěn ag tŷ camarada han ke vê, ag vóg kónãn jé ag tóg ke mŷ, prŷg tŷ 100 tŷ 4 ki;” he tóg, Abraão mŷ, Topê ti.

⁷ “Hã ra ù tŷ ag vóg kónãn mŷ ěn ag vóg kónãn jé sóg ke mŷ gé, kar kŷ;” he tóg, Topê ti. “Isŷ ag vóg kónãn kar kŷ ã krê ag tóg tá kãpanh mŷ. Kŷ ag tóg ga tag ki isŷ ti han mŷ;” he tóg, Topê ti. Ti tŷ Abraão mŷ ken hã vê;” he tóg, Estêvão ti.

⁸ “Kŷ tóg ti mŷ vênh jykre nŷm mŷ, ti tŷ ã krê ag gré junun fár kym jé. Kŷ ti sinal vê sir. Kar kŷ Abraão tóg Isaque han mŷ. Ti tŷ kurã tŷ 8 han kŷ tóg ti mŷ kym mŷ. Isaque tŷ Jacó han kŷ tóg ge han mŷ gé, kŷ Jacó tóg ge han mŷ gé, ti tŷ ã krê tŷ 12 ěn ag han kŷ, ěg tŷ ù to: ěg jóg’jóg kar, he mŷ ěn ag;” he tóg.

⁹ “Hã ra ěg jóg’jóg ěn ag tóg ãjag jãvy tŷ José to jŷgŷ nŷtŷ, ãjag tŷ ti tŷ to én kŷ. Hã kŷ ag tóg ti vêne he mŷ, José ti, ù tŷ ga tŷ Egito ra mŷ mŷ ag mŷ. Hã ra Topê tóg ti ki rŷr mŷ.

¹⁰ Kŷ tóg ti jy nŷgãn mŷ, ti tŷ vênh jagtar vég mŷ ra. Ti jykre há nŷn kŷ tóg Egito tá ke ag pã’i mág mŷ há tŷ, ag tŷ ù to: Faraó, he mŷ ěn mŷ. Hã kŷ tóg ti tŷ pã’i mág han mŷ, Faraó ti, José ti tŷ. Ti tŷ tóg pã’i mág han mŷ, ti tŷ Egito tá ke kar ag ki rŷr jé, Faraó mré ke kar ag ki rŷr jé gé sir.

¹¹ Kejên tóg prŷg han mŷ, ga tŷ Egito mŷ hã, ga tŷ Canaã mŷ hã ke gé. Kŷ vênh kar tóg kókŷnkŷr mŷ, prŷg kã. Kŷ ěg jóg’jóg ěn ag tóg kókŷnkŷr mŷ gé.

¹² Kŷ ù tóg Jacó mŷ: “Egito tá ti vĕjĕn nŷ inhhã;” he mŷ. Kŷ tóg ěg jóg’jóg ag jĕgnĕg mŷ, Jacó ti, ag tŷ Egito ra mŷ vĕn jé.

¹³ Ag tŷ ra mŷ nãn kŷ José tóg vãhã ag mŷ: “inh hã vê;” he mŷ, ã kãke ag mŷ. Hã kŷ Faraó tóg José kanhkã ki kanhró nŷ gé sir.

¹⁴ Kŷ José tóg ã panh tŷ Jacó jé prĕr mŷ, ti tŷ vĕnh kar tatŷn kãtŷg jé. Û tŷ 70 kri 5 ag vĕ, ti kanhkã ag.

¹⁵ Kŷ Jacó tóg Egito ra tŷ mŷ. Tá tóg ter mŷ kejĕn. Kar kŷ ěg jóg’jóg ag vŷ tá kãgter kãn mŷ gé.

¹⁶ ěmã tŷ Siquém tá ag tóg kĕnh kŷ nŷtŷ, Abraão vŷ tóg vĕnh kej ěn to jãnkamy nŷm ja nŷ, Emor kurã ag mŷ, ěmã tŷ Siquém tá;” he tóg, Estêvão ti.

¹⁷ “Vãhã tóg kurã pétĕm ke mŷ sir, Topê tŷ Abraão mŷ: “ã krê mŷ sóg ga ěn nŷm mŷ;” he mŷ kurã ti. Kŷ ag tóg Egito tá vĕnh grun mŷ.

¹⁸ Kejĕn ù tá pã’i tóg tŷ pã’i jĕ, Egito tá. Hã ra tóg José mĕ ja tŷ nŷ, pã’i tag ti.

¹⁹ ěn tóg ěg kanhkã ag kã’ug mŷ, ag lograr ke tóg mŷ, ěg jóg ag vóg kónãn tóg mŷ gé. Kŷ tóg ag mŷ: “ãjag krê kãsir ag vãm ra, ag kãgter jé;” he mŷ, pã’i ěn ti;” he tóg, Estêvão ti.

20 “Ti tỳ tag tó kar vāhā Moisés tóg mur mũ, kỳ tóg Topê mỷ há tí. Hã ra ti han mũ fag tóg kysã tãgtũ hã ki ti ki rĩr mũ.

21 Kysã tãgtũ tũg kỳ fag tóg sir ti fón mũ. Hã ra Faraó ên kósin fi tóg ti ve kỳ ti vãng mũ, ti jẽ'yn jé. Kỳ tóg fi kósin ri ke nĩ, Moisés ti.

22 Kỳ tóg nén kar ki kanhrãn mũ, Egito tá vênh jykre kar ên ki. Kỳ ti jykre vỹ vênh jykre tỹ hên ri ke nĩ, kỳ ti vĩ vỹ vênh vỹ tỹ hên ri ke nỹ gé, Moisés ti,” he tóg, Estêvão ti.

23 “Vāhā tóg prỹg tỹ 40 han mũ, Moisés ti. Kỳ tóg ã kanhkã pẽ ag to jykrén mũ, povo tỹ Israel to, ag tỹ nén han mũ vênh tĩg jé.

24 Kỳ tóg ù vég mũ. Egito tá ke ù vég tóg mũ, Moisés ti. Ti tỹ Israel vóg kónãn vég tóg mũ, nén ù tũ to. Kỳ tóg ti to jũ kỳ Israel ên kajãm mũ, ti tén tóg mũ, Egito tá ke ên ti.

25 “Inh kanhkã ag hỹn isỹ nén han mũ to jykrén mũ,” he tóg. “Hã kỳ ag tóg ki kanhró nỹtĩ, Topê tỹ inh tugrĩn ag kren han ke ti,” he tóg, Moisés ti. Hã ra ag tóg to jykrén tũ nỹtĩ, ti kanhkã ag,” he tóg, Estêvão ti.

26 “Tỹ vaj kỳ tóg ag to tĩg mãn mũ, ã kanhkã ag to. Kỳ ùn régre ag tóg jagnê to jũ nỹtĩ, Israel ag. Kỳ Moisés tóg ag tỹ jagnê to há han sór mũ. Hã jé tóg ag mỷ: “tỹ ãjag tóg jagnê kanhkã nỹtĩ vê,” he mũ. “Ãjag tỹ ne jé jagnê vóg kónãn sór nê?” he tóg.

27 Û tỹ ã régre vóg kónãn mũ ên tóg ti vóg kỳ ti mỷ: “ã pi(jé) tỹ êg pã'i nĩ,” he mũ. “Ã pi(jé) êg jyvẽn mũ,” he tóg.

28 “Ã hỹn isén sór mũ, ã tỹ rãké tá Egito tá ke ên tén ri ke han sór ã hỹn mũ,” he tóg ti mỷ,” he tóg, Estêvão ti.

29 “Kỳ Moisés tóg ã tỹ ti vĩ mẽ kỳ tóg vênh pēju kỳ tĩ mũ. Kỳ tóg ga tỹ Midiã ra tí mũ. Povo ù ag mĩ tóg tĩ mũ gé. Tá tóg prũg kỳ kósin régre han mũ.

30 Prỹg tỹ 40 tũg kỳ Topê tỹ jẽnê jafã vỹ ti mỷ vênh ven mũ, ti tỹ êmã tũ ja mĩ tĩ mũ ra, krĩ tỹ Sinai tá. Vãnh grug ki tóg ti vég mũ, Moisés ti, Topê tỹ jẽnê jafã ên ti.

31 Ti tỹ ti ve kỳ tóg ti mỷ e tĩ. Kỳ tóg ra tĩ mũ, ti ve há han jé. Kỳ tóg vênh vỹ mẽg mũ. Topê vỹ vê.

32 Kỳ tóg ti mỷ: “tỹ sóg ã jóg'jóg ag Topê nĩ,” he mũ, “Abraão Topê, Isaque Topê, Jacó Topê,” he tóg, vênh vỹ ti.

Hã ra Moisés tóg jũrũn ke mũ, ti kamẽg kỳ. Kỳ tóg tá êvãnh jãvãnh nĩ.

33 Hã ra Topê tóg ti mỷ: “ã pẽn né kunũ ra, ã pẽn to ró ti,” he mũ. “Inh jo ã tóg jẽ nĩ (mỹr), hã ra sóg vênh kar kãfór nĩ. Hã kỳ kunũ,” he tóg, Topê ti.

34 “Egito tá ke ag tỹ isũ ag vóg kónãn vég isóg nĩ nĩ. Ag vêkrênkrên mẽg sóg nĩ nĩ. Kỳ sóg tére, sỹ ag kygvãn jé. Hã kỳ sóg ã jẽnêg mũ, ga tỹ Egito ra, ã tỹ ag kygvãn jé. Ha tũg,” he tóg, Topê tỹ jẽnê jafã ti, Moisés mỷ,” he tóg, Estêvão ti.

35 “Moisés ên hã jẽnê ja tóg nĩ, Topê ti, ti tỹ ã kanhkã ag kren han jé, ti tỹ tỹ pã'i nĩ jé. Hã to Topê tỹ jẽnê jafã tóg ti mỷ vênh ven, vãnh gru ki. Hã ra ti kanhkã ag tóg ti to é he ja nĩgtĩ, ti mỷ: “ã pi(jé) tỹ êg pã'i nĩ,” hen kỳ, “ã pi(jé) êg jyvẽn mũ,” hen kỳ.

36 Moisés tóg sir êg tỹ nén han vãnh hyn han, ga tỹ Egito tá, goj kafã tũ tá ke gé, goj kusũg he mũ ên tá ke gé. Kỳ ag tóg êmã tũ mĩ mũ mũ, prỹg tỹ 40 ki, ti kanhkã ag. Kỳ Moisés vỹ ag jo tĩ mũ, ti tỹ ga tỹ Egito tá ag kãpan kỳ. Hã ra tóg ag mũn ki êg tỹ nén han vãnh hyn han mũ gé,” he tóg, Estêvão ti.

37 “Moisés tóg ã kanhkã ag mý, povo týt Israel ag mý tóg tag tó ja nĩ: “Topê výt ãjag mý ã vĩ tó tí ù jēnēnh mũ, ãjag mré ke ù, ti týt ãjag mý Topê vĩ tó jé inh ri kén,” he ja tóg nĩgtĩ, Moisés ti.

38 Moisés ên hã ne tóg povo týt Israel ag mré êmã tũ mĩ tí ja nĩgtĩ. Ag týt kejēn pãnónh týt Sinai tá nýtĩn ký tóg Topê týt jēnē jafã mré vĩ mũ, Moisés ti. Ký tóg ti mý vēnh vĩ nĩm mũ, Topê ti, êg týt ti vĩ ên han ký êg týt êg rĩr krýg ja tũ ve jé. Ký Moisés tóg êg jóg'jóg ag mý vēnh vĩ ên tugtó mũ. Hã ra tóg êg mý tó mũ gé,” he tóg, Estêvão ti.

39 “Moisés vĩ han vãnh ag nýtĩ, êg jóg'jóg ag. Ký ag tóg ti tovãnh ký ga týt Egito ra mũ mãn sór mũ, kyrãgrã ký.

40 Ký ag tóg Moisés jãvy týt Arão mré vĩ mũ. Ký ag tóg ti mý: “êg mý vēnh kãggrã týt topê han, retrato týt, êg týt vēnh jo ag gé(g) mũ jé,” he ag tóg.

Hã ra Moisés výt ver pãnónh týt Sinai kri nĩ nĩ.

Ký ag tóg Arão mý: “Moisés tóg êg jo tĩg ja nĩ,” he mũ. “Êg kãpan ja tóg nĩ, ga týt Egito tá, hã ran hē ra vyr hýn?” he ag tóg ti mý. Ký tóg ag mý: “hej,” he mũ.

41 Ký ag tóg monh sĩ kãggran mũ. Ký ag tóg ti kãggrã ên mý ag tóg ãjag mēg kugprũn mũ, retrato ên mý. Ag týt han mũ tóg ag mý sĩnvĩ tí. Ký tóg ag mý sér tí sir.

42 Hã ra Topê tóg vēnh kaja jé ag tovãnh mũ gé, hã ký ag tóg rã to jãnjãn mũ, kysã to (mýr), krĩg kar to (mýr). Hã ký Topê vĩ tó tí ù tóg ag to rán mũ gé, ký tóg: “Israel,” he mũ. “Ãjag týt êmã tũ ja mĩ mũn ký ãjag tóg inh mý nén ù pũn ja tũ nĩgtĩ (mýr),” he tóg. “Prýg týt 40 ki ãjag tóg êmã tũ ja mĩ mũ ja nĩgtĩ,” he tóg, “hã ra ãjag tóg tonp ù ag mý kugprũn ja nĩgtĩ, inh mý pũn tó nĩn ký,” he tóg, Topê ti, ã vĩ tó tí týt.

43 “Topê týt Moloque ĩn sĩ va ãjag tóg mũ ja nĩgtĩ, krĩg kãggrã ke gé, hã výt: Renfã, he mũ, krĩg retrato ên ti,” he tóg. “Vēnh kãggrã ên to ãjag tóg jãnjãn ja nĩgtĩ,” he tóg. “Hã ký sóg ãjag vóg kónãn ký Babilônia tá ke ag jēgnēnh mũ, ag týt ãjag taũn mũ jé, cidade týt Babilônia mã ra,” he tóg, Topê ti, ã vĩ tó tí týt,” he tóg, Estêvão ti.

44 “Êg jóg ag týt êmã tũg ja mĩ mũn ký ag tóg kur týt Topê pē jo ĩn han ja nĩ, ag týt tá Topê tũ han jé, ti ĩn tá. Topê výt Moisés mý tó ja nĩ, ti týt kur týt Topê jo ĩn han jé, ký tóg ti týt nén han ke ven ja nĩ ti mý.

45 Ag krē tóg sir ag ri kén ĩn týt kur ên ma mũ ja nĩgtĩ gé, ag týt Topê týt ãjag mý êmã tó mũ ên ra mũn ký. Moisés ter kar Josué tóg sir ag jo tí mũ, ký ag tóg ga ên ra mũ mũ. Hã ra Topê tóg ga ên tá ke ag kãpan mũ, êg jóg'jóg ag jo.

Kejēn Davi tóg týt ag pã'i nĩ sir, prýg týt hēn ri ke kar ký. Hã ra ĩn týt kur ên tóg ver jé nĩ.

46 Topê výt Davi to há nĩ. Ký Davi tóg ti mý: “sý ã mý ĩn há han há tóg tí vē,” he mũ. “Ã hã ne tóg týt ijóg'jóg týt Jacó Topê nĩ,” he tóg. “Ký tóg ã týt ĩn týt kur krēm nĩn ký inh mý há tũ nĩ,” he tóg ti mý, Davi ti.

47 Hã ra Davi tóg han tũ nĩ ver. Ti kósin týt Salomão tóg ĩn ên han mũ,” he tóg, Estêvão ti.

48 Ký tóg ag mý: “hã ra vēnh kar kãfór ên tóg êg týt ti jo ĩn han mũ ên krēm nĩ tũ nĩgtĩ (mýr),” he mũ. “Hã ký Topê vĩ tó tí ù tóg ti to tag tó ja nĩ, ha mē.

49 “Kanhkã tân výt týt inh nĩ,” he tóg. “Inh nĩg ja ri ken hã vē,” he tóg. “Ký ga výt týt isũ nĩ gé. Sý tá vēnhkãn sór nĩn ký sóg kenh ke mũ. Isũ kar vē. Ký ãjag týt inh mý ĩn han sór ký ãjag hýn hē ri kenh mũ?” he tóg. “Pétēm ke tũ ãjag nĩnh mũ, ãjag týt inh mý vēnhkãn jafã han ken kí,” he tóg.

50 “Inh hã ne tóg nén kar hyn han ja nĩ inhhã,” he tóg, Topê ti, ã ví tó tí tỹ,” he tóg, Estêvão ti.

51 Kĩ tóg ag mỹ: “krĩ tũ ãjag nỹĩ (mỹr),” he mũ. “Ki kanhrãn jãvãnh ãjag tóg nỹĩ (mỹr),” he tóg. “Kỹ ãjag nĩgrêg tóg kutu nĩ gé (mỹr), Topê kuprĩg kato ãjag tóg vãsãnsãn nỹĩ. ãjag jóg'jóg ag mré ãjag tóg ti kato vãsãnsãn nỹĩ,” he tóg.

52 “Ãjag jóg'jóg ag ne tóg Topê ví tó tí ag kar vóg kónãn ja nĩgtĩ, ag kãgtén ja ag tóg nĩgtĩ. Hã ra ên ag tóg ù tỹ vènh jykre kuryj han mũ ên kãmén ja nĩgtĩ, hã vỹ: Jesus, he mũ. Ti kãtĩg ke jo ag tóg ti tó ja nĩgtĩ, Topê ví tó tí ag. Jãvo ãjag tóg ên kato ví ja nĩgtĩ, fóg mỹ. Kĩ ãjag tóg ti tén ja nĩgtĩ, Cristo ti,” he tóg, Estêvão ti.

53 “Topê hã ne ãjag mỹ ã ví nĩm ja nĩ, ã tỹ jêgnê jafã ag tỹ. Hã ra ãjag tóg ti ví mrynhmranh ja nĩgtĩ,” he tóg. Estêvão tỹ pã'i ag mỹ tón hã vè.

Ag tỹ Estêvão tén

54 Û tỹ tá nỹĩ ag tỹ ti ví mẽ kỹ ag fe tóg gỹm ke mũ. Kỹ ag tóg ãjag jã tỹ gyngyn he mũ, tỹ ag tóg gangan ke mũ.

55 Hã ra Topê kuprĩg tóg Estêvão krĩn mũ, kỹ Estêvão tóg kanhkã ki êvãnh mũ. Kỹ tóg Topê vég mũ, ti kókov ti. Jesus vég tóg mũ gé, Topê pêgja tá tóg jê nĩ, Jesus ti.

56 Kĩ tóg: “ha vé,” he mũ. “Kanhkã tá sóg vég mũ,” he tóg. “Kỹ êprã ke fi kósín tóg Topê pêgja tá jê nĩ,” he tóg.

57 Kĩ ag tóg prênprêr mũ sir, ãjag nĩgrêg nĩgfénh kỹ. Ti to ag tóg vènh génh mũ sir, ag kar ti.

58 Kĩ ag tóg ti ség mũ, cidade tỹ Jerusalém tá ag tóg ti kutêm mũ gé. Kĩ ag tóg ti pin mũ, pó tỹ. ãjag kur vãvãm ag tóg mũ, kỹ kyrũ tóg ki rĩr mũ, ag kur ki. Kyrũ ên jiji hã vỹ: Saulo, he mũ.

59 Kĩ ag tóg Estêvão pin mũ sir, pó tỹ. Hã ra Estêvão tóg jamã hár(a): “!..inh Senhor'..!” he mũ. “!..Jesus'..!” he tóg. “!..Inh kuprĩg jãvãnh ra..!” he tóg mũ.

60 Kĩ tóg ã jakrĩ tỹ jê kỹ prêr mũ, jamã hár(a), kỹ tóg: “!..inh Senhor'..!” he mũ. “!..Ag tỹ inh pin tỹ vènh pãte fón ne..!” he tóg mũ. Kar kỹ tóg hun ke mũ sir.

8

Saulo tỹ ag vóg kónãn

1 Jãvo Saulo ên mỹ tóg há tí, ag tỹ ti tén kỹ. Kurã ên kã ag tóg Jesus ki ge mũ kar vóg kónãn jagy han mũ, Jerusalém tá. Û tỹ vènh mãn tí ag vóg kónãn ag tóg mũ gé, ù tỹ Topê ví mẽ jé vènh mãn tí ag. Kĩ ag tóg jagãgtar tãvi nỹĩ. Kĩ ag tóg vènh kãpugpón kãn mũ sir. Ga tỹ Judéia kar mũ ag tóg mũ mũ, ga tỹ Samaria mũ ke gé. Hã ra Jesus tỹ ùn vìn mũ ag hã tóg Jerusalém tá nỹĩ nĩ.

2 Û tỹ Topê to há tí ag tóg fe kaj nỹĩ, Estêvão ter kỹ. Kĩ ag tóg kygfỹ mág kỹ ti kénh mũ.

3 Hã ra Saulo tóg Jesus ki ge kỹ nỹĩ kar ag vóg kónãn jagy han mũ, ù tỹ Topê ví mẽ jé vènh mãn tí ag. Ti tỹ ag tũg sór vè, Saulo ti. Hã jé tóg ìn kar kãra rã tí. Ti tỹ Jesus ki rã kỹ jê ù ven kỹ tóg vèse jan kãtã ti fón ti, ùn gré ag, ùn tãtã fag ke gé.

Samaria tá Topê ví tó

4 Û tỹ vènh kãpugpón mũ ên ag vỹ vènh kar mỹ vènh ví sér tugtó mũgtĩ, Topê ví ti.

⁵ Kŷ Filipe tóg tĩ mũ gé. Ga tŷ Samaria ra tóg tĩ mũ, kŷ tóg cidade ũ ki ra mũ, Cristo kāmén jê.

⁶ Kŷ vĕnh kar tóg ti vĩ mẽgmĕg mũ. Jĕmĕ há han ag tóg mũ, Filipe vĩ ti. Hã ra Filipe tóg ĕg tŷ nĕn han vĕnh hyn han mũ gé. Kŷ ag tóg vég mũ. Hã kŷ ag tóg jĕmĕ há han mũ.

⁷ Vĕnh jagrĕ kórĕg tŷ hĕn ri ke pan tóg mũ, Filipe ti. Ti tŷ ag pan kŷ ag tóg jamã há r(a) prĕr mũ, kŷ ag tóg kãpa mũ. Ũ grĩ ag tŷ há' he tóg mũ gé, ũn vagvá ag tŷ ke gé, ũn vygvá ag tŷ.

⁸ Kŷ tóg vĕnh kar mŷ sér tĩ sir, cidade ĕn tá.

⁹ Kŷ Simão tóg nĩ nĩ, cidade ĕn tá ke ũ. Kujá vĕ, Simão ĕn ti. Kŷ tóg nĕn vĕnhmŷ hyn han tĩgtĩ. Kŷ tóg ga tŷ Samaria tá ke ag tŷ ti tŷ nĕn han ve kŷ tóg ag mŷ e tí. Vĕso tóg: “ag kãfór inh nĩ,” he tí, ag tŷ ti kamĕg jĕ.

¹⁰ Hã kŷ vĕnh kar tóg ti kamĕg mũ sir, ũn sanh ag, gĩr ag ke gé. Ti to ag tóg: “Topĕ jŷkre han tóg tĩgtĩ, Topĕ jŷkre mág (pĕ) ĕn,” he tí, Simão ĕn to.

¹¹ Kŷysã tŷ hĕn ri ke ki tóg nĕn vĕnhmŷ hyn han tí, kŷ tóg vĕnh kar mŷ e tí, hã kŷ ag tóg ti kamĕg tĩ sir.

¹² Vãhã ag tóg Filipe vĩ kri fig mũ, Samaria tá ke ag, ti tŷ Jesus Cristo tón kŷ. Topĕ tŷ tŷ ĕg pã' i nĩ kāmén tóg mũ, Filipe ti. Ũ tŷ ã vĩ kri fig mũ ag kygpĕg tóg mũ, ũn grĕ ag, ũn tâtã fag ke gé.

¹³ Kŷ Simão ĕn tóg ti vĩ kri fig mũ gé, kujá ĕn ti. Kŷ Filipe tóg ti kypĕg mũ gé. Kŷ tóg Filipe mrĕ nĩ nĩ. Kŷ tóg Filipe tŷ ĕg tŷ nĕn han vĕnh hyn han mũ vég mũ, Topĕ jŷkre tŷ. Kŷ tóg ti mŷ e (pĕ) tâvĩ tĩ sir, Simão mŷ.

¹⁴ Kŷ vãhã Jesus tŷ ũn vin mũ ag tóg kejĕn mẽg mũ, Samaria tá ke ag tŷ Topĕ vĩ kri fig mũ ĕn ti. Jerusalém tá ag tóg mẽg mũ, kŷ ag tóg João mrĕ Pedro jĕnĕg mũ, ag tŷ ve jĕ.

¹⁵ Pedro ag tŷ tá junjun kŷ ag tóg ag to Topĕ mrĕ vĩ mũ, Samaria tá ke ag to, Topĕ tŷ ã kuprĩg tŷ ag jagrĕn jĕ.

¹⁶ Tá ke ũ tóg tŷ jagrĕ tú ja nĩ ver. Kygpe kŷ ag nŷtĩ inhhã, Jesus jiji tó kŷ, ĕg Senhor jŷjy tó kŷ.

¹⁷ Kŷ Pedro ag tóg ãjag nĩgé tŷ ag mẽgmĕg mũ, kŷ Topĕ kuprĩg tóg ag kãra rã mũ.

¹⁸ Hã ra Simão tóg vég mũ, Jesus tŷ ũn vin mũ ag tŷ nĕn han mũ ti. Ag tŷ ũ mẽ kŷ Topĕ kuprĩg tóg ag kãra rã mũ. ĕn vég tóg mũ, Simão ti. Kŷ tóg ag mŷ jãnkamy ven mũ, Pedro ag mŷ.

¹⁹ Kŷ tóg ag mŷ: “inh mŷ vĕnh jŷkre tag nĩm nĩ, jãnkamy tag to,” he mũ. “Sŷ ũ mẽ kŷ Topĕ kuprĩg tóg ag kãra rãnh ke mũ. Sŷ vĕnh jŷkre ĕn ki kanhrãh há tóg tí,” he tóg.

²⁰ Hã ra Pedro tóg ti mŷ: “ã jãnkamy mrĕ ã nũgme ki kutĕnh mũ,” he mũ. “Topĕ tŷ nĩm ja vĕ (mŷr), hã ra ã tóg jãnkamy ti mãn sór mũ, vĕnh jŷkre ti,” he tóg.

²¹ “Ã pi(jé) Topĕ jŷkre tag ki kanhró nĩnh mũ', kŷ Topĕ tóg ã mŷ nĩm ke tú nĩ,” he tóg. “Ã jŷkre pijĕ kuryj nŷ', Topĕ mŷ,” he tóg.

²² “Ã jŷkre pãno tag tovãnh ra,” he tóg. “Topĕ mrĕ vĩ. Hĕn ri ke mũn tóg ã mŷ vĕnh pãte fón mũ, ã tŷ vĕnh jŷkre pãno to jŷkrĕn mũ tag ti,” he tóg. Pedro tí.

²³ “Fe kórĕg tâvĩ ã nĩ (mŷr), kŷ ã jŷkre vŷ pãno nŷ gé sir,” he tóg, Pedro ti.

²⁴ Kŷ Simão tóg ti mŷ: “iso Topĕ mrĕ vĩ, inh jagtar jĕg tú nĩ jĕ, ã tŷ inh mŷ tó mũ tag ti,” he mũ.

²⁵ Hā ra Pedro ag tóg mū mǎn gé, ag tǵ ěg Senhor tǵ Jesus vǐ tó kar kǵ. Ājag tǵ nén ve ja ěn tó kǎn ag tóg, Jesus tǵ nén han ja ti. Kǵ ag tóg Jerusalém to vǵnvǵn ke mū sir. Ag mū kǵ ag tóg ga tǵ Samaria mǐ Topě vǐ há tugtó mū gé.

Filipe tǵ ũn kypég mū

²⁶ Hā ra Topě tǵ jěně jafǎ tóg Filipe mǵ vǐ mū, kǵ tóg: “kanhkǎ tǎpér ra tǵg, ěpǵy jagma tǵg, ěmǐn jagma,” he mū. Jerusalém tǎn kǎtǐ, Gaza mǐ, hā ra tóg ěmǎ tǐ fǐn kutě mū. ěpǵy ěn jagma tǵg, ěmǐn ěn jagma,” he tóg mū, Topě tǵ jěně jafǎ ti.

Kǵ tóg tǐ mū sir, Filipe ti.

²⁷ Tá jun kǵ tóg ga tǵ Etiópia tá ke vég mū, pǎ'i fi rǎnrǎj han tǐ ti, pǎ'i tǵ rainha fi tǵ nén ũ kar vég tǐ ti, ũn kurǐ ěn ti. Pǎ'i fi jǐjin hǎ vǵ: Candace, he mū. Fi krěm pǎ'i ěn tóg Jerusalém ra tǵg ja nǐ, ũn kurǐ ěn ti. Tá tóg Topě kurǎ mág ve ja nǐ, festa mág ti, Jerusalém tá.

²⁸ Hā ra tóg Ā jamǎ ra vǵn ke mū sir, carroça kǎmǐ. Tǵg kǵ tóg Topě vǐ to ke mū, Isaías tǵ rá ěn ti. Vǎsǵ Topě vǐ tó tǐ vě, hǎ vǵ: Isaías, he mū.

²⁹ Kǵ Topě kuprǐg tóg Filipe mǵ: “carroça kukǎm tǵg,” he mū.

³⁰ Kǵ Filipe tóg fǐrǔn tǐ mū, kǵ tóg ti tǵ věnh rá to ke měg mū, Isaías tǵ rá ěn to, vǎsǵ Topě vǐ tó tǐ tǵ rá ěn to. Kǵ tóg ti mǵ: “ǎ mǵ Ā tǵ nén to ke mū tag ki kanhró nǐ?” he mū.

³¹ Hā ra tóg: “vó,” he mū. “Ū tóg inh mǵ kǎmén ja tǐ nǐ ver,” he tóg. “Ā mǵ inh mǵ kǎmén ke tǐ nǐ?” he tóg. “Tǎpǵy ra, inh mré nǐ jé,” he tóg. Kǵ tóg ke mū, Filipe ti.

³² Ti tǵ ken hǎ vě, ha mě: “ovelha ri ke han tóg, ũ ěn ti. Ovelha pére ěg mǔgtǐ, ti tǎnh jé, hǎ ra tóg vǐ tǐ nǐgtǐ (mǵr). Cordeiro ri ke han tóg mū gé. ěg tǵ ti kyki ronh mū ra tóg jatun mǵ jé nǐ gé (mǵr).

³³ Ū ěn tǵ Topě vǐ mranh tǐ hǎ ra ag tóg ti vóg kónǎn, ag tǵ ti jyvěn tǐ ra. Ti mré ke ag jykre pǎno tó kǎn ke tǐ ěg tóg nǐgtǐ (mǵr). Ti tén ja ag tóg (mǵr), kǵ tóg ter mū sir,” he tóg, věnh rá ti.

³⁴ Kǵ ũn kurǐ ěn tóg Filipe mǵ: “ũ to ke ně hǵn'?” Topě vǐ tó tǐ tǵ ne tó ně hǵn'?” he mū. “Inh mǵ tó,” he tóg. “Tǐ tǵ věso ke mǵ', ũ to ke mǵ vó?” he tóg.

³⁵ Kǵ Filipe tóg ti mǵ věnh rá tag kǎmén mū sir. Jesus kǎmén tóg mū. Ti mǵ tóg věnh vǐ há ěn tó mū, Jesus to.

³⁶ Ge ag tóg mū mū, ěpǵy jagma, ěmǐn jagma. Kǵ ag tóg goj tá junjun mū. Kǵ ũn kurǐ ěn tóg: “tag ki tóg goj nǐ,” he mū. “Ā tǵ ki inh kype jé tóg há nǐ, he tóg.

³⁷ Kǵ Filipe tóg ti mǵ: “ǎ tǵ Ā fe tǵ ti ki rǎ kǵ nǐ nǐn kǵ tóg há nǐ,” he mū.

Kǵ tóg: “tǐ ki sóg rǎ kǵ nǐ,” he mū. “Jesus tóg tǵ Topě kósin nǐ (mǵr), Jesus Cristo ti,” he tóg, ũn kurǐ ti.

³⁸ Kǵ tóg carroça tǐn ti mǵ: “ver krǵg hé,” he mū. Kǵ tóg Filipe mré goj ra tére mū, kǵ tóg kǎra rá mū, ũn kurǐ ti. Kǵ Filipe tóg ti kypég mū sir.

³⁹ Ag tǵ goj kǎtǎ kǎjǎpǵy kǵ Filipe tóg tǐ' he mū, Topě kuprǐg tǵ ti ma tǵg kǵ. Kǵ ũn kurǐ tóg ti ve mǎn tǐ nǐ sir. Hā ra tóg tǐ mū, Ā jamǎn ra. Ti mǵ tóg sér tǐ sir.

⁴⁰ Hā ra Filipe tóg cidade tǵ Azoto tá nǐ nǐ. Kǵ tóg tǵg kǵ Jesus vǐ tó tǐ mū, ěmǎ kar mǐ. Kǵ tóg kejěn cidade tǵ Cesaréia tá jun mū, Jesus kǎme sér tó jé.

9

Saulo tǵ Jesus ki rǎ
(Hk 22.6-16; 26.12-18)

1 Hã ra Saulo tóg ver ù tỹ ãg Senhor tỹ Jesus mré mũ mũ ag vóg kónãn sór mũ. Ag to tóg krĩ rỹ nĩ ver. Ti tỹ ag kãgtén sór vë. Hã to tóg Topê tũ ki rĩr tĩ to pã'i mág to tĩ mũ.

2 Kĩ tóg ti mỹ permissão to vĩ mũ, ti tỹ cidade tỹ Damasco ra tĩg jé. Tá tóg permissão ãn tỹ pã'i ag mỹ ven sór mũ, ag tỹ ti mỹ: “ha ag venh tĩ gé,” he jé. Ti tỹ Jesus mré tĩ mũ ù ve kỹ tóg ti se sór tĩ. Jerusalém ra tóg ag taĩ tĩg sór tĩ, ti tỹ ùn ség mũ ag, ùn gré ag, ùn tátã fag ke ge.

3 Hã jé tóg Damasco ra tĩ mũ. Ti tỹ kakó ke mỹr hã jẽngrẽ tar tóg vẽn ven mũ, kanhkã tá. Rã kãfór tóg nĩ, hã ra tóg Saulo ki kómkóm ke mũ sir.

4 Kĩ Saulo tóg kutê mũ, ga kri tóg tá' ke mũ. Kĩ tóg vẽn vĩ mẽg mũ. Kĩ tóg: “Saulo', Saulo',” he mũ. “Á tỹ ne jé isũ ag vóg kónãn nẽ?” he tóg, vẽn vĩ ti.

5 Kĩ Saulo tóg ãg Senhor mỹ: “ã tỹ ù nẽ?” he mũ.

Kĩ tóg ti mỹ: “tỹ sóg Jesus nĩ, ã tỹ ùn vóg kónãn sór tĩ ãn vỹ tỹ inh nĩ,” he mũ.

6 “Jẽg nẽ ra, cidade tag ki rã, tá ù tóg ã mỹ tónh mũ, ã tỹ nén han ke ti,” he tóg, vẽn vĩ ti.

7 Ti mré mũ ag vỹ vẽn vĩ tag mẽg mũ gé, hã ra ag tóg nén ù vég tũ nĩ. Kĩ ag kãne tóg jũrũn ke mũ.

8 Kĩ Saulo tóg jẽg nẽ mũ sir. Kĩ tóg tãmĩ ãvãnh sór mũ, hã ra tóg nén ù vég tũ nĩ. Kĩ ag tóg ti nĩgẽ kãgmĩ kỹ ti pére mũ mũ, cidade tỹ Damasco ra.

9 Kurã tãgtũ ki tóg ãvãnh tũ nĩ, kỹ tóg jẽg tũ (pê) nĩ gé, kron tũ (pê) ti nĩ gé, Saulo ti.

10 Damasco tá ke ù tóg nĩ nĩ, ti jyy hã vỹ: Ananias, he mũ. Jesus mré tĩ ù vë. Kĩ Jesus tóg ti mỹ vẽn ven mũ. Kĩ tóg: “Ananias',” he mũ.

Kĩ Ananias tóg ãg Senhor ti mỹ: “inh hã vë,” he mũ.

11 Kĩ Jesus tóg ti mỹ: “jẽg nẽ ra,” he mũ. “Èmĩn kuryj he mũ ãn ra tĩg. Judas he mũ ãn ãn kãra rã. Tá ù tóg nĩ nĩ, ti jiji hã vỹ: Saulo, he mũ. Cidade tỹ Tarso tá ke vë. Èn mré vĩmũ,” he tóg. “Ha vé, inh mré tóg vĩ nĩ,” he tóg.

12 “Kĩ tóg ù vég nĩ nĩ, ti jyy hã vỹ: Ananias, he mũ. Á hã vë. Á tỹ ti ãn kãra rãnh ke vë. Á tỹ ã nĩgẽ tỹ ti mẽn ke vë. Kĩ tóg ve mãn ke mũ, ã tỹ ti mẽn tỹ. Tag vég tóg nĩ nĩ, Saulo ti,” he tóg, Jesus ti, Ananias mỹ.

13 Kĩ Ananias tóg ãg Senhor ti mỹ: “vẽn kar tóg ti kãmén tĩ hã ra, ã tỹ inh mỹ tó mũ tag ti,” he mũ. “Jerusalém tá tóg ã tũ ag vóg kónãn,” he tóg.

14 “Kĩ tóg permissão ma kãtĩ mũ, Topê tũ ki rĩr tĩ to pã'i mág tỹ ti mỹ han kỹ. Kĩ tóg ù tỹ ã mré vĩ mũ kar sigse sór mũ, cidade tag ki,” he tóg, Ananias ti, Jesus mỹ.

15 Kĩ ãg Senhor tỹ Jesus tóg ti mỹ: “ti venh tĩg,” he mũ. “Ti kuprẽg isóg (mỹr), ti tỹ ijiji tó jé, fóg ag kar mỹ, kanhgág ag kar mỹ ke gé, povo tỹ Israel ag mỹ ke gé,” he tóg.

16 “Ti mỹ sóg ven mũ, ti tỹ isugrĩn jagtar ke ti,” he tóg, Jesus ti.

17 Kĩ Ananias tóg tĩ mũ. Ti tỹ ãn ãn tá jun kỹ tóg ã nĩgẽ tỹ ti mẽg mũ, kỹ tóg ti mỹ: “Saulo',” he mũ. “Régre',” he tóg mũ. “Èg Senhor vỹ inh jẽnẽ, Jesus mỹr, sỹ ã ve jé,” he tóg. “Ti ve ã (mỹr), ãpũ kri, ã tỹ tag ki jun mũn kã,” he tóg. “Hã kỹ sóg kãtĩ mũ, ã tỹ ve mãn jé, Topê kuprĩg tỹ tỹ ã jagrẽ nĩ jé,” he tóg, Ananias ti.

18 Kĩ tóg vãhã ti kanẽ tá pa mũ, pirã fãr ri ke. Kĩ tóg ve há' he mãn mũ sir. Kĩ tóg jẽg nẽ mũ sir. Kĩ tóg ti kypég mũ sir, Ananias ti.

19 Kĩ tóg jẽg mũ gé sir, hã kỹ tóg tar' he mũ sir. Damasco tá tóg nĩ nĩ ver, Jesus mré mũ tĩ ag mré.

²⁰ Kŷ tóg vēsŷmēr Jesus kāmén mŷ, Israel ag vēnh kanhrān jafā krēm. “Tŷ tóg Topē kósin nī,” he tóg mŷ, Jesus to.

²¹ Ū tŷ ti vī mēg mŷ kar ag mŷ tóg e tī. “Jerusalém tá tóg ag vóg kónān, ū tŷ Jesus tó mŷ ag,” he ag tóg. “Kŷ tóg tag ki jun mŷ gé, ag sigse jé, Topē tŷ ki rīr tī tŷ pā'i mág ag mŷ ag taŷi tŷg jé,” he ag tóg, Saulo to. Kŷ tóg ag mŷ e tī, ti tŷ Jesus to: Topē kósin vē,” hen kŷ.

²² Hā ra Saulo tóg fe tar nī. Kŷ tóg Israel ag kanhrān mŷ, cidade tŷ Damasco tá. Ag mŷ tóg Jesus kāmén mŷ. “Tŷ tóg Cristo nī, Jesus ti,” he tóg, ag mŷ Topē vī kāmén kŷ. Kŷ tóg ag tŷ ti vī kafān sór mŷ hā ra ag mŷ vēnhmŷ tī sir.

Saulo tŷ cidade tŷ Jerusalém ra tŷg

²³ Kurā tŷ hēn ri ke tŷg kŷ Israel ag tóg kejēn jagnē mré jykrén mŷ, Saulo tén ke to.

²⁴ Hā ra Saulo tóg mēg mŷ, ag tŷ ti to jykrén ēn to. Cidade ēn to ró jānkā tá ag tóg vājig nŷtī, ti jo, kurā kar ki, kuty tá ke gé, ag tŷ hēn ri ke mŷn tá ti tén jé. Kŷ tóg mēg mŷ sir, Saulo ti.

²⁵ Kŷ ti mré ke ag vŷ kuty tá kēj kākā ti nīm kŷ ti térem mŷ, cidade ēn to ró to. Kŷ tóg Jerusalém ra tī mŷ.

²⁶ Ti tŷ Jerusalém tá jun kŷ tóg Jesus mré mŷ ag mré nī sór mŷ, Jesus mré mŷ tī ag mré. Hā ra ag tóg ti kamēg mŷ. “Tī ón hŷn,” he ag tóg ti to, ti tŷ ag vóg kónān jan kŷ.

²⁷ Kŷ Barnabé tóg ti mré vī kŷ Jesus tŷ ūn vin mŷ ag to ti pére tī mŷ. Kŷ tóg ag mŷ ti tŷ Jesus ve ja ēn kāmén mŷ, ēpry jagma. “Kŷ Jesus tóg ti mré vī ja nī gé,” he tóg. “Kar tóg Damasco tá ke ag mŷ Jesus kāmén ja nī gé, ti tŷ mŷmēg tŷ nīn kŷ,” he tóg, Barnabé ti.

²⁸ Kŷ Saulo tóg ag mré tī nī ver, Jerusalém tá. Tá tóg Jesus kāmén mŷ gé, ti tŷ mŷmēg tŷ nīn kŷ.

²⁹ Kŷ tóg Israel ag mré vī mŷ gé, ū tŷ Grego vī tó mŷ ag mré ke gé. Ag tŷ ti vī kafān kŷ tóg ag mré vī mŷ. Hā ra ag tóg ti tén ke to jykrén mŷ, Saulo tén ke to.

³⁰ Kŷ Jesus mré ke ag tóg mēg mŷ gé, ag tŷ Saulo tén ke to jykrén mŷ ēn to. Kŷ ag tóg cidade tŷ Cesaréia ra ti pére mŷ mŷ. Tá junjun kŷ ag tóg cidade tŷ Tarso ra ti jēnēg mŷ.

³¹ Jesus ki ge kŷ nŷtī ag kar vŷ jatun mŷ nŷtī nī sir, ū tŷ Topē vī mē jé vēnh mán tī ēn ag. Jatun mŷ ag tóg nŷtī sir, ga tŷ Judéia tá, ga tŷ Galiléia tá ke gé, ga tŷ Samaria tá ke gé. Kŷ ag tóg jatun mŷ vēnh kanhrān mŷ, Topē jykre tŷ. Topē vī ki ag tóg króm mŷ, Topē kamēg kŷ. Topē kuprīg vŷ ag krīn mŷ. Kŷ ag krī vŷ kānhvy' he mŷ. Kŷ ag tóg e nŷtī gé sir.

Enéias

³² Kejēn Pedro tóg vēnh kar ag vegvenh tī mŷ. Kŷ tóg cidade tŷ Lida ra tī mŷ gé, tá Topē tŷ ag vegve jé.

³³ Tá ū tóg nŷ nī, ti jījin hā vŷ: Enéias, he mŷ. Grīn kŷ tóg nŷ nī, ā cama kri. 8 anos han tóg, grī nŷ ki.

³⁴ Kŷ Pedro tóg ti mŷ: “Enéias!,” he mŷ. “Jesus Cristo vŷ ā han,” he tóg. “Jēg nē ra, ā cama fi han ra,” he tóg.

³⁵ Kŷ tóg vēsŷmēr jēg nē mŷ. Kŷ cidade tŷ Lida tá ke kar ag vŷ ti vég mŷ, cidade tŷ Saroná tá ke kar ag ke gé. Kŷ ag tóg ti ve kŷ Jesus ki ge mŷ gé sir.

Dorcas fi

³⁶ Cidade tȳ Jope tá ũ fi tóg nĩ nĩ, Jesus mré tĩ mũ fi, fi jiji hã vȳ: Tabita, he mũ, hã vȳ: Dorcas, he mũ, fi jyjy ti, fóg tȳ Grego vĩn ki. Ēn fi hã vȳ nén kar há han mũ. Ũn jagāgtar fag mȳ fi tóg nén vĩn ti.

³⁷ Kejēn fi tóg kaga nȳ nĩ, kȳ fi tóg ter mũ sir. Kȳ fag tóg fi kupe kȳ ĩn to jāpȳ jafā tá fi fig mũ, kynh mȳ.

³⁸ Jo Jope tóg Lida kakó kã nĩ, hã ra Pedro tóg Lida tá nĩ nĩ. Kȳ Jope tá ke ag tóg ti ki kanhró nȳtĩ, Pedron ki, Jesus mré mũ ag.

Kȳ ag tóg ũn régre ag jēgnēg mũ, ag tȳ ti mȳ: “kur kãtīg mē han,” he jé.

³⁹ Kȳ Pedro tóg vēsȳmēr tĩ mũ. Kȳ tóg tá jun mũ. Hã ra Dorcas fi tóg ĩn to jāpȳ jafā tá nȳ nĩ, ter kȳ. Pedro jun kȳ ag tóg ĩn to jāpȳ jafā to jāpȳ mũ, ti mré. Kȳ ũn mén ter ja ěn fag kar vȳ ti to kãmũ mũ. Kygfȳ fag tóg mũ. Ti mȳ fag tóg kur venven mũ, fi tȳ fag mȳ kugrȳn ja ti, camisa, vestido ke gé, vėnh kri fē ke gé. Dorcas fi tóg fag mȳ kugrȳn mē han ja nĩgtĩ.

⁴⁰ Kȳ Pedro tóg vėnh kar mȳ: “ha pa jēg,” he mũ. Kȳ tóg ā jakrĩ tȳ jēg kȳ Topē mré vĩ mũ. Kȳ tóg vēser fi mȳ: “Tabita', nĩ ra,” he mũ. Kȳ fi tóg mrin ke mũ. Kȳ fi tóg nĩ mũ, fi tȳ Pedro ven kȳ.

⁴¹ Kȳ tóg fi nĩgé kãgmĩ kȳ fi fēg mũ. Kȳ tóg vėnh kar jé prēr mũ, Topē tũ kar, ũn mén ter ja ěn fag mré hã. Kȳ tóg fag mȳ fi ven mũ.

⁴² Kȳ Jope tá ke kar ag vȳ mēg mũ sir, fi rĩr mãn ěn ti. Kȳ ũ tȳ hėn ri ke ag vȳ Jesus ki ge mũ sir.

⁴³ Kȳ Pedro tóg cidade tȳ Jope tá nĩ nĩ ver, Simão he mũ ěn mré, ũ tȳ nén fār tȳ tãnj ke tĩ ěn mré.

10

Capitão tȳ Cornélio

¹ Cidade tȳ Cesaréia tá ũ tóg nĩ nĩ, ti jiji hã vȳ: Cornélio, he mũ. Soldado tȳ 100 to pã'i vē, ag tȳ ũ to: ga tȳ Itália tá ke ag, he mũ ěn to capitão vē.

² Ēn vȳ Topē to há nĩ, kȳ tóg Topē kamēg tĩ. Ti mré ke kar vȳ ge nȳtĩ gé. Povo tȳ Israel ag kãmĩ ũn jagāgtar ag jagāgtãn tóg tĩgtĩ, ti tȳ tȳ Israel ag mré ke tũ hã ra. Topē mré tóg vĩ tĩ gé.

³ Ēn tóg nén nē vég mũ, 3 horas ki, ā nũr tũ ra. Kȳ tóg Topē tȳ jēnē jafā jun vég mũ. Kȳ tóg ti mȳ: “Cornélio!,” he mũ, Topē tȳ jēnē jafā ti.

⁴ Ti tȳ ti ve kȳ ti fe tóg jũrũn ke mũ, kȳ tóg: “ne nē?” he mũ.

Hã ra tóg ti mȳ: “Topē vȳ ā vĩ mēg mũ (mȳr),” he mũ. “Ā tȳ ũn jagāgtar ag mȳ nén nĩm tĩ vég tóg mũ gé,” he tóg. “Hã kȳ tóg ā to jykrėn mũ,” he tóg.

⁵ “Kȳ ũ jēgnēmĩ, ag tȳ Jope ra mũ jé. Tá ũ tóg nĩ nĩ, ti jiji hã vȳ: Simão, he mũ, kȳ ti jyjy ũ hã vȳ: Pedro, he mũ. Ēn jé prėrmĩ,” he tóg.

⁶ “Simão mré tóg nĩ nĩ, ũ tȳ nén fār tȳ tãnj ke tĩ ěn mré, kȳ ti ĩn vȳ goj kafā tũ fyr tá jē nĩ,” he tóg.

⁷ Kȳ Topē tȳ jēnē jafā tóg tĩ mũ, ti mȳ tó kar kȳ. Kȳ capitão ěn tóg ā camarada régre ag jé prēr mũ, soldado pir mré, ũ tȳ Topē kamēg mũ ěn ti. ũ tȳ ā rãnrhāj han mũ ěn jé tóg prēr mũ.

⁸ Kȳ tóg ag mȳ ā tȳ nén ve ja tó mũ, kȳ tóg cidade tȳ Jope ra ag jēgnēg mũ.

⁹ Tȳ vaj kȳ ag tóg cidade ěn to hã nȳtĩ, meio dia ki. Kȳ Pedro tóg ĩn kri kyjer ěn ra tãpȳ mũ, Topē mré vĩ jé.

¹⁰ Kȳ tóg kókĩr mũ. Kȳ tóg fag mȳ vējén to vĩ mũ. Fag tȳ ver ti mȳ han mũ ra tóg nén nē vég mũ, Pedro ti.

11 Kŷ tóg ag tŷ kanhkā nón mŷ vég mŷ. Tá nén ũ tóg kátére mŷ. Kŷ tóg tŷ kur mág ve nŷ. Ti péno kygie kŷ tóg ga kri kátére mŷ, kur ti.

12 Hā ra bicho kar tóg kur ěn kākī nŷtŷ nŷ, fa tŷ 4 (ke) kar tóg nŷtŷ, ũ tóg ā nug kri mŷgtŷ gé, sēsŷ kar ke gé, jēsŷ kar.

13 Kŷ vĕnh vŷ tóg mĕ há tŷ, kŷ tóg: “tág,” he mŷ. “Tānh kŷ kó, vŷ,” he tóg.

14 Kŷ Pedro tóg ěg Senhor ti mŷ: “nejé,” he mŷ. “Nén ũ jĕggry ko ja tŷ sóg nŷ (mŷr),” he tóg. “Ĕg povo jykre tŷ vĕ, ěg tŷ bicho ěn kon kŷ,” he tóg.

15 Kŷ tóg ti mŷ vŷ mĕn mŷ sir jāvo, vĕnh vŷ ti, kŷ tóg: “Topĕ tóg hā ra to: há ti nŷ, he mŷ. Kŷ jĕggryg tŷg nŷ,” he tóg.

16 Ge tāgtŷ han tóg, kŷ nén nĕ ěn tóg vég tŷ' he mŷ sir, kanhkā tá.

17 Hā ra tóg Pedro mŷ e tŷ. Ti tŷ to jykrĕn tŷ tóg tŷ, ti tŷ vég mŷ to. Ti tŷ ver to jykrĕn mŷ ra ag tóg junjun mŷ, Cornĕlio tŷ ũn jĕgnĕg mŷ ag. Ũ tóg ag mŷ: “Īn ěn vĕ,” he ja nŷ.

18 Kŷ ag tóg tá junjun mŷ. Ró to jĕgĕ kŷ ag tóg jamā hár(a) ke mŷ, kŷ ag tóg: “Simāo Pedro ag mŷ ki nŷtŷ?” he mŷ.

19 Hā ra Pedro tóg ver ā tŷ vég mŷ ěn to jykrĕn nŷ nŷ. Kŷ Topĕ kuprĕg tóg ti mŷ ke mŷ. “Ha vé, ũn régre ag vŷ ā jĕ prĕr mŷ,” he tóg.

20 “Jĕg nĕ ra, kátére ra, tŷg ra ag mrĕ,” he tóg. “To jykrĕn tŷg. Isŷ ag jĕgnĕ vĕ,” he tóg, Pedro mŷ, Topĕ kuprĕg ti.

21 Kŷ Pedro tóg ag to kátére mŷ, kŷ tóg ag mŷ: “inh hā vĕ,” he mŷ. “Inh jĕ prĕr ja ājag tóg nŷ,” he tóg. “Ājag tŷ ne to kāmŷ nĕ?” he tóg ag mŷ.

22 Kŷ ag tóg ti mŷ: “Cornĕlio tŷ ěg jĕgnĕ vĕ,” he mŷ. “Capitāo vĕ, Cornĕlio ti. Ũn jykre kuryj vĕ, kŷ tóg Topĕ kamĕg tŷ,” he ag tóg. “Israel kar ag tóg ti to há nŷtŷ, ti to ag tóg vŷ há han tŷ. Topĕ tŷ jĕnĕ jafā vŷ ti mŷ ke ja nŷ, ti tŷ ā jĕ prĕr jĕ, ā tŷ ti Īn ra tŷg jĕ, ā tŷ ti mŷ Topĕ kāmĕn jĕ,” he ag tóg, Pedro mŷ.

23 Kŷ Pedro tóg ag mŷ: “kāge jĕg ra,” he mŷ. Kŷ ag tóg tá nŷgnŷr mŷ. Tŷ vaj kŷ tóg ag mrĕ tŷ mŷ. Kŷ Jope tá ke ũ ag tóg ti mrĕ mŷ mŷ gé, Jesus mrĕ ke ũ ag.

24 Tŷ vaj kŷ ag tóg Cesarĕia tá junjun mŷ. Tá Cornĕlio tóg ag jāvĕnh mŷ. Hā kŷ tóg ā kanhkā ag kar kógfyn ja nŷ, ag mŷ vĕnh vŷ jĕnĕ ja tóg nŷ, ā mrĕ ke kar ag mŷ. Kŷ ag tóg kāmŷ ja nŷ, kŷ ag tóg tá nŷtŷ sir.

25 Pedro tŷ tá jun kŷ Cornĕlio tóg ti kato tĕ mŷ, kŷ tóg ti jo mŷg ke mŷ. “Ti hŷn tŷ Topĕ nŷ,” he tóg, hā kŷ tóg ti jo mŷg ke mŷ, Cornĕlio ti.

26 Hā ra Pedro tóg ti fĕg mŷ, kŷ tóg: “ke tŷg ra,” he mŷ. “Tŷ sóg ĕprā ke nŷ gé,” he tóg ti mŷ.

27 Kŷ tóg ti mŷ vŷ há han mŷ. Kŷ tóg kāra rā kŷ ũn e ag vég mŷ, ũn vĕnh mĕn kŷ nŷtŷ ag, Pedro ti.

28 Kŷ tóg ag mŷ: “Israel ag vŷ fóg mrĕ ní tŷ nŷgtŷ (mŷr),” he mŷ. “Ĕg jykrĕn hā vĕ,” he tóg. “Kŷ ěg tóg fóg Īn kāra rā tŷ nŷgtŷ gé (mŷr) sir. Tag ki kanhró ājag tóg nŷtŷ,” he tóg. “Hā ra Topĕ tóg inh kanhrān, ā jykre tŷ. Kŷ sóg vĕnh kar Īn kāra rānh mŷ, jĕggry tŷ nŷn kŷ,” he tóg.

29 “Hā kŷ sóg jatun mŷ kātĕg, vĕsŷmĕr, ājag tŷ inh jĕ prĕr kŷ. Kŷ sŷ ājag ki jĕmĕnh há tóg tŷ. Ājag tŷ hĕ ri ke jĕ inh jĕ prĕr nĕ?” he tóg ag mŷ, Pedro ti.

30 Kŷ Cornĕlio tóg ti mŷ: “4 dias vĕ ha ũri,” he mŷ, “kŷ sóg Topĕ mrĕ vĕnh ke nŷ nŷ, jĕg tŷ nŷn kŷ. 3 horas vĕ. Īnh Īn krĕm sóg Topĕ mrĕ vĕnh ke nŷ nŷ, kŷ sóg ũ vég nŷ nŷ. Ti kur tóg kókov nŷ.

31 Kŷ tóg inh mŷ: “Cornĕlio,” he mŷ. “Topĕ vŷ ā vŷ mĕg mŷ. Ā tŷ ũn jagĕgtar mŷ nĕn vĕn ěn ve tóg. To tóg jykrĕn, Topĕ tŷ,” he tóg.

32 “Ký Jope ra ũ jěně. Tá Simão jé přer, ũ tý Pedro he mŭ ěn ti. Nén fár tý tãnjaj ke tí ěn ĩn krēm tóg nĭ nĭ, hã vŷ: Simão, he mŭ. Tĭ ĩn vŷ goj kafã tũ fyr tá jĕ nĭ,” he tóg ĩnh mŷ, Topĕ tý jĕně jafã ti,” he tóg, capitão ti.

33 “Ký sóg vĕšmĕr ã to ũ ag jĕgnĕ. Ký ã tóg kãtĭ mŭ. Ký tóg há tĭ, ã kãtĭg ti. Hã to ěg tóg vĕnh mãn, Topĕ jo. Topĕ tý ã mŷ nĕn tó ja kãmĕn ra ěg mŷ. Ěg tý mĕnh há tóg tĭ vĕ,” he tóg, Cornĕlio ti, Pedro mŷ.

Pedro tý Cornĕlio mŷ Topĕ vĭ tó

34 Ký Pedro tóg ag mŷ kãmĕn mŭ, ký tóg: “vãhã tóg sŷ to jykrĕn mŭ,” he mŭ. “Topĕ mŷ nĕn ũ tũ vĕ, Israel he mŭ ěn ag, fóg he mŭ ěn ag ke gé, kanhgág ag ke gé, Israel jykre han tũ kar ag,” he tóg.

35 “Ŭ tý ti kamĕg mŭ vŷ ti mŷ há nŷtĭ, Topĕ mŷ, ũ tý vĕnh jykre kuryj han mŭ ag kar, povo kar kãmĭ,” he tóg.

36 “Povo tý Israel mŷ tóg ã vĭ ěn jĕně ja nĭ, Topĕ ti. Ěg mŷ tóg tó, ěg tý jatu nŷtĭ jĕ, ti tý Jesus Cristo tugrĭn ěg to há nĭn ký. Jesus ěn vŷ tý vĕnh kar Senhor nĭ,” he tóg.

37 “Vĕnh vĭ ěn mĕ kãn ãjag tóg huri. Judĕia kar mĭ tóg rŭm ke ja nĭ. João tóg vĕnh kar mŷ: “ãjag jykre tovãnh ra,” he ja nĭgtĭ. Ký tóg ag kygpe ja nĭ. Kar ký Jesus tóg Galilĕia mĭ tĭg vĕn mŭ, Nazaré tá ke ěn ti.

38 Ký Topĕ tóg Jesus mŷ ã kuprĭg jĕně ja nĭ. Ký tóg ti mŷ vĕnh jykre nĭm ja nĭ. Ga kar mĭ tóg tĭg ja nĭgtĭ. Nĕn kar há han ja tóg nĭgtĭ. Japo tý ũn vóg kónãn mŭ ag tý há' he ja tóg nĭ gé. Topĕ hã ne ti mrĕ han ja nĭgtĭ hã ra',” he tóg.

39 “Nĕn kar ěn ve ja ěg tóg nĭgtĭ, ti tý nĕn han mŭ kar, ga tý Judĕia tá, Jerusalĕm tá ke gé. Ěn tý ag tóg cruz to ti sa ja nĭgtĭ, ti tĕn ja ag tóg nĭgtĭ.

40 Kurã tãgtũ tũg ký Topĕ tóg ěn rĭn mãn ja nĭgtĭ, ký tóg vĕnh ven ja nĭgtĭ,” he tóg, Pedro ti.

41 “Hã ra vĕnh kar vŷ ti ve ja tũ nĭ. Ěg hã mŷ tóg vĕnh ven ja nĭ. Hã to Topĕ tóg ěg kuprĕg ja nĭgtĭ. Tĭ mrĕ ěg tóg jĕn ja nĭgtĭ, kron ja nĭgtĭ gé, ti tý ã ter kar rĭr mãn ký,” he tóg, Pedro ti.

42 “Ký tóg ěg mŷ: “vĕnh kar mŷ ĩnh kãmĕn nĭ,” he ja nĭgtĭ. “Topĕ vŷ ti tý vĕnh kar kãfór han, hemnĭ,” he ja tóg nĭ ěg mŷ. “Ký tóg vĕnh kar tý nĕn han mŭ venh ke mŭ sir. Ŭ tý ũri rĭnrĭr mŭ ag kar tý nĕn hyn han mŭ ve jĕ tóg ke mŭ, ũn ter mŭ ag kar tý nĕn hyn han mŭ kar ke gé, hemnĭ,” he ja tóg nĭgtĭ ěg mŷ, Jesus ti,” he tóg, Pedro ti.

43 “Vãšŷ Topĕ vĭ tó tĭ ag kar vŷ ti kãmĕn ja nĭgtĭ, ký ag tóg: “ũ tý ti ki rã mŭ mŷ tóg vĕnh pãte fón ke mŭ, Topĕ ti, ti tý ti vĭ mranh mŭ ti,” he ja nĭgtĭ. “Cristo tugrĭn tóg vĕnh pãte fón ke mŭ,” he ja ag tóg nĭgtĭ, Topĕ vĭ tó tĭ ag,” he tóg, Pedro ti.

Topĕ kuprĭg tý tý ag jagrĕ nĭ

44 Pedro tý ver tag tó ký vãhã Topĕ kuprĭg tóg ag ki rã mŭ, ũ tý ti vĭ mĕg mŭ ag ki.

45 Ký Israel ag tý Jesus ki ge ký nŷtĭ ag mŷ tóg e tĭ, ũ tý Pedro mrĕ kãmũ ag mŷ. “Topĕ kuprĭg tóg tý ag jagrĕ nĭ,” he ag tóg. “Ag tý tý fóg nŷtĭ ra tóg ag ki rã mŭ!,” he ag tóg.

46 “Vĕnh vĭ ũ tugtó ag mŭ (mŷr),” he ag tóg. “Vĕnh vĭ ěn ki ag tóg Topĕ mŷ: há ã tóg nĭ, he mŭ,” he ag tóg.

⁴⁷ Kŷ Pedro tóg: “ũ tóg ag to: ag kygpenh ke tũ ěg nĩ, henh ke tũ nĩ (mŷr),” he mũ. “Topē kuprĩg tŷ ag jagrē nŷtĩ. Ěg ki rã ri ke han tóg ag ki, Topē kuprĩg ti. Kŷ ěg hŷn ag kygpenh mũ ha,” he tóg, Pedro ti.

⁴⁸ Kŷ tóg ũ mŷ: “ag kygpe ra ge, Jesus Cristo jiji tó kŷ,” he mũ sir.

Ājag kygpe kar kŷ ag tóg Pedro mŷ: “ver ěg mré nĩ,” he mũ. Kŷ tóg ag mré nĩ sĩ han kar kŷ tĩ mũ sir.

11

Pedro tŷ Jerusalém tá ã tŷ nén han mũ tó

¹ Kŷ Jesus tŷ ũn vin mũ kar ag vŷ jēmēg mũ, fóg ag tŷ Topē vĩ kri fig mũ ti. Judéia kar mũ ag tóg jēmēg mũ, Jesus mré ke kar ag.

² Kŷ Pedro tóg Jerusalém ra tĩ mũ. Kŷ tá Jesus ki ge mũ ag tóg ti mré vĩ mũ. Ti mré vĩ mũ ag tóg: “vēnh kar vŷ ājag gré junjun fãr kym ke mũ, ěg jykre han jé, ag tŷ Topē jykre han sór kŷ,” he ag tóg tĩ. Ěn ag vŷ Pedro mŷ vĩ mũ,

³ kŷ ag tóg: “ũn fãr kym ja tũ ag mré ã tóg jēg mũ (mŷr), ag ĩn ki,” he mũ.

⁴ Kŷ Pedro tóg ag mŷ nén kar ěn kāmén mũ,

⁵ kŷ tóg: “cidade tŷ Jope tá sóg nĩ ja nĩ, kŷ sóg Topē mré vĩ nĩ ja nĩgtĩ. Ti mré vĩ kŷ sóg nén nē vég mũ,” he tóg. “Nén gé(g) tĩg jafã vē, kur mág ri ke. Ti péno kygje tóg kanhkã tá kãtère mũ. Kŷ tóg ĩnh ki jun mũ.

⁶ Kŷ sóg kãki ěvãnh mũ, kŷ sóg bicho kar vég mũ, fa tŷ 4 ke ti nŷtĩ, nēn tãn ag mré hã, ag nug kri mũ tĩ ag mré hã, sēsĩ kar mré hã, jēsĩ kar.

⁷ Kŷ sóg vēnh vĩ mēg mũ, kŷ tóg: “tãg', vŷ,” he mũ. “Tãnh kŷ kó,” he tóg.

⁸ Kŷ sóg ti mŷ: “nejé,” he mũ. “Nén ũ jēggry ko ja tũ sóg nĩ,” he sóg ti mŷ. “Ěg jykre tũ vē, ěg tŷ bicho ěn kon kŷ,” he sóg ti mŷ.

⁹ Kŷ tóg ĩnh mŷ tó mãn mũ gé, kanhkã tá vēnh vĩ ti, kŷ tóg: “Topē tóg hã ra to: há tĩ nĩ, he mũ. Kŷ jēggry tũg nĩ,” he tóg, kanhkã tá.

¹⁰ Ge tãgtũ han tóg, kŷ nén nē ěn tóg vég tũ' he mũ sir, kanhkã tá.

¹¹ Kŷ vēsŷmér ũn tãgtũ ag vŷ tá nŷtĩ, ĩnh nĩ ěn rã. Cidade tŷ Cesaréia tá ag kãmũ ja nĩgtĩ, fóg tŷ iso ag jēgnēn kŷ.

¹² Kŷ Topē kuprĩg tóg ĩnh mŷ: “ha jatun mŷ ag mré tĩg,” he mũ. Kŷ tag ag tóg ĩnh mré mũ mũ, ũ tŷ 6 (ke) tag ag, Jesus mré ke tag ag. Kŷ ěg tóg ěn ĩn kãra ge mũ sir.

¹³ Kŷ tóg ěg mŷ ã tŷ Topē tŷ jēnē jafã ve ja tó mũ. Ti ĩn kãtã tóg nēji jē ja nĩ, Topē tŷ jēnē jafã ti. Kŷ tóg nēji ti mŷ: “Jope ra ũ jēgnē,” he mũ. “Tã Simão jé prēr, ũ tŷ Pedro he mũ ěn,” he ja tóg nēji ti mŷ.

¹⁴ “Ěn vŷ ã mré vĩnh mũ. Ti vŷ tŷ ã tóg kren ke mũ, ã mré ke kar fag ke gé,” he ja tóg nēji nĩ ti mŷ, Topē tŷ jēnē jafã ti,” he tóg, Pedro ti.

¹⁵ “Kŷ sóg ag mŷ kāmén mũ. Isŷ tó sĩ han mũ ra Topē kuprĩg tóg ag ki rã mũ. Ti tŷ ěg ki rã ri ke han tóg mũ, kurã ěn kã.

¹⁶ Kŷ sóg Jesus vĩ to jykren mũ, ti tŷ ěg mŷ: João tóg goj tŷ ag kygpe ja nĩgtĩ, hã ra Topē kuprĩg tóg ag kãra rãnh mũ, tŷ vēnh kype ri ke vē sir, he ěn to,” he tóg, Pedro ti.

¹⁷ “Kŷ Topē vŷ ag jagrēn mũ, ã kuprĩg tŷ, ti tŷ ěg jagrēn ri ke vē, ěg tŷ Jesus Cristo ki ge kŷ. Hã kŷ sóg Topē kato tē jãvãnh ja nĩ,” he tóg, Pedro ti.

¹⁸ Ag tŷ tag mē kŷ ag krĩ tóg kusa' he mũ. Kŷ ag tóg: “Topē vŷ fóg ag krĩn mũ gé, ag tŷ ājag jykre tovãnh jé, ag tŷ ěg rĩr krŷg ja tũ ve jé,” he ag tóg mũ.

Antioquia tá ke ag tŷ Topē vĩ kri fi

19 Ag t̄y Estêvão tén kar k̄y Jesus ki ge k̄y n̄t̄i ag tóg hên ra m̄ũ m̄ũ, ag t̄y ag vóg kónān k̄y. K̄y ag tóg ga t̄y Fenícia ra m̄ũ m̄ũ, goj vāso t̄y Chipre ra, cidade t̄y Antioquia ra ke gé. Ag m̄ũn k̄y ag tóg Israel ag hā m̄y Topē v̄i tó m̄ũ.

20 Kejēn Chipre tá ke ù ag tóg cidade t̄y Antioquia ra m̄ũ m̄ũ, Cirene tá ke ag ke gé. Ēn ag tóg fóg t̄y Grego v̄i tó m̄ũ ag m̄y Jesus Cristo kāmén m̄ũ, vènh v̄i s̄er tag ti.

21 K̄y Topē tóg ag mré ag kr̄in m̄ũ. K̄y ù t̄y hên ri ke ag tóg Jesus ki ge m̄ũ, Topē jykre han jé.

22 K̄y Jerusalém tá ke ag tóg mēg m̄ũ, fóg ag t̄y Jesus v̄i kri fig m̄ũ ti. Jerusalém tá Jesus ki ge k̄y n̄t̄i ag tóg mēg m̄ũ gé, ù t̄y tá Topē v̄i mē jé vènh m̄ān t̄i ag. K̄y ag tóg Barnabé jēnēg m̄ũ, ti t̄y Antioquia ra t̄ig jé.

23 Ti t̄y tá jun k̄y ti fe tóg m̄rin ke m̄ũ, Topē t̄y ag jagāgtān k̄y. K̄y tóg ag jyvēn m̄ũ, ag t̄y Jesus ki rā to krónh ke tũ n̄n jé, ag t̄y fe tar n̄t̄in jé.

24 Barnabé v̄y t̄y ùn v̄i há n̄i, Topē kupr̄ig v̄y t̄y ti jagrē n̄i. K̄y ti jykre kar tóg Jesus ki rā ja n̄i. K̄y ù t̄y hên ri ke ag v̄y Jesus ki ge m̄ũ gé sir, ti t̄y ag jyvēn k̄y.

25 K̄y Barnabé tóg cidade t̄y Tarso ra t̄i m̄ũ, Saulo jāvānh jé, tá.

26 Ti t̄y ti ve k̄y tóg ti pére t̄i m̄ũ, Antioquia ra. K̄y ag tóg pr̄yḡ pir han, Antioquia tá. Jesus ki ge k̄y n̄t̄i ag t̄y vènh m̄ān k̄y ag tóg ag kanhrān t̄i, Barnabé ti, Saulo ti ke gé. K̄y ùn e v̄y Barnabé ag v̄i jēmēg t̄i. K̄y ag tóg Antioquia tá ag tóg ù t̄y Jesus mré m̄ũ ag to: “Cristo mré ke ag,” he vén. K̄y ag jiji v̄e sir, hā v̄y: Cristo mré ke ag, he m̄ũ.

27 Kejēn Jerusalém tá ke ù ag tóg Antioquia tá junjun m̄ũ, Topē v̄i tó t̄i ag.

28 Ag k̄a ù jijin hā v̄y: Ágabo, he m̄ũ. Ēn v̄y kejēn Topē kupr̄ig t̄y ti kr̄in k̄y: “kejēn ēg tóg pr̄yḡ venh m̄ũ, k̄ānhmar,” he m̄ũ, “ga kar m̄i hā,” he tóg. K̄y tóg Cláudio t̄y p̄ā'i t̄y imperador n̄n k̄y tóg ge n̄i.

29 K̄y ag tóg pr̄yḡ n̄nh ken k̄y Jesus mré m̄ũ ag tóg Judéia tá ke ag to jykren m̄ũ sir. K̄y ag tóg: “ēg h̄yn ag m̄y n̄n ù jēnēh m̄ũ, ag t̄y kon jé,” he m̄ũ. K̄y vènh kar v̄y ag tũ kaju vin han m̄ũ, ag t̄y Judéia tá Jesus mré ke ag m̄y jēnē jé.

30 K̄y ag tóg Barnabé jēnēg m̄ũ, Saulo ke gé, ag t̄y gé(g) m̄ũ jé, kófa ag m̄y vin jé, ù t̄y Jesus ki ge k̄y n̄t̄i ag ki r̄ir t̄i ag m̄y. K̄y ag tóg ke m̄ũ sir.

12

Ag t̄y Pedro se

1 Kejēn p̄ā'i t̄y rei t̄y Herodes v̄y Jesus ki ge k̄y n̄t̄i ù ag sigség m̄ũ, ag vóg kónān jé.

2 K̄y tóg soldado jēnēg m̄ũ, ti t̄y Tiago tén jé, João k̄āke ěn. Kyfé téj t̄y tóg ti tén m̄ũ, rógro téj t̄y, soldado ti, Herodes t̄y ti jēnēn k̄y.

3 K̄y tóg Israel ag m̄y há t̄i, ti t̄y Tiago tén k̄y. K̄y Herodes tóg Pedro k̄āgm̄ig m̄ũ gé sir. Festa k̄āki tóg ti k̄āgm̄ig m̄ũ. Festa ěn ki ag tóg p̄āo jēḡjā tũ ko t̄i, Israel ag. Ag jykre v̄e.

4 Soldado ag t̄y Pedro ve k̄y ag tóg v̄ese ja k̄āki ti fón m̄ũ. Soldado t̄y 16 ag v̄y ti ki r̄ir m̄ũ, ù t̄y 4 t̄y ti ki r̄ir n̄t̄in k̄y ù t̄y 4 ù ag n̄t̄ig ja ki n̄t̄i ke t̄i, jagnē ri kén. “Festa t̄y Páscoa kar k̄y sóg ag m̄y ti ven m̄ũ, ag t̄y ti vóg kónān jé,” he tóg, Herodes ti.

5 K̄y Pedro tóg se k̄y jē n̄i. Hā ra Jesus ki ge k̄y n̄t̄i ag tóg ti jo Topē mré v̄i k̄y n̄t̄i, ag t̄y to krónh ke tũ n̄n k̄y.

Pedro t̄y kavar n̄i

⁶ Tŷ vaj kŷ Herodes vŷ ag mŷ ti ven sŏr mŷ. Tŷ kuty ěn kĀ Pedro tŏg soldado rĕgre ag kuju ki nŷr mŷ. Ferro rĕgre tŷ tŏg se kŷ nŷ ag mrĕ. Soldado ũ ag tŏg vĕse ja jĀnkĀ ki rŷr mŷ.

⁷ Kŷ vĀhĀ Topĕ tŷ jĕnĕ jafĀ tŏg ti mrĕ jĕ nŷ, kŷ tŏg ĩn ěn krĕm jĕngrĕ nŷ, kuty hĀ ra. ěn tŏg Pedro ki pĕrĕn ke mŷ, ti kĀvy ki. Ti rŷn tŏg mŷ, kŷ tŏg ti mŷ: “kur nŷ,” he mŷ. Kŷ ti nĭgĕ se ja tŏg varan ke mŷ, ferro ěn ti. Kŷ tŏg kavār kŷ nŷ nŷ, kyvar kŷ, Pedro ti.

⁸ Kŷ Topĕ tŷ jĕnĕ jafĀ tŏg ti mŷ: “vĕsŏg fi ra,” he mŷ. “Ā pĕn nĕ tu ra gĕ, Ā pĕn to rŏ ti,” he tŏg. Kŷ tŏg ke mŷ sir. Kŷ tŏg ti mŷ: “Ā kur rŷ tu kŷ inh nŏn kĀtĭg,” he mŷ.

⁹ Kŷ tŏg kĀkutĕ mŷ. Ti nŏn tŏg tŷ mŷ, Pedro ti. HĀ ra tŏg ti mŷ tŷ nĕn ũ ve jĕ, ti tŷ vĕg mŷ ti. Ti mŷ tŏg tŷ ti vĕnhpĕti ve tŷ, Topĕ tŷ jĕnĕ jafĀ tŷ nĕn han mŷ ti.

¹⁰ JĀnkĀ ki rŷr vĕn mŷ ěn pĀtĕn ag tŏg mŷ, jĀnkĀ ki rŷr mŷ ũ ke gĕ. Kŷ ag tŏg jĀnkĀ mĀg tĀ junjun mŷ, ferro tŷ han kŷ jĕ ěn, kyfĕ tŷ han kŷ jĕ ěn, ũn tŷ cidade to nŏn mŷ ěn. JĀnkĀ ěn vŷ vĕsŏgki rĀm ke mŷ ag jo. Kŷ ag tŏg kĀpa mŷ sir. Ępyr jagma ag tŏg mŷ mŷ, ěmĭn jagma. Kŷ vĀhĀ Topĕ tŷ jĕnĕ jafĀ tŏg tŷ mŷ sir.

¹¹ Kŷ vĀhĀ Pedro tŏg mrin ke mŷ, kŷ tŏg: “vĀhĀ sŏg ki kanhrŏ nŷ,” he mŷ. “Topĕ vŷ Ā tŷ jĕnĕ jafĀ jĕnĕ ja nŷ, kŷ tŏg inh kren han mŷ, pĀ'i tŷ Herodes jo. Israel kar ag tŏg inh jagtar nŷnh ke jĀvĀnh mŷ, hĀ ra sŏg venh ke tŷ nŷ,” he tŏg, Pedro ti.

¹² To jykrĕn kŷ tŏg Maria fi ĩn ra tŷ mŷ, JoĀo mŷnh ěn fi, ag tŷ ũ to: Marcos, he mŷ ěn mŷnh fi. Fi ĩn krĕm ag tŏg vĕnh mĀn kŷ nŷtŷ nŷ, Topĕ mrĕ ag vŷ nŷtŷ nŷ, ũ tŷ hĕn ri ke ag.

¹³ Kŷ tŏg ĩn to rŏ jĀnkĀ tŷ tŏrŏn' tŏrŏn' ke mŷ. Kŷ fi camarada fi tŏg venh kĀtŷ mŷ. Fi jyjy hĀ vŷ: Rode, he mŷ.

¹⁴ Kŷ fi tŏg Pedro vŷ ki kanhrŏ nŷ, hĀ ra fi tŏg ti mŷ nŏn tŷ nŷ, rŏm tŷ fi nŷ, jĀnkĀ ti, fi fe tŷ mrin ke mŷ ra. Fi tŷ ĩn kĀra rĀn kŷ fi tŏg vĕnh kar mŷ: “Pedro vŷ rŏ to jĕ,” he mŷ.

¹⁵ Kŷ ag tŏg fi mŷ: “krŷ vĕnhmŷ Ā nŷ,” he mŷ. HĀ ra fi tŏg: “ti hĀ vĕ,” he mŷ. Kŷ ag tŏg fi mŷ: “ti ki rŷr tŷ ěn vĕ hŷn,” he mŷ.

¹⁶ Kŷ Pedro tŏg ver re tĀ jĕ nŷ, jĀnkĀ tŷ tŏrŏn' tŏrŏn' ke mĀn kŷ. Kŷ ag tŏg ti mŷ rŏm mŷ, jĀnkĀ ti. Ti vĕg ag tŏg mŷ sir, kŷ tŏg ag mŷ e tŷ.

¹⁷ Kŷ Pedro tŏg ag mŷ Ā nĭgĕ tŷ ge mŷ, ag tŷ katy' he jĕ. Kŷ tŏg ag mŷ Topĕ tŷ ti kavĀn tŏ mŷ sir, Topĕ tŷ ti kyvĀn kŷ. Topĕ tŷ vĕse ja kĀtĀ Ā kutĕm kĀmĕn tŏg mŷ sir. Kŷ tŏg ag mŷ: “Tiagŏ mŷ kemnŷ, Jesus mrĕ ke kar ag mŷ ke gĕ,” he mŷ. Kŷ tŏg Jerusaleĕm tĀ kutĕ kŷ ěmĀ ũ ra tŷ mŷ sir.

¹⁸ Tŷ vaj kŷ soldado ag fe tŏg jŷrŷn ke mŷ. “Pedro hŷn hĕ kĀtĀ vyr, ti hŷn ne kĀtĀ vyr?” he ag tŏg mŷ, ti jĀvĀnh kŷ.

¹⁹ Kŷ Herodes tŏg ũ ag jĕgnĕg mŷ gĕ, ti kĀgmŷ jĕ. HĀ ra ag tŏg ti vĕg tŷ nŷ gĕ. Kŷ Herodes tŏg Pedro ki rŷr mŷ ag ki jĕmĕg mĀn mŷ. Kar kŷ tŏg soldado ũ ag mŷ: “ag kĀgtĕn ra, ti ki rŷr mŷ ag,” he mŷ. Kŷ ag tŏg ag kĀgtĕn mŷ sir.

Kar kŷ Herodes tŏg Judĕia tĀ kutĕ kŷ cidade tŷ Cesarĕia ra tŷ mŷ sir, tĀ nŷ jĕ.

Herodes ter

²⁰ Herodes tŏg cidade tŷ Tiro tĀ ke ag to jŷ mŷ, cidade tŷ Sidom tĀ ke ag to ke gĕ. ěn ag tŏg Herodes nĭgĭa tĀ junjun mŷ. Kŷ ag tŏg pĀ'i sŷ mrĕ vŷ mŷ, ti jiji hĀ vŷ: Blasto, he mŷ. Herodes vŷ ti tŷ pĀ'i han ja nŷ. ěn mŷ ag tŏg to vŷ mŷ, ti tŷ ag jagfy vŷ jĕ, pĀ'i tŷ Herodes mrĕ, tŷ tŷ ti fe tŷ hĀ' he jĕ. Herodes krĕm ke ag tŏg ag mŷ vĕjĕn vĕne he ja nĭgtŷ, Tiro tĀ ke ag mŷ, Sidom tĀ ke ag mŷ ke gĕ.

Herodes tỳ ag to jũ nĩn kỳ ag tóg tá vễjẽn ve mãn tũ nĩ sir. Hã kỳ ag tóg ti fe tỳ há' he sór mũ, ti tỳ ag mỷ vễne he mãn jé.

²¹ Kỳ Herodes tóg ag mỷ kurā nĩm mũ. Kỳ tóg ả kur sĩnvĩ ẻn tu mũ, pã'i kur ẻn ti. Kỳ tóg ả nĩgja kri nĩ kỳ ag mỷ vĩ mág han mũ.

²² Kỳ vễnh kar tóg ti to: “ẻprả vễnh vĩ pijé,” he mũ. “Tỳ tóg Topẻ vĩ mẽ tĩ, ti vĩ ti,” he ag tóg mũ.

²³ Kỳ vễsymẻr Topẻ tỳ jẻnẻ jafả tóg ti vóg kỏnẫn mũ sir, ti tỳ ag mỷ: “vỏ,” he tũ nĩn kỳ. “Inh pi(jẻ) tỳ Topẻ nĩ,” he ja tũ tóg nĩ, hã kỳ tóg ti vóg kỏnẫn mũ sir. Kỳ ti nug ga vỹ ti kagrảg mũ, hã kỳ tóg ter mũ.

Barnabẻ tỳ Saulo mrẻ Topẻ vĩ tỏnh tĩg

²⁴ Jỏ ừ tỳ hẻn ri ke ag vỹ Topẻ vĩ mẽg mũ, kỳ ag tóg Jesus ki ge mũ.

²⁵ Kỳ Barnabẻ vỹ Saulo mrẻ ảjag tỳ nẻn gẻ(g) kẫmũ mũ ẻn vin mũ, Jerusalẻm tá ke ag mỷ. Prỷg nĩn kỳ Jesus ki ge kỳ nỹtỉ ag tóg Jerusalẻm tá ke ag mỷ vễjẻn jẻgnẻ ja nĩgtỉ. Ag mỷ vễjẻn ẻn vin kỳ ag tóg vỹnvỹn ke mũ sir, Barnabẻ ti, Saulo ti ke gẻ. Joỏo pẻre ag tóg mũ mũ, Marcos he mũ ẻn ti.

13

¹ Antioquia tá ừ ag tóg nỹtỉ, Topẻ vĩ tỏ tĩ ừ ag, Jesus jykre tỳ vễnh kanhrẫn nỹtỉ ag ke gẻ. Jesus ki ge kỳ nỹtỉ ag mrẻ ag tóg nỹtỉ, ừ tỳ vễnh mãn tĩ ag mrẻ, ag tỳ Topẻ vĩ mẽ jẻ. Kỳ ừ jijin hã vỹ: Barnabẻ, he mũ, kar ừ jyjyn hã vỹ: Simỏo Negro, he mũ. Ừ tóg tỳ Lủcio nĩ, Cirene tá ke tag ti. Kỳ ừ tóg tỳ Manaẻm nĩ, pã'i tỳ Herodes mrẻ mog mũ tag ti. Kỳ ừ tóg tỳ Saulo nĩ gẻ.

² Kejẻn ag tóg jagnẻ mỷ Topẻ jykre tỏ mũ, ag tỳ jẻg tũ nĩn kỳ. Kỳ Topẻ kuprỉg tóg ag mỷ: “Barnabẻ fẻg ra, Saulo mrẻ,” he mũ, “ag tỳ inh rẫnhrẫj han jẻ, isỹ nẻn to jykẻn mũ ẻn ti, ag tỳ inh jykre tỏ jẻ, vễnh kar mỷ,” he tóg, Topẻ kuprỉg ti.

³ Kỳ ag tóg jẻg tũ nĩn kỳ Topẻ mrẻ vĩ mãn mũ. ảjag nĩgẻ tỳ ag tóg ag mẽg mũ, ag kymẻn ag tóg mũ, kỳ ag tóg: “ha mũ jẻg ge,” he mũ. Hã kỳ Topẻ kuprỉg tóg ag jẻgnẻg mũ sir.

Kujả tỳ Elimas

⁴ Topẻ kuprỉg tỳ ag jẻgnẻn kỳ ag tóg cidade tỳ Selẻucia ra mũ mũ. Tá junjun kỳ ag tóg goj vẫsỏ tỳ Chẻpre ra mũ mũ, canỏa mág kẫmỉ.

⁵ Kỳ ag tóg cidade tỳ Salamina tá junjun mũ. Tá ag tóg Topẻ vĩ kẫmẻn mũ, Israel ag tỳ vễnh kanhrẫn jafả kẫtả. Joỏo Marcos vỹ ag mrẻ tĩ mũ gẻ. Ag camarada vẻ, Joỏo Marcos ti.

⁶ Goj vẫsỏ mỉ ag tóg pa mũ. Kỳ ag tóg cidade tỳ Pafos tá junjun mũ, Topẻ vĩ kẫmẻn kỳ. Tá ừ tóg nĩ nĩ, kujả ừ. Ỏn kỳ tóg Topẻ vĩ tỏ sỏr mũ. Israel ừ vẻ, ti jiji hã vỹ: Bar Jesus, he mũ.

⁷ Gubernur mrẻ tóg nĩ nĩ. Gubernur jyjy hã vỹ: Sẻrgio Paulo, he mũ. Krỉ há ti nĩ, Sẻrgio Paulo ti. Kỳ tóg Barnabẻ jẻ prẻr mũ, Saulo jẻ ke gẻ, ti tỳ Topẻ vĩ jẻmẻ sỏr kỳ.

⁸ Kỳ kujả ẻn tóg ag vỉ kỏtỏ tẻ mũ, gubernỏr tỳ Topẻ vỉ kri fig tũ nĩ jẻ. Kujả ẻn jiji ừ hã vỹ: Elimas, he mũ, hã vỹ: kujả, he mũ, ti jyjy ti.

⁹ Kỳ vẫhả Topẻ kuprỉg tóg Saulo krỉn mũ. Saulo jiji ừ hã vỹ: Paulo, he mũ. Kỳ Topẻ kuprỉg tỳ ti krỉn kỳ Paulo tóg kujả ẻn ki kanẻ jũ han kỳ ti ki ẻvẫnh mũ,

¹⁰ kỳ tóg: “tỳ ả tóg ừn ỏn mẻ nĩ,” he mũ. “Jykre pẫnỏ ả nĩ (mỷr),” he tóg. “Jỏpỏ kỏsin vỹ tỳ ả nĩ (mỷr), vễnh jykre kuryj kỏtỏ tẻ ả nĩ (mỷr),” he tóg. “Topẻ jỏpy

vỹ kugryj nýtĩ, ti jamĩn ti, hã ra ã tóg tỹ pãno ke sór tĩ (mỹr), kỹ ã tóg vènh jykre pãno to krónh ke tũ nĩgtĩ (mỹr),” he tóg.

11 “Ha vé, Topê vỹ ã vóg mũ, kỹ ã tóg kyvãn ha,” he tóg. “Rã venh ke tũ ã nĩnh mũ, kurã tỹ hèn ri ke ki,” he tóg, Paulo ti.

Kỹ tóg vèsymér ti mỹ kuty' he mũ. Kyvó tóg nĩ sir. Kỹ tóg jèmĩg mũ. Ủ jé tóg prêr mũ, ti tỹ ti pére tũg jé.

12 Governador tỹ tag ve kỹ tóg ti mỹ e tĩ. Kỹ tóg Jesus ki rã mũ. Topê jykre tóg ti mỹ tar ja nĩ.

Paulo tỹ cidade tỹ Antioquia tá Topê vĩ tó

13 Kỹ vãhã Paulo ag tóg Pafos tá pa mũ. Canoa mág kãmĩ ag mũ mũ. Kỹ ag tóg ga tỹ Panfília tá junjun mũ, cidade tỹ Perge tá. Hã ra João Marcos tóg kyrã mũ. Ag ré kỹ tóg Jerusalém ra vỹn ke mũ, João Marcos ti.

14 Jó ag tóg Perge tá pa mũ, ga tỹ Pisídia ra mũ jé, cidade tỹ Antioquia ra. Tá junjun kỹ ag tóg vènhkãn ke kurã ki ag tóg Israel tỹ vènh kanhrãn jafã kãra ge mũ, tá ag nĩgnĩ mũ gé.

15 Ủ tóg tá Topê tỹ ãg mỹ vènh jykre nĩm ja ãn to ke mũ, rãn kỹ nĩ ãn to. Ti tỹ ãg jyvèn tó tóg mũ gé, vãsỹ Topê vĩ tó tĩ ag tỹ rãn ja ãn ti. Kar kỹ pã'i ag tóg Paulo ag jé prêr mũ. Kỹ ag tóg: “kanhkã',” he mũ. “Ăjag tỹ ãg jyvèn sór nýtĩn kỹ tóg há tĩ,” he ag tóg.

16 Kỹ Paulo tóg jêg nê mũ. Ă nĩgê tỹ tóg ag mỹ ge mũ, ag tỹ katy' he jé. Kỹ tóg ag mỹ: “ha mẽ, Israel kar',” he mũ. “Jêmê ra ha, ủ tỹ Topê kamêg mũ kar, ãjag tỹ tỹ fóg nýtĩ ra,” he tóg.

17 “Israel ag vỹ Topê kamêg tĩ. Topê tag tóg ãg jóg'jóg ag kuprêg ja nĩ. Ag tỹ tóg povo mág han, ag tỹ ver Egito tá ke ag mré nýtĩn kỹ. Tá tóg ag kãpan mũ, ã jykre tar ãn tỹ, Topê ti,” he tóg.

18 “Ag to tóg fen mág mũ, Topê tag ti, ag tỹ ãmã tũg ja mĩ mũn kỹ, prỹg tỹ 40 ãn ki.

19 Povo tỹ 7 tỹ tóg tũ' he mũ, ga tỹ Canaã tá. Kỹ tóg ãg jóg'jóg ag mỹ ag ga fig mũ, tỹ ag tũ nĩ jé.

20 Kỹ tóg ag mỹ pã'i ag vin mũ gé, ag jyvèn jafã ag, 100 tỹ 4 kri 50 anos ki. Kar kỹ Samuel vỹ tỹ Topê vĩ tó tĩ nĩ gé.

21 Kỹ ag tóg pã'i mág tỹ rei ve sór mũ. Kỹ ag tóg Topê mỹ to vĩ mũ. Hã kỹ Topê tóg Saulo fêg mũ, Quis kósĩn ãn. Benjamim krê'krê ủ vè, Saulo ti. 40 anos ki tóg tỹ pã'i mág tỹ rei nĩ.

22 Ti tỹ ãn kutêm kar tóg Davi fêg mũ, Topê ti. Davi to tóg vĩ há han mũ, Topê ti, kỹ tóg: “Davi ve sóg, Jessé kósĩn,” he mũ. “Nén há han tóg tũgtĩ. Kỹ sóg ti to há nĩ. ãn hã vỹ inh jykre kar han mũ,” he tóg, Topê ti, Davi to,” he tóg, Paulo ti.

23 “Davi kósĩn ủ vè, hã vỹ: Jesus, he mũ. Topê vỹ vãsỹ ti kãtĩg ke to ja nĩgtĩ. Kỹ tóg vãhã Jesus jènê ja nĩ, ãg povo tỹ Israel to, ti tỹ ãg kren han jé.

24 João vỹ ti kãtĩg ke jo vènh kar mỹ: “ãjag jykre tovãn hã ra,” he ja nĩgtĩ, “isỹ ãjag kygpe jé,” he ja tóg nĩgtĩ, ãg povo tỹ Israel kar mỹ.

25 João rãnrãj tỹ tũ' henh ken kỹ tóg ag mỹ: “iso ãjag tóg Cristo he sór mũ,” he ja nĩgtĩ, João ti. “Hã tũ vè,” he ja tóg nĩgtĩ. “Inh pí(jé) tỹ Cristo nĩ,” he ja tóg nĩgtĩ. “Ha vé, inh nón tóg kãtĩg, inh Senhor ti, hã vỹ: Jesus, he mũ. Sỹ tỹ ti camarada nĩnh ke vè vè, sỹ ti pẽn né kunũ jé, ti pẽn to ró ti, hã ra sóg tỹ ti krêm ke pẽ jẽ,” he ja tóg nĩ, João ti,” he tóg, Paulo ti.

26 “Inh kanhkā!,” he tóg. “Abraão krē!,” he tóg. “Ū tŷ Topē kamēg mū, fóg kāmī,” he tóg. “Topē vŷ ěg hā mŷ vĕnh vī tag jĕnĕ, ěg krenkren jĕ,” he tóg.

27 “Jerusalém tá ke ag vŷ Jesus ki kagtĭg ja nŷtĭgtĭ. Ti tŷ tŷ Topē kósĭn nĭn ki kagtĭg ja ag tóg nŷtĭgtĭ, ag pā'i ag ke gé. Hā kŷ ag tóg vāsŷ rán kŷ nĭ ěn han. Vĕnhkán ke kurā ki ag tóg vég tĭ, Topē vī tó tĭ ag tŷ nĕn rán ja ti. Hā ra ag tóg sir ag tŷ nĕn tó mŷ ěn ki króm, ājag tŷ Jesus to: ter jĕ tóg ke mŷ, hen kŷ.

28 Nĕn ū kórĕg han ja tŷ ti nĭ, kŷ ti ter ke tŷ vĕ vĕ, hā ra ag tóg Pilatos mŷ: “ěg tŷ ti tén há tóg tĭ vĕ,” he ja nĭgtĭ.

29 Ag tŷ ti to rán ja ěn ki króm kán kŷ ag tóg cruz ěn to ti térem ja nĭgtĭ, vĕnh kej kátá ag tóg ti fón ja nĭgtĭ.

30 Hā ra Topē tóg ti rĭn mán ja nĭgtĭ, ti ter mŷ ra.

31 Kŷ tóg ā mré ke ag mŷ vĕnh ven ja nĭgtĭ sir, Jesus ti, ū tŷ ti mré Jerusalém ra mŷ ja ag mŷ, Galiléia tá kāmŷ kŷ. ěn ag tóg ti kāmĕn mŷ sir, vĕnh kar mŷ.

32 Vĕnh vī tag tó ěg tóg mŷ,” he tóg, Paulo ti.

33 “ěg jóg'jóg ag vŷ Topē vī ěn mĕ ja nĭgtĭ. Hā ra tóg ūri han mŷ, Topē ti, ā tŷ vāsŷ nĕn tó ja ěn ti. ěg jóg'jóg ag krĕ'krĕ ag mŷ tóg han mŷ, ti tŷ vāsŷ nĕn tó ja ěn ti, Topē ti. Hā kŷ tóg Jesus rĭn mán, ti ter kŷ. Kŷ tóg ti mŷ: “tŷ ā tóg inh kósĭn jĕ. Ūri sóg ā han,” he ja nĭgtĭ, Topē ti, Jesus mŷ. Topē mŷ jān jafā ki tóg rán kŷ nĭ, jān tŷ 2 ki,” he tóg, Paulo ti.

34 “Hā ra tóg ti tŷ ti rĭn mán ke tó ja nĭgtĭ gé, ti mur ke to hā. Ti vag ke tŷ ěn tó ja tóg nĭgtĭ gé, kŷ tóg: “sŷ Davi mŷ nĕn tó ja ěn ki króm jĕ sóg ke mŷ,” he ja nĭgtĭ. “Ājag mŷ sóg han mŷ, sŷ ti mŷ nĕn tó ja ěn ti,” he ja tóg nĭgtĭ, Topē ti,” he tóg, Paulo ti.

35 “Kŷ tóg tag tó ja nĭgtĭ gé: “ā tŷ vŷ vag ke tŷ nĭ,” he ja tóg nĭgtĭ gé, Topē ti,” he tóg, Paulo ti.

36 “Hā ra Davi vŷ ter ja nĭgtĭ, ā jóg'jóg ag nón. Kŷ tóg vag ja nĭ inhhā. Topē tŷ ti mŷ nĕn tó jan ki króm ja tóg nĭgtĭ, Davi ti. Ā mré ke ag mŷ tóg han, Topē tŷ ti mŷ nĕn tó ja ti. Hā ra tóg ter kŷ vag ja nĭgtĭ inhhā, Davi ti.

37 Ti jāvo tóg vag ja tŷ nĭ inhhā, Jesus ti, Topē tŷ ti rĭn mán kŷ,” he tóg, Paulo ti.

38 “Ha vé, inh kanhkā!,” he tóg. “Jesus tag tŷgrĭn Topē vŷ ājag mŷ vĕnh pāte fón sór mŷ, ājag tŷ ti vī mranh ja ti. Hā kŷ sóg ājag mŷ tó mŷ,” he tóg.

39 “Ājag tŷ Moisés vī mĕg mŷ ra ājag jykre tóg kuryj ja tŷ nĭ ver. Ājag tŷ hā ra Jesus ki ge kŷ tóg ke mŷ sir, Topē ti. Ājag kugrynh tóg mŷ sir.

40 Hā ra ti to é he tŷg nĭ. Ke tŷ nĭ mŷ ra ājag tóg venh ke mŷ, vāsŷ nĕn rán kŷ nĭ ěn ti, Topē vī tó tĭ tŷ nĕn tó ěn ti,

41 hā vŷ: “iso ājag tóg é he mŷ (mŷr),” he mŷ. “Sŷ nĕn han ke ve jĕ ājag tóg ke mŷ, kŷ ājag kanĕ jur ke mŷ, ājag fĕ tóg jŷrŷn kĕnh ke mŷ gé,” he ja tóg nĭgtĭ, Topē ti. “Ājag tŷ kri finh ke tŷ vĕ vĕ, ū tŷ ājag mŷ tó mŷ ra. Hā ra ājag tóg venh ke mŷ,” he ja tóg nĭgtĭ, Topē vī tó tĭ ti,” he tóg, Paulo ti.

42 Ag tŷ Paulo vī mĕ kán kŷ ag tóg ĩn ěn kátá pa mŷ. ĩn kátá pa kŷ ag tóg ti mŷ: “vĕnh kán ke kurā ū tá ěg mŷ kāmĕn mán nĭ,” he mŷ.

43 Kŷ Israel tŷ hĕn ri ke ag tóg Paulo ag nón mŷ mŷ. Fóg ag tóg ag nón mŷ mŷ gé, fóg tŷ Israel jykre han mŷ ag, ū tŷ Topē kamēg mŷ ag. Kŷ Paulo ag tóg ag jyvĕn mŷ, ag tŷ Topē to jykren kŷ nŷtĭ jĕ, ag tŷ ti tŷ ěg jagāgtān to jykren kŷ nŷtĭ jĕ.

44 Vēnhkán ke kurā ũ tá cidade ēn tá ke kar ag vỹ vēnh mǎn mǔ, Topē vỹ jēmē jé.

45 Kỹ Israel ag tóg ũn e ēn vég mǔ. Kỹ ag tóg jǔgǔ mǔ, vēnh kar tỹ Paulo ag to há nýtĩn kỹ. Hǎ kỹ ag tóg Paulo vỹ kafǎn mǔ sir, ti tỹ ag mỹ Topē vỹ tón kỹ. Ti to ag tóg vỹ vỹ he mǔ gé.

46 Hǎ ra Paulo ag tóg ag kamēg tǔ nĩ. Ag mỹ ag tóg: “ājag hǎ mỹ ěg tóg tó vén, Topē vỹ ti,” he mǔ, “ti tỹ ěg mỹ: Israel ag mỹ tó vén, hen kỹ. Hǎ ra ājag tóg mē jāvǎnh nýtĩn kỹ,” he ag tóg. “Ěg rĩr krỹg ja tǔ venh ke tǔ ājag nĩ, ājag tỹ mē jāvǎnh nýtĩn kỹ,” he ag tóg. “Hǎ kỹ ěg tóg sir fóg ag hǎ mỹ tónh ke mǔ, Topē vỹ ti,” he ag tóg.

47 “Topē vỹ ěg mỹ: “ājag tỹ sóg néj gru ri ke han mǔ,” he mǔ, “fóg kar ag tỹ ājag ki Topē ve jé, kanhgág ag ke gé. Ājag ki ag tóg mēnh ke mǔ, Jesus tỹ ag krenkren han ke ti, ga fyn ja mĩ hǎ,” he ja tóg nĩ ěg mỹ, Topē ti,” he ag tóg, Paulo ag.

48 Fóg ag tỹ tag mē kỹ tóg ag mỹ sér tĩ sir. Kỹ ag tóg Topē vỹ to há nýtĩ, ti mỹ vỹ há han kỹ. Kỹ ag tóg Jesus ki ge mǔ, Topē tỹ ũn kuprēg mǔ ag, ag tỹ ěg rĩr krỹg ja tǔ ve jé.

49 Kỹ ga ēn tá ke kar ag vỹ Topē vỹ jēmēg mǔ.

50 Hǎ ra Israel ag tóg ũn tátá há ũ fag mré vỹ mǔ, fóg tỹ Israel jykre han mǔ fag. Pǎ'i ag mré ag tóg vỹ mǔ gé. Paulo ag kato ag tóg vỹ mǔ. Kỹ ag tóg ag vóg kónǎn mǔ. “Ha mǔ jēg, ěmǎ ũ ra,” he ag tóg mǔ sir, ag vóg kónǎn kar kỹ.

51 Kỹ Paulo ag tóg ājag pēn kykǔnhkǔnh mǔ, ag mỹ: “Topē tovǎnh ājag huri,” he jé. Kỹ ag tóg cidade tỹ Icônio ra mǔ mǔ sir.

52 Jesus mré mǔ ag mỹ tóg hǎ ra sér tĩ. Topē kuprĩg vỹ tỹ ag jagrē nĩ, kỹ tóg ag mỹ sér tĩ sir.

14

Cidade tỹ Icônio tá Topē vỹ tó

1 Ag tỹ cidade tỹ Icônio tá junjun kỹ ag tóg sir Israel tỹ vēnh kanhrǎn jafǎ kǎra ge mǔ. Kỹ ag tóg ag mỹ Topē vỹ kǎmén mǔ. Kỹ Israel tỹ hēn ri ke ag tóg Jesus ki ge mǔ gé, fóg tỹ hēn ri ke ag ke gé, ũ tỹ Grego vỹ tó mǔ ēn ag.

2 Kỹ Israel ag tóg, ũ tỹ Jesus ki ge jāvǎnh ag tóg fóg ag krĩn kónǎn mǔ sir, Jesus mré ke ag to.

3 Hǎ ra Paulo ag tóg tá nýtĩ mág han mǔ. Kỹ ag tóg Topē vỹ tó mǔ, ag tỹ ag kamēg tǔ nĩn kỹ, Topē vỹ kri fi kỹ. Kỹ Topē tóg ag mỹ ā jykre fig mǔ, ag tỹ ěg tỹ nēn han vǎnh hyn han jé. Hǎ kỹ vēnh kar tóg Topē jykre ki kanhró nýtĩ sir.

4 Kỹ vēnh kar tóg vēnh kǎpugpóv kỹ nýtĩ nĩ. Ũ ag tóg Israel ag to há nýtĩ, jó ũ ag tóg Jesus tỹ ũn vin mǔ ag tó há nýtĩ.

5 Kỹ Israel ag tóg fóg ag mré jykren mǔ, fóg tỹ pǎ'i ag mré, ag tỹ Paulo ag vóg kónǎn jé, ag tỹ pó tỹ ag pin jé.

6 Kỹ Paulo ag tóg jēmēg mǔ, kỹ ag tóg cidade ũ ra mǔ mǔ, cidade tỹ Listra ra, cidade tỹ Derbe ra ke gé. Ga tỹ Licaônia tá ti nýtĩ, cidade tag ti.

7 Cidade ēn mĩ mǔn kỹ ag tóg tá Jesus vỹ há tugtó mǔ sir.

Ag tỹ cidade tỹ Listra tá Paulo vóg kónǎn

8 Cidade tỹ Listra tá ke ũ tóg nĩ nĩ, ũn tǔg vǎnh. Ti pēn vỹ grĩ nýtĩ. Ge pē tóg nĩ, ā mur mǔn kǎ. Pēn krój tóg nĩ.

⁹ Ēn tóg sir Paulo vī mēg mū. Kŷ Paulo tóg ti tugnŷm mū. Kŷ tóg ti tŷ Jesus vī kri fig mū vėg mū, Jesus tŷ ti tŷ há' he jė.

¹⁰ Kŷ tóg jamā hár(a) ti mŷ ke mū, kŷ tóg: “jėg nė ra,” he mū. “Vėnhřā hā jėg,” he tóg ti mŷ, Paulo ti. Kŷ tóg vāhā hŷm he mū. Kŷ tóg mī tī mū.

¹¹ Kŷ tóg vėnh kar ěn mŷ e tī, ag tŷ Paulo tŷ nén han mū ven kŷ. Kŷ ag tóg ājag vī ki jagnė mŷ ke mū, vī tŷ Licaōnica he mŷn ki. Jamā hár(a) ag tóg: “topė ag vŷ ěg tá junjun,” he mū. “Ēg ri ke ag nŷtī, topė ag, kŷ ag tóg ěg tá re mū,” he ag tóg, Paulo ag to.

¹² Kŷ ag tóg Barnabė to: Júpiter, he mū. Paulo to ag tóg: Mercúrio, he mū sir, ti vī mág to. Őn kŷ ag topė jygji vė, hā vŷ: Júpiter, Mercúrio, he mū.

Hā ra Paulo ag tóg ag vī ki kagtŷg nŷtī.

¹³ Júpiter jo ĩn vŷ cidade fyr tá jė nī, kŷ ti tū ki rŷr tī tóg tá nī gé. Kŷ tóg monh gé(g) tī mū, ka fej tŷ coroa ke gé, Júpiter tū ki rŷr tī ěn ti. Cidade to ró jānkā māra tóg gé(g) tī mū. Tá tóg monh kugprŷn sór mū, Barnabė mŷ, Paulo mŷ ke gé. Őn kŷ ag tóg Paulo ag to: “topė ag vė,” he mū, hā kŷ ag tóg ag mŷ monh kuprŷn sór mū, tá ke kar ěn ag.

¹⁴ Hā ra Paulo ag tóg mėg mū, kŷ ag tóg ājag kur janjān mū, jŷgŷ kŷ. Ű tŷ vėnh mān kŷ nŷtī ag to ag tóg pétė mū. Prėr kŷ ag tóg ag mŷ:

¹⁵ “ne nė?” he mū. “Tŷ ěg ěprā ke nŷtī, ājag ri ke,” he ag tóg. “Hā ra ěg tóg ājag mŷ kāmén sór mū, ājag tŷ űn kŷ topė tag ag tovānh jė. Topė pė ki gemnī, űn rŷr mŷn ki. Kanhkā han tóg, ga ke gé, goj ke gé, mī mū kar ěn ke gé, Topė ti,” he ag tóg.

¹⁶ “Vāsŷ Topė tóg nação ag mŷ nén ű to ja tū nŷgtī, kŷ ag tóg ājag jykre mī mŷgtī.

¹⁷ Ge ra tóg ag ki rŷr há han mū, Topė ti, ag tŷ tag to vāhā ti ki kanhrān jė. Hā jė tóg ta jėnė, kŷ ājag jakrė tóg mogmog mū. Kŷ ājag tóg konh ke mū. Kŷ ājag fe tóg há' he mū sir. Ājag mŷ tóg sér tī sir, ti tŷ ājag mŷ vėjėn han kŷ, Topė ti,” he ag tóg, Paulo ag.

¹⁸ Ag vī ki ag tóg ag mŷ nén ű kugprŷn tovānh mū, Paulo ag mŷ, vėnh kar ěn ag. Hā ra ag tóg ag mŷ nén ű kugprŷn kren ja nŷgtī, tá.

¹⁹ Kar kŷ cidade tŷ Antioquia tá ke ag tóg tá junjun mū, cidade tŷ Icōnio tá ke ag ke gé. Israel ag vė, tá junjun mū ag. Ēn ag vėnh kar krŷn kōnān mū, kŷ ag tóg Paulo pin mū, pó tŷ. “Ter ti huri,” he ag tóg mū sir, ti pin kar kŷ. Kŷ ag tóg ti raran mū sir. Cidade fyr tá ag tóg ti raran kŷ ti fón mū sir.

²⁰ Kŷ Jesus mrė mū ag tóg ti venh kāmū mū, hā ra tóg jėg nė mū, Paulo ti. Cidade kāra tóg rā mū.

Tŷ vaj kŷ tóg hā ra cidade tŷ Derbe ra tī mū, Barnabė mrė.

²¹ Tá ag tóg Jesus kāme há tó mū gé, Derbe tá. Kŷ ű tŷ hėn ri ke ag tóg Jesus ki ge mū sir.

Paulo ag tŷ cidade tŷ Antioquia ra vŷnvŷn ke

Kar kŷ ag tóg cidade tŷ Listra ra vŷnvŷn ke mū, cidade tŷ Icōnio ra ke gé, cidade tŷ Antioquia ra ke gé, Paulo ag.

²² Vŷnvŷn ke kŷ ag tóg Jesus mrė mū ag jyvėn mū sir, ag tŷ Jesus vī kri fi to krónh ke tū nŷn jė, ag tŷ to fe tar nŷn jė ke gé. “Ēg tŷ Topė tŷ tŷ ěg pā' nī ve sór nŷtŷn kŷ ěg tóg ti venh ke jo vėnh jagāgtar jagy venh ke mū,” he ag tóg, Jesus ki ge kŷ nŷtī ag mŷ, Paulo ag.

²³ Kŷ ag tóg ag mŷ kófa ag kuprēg mŷ, ag tŷ Jesus ki ge kŷ nŷtī ag ki rīr jé, ū tŷ Topē vī mē jé vēnh mǎn tī ag ki. Ag to ag tóg Topē mré vī mŷ gé, nén ū ko tū nŷn kŷ. Kŷ ag tóg: “Topē vŷ ājag ki rīr há han mŷ,” he mŷ. Kŷ ag tóg mŷ mŷ sir.

²⁴ Kŷ ag tóg ga tŷ Pisidia fin pa mŷ. Ga tŷ Panfília tá ag tóg junjun mŷ.

²⁵ Cidade tŷ Perge tá ag tóg Topē vī tó mŷ gé sir. Kar kŷ ag tóg cidade tŷ Atália ra mŷ mŷ.

²⁶ Tá junjun kŷ ag tóg cidade tŷ Antioquia ra mŷ mŷ gé, canoa mág kāmī. Antioquia ěn tá ag tóg pa ja nī (mŷr). Tá ke ag tóg ag to Topē mré vī ja nŷgtī, ti tŷ ag jy nŷgǎn jé, ag tŷ ti rǎnhrāj han kŷ. Vēnh rǎnhrāj ěn han kǎn ag tóg mŷ (mŷr) sir, kŷ ag tóg Antioquia ra vŷnŷn ke mŷ.

²⁷ Tá junjun kŷ ag tóg Jesus ki ge mŷ kar jé prēr mŷ, ag tŷ vēnh mǎn jé. Kŷ ag tóg ag mŷ Topē tŷ nén han mŷ kar kāmén mŷ. “Fóg ag ne tóg Jesus ki ge mŷ gé, Topē tŷ ag krīn kŷ,” he ag tóg mŷ ag mŷ.

²⁸ Kŷ ag tóg tá nŷtī, kysā tŷ hēn ri ke ki. Jesus mré mŷ ag mré ag tóg nŷtīgtī.

15

Ag tŷ Topē jykre to jykren

¹ Kejēn Judéia tá ke ū ag tóg tá junjun mŷ, Antioquia tá. Tá junjun kŷ ag tóg Jesus mré ke ag mŷ kāmén mŷ, kŷ ag tóg: “ājag gré junun fár kym nī,” he mŷ. “Moisés tŷ ěg mŷ nén tó mŷ ěn han nī. Ke tū nī mŷ ra ājag tóg krenkren ke tū nī,” he ag tóg.

² Hā ra Paulo ag tóg: “ke tū vē,” he mŷ. Kŷ ag tóg jagnē vī kafǎn mŷ sir. Kŷ Jesus mré ke kar ag tóg Paulo ag mŷ ke mŷ, ag tŷ Jerusalém ra mŷ jé. “Tag ag mré mŷmŷ, Jerusalém ra,” he ag tóg. “Tá Jesus tŷ ūn vin mŷ ag mré vīmnī, kófa ag mré. Ag mŷ: ěg hŷn hē ri kenh mŷ, vēnh gré junun fár kym ke to? hemnī,” he ag tóg.

³ Kŷ Paulo ag tóg: “ěg mŷnh ke nē ha,” he mŷ. Jesus ki ge kŷ nŷtī ag tóg ag mré mŷ sī han, kŷ ag tóg mŷ mŷ. Kŷ ag tóg ga tŷ Fenícia fīn pa mŷ sir, ga tŷ Samaria fīn ke gé. Ag mŷn kŷ ag tóg Jesus mré ke kar ag mŷ fóg ag kāmén mŷ, fóg ag tŷ Jesus ki ge mŷ ag. Kŷ tóg vēnh kar mŷ sér tī sir.

⁴ Hā kŷ ag tóg Jerusalém tá junjun mŷ. Kŷ tá Jesus ki ge kŷ nŷtī ag tóg vēnh mǎn mŷ, Jesus tŷ ūn vin mŷ ag mré hā, kófa ag mré hā. Kŷ ag tóg ag mŷ Topē tŷ nén han mŷ kar tugtó mŷ.

⁵ Hā ra Fariseu ū ag tóg tá nŷtī gé, ū tŷ Jesus ki ge mŷ ag. ěn ag tóg ag mŷ ke mŷ. “ěg mŷ tóg há tī, ag tŷ ājag gré junun fár kym kym ken kŷ,” he ag tóg mŷ, fóg ag to. “Ag tŷ Moisés tŷ ěg mŷ vēnh jykre nŷm ja ki kanhrǎn kŷ tóg ěg mŷ há tī,” he ag tóg mŷ sir, Fariseu ag, fóg ag to, ū tŷ Israel jykre han tū ag to.

⁶ Kŷ vǎhā Jesus tŷ ūn vin mŷ ag vŷ kófa ag mré vēnh mǎn mŷ, vyr mŷ, to vēmén jé.

⁷ Kŷ ag tóg to vēmén mág han mŷ sir. Kŷ kejēn Pedro tóg jĕg nē kŷ ag mŷ: “inh kanhkā!,” he mŷ. “Vāsŷ Topē tóg inh kuprēg ja nī, isŷ fóg ag mŷ Jesus vī há tó jé, ag tŷ jĕmē kŷ krenkren jé,” he tóg. “Tag ki kanhró ājag tóg nŷtī,” he tóg.

⁸ “Kŷ Topē tóg ag mŷ ā kuprīg jĕnĕg mŷ. Ag fe ki kanhró tóg nī, Topē ti, kŷ tóg ag mŷ ti jĕnĕg mŷ. Hā ki tóg ěg mŷ ven mŷ, ag tŷ Jesus ki ge kŷ nŷtī ti, ěg ri kén,” he tóg.

⁹ “Hā kŷ Topē tóg ag to: vyr mŷ ke ag vē, he tū nŷgtī. Ag tŷ ti ki ge kŷ nŷtīn kŷ tóg ag fe tŷ jānhkri! he mŷ, fóg ag fe tŷ,” he tóg.

10 “Topē tỳ há vĕ (mỹr). To: vĕnhmỹ ti nĩ, he tũg nĩ,” he tóg. “Ag mỹ ãjag tóg vĕnh jykre jagy ěn fi sór mũ, ti tỳ ěg mỹ han jagy ja ra. Ěg jóg’jóg ag mỹ tóg han jagy ja nĩ, kỹ tóg ag mỹ ag tỳ ki króm tũ nĩnh ha mẽ tóg tĩ, ěg mỹ ke gé. Hã ra ãjag tóg ag mỹ fi sór mũ,” he tóg.

11 “Ke tũg nĩ. Jesus tỳ ěg jagãgtãn kỹ tóg ěg kren han mũ, ěg tỳ ti vĩ kri fi kỹ. Kỹ ěg tóg ag ri ke tãvĩ nỹtĩ,” he tóg, Pedro ti.

12 Kỹ vĕnh kar ag tóg ěmĕ kỹ nỹtĩ nĩ. Kỹ ag tóg Barnabé tỳ ag mỹ nĕn tó mũ mẽg mũ, Paulo tỳ ag mỹ nĕn kãmĕn ti ke gé. Ag tỳ ěg tỳ nĕn han vĕnh hyn han mũ tó ag tóg mũ gé. Ag tỳ Topē jykre ki fóg ag mỹ nĕn hyn han mũ tó ag tóg mũ gé sir.

13 Ag tỳ tó kãn kỹ Tiago tóg sir ag mỹ: “ha mẽ, inh kanhkã’,” he mũ.

14 “Simão vỹ ěg mỹ tó ja nĩ, Topē tỳ nĕn han ve ti, Simão tỳ fóg ag mỹ Topē vĩ tó ve ti. Kỹ ag tóg tỳ Topē tũ nỹtĩ sir, fóg tỳ ti vĩ mẽg mũ ag. Jesus mrĕ ke vỹ tỳ ag nỹtĩ, ag tỳ ti ki ge kỹ nỹtĩn kỹ.

15 Hã ra tóg vãsỹ rán kỹ nĩ. Topē vĩ tó tĩ tóg tag rán ja nĩgtĩ, ha mẽ:

16 “kãtĩg jé sóg ke mũ, he tóg, Topē ti. Davi krĕm Israel ag tóg e pĕ ja nỹtĩ ja nĩgtĩ. Hã ra Davi jykre tóg tũ’ he mũ. Kỹ tóg ĩn vag ri ke nĩ sir. ĩn tãg han jé sóg ke mũ, hã vỹ: Davi krĕ’krĕ ũ vỹ tỳ pã’i nĩnh mãn mũ, he mũ. Isỹ han ken hã vĕ.

17 Ti tỳ sóg ũn mág pĕ han ke mũ, povo kar kãmĩ ke ag tỳ inh ki ge sór jé, fóg kar kãmĩ ke ag tỳ isũ nỹtĩ jé, kanhgág kar kãmĩ ke ag ke gé, isỹ ũn kuprĕg mũ ag, he tóg.

18 Topē tỳ tón hã vĕ. Ũ tỳ vãsỹ tag kãmĕn mũ tỳ tón hã vĕ,” he tóg, Topē vĩ tó tĩ ti. Hã kỹ ěg tóg tag ki kanhró tãvĩ nỹtĩ,” he tóg, Tiago ti.

19 “Isỹ nĕn to jykrĕn hã vĕ, ěg tỳ ag mỹ ěg jykre jagy ěn tó tũ nĩn jé, ũ tỳ fóg kar kãmĩ Topē jykre han sór mũ ag mỹ, kanhgág ag mỹ ke gé,” he tóg.

20 “Ěg tỳ ag mỹ tónh ke, ha mẽ: vĕnh kãggrá to festa ko tũg nĩ, ã prũ tũ fi mrĕ nỹ tũg nĩ, nĕn ũ tỳ vĕsókĩ ter mũ ko tũg nĩ, nĕn ũ kyvĕnh ko tũg nĩ gé,” he tóg, Tiago ti.

21 “Moisés jykre tugtó ag tóg tĩ, ěg mrĕ Israel ag, cidade kar ki. Vĕnh kãn ke kurã ki ag tóg ti tỳ rán mũ to ke tĩ. Vãsỹ ag tóg ke ja nỹtĩ, kỹ ag tóg ũri ke tãvĩ tĩ gé,” he tóg. “Hã kỹ ũ tỳ han sór mũ tóg han tĩ, Moisés jykre ti,” he tóg, Tiago ti.

Apóstolo ag tỳ carta rán mũ

22 Kỹ Jesus tỳ ũn vin mũ ag tóg to jykrĕn mũ, kófa ag ke gé, Jesus ki ge mũ ag kar ke gé, ũ tỳ Topē vĩ mẽ jé vĕnh mãn tĩ ag. Kỹ ag tóg ũ ag kuprĕg mũ, ag tỳ Antioquia ra mũ jé, Paulo mrĕ, Barnabé mrĕ. Ag tỳ ũn kuprĕg mũ ag hã vĕ, hã vỹ: Judas, he mũ, ti jiji ũ hã vỹ: Barsabás, he mũ. Silas kuprĕg ag tóg mũ gé. Ěn ag tóg tỳ Jesus mrĕ ke ag pã’i nỹtĩ.

23 Ag mỹ ag tóg vĕnh rán nĩm mũ gé. Ag tỳ rán hã vĕ, ha mẽ:

“Jesus tỳ ũn vin mũ ag tỳ rán hã vĕ, kófa ag tỳ rán ke gé, Jesus mrĕ ke ag. Ěg tỳ cidade tỳ Antioquia tá ke ag mỹ rán hã vĕ, fóg tỳ Jesus mrĕ ke ag mỹ, ga tỳ Sírĩa tá ke ag mỹ, ga tỳ Cilícia tá ke ag mỹ ke gé. Ājag mỹ há?

24 Ěg kã ũ ag tỳ ãjag tá junjun mẽ ěg tóg. Ājag krĩn ũ han ag tóg mũ, kỹ ãjag krĩ tóg kufy’ he mũ. Hã ra ěg tóg ag mỹ: ha vĕnh jykre tag tó, he ja tũ nĩgtĩ.

25 Kỹ ěg tóg vĕnh mãn, ěg tỳ to jykrĕn jé. Kỹ ěg kar tóg to jykrĕn kỹ tag ag kuprĕg, ěg tỳ ãjag to ag jĕgnĕ jé, ag tỳ Barnabé mrĕ mũ jé, Paulo mrĕ. Ag to ěg há tãvĩ nỹtĩ, Barnabé to, Paulo to ke gé.

²⁶ Ag hā ne tóg fe tūmē nýtīgī', fe tar kamē ag nýtīgī'. Kŷ ag tóg ěg Senhor tŷ Jesus Cristo vī tó mūgtī, ũ tŷ hēn ri ke tŷ ag tén sór mū hā ra.

²⁷ Ěg tŷ ag to há nýtīn kŷ ěg tóg Judas jēnēg mū, Silas ke gé, ag tŷ ājag mŷ ěg tŷ rán mū tag ti kāmén jé.

²⁸ Topē kuprīg vŷ ěg mŷ tó, kŷ tóg ěg mŷ há tī gé, ěg tŷ ājag mŷ vēnh jykre jagy ěn fig tū nīn jé. Tag hā han jé ājag tóg ke mū, ha mē:

²⁹ vēnh kăgrá to festa ko tūg nī, nén ũ kyvénh ko tūg nī gé. Nén ũ tŷ vēsóg ki ter mū ěn ko tūg nī gé. Ājag prŷ tŷ fag mré nŷ tūg nī gé. Ājag tŷ tag ki króm kŷ tóg há tī. Jatun mŷ nŷtīmīnī." Vēnhrán hā vē.

³⁰ Kŷ ag tóg ag mŷ: "ha mū jēg ge," he mū. Kŷ ag tóg mū kŷ Antioquia tá junjun mū. Tá ag tóg vēnh kar jé prēr mū. Jesus ki ge mū kar jé ag tóg prēr mū sir, ag tŷ to vēnh mán jé. Kŷ ag tóg ag mŷ vēnh rán ěn nīm mū.

³¹ Kŷ ag tóg to ke mū, vēnh rán to. Kŷ tóg ag mŷ há tī, ag tŷ vēnh jyvēn rá ěn ven kŷ. Kŷ ag krī tóg kănhvy' he mū sir.

³² Kŷ Judas vŷ Silas mré vēnh kar jyvēn mū gé. Topē vī tó tī ag vē. Hā kŷ ag tóg ag jyvēn tŷ hēn ri ke han mū. Ag fe tŷ ag tóg tar' he mū.

³³ Tá ag tóg semana tŷ hēn ri ke han mū. Kŷ Jesus mré ke ag tóg ag mŷ: "ha jatun mŷ mū jēg," he mū, ag tŷ Jerusalém ra vŷnvŷn ke jé, ũ tŷ ājag jēgnēg mū ěn to.

³⁴ Hā ra tóg Silas mŷ há nī, kŷ tóg tá nī nī sir, tī tŷ tóg nī sir.

³⁵ Kŷ Paulo tóg Barnabé mré Antioquia tá nīnī. Topē vī tŷ ag tóg ag kanhrán mū, kāmén kŷ. Hā ra ũ tŷ hēn ri ke ag tóg ag ri kén Topē vī tó mū gé.

Paulo tŷ ā pir mŷ tīg, Barnabé tŷ ā pir mŷ tīg

³⁶ Si há tŷ ra Paulo tóg Barnabé mŷ: "mū nŷ, ěg tŷ ěmā ěn kar mī mū mán jé, ěg tŷ Jesus vī tó ja tá," he mū. "Isŷ Jesus mré ke ag venh há tóg tī. Ag mŷ hēn ri ke mūn mū há han mū vŷ? he sóg tī," he tóg, Paulo ti, Barnabé mŷ.

³⁷ Kŷ Barnabé tóg João Marcos pére tīg sór mū.

³⁸ Hā ra Paulo mŷ tóg kórég nī, Marcos tŷ ag ré kŷ tīg ja nīn kŷ, ga tŷ Panfília tá. "Ū tŷ ěg mré Topē rānhrāj han ja tŷ ěn pére sóg tīg mán ke tŷ nī ha," he tóg, Paulo ti.

³⁹ Hā to ag tóg jagnē to jŷgŷ mū. Kŷ ag tóg vēnh kăpugpón kŷ mū mū. Kŷ Barnabé tóg Marcos mré goj vāso tŷ Chipre ra tī mū, canoa mág kāmī.

⁴⁰ Jó Paulo tóg Silas kuprēg mū, ti tŷ ti mré tīg jé. Kŷ tóg tī mū sir. Jesus mré ke ag tóg Paulo to Topē mré vī mū, ti tŷ ti jy nŷgān jé.

⁴¹ Kŷ ag tóg ga tŷ Síria mī pa mū, ga tŷ Cilícia mī ke gé. Jesus ki ge mū kar jyvēn tóg mū, ā tīg kŷ, Paulo ti.

16

Timóteo tŷ Paulo mré tīg

¹ Kŷ Paulo ag tóg cidade tŷ Derbe tá junjun mū, cidade tŷ Listra tá ke gé. Kŷ tá ũ tóg nī nī, Jesus mré tī ũ, ti jyy hā vŷ: Timóteo, he mū. Ti mŷnh fi ne tóg tŷ Israel nī', hā ra fi tóg Jesus ki rā ja nŷgtī. Ti panh tóg tŷ fóg tŷ Grego nī, Timóteo panh ti.

² Ti to ag tóg vī há han mū, Jesus mré ka ag, Listra tá ke ag, Icônio tá ke ag ke gé, Timóteo to.

³ Kŷ Paulo tóg ti pére tīg sór mū, kŷ tóg ti gré junun fár kym mū, Israel ag tugrīn. Vēnh kar tóg ti panh tŷ tŷ fóg tŷ Grego nī ki kanhró nŷtī, hā kŷ tóg ti fár

kym ja tū nī. Hã ra ag tỹ ra mũnh ke tá ag tóg e nỹtĩ, Israel ag, hã kỹ Paulo tóg ti fár kym mũ sir.

⁴ Kỹ ag tóg cidade ẽn mũ mũ mũ. Kỹ ag tóg ag mỹ Jesus tỹ ùn vin mũ ag tỹ rá kãmén mũ sir, kófa ag tỹ Jerusalém tá nèn rán ja ti, Jesus mré ke ag mỹ. Ag tỹ nèn ki króm ke hã tỹ ag tóg ag mỹ kãmén mũ.

⁵ Hã kỹ Jesus ki ge mũ ag tóg tar nỹtĩ sir, Jesus jykren ki. Vẽnh mãn ag tóg tĩ, ag tỹ Topê vĩ mẽ jé. E ag tóg nĩgtĩ sir, komêr hã.

Paulo tỹ nèn nẽ vég mũ

⁶ Kỹ Paulo ag tóg ga tỹ Frigia mũ pa mũ, ga tỹ Galácia mũ ke gé. Kỹ ag tóg ga tỹ Asia tá Topê vĩ tó sór mũ, hã ra Topê kuprĩg tóg ag mỹn nenh mũ.

⁷ Kỹ ag tóg ga tỹ Mísia tá junjun mũ. Kỹ ag tóg ga tỹ Bitinia ra mũ sór mũ, hã ra Topê kuprĩg tóg ag mỹn nenh mũ gé.

⁸ Kỹ ag tóg Mísia jy mũ kỹ cidade tỹ Tròade tá junjun mũ.

⁹ Kỹ kutyg kỹ Paulo tóg nèn nẽ vég mũ. Ga tỹ Macedônia tá ke vég tóg mũ, ti vẽnhpéti ki. Kỹ tóg ti jo jẽ nĩ. Kỹ tóg ti mỹ: “Macedônia to kãtĩg, ẽg kanhrãn jé,” he mũ ti mỹ, ga tỹ Macedônia tá ke ẽn ti. Kỹ Paulo tóg rĩr mũ sir.

¹⁰ Paulo tỹ nèn nẽ ẽn ve kar kỹ ẽg tóg vėsỹmêr Macedônia ra mũ sór mũ sir. “Jesus hỹn ẽg mỹ: ha mũ jẽg, hé,” he ẽg tóg. “Ag mỹ inh vin tó, he ti hỹn, Jesus ti,” he ẽg tóg, Paulo tỹ nèn nẽ ẽn ve kỹ.

¹¹ Kỹ ẽg tóg cidade tỹ Tròade ki pa mũ. Vėsỹmêr ẽg tóg goj vãso tỹ Samotrácia ra mũ mũ. Tỹ vaj kỹ ẽg tóg cidade tỹ Neápolis ra mũ mũ.

¹² Tá pa kỹ ẽg tóg cidade tỹ Filipos ra mũ mũ. Ga tỹ Macedônia ki cidade ve vẽ. Ẽg tỹ tá junjun vén jan hã vẽ. Fóg tỹ Romano ag jamã ù vẽ. Tá ẽg tóg kurã e sĩ ki nỹtĩ nĩ.

Lídia fi tỹ Jesus ki rã

¹³ Vẽn hãn ke kurã ki ẽg tóg cidade to ró mãra mũ mũ, goj ra. “Tãn hỹn Topê mré vĩ jafã nĩ,” he ẽg tóg. Tá ẽg tóg nĩgnĩ mũ sir. Ûn tãtã fag tóg tá nỹtĩ nĩ, kỹ ẽg tóg fag mré vĩ mũ.

¹⁴ Tá ù fi tóg nĩ nĩ, fi jiji hã vỹ: Lídia, he mũ. Negociar he fi nĩ. Kur kósóg tỹ fi tóg negociar he nĩ. Tỹ fi cidade tỹ Tiatira tá ke nĩ. Topê kamêg fi tóg tĩ. Ẽn fi vỹ Paulo vĩ mẽg mũ sir. Kỹ Topê tóg fi mỹ krĩ há nĩm mũ, kỹ fi tóg Paulo vĩ jẽmẽ há han mũ.

¹⁵ Kỹ ẽg tóg fi kypég mũ, fi mré ke kar mré hã. Kỹ fi tóg ẽg mỹ: “isỹ Jesus ki rã kỹ jẽ ve ãjag (mỹr),” he mũ. “Ti tỹ ãjag mỹ gen kỹ inh ìn ki gemnĩ,” he fi tóg. “Tã inh mré nỹtĩmĩ,” he fi tóg. Vĩ ki fi tóg ẽg kutãn mũ. Kỹ ẽg tóg ke mũ.

Paulo ag tỹ Filipos tá se kỹ nỹtĩ

¹⁶ Ẽg tỹ kejẽn Topê mré vĩ jafã ra mũ mãn kỹ ù fi tóg ẽg kato tẽ mũ. Û camarada fi vẽ. Hã ra fi tóg jagrẽ kórég nĩ, kỹ fi jagrẽ tóg vẽn hãn kar mỹ ag tỹ nèn venh ke tó tĩ. Fi patrão ag tóg fi tugnĩn jãnkamy mág vég tĩ, fi tỹ jãnkamy to vẽn hãn kar mỹ ag tỹ nèn venh ke tòn kỹ.

¹⁷ Ẽn fi vỹ Paulo nòn tĩ mũ, ẽg nòn, kỹ fi tóg jamã hár(a) prêr mũ, kỹ fi tóg: “Topê pẽ camarada ag vẽ (mỹr),” he mũ. “Vẽn hãn kar kãfór camarada ag vẽ mỹr. Ag hã ne tóg ãjag mỹ vẽn hãn vĩ tó tĩ, ãjag tỹ to krenkren jé!,” he fi tóg ẽg to.

¹⁸ Kurã tỹ hẽn ri ke han fi tóg, vĩ tỹ ge han kỹ. Kỹ tóg Paulo mỹ tỹ ù nỹ, kỹ tóg kyrã kỹ fi jagrẽ mỹ: “Jesus Cristo jykre tỹ sóg ã mỹ tó mũ, ã tỹ fi tovãnh jé,” he mũ. Kỹ tóg vėsỹmêr fi tovãnh mũ sir, fi jagrẽ kórég ẽn ti.

¹⁹ Hā ra fi patrāo ag mǝ tóg tǝ ũ nǝ, ag tǝ fi tugrĭn ganho ve mǎn tũ nĭn kǝ. Kǝ ag tóg Paulo ség mũ, Silas ke gé. Pǎ'i ag mǝ ag tóg ag ven mũ, cidade kaju ki.

²⁰ Pǎ'i ag mǝ ag ven kǝ ag tóg: "Israel tag ag ve ra ha," he mũ. "Vĕnh kar jũgũ han ag tóg mũ nĭ (mǝr), ěg jamā tag mĭ," he ag tóg.

²¹ "Vĕnh jykre vĕnhmǝ tó ag tóg mũ (mǝr), ěg tǝ nĕn han ke tũ tó ag tóg mũ (mǝr). Tǝ ěg tóg Romano nǝtĭ, kǝ ag jykre tóg ěg mǝ tǝ ũ nǝ," he ag tóg.

²² Povo ěn kar tóg ag to kórég nǝtĭ, kǝ ag tóg ag kato vĭ mũ.

Kǝ pǎ'i ag tóg polĭcia ag mǝ: "ag kur nũ ra," he mũ. "Ag mrǎnmrǎn ra," he ag tóg mũ gé.

²³ Ag mrǎnmrǎn tǝ ěn ri ke han ag tóg mũ, ka tég tǝ. Kar ag tóg vĕse ja kǎki ag vǎm mũ. Vĕse ja ki rĭr tĭ mǝ ag tóg: "ag nĭgǝnh há han nĭ, ag tǝ kǎpa tũ nĭ jé," he mũ.

²⁴ Ag tǝ ti mǝ tag tó to tóg vĕse ja kaju tá ag vǎm mũ, vĕse ja mág ěn kaju tá. Ka tǝ tóg ag sigség mũ sir.

²⁵ Meia noite ki Paulo tóg Silas mré Topĕ mré vĭ mũ. Ti mǝ ag tóg jǎnjǎn mũ, Topĕ mǝ. Kǝ vĕse ag kar vǝ jĕmĕg mũ sir.

²⁶ Kǝ vǎhā ga tóg jũrũn ke mũ. Vĕse ja krĕm tóg jũrũn ke mũ. Kǝ vĕsǝmĕr jǎnkā kar vǝ nognor kǎn tĭ mũ, rómrom kǎn tóg mũ. Kǝ vĕse ag kar ěn ferro tóg kygvar kǎn mũ, ag se ja ti.

²⁷ Kǝ tóg vĕse ja ki rĭr tĭ nũnmǎn mũ gé. hā ra vĕse ja jǎnkā kar tóg nognor kǝ nǝtĭ nĭ, rómrom kǝ tóg nǝtĭ nĭ. Kǝ ũ tǝ ag ki rĭr tĭ ěn tóg ā kyfĕ tég, ā rógro ěn kunũnh kǝ tóg vĕnh kusón sór mũ. "Vĕse kar ag ĥĭn vĕnh pigju kǎn," he tóg. Hā kǝ tóg vĕnh kusón sór mũ.

²⁸ Hā ra Paulo tóg jamā hár(a): "ker vĕnh vóg kónǎn ěĕ," he mũ. "Ĕg kar vǝ ki nǝtĭ," he tóg.

²⁹ Kǝ tóg néj gru to vĭ mũ, ũ tǝ ag ki rĭr tĭ ěn ti. Kǝ tóg Paulo ag se ja kǎra vĕnhvǎg rǎ mũ, jũrũn ke kǝ. Paulo jo tóg mũg ke mũ, Silas jo ke gé, ag tǝ ti mǝ ti kǎfór nǝtĭn kǝ.

³⁰ Ag gé(g) tóg tĭ mũ, vĕse ja kátá kǎkutĕ kǝ, kǝ tóg ag mǝ: "inh ĥĭn ěĕ ri kĕnh mũ vǝ?" he mũ. "Topĕ vĭ mranh sóg, hā ra tóg ti tǝ inh kren han há tĭ," he tóg, ũ tǝ vĕse ja ki rĭr tĭ ěn ti.

³¹ Kǝ ag tóg ti mǝ: "Jesus Cristo ki rǎ ge," he mũ. "Kǝ ā tóg kren mũ, ā mré ke kar ag mré hā," he ag tóg ti mǝ, Paulo ag.

³² Kǝ ag tóg ti mǝ Jesus vĭ kǎmĕn mũ, ti mré nǝtĭ ag mǝ ke gé.

³³ Kǝ tóg ag ki rĭr mũ vĕsǝmĕr, kuty ke nǝ ra. Ag tǝ ag mrǎnmrǎn ja ěn kupég tóg mũ ag mǝ. Kǝ ag tóg vĕnh kaja jé ti kypég mũ gé, ti mré nǝtĭ ag mré, ag tǝ Jesus ki ge kǝ.

³⁴ Kǝ tóg ā ĭn ra ag tatĭn tĭ mũ. Ag jĕn tóg mũ. Ti fe tóg mrin ke mũ sir, ti tǝ Jesus ki rǎ kǝ. Ti mré nǝtĭ ag kar mǝ tóg sér tĭ gé sir, ũ tǝ vĕse ja ki rĭr tĭ ěn mré ke fag mǝ.

³⁵ Tǝ vaj kǝ pǎ'i ag tóg polĭcia ag jĕgnĕg mũ, ũ tǝ vĕse ja ki rĭr tĭ ěn mǝ. "Ĕn ag mǝ: ha mũ jĕg, ěmni," he ag tóg ti mǝ.

³⁶ Kǝ ũ tǝ vĕse ja ki rĭr tĭ ěn tóg Paulo mǝ ke mũ. "Pǎ'i ag vǝ inh mǝ vĕnh vĭ jĕnĕ, isǝ ājag mǝ: ha mũ jĕg, he jé. Hā kǝ jatun mǝ mũ jĕg," he tóg, Paulo ag mǝ.

³⁷ Kǝ Paulo tóg ti mǝ: "hā ra ag tóg vĕnh ó to ěg mrǎnmrǎn ja nĭ," he mũ. "Vĕnh kar vǝ ag tǝ ěg mrǎnmrǎn ve kǎn. Hā ra ag tóg ěg ki jĕmĕ ja tũ nĭ, ěg

jjvën ja tũ ag nĩ gé. Tỹ ěg Romano nỹtĩ, hã ra ag tóg vëse ja kãki ěg vãm. Jó ag tóg vënh kar vatánh tá ěg mỹ: ha mũ jëg, he sór mũ. Mũnh ke tũ ěg nĩ. Ag hã tóg kãmũnh mũ, pã'i ag. Ěg tatĩ ag tóg mũnh mũ. Kỹ ěg mũnh mũ ha," he tóg, Paulo ti.

³⁸ Kỹ polícia ag tóg pã'i ag mỹ tag tó mũ sir, kỹ tóg ag mỹ e tĩ. Ag tỹ Romano ù vóg kónãn ke tũ vë vë, hã kỹ ag fe tóg jürũn ke mũ, pã'i ag.

³⁹ "Ěg mỹ vënh pãte fón nĩ, ěg tỹ ãjag se ja ti," he ag tóg mũ. Kỹ ag tóg ag tatĩ mũ mũ. "Ájag tỹ ěg jamã ki pa kỹ tóg há tí," he ag tóg mũ sir ag mỹ.

⁴⁰ Ag tỹ vëse ja ki pa kỹ ag tóg Lídia fi Ìn ra mũ mũ sir. Jesus mré ke ag vég ag tóg mũ. Kỹ ag tóg ag jjvën mũ. Kỹ ag tóg cidade ěn ki pa mũ sir.

17

Cidade tỹ Tessalônica tá

¹ Kỹ ag tóg cidade tỹ Anfipolis mũ pa mũ, cidade tỹ Apolônica mũ ke gé. Kỹ ag tóg cidade tỹ Tessalônica tá junjun mũ. Tá Israel tỹ vënh kanhrãn jafã tóg nĩ.

² Kỹ Paulo tóg ã tỹ nén han tĩ ěn han mũ sir. Israel tỹ vënh kanhrãn jafã kãra tóg rã mũ. Ag mré tóg vĩ mũ, vënh kãn ke kurã tãgtũ ki. Topë vĩ tó tóg mũ sir ag mỹ, Paulo ti, vãsỹ rán kỹ nĩ ěn ti.

³ Ag mỹ tóg Cristo kãmén mũ, ti jagtar ti, ti ter kar rĩr mãn ja ěn ti. "Jesus hã vë, hã vỹ: Cristo, he mũ," he tóg. "Cristo tóg vãsỹ rán kỹ nĩ, ti jagtar ke ti, ti rĩr mãn ke ti ke gé, hã vỹ: Jesus, he mũ," he tóg, Paulo ti.

⁴ Kỹ tóg ù ag mỹ ge nĩ, Israel kãmĩ ù ag mỹ. Kỹ ag tóg Paulo mré mũgtĩ, Silas mré ke gé. Kỹ fóg tỹ Grego he mũ tỹ hën ri ke ag tóg to há nỹtĩ gé sir, ù tỹ Topë kamëg mũ ag, ùn tãtã há fag ke gé.

⁵ Hã ra Israel ù ag mỹ tóg tỹ ù nỹ. Hã kỹ ag tóg ùn kórég ag mỹ: "kãmũ jëg ra," he mũ, ùn rãnrãj vãnħ ag mỹ. Vënh génh kỹ ag tóg vënh kar jũgũ han mũ. Kỹ ag tóg Jasão he mũ ěn Ìn jy nỹtĩ nĩ sir. Paulo ag kanëg ag tóg mũ, ag jãvãnħ kỹ, ag tỹ vënh kar jũgũ ěn ag mỹ ag ven jé.

⁶ Hã ra ag tóg ag vég tũ nĩ, Paulo ag. Kỹ ag tóg Jasão pére mũ mũ, Jesus mré ke ù ag mré ke gé. Pã'i ag mỹ ag tóg ag vìn mũ. Kỹ ag tóg jamã hár(a) prër mũ. "Û tỹ mundo kar ki vënh kar jũgũ han mũ ag tóg tag ki junjun mũ (mỹr)," he ag tóg mũ.

⁷ "Jasão tóg ag mỹ: kãge jëg ra, hé. Hã ra ag kar tóg pã'i mág tỹ imperador vĩ mranh ja tĩgtĩ. "Vyr mỹ ěg pã'i mág nĩ, hã vỹ: Jesus, he mũ," he ag tóg. "Kỹ ěg pi(jé) imperador krëm nỹtĩgtĩ," he ag tóg, Paulo ag," he ag tóg mũ. Ag tỹ Paulo to ón hã vë, pã'i ag mỹ.

⁸ Kỹ ù tỹ mëg mũ ag vỹ fe ù nỹtĩ sir, cidade ěn tá pã'i ù ag, cidade ěn tá ke kar ag ke gé.

⁹ Kỹ pã'i ag tóg Jasão ag mỹ: "ěg mỹ jãnkamy nĩm ké, ěg tỹ to ve jé, ãjag tỹ imperador kato tênh ke tũ ti," he ag tóg. Ag tỹ ag mỹ nĩm kar kỹ ag tóg: "ha mũ jëg (ge)," he mũ sir.

Cidade tỹ Beréia tá

¹⁰ Kutỹ ěn kã Jesus mré ke ag tóg Paulo mỹ: "ha tĩg, cidade tỹ Beréia ra," he mũ. Silas mỹ ag tóg ke mũ gé. Kỹ ag tóg mũ mũ.

Ag tỹ Beréia tá junjun kỹ ag tóg Israel tỹ vënh kanhrãn jafã kãra ge mũ, ag mỹ Topë vĩ tó jé.

11 Beréia tá ke ag tóg jykre há nýtī. Ag pi(jé) Tessalônica tá ke ag ri ke nýtī'. Kŷ ag tóg Paulo ag vī kri fig mū. Ag mŷ tóg há tī sir. Kurā kar ki ag tóg Topē vī ki estudar he mū, ag tŷ to: "ki hā tóg tó tī," hen kŷ.

12 Kŷ ū tŷ hēn ri ke ag tóg Jesus ki ge mū, fóg tŷ Grego ag mré hā, ūn tátā há fag mré hā.

13 Kŷ Israel ag tóg mēg mū, cidade tŷ Tessalônica tá. Paulo tŷ Beréia tá Topē vī tó mū mēg ag tóg mū sir. Kŷ ag tóg Beréia tá junjun mū, ag tŷ tá vēnh kar jūgŷū han jé.

14 Kŷ Jesus mré ke ag tóg Paulo mŷ: "ha tīg, canoa mág kāmī," he mū. Hā ra Silas vŷ tī tū nī, Timóteo ke gé. Beréia tá ag nýtī.

15 Kŷ ū ag tóg Paulo mré mū mū. Cidade tŷ Atenas ra ag tóg ti pére mū mū. Ag tŷ tá vŷnvŷn kenh ken kŷ Paulo tóg ag mŷ ke mū, ag tŷ Silas jé prēr jé, ag tŷ Timóteo jé prēr jé ke gé, ag tŷ vēsŷmér cidade tŷ Atenas kukām kāmū jé.

Cidade tŷ Atenas tá

16 Kŷ Paulo tóg Atenas tá nī nī, Silas jāvānh kŷ, Timóteo jāvānh kŷ ke gé. Hā ra tóg sir krī ū nī, ti tŷ tá vēnh kăgrá tŷ hēn ri ke ven kŷ, ti tŷ ag tŷ to jān jāfā ěn ven kŷ.

17 Kŷ tóg Israel tŷ vēnh kanhrān jāfā ki Israel ag mré vī mū, fóg tŷ Israel jykre han mū ag mré ke gé. Kurā kar ki tóg cidade kuju tá vēnh kar mré vī mū gé sir, ū tŷ tá nýtī ag mré.

18 Kŷ ū ag tóg ti mré vī mū, ū tŷ Epicuro tŷ nén rán ja to jykrén mū ag, ū tŷ Estóico he mū ag tŷ nén rán ja to jykrén mū ag ke gé. Kŷ ag tóg ti to: "vī mā pē tóg nī, vī kamē tóg nī," he mū. "Tī hŷn tóg ne tó'?" he ag tóg. Kŷ ū ag tóg ti to: "topē ū tugtó ti hŷn, kór há tá topē," he mū. Hā ra Paulo tóg Jesus tŷ vēme sér tó mū. Jesus rŷr mǎn tó tóg mū, Paulo ti.

19 Kŷ ag tóg sór tŷ Areópago ra ti pére mū mū. Tá pǎ'i ag tóg ag jyvēn tī, sór tŷ Areópago tá. Kŷ pǎ'i ag tóg ti mŷ: "ā tŷ vēnh jykre tag tó mū kāmén há han ra ěg mŷ," he mū, ti mŷ.

20 "(Ge) mē ja tū ěg nýtī, ā tŷ ěg mŷ tó mū tag ti. Kŷ ěg mŷ kāmén há han nī," he ag tóg, pǎ'i ag.

21 Hā ra Atenas tá ke ag tóg vēnh vī tǎg mē to há nýtī, cidade ū tá kāmū kŷ tá nýtī ag ke gé. Ag tŷ vēnh vī tǎg mē kŷ ag fe tóg mrin ke tī.

22 Kŷ Paulo tóg sór tŷ Areópago kri jē kŷ ag mŷ: "Atenas tá ke'," he mū. "Topē tŷ hēn ri ke kamēg ājag tóg tī (mŷr). Tag ve sóg," he tóg.

23 "Ājag jamā mī sóg tī, kŷ sóg ājag tŷ topē jo ĩn kāsir kar vigvé. Kŷ sóg topē jo ĩn sī ū vé, kŷ tóg to rán kŷ nī, hā vŷ: ěg tŷ topē ki kagtīg jo ĩn, he mū, ti rá ti. Topē ěn tó sóg tī, ājag tŷ Topē ki kagtīg ěn. Ājag tŷ ti ki kagtīg nī ra ājag tóg ti mŷ nén ū kugprún tī," he tóg.

24 "Topē ěn vŷ mundo kar han, mī mū kar ke gé. Kanhkā tǎn vē mŷr, kŷ tóg tŷ ga to pǎ'i nī gé. Hā kŷ tóg ěg tŷ ti jo ĩn han krēm nī tū nġtī (mŷr)," he tóg.

25 "Kŷ ěg tóg ti ki rŷr ke tū nī gé, ti jagtar tū nġn kŷ. Vēnh kar rŷn tóg nġtī (mŷr), Topē ti, kŷ tóg vēnh kar tŷ hāmham ke han tī. Vēnh kar tŷ nén precisar he kar nġm tóg tī (mŷr)," he tóg.

26 "Kŷ tóg vēnh kyvénh pir tŷ ěprā ke kar hyn han, nação kar (mŷr), ga kar mī mū mū ag (mŷr). Tŷ ěg vēnh kyvénh pir nýtī. Kŷ tóg ěg mŷ ěg mur kurā nġm mū gé, ěg ter kurā ti ke gé. ěg mŷ tóg ěg jamā nġm mū gé, Topē ti," he tóg.

27 "Vēnh kar hyn han tóg, Topē ti, ěg tŷ ti to há nġn jé, ěg tŷ ti ki kanhró nýtī jé. Kór gy tū ti nī, ti pi(jé) kuvar gy nġ'. Kakó ti nī, Topē ti," he tóg.

28 “Ti t̄y ẽg han v̄e m̄ȳr, h̄a k̄y ẽg tóg r̄ĩnr̄ĩr n̄ȳt̄ĩ n̄ĩ, ti tugr̄ĩn. Ti tugn̄ĩn ẽg tóg m̄ũgt̄ĩ (m̄ȳr), k̄y ẽg tóg ti tugr̄ĩn n̄ȳt̄ĩ gé (m̄ȳr), Topẽ tugr̄ĩn. H̄a k̄y ̄ajag k̄am̄ĩ v̄ẽnhr̄an t̄ĩ ag tóg tó ja n̄ĩgt̄ĩ gé, k̄y ag tóg: t̄y ẽg Topẽ kr̄ẽ n̄ȳt̄ĩ, he ja n̄ĩgt̄ĩ.

29 Ẽg t̄y t̄y ti kr̄ẽ n̄ȳt̄ĩn k̄y ẽg tóg ti ki kanhró n̄ȳt̄ĩ gé. Ouro ri ke tũ ti n̄ĩ, Topẽ ti. Ti pi(jé) prata ri ke n̄ĩ'. Ti pi(jé) pó ri ke n̄ĩ'. Ti pi(jé) t̄y v̄ẽnh k̄aggrá n̄ĩ', retrato ke gé, ti s̄ĩnv̄ĩ ra. Ẽpr̄a ke t̄y n̄én to jykr̄én m̄ũ ri ke tũ ti n̄ĩ, ẽg t̄y n̄én han m̄ũ ri ke tũ ti n̄ĩ. Topẽ v̄e (m̄ȳr), Topẽ,” he tóg, Paulo ti.

30 “H̄a ra Topẽ tóg ẽg to fe mág m̄ũ, ẽg t̄y ti ki kagt̄ĩg n̄ȳt̄ĩn k̄y. H̄a k̄y tóg v̄ah̄a v̄ẽnh kar m̄ȳ v̄ẽnh v̄ĩ j̄ẽnẽg m̄ũ, ẽg t̄y ẽg jykre tov̄anh jé.

31 Kur̄a n̄ĩm tóg huri, k̄y tóg kur̄a ẽn ki ẽpr̄a ke jykre kar tugn̄ȳm ke m̄ũ. Kur̄a ẽn ki tóg v̄ẽnh jykre kuryj han ke m̄ũ inhh̄a, Topẽ ti, ti t̄y ẽg jykre tugn̄ȳm ke m̄ũn k̄y. Ẽn pir kupr̄ẽg tóg, ti t̄y ti jagfy ẽg kar jykre tugn̄ȳm jé. Ẽn tóg ter ja n̄ĩ, h̄a ra Topẽ tóg ti ter k̄y ti r̄ĩn m̄an ja n̄ĩ, ẽg t̄y ti ki kanhró n̄ȳt̄ĩ jé, ù t̄y Topẽ jagfy ẽg jykre tugn̄ȳm ke ti,” he tóg, Paulo ti.

32 Ti t̄y ag m̄ȳ ti ter kar r̄ĩr m̄an tón k̄y ù ag tóg to é he m̄ũ. Jó ù ag tóg: “kur̄a ù k̄a ẽg h̄en ri ke m̄ũn ̄a v̄ĩ m̄ẽ m̄an sór m̄ũ,” he m̄ũ.

33 H̄a k̄y Paulo tóg t̄ĩ m̄ũ, ag ré k̄y.

34 K̄y ù ag tóg ti nón m̄ũ m̄ũ, k̄y ag tóg Jesus ki ge m̄ũ sir. Ag k̄a ù v̄y t̄y Dionísio n̄ĩ. Areópago tá ag jyv̄en t̄ĩ ag k̄a ù v̄e, Dionísio ti. K̄y ù fi tóg Jesus ki r̄a m̄ũ gé. Fi jyjy h̄a v̄y: Damáris, he m̄ũ. K̄y ù ag v̄y ti ki ge m̄ũ gé sir.

18

Cidade t̄y Corinto tá

1 K̄y Paulo tóg cidade t̄y Atenas ki kutẽ k̄y cidade t̄y Corinto ra t̄ĩ m̄ũ.

2 Tá Israel ù tóg n̄ĩ n̄ĩ, ti jiji h̄a v̄y: Áquila, he m̄ũ. Ponto tá ke v̄e. Ẽri tóg ga t̄y Itália tá k̄at̄ĩg ja n̄ĩ, ̄a pr̄ũ fi mré. Fi jyjy h̄a v̄y: Priscila, he m̄ũ. Pã'i mág t̄y imperador t̄y Cláudio he m̄ũ tóg Israel kar ag m̄ȳ: “cidade t̄y Roma ki pa j̄ẽg,” he ja n̄ĩgt̄ĩ. H̄a k̄y fag tóg cidade t̄y Corinto tá junjun ja n̄ĩgt̄ĩ.

3 K̄y Paulo tóg fag mré n̄ĩ n̄ĩ sir. Fag mré tóg r̄ãnr̄aj m̄ũ sir. H̄a ra fag tóg kur t̄y ìn han m̄ũgt̄ĩ, Paulo kóm. Fag r̄ãnr̄aj h̄a v̄e. H̄a k̄y Paulo tóg fag mré r̄ãnr̄aj m̄ũ sir, ti t̄y fag mré n̄ĩn k̄y.

4 K̄y tóg v̄ẽnhk̄an ke kur̄a kar ki ag m̄ȳ Topẽ v̄ĩ tó m̄ũ, Israel t̄y v̄ẽnh kanhr̄an jaf̄a kr̄ẽm, Israel ag t̄y ti v̄ĩ kri fi jé, fóg t̄y Grego ag ke gé.

5 K̄y Silas v̄y Macedônia tá k̄at̄ĩ m̄ũ, Timóteo ke gé. K̄y Paulo tóg Topẽ v̄ĩ tó t̄ãv̄ĩ n̄ĩ n̄ĩ, ìn t̄y kur han m̄an tũ tóg n̄ĩ. Israel ag m̄ȳ tóg Jesus k̄ãmén m̄ũ, ti t̄y t̄y Cristo n̄ĩ ti.

6 H̄a ra ag tóg ti kato v̄ĩ m̄ũ. K̄y ag tóg Jesus to é he m̄ũ. K̄y Paulo tóg ̄a kur r̄ũmr̄ũm m̄ũ, ag m̄ȳ: “v̄ẽnh h̄a ki ̄ajag tóg v̄ãgfor kenh m̄ũ, n̄ũgme ki v̄ar k̄y, inferno ki,” he jé. “̄Ajag m̄ȳ sóg tó, Jesus ti, h̄a ra ̄ajag tóg m̄ẽ j̄ãv̄anh n̄ȳt̄ĩ. K̄y ̄ajag t̄y v̄ẽsóg ki v̄ẽs̄yr̄eh̄n ke v̄e. Ình h̄a tóg fóg ag kar m̄ȳ tónh t̄ĩg ha, kanhgág ag kar m̄ȳ ke gé,” he tóg m̄ũ, Paulo ti.

7 H̄a k̄y tóg tá kutẽ k̄y fóg ìn k̄ara r̄ã m̄ũ, ti jiji h̄a v̄y: Tício Justo, he m̄ũ. Topẽ kam̄ẽg ti t̄ĩ. Ti ìn v̄y Israel t̄y v̄ẽnh kanhr̄an jaf̄a r̄ã j̄ẽ gé. K̄y Paulo tóg ti ìn k̄ara r̄ã m̄ũ sir.

8 H̄a ra Israel t̄y v̄ẽnh kanhr̄an jaf̄a to pã'i v̄y Jesus ki r̄ã m̄ũ, ti jyjy h̄a v̄y: Crispo, he m̄ũ. Ti mré ke kar v̄y Jesus ki ge m̄ũ gé, Corinto tá ke t̄y h̄en ri ke ag ke gé, ag t̄y Paulo v̄ĩ m̄ẽ k̄y. K̄y ag tóg kygpe k̄y n̄ȳt̄ĩ sir.

⁹ Kejēn Paulo tóg kuty kã nén nē vég mū. Topē tỳ ti mý vènh ven vè, kýt tóg ti mý: “kamēg tũg ra,” he mū. “Inh vī kāmén ra, ha mē kýt nī tũg,” he tóg.

¹⁰ “Ā mré sóg nīnh mū. Ũ pi(jé) ā vóg kónān mū,” he tóg. “Cidade tag ki ũ tỳ hēn ri ke ag výt tỳ isũ nýtīnh mū,” he tóg, Topē ti.

¹¹ Kýt Paulo tóg prýg pir kri kysã tỳ 6 ke ki tá nī nī. Ag mýt tóg Topē vī kāmén tī nī sir, tá.

¹² Kejēn ũ tỳ Gálio he mū tóg tỳ Romano tỳ governador nī, ga tỳ Grécia ki. Kýt Israel ag kar tóg Paulo kato vāsānsān mū. Kýt ag tóg ti kãgmī kýt pã'i mág mýt ti ven mū mū.

¹³ Kýt ag tóg governador mý: “tag tóg ěg jykre tỳ tũ' he sór mū!” he mū. “Vènh kar tóg ti vī tugnīn Topē to jānjān tī, vènh jykre tãg tỳ hã ra,” he ag tóg ti mý.

¹⁴ Kýt Paulo tóg vī sór mū, hã ra Gálio tóg Israel ag mý: “Israel,” he mū. “Tī tỳ nén ũ kórég han mū ra sóg ājag jagfy vī tī vè, ti tỳ crime han mū ra, Paulo tī,” he tóg.

¹⁵ “Hã ra ājag jykre to ājag tóg ti to jũ mū, ājag jiji to, ājag vènh rá to (mýr). Isũ pijé', ājag tũ tag tī'. Ājag hã ne tag to jykren ke mū inhhã'. Inh pi(jé) ājag tũ to jykren sór mū,” he tóg, Gálio tī, pã'i mág ěn tī.

¹⁶ Kýt tóg ag mý: “ha mū jěg,” he mū sir, vī tar han kýt.

¹⁷ Kýt tá nýtī ag tóg Sóstenes kãgmīg mū. Israel tỳ vènh kanhrān jafã to pã'i vè. Tī kãgmī kýt ag tóg ti mrānhrān mū, pã'i mág ěn ĩn tá, hã ra Gálio tóg ki ěmě sór tũ nī.

Paulo tỳ Antioquia ra vȳn ke

¹⁸ Kýt Paulo tóg tá nī sir, kurã tỳ hēn ri ke ki. Kýt tóg kejēn Jesus mré ke ag mý: “isĳg vě ha,” he mū. Kýt Áquila tóg ti mré tī mū, ti prũ tỳ Priscila fi mré hã. Ag tỳ ga tỳ Síria ra mūnh ke vě. Cidade tỳ Cencreía tá ag tóg canoa mág ki ge sór mū, va mū jé. To hã tóg věnh jãrég mū, Paulo tī, Topē mýt promessa han kýt.

¹⁹ Kýt ag kar tóg canoa mág kãki cidade tỳ Ēfeso ra mū mū. Hã ra Áquila fag výt tá nýtī, mū mǎn tũ fag nī sir.

Kýt Paulo tóg Israel tỳ věnh kanhrān jafã kãra rã mū, Israel ag mré vī jé.

²⁰ Ag tỳ ti vī mě kýt tá ke ag tóg ti mý: “ěg mré nī nī,” he mū.

Hã ra tóg ag mý: “hã ra sóg ver tĳg mū ha,” he mū.

²¹ “Kãnhmar sóg vȳn kenh ke mū hã ra, Topē tỳ inh vȳn kenh ke to há nīn kýt,” he tóg. Kýt tóg cidade tỳ Ēfeso tá kutě mū.

²² Kýt tóg cidade tỳ Cesaréia tá jun mū. Kýt tóg cidade tỳ Jerusalém ra tĳg kýt Jesus ki ge mū kar vĳvgěg mū, ũ tỳ Topē vī mě jé věnh mǎn tī ag. Kar kýt tóg cidade tỳ Antioquia ra tī mū.

²³ Tá tóg nī sī han mū. Kar kýt tóg tá kutě kýt ga tỳ Galácia mī kutě mū, ga tỳ Frĳgia mī ke gé. Jesus mré mū ag jȳvěn tóg mū sir, ag tỳ tar nýtī jé.

Apolo tỳ Topē vī tó

²⁴ Kejēn Israel ũ tóg cidade tỳ Ēfeso tá jun mū, ti jiji hã vȳ: Apolo, he mū. Cidade tỳ Alexandria tá tóg mur ja nī. Vī há ti nī. Topē vī tó tóg tī gé, vāsȳ rán kýt nī ěn to tóg tar nī.

²⁵ ěn tóg Jesus japry ki kanhró nī, Jesus jamīn ki. Mūměg vānh nīn kýt tóg Jesus vī tó tī mū, ti tỳ to krónh ke vānh nīn kýt. Hã ra tóg João tỳ ag kygpěg mū ěn hã ki kanhró nī. ěg tỳ Jesus jȳjy tó kýt kygpe kýt nī tag ki kagtĳg tóg nī ver.

26 Ēn tóg Israel tý vènh kanhrān jafā krēm ag kanhrān mū sir; ti tý mūmēg vānh nīn kŷ. Áquila fag tý ti vī mēg kŷ fag tóg ti mŷ: “ēg venh kātīg nī,” he mū. Kŷ fag tóg ti mŷ Topē japry kāmén kān mū, Topē jamīn ti.

27 Kar tóg ga tý Grécia ra tīg sór mū, Apolo ti. Kŷ Jesus mré ke ag tóg ti mŷ: “há ti nŷ, ha tīg ge,” he mū. Kŷ ag tóg Jesus mré mū ag mŷ vènh rá jēnēg mū, ag tý ti mŷ: “kārā ra,” hen jé. Tá jun kŷ tóg Jesus ki ge kŷ nŷtī ag jyvēn mū, kŷ ag tóg ti tý ag jyvēn to tar han kŷ nŷtī nī sir, Topē tý ūn jagāgtān mū ag.

28 Israel ag mré tóg vī tī, Apolo ti, vènh kar jo. Ag mŷ tóg Topē vī tó tī, vāsŷ rán kŷ nī ěn tī. Kŷ tóg ag mŷ Cristo kāmén mū sir. “Cristo vŷ tý Jesus nī,” he tóg mū ag mŷ, Apolo ti, ag mŷ Topē vī rá kāmén kŷ.

19

Paulo tý cidade tý Éfeso tá nī

1 Kŷ Apolo tóg cidade tý Corinto tá nī nī sir. Hā ra Paulo tóg cidade tý Éfeso tá jun mū. Ga ěn mī tóg tīg ja nīgtī, pānónh kri kyjer ěn mī. Kŷ tóg Éfeso tá jun mū sir.

2 Tá ū ag tóg Jesus ki ge ja nīgtī. Kŷ Paulo tóg ag mŷ: “ājag mŷ Topē kuprīg tý jagrē nŷtī’, ājag tý Jesus ki gen kā’?” he mū. Kŷ ag tóg ti mŷ: “kŷ ne nē ge, Topē kuprīg ti?” he mū, Paulo mŷ.

3 Kŷ Paulo tóg: “ājag tý kygpe kŷ ājag hē ri ké?” he mū. Kŷ ag tóg: “João tý ag kygpe ri ke ti nī, ěg kygpe ti,” he mū.

4 Kŷ Paulo tóg: “João tóg ag kygpe ja nīgtī, ag tý ājag jykre tovānh sór nŷtīn kŷ,” he mū. “Kŷ tóg vènh kar mŷ kāmén ja nī gé, ag tý ū tý ti nón kātī ěn ki ge jé, hā vŷ: Jesus, he mū,” he tóg, Paulo ti.

5 Ag tý tag mē kŷ ag tóg ti mŷ: “Jesus jiji tó kŷ ěg kygpe ge,” he mū.

6 Kŷ Paulo tóg ā nīgē tý ag mēg mū, kŷ Topē kuprīg tóg ag ki rā mū sir. Vènh vī ū han ag tóg mū sir. Kŷ ag tóg Topē vī tó mū gé.

7 Ū tý 12 ag hŷn, vènh vī ū han mū ěn ag.

8 Kŷ Paulo tóg Israel tý vènh kanhrān jafā kāra rā mū. Ti tý mūmēg vānh nīn kŷ tóg Topē tý tý ěg pā’i nī kāmén mū. Kysā tāgtū ki tóg ag mŷ kāmén mū, ag tý hēn ri ke mūn ti vī kri fi jé.

9 Hā ra ū ag tóg ti vī to fe ū nŷtī sir, ag tý kri fi jāvānh nŷtīn kŷ. Kŷ ag tóg to é hen kŷ ag tóg to vī kónān mū, vènh kar jo. Kŷ Paulo tóg ag mré vī mán tū nī sir. Jesus mré mū ag mŷ tóg: “vyr mŷ ěg nŷtī,” he mū. Kŷ tóg escola krēm ag kanhrān mū sir, kurā kar ki. Escola to professor ěn jiji hā vŷ: Tirano, he mū.

10 Prŷg régre ki tóg tá nī nī, gen kŷ, Paulo ti. Hā kŷ ga tý Ásia tá ke ag kar vŷ Jesus vī mēg mūgtī, Israel ag kar, fóg tý Grego he mū ag kar ke gé.

11 Kŷ Topē tóg Paulo mŷ vènh jykre nīm mū gé, kŷ tóg ěg tý nēn han vānh tý hēn ri ke hŷn han mū.

12 Kejēn ag tóg Paulo kur tý ūn kagyga ag mēgmēg mū, ag tý há’ he jé. Paulo tý kur mē kar kŷ ag tóg tý ūn kagyga ag mēgmēg mū. Kŷ ag tóg hághá’ he mū. Vènh jagrē kórég ag vŷ gen kŷ pa mū gé, ūn kaga ag tý ti kur mē kŷ.

Kujá ag

13 Kŷ Israel ag kujá ag vŷ tá nŷtī gé. Kujá ěn ag tóg ěmā kar kri rūm ke tī. Kejēn ag tóg ājag tý vènh jagrē kórég ven kŷ ag tóg Jesus jyty tó tī. Ōn kŷ ag tóg tó tī. Kŷ ag tóg ū mŷ: “Jesus jykre tý sóg ā kutēm ke mū, Paulo tý ūn kāmén tī

ēn jykre t̄y;” he m̄, ūn jagrē kórég m̄. Hā ra ag t̄y ón k̄y Jesus jiji tó v̄. Ti mré ke pijé’.

¹⁴ Ū t̄y ge tó m̄ ag v̄y t̄y Israel ag n̄t̄i. Topē tū ki r̄ir t̄i to pā’i mág krē ag v̄, k̄y ti jiji hā v̄y: Ceva, he m̄, ag panh jyy ti. Ū t̄y 7 ke ag v̄, ti krē ēn ag.

¹⁵ Ag t̄y ūn jagrē kórég m̄y Jesus jiji tó k̄y v̄enh jagrē kórég ēn tóg ag m̄y: “Jesus ki kanhró sóg n̄, Paulo mē inh huri ke gé, hā ra ājag tóg t̄y ū n̄t̄i?” he m̄ ag m̄y, kujá ag m̄y.

¹⁶ K̄y ūn jagrē kórég ēn tóg ag to h̄m he m̄. Ag kygrēg tóg m̄, hā ra ag tóg ti t̄y h̄ ri ke tū n̄. K̄y ag tóg kator k̄y rinfig m̄ sir, kygv̄enh k̄y.

¹⁷ K̄y Éfeso tá ke ag kar tóg m̄eg m̄, Israel kar, fóg t̄y Grego ag kar ke gé. K̄y ag tóg m̄m̄egm̄eg m̄ sir. K̄y Jesus Cristo jiji tóg ag m̄y tar n̄, ag m̄y tóg n̄n kar káfór n̄, Jesus Cristo jyy ti.

¹⁸ K̄y Jesus ki ge k̄y n̄t̄i ag tóg ājag jykre kórég tugtó m̄ sir, jagnē m̄y.

¹⁹ Ū ag tóg curandeiro tū han ja n̄gt̄i, kujá tū ke gé. K̄y ag tóg ājag v̄enh rán gé kām̄ m̄, curandeiro t̄y v̄enh rán ēn ti. K̄y ag tóg kuprūn kām̄ m̄ sir, v̄enh kar r̄inve. Ag t̄y ti kaja n̄kr̄en k̄y tóg kaja e ja n̄, jānkamy t̄y 50 mil h̄n.

²⁰ Hā k̄y Topē v̄i tóg sir v̄enh kar kri r̄um ke m̄. K̄y ū t̄y h̄n ri ke ag tóg kri fig m̄ sir.

Éfeso tá v̄enh génh

²¹ Kar k̄y Paulo tóg to jykren m̄. Ga t̄y Macedônia m̄i tóg kutē sór m̄, ga t̄y Grécia m̄, Jerusalém ra t̄ig jé. “Is̄y Jerusalém ra t̄ig kar k̄y sóg cidade t̄y Roma ra t̄ig sór m̄ gé,” he tóg, Paulo ti.

²² K̄y tóg ga t̄y Macedônia ra ūn régre ag j̄egn̄eg m̄, ti mré r̄ānr̄āj m̄ ag, hā v̄y: Timóteo mré Erasto, he m̄. Ti hā tóg hā ra ga t̄y Ásia tá n̄i n̄i ver, Paulo ti.

²³ Kej̄en v̄enh génh tóg kutē m̄, Jesus japry tugr̄in, ti jam̄in tugn̄in.

²⁴ Ū tóg Éfeso tá n̄i n̄i, ū t̄y prata t̄y ĩn s̄i k̄aggrá han m̄ ti, ū t̄y topē t̄y Diana he m̄ fi jo ĩn s̄i ēn k̄aggrá han m̄ ti, retrato ēn. Ū t̄y han m̄ jiji hā v̄y: Demétrio, he m̄. Ti camarada t̄y h̄n ri ke ag tóg v̄enh r̄ānr̄āj ēn ki n̄n há vég t̄i. Ag ganho v̄.

²⁵ K̄y tóg ā camarada ag jé pr̄er k̄an m̄, Demétrio ti. Ū t̄y ā ri kén r̄ānr̄āj m̄ ag jé pr̄er tóg m̄ gé. Ag v̄enh m̄an k̄y tóg ag m̄y: “ha vé,” he m̄. “V̄enh r̄ānr̄āj tag ki ěg tóg n̄n ū há vég m̄gt̄i, ěg ganho t̄i. Tag ki ěg há n̄t̄i,” he tóg.

²⁶ “Hā ra Paulo tag tóg cidade tag ki tóg ū t̄y h̄n ri ke kr̄in m̄ sir, ga t̄y Ásia m̄i ke gé. Ag m̄y tóg: “v̄enh n̄iḡe t̄y han ja pi(jé) t̄y Topē n̄i,” he t̄i. K̄y ag tóg ti v̄i kri fig m̄ sir. Tag vég ěg m̄ (m̄yr),” he tóg.

²⁷ “K̄y ěg t̄y n̄n tag tóg t̄i’ he sór m̄ sir ti tugr̄in, ěg ganho ti. Hā ra Diana fi jo ĩn tóg t̄y n̄n ū t̄i n̄i ke gé, ti s̄inv̄i n̄i ra. K̄y fi tóg t̄y n̄n ū t̄i n̄i gé sir, fi t̄y t̄y ūn mág n̄i ra. Ásia kar m̄i ag tóg fi to jānj̄ān t̄i, ga kar m̄i ke gé. Hā ra tóg fi t̄y t̄ig’ henh ha, Paulo ti, ti t̄y: “v̄enh k̄aggrá pi(jé) t̄y Topē n̄i, henh k̄y,” he tóg, Demétrio ti, ū t̄y fi jo ĩn s̄i han m̄ ēn ti.

²⁸ Ag t̄y tag mē k̄y ag fe tóg ḡym ke m̄ sir. K̄y ag tóg jamā hár(a) pr̄er k̄y: “!..topē t̄y Diana fi v̄y káfór ne..! !..T̄y fi Éfeso ag tū ne..!” he m̄ sir, pr̄enpr̄er k̄y.

²⁹ K̄y cidade ēn ki ag v̄enh génh v̄e sir, k̄y v̄enh kar tóg ĩn mág ēn ra pétē m̄, ĩn kri ĩn tū ēn ra. Gaio he m̄ ti pére ag tóg m̄ m̄, ti k̄agm̄i k̄y, Aristarco ke gé. Macedônia tá ke ag v̄. Ēn ag tóg Paulo mré kām̄ ja n̄gt̄i. Ēn ag kugm̄ig ag tóg m̄, ag t̄y ĩn mág ēn ra ag tat̄i m̄ jé.

³⁰ Kŷ Paulo tóg ra tīg sór mũ, ag mré vī jé, hã ra ù tỹ Jesus ki ge kŷ nỹtĩ ag tóg ti mỹ: “tĩ tũg ra,” he mũ.

³¹ Kŷ ga tỹ Ásia tá pã'i ag tóg ti mỹ vènh vī jènèg mũ gé, ti tỹ ĩn mág èn ra tĩ tũ nĩ jé. Tĩ to ag tóg há nỹtĩ, pã'i ag.

³² ĩn mág tá ag tóg vènh mãn kŷ nỹtĩ nĩ, ù tỹ hèn ri ke ag. Kŷ ù ag tóg nén ù tó tĩ, prènrèr kŷ, jó ù ag tóg nén ù tó tĩ, prènrèr kŷ. Kŷ vènh kar tóg vī vī he kãn mũ sir. Vènh mãn kŷ ag nỹtĩ, hã ra ag tóg: “èg tỹ hẽ ri ke jé vènh mãn nẽ hỹn'?” he mũ.

³³ Kŷ Israel ag tóg vènh kar mỹ ù ven mũ gé, Alexandre he mũ èn. Kŷ Alexandre tóg ã nĩgè tỹ ge mũ, ag tỹ katy' he jé. Kŷ tóg ag mỹ kãmén sór mũ.

³⁴ Kŷ ag tóg vég mũ sir, ti tỹ tỹ Israel nĩ ti, Alexandre ti. Hã ra ag tóg tỹ fóg nỹtĩ, tá vènh mãn kŷ nỹtĩ ag. Kŷ ag tóg Israel ag to jũgũ nỹtĩ nĩ. Ag tỹ ti tỹ tỹ Israel nĩ èn ven kŷ vènh kar tóg prèr pir han mũ, hã vỹ: “!..Éfeso tá ke fi tỹ vènh kar kãfór ne..! ..Diana he mũ fi vỹ vènh kar kãfór ne..!” he mũ, prènrèr kŷ. Hora rége han ag tóg mũ sir, ge nỹtĩ ki.

³⁵ Governo mỹ rán tĩ èn tóg há ra ag fe tỹ há' he mũ. Kar kŷ tóg ag mỹ: “Éfeso tá ke',” he mũ. “Vènh kar vỹ Diana fi ki kanhró nỹtĩ,” he tóg. “Éfeso tá èg tóg fi ki rĩr mũ. Fi kãggrá nẽji tóg kanhkã tá kãkutè ja nĩ. Vènh kar tóg tag ki kanhró nỹtĩ,” he tóg.

³⁶ “Û tóg tag kato vī tũ nĩgtĩ (mỹr),” he tóg. “Hã kŷ jatu ké. Krĩ rỹg tũg ra,” he tóg.

³⁷ “Tag ag tatĩ àjag tóg kãmũ ja nĩgtĩ, hã ra ag tóg topè fi jo ĩn tá nén ù péju ja tũ nĩgtĩ. Èg topè fi to ag tóg vī kónãn tũ nĩgtĩ (mỹr),” he tóg.

³⁸ “Demétrio mỹ ag kato vī sór ke mũ'?” he tóg. “Vènh kãggrá han mũ ag mỹ ti mré ag vī vãfã sór mũ'?” he tóg. “Kŷ kófa ag mỹ tómnĩ ge, vènh jyvèn ke kurã èn kã. Ag kato vĩmnĩ ge,” he tóg.

³⁹ “Àjag tỹ hã ra nén ù tó sór kŷ àjag tóg èg tũ ki kanhró nỹtĩ. Kurã nĩm jé èg tóg ke mũ, kŷ èg vènh mãn kŷ venh mũ ha,” he tóg.

⁴⁰ “Hã ra èg tỹ ón kŷ vènh génh kŷ ù ag hỹn èg to: pã'i mág tỹ imperador kato ag tẽ sór mũ, he mũ. Nén ù tũ to àjag tóg vènh mãn mũ (mỹr),” he tóg. “Û tỹ èg mỹ: ne nẽ? he mũ ra èg tỹ ne tónh ke tóg tũ tĩ,” he tóg, governo mỹ rán tĩ ti.

⁴¹ Kar kŷ tóg ag mỹ: “ha mũ jèg,” he mũ. Kŷ ag tóg mũ mũ sir.

20

Paulo tỹ ga tỹ Macedônia mĩ tĩg

¹ Vènh kar tỹ jatu ke mãn kŷ Paulo tóg Jesus ki ge kŷ nỹtĩ ag jé prèr mũ. Ag jyvèn tóg mũ, kŷ tóg ag mỹ: “sỹ tĩ ma,” he mũ. Kŷ tóg ga tỹ Macedônia ra tĩ mũ.

² Kŷ tóg ga èn mĩ tĩ mũ, kŷ tóg fĩn kutè mũ. Jesus ki ge kŷ nỹtĩ kar ag jyvèn mág tóg mũ. Kŷ tóg tĩg mãn kŷ ga tỹ Grécia tá jun mũ.

³ Tá tóg kysã tàgtũ tũg mũ. Kŷ tóg ga tỹ Síria ra vỹn ke sór mũ, canoa mág kãmĩ. Hã ra Israel ag tóg tá ti vóg kónãn sór mũ. Kŷ tóg to jykrén kŷ ga tỹ Macedônia mĩ kutè mũ, ga tỹ Síria ra vỹn ken jé.

⁴ Ti mré ag tóg mũ mũ, hã vỹ: Sópatro, he mũ, Pirro kósın tag ti, Beréia tá ke tag ti. Kŷ Tessalônica tá Artistarco tóg ti mré tĩ mũ, Segundo ke gé. Derbe tá Gaio tóg ti mré tĩ mũ, Timóteo ke gé. Ásia tá Tíquico tóg ti mré tĩ mũ, Trófimo ke gé.

⁵ Èn ag kar vỹ èg jo mũ mũ, cidade tỹ Tróade ra. Tá ag tóg èg jãvãnh mũ sir.

⁶ Kŷ ěg tóg cidade tŷ Filipos tá pa mũ, festa tŷ pão jĕgja tũ ke kurã kar kŷ. Kŷ ěg tóg kurã tŷ 5 (ke) tũg kŷ Tróade tá junjun mũ ag tá, ěg jo mũ ag tá. Tá ěg tóg kurã tŷ 7 (ke) tũg mũ sir.

Cidade tŷ Tróade tá

⁷ Semana tŷ kurã ve ki ěg tóg věnh mãn mũ sir, Domingo kã, Jesus jamĩ kó jé. Kŷ Paulo tóg tŷ vaj kŷ tũg sór mũ, hã kŷ tóg ag mré vēmén mág mũ. Kŷ ěg tóg meia noite pētēm mũ, vēmén nŷtĩn ki.

⁸ Īn to jāpry jafã tá ěg nŷtĩ, kŷ néj gru tŷ hēn ri ke tá grug kŷ nŷtĩ nĩ.

⁹ Kŷ kyrũ tóg tá nĩnĩ, ti jyyj hã vŷ: Ęutico, he mũ. Jãnkã ror kã tóg nĩnĩ, janela kã. Hã ra tóg nũr mũ sir. Nũr sér han tóg mũ sir. Jó Paulo tóg vēmén jē nĩ. Kŷ tóg ã nũr kŷ jãnkã ror ki kutē mũ. Janela tãgtũ tá nĩ kŷ tóg ěprã kutē mũ. Kŷ tóg ter ja nĩ sir, ag tŷ re kŷ, ti ve jé.

¹⁰ Kŷ Paulo tóg tere mũ gé sir. Ti kri tóg pãnh ke mũ. Kŷ tóg ti kãgũg mũ, ã nĩgnó tŷ. Kŷ tóg ag mŷ: “fe kaj tũg ra,” he mũ. “Ti kuprĩg vŷ ti kãkã nĩ nĩ,” he tóg.

¹¹ Kŷ tóg tãpry mũ, Paulo ti. Jesus jamĩ kãnhkrég tóg mũ sir, kŷ tóg ko mũ gé. Ag mŷ tóg vēmén mág han mãn mũ gé, kŷ tóg tŷ vaj mũ. Vaj kŷ tóg ti mũ, cidade ěn ki kutē kŷ, Paulo ti.

¹² Hã ra ag tóg kyrũ ěn pėre kãmũ mũ. Rĩr tóg nĩ nĩ, kŷ ag krĩ tóg há' he mũ sir.

Cidade tŷ Mileto ra

¹³ Kŷ ěg tóg ti jo canoa mág kãra ge mũ, Paulo jo. Kŷ ěg tóg cidade tŷ Assôs ra mũ mũ. Tá Paulo tóg ěg mré canoa kãra rã sór mũ gé, ti tŷ ěg mré tũg jé. “Iso ra mũ jĕg, inh hã vŷ inh pēn kã ra tĩ mũ,” he ja tóg nĩgtĩ, Paulo ti.

¹⁴ Ęg tŷ cidade tŷ Assôs tá pa kŷ tóg ěg mré ti mũ gé, Paulo ti, canoa mág kãmĩ. Kŷ ěg tóg cidade tŷ Mitilene tá junjun mũ.

¹⁵ Tá pa kŷ ěg tóg tŷ vaj kŷ goj vãso tŷ Quios kakãm krŷg mũ. Tŷ vaj kŷ ěg tóg goj vãso tŷ Samos to hã nũgnũr mũ, kŷ ěg tóg tŷ vaj kŷ cidade tŷ Mileto tá junjun mũ sir.

¹⁶ Paulo tóg: “Ęfeso ra ěg mũnh ke tũ nĩ,” he ja nĩgtĩ. “Ęg tŷ Jerusalém kukãm mũnh ke vē, hã kŷ ěg tóg Ásia ki nŷtĩnh ke tũ nĩ. Festa tŷ Pentecoste ki tóg sŷ Jerusalém tá nĩnh há tĩ,” he ja tóg nĩgtĩ, Paulo ti.

Paulo tŷ Jesus mré ke ag mré vĩ

¹⁷ Mileto tá nĩ kŷ tóg Ęfeso ra věnh vĩ jĕnĕg mũ, Paulo ti, kófa ag mŷ, Jesus ki ge kŷ nŷtĩ to pã'i ag mŷ, ag kãmũ jé.

¹⁸ Ag tŷ tá junjun kŷ tóg ag mŷ: “inh ve ja ãjag tóg (mŷr),” he mũ. “Inh kãtĩg ven kã ãjag tóg inh vé, isŷ ga tŷ Ásia tá jun vén kã,” he tóg.

¹⁹ “Ęg Senhor tŷ Jesus tŷ inh mŷ nén nũm ja han isóg tĩ. Vēnh kãfór han tũ sóg tĩ. Kejĕn sóg fŷ tĩ gé, sŷ vēnh jykre pãno ven kŷ. Israel ag tóg iso jũgũ tĩ gé, kŷ sóg vēsŷrēnh tĩ gé,” he tóg.

²⁰ “Nén há kar tó sóg tĩ ãjag mŷ. Inh pi(jé) ãjag mŷ tó tũ nĩgtĩ', sŷ nén ki kanhrãn mũ ti. Ęg vēnh mãn ki sóg tó ja nĩgtĩ, ãjag ĩn krēm ke gé,” he tóg.

²¹ “Israel ag mŷ sóg tó ja nĩgtĩ, inh mré ke ag mŷ, fóg tŷ Grego ag mŷ ke gé, ag tŷ ãjag jykre tovãnh jé, Topĕ jykre han jé, Jesus Cristo ki rã jé, ěg Senhor ki. Tag tó ja sóg nĩgtĩ,” he tóg, Paulo ti.

22 “Ha vé, Jerusalém ra sóg tĩ mũ, Topê kuprĩg tỹ inh mỹ: ha tĩg, hen kỹ. Isỹ tá nén venh ke ki kagtĩg sóg nĩ ver;” he tóg.

23 “Hã ra Topê kuprĩg tóg inh mỹ tag tó tĩ, ha mẽ: “ã se jé ag tóg ke mũ, ã vóg kónãn jé ag tóg ke mũ,” he tóg tĩ. Isỹ êmã ù ki rã tóg inh mỹ inh vêsỹrénh ke tó tĩ, Topê kuprĩg tĩ,” he tóg.

24 “Hã ra tóg inh mỹ tỹ nén ù tũ nĩ. Ag tỹ isén ke mũ ra tóg inh mỹ tỹ nén ù tũ nĩ gé. Sỹ inh rãnrãj kãn há tóg tĩ, Jesus Cristo tỹ inh mỹ vènh rãnrãj nĩm ja ên ti, hã vỹ: sỹ vènh kar mỹ Jesus to vĩ sér ên tó jé, he mũ, sỹ Topê tỹ êg jagêgtãn mũ ti tó jé, he mũ,” he tóg.

25 “Ha vé, inh ve mãn ke tũ ãjag tóg nĩ ha, ki kanhró sóg nĩ. Û tỹ hèn ri ke ag mỹ sóg Topê tỹ tỹ êg pã'i nĩ tó ja nĩgtĩ, isỹ ag venh tĩg kỹ. Hã ra ag kar ên tóg inh ve mãn ke tũ nĩ ha,” he tóg.

26 “Hã kỹ sóg ãjag mỹ tó mũ. Û tỹ Jesus ki rã tũ nĩn kỹ tóg iso: inh mỹ tóg tó ja tũ nĩ, henh ke tũ nĩ,” he tóg.

27 “Ãjag mỹ sóg tó kãn, Topê jykre kar tó sóg ãjag mỹ. Inh pi(jé) ãjag mỹ nén ù tó tũg ja nĩ,” he tóg.

28 “Vènh ki rĩrmnĩ, vêsô jykrén kỹ. Kỹ Jesus ki ge mũ kar ag ki rĩrmnĩ gé. Topê kuprĩg vỹ ãjag tỹ ag to pã'i hyn han, kỹ ag ki rĩr há han nĩ. Á kvènh tỹ tóg ag kygãm mũ mỹr, Jesus ti. Ti mỹ ag tóg tỹ ti mæg ri ke nỹtĩ, kỹ ãjag tỹ ti mæg ên jên ke,” he tóg.

29 “Isĩg kỹ ù ag tóg ãjag to junjun ke mũ, kỹ ag tóg mĩg ri ke nỹtĩ, ti mæg mãn sór kỹ, hã vỹ: Jesus ki ge kỹ nỹtĩ ag kókén sór mũ, he mũ,” he tóg.

30 “Ãjag kãmĩ ù tóg vènh ó tónh ke mũ gé, Jesus mré mũ ag tỹ ag mré mũ kónãn han jé,” he tóg.

31 “Kỹ vènh ki rĩr. Iso jykrén. Prỹg tãgtũ ki sóg ãjag jyvèn, kurã ki, kuty ki ke gé. ãjag kar jyvèn sóg (mỹr). ãjag jyvèn kỹ sóg fỹ tĩ gé kejên,” he tóg.

32 “Hã ra sóg Topê mỹ: ag ki rĩr, he mũ, ãjag to. Topê vỹ ã vỹ tỹ ãjag ki rĩr ke mũ gé, ti tỹ ãjag jagãgtãn kỹ. Ti hã vỹ ti ki rã to ãjag tar han ke mũ, Topê ti. ãjag mỹ tóg êmã há tãvĩ nĩm ke mũ gé, kar kỹ, ti tũ kar ag mré hã,” he tóg, Paulo ti.

33 “Inh pi(jé) ãjag mỹ: inh mỹ jãnkamy nĩm, inh mỹ kur nĩm, he mũ;” he tóg.

34 “Isỹ nén ù génh jé sóg rãnrãj ja nĩgtĩ (mỹr), inh nĩgé tỹ. Kỹ inh rãnrãj ki inh companheiro ag vỹ ãjag tũ ti vĩgve ja nĩgtĩ gé inh kóm,” he tóg.

35 “Hã ki sóg ãjag mỹ Jesus jykre ti ven mũ. Êg rãnrãj ki êg tũ ven kỹ êg tóg ùn krónhkrój ag mỹ nén ù vin ke mũ gé, êg tỹ ti jykre han kỹ. Êg Senhor tỹ Jesus vĩ mĩ sóg êkrég tĩ. Ti hã tóg êg mỹ tag tó ja nĩgtĩ, kỹ tóg: “ù tỹ êg mỹ nén ù nĩm kỹ tóg pãgsĩ nỹ,” he ja nĩgtĩ. “Hã sĩ tóg nỹ. Êg tỹ ù mỹ êg tũ nĩm hã kỹ tóg há nỹ,” he ja tóg nĩgtĩ, Jesus ti,” he tóg, Paulo ti. Paulo tỹ ag mỹ ken hã vè.

36 Ti tỹ tó kãn kỹ tóg ã jakrĩ tỹ jé mũ, kỹ tóg Topê mré ví mũ, vènh kar to.

37 Kỹ ag tóg kygfỹ' he mũ. Paulo nunh jãgmỹ ag tóg ãjag nĩgnó fón mũ, ti ki ag tóg nhun ke mũ.

38 Ag mỹ tóg e tĩ, ti tỹ ag mỹ: “inh ve mãn ke tũ ãjag nĩ ha,” hen kỹ. Kỹ ag tóg canoa mág ra ti mré mũ mũ sĩa.

21

Jerusalém ra

1 Vãhã êg tóg ag mỹ: “êg mũ sór vè,” he mũ. Êg tỹ ag ré kỹ mũ kỹ tóg ag mỹ jagy tĩ. Ge ra êg tóg tá pa mũ. Kỹ êg tóg canoa mág kãmĩ mũ mũ, goj vãsô tỹ

Cós kukām, vēs̄yméri. T̄y vaj k̄y ěg tóg goj vāso t̄y Rodes tá junjun m̄. Kar ěg tóg cidade t̄y Pátara tá junjun m̄ sir.

² Tá ěg tóg canoa mág ũ vég m̄ gé, ũ t̄y ga t̄y Fenícia ra t̄i m̄ ěn. K̄y ěg tóg k̄ara ge k̄y k̄am̄i m̄ m̄ sir.

³ Goj vāso t̄y Chipre vég ěg tóg m̄, ěg jakānh tá. K̄y ěg tóg ga t̄y Síría kukām m̄ m̄. Cidade t̄y Tiro tá ěg tóg kr̄ȳg m̄. Ag t̄y canoa t̄y n̄n r̄inh t̄i ěn t̄y tá vin han ke vē, cidade t̄y Tiro tá.

⁴ Tá ěg tóg Jesus mré m̄ ag vég m̄. Hā k̄y ěg tóg kurā t̄y 7 (ke) ki tá n̄t̄i n̄. Topē kupr̄ig t̄y ag kr̄in k̄y ag tóg Paulo m̄ ke m̄, ti t̄y Jerusalém ra t̄ig t̄u n̄ jé, he ag tóg.

⁵ Ge ra ěg tóg kurā t̄y 7 (ke) t̄ig k̄y m̄ m̄n m̄. Hā ra ag tóg ěg mré m̄ s̄i han m̄, ājag pr̄ū fag mré hā ke gé. Cidade tá ag tóg pa m̄ ěg mré, k̄y ěg tóg goj fyr tá ěg jakr̄i t̄y n̄t̄in k̄y Topē mré v̄i m̄.

⁶ K̄y ěg tóg: “ěg m̄nh ken vē ha,” he m̄. K̄y ěg tóg canoa k̄ara ge m̄. Jó ag tóg ājag jamā ra v̄ynv̄yn ke m̄ gé.

⁷ K̄y ěg tóg cidade t̄y Tiro tá pa k̄y m̄ m̄n k̄y cidade t̄y Ptolemaida tá junjun m̄. Jesus mré ke ag vég ěg tóg m̄ sir tá. Ag mré ěg tóg kurā pir han m̄.

⁸ T̄y vaj k̄y ěg tóg tá pa k̄y cidade t̄y Cesaréia ra m̄ m̄, ěg p̄n k̄a. Tá ěg tóg Jesus v̄i tó t̄i ũ ĩn kr̄em n̄t̄i m̄, ti jiji hā v̄y: Filipe, he m̄. Ū t̄y 7 (ke) ěn ag k̄a ũ vē, ũ t̄y vēj̄en vēnh k̄apópam̄ m̄ ěn ag k̄a ũ vē.

⁹ Ti kósin fag v̄y t̄y 4 (ke) n̄t̄i, ũn mén ja t̄u fag. ěn fag v̄y Topē v̄i tó m̄gt̄i.

¹⁰ Si há t̄u tá Judéia tá ke ũ tóg k̄at̄i m̄, ũ t̄y Topē v̄i tó t̄i ti, ti jȳy hā v̄y: Ágabo, he m̄.

¹¹ ěn tóg ěg tá jun k̄y Paulo vēs̄ógf̄in ja t̄y ā n̄gé sigség m̄, ā p̄n ke gé. K̄y tóg: “Topē kupr̄ig t̄y tón hā vē, ha m̄: ũ t̄y vēs̄ógf̄in ja tag t̄y t̄u n̄ ěn v̄y se k̄y j̄enh m̄,” he m̄. “Israel ag v̄y ti senh m̄, k̄y ag tóg fóg ag m̄y ti f̄eg m̄, he tóg, Topē kupr̄ig ti,” he tóg, Ágabo ti.

¹² ěg t̄y tag m̄ k̄y ěg tóg Paulo m̄: “Jerusalém ra t̄i t̄ig n̄,” he m̄. K̄y tá ke ag tóg ge m̄ sir ěg mré.

¹³ Hā ra Paulo tóg: “ājag hā ne tóg kygf̄y’ he m̄,” he m̄. “Inh fe kaj han ājag tóg m̄,” he tóg. “Ag t̄y ise sór n̄t̄in k̄y tóg inh m̄y t̄y n̄n ũ t̄u n̄y. Ag t̄y isén sór n̄t̄in k̄y tóg inh m̄y t̄y n̄n ũ t̄u n̄y gé, ag t̄y Jerusalém tá inh vóg kónān sór k̄y, ěg Senhor t̄y Jesus tugn̄n,” he tóg, Paulo ti.

¹⁴ ěg v̄i m̄ jāvānh tóg n̄. K̄y ěg tóg v̄i m̄n t̄u n̄ sir: “Jesus t̄y n̄n han m̄ v̄y tóg há n̄,” he ěg tóg m̄ sir.

¹⁵ Kar k̄y ěg tóg n̄n kar k̄ān m̄. K̄y ěg tóg Jerusalém ra m̄ m̄.

¹⁶ Cesaréia tá ke ũ ag tóg ěg mré m̄ m̄ gé, Jesus mré ke ũ ag. ěg m̄y ag tóg ũ ven m̄, ěg t̄y ti ĩn kr̄em n̄t̄i jé. Ti jiji hā v̄y: Menasom, he m̄. Goj vāso t̄y Chipre tá ke vē. Vās̄y tóg Jesus ki rā ja n̄gt̄i. ěg t̄y ti ĩn kr̄em n̄gn̄n ke vē.

Paulo t̄y Tiago mré vēm̄n

¹⁷ ěg t̄y Jerusalém tá junjun k̄y Jesus mré ke ag fe tóg mr̄in ke m̄ sir.

¹⁸ T̄y vaj k̄y Paulo tóg ěg mré Tiago venh t̄i m̄. K̄y kófa ag kar tóg tá vēnh m̄n m̄ gé.

¹⁹ Ag m̄y tóg: “ājag m̄y há?” he m̄. K̄y tóg ag m̄y Topē t̄y n̄n han kar tugtóg m̄. Tugtóg k̄ān tóg m̄, Topē t̄y fóg kar kr̄in m̄ ti, ti t̄y ag m̄y Topē v̄i tón k̄y.

20 Ag tỳ mẽ kỳ ag tóg Topê mỳ vĩ há han mũ. Kỳ ag tóg Paulo mỳ: “régre!”, he mũ. “Israel tỳ hên ri ke ag vỹ Jesus ki ge kỳ nýtĩ, ù tỳ mil tỳ hên ri ke ag. Ēn kar tóg Moisés tỳ ěg mỳ vênh jykre nĩm ja han (ka)mê nĩgtĩ,” he ag tóg.

21 “Hã ra ù ag tóg ag mỳ ã to ón ja nĩgtĩ. Ā to ag tóg: “Israel kar krĩn kónãn tóg tĩ,” he tĩ. “Israel tỳ fóg mĩ mũ kar krĩn kónãn tóg tĩ, ag tỳ Moisés tỳ ěg mỳ nén nĩm ja tovãnh jé,” he ag tóg tĩ ã to, ón kỳ. Ājag krẽ gré junun fár kym tũg nĩ, he ã nẽji tĩ. Moisés tỳ ěg mỳ nén nĩm ja hán mãn tũg nĩ, he ã nẽji tĩ,” he ag tóg, Paulo mỳ.

22 “Kỳ ěg ne han mũ ha?” he ag tóg. “Û tỳ hên ri ke ag vỹ vênh mãn ke mũ, ag tỳ ã kãtĩg mẽn kỳ,” he ag tóg, Paulo mỳ.

23 “Tag hã han jé ã tóg ke mũ, ha mẽ. Û tỳ 4 (ke) ag vỹ ki nýtĩ ěg mré, Topê mỳ promessa han mũ ag,” he ag tóg.

24 “Ag mỳ: “inh mré nýtĩmĩ,” hemnĩ. Ag mré vênh jãnhkri han nĩ, ěg jykre ki. Ag tỳ vễjãrég mũ kỳ ag jo kajãm nĩ. Hã kỳ vênh kar tóg ã jykre ki kanhró nýtĩ sir. Û ěn ag tỳ ã to ón mũ ve jé ag tóg ke mũ, ã tỳ Moisés tỳ ěg mỳ nén nĩm ja ěn han kỳ,” he ag tóg mũ, Tiago ag, Paulo mỳ.

25 “Jó ěg tóg fóg ag tỳ Jesus ki ge mũ ag mỳ vênh rá jẽnê ja nĩgtĩ, kanhgág ag mỳ ke gé. Û tỳ Israel jykre han tũ kar to ěg tóg jykren, kỳ ěg tóg ag mỳ vênh rá ěn jẽnê ja nĩ. Ag mỳ ěg tóg: Moisés tỳ ěg mỳ nén nĩm ja ěn han ke tũ ãjag nĩ, he ja nĩgtĩ. Ājag tỳ nén han ken hã vễ, ha mẽ: vênh kãggrá to festa ko tũg nĩ, retrato to festa ěn. Nén ù kyvénh ko tũg nĩ gé. Nén tỳ vêsóg ki ter ja ěn ko tũg nĩ gé. Ājag prũ tũ fag mré nỹ tũg nĩ gé, he ja ěg tóg nĩgtĩ ag mỳ, ù tỳ Israel jykre han tũ ag mỳ,” he ag tóg, kófa ag, Paulo mỳ.

26 Kỳ Paulo tóg ù tỳ 4 (ke) ěn ag mỳ: “inh mré nýtĩmĩ,” he mũ, ù tỳ promessa han mũ ag mỳ. Tỳ vaj kỳ tóg ag mré vênh jãnhkri mũ, Israel ag jykre ki. Kỳ tóg Topê jo ĩn to tũg kỳ ù tỳ ki rĩr tĩ ag mỳ: “ag mré sóg vênh jãnhkri mũ,” he mũ sir. Ag mỳ tóg kurã nĩm, Paulo ti, ag tỳ kurã ěn kã Topê mỳ ti tũ pũn jé, ù tỳ 4 (ke) ag jo, Topê tũ ki rĩr tĩ ag. Kurã ěn to hã ag tóg vênh jãnhkri tĩ, kurã tỳ 7 (ke) ki, promessa han mũ ag.

Ag tỳ Paulo se

27 Kỳ tóg kurã tỳ 7 (ke) ěn tũ ken kỳ Israel tỳ Ásia tá ke ag tóg Topê jo ĩn tá ti vэг mũ sir, Paulo ti. Kỳ ag tóg vênh génh mág han mũ. Ti kãmĩg ag tóg mũ, kỳ ag tóg prẽnprẽn mũ sir.

28 “!..Israel kar, kãmũ jęg ra..!” he ag tóg. “!..Ûn gré ěn ve ra..! !..Û tỳ vênh kar krĩn kónãn mũ ěn ve ra..! !..Ēg povo to tóg vĩ kónãn mo..! !..Moisés tỳ ěg mỳ nén nĩm ja to..! !..Topê jo ĩn to tóg vĩ kónãn mo..! !..Kỳ tóg fóg ag mỳ: Topê jo ĩn kãra ge jęg, he ja ne..! !..Hã kỳ tóg Topê jo ĩn kavénh mo..!” he ag tóg, prẽnprẽn kỳ, Paulo to.

29 Fóg tỳ Tróximo ěn ve ja ag tóg nĩgtĩ, Éfeso tá ke ěn, Paulo mré tĩ mũ ěn. Jerusalém tá ag tóg ti ve ja nĩgtĩ, kỳ ag tóg ón kỳ: “Paulo hỹn ti pére vyr, Topê jo ĩn kãra,” he mũ.

30 Kỳ cidade ěn tá ke kar ag vỹ vênh génh mũ sir, jũgũ kỳ. Ag tỳ Paulo kãgmĩ kỳ ag tóg Topê jo ĩn kãtã ti kutém mũ. Kỳ ù tỳ ki rĩr tĩ ag tóg Topê jo ĩn nĩgfénh mũ sir.

31 Kỳ ag tóg ti ręg mũ, Paulo ti.

Hã ra soldado ag pã'i vỹ męg mũ, major ti, Jerusalém tá ke kar ag tỳ vênh génh kỳ.

³² Kŷ tóg soldado ag jé prēr kŷ, ag pā'i jé prēr kŷ tóg ag to pétē mŷ. Ag tŷ soldado ag ve kŷ, ag tŷ major ve kŷ ag tóg sir krŷg he mŷ, Paulo rēn kŷ.

³³ Hā ra major tóg tá jun mŷ. "Ti kǎgmī ra," he tóg, soldado ag mŷ. "Ti se ra, ferro régre tŷ," he tóg. "Ū nē?" he tóg. "Ti tŷ ne han nē?" he tóg, vēnh kar mŷ, major ti.

³⁴ Hā ra ū ag tóg ti mŷ nén ū tó, kŷ ū ag tóg ti mŷ nén ū tó, kŷ tóg ki kanhrān tŷ nŷ sir. Kŷ tóg soldado ag mŷ: "Ēg ĩn kǎra ti rǎg," he mŷ.

³⁵ Ag tŷ sǎnsǎn he jafā tá junjun kŷ ag tóg ti vǎg mŷ. Vēnh kar tŷ ti to vēnh génh kŷ ag tóg ti vǎg mŷ, ag tŷ ti kǎ kyn ke jé.

³⁶ Vēnh kar tóg ag nón mŷ kŷ: "!.ti rē ra..!" he mŷ, prēnprēr kŷ.

Paulo tŷ ag mŷ vēnh kǎmén mŷ

³⁷ Ag tŷ ĩn kǎra ti rǎg sór kŷ Paulo tóg major mŷ: "sŷ ā mré vēmén há tóg tŷ," he mŷ. Grego vŷ ki tóg ti mŷ ke mŷ. Fóg tŷ major vē, há kŷ tóg Grego vŷ há tó tŷ.

³⁸ Kŷ major tóg ti mŷ: "ā hā ne tóg Grego vŷ tó há nŷ," he mŷ. "Kŷ ā mŷ tŷ Egito tá ke ěn tŷ nŷ, ū tŷ kurā ěn kǎ vēnh génh han mŷ ěn', ū tŷ mŷ tŷ 4 (ke) mré tŷ mŷ ěn, governo kato tē mŷ ěn ag mré, ěmā tŷ mŷ tŷ mŷ ěn?" he tóg, Paulo mŷ, major ti.

³⁹ Kŷ Paulo tóg ti mŷ: "hŷ," he mŷ. "Tŷ sóg Israel nŷ," he tóg. "Tŷ sóg cidade tŷ Tarso tá ke nŷ. Ga tŷ Cilícia tá cidade mág kǎfór vē, inh mur ja ti. Isŷ povo tag mré vŷnh há tóg tŷ," he tóg, Paulo ti, major mŷ.

⁴⁰ Kŷ tóg ti mŷ: "ha vŷ ge," he mŷ.

Kŷ Paulo tóg sǎnsǎn he jafā kri jē kŷ ag mŷ ke mŷ sir. Hebreu vŷ ki tóg ag mŷ ke mŷ, kŷ tóg:

22

¹ "inh kanhkā," he mŷ. "Ijóg," he tóg. "Isŷ ājag mŷ inh jykre kǎmén ke vē, ki ěmē," he tóg ag mŷ.

² Kŷ ag tóg ti tŷ Hebreu vŷ ki ag mŷ vŷ mēg mŷ sir, kŷ ag tóg katy' he mŷ sir.

³ Kŷ tóg ag mŷ: "tŷ sóg Israel nŷ," he mŷ. "Cidade tŷ Tarso tá inh mur, ga tŷ Cilícia tá. Cidade tag ki sóg hā ra mog mŷ, kŷ Gamaliel tóg inh kanhrān. Inh mŷ tóg ěg jóg'jóg ag jykre tó kǎn, kŷ sóg to tar ja nŷ. Topē jykre to sóg tar tāvŷ ja nŷgtŷ, ājag tŷ ūri han mŷ ri kén," he tóg. "Topē jykre hŷn, he sóg tŷ gé, ěg jykre ěn to, há ra sóg kygnē.

⁴ Hā kŷ sóg Jesus mré mŷ ag to jŷ tāvŷ ja nŷgtŷ. Ag kǎgtén sór ja inh nŷgtŷ, ūn tátā fag ke gé. Ag sigse ja sóg nŷgtŷ, vēse ja kǎki sóg ag vām ja nŷgtŷ gé.

⁵ Topē tŷ ki rŷr tŷ to pā'i mág vŷ ki kanhró nŷ, kófa ag kar ke gé. Ag hā tóg inh mŷ permissāo han ja nŷgtŷ, sŷ cidade tŷ Damasco ra tŷg jé, tá ěg mré ke ag mŷ ven jé. Tá sóg Jesus mré ke ag sigse sór ja nŷ gé, Jerusalém ra ag tatŷ kǎtŷg jé, tag ki ag vóg kónān jé," he tóg, Paulo ti.

Paulo tŷ ā tŷ Jesus ki rǎ kǎmén

(Hk 9.1-19; 26.12-18)

⁶ "Isŷg kŷ sóg Damasco tá jun mŷ. Kŷ tóg vǎhā vēnh jēngrē tar tāvŷ tóg vǎhā inh ki kómkóm ke mŷ. Kanhkā tá ke vē, vēnh jēngrē tag ti. Rǎ tŷ ěg nŷno kǎ sa ra tóg ke mŷ.

⁷ Kŷ sóg kutē mŷ. Kŷ sóg vēnh vŷ mēg mŷ, kŷ tóg inh mŷ: "Saulo', Saulo', ā tŷ ne jé isŷ ag vóg kónān nē?" he mŷ, vēnh vŷ ti.

⁸ Kŷ sóg ěg Senhor mŷ: “ã tŷ ũ nĕ?” he mŷ. Kŷ tóg inh mŷ: “tŷ sóg Jesus nĭ, Nazaré tá ke ěn,” he mŷ, “ã tŷ ũn vóg kónān sór tĭ ěn hã vŷ tŷ inh nĭ,” he tóg inh mŷ.

⁹ Inh mré mŷ ag vŷ vĕnh jĕngrĕ ěn vigvĕg mŷ. Hã ra ag tóg ũ tŷ inh mŷ vĭ mŷ mĕg tŷ nĭ.

¹⁰ Kŷ sóg ěg Senhor ti mŷ: “kŷ sŷ hĕ ri kenh ke nĕ?” he mŷ. Kŷ tóg inh mŷ: “jĕg nĕ ra,” he mŷ. “Damasco ki rã. Tá ũ tóg ã mŷ tó kãn mŷ, ã tŷ nĕn han ke ti,” he tóg inh mŷ, vĕnh vĭ ti.

¹¹ Hã ra sóg nĕn ũ vĕg tŷ nĭ, vĕnh jĕngrĕ ěn tar tãvĭ nĭn kŷ. Kŷ inh mré mŷ ag tóg inh nĭgé kãgmĭ kŷ inh pére mŷ mŷ. Hã ki ěg tóg Damasco tá junjun mŷ sir.

¹² Kŷ ũ tŷ Ananias he mŷ ěn tóg inh venh kãtĭ mŷ. Moisés tŷ ěg mŷ vĕnh jykre nĭm ja ěn han kãn tóg nĭgtĭ, Ananias ti. Damasco tá ke kar vŷ ti to vĭ há han mŷgtĭ, Israel ěn ag kar.

¹³ ěn tóg inh venh kãtĭ mŷ, kŷ tóg iso jun kŷ inh mŷ: “régrĕ,” he mŷ. “Saulo,” he tóg mŷ. “Inh ki ěvãnh ra,” he tóg. Kŷ sóg vĕsŷmér ti vĕg mŷ sir.

¹⁴ Kŷ tóg inh mŷ: “ěg jóg'jóg ag tŷ Topĕ vŷ ã kuprĕg, vãsŷ,” he mŷ, “ã tŷ ti jykre ki kanhró nĭ jé, ã tŷ ũn kuryj nĭ ěn ve jé, Cristo ěn. Ti hã tóg ã mré vĭnh mŷ,” he tóg inh mŷ, Ananias ti.

¹⁵ “ã tŷ vĕnh kar mŷ ã tŷ nĕn vĕg mŷ tónh ke vĕ, ã tŷ nĕn mĕg mŷ ti,” he tóg inh mŷ.

¹⁶ “Kŷ ěmĕ kŷ nĭ tŷg nĭ. Jĕg nĕ ra, ã tŷ kype kŷ jĕ jé, Topĕ tŷ ã tŷ ti vĭ mranh tŷ tŷ” he jé. Ti mré vĭ, ti jiji tó kŷ,” he tóg inh mŷ, Ananias ti,” he tóg, Paulo ti.

Paulo tŷ ã rãnrhãj kãmĕn

¹⁷ “Isŷ Jerusalém ra vŷn ke kŷ sóg Topĕ jo ĩn krĕm ti mré vĭ mŷ. Kŷ sóg nĕn nĕ vĕg mŷ.

¹⁸ Ti hã vĕ, ěg Senhor hã vĕ. Kŷ tóg inh mŷ: “kur Jerusalém tá kutĕ,” he mŷ. “ã vĭ mĕnh ke tŷ ag nĭ, ã tŷ ag mŷ inh kãmĕn mŷ ra,” he tóg inh mŷ.

¹⁹ Kŷ sóg ěg Senhor ti mŷ: “hã ra ag tóg isŷ nĕn han ja ki kanhró nŷtĭ,” he mŷ. “Ag sigse han ja isóg tŷgtĭ. Vĕnh kanhrãn jafã krĕm sóg ag mrãnrãn ja tĭgtĭ gé, ũ tŷ ã ki ge kŷ nŷtĭ ag,” he sóg ti mŷ.

²⁰ “Kŷ sóg ag tŷ Estêvão tén kŷ, ag tŷ ũ tŷ ã vĭ tó mŷ ěn tén kŷ sóg tá jĕ ja nĭ gé, kŷ tóg inh mŷ há ja tĭ, ag tŷ ti tén kŷ. Ag kur ki sóg rĭr ja nĭgtĭ gé, ũ tŷ Estêvão tén mŷ ag kur ki,” he sóg, ěg Senhor mŷ.

²¹ Hã ra tóg inh mŷ: “vó, ha tĭg,” he mŷ. “Kór há ra sóg ã jĕnĕnh mŷ, kuvar há ra. Fóg kar to sóg ã jĕnĕnh mŷ, kanhgág kar to ke gé,” he tóg inh mŷ,” he tóg, Paulo ti.

²² Hã ra vĕnh kar ěn ag tóg ěmĕ kŷ nŷtĭ nĭ. Ag tŷ ti vĭ tag mĕ kŷ ag tóg prĕnrĕr mŷ sir. “!..Ti tén ra..!” he ag tóg. “!..Ũ tŷ ge vŷ kórég ne..!” he ag tóg. “!..Ti rĭr nĭn kŷ tóg ěg mŷ tŷ ũ nŷnh mo..!” he ag tóg.

²³ Prĕnrĕr ag tóg mŷ. Ājag kur vãm ag tóg mŷ, ga funfur han ag tóg mŷ sir. Ag jŷgŷ vĕ.

²⁴ Kŷ major vŷ: “ĭn kãra ti rãg,” he mŷ. “Nĕn fãr tŷ ti mrãnrãn, cavalo tŷ mrãn ke jafã ri ke ěn tŷ. Hã tŷ ti ki jĕmĕ. Ag tŷ hĕ ri ke jĕ ã to vĭ kónãn nĕ? hemnĭ ti mŷ,” he tóg, major ti, soldado ag mŷ. Major tóg Paulo tŷ ag mŷ nĕn tó ja ěn mĕ ja tŷ nĭ, ti tŷ Hebreu ag vĭ ki kagtŷg nĭn kŷ. Hã kŷ tóg soldado ag mŷ: “ti ki jĕmĕ,” he mŷ sir.

²⁵ Kŷ ag tóg ti sĕg mŷ, nĕn fãr tŷ, ag tŷ ti mrãnrãn jé. Hã ra Paulo tóg capitão mŷ, ũ tŷ tá jĕ ěn mŷ tóg: “mŷ ã mŷ kuryj, ag tŷ inh mrãnrãn ke ti?” he mŷ.

“Tý sóg Romano nī, hã ra ag tóg nén fár tý inh mrãnmrãn sór mũ, ù tý inh ki jëmëg tú ra, ag tý inh jyvën tú ra,” he tóg, Paulo ti.

²⁶ Ký tóg capitão mý e tí, ký tóg major mý tónh tí mũ. Ti mý tóg: “ã tý ne han ke nê ha?” he mũ. “Romano vë mýr,” he tóg ti mý.

²⁷ Ký major tóg ti to kãtĩ mũ, ký tóg ti mý: “ký ã mý tý Romano nĩ?” he mũ. Ký Paulo tóg: “hý,” he mũ.

²⁸ Ký major tóg ti mý: “isý tý Romano nĩ jé sóg jãnkamy tý hên ri ke tý kajãm,” he mũ ti mý. Ký Paulo tóg ti mý: “inh mur kã sóg ge nĩ hã ra, inh panh ri kén,” he mũ.

²⁹ Ký ag tóg ti tovãnh mũ sir, ù tý ti mrãnmrãn ke mũ ên ag. Hã ra tóg major mý e tí, ti tý ti se ký. Ti tý ùn Romano senh ke tú vë vë, hã ký tóg ti mý e tí.

Israel tý pã'i ag tý Paulo vĩ mëg mũ

³⁰ Tý vaj ký major tóg Israel ag ki jëmë mãn sór mũ, ag tý hê ri ke ký Paulo to jũ mũ ti. Ký tóg ti kavãn mũ. Ký tóg Topê tú ki rĩr tí to pã'i mág ag jé prêr mũ, vënh jyvën tí kar ag ke gé. Ký tóg Paulo pére tí mũ, ag jo ti fëg jé.

23

¹ Ký Paulo tóg vënh jyvën ti ag vég mũ, ký tóg: “inh kanhkã',” he mũ. “Vënh jykre há kar han isóg nĩgtĩ (mýr), kurã kar ki, ùri ke gé, isý Topê mĩ êkren ký,” he tóg.

² Ký Topê tú ki rĩr tí to pã'i mág tóg ke mũ, ù tý Ananias he mũ ên vỹ: “ti jënky ki tânh,” he mũ, ti jy nýtĩ ag mý.

³ Ký Paulo tóg ti mý: “Topê vỹ ã tânh ke mũ,” he mũ. “Jykre régre ã nĩ, ký ã tóg tý ìn to ró ri ke nĩ. Êg tý tinta kupri tý to tĩn ký êg tóg ti kórég vég tú nĩgtĩ, tinta krêm ti kórég ti,” he tóg. “Inh jyvën sór ã tóg mũ, Topê jykre ki, hã ra ã hã tóg Topê jykre mranh, ã tý ag mý: ti tânh ra, hen ký,” he tóg, Paulo ti.

⁴ Ký tá nýtĩ ag tóg ti mý: “ã hã tóg Topê camarada mý vĩ kónãn, Topê tú ki rĩr tí to pã'i mág mý,” he mũ, Paulo mý.

⁵ Ký Paulo tóg: “mê',” he mũ. “Ti tý tý pã'i mág nĩn ki sóg kagtũg ja nĩ, ke tú nĩ mũ ra sóg ti to vĩ kónãn ja tú nĩ vë,” he tóg. “Topê vĩ ki tag tóg rán ký nĩ nĩ, hã vỹ: ã povo tý pã'i mág to vĩ kónãn tũg nĩ, he mũ,” he tóg, Paulo ti.

⁶ Hã ra Paulo tóg ag vég mũ, vënh jyvën tí ag. Û ag tóg tý Saduceu nýtĩ, ký ù ag tóg tý Fariseu nýtĩ. Vyrmý ag jykre nýtĩ. Ký Paulo tóg jamã hár(a) ke ký ag mý: “inh kanhkã',” he mũ. “Tý sóg Fariseu nĩ, ký inh panh tóg tý Fariseu nĩ gé,” he tóg. “Topê vỹ ùn ter mũ ag rĩnrĩn mãn ke mũ. Tag vỹ inh mý ki hã ke nĩ, hã ký ãjag tóg iso jũgũ mũ,” he tóg, Paulo ti.

⁷ Ti tý tag to kar ký vënh jyvën tí ag tóg vënh kãpugpóv ký nýtĩ. Fariseu ag tóg Saduceu ag mré vỹ jũgũ han mũ, jagnê vỹ kafãn ký.

⁸ Saduceu ag mý tóg tú tí, Topê tý êg ter mũ rĩn mãn mũ ti. Topê tý jënê jafã tóg ag mý tú tí gé. Ký vënh kuprĩg tóg ag mý tú tí gé. Hã ra Fariseu ag mý tóg nýtĩ, vënh kuprĩg, Topê tý jënê jafã, ti tý êg rĩn mãn mũ ke gé. Hã ký ag tóg jagnê vỹ kafãn mũ sir.

⁹ Ký ag tóg jagnê to jũgũ ký prênprêr mũ. Fariseu ag kãmĩ ù ag tóg jëg nê nê ký, Saduceu vỹ kafãn ký ag tóg: “nén ù kórég han tú ti nĩ, Paulo ti,” he mũ. “Hên ri ke mũn ti hýn nén nê ve ja nĩ, vënh kuprĩg hên ri ke mũn, ke tú nĩ ký Topê tý jënê jafã,” he ag tóg, Fariseu ag, Topê vỹ to professor ag.

¹⁰ Ký vënh génh tóg kutê mũ ve nĩ. Ký major tóg Paulo to jykren mũ. “Ag hýn gen ký ti janjãn ke mũ, ti jónjãn ký,” he tóg, vënh génh ven ký. Ký tóg soldado

ag m̄y: “kur m̄u j̄ēg, ti k̄āgm̄i j̄é, ēg ãn k̄āra ti r̄āg j̄é,” he m̄u, major ti. K̄y ag tóg ãn k̄āra ti r̄āg m̄u.

11 T̄y kuty k̄y Jesus tóg Paulo mré v̄i m̄u. “Kam̄ēg t̄ug ra,” he tóg ti m̄y. “Jerusalém tá ã tóg ãn v̄i tó há han. Ge j̄é ã tóg ke m̄u, cidade t̄y Roma tá,” he tóg, Paulo m̄y, Jesus ti.

Ag t̄y Paulo tén sór

12 T̄y vaj k̄y Israel ag tóg v̄ēnh m̄ān m̄u sir. Jagnē mré ag tóg jykrén m̄u. “Paulo tén j̄é ēg tóg ke m̄u,” he ag tóg. “J̄ēn ke t̄u ēg ãn, kron ke t̄u ēg ãn ḡé, ēg t̄y Paulo tén ke jo, ke t̄u ãn m̄u ra Topē j̄é ēg vóg kónān,” he ag tóg.

13 Ũ t̄y 40 (ke) k̄āfór v̄ē, jagnē mré jykrén m̄u ag.

14 Ēn ag v̄y Topē t̄u ki r̄ir t̄i to p̄ā'i mág ag mré v̄ēnh kām̄u m̄u, kófa ag mré h̄ā. “Jagnē mré ēg jykrén,” he ag tóg. “Nén ũ kām̄ēnh ke t̄u ēg ãn, ēg t̄y Paulo tén ke jo, ke t̄u ãn m̄u ra Topē j̄é ēg vóg kónān,” he ag tóg.

15 “K̄y major mré v̄ēnh m̄ūmn̄i. V̄ēnh jyv̄ēn t̄i ag mré m̄ūmn̄i, ājag t̄y ti mré v̄i j̄é. Ti m̄y: ēg t̄y ti t̄y nén ũ kórég han m̄u to jykrén m̄ān ke v̄ē, hemn̄i, h̄ā to ēg m̄y ti ven m̄ān ãn, hemn̄i ti m̄y. Ti t̄y: hej, hen k̄y ēg tóg ti tén ke m̄u, k̄y tóg ājag to jun ke t̄u ãn,” he ag tóg, p̄ā'i ag m̄y.

16 H̄ā ra Paulo ve fi kósín tóg ag t̄y han sór m̄u ěn m̄ēg m̄u. K̄y tóg soldado jo ãn k̄āra r̄ā k̄y Paulo m̄y tó m̄u.

17 K̄y Paulo tóg capitão ũ j̄é pr̄ēr k̄y ti m̄y: “major m̄y kyr̄u tag pére t̄ig, ti t̄y ti m̄y nén ũ tó j̄é,” he m̄u ti m̄y.

18 K̄y tóg ti pére t̄i m̄u sir, major to. K̄y tóg ti m̄y: “ũ se k̄y j̄ē ěn tóg, Paulo ěn tóg ãn j̄é pr̄ēr,” he m̄u, “k̄y tóg ãn m̄y: “kyr̄u tag t̄y major m̄y ti pére t̄ig,” he m̄u. Ti t̄y n̄ēji ã mré v̄i sór n̄ē,” he tóg, capitão ti.

19 K̄y major tóg ti n̄igē k̄āgm̄i k̄y ti pére t̄i m̄u, v̄ēnh péju k̄y. K̄y tóg ti m̄y: “ã h̄ē ri k̄é?” he m̄u.

20 K̄y tóg ti m̄y: “Israel ag tóg to jykrén, ag t̄y ã m̄y to v̄i j̄é, ã t̄y vaj k̄y Paulo j̄ēn j̄é, v̄ēnh jyv̄ēn t̄i ag to. Ōn k̄y ag tóg ã m̄y: “ti ve m̄ān j̄é ēg tóg ke m̄u, ēg t̄y ti to jykrén m̄ān j̄é,” henh ke m̄u. H̄ā ra ag ón v̄ē,” he tóg, major m̄y.

21 “Ag m̄y: hej, he t̄ug ãn. Ũ t̄y 49 (ke) ag tóg, ti jo v̄ājig m̄u. Jagnē mré ag jykrén, ag t̄y nén ũ konh ke t̄u ãn j̄é, kron ke t̄u ãn j̄é, ti tén ken jo. “Ke t̄u ãn m̄u ra Topē j̄é ēg vóg kónān,” he ag tóg. Ēn ag tóg ã t̄y ag m̄y: hej, henh ke j̄āvānh m̄u sir,” he tóg, kyr̄u ti, major m̄y.

22 K̄y major tóg ti m̄y: “ũ m̄y: ti m̄y sóg tó, he t̄ug ãn,” he m̄u. “Ha jatun m̄y t̄ig,” he tóg ti m̄y.

Major t̄y Paulo j̄ēnēnh ke, p̄ā'i mág t̄y governador ra

23 K̄y major tóg capitão régre ag m̄y: “kām̄u j̄ēg ra,” he m̄u. K̄y tóg ag m̄y: “ājag t̄u k̄ānkān ra,” he m̄u. “Cidade t̄y Cesaréia ra ājag m̄ūnh m̄u, kuty tag k̄ā 9 horas ki. K̄y soldado t̄y 200 (ke) ag v̄y m̄ūnh m̄u, cavalo kri m̄u ag t̄y 70 (ke) ag ke gé, k̄y ũ t̄y 200 (ke) ũ ag v̄y rógro pu gég m̄ūnh m̄u,” he tóg.

24 “K̄y cavalo ũ ag v̄y m̄ūnh ke m̄u gé, Paulo t̄y kri ãn j̄é. Governador t̄y Félix to ti pére m̄u j̄ēg, t̄i t̄y jatun m̄y tá jun j̄é,” he tóg, major ti, capitão ag m̄y.

25 K̄y tóg p̄ā'i mág t̄y Félix m̄y rán m̄u, major ti, k̄y tóg:

26 “Cláudio Lísias t̄y rá v̄ē,” he m̄u. “Is̄y Governador t̄y Félix m̄y rán h̄ā v̄ē, ã t̄y ãn k̄āfór ãn k̄y. Ā m̄y sóg: ã m̄y há? he m̄u,” he tóg.

27 “Tag v̄y t̄y Israel ag v̄ēse j̄ē. Ti tén kren ag tóg. H̄ā ra sóg ti t̄y t̄y Romano ãn j̄ēm̄ē, k̄y sóg ãn soldado ag mré ti kren han.

²⁸ Hā ra sóg ti kato tē mū ag ki jēmē sór mū. Ag tỹ hē ri ke jé ti to jūgjũ nē' he sóg. Hā kỹ sóg vēnh jyvēn tĩ ag mỹ ti ven mū.

²⁹ Kỹ sóg vэг mū. Ag jykre tugrĩn ag tóg ti to jūgjũ mū. Crime han tũ ti nĩ. Ti tỹ nén ũ to ter jé han tũ ti nĩ gé. Kỹ tóg ti tỹ nén ũ to se kỹ nỹ jé tóg han tũ nĩ gé.

³⁰ Hā ra sóg nén ũ mē gé. Ti to ag tóg vājig mū sir, hā kỹ sóg vēsỹmér ti jēnēg mū ā to. Ti kato vĩ mū ag mỹ sóg: ti hā mré vĩmnĩ, he mū gé," he tóg.

Vēnh rá ki tóg tó ja nĩ, major ti, governador mỹ.

³¹ Kỹ soldado ag tóg han mū sir, ti tỹ ag mỹ nén tó mū ti. Paulo pére ag tóg mū mū. Kutý tá mū kỹ ag tóg cidade tỹ Antipátride tá junjun mū.

³² Tỹ vaj kỹ ag tóg kyrāgrā mū, ājag jamā ra, ũ tỹ ājag pēn kā mū mū ag. Cavallo kri mū ag tóg ti pére mū mū inhhā.

³³ Ēn ag vỹ Cesaréia tá junjun mū. Governador mỹ ag tóg vēnh rá ěn nĩm mū. Kỹ ag tóg ti mỹ Paulo ven mū.

³⁴ Kỹ pā'i mág ěn tóg vēnh rá vэг mū, kỹ tóg Paulo mỹ: "tỹ ā ga tỹ hē tá ke nĩ, ga tỹ ne tá?" he mū. Kỹ tóg ti mỹ: "ga tỹ Cilícia tá," he mū.

³⁵ Kỹ tóg Paulo mỹ: "ā kato vĩ mū ag tỹ junjun kỹ sóg ā ki jēmēnh mū," he mū. Kỹ tóg soldado ag mỹ: "pā'i mág tỹ Herodes tỹ vēnh jyvēn jafā krēm ti nĩm," he mū, pā'i mág tỹ Félix ti.

24

Ag tỹ Paulo kato vĩ

¹ 5 dias tũg kỹ pā'i tỹ Ananias vỹ tá jun mū, cidade tỹ Cesaréia tá. Topē tũ ki rĩr tĩ to pā'i mág vē. Kófa ag vỹ junjun mū gé ti mré. Ũ vỹ vĩ kǎfór han tĩ gé, ti jiji hā vỹ: Tértulo, he mū. Kỹ ag tóg pā'i mág tỹ governador mỹ Paulo tó mū, ón kỹ ti kato vĩ kỹ.

² Kỹ tóg Paulo jé prēr mū.

Kỹ Tértulo tóg ti kato vĩ mū, kỹ tóg: "Félix!" he mū. "Há tǎvĩ ā tóg jē," he tóg ti mỹ. "Ēg ki ā tóg rĩr há tǎvĩ han tĩ, kỹ ěg tóg jatun mỹ nỹtĩ. Ā tỹ nén to jykrén mū kar tóg ěg mỹ há tĩ," he tóg, Félix mỹ.

³ "Hā kỹ ěg tóg ā to há (pē) tǎvĩ nỹtĩ. Ā to ěg jykrén há han tĩ. Kurā kar ki ěg tóg ā to vĩ há han tĩ," he tóg.

⁴ "Kỹ ěg tóg ā mré nén ũ sĩ (pē) to vĩnh kāmū mū. Kutar ā nĩ, ěg ki rĩr há han kỹ, hā kỹ ěg tóg ā mỹ vĩ mág han sór tũ nĩ. Ēg to ā há nĩ, hā kỹ ā tóg ěg vĩ mē sór mū," he tóg.

⁵ "Tag ti vỹ vĩ kónān tǎvĩ han tĩ. Israel kar ag krĩn kónān tóg tĩ, kỹ ag tóg tĩ tugrĩn vēnh kǎpugpóv kỹ nỹtĩ. Ga kar mĩ tóg ke tĩ. Kỹ tóg tỹ Nazaré tá ke ěn mré ke ag pā'i mág nĩ gé," he tóg. Paulo to tóg ke mū.

⁶ "Kỹ tóg Topē jo ĩn kǎvėnh sór mū gé, hā kỹ ěg tóg ti kǎgmĩ. Ēg tỹ ěg jykre ki ti jyvēn ke vē vē.

⁷ Hā ra Lísias tóg kǎtĩ mū, major ěn ti. Kỹ tóg ti kǎgmĩg mū. Ēg kaju ki tóg ti tỹ hǎn ke mū, jũ kỹ.

⁸ Kỹ tóg ti kato vĩ mū ag mỹ ké, ag tỹ ā venh kāmū jé. Ā tỹ vėse tag ti ki jēmē kỹ ā tóg venh mū. Ki hā ěg tóg ke tĩ. Ā mỹ ti tónh mū," he tóg, Tértulo ti. Ti tỹ Paulo to ón hā vē.

⁹ Kỹ Israel ag tóg ti mré tó mū gé, pā'i ěn ag. "Ti tỹ ki hā ke vē," he ag tóg, Tértulo to.

Paulo tȳ vēnh kāmén

10 Kȳ governador tóg Paulo mȳ ā nĭgé tȳ ven mǔ, Paulo vĭ jé. Kȳ Paulo tóg: “prȳg tȳ hēn ri ke ki ā tóg tȳ pā'i mág nĭ, Israel ag mȳ,” he mǔ. “Hā kȳ tóg sȳ ā mȳ inh jykre tón kȳ tóg inh mȳ sér tȳ,” he tóg.

11 “Kurā tȳ 12 pātēn tǔ tóg nĭ, sȳ Jerusalém tá jun ti. Sȳ tá Topē tǔ han jé sóg ra tĭg ja nĭgtĭ. Vēnh kar vȳ tá inh ve ja nĭgtĭ. Ag hȳn ā mȳ tónh mǔ, ā tȳ ag ki jēmēn kȳ,” he tóg.

12 “Hā ra sóg jatun mȳ isū han tĭ ja nĭ. Topē jo ĩn krēm sóg ũ vĭ kafān ja tǔ nĭ. Vēnh génh han ja tǔ sóg nĭ gé, ěg vēnh kanhrān jafā krēm. Cidade ki sóg nén ũ kórég han ja tǔ nĭ gé,” he tóg.

13 “Ag tȳ inh kato vĭ mǔ pi(jé) tȳ ki hā ke nĭ. Ā tȳ ve há nĭn kȳ ā tóg ki kanhró nĭnh mǔ,” he tóg.

14 “Kȳ sóg ā mȳ ki hā tónh mǔ ha,” he tóg. “Inh jóg'jóg ag tȳ Topē jykre han tĭ ěn hā han isóg tĭ gé, kȳ sóg vāsȳ nén rán kȳ nĭ ěn kri fig tĭ gé, ũ tȳ Topē vĭ tó tĭ ag tȳ nén rán ja ěn ti, Moisés mré hā. Hā ra sóg vēnh jykre tǎg tag han mǔ gé, Topē tȳ ũri ěg mȳ nén tó mǔ ti. Tag to ag tóg: “vyr mȳ vēnh jykre vē,” he tĭ, pā'i ag.

15 Hā ra sóg ag ri kén Topē tȳ nén han ke ěn ve sór mǔ. Ti tȳ ěg ter kar kȳ ěg rĭn mǎn ěn ve sór isóg mǔ. Ũn jykre kuryj ag rĭn mǎn jé tóg ke mǔ, ũn jykre pāno ag ke gé,” he tóg.

16 “Kȳ sóg tĭg há han sór mǔ (mȳr), ũ tȳ iso: nén ũ kórég han ti huri, he tǔ nĭn jé,” he tóg. “Topē rĭnve sóg tĭg há han sór mǔ,” he tóg.

17 “Vāhā sóg Jerusalém tá jun mǎn. Prȳg tȳ hēn ri ke ki sóg tá jun ja tǔ nĭ vē. Hā ra sóg ra vyr, sȳ inh povo ki ũn jagāgtar fag mȳ nén ũ vin jé, sȳ Topē mȳ nén ũ pūn jé gé,” he tóg.

18 “Vēnh jānhkrig ja sóg nĭ, ěg jykre ki. Kȳ sóg Topē jo ĩn kāra rā ja nĭ, jatun mȳ, vēnh génh han tǔ kȳ.

19 Hā ra Israel ag tȳ Āsia tá ke ag vȳ tá inh ve ja nĭgtĭ gé,” he tóg. “Ěn ag tȳ ā jo nȳtĭn kȳ, ag tȳ inh kato vĭ kȳ tóg há tĭ vē, ag tȳ iso jykrén mǔ ra, ag tȳ iso jǔ mǔ ra,” he tóg.

20 “Hā ra ũ tȳ ki nȳtĭ ag tȳ ā mȳ inh jykre kórég tónh ke vē. Vēnh jyvēn tĭ ag vȳ inh ki jēmē ja nĭ, kȳ tag ag vȳ tá nȳtĭ ja nĭ. Hā ra ag tóg tá isȳ nén ũ vēnhmȳ han ve ja tǔ nĭ,” he tóg.

21 “Vēnh vĭ pir tȳ sóg jamā hár(a) tó ja nĭ, isȳ ag rĭnve jēn kȳ, hā vȳ: Topē tȳ ũn ter mǔ rĭn mǎn mǔ ěn kri sóg fig mǔ, hā kȳ ājag tóg ũri iso jǔgǔ mǔ, he ja sóg nĭ ag mȳ,” he tóg, Paulo ti.

22 Kȳ Félix tóg kurā ũ kā ti ve mǎn sór mǔ, pā'i mág tȳ governador ěn ti. Jesus japry ki kanhró tóg nĭ, Jesus jamĭn ki, ti jykre ki, Félix ti. Hā kȳ tóg: “major tȳ Lísias kātĭg kȳ sóg ājag ki jēmē kǎn mǔ,” he mǔ.

23 Kȳ tóg capitão mȳ: “ti fēg han ra,” he mǔ. “Ti jagāgtān ra hā ra,” he tóg. “Ti mré ke ag tȳ ti mȳ nén ũ nĭm sór kȳ tóg há nĭ. Ag mȳ nenh tǔg nĭ,” he tóg, capitão mȳ, Félix ti. Ti tȳ Paulo to ken hā vē.

Félix tȳ Paulo ki jēmē mǎn

24 Si há tǔ ra Félix vȳ Paulo vĭ mē mǎn sór mǔ, si prǔ fi mré. Fi jyjy hā vȳ: Drusila, he mǔ. Israel fi vē. Kȳ tóg Paulo jé prēr mǔ sir, Félix ti, ti tȳ fag mȳ Jesus Cristo ki rā kāmén jé.

25 Kȳ Paulo tóg vēnh jykre kuryj kāmén mǔ sir. Vēsō jykrén ke kāmén tóg mǔ. Topē tȳ kar kȳ vēnh kar tȳ nén han mǔ tó tóg mǔ. Kȳ Félix tóg ā kanē tȳ

jūrūn' ke mū sir, ti t̄y ā jykre pāno mī ēkrén k̄y. K̄y tóg ti m̄y: “ha ver t̄ig,” he mū. “Kejēn sóg ā ki jēmē m̄an mū gé, kar k̄y, inh kutar tū n̄n k̄y,” he tóg, Félix ti, Paulo m̄y.

²⁶Hā ra tóg Paulo ki jānkamy m̄an sór mū gé, ti t̄y ti kavān jé, ti t̄y ti kyvān jé. Hā jé tóg k̄anhmar ti jé pr̄er m̄an', k̄anhmar ti jé pr̄er m̄an' he tū, ti mré vēmén jé. Hā ra Paulo tóg ti m̄y ven tūg.

²⁷Hā ki pr̄yg rēgre tóg tūg mū sir. K̄y Félix jēgja k̄ā ū tóg jē mū sir, hā v̄y: Pórcio Festo, he mū. K̄y Félix tóg Israel ag t̄y ā to vī há han sór mū, ag t̄y ti t̄y jykren há han jé, ti n̄n. Hā k̄y tóg Paulo kavāg tū n̄. Se k̄y tóg jē n̄.

25

Paulo t̄y p̄ā'i mág t̄y Imperador ve sór

¹Hā k̄y Festo v̄y t̄y governador n̄i sir. Ti t̄y 3 (ke) dias ēn k̄ā p̄ā'i mág n̄n k̄y tóg cidade t̄y Cesaréia tá kutē k̄y cidade t̄y Jerusalém ra t̄i mū.

²K̄y Topē tū ki r̄ir t̄i to p̄ā'i mág ag v̄y Israel há ag mré vī mág han mū, Paulo kato. K̄y ag tóg governador m̄y n̄n ū to vī mū.

³“Ā t̄y ēg to há n̄n k̄y vēnh vī jēnēm̄nī, Paulo t̄y Jerusalém mī k̄ātīg jé, ēg mī,” he ag tóg ti m̄y. Hā ra ag tóg ti k̄ātīg k̄y ti tén sór mū, ēpy kri, ēm̄n kri.

⁴Hā ra Festo tóg ag m̄y: “Cesaréia tá tóg se k̄y jé, Paulo ti,” he mū. “Jó sóg k̄anhmar ra t̄ig mū gé,” he tóg.

⁵“K̄y ājag p̄ā'i ag v̄y inh mré m̄nh mū gé. Tá sóg ājag mré ti venh mū, ti t̄y h̄en ri ke m̄n n̄n ū kórég han ja ēn ti,” he tóg.

⁶K̄y tóg tá n̄i s̄i han mū sir, 8 (ke) dias h̄yn h̄en ri ke m̄n, ke tū n̄i k̄y 10 (ke) dias h̄yn. K̄y tóg Cesaréia ra v̄yn ke m̄an mū. T̄y vaj k̄y tóg ā t̄y kri n̄n k̄y ag jyv̄en jafā kri n̄i mū. K̄y tóg soldado m̄y: “Paulo pére k̄ātī,” he mū.

⁷Ti katīg k̄y Israel ag tóg ti jy n̄y t̄i, Jerusalém tá k̄āmū ag. Paulo kato ag tóg vī t̄y h̄en ri ke han mū. Ti jykre p̄āno tugtó ag tóg mū sir, ón k̄y, hā ra tóg ag m̄y ki krov tū n̄i.

⁸K̄y Paulo tóg vēnh k̄āmén mū sir, k̄y tóg: “Israel ag jykre mranh ja tū sóg n̄i,” he mū. “Topē jo ĩn kavénh ja tū sóg n̄i gé. K̄y sóg ēg kar p̄ā'i mág t̄y Imperador vī mranh ja tū n̄i gé,” he tóg, Paulo ti.

⁹Hā ra Festo tóg Israel ag m̄y n̄n ū há han sór mū. Hā k̄y tóg Paulo m̄y: “m̄y ā t̄y Jerusalém ra t̄ig jé há?” he mū. “S̄y tá ā jykre venh há tóg t̄i, ag t̄y ā kato vī t̄i,” he tóg, Festo ti.

¹⁰Hā ra tóg Paulo m̄y ag t̄y tá ti tén ha mē t̄i, hā k̄y tóg: “ne jé,” he mū. “Ēg p̄ā'i mág t̄y Imperador jēgja k̄ā ā tóg inh ki jēmēg mū,” he tóg. “Hā k̄y ā t̄y tag ki inh jykre venh ke vē,” he tóg. “Israel ag to sóg jykre p̄āno han ja tū n̄i (m̄ȳr). K̄y ā tóg ki kanhró n̄i (m̄ȳr), ha mē,” he tóg.

¹¹“Is̄y crime han ra is̄y to ter ke vē vē. K̄y sóg ne tónh ke tū n̄i vē. Hā ra ag tóg ón k̄y inh kato vī mū sir. Hā k̄y tóg ā t̄y ag m̄y inh fēg k̄y vēnhm̄y t̄i. Ā t̄y ag m̄y n̄n há han sór vē (m̄ȳr), hā k̄y ā tóg ag m̄y ke mū. Ēg p̄ā'i t̄y Imperador hā tóg ā pin k̄y inh jykre venh ke mū,” he tóg, Paulo ti.

¹²K̄y Festo tóg ā mré jykren mū ag mré vī mū, k̄y tóg Paulo m̄y: “ā t̄y Imperador ve sór k̄y ā tóg Imperador venh t̄ig mū, cidade t̄y Roma ra,” he mū, Paulo m̄y.

P̄ā'i t̄y Agripa t̄y Paulo mré vī

¹³Si há tū ra Israel ag p̄ā'i mág t̄y Agripa v̄y cidade t̄y Cesaréia tá jun mū, ti pr̄ū t̄y Berenice fi mré. Fag t̄y Festo to pygsa ke vē.

14 Tá fag tóg kurā pir tūg mū. Kŷ Festo tóg ti mŷ Paulo kāmén mū. Kŷ tóg ti mŷ: “Félix vŷ vēse ũ kavān ja tū nī,” he mū.

15 “Kŷ Topē tū ki rŷr tī to pā'i mág ag tóg inh mŷ ti kāmén, Israel ag kófa ag ke gé. Jerusalém tá ag tóg inh mré tī kato vī, isŷ ag mŷ: té, ha ti vóg kónān, he jé,” he tóg.

16 “Kŷ sóg ag mŷ: ěg jykre tóg ge tū nī, he mū. ěg pi(jé): ti tén ra, henh mū', kānhmar', he sóg. Tī kato vī mū ag tŷ ti kato nŷtŷn kŷ tóg vėnh kāmén tī, vēse tī. Kar ěg tóg ti vóg kónān tī sir. Romano jykren hā vē, he sóg ag mŷ,” he tóg Festo ti.

17 “Hā kŷ ag tóg tag ki vėnh mān mū. Kŷ sóg vēsŷmėr ag vég mū, tŷ vaj kŷ. Inh nŷg jafā kri nī kŷ sóg Paulo jé prėr mū,” he tóg.

18 “Kŷ ag tóg ti kato vī mū. Hā ra ag tóg isŷ nén to jykren mū tó tū nŷgtŷ (mŷr), tī jykre kórėg ti,” he tóg.

19 “Ag Topē jykre tó ag tóg mū. Ũn ter mū tó ag tóg mū, ag tŷ ũn to: Jesus, he mū ěn tī. Hā ra Paulo tóg ti to: rŷr tī jē nī, he mū,” he tóg.

20 “Kŷ sŷ ne to jykren ke tóg tū tī inh mŷ. Kŷ sóg Paulo mŷ: ā mŷ Jerusalém ra tŷg ke tū nŷ? he mū. Tá ag tóg ā jyvėn hā han mū sir, he sóg ti mŷ,” he tóg.

21 “Hā ra Paulo tóg ěg pā'i mág tŷ Imperador ve sór mū, ti tŷ tī jykre ve jé. Hā kŷ sóg soldado ag mŷ: tī fėg han ra, he mū. Kejėn sóg Imperador ra ti jėnėnh mū, he sóg ag mŷ,” he tóg, Festo ti, pā'i tŷ Agripa mŷ.

22 Kŷ Agripa vŷ Festo mŷ: “sŷ tī vī mėnh hā tóg ti,” he mū.

Kŷ Festo tóg: “vaj kŷ ā tóg ti vī mėnh mū,” he mū

23 Tŷ vaj kŷ Agripa vŷ kātŷ mū, Berenice fi mré. Kur sŷnvŷ rŷnh kŷ fag nŷtŷ, pā'i mág kur ti. Tenente ag mré fag tóg kāmū mū, ũn kăfór ag mré ke gé, cidade ěn tá ke ag. Īn mág kăra ag tóg ge mū. Kŷ Festo tóg Paulo jé prėr mū sir. Kŷ ag tóg ti pére kāmū mū.

24 Kŷ Festo vŷ: “pā'i tŷ Agripa',” he mū. “Tag ki ke kar',” he tóg. “Tag ti ve ra ha,” he tóg. “Israel kar ag tóg Jerusalém tá inh mré ti to vī. Tag ki ag tóg inh mré vī mū gé ti to. Prėnrėr ag tóg, ti ter jé,” he tóg.

25 “Hā ra sóg vég mū. Nén ũ vėnhmŷ han tū tóg nī, ti tŷ to ter jé. Kŷ tóg pā'i mág tŷ Imperador ve sór mū, hā kŷ sóg to jykren mū. Sŷ tī jėnėnh ke vē,” he tóg.

26 “Hā ra sóg ti to nén rán ke ki kagtŷg nŷ ver, sŷ Imperador mŷ nén rán jé. Hā kŷ sóg ti jé prėr, ājag tŷ ti ve jé, ā tŷ ti ve jé, pā'i tŷ Agripa',” he tóg. “Ājag tŷ tī ki jėmė kŷ sóg sŷ nén rán ke ki kanhró nŷnh mū,” he tóg.

27 “Sŷ nén rán tū ra ti jėnė kŷ tóg vėnhmŷ nŷnh mū, sŷ ag tŷ ti kato nén tó mū ěn rán tū ra,” he tóg, Festo ti.

26

Paulo tŷ vėnh kāmén mān

1 Kŷ Agripa vŷ Paulo mŷ: “ā tŷ vėnh kāmén kŷ tóg há tī,” he mū. Kŷ Paulo tóg ā nŷgé tŷ krŷg he mū, kŷ tóg: “pā'i Agripa',” he mū.

2 “Ā hā ne tóg Israel jykre kar ki kanhró nŷ. Hā kŷ tóg inh mŷ há tī, sŷ ũri ā jŷ vŷ kŷ,” he tóg.

3 “Israel ag tŷ inh kato vī mū to sóg kāmén kān sór mū ā mŷ,” he tóg. “Hā kŷ jatun mŷ inh vŷ jėmėmnŷ,” he tóg.

4 “Israel kar vŷ inh ki kanhró nŷtŷ, văsŷ, isŷ kă, isŷ inh mur ja tá nŷn kă, isŷ kar kŷ Jerusalém tá nŷn kŷ ke gé,” he tóg.

5 “Isī kā sóg ěg jykre han kĀn mŭ, tag ki kanhró ag nŷtī, ag tŷ tó sór kŷ,” he tóg. “Tŷ sóg Fariseu nī (mŷr), jó Fariseu ag vŷ ěg jykre kar to tar nŷtī (mŷr),” he tóg.

6 “Hā ra ag tóg inh kato vī mŭ. Topē vŷ ěg jóg jóg ag mŷ: “rīr mĀn jé ājag tóg ke mŭ, ājag ter kŷ,” he ja nĭgtī. Ti vī tag kri sóg fig mŭ, hā kŷ ag tóg inh kato vī mŭ,” he tóg.

7 “Povo tŷ 12 (ke) vŷ tŷ ěg nŷtī. ěg kar vŷ Topē jykre hyn han tī, kuty ki, kurā ki ke gé. ěg tŷ ter kar rīr mĀn jé, hā jé ěg tóg ke tī, hā jé ěg tóg Topē jykre han tī, pā'i tŷ Agripa',” he tóg. “Sŷ Topē tŷ ěg mŷ tag tó kri fi kŷ Israel ag tóg inh kato vī mŭ,” he tóg.

8 “Mŷ ājag mŷ vēnhmŷ, Topē tŷ ūn ter kar rīn mĀn ke ti?” he tóg. “Vēnhmŷ ke tŷg nī,” he tóg, Paulo ti.

9 “Hā ra sóg vāsŷ Jesus kato tē ja nī gé. Nazaré tá ke ěn mré ke ag vóg kónĀn jagy han ja sóg nī vē, vāsŷ,” he tóg.

10 “Jerusalém tá sóg ke ja nĭgtī. Jesus tŷ ag sigse ja sóg nĭgtī gé. Topē tŷ ki rīr tī to pā'i mág ag vŷ inh mŷ tag to permissão han ja nĭgtī gé,” he tóg. “Ag tŷ Jesus mré ke ag kāmī ū tén kŷ tóg inh mŷ há ja tĭgtī gé,” he tóg.

11 “Ěg vēnh kanhrĀn jafā krēm isóg ag vóg kónĀn ja nĭgtī gé, ag tŷ Jesus ki ge tag tovĀnh jé, ag tŷ ti mŷ vī kónĀn jé. Ag to sóg jŷ tāvī ja nĭgtī gé, inh fe tŷ gŷm ken kŷ. Kŷ sóg cidade ū ra ag nón tĭg ja nĭgtī gé, ag vóg kónĀn jé,” he tóg.

Paulo tŷ ā tŷ Jesus ki rā kāmén

(Hk 9.1-19; 22.6-16)

12 “Hā kŷ sóg cidade tŷ Damasco ra tĭg ja nī gé. Topē tŷ ki rīr tī to pā'i mág ag vŷ inh mŷ permissão han ja nĭgtī, inh mŷ: ha tĭg, hen kŷ.

13 Ěpŷy jagma sóg meio dia ki jēngrē tar vé, kanhkā tá. Rā káfór vē, ha mē, pā'i,” he tóg. “Jēngrē ěn vŷ inh ki kómkóm ké, inh mré mŭ ag ki ke gé.

14 Kŷ ěg kar vŷ vár mŭ, ga kri. Kŷ sóg vēnh vī mē. Inh mré tóg vī, Hebreu vī ki, kŷ tóg inh mŷ: “Saulo', Saulo',” he mŭ. “Ā hā ne tóg isŷ ag vóg kónĀn nī,” he tóg inh mŷ. “Ā vóg isóg mŭ, ka junun kri ferro ěn tŷ, monh vóg jafā ěn tŷ. Kŷ tóg ā tŷ inh kato nĭg kŷ, ā tŷ ka kato vāsĀn kŷ tóg kaga mág tĭnh mŭ,” he tóg inh mŷ, vēnh vī tī,” he tóg, Paulo ti.

15 “Kŷ sóg ěg Senhor mŷ: “ā tŷ ū nē?” he mŭ. Kŷ tóg inh mŷ: “tŷ sóg Jesus nī,” he mŭ. “Ā tŷ ūn vóg kónĀn sór tī ěn vŷ tŷ inh nī,” he tóg inh mŷ.

16 “Jĕg ra, vēnh rā hā jĕg,” he tóg. “Ā mŷ sóg vēnh ven, ā tŷ isŷ han jé, ā tŷ nén vég mŭ tag tó jé. Ā mŷ sóg vēnh ven mĀn ke mŭ gé, kejĕn. Tag kar tó jé ā tóg ke mŭ,” he tóg inh mŷ.

17 “Ā povo mŷ sóg ā jĕnĕnh mŭ, fóg kar ag mŷ ke gé, kanhgág kar ag mŷ ke gé. Hā ra sóg ā jy nĭgĀn mŭ,” he tóg inh mŷ.

18 “Ag kanē nugnón sór inh mŭ (mŷr). Ag tŷ vēnh jykre pĀno han kŷ tóg ag kĀki kuty nī sir, hā ra sóg ag kĀki jēngrē han sór mŭ. Satanás krēm ag nŷtī, Japo krēm. Hā ra sóg ag kygvĀn sór mŭ, ag tŷ inh jykre han jé. Ag tŷ inh vī mranh tŷ sóg vēnh pĀte fón sór ke mŭ (mŷr), ag tŷ ū tŷ inh ki ge kŷ nŷtī ag mré kanhkā tá nŷtĭnh ken jé, isŷ ūn kuprĕg kar ag mré hā,” he tóg inh mŷ, Jesus ti,” he tóg, Paulo ti.

Paulo tŷ ā rānrĀj kāmén

19 “Kŷ sóg ti vī mranh tŷ nī, pā'i tŷ Agripa',” he tóg. “Kanhkā tá nī kŷ tóg inh mré vī ja nī, Jesus ti, kŷ sóg ti vī han.

²⁰ Damasco tá ke ag mǝ sóg tó vén, kar Jerusalém tá ke ag mǝ ke gé, ga tǝ Judéia tá ke ag kar mǝ ke gé. Israel kar ag mǝ sóg tó mǝ, kar sóg fóg ag mǝ tó mǝ gé sir, kanhgág ag mǝ ke gé. Ag mǝ sóg tó, ag tǝ ājag jykre tovānh jé, ag tǝ Topē jykre han jé sir, ag tǝ vēnh jykre kuryj han jé, vēnh kar tǝ ag tǝ ājag jykre tovānh ve jé,” he tóg, Paulo ti.

²¹ “Isǝ tag han to Israel ag tóg Topē jo ĩn krēm inh kāmī ja nǝgtī, isén jé,” he tóg.

²² “Hā ra Topē tóg inh jy nǝgān mǝ. Hā kǝ sóg ũri jē mǝ. Ti vī tó inh mǝ (mǝr), ũn mág ag mǝ, ũn kāsir ag mǝ ke gé. Vāsǝ Topē vī tó tǝ ag tóg tó ja nǝgtī, isǝ nén tó mǝ tag, Moisés mré hā,” he tóg.

²³ “Cristo jagtar ke tó ja ag tóg nǝgtī. Ā ter kar rǝr vén ke ti, ěg jo, he ja ag tóg nǝgtī, Cristo to. Kǝ tóg ěg povo mǝ jēngrēg tǝ ěn ri ke nǝ sir, fóg kar ag mǝ ke gé, kanhgág kar ag mǝ ke gé,” he tóg, Paulo ti.

²⁴ Paulo tǝ gen kǝ tóg Festo mǝ e tǝ sir, Paulo tǝ vēnh kāmén kǝ. Kǝ Festo tóg jamā hár(a): “krī tǝ ā nǝ, Paulo,” he mǝ. “Ā tǝ vēnh rá ve mág kǝ tóg ā krī tǝ (pē) tǝ,” he tóg, Festo ti.

²⁵ Hā ra tóg ti mǝ: “inh krī vǝ há nǝ, Festo,” he mǝ. “Há tāvī ā jē nǝ vǝ,” he tóg ti mǝ. “Hā ra sóg ki hā tó mǝ (mǝr), to jykrén há han kǝ,” he tóg.

²⁶ “Tag kǝ nǝ vǝ ki kanhró nǝ, pǝ'i tǝ Agripa tag ti. Hā kǝ sóg ti ve kǝ mǝ'āg tǝ nǝ. Tó kǝn sóg mǝ. Mē ti huri, ki kanhró tóg nǝ. Vēnh kar tóg mē kǝn tǝ ha,” he tóg.

²⁷ “Pǝ'i tǝ Agripa,” he tóg. “Ā mǝ Topē vī tó tǝ ag tǝ nén tó mǝ kri fig mǝ'?” he tóg. “Kri nǝm ā tóg mǝ, ki kanhró sóg nǝ,” he tóg.

²⁸ Kǝ Agripa tóg Paulo mǝ: “vēme sǝ tǝ ā mǝ isǝ Cristo ki rā han sór mǝ'?” he mǝ.

²⁹ Kǝ Paulo tóg ti mǝ: “hǝ,” he mǝ. “Hā to sóg Topē mré vǝ mǝ,” he tóg. “Ā tǝ vēme sǝ hā ki Jesus ki rānh ken kǝ tóg há tǝ vē, ke tǝ nǝ kǝ vēme mág ki. Ā tǝ ĩnh ri kén ke kǝ tóg há tǝ vē, ā, ā mré inh vǝ mēg mǝ ag ke gé. Isǝ se kǝ jē tag hā to sóg ā mǝ: inh ri kemnǝ, henh ke tǝ nǝ,” he tóg, Paulo ti.

³⁰ Kǝ pǝ'i tǝ Agripa vǝ jēg nē mǝ sir, governador ke gé, Berenice fi ke gé, ag mré nǝtǝ kar ag ke gé.

³¹ Kǝ ag tóg kǝpa mǝ. Kǝ ag tóg jagnē mré vǝ mǝ. “Nén ũ kórég han tǝ ti nǝ,” he ag tóg. “Véké tóg se kǝ jē. Ā tǝ nén han tǝ to tóg ter ke tǝ nǝ,” he ag tóg.

³² Kǝ Agripa tóg Festo mǝ: “tǝ tǝ kyvar kǝ jē hā vē vē, hā ra tóg pǝ'i mág tǝ Imperador ve sór mǝ,” he tóg mǝ.

27

Cidade tǝ Roma ra

¹ Hā kǝ Festo tóg kejēn Paulo mǝ: “ā tǝ ga tǝ Itália ra tǝg ke nē ha,” he mǝ. Kǝ tóg pǝ'i mǝ ti fēg mǝ. Soldado ag capitāo vē, pǝ'i ěn ti. Ũ tǝ Imperador mré ke ag he mǝ ěn capitāo vē. Ti jiji hā vǝ: Júlio, he mǝ. Ti mǝ ag tóg vēse ũ ag vin mǝ gé.

² Kǝ ěg tóg canoa mág kǝra ge mǝ sir. Cidade tǝ Adramítio tá ke vē, canoa mág ěn ti. Ag tǝ ga tǝ Ásia fyr to mǝ sór vē, canoa kāmī. Kǝ ěg tóg goj kāmī mǝ mǝ, tá pa kǝ. Aristarco tóg ěg mré tǝ mǝ, cidade tǝ Tessalónica tá ke ěn ti, ga tǝ Macedónia tá ke ěn ti.

³ Tǝ vaj kǝ ěg tóg cidade tǝ Sidom tá krǝg mǝ sir. Kǝ Júlio tóg Paulo mǝ vǝ há han mǝ. Kǝ tóg ti mǝ: “ā mré ke ag venh tǝg, ag tǝ ā ki rǝr jé,” he mǝ.

4 Tá pa kŷ kĀka tóg ěg kato tē mŭ. Kŷ ěg tóg goj vāso tŷ Chipre kakām mŭ mŭ, ti tŷ ěg jakānh tá nĭn kŷ.

5 Kŷ ěg tóg goj kafā tŭ kāmī mŭ mŭ, ga tŷ Cilicias fyr to, ga tŷ Panfília fyr to ke gé. Kŷ ěg tóg cidade tŷ Mirra tá junjun mŭ sir, ga tŷ Lícia tá.

6 Tá capitāo tóg canoa mág ũ vég mŭ, cidade tŷ Alexandria tá canoa, ũ tŷ ga tŷ Itália ra tī mŭ ěn. Kŷ tóg ěg mŷ: “kā ge jěg,” he mŭ, capitāo ti.

7 Kāmī ěg tóg mŭ mŭ. Komĕr hā ěg tóg mŭ mŭ, kurā tŷ hĕn ri ke ki. Kŷ ěg tóg vāhā goj vāso tŷ Cnido tá junjun mŭ. Hā ra kĀka tóg ěg kato tē mŭ gé. Kŷ ěg tóg tá fĭn rām tŭ nĭgtī. Kŷ ěg tóg goj vāso tŷ Creta kakām mŭ mŭ, kĀka tŷ ěg tŷ vĭrĭn ke kŷ. Krĭ tŷ Salmona kakām mŭ ěg tóg mŭ, kĀka krĕfĭn.

8 Kāmī tĭg tóg jagy tī, Creta fyr to hā tĭg kŷ. Kŷ ěg tóg vāhā komĕr hā ěg tóg canoa sag ja há he mŭ tá junjun mŭ. Cidade ũ vŷ tá kakó nĭ, ti jyjy hā vŷ: Laséia, he mŭ.

9 Hā ra ěg tóg komĕr hā mŭ ja nĭgtī, hā kŷ kusa tóg kakó tī ha. Kŷ tóg goj kāmī tĭg kórég nĭ, kóho tugrĭn. Festa ũ pātĕn tóg huri, Israel ag vākre jafā ti. Hā kŷ Paulo tóg ag jyvĕn kŷ:

10 “goj tóg kāmī tĭg kórég tī ha, vŷ,” he mŭ. “Kŷ ěg tóg jagāgtar mŭ ha. Kŷ tóg inh mŷ canoa tŷ nĭnunh mŷ tĭg ha mĕ tī, kŷ ājag tŭ vŷ vāgfor mŭ sir, jó ěg hĕn ri ke mŭn kĀgter ke mŭ gé,” he tóg, Paulo ti.

11 Hā ra capitāo tóg canoa tŷ ũ tŭn mŭn vĭ mĕg mŭ sir. Canoa vóg mŭ vĭ mĕg tóg mŭ gé, hā kŷ tóg Paulo vĭ mĕg tŭ nĭ sir.

12 Canoa sag ja ěn tóg há sĭ nĭ, hā kŷ ag tóg tá kusa fĭn pa vānh nŷtī. Hā kŷ ũn e ag tóg tá pa sór mŭ, ag tŷ cidade tŷ Fenice tá junjun jé, tá kusa fĭn pa jé. Goj vāso tŷ Creta tá cidade ũ vē, canoa sag ja ũ vē, Fenice ti. Tá rā krĕfĭn tá kĀka vŷ króg he tŭ nĭgtī. Hā kŷ ag tóg ra mŭ sór mŭ sir.

Kóho mág

13 Hā ra kĀka sĭ tóg komĕr hā kraug he mŭ sir. Kŷ tóg ag mŷ há tī. Hā kŷ ěg tóg tá pa kŷ Creta fyr ra mŭ mŭ sir, Creta fyr kakó ra, goj kāmī mŭn kŷ.

14 Vāhā kóho jŭ tóg canoa kato tē mŭ sir, ti jiji hā vŷ: Nordeste, he mŭ. Creta tán kĀtī mŭ.

15 Hā ra ěg tóg kóho jŭ tag kato canoa vóg tŷ hĕ ri ke tŭ nĭ, kŷ ěg tóg ti vóg tovānh mŭ sir. Kŷ kóho tóg canoa va tī mŭ.

16 Kŷ ěg tóg goj vāso sĭ to hā mŭ mŭ, ti jyjy hā vŷ: Cauda, he mŭ. Hā ra ěg tóg canoa sĭ nŷgnŷn kāmŭ ja nĭ, ti se kŷ. Cauda tá ěg tóg canoa mág kri ti fi han sór mŭ, hā ra ěg tóg to jagāgtar mŭ, kóho to.

17 Vāhā ag tóg ti kĀtĀnfyn mŭ, canoa vóg tī ag. Kar ag tóg canoa mág tógfĭn mŭ, ti tŷ vām ke tŭ nĭ jé. Hā ra ag tóg rŷnhŷj kamĕg mŭ, rŷnhŷj tŷ Sirte he mŭ ěn, ga tŷ Líbia fyr tá. Hā kŷ ag tóg kur kunŭg mŭ sir. Kur ěn vŷ canoa kri sag tī, kĀka tŷ ti tĭn jé. ěn kunŭg ag tóg mŭ sir.

18 Hā ra ěg tóg kóho jŭ to jagāgtar' he mŭ, kŷ ag tóg tŷ vaj kŷ canoa tŷ rĭg mŭ ěn kujy vām mŭ sir, goj ki, ti kufy vĕnh kĀpām ag tóg mŭ sir.

19 Tŷ vaj ũn kŷ ěg tóg jagāgtar tāvĭ nŷtī, kŷ ěg tóg vāvām kĀn mŭ sir, canoa kĀki nŷtī ěn, ti tralha ti. ěg kar tóg ag mré vāvām mŭ sir.

20 Kurā tŷ hĕn ri ke ki ěg tóg rā vég tŭ (pĕ) nĭ, krĭg ke gé. Kóho jŭ ěn tóg ěg kato tē mŭ. Kŷ tóg ěg mŷ ěg kĀgter ha mĕ tī. “ěg hŷn krenkren ke tŭ nĭ ha,” he ěg tóg.

21 Hã ra ěg tóg jĕg tũ (pĕ) ja nĩ, kurã tỹ hĕn ri ke ki. Kỹ Paulo tóg ag to tĩg kỹ: “ãjag tỹ inh vĩ kri finh ke vĕ vĕ,” he mũ. “Ĕg tỹ Creta tá kãpa tũ nĩ ra ěg jagĕgtar tũ nĩnh ke vĕ vĕ, kỹ ãjag tỹ nĕn ù kren tũ nĩnh ke vĕ vĕ,” he tóg.

22 “Hã ra ãjag fe ti tỹ rỹnh kemnĩ. Ĕg kar vỹ krenkren mũ. Canoa hã vỹ tũ' henh mũ!,” he tóg.

23 “Kuty tag kã Topĕ tỹ jĕnĕ jafã tóg inh mré vĩ mũ. Inh Senhor hã vĕ, ù tỹ ti jĕnĕg mũ ti, hã vỹ: Topĕ, he mũ,” he tóg.

24 “Ti tỹ jĕnĕ jafã tóg inh mũ: “kamĕg tũg nĩ, Paulo!,” he mũ. “Pã'i mág tỹ Imperador ve jé ã tóg ke mũ, kỹ Topĕ tóg ã mré mũ ag kar vin, ag tỹ ã mré krenkren jé,” he tóg inh mũ,” he tóg, Paulo ti.

25 “Kỹ ãjag fe ti tỹ há' hemnĩ. Topĕ vĩ kri sóg fig mũ. Ti tỹ inh mũ tó mũ vỹ ge nĩnh mũ,” he tóg, Paulo ti.

26 “Jó ěg tỹ canoa tỹ goj vãso to tĩn há tóg tĩ,” he tóg.

27 Semana régre vĕ sir, ěg tỹ goj kafãn tũ mũ mũ kri, kóho tỹ ěg ran tĩ ki. Goj kafã tũ ěn jiji hã vỹ: Mediterrãneo, he mũ. Meio noite ki canoa vóg tĩ ag tóg: “ga hỹn kakó nĩ ha,” he mũ.

28 Kỹ ag tóg goj kãmun mũ sir. Kỹ tóg 36 (ke) metros he mũ. Kãnhmar ag tóg kãmun mãn, kỹ tóg 27 (ke) metros he mũ sir.

29 Kỹ ag tóg pãro kamĕg mũ, ěg tỹ ag mũ kã ta kenh ha mẽ tĩn kỹ. Kỹ ag tóg canoa nér tá ti se jafã tỹ 4 (ke) vin mũ. Ferro ù vĕ, ti se jafã ti. Ti tỹ rỹnhřỹ kãkã nỹ kỹ canoa tóg tá krỹg he mũ. Ti vin kỹ tóg ag tỹ kurã venh há tĩ, canoa vóg tĩ ag.

30 Kỹ ag tóg canoa sĩ ěn térem mũ, goj ki. Canoa se jafã tỹ ag tóg kãki vin mũ, ag tỹ ón kỹ canoa krĩ tá vin jé. Hã ra ag tóg canoa mág ré kỹ ga ra mũ sór mũ.

31 Hã ra Paulo tóg vég mũ. Kỹ tóg capitão mũ, soldado ag mũ tóg: “ag tỹ pa kỹ ãjag vỹ krenkren ke tũ nĩ,” he mũ.

32 Kỹ soldado ag tóg vãfe kym mũ sir, ag tỹ vãfe tỹ canoa sĩ térem kỹ. Kỹ canoa sĩ ěn tóg kutĕ mũ sir.

33 Tỹ vaj ken kỹ Paulo tóg vĕnh kar jyvĕn mũ, ag jĕn jé. Kỹ tóg: “semana régre vĕ (mỹr), ãjag fe von kỹ,” he mũ. “Nĕn ù kãmĕg tũ ãjag nỹtĩ (mỹr) ver,” he tóg.

34 “Pão ko ra, ãjag tỹ tar há ki krenkren jé. Û vỹ ter ke tũ nĩ, kỹ ù vỹ kaganh ke tũ nĩ gé,” he tóg, Paulo ti.

35 Ti tỹ tag tó kar kỹ tóg pão mǎg mũ sir. Vĕnh kar rĩnve tóg Topĕ mré vĩ mũ, kỹ tóg kupãn kỹ ko mũ sir.

36 Kỹ vĕnh kar tóg fe tar nỹtĩ sir. Kỹ ag tóg ko mũ gé sir.

37 276 (ke) ěg nỹtĩ, canoa mág ěn kãki.

38 Ĕg tỹ ko kar kỹ ag tóg goj ki trigo kugĕg mũ, canoa tỹ kãnhvỹ' hen jé.

39 Tỹ vaj kỹ ag tóg vég mũ sir, hã ra ag tóg goj vãso ěn ki kagtĩg nỹtĩ. Kỹ ag tóg tá rỹnhřỹ vég mũ sir, rĩnhřỹ ti. Tá kóho tóg há sĩ nĩ. Kỹ ag tóg tag ra canoa tĩn sór mũ.

40 Kỹ ag tóg ferro ěn kykym mũ sir, goj kãki. Kỹ ag tóg canoa vóg jafã kygvãg mũ gé. Canoa krĩ tá ag tóg kur kujĕn mũ, kóho kato.

41 Hã kỹ ěg tóg rỹnhřỹ ěn to mũ mũ sir. Kỹ goj régre tóg jagnĕ ki jun nĩ. Kỹ canoa tóg rỹnhřỹ kãra rã mũ sir. Ti krĩ tóg rĩnhřỹ krĕm rã mũ, kỹ tóg sir tar mũ sir. Kỹ ti nér tóg kam ke mũ sir, goj jũ kỹ. Kỹ tóg mráj mũ, canoa ti.

42 Kỹ soldado ag tóg vĕnh sigse ag kãgtĕn sór mũ, ag mrogmro kỹ vĕnh pigju tũ nĩn jé, ag krenkren tũ nĩn jé.

⁴³ Hã ra capitão tóg Paulo kren han sór mũ. Kĩ tóg ag mũ: “ke tũg ra,” he mũ. “Ájag tỹ tũgnũm há nĩn kũ goj kãra ge vén inhhã, ájag tỹ ga ra ge vén jé, tũgnũm kũ,” he tóg.

⁴⁴ “Ájag tỹ tũgnũm kórég kũ kan kri nỹmĩ, canoa mránhráj kri,” he tóg, capitão ti.

Kỹ ag tóg ge mũ sir. Hã kũ ãg kar tóg ga tá junjun mũ, krenkren kũ.

28

Goj vãso tỹ Malta tá

¹ Ëg tỹ ga tá nỹtĩn kũ ãg tóg ga jiji mẽg mũ, hã vỹ: Malta, he mu.

² Tá ke ag tóg ãg jagãgtãn mũ. Kũ ag tóg pĩn han mũ. Ëg mũ ag tóg: “kãge jẽg ra,” he mũ, ta kutẽ kũ, kusa jagy tĩn kũ. Kanhgág ri ke ag vẽ, tá ke ag.

³ Kũ Paulo tóg pĩnh tĩ mũ, kũ tóg pĩ ki nĩn mũ. Hã ra pỹn tóg pĩ kãkã nỹ ja nĩ. Rỹ mẽ kũ tóg tim ke kũ Paulo prãg mũ, ti nĩgẽ ki.

⁴ Kũ tá ke ag tóg pỹn ãn vãng mũ, ti tỹ ti nĩgẽ to sa kũ. Kũ ag tóg jagnẽ mũ: “ũ tén tĩ hỹn vẽ,” he mũ. “Goj tán kren, hã ra tóg ã tỹ nén han jan kajãm mũ,” he ag tóg, Paulo to.

⁵ Hã ra Paulo tóg pỹn kãvén mũ, pĩ ki tóg tỹ vén mũ. Hã ra tóg kaga tũ nĩ, ti nĩgẽ ti, Topẽ tỹ ti tỹ há' hen kũ.

⁶ Hã ra ag tóg ti tugnỹm mũ, ti kãnhpar ve jé, ke tũ nĩ kũ ti ter kũ kutẽ ve jé. Hã kũ ag tóg ti vãng nỹtĩ, hora tỹ hẽn ri ke ki. Hã ra tóg ke tũ nĩ. Kũ ag tóg ti to jykren mãn mũ. “Topẽ tũ mũ vó?” he ag tóg mũ, ón kũ, Paulo to. Ag mũ tóg e tí, hã kũ ag tóg ti to: “topẽ hỹn,” he mũ.

⁷ Goj vãso tá ke ãn ag kãfór vỹ tỹ Públio nĩ. Tá tóg ĩn nĩ, ã japỹ tá. Ëg tỹ tón nỹtĩ tag tá tóg kakó nĩ, ti ĩn ti. Kũ tóg ãg mũ: “kãge jẽg ra,” he mũ. Ti mrẽ ãg tóg kurã tãgtũ han mũ.

⁸ Hã ra Públio panh tóg kaga nỹ nĩ. Jãgfa kyvénh han tóg, kũ tóg to rỹg nỹ nĩ gé. Kũ Paulo tóg ti venh rã mũ. Kũ tóg ti to Topẽ mrẽ vĩ mũ. ã nĩgẽ tỹ tóg ti mẽg mũ, kũ tóg há' he mũ sir.

⁹ Ti han kũ vènh kagyga kar ag vỹ tá junjun mũ sir, goj vãso ãn tá. Kũ tóg ag tỹ há' he kãn mũ, Paulo ti.

¹⁰ Kũ ag tóg ãg ki rĩr há han mũ. Ëg tỹ kar kũ canoa ù kãra ge kũ ag tóg ãg mũ ãg tỹ nén ve sór mũ kar ãn vin mũ.

Roma ra

¹¹ Kysã tãgtũ tũg kũ ãg tóg canoa ù kãra ge mũ sir. Cidade tỹ Alexandre tá ke vè gé, canoa ãn. Tá tóg kusa fĩn rã ja nĩ, Malta tá. Ti rá vỹ tỹ ti vègni kãggrã nĩ, ti retrato ãn ti. Ón kũ Romano ag topẽ ù vè, ti vègni kãggrã ti.

¹² Tá pa kũ ãg tóg mũ kũ cidade tỹ Siracusa tá krỹg mũ. Kũ ãg tóg tá kurã tãgtũ tũg mũ.

¹³ Tá pa kũ ãg tóg cidade tỹ Régio tá junjun mũ. Tỹ vaj kũ kãka tóg ãg vóg há han mũ. Hã kũ ãg tóg kurã régre tũg kũ cidade tỹ Pozuoli tá junjun mũ sir.

¹⁴ Tá ãg tóg Jesus mrẽ ke ag vãng mũ, kũ ag tóg ãg mũ: “ãg mrẽ semana tũg nĩ ver,” he mũ. Kar kũ ãg tóg cidade tỹ Roma ra mũ mũ sir.

¹⁵ Roma tá ke ag tóg ãg kãmũ mẽ ja nĩ, Jesus mrẽ ke ag. Kũ ag tóg ãg venh kãmũ mũ. Cidade tỹ Ápio jamã he mũ ãn tá ag tóg ãg kato tẽgtẽ mũ, ãmã tỹ Venda Tãgtũ he mũ ãn tá ke gé. Paulo tỹ ag ve kũ ti fe tóg mrin ke mũ. Kũ tóg Topẽ mũ vĩ há han mũ. Ti krĩ tóg kãnhvỹ' he mũ sir.

16 Ēg t̄y cidade mág t̄y Roma tá junjun k̄y Paulo tóg vyr m̄y n̄i n̄i, v̄ese ũ ag mré tóg n̄i t̄u n̄i. Soldado pir hā tóg ti ki r̄ir m̄u. Capitão tóg ti m̄y tag to: “hej,” he ja n̄i.

Roma tá

17 Kurā tāgt̄u t̄ug k̄y Paulo tóg Israel k̄áfór ag jé pr̄er m̄u. Ag v̄enh m̄an k̄y tóg ag m̄y: “inh kanhkā’;” he m̄u. “Se k̄y inh jē, Jerusalém tá, k̄y ag tóg tá fóg t̄y Romano ag m̄y inh f̄eg, is̄y n̄én ũ han t̄u hā ra, is̄y ěg jykre mranh t̄u hā ra, is̄y ěg jóg’jóg t̄y ěg m̄y v̄enh jykre n̄im ja ěn mranh t̄u hā ra,” he tóg.

18 “Fóg t̄y Romano ag tóg inh kavān sór m̄u v̄e, ag t̄y inh ki jēmē kar k̄y. Is̄y n̄én han ja t̄u to sóg ter ke t̄u n̄i v̄e.

19 Hā ra Israel ag tóg inh kato v̄i, hā k̄y sóg sir p̄a’i mág t̄y Imperador ve sór m̄u, ag t̄y is̄én t̄u n̄i jé. Hā ra sóg ěg povo kav̄enh sór t̄u n̄i, Imperador jo,” he tóg.

20 “Hā k̄y sóg ājag jé pr̄er m̄u, s̄y ājag ki jēmē jé. Ēg povo t̄y Israel kar v̄y Cristo ve sór m̄u. S̄y Cristo tó hā to sóg se k̄y jē n̄i,” he tóg, Paulo ti.

21 K̄y ag tóg ti m̄y: “ũ tóg ěg m̄y ā to v̄enh rán han ja t̄u n̄i, Judéia tá,” he m̄u ti m̄y, p̄a’i ag. “K̄y ěg kanhkā ũ tóg ěg ki jun ja t̄u n̄i jé, ti t̄y ěg m̄y ā t̄y n̄én ũ kórég han m̄u ěn tó jé,” he ag tóg.

22 “Hā ra tóg ěg t̄y ā ki jēm̄nh há t̄i, ā t̄y n̄én to jykr̄én m̄u ti. V̄enh jykre t̄ag tag kato ag tóg v̄i t̄i, v̄enh kar ag, hā k̄y tóg ěg t̄y ā ki jēm̄nh há t̄i,” he ag tóg ti m̄y, Israel mág ag.

23 K̄y ag tóg ti m̄y kurā n̄im m̄u. K̄y ũn e ag tóg v̄enh m̄an m̄u sir, ti t̄y ĩn kr̄ém n̄i ěn tá. Ag m̄y tóg Top̄ē t̄y t̄y ěg p̄a’i n̄i k̄āmén m̄u. Jesus k̄āmén tóg m̄u, ag t̄y h̄en ri ke m̄un ti ki ge jé. Moisés t̄y ag m̄y v̄enh jykre n̄im ja ěn tó tóg m̄u sir ag m̄y, v̄as̄y Top̄ē v̄i tó t̄i ag v̄i ke gé. V̄enh rá ěn ki tóg ag m̄y Jesus ti ven m̄u sir. Kusā ki ag tóg k̄ām̄u ja n̄i, t̄y v̄émén n̄ȳt̄i ki ag tóg kutyg m̄u.

24 K̄y tóg ũ ag m̄y ki hā tó ti, Paulo t̄y ag m̄y n̄én tó m̄u ti, k̄y ag tóg kri fig m̄u. Hā ra tóg ũ ag m̄y há t̄u n̄i.

25 Hā k̄y ag tóg v̄enh k̄apugp̄ov̄ k̄y n̄ȳt̄i. K̄y ag tóg m̄u m̄u, Paulo t̄y ag m̄y tag tó kar k̄y, ha m̄e. Ag m̄y tóg: “Top̄ē kupr̄ig tóg tó há han ja n̄i, ti t̄y Top̄ē v̄i tó t̄i t̄y Isaías m̄y: ag m̄y tag tó, hen k̄y,” he tóg.

26 “Ēg jóg’jóg ag m̄y tóg tag tó ja n̄i, hā m̄e: “povo tag m̄y tag tó, hā m̄e: m̄e jé ājag tóg ke m̄u, ón k̄y, hā ra ājag tóg to jykr̄én ke t̄u n̄inh m̄u, hem̄n̄i,” he tóg.

27 “K̄y ag tóg ki kagt̄ig n̄ȳt̄inh m̄u. Povo tag ag v̄y kr̄i t̄u n̄ȳt̄i, n̄igr̄eg kutu ag tóg n̄ȳt̄i gé, kan̄ē kyv̄o ag tóg n̄ȳt̄i gé, ag t̄y n̄én ũ ve sór t̄u n̄ȳt̄inh k̄y, ag t̄y jēm̄ē sór t̄u n̄ȳt̄inh k̄y, ag t̄y to jykr̄én sór t̄u n̄ȳt̄inh k̄y ke gé. Hā k̄y ag tóg inh ki ge sór t̄u n̄ȳt̄i gé, k̄y sóg ag t̄y há’ henh ke t̄u n̄i gé,” he tóg, Isaías ti,” he tóg m̄u, Paulo ti, Israel ag m̄y.

28 “Hā k̄y sóg, ājag m̄y tó m̄u,” he tóg, Paulo ti. “Ājag t̄y m̄e jāv̄anh n̄ȳt̄inh k̄y fóg ag v̄y m̄ēnh m̄u, kanhgág ag ke gé, Top̄ē t̄y ag krenkren han sór m̄u ti. K̄y ag tóg ti m̄y: hej, henh m̄u,” he tóg, Paulo ti, Israel ag m̄y.

29 Paulo t̄y tag tó kar k̄y Israel ag tóg m̄u m̄u sir, jagn̄ē v̄i kafān k̄y.

30 Paulo v̄y pr̄yg régre t̄ug m̄u, ā ĩn kr̄ém n̄in k̄y. Alugar hen k̄y tóg jē n̄i, ĩn ěn ti, k̄y tóg kajām m̄u, Paulo ti, ā jānkamy t̄y. K̄y tóg ũ t̄y ti mré v̄i sór m̄u m̄y: “k̄arā ra,” he ti.

31 V̄enh kar m̄y tóg Top̄ē t̄y t̄y ěg p̄a’i n̄i k̄āmén m̄u sir, fe tar han k̄y. Ēg Senhor t̄y Jesus Cristo k̄āmén tóg m̄u sir. Ũ tóg ti m̄y: “v̄i t̄ug ra,” he t̄u n̄i, ti se k̄y n̄i hā ra.

PAULO TŶ CARTA HAN: ROMA TÁ KE AG MŶ CARTA

¹ Paulo tŷ rá vĕ. Isŷ cidade tŷ Roma tá ke ag mŷ rán ken hã vĕ.

Tŷ sóg Jesus Cristo camarada nĭ, kŷ tóg inh fĕg, isŷ tŷ apóstolo nĭ jé. Hã jé tóg inh jé prĕr. Kŷ tóg inh kuprĕg gé, isŷ vĕnh kar mŷ vĕnh vĭ sér kãmén jé, Topĕ tŷ ěg mŷ vĕnh vĭ jĕnĕ ja ěn ti.

² Topĕ vŷ vãsŷ ã vĭ tó tí ag mŷ: “ha inh kósín kãme tó,” he ja nĭgtĭ, kŷ ag tóg ti kãme rán ja nĭgtĭ gé, ag tŷ Topĕ vĭ rán kŷ.

³ Topĕ kósín ěn tó ja ag tóg nĭgtĭ, ěg Senhor tŷ Jesus Cristo ti. Tŷ tóg vãsŷ pã'i mág tŷ Davi kósín nĭ, Jesus ti. Ti jóg'jóg ve hã vĕ, Davi ti.

⁴ Ti tŷ tŷ Davi kósín nĭn kŷ tóg tŷ ěprã ke nĭ, Davi ri ke, hã ra tóg tŷ Topĕ kósín nĭ gé, hã kŷ tóg ã ter kar kŷ rĭr mãn ja nĭ. Topĕ tŷ ti rĭn mãn to ěg tóg ti tŷ tŷ Topĕ kósín nĭn ki kanhró nŷtĭ. Topĕ vŷ ti tŷ ũn mág han mŷ gé sir, ěg Senhor tŷ Jesus tŷ.

⁵ Topĕ hã ne isar han', Jesus tugrĭn. Ti hã ne inh fĕg', isŷ tŷ apóstolo nĭn jé, isŷ fóg ag kar mŷ ti kãmén jé, kanhgág ag mŷ ke gé, ag tŷ ti ki ge jé, ti vĭ kri fi jé, ti vĭ kri nĭm jé, ti jiji mĕ kŷ.

⁶ Ũ tŷ inh vĭ mĕg mŷ vŷ tŷ ãjag nŷtĭ gé.

Topĕ vŷ ãjag kuprĕg, hã kŷ ãjag vŷ tŷ Jesus Cristo tũ nŷtĭ.

⁷ Kŷ sóg ãjag mŷ vĕnhrá jĕnĕg mŷ, Topĕ tŷ ãjag to há nĭn kŷ. Cidade tŷ Roma tá ãjag tóg nŷtĭ. Topĕ ne ãjag kuprĕg', hã kŷ ãjag vŷ tŷ ti tũ nŷtĭ. Hã kŷ sóg ěg jóg tŷ Topĕ mŷ: “ag tar han nĭ, ag mŷ vĕnh jykre kusa nĭm nĭ,” he tí, Topĕ mŷ, ěg Senhor tŷ Jesus Cristo mŷ ke gé.

Paulo tŷ Roma tá ke ag ve sór

⁸ Ha mĕ, vĕnh kar vŷ ãjag tŷ ti ki ge kŷ nŷtĭ tag mĕ huri, kŷ sóg ãjag to Topĕ mŷ vĭ há han tí, Jesus Cristo tugrĭn. Ti hã mré sóg vĕmĕn tí.

⁹ Ti hã mŷ sóg rãnrãj tí, to krónh ke vãnh sóg nĭgtĭ, hã kŷ sóg ti kósín to vĕme sér ěn tó tí. Ti hã mré sóg ãjag jagfy vĭ tí gé, kŷ tóg ki kanhró nĭ. Kurã kar ki sóg ãjag kãmén tĭgtĭ, ti mŷ.

¹⁰ Isŷ ti mré vĕmĕn kŷ sóg ãjag tó tí. Ti mŷ sóg sŷ kejĕn ãjag ve sór mŷ tó tí. Ti tŷ kejĕn sŷ ãjag venh ke to há nĭn kŷ tóg inh mŷ: hej, henh ke mŷ.

¹¹ ãjag ve sór tãvi inh nĭgtĭ, sŷ ãjag mŷ Topĕ kuprĭg tŷ inh kanhrãn ja ěn kãmén jé, ãjag tŷ inh vĭ jĕmĕn kŷ tar nŷtĭ jé.

¹² Kŷ ěg tóg jagnĕ tar han ke mŷ sir, ěg tŷ jagnĕ jykre ven kŷ, ãjag tŷ isŷ Jesus ki rã kŷ nĭ ven kŷ, isŷ ãjag tŷ ti ki ge kŷ nŷtĭ ven kŷ ke gé.

¹³ Inh kanhkã', inh mŷ tóg ãjag tŷ tag ki kanhró nŷtĭnh há tí, ha mĕ: ãjag venh tĭg ke to inh jykren tŷ hĕn ri ke han huri, hã ra tóg inh mŷ ki króm ja tũ nĭ ver. Isŷ ãjag mŷ Topĕ vĭ kãmén sór vĕ, Roma ki ke ũ ag mŷ ke gé, ag kãmĭ ũ tŷ Topĕ ki ge jé. Fóg kar mŷ sóg ke tí, kŷ tóg inh mŷ sér tĭnh mŷ, sŷ Roma tá tónh ke mŭn kŷ ke gé.

¹⁴ Fóg tŷ Grego ag mŷ sóg Topĕ vĭ tó tí, fóg kar ag mŷ ke gé, kanhgág ag mŷ ke gé, ũ tŷ nĕn ũ ki kanhró ag mŷ, ũ tŷ nĕn ũ ki kagtĭg ag mŷ ke gé. Topĕ vŷ inh mŷ: “ha ag mŷ tó,” he ja nĭgtĭ.

¹⁵ Hã kŷ sóg Roma tá ti tó sór mŷ gé, Topĕ vĭ sér ěn ti.

Topĕ jykre tar

16 Inh pi(jé) Topě ví sér tag to mý'äg sór mü'. Topě hã ne tag to ěg kren han tí, ěg tý kri fin ký. Topě jykre tar hã vě. Judeu ag kren han sór tóg mü, kar ký fóg kar ag ke gé, kanhgág ag ke gé.

17 Tag hã ki ěg tóg Topě jykre ki kanhró nýtinh mü, Topě ví sér hã ki. Ěg tý ti ki rã hã ký ěg tóg ti mý kuryj nýtí. Hã ký tag tóg rán ký nĩ, ha mē: “ěg tý Topě ki rã hã tugnĩ ěg tóg ti mý kuryj nýtinh ke mü, ký ěg rĩnrĩ mãn ke mü,” he ja tóg nĩ, Topě ví rán ki.

Ěprã ke ag jykre pãno

18 Hã ra Topě tóg jũ nĩ gé, kanhkã tá. Ů tý ti ki ěkrég tũ ag to tóg jũ mü. Topě vỹ ag mý tý nén ũ tũ nĩ, hã ký ag tóg věnh jykre kuryj han sór tũ nĩgtí. Věnh ví há tý ag tóg tũg' he sór tí gé, věnh jykre kórég han sór ký.

19 Topě jykre há nýtĩn hã ki kanhró ag tóg nýtĩ vě, ag tý ki kanhrãn sór ký. Topě vỹ ěg kar mý tag ven tí.

20 Ěg pi(jé) Topě vég tí'. Hã ra tóg nén ũ kar han, ěg tý nén vég mü kar. Ěn vigve ký ěg tóg ti jykre mág nĩ ěn ki kanhró nĩ sir. “Ů tý tag han mü vỹ tý ũn mág nĩ,” he jé ěg tóg ke mü. “Ěn jykre vỹ tar nĩ, ěn hỹn tóg tũ' henh ke tũ nĩ,” he jé ěg tóg ke mü, ěg tý Topě tý nén han ja vigve ký. Hã ra ag tóg ki kanhrãn jãvãnh nýtí, hã ký Topě tóg ag to jũnh ke mü, hã ra ag tý ne tónh ke tóg tũ tĩnh mü.

21 Ti tý tý Topě nĩn ki kanhró ag tóg nýtĩ vě, hã ra ag tóg ti to: “Topě vě,” he tũ nĩgtí. Ti tý tý ũn mág nĩ tag tó sór tũ ag tóg nĩgtí. Ti mý ag: “inh mý tóg há tí,” he ja tũ nĩgtí gé, ti tý ag ki rĩr há han mü ra. Hã ký ag tóg ag tý krĩ há ra ki kagtĩg nýtí sir, ag krĩ há tóg tũ' he ja nĩgtí sir. Nén ũ há to jykrén mü ki kagtĩg ag nýtĩ ha.

22 “Ki kanhró mág inh nĩ,” he ag tóg tí, hã ra ag tóg krĩ věnhmý nýtĩ ha.

23 Ký ag tóg Topě pē tag jěgja kã, ũn ter vãnh tag jěgja kã ag tóg sir ěprã ke kãggrã fěg mü sir, ěprã ke ag kãgter tĩn ra. Sěsĩ kãggrã vin ag ke gé, bicho tý fa tý 4 ag kãggrã ke gé, pýn kãggrã ke gé. Tag vỹ ag mý tý topě nýtĩ sir.

24 Hã ký Topě tóg ag tovãnh mü sir. Ag tý äjag tý nén to ěn mü ěn han sór nýtĩn ký tóg ag tovãnh mü, ag tý han jé. Jagně kavěnh ag tóg mü sir.

25 Topě ví há kri fi vãnh ra ag tóg věnh ó hã kri nĩm tí. Ag tý ũ tý nén ũ kar han ja ěn to: “Topě vě,” henh ke vě vě, hã ra ag tóg ti tý nén han ja to: “Topě vě,” he sór mü, ón ký. Ů tý nén ũ kar han mü hã ne ä pir mý tý ũn mág nĩ', ti hã mý ěg tóg ví há han ke mü'. To krónh ke vãnh ěg nýtĩ. Amém.

26 Ag tý Topě tý nén han ja to: “Topě vě,” hen ký Topě tóg ag togvãnh gé, ag tý äjag tý nén to ěn mü ěn han jé, ěg kavěnh tí ěn ti. Ag prũ fag tý ag mré nỹ tũg ký fag tóg jagně) hã mré ti věnhmý han mü sir, mýr, ha mē.

27 Ký fag mén ag tóg äjag prũ fag mré nỹ tovãnh ký jagně to ěn mü gé sir. Jagně to ěn ký ag tóg jagně mré nỹ ký ti kórég han mü gé sir, jagně kavěnh ký. Hã ký ag tóg ag tý Topě tovãnh to jagãgtar nýtinh mü. Ti tý ag vóg kónãn hã vě.

28 Ve ra ha. Topě ki ěkrén jãvãnh ag tóg nýtĩ, ti to é he ký. Hã ký Topě tóg ag togvãnh ja nĩgtí gé sir, věnh kato, ag tý věnh jykre pãno han sór ký. “Ha han, ge ký sir,” he ja tóg nĩgtí.

29 Věnh jykre pãno tý ag fór nýtĩ ha, ti kórég täví tý. Nén kar to ěn (ka)mě ag nýtĩ. Věnh jykre kuryj han vãnh ag nýtĩ. Jagně tũ to ěn (ka)mě ag nýtĩ. Jagně kãgtěn ag tóg tí gé. Jagně ví kafãn ag tóg tí gé. Jagně mý un'ón ag tóg tí gé. Jagně krĩn kónãn ag tóg tí gé. Jagně to ví kónãn ag tóg tí gé.

³⁰ Jagnē to un'ón ag tóg tī gé. Topē kato tē mág ag tóg nýtī. Jagnē vóg kónān ag tóg tī. “Ag kāfór vỹ tỹ inh nĩ,” he ag tóg tī, kỹ ag tóg vēso nēn ũ há tó tī, ón kỹ. “Inh hỹn vēnh jykre pāno tỹ ne han mũ, ũri?” he ag tóg tī, kurā kar ki. Ājag mýnh fag vĩ han vānh ag tóg nýtī gé, ājag panh ag vĩ ti.

³¹ Krī tũ ag nýtī. Ón kỹ ag tóg jagnē mré nēn kar to jykrén tī, ājag tỹ ki króm ke tũ (hā) ra. Jagnē mré há nýtī ki kagtīg ag nýtī, kỹ ag tóg jagnē jagāgtān ki kagtīg nýtī gé.

³² Topē vỹ ũ tỹ tag han mũ to: “kāgter jé ag tóg ke mũ,” he ja nĩgtī. Ag tỹ tag ki kanhró nýtī ra ag tóg han mũ sir, kỹ ag tóg ũ tỹ tag han mũ to há nýtī gé, mýr, ha mē.

2

Topē tỹ vēnh jykre pāno to jũ

¹ Fóg mré kanhgág ag vỹ vēnh jykre kórég tag hyn han kān tī, kỹ ag tóg Judeu ag mý kórég nýtī. Hā ra Judeu ag vỹ ti kórég han tī gé, ag tỹ ón kỹ ag to vĩ mũ ra. “Kórég ag nýtī,” he ag tóg tī, há ra ag tóg fóg jykre kórég ěn han tī gé, kanhgág jykre kórég ti ke gé. Hā kỹ ag tóg ājag jykre tugnīn ti kórég venh ke mũ gé.

² Topē vỹ ũ tỹ tag han mũ vóg kónān ke mũ, ti jykre kuryj nĩn kỹ, Topē ti. Ti tỹ ke há vē.

³ Ũn jykre kórég ag tóg ag mý kórég nýtī, Judeu ag mý, há ra ag tóg há han tī gé. Kỹ ag hỹn hē ri kenh mũ, Topē tỹ ag vóg kónān tũ nĩ jé? Ag vóg kónān jé tóg ke mũ, ha vemnĩ.

⁴ Ver tóg ěg to há nĩ, ver tóg ěg to fen nĩnh mũ, ver tóg jũ vānh nĩ, Topē ti. Ti tỹ ěg tỹ ěg jykre kórég tovānh ve sór vē, há kỹ tóg ver ěg to há tāvi nĩ. Hā ra tóg ag mý tỹ nēn ũ tũ nĩ ve nĩ, Topē tỹ ěg to fen nĩnh ke mũ ti.

⁵ Kutu ag nýtī, vēnh jykre pāno tovānh jāvānh ag nýtī, há kỹ Topē tỹ ag to jũ tóg komēr há mág rā nĩ. Kejēn tóg Topē tỹ vēnh kar jykre venh ke kurā pétēm ke mũ sir. Kỹ ag tóg venh ke mũ, Topē tỹ ag vóg kónān ke ti, kỹ vēnh kar vỹ ti jykre kuryj venh ke mũ, ti tỹ ěg mý ki há tó mũ ti.

⁶ Ti há ne ěg mý nĩm ke mũ', ěg tỹ nēn hyn han ja ěn kaja ti.

⁷ Ěn ká tóg ěg mý ěg rĩr krỹg ja tũ ven ke mũ, ũn jykre kuryj ag mý. Ěg tỹ ti jykre há to tar nýtīn kỹ tóg ěg mý ěg rĩr krỹg ja tũ ven ke mũ, ěg tỹ tá tỹ ũn mág nýtī sór kỹ, ěg tỹ Topē há tỹ ěg mý vĩ há han ke ve sór kỹ, ěg tỹ ěg rĩr krỹg ja tũ ve sór kỹ. Kỹ tóg ěg mý ven ke mũ.

⁸ Hā ra tóg ũ vóg kónān ke mũ gé. Ũ tóg ājag tỹ nēn han sór mũ ěn há han tī. Vēnh vĩ há kri fi vānh ag nýtī, ag tỹ vēnh jykre pāno hyn han sór kỹ. Hā kỹ tóg ag vóg kónān ke mũ.

⁹ Ũ tỹ vēnh jykre pāno han mũ kar vỹ kanē junjur ke mũ, jagtar jagy hyn han kỹ. Ag tỹ tỹ Judeu nýtī ra ag tóg jagāgtar ke mũ, kar kỹ fóg kar ag ke gé, kanhgág ag ke gé.

¹⁰ Ũ tỹ vēnh jykre kuryj han mũ tỹ tóg ũn mág hyn han ke mũ há ra, to tóg vĩ há han ke mũ, ěg mý tóg vēnh jykre kusa nĩm ke mũ, ěg tỹ tỹ Judeu nýtī ra, kar kỹ fóg ag mý ke gé, kanhgág ag mý ke gé.

¹¹ Ha vé, Topē mý ti tỹ nēn ũ tũ nĩ, Judeu ag, fóg ag, kanhgág ag. Ti mý ěg tóg tỹ ũn pĩr nýtī.

¹² Ũ ag tóg Topē vĩ mē ja tũ nýtī. Kỹ ag tóg ti kórég kar hyn han mũ sir. Kỹ ag tóg nũgme ki vār ke mũ sir, inferno ki, ag jykre kórég to. Ag jāvo Judeu ag vỹ

Topē vī mē ja nīgtī. Hā ra ag tóg ti kórég han tī gé. Kŷ Topē tóg ag vóg kónān ke mū gé sir. “Isŷ ājag mŷ nén tó ja ēn han ja tū ājag nŷtī,” he jé tóg ke mū.

13 Ha vé, ēg tŷ Topē vī mēg mū ra han tū nīn kŷ ēg Topē mŷ há tū nŷtī. Ēg tŷ ti vī ki króm kŷ ēg tóg ti mŷ kuryj nŷtī.

14 Fóg ag mré kanhgág ag vŷ Topē vī mē ja tū nī ver, ū tŷ Judeu jykre han tū kar ag. Ge ra vēnh jykre há tóg ag mŷ sér tī, ag tŷ Topē vī mē ja tū (hā) ra. Kŷ ag tŷ vēnh jykre há han sór mū tag vŷ ag mŷ ag tŷ ki króm han jafā nī.

15 Topē tŷ nén tó ja ēn vŷ ag kākā nī, há kŷ ag tóg han sór mū, ag tŷ mē ja tū ra. Hā kŷ tóg ag mŷ sér tī, ag tŷ nén ū há han kŷ. Jāvo tóg ag mŷ e tī, ag tŷ ti kórég han kŷ. Ag tŷ Topē vī mē ja tū ra ag tóg vēnh jykre há ki kanhró nŷtī.

16 Kejēn Topē tóg Jesus Cristo mŷ: “ag jykre ve kán nī,” henh ke mū, ti kurā ēn kā. Kŷ vēnh kar jykre vŷ vēnh ven ke mū, ag jykre kórég mré há, ag tŷ vēnh kar vatánh tá nén han ja ti. Tag há tó sóg tī, sŷ vēnh kar mŷ ti vī sér kāmén kŷ.

Judeu ag tŷ Topē vī mranh ja

17 Ha vé, Judeu ag mŷ tóg sér tī, ag tŷ tŷ Judeu nŷtīn kŷ. “Topē ne ēg jyvēn ja nīgtī’, kŷ ēg nūgme ki vár ke tū nī,” he ag tóg tī. “Topē to ēg há nŷtī,” he ag tóg tī gé.

18 Ti tŷ ēg ki nén ve sór mū ki kanhró ag tóg nŷtī. Ti vī ki tóg rán kŷ nī, há kŷ ag tóg ēn ve kŷ vēnh jykre kuryj ki kanhró nŷtī.

19 “Ki kanhró ēg nŷtī,” he ag tóg tī, há kŷ ag tóg ū tŷ ki kagtŷ ag mŷ tó tī, Judeu ag, ag tŷ ag mŷ ūn kyvó ag ri ke nŷtīn kŷ. Kutŷ mī ag tóg mügtī, kŷ ag tóg ag mŷ jēngrē han sór tī, ag mŷ Topē vī tó kŷ.

20 Ū tŷ ki kagtŷ ag kanhrān ag tóg tī, gŷr ag ke gé. “Topē vī vŷ há nī, vēnh jykre há vē, ki há tóg tó tī, há to ēg Topē ki kanhrān tī,” he ag tóg tī.

21 Ōn kŷ ag tóg ū ag kanhrān tī, ājag tŷ ki kagtŷ nŷtī (hā) ra. Ū mŷ ag tóg: “nén ū péju(g) tūg nī,” he tī. Hā ra ag tóg ū tū péju(g) tī.

22 Ōn kŷ ag tóg: “ā prū tū fi mré nŷ tūg nī, ā mén tū mré nŷ tūg nī gé,” he tī. Hā ra ag tóg fag mré nŷgnŷ tī. Ōn kŷ ag tóg vēnh kăgrá tŷ topē to: “Topē pijé’,” he tī. Hā ra ag tóg vēnh kăgrá ag jo ĩn krēm ag tū péju(g) tī.

23 “Topē vŷ ēg jyvēn ja nīgtī,” he ag tóg tī. Hā ra ag tóg ti vī mranh tī. Topē kavénh ag tóg tī.

24 Hā kŷ tag tóg rán kŷ nī, Judeu ag to, Topē vī rán ki, ha mē: “ājag jykre kórég ve kŷ fóg ag mré kanhgág ag vŷ Topē jykre to: kórég ti hŷn nī,” he tī,” he ja tóg nīgtī, Judeu ag to, Topē vī rán ki.

25 Há ti nī, ēg tŷ tŷ Judeu nŷtī ti, ēg tŷ Topē vī ki króm kŷ. Ēg tŷ há ra ti vī mranh kŷ tóg ēg mŷ nén ū há han ke tū nī, ēg tŷ tŷ Judeu nŷtī ra. Fóg ri ke vŷ tŷ ēg nŷtī, kanhgág ri ke, ēg tŷ ti vī mranh kŷ.

26 Kejēn fóg ū tóg sir Topē vī ki króm mū sir, kanhgág ū hēn ri ke mūn. Kŷ tóg Topē mŷ tŷ Judeu ri ke nī sir, ti tŷ Topē vī ki króm to.

27 Hā kŷ fóg ag mré kanhgág ag vŷ Judeu ag jykre kórég tónh ke mū, ha vemnī, ag tŷ Topē vī ki króm kŷ. Topē vī mranh ag tóg tī, ag tŷ tŷ Judeu nŷtī ra, ag tŷ Topē vī rá vég nŷtī ra. Hā tó jé ag tóg ke mū, fóg ag, kanhgág ag ke gé.

28-29 Ōn kŷ ag tóg tŷ Judeu nŷtī, ag pi(jé) tŷ Topē tū pē nŷtī’. Ōn kŷ ag gré junun fār vŷ kym kŷ nī, Topē tŷ ag mŷ: “kym ra,” he ja nīn kŷ. Kŷ ag tóg tag tugnīn jagnē mŷ: “Topē tū vŷ tŷ ēg nŷtī,” he tī. Hā ra ag pi(jé) tag tugrīn tŷ Topē tū nŷtī’. Topē tū ag vŷ ājag fe tŷ ti ki rā tī, kŷ ag jykre há ne kym kŷ nī ri ke nī’. Ag tŷ vēnh jykre kórég tovānh to ken há vē. Topē kuprīg ne ēg jykre há han tī’,

ký Topě tóg ěg mý ví há han tí gé sir, ěg jykre há nýtín ký. Ti pi(jé) ěprā ke ri ke ón ký ví há han tí, ti ki ge ký nýtí ag mý. Ěg hā vỹ tý Topě tú pē nýtí!

3

¹ Ký Judeu ag hýn inh mý: “kýn mý há tú nī, ěg tý tý Judeu ag krě nýtín ký?” he sór mū. “Ěg gré junun fār kym ký nīn kýn mý tý nén ũ tú nī?” he sór ag hýn mū.

² Vó, há tāvī ti nī gé. Ěg hā mý tóg ā ví ti tó ja nīgtí, Topě ti, ěg tý tý Judeu krě nýtín ký.

³ Ěg kāmī ũ tóg ti ví kri fig tú nīgtí. Hā ra Topě pi(jé) ag tigrīn ā tý nén tó ja ěn han ke tú nī, ag tý ti ví ki króm tú ra tóg ā ví ki króm tí, Topě ti, ag jāvo.

⁴ Ti tý ěg mý tó ja ěn han tí tí, ón vānh ti nīgtí. Ěprā ke ag ne un'ón tí, hā ra tóg ón ke tú pē nī, Topě ti. Hā ký tag tóg rán ký nī, Topě ví rán ki, hā vỹ: “věnh kar vỹ venh ke mū, ā tý ā ví han tí ti,” he mū. “Ů tý ā jykre tugným ký tóg venh ke mū sir, ā tý ki hā tó tí ti,” he ja tóg nī, Topě to, Topě ví tý rán ký nī ki. Hā ra tóg ge nī.

⁵ Ký Judeu ag hýn ón ký inh mý: “kýn hýn há nī, ěg jykre pāno ti,” he sór mū. “Věnh kar vỹ ěg jykre pāno ve ký Topě jykre kuryj nī ki kanhró nýtí, ti tý ěg jāvo věnh jykre pāno to há tú nīn ký. Hā ký ěg jykre pāno tag vỹ tý nén ũ há nī. Hā ra tóg to ěg vóg kónān sór mū, ěg jykre pāno to, ti tý tý nén ũ há nī ra. Tag tugnīn tóg jykre pāno nī ve nī, Topě ti,” he sór ag hýn mū, Judeu ũ ag. Ěprā ke ag vỹ ón ký ví tý ge han tí.

⁶ Hā ra tóg há tú nī, ag ví tag ti. Topě jykre hā ne kuryj nī. Ti jykre há nīn ký tóg ěprā ke jykre to: “há tú ti nī,” henh ke mū. Jykre kuryj ti nī inhhā.

⁷ Hā ra Judeu ũ ag tóg ón ký: “věnhmý ěg ki króm ký nýtí vě,” he tí gé. “Ěg ón tigrīn Topě tý tý ũn mág nī tag vỹ věnh ven mū, ti ón vānh vỹ věnh ven mū ěg jāvo. Há tí nī, tag ti. Hā ký ti tý ěg ón mū tag to: “inh ví mranh ja ājag tóg nīgtí,” hen ký tóg věnhmýn ký tó mū, Topě ti,” he ag tóg tí, ón ký.

⁸ “Tí kórég han jé ěg tóg ke mū, Topě tý ěg jykre kórég tý nén ũ há han jé,” he ag tóg tí, ón ký. Ký ag tóg iso ón ký: “tag tó tí tí, Paulo ti,” he tí gé. Ů tý tag tó mū ag vóg kónān jé tóg ke mū, Topě ti, ag ón mū tag to, ti jykre kuryj nīn ký, ha vemní.

Ěg kar tý Topě ví mranh kān

⁹ Ký isý Judeu ag to ne tó nē? Ěg mý fóg ag káfór nýtí, ěg tý tý Judeu nýtín ký? Vó, ag káfór tú ěg nýtí. Topě ví mranh kān ěg mýr, Judeu, fóg, kanhgág, ěg kar mýr. Tag tó inh huri. Hā ra tóg ge nī.

¹⁰ Hā ký tag tóg rán ký nī gé, ha mē: “ŭn jykre kuryj vỹ tú tí, ŭn jykre kuryj venh ke tú pē ěg nīgtí.

¹¹ Věnh jykre há han ki kagtīg kar ěg nýtí, ũ tý Topě jykre han sór mū vỹ tú tí.

¹² Ěg kar vỹ Topě japyr, Topě jamīn tovānh kān ký nýtí. Jykre kórég kar ěg nýtí. Věnh jykre kuryj han vānh ěg nýtí. Ŭn jykre há venh ke tú pē ěg nī.

¹³ Un'ón (ka)mē kar ěg nýtí, jagně to. Ěg tý vēsér to nón ký vēsér ger tóg kākutě tí. Ěg ón vỹ vēsér ger tag ri ke nī. Jagně mý ěg tóg un'ón tí gé. Ěg ví jū tý ěg tóg jagně kāgtén ri ke han tí gé, ký tóg pýn veneno ri ke nī, ěg ví jū tí.

¹⁴ Věnh ví jū tý ěg fór nýtí, ký ěg tóg věnh kar mý ví kónān tí.

¹⁵ Jagně kāgtén (ka)mē ěg nýtí, tag hā tóg ěg mý sér tí.

16 Ęg tŷ hĕn mĭ mŷ kŷ ěg tóg nĕn ũ kar kókég tĭ, hă kŷ ěg mrĕ ke fag vŷ jagtar nŷtĭ, ěg to.

17 Ęg pi(jĕ) vĕnh jykre kusa ve sór tĭ'.

18 Topĕ kamĕg sór vănh ěg nŷtĭ," he ja tóg nĭgtĭ, Topĕ vĭ tŷ rán kŷ nĭ ki. Hă ra tóg ge nĭ.

19 Hă ra ěg kar vŷ tag ki kanhró nŷtĭ, ha mĕ. Ęg hă mŷ ti rán kŷ nĭ, Topĕ vĭ ti, ěg tŷ ki króm jĕ. Hă ra ěg tóg mranh kăn. Kŷ Topĕ tŷ ěg mŷ: "ti kórég han ā," he mŷ ra tóg ěg tŷ ti mŷ ne tónh ke tóg tŷ tĭ, ěg kar ti. Hă jĕ tóg ěg mŷ ā vĭ jĕnĕ ja nĭgtĭ, ěg tŷ to ěg kórég nĭ tag ki kanhrăn jĕ.

20 Topĕ vĭ ki króm kăn ja tŷ ěg tóg nŷtĭ, hă kŷ ěg kuryj tŷ nŷtĭ, Topĕ mŷ. Hă kŷ ěg tŷ Topĕ tŷ văsŷ ěg jyvĕn ja ěn mĕg mŷ ra ěg tóg Topĕ vĭ mranh ki kanhrăn mŷ, ti tŷ ěg mŷ: "tag han tŷg ra," hen kŷ. Ge ta ěg tóg mranh tĭ.

Topĕ tŷ ěg kren han sór

21-22 Văhă Topĕ jykre kuryj tóg vĕnh ven ja nĭgtĭ. Ti hă ne ěg mŷ vĕnh păte fón mŷ sir', inhăhă', ěg tŷ Jesus Cristo ki ge kŷ, ěg tŷ ti tŷ ěg jyvĕn ja ěn mranh ja (hă) ra. Ti jykre kuryj hă vĕ. Văsŷ tóg tó ja nĭ, Topĕ ti, ti tŷ tag han ke ti. Ā jykre si ki tóg tó ja nĭ, kŷ ti vĭ tó ti ag, profeta ěn ag tóg tó ja nĭgtĭ gé, ti jykre tăg ke ti. Ũ tŷ ti ki ge kŷ nŷtĭ kar mŷ tóg vĕnh păte fón tĭ. Kŷ ěg kar tóg jagnĕ ri ke nŷtĭ ha, ěg tŷ ti ki ge kŷ.

23 Topĕ vĭ mranh kăn ěg, vĕnh jykre kuryj han tŷ ěg nŷtĭ, Topĕ jykre kuryj tag han ki kagtĭg ěg nŷtĭ.

24 Hă ra tóg ěg jagăgtăn kŷ ěg mŷ vĕnh păte fón sór mŷ. Fagrĭnh mŷ ke vĕ, kajăm ke tŷ ěg tóg nĭ. Jesus Cristo tugnĭn tóg ěg kren han sór mŷ.

25 Topĕ ne Jesus fĕg', ti hă tŷ ěg tŷ Topĕ vĭ mranh tŷ tŷg' hen jĕ, ti ter kŷ ti kyvĕnh tŷ ěg jagfy ti ki kăkutĕ kŷ. Kŷ ěg tóg ti ki ră kŷ há nŷtĭ sir, Topĕ jykre kuryj hă vĕ sir. Jesus to ěg ki kanhrăn mŷ, vĕnh jykre kuryj ti. Hă kŷ Topĕ tóg ěg tŷ văsŷ ti vĭ mranh ja ěn to tóg ěg vóg ja tŷ nĭ ver, ěg to fen kŷ,

26 ti tŷ ũri ěg mŷ ā jykre tăg ven sór kŷ. Topĕ vŷ kuryj nĭ. Ti tŷ ěg mŷ vĕnh păte fón kŷ ěg ti mŷ kugryj nŷtĭ sir, ěg tŷ Jesus ki gen kŷ. Topĕ jykre kuryj hă vĕ sir.

27 Kŷ Judeu ag hŷn inh mŷ: "kŷ ěg mŷ Topĕ mŷ há tŷ nŷtĭ, ěg tŷ ti vĭ ki króm sór mŷ ra?" he sór mŷ. Hŷ, hă vĕ. Kórég ěg nŷtĭ, hă kŷ ěg tóg ti vĭ ki króm sór mŷ ra mranh tĭ. Ęg tŷ ti ki ge kŷ tóg ěg mŷ vĕnh păte fón tĭ, kŷ ěg há nŷtĭ.

28 Tag ki kanhró ěg nŷtĭ, ha mĕ. Ęg tŷ Topĕ jykre si ěn han sór mŷ ra ěg jykre păno vŷ ěg kăkă nĭ nĭ. Ęg tŷ Jesus ki gen hă kŷ tóg ěg mŷ vĕnh păte fón ke mŷ hă ra.

29 Topĕ pi(jĕ) Judeu ag tăvĭ vég nĭ nĭ'. Fóg ag vég ti nĭ gé, kanhgág ag ke gé.

30 Pir ti nĭ, Topĕ ti. Hă kŷ tóg ũ tŷ ti ki ge mŷ ag mŷ vĕnh păte fón tĭ, Judeu ag mrĕ hă, fóg ag mŷ ke gé, kanhgág ag mŷ ke gé. Ęg tŷ ti ki ge to tóg ěg mŷ vĕnh păte fón tĭ, ěg kar mŷ.

31 Kŷ ěg mŷ ti ki ge kŷ (ěg mŷ) Topĕ tŷ văsŷ ěg mŷ vĕnh jykre nĭm ja ěn tŷ tŷg' he tĭ, Topĕ tŷ Judeu ag jyvĕn ja ěn ti? Vó. Văhă ěg ki króm há han ki kanhró nŷtĭ, Topĕ tŷ ěg mŷ vĕnh jykre nĭm ja ěn ki.

4

Topĕ tŷ Abraăo mŷ vĕnh păte fón

1 Kŷ Judeu ag hŷn inh mŷ: "ěg jóg'jóg ve pĕ tŷ Abraăo hŷn hĕ ri ke tĭ?" he sór mŷ.

2-3 “Nén ũ há kar han ti tĩ, Abraão ti, hã tigrĩn tóg tỹ Topẽ mỹ ũn há nĩ,” he sór ag hỹn mũ, Judeu ag. Vó, hã tũ vẽ. Ti ki rã tugnĩn ke vẽ. Hã kỹ tag vỹ ti to rán kỹ nĩ, ha mẽ: “Abraão vỹ Topẽ ki rã, hã kỹ tóg tỹ Topẽ mỹ ũn há nĩ, ti tỹ ti ki rã tigrĩn,” he tóg mũ, Topẽ vĩ rán ki. Ti tỹ nén ũ há han tugnĩn Topẽ mỹ tỹ ũn há nĩ ra tóg vẽso: “tỹ sóg ũn há nĩ, ag kar kãfór,” henh ke mũ vẽ, vễsỹ ũn há han sór kỹ. Hã ra ẽg vễsỹ ũn há han ki kagtĩg nỹtĩ.

4 Hã vẽ, ẽg rãnrhãj to ẽg tóg ẽg rãnrhãj kaja vэг tĩ. Fagrĩnh mỹ ke tũ vẽ, ẽg rãnrhãj kaja ti.

5 Topẽ jykre vỹ ge tũ nĩgtĩ. Ẽg tỹ ti ki ge kỹ ẽg tóg ti mỹ tỹ, ũn há nỹtĩ. Ẽg tỹ ti ki ge tigrĩn tóg ẽg mỹ vễnh pãte fón tĩ, ẽg tỹ ti vĩ mranh ja ti. Ẽg rãnrhãj pijé'. Topẽ tỹ nén han mũn hã vẽ.

6 Hã kỹ vẫsỹ ẽg pã'i tỹ Davi tóg tó ja nĩgtĩ gé. Ẽ tỹ nén ũ kórég han tĩ ẽn to tóg vĩ há han ja nĩ, Davi ti. Topẽ vỹ ẽg mỹ vễnh pãte fón tĩ, ẽg tỹ ti vĩ mranh ja ti. Topẽ tỹ ũn mỹ vễnh pãte fón ja ẽn to Davi tóg tag tó ja nĩgtĩ, ha mẽ:

7 “Topẽ vỹ ẽg ve há han ke mũ, hã kỹ tóg ẽg mỹ ẽg tỹ ti vĩ mranh ja ẽn tỹ vễnh pãte fón tĩ. Kỹ ẽg ve mãn ke tũ nĩ ha, ẽg jykre pãno ja ẽn ti, ti tỹ vễnh pãte fón kỹ nĩn kỹ.

8 Topẽ vỹ ẽg ve há han ke mũ, hã kỹ tóg ẽg mỹ ẽg tỹ ti vĩ mranh ja ẽn kaja kórég ẽn ven ke tũ pẽ nĩ,” he ja tóg nĩgtĩ, Davi ti.

9 Kỹ Judeu ag hỹn inh mỹ: “Davi hỹn ũ tỹ hẽ to tag tó ja nĩgtĩ?” he sór mũ. “Judeu jykre han mũ ag to ke mỹ vó, ag jykre han tũ ag to ke mỹ vó?” he sór ag hỹn mũ. Ẽg kar to ke vẽ. Hã vẽ, Abraão to sóg: “ti tỹ Topẽ ki rã tigrĩn tóg tỹ Topẽ mỹ ũn há nĩ,” he ja nĩ.

10 Kỹ ti jykre tỹ Topẽ mỹ kuryj nĩ ẽn kã ti mỹ Judeu ag jykre han kỹ tĩ nĩ', Abraão ti? Vó, ẽn kã ti ẽg jykre han tũ nĩ ver. Ẽn kã ti ã gré junun fár kym ja tũ nĩ ver.

11 Topẽ vỹ ti mỹ vễnh pãte fón, ti tỹ ti ki rã tugnĩn, ti tỹ ver Israel ag jykre ki kagtĩg nĩn kã. Ti mỹ vễnh pãte fón kar kỹ Topẽ tóg ti mỹ ẽg jykre tag nĩm ja nĩ, ti tỹ ã gré junun fár kym je sir, vễnh kar tỹ ti jykre há nĩ ki kanhrãn je. Hã kỹ tóg tỹ ũ tỹ Topẽ ki ge mũ kar jóg nĩ sir, Abraão ti, ag tỹ Judeu ag jykre han tũ ra, ag tỹ ãjag fár kym tũ ra ke gé. Topẽ ki ge kỹ ẽg tóg Topẽ mỹ tỹ ũn há nỹtĩ, Abraão ri ke.

12 Kỹ tóg tỹ Judeu jykre han mũ ag jóg'jóg ve pẽ nĩ gé sir, Abraão ti, ag tỹ ti mré Topẽ ki ge kỹ. Judeu jykre han to hã tóg Topẽ ki rã, ẽg jóg tỹ Abraão ti. Kỹ ẽg tỹ Topẽ ki ge kỹ tóg tỹ ẽg jóg pẽ nĩ gé sir, ẽg tỹ tỹ Judeu krẽ nỹtĩ ra Topẽ ki ge kỹ nỹtĩn kỹ.

13 Topẽ vỹ Abraão mỹ: “ã krẽ vỹ ga kar mĩ mũnh mũ, kỹ tóg tỹ ag tũ kar nĩnh mũ,” he ja nĩgtĩ. Ti tỹ Topẽ vĩ ki ri tigrĩn tóg ti mỹ tag tó. Vễnh jykre si ki króm tugnĩn ke pijé'. Ti tỹ Topẽ ki rã kỹ tóg ti mỹ tỹ ũn há nĩ, hã kỹ Topẽ tóg ti mỹ tag tó ja nĩ.

Topẽ tỹ ũ tỹ ti ki ge kỹ nỹtĩ ag to há

14-15 Ha vé, ẽg tỹ Topẽ tỹ vẫsỹ ẽg mỹ vễnh jykre nĩm ja ẽn han sór mũ ra ẽg tóg mranh tũ, kỹ Topẽ tóg ẽg vóg kónãn ke mũ vẽ sir. Hã kỹ ẽg tóg ti tỹ ẽg mỹ nén ũ há tó ja ẽn venh ke tũ pẽ nĩ vẽ sir. Ẽg vóg kónãn je tóg ke mũ vẽ sir, kỹ tóg ẽg mỹ nén ũ há nĩm ke tũ nĩ vẽ sir. Kỹ tóg ẽg mỹ: “ha inh ki rã,” henh ke tũ nĩ vẽ gé. Topẽ tỹ ẽg vóg kónãn ke mũ há ne kã nĩ vẽ', ti vĩ mranh tigrĩn.

16 Hã ra tóg ẽg mỹ: “ha inh ki rã, sỹ ãjag mỹ nén ũ há ẽn han je, ãjag tỹ inh ki ge tigrĩn,” he ja nĩgtĩ. Ti tỹ ẽg jagãgtãn hã vẽ. Topẽ tóg Abraão krẽ kar ag mỹ

vin sór mū, ā tŷ nén tó ja ěn. Ti pi(jé) Judeu jykre han mū ag tāvī mŷ vin sór mū'. Ū tŷ Abraão ri ke Topē ki ge mū ag mŷ tóg vin sór mū gé, Topē ti. Ěg kar jóg'jóg ve vŷ tŷ ti nī, Abraão ti.

¹⁷⁻¹⁸ Topē hā ne ti mŷ: “ā krē tŷ sóg povo e hyn han ke mū,” he ja nī', hā kŷ tóg tŷ ěg kar jóg'jóg ve pē nī. Rán kŷ ti nī, Topē vī rán ki. Kŷ tóg ti vī tag kri fi ja nĭgtī, Abraão ti, ā tŷ ġir ve vānh nī ra, ti kófa nĭn kŷ. Ūn ter mū ag rĭnrĭr mān han ki kanhró tóg nī, Topē ti. Kŷ tóg nĕn kar han ki kanhró nĭgtī gé. Nĕn ū tóg tŷ ti ver; hā ra Topē tóg nĕn ū kar han ti, ā vī tŷ. Hā kŷ tóg Abraão mŷ ti kósin ke tó ja nĭgtī gé. Kŷ Abraão tóg ti vī kri fi ja nĭgtī. Ver tóg kósin ja tŷ nī, ā kófa nī ra, hā ra tóg Topē vī kri fi ja nĭgtī, Topē tŷ ti mŷ: “ā krē tŷ sóg povo e hyn han ke mū,” he ja tag to.

¹⁹⁻²⁰ Topē tŷ ti mŷ tag tó kŷ tóg 100 (ke) anos pétĕm, Abraão ti. Si há ti nī ja nĭgtī, ti prŷ tŷ Sara fi ke gé. Ģir han vānh fag nŷtī, ěn kā. Ěn hā kā Topē tóg ti mŷ ti krē e hyn han ke tó ja nĭgtī. Kŷ tóg ti vī kri fi ja nĭgtī, to krónh ke tŷ ja tóg nĭgtī. “Hŷ mŷ vŷ?” he ja tŷ ti nĭgtī, Topē vī tag to. Ti vī kri fi kŷ tóg Topē to: “ŭn mág vŷ tŷ ti nī,” he ja nĭgtī.

²¹ “Topē vŷ ā tŷ nén tó ja han ki kanhró nī,” he ja ti nī, Abraão ti, to krónh ke tŷ nĭn kŷ.

²² Tag hā tugnĭn tóg Topē mŷ tŷ ŭn há nī, ti tŷ ā fe tŷ ti ki rān kŷ.

²³ Topē vī tó tŷ ū tóg Abraão to rán ja nī, Topē vī rán ki, ti tŷ Topē mŷ tŷ ŭn há nī ti.

²⁴ Hā ra tóg ěg to rán ja nĭ gé. Topē mŷ ěg tóg tŷ ŭn há nŷtĭnh ke mū gé, Abraão ri ke, ěg tŷ ti ki ge kŷ. Hā kŷ tóg ěg Senhor tŷ Jesus rĭn mān ja nĭgtī, ti ter ja tá.

²⁵ Ěg jagfy tóg ter ja nī, Jesus ti, ti tŷ ěg tŷ Topē vī mranh tŷ tŷg' he jé. Hā jé Topē tóg ti fĕg ja nī. Kŷ tóg ti rĭn mān ja nĭ gé, ti tŷ ěg mŷ vĕnh pāte fón jé, ěg tŷ ti vī mranh ja ti.

5

Topē tŷ ěg to jŷ mān ke tŷ

¹ Kŷ tóg ěg mŷ vĕnh pāte fón mū sir, ěg tŷ Jesus Cristo ki ge kŷ nŷtĭn kŷ. Kŷ ěg tóg jatun mŷ nŷtī, Topē tŷ ěg to jŷ mān tŷ nĭn kŷ, ěg Senhor tŷ Jesus Cristo tugrĭn.

² Ti hā tugnĭn Topē tóg ěg jagāgtān tī. Tag tugrĭn ěg tar nŷtī sir. Kŷ tóg ěg mŷ sér tī gé. Topē vŷ ěg tŷ ŭn mág han ke mū, ti tŷ tŷ ŭn mág nī ěn ri ke han jé tóg ke mū, kŷ tóg ěg mŷ sér tĭnh mū sir.

³ Ver ěg tóg ti jagy vég tī, tag ki. Hā ra tóg ěg mŷ sér tī gé, ěg tŷ ti jagy vég mŷ ra. Ěg tŷ ti jagy vég mŷ tag ne ěg tar han ke mū', komĕr hā.

⁴ Ěg tar nŷtĭn kŷ ěg ti tovānh sór tŷ nī ki kanhró nŷtī sir. Ěg tŷ ti tovānh sór tŷ nŷtĭn kŷ ěg tóg Topē tŷ ěg mŷ nĕn tó ja kar venh ke mū, ti tŷ ěg mŷ nĕn ū há ven ke ěn ti, tá.

⁵ Ěg pi(jé) venh ke tŷ nī', Topē tŷ nĕn tó ja ěn ti. Ěg mŷ tóg ā kuprĭg jĕnĕ huri, ti tŷ tŷ ěg jagrĕ nī jé. Ěg jagrĕ tag vŷ ěg mŷ: “Topē vŷ ā to há nī,” he tī. Ti hā tugrĭn ěg ki kanhró nŷtī, ěg tŷ Topē tŷ ěg mŷ nĕn tó ja ěn venh ke ki.

⁶ Jykre pāno ěg nŷtī, krój ěg nŷtī. Ěg tŷ ver kórĕg nŷtī ěn kā Cristo ne ěg jagfy ter ja nĭgtī'.

⁷ Ti jāvo ěg kā ū tóg ěg jagfy ter ke tŷ nī. Ūn jykre há jagfy ter ke tŷ ěg nŷtī.

⁸ Ěg jāvo Cristo vŷ ěg jagfy ter ja nī, ěg tŷ tŷ Topē vī mranh jafā nŷtī ra. Hā ki ěg ki kanhró nŷtī, Topē tŷ ěg to há tāvī nī ti.

⁹ Kÿ Topê tóg êg mÿ vènh pãte fón mÿ sir, Jesus tÿ êg jagfy ter ja tugnÿn, ti kyvènh tugrÿn. Kÿ tóg Topê tÿ vènh kar to jÿnh ke kurã ên ki êg kren han ke mÿ gé, ha mÿ.

¹⁰ Êg tÿ ver ti kato tẽ nÿtÿ ra Topê kósin tóg êg jagfy ter, kÿ Topê tóg êg to há nÿ, êg to jÿ mãn tÿ ti nÿ. Kÿ tóg êg to há nÿ ha. Kÿ tóg kurã ên kã êg kren han ke mÿ gé, ti rÿr jÿn kÿ, ti kósin ti.

¹¹ Kurã ên kã tóg êg kren han ke mÿ, há ra tóg ùri êg to há nÿ gé, kÿ tóg êg mÿ sér tÿ. Êg Senhor tÿ Jesus Cristo tugnÿn ke vÿ. Ti há ne Topê tÿ êg to há nÿnh ke han'. Ti há ne Topê tÿ êg to jÿ tÿ tú' he mÿ'.

Adão vÿ Topê vÿ mranh vén, Jesus vÿ ki króm kãn

¹² Ha vé, ùn pir vÿ Topê vÿ mranh vén, kÿ Topê vÿ mranh vÿ kã nÿ nÿ sir. Ti vÿ mranh tugrÿn tóg ter ja nÿ gé, ù tÿ ti vÿ mranh vén mÿ ên ti. Û tÿ ti vÿ mranh vén ja ên ri ke êg nÿtÿ. Topê vÿ mranh kãn ja êg tóg nÿ gé, êg tÿ tÿ ùn ve nón ke nÿtÿn kÿ. Kÿ êg tóg kãgter kãn ke mÿ gé, Topê vÿ mranh kÿ.

¹³ Topê tÿ êg jyvèn to há ag tóg ti vÿ mranh ja nÿgtÿ gé, há ra ag tóg vènh jykre kórég to: “Topê vÿ mranh vÿ,” he ja tú nÿ ver, ag tÿ Topê tÿ êg jyvèn tí ên mÿ ja tú nÿn kÿ, Moisés tÿ Topê vÿ rán ja to há.

¹⁴⁻¹⁵ Ge ra ag tóg kãgter ja nÿ, ên to. Adão vÿ ter, ti nón ke ag vÿ kãgter, Moisés mur to há. Adão ne Topê tÿ ti mÿ ka kanê to: “ko tÿg nÿ,” he ja ên ko ja nÿgtÿ'. Ti nón ke ag vÿ Topê vÿ mranh gé, há ra ag pi(jé) Adão tÿ Topê vÿ mranh ja ên ri ke hyn han ja nÿgtÿ'. Ge ra ag tóg kãgter. Kÿ êg ùri kãgter tí gé, êg tÿ ùn ve ên nón Topê vÿ mranh kÿ.

Ùn pir tÿ Topê vÿ mranh vén ja tugrÿn êg tóg kãgter kãn ke mÿ. Ùn ve tÿ êg jo vènh jykre kórég han jan há vÿ. Ti jávo ti nón ke ên ti, Jesus há vÿ êg mÿ vènh jykre há nÿm ke mÿ. Ti tugnÿn Topê vÿ ùn e távÿ jagãtãn ke mÿ sir. Êg mÿ tóg nén tÿ hèn ri ke hyn han ke mÿ sir, kÿ tóg presente há távÿ ri ke nÿ sir, ùn pir tugrÿn, há vÿ: Jesus Cristo, he mÿ. Kÿ Jesus tÿ êg mÿ vènh jykre há nÿm mÿ ên vÿ ùn ve tÿ êg mÿ vènh jykre kórég nÿm ja ên kãfór nÿ.

¹⁶ Ùn pir tÿ Topê vÿ mranh vén ên tugnÿn êg kãgter kãn ke mÿ. Topê vÿ mranh pir tugrÿn tóg êg vóg kónãn kãn ke mÿ. Há ra tóg êg mÿ presente ri ke han sóm mÿ ha. Êg jagãgtãn tóg tí, êg tÿ ti vÿ mranh tÿ hèn ri ke han ja ra, kÿ tóg êg mÿ vènh pãte fón mÿ gé sir.

¹⁷ Ùn pir tÿ Tope vÿ mranh vén ja tugnÿn êg kar kãgter kãn ke mÿ. Há ra tóg ùn pir ù tugrÿn êg jagãgtãn ke mÿ ha, kÿ tóg êg mÿ vènh pãte fón mÿ. Kÿ tóg êg kugrynh ke mÿ. Êg mÿ presente ri ke han há vÿ. Kÿ êg tóg rÿnrÿr mãn ke mÿ gé, kÿ êg tóg tá tÿ ùn mág nÿtÿnh mÿ sir, ùn pir tugnÿn, há vÿ: Jesus Cristo, he mÿ. Há ki Jesus tÿ êg mÿ vènh jykre há nÿm mÿ tóg ùn ve tÿ êg mÿ vènh jykre kórég nÿm ja ên kãfór nÿ.

¹⁸ Hÿ, ùn pir tÿ Topê vÿ mranh vén ja tugrÿn Topê tóg êg vóg kónãn kãn ke mÿ sir. Ri ke ti nÿ, Jesus tÿ êg kren han mÿ ti. Ùn pir tÿ Topê vÿ ki króm kãn tugnÿn Topê tóg êg kar jagãgtãn ke mÿ sir, kÿ tóg êg mÿ vènh pãte fón ke mÿ, êg kãgter mãn tú nÿ jé, êg kuprÿg ti.

¹⁹ Ùn pir tóg Topê vÿ han ja tú nÿ, kÿ êg kar vÿ Topê vÿ mranh tí sir, ti nón. Kar kÿ ùn pir vÿ Topê vÿ han kãn ja nÿgtÿ, kÿ Topê tóg ti tugrÿn êg mÿ vènh pãte fón kãn ke mÿ gé sir.

²⁰ Kÿ Topê tóg Moisés tÿ ãg jyvën ja nÿgtÿ, hã kÿ tóg rán ja nÿ. Kÿ ãg tóg ti vÿ mẽ kÿ ãg tÿ Topê vÿ mranh e han ja ãn ki kanhrãn mÿ sir. ãg tÿ ti vÿ mranh e tãvÿ nÿ ra Topê tóg ãg jagãgtãn kãfór han mÿ gé sir,

²¹ ti tÿ ãg jykre kugrynh jé sir. Nÿgme ki ãg tóg vár kãn ke mÿ vë, inferno ki, ãg tÿ Topê vÿ mranh to. Jagy ti nÿ. Hã ra Topê tóg ãg jagãgtãn kãn ke mÿ, kÿ tóg ãg kugrynh ke mÿ, kÿ ãg rÿr krÿg ja tÿ venh ke mÿ, nÿgme ki vár ke tÿ ãg nÿtÿ, inferno ki. Topê tÿ ãg jagãgtãn hã vë, ãg Senhor tÿ Jesus Cristo tÿ ãg jagfy ter ja tugrÿn ken hã vë.

6

Jesus Cristo tÿ ãg jykre si tÿg

¹ Kÿ Judeu ù hÿn inh mÿ: “kÿn hÿn há nÿnh mÿ, ãg tÿ Topê vÿ mranh kÿ,” he sór mÿ. “Kÿ tóg ãg jagãgtãn kãfór han ke mÿ gé, ãg tÿ mranh mág kÿ,” he sór ag hÿn mÿ.

² Vó, há tÿ pë ti nÿ. Kórég ti nÿ. Ti ki ge kÿ ãg tóg vënh jykre tãg han tÿ, kÿ ãg jykre si tóg tÿ ti ha, ti tÿ ãg jykre si tÿ tÿ' hen kÿ.

³ Ha vé, vënh kype kÿ ãg nÿtÿ. Batismo tag vÿ ge nÿ, ha mẽ. ãg tÿ Cristo ki rã to ken hã vë. Cristo vÿ ter ja nÿ. Ter kÿ tóg ãg jykre si tÿ tÿ' hé.

⁴ Tÿg kÿ tóg ti mré vënh kej kãkã nÿ ri ke han mÿ gé, ãg jykre si ti. Kÿ Cristo vÿ rÿr mãn, ter kar kÿ, Topê tÿ ti rÿn mãn kÿ. Tar ti nÿ, Topê ti, hã kÿ tóg ti rÿn mãn. ãg tÿ ti mré rÿr mãn ri ke ti nÿ, hã vÿ: vënh jykre tãg to tar nÿ, he mÿ. Batismo to ken hã vë.

⁵ ãg jykre si tÿ tóg tÿ' hé, ti ter kÿ, kÿ ãg jykre tãg tóg nÿ ha, ãg tÿ ti mré rÿnrÿr nÿtÿn kÿ, ti rÿr mãn ãn ri ke.

⁶ Ti tÿ cruz to sa kÿ ãg jykre si tóg ti mré to sa ri ke han gé, kÿ tóg tÿ' he mÿ, ãg tÿ ti vÿ mranh mãn tÿ nÿ jé. Topê vÿ mranh jafã vÿ tÿ ãg nÿtÿ ja nÿgtÿ, hã kÿ tóg tÿ tÿg' he ja nÿ, Jesus Cristo ti. Hã kÿ ãg tóg ùri Topê vÿ mranh tÿ ag ri ke tÿ nÿtÿ ha.

⁷ ãg jykre si tÿg kÿ ãg tóg jykre kuryj nÿtÿ ha, ha mẽ, kÿ ãg tóg mranh sór mãn tÿ nÿ ha.

⁸ Cristo vÿ ãg jykre si tÿ tÿg' hé, ti ter kÿ. Kÿ tóg ãg mÿ vënh jykre tãg han mÿ gé, rÿr mãn kÿ, kÿ ãg tóg ti mré jykre tãg ãn hã mÿ mÿnh mÿ. Vënh vÿ há to ken hã vë.

⁹ Cristo ne rÿr mãn', ter kar kÿ. Kÿ tóg ter mãn ke tÿ nÿ ha. Û vÿ ti tén mãn ke tÿ pë nÿ ha.

¹⁰ Ter ja ti nÿ. Ti ter ja vÿ pir nÿ, ãg tÿ Topê vÿ mranh ãn tugnÿn. Kÿ tóg rÿr jé nÿ sir, Topê mÿ, ti tÿ Topê tÿ han kãn jé.

¹¹ Kÿ ti ri ke han nÿ. Topê vÿ mranh tÿg nÿ, ãgag jykre si ter kÿ nÿn kÿ. Topê jykre hã han nÿ, ãgag tÿ ti tÿ han kãn jé, ãgag tÿ Jesus Cristo ki ge kÿ nÿtÿn kÿ.

¹² ãg jykre vÿ Topê vÿ mranh sór mÿ, ãg jykre ter ke tag. ãg jykre tÿ nén to ãn mÿ ãn han tÿg nÿ, Topê vÿ mranh tÿg nÿ.

¹³ Kejën ãgag tóg ãgag pën tÿ, ãgag nÿgé tÿ, ãgag há ki nÿtÿ kar tÿ Topê vÿ mranh sór mÿ. Ágag tÿ mranh kÿ ãgag tóg ãgag há tÿ vënh jykre pãno han ja nÿtÿgtÿ, Topê kato tã ja nÿtÿgtÿ. Kÿ ke tÿg nÿ. Topê mÿ vënh fãg nÿ. Ágag jykre si ter kÿ, ãgag jykre tãg nÿtÿn kÿ Topê mÿ vënh fãg kãn nÿ, ti jykre hã han sór mnÿ, ãgag jykre tÿ, ãgag há ki nÿtÿ kar tÿ. ãg tÿ ti mÿ vënh fãg kÿ ãg tóg ti jykre há han kãn ke mÿ sir.

14 Kŷ ěg tóg ũri Topě vĭ mranh tĭ ag ri ke tũ nŷtĭ ha, Topě tŷ ěg jagăgtăn kŷ, ti tŷ ěg tar han kŷ. Ti tŷ ěg jyvĕn ja ěn tugnĭn tóg ěg vóg kónăn ke mŷ vĕ, ěg tŷ mranh kŷ, hă ra tóg ěg jagăgtăn mŷ ha.

Jesus Cristo tŷ ěg jykre tăg

15 Kŷ Judeu ag hŷn inh mŷ: “kŷ Topě vŷ ěg tŷ ti vĭ mranh mŷ ra ěg vóg kónăn măn ke tũ nĭ. Kŷ ěg hŷn jatun mŷ mranh mŷ,” he sór mŷ. “Ěg jagăgtăn ti tĭ, hă kŷ tóg tŷ nĕn ũ tũ nĭ, ti vĭ mranh mŷ ti,” he sór ag hŷn mŷ. Hă tũ vĕ hă ra. Kórég ti nĭ, ěg tŷ ti vĭ mranh kŷ.

16 Ěg tŷ ũ mŷ vĕnh fĕg kŷ tóg tŷ ěg patrăo nĭ, kŷ ěg hă vŷ tŷ ti camarada nŷtĭ. Ri ke ti nĭ, ěg tŷ Topě vĭ mranh sór kŷ. Ti vĭ mranh jafă vŷ tŷ ěg nŷtĭ, ěn kă. Ěg tŷ Topě vĭ kri fig tĭ nĭn kŷ ěg tóg ti mŷ há nŷtĭ sir.

17 Văsŷ ājag tóg tŷ Topě vĭ mranh jafă ja nŷtĭgtĭ. Hă ra ājag tóg ũri Topě vĭ kri fig tĭ ha, ājag fe tŷ ti ki ge kŷ. Ājag tŷ Topě vĭ mĕ ja ěn kri fig ājag tóg tĭ, kŷ sóg Topě mŷ vĭ há han tĭ, ājag to.

18 Topě vŷ ājag jykre kugrynh, ājag tŷ tŷ ti vĭ mranh jafă tũ nŷtĭ jé, ũri. Kŷ ājag tóg tŷ Topě krĕm ke nŷtĭ, ājag tŷ tŷ ti jykre kuryj mĭ mŷ jafă nŷtĭ jé, ũri.

19 Ājag mŷ sóg ěg tŷ tŷ ti vĭ ki króm jafă nŷtĭ tag tó mŷ, comparaçăo han kŷ, ājag tŷ to ěg tŷ tŷ ũn há mŷ vĕnh fĕg ki kanhró nŷtĭ jé, hă vŷ: Topě, he mŷ. Văsŷ ājag tóg vĕnh jykre păno han sór ja nŷtĭ, nĕn ũ kavĕj ti, nĕn ũ kórég kar ti. Tag han kŷ ājag tóg ũn kórég mŷ vĕnh fĕg ja nŷtĭ. Ŭri Topě mŷ vĕnh fĕg kăn, ājag tŷ tŷ ti tũ nŷtĭ jé, vĕnh jykre kuryj hă han jé sir.

20 Văsŷ, ājag tŷ tŷ Topě vĭ mranh kŷ nŷtĭn kŷ vĕnh jykre há tóg ājag mŷ tŷg ja nĭ.

21 Kŷ ājag ne han ja nŷtĭ, tempo ěn kă? Vĕnh jykre kórég tăvĭ han ja ājag tóg nŷtĭ. Ājag tŷ ājag jykre si to jykren kŷ tóg ājag mŷ'a tĭ, ũri. Vĕnh jykre tag tugnĭn ěg nŷgme ki văr kăn ke mŷ vĕ, hă kŷ tóg ājag mŷ'a tĭ, ājag tŷ ti kórég han ja to jykren kŷ.

22 Ŭri ājag tóg kygvar kŷ nŷtĭ, mŷr, ha mĕ, Topě vĭ mranh ja ěn tŷ tóg tŷg' he ja nĭ. Topě mŷ ājag vĕnh fĕg kŷ nŷtĭ. Ājag tŷ nĕn han mŷ vŷ tŷ ti tũ nĭ, ti jykre kuryj, kŷ ājag tóg ter ke tũ nĭ ha, ājag kuprĭg vŷ rĭr nĭ ha.

23 Topě vĭ mranh tugrĭn ěg nŷgme ki văr ke mŷ vĕ. Topě tŷ ěg vóg kónăn hă vĕ. Hă ra tóg ěg jagăgtăn mŷ, kŷ tóg ěg mŷ rĭr krŷg ja tũ ven ke mŷ. Ti tŷ ěg mŷ presente han hă vĕ, hă vŷ: ěg tŷ ěg rĭr krŷg ja tũ venh ke, he mŷ, ěg Senhor tŷ Jesus Cristo tugnĭn.

7

Vĕnh prŷg to comparaçăo

1 Inh kanhkă', Topě tŷ văsŷ ěg mŷ vĕnh jykre nĭm ja ěn ki kanhró ājag tóg nŷtĭ, Moisĕs tŷ rán ja ěn ti. Ěg rĭr nŷtĭn kŷ ěg tóg vĕnh jykre ěn han kŷ nŷtĭ, ěg ter kŷ tóg ěg mŷ tũ' he mŷ, vĕnh jykre ěn ti.

2 Ri ke ti nĭ gé, ěg prŷ fi mré. Fi mén rĭr jĕn kŷ fi tóg tŷ ti tũ jĕ, fi mén tũ. Ti ter kŷ fi tóg tŷ ti tũ tũ jĕ sir, ti tŷg kŷ.

3 Fi mén rĭr jĕn kŷ fi tóg tŷ ti tũ jĕ. Fi tŷ ti rĭr tĭ ra ũ mré nŷ kŷ fi tóg ā mén tũ mré nŷ mŷ. Ti ter kŷ fi tóg mén tũ jĕ sir, kŷ, fi tŷ ũ mré tĭg sór kŷ tóg sir há tĭ, fi mén vĕ sir, fi tŷ ũ mré tĭ mŷ ěn ti.

4 Ri ke ti nĭ, Topě tŷ văsŷ ěg mŷ vĕnh jykre nĭm ja ěn ti. Cristo ter kŷ tóg ěg jykre si tŷ tŷg' hé gé. Hă kŷ tóg ěg tŷ ti tŷ ěg jyvĕn ja ěn mranh ja ra tóg ěg vóg

kónān ke tū nī sir. Vāhā ēg tóg t̄y Cristo tū n̄t̄i ha, ū t̄y ter kar k̄y r̄ir m̄an ja ēn tū v̄y t̄y ēg n̄t̄i. K̄y ēg tóg ūri Topē jykre hā han sór mū ha, ti m̄y sér t̄i jé.

⁵Vās̄y ēg tóg ēg t̄y n̄n to én ja ēn hyn han t̄i ja n̄gt̄i. K̄y ēg tóg v̄nh jykre kavéj han k̄an ja n̄gt̄i, ēg jykre t̄y, ēg há ki n̄t̄i kar t̄y ke gé. Ēg jykre kavéj tugr̄in ēg nūgme ki v̄ar ke mū vē. Topē t̄y ēg jyv̄ēn mū jēm̄ēn k̄y ēg tóg ki kanhr̄an mū, ēg t̄y ti v̄i mranh mū tag ki. Jér̄in m̄y ēg tóg mranh m̄an', mranh m̄an' he mū sir.

⁶Hā ra tóg ēg m̄y tū t̄i ha, ēg t̄y Topē t̄y vās̄y ēg jyv̄ēn jēm̄ēg mū ra mranh mū ti, Cristo t̄y ter k̄y ēg jykre si t̄y tūg' hen k̄y. Topē v̄i mranh sór tū ēg n̄t̄i ha. Ēg kygv̄an ti huri, k̄y ēg tóg Topē tū hā han t̄i sir, Topē kupr̄ig t̄y ēg kr̄in k̄y. K̄y ēg tóg Topē t̄y ēg jyv̄ēn to kanē jur han m̄an ke tū nī ha. Ki króm sór ēg n̄t̄i ha. Ēg kanē jur pijé'. Topē kupr̄ig t̄y ēg m̄y v̄nh jykre t̄ag n̄im jan hā vē.

V̄nh jykre kórég han k̄y ēg Topē v̄i mranh t̄i

⁷K̄y Judeu ag h̄yn inh m̄y: “k̄y Topē t̄y vās̄y ēg jyv̄ēn mū ēn m̄y kórég n̄i?” he sór mū. Vó, kórég tū ti nī. Ēg jyv̄ēn ja tóg n̄gt̄i, k̄y ēg tóg ti v̄i mē k̄y: “v̄nh jykre kórég han k̄y inh h̄yn tóg ti v̄i mranh t̄i,” he t̄i. Topē v̄y ēg m̄y: “n̄n ū to én tūg n̄i,” he ja nī. Tag jēm̄ēn k̄y ēg tóg ū tū to én tag t̄y Topē v̄i mranh nī ki kanhró n̄t̄i.

⁸Topē t̄y ēg jyv̄ēn mū ra ēg tóg ti v̄i mranh sór mūgt̄i, Jér̄in m̄y. Ti t̄y ēg m̄y: “tag han tūg ra,” he mū ra ēg tóg han sór t̄i, hā k̄y ēg tóg ū tū to én sór t̄i. Topē t̄y ēg jyv̄ēn tū ra ēg ki kanhr̄an ke tū nī vē, v̄nh jykre p̄ano t̄y ti v̄i mranh n̄in ki.

⁹Vās̄y ēg tóg Topē t̄y ēg jyv̄ēn mū ēn mēg tū ja n̄t̄igt̄i. Véké ēg tóg mū ja n̄t̄igt̄i, jatun m̄y. K̄y tóg vāhā ēg m̄y ā v̄i jēnē ja nī, Topē ti, ēg jyv̄ēn k̄y. Ēn mē k̄y ēg tóg ēg t̄y ti v̄i mranh ja ēn ki kanhr̄an ja n̄t̄igt̄i, ēg t̄y to nūgme ki v̄ar ke mū mré hā. K̄y ēg tóg kanē jur n̄t̄i ha.

¹⁰Topē v̄y tóg ēg jyv̄ēn, ēg t̄y nūgme ki v̄ar ke tū n̄t̄i jé. Jér̄in m̄y ēg tóg ki v̄ar ke mū, ēg t̄y ti t̄y ēg jyv̄ēn kri fig tū n̄in k̄y. Hā ve ēg tóg, ēg t̄y ti t̄y ēg jyv̄ēn mē k̄y.

¹¹Ēg t̄y Topē v̄i mranh k̄y ēg tóg Topē t̄y ēg jyv̄ēn mū kato tē mū. K̄y ēg nūgme ki v̄ar ke mū sir, ēg t̄y: “ti h̄yn t̄y n̄n ū tū nī, s̄y ti v̄i mranh mū ti,” he mū ra.

¹²Hā k̄y Topē t̄y vās̄y ēg jyv̄ēn mū ēn v̄y há nī, ti t̄y t̄y Topē tū n̄in k̄y. K̄y Topē t̄y vās̄y ēg m̄y v̄nh jykre n̄im ja ēn v̄y kuryj n̄i gé. Há ti nī, Topē tū v̄y t̄y ti nī gé.

¹³K̄y Judeu ag h̄yn inh m̄y: “ēg m̄y v̄nh jykre há tugn̄in nūgme ki v̄ar ke mū?” he sór mū. Vó, ke tū vē. Topē v̄i mranh tugr̄in ēg nūgme ki v̄ar ke mū. N̄n ū há ja vē, Topē t̄y ēg jyv̄ēn ja ti, hā ra ēg tóg mranh. Ēg t̄y Topē t̄y ēg jyv̄ēn mē k̄y ēg tóg ēg jykre kórég to: “ti v̄i mranh ja inh n̄gt̄i,” he t̄i. Hā ki ēg tóg ki kanhr̄an mū, ēg t̄y Topē v̄i mranh tag t̄y t̄y n̄n ū kórég t̄av̄i n̄in ki.

¹⁴Topē t̄y ēg jyv̄ēn mū ēn v̄y t̄y ti tū nī, ti kupr̄ig v̄y to ēg kanhr̄an t̄i. Jér̄in m̄y ēg tóg ēg t̄y n̄n to én mū ēn han sór t̄i, ēg krój n̄t̄in k̄y. Ti v̄i mranh k̄y ēg tóg t̄y ti v̄i mranh jafā n̄t̄i.

Ēg t̄y ti kórég han sór tū ra ēg tóg han t̄i

¹⁵Ēg jykre tóg inh m̄y e t̄i. S̄y n̄n to há ēn han tū sóg n̄gt̄i. S̄y n̄n to há tū ēn hā han sóg ti m̄y, k̄y tóg inh m̄y e t̄i.

¹⁶Ēg t̄y ti kórég han sór tū ra ēg tóg han t̄i. Ti v̄i mranh mū v̄y ēg m̄y kórég nī, k̄y ēg tóg ki kanhró n̄t̄i, ti t̄y ēg jyv̄ēn há han ja ēn ki. Ge ra ēg tóg mranh t̄i.

¹⁷ Ęg jykre si hã vĕ. Ęg tŷ Ęg jykre si tovãnh kãn ja tũ nĩn kŷ Ęg tóg ti vĩ mranh tĩ, Ęg tŷ mranh sór tũ (hã) ra. Ęg jykre tãg tũ vĕ, tag ti.

¹⁸ Ęg pi(jé) vĕnh jykre há to tar nŷtĩ'. Vĕnh jykre kórég vŷ ver Ęg kãkã nĩ nĩ. Vĕnh jykre kuryj tóg Ęg mŷ sér tí, ge ra Ęg tóg ti pãno han tí, Ęg tŷ ũn há han sór mũ ra.

¹⁹ Hã kŷ Ęg pi(jé) vĕnh jykre há han tí', Ęg tŷ han sór mũ ra'. Ti kórég hã han Ęg tí, Ęg tŷ han sór tũ ra.

²⁰ Ęg tŷ nén han sór tũ ěn han Ęg tóg tí, vĕnh vatãnh tá. Ęg jykre si hã tugrĩn Ęg tóg Topĕ vĩ mranh tĩ, Ęg tŷ tovãnh kãn ja tũ nĩn kŷ.

²¹ Ha vé, Ęg jykre ti. ũn há hã han sór Ęg tóg mũgtĩ. Ge ra Ęg tóg ũn kórég hã han tí, Ęg jykre si tŷ Ęg kãkã nĩn kŷ.

²² Ęg tŷ to jykren há han kŷ Ęg tóg: "Topĕ tŷ Ęg jyvĕn mũ vŷ há nĩ," he ti. Ęg mŷ tóg sér tí.

²³ Ęg tŷ hã ra Ęg jykre to jykren kŷ Ęg tóg vĕnh jykre kórég hã han mũgtĩ ver, vĕnh vatãnh tá. Kŷ Ęg tóg sir vĕnh jykre há kato tĕ mũ, Ęg tŷ vĕnh jykre kórég han kŷ, vĕnh jykre há tŷ Ęg mŷ há nĩ (hã) ra. Ti vĩ mranh jafã vŷ tŷ Ęg nŷtĩ, Ęg tŷ Topĕ vĩ mranh to ěn kŷ, Ęg tŷ to ěn sór tũ ra. Ęg kãkã tóg nĩ nĩ, vĕnh jykre kórég ti.

²⁴⁻²⁵ Ęg tŷ to jykren há han kŷ Topĕ tŷ Ęg jyvĕn tí ěn tóg Ęg mŷ há tí, kŷ Ęg tóg han sór mũ. Ge ra Ęg tóg ti vĩ mranh ja nĩgtĩ, kŷ Ęg tóg mranh mãn', mranh mãn' he tí sir, Ęg tŷ mranh sór tũ ra.

Jagy pĕ ti nĩ. Kórég Ęg nŷtĩ, Ęg tŷ ũn há han ki kagtŷg nŷtĩn kŷ. Nũgme ki vár kãn jé Ęg tóg ke mũ mŷr. Ũ nŷ hŷn Ęg kren han ki kanhró nĩ, vĕnh jykre kórég tag to? Ęg Senhor tŷ Jesus Cristo hã vĕ. Ti hã vŷ Ęg kren han mũ. Kŷ Ęg tóg Topĕ mŷ: "há ti nĩ, ã kósin tŷ Ęg kren han mũ ti," he tí. Hã kŷ Ęg tóg vĕsóg ki Ęg jykre si tŷ tũg' he ki kagtŷg nŷtĩ. Jesus hã tugnĩn Topĕ tóg Ęg mŷ vĕnh pãte fón tí, kŷ Ęg tóg ti mŷ há nŷtĩ.

8

Topĕ kuprĩg tŷ Ęg jagrĕ

¹ Kŷ tóg, Ęg tŷ Jesus Cristo ki rã kŷ Topĕ tóg Ęg vóg kónãn mãn ke tũ nĩ ha.

² Vĕnh jykre tãg vŷ Ęg kãkã nĩ ha, Topĕ kuprĩg tugrĩn, Ęg tŷ Jesus Cristo ki ge kŷ nŷtĩn kŷ. Ti tŷ tŷ Ęg jagrĕ nĩn kŷ Ęg rĩnrĩr nŷtĩ, kŷ Ęg kygvar kŷ nŷtĩ sir, Topĕ vĩ mranh jan ki. Nũgme ki vár ke tũ Ęg nŷtĩ ha.

³ Topĕ tŷ vãsŷ Ęg jyvĕn mũ ra Ęg krenkren ja tũ nĩ ver, Ęg tŷ ki króm kãn ja tũ nĩn kŷ, Ęg krónhkroj nŷtĩn kŷ. Hã kŷ Topĕ tóg ã kósin jĕnĕ ja nĩ. Ũ tŷ Topĕ vĩ mranh jafã ri ke tóg mur, Ęg ri ke, hã ra tóg mranh ja tũ nĩ inhhã. Kŷ tóg Ęg jagfy ter ja nĩ, Ęg hã tŷ ti vĩ mranh ja tugrĩn. Topĕ tŷ ti vóg kónãn hã vĕ, Ęg nŷtĩg ja ki.

⁴ Vãhã Ęg tóg Topĕ tŷ vãsŷ Ęg jyvĕn mũ ěn ki króm há nŷtĩ, Topĕ kuprĩg tŷ tŷ Ęg jagrĕ nĩn kŷ. Kŷ Ęg tóg Ęg tŷ nén to ěn mũ ěn han mãn ke tũ nŷtĩ sir, Ęg jagrĕ há tŷ Ęg tar han mũ tugnĩn.

⁵ Ęg tŷ Ęg tŷ nén to ěn mũ ěn han sór kŷ Ęg tóg tŷ Topĕ vĩ mranh jafã nŷtĩ. Ęg tŷ hã ra Topĕ kuprĩg tŷ jagrĕ nĩn kŷ Ęg tóg ti há tŷ Ęg mŷ nén tó mũ ěn han tí.

⁶ Ęg tŷ nén to ěn mũ ěn han kŷ Ęg nũgme ki vár ke mũ vĕ. Ęg tŷ Topĕ kuprĩg tŷ Ęg mŷ nén tó mũ ěn han kŷ Ęg tóg vĕnh jykre tãg han kŷ nŷtĩ, kŷ Ęg jatun mŷ mũgtĩ sir.

7 Ū t̄y ẽg t̄y n̄n to ẽn m̄ũ ẽn han k̄y tóg Topẽ kato tẽ m̄ũ sir. Ti pi(jé) Topẽ jykre han t̄i'. Han ki kagt̄ig tóg n̄igt̄i. Ẽg jykre sin hã v̄ẽ.

8 Ū t̄y ẽg t̄y n̄n to ẽn m̄ũ ẽn han to tóg kórég n̄i, Topẽ ti.

9 Ag jãvo ãjag tóg Topẽ kupr̄ig t̄y ãjag m̄y n̄n to m̄ũ ẽn hã han t̄i. Ẽg t̄y n̄n to ẽn m̄ũ ẽn han v̄anh ãjag n̄yt̄i, Topẽ kupr̄ig t̄y t̄y ãjag jagrẽ n̄n k̄y. Ū t̄y Cristo kupr̄ig t̄y jagrẽ tũ n̄i ẽn pi(jé) t̄y ti tũ n̄i'.

10 Cristo tũ v̄y t̄y ẽg n̄yt̄i, k̄y tóg ẽg kãkã jẽ n̄i, Jesus Cristo ti, ã kupr̄ig t̄y. K̄y ẽg há v̄y ter ke m̄ũ, ẽg t̄y Topẽ v̄i mranh jan k̄y. Hã ra ẽg tóg ẽg r̄ir kr̄yg ja tũ venh ke m̄ũ, Topẽ t̄y ẽg m̄y v̄ẽnh pãte fón ja n̄n k̄y.

11 Topẽ kupr̄ig v̄y t̄y ẽg jagrẽ jẽ ha. Topẽ v̄y Jesus r̄in m̄ãn, ti ter kar k̄y. Ti t̄y Jesus r̄in m̄ãn k̄y tóg ẽg há ter ke tag r̄in m̄ãn ki kanhró n̄i gé, ẽg m̄y ẽg há tãg han k̄y, ti kupr̄ig t̄y t̄y ẽg jagrẽ n̄n k̄y.

12 Inh kanhkã', Topẽ tũ v̄y t̄y ẽg n̄yt̄i ha, ẽg t̄y ti jykre hã han jé. K̄y han tũg n̄i, ãjag t̄y n̄n to ẽn m̄ũ ti.

13 Ẽg t̄y n̄n to ẽn m̄ũ ẽn han k̄y ẽg nũgme ki vár ke m̄ũ. Topẽ t̄y ẽg jagrẽ v̄y ẽg t̄y n̄n to ẽn m̄ũ tag t̄y tũg' he sór m̄ũ. Ẽg t̄y ti mré t̄y tũg' hen k̄y ẽg v̄ẽnh jykre tãg han k̄y n̄yt̄inh m̄ũ.

14 Ẽg t̄y Topẽ kupr̄ig t̄y ẽg m̄y n̄n to t̄i ẽn han k̄y ẽg tóg t̄y Topẽ krẽ n̄yt̄i, Jesus jãvy ẽg n̄yt̄i m̄y, ha mẽ.

15 Ẽg t̄y t̄y Jesus jãvy n̄yt̄in k̄y ti pi(jé) ẽg kanẽ jun ke m̄ũ'. Ti kupr̄ig v̄y t̄y ẽg jagrẽ n̄i, k̄y ẽg tóg t̄y Jesus jãvy n̄yt̄i ha. Topẽ pi(jé) t̄y ẽg patrão kórég ri ke n̄i'. T̄y tóg ẽg panh n̄i ha. Hã k̄y ẽg tóg ti m̄y: "Aba," he t̄i, hã v̄y: "ẽg jóg," he m̄ũ, ẽg v̄i ki. Ẽg jagrẽ hã jam̄en k̄y ẽg tóg ti m̄y: "ẽg jóg mág," he t̄i.

16 Topẽ kupr̄ig hã ne ẽg m̄y to t̄i', ẽg t̄y t̄y Topẽ krẽ n̄yt̄i ti, Jesus jãvy. Hã k̄y ẽg ki kanhró n̄yt̄i.

17 Ẽg t̄y t̄y ti krẽ n̄yt̄in k̄y tóg ẽg m̄y ã tũ n̄im kãn ke m̄ũ gé, Topẽ ti. Jesus Cristo hã m̄y tóg n̄im kãn ke m̄ũ, k̄y tóg ẽg m̄y n̄im kãn ke m̄ũ gé sir, ẽg kãke mré. Hã jé ẽg tóg ti mré jagãgtar ke m̄ũ gé, ti t̄y v̄ẽnh jykre há to jagtar ja ẽn ri ke. K̄y ẽg tóg ti mré t̄y ùn mág n̄yt̄inh ke m̄ũ gé, ẽg jagtar kar k̄y.

Kanhkã ve jé ẽg tóg ke m̄ũ

18 Ha vé, tag ki kanhró sóg n̄i, ha mẽ. Kanhkã tá tóg sér pẽ t̄inh m̄ũ. Tá ẽg tóg t̄y ùn mág n̄yt̄inh m̄ũ. K̄y ẽg t̄y ùri ti tugn̄in jagãgtar m̄ũ tag v̄y t̄y ẽg m̄y n̄n to tũ pẽ n̄igt̄i, ẽg t̄y t̄y ùn mág n̄inh ke to jykren k̄y.

19 Topẽ v̄y ã krẽ t̄y t̄y ùn mág han ke m̄ũ. K̄y Topẽ t̄y ùn han m̄ũ kar ag tóg tag hã ve sór m̄ũ gé, bicho kar, ka kar, ẽkrẽ kar ke gé, n̄n kar ti.

20 N̄n kar v̄y jagãgtar n̄yt̄i, ùn ve t̄y Topẽ v̄i mranh tugr̄in. V̄ẽnh kókén ja tũ ti n̄i, Topẽ v̄i mranh ja tũ ti n̄i, hã ra tóg ùn ve t̄y Topẽ v̄i mranh ja tugn̄in jagtar n̄yt̄i, Topẽ t̄y ẽg mré ti vóg kónãn k̄y, n̄n kar ti.

21 Hã ra Topẽ tóg ã t̄y ùn han m̄ũ kar ag m̄y: "kejẽn ãjag jagtar m̄ãn ke tũ n̄yt̄i ha," he ja n̄i. K̄y Topẽ t̄y Jesus jãvy ag t̄y ùn mág hyn han ke kurã ẽn kã tóg n̄n kar t̄y há' henh ke m̄ũ gé, k̄y tóg tũg m̄ãn ke tũ n̄i ha, n̄n kar ti. N̄n kar v̄y há n̄yt̄inh m̄ũ, Jesus jãvy há n̄yt̄inh ke ẽn ri ke.

22 Ver tóg Topẽ t̄y ùn han m̄ũ kar ag m̄y jagy t̄i, k̄y tóg fag t̄y fag kósin m̄ãn k̄y fag v̄ẽnhkrẽr ẽn ri ke han t̄i, Topẽ t̄y ùn han kar ti, ti jagãgtar n̄yt̄in k̄y.

23 N̄n ù kar tag v̄ẽnhkrẽr ri ke han ẽg tóg t̄i gé, ẽg t̄y ti jagy ven k̄y, ẽg t̄y ti kupr̄ig t̄y jagre n̄yt̄i ra. Ẽg jagrẽ to ẽg tóg ki kanhró n̄yt̄i, ẽg t̄y tá t̄y ùn mág n̄yt̄inh ke ti. Ge ra tóg ver ẽg m̄y jagy t̄i, tag ti ki, k̄y ẽg tóg ti mré n̄yt̄i sór m̄ũ.

Kỹ ẽg tóg venh ke mũ sir, ti tỹ ã krẽ pẽ mỹ nén nĩm ke mũ ẽn ti. Hã jãvãnh ẽg tóg mũ. Ẽn kã tóg ẽg mỹ ẽg fár tãg han ke mũ, ẽg fár ter ke tũ ti.

²⁴ Krenkren kỹ ẽg nỹtĩ, hã ra ẽg tóg ver vég tũ nĩgtĩ, ẽg krenkren kỹ nỹtĩ tag, ẽg fár tãg tag. Ẽg tỹ venh há tóg tĩ. Hã jãvãnh ẽg tóg tĩ. Ẽg tỹn jãvãnh mũ ra ẽg tóg ver vég tũ nỹtĩ. Ẽg tỹn ve kar kỹ ẽg tóg ti jãvãnh mãn ke tũ nỹtĩ ha.

²⁵ Hã ra ẽg tóg ver vég tũ nỹtĩ, hã kỹ ẽg tóg ti jãvãnh mũ ver. To krónh ke tũ ẽg tóg nỹtĩ, ti jãvãnh to.

Topẽ kuprĩg tỹ ẽg jagfy vĩ

²⁶ Hã ra Topẽ kuprĩg vỹ ẽg tar han tĩ, ẽg krój nỹtĩn kỹ. Kejẽn ẽg ki kagtĩg nỹtĩ, ẽg tỹ ne to vĩnh ken ki, ẽg tỹ Topẽ mré vēmén kỹ. Hã kỹ tóg ẽg jagfy vĩ tĩ, Topẽ kuprĩg ti. Kejẽn ẽg jẽnger mág han tĩ, ẽg tỹ nén ù to vĩnh ken ki kagtĩg nỹtĩn kỹ. Hã ra tóg ẽg mré vĩ tĩ gé, ẽg jagfy, Topẽ kuprĩg ti. Ti vĩ ki kagtĩg ẽg nỹtĩ, hã ra tóg ẽg jagfy vĩ vĩ he tĩ.

²⁷ Kỹ Topẽ vỹ ẽg tỹ nén ù to jykrén mũ kar vég tĩ. Kỹ tóg ã kuprĩg tỹ nén tó mũ tag ki kanhró nĩ gé. Ti jykre vỹ ti mỹ há nĩ, ti tỹ nén to vĩ mũ ti, ẽg jagfy, Topẽ tũ kar ag jagfy. Topẽ tỹ nén ù han sór mũ ẽn hã to vĩ tóg tĩ, ti kuprĩg ti.

²⁸ Ha vé, Topẽ to há ẽg nỹtĩ, hã kỹ ẽg tỹ nén vég mũ kar vỹ ẽg tar han ke mũ, ẽg tỹ ti jagy vég mũ mré hã. Topẽ hã vỹ ẽg ki rĩr mũ, hã kỹ nén ù kar vỹ ẽg tar han ke mũ, ti tỹ ẽg kuprẽg ja nĩn kỹ.

²⁹ Ẽg tỹ ti ki ge tũg ki tóg: “inh ki tóg rãnh ke mũ, tag,” he ja nĩ, ki kanhró nĩn kỹ. Kỹ tóg ẽg kuprẽg ja nĩ gé, ẽg tỹ ti kósın ri ke pẽ nỹtĩ jé. Ti hã vỹ tỹ Topẽ kósın pẽ nĩ inhã, ti kósın ve, kỹ tóg tỹ ẽg kãke nĩ gé sir, kỹ ti jãvy ag, ti ve fag vỹ e tãvĩ tãvĩ nỹtĩnh mũ ha. Ẽg hã vẽ sir. Topẽ tỹ nén to jykrén hã vẽ.

³⁰ Hã jé tóg ẽg kuprẽg, kỹ tóg ẽg mỹ vẽnĩ vĩ jẽnẽ. Ti tỹ ẽg mỹ vẽnĩ vĩ jẽnẽ kỹ tóg ẽg mỹ vẽnĩ pãte fón gé. Ẽg mỹ vẽnĩ pãte fón kỹ tóg ẽg tỹ ùn mág hyn han ke mũ gé, ti mré, tá.

Topẽ tỹ ẽg to há

³¹ Tag tóg inh mỹ e tĩ, sỹ to jykrén ke tóg inh mỹ tũ tĩ. Topẽ vỹ tỹ ẽg mré ke nĩ mỹr. Hã kỹ ẽg kato tẽ ù pi(jé) ẽg tỹ hẽ ri kenh mũ ha'.

³² Topẽ vỹ ã kósın pir fẽg ja nĩ, ti tỹ ẽg jagfy ter jé. ã kósın pir nenh ja tũ tóg nĩ, hã kỹ tóg ẽg mỹ nén ù há nenh ke tũ pẽ nĩ, ti tỹ ã kósın pir nenh ja tũ nĩn kỹ.

³³ Topẽ tỹ ẽg kuprẽg kỹ tóg ù tỹ ẽg kato vĩ sór mũ ra tóg ag mỹ vẽnĩmỹ tĩ. Topẽ hã ne ẽg mỹ vẽnĩ pãte fón ja nĩgtĩ'.

³⁴ Kỹ ù ag tỹ ẽg to: “kórég ag nỹtĩ,” he mũ ra ẽg tóg Topẽ mỹ há nỹtĩ. Jesus Cristo hã tóg ter ja nĩ, ẽg jagfy, kỹ tóg rĩr mãn ja nĩ gé. Topẽ pẽgja tá tóg nĩ nĩ, ti rã hã, kỹ tóg ẽg jagfy vĩ tĩ.

³⁵ Kỹ ù pi(jé) Cristo tỹ ẽg to jũ han ki kanhró nĩ'. Ti fe vỹ tỹ ẽg nỹtĩ. Kejẽn ẽg tóg nén ù jagy venh ke mũ, ti tugrĩn. Kejẽn ẽg kanẽ jur ke mũ. Kejẽn ag tóg ẽg vóg kónãnh ke mũ. Kejẽn ẽg tóg kókĩnkĩr ke mũ. Kejẽn ẽg tóg kur venh ke tũ nĩ gé. Kejẽn ẽg tóg kãgter kren ke mũ. Kejẽn ag tóg ẽg kãmĩ ù tén ke mũ. Jérĩn mỹ ẽg tóg Cristo tovãnh ke tũ nĩ. Kỹ tóg ẽg tovãnh ke tũ nĩ gé, Jesus Cristo ti. Ẽg to há nĩn kỹ tóg nĩ nĩ.

³⁶ Kejẽn ẽg tóg ti jagy tag vég tĩ, hã kỹ tóg rán kỹ nĩ, ha mẽ: “ẽg tỹ ã to há nỹtĩ tugnĩn ag tóg ẽg tén sór tĩ, kurã kar ki. Ag mỹ ẽg tóg carneiro ri ke nỹtĩ. Carneiro tãnh ẽg tóg tĩ, ẽg tỹ ko jé. Vẽnĩ mẽg ri ke ẽg nỹtĩ, ag mỹ, ẽg tỹ ã to há nỹtĩ tugrĩn,” he ja tóg nĩ, Topẽ vĩ rá ki. Hã ra tóg ge nĩ.

³⁷ Hã ra tóg tỹ nén ù tũ nĩ, ěg mỹ. Ti hã ne ěg tar han tĩ', ù tỹ ěg to há tãvĩ nĩ tĩ. Hã kỹ tóg ěg mỹ sér tĩ, ěg tỹ nén jagy vég mũ ra, ti tugrĩn.

³⁸ Ha vé, tag ki kanhró sóg nĩ, ha mẽ. Nén ù pi(jé) Topê tỹ ěg to há nĩ tag tỹ tũg' henh mũ', ha mẽ. ěg ter mũ ra tóg ěg to há nĩ, ěg ter tũ ra ke gé. Topê tỹ jěně jafã ag vỹ Topê tỹ ěg kato tẽ han ki kagtũg nỹtĩ gé. Japo ag vỹ ti tỹ ěg kato tẽ han ke tũ nĩ gé, ag tỹ han sór mũ ra. Pã'i kar ag vỹ tag han ki kagtũg nỹtĩ gé. ěg tỹ ùri nén ù jagy vég mũ ra ěg tóg ti to vãnh ke tũ nĩ, kỹ tóg ěg to jũnh ke tũ nĩ gé, ěg tỹ kejěn nén ù jagy tãvĩ vég mũ ra.

³⁹ Kanhkã tân ag vỹ ti tỹ ěg to jũ han ke tũ nĩ gé, nũgme tân ag ke gé, ag tỹ ti tỹ ěg to jũ han sór mũ ra. Topê tỹ nén hyn han ja kar vỹ ti tỹ ěg to jũ (jé) han ke tũ pẽ nĩ. ěg to há nĩ kỹ tóg nĩ nĩ, ěg tỹ ěg Senhor tỹ Jesus Cristo ki ge kỹ nỹtĩn kỹ.

9

Topê tỹ Judeu ag kuprěg

¹ Nén ù tó sór inh mũ gé, ha mẽ. Cristo vỹ ki kanhró nĩ, sỹ tónh ke mũ tag. Sỹ ki hã ke vẽ, ón tũ sóg nĩgtĩ, kỹ Topê kuprĩg vỹ inh mỹ: “ki hã ã tóg tó,” he tĩ gé.

²⁻³ Ha mẽ, inh mré ke ag to sóg fe kaj tãvĩ nĩ, Judeu ag to, ag tỹ Jesus kato tẽn kỹ. Fỹ sóg tĩ, sỹ ag mũ ěkrén kỹ, inh mỹ tóg vėnh kaga jagy ri ke nĩ, ha mẽ. Kỹ, Topê tỹ ag jagfy inh kato tẽ ra tóg inh mỹ há tĩ vẽ, Jesus tỹ ěg jagfy ter ri ke, ag tỹ ti ki ge jé. Ti tỹ ag jagfy isỹ Cristo mré ke tũ han ra tóg inh mỹ há tĩ vẽ. Tỹ ag tóg inh kanhkã pẽ nỹtĩ,

⁴ isỹ tỹ ag mré Israel krě nĩn kỹ. Tỹ ag tóg Topê krě ja nỹtĩ vẽ, kỹ tóg ag mỹ ã jykre tar ven ja nĩ gé. Ag mré vėnh jykre tỹ hěn ri ke han ja tóg nĩgtĩ, ag jyvěn ja tóg nĩgtĩ gé, kỹ ti vĩ tó tĩ ag vỹ rán ja nĩgtĩ gé, Topê vĩ ti. Ti jo ĩn pẽ han ja ag tóg nĩgtĩ, Jerusalém tá, krěm nén ù kar pũn jafã. Ag mỹ tóg ã tỹ nén han ke ti kãmén ja nĩgtĩ.

⁵ ěg jóg'jóg ve ag, ù tỹ vãsỹ Topê mré vėmėn tĩ ag vỹ ag jóg'jóg ve nỹtĩ gé, kỹ Cristo vỹ tỹ ag kã ù nĩ gé, ag kanhkã, ti tỹ ga kri tũg kỹ. ěg kri ke kar vẽ, Cristo ti, Topê ti. Ti hã mỹ ěg vĩ há han ke mũ, to ěg krónh ke vãnh nỹtĩ, ga kri, kanhkã tá ke gé, ti mỹ vĩ há han to. Amém.

⁶ Jesus kato tẽ ag tóg nỹtĩ ha, Israel ag, Topê tỹ ag jyvěn ja ra. Hã kỹ tóg Topê tỹ ag mỹ tó há han ja tũ nĩ ve nĩ. Hã tũ vẽ hã ra. Ag hã ne to jykrel há han ja tũ nĩ', ti tỹ ag mỹ tó há han ja ra. ěg tỹ to jykrel há han kỹ ěg Israel ag jykre ki kanhrãn mũ, ha mẽ: Israel krě ù tóg tỹ Topê krě pẽ tỹ nỹtĩ, ha mẽ.

⁷ Hã ra ag tóg: “Abraão vỹ tỹ ěg jóg'jóg ve nĩ,” he tĩ, “hã kỹ ěg tóg tỹ Topê krě nỹtĩ, Abraão tugnĩn,” he ag tóg tĩ. Kygñě kỹ ag tóg tag tó tĩ, ha mẽ. Topê tóg Abraão mỹ: “ã kósin tỹ Isaque krě vỹ tỹ ã krě pẽ nỹtĩnh mũ,” he ja nĩ.

⁸ Hã ra Abraão vỹ krě e han ja nĩgtĩ, kósin pir tũ ti nĩ. Hã kỹ Abraão krě ù vỹ tỹ Topê krě tũ nỹtĩ, Abraão tỹ ag han ja ra. Û tỹ Topê ki ge kỹ nỹtĩ ag hã vỹ tỹ Topê krě nỹtĩ, Topê tỹ ùn kuprěg ja ag.

⁹ Topê vỹ Abraão mỹ: “prỹg tũg kỹ sóg ã venh kãtĩg mãn ke mũ, kỹ Sara fi kósin vỹ kã nỹnh mũ sir, ha vemnĩ,” he ja nĩ. Topê tỹ Abraão mỹ Isaque mur ke to jan hã vẽ, ti tỹ Isaque hã kuprěg jan kỹ.

¹⁰ Kỹ tóg ge nĩ gé, ěg tỹ Rebeca fi krě to jykrel kỹ, Isaque prũ fi. Krě vėgñi han ja fi nĩ, kỹ ag tóg tỹ ěg jóg tỹ Isaque krě kar nỹtĩ, ùn vėgñi ja ag.

11-12 Kÿ ag mur tÿg ki, ag tÿ ver nén ù han tÿg ki Topê tóg ag mÿnh fi mÿ: “ùn mur vén ke mÿ vÿ tÿ ù tÿ ti nón mur ke mÿ ên krêm ke jênh ke mÿ, ha vemní,” he ja nĩ. Topê tÿ fi mÿ tó kã ag tóg nén ù há mré nén ù kórég han ja tÿ nĩ ver. Ag mur tÿg ki ke ja vê. Topê tÿ êg mÿ ã jykre ven sór ja vê, hã kÿ tóg ag mur tÿg ki tag tó ja nĩ. ã tÿ nén to jykrén mÿ ên han ti tĩ, Topê ti. Kÿ tóg ã tÿ ùn kuprêg sór mÿ ên hã kuprêg tĩ gé, ag tÿ ver nén ù han tÿg ki.

13 Hã kÿ tag tóg rán kÿ nĩ gé, Rebeca fi krê ên ag to, ha mê: “Jacó to inh há nĩ, hã ra sóg ti jo mur ja tÿ Esaú to kórég nĩ,” he ja tóg nĩ, Topê vĩ rán ki.

14 Kÿ Judeu ag hÿn inh mÿ: “Topê jykre vÿ há tÿ nĩ,” he sór mÿ. “Kuryj tÿ ti nĩ, ti tÿ vêsóg ki nén to jykrén sór kÿ, ti tÿ ùn kuprêg mÿ ên to,” he ag hÿn tĩ. Hã tÿ vê hã ra.

15 Hã kÿ tóg Moisés mÿ: “isÿ ùn jagãgtãn sór mÿ ên hã jagãgtãn jé sóg ke mÿ,” he ja nĩ, Topê ti.

16 Êg tÿ to vãsãn tÿ vê, êg tÿ to tar nĩnh ke tÿ vê. Topê tÿ vêsóg ki êg jagãgtãn hã vê.

17 Hã kÿ ga tÿ Egito tá pã'i tÿ Faraó to tag tóg rán kÿ nĩ gé, ha mê. “Ûn tar vÿ tÿ inh nĩ,” he ja ti nĩ, Topê ti, Faraó mÿ. “Á tÿ sóg ùn tar han, vênh kar tÿ isÿ tÿ ùn tar nĩ tag ki kanhró nÿtĩ jé, isÿ ã vóg kónãn to, ã tar jê ra. Vênh kar tÿ inh jÿjÿ mênh ke vê, hã jé sóg ã fêg,” he ja ti nĩ, vãsÿ, Topê ti, Faraó mÿ.

18 Hã kÿ, Topê tÿ ùn jagãgtãn sór nĩn kÿ tóg ti jagãgtãn tĩ sir. Hã ra tóg ù tÿ mê jãvãnh ên tĩ kutu kãfór han mÿ sir, Faraó ri ke.

Topê tÿ ã tÿ nén han sór mÿ ên han tĩ

19 Kÿ Judeu ag hÿn inh mÿ: “kÿ êg hÿn Topê tÿ êg kuprêg tÿ tugrĩn kutu nÿtĩnh mÿ,” he sór mÿ. “Ti tugnĩn ke vê. Kÿ ti tÿ ne jé êg vóg kónãn sór nê?” he sór ag hÿn mÿ, ón kÿ Topê to vĩn kÿ.

20 Ha vé, êprã ke vÿ tÿ êg nÿtĩ. Ti vĩ kafãn ke tÿ pê êg tóg nĩ. Ti kamêg jé êg tóg ke mÿ. ã tÿ nén han sór mÿ ên han ti tĩ.

Êg rãnrãj to jykrén nĩ. Kejên êg tóg nén ù han tĩ, go'or tÿ. Kÿ go'or tóg êg mÿ: “isÿ kukrũ kórég han tÿg nĩ, isÿ kukrũ sĩnvĩ han nĩ,” he tÿ nĩgtĩ. Êg vĩ kafãn ke tÿ ti nĩ, go'or ti. Êg tÿ tÿ nén han sór mÿ ên han êg tóg tĩ, ti ki jêmê vãnh êg nÿtĩ.

21 Go'or ù tÿ êg kukrũ sĩnvĩ han tĩ, ù tÿ êg kukrũ kórég han tĩ. Êg tÿ nén han sór mÿ ên han êg tóg tĩ.

22 Topê vÿ êg rãnrãj tag ri ke han tĩ gé. Ti tÿ nén han sór mÿ ên han ti tĩ, êg tÿ, êg tÿ ti mÿ go'or tÿ kukrũ ri ke nÿtĩn kÿ. Û ag to tóg jÿ tĩ, êg kar tÿ ag ki ti tar nĩ to jykrén jé, ti jÿ ên ti, Topê ti. Kÿ tóg kãnhmar ag to jÿnh ke vê vê, hã ra tóg ver ag to fe mág nĩ, ag kórég tãvĩ nÿtĩ ra, ti tÿ ù to jÿnh ke mÿ ag. Hã ra tóg ag vóg kónãn ke mÿ, ha vemní.

23 Kÿ tóg ù ag jagãgtãn mÿ gé, vênh kar tÿ ag ki Topê tÿ tÿ ùn há tãvĩ nĩ to jykrén jé, êg há kar kãfór. Hã jé tóg ag kuprêg ja nĩgtĩ. Ti tÿ ag tÿ ùn mág han sór vê, ti mré.

24 Êg hã vê sir, ùn kuprêg kÿ nÿtĩ tag ag. Hã kÿ tóg êg mÿ vênh vĩ jêñê. Judeu ag kãmĩ tóg êg mÿ vênh vĩ jêñê, fóg ag kãmĩ ke gé, kanhgág ag kãmĩ ke gé, ti tÿ êg jagãgtãn sór kÿ.

25 Hã kÿ Oséias tóg tag tó ja nĩ, ha mê. “Vãsÿ ag vÿ tÿ inh mré ke tÿ ja nÿtĩ, hã ra sóg ag mÿ: “inh mré ke vÿ tÿ ãjag nÿtĩnh mÿ ha, isÿ ag,” he sór mÿ, he ti, Topê ti,” he ja tóg nĩgtĩ, Oséias ti. “Vãsÿ sóg ag to há tÿ ja nĩgtĩ, hã ra sóg ag to há nĩnh mÿ ha,” he ti.

26 “Vāsý sóg ag mý: “ājag pi(jé) tý isū nýtī,” he ja nīgtī. Hā ra sóg ag mý: “Topē krē vý tý ājag nýtīnh mū,” henh ke mū, “ūn rīr nī ěn krē vý tý ājag nýtīnh mū,” he jé sóg ke mū ag mý,” he ti, Topē ti,” he ja tóg nī, Oséias ti. Ti tý ũ tý ũri Cristo ki ge ký nýtī ag kāmén hā vē.

27 Ký Isaiás vý Israel krē ag to tag tó, ha mē: “e ag nýtī, Israel krē ag, rýnhryj e nī ěn ri ke, goj kāmī pó rynhryj e nī ěn ri ke. Ge ra ag pipir nýtīnh mū, ũn krenken ke mū ag.

28 Topē vý kānhmar ā tý nén tó ja ěn han ke mū, ga tag ki, ký tóg ag vóg kónān kán ke mū, ũn e ěn ag, ag kórég nýtīn ký,” he ja ti nī, Isaiás ti.

29 Ký tóg tag tó ja nī gé, ha mē: “ěg tūg kán kren ti, Topē ti, věnh kar kri nī ěn ti. Hā ra tóg ěg kāmī ũn pipir krenken han ja nīgtī. Cidade tý Sodoma tá ke ag tūg kán ja tóg nī, Topē ti, cidade tý Gomorra tá ke ag ke gé. Ký tóg ěg tūg kán kren gé, ag ri kén, hā ra tóg ěg kāmī ũ krenken han mū,” he ja tóg nī, Isaiás ti.

30 Oséias mré Isaiás ag tý tó mū vý ge nī, ha mē. Fóg ag, kanhgág ag pi(jé) věnh jykre kuryj nón mū ja nīgtī. Ge ra Topē tóg ag jagāgtān ký ag mý věnh pāte fón mū ha, ag tý Jesus ki rā ký.

31 Ag jāvo Israel krē ag vý ājag jykre hā tý Topē tý ag jyvěn ki króm sór ja nīgtī. “Ti vī han ěg tī, ký tóg ěg to há nī,” he ag tóg tī. Hā ra ag tóg ki króm kán ja tū nī, hā ký Topē tóg ag to há tū nī, jérīn mý.

32 Hē ri ken ký hýn? Ag tý ti ki ge ja tū nīn ký, hā ký tóg ag mý věnh pāte fón ja tū nī gé. Ag tý vēsóg ki Topē jykre ki króm sór ja vē. Hā ký ag tóg ón ký ki króm ja nīgtī. Hā ký ag tóg Cristo kato tē nýtī.

Pó ri ke ti nī, Cristo ti, ěg tý tý krīm ke jafā. Ag tý ti tý krīm ke jan hā vē, hā vý: ti ki rā tū, he mū.

33 Hā ký tag tóg rán ký nī, Jesus Cristo to, ha mē. “Pānónh sī tý Siāo pēnīn cidade ki sóg pó nīm mū, ag tý tý krīm ke jé. Ký ag tóg, pāro tag tý ag tóg krīm ke ký vár ke mū sir. Hā ra ũ tý ti ki rā mū vý ā tý nén ve sór mū ěn venh ke mū,” he ja ti nī, Topē vī rán ki, Jesus Cristo to.

10

Judeu ag tý Jesus ki ge ký krenken ke

1 Inh kanhkā', isý inh mré ke tý Israel tý krenken han venh há tāvī tóg tī, hā jé sóg Topē mré vēmén tī.

2 Topē vī han jé ag tóg vāsānsān mūgtī, tag vég isóg nī nī. Hā ra ag tóg ki kagtīg nýtī, ký ag tóg ěg tý nén han ke tū ěn han ti.

3 Vēsóg ki ag tóg věnh jykre kuryj to vāsān sór tī. Hā ra ũ tý ěg mý věnh jykre kuryj nīm sór mū vý tý Topē ti nī. Tag ve sór tū ag nýtī, Topē tý ěg mý nīm ke tag. Hā ký ag tóg Topē kato vāsānsān mū.

4 Cristo vý hur kātīg. Ký ěg tóg ti ki ge ký nýtīn ký ti mý há nýtī ha. ěg tý Topē tý vāsý ěg jyvěn ki króm tugnīn ke pijé. Jesus Cristo ki rā tugrīn ke vē.

5 Ha vé, Moisés vý Topē jykre si to tag rán, ha mē. “Ũ tý věnh jykre kuryj han kán mū vý rīr nīnh ke mū, ũ tý ge vý rīr krýg ja tū venh ke mū, ti tý Topē tý ěg jyvěn tī ěn ki króm kán tugnīn,” he ja tóg nī, Moisés ti. Hā ra ěg tóg ki króm kán ki kagtīg nýtī, hā ký ěg tóg ěg tý ki króm kán sór mū ra rīr nīnh ke tū nī.

6 ěg tý Jesus ki rā tugrīn ěg Topē mý há nýtī. Ký ěg tóg: “ũ ný hýn kanhkā ra tīg mū, Cristo pére kātīg jé?” henh ke tū pē nī. Mur ký ti nī ha.

7 Ký ěg: “ũ ný hýn věnh kuprīg ag jamā ra tīg mū, Cristo rīn mán jé?” henh ke tū pē nī gé. Rīr mán ký ti nī ha.

8 Tag tó jé ěg tóg ke mũ, ha mẽ: “jagy tũ ti nĩ, Topě vĩ ti, to jykrén há ti nĩ. Kãnhmar ěg tónh ke mũ, kãnhmar ěg to jykrén ke mũ, Topě vĩ to,” he jé ěg tóg ke mũ.

Topě vĩ tag hã tó sóg tĩ. “Jesus Cristo ki rã tugnĩn ěg krenkren ke mũ,” he sóg tĩ.

9 ěg krenkren jé ěg tóg Jesus to: “ěg Senhor vỹ tỹ ti nĩ,” henh ke mũ. Vẽnh kar mỹ ěg tónh ke mũ. Kỹ ěg tóg ěg fe tỹ ti ki rãnh ke mũ gé. Topě tỹ ti ter kar kỹ ti rĩn mãn ja tag vỹ tỹ ěg mỹ ki hã ke nĩ, kỹ ěg kri fig mũ. Kỹ ěg tóg krenkren ke mũ sir.

10 ěg tỹ ěg fe tỹ ti ki rã kỹ ěg tóg ti mỹ há nỹtĩ. ěg tỹ vẽn h kar mỹ ti kãmén kỹ ěg krenkren ke mũ sir.

11 Hã kỹ tag tóg rãn kỹ nĩ, ha mẽ: “ěg tỹ ti ki ge kỹ ěg tóg ěg tỹ nén ve sór mũ ěn venh ke mũ,” he ja tóg nĩ, Topě vĩ rãn ki.

12 Vẽn h kar mỹ ke vẽ sir, vẽn h vĩ tag. Judeu ag mỹ ke vẽ, kar kỹ fóg ag mỹ ke vẽ gé, kanhgág ag mỹ ke vẽ gé. Tỹ tóg ěg kar Senhor nĩ mỹr. Kỹ, ěg tỹ ti mỹ nén ũ to vĩn kỹ tóg ěg mỹ nén ũ tỹ hẽn ri ke nĩm ke mũ gé sir, ěg kar mỹ.

13 Tag hã vỹ rãn kỹ nĩ gé, ha mẽ: “ěg tỹ ěg Senhor mỹ: “inh kren han nĩ,” henh kỹ ěg krenkren ke mũ, ěg kar,” he ja tóg nĩ, Topě vĩ tỹ rãn kỹ nĩ ki.

14 ěg tỹ ti ki rã tũ nỹtĩ ra ěg tóg: “inh kren han nĩ,” he ki kagtĩg nỹtĩnh mũ vẽ. ěg tỹ ti vĩ mẽ ja tũ nỹtĩ ra ěg tóg ti ki ge ki kagtĩg nỹtĩnh mũ vẽ. Ũ tỹ ěg mỹ ti vĩ tó tũ nĩ ra ěg ti vĩ mẽnh ke tũ nĩnh mũ vẽ.

15 Topě tỹ ag jěgněg tũ nĩ ra ag tóg ěg mỹ ti vĩ tónh ke tũ nĩnh mũ vẽ. Hã kỹ tag tóg rãn kỹ nĩ, ha mẽ. “Ũ tỹ ěg mỹ Topě vĩ sér ma kãmũ ag junjun vỹ ěg mỹ sér pẽ tĩ,” he ja tóg nĩ, Topě vĩ tỹ rãn kỹ nĩ ki. Topě tỹ ã vĩ tó tĩ ag jěgně to ken hã vẽ.

16 Hã ra ũ ag tóg kri fi jãvãnh nỹtĩ gé, ag tỹ ón kỹ mẽg mũ ra, Topě vĩ sér ti. Isaías vỹ ag to Topě mỹ tag tó ja nĩ. “ěg jóg mág!, inh vĩ mẽ jãvãnh ag nỹtĩ,” he ja tóg nĩ.

17 Hã kỹ tóg, ěg tỹ ti vĩ mẽ há han kar kỹ ěg tóg ti ki rã tĩ. ěg tỹ Cristo kãmẽ mẽ kỹ ěg ti ki rã tĩ.

18 Kỹ ãjag hỹn inh mỹ: “Judeu ag mỹ hẽn ri ke mũn mẽ ja tũ nĩ, hã kỹ ag mỹ ti ki ge ja tũ nĩ?” he sór mũ, ãjag tỹ inh carta tag ve kỹ. Vó, mẽ kỹ ag nỹtĩ vẽ. Tag vỹ rãn kỹ nĩ, ha mẽ: “ga kar mĩ ag tóg mẽ ja nĩgtĩ, ã vĩ ti. Ga fyr tá tóg jun gé, ã vĩ ti,” he ja ti nĩ, Topě vĩ rá ki.

19 Kỹ ãjag hỹn inh mỹ: “kỹ Judeu ag hẽn ri ke mũn to jykrén há han ki kagtĩg nỹtĩ, ag tỹ mẽg mũ ra?” he sór mũ, ãjag tỹ inh carta tag ve kỹ. Vó, ag tỹ to jykrén sór kỹ ag tóg to jykrén mũ vẽ. Moisés vỹ ěg mỹ tag kãmén, ha mẽ: “Topě tóg fóg mré kanhgág to tag tó sór mũ, ha mẽ,” he tóg. “Ag vỹ tỹ isũ tũ nỹtĩ ver, hã ra sóg ag tỹ isũ han sór mũ, ãjag tỹ ag ve kỹ ãjag tỹ inh ki rã to én jé,” he tóg. “Fóg mré kanhgág ag vỹ ãjag mỹ krĩ tũ nỹtĩ, hã ra sóg ag to há nĩ sór mũ, ãjag tỹ ag tugrĩn jũgũ jé, he tóg, Topě ti,” he ja tóg nĩgtĩ, Moisés ti, Judeu ag mỹ.

20 Kỹ Isaías tóg tag tó mũ gé, fóg ag to, kanhgág ag to, ha mẽ. “Ũ ag tóg inh jãvãnh ja tũ nỹtĩgtĩ, hã ra ag tóg inh vĩ jěmẽg mũ ha. Topě hẽ ri ke tĩ? he ja tũ ag nỹtĩ, hã ra sóg ag mỹ inh vĩ jěnẽg mũ ha, he tóg, Topě ti,” he ja ti nĩ gé, Isaías ti. Pã'i ag kamẽg vãnh kỹ tóg Judeu ag mỹ fóg ag mré kanhgág ag tỹ Topě ki genh ke tó ja nĩ, Isaías ti.

21 Kỹ tóg Israel ag to tag tó ja nĩ gé sir, ha mẽ: “kurã kar ki sóg ãjag mỹ: kunĩg, he tĩ. Hã jé sóg ãjag mỹ inh nĩgé ven tĩ, ãjag tỹ gĩr mỹ ãjag nĩgé ven tĩ ěn ri ke.

Hã ra ãjag tóg inh vî mẽ jãvãnh nýtĩ'. Inh vî kafãn kónãn ãjag tóg mũ mýt', he ja tóg nĩ, Isaiás ti, ti týt Judeu ag mýt Topê vî tón ký.

11

Israel krê'krê pipir ag výt týt Topê tũ nýtĩ

¹ Kýt ãjag hýt: "kýt Topê mýt ã povo týt Israel tovãnh kãn kýt nĩ?" he sór mũ, ãjag týt inh carta tag ve ký. Vó, ag tovãnh kãn tũ ti nĩ. Hã vé, týt sóg Israel krê nĩ gé, hã ra sóg ti ki rã. Abraão krê'krê ù výt týt inh nĩ gé, ti kósin'kósin týt Benjamim krê'krê ù mýt.

² Isovãnh ja tũ ti nĩ, Topê ti, hã ký tóg ã povo tovãnh kãn ja tũ nĩ. Nén kar han tũg ki tóg ãg kuprêg ja nĩ, ãg týt týt ti tũ nýtĩ jé.

Elias to jykrén nĩ. Ti kãme tóg rán kýt nĩ, Topê vî rá ki. Elias tempo kã Israel ag tóg Topê kato tê mũ. Ký ag tóg Elias kato tê mũ gé, ti tén jé. Hã ký tóg Topê mýt tó mũ, Elias ti, ký tóg:

³ "Senhor," he mũ. "Á vî tó tĩ ag kãgtén kãn ag huri, ã mýt pũn jafã kókén ag huri ke gé. Inh pir mýt sóg kren, ký ag tóg isén sór mũ ha ke gé. Á tovãnh kãn ký ag nýtĩ," he ja tóg nĩ, Topê mýt, Israel ag to.

⁴ Hã ra Topê tóg ti mýt: "krĩ kufy han tũg nĩ," he mũ. "Û týt 7 mil (ke) výt ki nýtĩ, ù týt isovãnh tũ ag, sýt ùn kuprêg ja ag. Tag ag výt vènh kãgrá týt topê týt Baal mýt: "Topê výt týt ã nĩ," he ja tũ nĩ," he ja tóg nĩ, Topê ti, Elias mýt. Ti týt Israel pipir ag týt Topê tovãnh tũg ja ên tó vè.

⁵ Ge ti nĩgtĩ, ùri. Pir ag nýtĩ, Israel týt Topê to há nýtĩ ag. Ti kato tê kãn tũ ãg mýt. Topê výt ãg jagãgtãn, ký tóg ãg kuprêg, hã ký ãg tóg ti to há nýtĩ, ãg pipir nýtĩ ra, ãg týt týt Israel krê nýtĩn ký.

⁶ Ëg týt vèsóg ki han pijé', ãg týt to vãsãn pijé'. Topê týt vèsóg ki ãg jagãgtãn hã vè. Ke tũ nĩ mũ ra tóg: "vèsóg ki sóg ãjag jagãgtãn," henh ke tũ nĩ vè. Hã ra tóg vèsóg ki ãg jagãgtãn.

⁷ Ge ti nĩ, ha mẽ, Israel ag výt ve sór ja nĩgtĩ, Topê týt ãg mýt nén ù há ven ke ên ti, hã ra ag tóg venh ke tũ nĩ. Topê týt ùn kuprêg mũ ag hã mýt tóg ven ti, Topê ti. Jãvo ù ag tóg kutu nýtĩ sir, ag týt Topê vî mẽ jãvãnh nýtĩn ký.

⁸ Hã ký tag tóg rán kýt nĩ, Israel ag to, ha mẽ: "Topê výt ag krĩ tũ han, hã ký ag tóg ti vî rá vég mũ ra to jykrén tũ nýtĩgtĩ. Mẽg tũ ag nýtĩ, ãjag nĩgrêg ra. Ûri ag tóg gen ký nýtĩn mũ ver," he ja ti nĩ, Topê vî rán ki.

⁹ Ký Davi výt Judeu ag to tag tó ja nĩ gé, ha mẽ: "Topê mýt festa han ag tóg tĩ. Hã ra ag tóg ón ký ti mýt festa han tĩ, ký ag tóg to sigse ký nýtĩn mũ, ag festa to. Ag sigse ký tóg ag vóg kónãn ke mũ, Topê ti. Krenkren ke tũ ag tóg nĩ.

¹⁰ Kutu ag nýtĩ, to jykrén ke tũ pè ag nýtĩ, ký ag tóg vènh jykre kufy hã venh ke mũ, hã to ag jagtar nýtĩn mũ," he ja tóg nĩ, Judeu ag to, Davi ti.

Judeu ag to é henh ke tũ ãg tóg nĩ

¹¹ Ký ãjag hýt inh mýt: "kýt Topê mýt Judeu ag týt nũgme ki vár ke tag ve sór mũ, hã jén mýt ag mýt Jesus jênê ja nĩ, ag týt ti týt prãnh ke jé?" he sór mũ. Vó. Hã ra ag tóg Topê kato tẽgtẽ tĩ. Ti vî mranh ja ag tóg nýtĩgtĩ, hã ký Topê tóg fóg ag mré kanhgág ag krenkren han sór mũ, Judeu ag týt ag ve ký ti ki ge to én jé.

¹² Ký Judeu ag týt Topê vî mranh ký Topê tóg fóg mré kanhgág kar to há nĩ. Ký Judeu ag výt jagãgtar nýtĩ. Ag nýtĩg ja ki ù ag kar výt Topê týt ag to há nĩ vég mũ. Há ti nĩ, tag. Ký, Topê týt Judeu ag to há' he mãn nĩ ra tóg hã ra ga kri mũ kar mýt há pè tãvĩ tĩnh mũ vè, mýt, ha mẽ. Hã ra tóg ag to há tũ nĩ ver.

¹³ Kĩ sóg ãjag mĩ tag tó sór mũ, ãjag tĩ tĩ fóg nĩtĩn kĩ, kanhgág ag mĩ ke gé. Æjag apóstolo vỹ tĩ inh nĩ, sỹ ãjag mĩ Topẽ vĩ tó jé. Inh rãnrãr vỹ inh mĩ sér pẽ tĩ.

¹⁴ Isỹ ãjag mĩ Topẽ vĩ tó kĩ inh mré ke ag hẽn ri ke mũn ãjag kóm Jesus ki ge sór mũ gé, kĩ ag krenkren ke mũ sir, Israel ag.

¹⁵ Ha vé, Topẽ tĩ inh mré ke ag tovãnh to tóg povo ù ag to há nĩ ha, ag to jũ mãn tũ tóg nĩ sir. Topẽ tĩ Israel ag to há' he mãn mũ ra tóg vẽn kar mĩ há pẽ tãvĩ tĩnh mũ vẽn, kĩ vẽn kar vỹ rĩnrĩr mãn ke mũ vẽn, ùn kãgter mũ ag mré hã. Hã ra tóg ag to há tũ nĩ ver.

¹⁶ Êmĩ to jykrén nĩ. Êmĩ kupar ko há nĩn kĩ tóg ko há kar nĩ. Ge ti nĩgtĩ gé, ka tỹ. Ti jãre há nĩn kĩ ka vỹ há kar nĩ. Israel ag vỹ tag ri ke nĩtĩ. Ag jóg'jóg ve ag vỹ ka jãre ri ke nĩtĩ. Topẽ mỹ ag há nĩtĩ ja nĩgtĩ, hã kĩ ag krẽ vỹ Topẽ mỹ há nĩtĩnh ke mũ gé.

¹⁷ Povo tỹ Israel vỹ ka tỹ oliveira há ri ke nĩtĩ. Ti jãre vỹ há nĩ, hã ra ti pẽ ù tóg kórég nĩtĩ. Hã kĩ tóg mrynhmranh kĩ vãvãm mũ, Topẽ ti, ti pẽ kórég ên ti. Ti tỹ Israel kórég ag togvãnh to ken hã vẽn, hã vỹ: ka pẽ kórég vãvãm, he mũ. Ka pẽ kórég tag nĩtĩg ja ki tóg ka ù pẽ vin, vãnh kãmĩ ka tỹ oliveira pẽ tỹ, ùn kanẽn vãnh pẽ tỹ. Æjag hã vẽn sir, ãjag tĩ tĩ fóg nĩtĩn kĩ, kanhgág ag ke gé. Hã ra ka ù pẽ tag vỹ ka há jãre ên tỹ ti kume vég tĩ, kĩ tóg tỹ há' he mũ sir. Æjag tỹ Topẽ tỹ Israel jóg'jóg ve tỹ Abraão mỹ nén tó ja ên vég mũ to ken hã vẽn, hã vỹ: ka há jãre kume vég mũ, he mũ.

¹⁸ Kĩ Israel ag to é he sór tũg nĩ, Topẽ tỹ ag vãm mũ ra, êg tỹ ka pẽ kórég vãm ri ke. Ag nĩtĩg ja ki ãjag nĩtĩ. Hã ra ka jãre vỹ tỹ Judeu ag jóg'jóg ve nĩtĩ. Æjag jóg'jóg ve pijé', fóg pijé', kanhgág pijé'. Judeu ag vẽn. Kĩ Judeu ag to é he sór tũg nĩ.

¹⁹ Hẽn ri ke mũn ãjag tóg inh mỹ: "hã ra tóg Judeu ag vãm, êg to há nĩ jé," he sór mũ. "Hã kĩ tóg êg to há nĩ," he ãjag hỹn mũ.

²⁰ Hỹ, ag vãm tóg. Hã ra ag tóg ti ki rã jãvãnh ja nĩtĩgtĩ, hã kĩ tóg ag vãm. Jãvo tóg ãjag to há nĩ, ãjag tỹ ti ki ge to. Hã kĩ ag to é he sór tũg nĩ. Topẽ kamẽg nĩ mỹr.

²¹ Israel krẽ ag tỹ ti ki ge jãvãnh tũgnĩn tóg ag vãm. Ag jagãgtãn jãvãnh tóg nĩ ha. Kĩ tóg ãjag jagãgtãn ke tũ nĩ gé, ãjag tỹ ti ki ge to tar tũ nĩtĩn kĩ. Hã kĩ ti hã kamẽg nĩ.

²² Hã ki Topẽ tỹ tỹ ùn há nĩ tóg ve há tí, hã ra tóg ù ag vóg kónãn jagy han tí gé. Û tỹ ti vĩ mranh mũ ag vóg kónãn jagy han tóg tí, Topẽ ti. Hã ra tóg sir ãjag to há nĩ sir, ãjag tỹ ti tovãnh tũ nĩn kĩ. Æjag tỹ ti tovãnh kĩ tóg ãjag vãm ke mũ gé, ha vemnĩ.

²³ Judeu ag tỹ ti ki ge kĩ tóg ag to há nĩ mãn ke mũ gé sir, kĩ tóg ka há ki ti pẽ mrynhmráj ja ên ki vin mãn ke ri ke nĩ sir.

²⁴ Ha vé, ãjag hã vỹ tỹ ka kanẽn vãnh pẽ ri ke nĩtĩ'. Hã ra tóg ka há ki ãjag vin, ãjag tỹ tỹ ka kanẽn vãnh pẽ nĩtĩ ra. Kĩ tóg, ti tỹ ka há ên pẽ mrynhmráj ja ên ki vin mãn sór nĩ ra tóg vin mãn mũ sir, ka há ên ki, hã vỹ: Judeu ag tỹ Jesus ki rã, he mũ. Ka há pẽ mrynhmráj ja ên ki vin mãn to ken hã vẽn. Êg pi(jé) ka kanẽn vãnh pẽ tỹ ka kanẽn há ki vin tí'. Êg tỹ ka há pẽ tỹ ki vin mãn tag vỹ jagy tũ nĩ vẽn. Hã kĩ tóg Topẽ mỹ jagy tũ tí, ti tỹ Judeu ag to há nĩ mãn kĩ.

²⁵ Isy' ajag mý nén ũ kāmén sór vĕ, ajag tŷ mĕ ja tũ ũ, ha mĕ. Sŷ ajag mý kāmén sór vĕ, ajag tŷ Judeu ag to é he tũ nĭ jĕ. Ha vé, Israel ũ ag vŷ ver mĕ sór tũ nŷtĭ. Ũ ag tóg mĕ sór mũ, hã ra ũ ag tóg mĕ jãvãnh nŷtĭ gé, vĕnh kar tŷ Topĕ vĭ mĕ jĕ, Judeu tũ ag kar. Kejĕn ag tóg mĕ kãn ke mũ, fóg kar, kanhgág kar ke gé.

²⁶ Ag tŷ mĕ kãn ke ĕn kã Israel ag tóg krenkren ke mũ gé. Hã kŷ tag tóg ag to rán kŷ nĭ, ha mĕ: “ag krenkren han tũ vŷ jun ke mũ. Pãnónh sĭ tŷ Sião pĕnĭn cidade ĕn tá tóg vĕnh ven ke mũ, ag krenkren han tũ ti. Ĕn vŷ Jacó krĕ ag tŷ inh vĭ mranh ja ĕn tŷ vĕnh pãte fón ke mũ, Israel krĕ en ag mŷ.

²⁷ Sŷ ag mré jykrĕn jan hã vĕ. Ag tŷ inh vĭ mranh tŷ sóg tũg' he mũ,” he ja tóg nĭ, Topĕ vĭ rá ki, Judeu ag to.

²⁸ Jesus kato tĕ ag tóg mũ ver, ti kãme sér mĕ jãvãnh ag nŷtĭ ver, hã kŷ ajag tóg ag nŷtĭg ja ki Topĕ vĭ sér mĕg mũ. Hã ra ag jóg'jóg ve ag vŷ Topĕ to há nŷtĭ ja nĭgtĭ, hã kŷ Topĕ tóg ag krĕ'krĕ to há nĭnh ke mũ ge kejĕn, ti tŷ vãsŷ ag kuprĕg ja nĭn kŷ.

²⁹ Topĕ tŷ ũ to há nĭn kŷ tóg ti to há nĭ, ti tŷ ũ kuprĕg kŷ tóg kuprĕg kŷ jĕ nĭ gé. Tŷ tũg' henh ke tũ ti nĭ, Topĕ ti.

³⁰ Vãsŷ ajag tóg Topĕ vĭ ki kagtĭg ja nŷtĭgtĭ gé. Hã ra Topĕ tóg ũri ajag jagãgtãn, ajag tŷ ti ki ge jĕ, Judeu ag tŷ ti vĭ mranh ag nŷtĭg ja kã.

³¹ Kŷ ĕn ag tóg ti vĭ mranh mũgtĭ ver, Topĕ tŷ kar kŷ ag jagãgtãn jĕ, ti tŷ ajag jagãgtãn ri ke.

³² Kŷ Topĕ tóg ĕg kar mŷ ĕg tŷ ti vĭ mranh mũ tag ven kãn sór mũ, ĕg tŷ to jykrĕn mãn jĕ. Ti tŷ ĕg jagãgtãn sór vĕ, ĕg tŷ ti ki ge jĕ, hã jĕ tóg ĕg mŷ ĕg tŷ ti vĭ mranh mũ ven sór mũ.

Topĕ jykre tŷ ĕg jykre kãfór nĭ

³³ Topĕ vŷ tŷ ũn mág pĕ nĭ, mŷr, ha mĕ. Ti jykre vŷ vĕnh kar kri nĭ kar nĭ. Ve kãn jãvãnh ĕg nŷtĭ, ti jykre ti, tá krŷg jãvãnh ĕg nŷtĭ. Nén ũ kar ki kanhró ti nĭ mŷr, nén ũ kar to jykrĕn há han kãn ti tũ mŷr. Ti tŷ nén to jykrĕn mũ ve kãn ke tũ pĕ ĕg nĭ. “Ti hŷn hĕ ri ken kŷ tag han?” henh ke tũ ĕg tóg nĭ gé. To jykrĕn kórĕg ĕg tóg nŷtĭ.

³⁴ Ũ nŷ Topĕ tŷ nén to jykrĕn mũ ki kanhró nĭ'? Ki kagtĭg kar ĕg nŷtĭ. Ũ nŷ Topĕ mŷ: “tag han ra, tag han tũg ra,” he tĭ'? Ũ vŷ ti jyvĕn ke tũ pĕ nĭ.

³⁵ Ũ nŷ ti mŷ nén ũ nĭm', Topĕ tŷ ti mŷ kajãm jĕ'? Nén kar vŷ tŷ ti tũ nŷtĭ mŷr, hã kŷ tóg ĕg hã mŷ nén ũ kar nĭm tĭ, ĕg jagãgtãn kŷ.

³⁶ Topĕ hã ne nén kar hyn han'. Ti hã jamĕn kŷ ĕg tóg nŷtĭ, nén ũ kar vŷ ti jamĕn kŷ nŷtĭ gé. Hã kŷ ĕg tóg tŷ ti tũ nŷtĭ gé, nén ũ kar ti ke gé. Kŷ ti hã ne tóg tŷ ũn mág nĭ', ti pir mŷ. Ti hã mŷ ĕg tóg vĭ há han tĭ, to krónh ke tũ ĕg nĭ, ga kri, kanhkã tá ke gé. Amém.

12

Topĕ mŷ ĕg vĕnh fĕg ke mũ

¹ Inh kanhkã', Topĕ vŷ ajag jagãgtãn. Hã kŷ sóg ajag mŷ: “ti mŷ vĕnh fĕg,” he mũ. Kŷ tóg ĕg tŷ ti mŷ nén ũ pũn ri ke nĭ, ĕg tŷ ti mŷ vĕnh fĕg kŷ. Judeu ag vŷ ajag mĕg tãnh kŷ pũn tĭ. Ag jãvo ĕg tóg ti mŷ ĕg rĭnrĭr nŷtĭn kŷ vĕnh fĕg tĭ. Ti mŷ tóg sér tĭ, ĕg tŷ tag han kŷ, ĕg tŷ tŷ ti tũ nŷtĭn kŷ sir. Gen kŷ ajag tóg Topĕ jykre han ke mũ.

² Ĕprã ke ag jykre han sór tũg nĭ. Topĕ vŷ ajag krĭ tãg han sór mũ. Vĕnh jykre tãg han sór tóg mũ. Kŷ ajag tóg nén há han ki kanhró nŷtĭnh mũ. Vĕnh jykre

kurj han jé ājag tóg ke mū. Kygnēnh ke tū ājag tóg nī. Tag ve sór tóg mū, Topē ti. Tag hā to tóg ēg kanhrān ke mū.

³ Ha vé, Topē vỹ isar han, kỹ sóg ājag jyvēn há han ki kanhró nī. Hā kỹ sóg ājag kar mỹ tag tó mū. Vēsỹ ũn mág han sór tūg nī. “Tỹ inh ũn mág nī,” he tūg nī, ā tỹ tỹ ũn mág tū nīn kỹ. Ēg kar vỹ Topē ki ge kỹ nỹtī, kỹ tóg ēg kar tỹ nén ũ to tar han tī, ēg kar tỹ ti rānhrāj han jé. Tag to jykrén kỹ jagnē to é he tūg nī.

⁴ Ēg há to jykrén nī. Ti ki nỹtī vỹ e nỹtī, ēg pēn, ēg nīgnó, ēg kanē, ēg nīgrēg, ti kar ti. Ēg há ki nỹtī vỹ jagnē kóm rānhrāj nỹtī kar nỹtī, vyr mỹ.

⁵ Ge ti nīgtī, ēg mré. E ēg nỹtī, hā ra ēg tỹ Cristo ki ge kỹ nỹtīn kỹ ēg tóg ēg há ri ke nỹtī, kỹ ēg tóg jagnē ki rīr ke mū sir, ēg há ki nỹtī tỹ jagnē ki rīr tī ēn ri ke.

⁶ Hā ra ũ tóg nén ũ han há nīgtī, kỹ ũ tóg nén ũ ũ han há nīgtī gé, Topē tỹ to ēg tar han kỹ. Ēg kāmī ũ mỹ tóg: “ag jyvēn nī,” he tī, Jesus ti. Kỹ Topē tỹ ā mỹ nén tó mū hā tỹ ēg jyvēn nī, ti tỹ ā mỹ: “ag jyvēn nī,” hen kỹ.

⁷ Ēg kāmī ũ mỹ tóg: “ũn jagāgtar ag jagāgtān nī,” he ti gé. Kỹ ēg jagāgtān há han to tar nīmnī. Ēg kāmī ũ mỹ tóg: “inh vī kāmén nī,” he tī gé. Kỹ to krónh ke tūg nī.

⁸ Ēg kāmī ũ mỹ tóg: “ag mỹ ag tỹ nén han ke kāmén nī,” he tī gé. Kỹ ā rānhrāj tag ki rīr há han nī. Ēg kāmī ũ mỹ tóg: “ā tỹ nén ũ nīm mág nī, inh mỹ,” he tī gé. Kỹ ón kỹ ti mỹ nīm sór tūg nī. Ēg kāmī ũ mỹ tóg: “culto to pā'i vỹ tỹ ā nī,” he tī gé. Ā tỹ tỹ to pā'i nīn kỹ to jykrén há han nī. Ēg kāmī ũ mỹ tóg: “ag jagāgtān nī,” he tī gé. Kỹ ti tỹ ā mỹ ā tỹ ēg jagāgtān ke tag tó kỹ to mỹ sér nīmnī. Ēg tỹ jagnē ki rīr to ken há vé.

⁹ Jagnē to há tāvī nỹtīmnī. Ón kỹ jagnē to há nỹtī sór tūg nī. Vēnh jykre pāno to kórég tāvī nỹtīmnī, kỹ tovānh kān nī. Vēnh jykre há hā mī mūmnī.

¹⁰ Jagnē to há pē tāvī nỹtīmnī, ājag tỹ jagnē mré pafa ja ag to há ri ke nỹtīmnī, jagnē to. Jagnē mỹ komēr hā vīmnī, ēg tỹ pā'i mỹ komēr hā vī ēn ri kemnī, jagnē mỹ.

¹¹ Topē jykre to krónh ke tūg nī. Ti tỹ ājag mỹ: “tag han ra,” he to jēnjēr ke tūg nī gé, to vāsān nī. Ti kuprīg tỹ ājag mỹ nén tó mū ēn ki króm nī, kỹ tóg ājag mỹ sér tīnh mū. Ēg Senhor tū han nī.

¹² Topē vỹ ēg mỹ nén ũ há kar han ke mū. Tag to mỹ sér nỹtīmnī. Kejēn ājag tóg nén ũ jagy venh ke mū, ti tugnīn. Tag to krónh ke tūg nī. Topē mré vēmén kỹ nỹtīmnī.

¹³ Ājag mré Topē ki rā ũ jagtar nīn kỹ ti jagāgtān nī. Ũ tỹ ājag to pasa ke kỹ ti mỹ: “inh mré nī,” hemnī.

¹⁴ Kejēn ũ tóg ājag vóg kónān sór mū. Ēn to Topē mỹ: “ti jagāgtān nī,” hemnī. Ti to: “ti vóg kónān nī,” he tūg nī.

¹⁵ Kejēn tóg ũ mỹ sér tī. Kỹ ti mré mỹ sér nỹtīmnī gé. Kejēn ũ tóg fỹ tī. Ti mré fỹmnī gé.

¹⁶ Jagnē mré vēnh jykre pir hā han nī, hā vỹ: jagnē to há, he mū. Vēsỹ ũn mág han sór tūg nī. Tỹ ũn kāsir ag mré ke nỹtīmnī. “Ag mré ke vỹ tỹ inh nī,” hemnī, ũn kāsir ag to. Hēn ri ke mūn ājag kāmī ũ tóg vēnh kanhrān mág to tar nī, ājag káfór. Ti jé: “ag káfór inh nī, vēnh kanhrān mág ja tag to,” he tūg nī.

¹⁷ Kejēn ũ tóg ājag mỹ nén ũ kórég han tī. Ge ra ti mỹ nén ũ há hā han nī. Vēnh kar mỹ vī há tāvī han nī, ũ tỹ ājag to: “kygnē ti huri,” he tū nī jé.

¹⁸ Vāsān nī, ājag tỹ ũ to krī rỹ tū nỹtī jé, ājag tỹ vēnh kar to krī kuprā nỹtī jé.

¹⁹ Inh kanhkā, ũ tŷ ājag mŷ nén ũ kórég han mŷ ra vènh kajām sór tŷg nĩ. Topè hā tóg ā tŷ ti to jũnh ke èn ki kanhró nĩ. Hā kŷ tag vŷ rán kŷ nĩ, ha mē: “inh hā ne ājag kajām ke mŷ”, inh hā ne ag mŷ ven ke mŷ”, ag tŷ ājag jykre kórég to jagāgtar ke ti, he ti, ěg Senhor ti,” he ja tóg nĩ, Topè vĩ tŷ rán kŷ nĩ ki.

²⁰ Kŷ ũ tŷ ājag kato tē mŷ mŷ nén ũ há kar han nĩ. Ti kókĩr nĩn kŷ ti mŷ vĕjĕn ven nĩ. Ti hāghā kŷ ti mŷ goj ven nĩ. Gen kŷ ā tóg ti mŷ'a pē han ke mŷ, ha vemnĩ, ā tŷ ti to há nĩn kŷ, ti tŷ ā to kórég nĩ ra.

²¹ Ũ tŷ vènh jykre pāno han mŷ ag vŷ ěg kato tē tí. Kŷ ěg tóg ag ki rĩr ke mŷ, vènh kaja jé. Ag jagtar nŷtĩn kŷ ěg tóg ag jagāgtān ke mŷ. ěg tŷ ag jagāgtān kŷ ag jykre pāno tóg ag mŷ vènhmŷ nĩnh mŷ, ag tŷ ěg jykre ve kŷ, ha vemnĩ.

13

Ěg pā'i ag

¹ Ěg kri pā'i vŷ nŷgtĩ. Kŷ tóg ěg tŷ ag vĩ ki han há tí. Topè tŷ ag tŷ pā'i han há vĕ, ag krĩn kŷ. Ti hā vŷ ũ tŷ hĕ nŷ tŷ pā'i nĩnh ke to jykren tí'.

² Kŷ ag kato tē sór tŷg nĩ. Topè hā vŷ ag vin tí, pā'i ag krĩn kŷ, kŷ ag kato vāsān tŷg nĩ. Ũ tŷ ag kato vāsānsān mŷ ag vóg kónān jé ag tóg ke mŷ, pā'i ag.

³ Ěg tŷ vènh jykre há han kŷ ěg tóg pā'i ag vég mŷ ra kanĕ jur han ke tũ nĩ. Ũ tŷ vènh jykre kórég han mŷ ag vŷ vĕso kanĕ jur tí, pā'i ag ve kŷ. Kŷ ěg hŷn hĕ ri kenh ke mŷ, ag tŷ ěg kanĕ jun tŷg jé? Vĕnh jykre há tāvĩ han jé ěg tóg ke mŷ, kŷ ag tóg ěg to vĕmén há han ke mŷ sir, pā'i ag.

⁴ Ěg pā'i ag ne ěg jyvĕn tí', ěg tŷ vènh jykre há to tar nŷtĩ jé. Ag tŷ Topè tŷ ag mŷ nén tó mŷn han há vĕ. Á tŷ vènh jykre kórég han kŷ kanĕ jurmnĩ. Ā vóg kónān jé ag tóg ke mŷ, ha vemnĩ, hā jé Topè tóg ag vin. Topè tũ ag vĕ, ag tŷ ũn jykre kórég han mŷ ag vóg kónān jé, ag tŷ ag jykre pāno to ag jagāgtar han jé.

⁵ Hā kŷ ag vĩ ki króm nĩ, ag tŷ ājag to jũ tũ nŷtĩ jé. Ājag kakā kavĕnh ti tí gé, ājag tŷ pā'i ag vĩ ki króm tũ ěn tí. Hā kŷ ki króm sórmnĩ.

⁶ Kŷ governo mŷ imposto kajām nĩ gé. Topè tŷ ag mŷ vènh rānhrāj nĩm ja ěn han ag tí, kurā kar kí, pā'i ag, governo mŷ rānhrāj tí ag. Kŷ ag mŷ kajām nĩ.

⁷ Kŷ ājag név(e) kajām kån nĩ, governo mŷ ke gé. Ājag tŷ pā'i ũ mŷ imposto kajām ken kŷ ti mŷ ven nĩ, jānkamy ti. Ājag pā'i ag kamĕg nĩ, ag mŷ komĕr hā vĩmnĩ.

Topè jykre hā mĩ mŷmnĩ

⁸ Ājag név(e) kajām kån nĩ. Mré hā jagnĕ to há tāvĩ nŷtĩmnĩ gé. Jagnĕ to há nŷtĩ to krónh ke tŷg nĩ. Ěg tŷ jagnĕ to há nŷtĩn kŷ ěg tóg Topè tŷ ěg jyvĕn ja ěn ki króm kån mŷ sir.

⁹ Ha vé, Topè tóg ěg mŷ: “ā prũ tũ fi mré nŷ tŷg nĩ, kŷ ā mén tũ mré nŷ tŷg nĩ gé,” he ja nĩ. Kŷ tóg: “ũ tén tŷg nĩ, nén ũ péju(g) tŷg nĩ, ũ to ón tŷg nĩ, nén ũ to én tŷg nĩ gé,” he ja nĩ gé. Ti tŷ ěg jyvĕn vŷ e nŷtĩ. Hā ra ěg tŷ ti tŷ ěg jyvĕn kar tŷ tó pir han sór kŷ ěg tóg tag tónh ke mŷ, ha mē: “ā régre ki rĩr nĩmnĩ. Á tŷ vènh ki rĩr há ri ke han nĩ, ā régre ki,” he jé ěg tóg ke mŷ.

¹⁰ Ěg tŷ ěg régre kar ki rĩr há nŷtĩn kŷ ěg tóg ag mŷ nén ũ kórég han ke tũ nĩ. Hā kŷ ěg tóg jagnĕ ki rĩr há nŷtĩn ki Topè tŷ ěg jyvĕn tí ěn ki króm kån ke mŷ.

¹¹ Vāsān nĩ. Vènh jykre kórég tovānh kån nĩ. Ti tŷ ěg kren han ke kurā vŷ kakó pē tí ha. Ěg tŷ ti ki ge vén kŷ tóg ver kór gy nŷ ja nĩ, kuvar gy nŷ ja tóg nĩ ver ěn kā, hā ra tóg ũri kakó tāvĩ tí ha.

¹² Ti kätŭg to hã tóg ěg mŷ kuty ri ke nĩ. Kuty tag vŷ tũg ke nē ha, tŷ vaj ke ti nŷ ha. Ti tŷ kãnhmar kätŭg ke to ken hã vē. Hã kŷ ag tŷ kuty kã nén han tĩ ěn han mãn sór tũg nĩ, vėnh jykre kavėj ěn ti. Ěg tŷ kurã ki nén han jafã ěn han nĩ, vėnh jykre kurjŷ ti, ěg tŷ vėnh jykre há han kŷ vėnh jykre kórég kato tē jé, tŷ tũg' he jé.

¹³ Ěg tŷ kurã mĩ tũg há han tĩ ěn ri ke han nĩ. Ag tŷ baile ki nén ũ vėnhmŷ han tĩ ěn han tũg nĩ. Kronkron tũg nĩ gé. Fag to ěn tũg nĩ, kŷ fag mré nŷ tũg nĩ, ag mré ke gé. Jagnė to jũ tũg nĩ gé, jagnė tũ to ěn tũg nĩ gé.

¹⁴ Ěg Senhor tŷ Jesus Cristo jykre tãg hã han nĩ. Ěg tŷ nén to ěn mũ ěn han sór mãn tũg nĩ. Ěg jykre si tovãnh kãn nĩ.

14

Jesus ki ge kŷ nŷtĩ fag tŷ jagnė to há nŷtĩnh ke

¹ Ũ tóg krój nŷtĩ ver. Jesus jykre ũ tóg ver ag mŷ jagy tĩ, ag tŷ ti ki ge kŷ nŷtĩ ra. Ũ tŷ ge tovãnh tũg nĩ, ag mŷ: “ěg mré Topė vĩ mėnh kätŭg nĩ,” hemnĩ. Ag vĩ kafãh tũg nĩ hã ra, ag tŷ kygnė kŷ: “tag tóg inh mŷ ge nĩ, ge nĩ,” he mũ ra.

² Ũ mŷ tóg nén kar ko há tĩ, hã ra ũ tóg nén ũ nĩ ko vãnh nĩn kŷ ěkre há ko tĩ. “Vėnh kãggrã mŷ ag tóg pũn ja nĩ, vėnh mėg ěn nĩ ti, ag tŷ ón kŷ topė kãggran ja ěn mŷ, hã kŷ sóg ti nĩ ko sór tũ nĩ,” he ag tóg tĩ, ũn krój ag.

³ Hã ra ãjag kãmĩ ũ ag tóg ge ra ko tĩ, vėnh kãggrã tŷ ag mŷ tŷ nén ũ tũ nĩn kŷ. Ājag tŷ ko kŷ ũ tŷ ko vãnh ěn to é he tũg nĩ. Kŷ ãjag tŷ ko sór vãnh kŷ ũ tŷ ko mũ ěn to: “ti kórég han ti tĩ,” he sór tũg nĩ gé. Vėjėn to jagnė mŷ vĩ tũg nĩ. Ā mré tóg Topė ki rã kŷ jé gé, ũ tŷ ko mũ ti, kŷ ti to vĩ tũg nĩ.

⁴ Jesus mŷ rãnhraj tĩ vŷ tŷ ěg nŷtĩ, ěg kar, hã kŷ tóg vėnhmŷ tĩ, ěg tŷ jagnė to vĩ sór kŷ. Ũ tŷ ěg mŷ vĩnh ke mũ vŷ tŷ ěg Senhor ti nĩ, ěg tŷ tŷ ti tũ nŷtĩn kŷ. Hã ra ěg kar vŷ há kutė kãn ke mũ, kurã ěn kã, ha vemnĩ, ěg Senhor tŷ ěg tar han kŷ.

⁵ Ũ tóg vėnh kãn ke kurã to: “kurã kórég,” he tĩ, kurã ũ to ke gé. Jãvo ũ tóg kurã kar to: “kurã há,” he tĩ gé. Há kar ti nŷtĩ, ãjag tŷ kurã han mũ ti. Kŷ ãjag tŷ nén to jykrén mũ ěn hã han nĩ.

⁶ Ěg kar vŷ ěg Senhor jykre mĩ mũ sór mũ, hã kŷ ũ tóg kurã kórég han sór tĩ, ti jykre mĩ tĩ jé, jãvo ũ tóg kurã kórég han vãnh nĩ, ti jykre mĩ tĩ jé gé. Há kar ti nĩ.

Kŷ ũ tŷ nén ũ kar ko mũ vŷ ge nĩ gé. Ěg Senhor jykre mĩ tĩ hã jé tóg ko tĩ gé. Ti hã mŷ tóg to vĩ há han tĩ, vėjėn to, Topė hã mŷ. Ũ tŷ nén ũ nĩ ko vãnh ěn vŷ ěg Senhor jykre mĩ tĩ hã jé ko vãnh nĩ gé, ti tŷ ti mŷ há nĩ jé. Kŷ tóg to Topė mŷ vĩ há han tĩ gé. Há kar ti nĩ, ěg tŷ nén ũ nĩ ko mũ ti, ěg tŷ ko vãnh ti ke gé.

⁷ Ěg pi(jé) ěg jykre han ke mũ', ěg tŷ ga kri mũn kŷ. Kŷ, ěg ter ken kŷ ěg pi(jé) ěg jykre ki ter ke mũ gé'.

⁸ Ěg tŷ ga kri mũn kŷ ěg tóg ěg Senhor jykre hã han ke mũ. Ti tũ han hã jé ěg tóg ga kri mũ nĩ. Kŷ, ěg ter ken kŷ ěg tóg ti jykre hã ki ter ke mũ gé'. Hã kŷ ěg tóg tŷ ti tũ kar nŷtĩ sir, ěg tŷ ga kri mũn kŷ ke gé. Ěg Senhor tŷ Jesus Cristo tũ vŷ tŷ ěg nŷtĩ.

⁹ Ěg tŷ tŷ ti tũ nŷtĩ hã jé tóg ter ja nĩ. Hã jé tóg rĩr mãn ja nĩ gé. Ti tŷ tŷ ěg Senhor nĩ hã jé tóg ter ja nĩ, vėnh kar pã'i, ũn rĩnrĩr mũ ag pã'i, ũn kãgter ja ag pã'i ke gé.

10 Kŷ ājag tŷ hē ri ke jé jagnē to vī sór nē? Ājag tŷ hē ri ke jé jagnē to é he nē? Topē hā vŷ ěg jykre ve kân ke mŷ, ěg kar, ti tŷ ěg jé prēr ken kŷ.

11 Hā kŷ tag tóg rán kŷ nī, ha mē. “Rīr inh jē nī,” he tóg, ěg Senhor ti. “Vēnh kar vŷ inh krēm grīnh kenh ke mŷ, ha vemñī. Vēnh kar vŷ inh mŷ: “ũn mág vŷ tŷ ā nī,” henh ke mŷ, he ti, Topē ti,” he tóg, Topē vī tŷ rán kŷ nī ki.

12 ěg kar vŷ Topē rīnja tá nŷtīnh ke mŷ, kŷ tóg ěg jykre tugñŷm ke mŷ. ěg hā ki tóg jēmēnh ke mŷ, ěg tŷ nēn han ja ěn to.

13 Hā kŷ jagnē to vī mân tŷg nī.

Ěg tŷ jagnē to fen ke

Jagnē to: “kórég ti nī,” he mân tŷg nī. Ājag tŷ nēn ū han ken kŷ tag to jykren nī, ha mē. “Isŷ tag han kŷ inh régre mŷ inh ve kŷ Topē vī mranh ke tŷ nī vŷ?” he jé ěg tóg ke mŷ. “Ti mŷ tŷ prānh kenh ke tŷ nī vŷ, isŷ tag han kŷ?” he jé ěg tóg ke mŷ.

14 Tag ki kanhró inh nī, ha mē: “vējēn pi(jé) ěg kavénh tí’.” Jesus tŷ tón hā vē. Nén ū tŷ vē, vējēn ti, ěg tŷ ko jafā tāvī vē. Hā ra ū tóg nēn ū nī to: “vēnh kăgrá mŷ ag tóg pŷn ja nī, vēnh mēg ěn nī ti, hā kŷ sóg ko kŷ Topē vī mranh tí,” he tí. Ū tŷ tag tó mŷ jykre kavénh ti tí, ti tŷ ge ra kon kŷ.

15 Inh mŷ tóg tŷ Topē vī mranh tŷ nī, isŷ nēn ū nī ko tag ti. Kŷ sóg ko’ he mŷ sir. Kŷ inh régre ū tóg isŷ ko mŷ ve kŷ ko sór mŷ gé sir, hā ra tóg ti hā mŷ Topē vī mranh ri ke nī. Kŷ tóg ko kŷ isugrīn Topē vī mranh mŷ sir. Kŷ tóg nŷgme ki kutēnh ke mŷ sir, ti tŷ ko kŷ Topē vī mranh kŷ. Kŷ tóg isŷ ti tén ri ke nī sir, Cristo tŷ ūn jagfy ter ja ěn ti. Isŷ tag han kŷ tóg sŷ ti to há tŷ ri ke nī, isŷ inh jēn tugñīn ti tén ri ke han kŷ.

16 Kŷ tag han sór tŷg nī, ū tŷ ājag tŷ nēn han mŷ to ājag to vī tŷ nī jé. Há ti nī vē, ājag tŷ kon kŷ, hā ra ū tŷ ājag jēn to ājag to vīn kŷ ko sór tŷg nī.

17 Topē tŷ tŷ ěg Senhor nīn kŷ ěg jēn tóg tŷ nēn ū tŷ nī hā mŷr, kŷ ěg tŷ nēn ū nī ko tŷ ra tóg ěg mŷ tŷ nēn ū tŷ nī. Nén ū ū to ěg jykren ke mŷ ha, hā vŷ: vēnh jykre kuryj, he mŷ, vēnh jykre kusa, he mŷ, vēnh jykre sér, he mŷ, Topē kuprīg tŷ mŷr, ěg jagrē tág ti.

18 ěg tŷ gen kŷ Cristo jykre han kŷ tóg Topē mŷ há tí ha, ěg jykre ti, kŷ tóg ěg mré ěprā ke ag mŷ há tí gé sir, ha vemñī.

19 Kŷ ěg jé jagnē krī kuprăg hā to jykren. ěg jé jagnē tar han sór.

20 Kŷ tóg ěg tŷ nēn ū nī ko to ěg régre tŷ tŷ prānh ke han kŷ tóg kórég nī, ěg tŷ ū tŷ Topē ki rā kŷ nī ū tŷ tŷ prānh ke han kŷ. Vējēn kar vŷ há nī. Hā ra ū tóg vējēn ū to jykren kónān sór mŷ, ti tŷ to Topē vī mranh kŷ. Ti tŷ ge ra kon kŷ tóg tŷ prānh ke mŷ sir.

21 Kŷ tóg kórég nī, ěg régre tŷ ěg tugñīn Topē vī mranh kŷ. Hā jé nēn ū nī ko tŷg nī, ā régre tŷ to tŷ prānh kenh (ka) mē tīn kŷ. Ti rīnve vīnho kron tŷg nī gé. Nén ū tŷ ā régre tŷ Topē vī mranh han ěn tovānh kân nī.

22 Ā tŷ nēn ū to: “kórég tŷ ti nī,” hen kŷ Topē hā mŷ tómnī. Hā ra ā régre rīnve han tŷg nī, ti tŷ ā mŷ há nī ra, ā régre tŷ ā tugñīn Topē vī mranh tŷ nī jé. Ā tŷ Topē tŷ ā mŷ nēn to hā han kŷ tóg há nī, kŷ ā tóg jatŷ nī, ha vemñī.

23 Ū tóg ko tí, hā ra tóg ā tŷ ko mŷ tag to: “isŷ Topē vī mranh ja mŷ vŷ?” he mŷ sir. Ti tŷ ge ra ko kŷ tóg to krī kufy nī sir, kŷ tóg Topē vī mranh mŷ sir. ěg tŷ ti ki ge kŷ nŷtīn kŷ ěg tóg ti tŷ hā han sór mŷ sir. ěg tŷ nēn ū to: “tag han kŷ inh mŷ ti vī mranh mŷ vŷ?” hen kŷ ěg han ke tŷ nī, ke tŷ nī mŷ ra ěg ti vī mranh mŷ.

15

Ēg tǵ ěg mré ke ag to há nǵtǵnh ke

¹ Ha vé, tar ěg nǵtǵ. Hǵ kǵ tóg ěg tǵ ũn krój nǵtǵ ag to fen nǵtǵnh há tǵ. “Ēn tóg inh mǵ há tǵ, hǵ kǵ sóg han sór mǵ,” henh ke tǵ ěg tóg nǵ.

² “Mǵ inh régre mǵ há nǵ vǵ?” he jé ěg tóg ke mǵ. Tǵ tǵ ti mǵ há tǵ nǵn kǵ ěg han ke tǵ nǵ. Ēg tǵ ti tar han sór vé, ěg tǵ nén han mǵ kar tǵ.

³ Cristo pí(jé) ǵ tǵ nén to én mǵ ěn han ja nǵgtǵ, hǵ kǵ tóg ěg jagfy jagtar ja nǵgtǵ. Kǵ tóg Topě mǵ: “ǵ to ag tóg vǵ kónǵn tǵ, ǵ kato tě ag, hǵ ra ag vǵ vǵ inh kri kutěnh ke mǵ,” he ja nǵ. Tǵ mur tǵg ki Topě vǵ tǵ ũ tóg ti vǵ tag rán ja nǵ, hǵ ra tóg ge nǵ.

⁴ Hǵ ra Topě tóg ěg kanhrǵn sór mǵ, hǵ kǵ tóg ǵ vǵ tó tǵ ag mǵ: “ha rán,” he ja nǵgtǵ, hǵ kǵ ag tóg ránrán ja nǵgtǵ. Ēn ve kǵ ěg tar nǵtǵ, Jesus jykre mǵ mǵ to, kǵ ěg tǵ prǵnh kenh ke tǵ nǵ. Kǵ ěg tóg ěg tǵ kanhkǵ tá nén venh ke ěn kǵ jatǵ' henh ke tǵ nǵ gé.

⁵ Topě vǵ ěg to fen kǵ nǵ. Tǵ hǵ vǵ ǵjag tǵ jagně to fen han ke mǵ, ti kóm, ǵjag tǵ ti mré jykre píř nǵtǵ jé, ǵjag tǵ Jesus Cristo ki ge kǵ nǵtǵnh kǵ. Ēg tǵ to vǵsǵn han ki kanhró tóg nǵ, Topě ti.

⁶ Kǵ ǵjag tóg jagně mré ěg jóg tǵ Topě to: “ũn mág vǵ tǵ ti nǵ,” henh ke mǵ gé. Věnh vǵ píř han jé ǵjag tóg ke mǵ, ti to, ěg Senhor tǵ Jesus Cristo to ke gé.

Fóg ag mré kanhgág ag tǵ Topě vǵ měnh ke

⁷ Hǵ kǵ jagně to há nǵtǵmǵnǵ, Cristo tǵ ěg to há nǵ ri ke nǵtǵmǵnǵ, jagně to. Kǵ ũ tóg ǵjag jykre ve kǵ Topě to: “ũn mág vǵ tǵ ti nǵ,” henh ke mǵ.

⁸ Tag to jykrén nǵ, ha mě. Cristo vǵ Judeu ag ki rǵr jé kǵtǵg ja nǵ, ti tǵ Topě tǵ vǵsǵ ěg jóg'jóg ve ag mǵ nén tó ja ěn ki han jé. Ēn ve kǵ ěg tóg ki kanhrǵn mǵ, Topě tǵ věnh vǵ há hǵ tó tǵ ti.

⁹ Kǵ tóg povo ũ ag jagǵgtǵn gé, kǵ ag tóg ti tugrǵn Topě mǵ vǵ há han mǵ gé sir, fóg ag, kanhgág ag ke gé. Hǵ kǵ Davi tóg tag rán ja nǵ gé, ha mě: “tag tugnǵn sóg ǵ mǵ vǵ há han ke mǵ, fóg ag rǵnve, kanhgág ag rǵnve ke gé. Ag rǵnve sóg ǵ mǵ jǵn ke mǵ, ǵ jé tó jé sóg ke mǵ, ǵ jǵji tó kǵ,” he ja tóg nǵ, Davi tǵ, Topě vǵ tǵ rán kǵ nǵ ki.

¹⁰ Kǵ tag tóg rán kǵ nǵ gé, ha mě. “Fóg', kanhgág', mǵ sér nǵtǵmǵnǵ, Judeu ag mré hǵ, ti tǵ ag mré hǵ,” he tóg mǵ gé, Topě vǵ tǵ rán kǵ nǵ ki.

¹¹ Kǵ tag tóg rán kǵ nǵ gé, ha mě. “Fóg', kanhgág', ěg Senhor mǵ vǵ há han nǵ. Topě to vǵ há han kǵn nǵ, povo kar,” he ja tóg nǵ gé, Topě vǵ tǵ rán kǵ nǵ ki.

¹² Kǵ Isaiás vǵ Cristo to tag tó ja nǵ gé, ha mě: “Jessé krě'krě ũ vǵ tǵ ũn mág jěnh mǵ, Davi panh ěn krě'krě ũ, kǵ tóg tǵ povo kar ag pǵ'i mág jěnh mǵ. Fóg ag vǵ kanhgág ag mré ti ki ge sór ke mǵ,” he ja tóg nǵ, Isaiás ti. Tǵ tǵ Jesus tón hǵ vé.

¹³ Topě hǵ ne ěg mǵ ven ke mǵ', nén ũ há kar, hǵ kǵ tóg ěg mǵ tó ja nǵ. Tǵ hǵ ki ǵjag tóg ge kǵ nǵtǵ. Tǵ hǵ vǵ ǵjag fe tǵ mǵn kenh ke mǵ, ti hǵ vǵ ǵjag krǵ kuprǵg ke mǵ'. Topě kuprǵg vǵ tǵ ǵjag jagrě nǵ, kǵ tóg nén kar han há nǵgtǵ. Tǵ hǵ vǵ ǵjag tar han ke mǵ', ǵjag tǵ Topě tǵ ěg mǵ nén ũ há ven kenh ke ěn to tar nǵtǵ jé, ǵjag tǵ tag hǵ mǵ ěkrén jé.

Paulo rǵnhrǵj

¹⁴ Inh kanhkǵ, věnh jykre há han kǵ ǵjag tóg nǵtǵ. Isǵ ǵjag mǵ tó tǵg ki ǵjag tóg ki kanhrǵn ja nǵ. Vég isóg nǵ nǵ. Hǵ kǵ ǵjag tóg jagně jyvěnh ki kanhró nǵtǵ gé.

15 Inh vėnh rá tag ki sóg ājag mý nén ũ tỹ hėn ri ke kāmén, ti tỹ inh mý sér tĩn kỹ, sỹ ājag vėg tú ra. Ājag mý sóg kāmén há han, ājag tỹ kã jatu tú nĩ jé, ājag tỹ mėg mũ tag kã. Topė ne tag to inh jėnė', tag to tóg isar han'.

16 Inh jé prėr tóg, isỹ povo kar mý Jesus Cristo kāmén jé. Kỹ sóg ti tú ki rĩr jė nĩ, Topė vĩ sér tó sóg tĩ, fóg ag mý, kanhgág ag mý ke gé. Ag tỹ ti ki ge kỹ tóg ti mý sér tĩ, Topė kuprĩg tỹ ag tỹ ũn há han kỹ, ag tỹ tỹ Topė tú nỹtĩn kỹ. Inh rãnrãj hã vė.

17 Tỹ sóg Jesus Cristo rãnrãj han jafã nĩ, Topė tỹ isar han kỹ, kỹ inh rãnrãj tóg inh mý sér tĩ.

18 Kỹ sóg ājag mý Cristo tỹ inh mý vėnh rãnrãj nĩm ja hã tỹ vėmén sór mũ. Fóg ag mrė kanhgág ag tỹ ti ki ge jé tóg isar han tĩ, ti vĩ tó tag to. Inh vĩ mė kỹ ag tóg ti ki ge sór mũ, ag tỹ inh jykre ve kỹ ke gé. Jesus Cristo tỹ nén han mũn hã vė.

19 Milagre hyn han sóg tĩ gé, Topė tỹ isar han kỹ. Ti kuprĩg tỹ inh krĩn kỹ sóg hyn han tĩ, milagre ti. Milagre hyn han kỹ sóg vėnh kar mý ti vĩ ti tó ja nĩgtĩ, Jerusalém tá, kỹ tá kãkutė kỹ sóg ga kar mĩ tĩg ja nĩgtĩ gé, ga tỹ Ilĩria mĩ hã. Vėnh kar mý sóg Cristo kãme sér tó ja nĩgtĩ.

20 ũ tỹ tá jun tú ra sóg tá jun vén ja nĩgtĩ, sỹ tá ti vĩ tó vén jé, ag tỹ vãhã Cristo kãme mė jé, ũ tỹ mė ja tú ag. Inh hã ne ag mý tó vén sór ja nĩgtĩ', isỹ ũ rãnrãj ja ki rãnrãj tú nĩ jé.

21 Hã kỹ tag tóg rán kỹ nĩ, ha mė: “ũ tỹ ti vėme mė ja tú ěn ag vỹ ti ki kanhrãn ke mũ. ũ tỹ ti vĩ mė ja tú ag vỹ mėnh ke mũ,” he ja tóg nĩ, Topė vĩ rá ki. Sỹ ti vĩ tag hã ki króm sór vė.

Paulo tỹ Roma ra tĩg sór

22 Hã kỹ sóg ājag tá jun ja tú nĩ ver, sỹ ājag venh há hã ra.

23 Hã ra sóg hur han kãn, tag ki inh rãnrãj ti. Vãsỹ sóg to jykrén, sỹ ājag venh tĩg jé.

24 Kỹ tóg hėn ri ke mũn inh mý ki króm ke mũ ha. Sỹ ga tỹ Espanha ra tĩg sór vė, kỹ sóg ājag venh rãnh mũ, ěpřy kãkre ki, ěmĩn kãkre ki. Kỹ tóg há tĩ, ājag tỹ inh jagãgtãn ken kỹ, sỹ ājag tá jun ken kỹ. Ājag tỹ inh jagãgtãn há han kỹ sóg tĩg há han ke mũ, Espanha ra. Hã ra sóg ājag mrė nĩ sĩ han sór mũ, ājag tỹ isar han jé.

25 Hã ra sóg ver Jerusalém ra tĩg sór mũ. Sỹ tá Topė tú ag mý jãnkamy ma tĩg ke vė.

26 Ga tỹ Macedônia tá Jesus mrė ke ag vỹ inh mý jãnkamy vin, ga tỹ Grécia tá Jesus mrė ke ag ke gé, isỹ Jerusalém tá ũn jagãgtar nỹtĩ ag jagãgtãn jé, jãnkamy ěn tỹ. ěg mrė ke ag vė gé, Jerusalém tá ũn jagtar nỹtĩ ag.

27 Macedônia tá ke ag mý tóg sér tĩ, ag tỹ Jerusalém tá ke ag mrė jãnkamy vėnh kãpãm kỹ. Grécia tá ke ag mý tóg sér tĩ gé. Hã ra tóg inh mý há tĩ gé. Jerusalém tá ke ag vỹ Jesus ki ge vén, Judeu ag, kỹ fóg ag vỹ ag vĩ mė kỹ Jesus kãme mė ja nĩgtĩ. Hã kỹ fóg ag vỹ Judeu ag tú mãn ja nĩ, hã vỹ: Topė vĩ, he mũ. Kỹ tóg há nĩ ha, ag tỹ mė kar kỹ ag mý ājag tú vėnh kãpãm kỹ, vėnh kaja jé, ag jãnkamy ti.

28 Isỹ tag han kãn kỹ, sỹ ag mý jãnkamy tag vin kar kỹ sóg cidade tỹ Roma tá nĩ sĩ han kar kỹ ga tỹ Espanha ra tĩg sór mũ ha.

29 Ha mė, isỹ ājag ki jun ken kỹ Cristo vĩ vỹ ājag mý sér tĩnh mũ, ěg tỹ jagnė mrė ti to vėmén kỹ, isỹ ājag mý ti vĩ tón kỹ, ha vemnĩ. Ti vĩ sér to tóg ěg mý sér tĩnh mũ.

³⁰ Inh kanhkā', ěg Senhor tỹ Jesus Cristo ki ge kỹ ājag tóg nỹtĩ, kỹ ājag tóg jagnē to há nỹtĩ gé, Topē kuprĩg tugrĩn. Kỹ sóg ājag mỹ tag to vĩ sór mũ gé, ha mẽ. Iso Topē mré vĩmnĩ, inh mré, to krónh ke tũg nĩ.

³¹ Judéia tá ag vỹ e nỹtĩ, ù tỹ Jesus kato tẽ mũ ag, kỹ ag tóg inh kato tẽ sór mũ gé. Kỹ iso Topē mré vĩmnĩ, ti tỹ inh jy nĩgãn jé, Jerusalém tá ù tỹ Jesus ki ge kỹ nỹtĩ ag tỹ inh mỹ vĩ há han jé gé, ti tỹ ag mỹ há tí jé, sỹ jãnkamy ěn tỹ ag jagãgtãn sór mũ tag ti.

³² Tá kãtĩg kỹ sóg jatun mỹ ājag ki jun ke mũ. Kỹ tóg ěg kar mỹ sér tĩnh mũ, sỹ ājag to pasanh tĩg ken kỹ, Topē tỹ isĩg ke tag to há nĩn kỹ. Kỹ ājag tóg isar han ke mũ sir.

³³ Topē vỹ ěg krĩ kuprãg tĩ. Kỹ sóg ti mỹ to vĩ tĩ, ti tỹ ājag krĩ kãnhvy han jé. Amém.

16

Paulo tỹ ùn e mĩ ěkrég tĩ

¹ Ājag mỹ sóg ěg mré ke fi tó sór mũ, Febe fi. Cidade tỹ Cencreía tá fi tóg Jesus ki ge kỹ nỹtĩ fag ki rĩr tĩgtĩ.

² Fi tỹ kejẽn ājag ki jun kỹ fi mỹ: “ha kãrã,” hemnĩ. Ājag mré fi tóg Jesus ki rã kỹ jẽ nĩ, kỹ fi mỹ nén tỹ fi mỹ tũ ěn ven kãn nĩ. Û tỹ hẽn ri ke jagãgtãn fi huri, inh ke gé.

³ Priscila fi mĩ sóg ěkrég tĩ, fi mén tỹ Áquila mĩ ke gé. Inh mré fag tóg rãnrhãj mág, Jesus Cristo rãnrhãj han kỹ.

⁴ Isugnĩn fag tóg kãgter kren, inh jy nĩgãn jé. Tag hã mĩ sóg ěkrég tĩ, kỹ sóg fag to há tãvĩ nĩ. Kỹ fóg kar kãmĩ Jesus ki ge kỹ nỹtĩ ag vỹ tag tugrĩn fag to há nỹtĩnh ke mũ gé, fag tỹ inh jy nĩgãn kỹ.

⁵ Fag ĩn krēm ù ag tóg vẽn hãn tĩ gé, culto han jé. ěn fag ki sóg ěkrég tĩ gé.

Iso há ù vỹ nĩ gé, hã vỹ: Epêneto, he mũ. Ga tỹ Ásia tá ù tỹ Jesus ki rã vén jan hã vẽ. Ti mĩ sóg ěkrég tĩ gé.

⁶ Kỹ Maria fi vỹ nĩ gé. Ājag mỹ fi rãnrhãj mág. Fi mĩ sóg ěkrég tĩ gé.

⁷ Kỹ sóg Adrônico mĩ ěkrég tĩ gé, Júnias mĩ ke gé. Inh kanhkã ag vẽ. Inh mré ag tóg sigse kỹ nỹtĩ ja nĩgtĩ gé. Apóstolo ag kãmĩ ag tóg tỹ ùn mág nỹtĩ. Vãsỹ ag tóg Jesus ki ge jég, isỹ ti ki rã tũg ki.

⁸ Ampliato mĩ sóg ěkrég tĩ gé. Ti to inh há tãvĩ nĩ, ěg Senhor tugrĩn.

⁹ Kỹ sóg Urbano mĩ ěkrég tĩ gé. Inh mré tóg Cristo rãnrhãj han tĩ. Kar kỹ iso há ù vỹ nĩ gé, Estáquis ti. Ti ki sóg ěkrég tĩ gé.

¹⁰ Apeles mĩ sóg ěkrég tĩ gé. Cristo tovãnh jãvãnh ja ti nĩ. Aristóbulo mré ke fag mĩ sóg ěkrég tĩ gé.

¹¹ Kar kỹ inh kanhkã ù vỹ tá jẽ gé, Herodião ti. Ti ki sóg ěkrég tĩ. Kỹ sóg Narciso mré ke fag mĩ ěkrég tĩ, ù tỹ fag kãmĩ ěg Senhor ki ge kỹ nỹtĩ fag.

¹² Kỹ sóg Trifena fi ki ěkrég tĩ, Trifosa fi mĩ ke gé. ěg Senhor mỹ fag rãnrhãj mũgtĩ. Kỹ sóg iso há tãvĩ ù fi mĩ ěkrég tĩ gé, hã vỹ: Pãrside, he mũ. ěg Senhor mỹ rãnrhãj to fi tar tãvĩ nĩ.

¹³ Kỹ sóg Rufo mĩ ěkrég tĩ. Topē ne ti kuprẽg', ti mỹnh fi ke gé'. Inh mỹ fi tóg tỹ inh mỹnh ri ke nĩ, ti mỹnh fi.

¹⁴ Kỹ sóg Asíncrito mĩ ěkrég tĩ, Flegonte mĩ ke gé, Hermes mĩ ke gé, Pátrobas mĩ ke gé, Hermas mĩ ke gé, ag mré Topē vĩ mẽ jé vẽn hãn tĩ ag mũ ke gé.

¹⁵ Kŷ sóg Filólogo mĩ êkrég tí, Júlia fi mĩ ke gé, Nereu mĩ ke gé, ti ve fi mré, Olimpas mĩ ke gé, kŷ ag mré Jesus ví mẽ jí vènh mǎn tí ag mĩ ke gé, Topê tũ kar ag mĩ.

¹⁶ Kŷ jagnê ki nhun ke ri ke han nĩ, Jesus mré ke kar ki, jagnê nĩgê kǎgmĩ kŷ. Cristo ki ge kŷ nŷtĩ kar vŷ ājag mĩ êkrég tí, êmā kar ki ke ag.

Ón kŷ vènh ví há mẽ sór tũg nĩ

¹⁷ Nén ũ tó sór sóg mũ gé ver ājag mŷ. Ũ ag tóg ājag tŷ jagnê to jũ han sór mũ. Ājag tŷ jagnê ví kafǎn kónǎn mũ han sór ag tóg mũ. Ag pi(jé) ājag tŷ Topê ví mẽ ja ên ri ke tó tí'. Ēn ag ví mẽ sór tũg nĩ.

¹⁸ Ag pi(jé) ěg Senhor tŷ Cristo rǎnhrǎj han sór tí'. Ag nug hǎ ki rĩr ag tóg tí'. Ag ví vŷ mẽ há tí, ón kŷ, kŷ ũ tŷ hèn ri ke ag tóg kri fi sór mũ, ag ví kri, ag tŷ ag jykre kórég ki kagtũg nŷtĩn kŷ, ũ tŷ nén ũ vènhmŷ to jykren tũ ag. Inh mŷ tóg ag tŷ ũ tŷ ge krĩn kónǎn ha mẽ tí. Kŷ ag ví mẽ sór tũg nĩ.

¹⁹ Ājag tŷ Topê ví kri nĩm mũ tag vŷ mẽ há tí. Vènh kar vŷ mẽ, kŷ tóg inh mŷ sér tí sir, ājag to. Kŷ tóg ājag tŷ vènh jykre há ki kanhrǎn mág nŷtĩnh há tí. Ājag tŷ vènh jykre pǎno to jykren tũ pẽ nŷtĩn kŷ tóg há tí gé.

²⁰ Topê vŷ ěg krĩ kuprǎg tí. Kǎnhmar tóg ěg mŷ Satanás tŷ tũg' henh ke mũ gé, ha vemnĩ, kŷ tóg ājag vóg mǎn ke tũ nĩ ha.

Ēg Senhor tŷ Jesus mŷ sóg to ví tí, ti tŷ ājag mŷ ā tŷ nén ũ há ên vin jí.

Paulo mré ke ag tŷ Roma ki ke fag mĩ êkrég tí

²¹ Inh mré Jesus rǎnhrǎj han mũ tŷ Timóteo vŷ ājag mĩ êkrég tí gé, Lúcio ti ke gé, Jasão ke gé, Sosipatro ke gé, inh kanhkǎ ag.

²² Ũ tŷ Paulo mŷ tag rǎn mũ vŷ tŷ inh nĩ, hǎ vŷ: Tércio, he mũ. Kŷ sóg ājag mĩ êkrég tí gé, ājag tŷ inh mré ěg Senhor ki ge kŷ nŷtĩn kŷ.

²³ Gaio vŷ ājag mĩ êkrég tí. Ti ĩn krēm sóg jê, kŷ ěg tóg ti ĩn krēm culto han tí. Erasto vŷ ājag mĩ êkrég tí gé, ũ tŷ cidade jǎnkamy ki rĩr tí ên ti. Ēg régre tŷ Quarto vŷ ājag mĩ êkrég tí gé.

²⁴ Ēg Senhor tŷ Jesus Cristo mŷ sóg to ví tí, ti tŷ ājag kar tar han jí. Amém.

Topê mŷ ěg ví há han ke

²⁵ Ha mẽ, ěg jí Topê mŷ ví há han. Ēg tar han ki kanhró tóg nĩ, ěg tŷ ti ki rǎ kar krónh ke tũ nĩn jí. Sŷ ājag mŷ Topê ví sér tó mũn hǎ vè, Jesus Cristo kǎmén kŷ. Vǎsŷ ěg tóg mẽ ja tũ nĩ, ti ví sér tag ti. Ēg tŷ vǎhǎ mẽ vè, Topê tŷ ěg mŷ to vènh jykre nĩm kŷ. Prŷg tŷ hèn ri ke ki ag tóg mẽ ja tũ nŷtĩ, ěg jo ke ag.

²⁶ Ũri hǎ ěg tóg mẽg mũ. Vǎsŷ Topê ví rǎn tí ag vŷ ěg tŷ ũri mẽg mũ tag tó ja nĩgtĩ. Kŷ Topê tóg tag to: “povo kar mŷ kǎmén nĩ, fóg ag mŷ, kanhgág ag mŷ, Judeu ag mré hǎ,” he ja nĩ, ěg tŷ mẽ kǎn jí, ti ki ge jí, ti ví kri fi jí, ti tŷ tŷ ěg Senhor kar jê jí. Ā tŷ nén kar han tũg ki tóg nĩ nĩ, Topê ti, ũ tŷ ti han ja tũ (hǎ) ra. Kŷ tóg tũ' henh ke tũ nĩ gé. Gen kŷ tóg nĩ nĩ.

²⁷ Ti hǎ ne ā pir mŷ nén ũ kar ki kanhró nĩ', Topê ti. Jesus Cristo hǎ tóg ěg mŷ Topê ven ke mũ. Kŷ ěg tóg ti hǎ mŷ ví há han sór mũ, Topê hǎ mŷ, kŷ tóg krŷg henh ke tũ nĩ, ěg tŷ ti mŷ ví há han mũ ti. Amém.

PAULO TỸ CARTA HAN: CORINTO TÁ KE AG MỸ CARTA VE

¹ Paulo tỹ rá vè. Isỹ cidade tỹ Corinto tá ke ag mỹ rán hã vè. Kỹ ãg régre tỹ Sóstenes vỹ inh mré rán mũ gé. Topê hã ne inh kuprêg', kỹ tóg inh jé prêr, Jesus Cristo tỹ inh fêg jé, sỹ tỹ ti apóstolo jé jé sir. Hã kỹ sóg ãjag mỹ rán mũ.

² Corinto tá ãjag tóg vènh măn tĩ, Topê vĩ mẽ jé. Topê tũ vĩ tỹ ãjag nỹtĩ, ãjag tỹ tỹ Jesus Cristo mré ke nỹtĩn kỹ. ãjag jé prêr tóg, ãjag tỹ tỹ ti tũ nỹtĩn jé.

Vènh kar mỹ ke vè gé, vènh rá tag ti, ù tỹ hẽ tá ãg Senhor tỹ Jesus Cristo jiji tó tĩ ag mỹ. Û tỹ ti hã to: “ãg Senhor vè,” he tĩ ag mỹ ke vè gé. Ag Senhor vè, kỹ tóg tỹ ãg Senhor nĩ gé, Jesus ti.

³ Topê mỹ sóg to vĩ tĩ, ti tỹ ãjag tar han jé, ti tỹ ãjag krĩ kuprãg jé, ãg jóg mág ti, ãg Senhor tỹ Jesus Cristo jóg ti.

Topê tỹ ãg mỹ nén han mũ vỹ há nĩ

⁴ Kurã kar ki sóg ãjag to Topê mré vĩ tĩ. Ti mỹ sóg: “há ti nĩ, ã tỹ Jesus Cristo tũgrĩn ag tar han kỹ,” he tĩ.

⁵ Ti tũgrĩn ãjag tóg ùn rico ag ri ke nỹtĩ, nén kar to mỹr, Topê vĩ to, vènh jykre há kar to. Ki kanhró ãjag tóg nỹtĩ.

⁶ Cristo tỹ vème ki kanhró ãjag tóg nỹtĩ mỹr, to tar ãjag tóg nỹtĩ.

⁷ Hã kỹ Topê kuprĩg tỹ ãg mỹ nén nĩm tĩ ên vỹ tũg' he vãnھ nĩgtĩ ãjag mỹ. ãg Senhor tỹ Jesus Cristo vènh ven măn ên jãvãnھ ãjag tóg mũgtĩ gé, ti kãtĩg ke ti.

⁸ Ti hã vỹ ãjag tar han mũ', ãjag tỹ ti tovãnھ tũ nĩ jé, ãjag tỹ kygnêg tũ nĩ jé. Kỹ ãg Senhor tỹ Jesus Cristo kãtĩg măn kỹ, ti kurã ki, kỹ tóg ãjag tỹ kygnê ja tũ ên venh ke mũ sir.

⁹ Topê ne fagrĩnh mỹ vĩ vãnھ nĩgtĩ'. ãjag jé prêr tóg, ãjag tỹ tỹ ti kósin tỹ Jesus Cristo mré ke nỹtĩ jé, ãjag tỹ tỹ ãg Senhor mré ke nỹtĩ jé gé.

Vènh kãpãm kỹ nỹtĩ tũg nĩ

¹⁰ Inh kanhkã', vènh vĩ pir han nĩ. ãg Senhor tỹ Jesus Cristo jiji ki sóg ãjag jyvên sór mũ, hã kỹ sóg ke mũ. Vènh kãpãm sór tũg ra. Vènh jykre pir han sór ra. Nén pir hã to jykrén nĩ. Vènh jykre pir hã han sór ra.

¹¹ Inh kanhkã', ãjag to sóg vènh vĩ jagy mẽ. Cloe fi mré ke fag vỹ inh mỹ tó, kỹ fag tóg inh mỹ ãjag tỹ vènh kãpãm sór mũ kãmén, ãjag tỹ jagnê to jũ sór mũ tĩ.

¹² Tag mẽ sóg, ha mẽ: ãjag kãmĩ ù tóg nêji: “tỹ sóg Paulo mré ke nĩ,” he tĩ. Kỹ ù tóg nêji: “tỹ sóg Apolo mré ke nĩ,” he tĩ gé. Jãvo ù tóg: “tỹ sóg Pedro mré ke nĩ,” he tĩ, kỹ ù tóg: “tỹ sóg Cristo mré ke nĩ,” he tĩ gé.

¹³ Cristo mỹ vènh kãpãm kỹ nĩ? Vó. Inh hã mỹ ãjag jagfy cruz to sa? Vó. Inh jyyj tó kỹ ãjag mỹ vènh kygpe kỹ nỹtĩ', isỹ tỹ Paulo nĩn kỹ? Vó, ke tũ vè.

¹⁴ Hã kỹ tóg inh mỹ há tĩ, ùri, sỹ ãjag kygpe ja tũ nĩ ti. Tag to sóg Topê mỹ: “há ti nĩ,” he tĩ.

¹⁵ Kỹ ãjag tóg iso: “ti jiji tó kỹ sóg kype kỹ nĩ,” he vãnھ nỹtĩgtĩ. Crispo hã kype inh, kar kỹ Gaio ti ke gé.

¹⁶ Kar kỹ sóg Estéfanas fag kygpé gé. Kar inh ù kygpég tũ nĩ, hỹn, he sóg.

¹⁷ Cristo pi(jé) inh mỹ: “ha ag kygpenh tũg,” he ja nĩ'. Inh mỹ tóg: “ha ag mỹ inh kãmén tũg, ha inh vĩ tónh tũg,” he ja nĩ. Kỹ sóg tó tũgtĩ. Hã ra sóg ón kỹ tỹ

vême kanhró han vānh nīgtī, ke tū nī mū ra Cristo tỹ cruz to sa ja ěn tỹ nén ũ tū ri ke nī sir, isỹ inh vī kanhró tỹ ājag krīn sór mū ra.

Jesus tỹ cruz to sa ja hā tó ěg tĩ

¹⁸ Ũ mỹ ěg tóg vĕnh kagtĩg nỹtĩ ve nĩ, ěg tỹ Jesus tỹ cruz to sa mū ěn tó kỹ. Hā ra ag tỹ nũgme ki vār ke vĕ. Ag jāvo tóg ěg mỹ Topĕ tỹ há (r) nĩ, Jesus tỹ cruz to sa ti, hā kỹ ěg krenkren kỹ nỹtĩ, Topĕ tỹ hā tugrīn ěg krenkren han kỹ.

¹⁹ Hā kỹ tóg rán kỹ nĩ, ha mĕ. “Ũn kanhró mág ag jykre tỹ sóg tū' henh ke mū, ha vemnĩ, ũn estudo mág ag tỹ nén to jykrén mū tỹ sóg tū' henh ke mū,” he tóg, Topĕ ti.

²⁰ Hā kỹ ón kỹ ũn kanhró mág ag pi(jé) tỹ nén ũ nỹtĩ'. Ón kỹ vĕnh rán tĩ ag pi(jé) tỹ nén ũ nỹtĩ'. Ón kỹ ũn estudo mág ag pi(jé) tỹ nén ũ nỹtĩ'. ěg tỹ tag ki nén ũ ki kanhrān mū to tóg: “nén ũ tū vĕ,” he ja nīgtī, Topĕ ti. “Krī tū ag nỹtĩ, ũ tỹ tag hā nón mū sór mū ag,” he tóg, Topĕ ti.

²¹ Topĕ tỹ nén to jykrén mū vỹ ge nĩ, ha mĕ. ěg tỹ vĕsóg ki Topĕ to jykrén sór mū ra ěg tóg ti ki kanhrān ja tū nīgtī, ěg tỹ ga kri mūn kỹ. Hā kỹ Topĕ tóg ěg tỹ ti vī jĕmĕ kỹ kri fi kỹ ěg kren han mū. Hā kỹ tóg ag mỹ Topĕ krī tū nĩ ve nĩ, ũ tỹ ki kagtĩg ag mỹ.

²² Judeu ag ne ěg tỹ nén han vānh ve sór mū', milagre ti, ag tỹ Topĕ jykre ki kanhrān jé. Kỹ fóg tỹ Grego ag ne ón kỹ ti jykre to vĕmén sór mū'.

²³ Ag jāvo ěg tóg nén pir hā tó tí, hā vỹ: Cristo tỹ cruz to sa kỹ ter ja ti, he mū. Judeu ũ ag mỹ tóg jĕggy tĩ, ti cruz ti, jāvo tóg Judeu tū ag mỹ ěg krī tū nĩ ve nĩ, ag tỹ ěg vī mĕ kỹ, fóg ũ ag mỹ, kanhgág ũ ag mỹ ke gé.

²⁴ Judeu kāmĩ ũ ag tóg kuprĕg kỹ nỹtĩ jāvo, fóg kāmĩ ũ ag tóg kuprĕg kỹ nỹtĩ gé, kanhgág ag kāmĩ ke gé. Ag hā mỹ tóg há tí, Cristo tỹ cruz to sa kỹ ter ja ti, ũn kuprĕg kỹ nỹtĩ ag mỹ. ěg hā vĕ. Topĕ jykre tar hā vĕ, Cristo tỹ cruz to sa ja ti. Topĕ krī há to ken hā vĕ, hā vỹ: Cristo ter ja ti, he mū.

²⁵ Topĕ krī tū nĩ ve vỹ ěprā ke krī há nĩ ve káfór nĩ mỹr, ti hā ne ā pir mỹ krī há nĩ'. Kỹ Topĕ krój nĩ ve vỹ ěprā ke ag tar nĩ ve káfór nĩ gé. Topĕ hā ne ā pir mỹ tar nĩ'.

Topĕ vỹ ěg kuprĕg, ěg tỹ tỹ nén ũ tū ra

²⁶ Inh kanhkā', vĕso jykrén. Topĕ vỹ ājag jé prĕr. Ājag kāmĩ ti pipir nỹtĩ, ũn kanhró mág ag, escola tỹ hĕn ri ke ki vĕnh kanhrān ja ag. Ũn mág ag vỹ pipir nỹtĩ gé, ũn mág krĕ ag ke gé. Ũ tỹ ge kuprĕg mág tū ti nīgtī, Topĕ ti.

²⁷ Ũ tỹ ũn mág ag mỹ krī tū nĩ ve ag hā kuprĕg ti tí mỹr, ũn vĕnh kagtĩg ag. Ti tỹ ũn krī há ag mỹ'a han sór vĕ. Kỹ tóg tag ki ũn krój nỹtĩ ag kuprĕg, ũn tar ag mỹ'a han jé.

²⁸ Hā jé Topĕ tóg ũ tỹ tag ki jagtar nỹtĩ ag kuprĕg. Ũn mág ag tỹ ěg ve kỹ ěg tóg ag mỹ jagāgtar nỹtĩ. Nén ũ tū vỹ tỹ ěg nỹtĩ. Hā ra Topĕ tóg ěg kuprĕg mū, ag tỹ tū' hen jé, ũn mág ag vī tỹ.

²⁹ Hā kỹ ũ tóg Topĕ mỹ: “ũn mág vỹ tỹ inh nĩ, há inh nĩ,” henh ke tū pĕ nĩ, ěg tỹ kejĕn ti ve kỹ. Hā jé Topĕ tóg ũn jagtar ag kuprĕg.

³⁰ Topĕ mré ke vỹ tỹ ěg nỹtĩ, ha mĕ, ěg tỹ tỹ Jesus Cristo mré ke nỹtĩn kỹ. Topĕ hā vỹ ěg krī há han mū', Jesus tugnĩn. Topĕ hā vỹ ěg mỹ vĕnh pāte fón mū', ti tugrīn. Ti hā ne ěg tỹ tỹ ti tū nỹtĩ han mū', ti tugnĩn. Ti hā ne ěg krenkren han mū'. Topĕ tỹ ti mỹ vĕnh jykre nĩm hā vĕ, ěg tỹ tag han jé,

³¹ ũ tỹ rán kỹ nĩ tag ti, hā vỹ: “ājag tỹ ũ to: ũn mág vỹ tỹ ti nĩ, he sór kỹ ěg Senhor ti tómnĩ,” he mū, Topĕ vī rán ki.

2

Paulo vỹ krój nĩ gé

1 Inh kanhkã', ãjag ki sóg jun ja nĩ, sỹ ãjag mỹ Topẽ jykre tó jé. Inh pi(jé) ãjag mỹ ón kỹ vême kanhró han'. Inh pi(jé) ãjag tỹ vênh ví ki kanhró jãvãnh tó'.

2 Nén pir hã to sóg jykrén ja nĩgtĩ, sỹ ãjag mỹ tó jé, hã vỹ: Jesus Cristo, he mũ, ti tỹ cruz to sa kỹ ter ja ên ti.

3 Krój ja inh nĩ, sỹ ãjag ki jun kỹ. Mũmẽg ja inh nĩ, kanẽ jur han ja inh nĩ, sỹ ãjag mré nĩn kỹ.

4 Isỹ ãjag mỹ Topẽ ví tó kỹ inh pi(jé) vênh ví sĩnvĩ tỹ ãjag krĩn sór ja nĩgtĩ', inh pi(jé) inh krĩ há tỹ vênh ví kanhró tó ja nĩgtĩ'. Topẽ kuprĩg tỹ inh jagrẽ nĩ hã tỹ sóg ãjag mỹ tó ja nĩgtĩ', ti jykre tar tỹ.

5 Hã kỹ ãjag pi(jé) êprã ke jykre há ki ge jẽg', êprã ke ví kanhró ki'. Hỹ, hã ra ãjag tóg Topẽ jykre tar ki ge jẽg mỹr'.

Topẽ kuprĩg vỹ Topẽ tỹ nén to jykrén mũ ki kanhró nĩ

6 Jãvo sóg ù tỹ Jesus ki kanhró mág ag mỹ Topẽ ví kanhró tó tĩ gé, ù tỹ to jykrén há ag mỹ. Hã ra ti pi(jé) tỹ êprã ke ví kanhró nĩ'. Ga kri ke ag jykre tó tũ sóg nĩgtĩ, ùri ùn mág ag ví ti. Tũ' he jé tóg ke mũ, ùri ùn mág ag ví ti.

7 Topẽ ví kanhró tó sóg tĩ mỹr'. Ên tỹ êg vêsóg ki ki kanhrãn ke tũ nĩ. Vãsỹ êg tóg ki kanhrãn ja tũ nĩ gé. Hã ra Topẽ tóg vãsỹ to jykrén mũ, mundo tỹ kã nĩ to hã tóg to jykrén mũ, êg tỹ ti ví ki kanhrãn jé, êg tỹ ti jykre ki kanhró tugrĩn tỹ ùn mág nỹtĩ jé.

8 Ùri ùn mág ag pi(jé) ki kanhró nỹtĩ', Topẽ jykre tag ki'. Ag tỹ ki kanhró nỹtĩ ra ag pi(jé) Jesus tỹ ka to ti sanh mũ vê', êg Senhor tỹ, ù tỹ vênh kar káfór nĩ tag tỹ mỹr. Hã ra ag tóg ti ki kagtĩg nỹtĩn kỹ ag tóg cruz to ti sa ja nĩgtĩ.

9 Hã ra tóg rán kỹ nĩ, Topẽ jykre ti, hã vỹ: "Topẽ tóg êg mỹ nén ù há tãvĩ kãn ja nĩ, ù tỹ ti to há kar mỹ mỹr," he mũ. "Û pi(jé) tag ve ja nĩ ver'. Û pi(jé) tag mẽ ja nĩ ver'. Êprã ke ag pi(jé) to jykrén ja nĩ ver'. Topẽ hã ne to jykrén ja nĩgtĩ, ti tỹ êg mỹ kãn ke ên to," he ja tóg nĩgtĩ, Topẽ ví rán ki.

10 Kỹ tóg êg hã mỹ tó ja nĩ. ã kuprĩg tỹ tóg êg kanhrãn ja nĩ, to. Ti kuprĩg vỹ nén kar to jykrén tĩgtĩ, Topẽ tỹ nén to jykrén mũ mré hã, ti tỹ vênh kar vatãnh tá nén to jykrén mũ mré hã.

11 Ge ti nĩ, ha mẽ. Êprã ke tỹ nén to jykrén mũ ki kanhró êg tóg nĩ. Kỹ êg ne tỹ ki kanhrãn tĩ? Êg krĩ tỹ êg ki kanhrãn tĩ. Êprã ke krĩ vỹ êprã ke tỹ nén to jykrén mũ ki kanhrãn tĩ. Hã ra Topẽ kuprĩg vỹ Topẽ tỹ nén to jykrén mũ ki kanhrãn tĩ. Êprã ke pi(jé) Topẽ tỹ nén to jykrén mũ ki kanhrãn tĩ', ti tỹ Topẽ kuprĩg tỹ jagrẽ tũ ra'.

12 Hã ra Topẽ pi(jé) êg mỹ êprã ke kuprĩg tỹ êg jagrẽ han'. Topẽ kuprĩg tỹ tóg êg mỹ êg jagrẽ han, êg tỹ ti tỹ êg mỹ nén nĩm mũ ki kanhró nỹtĩ jé. Ti hã vỹ êg kren han sór mũ, êg tỹ vênh krenkren han ki kagtĩg ra. Ti tỹ êg mỹ nén nĩm to ken hã vê.

13 Hã tó sóg tĩ. Êprã vênh kanhró pijé', sỹ ãjag mỹ tó mũ tag ti. Topẽ kuprĩg kanhró vê. Hã kỹ sóg ti kuprĩg hã tỹ ti jykre kãmén tĩ.

14 Êprã ke ag pi(jé) Topẽ kuprĩg to há nỹtĩ', ti jykre to'. Ag mỹ tóg tỹ Topẽ krĩ tũ nĩ ve nĩ. To jykrén há han ki kagtĩg ag nỹtĩ, ag tỹ Topẽ kuprĩg tỹ jagrẽ tũ nỹtĩn kỹ.

15 Û tÿ ti kuprÿg tÿ jagrê jê ên hã ne nén kar to jykrén há han tí'. Kÿ ù pi(jé) êg tÿ nén han mü ên ki kanhró nĩ', ti tÿ vég mü ra, ti tÿ Topê kuprÿg tÿ jagrê tũ jên kÿ.

16 Hÿ, ù nÿ hÿn Topê tÿ nén to jykrén mü ki kanhró nĩ'? Û nÿ hÿn Topê kanhrân mü'? Û tÿ ti kanhrân mü venh ke tũ êg tóg nĩ. Jávo Cristo hã ne êg kanhrân tí', ti tÿ êg krĩ ri ke nĩn kÿ.

3

Topê camarada ag tÿ jagnê ri ke

1 Inh kanhkã', inh pi(jé) ãjag mÿ Topê jykre tó kãn ja nĩ ver', sÿ ãjag mÿ tó sór mü ra. Û tÿ Topê kuprÿg tÿ jagrê nÿtĩ tũ ri ke vÿ tÿ ãjag nÿtĩ, gĩr ri ke vÿ tÿ ãjag nÿtĩ, ãjag tÿ Cristo jykre to tar tũ nÿtĩn kÿ.

2 Hã kÿ sóg ãjag mÿ leite ri ke hã ven ja nĩ, sÿ ãjag mÿ Topê vĩ tó kÿ. Inh pi(jé) ãjag mÿ vÿjên tar ri ke ven ja nĩgtĩ', ãjag tÿ to tar tũ ja nÿtĩn kÿ ver. Kÿ ãjag tóg ùri to tar tũ nÿtĩ gé. Ver ãjag tóg ù tÿ Topê kuprÿg tÿ jagrê tũ nÿtĩ ve nĩ.

3 Hã kÿ ãjag tóg vènh kãpugpóv kÿ nÿtĩ, ãjag tÿ jagnê to jũ nÿtĩn kÿ. Hã ki ãjag tóg êprã ke jykre han tí, hã ki ãjag tóg ti tÿ jagrê tũ nÿtĩ ve nĩ.

4 Kÿ ãjag kãmĩ ù ne tóg: "Paulo mré ke vÿ tÿ inh nĩ," he tí'. Kÿ ù tóg: "jãvo sóg tÿ Apolo mré ke nĩ," he tí gé!. Êprã ke jykre hã vè, ãjag tÿ han mü tag ti.

5 Û nÿ tÿ Apolo nĩ', jo ù nÿ tÿ inh nĩ', hã vÿ: Paulo, he mü? Topê camarada ri ke êg nÿtĩ, kÿ ãjag tóg êg vĩ kri fi kÿ Jesus ki ge ja nĩgtĩ, êg Senhor tÿ ãjag krĩn kÿ. Ti hã vÿ êg mÿ êg rãnrãj nĩm ja nĩ.

6 Topê vĩ krãn inh, ãjag kãki, kÿ Apolo vÿ ki gónh, hã ra ù tÿ ti mog han mü vÿ tÿ Topê nĩ.

7 Hã kÿ ù tÿ krãn mü pi(jé) tÿ ùn mág nĩ'. Û tÿ ki gónh mü pi(jé) tÿ ùn mág nĩ gé'. Pir ti nĩ, ùn mág ti, hã vÿ: Topê, he mü, ù tÿ ti mog han mü ên ti.

8 Û tÿ krãn mü vÿ ù tÿ ki gónh mü ên ri ke nĩ. Kanhkã tá êg tóg êg rãnrãj kaja venh ke mü. Sÿ krãn ja kaja ve jé sóg ke mü, jávo tóg á tÿ ki gónh ja kaja venh ke mü gé.

9 Topê hã mré êg tóg rãnrãj mügtĩ. Topê japÿ ri ke ãjag nÿtĩ.

Topê tÿ êg rãnrãj tugnÿm ke

Kÿ ãjag tóg ti tÿ ïn han mü ri ke nÿtĩ gé.

10 ïn tÿ kri jê jafã ri ke han inh, ïn krógrógró ri ke ti, sÿ ãjag mÿ ti jykre tó kÿ, Topê tÿ to inh krĩn kÿ. Kÿ sóg to jykrén há han, sÿ ïn tÿ kri jê jafã ri ke ên tar há han jê. Kÿ ãjag kãmĩ tóg kri ïn ri ke han mü sir, ti tÿ isÿ ãjag kanhrân nón ãjag kanhrân kÿ. Kÿ ù tÿ Topê vĩ tó mü jé to jykrén há han.

11 ïn tÿ kri jê jafã ri ke ên vÿ pir nĩ, hã vÿ: Jesus Cristo, he mü, hã kÿ sóg ãjag mÿ ri ke han, sÿ ti kãmén kÿ. Û venh ke tũ êg tóg nĩgtĩ.

12 Kri êg tóg ïn ri ke hÿn han tí. Û tóg ouro tÿ han mü, ù tóg prata tÿ han mü, ù tóg pó sĩnvĩ tÿ han mü, ù tóg ka tÿ han mü, ù tóg re tÿ han mü, ù tóg êkre fãr tÿ han mü.

13 Kurã tÿ êgno ki êg tóg venh ke mü, ïn há ti, hã vÿ: êg tÿ ù mÿ ti vĩ kãmén há han ja ti, he mü. Pĩ vÿ êg rãnrãj kókén ke mü, kÿ êg tóg pĩ ki êg rãnrãj jykre venh ke mü.

14 Pĩ tÿ ti kókén vãnh nĩn kÿ êg tóg ti kaja venh ke mü sir, êg tÿ ïn tÿ kri jê jafã kri han ja kaja ti.

¹⁵ Pī tỳ ěg rānrhāj kókén kýt ěg tóg ěg rānrhāj ti kren ke mŭ sir, ti tŭg kýt, ge ra ěg hā tóg kren ke mŭ hā ra, ěg tỳ kanhkā ra mŭn kýt. Hā ra tóg ěg tỳ pī ki kren ri ke nī sir.

¹⁶ Ha mẽ, Topě ĩn ri ke ěg nýtĩ, Topě kuprĩg tỳ ěg kākā jĕn kýt. Ājag mýt tag ki kagtĩg? Ki kagtĩg nĩ ve ājag nýtĩ.

¹⁷ Ū tỳ Topě ĩn kókén mŭ ěn kókén jé tóg ke mŭ, Topě ti. Ti tŭ vĕ mýt, ti ĩn ti. Ājag hā vĕ, ti ĩn ti, ěg hā vĕ.

Ěg pi(jé) jagnĕ káfór nýtĩ'

¹⁸ Kygnĕ tŭg nĩ, ājag tỳ vĕso: “ki kanhró mág inh nĩ,” hen kýt. Ājag tỳ ěprā ki kanhró mág nýtĩn kýt to: “nén ũ tŭ vĕ,” hemnĩ, to: “sý nén ũ ki kagtĩg ri ke vĕ,” hemnĩ, ājag tỳ Topě jykre hā ki kanhrān jé.

¹⁹ Ěprā ki kanhró mág ag to Topě tóg: “nén ũ tŭ vĕ,” he tí. Vĕnh kagtĩg ag tóg nýtĩ, ti mýt. Hā kýt tag tóg rán kýt nĩ, ha mẽ: “ěprā ke ag mýt tóg ag tỳ ki kanhró mág nýtĩ ve nĩ, hā ra Topě tóg hā ki ag mýt ag krĩ tŭ nýtĩ ěn ven ke mŭ,” he tóg, Topě ví rá ki.

²⁰ Kýt ti rá ũ výt ge nĩ gé, ha mẽ: “Topě výt ki kanhró nĩ, ũ tỳ ki kanhró mág ag tỳ nén to jykren mŭn ki. Nén ũ tŭ vĕ, ag tỳ nén to jykren mŭ ti. Kýt tóg ki kanhró nĩ, Topě ti,” he tóg mŭ gé, Topě ví rá ki.

²¹ Hā kýt ěprā ke jiji tó sór tŭg nĩ. Ag pi(jé) tỳ ũn mág nýtĩ'. Ājag mré ke kar ag vĕ mýt.

²² Inh hā výt tỳ ājag mré ke nĩ. Apolo výt tỳ ājag mré ke nĩ gé, Pedro ti ke gé. Mundo ki ke kar výt tỳ ājag tŭ nĩ gé, ājag rĩnrĩr nĩ ti ke gé, ājag ter ke ti ke gé, ājag tỳ ũri vég mŭ ti ke gé, ājag tỳ vāhā venh ke ti ke gé. Ājag tŭ kar vĕ mýt,

²³ jāvo ājag hā ne tỳ Cristo tŭ nýtĩ', kýt Cristo výt tỳ Topě tŭ nĩ. Vyrmýt tŭ han sór tŭg nĩ.

4

Apóstolo ag

¹ Ājag tỳ ěg to jykren kýt tag to jykren nĩ, ha mẽ. Cristo camarada výt tỳ ěg nýtĩ. Topě jykre tó ěg tóg tí, ěg tỳ vĕsóg ki nén to jykren vānh ěn. ěn ki rĩr ěg tóg tí.

² Kýt ěg patrāo tóg nén ũ pir ve sór nĩgtĩ, ěg tỳ ti tŭ ki rĩr mŭn kýt, hā výt: ěg tỳ ki rĩr há han mŭ, he mŭ. Ge ti nĩ, Topě tỳ ěg ki nén ve sór mŭ ti. Ti tŭ ki rĩr há han jé ěg tóg ke mŭ.

³ Kýt ājag tỳ isý nén han mŭ to ví mŭ ra tóg inh mýt tỳ nén ũ tŭ nĩ, ěprā ke ag tỳ inh jykre to ví mŭ ra. Kýt isóg inh jykre to: há ti nĩ, he tŭ nĩgtĩ gé.

⁴ Inh pi(jé) sýt ti ví mranh mŭ ki kanhró nĩ'. Hā ra sóg tag to: “hā kýt inh jykre výt kuryj kar nĩ,” he tŭ nĩgtĩ gé. Topě hā ne ěg jykre tugnýtĩ tĩ, hā kýt tóg ki kanhró kar nĩ, hā kýt tóg tónh ke mŭ.

⁵ Kýt ũ jykre to ví sór tŭg nĩ, kurā tỳ ěgno to hā, ěg Senhor kātĩg ke to hā. Ti ha ne nĕn kar vĕnh ven han ke mŭ', ěg tỳ vĕnh vatānh tá nén han mŭ mré hā, ěg tỳ kuty tá nén han mŭ mré hā. Kýt tóg ěg tỳ nén ũ to jykren mŭ ěn vĕnh ven han kĕn ke mŭ gé mýt. Kýt ěg tóg mĕnh mŭ sir, Topě tỳ ěg mýt ví há han ke ti. Vyrmýt tóg ěg mýt tónh ke mŭ, ěg kar mýt, ěg tỳ nén han ja ti.

⁶ Inh kanhkā', Topě ví rán ja pātĕn sór tŭg nĩ. Ū tỳ ājag kanhrān mŭ to: “Topě ví tó tí ag kāmĩ káfór výt tỳ ti nĩ,” he tŭg nĩ. Ājag tỳ to jykren há han jé, hā jé sóg vĕnh hā to tag rán, ājag mýt, Apolo to ke gé, ěg tỳ jagnĕ ri ke nýtĩ tag ti.

⁷ Ęg tŷ jagnĕ kăfór han sór kŷ Ęg tóg ón kŷ ke tĭ. Ha vé, Topĕ vŷ Ęg mŷ Ęg tŷ vin kăn. Ęg tŷ vĕsóg ki măn ja pijé'. Kŷ ājag tŷ ne jé to: "isŷ vĕ," he sór nĕ? Tŷ tóg Topĕ tŷ ājag mŷ nĭm tŷ nĭ ve nĭ, ājag tŷ to: "isŷ vŷ ā tŷ kăfór nĭ," hen kŷ.

⁸ Tŷ ũn há nŷtĭ ve ājag nŷtĭ, vĕnhmŷ. Rico nŷtĭ ve ājag nŷtĭ, vĕnhmŷ. Tŷ ũn mág nŷtĭ ve ājag nŷtĭ vĕnhmŷ, inh jāvo. Hŷ, há ti nĭ vĕ, ājag tŷ tŷ ũn mág nŷtĭ ra. Kŷ sóg tŷ ājag mrĕ ũn mág nĭnh mŷ gé vĕ vĕ. Hă ra tóg ke tŷ tĭ.

⁹ Jesus tŷ ũn fĕg mŷ vŷ tŷ inh nĭ, apóstolo vŷ tŷ inh nĭ. Hă ra tóg sŷ to jykren mŷ ra tóg Topĕ tŷ isŷ ũn jykre kórég ag ri ke han nĭ ve nĭ, ũn kónĕg ag ri ke, ag tŷ ũn kăgtĕn mŷ ĕn ag ri ke. Vĕnh kar ne tóg isugnŷm tĭ', ĕpră ke kar, Topĕ tŷ jĕnĕ jafă ag kar ke gé, mundo tag ki ke kar ag mŷr.

¹⁰ Krĭ tŷ nĭ ve sóg nĭ mŷr, Cristo tugrĭn. Inh jāvo ājag tóg krĭ há nŷtĭ ve nŷtĭ, Cristo jykre ki. Krój inh nĭ, jāvo ājag tóg tar nŷtĭ ve nŷtĭ. Ājag to ag tóg vĭ há han tĭ, jāvo ag tóg iso é he tĭ.

¹¹ Hă kŷ sóg kókĭr mŷ, ũri, kur tŷ sóg nĭ gé, iso kry ag tóg mŷ gé, jamă tŷ sóg nĭ gé,

¹² ron sóg tĭ gé, sŷ inh rănhrăj ki ijĕn ven jĕ. Ag tŷ iso é he mŷ ra sóg ag mŷ nĕn ũ há tó tĭ, Topĕ tŷ ag mŷ han jé. Ag tŷ inh vóg kónăn kŷ sóg ag mŷ vĕnh nenh tŷ nĭgtĭ.

¹³ Ag tŷ iso fé fé he mŷ ra sóg komĕr hă ag mŷ vĭ tĭ, ag jŷ tŷ tŷ' he jé. Văfăr ri ke inh nĭ, vĕnh kar mŷ, ag tŷ nĕn fón tĭ kar ri ke inh nĭ.

¹⁴ Inh pi(jé) ājag mŷ'a han sór mŷ'. Hă ra sóg ājag mŷ tag răn, sŷ ājag jyvĕn jé, ājag tŷ tŷ inh krĕ ri ke nŷtĭn kŷ, sŷ ājag to há tăvĭ nĭn kŷ.

¹⁵ Ũ tŷ ājag kanhrăn sór mŷ vŷ e nŷtĭ, ũ tŷ Cristo jykre tŷ ājag kanhrăn sór mŷ ag. Mĭl kăfór ag nŷtĭ, hŷn. Hă ra sóg pir nĭ, sŷ ājag panh ri ke nĭn kŷ. Isŷ ājag mŷ Jesus Cristo kămĕn kŷ sóg ājag panh ri ke nĭ, ti tŷ sŷ ājag hyn han ri ke nĭn kŷ.

¹⁶ Hă kŷ sóg ājag jyvĕn mŷ, ājag tŷ sŷ nĕn han mŷ han jé.

¹⁷ Hă jé sóg Timóteo jĕnĕ, ājag to. Inh kósĭn ri ke ti nĭ, ti to inh há tăvĭ nĭ, kŷ tóg ĕg Senhor jykre to tar nĭ. ĕn hă vŷ ājag mŷ tó măn ke mŷ, isŷ Jesus Cristo japry jagma tĭ ti, isŷ ti jamĭn jagma tĭ ti, isŷ ĩgreja kar ki ke ag kanhrăn tĭ ti, ĕmă kar mĭ hă.

¹⁸ Jăvo ājag kămĭ ũ tóg vĕsŷ ũn mág han sór mŷ, iso: "kătĭg ke tŷ pĕ ti nĭ," hen kŷ.

¹⁹⁻²⁰ Hă ra sóg kănhrmăr ājag to pasa ke kătĭg ke mŷ, ha vemnĭ, ĕg Senhor tŷ: "ha tĭg," hen kŷ. Kŷ sóg ag jykre venh ke mŷ, vĕsŷ ũn mág han mŷ ag. Ęg pi(jé) ũ vĭ tŷ Topĕ tŷ tŷ Ęg pă'i nĭ ĕn vĕg tĭ'. Hă ra ti jykre tar hă tŷ Ęg vĕg tĭ. Hă kŷ inh pi(jé) ag vĭ mĕ sór mŷ ver'. Ag jykre tar ve sór inh mŷ, ũ tŷ vĕsŷ ũn mág han mŷ ag.

²¹ Kŷ isŷ ājag tá jun kŷ ne nŷ hŷn ājag mŷ há nĭnh mŷ? Inh mŷ ka ma kătĭ mŷ', ājag mrănmrăn jé? Inh mŷ ājag mŷ vĭ há han ke mŷ', komĕr hă, ājag tŷ tŷ inh fe nŷtĭn kŷ? Ne nŷ hŷn há nĭ ājag mŷ? Ha to jykren.

5

Ũn prŷg kónăn mŷ

¹ Nĕn ũ tóg mĕ há tĭ ājag to, ke gé. Nĕn ũ vĕnhmŷ han ājag nĕji tĭ, hă ra tóg kórég pĕ nĭ, ājag kămĭ ũ tŷ nĕn han mŷ ti. Tag mĕ inh, ha mĕ: ājag kămĭ ũ tóg nĕji ā panh prŷ fi tŷ prŷg mŷ. Ũ tŷ Topĕ jykre ki kăgtĭg ag pi(jé) ti ri ke han tĭ', ti jykre kórég tag tĭ'.

² Hã ra ãjag tóg to fe kaj tũ nýtĩgtĩ. Vēsỹ ùn mág han sór ãjag tóg mũgtĩ, vènh jykre kórég tag tỹ ãjag kãmĩ ù kãkã nỹ ra. Æjag ne tóg vēsỹrénh tũ nýtĩgtĩ, ãjag tỹ ù tỹ ti kórég tỹ ge han mũ ên kutêm jé, ãjag kãmĩ.

³ Ha mē, êg tỹ ti tỹ nén han ke to inh jykrén huri, sỹ ãjag mré nĩ tũ ra ver. Hã ra sóg ãjag to jykrén tĩ. Sỹ ãjag mré nĩ ri ke han sóg tĩ, sỹ ãjag mré ti to jykrén kỹ. Û tỹ vènh jykre pãno tỹ ge han mũ ên tỹ tag han nĩ, ha mē.

⁴ Vènh mãn jé ãjag tóg ke mũ, jó sóg ãjag mré nĩ ri ke han mũ, ãjag vènh mãn ki. Ên ki êg Senhor tỹ Jesus vỹ ãjag mỹ vènh jykre nĩm ke mũ. Kỹ ãjag tóg sir Jesus jyjy tó ký

⁵ ti fêg ke mũ, ùn jykre kórég ên ti, Satanás mỹ, ti tỹ ti fár kókén jé. Satanás tỹ ti fár kókén kỹ tóg hèn ri ke mũn to jykrén mãn ke mũ, kỹ ti kuprĩg vỹ kren ke mũ, êg Senhor tỹ Jesus kurã ên kã.

⁶ Æjag tỹ vêsõ: “há êg nýtĩ,” he mũ ran pi(jé) há nĩgtĩ'. Ha mē, pão jãgia sĩ tỹ, fermento sĩ tỹ pão kar tóg sòn ke kỹ mog tĩ. Tag to jykrén.

⁷ Hã kỹ fón kãn nĩ, pão jãgia si ti, ãjag tỹ pão tãg han jé, ùn jãgia tũ ri ke ãjag nýtĩ, ãjag jykre ti, ti há nĩn kỹ. Kỹ vènh jykre kórég vãm kãn nĩ. Cristo vỹ êg jãgy ter mỹr. Êg tỹ Páscoa kã cordeiro tãnh tĩ ên ri ke ti nĩ, Jesus ter ti.

⁸ Êg tỹ festa ên ko jé êg tóg pão jãgia si fón kãn tĩ. Kỹ kemnĩ gé, hã vỹ: vènh jykre pãno tovãnh, he mũ, nén ù vènhmỹ han mãn tũg, he mũ, ãjag tỹ pão jãgia tũ ri ke nýtĩ jé, hã vỹ: vènh jykre kuryj han nĩ, he mũ, vènh jykre pir han nĩ, he mũ gé.

⁹ Hã jé sóg ãjag mỹ rán ja nĩ, ãjag tỹ ù tỹ nén ù vènhmỹ han mũ ag mré mũ tũ nĩ jé.

¹⁰ Hã ra sóg ù tỹ Jesus ki ge tũ ag tó ja tũ nĩ, isỹ: “ag mré mũ tũg nĩ,” hen kỹ. Jykre pãno ag nýtĩ, êprã ke ag, hã vỹ: nén kar to én (ka)mē, he mũ, nén ù péju tĩ he mũ vurmỹ topē han mũ, he mũ. Æjag tỹ tag ag mré vēmén sór tũ nĩn kỹ ãjag hỹn mundo tag tovãnh kỹ hē ra mũnh ke mũ. Inh pi(jé) tag tó ja nĩ.

¹¹ Hã ra sóg ãjag mỹ ù tỹ ón kỹ tỹ êg régre nĩ ên rán mũ. Û tỹ: “tỹ inh ã mré Jesus ki rã kỹ nĩ,” he mũ ra nén ù vènhmỹ han tovãnh sór tũ nĩn kỹ ti mré tĩg mãn tũg nĩ, ti tỹ nén kar to én (ka)mē nĩn kỹ, ti tỹ vurmỹ topē han kỹ, ti tỹ ù to vĩ kónãn (ka)mē nĩn kỹ, ti tỹ kron (ka)mē nĩn kỹ, ti tỹ nén ù pigju(g) ti nĩn kỹ. Û tỹ ge mré nĩ sór tũg, nĩ, ti mré jèn tũg nĩ gé.

¹² Êg pi(jé) êg mré ke tũ ag jykre tũgnỹm ke mũ', Jesus ki ge tũ ag. Æjag tỹ êg mré ke ag jykre tũgnỹm ke vè, ag jykre to: “tag vỹ há nĩ, tag vỹ kórég nĩ,” henh ke vè.

¹³ Topē hã ne ù ag jykre venh ke mũ', êg mré ke tũ ag. Êg mré ke tỹ vènh jykre pãno han kỹ êg ti jykre tónh ke mũ. Hã kỹ ù tỹ vènh jykre kórég han mũ ên kutêm nĩ, ãjag kãmĩ.

6

Êg tỹ pã'i ag mỹ êg mré Jesus ki rã kỹ nýtĩ ù tónh ke tũ

¹ Kỹ nén ù tóg vènhmỹ tĩ gé. Æjag kãmĩ ù tóg ã mré ke to jũ kỹ Jesus mré ke tũ ag tỹ pã'i mỹ tó tĩ, pã'i ag jykre pãno ra. Ti pi(jé) Topē tũ ag mỹ tó tĩ'. Vènhmỹ ti nĩ, tag ti.

² Êprã ke ag jykre tũgnỹm jé ãjag tóg ke mũ mỹr, ãjag tỹ tỹ Topē tũ nýtĩn kỹ. Æjag mỹ tag mē ja tũ? Kỹ, ãjag tỹ ga kri ke kar jykre tũgnỹm ken kỹ ãjag hỹn

jagnē jykre tugnēm há han ke mū gé, jagnē to jū tỳ tū' henh ke jé ājag tóg ke mū gé. Ki ājag tóg krýg mū mýr.

³ Topē tỳ jēnē jafā ag jykre tugnēm jé ājag tóg ke mū mýr, ājag mý tag mē ja tū? Ký ājag hýn ēprā ke jykre tugnēm há han ke mū gé.

⁴ Ge ra ājag tóg ēg mré ke tū ag mý: “ha inh mý isū ti vé,” he tī, ũ tỳ ēg mré vėnh mān tī tū ag mý, ag tỳ ga kri ājag tū ven jé.

⁵ Mý ājag mý'a tū? Ājag kāmī ũ mý kri há tū nī', ti tỳ ājag jyvėn jé ājag tū to, ājag tỳ jagnē tū to jykrén mū to?

⁶ Vėnhmý ti nī, irmāo tỳ irmāo ũ tón ký, ũ tỳ Jesus ki rā ký nī tū mý, ti tỳ ājag tū ven jé.

⁷ Ājag tỳ jagnē tū to jykrén kónān ký tóg vėnhmý pē nī, ājag tỳ to jagnē to jū ký mýr. Ājag tỳ ne jé ājag tū tovānh sór tū nī nē? Ājag tỳ ne jé ũ tỳ ājag tū mān sór ký ti mý nenh ke nē? Ti hā tóg vėnh jykre pāno han mū, ājag tū mān sór ký. Ge ra ti mý nīm nī. Ký ā tóg Topē vī mranh tū nī, inhhā, ti tugrīn.

⁸ Hā ra ājag tóg ti mý nenh sór mū. Ký ājag tóg jagnē tū to vėnh jykre kórég han tī gé mýr, jagnē tū mān sór ājag tóg mū gé mýr, ājag mré ke tū ěn mýr.

⁹ Ūn jykre pāno ag pi(jé) Topē tỳ tỳ ēg pā'i nī venh ke mū'. Ājag mý tag mē ja tū?

Ha mē, ker kygnē hē'. Ū tỳ ũn mén tū fag mré ný mū ag pi(jé) venh ke mū', Topē tỳ ēg pā'i nī ti. Ū tỳ vurmý topē han mū ag pi(jé) venh ke mū'. Ū tỳ ā prū ra ũ fi mré ný mū ěn pi(jé) venh ke mū', ũ fi tỳ ā mén ra ũ mré ný ký fi pi(jé) venh ke mū'. Ūn gré tỳ ũn gré ũ tỳ prūg mū ěn pi(jé) venh ke mū'. Ūn gré tỳ ti tỳ prūg sór mū mý nenh tū ěn pi(jé) venh ke mū gé'.

¹⁰ Ūn tū péju(g) tī ěn pi(jé) venh ke mū', ũ tỳ nén kar to én (ka)mē pi(jé) venh ke mū', ũn kron (ka)mē pi(jé) venh ke mū', ũ tỳ ēg to vī kónān tī pi(jé) venh ke mū', ũ tỳ ēg vatānh tá ēg tū māg tī pi(jé) venh ke mū'. Topē tỳ tỳ ēg pā'i nī venh ke tū ag tóg nī, vėnh jykre tỳ ge han tī ag.

¹¹ Ājag kāmī ũ tóg vėnh jykre tỳ ge han ja nīgtī, vāsý, hā ra ājag tóg vėnh kugpe ký nýtī, ũri. Kykūnh ký ājag tóg nýtī, ěn tỳ, ký Topē tóg ājag mý vėnh pāte fón ja nī sir, ēg Senhor tỳ Jesus Cristo tugrīn, Topē kuprīg tugnīn.

Ēg tỳ nén ũ vėnhmý han ke tū

¹² Ký ājag hýn inh mý: “isý nén han sór mū ěn han jé sóg ke mū. Topē vý ge ra inh jagāgtān ke mū,” he sór mū. Vó. Nén ũ tóg ēg mý nén ũ há han ke tū nī, ký tóg ēg tỳ ěn han mū ra há tū nī. Ēg tỳ nén ũ han sór mū ěn tóg han há nýtīnh mū vē, hā ra isý nén ũ kórég tỳ tān nūn ký tóg inh mý há tū nī sir.

¹³ “Vějėn vý tỳ ēg nug tū nī, ký ēg nug vý tỳ vėjėn né nī,” he ājag tóg tī. Hý, hā ra Topē vý tỳ tū' henh ke mū, vėjėn tỳ, ēg nug tỳ ke gé. Ēg han ja tóg nīgtī, Topē ti. Hā ra ti pi(jé) ēg tỳ tỳ ũn mén tū mré ný jafā han'. Ēg Senhor tū vē, ēg, ký ēg Senhor vý tỳ ēg tān nī sir.

¹⁴ Ēg Senhor rīn mān tóg, Topē ti, ký tóg ēg rīn mān ke mū gé, ti jykre tar tỳ.

¹⁵ Ký ēg hā vý tỳ Cristo tū nýtī, ti mré ēg tóg tỳ ũn pir ri ke nýtī. Ājag mý tag mē ja tū'? Ký ēg tỳ Cristo tū tỳ ũn mén tū fi mré tỳ ũn pir ri ke han ký tóg vėnhmý pē nīgtī, fi mré nýn ký. Ke tūg nī.

¹⁶ Ha mē, ũ tỳ ũn mén (ka)mē fi mré ný ký tóg fi mré tỳ ũn pir ri ke nī. Hā ký tóg vāsý tó ja nī. “Ūn pir ri ke fag nýtī, jagnē mré nýtī fag,” he ja tóg nī. Ājag mý tag mē ja tū'?

¹⁷ Fag jāvō ěg tŷ tŷ ěg Senhor mré ke nŷtŷn kŷ ěg tóg ti mré vĕnh kuprŷg pir ri ke nŷtŷ gé sir.

¹⁸ ěg tŷ ūn mén tŷ mré nŷ kŷ, ěg tŷ ūn prŷg tŷ mré nŷ kŷ ěg tóg vĕnh kavĕnh tí sir, ěg tŷ Topĕ ví mranh tag tŷ. ěg tŷ nĕn ū ū ki Topĕ ví mranh kŷ ěg tóg vĕnh kavĕnh tŷ ge han tŷ nŷgtŷ. Hā kŷ ūn mén tŷ mré nŷ tovānh kān nŷ, ūn prŷ tŷ mré nŷ tovānh kān nŷ gé.

¹⁹ ěg hā vŷ Topĕ kuprŷg jo ūn ri ke nŷtŷ. ěg kākā tóg jĕ nŷ, Topĕ kuprŷg ti, ti tŷ tŷ ěg jagrĕ nŷn kŷ. Topĕ tŷ ěg mŷ nĕn han hā vĕ. Ājag mŷ tag mĕ ja tŷ? Hā kŷ ěg pi(jé) tŷ vĕnh pā'i jĕ'. Topĕ krĕm ke vŷ tŷ ěg nŷtŷ.

²⁰ ěg kajām tóg mŷr, kaja e to. Hā kŷ vĕnh kar mŷ Topĕ tŷ tŷ ūn há nŷ ven nŷ, ājag tŷ ti jykre kurjŷ han mŷn kŷ.

7

Ěg tŷ prŷg há han to vĕnh jykre

¹ Ājag tŷ inh mŷ vĕnh rán jĕnĕn kŷ ājag tóg inh mŷ ājag prŷg ke ti tó ja nŷ. Ājag prŷg tŷ nŷn kŷ tóg há tí vĕ.

² Hā ra tóg ājag mŷ vĕnhmŷ tŷn h mŷ, kŷ tóg inh mŷ ājag tŷ ūn mén tŷ fag to ěn ha mĕ tí. Hā kŷ tóg há nŷ, ū tŷ ūn pir fi tŷ prŷg kŷ, fi tŷ tŷ ti prŷ pĕ nŷ jĕ. Ū fi tŷ ūn pir tŷ mén kŷ tóg há tí gé, ti tŷ fi mén pĕ nŷ jĕ gé.

³ Kŷ fi mén jĕ fi mŷ fi tŷ han, fi mré nŷ kŷ, jāvō ti prŷ fi jĕ ti tŷ han, ti mré nŷ kŷ.

⁴ Fi pi(jé) tŷ vĕsŷ nŷ, fi mén jĕn kŷ'. Fi mén tŷ vĕ sir. Kŷ ti hā vŷ ri ke nŷ gé. Ti pi(jé) tŷ vĕsŷ nŷ gé', ti prŷ jĕn kŷ'. Fi tŷ vĕ, fi mén ti.

⁵ Hā kŷ jagnĕ mŷ vĕnh nenh tŷg nŷ. Hĕn ri ke mŷn ājag kejĕn jagnĕ mré to jykren sór mŷ, ājag tŷ kuty pipir ki jagnĕ mré nŷ tŷ nŷ jĕ, ājag tŷ Topĕ mré vĕmén jĕ vāsānsān jĕ. Kŷ tag pāte jagnĕ mré nŷ mān nŷ sir, Satanás tŷ ājag krŷn kónān tŷ nŷ jĕ. Ājag tŷ ū mré nŷ sór kŷ tóg inh mŷ to ājag tŷ Topĕ ví mranh ha mĕ tí, Satanás tŷ ājag krŷn kŷ. Hā kŷ tóg ājag tŷ kānhmar jagnĕ mré nŷ mān kŷn há tí.

⁶ Tag kar tó sóg ājag mŷ, ājag krój nŷtŷn kŷ. Inh pi(jé) vĕnh kar mŷ: “ha prŷg, ha mĕn,” he sór mŷ'.

⁷ Vĕnh kar tŷ inh ri ke nŷtŷ ra tóg inh mŷ há tí vĕ, isŷ prŷ tŷ nŷ tag ri ke. Hā ra Topĕ tóg vĕnh kar tŷ vyrŷmŷ nĕn ū to tar han tí, ěg tŷ ki króm jĕ. Hā kŷ ū tóg ā prŷ tŷ to tar nŷ, jó ū tóg ā prŷ fi to tar nŷ. Topĕ tŷ nĕn han jan hā vĕ.

⁸ Hā ra sóg ūn prŷ tŷ mŷ tag tó sór mŷ, ha mĕ. Ājag tŷ inh prŷ tŷ ri ke nŷtŷ ra tóg há tí vĕ, kŷ ūn mén ter ja fag tŷ mén mān tŷ ra tóg há tí vĕ gé.

⁹ Ājag tŷ hā ra prŷg sór kŷ, ājag tŷ mén sór kŷ tóg há tí gé, kŷ ājag tóg vĕnh prŷg han mŷ sir. Ājag tŷ prŷ tŷ nŷ ra fag to ěn kŷn pi(jé) há nŷ', ājag tŷ ag to ěn kŷ gé'. Hā kŷ prŷg nŷ, mén nŷ ājag tŷ ū to ěn tŷ nŷ jĕ.

¹⁰ Ājag kāmŷ ū tóg prŷ nŷtŷ, ū fag tóg mén nŷtŷ gé. ěg Senhor vŷ ājag hā mŷ tag tó mŷ, sŷ tóh ke tag, ha mĕ. Isŷ tó pijĕ', ti tŷ tó hā nĕ', ha mĕ. Ā mén fón tŷg nŷ.

¹¹ Ā tŷ ge ra to fón kŷ mén mān tŷg nŷ. Ā tŷ mén mān sór kŷ ā mén fón jan hā mré to jykren, ājag tŷ jagnĕ mré nŷtŷ mān jĕ sir. Kŷ ā prŷ jĕn kŷ fi fón tŷg nŷ gé. ěg Senhor tŷ tón hā vĕ.

12 Jāvo inh hã tóg tag tó mũ ājag mỹ, ha mẽ. Ēg Senhor tỹ tó pijé', ha mẽ. Ājag kāmī ũ prũ fi tóg Jesus ki rã sór tũ nĩ, fi mén tỹ tỹ Jesus mré ke nĩ ra. Fi tỹ ti mré nĩ sór nĩn kỹ tóg fi mré nĩ ha sir. Fi tovãnh sór tũg nĩ.

13 KỸ ã mén tỹ Jesus ki rã sór tũ ra ã mré nĩ sór kỹ ti mré nĩmnĩ gé.

14 Topê tũ vỹ tỹ ã nĩ, ã mén tỹ ti ki rã sór tũ ra. Hã ra tóg ã mré nĩn kỹ tỹ ti tũ ri ke nĩ gé sir. KỸ ã prũ fi tỹ Jesus ki rã sór tũ ra fi tóg tỹ Topê tũ ri ke nĩ gé sir, fi tỹ ã mré nĩn kỹ. Ke tũ nĩ mũ ra ājag krê vỹ ti ki rã tũ krê ri ke nỹtĩnh mũ vê, Topê mũ. Hã ra ag pi(jé) ri ke nỹtĩ'. Tỹ Topê tũ ri ke ag nỹtĩ gé sir; ājag krê ti.

15 Hẽn ri ke mũn ã mén, ã prũ fi ã fón sór mũ, fi tỹ Jesus ki rã sór tũ nĩn kỹ. KỸ fi mỹ, ti mỹ: "ha tĩ ge," hemnĩ. Topê vỹ ěg krĩ kuprãg sór mũ, hã jé tóg ěg kuprêg. Hã kỹ ã pi(jé) tỹ ã mén krêm ke nĩ', ti tỹ ã tovãnh sór kỹ, ã pi(jé) tỹ ã prũ fi krêm ke nĩ gé', fi tỹ ã tovãnh sór kỹ, ã tỹ Jesus ki rã tũgrĩn.

16 Hẽn ri ke mũn ti kejẽn kren ke mũ, ã jamẽn kỹ, ã mén ti, hã ra ã pi(jé) ki kanhró nĩ', ti kren ke ti'. Hẽn ri ke mũn fi kejẽn kren ke mũ, ã jamẽn kỹ, ã prũ fi, hã ra ã pi(jé) ki kanhró nĩ', fi kren ke ti'. Hã kỹ fi tũg kamêg tũg nĩ, fi tũg sór kỹ, ti tũg sór kỹ ke gé.

Ēg tỹ Topê jykre hã mũ mũnh

17 Topê tỹ ã jykre tỹ ã kuprêg ja ěn hã mũ tũg nĩ, ěg Senhor tỹ ã mỹ Vẽnh jykre nĩm ja ěn hã mũ. Hã tó sóg tĩ, ěg mré vẽnh mũn tĩ kar ag mỹ.

18 Topê vỹ ã kuprêg. Ā tỹ tỹ Israel mré ke nĩn kỹ ã gré junun fár vỹ kym kỹ nĩgtĩ. KỸ tóg hã tĩ. Tỹ tũ' he sór tũg nĩ. Ā tỹ tỹ Israel mré ke tũ nĩn kỹ ã fár vỹ kym kỹ nĩ tũ nĩ. KỸ tóg há tĩ gé. Kym sór tũg nĩ gé.

19 Nén ũ tũ vê, ti fár kym ke ti, ti fár kym ke tũ ti ke gé. Nén pir vỹ há nĩ, hã vỹ: ěg tỹ Topê vĩ ki króm, he mũ, ěg tỹ ti tỹ ěg jyvẽn mũ han, he mũ.

20 Topê tỹ hã tỹ ã kuprêg kỹ vẽnh jykre ěn hã mũ tũmnĩ.

21 Ājag kāmī ũ vỹ patrão nỹtĩ. Ājag kajãm tóg, ājag patrão ti, ěg tỹ ěg mẽg kajãm ěn ri ke, hã kỹ ājag tóg tỹ ti tũ nỹtĩ, fagrĩnh mỹ ājag tóg ti rãnrhãj han ti. To krĩ kufy nỹtĩ tũg nĩ. Ājag tỹ hã ra ājag patrão tovãnh to vẽnh jykre há ve kỹ tovãnh nĩ, ti tỹ ājag tovãnh sór kỹ.

22 Ha vé, ěg Senhor vỹ ājag kuprêg, ājag patrão nỹtĩ ra. Ājag tỹ tỹ Cristo tũ nỹtĩn kỹ ājag tóg tỹ ũn patrão tũ ěn ri ke nỹtĩ sir, ājag tỹ ěprã patrão krêm nỹtĩ ra. KỸ ājag patrão vỹ ge nĩ gé. Ēg Senhor tỹ ti kuprêg kỹ tóg tỹ ti patrão jê sir. Hã kỹ ũn patrão tũ ag vỹ Cristo ki ge kỹ tỹ Cristo krêm ke nỹtĩ. jāvo ũn patrão ag vỹ Cristo tũgrĩn tỹ ũn patrão tũ ěn ri ke nỹtĩ gé.

23 Hỹ, ěg kygiãm ti mỹr, kaja e tỹ, Cristo ti. Hã kỹ ěprã ke ag krêm nỹtĩ sór tũg nĩ, tũ nĩ mũ ra ag tóg ājag tỹ Cristo mré mũ kamêg mũ.

24 Inh kanhkã', Topê tỹ hã tỹ ājag kuprêg kỹ vẽnh jykre ěn hã mũ mũmnĩ.

Ūn mén ja tũ fag tó vẽnh jykre

25 Ūn mén ja tũ fag tó ja ājag tóg nĩgtĩ inh mỹ, ājag tỹ rán ki. Hã ra ěg Senhor pi(jé) fag to nén ũ tó ja nĩgtĩ'. KỸ sóg to jykren kỹ ājag mỹ tag tó sór mũ, ha mẽ. Ēg Senhor tóg inh jagãgtãn, kỹ tóg isar han, sỹ to jykren há han jé.

26 KỸ sóg ěg tỹ ti jagy vêg ti tag to jykren mũ. To jykren kỹ tóg inh mỹ há tĩ, ājag tỹ ũri nẽn han mũ tag tovãnh sór tũ nĩ jé.

27 Ā mỹ prũ jê? KỸ fi fón sór tũg nĩ. Ā mỹ prũ tũ jê? KỸ prũg sór tũg nĩ gé.

28 Ā tỹ ge ra prũg sór kỹ tóg há tĩ gé hã ra, Topê vĩ mranh ke tũ ã tóg nĩ, prũg kỹ. KỸ ũn mén ja tũ fi mén kỹ tóg há tĩ gé sir. Topê vĩ mranh pijé'. Hã ra tóg

jagy tĩnh mũ. Krĩ kufy ve jé ãjag tóg ke mũ, tag ki, ãprã, ãjag prũg kũ, ãjag mén kũ ke gé. Hã ra tóg inh mũ há tĩ vễ, ãjag krĩ kufy tũ nĩ ti.

²⁹ Inh kanhkã', inh vĩ tag jẽmẽ ra, ha mẽ. Kurã tỹ ẽgno vỹ kãnhmar jun ke mũ. Hã kũ ãn mén fi jé ãn mén ja tũ fi ri ke nĩ, ãn prũg ja tũ ri ke nĩ gé. Tag ki vễnh jykre vễ, fag tỹ jagnẽ mrẽ nỹtũ ti. Kãnhmar tóg tũ' henh ke mũ.

³⁰ Hã kũ ã tỹ tag ki fỹ mũ jé ãn fỹ tũ ri ke nĩ. Û tỹ tag ki mũ sér nĩ jé ãn mũ sér vãnh ri ke nĩ. Û tỹ nén ã comphar he mũ jé ã tỹ nén ã comphar he tũ ri ke nĩ.

³¹ Û tỹ ga kri tỹ nén ã mág nĩ ẽn jé ã tỹ nén ã tũ ẽn ri ke nĩ. Tũg kãn jé tóg ke mũ, ẽg tỹ tag ki nén vэг mũ ti.

³² Nén ã pir tóg inh mũ há tĩ vễ, hã vỹ: ãjag krĩ kuprã kũ nỹtĩmĩ, he mũ, ãjag tỹ nén ã to krĩ kufy tũ nỹtĩ jé.

Ûn prũg tũ ẽn vỹ ẽg Senhor tũ ki rĩr tĩgtĩ, kũ tóg: “ẽg Senhor mũn mũ há nĩ vỹ, sỹ nén han mũ ti?” he tĩ.

³³ Jãvo ãn prũg mũ vỹ ẽg tỹ tag ki nén vэг tĩ ki rĩr nĩgtĩ, kũ tóg: “inh prũ fi mũn mũ há nĩ vỹ, sỹ nén han mũ ti?” he tĩ gé.

³⁴ Kũ tóg ẽg Senhor tũ ki rĩr tãvĩ han tũ nĩ sir, ãn prũ ẽn ti. Kũ fi vỹ ge nĩgtĩ gé, ãn mén ter ja fi, ãn mén ja tũ fi ke gé. Ẽg Senhor tũ ki rĩr fag tóg nĩgtĩ, fag tỹ tỹ ti tũ tãvĩ nỹtĩ jé, fag tỹ ti tũ ki króm há han jé, fag tỹ nén ã han kũ, fag tỹ nén ã to jykren kũ ke gé. Ûn mén mũ fi tóg hã ra ẽg tỹ tag ki nén vэг tĩ ki rĩr nĩgtĩ, kũ fi tóg: “inh mén mũn mũ há nĩ vỹ, sỹ nén han mũ ti?” he tĩ gé.

³⁵ Sỹ ãjag tũ to jykren há han kũ, hã kũ sóg ãjag mũ tag tó mũ. Inh pi(jé) ãjag mũ vĩ tar han sór mũ', ãjag tỹ ti tỹ ãjag mũ há tũ nĩ ẽn han jé'. ãjag tỹ mũ há han kũ tóg inh mũ há tĩ, ãjag tỹ ẽg Senhor tũ ki rĩr há han kũ, nén ã tỹ ãjag kutãn tũ nĩ jé.

³⁶ Hẽn ri ke mũn ti ãjag kãmĩ ã mũ há tũ nĩ, ti kósin fi mén tũ nĩn kũ. Hẽn ri ke mũn tóg fi mũ vễnhmỹ nỹ ve nĩ, fi panh mũ ke gé. Hẽn ri ke mũn fi sanh há nĩ ha, hẽn ri ke mũn fi jagtar ke mũ, fi mén ke tũ to. Kũ tóg jatun mũ fi tỹ ã tỹ nén han sór mũ ẽn han mũ sir, fi panh ti. Há ti nĩ, fi mén ke ti. Topẽ vĩ mranh pijé'.

³⁷ Hẽn ri ke mũn ã tóg to jykren há han mũ hã ra, kũ tóg fi mén sór tũ nĩ sir. Kũ tóg tá krỹ nĩ, ã kósin fi ki rĩr ke ti. Kũ tóg to jykren mãn mũ ra tóg ti mũ há tĩ, fi mén ke tũ ti. Tovãnh sór tũ ti nĩ. Kũ tóg fi mén tũ nĩ sir. Tag vỹ há tãvĩ nĩ.

³⁸ Hã kũ tóg ge nĩ, ha mẽ. Ti tỹ fi mén kũ tóg há nĩ, ã kósin mén ja tũ fi. Ti tỹ fi mén tũ nĩn kũ tóg há kãfór nĩ.

³⁹ Ûn tỹtã fag vỹ tỹ ãjag mén tũ nỹtĩ, ag rĩnrĩr nỹtĩn kũ. Û fi mén ter kar kũ fi hã ra ã tỹ mén sór mũ kũ fi tóg mén mũ sir, jatun mũ. Fi mén mãn vễ sir, Há ti nĩ. Hã ran jé tỹ ẽg Senhor mrẽ ke nĩ, fi mén mãn ke ti.

⁴⁰ Fi tỹ mén mãn sór tũ nĩn kũ tóg há kãfór nĩ sir, fi mũ sér kãfór. Isỹ fag to jykren hã vễ. Hã ra sóg Topẽ kuprĩg tỹ jagrẽ nĩ, hã kũ sóg ãjag mrẽ to jykren há han mũ gé.

8

Vễnh kãggrã tỹ topẽ to vễnh jykre

¹ Kũ sóg ãjag mũ vễnh tó sór mũ gé. ãjag mẽg tãnh kũ ag tóg vễnh kãggrã tỹ topẽ mũ pũn vén tĩ, pũn kar kũ ag tóg açougue ki ãjag mũ vễne he tĩ. Kũ ãjag kãmĩ ã tóg: “inh mũ açougue ki mãn kũ konh mũ vỹ?” he tĩ, hã kũ sóg ãjag mũ kãmén sór mũ.

Hã ra ãjag kãmĩ ù tóg: “ki kanhró ãg nýtĩ, to tar ãg nýtĩ,” he tí. “Jatun mý ãg tóg konh ke mũ,” he ag tóg tí. Ëg tý nén ù to: “ki kanhró mág inh nĩ,” hen ký tóg inh mý ãg tý kãnhmar ù to: “ti pí(jé) inh ri ke nĩ, ti kãfór inh nĩ,” henh ha mẽ tí. Ëg tý jagnê to há nýtĩnh ke vê. Ëg tý jagnê to há nýtĩnh ký ãg tóg jagnê mý nén ù há tó tí, ãg kar tý ki kanhrãh há han jé sir.

² Ëg tý nén ù to: “ki kanhró sóg nĩ, ã jãvo,” hen ký ãg pí(jé) ki kanhrãh há han mũ ver’.

³ Ëg tý Topê to há nýtĩnh ký, ký tóg ãg tý ti ki kanhrãh há han mũ sir Topê ti.

⁴ Ký sóg ãjag mý vėjẽn ên kãmén sór mũ, ag tý ón ký vãnh kãggrá tý topê mý pũn tí ên ti. Nén ù tũ vê ón ký vãnh kãggrá tý topê ti. Pir ti nĩ, Topê ti. Topê ù vỹ tũ nĩ.

⁵ Nén ù e to ag tóg ón ký: “Topê vê,” he tí, kanhkã tãn ù ag to, ga tãn ù ag to ke gé, Û tý ge vỹ e nýtĩ, topê tý ge ti, Senhor tý ge ti.

⁶ Hã ta tóg ãg mý pir nĩ, Topê ti, ãg jóg mág ti, ag jãvo. Nén kar han ja ti nĩgtĩ mýr vẽnhmý, ký ãg tóg ti hã ve sór mũ gé sir. Pir ti nĩ gé, ãg Senhor ti, hã vỹ: Jesus Cristo, he mũ. Nén ù kar vỹ nýtĩ ti tugrĩn, ký ãg ti tugnĩn krenkren ke mũ gé.

⁷ Hã ra ãg kãmĩ ù ag tóg tag ki kagtĩg nýtĩ ver. Tãg ti nĩ ver, ãjag tý ón ký vãnh kãggrá tý topê tovãnh mũ ti, ký tóg ver ag mý e tí. Hã ký ón ký vãnh kãggrá tý topê mý vėjẽn pũn ja ên tóg tý vãnh kãggrá tý topê ên tũ nĩ něji ag mý. Ký tóg ag tũ vėjẽn ên ko ký tóg ag tý vãnh kãggrá tý topê ên tũ ko ri ke nĩ sir ag mý. Ký tóg ag mý há tũ tí sir, ag tý tag to krój nýtĩnh ký ver. Ký tóg ag mý ag tý vėjẽn to vãnh kavẽnh ha mẽ tí.

⁸ Ëg pí(jé) vėjẽn tugrĩn Topê to há nýtĩ’, ti to kórég nýtĩ’. Ëg tý ko tũ (hã) ra nén ù tũ vê gé, vãnh kãggrá tý Topê mý pũn ja ên ti. Vėjẽn vê mýr.

⁹ Nén ù kar vỹ tý ãg tũ nĩ.

Hã ra ùn krój tóg hẽn ri ke mũn Topê vĩ mranh ke mũ, ãg tugrĩn, ti tý ãg tý ti mý nén ù vẽnhmý to tar nýtĩ nĩ ve nũn ký. Ký tag han sór tũg nĩ.

¹⁰ Ve ra ha. Tar ã tóg nĩ, ki kanhró ã tóg nĩ, vãnh kãggrá tý topê vỹ tý nén ù tũ nĩ ã mý. Hã ký ã tóg ti jo ãn krêm rã ký ko mũ sir, ti festa ti, ã mré ke ù tý ti mý festa han ký. Nén ù tũ vê vê. ã tý ti festa ko mũ ti. Hã ra ãg mré Jesus ki rã ký jê ù tóg tag to krój nĩ ver, ký tóg tá ã vэг mũ sir, ã tý ti festa ko mũ ên kã. Ký tóg ã ve ký to jyrkren mũ sir, ti festa ko sór jé, vãnh kãggrá tý topê mý festa ên, ti mý pũn ja ên ti. Hã ra vãnh kãggrá tý topê tóg ti mý tar nĩ, ùn krój mý, ti tý Jesus ki rã ký nĩ (hã) ra.

¹¹ Ký tóg ã tý ko mũ tugrĩn vãfor ke mũ sir, ùn krój nĩ ti. Ti jãvo ã tóg ki kanhró nĩ, hã ra tóg ã tugnĩn tũ’ henh ke mũ, ùn krój nĩ ti. Hã ra Cristo tóg ti jagfy ter ja nĩgtĩ.

¹² Á tý ti vĩ mranh hã vê sir, ã régre krój ên to. Ti vóg kónãh ã tóg mũ sir, ti krój nũn ký. Hã ki ã tóg Cristo vĩ mranh mũ sir, mýr, ha mẽ.

¹³ Hã ký sóg tag han sór tũ nĩ. Inh irmão tý isý nén ù nĩ ko to Topê vĩ mranh ký sóg nén ù nĩ ko sór mãn ke tũ nĩ ha, ón ký vãnh kãggrá tý topê mý pũn ja ên ti, ti tý mranh tũ nĩ jé sir, isugrĩn.

¹ Isý nén han mũ ve ra. Ęprã ke ag tỹ inh mỹ nén tó mũ ẽn han sór tũ inh nĩgtĩ. Jesus hã vỹ inh fẽg, isỹ tỹ apóstolo jẽ jé. Ti ve inh mỹr, ẽg Senhor tỹ Jesus ti. Kỹ ãjag vỹ isugnĩn ẽg Senhor ki ge jẽg. Inh rãnrãj kaja vỹ tỹ ãjag nỹtĩ.

² Hẽn ri ke mũn sóg ù mỹ tỹ apóstolo tũ nĩ. ãjag hã mỹ sóg tỹ apóstolo jẽ mỹr, ãjag tỹ inh vĩ mẽ tugrĩn ti ki ge kỹ. Hã ki tóg ve há tí, ẽg Senhor tỹ inh fẽg ja ti.

³ Kỹ ù tỹ kejẽn inh kato vĩ sór mũ mỹ sóg tag tó tĩ, ha mẽ.

⁴⁻⁵ Jesus tỹ ùn vin mũ ù ag ri ke inh nĩ, apóstolo ù ag ri ke, ù tỹ Jesus mré pygfa mũ ag ri ke, Pedro ri ke ke gé, isỹ vjẽn to, inh prũ tũ to ag jykre han tũ ra. ãjag prũ fag pére ag mũ tĩ, ag tỹ hẽn ra mũn kỹ. Isỹ ag ri ke ù tỹ Jesus ki rã kỹ jẽ ù fi tỹ prũg sór mũ ra sóg fi pére tũg ke mũ vjẽ gé, hã ra sóg ke sór tũ nĩ. Kỹ ag tóg ãjag jẽn ko tĩ, ag tỹ ãjag mỹ Topẽ vĩ to to. Isỹ ag ri kén ãjag jẽn ko sór mũ ra sóg konh ke mũ vjẽ gé, hã ra sóg ko sór tũ nĩ.

⁶ Inh nĩgẽ rãnrãj ja kaja hã ko sór inh tĩ, Barnabé ti ke gé. Ęg tỹ Topẽ vĩ to tĩ ù ag ri kén ẽg nĩgẽ rãnrãj tovãnh sór mũ ra ẽg tóg tovãnh ke mũ vjẽ, hã ra ẽg tóg rãnrãj sór mũ.

⁷ Ęg tỹ Topẽ tỹ ẽg mỹ vjẽn rãnrãj nĩm kaja venh ken kỹ tóg há tí vjẽ. Soldado jykre ri ke ti nĩ. Ag pi(jé) ãjag tũ ko tĩ', ag tỹ vjẽn génh han kỹ, soldado ag. ãjag vjẽn génh hã to ag tóg vjẽn vég tí. Kỹ ù tỹ uva ki rĩr tí vỹ ti kanẽ ko tí gé. Kỹ ù tỹ ovelha ki rĩr tí vỹ fi leite kron tí gé. Hã kỹ tóg ẽg tỹ Topẽ vĩ to to ganho ve sór mũ ra tóg há tí vjẽ, hã ra ẽg tóg ve sór tũ nĩ.

⁸ Ęprã ke jykre ki ẽg tóg ẽg rãnrãj pẽ to ẽg jẽn vég tí. Kỹ Topẽ vỹ tag tó ja nĩgtĩ.

⁹ Moisés vỹ tag rán ja nĩ, ha mẽ. “Monh tỹ ẽkré jãnkre ki rãnrãj kỹ ti jẽnky tógfin tũg nĩ, ti jẽn kamẽg tũg nĩ,” he ja ti nĩ, Topẽ vĩ rá ki. Topẽ mỹ monh hã to jykrén kỹ tag tó ja nĩ? Vó.

¹⁰ Ęg to jykrén hã kỹ tóg tag tó ja nĩ. Ęg hã to tóg rán kỹ nĩ, ẽg tỹ ẽg rãnrãj to ẽg jẽn ve jé. Hã kỹ ù tỹ ẽpy ki rãnrãj mũ tóg to nén ù ve sór mũ, hã jé tóg rãnrãj jẽ nĩ. ù tỹ jãnkreg mũ vỹ to nén ù ve sór mũ gé, ã rãnrãj to.

¹¹ Isỹ ãjag mỹ kanhkã jykre tó kỹ tóg sỹ nén ù krãn ri ke nĩ, kỹ sỹ ãjag ki nén ù ve sór mũ ra tóg há tí vjẽ, ijẽn jé, hã ra sóg ve sór tũ nĩ.

¹² ù ag tóg ãjag jẽn vég tí, Topẽ vĩ to. Kỹ tóg sỹ ag ri kén ãjag ki jãnkamy ve sór mũ ra há tí vjẽ, sỹ ãjag mỹ Topẽ vĩ to vén kỹ. Hã ra sóg ãjag jẽn ve sór tũ nĩ. Inh jagtar ra tóg inh mỹ tỹ nén ù tũ nĩ, ù tỹ isugnĩn Cristo kãme sér kato vĩ tũ nĩ jé, sỹ ti kaja ve tugnĩn Jesus to kórég tũ nĩ jé. Hã kỹ sóg ve sór tũ nĩ.

¹³ ù tỹ Topẽ ìn krẽm ti tũ ki rĩr tí ag vỹ tá ãjag jẽn vég tí gé, ag tỹ Topẽ mỹ nén vin tí ẽn tỹ. Kỹ ù tỹ Topẽ mỹ nén ù pũn tí ẽn vỹ ti ke ko tí gé. ãjag mỹ tag mẽ ja tũ?

¹⁴ Hã kỹ ẽg Senhor vỹ tag tó ja nĩgtĩ gé, hã vỹ: “ù tỹ ti kãmén mũ ẽn vỹ tag to ãjag jẽn venh ke mũ,” he mũ.

¹⁵ Hã ra sóg ãjag jẽn ve sór ja tũ nĩ. Kỹ sóg ve sór tũ nĩ gé, ùri, hã kỹ sóg ãjag mỹ rán mũ. Isỹ ijẽn to inh nĩgẽ tỹ rãnrãj mũ hã to sóg tỹ ùn mág nĩnh mũ, kanhkã tá. Kỹ sóg tỹ tũ' he sór tũ nĩgtĩ. Iser jé tóg inh mỹ há tí, ù tỹ inh mỹ Topẽ vĩ kajãm sór mũ (hã) ra.

¹⁶ Jesus kãmén sóg tí. Inh rãnrãj hã vjẽ. Ti hã tóg inh mỹ tó, sỹ ti kãmén jé. Kỹ sóg ti tó tugrĩn tỹ ùn mág nĩnh ke tũ nĩ. Isỹ ti kãmén sór tũ ra Topẽ tóg inh vóg kónãh ke mũ vjẽ, isỹ inh rãnrãj han tũ nĩn kỹ.

17 Topě tŷ inh mŷ: “ha kāmén,” he tũ nĩ ra sóg kanhkā tá to ganho venh ke vĕ vĕ, sŷ ti kāmén tĩ ti to. Hã ra tóg inh mŷ: “ha kāmén,” he ja nĩ, kŷ tóg sŷ ti rãnrãj ki rĩr há han mũ ve sór mũ sir inh ki, Topě ti.

18 Kŷ sóg kanhkā tá to ganho venh ke tũ nĩ, inh rãnrãj ja to. Hã ra sóg ganho ve sór mũ tá. Hã kŷ sóg ěprã ke ag ki sŷ nén ve sór mũ ěn ve sór tũ nĩ, iĵén jé. Ājag tŷ inh mŷ nén vin ke ti ve sór tũ inh nĩ. Véké sóg ājag mŷ tó tĩ, Topě vĩ ti, vĕnh kar mŷ ke gé. Ājag tŷ inh mŷ kajãm tũ ra tóg inh mŷ há tĩ. Kŷ sóg tag hã to kanhkā tá inh ganho ti venh ke mũ.

Ūn e tŷ Jesus ki ge kŷ tóg Paulo mŷ há tĩ

19 Ū pi(jé) inh kri ke nĩ'. Ge ra sóg vĕsŷ vĕnh kar krĕm ke han, vĕnh kar tŷ inh patrão ri ke nŷtĩ jé. “Hĕn ri ke mũn ũ tóg Jesus ki rã sór mũ, isŷ tŷ ti krĕm ke nĩn kŷ,” he sóg tĩ. Hã jé sóg vĕsŷ ag krĕm ke han tĩ, ũ tŷ ti ki ge mũ ag e nŷtĩ jé, isugrĩn.

20 Judeu ag tugnĩn sóg vĕsŷ Judeu han tĩ, Judeu ag tŷ Jesus ki ge jé. Isŷ ag jykre han sór tũ ra inh han ke tũ nĩ vĕ, hã ra sóg han sór tĩ, isŷ ag to há nĩn kŷ. Kŷ sóg Judeu jykre han mũ ag tugrĩn ag jykre han tĩ, ũ tŷ ag jykre han mũ ag tŷ Jesus ki ge jé, isugnĩn.

21 Kŷ fóg ag vŷ Judeu jykre han tũ nĩgtĩ, kanhgág ag ke gé. Kŷ sóg fóg ag tugrĩn fóg jykre han tĩ, kanhgág ag tugnĩn sóg kanhgág jykre han tĩ, ag tŷ isugrĩn Jesus ki ge jé. Inh pi(jé) Topě jykre tovãnh mũ hã ra'. Cristo jykre han sóg tĩgtĩ mŷr. Judeu jykre hã tovãnh inh tĩ, fóg to, kanhgág to ke gé.

22 Kŷ sóg ũn krój ag mŷ komĕr hã vĩ tĩ, ag tŷ isugnĩn Jesus to vãsãnsãn mãn jé. Isŷ ũn jykre ve kŷ sóg ti jykre ri ke han tĩ, ag tŷ Jesus ki ge jé, isugrĩn.

23 Tag kar han sóg tĩ, Jesus kãme tugnĩn, isŷ ti mré ti rãnrãj ki rĩr jé.

24 Ha mẽ, ũn e tóg corrída han tĩ, hã ra ũn pir tóg ganhar ke tĩ inhhã. Ag ri ke han nĩ. Vãsãn ra, ājag tŷ ganhar ken jé, Jesus tŷ ěg mŷ nén ven ke ti.

25 Ha vé, ũ tŷ torneio han tĩ ag vŷ to jykrén mág tĩ, kŷ ag vãkrég tĩ gé, ag tŷ ganhar ken jé. ěprã jykre ki ag tóg ganhar ke sór tĩ, hã jé ag vãkrég tĩ, ti tŷ kãnhmar tũ' he mũ ra, ag ganho ti. Hã ra ěg tóg kanhkā tá ěg ganho venh ke mũ, ũ tŷ tũg ke vãnh ěn ti.

26 Ge sóg tĩ gé, sŷ corrída ri ke han kŷ. Pĕtĕm sór inh nĩ, to krónh ke tũ sóg nĩ. Rará ri ke han sóg tĩ to. Inh pi(jé) véké rará tĩ'.

27 Vĕnh hã to rá sóg tĩ, kŷ sóg isŷ nén to ěn mũ ěn han ke tũ nĩ. Inh mŷ Topě tŷ inh fón ha mẽ tóg tĩ, isŷ ājag jyvĕn kar kŷ vĕnh jykre pãno han kŷ. Hã kŷ sóg vĕso rá tĩ, sŷ han tũg jé.

10

Ēg jo ke ag to jykrén nĩ

1 Inh kanhkā', tag jĕmĕ ra, ājag tŷ ki kanhrãn jé. Ēg jóg'jóg ve ag vŷ Moisés mré mũ ja nĩgtĩ. Kanhkā góg ěn krĕm ag tóg mũ kãn ja nĩgtĩ, kŷ ag tóg goj kusũg nig ěn kafã ra pa kãn ja nĩgtĩ gé.

2 Ēg vĕnh kygpe ri ken hã vĕ, ag tŷ kanhkā góg krĕm mũ ja ti, ag tŷ goj kusũg nig kafã ra pa ja ti ke gé. Ēn kã Moisés vŷ ag jãmĩ tĩg ja nĩgtĩ, Jesus tŷ ěg ki rĩr nĩ tag ri ke.

3 Kŷ ěg jóg'jóg ve ag tóg kanhkā tá vĕjĕn ko kãn ja nĩgtĩ gé,

4 kanhkā tá goj tý ěganě ki kronkron kãn ja ag tóg nĩgtĩ gé, kanhkā tá goj tý vėnh kaně ti. Páro tá ag tóg goj ve ja nĩgtĩ, hã ra tóg tý kanhkā tá ke nĩ ja nĩgtĩ. Cristo to ken hã vė. Ti hã vỹ ag mré tí ja nĩgtĩ. Kĩ tóg ag mỹ goj ěn ven ja nĩgtĩ.

5 Ge ra Topě tóg ěg jóg'jóg ve ag to jũ kãn ja nĩgtĩ, kỹ ag tóg kãgter kãn ja nĩgtĩ, ga kórég ěn tá. Hã ra tóg ùn pipir ag hã to há ja nĩgtĩ, Topě ti, kỹ ag hã tóg krenkren ja nĩgtĩ, ùn pipir ěn ag.

6 Hã ra tóg rán kỹ nĩ, ěg tý tý vėnh kanhrãn jé, ěg tý nén ù kórég to ěn tú nĩ jé. To ěn ja ag tóg nĩgtĩ, ěg jóg'jóg ve ag, kỹ ěg tag han ke tú nĩ.

7 Hã kỹ ón kỹ vėnh kãggrá tý topě nón mũ sór tũg nĩ. Tag han ja ag tóg nĩgtĩ gé, ěg jóg'jóg ve ag. Hã kỹ tag tóg rán kỹ nĩ, hã mẽ. “Povo kar vỹ nĩgnĩ mũ sir, ag tý vėnh kãggrá tý topě to festa ko jé, ag kronkron jé sir, ag tý kar kỹ vėnh grĩngrén jé fag mré,” he ja tóg nĩgtĩ, Topě vĩ rán ki. Hã to Topě tóg ag to jũ ja nĩgtĩ gé.

8 Kỹ ěg ùn mén tú fag mré nỹnh ke tú nĩ gé. Tag han ja ag tóg nĩgtĩ gé, ěg jóg'jóg ve ag, kỹ kurã pir ki ù tý 23 mìl (ke) ag vỹ kãgter ja nĩgtĩ, Topě tý ag tũg kỹ.

9 Kỹ ěg Topě to: “ti hỹn iso jũnh ke tú nĩ, sỹ ti vĩ mranh mũ ra,” henh ke tú nĩ gé. Ke ja ag tóg nĩgtĩ gé, ěg jóg'jóg ve ag, kỹ pỹn tóg ag kãgtén ja nĩgtĩ, Topě tý ag to jũn kỹ.

10 Kỹ ěg Topě to vĩ kónãn ke tú nĩ gé. Ke ja ag tóg nĩgtĩ gé, ěg jóg'jóg ve ag, kỹ Topě tý jėnė jafã tóg ag kãgtén ja nĩgtĩ.

11 Hã ra Topě tóg ag vóg kónãn, ěg tý ag to vėnh kanhrãn jé. Hã jé tóg rán kỹ nĩ gé, ti tý to ěg jyvėn jé. ěg hã mỹn kakó nĩ, kurã tý ěgno ti.

12 Hã kỹ vėso jykrén. Ā tũg há han kỹ, ā tý ti vĩ mranh tũg kỹ tóg há tí. Hã jé vėnh ki rĩr, ā tý prãnh ke tú nĩ jé.

13 Nén-Kórég vỹ ěg krĩn sór mũ, ěg tý Topě vĩ mranh jé. Hã ra tóg ěprã ke jykre ki ěg krĩn sór tĩgtĩ, Japo ti. Kỹ Topě tóg ti vėg tí, kỹ tóg ěg ki rĩr tí. Kỹ tóg kejėn tí mỹ: “gen kỹ,” he tí sir, ti tý ěg kutãn tãvĩ han mũ ra ěg tý hė ri ke tú nĩ jé. Kỹ tóg ěg tar han ke mũ gé, ěg tý Nén-Kórég tý ěg krĩn kónãn mũ ra ti kato tė jé, ěg tý ti mỹ: “hej,” he tú nĩ jé.

Vėnh kãggrá tý topě jykre han sór tũg nĩ

14 Inh krė', tag tugrĩn vėnh kãggrá tý topě tovãnh pė han nĩ, ve sór tũg nĩ.

15 Ki kanhró ãjag tóg nỹtĩ, hã kỹ ěg tý Jesus jamĩ ko tí ěn to jykrén nĩ, ha mẽ.

16 ěg tý Cristo ter ja mĩ ěkrén kỹ ěg tóg kron tí, ti kyvėnh ri ke ěn ti. Copa ěn to Jesus tóg Topě mré vĩ há han ja nĩgtĩ, ag tý kron jé. Kỹ ěg tóg to Topě mré vĩ kar kỹ kron tí sir. ěg tý kron kỹ ěg tóg tý ti mré ke nỹtĩ sir, ěg tý ti kyvėnh ri ke ěn kron kỹ. Kỹ ti jamĩ vỹ ge nĩgtĩ gé. Kupãn kỹ ěg tóg ko tí, Cristo tý ěg mỹ tón kỹ. ěg tý kon kỹ ěg tóg tý ti mré ke nỹtĩ gé sir, ěg tý ti nĩ ri ke ěn kon kỹ.

17 Ti jamĩ vỹ pir nĩ, kỹ ěg tóg ko kãn kỹ ěg tóg tý ùn pir nỹtĩ gé, ti mré, ěg e hã ra. Jesus jamĩ ko to vėnh jykre hã vė.

18 Kỹ povo tý Israel ag to jykrén nĩ gé, ha mẽ, Israel krė ag to. Topě mỹ ag tóg nén ù pũn tí, ti pũn jafã kri. Pũn kỹ ag tóg ko tí gé. Ag tý kon kỹ ag tóg tý ag tý ùn mỹ pũn mũ ěn mré ke nỹtĩ gé sir, ěg tý tý Jesus mré ke nỹtĩ ri ke.

19-20 Kỹ ón kỹ vėnh kãggrá tý topě to jykrén nĩ gé, ha mẽ. Ag tý vėnh kãggrá tý topě mỹ nén ù pũn kỹ ag tóg Nén-Kórég ag hã mỹ pũn tí. Ag pi (jé) Topě pė mỹ pũn tí'. Hã kỹ tóg inh mỹ há tú nĩ, ãjag tý tý Nén-Kórég ag mré ke nỹtĩn kỹ, ãjag tý ag tú kon kỹ ke gé.

Inh pi(jé) ājag mý: “vēnh kǎggrá tǔ topē vǔ nǔgtǐ, kǔ ag tǔ ag mý pūn mǔ ěn vǔ tǔ nén ũ nǐ,” he sór tǐ'. Nén ũ tǔ vē, Topē tǔ vē, ón kǔ vēnh kǎggrá tǔ topē ti.

²¹ Hǎ ra tóg vēnhmý nǐ, ājag tǔ ěg Senhor tǔ copa ki ke kron kar kǔ Nén-Kórég tǔ copa ki ke kron kǔ ke gé. Vēnhmý ti nǐ, ājag tǔ ěg Senhor jĕn ko kar Nén-Kórég ag jĕn kon kǔ ke gé.

²² Ěg tǔ Nén-Kórég ag tǔ kon kǔ ti hĕn ri ke mǔn ěg to jũnh ke mǔ, ěg Senhor ti. Ti tǔ ěg to jũ nǐn kǔ tóg vēnhmý nǐ. Ěg pi(jé) ti tǔ hĕ ri kenh mǔ'. Hǎ kǔ ón kǔ vēnh kǎggrá tǔ topē ve sór tũg nǐ.

Ěg régre tigrĕn ěg kejĕn konh ke tũ nǐ

²³ Hǎ ra ājag tóg inh mý: “isý nén han sór mǔ ěn han jé sóg ke mǔ, pi(jé) kórég nǐ,” he sór mǔ. Há ti nǐ vē, tag ti. Hǎ ra ěg tǔ nén han mǔ ũ tóg ěg mý nén ũ há han tũ nǔgtǐ. Nén ũ kar han há ěg tóg tǐ vē, hǎ ra ěg tǔ nén han mǔ ũ tóg ěg tar han ke tũ nǐ, Jesus to.

²⁴ Kǔ ā tũ to jykrĕn tǎvĭ han tũg nǐ, ā régre tũ to jykrĕn nǐ gé, ti mý há nǐ jé, ha mĕ.

²⁵ Kǔ ā tǔ nén ũ tǎnh jafǎ ki nén ũ nǐ kajām sór nĕn kǔn há tǐ, kǔ ag mý: “ũ mý ón kǔ vēnh kǎggrá tǔ topē mý ti nǐ tag pūn ja tũ?” he tũg nǐ. Jĕmĕ tũg nǐ, jatun mý komnĭ.

²⁶ Topē tũ vē, ga ti, ga kri ke kar ti ke gé, hǎ kǔ jatun mý komnĭ.

²⁷ Kejĕn ũ tǔ Jesus ki rǎ tũ ũ vǔ ā mý: “inh mré jĕn kǎtĕg,” he mǔ sir. Ā tǔg sór kǔ ā tóg tǔg mǔ, kǔ ā tóg nén ũ kar konh ke mǔ. Ti ki jĕmĕ tũg nǐ, ũ tǔ hĕn ri ke mǔn ón kǔ vēnh kǎggrá tǔ topē mý nén ũ pūn ja ti, ā tǔ jatun mý ko jé.

²⁸ Hĕn ri ke mǔn ũ tóg sir ā mý: “vējĕn tag ũ pūn ag, ón kǔ vēnh kǎggrá tǔ topē mý,” he mǔ. Kǔ ko tũg nǐ sir, ti tigrĕn, ũ tǔ ā mý tó mǔ tũgnĕn, ti tǔ ā to jykrĕn kónĕn tũ nǐ jé.

²⁹ Ā pi(jé) to jykrĕn mǔ vē', hǎ ra ti hǎ tóg to jykrĕn mǔ, hǎ kǔ tóg ā mý tó mǔ. Há tũ ti nǐ inh mý, ũ tǔ iso jykrĕn kónĕn kǔ, isý nén ũ tǔ inh mý kórég tũ han to.

³⁰ Topē mý sóg vējĕn ěn to vĭ há han ja nǔgtǐ. Kǔ ũ tǔ tag to iso vĭ vĭ he mǔ ra tóg inh mý kórég nǐ, sý Topē mý vĭ há han ja ěn to. Hǎ kǔ sóg ko sór tũ nǐ, ũ tǔ iso jykrĕn kónĕn sór kǔ.

³¹ Hǎ kǔ Topē hǎ mý nén kar han nǐ, vēnh kar tǔ Topē jykre há nǐ ve jé. Ā jĕn kǔ ti jykre ki jĕn nǐ. Ā kron kǔ ti jykre ki kron nǐ. Ā tǔ nén ũ han kǔ ti jykre há ki han nǐ gé, vēnh kar tǔ ti jykre há nǐ ve jé.

³² Ũ tǔ ā tigrĕn Topē to jũ tũ nǐ jĕn há tǐ, Judeu ag, fóg ag, kanhgág ag, Topē tũ ag ke gé, ũ tǔ ěg mré ke ag. Kǔ vēnh jykre há há han nǐ.

³³ Ke sóg tǐ gé. Vǎsĕn sóg tǐ, vēnh kar tǔ iso há nǔtǐ jé. Hǎ jé sóg isũ ki rĕr tǎvĭ han tũ nǔgtǐ. Vēnh kar tũ ki rĕr inh tǐ, ag tǔ Jesus ki ge jé.

11

1 Inh jykre han sórmnĭ, isý Jesus jykre han ri ke.

Ũn tǔrá fag jykre

² Hý, ājag mý sóg vĭ há han sór mǔ mýr. Isý ājag mý nén tó mǔ ěn to jykrĕn kǎn ājag tóg mǔgtǐ mýr'. Isý ājag kanhrĕn ěn ki króm sór ājag tóg tǐ.

³ Hǎ kǔ sóg nén ũ ki ājag kanhrĕn sór mǔ sir, ha mĕ. Cristo vǔ tǔ ag kri ke nǐ, kǔ ag vǔ tǔ ājag prũ fag kri ke nǔtǐ, kǔ Topē vǔ tǔ Cristo kri ke nǐ gé.

⁴ Kÿ ag kãmĩ ù tÿ kur tÿ vènh kri fón kÿ Topè mré vĩ kÿ tóg há tù nĩ, ti tÿ kur tÿ vènh kri fón kÿ jèn kÿ Topè vĩ tón kÿ. Ti mÿ'äg vè sir.

⁵ Ûn tÿtá fag tÿ hã ra kur tÿ vènh kri fón tù ra Topè mré vĩ kÿ tóg há tù nĩ. Fag tÿ kur tÿ vènh kri fón tù ra Topè vĩ tó kÿ fag tóg äjag kri ke ên mÿ'a han mũ sir, kÿ tóg fag mÿ'a tĩ gé sir, fag krĩ kator ri ke ti nĩ sir.

⁶ Hã kÿ tóg fag tÿ vènh kri fón sór tù kÿ fag krĩ kator ri ke nĩ. Hã ra tóg fag mÿ'a ù, fag gãnh ronh ke to, fag krĩ kator ninh ke to. Hã kÿ tóg há tĩ gé, fag tÿ kur tÿ vènh kri fón ti.

⁷ Hÿ, hã vè. Ag kãmĩ ù tóg kur tÿ vènh kri fón ke tù nĩ, ti tÿ tÿ Topè ri ke nĩn kÿ, êg tÿ ti tugrĩn Topè tÿ ti kri tÿ ùn mág nĩ ven kÿ. Hã ra êg tóg ùn tÿtá fag hã tugrĩn êg tóg ag tÿ fag kri tÿ ùn mág nÿtĩ vég ti.

⁸ Ha vé, Topè pi(jé) ùn ve fi tÿ ùn ve ti han ja nĩ'. Ûn ve tÿ tóg fi han ja nĩ mÿr.

⁹ Kÿn pi(jé) fi tugrĩn ti han'. Ti hã tugnĩn tóg fi han.

¹⁰ Hã kÿ ùn tÿtá fag tóg kur tÿ vènh kri fón ke mũ, fag tÿ tÿ ag krêm ke nÿtĩn kÿ. Kÿ Topè tÿ jènè jafã ag tóg fag tÿ tÿ ag tù nÿtĩ ki kanhró nÿtĩ sir, kur ên to.

¹¹ Hã ra êg kar vÿ êg Senhor ki ge kÿ nÿtĩ. Ti ki ge kÿ nÿtĩn kÿ ùn tÿtá fag pi(jé) äjag pir mÿ tÿ nén ù nÿtĩ'. Ag mré ke fag nÿtĩ. Kÿ ag pi(jé) äjag pir mÿ tÿ nén ù nÿtĩ gé'. Fag mré ke ag nÿtĩ gé. Jagnè ki rĩr êg tóg ti ha.

¹² Hÿ, ùn tÿtá fi vÿ tÿ ti ki han kÿ nĩ. Hã ra ag kar tóg fag ki mur tĩ sir, jãvo êg kar vÿ tÿ Topè tÿ há (r) kar nÿtĩ.

¹³ Kÿ to jykrén, äjag. Há tù tóg nĩ, ùn tÿtá fag tÿ kur tÿ vènh kri fón tù ra Topè mré vèmén kÿ.

¹⁴ Fag kar vÿ kur tÿ vènh kri fón tĩ, êg mré ke tù fag mré hã. Hã kÿ êg vèsóg ki ki kanhró nÿtĩ, vènh jykre tag ti. Há ti nĩ mÿr.

Ag mÿ'a tóg tĩ, ag gãnh téj ti. Vèsóg ki êg tag to jykrén tĩ.

¹⁵ Hã ra tóg fag mÿ sér tĩ, fag gãnh téj ti. Hÿ, fag gãnh vÿ tÿ fag krĩ kri fón ja ri ke nĩ.

¹⁶ Hèn ri ke mũn äjag kãmĩ ù mÿ tóg há tù nĩ hã ra, fag krĩ kri fón ja ti. Kÿ tag to jykrén nĩ, ha mẽ: ã tÿ kri fón sór tù tag pi(jé) tÿ êg jykre nĩ'. Topè tù fag jykre pijé'. Igreja kar ki fag tóg kur tÿ vènh kri fón tĩ, ha mẽ. Kÿ igreja krêm êg mÿ'a han sór tũg nĩ.

Santa Ceia to vènh jykre

(Mt 26.26-28; Mc 14.22-24; Lc 22.17-20)

¹⁷ Kÿ sóg nén ù ki äjag mÿ vĩ há han ke tù nĩ gé. Äjag jykre ù tóg há tù nĩ, ha mẽ. Äjag vènh mãn kÿ äjag nèji, Jesus jamĩ ko kÿ äjag nèji jagnè jèn vóg tĩ, kÿ äjag nèji jagnè kókég tĩ sir.

¹⁸ Äjag vènh mãn kÿ äjag nèji jagnè kato tē tĩ, vènh kãpãm kÿ, kÿ tóg inh mÿ ki hã ke ve nĩ, sÿ to jykrén kÿ. Äjag kãmĩ ù hÿn vènh kãpãm sór tĩ, he sóg tĩ.

¹⁹ Hÿ, há ti nĩ vè, äjag tÿ vènh kãpãm kÿ nÿtĩn kÿ. Kÿ ùn jykre há ag vÿ vènh ven ke mũ, äjag kãmĩ.

²⁰ Kÿ, äjag vènh mãn kÿ äjag pi(jé) êg Senhor jamĩ ko tĩ', Santa Ceia he mũ ên tĩ'.

²¹ Tÿ festa han kÿ äjag kar nèji vènh fãn hã jé ko tĩ, äjag fór sór kÿ. Tá jun kÿ äjag nèji kãnhmar ko tĩ. Kÿ ù ag nèji vènh fãn tĩ, vinho kron kÿ ag nèji tÿ pépév tĩ, jó ù ag tóg kókĩnkĩr tĩ sir, ù tÿ kãnhmar tá junjun mũ ag tÿ ag tù kaggran kÿ.

²² Ha mẽ, vènhmÿ ti nĩ. Topè mré ke ag to é he mũ ve äjag tóg nÿtĩ mÿr', äjag tÿ ag tù kaggran kÿ. Ûn jagtar ag mÿ'a han äjag tóg mũ mÿr', äjag tÿ ag jèn kaggran kÿ, ag junjun to hã. Tag tÿ inh hÿn hē ri kenh mũ? Inh mÿ äjag mÿ vĩ

há han ke mŭ', tag to'? Vó', kenh ke tũ inh nĩ. Kórég ti nĩ, ájag tỹ han mŭ tag ti. Ájag ĩn hã tá vĕjĕn tỹ vĕnh fãn nĩ.

²³ Ha mĕ, ěg Senhor tóg inh mỹ tó ja nĩ, sỹ ájag mỹ tó mŭ ti, ěg tỹ ti ter to jykren kỹ tag han jé, ha mĕ. Kuty ěn kã, Judas tỹ pã'i ag mỹ ěg Senhor tỹ Jesus tó ja ěn kã ěg Senhor tóg ěmĩ mãn ja nĩgtĩ, Jesus ti.

²⁴ To tóg Topĕ mré vĩ ja nĩgtĩ. Kupãn kỹ tóg ag mỹ: "inh hã vĕ," he ja nĩgtĩ. "Ájag jagfy sóg ter ke mŭ. Kỹ inh mĩ ěkren nĩ, ájag tỹ pão tag kon kỹ," he ja tóg nĩgtĩ.

²⁵ Ag tỹ ko kar kỹ tóg copa mãn ja nĩgtĩ gé sir. Kỹ tóg ag mỹ: "copa ki jĕ tag vỹ inh kyvĕnh ri ke nĩ," he ja nĩgtĩ. "Inh jykre tãg to ken hã vĕ, isỹ inh kyvĕnh tugrĩn ájag mỹ vĕnh pãte fón jé. Kỹ inh kyvĕnh tỹ inh ki kutĕ mŭ ěn mĩ ěkren nĩ, ájag tỹ copa kãkã nĩ tag kron kỹ," he ja tóg nĩgtĩ gé.

²⁶ Hã kỹ ěg tỹ ěmĩ ěn kon kỹ, ěg tỹ copa kãkã nĩ ěn kron kỹ ěg tóg sir ěg Senhor ter ti tó ti. Tag han ěg tĩ, ti kãtĩg ken jo.

²⁷ Hã kỹ vĕnh jykre kórég ki ěmĩ ěn ko sór tũg nĩ, copa kãkã nĩ ěn kron kónãn sór tũg nĩ gé, ěg Senhor tũ ti. Ke tũ nĩ mŭ ra tóg ěg tỹ ti ter to é he ri ke nĩ, ěg tỹ ti kyvĕnh kutĕ to é he ri ke ti nĩ, ěg tỹ ěg jykre kórég ra kron kỹ.

²⁸ Hã kỹ ěg jé ěg jykre tugnỹm. Tugnỹm kar kỹ, ti há nĩ ve kar kỹ ěg tóg ěmĩ ěn konh mŭ, copa kãkã nĩ ěn kron ke mŭ gé.

²⁹ ěg tỹ ón kỹ ko sór kỹ, ón kỹ kron sór kỹ, ti tỹ ěg mỹ vĕjĕn ũ ri ke nĩn kỹ Topĕ tóg ěg vóg kónãn ke mŭ sir, ěg tỹ ěmĩ ěn to ěg Senhor ter mĩ ěkrég tũ nĩn kỹ. Kỹ ěg tóg Topĕ tỹ ěg vóg kónãn hã jé tỹ nĕn ũ tũ han kỹ ko' he mŭ, kron' he mŭ gé sir.

³⁰ Ájag tỹ Jesus jamĩ ko to vĕnh ki rĩr há han tũ nỹtĩn kỹ, hã kỹ ũ ag tóg krónhkrój nỹtĩ, ájag kãmĩ, kỹ ũ ag tóg kaga nỹtĩ, kỹ ũ tỹ hĕn ri ke ag tóg kãgter huri ke gé.

³¹ Ha vé, ěg tỹ ěg jykre tugnỹm kỹ ti mỹ tó kỹ tóg ěg mỹ vĕnh pãte fón ke mŭ. Kỹ tóg ěg jykre tugnỹm mãn ke tũ nĩ sir, ěg vóg kónãn ke tũ tóg nĩ gé, ěg Senhor ti.

³² Hã ra tóg kejĕn ěg vóg kónãn tĩ. ěg Senhor tỹ ěg kanhrãn sór vĕ, ti tỹ ěg tỹ kygnĕ to ěg vóg kónãn kỹ, ti tỹ ěg vãm tũ nĩ jé, ũ tỹ ti vĩ mranh mŭ ag mré hã.

³³ Inh kanhkã', tag to jykren, kỹ jagnĕ jãvãnh nĩ, ájag tỹ vĕjĕn tỹ Santa Ceia ko sór kỹ.

³⁴ Ájag kãmĩ ũ kókĩr nĩn kỹ tóg ã ĩn tá ã jĕn tỹ vĕnh fãn ke mŭ, ke tũ nĩ mŭ ra tóg ájag vóg kónãn ke mŭ, ěg Senhor ti, ájag tỹ vĕnh mãn kỹ vĕnh fãnfãn kỹ.

Sỹ ájag mỹ nĕn tónh ke ũ tóg nỹtĩ ke gé, hã ra sóg rán ke tũ nĩ. Sỹ ájag mré nĩnh ken kỹ sóg ájag mỹ kãmĕn ke mŭ.

12

Topĕ vỹ ěg tar han mŭ, ti kuprĩg tỹ

¹ Kỹ sóg ájag mỹ Topĕ kuprĩg tỹ ěg krĩn ke tag tó sór mŭ, ájag tỹ inh ki jĕmĕn kỹ. Kejĕn tóg nĕn ũ to ěg tar han tĩ, ěg tỹ han jé, Topĕ kuprĩg ti.

² Ha vé, vãsỹ, ájag tỹ Jesus ki ge tũg ki ájag tóg ón kỹ vĕnh kãggrá tỹ topĕ nón mŭ ja nĩgtĩ gé. Vĩ vãnh ti nỹtĩ, vĕnh kãggrá tỹ topĕ ti, hã ra Japo vỹ ájag tỹ ag ki rã han ja nĩgtĩ.

³ Hã kỹ sóg tag to ájag kanhrãn sór mŭ, ha mĕ. Topĕ kuprĩg tỹ ěg krĩn kỹ ěg pi(jé) Jesus to: "Nĕn-Kórég ag pã'i mág," he tĩ'. Jãvo ěg tỹ Jesus mỹ: "ěg Senhor,"

hen kŷ Topě kuprŷg tóg ěg krŷn mŷ sir, ke tŷ nŷ mŷ ra ěg ti mŷ: “ěg Senhor,” he vānh nŷ sir.

⁴ Kŷ Topě kuprŷg vŷ tŷ ūn pir nŷ, hā ra tóg ěg tar han tŷ, nén ū kar to. Vyrmŷ tóg ěg tān tŷ', ěg tān tŷ' he tŷ.

⁵ Kŷ ěg rānhřāj vŷ e nŷtŷ gé, ěg kar vŷ vyrmŷ rānhřāj nŷtŷ gé, hā ra tóg pir nŷ, ěg Senhor ti, ū tŷ ěg mŷ vĕnh rānhřāj nŷn tŷ ti.

⁶ Kŷ ěg tŷ ti jykre ki nén ū hyn han mŷ vŷ e nŷtŷ, hā ra tóg pir nŷ, Topě ti, ū tŷ ěg tar han mŷ ti.

⁷ Kŷ Topě kuprŷg vŷ ěg tar han kān tŷ sir, kŷ tóg ū tŷ nén ū to tān kŷ nŷ han tŷ, jó tóg ū tŷ nén ū ū to tān kŷ nŷ han tŷ gé, ěg kar tŷ jagnĕ mŷ nén ū há han jé, ěg tŷ nén ū to tar nŷtŷ ěn tŷ.

⁸ Hā kŷ Topě kuprŷg tóg ū tar han tŷ, ti tŷ ěg mŷ ti vŷ kāmĕn há han jé sir. Ū tar han tóg tŷ gé, ti tŷ Topě vŷ ki nén ū kar ki kanhró nŷ jé.

⁹ Kŷ Topě kuprŷg tóg ū tar han tŷ, ti tŷ ti ki fé mág to. Ū tar han tóg tŷ gé, ti tŷ ūn kagyga tŷ há' he jé, Topě kuprŷg ěn ti mŷr.

¹⁰ Ū tar han tóg tŷ gé, ti tŷ ěg tŷ nén han vānh han jé, ū tar han tóg tŷ, ti tŷ ěg jyvĕnh há han jé, kŷ tóg ū tar han tŷ, ti tŷ: “tag vŷ tŷ vĕnh jagrĕ há nŷ, tag vŷ tŷ vĕnh jagrĕ kórĕg nŷ,” he jé. Ū tar han tóg tŷ, ti tŷ ěg tŷ vĕnh vŷ ki kagtŷg ki Topě mrĕ vĕmĕn jé, kŷ tóg ū tar han tŷ, ti tŷ ěg tŷ vĕnh vŷ ki kagtŷg mĕ kŷ ěg vŷ ki tó jé sir.

¹¹ Hā ra tóg pir nŷ, Topě kuprŷg ti. Ti pir nŷ ra tóg nén ū e tag hyn han tŷ, kŷ tóg to ěg tar han tŷ. Ti hā ne to jykrĕn kŷ: “tag tar han jé sóg ke mŷ, tag to, jó sóg ū ěn tar han ke mŷ, ěn to,” he tŷ'. Kŷ tóg vyrmŷ ū tar han', vyrmŷ ū tar han' he tŷ sir.

Nén ū pir ri ke ěg nŷtŷ, ěg jagrĕ pir nŷn kŷ

¹² ěg há to jykrĕn nŷ, ha mĕ. ěg há vŷ tŷ ūn pir nŷ, hā ra ěg há ki nŷtŷ vŷ e nŷtŷ, ěg pĕn, ěg nŷgé, ěg nŷgrĕg, ti kar ti. Kŷ ěg há ki nŷtŷ kar vŷ tŷ ěg há nŷ sir. Nén ū pir vĕ sir, ti e nŷtŷ ra, ti tŷ ěg ki nŷtŷ kar nŷn kŷ. Tag ri ke ěg nŷtŷ gé. Cristo há ri ke ěg nŷtŷ, ěg tŷ ti ki ge kŷ nŷtŷn kŷ.

¹³ Topě kuprŷg vŷ tŷ ūn pir nŷ, kŷ ěg kar vŷ kygpe kŷ nŷtŷ, ti kuprŷg tŷ, hā vŷ: Cristo há pir, he mŷ. ěg kāmŷ ū ag tóg tŷ povo tŷ Israel ag ki ke nŷtŷ, ū ag tóg tŷ povo ū ag ki ke nŷtŷ gé, ū ag tóg ěprā ke tŷ patrāo nŷtŷ, jó ū ag tóg patrāo tŷ nŷtŷ. Hā ra Topě kuprŷg vŷ tŷ ūn pir nŷ, ěg jagrĕ ti, kŷ tóg tŷ ěg jagrĕ kar nŷ, ti pir nŷ hā ra. Nén ū pir vŷ tŷ ěg nŷtŷ.

¹⁴ ěg há vŷ ge nŷ, ha mĕ. ěg há ki nŷtŷ pi(jé) tŷ ūn pir nŷ'. E ti nŷtŷ, ěg há ki nŷtŷ ti. Kŷ ěg jé ěg rānhřāj to vŷ vŷ he tŷ nŷ.

¹⁵ Hĕn ri ke mŷn ěg pĕn tóg to jykrĕn kŷ: “inh pi (jé) tŷ vĕnh nŷgé nŷ', hā kŷ sóg vĕnh há ki nŷtŷ tŷ nŷ,” he tŷ. Hā tŷ vĕ hā ra. ěg há ki nŷtŷ ti nŷ, ěg pĕn ti, ti tŷ tŷ ěg nŷgé tŷ nŷ ra.

¹⁶ Kŷ ěg nŷgrĕg tóg to jykrĕn kŷ hĕn ri ke mŷn: “inh pi(jé) tŷ vĕnh kanĕ nŷ', hā kŷ sóg vĕnh há ki nŷtŷ tŷ nŷ,” he tŷ gé. Hā tŷ vĕ mŷr.

¹⁷ ěg há tŷ tŷ vĕnh kanĕ tāvŷ nŷ hā ra ěg ne tŷ jĕmĕnh mŷ vĕ? ěg há tŷ tŷ vĕnh nŷgrĕg tāvŷ nŷ hā ra ěg nén ū ger mĕnh ke tŷ nŷ vĕ.

¹⁸ Topě hā ne ěg há ki nŷtŷ hyn han kān', kŷ tóg ti ki nŷtŷ kar mŷ vyrmŷ vĕnh jykre vin kān ja nŷgtŷ, ti tŷ ā rānhřāj ěn han jé. Topě tŷ nén to jykrĕn jan hā vĕ.

¹⁹ Kŷ ti ki nŷtŷ kar tŷ vĕnh jykre pir nŷ ra ěg há vŷ tŷ nŷ vĕ.

²⁰ Há ti nĩ, Topě jykre ti. Ěg há ki nýtĩ jykre e han ti, ti e tỹ ěg há pir han jé sir.

²¹ Hã kỹ ěg kaně pi(jé) ěg nígé mỹ: “ã pi(jé) inh mré rãnrãj tĩ,” he tĩ'. Kỹ ěg krĩ vỹ ge nĩgtĩ gé. Ěg pěn mỹ ti: “ã pi(jé) inh mré rãnrãj tĩ,” he tũ nĩgtĩ gé.

²² Ge tũ ti nĩ, ěg há jykre ti. Ěg há ki nýtĩ ũ tóg rãnrãj krój han nĩ ve nĩ, hã ra ěg tóg jarĩn mỹ tỹ jagně mré rãnrãj kãn tĩ.

²³ Kỹ ti ki nýtĩ ũ tóg rãnrãj kufy han tĩ, kỹ ěg tóg hã ra ti ki rĩr há han tĩ sir. Kỹ ti ki nýtĩ ũ tóg ěg mỹ sĩnvĩ tũ nýtĩ, hã kỹ ěg tóg kur krēm ti rãg tĩ.

²⁴ Ũ tỹ ěg mỹ sĩnvĩ nýtĩ tỹ ěg tóg kur krēm rãg tũ nĩgtĩ sir. Kỹ Topě tóg ěg mỹ věnh jykre nĩm, ěg tỹ ti ki nýtĩ tỹ věnh rãnrãj kufy han mũ ěn ki rĩr há han jé sir. Ěg há jykre hã vě. Topě vỹ to jykren kãn, kỹ tóg ěg há ki nýtĩ han kãn,

²⁵ ěg há tỹ věnh jykre pir han jé. Kỹ tóg ti mỹ há tĩ, ěg tỹ ěg mré Jesus ki ge kỹ nýtĩ kar ag ki rĩr há han kỹ. Ěg tỹ jagně ki rĩr há han kỹ ěg kãmĩ ũ vỹ jagtar tũ nýtĩnh mũ, ěg tỹ ěg há ki nýtĩ jykre pir ri ke han kãn kỹ, jagně mỹ.

²⁶ Hỹ, ěg há ki nýtĩ pir kaga nĩn kỹ tóg kaga kãn tĩ sir. Kỹ tóg ge nĩ gé, ěg mré. Jagně mré tóg ěg mỹ e tĩ. Kỹ ũ tỹ ěg kãmĩ ũ mỹ vĩ há han kỹ tóg ěg kar mỹ sér tĩ gé sir.

²⁷ Ha mẽ, Cristo há ri ke ěg nýtĩ, kỹ ěg kar vỹ ti há ki nýtĩ ri ke nýtĩ gé sir.

²⁸ Kỹ Topě tóg ũ tỹ igreja ki ke kar mỹ věnh rãnrãj vin kãn, ěg mỹ. Ěg kãmĩ ũ ag vin tóg, ag tỹ tỹ apóstolo nýtĩ jé. Tag pãte tóg ũ ag vin, ag tỹ jagně jykre ki kanhrãn kỹ jagně jyvěň jé. Tag pãte tóg ũ ag vin, ag tỹ tỹ ti vĩ tó jafã nýtĩ jé. Kỹ tóg ũ ag vin, ag tỹ ěg tỹ nén han vãnh hyn han jé. Kỹ tóg ũ ag vin, ag tỹ ũn kagyga tỹ há' he jé. Kỹ tóg ũ ag vin, ag tỹ ũ jagãgtãn jé. Kỹ tóg ũ ag vin, ag tỹ tỹ igreja krēm tỹ pã'i nýtĩ jé. Kỹ tóg ũ ag vin, ag tỹ ěg tỹ věnh vĩ ki kagtĩg ki Topě mré vēmén jé.

²⁹ Ěg kar pi(jé) tỹ apóstolo nýtĩ'. Ěg kar pi(jé) tỹ věnh jyvěň jafã nýtĩ'. Ěg kar pi(jé) tỹ Topě vĩ kãmén jafã nýtĩ'. Ěg kar pi(jé) ěg tỹ nén han vãnh hyn han tĩ'.

³⁰ Ěg kar pi(jé) ũn kagyga tỹ há' he tĩ'. Ěg kar pi(jé) ěg tỹ věnh vĩ ki kagtĩg tỹ Topě mré vēmén tĩ'. Ěg kar pi(jé) věnh vĩ ěn mẽ kỹ ěg vĩ ki hã tó tĩ'.

³¹ Kỹ Topě mỹ to vĩ mág, ti kuprĩg tỹ nén ũ há to ãjag tar han jé, ãjag kar tỹ jagně mré rãnrãj kãn jé sir.

Ājag tỹ nén han mũ ũ tóg há sĩ nĩ, kỹ ũ tóg há tãvĩ nĩ gé. Kỹ sóg ãjag mỹ nén ũ há tãvĩ kãmén sór mũ, ha mẽ.

13

Věnh kar to há nýtĩmĩ

¹ Hěn ri ke mũn ěg tóg ěprã ke ag vĩ tỹ hěn ri ke tó há nýtĩgtĩ, Topě tỹ jěně jafã ag vĩ mré hã. Ěg tỹ jarĩn mỹ věnh kar to há tũ nýtĩn kỹ ěg tóg ón kỹ ke nĩ hã ra, ěg vĩ tag ti. Ěg tỹ věnh kar to há tũ nýtĩn kỹ ěg tóg ón kỹ vĩ há han tĩ, ferro tỹ véké kyr ri ke, sino tỹ kejěň ón kỹ kyr ěn ri ke.

² Hěn ri ke mũn ěg tóg věnh jyvěň há han tĩgtĩ. Topě hěn ri ke mũn nén ũ kar tó tĩ ěg mỹ, ěprã ke jykre ki kanhró kar ěg nýtĩ hěn ri ke mũn. Hěn ri ke mũn ěg tóg Topě kí rã há han kỹ nýtĩ, kỹ ěg ti vĩ to: “hỹ mỹ vỹ?” he tũ pě nĩgtĩ. Kỹ ěg tóg pãnóňh mỹ: “ha tĩg,” he tũ, hã ra tóg sir tĩ tĩ. Ěg tỹ jarĩn mỹ věnh kar to há tũ nýtĩn kỹ tóg tỹ ón kỹ ke nĩ.

³ Hën ri ke mün ěg tóg ěg tũ vin kãn tĩ, ũn jagtar ag mý. Hën ri ke mün ěg tóg ũ tỹ Jesus kato tẽ mũ ag mý vãnh fẽg mũ, ag tỹ ěg pũn jé. ěg tỹ jarĩn mý vãnh kar to há tũ nýtĩn kỹ tóg ěg mý nén ũ há han ke tũ nĩ.

⁴ ěg tỹ vãnh kar to há nýtĩn kỹ ěg tóg vãnh kar to fen nýtĩ. Ag mý ěg tóg nén há kar han sór mũ. ěg pi(jé) jagnẽ tũ to én ke mũ'. “Á kãfór vỹ tỹ inh nĩ,” henh ke tũ ěg tóg nĩ. “Ũn mág vỹ tỹ inh nĩ,” henh ke tũ ěg tóg nĩ gé.

⁵ Vẽnhmý mẽ han ke tũ ěg tóg nĩ gé, ěg tũ tãvĩ hã to jykrén ke tũ ěg tóg nĩ gé. “Ti hỹn ne ki kanhrãn ke tũ pẽ nĩ,” henh ke tũ ěg tóg nĩ gé. Kỹ ũ tỹ ěg vóg kónãn mũ ra ěg tóg ti to jũnh ke tũ nĩ gé.

⁶ ěg tỹ vãnh jykre pãno ven kỹn pi(jé) ěg mý sér tĩnh mũ'. ěg tỹ ũ tỹ ki hã to mũ mẽ kỹ tóg ěg mý sér tĩnh mũ.

⁷ ěg tỹ nén ũ jagy vég mũ ra ěg pi(jé) to vĩnh ke mũ'. Nén ũ kar to ěg tóg: “Topẽ vỹ tag han há nĩ,” henh ke mũ. Ti hã ki ěg tóg nén ũ kar ve sór ke mũ. Vãnh kar ki ěg fe mág nýtĩnh mũ, ěg tỹ vãnh kar to há nýtĩn kỹ.

⁸ ěg tỹ vãnh kar to há nýtĩ ěn vỹ krỹg ja tũ nĩnh mũ. Jãvo ěg tỹ jagnẽ jykre ki vãnh kanhrãn kỹ jagnẽ jyvẽn tĩ ěn vỹ krỹg ja nỹ. ěg tỹ ěg tỹ vãnh vĩ ki kagtĩg tỹ Topẽ mré vẽnén tĩ ěn vỹ krỹg ja nỹ gé. ěg tỹ ěprã nén ũ ki kanhró nýtĩ ěn kar vỹ krỹg ja nỹ gé.

⁹ Ũri ěg tóg nén sĩ hã ki kanhró nýtĩ. Nén sĩ tỹ ěg tóg jagnẽ jyvẽn tĩ, Topẽ tỹ ěg mý tó tỹ. ěg pi(jé) ki kanhrãn kãn kỹ nýtĩ ver'.

¹⁰ Kãnhtar tóg vãnh ven ke mũ, ũ tỹ nén ũ kar ki kanhró kar nĩ ěn ti. Kỹ hã ěg tóg nén ũ hyn han há tãvĩ han kãn ke mũ, kurã ěn kã.

¹¹ ěg mog mũ ri ke ti nĩ. Vãsỹ sóg sĩ ja jęgtĩ. Kỹ sóg ũn kãsir ag tỹ nén tó tĩ ěn tó ja nĩgtĩ gé. Ũn kãsir ag mý ke ěn tóg inh mý ke ja nĩgtĩ gé. Ũn kãsir tỹ nén to jykrén tĩ ěn to sóg jykrén ja nĩgtĩ gé. Kejẽn sóg sanh há jẽ sir. Kỹ sóg ũn kãsir jykre tovãnh kãn ja nĩgtĩ. ěn ri ke ti nĩ, ěg Senhor kãtĩg mãn ke ti. Ki kanhrãn kãn jé ěg tóg ke mũ, ěn kã.

¹² Ũri ěg tóg ve há han tũ nĩgtĩ ver, ěg Senhor jykre ti, kỹ tóg ěg tỹ vãnh ve jafã ki vãnh ve há han tũ ri ke nĩ. Kuty nĩ ve ti nĩ, ěg tỹ vãnh ve jafã ki nén vég mũ ti. Hã kỹ ěg tóg ve há han tũ nĩ ver. Kurã ěn kã ěg tóg nén kar ve há han kãn ke mũ hã ra. ěg hã vỹ tóg ti venh ke mũ. Ũri ěg tóg sĩn kỹ ti ki kanhró nýtĩ. Kurã ěn kã ěg tóg ki kanhrãn kãn ke mũ, ti tỹ ěg ki kanhró kar ěn ri ke.

¹³ Hã kỹ tag vỹ krỹg ja tũ nỹ, ha mẽ. ěg tỹ Topẽ ki rã mũ vỹ krỹg ja tũ nỹ. ěg tỹ ti hã ki nén ũ kar ve sór mũ vỹ krỹg ja tũ nỹ gé. ěg tỹ vãnh kar to há vỹ krỹg ja tũ nỹ gé. Kỹ nén ũ pir tóg kãfór nĩ, hã vỹ: ěg tỹ vãnh kar to há nĩ, he mũ.

14

Topẽ vỹ ã kuprĩg tỹ ěg tar han tĩ, ěg tỹ jagnẽ ki rĩr-jé

¹ Kỹ vãnh kar to há nýtĩmĩ. Kỹ Topẽ mý to vĩmĩnĩ gé, ti kuprĩg tỹ nén ũ to ãjag tar han jé. Ti tỹ nén ũ to ěg tar han tĩ ũ vỹ kãfór nĩ, hã vỹ: ěg tỹ jagnẽ jykre ki kanhrãn kỹ jagnẽ jyvẽn tĩ, he mũ.

² ěg tỹ hã ra ěg tỹ vãnh vĩ ki kagtĩg ki vẽnén kỹ ěg pi(jé) ěprã ke ag mý nén ũ tó tĩ'. Topẽ hã mý ěg tó tĩ, ěg tỹ tag tó kỹ. Ũ pi(jé) ki kanhró nĩ', ěg tỹ vãnh vĩ ki kagtĩg ki vẽnén kỹ'. Topẽ kuprĩg hã tóg ěg krĩn tĩ, ěg tỹ vãnh vĩ ki kagtĩg ěn tó jé. Kỹ ěg tóg ki kagtĩg nýtĩ, ěg tỹ nén tó mũ ti.

³ Ěg tŷ hã ra ěg vŷ ki jagně jyvěn kŷ ěg tóg ũ tŷ měg mŷ kar jyvěn tŷ sir. Tŷ ěg tóg jagně tar han tŷ, Topě to. Jagně jyvěn ěg tóg tŷ, jagně fe kaj tŷ ěg tóg tŷg' he tŷ gě, ěg tŷ jagně mŷ ěg vŷ ki věměn kŷ.

⁴ Ũ tŷ ěg tŷ věnh vŷ ki katŷg ki věměn mŷn vŷ věnhmŷ tŷ ũn tar jě sir, Topě to, ũn věměn mŷ ti. Ũ tŷ ěg vŷ ki věnh jyvěn tŷ ěn tóg ěg tar han kãn mŷ sir, Topě to, ěg mrě věnh mãn kŷ nŷtŷ ag kar.

⁵ Inh mŷn hã tŷ vě, ājag kar tŷ ěg tŷ věnh vŷ ki kagtŷg tŷ Topě mrě věměn hã hã ra. Ājag kar tŷ ěg vŷ ki jagně jykre to jagně jyvěn hã nŷtŷ ra tóg hã ra tag kãfór nŷ. Kŷ tóg inh mŷ hã kãfór nŷ vě, ājag tŷ ke kãn mŷ ra. Ũ tŷ ěg vŷ ki tó mŷ vŷ ũ tŷ ěg tŷ věnh vŷ ki kagtŷg ki věměn mŷ ěn kãfór nŷ, ũ tŷ ěg vŷ ki jagně jykre to věnh jyvěn tŷ ěn, mŷr, ha mě. Kejěn ũ tóg ěg tŷ věnh vŷ ki kagtŷg ki věměn tŷ. Kar kŷ ũ tóg ti vŷ ěn mě kŷ ěg vŷ ki tó mŷ sir, ti tŷ něn tó ja ěn ti. Tag vŷ hã tŷ gě. Ũ tŷ věnh mãn kŷ nŷtŷ kar vŷ ki kanhrãn kãn mŷ sir, ti vŷ ti, kŷ ag tóg tŷ tar nŷtŷnh mŷ sir.

⁶ Inh kanhkã', ha vé. Hěn ri ke mŷn sóg ājag ki jun kŷ ěg tŷ věnh vŷ ki kagtŷg ki věměn mŷ. Kŷ sóg ājag mŷ něn ũ hã han ke tŷ nŷ ha, tŷ, ājag tŷ inh vŷ ki kagtŷg nŷtŷnh kŷ. Jãvo isŷ ājag mŷ Topě tŷ inh mŷ něn tó mŷ tŷ ěg vŷ ki kãměn kŷ sóg tŷ ājag tar han mŷ sir, isŷ ājag mŷ sŷ něn to jykrěn mŷ kãměn kŷ, sŷ ājag jyvěn kŷ, sŷ ājag mŷ Topě vŷ ki něn rán kŷ nŷ ěn kãměn kŷ. Kŷ sóg tŷ ājag tar han mu sir, mŷr, ha mě, ājag tŷ inh vŷ ki kanhrãn kŷ.

⁷ Vãn tŷ vãkyn jafã to jykrěn nŷ, vãkyn jafã ũ to ke gě. Ag tŷ kyn kórěg kŷ ěg tóg ki kagtŷg nŷtŷ sir, ag tŷ vãkyn mŷ ti.

⁸ Kŷ vãkyn jafã tŷ trombeta vŷ ge nŷgtŷ gě. Ag tŷ ti kyr mě kŷ soldado ag vŷ věnh kãn kãn tŷ, věnh gěnh ke to. Ag tŷ tŷ kyn hã han tŷ nŷtŷnh kŷ ag pi (jě) věnh gěnh ke to věnh kãn ke mŷ'.

⁹ Ge ti nŷ gě, ěg vŷ ti. Ěg tŷ ag tŷ ki kagtŷg ěn tó kŷ ag tóg to jykrěn ke tŷ nŷ gě, ěg tŷ něn tó mŷ to. Věké ěg tóg věměn mŷ sir, ěg tŷ gen kŷ.

¹⁰ Věnh vŷ vŷ e nŷtŷ, ga tag kri. Povo kar vŷ vyrmŷ vŷ nŷ' he kar nŷtŷ. Ěg vŷ pě ki ěg tóg věměn ki kanhró nŷtŷ.

¹¹ Kŷ sóg kejěn hě tá ke ũ vŷ měg tŷ. Sŷ ti vŷ ki kagtŷg nŷn kŷ sóg ti jykre ki kanhrãn ke tŷ nŷ, ũn vŷ mŷ ti, kŷ tóg inh jykre ki kanhrãn ke tŷ nŷ gě. Ge ti nŷ gě, ěg tŷ věnh vŷ ki kagtŷg ki věměn kŷ. Kŷ kagtŷg ěg tóg nŷtŷ sir.

¹² Topě kuprŷg tŷ ājag tar han mŷ ve sór ājag tóg nŷtŷ, něn ũ ũ to. Kŷ tóg hã tŷ. Kŷ hã ra ěg mrě ke ag tar han jafã to ěn nŷ, ěn hã to Topě mrě vŷmŷnŷ, hã vŷ: ěg vŷ ki jagně jyvěn, he mŷ.

¹³⁻¹⁴ Ěg tŷ věnh vŷ ki kagtŷg ki Topě mrě věměn kŷ ěg tóg to jykrěn kŷ nŷ tŷ ra Topě mrě věměn tŷ. Kŷ, ā tŷ věnh vŷ ki kagtŷg ki věměn to tar nŷn kŷ Topě mŷ to vŷmŷnŷ, ti tŷ ā tŷ něn tó ja ěn ki kanhrãn kŷ ěg mŷ ěg vŷ ki kãměn to ā tar han jě gě. Kŷ ā tóg: “tag tó ja inh nŷ, tag tó ja inh nŷ,” henh ke mŷ gě sir, kŷ tóg hã tŷ.

¹⁵ Ěg tŷ to jykrěn kŷ nŷ tŷ ra Topě mrě věměn kŷ tóg hã tŷ. Ěg tŷ hã ra to jykrěn kŷ nŷn kŷ ti mrě věměn kŷ tóg hã tŷ gě. Ěg tŷ to jykrěn kŷ nŷ tŷ ra Topě mŷ jãn kŷ tóg hã tŷ. Ěg tŷ hã ra to jykrěn kŷ nŷn kŷ ti mŷ jãn kŷ tóg hã tŷ gě. Sŷ tag han kãn sór vě.

¹⁶ Ha vé, ā tŷ to jykrěn kŷ nŷ tŷ ra Topě to vŷ hã han kŷ ā vŷ měg mŷ ag vŷ ki kagtŷg nŷtŷ, ā vŷ ti, ā tŷ ěg tŷ věnh vŷ ki kagtŷg ki věměn kŷ. Kŷ tóg ag tŷ ā mrě: “hŷ, hã vě,” he sór mŷ ra tóg věnhmŷ tŷ. “Tŷ ne tó mŷ vŷ? Sŷ ki kagtŷg tóg tŷ,” he jě ag tóg ke mŷ.

17 Tó há han ã tũgtĩ, ã tỹ ěg tỹ vĕnh vĩ ki kagtũg ki vĕmĕn kỹ. Hã ra ù tỹ mĕg mũ ag vỹ ki kagtũg nỹtĩ, kỹ ã pi(jé) ag tar han tĩ'.

18 Ěg tỹ vĕnh vĩ ki kagtũg ki vĕmĕn to sóg tar pĕ nĩ inhhã. To tar nĩn kỹ sóg ãjag kãfór nĩ.

19 Hã ra sóg tag tó sór tũ nĩ, ěg vĕnh mãn kỹ nỹtĩn kỹ. Hĕn ri ke mũn sóg vĕnh vĩ tỹ mil (ke) han ke mũ, ěg tỹ vĕnh vĩ ki kagtũg ki vĕmĕn kỹ. Hã ra sóg jérĩn mỹ ãjag tar han ke tũ nĩ. Hã kỹ sóg tag tó sór tũ nĩ. Sỹ nĕn to jykrĕn mũ hã tó sór inh mũ, kỹ sóg inh vĩ pir tỹ ãjag tar han ke mũ.

20 Inh kanhkã', to jykrĕn há han nĩ. Ğĩr tỹ nĕn ù to jykrĕn tũ ěn ri ke nỹtĩ sór tũg nĩ. Vĕnh jykre pãno hã to ĝĩr tỹ ti ki kagtũg nĩ ěn ri ke nỹtĩmũ, ãjag tỹ ti kórég han tũ nĩ jé. Nĕn ù há to jykrĕn kỹ tóg inh mỹ ãjag tỹ ùn sanh há ag tỹ nĕn ù to jykrĕn há ěn ri ke nỹtĩnh há tĩ.

21 Ve ra, Topĕ vĩ rán ki tag vỹ rán kỹ nĩ, ha mĕ. "Inh povo tỹ inh vĩ mĕ jãvãnh nỹtĩn kỹ sóg ag mỹ ùn vĩ ù ag vĩ ki inh vĩ jĕnĕnh ke mũ. Povo tỹ vyrmỹ vĩ ag mỹ sóg: "ha ag mỹ inh vĩ ti tó," hĕnh ke mũ, "ag vĩ tũ ki hã ra, ù tỹ inh vĩ mĕ jãvãnh ag mỹ," he jé sóg ke mũ. Hã kỹ ag tóg mĕnh ke tũ nĩ, inh povo ti, ag tỹ ag vĩ tũ ki ag mỹ vĕmĕn kỹ," he tóg, ěg Senhor ti, Topĕ vĩ rá ki.

22 Hã kỹ tóg tỹ ù tỹ Topĕ ki ge jãvãnh ag tỹ ki kagtũg han jafã nĩ, ěg tỹ vĕnh vĩ ki kagtũg tỹ vĕmĕn mũ tĩ. Ti ki ge kỹ nỹtĩ ag mỹ ke pijé'. Jãvo ěg tỹ jagnĕ jykre ki kanhrãn kỹ jagnĕ jyvĕn tag vỹ tỹ ti ki ge kỹ nỹtĩ ag tar han jafã nĩ. Ti ki ge jãvãnh ag mỹ ke pijé'.

23 Ha vé, kejĕn ěg mré ke ag vỹ vĕnh mãn kãn mũ. Kỹ vĕnh kar tóg hĕn ri ke mũn ěg tỹ vĕnh vĩ ki kagtũg ki vĕmĕn mũ. Kỹ ù tỹ ki kagtũg tóg vĕnh ke kãtũg mũ, ù tỹ Jesus ki rá ja tũ ti hĕn ri ke mũn. Kỹ tóg ti tỹ ãjag tỹ vĕnh vĩ ki kagtũg tag mĕ kỹ tóg ãjag to: "krĩ vĕnhmỹ ag nỹtĩ," hĕnh ke mũ sir, ón kỹ.

24 ãjag tỹ ěg vĩ ki jagnĕ jykre ki kanhrãn kỹ jagnĕ jyvĕn kỹ tóg hã ra há tĩ. Kỹ ù tỹ Jesus ki rá tũ vỹ jun mũ, ù tỹ ki kagtũg. Kỹ tóg ãjag vĩ mĕnh mũ, kỹ tóg to jykrĕn ke mũ sir. ãjag vĩ to tóg: "hỹ, hã vĕ," hĕnh ke mũ. Ti jykre pãno to tóg jykrĕn ke mũ gé.

25 Ti tỹ nĕn ù to jykrĕn mũ vỹ vĕnh ven kãn ke mũ, kỹ tóg ti mỹ e tũnh mũ sir. Mũg ke jé tóg ke mũ. "Topĕ vỹ tỹ ùn mág nĩ," he jé tóg ke mũ. Kỹ tóg ki kanhró nĩnh mũ, tó jé tóg ke mũ sir, Topĕ tỹ ãjag mré nĩ ti.

Culto ki vĕnh jykre

26 Kỹ ãjag vĕnh mãn kỹ tag vỹ há nĩ, ha mĕ. Û tóg Topĕ mỹ jãn ke mũ, ti mỹ cantar ken jé. Û tóg Topĕ vĩ tỹ vĕnh kanhrãn kỹ tónh ke mũ. Û mỹ tóg nĕn ù tónh mũ, Topĕ ti, ti tỹ tỹ ãjag jyvĕn jé. Û tóg ěg tỹ vĕnh vĩ ki kagtũg ki vĕmĕn ke mũ, ù tóg ti vĩ mĕ kỹ ěg vĩ pĕ ki tónh ke mũ, ti tỹ nĕn tó mũ ěn ti. Há kar ti nĩ, ãjag tỹ tag tỹ Topĕ to tar nỹtĩ jé.

27 ãjag tỹ ěg tỹ vĕnh vĩ ki kagtũg ki vĕmĕn sór kỹ ùn pipir ag hã tóg tónh ke mũ, hĕn ri ke mũn ùn régre, ke tũ nĩn kỹ ùn tãgtũ, jagnĕ ri ke. Û tỹ tó kỹ ù tóg vĩnh ke tũ nĩ sir. Ûn pir tỹ vĕmĕn kỹ tóg há tĩ. Kỹ ù tóg ti vĩ mĕ kỹ ěg vĩ pĕ ki tónh ke mũ gé sir, ti tỹ nĕn tó mũ ěn ti.

28 Kejĕn tóg ki tũ nĩ, ù tỹ ti tỹ nĕn tó mũ ěn tỹ ěg vĩ ki tónh ke mũ ti. Kỹ ěg tóg ěg tỹ vĕnh vĩ ki kagtũg tỹ vĕmĕn ke tũ nĩ sir, vĕnh kar rĩnve. ãjag ĩn hã tá vĕmĕn nĩ, ěg tỹ vĕnh vĩ ki kagtũg tỹ. Ěn tỹ igreja krĕm vĕmĕn tũg nĩ, ěg tỹ vĕnh vĩ ki kagtũg tỹ, ù tỹ ti tỹ nĕn tó mũ tỹ ěg vĩ ki tónh ke tũ nĩn kỹ.

²⁹ Kÿ tóg ãjag tÿ jagnê jykre ki kanhrân kÿ êg vî ki jagnê jyvên ken kÿ tóg ge nî gé, ha mē. Ûn régre vÿ tónh ke mû, ke tû nîn kÿ ùn tâgtû, jagnê ri kén tón jé. Kÿ ag vî mēg mû ag vÿ to jykrén ke mû, ag tÿ ti kygnê tû ve jé.

³⁰ Hã ra hên ri ke mûn Topê tóg ù mÿ nén ù tónh ke mû gé. Kÿ ùn vēmén vén mû tóg krÿg henh ke mû ver, kÿ ù tóg ti ri kén tónh mû sir, Topê tÿ ti mÿ nén tó ja ti.

³¹ Hã kÿ ãjag kar vÿ jagnê jyvên ke mû, ãjag tÿ jagnê ri kén vēmén kÿ. Gen kÿ ãjag tóg jagnê kanhrân ke mû sir, jagnê kri kuprãg ke ãjag tóg mû gé sir.

³² Topê kuprÿg vÿ êg krÿn tî, êg tÿ jagnê jyvên jé. Hã ra ti pi(jé) êg tÿ nén tó sór tû ra êg kri gÿnh ke tî'.

³³ Hã kÿ tóg Topê mÿ há tû nî, êg tÿ ù vēmén jê ra êg tÿ nén tónh ke mû ên tó sór kÿ. Êg tÿ jagnê tÿ tó kar kÿ êg tÿ nén tónh ke tó kÿ tóg ti mÿ há tî, kÿ vênh kar tóg jatun mÿ mēnh ke mû sir, êg tÿ nén tó mû ti. Topê jykre kusan hã vê.

³⁴ Topê tû vÿ tÿ êg nÿtî. Kÿ ùn tÿtã fag vÿ vēmén ke tû nî, igreja krēm. Hê tá igreja krēm fag vÿ jatu nÿtÿgtî, êmã kar mî, kÿ ãjag tóg fag ri ke jatu nÿtÿnh mû gé. "Tÿ fag tóg ag krēm ke nÿtî," he ja tóg nî, Topê ti, hã kÿ fag tóg vēmén ke tû nî, igreja krēm.

³⁵ Kÿ fag tóg ãjag tÿ Topê vî ki kanhrân há han tû nîn kÿ fag tóg ãjag ïn tá ãjag mén ki jēmēnh mû, ãjag tÿ ki kanhrân há han tû ja ên ti. Êg mÿ'a tóg tî, fag tÿ igreja krēm vēmén sór kÿ, kÿ ke sór tûg nî.

³⁶ ãjag hÿn tag ki króm sór tû nî, vég isóg nî nî. "Êg hã vÿ to jykrén há tãvî han tî, êg hã vÿ tó vén, vênh kar jo, Topê vî ti," he ãjag tóg tî, êg kãfór nÿtî sór kÿ. Hã ra tóg e nÿtî, Jesus ki ge mû ag. Tó há han ag tóg tî gé. Ag mré vênh jykre pir han sórnî.

³⁷ ãjag kãmî ù hÿn: "Topê vÿ inh mré vēmén tî, ti kuprÿg tÿ inh krÿn tag to sóg tar tãvî nî," he tî. Kÿn hÿn ki kanhró nî, sÿ ãjag mÿ Topê jykre tó mû tag, ãjag tÿ igreja krēm vênh mãn ke to. Êg Senhor tÿ êg mÿ vênh jykre nÿm jan hã vê, sÿ ãjag mÿ rán mû tag ti.

³⁸ Û tÿ tag to: "nén ù tû vê," he mû ra sóg ti to: "nén ù tû vÿ tÿ ã nî," he mû gé.

³⁹ Inh kanhkã', Topê mÿ to vî mág, ti kuprÿg tÿ ãjag tar han jé, ãjag tÿ jagnê jykre ve kÿ jagnê jyvên há han jé, êg vî ki. Û tÿ êg tÿ vênh vî ki kagtÿg ki vēmén sór kÿ ti mÿ: "vî tûg ra," he tûg nî gé.

⁴⁰ Hã ra ù vēmén jê ra êg tÿ nén tónh ke mû ên tó sór tûg nî. To jykre kusa nÿtÿmñî.

15

Jesus rÿr jê

¹ Inh kanhkã', sÿ ãjag mÿ Jesus kãme sér ên tó mãn ke vê, sÿ ãjag mÿ tó ja ên ti. Ên kri fig ãjag tóg tî, kÿ ãjag tóg mî mÿgtî.

² Ti vî kri nÿm kÿ ãjag tóg krenkren ke mû, ãjag tÿ tovãnh tû nîn kÿ. Sÿ ãjag mÿ nén tó ja ên tÿ tû' he tûg nî, ke tû nî mû ra ãjag tóg véké kri fi ja nÿnh mû. Kÿ ãjag tóg tá nén ù venh ke tû nî gé.

³ Sÿ ãjag mÿ Topê vî kãmén kÿ sóg ãjag mÿ sÿ nén mē ja ên hã tó vén ja nÿgtî, hã vÿ: Cristo vÿ êg jagfy ter ja nÿgtî, êg tÿ Topê vî mranh ja tugrÿn, he mû. Tag vÿ rán kÿ nî, Topê vî rá ki.

⁴ Kÿ ag tóg vënh kej kátá ti fi ja nĩgtĩ. Kurã tágtũ tũg kÿ tóg rĩr mãn ja nĩgtĩ gé. Tag vÿ rán kÿ nĩ gé, Topê vĩ rá ki.

⁵ Kÿ tóg Pedro mÿ vënh ven, kar kÿ ù tÿ 12 (ke) ag mÿ ke gé.

⁶ Kar kÿ tóg ù tÿ 500 (ke) kãfór ag mÿ vënh ven gé, vënh ven pir ki, ag vënh mãn kÿ nÿtĩ ên ki. Ên ag kãmĩ ùn pipir ag tóg kãgter ja nĩgtĩ, hã ra ùn e ag tóg ver êg mré nÿtĩ.

⁷ Kar kÿ Tiago tóg ti vé gé, kar kÿ ti tÿ ùn vin mũ kar ag, ke gé, apóstolo kar ên ag.

⁸ Kar kÿ sóg vãhã ti vé gé, ag kar nón. Sÿ ti venh ke tũ vë vë, sÿ kãnhmar ti ki rã ja tũ nĩn kÿ.

⁹ Apóstolo ag krêm ke kar vÿ tÿ inh nĩ. Sÿ tá krÿg ke tũ vë vë, sÿ tÿ apóstolo nĩnh ke ti, isÿ Topê ki ge kÿ nÿtĩ ag vóg kónãn jan kÿ, fag ke gé.

¹⁰ Hã ra Topê tóg inh jagãgtãn, hã kÿ tóg isÿ apóstolo han mũ. Kÿ ti pi(jé) fagrĩnh mÿ inh jagãgtãn'. Rãnhraj mág han inh mÿr, ag rãnhraj kãfór kar. Hã ra sóg inh pir mÿ han tũ nĩgtĩ. Topê hã ne isar han tĩ', inh rãnhraj to'.

¹¹ Hã ra êg kar tóg Jesus tó tĩ. "Jesus vÿ rĩr jê," he ag tóg tĩ, apóstolo ù ag, kÿ sóg tag tó tĩ gé, ag mré. Kÿ ãjag tóg sÿ ti kãmén kÿ inh vĩ kri fig ti.

¹² Êg kar vÿ Cristo tÿ ter kar ti rĩr mãn ja ên tó tĩ.

Jesus mré êg rĩnrĩr mãn ke mũ gé

Cristo rĩr mãn mũ ra ãjag kãmĩ ù tóg ón kÿ: "êg ter kar kÿ êg rĩr mãn ke tũ nĩ ha," he tĩ'. Hã tũ vë.

¹³ Êg tÿ êg ter kar kÿ rĩr mãn ke tũ nĩ hã ra Cristo vÿ rĩr mãn ja tũ nĩnh mũ gé vë vë.

¹⁴ Cristo rĩr mãn ja tũ nĩ hã ra êg tóg fagrĩnh mÿ ãjag mÿ ti kãmén ja nĩnh mũ gé vë vë. Kÿ ãjag tóg fagrĩnh mÿ kri fi ja nĩnh mũ gé vë vë.

¹⁵ Kÿ êg tóg Topê to ón ja nĩnh mũ gé vë vë, êg tÿ ti to: "Cristo rĩn mãn ja tóg nĩ," hen kÿ. Kÿ êg kar vÿ ti to ón ja nĩnh mũ vë. Hã ra tóg Jesus rĩn mãn ja nĩ, Topê ti.

¹⁶ Hÿ, ùn kãgter mũ ag rĩnrĩr mãn ke tũ nĩ ra Cristo vÿ rĩr mãn ja tũ nĩnh mũ gé vë vë, ha mē.

¹⁷ Kÿ Cristo rĩr mãn tũ nĩ ra êg tóg fagrĩnh mÿ ti ki ge ja nĩnh mũ gé vë vë. Kÿ êg tóg Topê vĩ mranh ja ên hã ki nÿtĩnh mũ vë ver, tÿ tũ' he ja tũ ti nĩnh mũ vë, ti rĩr mãn tũ nĩ hã ra.

¹⁸ Kÿ ù vé gé, ha mē: ti rĩr mãn tũ nĩ ra ù tÿ Cristo ki ge kar kÿ kãgter mũ ên ag vÿ nũgme ki vár kãn kÿ nÿtĩnh mũ gé vë vë, ha mē.

¹⁹ Hã kÿ tóg vënhmÿ tũ, ãjag tÿ: "rĩr mãn ke tũ êg nĩ," hen kÿ. Cristo pi(jé) êg tÿ ga kri mũ tag távi ki rĩr nĩgtĩ'. Kanhkã tá êg tóg junjun ke mũ. Ke tũ nĩ mũ ra êg tóg ùn jagãgtar ag kãfór kar nÿtĩnh mũ vë, êg tÿ fagrĩnh mÿ Jesus ki rá ja nÿtĩ ra. Hã tũ vë mÿr.

²⁰ Cristo vÿ rĩr mãn, ter kar kÿ. Hã vë. Ûn kãgter kÿ nÿtĩ ag kar kãmĩ ti rĩr mãn vën, Cristo ti, hã kÿ êg tóg rĩnrĩr mãn ke mũ gé, êg tÿ ti ki ge kÿ.

²¹ Ûn pir tugrĩn êg kar vÿ kãgter ke mũ, hã kÿ êg tóg ùn pir tugnĩn rĩnrĩr mãn kãn ke mũ gé, êg ter kar kÿ.

²² Adão tÿ Topê vĩ mranh tugrĩn êg tóg kãgter kãn ke mũ, êg tÿ tÿ ti krê nÿtĩn kÿ. Ri ke ti nĩ, Cristo tugnĩn êg tóg rĩnrĩr mãn kãn ke mũ gé, êg tÿ ti ki ge kÿ nÿtĩn kÿ.

²³ Topě tỳ nén to jykrén mün hã vë, Cristo tỳ ãg jo rĩr mãn tag ti. Hã kÿ tóg rĩr mãn vén. Kar kÿ ù tỳ Cristo ki ge kÿ nÿtĩ ag vÿ rĩnrĩr mãn ke mũ gé sir, ti kãtĩg mãn kÿ.

²⁴⁻²⁵ Kÿ vãhã kurã tỳ ãgno vë sir. Kurã ãn kã Jesus vÿ Topě mÿ: “ã hã ne ãg kri ke jẽ ha,” henh ke mũ, ti panh mÿ. Ûri tóg tỳ pã'i mág nĩ ver, Cristo ti, kÿ tóg pã'i ù ag vĩ tỳ tũ' he kãn mũ, ùn jykre tar kar, ù tỳ ãg kãfór nÿtĩ kar. Tỳ tũ' he kãn jé tóg ke mũ, hã jé tóg ver tỳ pã'i mág nĩ, Cristo ti, ti tỳ ã kato tẽgtẽ mũ ag jykre sãn kãn jé, ti tỳ ag vĩ tỳ tũ' he kãn jé.

²⁶ Ëg tỳ Topě vĩ mranh tugrĩn ãg kãgter kãn mũ. Hã ra tóg tỳ tũ' henh ke mũ gé, ãg ter mũ tỳ, kÿ ãg ter mãn ke tũ nĩ ha, kurã tỳ ãgno ãn kã. Ti tỳ ãg ter mũ tỳ tũ' hen kÿ tóg há kar nĩ sir.

²⁷ Hÿ, vënh kar vÿ tỳ ti krêm ke nÿtĩ, ti tỳ ag jykre sãn kÿ, ti tỳ ùn mág ag vĩ tỳ tũ' hen kÿ. Vënh kar vÿ tỳ ti krêm ke nÿtĩ, Cristo krêm. Hã ra ùn pir vÿ tỳ ti krêm ke tũ nĩ, hã vÿ: ù tỳ vënh kar tỳ ti krêm ke han ja ãn, he mũ, hã vÿ: Topě, he mũ.

²⁸ Vënh kar tỳ ti krêm ke nÿtĩn kÿ, kurã ãn kã tóg ti krêm vënh fẽg ke mũ gé, ti kósın ti, ã panh krêm, ù tỳ vënh kar tỳ ti krêm vin ja ãn krêm. Kurã ãn kã Topě tóg tỳ vënh kar kri ke jẽnh mũ, ã pir mÿ. Kÿ ù tóg ti ri ke jẽnh ke tũ pẽ nĩ.

²⁹ Ëg rĩr mãn ke tũ nÿtĩ ra ãjag kã ù tóg fagrĩnh mÿ ùn ter mũ ag jagfÿ vënh kygpenh mũ vë. Ag rĩr mãn tũ ra tóg vënhmÿ tĩ vë, ãjag tỳ ag jagfÿ vënh kygpenh ke ti. Hã tũ vë hã ra. Rĩr mãn jé ãg tóg ke mũ.

³⁰ Hã kÿ sóg kurã kar ki ti jagÿ vég tĩ gé, hã ra sóg ag mÿ vënh nenh tũ nĩgtĩ, ù tỳ inh vóg kónãn sór mũ ag mÿ.

³¹ Kurã kar ki sóg ter kren' he tĩgtĩ. Ki hã sóg tó tĩ, ki kanhró ãjag nÿtĩ. ãjag hã ki sóg tỳ ùn mág nĩ, Jesus Cristo ki, ãg Senhor ki.

³² Cidade tỳ Ëfeso tá sóg mĩg mré rárã ri ke han mÿr, hã ra tóg inh mÿ nén ù há han ke tũ nĩ vë, ãg tỳ rĩr mãn' he tũ ra. Ûn kãgter mũ ag rĩnrĩr mãn ke tũ ra ãg tóg jatun mÿ ãg tỳ nén to ãn mũ han ke mũ vë, ãg tỳ: “mũ nÿ, jẽn jé, kron jé, ãg hÿn vaj kÿ ter ke mũ,” hen kÿ, Topě ki ge tũ ag ri kén ken kÿ.

³³ Hã tũ vë hã ra.

Kygnẽ tũg nĩ. Tag to jykrén nĩ, ha mẽ: ùn vĩ kórég ag vĩ jẽmẽ sór tũg nĩ. Vënh jykre há pãno han ti tĩ, ag vĩ kórég ti.

³⁴ Krĩ há han ra, tag hã ne há nĩ'. Topě vĩ mranh tũg nĩ. ãjag kãmĩ ù vÿ Topě ki kanhró tũ nÿtĩ ver'. Tag to vënh mÿ en nĩ.

Ëg rĩr mãn ke to vënh jykre

³⁵ Kÿ ù tóg to jykrén kÿ inh mÿ: “Topě hÿn hẽ ri kenh ke mũ, ti tỳ ùn ter mũ ag rĩnrĩr mãn jé?” he sór mũ. “Ëg fãr hÿn hẽ ri kenh ke mũ?” he sór ãjag hÿn mũ.

³⁶ Krĩ tũ ãjag nÿtĩ mÿr'. Nén ù fy jykre vÿ ãg ter ri ke nĩ, ha mẽ. Ëg tỳ krãn kÿ tóg kugnãnh tĩ, tĩ fãr tĩ, jãvo tóg ti kãtã mur mãn mũ sir.

³⁷ Kÿ ti fy pi(jé) ti fėj ri ke nĩ gé', ti tỳ han ke ti. Sĩ ti nĩ, trigo fy ti, nén ù kar fy ti ke gé.

³⁸ Topě hã ne ti pẽn han mũ', ti fėj ke gé, ti fey ke gé. Ti hã ne to jykrén tĩ'. Kÿ tóg nén kar fy mÿ ti fėj ù nĩm', ti fėj ù nĩm' he tĩ.

³⁹ Kÿ nén ù fãr vÿ ge nĩgtĩ gé. Ti pi(jé) pir nĩ gé'. Ëg fãr vÿ vyrmÿ nĩ, kar kÿ bicho fãr vÿ vyrmÿ nĩ gé, kar kÿ sēsĩ fãr vÿ vyrmÿ nĩ gé, jēsĩ fãr ti, kar kÿ pirã fãr vÿ vyrmÿ nĩ gé.

40 Kŷ kanhkā tăn ag vŷ vŷrmŷ făr nŷtĭ gé, ěprā ke ag vŷ vŷrmŷ făr nŷtĭ gé. Kŷ ěg ve vŷ ge nĭgtĭ gé. Kanhkā tá ke ag ve vŷ vŷrmŷ nĭ, ěprā ke ag ve vŷ vŷrmŷ nĭgtĭ gé.

41 Rā jĕngrĕ vŷ vŷrmŷ nĭ, kysā jĕngrĕ vŷ vŷrmŷ nĭ gé, krĭg jĕngrĕ vŷ vŷrmŷ nĭ gé. Kŷ krĭg ag vŷ jagnĕ ri ke tŭ nŷtĭ gé, ājag jĕngrĕ ki.

42 Ge ti nĭ, ěg ter kar kŷ ěg rĭr măn ke ti. Ter jĕ ěg tóg ke mŭ, kŷ tóg ěg tŷ nĕn ũ fy krăn ri ke nĭ sir, ěg făr tŷ ga ra rā mŭ ti. ěg rĭr măn kŷ ěg pi(jĕ) ter măn ke mŭ'.

Kejĕn tóg ěg mŷ'a tĭ, ěg ter ke to hā. Hā ra ěg tóg sĭnvĭ nŷtĭnh mŭ, ěg rĭr măn kŷ.

43 Krój ěg nŷtĭ. Hā ra ěg tóg tar nŷtĭnh mŭ, ěg rĭr măn kŷ.

44 Ūri ěg tóg tŷ ěprā ke nŷtĭ, kŷ ěg făr vŷ tŷ ěprā ke făr nĭ. ěg rĭr măn kŷ ěg tóg Topĕ kuprĭg jamā tá făr nŷtĭnh mŭ. ěprā ěg făr nŷtĭ, kŷ ěg tóg tŷ ěprā ke nŷtĭ. Kŷ ěg tóg ěg tŷ Topĕ kuprĭg jamā tá ěg făr ũ venh ke ki kanhró nŷtĭ sir. ěprā ke făr ve ven ěg tĭ. Kar kŷ ěg tóg Topĕ kuprĭg jamā tá făr ũ venh ke mŭ, ěprā ke făr ve kar kŷ.

45-46 Hā kŷ tag tóg rán kŷ nĭ, ha mĕ: “ŭn ve ti, Adāo ti vŷ rĭr nĭ ja nĭgtĭ. Jāvo ũ tŷ ěgno ti, Cristo ti vŷ ā kuprĭg tŷ nĕn kar rĭnrĭr han,” he ja tóg nĭgtĭ, Topĕ vĭ rá ki.

47 Ūn ve ěn, Adāo ěn vŷ ga tŷ há (r) nĭ, hā kŷ ti jykre tóg tŷ ěprā ke jykre nĭ. Cristo vŷ tŷ kanhkā tá ke nĭ.

48 Ūn ve vŷ tŷ ěprā ke nĭ, kŷ ti krĕ kar vŷ tŷ ěprā ke nŷtĭ gé, ti mrĕ. Jāvo Cristo vŷ tŷ kanhkā tá ke nĭ. Kŷ ti mrĕ ke kar vŷ tŷ kanhkā tá ke nŷtĭ gé, ti mrĕ.

49 ěprā ke ěn ve ri ke ěg nŷtĭ, ěg kar tŷ Adāo ve kŷ. Kŷ ěg tóg kanhkā tá ke ěn ve ri ke nŷtĭnh ke mŭ gé, ěg tŷ Cristo ve kŷ, ěg rĭnrĭr măn ken kŷ.

Jesus kătĭg măn ken kŷ tóg ěg kar han măn ke mŭ

50 Inh kanhkā', sŷ ājag mŷ tag tó há han sór vē, sŷ ki kanhrān há han kŷ, ha mĕ. ěg făr tŷ ěprā ke tag pi(jĕ) Topĕ tŷ tŷ ěg pā'i nĭ venh ke mŭ'. Nĕn ter ke mŭ ěn pi(jĕ) nĕn ũ ter vānh tá venh ke mŭ'. Topĕ vŷ ěg han măn ke mŭ, ěg tŷ ve jĕ.

51 Kŷ sóg ājag mŷ nĕn ũ tó sór mŭ gé, ājag tŷ mĕ ja tŷ ti, ha mĕ. ěg kāmĭ ũ ag tóg ti jun ke pĕtĕm mŭ, kăgter ke tŷ ag tóg nĭ. Kŷ Topĕ tóg ěg kar han măn kăn ke mŭ, kurā ěn kă, ěg tŷ ti ki ge kŷ nŷtĭnh kŷ.

52 Kŷ tóg ěg tŷ pan ke kar mrin ke ěn ri ke nĭnh mŭ, ti tŷ ěg han măn ke ti, trombeta kyr rĕn kă. Trombeta kyr ěn vŷ mĕ há tĭnh mŭ, kŷ ũn kăgter mŭ ag vŷ rĭnrĭr măn kăn ke mŭ, ag tŷ kăgter măn ke tŷ nĭ jĕ sir. ěn kă tóg ěg han măn ke mŭ gé sir, ěg tŷ ti jun ke pĕtĕm mŭ ra kăgter ja tŷ ra.

53 Ha vé, ti tŷ ěg făr kókrānh mŭ tag tŷ ũ han tŷ ra ěg tóg venh ke tŷ nĭnh mŭ vē, kanhkā ti. Hā kŷ tóg ěg făr ter ke mŭ tag tŷ ũ han ke mŭ, ti han măn kŷ, ti ter măn tŷ nĭ jĕ, kókrānh măn tŷ nĭ jĕ. Kejĕn tóg kĕnh ke mŭ.

54 ěg făr kókrānh mŭ tag tŷ tóg ũ han ke mŭ, ti kókrānh vānh nĭ jĕ sir. ěg făr ter ke mŭ tag tŷ ũ han jĕ tóg ke mŭ, ti ter vānh nĭ jĕ. Kurā ěn kă ěg tóg vēnh rá tag venh ke mŭ gé, vāsŷ rán kŷ nĭ tag, hā vŷ: “tŷg ti huri, ěg ter ke mŭ ti, ěg ter pāte rĕg kŷ,” he mŭ. “Topĕ vŷ tŷ tŷg' hé, ěg ter ke mŭ ti.”

55 Kăgter kăn ja ěg tóg nĭgtĭ. Hā ra ěg tóg tag ve măn ke tŷ nĭ ha. Nĕn ũ tŷ ā prĕj tŷ ěg tugtān tŷ ěg tĕn ri ke ti nĭ, ěg ter ke mŭ ti, hā ra Topĕ tóg tŷ tŷg' hé,” he tóg, Topĕ vĭ rá ki.

⁵⁶ Topê vî mranh hã tigrîn êg tóg kãgter tí. Nén ù tỹ êg tugtãg tí préj ri ken hã vê, hã vỹ: êg tỹ Topê vî mranh, he mũ. Hã ra Jesus tóg tỹ tũg' he kãn, êg tỹ Topê vî mranh tỹ. Kỹ tóg nén ù préj ên tỹ préj tú nĩ ri ke nĩ sir. Ter mãn ke tú êg tóg nỹtĩ ha, kurã ên kã. Topê vỹ êg jyvên tí. Êg tỹ ti vî mranh hã tugnĩn êg tóg kãgter kãn ja nĩgtĩ.

⁵⁷ Hã ra Jesus tóg tỹ tũg' hé huri.

Topê hã mỹ sóg vĩ há han mũ, ti hã vỹ êg tar han tí, êg tỹ ti vî mranh mãn tũg jé. Êg Senhor tỹ Jesus Cristo tigrîn tóg êg tar han tí, Topê ti.

⁵⁸ Tag to jykrén ký tar nỹtĩmĩ, Topê to, ãjag tỹ ti ki rã tovãnh tú nĩ jé. ãjag to sóg há tãvĩ nĩ, inh kankhã'. Êg Senhor rãnrãj han kãn sórmnĩ. Tag to jykrén nĩ, ha mẽ: êg pi(jé) véké rãnrãj tũgtĩ', êg tỹ êg Senhor rãnrãj han ký'. Ti kaja ve jé êg tóg ke mũ mỹr, kankhã tá.

16

Êg tỹ êg mré Jesus ki ge ký nỹtĩ ag jagãgtãn ke

¹ Ký sóg ãjag mỹ ãjag tỹ ù tỹ Topê ki ge ký nỹtĩ ra jagãgtar nỹtĩ ag mỹ jãnkamy jẽnẽnh ke ên tó sór mũ gé sir, ãjag tỹ inh ki nén jẽmẽ sór mũ ti. Ga tỹ Galácia tá igreja krẽm vẽn hãn tí ag mỹ sóg tag tó ja nĩ, sỹ ãjag mỹ tónh ke tag ti, ha mẽ.

² Domingo kar ki nén ù sĩ tỹ vyrmỹ nĩmĩ, ãjag ìn tá. Û tỹ nén ù mág ên tóg nén ù mág sĩ tỹ vyrmỹ nĩm ke mũ gé, ký ù tỹ nén ù sĩ ên tóg nén ù sĩ tỹ vyrmỹ nĩm ke mũ gé. ãjag tỹ semana kar ki nĩm han ký tóg komêr hã mág mũ sir. Ký tóg kar ký nĩ, sỹ ãjag ki jun mũ ra. ãjag tỹ inh kãtĩg ken jo vyr mỹ nĩm han ja tú nĩn ký tóg há tú nỹ.

³ Ký ùn kuprêg nĩ gé, ag tỹ ãjag tỹ nén ù ma mũ jé, Jerusalém ra, ãjag tỹ tá ke fag mỹ nén ven sór mũ ti. Inh jun ký sóg ag jẽgnẽnh ke mũ, carta mré hã.

⁴ ãjag tỹ nén ù ên ehé nĩn ký sóg hẽn ri ke mũn ma tũg sór mũ gé, ký sóg ag mré tũg mũ gé.

Paulo tỹ nén han sór mũ

⁵ Ký tóg, isỹ ga tỹ Macedônia mĩ kutẽn h ken ký sóg vãhã ãjag tá jun sór mũ sir. Isỹ Macedônia mĩ kutẽ sór vê.

⁶ Hã ra sóg ãjag mré nĩg mág sĩ han sór mũ, ti tỹ inh mỹ ki króm ken ký. Hẽn ri ke mũn sóg prỹg kusa fĩn rãm ke mũ, ãjag mré nĩ ki, ký ãjag tóg sir inh jagãgtãn kenh ke mũ, isỹ kar hẽn ra tũg ken ký.

⁷ Inh pi(jé) ãjag ve sĩ han sór mũ', hã ra sóg ver kutar nĩ, hã ký sóg kar hã ãjag venh tũg sór mũ. Sỹ ãjag mré nĩ sór vê mỹr, êg Senhor tỹ to há nĩn ký.

⁸ Ver sóg cidade tỹ Éfeso tag kã nĩ ki festa tỹ Pentecoste pétẽm sór mũ.

⁹ Tag ki ke ag tóg mẽ há han mũ, inh vĩ ti, ù tỹ hẽn ri ke ag. Hã ra tag ki ver ù tỹ inh kato vãsãnsãn mũ ag vỹ e nỹtĩ. Hã ký sóg Éfeso tag kã nĩg mág sĩ han sór mũ, sỹ kar ãjag venh tũg jé.

¹⁰ Hẽn ri ke mũn Timóteo tóg ãjag ki jun ke mũ. Ký ti vĩ jẽmẽ há han nĩ, ti mỹ'ãg tú nĩ jé, ti tỹ ãjag mré nĩn ký. Êg Senhor rãnrãj han tóg tí mỹr, inh kóm.

¹¹ Ký ti to é he tũg nĩ, ti kyrũ hã ra. Ký ti tũg ken ký ti jagãgtãn nĩ gé, ti tỹ jatun mỹ inh ki jun jé. Sỹ ti jãvãnh vê, êg régre ag mré hã.

¹² Êg régre tỹ Apolo mré sóg vẽnẽn gé. Ti mỹ sóg to vĩ mũ vê, ti tỹ ãjag venh tũg jé, êg régre tag ag mré hã, ù tỹ ãjag venh kãmũ tag ag mré. Hã ra tóg tũg jãvãnh nĩ ver. Ti tỹ ti mỹ ki króm ken ký ti nẽji kejẽn ãjag venh tũg ke mũ hã ra.

Jesus ki ge kŷ nŷtŷ ag tŷ jagnĕ mĭ ěkrĕn

¹³ Ājag kanĕ fĕn nĭ. Ěg Senhor ki rĕ tovĕnh tŷg nĭ. Krŏnh ke tŷg nĭ, tar nŷtĭmnĭ.

¹⁴ Kŷ Ājag tŷ nĕn ũ kar han kŷ vĕnh kar to hĕ nŷtĭmnĭ.

¹⁵ Kŷ sŏg ājag mŷ nĕn ũ to vĭ sŏr mŷ gĕ, Estĕfanas to mŷr. Estĕfanas fag vŷ Jesus ki ge vĕn ja nĭgtĭ, ājag jamĕ tĕ, ga tŷ Grĕcia tag tĕ. Kŷ fag tŏg Topĕ tŷ fag ki rĭr nŷtĭgtĭ, Topĕ tŷ fag kar ki.

¹⁶ Hĕ kŷ sŏg fag tŏ mŷ ājag mŷ. Kŷ fag vĭ jĕmĕmnĭ. Kŷ Topĕ rĕnhrĕj han mŷ ag kar vĭ jĕmĕ kĕn nĭ, ke gĕ, ěg mrĕ rĕnhrĕj mŷ ag kar vĭ tĭ.

¹⁷ Estĕfanas tŏg inh ki jun hĕ han, Fortunato ke gĕ, Acaico ke gĕ. Ag tŷ inh ki junjun kŷ inh fe tŏg mrin ke mŷ mŷr. Sŷ ājag venh hĕ tĭn kŷ tŏg inh mŷ sĕr pĕ tĭ, sŷ ag ve kŷ, ājag jĕgja kĕ ke vĕ mŷr, ag tŷ tŷ ājag mrĕ ke nŷtĭn kŷ.

¹⁸ Inh mŷ ag tŏg vĭ hĕ han mŷ ājag to, kŷ ag tŏg inh krĭ kusĕg mŷ sir. Ag tŷ ājag krĭ kusĕg ke vĕ gĕ. Ũ tŷ ge to hĕ tĕvĭ nŷtĭmnĭ.

¹⁹ Ga tŷ Āsia tĕ igreja krĕm vĕnhmĕn tĭ ag vŷ ājag mĭ ěkrĕg tĭ. Kŷ Āquila mrĕ Priscila fag vŷ ājag mĭ ěkrĕn mĕg tĭ gĕ, fag tŷ ājag mrĕ ěg Senhor ki ge kŷ nŷtĭn kŷ. Fag ĩn krĕm fag tŏg culto han tĭ. Fag ĩn tĕ culto to kĕmŷ fag vŷ ājag mĭ ěkrĕg tĭ gĕ,

²⁰ kar kŷ ěg Senhor ki ge kŷ nŷtĭ fag kar ke gĕ. Jagnĕ to hĕ tĕvĭ nŷtĭmnĭ, kŷ jagnĕ ki nhun ke ri ke han nĭ, Jesus mrĕ ke kar ki, ājag tŷ jagnĕ nĭgĕ kĕgmĭ kŷ.

²¹ Sŷ vĕhĕ vĕsŏg ki ājag mŷ rĕn vĕ, ũ tŷ inh vĭ rĕn ja pĕte, inh, hĕ vŷ: Paulo, he mŷ.

²² Topĕ mŷ sŏg to vĭ tĭ, tĭ tŷ ũ tŷ ěg Senhor to hĕ tĕvĭ tŷ ěn ag vŏg kŏnĕn kĕn jĕ. “Marana tĕ,” he sŏg tĭ, hĕ vŷ: ha kĕtĭg, Senhor, he mŷ, ājag vĭ ki.

²³ Ěg Senhor tŷ Jesus mŷ sŏg to vĭ tĭ, tĭ tŷ ājag tar han jĕ.

²⁴ Ājag jĕ isŷ ājag to hĕ tĕvĭ nĭ ki kanhrĕn, ěg tŷ Jesus Cristo ki ge kŷ nŷtĭn kŷ. Hĕ vĕ.

PAULO TÛ CARTA HAN: CORINTO TÃ KE AG MÛ CARTA Û

¹ Paulo tÛ rá vë, ãg régre tÛ Timóteo mré. Jesus Cristo há ne inh fêg', isÿ tÛ ti apóstolo jê jé, Topê tÛ inh kuprêg ký. Isÿ Topê tÛ ag mÛ rán vë, ù tÛ cidade tÛ Corinto tá vënh mǎn tí ag mÛ, ù tÛ Grécia tá vënhmǎn tí ag mÛ ke gé.

² Ëg jóg tÛ Topê jé ãjag tar han, ti jé ãjag krĩ kuprãg, ãg Senhor tÛ Jesus Cristo ti ke gé.

Topê tÛ Paulo krĩ tÛ kǎnhvy' he

³ Topê mÛ sóg ví há han tí, ãg Senhor tÛ Jesus Cristo panh ti mÛ, ãg jóg mÛ, ù tÛ ãg jagãgtǎn tí ên mÛ. Ëg vësÿrénh ký tóg ãg krĩ tÛ kǎnhvy' he tí, Topê ti. Ti há mÛ sóg agradecer he tí mÛ.

⁴ Ti há ne inh vësÿrénh mÛ ra inh krĩ tÛ kǎnhvy' he tí', inh jagtar tǎn ký. Ti tÛ inh krĩ tÛ kǎnhvy' he tigrĩn sóg inh kǎnhkǎ ag krĩ tÛ kǎnhvy' he ki kǎnhró nĩ ha, inh kǎnhkǎ ù tÛ nén ù jagy vëg mÛ ra.

⁵ Cristo jagtar ja ên ri ke pë ve mág sóg mÛr, há ký Cristo tóg inh krĩ kufy tÛ hën ri ke tÛ tú' he tí gé sir.

⁶ Há ra sóg ãjag jagfy jagtar nĩ, ãjag tÛ ti há to tar nÿtǎn jé gé, ãjag krenkren jé. Topê tÛ isar han ký tóg inh kóm ãjag tar han ke mÛ gé sir. ãjag tÛ inh kóm jagtar nÿtǎn ký ãjag tóg inh kóm ti to krónh kenh ke tú nĩ gé sir.

⁷ ãjag ki êkrén mág sóg tí, há ra sóg ki kǎnhró nĩ, Topê tÛ ãjag tar han ên ki. Ûri ãjag tóg há ra inh mré jagtar nÿtǎn, há ký Topê tóg ãjag krĩ tÛ kǎnhvy' he tí gé, ti tÛ inh krĩ tÛ kǎnhvy' he tí ên ri ke han tóg tí, ãjag mÛ.

⁸ Inh kǎnhkǎ', ãjag mÛ sóg inh jagtar mág ja tó sór mÛ. Ga tÛ Ásia tá sóg nén ù jagy tǎvĩ ve ja nĩ, tá ag tóg isÿ hën ri ke kren, ký sóg: “Ûri inh hÿn kren mǎn ke tú nĩ ha,” he ja nĩ.

⁹ “Ag tÛ isÿ tÛg' henh ke hÿn,” he sóg mÛ vë. Ên kǎ sóg Topê há mĩ êkrég mÛ sir, isÿ vënhmÛ kren mǎn ke tú nĩn ký. “Ti há ne inh kren han ki kǎnhró nĩ!” he ja inh nĩ. “Ûn kǎgter mÛ ag rĩnrĩn mǎn ki kǎnhró tóg nĩ, ký tóg inh kren han ki kǎnhró nĩ gé,” he ja inh nĩ.

¹⁰ Ký tóg inh kren han ja nĩ, iser kren mÛ ên kǎ, ký tóg kejën inh kren han mǎn ke mÛ gé. Ti há mÛ sóg to ví tí, ti há tÛ inh kren han jé.

¹¹ Ký iso vǎsǎn nĩ gé, iso Topê mré ví ký, ký Topê tóg ãjag ví mën h mÛ. Ti tÛ ãjag ví mē tigrĩn inh jagãgtǎn ký ãjag tóg ti mÛ agradecer henh ke mÛ. Ký ù tÛ hën ri ke ag vÿ Topê mÛ ví há han ke mÛ, ti tÛ inh jagãgtǎn ke tigrĩn.

Paulo tÛ Corinto tá ke ag venh kǎtǎg ja tú

¹² Ha vé, inh jykre tóg tÛ ùn há nÿ, ki kǎnhró inh nĩ. Vënh kar mÛ sóg nén ù há há han tí, vënh jykre kuryj, ký sóg ki há tó tí gé, Topê jykre han ký. Inh pi(jé) isÿ vësóg ki nén to jykrén mÛ ên há han tí'. Topê há ne isar han tí', isÿ ti jykre ki króm jé. Ký sóg ãjag mÛ ti jykre há kǎmén ja nĩgtǎ gé.

¹³ Tag há rán isóg tí gé, ký ãjag tóg isÿ rá ve ký (ãjag tóg) ki kǎnhrán ke mÛ gé sir. Ti pi(jé) mē jagy tí'. ãjag tÛ ki kǎnhrán kǎn ký tóg há tǎn mÛ.

¹⁴ ãjag tÛ ki kǎnhrán sí tag kǎfór han ký tóg há tǎn mÛ. Ký kurǎ ên kǎ, ãg Senhor tÛ Jesus kurǎ ên kǎ tóg ãjag mÛ sér tǎn ke mÛ, ãjag tÛ inh ven ký. Ký tóg inh mÛ sér tǎn ke mÛ gé, isÿ ãjag ven ký.

¹⁵ Tag to jykrén kŷ sóg ājag ki jun kren ja nŷgtī. Isŷ ājag ki jun ke vē vē, isŷ ājag tar han jé. Isŷ vāsŷ ājag tar han ja ēn ri ke han mǎn ke vē vē.

¹⁶ Kŷ sóg ājag ve kar kŷ (sóg) ga tŷ Macedônia ra tŷg ke mŷ vē. Kar kŷ, isŷ Macedônia tá kǎtŷg mǎn kŷ sóg ājag ve mǎn ke mŷ vē gé, ājag tŷ inh jagǎgtǎn kŷ inh mŷ jānkamy nŷmŷnī' he jé vē vē, isŷ ga tŷ Judéia ra tŷg há han ke to.

¹⁷ Hǎ ra tóg inh mŷ ki krov ja tŷ nŷ, hǎ kŷ sóg kǎtŷg ja tŷ nŷ. Kŷ inh mŷ kanhir kŷ ājag mŷ: “kǎtŷg jé sóg ke mŷ,” he ja nŷ? Vó. Inh jykre pijé', isŷ kanhir kŷ tó tŷ ēn tŷ. Kŷ sóg jykré régre han tŷ nŷgtī gé. Ūn jykre régre ag tŷ: “hej,” he mŷ ra ag tóg han sór tŷ nŷ. Ge tŷ inh nŷgtī.

¹⁸ Topē hǎ ne ón vǎnh nŷ', hǎ ra tóg ki kanhró nŷ, inh jykre pir nŷ tŷ.

¹⁹ Topē kósin jykre hǎ han sóg tŷ, Jesus Cristo jykre tŷ. Inh hǎ ne ājag mŷ ti kǎmén ja nŷ', Silas mré, Timóteo mré ke gé. Ti pi(jé) ā tŷ: “hej,” he mŷ ra han ke tŷ nŷ'. Han ti tŷ, nén ū kar ti, Topē kósin tŷ.

²⁰ Topē hǎ vŷ ēg mŷ ēg tŷ nén vēnh ke ti tó ja nŷgtī, kŷ ēg tóg ti kósin hǎ tŷgrŷn vég mŷ sir, ti panh tŷ ēg mŷ nén tó mŷ ēn tŷ. Hǎ tó sóg tŷ, vēnh kar mŷ, Topē ón vǎnh ēn hǎ tó sóg tŷ. Kŷ ēg tóg ti hǎ mŷ vŷ há han tŷ sir, Topē hǎ mŷ, ēg tŷ ti tŷ ēg mŷ nén tó mŷ ēn to: “hǎ vē,” hen kŷ.

²¹ Topē hǎ ne Cristo ki isar han, ājag mré hǎ. Kŷ tóg ēg kuprēg gé.

²² Kŷ tóg ēg nŷgēg kŷ ēg vin tŷ gé. Á kuprŷg jēnēg tóg mŷ ēg mŷ. Ti tŷ ēg mŷ ā kuprŷg jēnē tŷgrŷn ēg tóg ki kanhró nŷtŷ, ti tŷ ēg mŷ nén ū kar vin ke mŷ ēn tŷ.

²³ Hǎ vé, ki hǎ sóg tó mŷ, Topē ne ki kanhró nŷ'. Inh ón tŷ nŷ ra tóg inh vóg kónǎn mŷ vē. Isŷ ājag to jŷ tŷ nŷ jé, hǎ jé sóg ājag tá jun ja tŷ nŷ ver, cidade tŷ Corinto tá. Sŷ tá jun ra sóg ājag to jŷnh ke mŷ vē.

²⁴ Inh pi(jé) ājag to tar han sór mŷ'. Jesus hǎ ki ge kŷ ājag nŷtŷ, ti hǎ to tar ājag nŷtŷ. Ājag fe tŷ mrin ke han sór sóg mŷ vē, hǎ jé sóg ājag to vāsǎn tŷ vē.

2

¹ Hǎ kŷ sóg tag to jykrén ja nŷ, ha mē: “ag kanē jun mǎn sór tŷ inh nŷ,” he sóg, “hǎ kŷ sóg ag venh tŷg ke tŷ nŷ ver,” he sóg ājag to.

² Ha mē, isŷ ājag kanē jun kŷ ū nŷ hŷn inh fe tŷ mrin kenh mŷ'? Isŷ ājag kanē jun kŷ ū tŷ inh fe tŷ mrin kenh ke tóg tŷ tŷ.

³ Hǎ kŷ sóg ājag mŷ vēnh rá ēn jēnē gé, ājag tŷ inh kanē jun tŷ nŷn jé gé, sŷ ājag ki jun kŷ. Inh jun kŷ tóg inh mŷ há tŷnh mŷ, ājag tŷ inh fe tŷ mrin ken kŷ. Tag to sóg jykrén tŷ gé, ha mē. “Ag tŷ inh fe tŷ mrin ke kŷ tóg hŷn ag mŷ sér tŷ gé,” he sóg tŷ, ājag to.

⁴ Sŷ ājag mŷ carta ēn rán mŷn kŷ sóg to fŷ mág mŷr, ājag tŷgrŷn sóg kanē jur, ājag tŷgrŷn sóg vēnh mŷ en. Inh pi(jé) ājag kanē jun sór ja nŷ'. Isŷ ājag to há pē nŷn kŷ sóg ājag mŷ vēnh rá ēn han ja nŷgtī, ājag tŷ isŷ ājag to há nŷ tag ki kanhró nŷtŷn jé.

Ēg tŷ jagnē mŷ vēnh pǎte fón ke

⁵ Ha mē, ājag kǎmŷ ū tóg ājag kanē jur han ja nŷ. Ti pi(jé) isavŷn kanē jun ja nŷ'. Ājag kar kanē jun ja tóg nŷ. Hēn ri ke mŷn sóg tó há han ja tŷ nŷ, isŷ: “ājag kar,” he kŷ. Ājag kǎmŷ ūn e kanē junjur han tóg hǎ ra, ti tŷ Topē vŷ mranh tŷgrŷn.

⁶ Kŷ ājag tóg hur ti mŷ vŷ kónǎn. Ha ti tovǎnh, gen kŷ.

⁷ Vǎhǎ ti mŷ vēnh pǎte fón nŷ, ti mŷ vēnh vŷ há hǎ tómnŷ. Ke tŷ nŷ (mŷ) ra ti fe kaj tóg ti tén ke mŷ, ha vemnŷ.

⁸ Hã kÿ sóg ãjag mÿ tag to vÿ sór mÿ vãhã, ha mē: ti mÿ ven nÿ, ãjag tÿ ti to há nÿtÿ ti.

⁹ Isÿ ãjag tÿ inh vÿ kri fig mÿ ěn ve sór ja vē, hã jé sóg ãjag mÿ vēnh rá ěn jēnē ja nÿ, mÿr, ha mē.

¹⁰ Ājag tÿ ũ mÿ vēnh pãte fón kÿ sóg ti mÿ vēnh pãte fón tÿ gé. Kejēn sóg vēnh pãte fón tÿ, ũ mÿ. Kÿ sóg Cristo rÿnve ti mÿ vēnh pãte fón tÿ, ãjag jagãgtãn kÿ.

¹¹ Satanás tÿ ěg tÿ hē ri ke tũ nÿn jé sóg vēnh pãte fón tÿ. Ti tÿ nēn to jykřen mÿ ěn ki kanhró ěg tóg nÿ mÿr, Satanás tÿ nēn to jykřen mÿ ti.

Paulo krÿ kufy

¹² Ha vé, isÿ cidade tÿ Trôade tá jun ja nÿn kÿ sóg tá ke ag mÿ Cristo kãme sér ěn to ja nÿgtÿ. Kÿ ag tóg jēmē há han ja nÿgtÿ, ěg Senhor tÿ ag krÿn kÿ.

¹³ Hã ra sóg ěg mré ke tÿ Tito ve ja tũ nÿ tá. Isÿ tá ti venh ke vē vē, hã ra tóg ki tũ nÿ, isÿ tá jun mÿ ra. Hã kÿ sóg ti to krÿ kufy nÿ ja nÿgtÿ. Hã kÿ sóg ag mÿ: “isÿg ke vē,” he kÿ tÿg ja nÿ sir, ga tÿ Macedônia ra, ti nón.

Jesus vÿ tÿ nēn ger há ri ke nÿ

¹⁴ Hã ra sóg Topē hã mÿ vÿ há han tÿ. Ti hã ne inh jēnēg tÿ', isÿ ěmã kar mÿ tÿg jé, Cristo tũgrÿn. Kÿ vēnh kar tóg ti tÿ tÿ ũn mág pē nÿ há vég tÿ, ag tÿ inh jykře jagma ěvãnh kÿ. Hã kÿ vēnh kar tóg ti ki kanhrãn mÿ sir, isÿ ag mÿ ti tón kÿ. Kÿ tóg ag mÿ nēn ger há kri nÿ nÿ, ag tÿ ti vÿ mēn kÿ.

¹⁵ Nēn ger há tóg vēnh kar kri rÿm ke tÿ. Ri ke ti nÿ, isÿ vēnh kar mÿ Cristo kãmén kÿ, ag tÿ Topē ki kanhrãn jé. Vēnh kar mÿ sóg ti vÿ tó tÿ, ũn krenkren mÿ ag mÿ, ũn vãgfor kÿ nÿtÿ ag mÿ ke gé.

¹⁶ Ũn vãgfor kÿ nÿtÿ ag tÿ inh vÿ mēg mÿ ra kri fig tũ nÿn kÿ ag tóg nũgme ki vár ke mÿ. Kÿ inh vÿ tóg ag mÿ nēn ũ ter ger gy ěn ri ke nÿ. Ag jãvo ũn krenkren mÿ ag tÿ inh vÿ jēmē kÿ ag tóg rÿnrÿr ke mÿ, ag tÿ inh vÿ kri nÿm kÿ. Kÿ inh vÿ tóg ag mÿ ěg tÿ nēn ger há mē kÿ ěg fe tÿ mřin ke ěn kri nÿ nÿ. Hã ra ěg pi(jé) vēsóg ki vēnh rãnrãj tag han há nÿtÿgtÿ'.

¹⁷ Ha vé, ũ ag vÿ Topē vÿ kãmén to ti kaja ve sór tÿ, jãnkamy ve sór to ag tóg Topē vÿ kãmén tÿ. Ke tũ nÿ kÿ ag tóg ti vÿ tó ěn tũgrÿn vēsÿ ũn mág han tÿ. Ag jãvo inh pi(jé) ti kaja ve sór tÿ', inh pi(jé) vēsÿ ũn mág han sór mÿ'. Cristo ki rã kÿ sóg Topē rÿnve ti kãmén tÿ. Jykře pir han sóg tÿ gé mÿr. Kÿ ũ tÿ inh jēnēg mÿ vÿ tÿ Topē ti nÿ.

3

Vēnh jykře tãg

¹ Kÿ ãjag hÿn iso: “tÿ sóg ũn há nÿ, he tóg tÿ, Paulo ti,” he sór tÿ. Hã tũ vē. Ũ ag tóg ãjag mÿ carta to vÿ tÿ, kÿ ag tóg: “ũn há vÿ tÿ ti nÿ, hemnÿ iso, carta ki,” he tÿ, “kÿ vēnh kar tóg vēnh rá tag ve kÿ isÿ tÿ ũn há nÿ ki kanhró nÿtÿnh mÿ,” he ag tóg tÿ. Inh pi(jé) carta tÿ ge ma tÿg sór mÿ'.

² Inh mÿ ãjag tóg carta ri ke nÿtÿ. Ājag mÿ sóg ěkrég tÿ, kÿ sóg vēnh kar mÿ ãjag kãmén tÿ. Inh hã ki ag tóg ãjag jykře há vég tÿ, kÿ ag tóg isÿ tÿ ũn há nÿ ěn ki kanhrãn mÿ sir. Hã ki ãjag tóg carta ri ke nÿtÿ.

³ Ājag mÿ sóg Cristo jykře kãmén ja nÿ, kÿ ãjag tóg mÿ mũgtÿ. Kÿ vēnh kar tóg ãjag jykře ve kÿ (ag tóg) Cristo ki kanhró nÿtÿ, kÿ ãjag tóg tÿ Cristo tÿ vēnh rá ri ke nÿtÿ, sÿ carta han ja ri ke. Hã ra ti pi(jé) caneta tÿ rãn kÿ nÿ'. Topē kupřig tÿ tóg rãn kÿ nÿ, ũn rÿr nÿ ěn kupřig tÿ tóg rãn kÿ nÿ, carta ěn tÿ. Kÿ tóg pó tÿ rãn

jafã kri rán kÿ nÿ tũ nÿ gé. Ęg ki tóg rán kÿ nÿ, kÿ tóg tÿ Ęg jykre nÿ sir, carta ri ke ěn ti.

⁴ Topě hã vÿ Cristo tÿ isar han tÿ, hã kÿ sóg ajag ki carta tÿ ge han ki kanhró nÿ.

⁵ Inh pi(jé) vėsóg ki nén ũ há to jykrén ki kanhró nÿ'. Inh pi(jé) vėsóg ki nén ũ há han ki kanhró nÿ gé'. Hÿ, Topě hã ne isar han tÿ', isÿ nén ũ há han ke to.

⁶ Ti hã ne inh krÿn tÿ', isÿ ti jykre tãg kãmén jé, vėnh kar mÿ. Ti pi(jé) Ęg mÿ vãsÿ nén rán kÿ nÿ ěn tó mãn mũ'. Vãhã tóg Ęg mÿ ã kuprÿg jėnėg mũ. Vėnh jykre tãg to ken hã vė, hã vÿ: "Topě kuprÿg tÿ Ęg krÿn mũ," he mũ. Ha vé, Topě kuprÿg vÿ Ęg rÿn tÿ, jãvo vãsÿ Topě vÿ rán kÿ nÿ ěn vÿ Ęg tén ke ja nÿgtÿ, Ęg tÿ mranh kÿ.

⁷ Topě vÿ tÿ vãsÿ rán kÿ nÿ ja ěn vÿ pó kri rán kÿ nÿ ja nÿ, ũ tÿ Ęg tén mũ ěn ti. Moisés tóg pó kri ti rán ja nÿ, Topě tÿ ti mÿ tón kÿ. Ti tÿ ti mÿ tó kar kÿ ti kakã tóg jėngrė nÿ ja nÿgtÿ, Moisés ti. Kÿ tóg Israel ag mÿ e ja tÿ, Moisés kakã ki ěvãnh tũ ja ag tóg nÿgtÿ sir, ti tÿ kakã jėngrė nÿn kÿ. Hã ra tóg kejėn tũ' he ja nÿgtÿ gé, ti kakã jėngrė ti.

⁸ Kÿ ũ tÿ Topě kuprÿg kãmén mũ ěn hÿn tóg Moisés kakã jėngrė kãfór nÿ, ti sÿnvÿ kãfór ti nÿ.

⁹ Moisés vÿ Topě tÿ Ęg vóg kónãn ke ěn tó ja nÿgtÿ. Hã ra Topě vÿ tag tóg ti kakã jėngrė han, ti sÿnvÿ han ti. Jãvo sóg Topě tÿ Ęg mÿ vėnh pãte fón ke ěn hã tó tũ. Ti tÿ Ęg to "jykre há ag nÿtÿ ha," he mũ ěn tó sóg ti. Topě vÿ tag tugrÿn sóg Moisés sÿnvÿ kãfór pė nÿ.

¹⁰ Kÿ vãsÿ nén sÿnvÿ ěn tóg vãhã Ęg mÿ sÿnvÿ tũ nÿ ha, vãsÿ jėngrė ěn tóg Ęg mÿ jėngrė tũ nÿ ha, Ęg tÿ ũ tãg tag sÿnvÿ ve kÿ, Ęg tÿ ũ tãg jėngrė ven kÿ. Ũn tãg tag vÿ nén kar sÿnvÿ kãfór nÿ.

¹¹ Vãsÿ rán kÿ nÿ ja ěn tóg tũ' he ja nÿ. Kÿ ũ tÿ tũ' he mũ ěn tóg sÿnvÿ ja nÿgtÿ gé. Ti jãvo isÿ vėnh jykre tó mũ tag vÿ tũ' henh ke tũ pė nÿ, hã kÿ tóg ũn si sÿnvÿ ěn kãfór nÿ.

¹² Ęg tÿ tag venh ke jãvãnh sóg mũ mÿr. Hã kÿ sóg jamã hár(a) tó mũ, inh pi(jé) sÿ ag mÿ tó jé to mÿ'ãg mũ'.

¹³ Moisés ri ke han tũ sóg nÿ. Kur tÿ tóg vėnh kri fón ja nÿ. Kÿ tóg vėnh pugrÿn ja nÿ, ti tÿ ã kakã jėngrė ěn pėju jé. Hã ra tóg koměr hã tũ' he ja nÿ, ti jėngrė ěn ti. Hã kÿ tóg kur krēm vėnh pėju, Moisés ti, Israel ag tÿ ti jėngrė vėg tũ nÿ jé.

¹⁴ Hã ra ag tóg ũri ki kagtÿg nÿtÿ gé ver. Kyvó ri ke ag nÿtÿ, kutu, Israel ag. Ag tÿ vãsÿ rán kÿ nÿ ěn to ken kÿ tóg ag mÿ Moisés vėnh pugrÿn kÿ nÿ ěn ri ke nÿ, tÿ pãkrÿ ri ke. Ag tÿ ki kagtÿg to ken hã vė. Cristo hã tugrÿn Ęg tóg vãsÿ nén rán kÿ nÿ ěn to jykrén há han mũ ha, hã ra ag tóg ki kagtÿg nÿtÿ jãvo.

¹⁵ Hã kÿ ag tóg Moisés tÿ nén rán mũ to ke ěn mėg tÿ, hã ra ag tóg to jykrén tũ nÿgtÿ, kÿ tóg Moisés vėnh pugrÿn ěn ri ke nÿ ag mÿ, ti pãkrÿ ěn ri ke.

¹⁶ Kejėn ũ tóg Ęg Senhor ki rã mũ, ag kãki ũ. Kÿ tóg vãhã ag tÿ ti vėnh pugrÿ vÿm ri ke nÿ.

¹⁷ Hã kÿ tag tóg rán kÿ nÿ, Topě vÿ rá ki, ha mē: Moisés tÿ Ęg Senhor mrė vėmėn kÿ tóg ã vėnh pugrÿn tÿ vÿm ke ja nÿgtÿ," he ja tóg nÿ, Topě vÿ rá ki. Topě kuprÿg to ken hã vė, Ęg Senhor he mũ tag ti. Kÿ Ęg Senhor kuprÿg hã ne Ęg kygvãn ke mũ', Ęg tÿ ti vÿ ki króm ke to.

¹⁸ Hã kÿ tóg Ęg mÿ ti vėnh pugrÿn tÿ vÿm ke ja ri ke nÿ, kÿ Ęg tóg Ęg Senhor sÿnvÿ ěn, jėngrė ěn ve há han tÿ. Ęg tÿ vėnh ve jafã ki nén ũ ve há ěn ri ke tóg nÿ sir. Ęg tÿ Ęg Senhor ki ěvãnh kÿ Ęg tóg ti ri ke nÿtÿnh ke mũ gé. Koměr hã Ęg tóg

ve ũ han ke mũ, ti ve ên ri ke, êg tỹ ti tugnỹm kỹ, êg tỹ êg Senhor tugnỹm kỹ, ti kuprĩg ti.

4

Paulo krój nĩ

¹ Inh rãnrãj hã vê, Topê tỹ inh mỹ vênh rãnrãj nĩm jan hã vê. Kỹ tóg inh jagãgtãn mũ gé, isỹ ti rãnrãj to krónh ke tũ nĩ jé.

² Hỹ, ũ ag tóg nén tỹ êg mỹ'ãg han tĩ ên han tĩ, kuty tá, ũ tỹ ag vég tũ nĩn jé. Vênh jykre tỹ ge tovãnh kãn inh huri mỹr. Kỹ sóg ãjag mỹ ón tũ nĩgtĩ gé, ãjag lograr henh ke tũ sóg nĩ gé. Ón kỹ sóg: "Topê vỹ tag tó ja nĩ," he tũ nĩ gé. Ki hã sóg tó tĩ. Topê rĩnve sóg vémén tĩ, hã kỹ sóg ón tũ nĩgtĩ. Ũ tỹ isugnỹm mũ ên vỹ ki kanhrãn kãn ke mũ, inh jykre ki.

³ Kỹ ũ tóg kejẽn ki kagtĩg nỹtĩ, isỹ Jesus kãme sér tó mũ ên ki. Ag mỹ tóg nén ũ péju kỹ nĩ ri ke nĩ. Ũ tỹ vãgfor kỹ nỹtĩ ag vê, hã kỹ ag tóg ki kanhrãn tũ nĩgtĩ.

⁴ Kyvó ag nỹtĩ, krĩ tũ ag nỹtĩ. Jesus ki ge sór tũ ag nỹtĩ, Satanás tỹ ag kyvó nĩm ti kỹ. Êprã pã'i ag kri ke vỹ tỹ ti nĩ, Satanás ti. Ti tỹ ag kyvó nĩm ti kỹ ag tóg Cristo kãme tag to jykrén tũ nĩgtĩ. Ti jẽngrê vég tũ ag tóg nĩgtĩ, ti sĩnvĩ ti. Cristo hã vỹ tỹ Topê kãnhvég ri ke nĩ, ti ve ri ke.

⁵ Inh pi(jé) inh jykre kãmén tĩ'. Jesus Cristo hã kãmén sóg tĩ, ti tỹ tỹ êg Senhor nĩ ti. Jãvo sóg tỹ ãjag camarada ri ke nĩ, isỹ Jesus to há nĩn kỹ.

⁶ Ha vé, ũ tỹ kutyg mũ ra kurãg han mũ ên tóg êg ki kurã han mũ gé sir, Topê ti, êg tỹ ki kanhrãn jé, Topê tỹ tỹ ùn mág nĩn ki. Êg tỹ Cristo ve kỹ êg tóg Topê ki kanhrãn tĩ. Cristo vỹ tóg Topê ve hã pẽ nĩ. Êg ki kurã to ken hã vê, hã vỹ: Topê ki kanhró he mũ.

⁷ Êg tỹ tỹ êprã ke nỹtĩ (hã) ra tóg êg kanhrãn sór tĩ, kỹ tóg êg tỹ go'or tỹ kukrũ han kỹ kãki jãnkamy e vin ên ri ke nĩ. Êg hã vỹ tỹ go'or tỹ kukrũ ên ri ke nỹtĩ, êg krój nỹtĩn kỹ, inh ke gé. Hã ra tóg êg kanhrãn tĩ, vênh kar tỹ ti hã tỹ tỹ ùn tar tãvĩ nĩ ên ve je. Jãnkamy ri ke to ken hã vê. Êg pi(jé) tar nỹtĩ'. Ũ tỹ êg tar han mũ vỹ tỹ Topê ti nĩ.

⁸ Inh krój nĩ ra Topê tỹ isar han mũ vê, ha vé ha. Nén kar tóg inh kutãn tĩ, hã ra inh pi(jé) to krĩ kufy han tĩ'. Kejẽn tóg inh jykre tũ tĩgtĩ, kỹ tóg isỹ: hỹ mỹ vỹ? he ja há tĩgtĩ, hã ra inh pi(jé) to krónh ke tĩ'.

⁹ Inh vóg kónãn ag tóg tĩ, hã ra Topê pi(jé) isovãnh tĩ'. Inh rỹnh ag tóg tĩ, hã ra ag pi(je) isén tĩ'.

¹⁰ Kurã kar ki sóg Jesus vêsýrénh ên ri ke han tĩgtĩ. Hã tugrĩn vênh kar tóg Jesus rĩr nĩ tag venh ke mũ gé, inh vêsýrénh tugrĩn.

¹¹ Kurã kar ki sóg ter kren tĩ, Jesus tugrĩn. Hã ki Jesus rĩr nĩ tóg inh ki ve há tĩ, inh fãr vag ke mũ ra.

¹² Iser kren kỹ ajag tóg tar nỹtĩ jãvo, rĩnrĩr ãjag nỹtĩ.

¹³ Tag vỹ Topê vĩ ki rãn kỹ nĩ, ha mẽ: "Topê vĩ kri nĩm inh, hã kỹ sóg tó," he ja tóg nĩgtĩ, Topê vĩ rá ki. Topê vỹ tag hã vỹ inh jykre han tĩ, hã kỹ sóg tó tí gé. Kri fig sóg tĩ, hã kỹ sóg tó tí mỹr.

¹⁴ Topê ne êg Senhor tỹ Jesus rĩn mãn ja nĩ'. Ên vỹ inh rĩn mãn ke mũ gé, ki kanhró sóg nĩ. Kurã ên kã tóg ãjag mré inh jé prẽr ke mũ, êg tỹ ti mỹ vênh ven jé.

¹⁵ ãjag tugrĩn sóg ti jagy tag ve kãn tĩ. Kỹ komêr hã ùn e tóg Topê tỹ ag jagãgtãn tag mênh ke mũ. Vênh grun jé êg tóg ke mũ, kỹ ùn e tóg sir ti mỹ

vĩ há han ke mũ. Kỳ Topê to vĩ há han mũ ag tóg e tãvĩ nỹtĩ sir. Topê tỹ tỹ ùn mág nĩn hã vễ.

Êg tỹ Jesus ki ge kỳ nỹtĩn kỳ êg krenkren ke

¹⁶ Hã kỳ sóg to krónh ke jãvãnh nĩ. Ha vé, inh fár tag tóg krój nĩ, komêr hã tóg ter sór mũ, ti vag jé. Hã ra inh kuprĩg tóg tar nĩ jãvo. Kurã kar ki tóg vênh han mãn tĩ, Topê tỹ isar han kỳ, inh kuprĩg ti.

¹⁷ Tag ki sóg ti jagy vég tĩ, hã ra tóg inh mỹ kãnhvy nĩ. Tũ' he jé tóg ke mũ, tag ki ti jagy ti. Tá êg tóg nén ù há tãvĩ venh ke mũ, êg tỹ tag ki ti jagy ve ja tugrĩn, hã ra tóg tũ' he jãvãnh nĩ, êg tỹ tá nén venh ke mũ ên ti. Ki kagtĩg êg nĩ ver, hã ra tóg há tãvĩ nĩnh mũ, êg tỹ tag ki nén ù há ve kãfór ti nĩnh mũ, tá.

¹⁸ Hã ve sór inh nĩ, hã mũ sóg êkrég tĩ. Ver êg tóg vég tũ nĩgtĩ, sỹ nén ve sór mũ tag ti. Hã kỳ sóg êg tỹ nén (ũ) vég mũ tag to jykrén sór tũ nĩgtĩ. Êg tỹ nén (ũ) vég mũ tag vỹ tũ' henh ke mũ. Êg tỹ ùri nén (ũ) vég tũ ên vỹ tũ' henh ke tũ nĩ, êg tỹ tá nén venh ke mũ ên ti.

5

¹ Êg fár vỹ êg pãjó ri ke nĩ. Tũ' he jé tóg ke mũ, êg fár ti. Hã ra Topê ne êg mỹ ãn tãg ri ke han ke mũ', kãnhkã tá'. Hã ra tóg êg tỹ tag ki ãn han ri ke tũ nĩ. Tũ' he jãvãnh tóg nĩ, Topê tỹ êg jamã tãg han mũ ti.

² Tag ki êg tóg vễsỹrénh tĩ, êg fár tỹ êg pãjó ri ke tag ki. Kỳ tóg êg tỹ kãnhkã tá êg jamã tãg ên venh há tĩ. Hã jé êg tóg prêr tĩ. Kỳ tóg êg tỹ kur tãg tu ri ke nĩ.

³ Êg tỹ kur tu kỳ êg kator tũ nỹtĩ. Êg kur ri ke ti nĩ, kãnhkã tá êg jamã ti, êg tỹ êg fár tãg tun kỳ.

⁴ Ha vé, ki hã sóg tó mũ. Tag ki, êg tỹ êg fár tỹ pãjó ri ke tag ki nỹtĩn kỳ êg tóg vễsỹrénh tĩ, êg mỹ êg ter jãvãnh tũn kỳ. Êg mỹ tóg êg rĩr hã tag tỹ kãnhkã tá jun há tĩ vễ, kỳ tóg êg tỹ tag ki êg kur kunũg tũ ra êg tỹ kãnhkã tá jun kỳ êg kur tãg tu ri ke nĩnh mũ, êg mỹ. Kỳ êg tỹ êg fár tãg ve kỳ êg fár si tóg tũ' he mũ, êg ter tũ ra. Tag hã tóg êg mỹ há tũnh mũ vễ.

⁵ Êg tỹ kãnhkã tá êg fár tãg venh ke jé Topê tóg êg mỹ vênh jykre nĩm, kỳ tóg êg mỹ ã kuprĩg jênê gé. Hã ki êg tóg ki kãnhró nỹtĩ, êg tỹ tá nén (ũ) venh ke mũ ên ki.

⁶ Hã kỳ tóg inh mỹ sér tĩ. Êg tỹ ver ga kri mũn kỳ êg tóg êg Senhor vég tũ nĩgtĩ ver.

⁷ Êg tỹ ti vég tũ ra êg tóg ti vĩ kri fig tĩ.

⁸ Kỳ sóg kanê jur mãn tũ nĩ ha. Isỹ inh fár tỹ pãjó ri ke tag tovãnh há tóg tĩ, sỹ êg Senhor mré nĩ jé, inh jamã pẽ tá.

⁹ Hã kỳ sóg vãsãn tĩ, inh jykre tỹ ti mỹ há nĩ jé. Isỹ tag kã nĩ kỳ sóg vãsãn tĩ, kỳ sóg tá vãsãn ke mũ gé, sỹ tá ti mré nĩnh ken kỳ.

¹⁰ Ha vé, êg kar vỹ Cristo mỹ vênh ven ke mũ, ti tỹ êg jykre tugnỹm jé. Kỳ tóg êg mỹ nĩm ke mũ, êg tỹ tag ki nén (ũ) han mũ kaja ti. Ủ tỹ tag ki nén (ũ) há han mũ ên tóg ã tũ kajan venh ke mũ gé, kỳ ù tỹ tag ki nén (ũ) kórég han mũ ên ag tóg ãjag vễsỹrénh venh ke mũ gé sir.

Cristo tỹ êg jykre si tỹ tũ' he

¹¹ Ha vé, êg Senhor kamêg sóg tĩ, hã kỳ sóg êprã ke ag mỹ ki hã tó tĩ, ag tỹ ti ki ge jé. Topê hã ne inh ki kãnhró kar nĩ'. Kỳ ãjag hỹn, ãjag tỹ nén to jykrén há han kỳ (ãjag hỹn) inh ki kãnhró nỹtĩnh ke mũ gé, he sóg tĩ.

12 Inh pi(jé) ājag mý: “ŭn mág vỹ tỹ inh nĩ,” he sór tĩ'. Hã ra sóg ājag mý vĕnh kãmĕn mũ, ti tỹ ājag mý sér tĩ jé, sỹ ājag mý nĕn (ũ) kãmĕn mũ ěn tugrĩn, ājag tỹ iso: “jykre há tãvĩ ti nĩ,” he jé. Tag tómnĩ, ũ tỹ vĕsỹ tỹ ŭn mág han sór mũ ag mý. Ũ tỹ ge jykre vỹ sĩnvĩ nĩ ve nĩ, hã ra tóg ěg tỹ ve há han kỹ (tóg) krój nĩ, ag jykre ti.

13 Ha vé, krĩ tũ inh nĕji nĩ. Topĕ jykre han tugrĩn sóg krĩ tũ nĩ ve nĩ. Kejĕn sóg krĩ há han tĩ gé. Ājag tugrĩn ke vĕ, inh krĩ há ti.

14 Cristo hã vỹ tỹ inh fe nĩ, hã kỹ sóg vĕnh kar to há nĩ. Tag to sóg jykrĕn mũ, ha mĕ: vĕnh kar jagfy tóg ter ja nĩ, Cristo ti, kỹ ěg kar jykre si vỹ tũ' he mũ sir, ti jamĕn kỹ.

15 Ti hã ne vĕnh kar jagfy ter ja nĩ'. Hã kỹ ěg pi(jé) tỹ ěg tũ nỹtĩ', ũri'. Ti tũ vỹ tỹ ěg nỹtĩ, ti tỹ ěg jagfy ter ja nĩn kỹ, ti tỹ ěg jagfy rĩr mãn ja nĩn kỹ ke gé. Kỹ ti hã ne ěg mý ěg tỹ nĕn han ke mũ ěn tó tĩ', ũri'.

16 Vãsỹ ěg tóg ěg tỹ vĕsóg ki nĕn (ũ) to jykrĕn kỹ (ěg tóg) ěprã ke jykre to: “tag vỹ há nĩ, tag vỹ kórĕg nĩ,” he ja nĩgtĩ. ũri ěg tóg vĕsóg ki tag to jykrĕn mãn ke tũ nĩ ha. Cristo to ěg vĕsóg ki jykrĕn mãn ke tũ nĩ gé, ěg tỹ vãsỹ vĕsóg ki ti to jykrĕn' he ja ěn ri ke tũ vĕ ha, ũri.

17 Hĕ ri ken kỹ? Cristo tỹ ěg han mãn kỹ mýr. Ti ki ge kỹ ěg nỹtĩ, hã kỹ tóg ěg han mãn ja nĩ. ěg jykre si tóg tũ tĩ ha, ěg tỹ nĕn han ja ěn tóg tũ tĩ ha ke gé. ũri ěg tóg tỹ ŭn tãg nỹtĩ ha, ěg krĩ, ěg jykre ti ke gé.

18 Topĕ tỹ nĕn han mũn hã vĕ. Topĕ kato vãsãn ěg tĩ vĕ, hã ra ěg tóg ũri tỹ Cristo mrĕ ke nỹtĩ ha, Topĕ tỹ ěg han mãn kỹ, Cristo tugrĩn. Kỹ tóg ěg mý vĕnh rãnrãj tag nĩm mũ gé sir, ěg tỹ vĕnh kar mý: tỹ Cristo mrĕ ke nỹtĩmnĩ, he jé.

19 Ha vé, Topĕ vỹ Cristo jĕnĕ, ti tỹ ěg tỹ tỹ ti mrĕ ke nỹtĩ han jé, ěprã ke kar tỹ ti ki ge sór jé. Kỹ tóg ěg tỹ ti vỹ mranh tỹ tũ' he sór mũ gé sir, ěg tỹ ti kaja kórĕg vĕg tũ nĩ jé. Kỹ tóg ěg mý: ha vĕnh kar mý tó, isỹ ag to há nĩ sór mũ ti,” he ja nĩ gé.

20 Cristo hã ne inh jĕnĕg mũ', isỹ ti jiji tó jé. Kỹ Topĕ tóg vĕnh kar jyvĕn tĩ, kỹ sóg hã tó jĕ nĩ. Hã kỹ sóg Cristo jyjy tó kỹ (sóg) ājag mý tag to vĩ sór mũ, ha mĕ: “Topĕ to há nỹtĩmnĩ, ti kato vãsãn mãn sór tũg nĩ,” he sóg mũ.

21 Jesus pi(jé) Topĕ vỹ mranh ja nĩgtĩ'. Hã ra tóg ěg tỹ ti vỹ mranh ja ěn kajãmn kãn. Kỹ tóg ěg mý Topĕ jykre kuryj ěn nĩm mũ sir, ěg jagfy kajãmn kar kỹ.

6

1 Topĕ mrĕ sóg rãnrãj tũgtĩ. Hã kỹ sóg ājag jyvĕn mũ, ājag tỹ Topĕ vĩ ki króm jé. Ājag tỹ ti vĩ ki króm tũ nĩn kỹ tóg fagrĩnh mý ājag jagãgtãn nĩ.

2 Ti hã ne tag tó ja nĩ', ha mĕ: sỹ ājag jagãgtan ke kurã ki sóg ājag krenkren han nĕn to vỹ mũ ěn han ke mũ. Ājag krenkren ke kurã ki sóg ājag krenkren han ke mũ,” he ja tóg nĩ, Topĕ ti. Ājag krenkren ke kurã vỹ hur jun, ha mĕ. ũri tóg ěg krenkren han sór mũ, Topĕ ti.

3 Kỹ sóg nĕn ũ vĕnhmý han tũ nĩgtĩ sir, ũ tỹ iso vĕnh jykre kórĕg tó tũ nĩ jé, inh rãnrãj to.

4 Vĕnh jykre há mĩ sóg tũ mýr, isỹ tỹ Topĕ camarada jĕn kỹ, kỹ inh jykre tóg vĕnh kar mý ve há tĩ. Isỹ nĕn ũ jagy vĕg mũ ra sóg ti to krónh ke tũ nĩgtĩ, ijagtar nĩ ra, inh kanĕ jur mũ ra.

5 Kejĕn ag tóg inh mrãnmrãn tĩ, vĕseja kãtã ag tóg inh fón tĩ, vĕnh kar tóg kejĕn inh kri rũv tĩ. Kejĕn sóg inh rãnrãj tỹ inh kutãn to jagtar tĩ, kejĕn sóg nũr tũ nĩgtĩ, kejĕn sóg vĕjĕn vĕg tũ nĩgtĩ.

⁶ Isy ti jagy vég mû hã ra ijykre tóg tỹ ùn há nỹ, Topê ví ki kanhró mág sóg nĩ, vènh kar to sóg fe nĩ, vènh kar mỹ sóg komêr hã ví tí, vènh kar tỹ isỹ tỹ Topê camarada jê tag ki kanhrãn kãn jé. Topê kuprĩg vỹ tỹ inh jagrê nĩ, hã kỹ sóg vènh jykre kuryj to tar nĩ. Inh pi(jé) ón kỹ ù to há nĩ'.

⁷ Ki hã tó sóg tí. Topê hã ne isar han'. Ti hã ne inh mỹ ã jykre kuryj nĩm', kỹ tóg tỹ isỹ tỹ rárá jafã nĩ, Topê jykre há ên ti. Inh kren han tóg, Topê ti, ti tỹ inh mỹ vènh jykre kuryj nĩm ti kỹ, kỹ ag tóg ti jykre hã tugrĩn (ag tóg) ãjag jykre kórég vég tí gé.

⁸ Kejên ag tóg inh mỹ ví há han tí, kejên ag tóg iso é he tí. Kejên ag tóg iso ti kórég kar tó tí, kejên ag tóg iso nén ù há tó tí. Kejên ag tóg iso: "tí ón nê," he tí, hã ra sóg ón vãnh nĩgtĩ.

⁹ Û tóg kãmĩ inh ki kagtĩg nĩ ve nỹtĩ, hã ra vènh kar tóg inh ki kanhró nỹtĩ. Ter kren tỹ hên ri ke han sóg tígtĩ, hã ra sóg rĩr tí nĩ ver. Inh vóg kónãn ag tóg tí, hã ra ag tóg isén ja tú nĩ.

¹⁰ Inh fe kaj tóg tí, ge ra tóg inh mỹ sér tí. Jagtar sóg tí, hã ra sóg ù tỹ hên ri ke ag jagãgtãn tí, ag mỹ Topê ví tón kỹ. Nén ù tỹ isóg tú tú nĩ, hã ra Topê tỹ êg mỹ nén nĩm mû ên kar vỹ tỹ isũ nỹtĩ.

¹¹ ãjag hã mỹ sóg ijagtar tag kãmén mû, tó kãn sóg mû, ãjag mỹ, isỹ ãjag to há táví nĩn kỹ. ãjag hã to sóg fen mág kỹ nĩ.

¹² Inh pi(jé) ãjag to kórég nĩ'. ãjag hã ne iso há tú nĩ ve nỹtĩ'.

¹³ Inh krê ri ke ãjag nỹtĩ. Hã kỹ sóg ãjag mỹ tag to ví sór mû, ha mē: "isỹ ãjag to há kóm iso há nỹtĩmĩ, iso fe mág nỹtĩmĩ," he sóg mû.

Û tỹ Jesus ki ge tú ag pi(jé) tỹ êg mré ke nỹtĩ'

¹⁴ Û tỹ Jesus ki rá tú mré jykrén sór túg nĩ. Tỹ ag êg mré ke tú nỹtĩ. Hã kỹ ùn jykre pãno ag mré jykrén sór túg nĩ gé, ãjag tỹ vènh jykre kuryj han kỹ nỹtĩn kỹ. Kurã pi(jé) tỹ kuty mré ke nĩ'.

¹⁵ Cristo pi(jé) Japo mré jykrén tí'. Kỹ ù tỹ ti ki rá kỹ jê pi(jé) ù tỹ ti ki rá tú mré jykrén há nĩnh mû'.

¹⁶ Kỹ Topê jo ãn pi(jé) tỹ ón kỹ topê jo ke nĩ'. Ha vé, Topê jo ãn vỹ tỹ êg nỹtĩ, ùn rĩr mû jo ãn. Ti hã ne tag tó', ha mē: "ag ki sóg ijamá han ke mû, ag mré sóg túg ke mû, ag Topê vỹ tỹ inh nĩnh mû, kỹ ag vỹ tỹ inh povo nỹtĩnh mû," he ja ti nĩgtĩ.

¹⁷ Hã kỹ êg Senhor tóg tag tó, ha mē: "ag ré kỹ mũmĩ, vyrmỹ nỹtĩmĩ. Vènh jykre kavéj han túg nĩ, kỹ sóg ãjag mỹ: ha kãmũ jêg, henh ke mû.

¹⁸ ãjag jóg vỹ tỹ inh nĩnh mû, kỹ ãjag vỹ tỹ inh krê nỹtĩnh mû," he tóg, êg Senhor tí, ù tỹ nén (ũ) kar han ki kanhrãn kỹ nĩ ên ti," he ja tóg nĩgtĩ, Topê ví rán kí.

7

¹ Inh kanhkã', inh fe vỹ tỹ ãjag nỹtĩ. Hã kỹ sóg ãjag mỹ tag tó mû. Êg hã mỹ tóg tó mû, Topê ti, ti tỹ tỹ êg jóg mág nĩ tag tí, kỹ êg tóg tí venh ke mû. ãjag tỹ ti ve hã jé nén (ũ) kavéj ên tovãnh kãn nĩ, ãjag jãnhkri nỹtĩ jé. Nén (ũ) kavéj han túg nĩ, to jykrén túg nĩ gé. Komêr hã jykre há táví nỹtĩ sórmnĩ. Topê tú vỹ tỹ êg nỹtĩ, kỹ ti kamêg nĩ, ti jykre kuryj ên ri ke nỹtĩ sórmnĩ.

Paulo fe tỹ mrin ke

² Iso fe mág han mãn nĩ, ha mē. Inh pi(jé) ù mỹ vènh jykre pãno han sór tí', inh pi(jé) ù krĩn kónãn sór tí', inh pi(jé) ù tỹ nén ù péju sór tí'.

³ Isy' ājag mý tag tó mü jāvo sóg ājag to kórég tū nī. Ājag mré ke vỹ tỹ inh nī, kỹ ěg tóg jatun mý jagně mré mü mü, jagně mré kǎgter ěg tóg ke mü gé, hěn ri ke mü.

⁴ Inh mý ag tóg věnh vī há tónh ke mü, he sóg tī ājag to. Kỹ sóg věnh kar mý ājag to: há ag nýtī, he tí. Tag ki sóg ti jagy pē vég mü, hā ra inh krī tóg kǎnhvy nī, ājag to, kỹ tóg sir inh mý sér pē tí.

⁵ Ha vé, isy' ga tỹ Macedônia tá jun kỹ sóg nén ũ tỹ inh krī kuprǎg ke ve ja tū nī. Tá sóg ti jagy ve mǎn gé. Iso rará ag tóg, tá, kỹ sóg věnhmý en mǎn gé sir.

⁶ Hā ra Topě tóg inh mý Tito jěně, kỹ ti hā tóg inh krī tỹ kǎnhvy' hé. Ūn vēsýrěnh mü ěn mý tóg vī há han tí, Topě ti, hā kỹ tóg inh mý Tito jěně, ěn kǎ.

⁷ Ti tỹ inh ki jun kỹ tóg inh mý vī há han. Kỹ tóg inh mý ājag tỹ iso vī há han ja tag tó mü gé sir, ājag tỹ inh ve sór mü tag tó ti mü, ājag tỹ věnh jykre kórég to věnhmý en ěn kǎmén ti mü, ājag tỹ inh jagfỹ věnh vī tó sór mü tó ti mü gé inh mý. Sý tag mē kỹ tóg inh mý sér gy tí sir.

⁸ Inh carta tỹ ājag ki jun kỹ tóg ājag fe kaj han, isy' rá ti. Hā ra tóg há tí. Ājag fe kaj han tóg, kurǎ pir ki, kỹ ājag tóg ājag jykre kórég ěn tovǎnh ja nī, hā kỹ tóg inh mý sér tí. Ūri tóg inh mý sér tí, isy' carta rán kỹ jěně ja ěn mī ěkrén kỹ, hā kỹ sóg rán tũg sór ja tū nī.

⁹ Inh mý tóg sér tí. Hě ri ken kỹ? Ājag fe kaj mý inh mý sér tí? Vó. Ājag tỹ ājag fe kaj tỹ ājag mý jagy tǎn kỹ ājag jykre kórég ěn tovǎnh kỹ tóg inh mý sér tí. Ājag fe kaj tigrǎn ājag tóg Topě mý věnh fěg, kỹ inh carta tóg ājag mý nén (ũ) kórég kǎmén ja tū nī.

¹⁰ ěg tỹ ěg fe kaj tigrǎn Topě mý věnh fěg kỹ ěg tóg ěg jykre kórég tovǎnh kǎn ke mü, kỹ ěg krenkren ke mü. Tag vỹ ěg mý sér tí. Jāvo ěg tỹ fe kaj ra ěg jykre kórég tovǎnh tū nǎn kỹ ěg ter pē han ke mü sir.

¹¹ Ha vé. Ājag fe kaj tǎn kỹ ājag tóg ājag jykre tugným mü sir, Topě tỹ ājag krǎn kỹ. Věnh jykre kórég ěn to ājag tóg jũ mü sir, kǎně jur han ājag tóg mü sir, kỹ ājag tóg: “věnh jykre kórég ěn han sór tū ěg tóg nǎgtī,” he mü sir. Inh ve sór ājag tóg mü nī sir, věnh jykre kórég tỹ ājag tóg tū' he sór mü, ũn tỹ věnh jykre kórég han mü ěn mý vī tar han sór ājag tóg mü. Há kar ti nī. Hā ki tóg ājag tỹ ti mre ti jykre kórég ěn han ja tū (tóg) ve há tí sir.

¹² Isy' ājag mý carta ěn rán kỹ sóg ũ tỹ věnh jykre kórég han mü ěn tó ja nī, ti tỹ ũn mý ti kórég han mü ěn tó ja inh nī gé. Hā ra sóg tag to jykrén, sý rán kỹ, ha mē: “isy' Corinto tá ke ag tỹ iso há nýtī venh há tóg tí, ag tỹ ājag tỹ iso há nǎn ki kǎnhrán jé, Topě rǎnve,” he ja sóg nī, hā kỹ sóg carta ěn rán ja nī.

¹³ Hā kỹ inh krī tóg kǎnhvy' he mü sir, isy' ājag tỹ iso há nýtǎn mēn kỹ. Kỹ inh krī tỹ kǎnhvy' hen mré tóg inh mý sér pē tí gé sir, Tito tỹ ājag to vī há han kỹ. Ti krī tỹ kuprǎ' he ja ājag tóg nī, ti tỹ ājag mré nǎn kỹ, kỹ tóg ti mý há tí gé.

¹⁴ Ti mý sóg ājag kǎmén ja nī, ājag tỹ ti mý vī há han ke tag ti. Ti tǎg ke to há sóg ti mý ājag kǎmén ja nī, hā ra ājag tóg ti mý ki hā han ja nī. Inh kavěnh ja tū ājag tóg nī. Ha vé, ājag mý sóg ki há tó há han tí. Kỹ tóg ri ke nī ja nǎgtī, sý Tito mý ājag to vī há han ja nǎn kỹ. Ki hā han ja ājag tóg nǎgtī.

¹⁵ Kỹ tóg kurǎ kar ki ājag mī ěkrég tí, ājag to tóg há tǎvī nī, Tito ti. Ājag tỹ inh vī kri nǎm mü ěn mī tóg ěkrég tí, ājag tỹ inh kaměg mü ěn mī, kỹ ājag něji ti kaměg ja nī gé, isy' ti jěněn kỹ. Há tó tóg tí.

¹⁶ Kỹ tóg inh mý sér tí gé sir, ājag tỹ inh kavěnh ja tū nǎn kỹ, ājag tỹ inh vī ki króm kỹ.

8

Ĕg tŷ jĕnkamy nĭm ke

1 Kŷ sóg ājag mŷ Topē tŷ ga tŷ Macedônia tá ke ag tar han mŷ tó sór mŷ gé, Macedônia tá igreja krēm vĕnhmĕn kŷ nŷtĭ ag, ũ tŷ tá vĕnh pĕnpin tĭ ag. Ājag jagĕgtar hĕ ra ag tóg Jerusalém tá ke ag jagĕgtĕn sór mŷ, ag mŷ jĕnkamy jĕnĕn kŷ.

2 Ha vé, ti jagy pĕ hĕ ve ja ag tóg nĭgtĭ, Macedônia tá ke ag, ag jykre há vĕnh ven jé. Ge ra tóg ag mŷ sér tĭ. Jagĕgtar ag nŷtĭ gé, tŷ nĕn (ũ) mág tŷ ag nŷtĭ. Hĕ ra ag tóg, ag mŷ sér nĭn kŷ (ag tóg) vin mág pĕ han ja nĭgtĭ, ag jagtar mág mŷ ra. Ag tŷ Jerusalém ra jĕnkamy jĕnĕ sór vĕ.

3 Ha vé, ag jykre ve inh. Ājag tŷ nĕn (ũ) tŷ vĕnh kĕpĕm ag tóg, ag jĕn mré hĕ.

4 To ag tóg inh mŷ to vĭ mág, isŷ ag mŷ: “ājag tŷ tŷ vĕnh kĕpĕm tŷg nĭ,” he tŷ nĭn jé. Ag tŷ Topē tŷ ag mŷ nĕn ũ há han sór vĕ. Tag hĕ ne ag mŷ sér tĭ, Topē tŷ tag to ag tar han kŷ, hĕ kŷ ag tóg inh mŷ: “ĕg tŷ ag mŷ jĕnkamy jĕnĕ sór vĕ,” he mŷ.

5 Kŷ ag tóg vĕnh jykre há han, isŷ ag ki vĕnh jykre há ve sór mŷ ĕn kĕfór. Ĕg Senhor mŷ ag tóg vĕnh vin, kar kŷ ag tóg inh mŷ vĕnh vin gé, Topē tŷ ag mŷ: “ha ti mŷ vĕnh vin,” hen kŷ.

6 Kŷ sóg Tito mŷ ké, ti tŷ ājag ki jĕnkamy ũ ve jé, ājag tŷ Jerusalém tá ke ag mŷ jĕnkamy jĕnĕnh ke ti. Ājag ki tóg hur jĕnkamy sĭ vé, kŷ tóg ti tŷ ũri ve kĕn há tĭ, ti tŷ ājag mŷ sér tĭ jé gé, Topē tŷ tag to ājag tar han kŷ.

7 Ha vé, Jesus ki ge kŷ ājag nŷtĭ. Vĭ há ājag nŷtĭ. Ki kanhrĕn mág ājag nŷtĭ. Ũ jagĕgtĕn sór ājag nŷtĭ. Jagnĕ to há ājag nŷtĭ. Tag kar ki ājag tóg ũn rico ri ke nŷtĭ. Kŷ nĕn ũ há tag han sórnmĭ gé, Tito tŷ ājag ki nĕn venh ke mŷ tag ti.

8 Inh pi(jé) ājag mŷ: “ker ag jagĕgtĕn tŷg hĕ,” he sór mŷ. Sŷ ājag tŷ vĕnh kar to há nŷtĭ ve sór vĕ, ājag tŷ ũ ag jagĕgtĕn mŷn ki.

9 Ha vé, ĕg Senhor tŷ Jesus Cristo vŷ ĕg jagĕgtĕn ja nĭ gé. Tag ki kanhró ājag tóg nŷtĭ. Kanhkĕ tá ti rico nĭ ja nĭgtĭ, hĕ ra tóg ĕ tŷ nĕn (ũ) ĕn tovĕnh kĕn. Ā tŷ ĕg jagfŷ jagtar tĭ jé tóg kĕtĭg. Kŷ ĕg tóg ti jagtar tŷgrĭn rico nŷtĭ sir.

10 Kŷ sóg tag to jykrĕn, ha mĕ. Ano ti nĭ ha, ājag tŷ ag mŷ jĕnĕnh ke tŷ vŷrmŷ vin han vén kri. Ājag hĕ ne to jykrĕn vén ja nĭgtĭ gé, Jerusalém tá ke ag mŷ jĕnkamy jĕnĕnh ke to.

11 Kŷ ājag tŷ nĕn han vén ja ĕn han kĕn nĭ, ũri. To jykrĕn ja ājag tóg nĭgtĭ, kŷ han kĕn sórnmĭ gé. Ājag tŷ vŷrmŷ nĕn vin ja ĕn kri vin mĕn nĭ, ag mŷ jĕnĕn jé.

12 Ājag tŷ nĕn nĭm kŷ ti tŷ ājag mŷ sér nĭn kŷ tóg Topē mŷ há tĭ. Ũ tŷ nĕn ũ mág vŷ nĭm mág han ke mŷ, ũ tŷ nĕn ũ sĭ vŷ sĭn kŷ nĭm ke mŷ. Topē pi(jé) ũ tŷ nĕn ũ sĭ tŷ nĭm mág ve sór mŷ.

13 Ti tŷ ājag tŷ ũ jagĕgtĕn tŷgrĭn ājag mŷ tŷ tĭn kŷ tóg Topē mŷ ũ tĭ sir. Vĕnh kar tŷ nĕn ũ sĭ ve kŷ tóg há tĭ.

14 Ũri ājag tŷ tóg e nĭ, hĕ kŷ tóg ājag tŷ ũn jagĕgtar ag mŷ vĕnh kĕpĕm há tĭ. Kejĕn tóg ājag mŷ tŷ' hĕnh ke mŷ gé, kŷ ag tóg sir ājag mŷ nĕn (ũ) vin ke mŷ gé, vĕnh kato. Kŷ vĕnh kar vŷ jagnĕ ri ke nŷtĭ sir. Tag hĕ vŷ há nĭ'.

15 Hĕ kŷ tag tóg rán kŷ nĭ, ha mĕ: “ũ tóg vĕjĕn génh mág han ja nĭgtĭ, ũ tóg génh pir han ja nĭgtĭ gé. Kŷ ũ tŷ génh mág han mŷ mŷ tóg kĕfór ja tŷ nĭgtĭ, hĕ ra ũ tŷ génh pir han mŷ ĕn mŷ tóg tŷ' he ja tŷ nĭgtĭ gé,” he tóg mŷ, Topē vĭ rá ki. Jagnĕ ri ke ag tóg nŷtĭ ja nĭgtĭ. Hĕ kŷ tóg ĕg tŷ ũ tŷ nĕn (ũ) pir nĭ ĕn jagĕgtĕn há tĭ.

Tito to vême

¹⁶ Topê hã ne Tito fe han', ti tÿ ãjag to há tâvĩ nĩ jé. Kÿ sóg Topê mÿ vĩ há han tĩ sir, ti tÿ ti fe han kÿ.

¹⁷ Kÿ tóg kãnhmar inh mÿ: "hej," hé, sÿ ti mÿ: "ha Corinto ra tĩg," hen kÿ. Kãnhmar tóg tĩg sór ja nĩ, Tito ti.

¹⁸ Kÿ sóg ti mré êg régre ù jênê sór mũ gé. Êg régre tag vÿ Jesus kãmén tĩ, kÿ igreja krêm vênhmãn kÿ nÿtĩ ag kar vÿ ti to vĩ há han tĩ, ù tÿ êmã kar ki Topê vĩ to vênh pãnpin tĩ ag.

¹⁹ Kÿ igreja krêm ke kar vÿ ti hã kuprêg, ti hã tÿ inh mré êg tÿ ùn jagãgtar ag mÿ nén jênênh ke tag ki rĩr jé. Êg Senhor tÿ ùn mág nĩ tag vênh ven hã jé êg tóg tag ki rĩr sór mũ, êg tÿ ag jagãgtãn ke tag ti ki. Kÿ tóg inh mÿ há tĩ gé, sÿ inh pir mÿ ki rĩr tũ nĩn kÿ.

²⁰ Kÿ ù tóg iso jykrén kónãn ke tũ nĩ gé, isÿ inh pir mÿ ki rĩr tũ nĩn kÿ. Jãnkamy e vê, êg tÿ ma mũnh ke ti, kÿ tóg inh mÿ ù tÿ tag to iso jykrén kónãn ha mē tĩ. Kÿ tóg inh mÿ há tĩ, ù ag tÿ inh mré ki rĩr mũn kÿ.

²¹ Isÿ vênh jykre kuryj han sór vê, hã to sóg jykrén tĩ. Êg Senhor ne inh jykre ki kanhró nĩ', kÿ tóg há tĩ gé, êprã ke ag tÿ inh jykre há vég mũn kÿ.

²² Inh mré tĩg ke mũ tag vÿ Tito mré ãjag ki jun ke mũ, kar kÿ êg régre ù ke gé. Êg régre tag hã ne êg Senhor tũ ki rĩr há han tĩgtĩ', tag ve tÿ hên ri ke han inh huri. Ti tũ ki rĩr nĩ vÿ ti mÿ sér tĩ. Kÿ tóg ãjag vême mē, hã kÿ tóg ãjag ve sór mũ. ãjag to tóg há tâvĩ nĩ, ti tÿ ãjag vême mên kÿ.

²³ Kÿ Tito ne ãjag venh kãtĩg ke mũ'. Inh mré rãnrhãj jafã vê, Tio ti, kÿ tóg inh mré ãjag to vãsãn tĩ. Ti mré kãmũ tag ag vÿ tÿ ùn há nÿtĩ gé. Û tÿ igreja krêm vênhmãn kÿ nÿtĩ ag vÿ ag jêgnê ja nĩ, ãjag to. Ag tÿ Cristo jykre há ên han kÿ nÿtĩ vÿ ve há tĩ.

²⁴ Ag tÿ ãjag ki junjun kÿ ag ki rĩr há han nĩ, vênh kar tÿ ve jé, ãjag tÿ ag to há nÿtĩ ti, igreja krêm vênh pãnpin tĩ ag kar tÿ ãjag jykre há ve jé. Vênh kar mÿ sóg ãjag to: "vĩ há tâvĩ han ag tóg tĩ," he tĩ. Kÿ Tito ag mÿ vĩ há han nĩ, ke tũ nĩ (mũ) ra sóg ón ja nĩnh mũ.

9*Ag tÿ jãnkamy jênênh ke*

¹ Kÿ ãjag tóg, êg tÿ Jerusalém tá Topê ki ge kÿ nÿtĩ ag mÿ jêgnênh ke tag ki kanhró (ãjag tóg) nÿtĩ, hã kÿ sóg tó sór tũ nĩ.

² Ag jagãgtãn sór ãjag tóg mũ, ki kanhró sóg nĩ. Hã kÿ sóg Macedônia tá ke ag mÿ tó tĩ. Ag mÿ sóg: "Grécia tá ke ag ne Jerusalém tá ke ag mÿ nén ù jênê sór tĩ," he tĩ. "Kri prÿg tóg nÿ ha, ag tÿ nén ù jênê sór mũn kri," he sóg tĩ, ãjag to. Kÿ ag tóg ke sór mũ gé sir, ãjag kóm.

³ Hã kÿ sóg ãjag mÿ êg régre ag jêgnêg mũ, ãjag tÿ ki kanhrãn jé, sÿ ãjag kãmén mũ ti. Kÿ ãjag tÿ nén (ù) nĩm sór mũ ên vin kãn nĩ, ùri, kÿ sóg fagrĩnh mÿ vĩ ja tũ nĩnh mũ.

⁴ Hên ri ke mũn Macedônia tá ke ù ag tóg inh mré kãmũ sór mũ. Kÿ tóg ãjag tÿ nén vin ja tũ nĩ kÿ inh mÿ'a tũnh mũ, isÿ ón kÿ vĩ ja nĩn kÿ. Kÿ tóg ãjag mÿ'a tũnh mũ gé sir.

⁵ Hã kÿ sóg to jykrén, sÿ ãjag mÿ êg régre tag ag jêgnê jé, inh kãtĩg ke to hã, ãjag tÿ nén vin han kãn jé, ãjag tÿ nén (ù) tÿ êg mré ke ag jagãgtãn ke ti. Vãsÿ ãjag tóg tó ja nĩ, ãjag tÿ nén vin sór mũ ên ti, kÿ ha vin han, kÿ tóg e nĩnh mũ,

jānkamy ti, kŷ tóg ve há tī, ti tŷ ājag mŷ sér nī ti. Kŷ ū tóg ājag to: “ti mŷ ag mŷ há tú ja, hā kŷ ag tóg nīm sī han ja nī?” henh ke tū nī.

⁶ Kŷ sóg tag tó sór mŷ, ha mē: “ū tŷ ti fy pir krān kŷ tóg pin kŷ génh ke mŷ gé sir. Ū tŷ krān mág mŷ ěn hā tóg génh mág han ke mŷ gé sir,” he sóg tī.

⁷ Kŷ ājag tŷ nén to jykrén mŷ ěn hā vin nī, ājag tŷ Jerusalém ra jĕnĕ jé. Ti tŷ ājag mŷ sér tū nīn kŷ tóg há tū nī. Inh pi(jé) ājag mŷ vī tar han mŷ'. Mŷ sér nŷtīmnī, ājag tŷ ěg mré ke ag jagāgtān to, kŷ tóg Topĕ mŷ há tī sir. Ū tŷ ge to tóg há tāvī nī.

⁸ Kŷ Topĕ tóg to tar nī gé, ājag mŷ nén vin mág han ke to, ājag tū tŷ ājag ki e nī jé, kurā kar ki, nén ū tŷ ājag mŷ tū' he tū nī jé. Kŷ tóg, ājag tū tŷ ājag ki mág nīn kŷ (tóg) ājag tŷ ū jagāgtān', ū jagāgtān' henh há tī sir.

⁹ Tag vŷ rán kŷ nī, ha mē: “ūn jagāgtar ag mŷ tóg vin mág tī, ti tŷ ěg mŷ vēnh vī há tó tóg tū' henh ke tū nī,” he tóg, Topĕ vī rá ki.

¹⁰ Ha vé, Topĕ ne ěg mŷ nén (ū) kar fy vin mŷ', ěg tŷ krān jé, kŷ tóg ěg mŷ pāo han jafā nīm mŷ gé, ěg tŷ tŷ pāo han kŷ han jé. Kŷ tóg ājag mŷ ājag tŷ tŷ ū jagāgtān ke mŷ ěn ven mŷ gé, kŷ tóg nén ū fy ri ke nī. Kanĕ há ri ke han jé tóg ke mŷ gé, ājag tŷ vēnh jykre kuryj tag han kŷ, hā vŷ: jagnĕ jagāgtān, he mŷ.

¹¹ Tag ki ājag tóg rico nŷtīnh ke mŷ, ājag tŷ vēnh kar jagāgtān kŷ. Kŷ ag tóg e nŷtīnh mŷ gé sir, ū tŷ ěg tŷgrīn Topĕ to vī há han mŷ ag, ag tŷ ěg tŷ ag jagāgtān tŷgrīn Topĕ to vī há han kŷ.

¹² Kŷ tóg ge nī. ěg tŷ Topĕ ki ge kŷ nŷtī ag jagāgtān kŷ ěg tóg ag jagāgtar tŷ tū' he mŷ. Tag tóg há tī. Hā ra ag tóg ěg tŷ ag jagāgtān tŷgrīn (ag tóg) Topĕ mŷ vī há han ke mŷ gé sir.

¹³ Hā ki ag tóg ājag tŷ Topĕ vī kri fig mŷ vég mŷ, ājag tŷ ag jagāgtān ki. Kŷ ag tóg tag to Topĕ to vī há han ke mŷ gé sir, ha vemnī. Cristo to vēme to ājag nĕji há nŷtī. Hā ve jé ag tóg ke mŷ, ājag tŷ ag jagāgtān mág kŷ, ājag tŷ vēnh kar jagāgtān kŷ ke gé.

¹⁴ Kŷ ag tóg ājag to Topĕ mré vēmén ke mŷ gé sir, ājag to há tāvī nŷtīn kŷ. Topĕ tŷ ājag jagāgtān há pĕ han mŷ ěn ve jé ag tóg ke mŷ, hā kŷ ag tóg ājag ve sór ke mŷ gé sir.

¹⁵ Topĕ ne ěg mŷ nén ū há tāvī vin tī mŷr'. Pi(jé) kaja nī', ti tŷ ěg mŷ nén vin mŷ ti. ěg jé ti mŷ to vī há han, ti mŷ agradecer hen kŷ.

10

Paulo tŷ nén to vī

¹ Ha vé, ājag jyvĕn sór inh mŷ, inh, hā vŷ: Paulo, he mŷ. Sŷ ājag mré nīn kŷ sóg nĕji komĕr hā vī tī, kŷ, isŷ kór há tá nīn kŷ isóg nĕji vī jū han tī ājag mŷ. Cristo ne komĕr hā vī tī'. Ūn há vē, Cristo ti. Ti jykre hā han sór inh nĕgtī.

² Hā kŷ sóg ājag mŷ tag to vī sór mŷ, ha mē. Isŷ ājag mŷ nén rán mŷ tag jĕmĕmnī. Kŷ sóg ājag ki jun kŷ vī jū han ke tū nī. Vī jū han jé sóg ke mŷ, ha vemnī, ū tŷ inh kato vī mŷ ag mŷ, ū tŷ iso: “ā tŷ vēsóg ki nén to jykrén mŷ ěn hā han tóg tī,” he mŷ ag mŷ.

³ ěprā ke vŷ tŷ inh nī, hā ra inh pi(jé) ěprā ke jykre han kŷ vēnh jykre kórég han to vāsān tī'.

⁴ Vāsān mág sóg tī, hā ra inh pi(jé) ěprā ke ag jykre han kŷ vāsān mŷ'. Topĕ jykre tar ěn hā han kŷ sóg hā to vāsān tī, kŷ tóg soldado tŷ rárá jafā ri ke nī, Topĕ jykre tar ti. Tŷ sóg ěg kato tē mŷ ag vēnh pigju jafā mág ěn kókég tī, hā vŷ: isŷ ū tŷ ěg vī kato vāsānsān mŷ ag vī tŷ tū' he mŷ, he mŷ.

⁵ Ū tŷ Topě kato vī sór mū ag vī tŷ sóg tū' he tī gé. Vēsŷ ūn mág han sór ag tóg nŷtī, Topě kato vāsān kŷ, ěg tŷ Topě jykre ki kanhrān mū kato vāsān kŷ. Tŷ tū' he jé sóg ke mū, Topě jykre tar hā tŷ. Ěprā ke ag tŷ Topě vī kato tē mū ag tŷ Cristo krēm ge han kān sór sóg mū, kŷ ag sigse kŷ nŷtī ri ke vē sir.

⁶ Kŷ, sŷ ājag tŷ Topě vī kri nīm mū ve kŷ sóg ū tŷ kri fi sór tū ag mŷ vī jū han ke mū sir, ha vemnī.

⁷ To jykřén há han nī, ha mē. “Tŷ sóg Cristo mré ke nī,” he ājag tóg tī, ājag kāmī ū. Kŷ to jykřén há han nī. Tŷ sóg Cristo mré ke nī gé, inh, ājag kóm mŷr, ha mē.

⁸ Ěg Senhor ne inh fĕg', sŷ ājag jyvĕn jé. Ti pi(jé) inh mŷ: “ha ag kókén,” hé'. Kŷ sóg ājag mŷ tó, ěg Senhor tŷ inh fĕg ja ti. Isŷ vēso vī há han hā vē. Ge ra tóg inh mŷ'a tū nī, isŷ vēso vī há han mū tī.

⁹ Sŷ ājag jyvĕn sór vē. Inh pi(jé) ājag kanē jun sór mū'. Ājag jyvĕn hā jé sóg ājag mŷ rān.

¹⁰ Inh carta ki inh nĕji ājag mŷ vī tar han tī, vī jū, kŷ sŷ ājag mré nīn kŷ sóg nĕji krój nī ve nī, kŷ inh vī nĕji tóg tŷ nĕn ū tū nī ve nī.

¹¹ Tag to jykřén, ha mē: isŷ rān mū ri ke han jé sóg ke mū, isŷ ājag mré nīnh ken kŷ, ha mē. Ājag vég tū sóg nī, isŷ carta tag rān kŷ. Isŷ ājag mré nīnh ken kŷ sóg inh vī tag ri ke han ke mū, ha vemnī.

¹² Ājag kāmī ū tóg vēso vī há han sór tī. Inh pi(jé) ag ri ke nī', inh pi(jé) tŷ ag mré ke nī gé'. Vēsóg ki to jykřén kŷ ag tóg nĕn ū to: “tag vŷ há nī, tag vŷ há tū nī,” he tī. Tag to jykřén kŷ ag jykre tóg ag mŷ há nī ve nī. Topě jykre ve vĕn sór tū ag tóg nī. Ag tŷ vēsóg ki nĕn to jykřén hā tóg ag mŷ há tī. Krī tū ag nŷtī.

¹³ Ag jāvo sóg Topě jykre vég tī, hā kŷ sóg ājag mŷ: “inh jykre vŷ há nī,” he tī. Topě ne inh mŷ inh rānhrāj ti nīm, kŷ tóg inh mŷ: “ha Corinto tá ke ag ki rīr,” he ja nĕgtī gé.

¹⁴ Inh pi(jé) Topě tŷ inh mŷ vēnh rānhrāj nīm ěn pātĕn tī', kŷ sóg pātĕn ja tū nī gé, sŷ ājag mŷ rān kŷ. Inh hā ne ājag mŷ Cristo kāmĕn vĕn ja nĕgtī'.

¹⁵ Hā kŷ sóg isŷ tŷ ājag jyvĕn tī. Ū tū pijé'. Inh pi(jé) ū rānhrāj to: “isŷ han ja vē,” he mū'. Isŷ hā ki sóg tŷ ūn mág nī. Kŷ sóg tag to jykřén mū gé, ha mē: ājag tŷ Topě ki ge kŷ nŷtī to tar nŷtīn kŷ sóg tŷ ūn mág tāvī nīnh ke mū gé, ājag mré. Isŷ hā vē, inh rānhrāj hā vē.

¹⁶ Kŷ sóg ājag jamā mā ra tĕg sór mū gé, sŷ Cristo kāmĕn jé, ū tŷ ag mŷ tó ja tū ěn ra. Sŷ tátā ag mŷ kāmĕn kŷ sóg inhhā ki rānhrāj mū sir, ū tŷ ag mŷ tá Topě vī kāmĕn ja tū nīn kŷ. Kŷ sóg inh rānhrāj hā tugnīn tŷ ūn mág jĕnh mū, ū rānhrāj tugrīn ke tū vē.

¹⁷ Hā ra tóg há tū tī, ěg vēme tag ti. Ājag tŷ ūn mág nī tó sór kŷ ěg Senhor ti tómnī.

¹⁸ Ěg tŷ vēso: “ūn há vŷ tŷ inh nī,” he mū ra ěg pi(jé) tŷ ūn há nŷtī'. Ěg Senhor tŷ ěg to: “ūn há vŷ tŷ ā nī,” hen hā kŷ ěg tóg tŷ ūn há nŷtī'.

11

Ōn kŷ apóstolo ag

¹ Iso fe nŷtīmī. Krī tū nī ve inh nī, isŷ vēsóg kŷ. Hā ra ājag tóg iso fe nŷtī, kŷ tóg há tī.

² Ājag to sóg há pĕ nī, Topě tŷ ājag to há nī ri ke, hā kŷ sóg ājag jyvĕn tī. Kŷ ājag tóg ūn mén ke mū fi ri ke nŷtī, kŷ Cristo vŷ ājag mén ke ri ke nī sir. Vĕnh prŷg

tag to sóg ājag kǎn sór mǔ mýr, ājag jānhkri nýtī jé, tátāg týt mén ja tū jānhkri ri ke.

³ Hǎ ra sóg ājag to: “ag mýt ti tovānh sór tū nǐ výt?” he mǔ. Pýt výt Eva fi mýt ón, Japo ti, ti jykre (ka)mě nǎn kýt, kýt fi tóg ti vǐ kri nǐm. Kýt tóg ājag mýt ón sór mǔ gé, Japo ti, ājag týt Cristo tovānh jé, ājag týt ti jykre pir tovānh jé, ājag týt ti to tar ěn to krónh ke jé.

⁴ Hǎ kýt ājag tóg ũ ag vǐ jěmě sór mǔ, ag týt ājag mýt ón kýt Jesus tó kýt, ag týt isýt ājag mýt nén tó mǔ ěn hǎ tū tó mǔ ra ājag tóg jěmě sór tí. Ón kýt jagrě výt ājag mýt há nǐ ve nǐ, Topě týt ājag mýt nǐm ja tū ěn. Ón kýt topě vǐ výt ājag mýt mě sér tí ve nǐ, ājag týt vāsýt mě ja tū ěn. Věnhmýt han sór ājag tóg mǔ.

⁵ Ón kýt apóstolo ag ne ājag mýt věnh vǐ tag tó sór mǔ'. Inh pi(jé) týt ag krēm ke nǐ', ha mẽ.

⁶ Vǐ sǐnvǐ han tū inh něji nǐ, ag vǐ sǐnvǐ ri ke han tū inh něji nǐ. Hǎ ra sóg nén týt ěn ri ke ki kanhró nǐgtǐ, tag ve ājag tóg mýr, ājag týt inh vǐ mẽ týt ěn ri ke han mǔ ěn ki.

⁷ Ājag mýt sóg Topě vǐ tó ja nǐgtǐ, kýt sóg tag to ājag ki ti kaja ve sór ja tū nǐ. Věsýt ũn sǐ han ja inh nǐ, sýt ājag mré nǎn kýt, ājag týt týt ũn mág nýtī jé, isugrǐn. Tag tugrǐn inh mýt Topě vǐ mranh'? Vó, věnh jykre há vé.

⁸ Ěmǎ ũ tá Jesus ki ge kýt nýtī fag ne inh mýt fag jānkamy věnh kǎpām, kýt fag tóg inh mýt ti jěně ja nǐ, sýt ājag mré nǎn kýt. Fag tū hǎ ko ja inh nǐgtǐ.

⁹ Kýt, isýt jānkamy ve sór mǔ ra sóg ājag mýt tó ja tū nǐ gé. “Tí hýt ag mýt jagy tǐnh mǔ,” he sóg tí, hǎ kýt sóg ājag mýt to ja tū nǐ. Ga týt Macedônia tá ěg régre ag ne inh ki junjun ja nǐgtǐ', sýt ājag mré nǎn kýt, kýt ag tóg inh mýt jānkamy ũ ma kāmŭ ja nǐ gé, sýt to nén týt inh mýt tū nǐ ěn mǎn jé. Gen kýt sóg isŭ végtí hǎ ra, ti týt ājag mýt jagy tū nǐn jé. Inh jykren hǎ vē. Tovānh sór tū inh nǐgtǐ.

¹⁰ Kí hǎ tó sóg tí, Cristo týt ki hǎ tó tí ěn ri ke han sóg tí. Kýt sóg ājag to: “ga týt Grécia tá ke ag výt jānkamy to inh jykre ki kanhrǎn kǎn ke mǔ, ag týt iso vǐvǐ he tū nǐn jé,” he mǔ. Ājag jānkamy ve sór tū pě inh nǐgtǐ.

¹¹ Hě ri ken kýt? Inh mýt ājag to há tū nǐgtǐ? Vó, ājag to sóg há tǎvǐ nǐ, kýt Topě ne ki kanhró nǐ'.

¹² Hǎ ra sóg ājag tū ve sór tū nǐ, sýt ag vǐ týt tū' hen jé, ón kýt apóstolo ěn ag vǐ tí. Inh mýt tóg ag týt ājag mýt: “Paulo ri ke inh nǐ. Inh mýt ājag tū věnh kǎpām,” henh ha mẽ tí. Hǎ kýt sóg ājag tū ve sór tū nǐ.

¹³ Ón kýt apóstolo výt týt ag nýtī, mýr, ha mẽ, ón kýt ag tóg: “Topě rǎnhrǎj han ěg tóg mǔ,” he tí. Ón kýt ag tóg: “Cristo výt ěg týt apóstolo han,” he tí.

¹⁴ Satanás jykre há vē. Věsýt tóg Topě týt jěně jafǎ ri ke han tí, ón kýt, Satanás ti.

¹⁵ Kýt Satanás mýt rǎnhrǎj tí ag tóg ón kýt (ag tóg) jykre kuryj nýtī ve nǐ gé. Hǎ ra Topě tóg ag vóg kónǎn ke mǔ, ag rǎnhrǎj kórég to.

Paulo jagtar

¹⁶ Ha mẽ, tó mǎn jé sóg ke mǔ, sýt tó ja ti. Inh pi(jé) krǐ tū nǐ'. Isýt ājag mýt krǐ tū nǐ ve (hǎ) ra, ge ra iso hǎ nýtīmǎnǐ, sýt vēso věnh vǐ há tón kýt.

¹⁷ Sýt ājag mýt sýt nén ve ja ěn tó sór vē, kýt tóg inh krǐ tū nǐ ve nǐ. Sýt vēso vǐ há han kýt sóg krǐ tū nǐ ve nǐ. Ěg týt ěg Senhor jykre tó kýt ěg tóg tag tó tū nǐgtǐ, sýt tónh ke tag.

¹⁸ Hǎ ra sóg tó sór mǔ. Věnh kar tóg ājag mýt ag týt nén ve ja tó tí, kýt sóg ājag mýt sýt nén ve ja ěn tó sór mǔ gé, ha mẽ.

¹⁹ Krǐ há ājag nýtī, ge ra ũn krǐ tū ag tóg ājag mýt há nýtī ve nǐ.

²⁰ Ū t̄y ājag m̄y: “tag han ra, tag han t̄ug ra,” hen k̄y tóg ājag m̄y sér t̄i ve n̄gt̄i. Ū t̄y ājag t̄u m̄n sór k̄y tóg ājag m̄y há t̄i ve n̄gt̄i, ū t̄y ājag m̄y un'ón m̄u ag tóg ājag m̄y há n̄yt̄i ve n̄gt̄i, ū t̄y v̄eso: “t̄y inh ūn mág n̄i,” he m̄u ag v̄y ājag m̄y há n̄yt̄i ve n̄gt̄i gé, ū t̄y ājag kakā ki t̄anh t̄i ěn ag ke gé. Ū t̄y ge v̄y ājag m̄y há kar n̄yt̄i ve n̄gt̄i.

²¹ Inh m̄y' a tóg t̄i, s̄y tag tóg k̄y. V̄enh jykre tag to sóg krój n̄i, tag han sór v̄anh inh n̄gt̄i, ag t̄y han ri ke tag.

Hā ra ag tóg ājag m̄y ag t̄y n̄en ve ja ěn ti tóg sór m̄u, ón k̄y apóstolo ěn ag, ag t̄y n̄en ū há kar han m̄u tóg tóg t̄i. K̄y sóg ag ri ke tónh ke m̄u gé sir, ūn kr̄i t̄u ag ri k̄en.

²² Hebreu v̄y t̄y ag n̄yt̄i. T̄y sóg Hebreu n̄i gé. Israel kr̄e'kr̄e v̄y t̄y ag n̄yt̄i. T̄y sóg Israel kr̄e'kr̄e n̄i gé. Abraão kr̄e'kr̄e v̄y t̄y ag n̄yt̄i. T̄y sóg Abraão kr̄e'kr̄e n̄i gé.

²³ Cristo camarada v̄y t̄y ag n̄yt̄i. Tag to sóg ag k̄áfór n̄i hā ra. Ha vé, kr̄i t̄u p̄e n̄i ve sóg n̄i, s̄y t̄y ag k̄áfór n̄i tag tón k̄y.

Ha m̄e, is̄y t̄y Cristo camarada n̄i ti: inh r̄anh̄rāj e tag hā to sóg ag k̄áfór n̄i, ise k̄y n̄in e ja hā to sóg ag k̄áfór n̄i gé. Inh mr̄änmr̄än k̄áfór han ag tóg t̄i gé, ter kren t̄y h̄en ri ke ve inh, ag k̄áfór ke gé.

²⁴ Judeu ag ne inh mr̄änmr̄än t̄y 5 (ke) han', ag t̄y ū mr̄änmr̄än t̄y 39 (ke) han t̄i ěn t̄y 5 (ke) han ag tóg is̄y, kurā t̄y h̄en ri ke han tóg, ti t̄y 5 (ke) ěn tá kr̄ȳg j̄e.

²⁵ Kar k̄y ag tóg ka t̄y inh mr̄änmr̄än t̄y 3 (ke) han ja n̄gt̄i gé. Kurā t̄y h̄en ri ke han tóg ke gé, ti t̄y 3 (ke) ěn tá kr̄ȳg j̄e. Pó t̄y ag inh pin ja n̄gt̄i gé, is̄en j̄e, kurā pir ki. Kar k̄y sóg goj ki ter kren t̄agt̄u han ke gé, ěn k̄a sóg kej̄en kuty pir ki kurā mr̄é goj nig k̄äki n̄agn̄ar, goj kafā t̄u k̄äki.

²⁶ Kuvar há ra t̄ȳg t̄y h̄en ri ke han inh, k̄y goj var tóg inh jagtar han. Ěg t̄u p̄eju(g) t̄i ag v̄y inh jagtar han t̄i. Inh mr̄é ke ag v̄y inh vóg kónān sór n̄gt̄i, fóg ag ke gé, cidade ki ke ag ke gé, ěmā t̄u tá ke ag ke gé. Goj kafā t̄u kri inh jagtar han. Ón k̄y ěg kanhkā ag v̄y inh jagtar han t̄i gé.

²⁷ R̄änhrāj mág to inh jagtar t̄i gé, to sóg ron t̄i, k̄y sóg n̄ur t̄u t̄y h̄en ri ke hyn han t̄i gé. Kej̄en sóg kók̄ir t̄i, kej̄en sóg goj v̄ég t̄u n̄gt̄i, v̄akre t̄y h̄en ri ke han sóg t̄i, kusa m̄eg sóg t̄i, inh kur tóg iso t̄ug t̄i gé.

²⁸ K̄y, is̄y kurā kar ki ti jagy tag v̄ég m̄u mr̄é hā sóg igreja kr̄em v̄enhm̄än ti ag to kr̄i kufy han t̄i gé.

²⁹ Ū t̄y Cristo v̄i to krónh ken k̄y tóg inh m̄y jagy t̄i gé. Ū t̄y Top̄e v̄i mranh k̄y sóg kan̄e jur t̄igt̄i gé.

³⁰ K̄y, is̄y v̄eso k̄y sóg is̄y n̄en ū jagy v̄ég m̄u ěn tóg sór t̄i, inh krój n̄i ěn ti.

³¹ Top̄e ne ki kanhró n̄i', ěg Senhor t̄y Jesus jóg ti. Ěg t̄y ti m̄y v̄i há han tóg t̄u' henh ke t̄u p̄e n̄i. Ti hā ne ki kanhró n̄i'. Inh pi(j̄e) ón m̄u'.

³² Cidade t̄y Damasco tá sóg n̄i ja n̄gt̄i, k̄y p̄ā'i mág t̄y rei t̄y Aretas ěn kr̄em p̄ā'i ū v̄y governo ki r̄ir n̄i ja n̄gt̄i. Ěn tóg ijo v̄aji ja n̄gt̄i. Ti polícia ag tóg ijo v̄aji ja n̄gt̄i, ag t̄y ise j̄e.

³³ Hā ra inh mr̄é ke ag tóg k̄ej̄ mág k̄äkā inh p̄eju k̄y j̄änkā ror t̄y is̄erem, cidade to ró t̄y, hā k̄y sóg kren. Is̄y ti jagy ve jan hā vé.

¹ Kÿ ãjag tÿ isÿ tÿ ùn mág nÿ tag mẽ sór kÿ, kÿ sóg ãjag mÿ ãg Senhor tÿ inh mÿ nén ven mũ ãn tó sór mũ gé ver, ti tÿ inh mÿ nén kãmén mũ ti. Sÿ ãjag mÿ tónh ke tũ vè vè, hã ra ãjag tóg mẽ sór mũ.

² Ha vé, ù ki kanhró sóg nÿ, Jesus ki rã ù. 14 (ke) anos ti nÿ ha, ti tÿ kanhkã ra tÿg kri, kanhkã tãgtũ he mũ ãn ra. Hãn ri ke mũn tóg ã rÿr há ra vyr, hãn ri ke mũn ti kuprÿg tóg ra vyr, inh pi(jé) ki kanhró nÿ'. Topê hã ne ki kanhró nÿ'.

³ Hã ra tóg ra vyr, hãn ri ke mũn ã rÿr há ra, ti kuprÿg hãn ri ke mũn, inh pi(jé) ki kanhró nÿ', Topê hã ne ki kanhró nÿ'.

⁴ Kÿ tóg ãg tÿ hẽ tá Topê mré nÿtÿnh ke mũ ãn ra vyr, Paraíso he mũ ãn ra. Tá tóg vènh vÿ jëmẽ, ãprã ke tÿ nén tónh ke tũ ãn mẽ tóg tá, kanhkã tá vènh jykre sÿnvÿ pẽ ãn, ãg tÿ tag ki nén ki kãgtÿg ãn.

⁵ ãn hã to sóg: “ùn mág vÿ tÿ inh nÿ,” he sór mũ. Isÿ vèsóg ki kanhkã ra tÿg pijé'. Isÿ ãg tÿ ãprã vég tÿ ãn tó kÿ sóg inh krój nÿ hã tó sór mũ.

⁶ Isÿ ùn mág nÿ tag tó kÿ sóg ki hã tó tÿ, vènh ó pijé'. Hã ra sóg tó tũ nÿ, ãjag tÿ iso: “vènh kar kãfór vÿ tÿ ti nÿ,” he tũ nÿ jé. Inh jykre vég ãjag tóg mÿgtÿ, inh vÿ mẽg ãjag tóg mÿgtÿ, kÿ tag hã to jykrén nÿ, tag hã to ãjag tóg inh jykre ki kanhrãn ke mũ.

⁷ Kÿ Topê tóg, ti tÿ inh mÿ kanhkã ven kar kÿ (tóg) to jykrén gé, sÿ vèsÿ ùn mág han sór tũ nÿ jé. Hã jé tóg inh há tÿ nén ù jagy ki nÿ han tÿ gé, kÿ tóg sónh tÿ inh ki já ri ke nÿ. Satanás krêm ke ù vè, kÿ tóg isãnh tÿ, isÿ vèsÿ ùn mág han tũ nÿ jé.

⁸ Kÿ sóg ãg Senhor mÿ to vÿ tãgtũ han, ti tÿ inh mÿ tÿ tũ' hen jé.

⁹ Hã ra tóg ke jãvãnh ja nÿ. Kÿ tóg inh mÿ: “ã jagãgtãn sóg tÿ,” he ja nÿ, “kÿ tóg há tÿ,” he ja tóg nÿ, ãg Senhor ti. “Á krój nÿ hã ki isÿ tÿ ùn tar nÿ ve há tÿ,” he ja tóg nÿ inh mÿ, ãg Senhor ti. Hã kÿ inh krój nÿ tag tóg inh mÿ há tÿ. Inh krój nÿn kÿ sóg Cristo tar hã tÿ tar nÿ nÿ. Tag hã ne há tÿ'.

¹⁰ Hã kÿ inh krój nÿ tóg inh mÿ sér tÿ, ag tÿ iso vÿ kónãn ti ke gé, inh jagtar nÿ ti ke gé, ag tÿ inh vóg kónãn ti ke gé, inh kanẽ jur ti ke gé. Inh mÿ tóg sér kar tÿ, sÿ nén vég mũ ti, sÿ Cristo hã tÿ fe nÿn kÿ. Inh krój nÿ ãn kã sóg tar nÿ, mÿr, ha mẽ.

Paulo tÿ Corinto tá ke ag to nén to jykrén

¹¹ Ha vé ha, vèsÿ ùn krÿ tũ nÿ ãn ri ke han sóg, ãjag tÿ inh kutãn kÿ. ãjag tÿ iso vÿ há han ke vè vè. Inh pi(jé) ù tÿ vèsÿ apóstolo han mũ ãn ag krêm ke nÿ', isÿ tÿ nén (ũ) tũ hã ra, mÿr, ha mẽ.

¹² ãjag mÿ sóg sÿ tÿ apóstolo jẽ ven huri. Isÿ nén (ũ) jagy vég mũ ra sóg to krónh ke tũ nÿgtÿ. ãg tÿ nén han vãnh hÿn han ja inh nÿgtÿ, ãjag rÿnve, milagre ti, Topê jykre ti ke gé. Hã ki ãjag tóg venh mũ, sÿ tÿ apóstolo jẽ ti.

¹³ Kÿ inh ãjag mÿ ne han ja tũ nÿ ãn jẽ, ãjag tÿ ãmã ù tá Jesus to vènhmãn tÿ ag to: “ãg kãfór ag nÿtÿ,” hen jé? Nén pir hã han tũ inh nÿ, hã vÿ: ãjag jãn ko ja tũ inh nÿ, he mũ, sÿ ãjag mré nÿn kÿ, kÿ tóg ãjag mÿ jagy nÿ ja tũ nÿ. Tag tÿ kórég kÿ inh mÿ vènh pãte fón nÿ.

¹⁴ Ha vé ha, sÿ ãjag ve mãn sór vè mÿr. Sÿ tag to jykre tãgtũ hã vè sir. Kÿ sóg inh jun kÿ ãjag mré nÿn kÿ (sóg) ãjag mÿ ti jagy nÿm sór tũ nÿ gé, ùri. Inh pi(jé) ãjag tũ mãn sór mũ'. Sÿ ãjag venh kãtÿg ke vè. ãg krẽ pi(jé) ãg rico han tÿ', ãg tÿ ag jẽ'ÿn mũ ra. ãg hã ne ãg krẽ mÿ nén ù nÿm tÿ'.

15 Hã ky' sóg isũ fón kãn ke mũ, ãjag tugrĩn, vẽn hẽg jé sóg ke mũ gé, sỹ ãjag krenkren han jé. ãjag to sóg há tãvĩ nĩ. Hã ky' tóg inh mỹ e tĩ, ãjag tỹ iso há tũ nỹtĩ ti.

16 Ky' ãjag tóg ki kanhró nỹtĩ, isỹ ãjag mré nĩn ky' ãjag mỹ ti jagy nĩm sór tũ nĩ ti.

Hã ra sóg nẽji ãjag vatánh tá ãjag krĩn tĩ, ãjag mỹ sóg nẽji ón tĩ.

17 Ky' inh mỹ ãjag vatánh tá ãjag tũ mág tĩ', sỹ ãjag mỹ inh mré ke ag jẽgnẽn ky'?' Ke tũ sóg nĩgtĩ mỹr.

18 Tito mỹ sóg to vĩ, ti tỹ ẽg rẽgre ù ẽn mré ãjag venh tĩg jé. Ky' Tito mỹ inh mỹ ãjag tũ ma kãtĩg ja nĩ'? Ke tũ tóg nĩ, ki kanhró ãjag tóg nỹtĩ. Inh jykre hã han tóg tĩ, Tito ti. Isỹ nén han mũ ẽn hã han tóg tĩ.

19 ãjag hỹn iso: "ón ky' tóg vẽn h jãgfy vĩ mũ," he mũ. "Ti tỹ ẽg tỹ ã to há nỹtĩ ẽn han sór vẽ," he ãjag hỹn mũ iso. Hã tũ vẽ, ky' Cristo vĩ ki kanhró nĩ, Topẽ ti ke gé. ãjag to sóg há pẽ nĩ, hã ky' sóg vĩ mũ, ãjag tỹ inh vĩ tugrĩn ti hã to tar nỹtĩ jé.

20 Tag hã to sóg jykrén mũ, ha mẽ: hẽn ri ke mũn ẽg tóg jagnẽ tỹ ùn mũ, sỹ ãjag ki jun ky'. Hẽn ri ke mũn ãjag tóg jagnẽ to jũ mũ, hẽn ri ke mũn ãjag tóg jagnẽ tũ ki vẽ'ĩ mũ, hẽn ri ke mũn ãjag tóg jagnẽ to krĩ rỹ nỹtĩ, vẽn kar hẽn ri ke mũn ãjag tũ hã mĩ ẽkrén sór tĩ, hẽn ri ke mũn ãjag tóg jagnẽ to vĩ kónãn mũ, hẽn ri ke mũn ãjag tóg jagnẽ to vĩ vĩ henh mũ, hẽn ri ke mũn ãjag tóg jagnẽ kãfór nỹtĩ sór mũ, hẽn ri ke mũn ãjag tóg vẽn h jykre e han sór mũ.

21 Ky' tóg inh mỹ'a tĩnh mũ, sỹ ãjag ki jun ky', ky' Topẽ tỹ isỹ ùn sĩ han ri ke vẽ sir. Inh fỹnh ke vẽ, ãjag tỹ vãsỹ Topẽ vĩ mranh ja ẽn tovãnh sór tũ nỹtĩn ky', nén ù kavéj ẽn ti, ã prũ tũ fi mré nỹ, ã mén tũ mré nỹ, fag to ẽn tĩ ẽn mỹr. ãjag tỹ ẽn tovãnh tũ nĩn ky' tóg inh mỹ'a tĩnh mũ.

13

Paulo tỹ ag jyvẽn mãn mũ

1 Sỹ ãjag ve tãgtũnh ke vẽ ha. Ky' sóg ãjag jykre venh ke mũ. ù tỹ ãjag jykre kórég vэг mũ vĩ tónh ke mũ, ãjag tỹ ti kórég han ja ti. ùn rẽgre vĩ tugtónh ke mũ, ke tũ nĩn ky' ùn tãgtũ.

2 Tag tó inh huri, ky' sóg tó mãn sór mũ mỹr. Sỹ ãjag mré nĩ ja nĩn ky' sóg ãjag mỹ tag tó ja nĩ, ky' sóg ùri ãjag mỹ rán mũ sir, sỹ ãjag mré nĩ tũ nĩn ky', ha mẽ. Sỹ ãjag mré nĩ ja nĩn ky' sóg komẽr hã vĩ ja nĩ, ù tỹ Topẽ vĩ mranh ja ẽn ag mỹ. Inh jun mãn ky' inh pi(jé) komẽr hã vĩ mãn mũ', ha vemnĩ. Vĩ tar han jé sóg ke mũ mỹr.

3 Cristo vĩ mẽ sór ãjag mũ, inh ki. Mẽ jé ãjag tóg ke mũ. Ti pi(jé) krój nĩ'. Tar ti nĩ, hã ky' sóg vĩ tar han ke mũ gé.

4 Krój nĩ ve ja ti nĩ, ti tỹ cruz to sa ky'. Hã ra tóg rĩr mãn, Topẽ tỹ ti rĩn mãn ky'. Topẽ tar nĩ hã vẽ. Ky' sóg krój nĩ gé, sỹ ti ki rã ky' jẽn ky', hã ra sóg ti mré rĩr ky' jé gé, ãjag mỹ, Topẽ tar nĩn ky'.

5 ãjag jykre tugnỹm nĩ. "Inh mỹ Jesus ki rã há han mũ vĩ?" hemnĩ, vẽnso jykrén ky'. "Jesus Cristo mỹ inh kãkã nĩ?" hemnĩ. ãjag tỹ tag to: "hỹ, hã vẽ," he tũ nĩn ky' ãjag pi(jé) tỹ ti tũ nỹtĩ'. Ẽn kã ãjag tóg ti tovãnh ky' mũ nĩ sir.

6 Hã ra sóg ti tovãnh ja tũ nĩ. ãjag tỹ tag ki kanhrãn kỹn há tĩ.

7 ãjag to sóg Topẽ mré vẽnén tĩ, ãjag tỹ nén ù kórég han tũ nĩ jé. Ky' inh rãnrãj tóg Topẽ mỹ há tĩ sir, vẽn h kar mỹ ke gé. Ag tỹ hã ra iso é he mũ ra nén

ũ há tãvĩ han sórmnĩ, ha mẽ, kÿ ãjag tÿ Jesus tũ hã han ke mũ tag ne há tãvĩ nĩnh mũ'.

⁸ Inh pí(jé) ũ tÿ ki hã tó mũ kato tẽ sór mũ'. Ũ tÿ ki hã tó mũ tag ve sór inh nĩ mÿr.

⁹ Inh mÿ tóg sér tí, inh krój nĩn kÿ, kÿ tóg inh mÿ sér tí gé, ãjag tar nÿtĩn kÿ. Hã jé sóg Topẽ mré ví tí, ti tÿ ãjag mÿ vẽn h jykre há ěn nĩm jé, ãjag tÿ há pẽ nÿtĩ jé.

¹⁰ Hã kÿ sóg ãjag mÿ carta tag rán, sÿ ãjag vég tũ nĩn kÿ. Kÿ sóg komẽr hã ví sór mũ, sÿ ãjag mré nĩnh ken kÿ. Inh pí(jé) ví tar han sór mũ', inh pí(jé) ěg Senhor tÿ isar han kÿ inh ví tar tÿ ãjag kókén sór mũ'. ãjag tar han sór inh mũ mÿr.

¹¹ Inh kanhkã', sÿ ãjag mÿ rán kãn hã vẽ. Hã ra sóg ver tag tó sór mũ, ha mẽ: vẽn kãn nĩ, ãjag tÿ kygnẽg tũ nĩ jé, inh ví jẽmẽmnĩ, vẽn h jykre pir han nĩ, krĩ kuprã nÿtĩmnĩ. Topẽ ne ěg to há nĩ', ti ne ěg krĩ kuprãg tí'. Ti hã ne ãjag ki rĩr mũ', ãjag tÿ ti jykre tag han kÿ.

¹² Jagnẽ ki nhun ke ri ke han nĩ, Jesus mré ke kar ki, ãjag tÿ jagnẽ nĩgẽ kãgmĩ kÿ. Topẽ tũ ki ge kÿ nÿtĩ kar vÿ ãjag mÿ: "ãjag mÿ há?" he sór mũ.

¹³⁻¹⁴ Ěg Senhor tÿ Jesus Cristo jé ãjag tar han tí. Topẽ vÿ ãjag to há nĩ. Ti kuprĩg vÿ tÿ ãjag jagrẽ nĩ. Ti jykre hã mĩ mũmnĩ. Hã vẽ.

PAULO TŶ CARTA HAN: GALÁCIA TÁ KE AG MŶ CARTA

¹ Paulo tŷ rá vē, inh. Isŷ ga tŷ Galácia tá ke ag mŷ rán hã vē. Jesus Cristo hã vŷ inh fêg, sŷ tŷ ti apóstolo jê jé, êg jóg tŷ Topê ti ke gé. Êprã ke tŷ inh fêg pijé'. Jesus Cristo hã ne inh fêg', Topê tŷ ùn rĭn mǎn mŷ tĭ, ti ter kar kŷ.

² Sŷ inh mré ke ag mré ga tŷ Galácia tá ke ag mŷ rán hã vē, ù tŷ Galácia tá Jesus to vēnhmǎn tĭ ag mŷ.

³ Topê mŷ sóg to vĭ tĭ, ti tŷ ājag tar han jé, êg jóg mág tŷ ājag krĭ kuprǎg jé, êg pǎ'i tŷ Jesus Cristo ti ke gé.

⁴ Tĭ hã ne ù tŷ ā tén mŷ ag mŷ vēnh fêg', ti tŷ êg tŷ Topê vĭ mranh tŷ tŷ' he jé, kŷ tóg êg kren han, êprã ke jykre to. Êprã ke jykre tŷ pǎno nĭ kŷ tóg vēnh jykre tag ki êg kunŷ. Êg jóg tŷ Topê tŷ nén ve sór mŷn hã vē, ti hã ne Jesus mŷ tag tó ja nĭ'.

⁵ Kŷ êg tóg Topê to vĭ há han sór mŷ, kŷ tóg tŷg' he jāvǎnh nĭ, ti to vĭ há tag ti. Hã vē.

Jesus kǎme pĭr nĭ

⁶ Ājag ne tóg kǎnhmar sŷ ājag mŷ Cristo kǎmén ja ên tovǎnh sór mŷ', ti tŷ êg jagfŷ ter ja kǎme tĭ. Tĭ kǎme ù nón mŷ sór ājag tóg mŷ, Cristo tŷ êg mŷ tó ja tŷ nón. Inh mŷ tóg e tĭ mŷr, ājag jykre tag ti.

⁷ Cristo kǎme vŷ pĭr nĭ, kŷ tĭ kǎme ù tóg tŷ tĭ. Hã ra ù ag tóg ājag krĭ kufy han sór mŷ, hã kŷ ag tóg Cristo kǎme ên ki króm há han tŷ nĭgtĭ. Û tó sór ag tóg mŷ mŷr, Cristo jykre to, hã vŷ: "ājag krenkren jé ājag tóg Cristo ki rá kar kŷ Judeu ag jykre han ke mŷ gé, Topê tŷ Moisés mŷ nén tó ja ên ti," he mŷ.

⁸ Hã ra sóg ājag mŷ tó há han ja nĭgtĭ, isŷ ājag mŷ: "tĭ ki rá tǎvĭ han jé ājag tóg ke mŷ," hen kŷ. Û tŷ inh vĭ tag ri ke tó tŷ ag jé mŷ kónǎn. Hên ri ke mŷn isóg ājag mŷ tag tó tŷ nĭ, hên ri ke mŷn sóg tĭ pǎte nén ù tónh ke mŷ. Kŷ inh jé tŷg kónǎn. Hên ri ke mŷn kǎnhkǎ tá Topê tŷ jĕnĕ jǎfǎ tóg isŷ tó ja ên ri ke han ke tŷ nĭ, pǎte tóg hên ri ke mŷn nén ù tó sór mŷ. Kŷ tĭ jé tŷg kónǎn.

⁹ Tag tó ja inh nĭ, kŷ sóg tó mǎn mŷ sir. Û tŷ ājag mŷ Cristo kǎmén kŷ, hã ra tóg ājag mŷ isŷ tó ri ke han tŷ nĭ, isŷ tó pǎte tóg ù tó sór mŷ, kŷ tĭ jé tŷg kónǎn.

¹⁰ Vĭ tar han sóg tĭ, êprã ke kórég ag to. Inh pi(jé) ón kŷ ag mŷ vĭ há han sór mŷ', ag tŷ iso há nŷtĭ jé'. Êprã ke ag tŷ iso há nĭ tag, ag tŷ iso kórég nĭ tag tóg inh mŷ tŷ nén ù tŷ nĭ.

Isŷ êprã ke ag tŷ iso nén tó mŷ to jykrén nĭ ra inh hŷn Cristo tŷ ki rĭr tŷ nĭnh mŷ vē. Hã ra sóg tĭ hã to jykrén tĭ. "Isŷ nén tó mŷ hŷn ti mŷ há nĭ, ti mŷ kórég nĭ vó?" he sóg tĭ, ti tŷ inh mŷ vĭ há han jé, Topê ti.

Paulo tŷ Topê vĭ hã tó

¹¹⁻¹² Cristo kǎmén ja inh nĭgtĭ, isŷ ājag mŷ: "tĭ ki rá kŷ êg krenkren ke mŷ, êg tŷ Moisés jykre han tŷ ra," hen kŷ. Êprã ke tŷ véké nén ù to jykrén ja pijé', sŷ ājag mŷ nén tó mŷ ti. Êprã ke tŷ inh kǎnhrǎn ja pijé'. Û pi(jé) inh mŷ: "tag tómnĭ," he mŷ'. Jesus Cristo hã ne inh kǎnhrǎn', tĭ hã ne inh mŷ tag tó kǎn'. Tag to jykrén nĭ, inh kǎnhkǎ'.

¹³⁻¹⁴ Isŷ vǎsŷ nén han ja mĕ ājag tóg huri. Tŷ sóg Judeu krĕ nĭ, hã kŷ sóg Judeu jykre han tĭ ja nĭgtĭ, Moisés tŷ êg jóg'jóg ve ag mŷ Topê jykre tó ja ên tĭ.

Kỹ sóg inh povo jykre ki, Judeu jykre ki sóg vāsān mág, hã kỹ sóg inh régre ag pātén, sỹ ěg jykre ki króm to tar tãvĩ nĩn kỹ. Ěg jóg'jóg ve ag jykre tãvĩ han sóg nĩgtĩ mýr, tag hã mĩ sóg ěkren ja nĩgtĩ. Kỹ sóg kygně kỹ: "Jesus hýn ón kỹ vėsý Topě han," he ja nĩ gé. Hã kỹ sóg ti ki ge kỹ nýtĩ ag vóg kónān tãvĩ han, isý ag týtũ' he jé. Ag jagãgtān vānh ja inh nĩgtĩ.

¹⁵⁻¹⁶ Hã ra Topě tóg kejěn inh mý Jesus to: "inh kósın výtỹ ti nĩ," hé, isý fóg ag mý, kanhgág ag mý ti kāmén jé, ũ týtĩ mē ja tũ ag kar mý. Ti hã tóg inh mur to hã inh kuprěg, inh jagãgtān kỹ. Kỹ, Jesus týtĩ inh mý věnh ven kar inh pi(jé) ěprã ke ũ mré věmén', ti ki jěmě jé'.

¹⁷ Kỹ sóg Jerusalém ra tĩg ja tũ nĩ gé, sỹ ijo apóstolo ag mré věmén jé. Ga týtĩ Arábıa ra sóg vyr, ěn kã, kar kỹ sóg tá kãtĩg kỹ cidade týtĩ Damasco tá jun mãn.

¹⁸ Kỹ, 3 anos tũg kỹ sóg kejěn Jerusalém ra vyr, sỹ apóstolo Pedro mré věmén jé. Ti mré sóg kurã týtĩ 15 (ke) han, tãvĩ.

¹⁹ Ěn kã inh pi(jé) apóstolo ũ ag vé'. Tiago hã ve inh, ěg Senhor jãvy ěn, isý Pedro mré vĩn kỹ.

²⁰ Ājag mý sóg ki hã rán mũ. Inh pi(jé) ón mũ', Topě hã ne ki kanhró nĩ'.

²¹ Tag pãte sóg ga týtĩ Síria ra vyr, ga týtĩ Cilícia ra ke gé.

²² Isý ra tĩg jé sóg ga týtĩ Judéıa fın rãm. Kỹ Judéıa tá Jesus to věnh mãn tĩ ag inh ki kagtĩg nýtĩ ja nĩgtĩ. Inh ve ja tũ ag nýtĩ ver, Judéıa tá Cristo ki ge kỹ nýtĩ ag.

²³ Iso vĩ hã mē ja ag tóg nĩgtĩ, hã výtĩ: "ũ týtĩ ěg vóg kónān mũ ěn něji Cristo tó mũ," he mũ. "Vāsý tóg ũ týtĩ ti ki ge kỹ nýtĩ ag tũg sór ja nĩ, hã ra tóg ũri ti kāmén mũ ha, něji," he ja ag tóg nĩgtĩ iso.

²⁴ Kỹ ag tóg isugrĩn Topě to vĩ há han ja nĩgtĩ, ag týtĩ tag mē kỹ.

2

Paulo jykre týtĩ apóstolo ũ ag mý há nĩ.

¹ Tag pãte 14 anos tũg kar sóg Jerusalém ra tĩg mãn gé, Barnabé mré, kỹ Tito tóg ěg mré vyr gé.

² Topě týtĩ inh mý: "ha ra tĩg," he ja vē. Tá jun kỹ sóg ag mý isý něn tó tĩ ěn kāmén kãn ja nĩ sir, sỹ fóg ag mý něn kāmén tĩ ěn ti. Vyr mý sóg tag to pã'i ag mré věmén. Fóg ag mý sóg: "Jesus ki rã kỹ ěg krenkren ke mũ, ěg týtĩ Moısés jykre han tũ ra," he tĩ. Kỹ sóg tag to pã'i ag ki jěmě sór ja nĩ, sỹ ag mý: "mý há, fóg ag týtĩ Moısés jykre han tũ ra, kanhgág ag ke gé?" he jé. Isý fagrĩnh mý rãnrhãj jãvãnh tóg tĩ, isý fagrĩnh mý carreira ri ke han jãvãnh tóg tĩ, hã kỹ sóg ag ki jěměnh vyr.

³ Kỹ tóg ag mý há tĩ, sỹ fóg ag mý, kanhgág ag mý Jesus hã tó mũ ti, sỹ ag mý Moısés tó tũ ra, sỹ ag mý Judeu ag jykre tó tũ ra, sỹ ag mý: "ha ājag gré fãr junun kym," he tũ ra. Hã kỹ ag tóg Tito mý: "ha kym," he ja tũ nĩ gé. Fóg týtĩ Grego vē, Tito tĩ, ũ týtĩ Jerusalém ra inh mré tĩ mũ ěn ti. Hã kỹ tóg ā gré fãr kym ja tũ nĩ, ti týtĩ týtĩ Judeu tũ nĩn kỹ.

⁴ Hã ra ón kỹ Jesus ki ge kỹ nýtĩ ag tóg ti kym sór ja nĩ. Ón kỹ ag tóg Jesus jykre ve sór ja nĩ. "Ti mý Moısés jykre tovãnh tũ'?" he ag tóg iso. Ag týtĩ Moısés jykre krěm ěg vĩn mãn sór ja vē, kỹ tóg ěg patrão ri ke nĩ, Moısés jykre ěn ti.

⁵ Hã ra sóg ag kato tē. Inh pi(jé) ag mý: "hỹ," he ja nĩgtĩ'. Ag kato tē tãvĩ han ja inh nĩgtĩ ājag jagfy, ājag týtĩ věnh vĩ há hã kri fi jé, Jesus kãme týtĩ ājag mý sér tĩ jé, ājag týtĩ Moısés jykre kufy ěn han tũ nĩn kỹ.

⁶ Kĩ pã'i ag tóg isỹ ag mỹ nén kāmén mũ ěn to: “tó kãn ja tũ ã nĩ,” he ja tũ nĩ gé, ùn mág ag. Vãsỹ ag tóg tỹ pã'i tũ ja nỹtĩgtĩ, ùn mág tag ag, hã ra tóg inh mỹ tỹ nén ù tũ nĩ, ha mẽ. Topě mỹ ti tỹ nén ù tũ nĩ, ěg tỹ ěprã ke ag mỹ tỹ ùn mág nỹtĩ ti, ùn sĩ nỹtĩ ti ke gé.

⁷ Kĩ tóg pã'i tag ag mỹ há tĩ, sỹ fóg ag mỹ, sỹ kanhgág ag mỹ Topě vĩ tónh ke ti, ùn gré fãr junun kym ja tũ ěn ag mỹ, Topě tỹ inh mỹ: “povo ù ag mỹ tónh tĩg,” hen kỹ. “Topě vỹ Pedro mỹ tó, ti tỹ Judeu ag mỹ tó jé, ùn gré fãr junun kym kỹ nỹtĩ ěn ag mỹ, hã ra ã tóg ù ag mỹ tónh ke mũ,” he ja ag tóg nĩ inh mỹ, Jerusalém tá ùn mág ag.

⁸ Topě ne Pedro ti tar han, ti tỹ tỹ Judeu ag apóstolo jě jé. Kĩ tóg isar han, isỹ tỹ ù ag apóstolo jě jé, ùn tỹ Judeu ag jykre han tũ kar ag.

⁹ Tag ve ag, Topě tỹ tag to isar han mũ ve ag, Tiago ti, Pedro ti, João ti ke gé. Igreja to pã'i vỹ tỹ ag nỹtĩ, kỹ ag tóg tỹ igreja nũna ri ke nỹtĩ. ěn ag ne inh nĩgė mẽ, Barnabé nĩgė ke gé. Hã kỹ ag tóg ěg mỹ: “há ti nĩ, ãjag rãnrãj ti, ãjag tỹ nén han sór mũ ti,” he mũ. “Ha fóg ag mỹ tónh mũjěg, kanhgág ag mỹ, jãvo ěg tóg ù tỹ Judeu ag jykre han mũ ag hã mỹ tónh ke mũ,” he ag tóg mũ ěg mỹ, pã'i ag.

¹⁰ Kĩ ag tóg ěg mỹ to vĩ, ěg tỹ ag kãmĩ ùn vėsỹrénh mũ ag jagãgtãn jé, ěg tỹ ag mỹ nén ù jěně jé, fag mỹ ke gé. Tag han sóg tũ mỹr. Inh pi(jé) kã jatun tí'.

Fóg ag tỹ Judeu ag ri ke nỹtĩ

¹¹ Kĩ kejěn Pedro tóg cidade tỹ Antioquia tá jun ja nĩgtĩ. Hã ra tóg tá kygně, kỹ sóg ti kato tě. Ti hã mỹ sóg ti kygně ěn tó.

¹² Kĩ Tiago tóg kejěn ti mré ke ù ag jěgně ja nĩgtĩ. Ag tỹ junjun tũ ki Pedro tóg fóg ag mré jěn ja nĩgtĩ, Judeu tũ ag mré. Hã ra Tiago tá ke ag tỹ junjun kỹ tóg sir Judeu tũ ag mré jěn jãvãnh nĩ sir, ti tỹ Judeu ag kaměg vě sir, ùn gré junun fãr kym tí ag jagfỹ. Kĩ Pedro tóg ón kỹ vyrmỹ nĩ mũ sir, fóg ag vãm kỹ.

¹³ Kỹ ti mré Judeu ù ag tóg fóg ag vãm mũ gé sir. Kỹ vãhã Barnabé tóg fóg ag vãm mũ gé sir. Ki kanhró ti nĩ vě, Barnabé ti, ěg tỹ jatun mỹ fóg mré nĩnh ke ti, ěg tỹ tỹ Judeu nỹtĩ ra.

¹⁴ Ag kar vỹ kygně kãn, Pedro nón. Jesus jykre pijé', věnh vĩ sér pijé'.

Sỹ ag tỹ kygně tag ve kỹ sóg věnh kar rĩnve Pedro mỹ tag tó, ha mẽ. “Ha vé, Judeu vỹ tỹ ã nĩ,” he sóg ti mỹ. “Á tỹ tỹ Judeu nĩ ra ã tóg fóg jykre han ja nĩgtĩ, fóg mré jěn kỹ,” he sóg ti mỹ. “Kỹ ã tỹ ne jé ùri Judeu jykre han mãn sór ně? Á tỹ ne jé fóg ag mỹ: Judeu ag jykre han nĩ, he sór ně?” he sóg ti mỹ.

Jesus ki ge kỹ nỹtĩ kỹ ěg povo pir ri ke nỹtĩ

¹⁵ Judeu krě vỹ tỹ ěg nỹtĩ, kỹ ěg tóg fóg ag tỹ Topě vĩ mranh tí ěn ri ke tũ nỹtĩ.

¹⁶ Hã kỹ ěg tóg Topě tỹ vãsỹ ěg jyvěn tí ěn ki kanhró nỹtĩ. Hã ra ěg pi(jé) tag tugrĩn Topě mỹ há nỹtĩ'. ěg tỹ Jesus Cristo ki ge kỹ ěg ti mỹ há nỹtĩ. Hã kỹ ěg tóg Jesus Cristo ki ge kỹ nỹtĩ, ěg tỹ ti mỹ tỹ ùn há nỹtĩ jé, ti tỹ ěg tỹ ti ki ge kỹ nỹtĩ tag tugrĩn ěg mỹ věnh pãte fón jé sir. ěg pi(jé) Topě tỹ vãsỹ ěg jyvěn tí ěn ki króm ja nĩgtĩ', hã kỹ ěg tóg ti mỹ tỹ ùn há tũ nỹtĩ, ěg tỹ ti tỹ vãsỹ ěg jyvěn han sór mũ ra. Topě pi(jé) Moisés tỹ ěg mỹ věnh jykre nĩm ja ěn tugrĩn ěg mỹ věnh pãte fón ke mũ'. Jesus Cristo tugrĩn ke vě.

¹⁷ Kỹ tóg ge nĩ. ěg tỹ Cristo ki ge tugrĩn ěg tóg Topě mỹ tỹ ùn há nỹtĩ. ěg tỹ Topě vĩ mranh kỹ, hã kỹ tóg ěg mỹ věnh pãte fón mũ, ěg tỹ tỹ Judeu nỹtĩn kỹ, kỹ tóg fóg ag mỹ věnh pãte fón mũ gé, kanhgág ag mỹ ke gé.

Ký ãjag hÿn iso: “ã tÿ tag tó ký ã tóg: Cristo vÿ Topê vÿ mranh tag to há nÿgtÿ, he tú,” he sór mÿ. Vó, há tú vê.

¹⁸ Há ra tag to jykrén, ha mẽ: ãg tÿ Topê tÿ vãsÿ vênh jykre to: “vênh jykre tag han mán ke tú ãg nÿ ha,” he kar ký: “vó, han mán jé ãg tóg ke mÿ, ge ra,” hen ký tóg vênhmÿ tí sir. Vênh jykre régre vê sir.

¹⁹ Topê tÿ vãsÿ ãg jyvên ja ên ki kanhró ãg tóg nÿtÿ. Ký ãg tóg ti tÿ ãg jyvên mÿ ên mẽ ký: “vênh jykre kórég han ký sóg Topê vÿ mranh tí,” he mÿ sir. Ti vÿ ki króm ki kagtÿg ãg tóg nÿtÿ, ãg tÿ ki króm sór mÿ ra. Há ra Cristo vÿ ãg jykre si tÿ tú' he ja nÿ. Ti mré tóg cruz to sa ja nÿ, ãg jykre si ti. Ký tóg ãg mÿ vênh jykre tãg nÿm mÿ sir; ãg tÿ tÿ Topê tú nÿtÿ jé.

²⁰ ãg jykre si vÿ tú' hé. Há ký ãg tóg ti tú há han tí, ãg tÿ ver ga kri mÿn ký. Topê kósín ki rá tigrÿn ãg tóg sir rÿnrÿr nÿtÿ. Ti fe vÿ tÿ ãg nÿtÿ, ãg kar vÿ tÿ ti fe nÿtÿ, ký tóg ãg jagfy ù tÿ ã tén tí ag mÿ vênh fêg, ký tóg ãg jagfy ter ja nÿ.

²¹ Ti ki ge ký nÿtÿ tigrÿn ãg tóg Topê mÿ há nÿtÿ. Topê tÿ ãg jagãgtãn há vê. ãg tÿ: “Topê jykre si ki króm ký inh hÿn Topê mÿ tÿ ùn há nÿ,” hen ký Cristo vÿ fagrÿnh mÿ ter ja nÿ. Ký ãg tóg Topê tÿ ãg jagãgtãn tag tÿ tú' he mÿ. Há tú vê mÿr.

3

ãg tÿ Jesus ki ge ký ãg krenkren ke

¹ Galácia tá ke', ãjag ne tóg krÿ tú nÿtÿ ve nÿtÿ'. Û nÿ ãjag krÿn kónãn, ãjag tÿ Jesus Cristo tovãn h sór jé? Ti tÿ ka to sa ja ên tó kãn inh mÿr ãjag mÿ, ký ãjag tÿ ne jé vãsÿ vênh jykre ên han sór nê?

² Ký sóg ãjag ki tag jêmê sór mÿ, ha mẽ: Topê ne ãjag mÿ ã kuprÿg jênê'. ãjag tÿ vãsÿ vênh jykre si ên mÿ mÿ tigrÿn ãjag mÿ jagrên ký nÿtÿ'? Vó, inh vÿ tigrÿn ãjag tóg Cristo ki ge ký nÿtÿ, ký ãjag tóg Cristo ki ge tigrÿn jagrên ký nÿtÿ.

³ Ký krÿ vênh mÿ han sór túg nÿ. Topê kuprÿg tÿ ãjag krÿn ký ãjag Jesus ki ge ja nÿ. Ký: vêsóg ki sóg ti jykre ki krov,” he túg nÿ.

⁴ Ke tú nÿ (mÿ) ra ãjag tóg fagrÿnh mÿ Topê kuprÿg tÿ jagrê nÿ ên vé. Há ra tóg inh mÿ fagrÿnh mÿ ke tú nÿ.

⁵ Ký ù tÿ ãjag mÿ ã kuprÿg jênêg mÿ ên vÿ ãg tÿ nén han vãn hÿn han ja nÿgtÿ gé. Ti mÿ ãjag tÿ vãsÿ vênh jykre si mÿ mÿ tigrÿn milagre ên hÿn han'? Vó. ãjag tÿ Cristo kãme sér mẽ ký ti ki ge tigrÿn tóg milagre ên hÿn han. Tag to jykrén.

⁶ Ký Abraão to jykrén nÿ gé. Topê ki tóg rá ký nÿ ja nÿ, ký tóg Topê mÿ tÿ ùn há nÿ sir, Abraão tí.

⁷ Tag to jykrén há han nÿ. ãg tÿ Abraão nón Topê ki ge ký nÿtÿ ký ãg tóg Abraão krê'krê ag ri ke nÿtÿ.

⁸ Topê vÿ fóg ag mré kanhgág ag krenkren han sór mÿ, ag tÿ ti ki ge ký. Û tÿ Judeu jykre han tú ag kar krenkren han sór tóg mÿ. Há tóg rán ký nÿ. Vãsÿ tóg rán ký nÿ, Topê vÿ tÿ rán ký nÿ ki. Vãsÿ tóg Abraão mÿ vênh vÿ sér tag tó ja nÿ, ha mẽ: “povo kar mÿ sóg vÿ há han ke mÿ, ã tigrÿn,” he ja tóg nÿ, Topê tí, Abraão mÿ.

⁹ Ti mÿ tóg vÿ há han ja nÿ, Topê tí, Abraão mÿ, ti tÿ ti ki rá há han ký. Ký tóg ù tÿ tí nón tí ki ge ký nÿtÿ ag mÿ vÿ há han ke mÿ gé.

¹⁰ Û tÿ vãsÿ vênh jykre si ên ki króm tigrÿn kren sór mÿ ag mÿ tóg vÿ kónãn ke mÿ, Topê tí, ag tÿ ki króm sór mÿ ra mranh ký, mÿr, ha mẽ. Há ký tag tóg rán ký nÿ, ha mẽ. “Topê tÿ ãg jyvên mÿ tóg e nÿtÿ, ký ti vÿ tóg rán ký nÿtÿ. ãg tÿ

ki króm kãn ke vë. Û tÿ mranh pir han mũ mÿ tóg vï kónãn ke mũ, Topê ti,” he tóg, Topê vï tÿ rán kÿ nĩ ki.

¹¹ Hã kÿ êg tÿ Topê tÿ vãsÿ êg jyvën mũ ên ki króm sór mũ ra êg tóg ti mÿ tÿ ùn há tù nÿtĩ, Topê ti mÿ, êg tÿ ki króm kãn tù nĩn kÿ. Hã kÿ tag tóg rán kÿ nĩ gé: “êg tÿ Topê ki ge kÿ nÿtĩn hã kÿ êg tóg ti mÿ tÿ ùn há nÿtĩ, kÿ êg tóg krenkren ke mũ ha,” he ja tóg nĩ, Topê vï tÿ rán kÿ nĩ ki.

¹² Kÿ Topê tÿ vãsÿ êg jyvën ti ên vÿ êg tÿ ti ki rã ri ke tù nĩ. Hã kÿ tóg tag tó ja nĩ, Topê ti, ha mẽ: “ãjag tÿ inh vï ki króm tugrĩn ãjag krenkren ke mũ,” he ja tóg nĩ. Hã ra êg tóg ki króm ki kagtũg nÿtĩ, hã kÿ êg tóg ti jykre si ki króm sór mũ ra ki króm ja tù nĩ, hã kÿ êg tóg krenkren ke tù nĩ sir.

¹³ Jãvo êg tÿ Cristo ki ge kÿ êg krenkren ke mũ. Topê vÿ êg mÿ vï kónãn ke mũ vë, êg tÿ ti tÿ vãsÿ êg jyvën mũ ên mranh ja to. Hã ra Cristo tóg êg kren han mũ, Topê tÿ êg mÿ vï kónãn tù nĩ jé. Cristo hã ne Topê mÿ: “ha ag jagÿ inh hã mÿ vï kónãn,” he ja nĩgtĩ'. Ti to tag tóg rán kÿ nĩ, ha mẽ: “ù tÿ cruz to sa mũ ên mÿ tóg vï kónãn mũ, Topê ti,” he ja tóg nĩgtĩ, Topê vï tÿ rán kÿ nĩ ki.

¹⁴ Ti tÿ Cristo hã mÿ vï kónãn kÿ tóg êg hã mÿ vï há han mũ sir, ti tÿ Abraão mÿ vï há han ja ên ri ke. Fóg ag mÿ tóg vï há han mũ, kanhgág ag mÿ ke gé, Jesus Cristo tugrĩn. Kÿ tóg êg mÿ ã kuprĩg jënêg mũ sir, êg tÿ ti ki rã ja tugrĩn. Tó ja ti nĩ, ti tÿ êg jagrën ke ti, kÿ tóg ke mũ, êg tÿ ti ki rã ja tugrĩn.

Abraão tÿ Topê vï kri nĩm kÿ tÿ ùn há nĩ

¹⁵ Inh kanhkã', êprã ke jykre to jykrén. Kejën ùn régre ag tóg jagnë mré nén ù to jykrén ti. To jykrén kar kÿ ag tóg rán tĩ, kÿ ag tóg ãjag jygi ránrán tĩ gé sir. Ag jygi ránrán kar kÿ ù tóg sir tÿ nén ù han mãn ke tù nĩ. Rán kÿ tóg nĩ nĩ, kÿ ag tóg tÿ ti rá ù han tù nĩgtĩ sir. Êprã ke jykre hã vë.

¹⁶ Kÿ Topê jykre vÿ ge nĩgtĩ gé. Topê vÿ Abraão mÿ tó ja nĩ, vãsÿ, ti tÿ ti mÿ nén ù há han ke ti, ti krë'krë mÿ ke gé. Kÿ tóg, ti tÿ ti krë'krë tó kÿ (tóg) Abraão krë'krë ag kã ùn pir hã tó ja nĩ. Ti pi(jé) Abraão mÿ: “ã krë'krë ag,” he ja nĩ'. “Ã krë'krë,” he ja ti nĩ, hã vÿ: Cristo, he mũ, hã vÿ: Abraão krë'krë ag kã ùn pir, he mũ.

¹⁷ Kÿ Topê tóg Moisés mur ke to hã Abraão mÿ ti tÿ ti krë'krë ag kã ù mÿ vï há han ke tag tó ja nĩ, ti tÿ Abraão mré jykrén kÿ. Kÿ, tag pãte, 430 (ke) anos tũg kÿ tóg Moisés mÿ ti tÿ êg jyvën ke ên nĩm. Hã ra tóg ã tÿ Moisés mÿ vënh jykre ên nĩm mũ ra tóg ã tÿ Abraão mÿ vënh jykre tó ja ên tÿ tũ' he ja tù nĩ.

¹⁸ Kÿ Topê tÿ Abraão mÿ: “ve jé ã tóg ke mũ, ã krë'krë mrë,” he ja ên tugrĩn tóg ve ja nĩ, Topê vï hã tugrĩn tóg ve ja nĩ, Abraão ti. Ti tÿ êg jyvën ên to ke tù vë, ti tÿ êg mÿ: “ên ve jé ãjag tóg ke mũ,” hen kÿ êg tóg venh ke mũ, ti vï tugnĩn.

¹⁹ Kÿ ãjag hÿn inh mÿ: “Topê tÿ ne jé Moisés mÿ ti tÿ êg jyvën ke ên tó ja nê?” he sór mũ. Êg tÿ: “venh jykre kórég han kÿ inh hÿn tóg Topê vï mranh,” he jé, hã jé Topê tóg Moisés mÿ ti tÿ êg jyvën ke ên nĩm ja nĩ, Jesus mur ke to hã. Abraão kósĩn tÿ Jesus mur ke tũg ki ke ja vë, Topê tÿ êg jyvën ja ên ti. Ti hã mÿ tóg vï há han sór ja nĩ, Topê ti, Jesus hã mÿ.

Topê tÿ Israel ag jyvën kÿ tóg ã tÿ jënë jafã ag mÿ tó ja nĩ. Kÿ Topê tÿ jënë jafã ag tóg Moisés mÿ tó ja nĩ, Moisés tÿ Israel ag mÿ kãmén jé. Topê tÿ êg jyvën jafã ti nĩ ja nĩ, Moisés ti.

²⁰ Topê jëgia kã jëg kÿ tóg Israel ag mÿ vï ja nĩgtĩ, Moisés ti, Topê tÿ Israel ag mré jykrén kÿ. Kÿ Moisés tóg ag jyvën, ag tÿ Topê vï ki króm jé. Topê tÿ êg kren han kÿ tóg ge tù nĩgtĩ. Æ pir mÿ tóg êg mÿ tó mũ, ti tÿ êg kren han sór mũ ti, Topê ti. Û tóg ti jagÿy êg mré vï tù nĩ sir.

Topě vŷ ěg jyvĕn, ěg tŷ ti vŷ ki kanhrĕn jé

²¹ Isŷ tag tó kŷ Topě hŷn ājag mŷ tŷ ũn ón mé nŷ ve nŷ. “Topě tŷ ěg jyvĕn mŷ ra ěg tóg ti vŷ mranh tí. Hĕ kŷ tóg ěg vóg kónĕn ke mŷ. Kŷ tóg ěg kren han ke tŷ nŷ,” he ājag hŷn tí. Vó, Topě pi(jé) ón tí. Hĕ ra Topě tŷ ěg jyvĕn mŷ ra ěg tóg ki króm tú nŷgtŷ, hĕ kŷ ti tŷ ěg jyvĕn tag tóg ěg kren han jāvĕnh nŷ. Ti tŷ ěg jyvĕn ěn tŷ ěg kren han mŷ ra ěg tóg ti tŷ ěg jyvĕn tugrŷn jykre kurŷj nŷtŷnh mŷ vĕ.

²² Hĕ ra tag tóg rán kŷ nŷ, ha mĕ: “vĕnh kar vŷ Topě vŷ mranh kĕn ja nŷgtŷ,” he ja tóg nŷ, Topě vŷ tŷ rán kŷ nŷ ki. Kŷ ěg tŷ Jesus ki ge hĕ kŷ ěg tóg krenkren ke mŷ sir. Ũ tŷ ti ki ge kŷ nŷtŷ ag hĕ vŷ krenkren ke mŷ.

²³ Kŷ, ěg tŷ Cristo ki rĕnh ke to hĕ ěg tóg Topě tŷ vĕsŷ ěg jyvĕn mŷ ěn krĕm nŷtŷ ja nŷgtŷ, kŷ tóg ěg kanhrĕn tí ja nŷgtŷ. Ti tŷ ěg mrĕnmrĕn ri ke ja ti nŷgtŷ, ti vŷ ti. Krĕm ěg tóg sigse kŷ nŷtŷ ja nŷgtŷ. ěg tŷ Cristo ki ge kŷ ěg tóg kygvar kŷ nŷtŷ sir. Cristo mur to hĕ ke ja vĕ, Topě tŷ vĕsŷ ěg jyvĕn ja ti.

²⁴ Kŷ tóg ěg jyvĕn ja nŷgtŷ, ěg tŷ Cristo ki rĕnh ke to jykrĕn jé. Cristo ki ge tugrŷn ěg tóg Topě mŷ tŷ ũn hĕ nŷtŷ ha.

²⁵ Kŷ, ěg tŷ ti ki rĕ kar kŷ ěg tóg Topě tŷ vĕsŷ ũn mŷ: ag jyvĕn nŷ, he mŷ ěn krĕm ke tŷ nŷtŷ ha.

²⁶ Topě krĕ vŷ tŷ ěg nŷtŷ ha, ěg tŷ Jesus Cristo ki ge kŷ.

²⁷ Ti jiji tó kŷ ěg kygpe kŷ nŷtŷ, kŷ ěg tóg ti ri ke nŷtŷ sir, tŷ ti hĕ ri ken hĕ vĕ.

²⁸ Hĕ kŷ ěg tóg tŷ jagnĕ hĕ nŷtŷ gé. Kŷ ěg tŷ ti ki ge kŷ Judeu ag vŷ fóg ag ri ke nŷtŷ, kŷ fóg ag vŷ kanhgág ag ri ke nŷtŷ gé. Ũ camarada ag vŷ ājag patrĕo ri ke nŷtŷ. Ag vŷ fag ri ke nŷtŷ gé. Nĕn ũ pir vŷ tŷ ěg nŷtŷ, ěg tŷ Jesus Cristo ki ge kŷ nŷtŷnh kŷ.

²⁹ Kŷ, ěg tŷ tŷ Cristo mré ke nŷtŷnh kŷ ěg tóg tŷ Abraĕo krĕ'krĕ ag ri ke nŷtŷ gé sir, ěg kar, kŷ ěg venh ke mŷ sir, Topě tŷ Abraĕo mŷ nĕn to mŷ ěn ti.

4

¹ Sŷ ājag mŷ kĕmĕn mĕn ke vĕ, sŷ nĕn tó ja ěn ti. Ũn rico kósin vŷ ti tŷ mĕn kĕn ke mŷ, ti mog kŷ. Ti tŷ ver sí nŷn kŷ tóg nĕn ũ venh ke tŷ nŷ ver. Ti panh camarada ri ke tóg nŷ ver, ti sí nŷn kŷ. Hĕ ra ti panh tŷ nĕn kar vŷ tŷ ti tŷ nŷtŷnh ke mŷ.

² Ge ra ag tóg ver ti kanhrĕn tí, ti sí nŷn kŷ. Kŷ ti kri ke ag ne ti tŷ to jykrĕn tí. Gen kŷ tóg kejĕn ti panh tŷ ti mŷ kurĕ nŷm ja ěn pétĕm ke mŷ. ěn kĕ tóg ā tŷ mĕn kĕn ke mŷ sir.

³ Ge ti nŷgtŷ ěg mrĕ, ěg tŷ tŷ Topě krĕ nŷtŷnh kŷ. Jesus mur ke to hĕ ěg tóg gŷr ri ke nŷtŷ ja nŷgtŷ. Nĕn kar tĕn kamĕj ja ěg tóg nŷgtŷ, krŷg tĕn mrĕ hĕ. ěg sigse ri ke han ja ag nŷgtŷ, nĕn tĕn ag.

⁴ Kŷ, ti kurĕ tá krŷg kŷ Topě tóg ā kósin jĕnĕ. ěprĕ ke fi ki tóg mur. Moisés tŷ ěg jyvĕn tí ěn ki króm kĕn ja tóg nŷgtŷ.

⁵ ěg kren han jé tóg mur, ti tŷ Moisés tŷ ěg jyvĕn ja ěn to ěg kygvĕn jé sir, ěg tŷ vĕhĕ tŷ Topě krĕ pĕ nŷtŷ jé sir. Tŷ ěg ti krĕ tŷ ja nŷtŷnh vĕ, hĕ ra Topě tóg ěg jĕ'ŷn sór mŷ ha sir.

⁶ Kŷ ěg tóg tŷ ti krĕ nŷtŷ sir. ěg tŷ tŷ ti krĕ nŷtŷnh kŷ tóg ěg mŷ ā kuprŷg jĕnĕg mŷ sir, ti tŷ tŷ ěg jagrĕ nŷ jé. Ti kósin kuprŷg ri ke ti nŷ, Topě kuprŷg ti. ěg jagrĕ tag tŷ ěg tóg sir Topě to: “ěg jóg mág,” he tí.

⁷ Hĕ kŷ ěg tóg tŷ ũ camarada ri ke tŷ nŷtŷ ha. Topě krĕ vŷ tŷ ěg nŷtŷ ha. Kŷ, ěg tŷ tŷ ti krĕ nŷtŷnh kŷ ěg tóg ti tŷ nĕn mĕn ke mŷ gé sir, ti tŷ ěg mŷ nĕn nŷm ke ti. Topě tŷ ěg mŷ nĕn han hĕ vĕ.

Paulo tǵ krī kufy nī

⁸ Vāsŷ ājag tóg Topē ki kagtīg ja nýtīgťi. Kŷ ājag tóg ón kŷ vēnh kǎgrá hǎ to: “ēg Topē vē!,” he ja nīgtī. Vēnh kǎggrá pi(jé) tŷ Topē nī!. Vēnh kǎggrá hǎ nón mūn kŷ ājag tóg sigse kŷ nýtī ja nīgtī.

⁹ Ūri ājag tóg Topē ki kanhró nýtī jāvo. Hǎ ra tóg vāsŷ ājag ki kanhró nī ja nī vē, Topē tī, ha mē. Kŷ ājag tŷ ne jé tŷ nén kar tǎn ag mré ke nýtī mǎn sór nē? Krój tī nýtī, nén kar tǎn tī, to ēg jagtar' he nýtī ja nīgtī, sigse kŷ ēg nýtī ja nīgtī, ēg tŷ tŷ ag mré ke ja nýtīn kŷ. Ājag mŷ sigse kŷ nýtī mǎn sór mŷ'?

¹⁰ Kurā to ājag tóg jykrén sór mŷ, kurā kórég to, kar kŷ kysǎ kórég to ke gé, prŷg kórég to ke gé.

¹¹ Inh kanē jur tóg tī, sŷ tag mē kŷ. Inh hŷn fagrīnh mŷ ag mŷ Jesus kāmén, he sóg tī, mŷr.

¹² Inh kanhkǎ, inh ri ke nýtī sórmnī. Ājag mré ke vŷ tŷ inh nī, kŷ inh ri ke han sórmnī. Tag hǎ to sóg vī mŷ, ājag mŷ. Ājag pi(jé) inh jū han'.

¹³ Sŷ ājag ki jun vén mŷ ěn mī ěkré, sŷ ājag mŷ Topē vī to vén mŷ ti. ěn kǎ sóg kaga nŷ ja nīgtī.

¹⁴ Kŷ tóg ājag mŷ e tī ja nīgtī, ājag tŷ inh kaga ven kŷ. Ge ra ājag tóg iso é he ja tū nīgtī, tī pi(jé) ājag mŷ jēgry ja nīgtī', inh kaga tī. Inh mŷ vī há han ja ājag tóg nīgtī, sŷ tŷ Topē tŷ jēnē jafǎ nīn kŷ, ājag mŷ. Ājag tŷ Jesus Cristo ki rīr mŷ ěn ri ke han ja ājag tóg nīgtī isŷ.

¹⁵ ěn kǎ tóg ājag mŷ sér pē tī ja nīgtī. Hǎ kŷ ājag tóg inh jagǎgtǎn ja nīgtī. Isŷ ājag mŷ ājag kanē to vī ra ājag hŷn inh mŷ vin ke mŷ vē. Kŷ tī tŷ ne jé ājag mŷ sér tū tī nē, ūri?

¹⁶ Ājag mŷ sóg ki hǎ to mŷ. Inh mŷ tag tugrīn ājag mŷ kórég nī ha'? Inh mŷ tóg e tī, tag tī.

¹⁷ Ū ag tóg ājag mŷ vī há han sór mŷ. Ag ón vē hǎ ra. Ag tŷ ājag tŷ inh kato tē han sór vē, hǎ kŷ ag tóg ón kŷ vī há han sór mŷ, ājag tŷ ag hǎ nón mŷ jé sir, isovǎnh kŷ.

¹⁸ Há tī nī vē, nén ū há tŷ ājag mŷ sér nīn kŷ. Isŷ ājag mré nīn kŷ nén ū há ěn tóg ājag mŷ sér nī ja nīgtī. Kŷ ājag tŷ tag tovǎnh tū nī kŷ tóg há tī, inh mŷ. Kŷ nén ū há hǎ to tar nýtīmīnī.

¹⁹ Inh krē', ājag mŷnh ri ke vŷ tŷ inh nī. ěg mŷnh fi ne kaga tī', ēg tŷ fi ki mur ken kŷ. Fi kaga tag ri ke han mǎn inh, ājag to. Ājag tŷ Cristo hǎ ri ke nýtīn kŷ tóg há tī, sŷ tag hǎ ve sór vē, hǎ jé sóg ēg mŷnh fi kaga ěn ri ke han mǎn mŷ, ājag tugrīn.

²⁰ Sŷ ājag mré nīnh há tóg tī, sŷ ājag mré vēmén jé, sŷ ājag mŷ kāmén há han jé sir. Sŷ komēr hǎ ājag mŷ kāmén há tóg tī. Hǎ ra sóg kanē jur mŷ, ājag to, hǎ kŷ sóg vī mŷ.

Agar fi mré Sara fag to vēnh jykre

²¹ Ājag kāmī ū tóg Moisés tŷ ēg jyvēn ja ěn han sór mŷ. Ājag hŷn mē kǎn ja tū nī, vāsŷ vēnh jykre ěn ti, hǎ kŷ ājag tóg han sór mŷ. Ājag tŷ mē há han kǎn ja nī ra ājag hŷn han sór ke tū nī vē. Hǎ mē, vāsŷ vēnh jykre ěn ti, ājag tŷ nén han sór mŷ ěn ti.

²² Tag vŷ rán kŷ nī, ha mē. Abraão vŷ kósin régre nī ja nīgtī. Ū mŷnh fi vŷ tŷ tī camarada fi nī, kŷ ū mŷnh fi vŷ tŷ tī prŷ pē fi nī.

²³ Kŷ Abraão tóg ã camarada fi mré nŷ ja nĩ, ti tŷ ver kófa tũ ra, kŷ ti kósin tóg fi ki mur mũ sir. Hã ra tóg ã prũ pẽ fi ki (tóg) ã kófa ra kósin mũ gé sir. Topẽ tŷ ti mŷ: “ã kófa nĩ ra ã tóg kósin ke mũ,” he jan hã vë.

²⁴ Topẽ tóg tag han, ěg tŷ ti jykre ki kanhrân jé. Ti tŷ ěg mŷ comparação han hã vë, fag to, ha mẽ. Topẽ tŷ ěg mré jykren mũ ri ke fag nŷtĩ, Abraão prũ fag. Agar fi vŷ tŷ Abraão camarada ja nĩgtĩ. Ti mré ke pẽ tũ fi vë. Kŷ fi tóg ri ke nĩ, Topẽ tŷ krĩ tŷ Sinai ta Moisés mŷ ti tŷ ěg jyvën ěn to ja ti. Tag vŷ Agar fi ri ke nĩ, ti camarada fi ri ke. Ũ tŷ vënh jykre ěn han mũ vŷ tŷ ũ camarada ri ke nŷtĩ, fi kóm. Tŷ ag tóg sir Topẽ mré ke tũ nŷtĩ, ũ tŷ Judeu jykre han mũ ag.

²⁵ Kŷ Agar fi vŷ krĩ tŷ Sinai ri ke nĩ, ga tŷ Arábia tá. Hã ra fi tóg cidade tŷ Jerusalém ri ke nĩ gé, hã vŷ: Judeu ag jykre han mũ ag kar, he mũ, hã vŷ: Jerusalém, he mũ. Tŷ ag Topẽ mré ke tũ nŷtĩ, ũ tŷ Judeu ag jykre han mũ ag.

²⁶ Hã ra ěg jamã vŷ kanhkã tá nĩ, Jerusalém tãg to ken hã vë, hã vŷ: kanhkã, he mũ. ěg mŷnh ri ke vë sir, Abraão prũ pẽ fi ri ke vë sir, Jerusalém tãg, he mũ tag ti.

²⁷ Tag to tag tóg rán kŷ nĩ, ha mẽ: “kurĩ ã tóg nĩ, krĕg vãnh ã tóg nĩ. Ge ra mŷ sér tũmnĩ, jamã há ra prĕrmnĩ, ã mŷ sér tũn kŷ, gĩr ũ tŷ ã ki mur ja tũ ra. Ā krĕ vŷ e tãvĩ nŷtĩnh mũ, ũn krĕg mũ fi krĕ e kãfór ti nŷtĩnh mũ, ã krĕ ti, ã mén tŷ ã fón mũ ra. Ũ tŷ fi mén mré tĩ mũ fi krĕ kãfór ti nŷtĩnh mũ, ã krĕ ti,” he ja tóg nĩ, Topẽ vŷ tŷ rán kŷ nĩ ki.

²⁸ Kŷ ěg tóg Isaque ri ke nŷtĩ. Topẽ tóg Isaque to Abraão mŷ: “ã kófa nĩ ra ã tóg kósin ke mũ,” he ja nĩ. Kŷ ěg tóg Cristo ki ge kŷ nŷtĩ kŷ tŷ Topẽ krĕ nŷtĩ, Topẽ tŷ: “inh krĕ vŷ tŷ ãjag nŷtĩnh mũ,” hen kŷ. Topẽ vŷ tag tugrĩn ěg tóg Isaque ri ke nŷtĩ.

²⁹ Kŷ Abraão kósin ve vŷ ti prũ pẽ fi kósin vóg kónãn ja nĩgtĩ. Abraão vŷ ã kófa tũ ra ã kósin ve ěn han, hã ra tóg Topẽ kuprĩg tugrĩn ã prũ pẽ fi kósin han, ã kófa pẽ ra. Kŷ ti kósin ve vŷ ěgno vóg kónãn mũ. Hã kŷ ěg tóg tag vĕg tĩ gé, ũri. Judeu jykre han mũ ag vŷ ěg vóg kónãn sór tĩ gé ver.

³⁰ Kŷ Abraão krĕ ag to tag vŷ rán kŷ nĩ, ha mẽ: “ã camarada fi fón nĩ, fi kósin mré,” he ja tóg nĩ. “Ā camarada fi kósin pi(jé) ã prũ pẽ fi kósin mré ã tũ mãn ke mũ”. Ā pir mŷ ti mãn ke mũ, ã prũ pẽ fi kósin ti,” he ja tóg nĩgtĩ, Topẽ vŷ tŷ rán kŷ nĩ ki, Abraão krĕ to.

³¹ Kŷ ěg tóg ti prũ pẽ fi kósin ri ke nŷtĩ. ěg pi(jé) tŷ ti camarada fi kósin ri ke nŷtĩ, ěg tŷ Jesus ki ge kŷ nŷtĩn kŷ.

5

Jesus tŷ ěg kygvãn ja

¹ Kŷ Jesus tóg ěg kygvã, vënh jykre si to, ěg kygvar kŷ nŷtĩ jé sir. Hã kŷ Judeu ag jykre ěn han sór tũg nĩ. Ũ tŷ tag to ãjag krĩn sór mũ ěn ag kato tĕmnĩ, ag nón mũ sór tũg nĩ, ãjag tŷ vënh jykre ěn krĕm sigse kŷ nŷtĩ mãn tũ nĩn jé sir.

² Hã kŷ sóg ãjag mŷ kãmén mũ, inh, hã vŷ: Paulo, he mũ. Sŷ ãjag mŷ nén tónh ken hã vë, ha mẽ: ãjag tŷ ãjag gré junun fãr kym kŷ, ãjag tŷ Judeu ag jykre han jé, kŷ Cristo vŷ ãjag mŷ nén ũ há han ke tũ nĩ.

³ Ha vé, sŷ tag to mãn ke vĕ gé, ha mẽ. Ājag tŷ ãjag fãr kym kŷ ãjag han kãn ke mũ sir, Moisés tŷ ěg mŷ vënh jykre nĩm ja ěn ti.

⁴ Hã ra ãjag tóg Cristo tovãnh ke mũ, ãjag tŷ Moisés tŷ ěg jyvën tĩ ěn han sór kŷ, ãjag tŷ Moisés jykre tugrĩn Topẽ mŷ tŷ ũn há nŷtĩ sór kŷ. Topẽ vŷ ěg jagãgtãn

sór mŭ. Ājag tŷ Moisés jykre han sór ký ājag tóg ti tŷ ěg jagāgtān tag to é he mŭ sir.

⁵ Ājag jāvo ěg tóg ěg tŷ Jesus ki gen ký Topě mŷ tŷ ūn há nŷtĭnh mŭ. ěg tŷ ti ki ge ký nŷtĭn ký ěg tóg Topě kuprĭg tŷ jagrě nŷtĭ. ěg jagrě tag tugnĭn ěg tóg Topě mŷ tŷ ūn há nŷtĭ.

⁶ Ha vé, ěg tŷ Jesus Cristo ki ge ký nŷtĭn ký tóg tŷ nén ū tŷ tŷ sir, ūn gré junun fār kym ja tí, ūn tŷ kym ja tŷ ti ke gé. Ti ki ge ký ěg tóg nŷtĭ, ký ěg tóg tŷ nén ū pir nŷtĭ ha, jagně to há ěg nŷtĭ ha.

⁷ Ha vé, mŭ há han ja ājag nĭgtĭ. Ājag tŷ ne jé tovānh sór nē? Ājag tŷ ne jé vĕnh vĭ há kri nĭm sór tŷ nĭ nē?

⁸ Topě tŷ ājag krĭn pijé'. Ti há ne ājag jé prĕr ja nĭgtĭ'.

⁹ Tag to jykrén: fermento sĭ vŷ ěg tŷ pāo kujāgia ký kri rūm ke tí, ký tóg tŷ sónsón ke kĕn tí, tŷ nĭ kĕn tóg tí, pāo ti. Topě vĭ kujāgia vŷ ge nĭ, ha mĕ. Ke tŷg nĭ.

¹⁰ ěg Senhor tŷ vŷ tŷ ājag nŷtĭ. Hā ký sóg ājag to: “ag hŷn ti tovānh ke tŷ nĭ,” he tí, “ag hŷn ti japry, ti jamĭn jagma mŭ mĕn ke mŭ,” he sóg tí. Ū tŷ ājag krĭn mŭ ěn ne vĕsŷrĕnh ke mŭ', ājag krĭn kónān ja tag to, ti tŷ tŷ pā'i nĭ ra.

¹¹ Inh pi(jé) ěg gré junun fār kym to: “ke ra,” he tí'. Isŷ ag mré tag to ra ag hŷn inh vóg kónān ke tŷ nĭ vĕ. Isŷ ag mré tag to ra ag hŷn iso jŷnh ke tŷ nĭ vĕ. ěg tŷ ěg fār kym tugrĭn krenkren tí ra ěg tóg Jesus tŷ ka to sa ja ěn to krenkren ke tŷ nĭ vĕ, ký tóg ag mŷ sér tí vĕ, isŷ vĕnh jykre si to tí ra. Hā ra sóg to tŷ nĭgtĭ.

¹² Ū tŷ tag to mŭ ag jé ājag grāfy kym kĕn, ū tŷ ājag krĭn kónān mŷ tag ag.

¹³ Hā ra Topě tóg ěg jé prĕr, ti tŷ ěg kygvān jé. Ti tŷ ěg kygvān ký ěg kygvar ký nŷtĭ ha. Ge ra ěg tóg ěg tŷ vĕsóg ki nĕn to jykrén mŭ ěn han sór ke tŷ nĭ, ti kórég nĭn ký. ěg tŷ há han ke tŷ ěg nĭ. ěg tŷ jagně to há nŷtĭ tag há ne há nĭ'. Jagně ki rĭr to ken há vĕ.

¹⁴ Ha vé, Topě tŷ ěg jyvĕn e ěn ki króm kĕn jé ěg tóg ke mŭ, ěg tŷ nén ū pir han ký, há vŷ: “ā régre ki rĭr há han nĭ, ā tŷ vĕnh ki rĭr há ri ke han nĭ, ā régre ki,” he mŭ.

¹⁵ Jāvo ājag tóg mŷg ri ke jagně mĕn sór mŭ, jagně to jŷn ký. Jagně tŷ tŷ' he jé ājag tóg ke mŭ, ge ký, ha vemnĭ.

Ěg tŷ ěg tŷ nén to ěn mŭ ěn han ke tŷ

¹⁶ Hā ký sóg ājag mŷ: “Topě kuprĭg tŷ ājag mŷ nén to mŭ ěn há han nĭ,” he sór mŭ. Ký ājag tóg ājag tŷ nén to ěn mŭ ěn han ke tŷ nĭ.

¹⁷ ěg tŷ nén to ěn mŭ vŷ Topě kuprĭg tŷ ěg mŷ nén to mŭ ěn kato tĕ nĭ, ký Topě kuprĭg vŷ ěg tŷ nén to ěn mŭ ěn kato tĕ nĭ gé. Jagně to rárá ag tóg tí, há ký ěg tóg ěg tŷ nén han sór mŭ ěn han ke tŷ nĭ.

¹⁸ ěg tŷ há ra Topě kuprĭg tŷ ěg mŷ nén to mŭ ěn han kĕn ký tóg ěg se mĕn ke tŷ nĭ sir, Topě tŷ vāsŷ ěg jyvĕn ja ěn ti.

¹⁹ ěg tŷ vĕsóg ki nĕn to jykrén mŭ ěn vŷ kórég nĭ, ký vĕnh kar vŷ ki kanhró nŷtĭ. ěg tŷ vĕsóg ki nĕn to jykrén to ken há vĕ, há vŷ: mĕn tŷ mré nŷ, he mŭ, prŷ tŷ mré nŷ, he mŭ, nĕn ū kavĕj han tí, he mŭ, ěg tŷ nén to ěn mŭ kar han tí, he mŭ,

²⁰ ěg tŷ vĕnh kāgrá to: Topě vĕ, he tí, he mŭ, kujá jykre han tí, he mŭ, curandeiro jykre han tí, he mŭ, jagně kato vāsān tí, he mŭ, jagně to ājag fe tŷ gŷm ke (ka)mĕ, he mŭ, jagně tŷ to jykrén kónān tí, he mŭ, vĕsŷ ūn mág han sór mŭ, he mŭ, vĕnh kĕpām ký nŷtĭ sór mŭ, he mŭ, jagně vĭ kato tĕ mŭ, he mŭ,

²¹ Jagně tũ to én tí, he mũ, kronkron tí, he mũ, krĩn tũ, he mũ, vėnh jykre pãno han tí tỹ hėn ri ke ke gé. Tag to sóg ājag jyvėn huri, hã ra sóg tó mãn sór mũ. Ũ tỹ tag han mũ ag pi(jé) Topě tỹ tỹ ěg pã'i nĩ venh ke mũ'.

²² Topě kuprĩg tỹ ěg kanhrãn mũ vỹ tag ri ke tũ nĩ. Hã kar ti nĩ. Ti tỹ ěg kanhrãn to ken hã vė, hã vỹ: jagně to há, he mũ, mỹ sér tí, he mũ, krĩ kuprã, he mũ, jagně to fe há nỹtĩ, he mũ, koměr hã vĩ, he mũ, jagně jagãgtãn tí, he mũ, jagně mỹ ón vãnħ, he mũ,

²³ vėsỹ ũn mág han sór tũ, he mũ, vėso jykrén tí, he mũ. Topě pi(jé) tag kato tẽ tũ', ti tỹ vãsỹ ěg jyvėn ti vỹ tag ri ke ja nĩgtĩ gé.

²⁴ ěg tỹ tỹ Jesus Cristo tũ nỹtĩn kỹ, kỹ ěg tóg tỹ ti tỹ ka to sa ja ěn ri ke nỹtĩ. Hã kỹ ěg tóg ěg tỹ nén to én mũ ěn han mãn sór ke tũ nĩ ha sir, ěg tỹ nén ki vė'ĩ mũ ěn han mãn sór ke tũ ěg nĩ ha.

²⁵ ěg tỹ Topě kuprĩg tỹ jagrě nỹtĩn kỹ, kỹ ěg tóg ti tỹ ěg mỹ nén tó mũ ěn han kãn ke mũ sir, ti kuprĩg tỹ ěg mỹ nén tó mũ ěn ti.

²⁶ Kỹ ěg tóg sir tỹ ũn mág nỹtĩ sór ke tũ nĩ, jagně jũ han mãn sór ke tũ ěg nĩ, jagně tũ mãn sór ke tũ ěg nĩ gé. Vėnh jykre há hã han jé ěg tóg ke mũ.

6

Ěg tỹ jagně jagãgtãn ke

¹ Inh kanhkã', kejėn ājag kãmĩ ũ tóg kygněg tí, vėnh vatãnh tá. Kỹ ũ tỹ kygněg mũ ěn mỹ: "kygně ā mỹr," hemnĩ, ājag tỹ Topě kuprĩg tỹ jagrě nỹtĩn kỹ. Koměr hã ti mỹ tómnĩ, ti tỹ kygněg mũ ěn ti. Kỹ vėso jykrén há han nĩ gé, ājag tỹ ti tỹ kygně ěn ri ke han tũ nĩ jé, ti kóm.

² Jagně ajudar hemnĩ, ājag mré ke ũ tỹ jagtar nĩn kỹ. Cristo tỹ ěg jyvėn mũn hã vė.

³ Kejėn ũ tóg vėsóg ki vėsỹ ũn mág han sór tí. Hã ra tóg tỹ nén ũ tũ nĩ. Kygněg ti tí, ũ tỹ tag to jykrén mũ tí. Vėnh hã mỹ tóg ón mũ sir.

⁴ Ājag jykre tugnỹm nĩ. Ti há nĩn kỹ tóg há tí, kỹ tóg tỹ ũn há nĩ, ũ tỹ vėnh jykre há han mũ ěn ti. Jagně mỹ: inh jykre há vỹ ā jykre há kãfór nĩ, he tũg nĩ.

⁵ Topě hã ne ěg ki ěg jykre há ěn vėg tí', kar kỹ tóg ěg mré ke ag jykre ki kanhró nĩ gé, Topě ti.

⁶ Kejėn ũ tóg ājag mỹ Topě vĩ kãmén mũ. Ti mỹ ājag tỹ nén ũ nĩmnĩ, ti tỹ ājag mỹ kãmén mũ kaja ti.

⁷ Kygně tũg nĩ, ěg tỹ Topě to é he kỹn pi(jé) há nĩ'. ěg tỹ ón kỹ: vėnh jykre há kãgmĩ kỹ inh nĩ ha, hen kỹ tóg ěg kren han ke tũ nĩ. Topě vỹ ěg jykre ki kanhró nĩ.

⁸ Ge ti nĩgtĩ, ěg tỹ nén han mũn ti. ěg tỹ ěg tỹ nén to én mũ ěn han kỹ ěg tóg ter ke mũ sir. Kỹ tog ěg tỹ mandioca ko vãnħ krãn kỹ ti nĩn ko kỹ ti tỹ ěg tén ěn ri ke nĩ sir. ěg tỹ Topě kuprĩg tỹ ěg mỹ nén tó mũ ěn han kỹ ěg tóg rĩr krỹg ja tũ ěn venh ke mũ, kỹ tóg ěg jakré tỹ kanėn há han kỹ ěg tỹ ko ěn ri ke nĩ sir.

⁹ Hã kỹ nén ũ há han to krónħ ke tũg nĩ. Ve jé ěg tóg ke mũ, ti kaně há ěn ti, Topě tỹ ěg mỹ nén ũ há han ke tí, ěg tỹ Topě jykre há tovãnħ tũ nĩn kỹ.

¹⁰ Hã kỹ ěg tóg vėnh kar jagãgtãn ke mũ. Kỹ tóg há tãvĩ nĩ, ěg tỹ ěg mré Jesus ki ge kỹ nỹtĩ ag jagãgtãn ti.

Paulo tỹ ag jyvėn mãn

¹¹ Ha vé, rá mág han sóg tí, sỹ vėsóg ki ājag mỹ rán kỹ.

¹² Ũ ag tóg ājag kutãn tí, ājag tỹ ājag gré junun fár kym jé. Ag tỹ vėnh mỹ nén ũ há han sór vė, ha mẽ. Judeu ag tóg ěg vóg kónãn tí, ěg tỹ fóg ag mỹ: "ājag gré

junun fár kym nĩ,” he tũ to. Ũ tỹ ãjag kutãn mũ ag vỹ Judeu tỹ ag vóg kónãn ěn ve sór tũ nĩ. Cristo tỹ cruz to sa ja ra ag vėsỹrėnh sór tũ nĩ, hã kỹ ag tóg ãjag mỹ: “ha ãjag fár kym nĩ,” he mũ. Ag vỹ jēmē tũg nĩ.

¹³ Ha vé, ag tỹ ãjag gré junun fár kym ja ra ag tóg Topě tỹ vãsỹ ěg jyvėn tĩ ěn han kãn ja tũ nĩgtĩ. Hã ra ag tóg ãjag mỹ ãjag tỹ vėnh kym ke ti tó mũ, ag tỹ vėnh kar mỹ ãjag tỹ nén han mũ tó jé sir. Tag ki ag tóg tỹ ũn mág nỹtĩ sór mũ, vėsóg ki.

¹⁴ Ag jãvo sóg tỹ ũn mág nĩ sór tũ nĩ. Nén pir tóg inh mỹ sér tĩ, hã vỹ: ěg pã'ĩ tỹ Jesus Cristo tỹ cruz to sa ja ěn, he mũ. Kỹ ěprã ke jykre inh mỹ tũ tĩ ha. Jesus tỹ cruz to sa kỹ tóg inh mỹ tỹ tũ' he ja nĩ, ěprã ke jykre tỹ, Jesus ti. Kỹ sóg han sór tũ nĩ ha. Jãvo sóg cruz to sa ri ke han kỹ nĩ gé, ěprã ke jykre mỹ sóg hur tũg. Sỹ han tũ to ken hã vė.

¹⁵ Ũ ag tóg ãjag fár kym tĩ, jãvo ũ ag tóg kym tũ nĩ gé. Hã ra tóg tỹ nén ũ tũ nĩ gé. Topě mỹ ěg há nỹtĩ, ěg tỹ ti ki ge kỹ nỹtĩn kỹ. Topě vỹ ěg han mãn, kỹ ěg tóg tỹ ũn tãg nỹtĩ ha. Tag hã ne há nĩ'.

¹⁶ Ũ tỹ vėnh jykre tãg tag han mũ ag krĩ kuprãg ti tĩ, Topě ti, ũ tỹ ge jagãgtãn ti tĩ. Topě tũ ag hã vė ha. Israel pė ag hã vė sir.

¹⁷ Kỹ inh kutãn mãn tũg nĩ, inh vėsỹrėnh han mãn tũg nĩ. Jesus vėsỹrėnh ja ěn ri ke han inh mỹr, hã kỹ sóg ti ri kén kygven kỹ nĩ ha.

¹⁸ Inh kanhkã', ěg pã'ĩ tỹ Jesus Cristo jé ãjag tar han, ti jé ãjag krĩ kuprãg. Hã vė.

PAULO Tÿ CARTA HAN: ÉFESO TÁ KE AG Mÿ CARTA

¹ Paulo tÿ rá vë. Isÿ cidade tÿ Éfeso tá ke ag mÿ rán há vë. Jesus Cristo vÿ inh fëg', sÿ tÿ ti apóstolo jë jé, Topë tÿ isÿ apóstolo han kÿ. Há kÿ sóg äjag mÿ carta tag rán mü. Topë tÿ vÿ tÿ äjag nÿtÿ, kÿ äjag tóg cidade tÿ Éfeso tá Jesus to vënhmân tÿ. Jesus Cristo tovãnh tÿ äjag tóg nÿtÿ.

² Ëg jóg tÿ Topë jé äjag tar han, ti jé äjag krÿ kuprëg, ëg Senhor tÿ Jesus Cristo ti ke gé.

Cristo tÿ ëg mÿ vÿ há han mü

³ Ëg kar jé Topë mÿ vÿ há han, ëg jé ti mÿ agradecer hé, ëg Senhor tÿ Jesus Cristo panh mÿ. Ëg tÿ Cristo ki ge kÿ nÿtÿn kÿ tóg ëg mÿ kanhkã ti ven sór mü, Topë ti. Tá tóg ëg mÿ nén (ü) há kar ven sór mü gé, kÿ nén ü tóg ëg mÿ tÿ' henh ke tÿ pë nÿ, tá. Há jé tóg ëg mÿ ä kuprëg jënë, ëg tÿ ti tugrÿn nén (ü) há kar ve jé.

⁴ Väsÿ tóg ëg kuprëg ja nÿ, ä tÿ nén (ü) kar han ke to há tóg ëg kuprëg ja nÿ, Topë ti, ëg tÿ tÿ ti tÿ nÿtÿ jé, Cristo tugrÿn. Ëg tÿ ti ri ke nÿtÿ jé tóg ëg kuprëg, ëg tÿ kÿgnëg tÿ nÿ jé. Ti fe vÿ tÿ ëg nÿtÿ.

⁵ Há kÿ tóg ëg kuprëg, ëg tÿ tÿ ti krë nÿtÿ jé, Jesus Cristo tugrÿn. Ti há ne vësóg ki ëg kuprëg ke to jÿkrén ja nÿgtÿ'.

⁶ Ëg tÿ ti mÿ vÿ há han jé tóg ëg kuprëg. Ün mág vÿ tÿ ti nÿ, ëg jagãgtãn tóg tÿ, há kÿ tóg há tÿnh mü, ëg tÿ ti mÿ agradecer hen kÿ. Ti kósin pir tugrÿn ëg tóg tÿ ti fe pë nÿtÿ.

⁷ Ti há ne ëg kren han tÿ', ti kyvénh tÿ ëg jagfy kãkutë ja nÿn kÿ. Tÿ tóg ëg tÿ Topë vÿ mranh ja ën tÿ tÿ' he ja nÿgtÿ, ä kyvénh tÿ. Topë tÿ ëg mÿ nén ü há han há vë.

⁸ Há ra tóg tÿ' henh ke tÿ nÿ, ti tÿ ëg mÿ nén nÿm ja tag tÿ. Krÿ há ti nÿ, nén kar to jÿkrén há han ti tÿ, Topë ti.

⁹ Väsÿ tóg to jÿkrén ja nÿgtÿ, kÿ tóg ùri ëg mÿ tó mü sir, ti tÿ Cristo tugrÿn nén han sór mü ti.

¹⁰ Cristo tÿ tóg ün mág han sór mü, vënh kar kri ke, kanhkã tân ag kri ke, ga kri mü ag kri ke gé, kÿ vënh kar vÿ tÿ ti krëm ke nÿtÿnh mü. Povo pir ri ke ag nÿtÿnh mü, kurã ën kã. Ti kurã ki tóg ti tÿ ün mág han sór mü ha, Topë ti.

¹¹ Ëg tÿ Cristo ki ge kÿ nÿtÿ kÿ ëg tóg venh ke mü gé, Topë tÿ ä tÿ ag mÿ nén ven ke mü ën ti. Ëg tÿ ën ve jé Topë tóg ëg kuprëg ja nÿ, ti tÿ ëg kuprëg to jÿkrén kÿ. Nén kar to tóg jÿkrén há han tÿ, vësóg ki, kÿ tóg ëg kuprëg to jÿkrén ja nÿ gé,

¹² ëg tÿ Jesus há pin kÿ ti ki ëvãnh jé. Ëg tÿ ti ki ëvãnh kar kÿ ëg tóg vãhã Topë mÿ vÿ há han ki kanhró nÿtÿ. Ti há ki ëvãnh kÿ ëg tóg Topë to: "ün mág vÿ tÿ ti nÿ," he' he tÿ sir.

¹³ Ti kãme më ja äjag tóg nÿgtÿ gé, vënh vÿ há ën, ti tÿ ëg krenkren han sór mü kãme. Ti kãme ën më kÿ äjag tóg ti ki ge jëg. Kÿ Topë tóg äjag mÿ ä kuprëg jënë. Tÿ tóg äjag jagrën há han. Ti tÿ äjag nÿgÿëg há vë, ä kuprëg tÿ.

¹⁴ Ëg jagrë tugrÿn ëg tóg ki kanhró nÿtÿ, ti tÿ ëg mÿ ä tÿ ëg mÿ nén tó ja ën ven kãn ke ti. Kejën ëg tóg venh ke mü, ha vemnÿ, ëg tÿ tÿ ti tÿ nÿtÿn kÿ, kÿ tóg ëg mÿ sér tÿnh mü. Kÿ ëg tóg ti mÿ vÿ há han ke mü, ti tÿ tÿ ün mág jën kÿ.

Paulo tỳ Topě mré vī mũ

¹⁵ Ājag tỳ ěg Senhor tỳ Jesus ki ge mẽ kỳ inh nĩ, ājag tỳ jagně to há nýtĩ ti ke gé, ājag tỳ ù tỳ Jesus ki ge kỳ nýtĩ ag kar to há nýtĩ ti.

¹⁶ Hã kỳ sóg ājag to Topě mỳ: “há ti nĩ,” he tĩ. Ājag to ti mré vēmén to krónh ke vãnh inh nĩgtĩ.

¹⁷ Ěg Senhor tỳ Jesus Cristo panh mré sóg vēmén tĩ, ěg jóg mré, ùn mág pẽ ěn mré. Ti mré vēmén kỳ sóg ti mỳ: “ã kuprig tỳ ag krĩn nĩ,” he tĩ, “ã kuprig tỳ ag mỳ vãnh kãmén há han nĩ, ag tỳ ã ki kanhrãn há han jé,” he sóg tĩ.

¹⁸ “Ha ag mỳ krĩ há nĩm. Ha ag kaně tar han, ag tỳ ve há han jé. Ag kuprẽg ja ã tóg nĩ, ã tỳ ag mỳ nĩm jé, ã tỳ nén to ja ěn ti. Ag tỳ tỳ ã tũ nýtĩn kỳ ã tóg ag mỳ ã tũ vin ke mũ, ã tỳ nén to mũ ěn ti, hã ra tóg e tãvĩ nýtĩ, ã tỳ ag mỳ nén vin ke mũ ěn ti.

¹⁹ Tar tãvĩ ã tóg nĩ gé, kỳ ã tóg ag mỳ nén kar há han tĩ tag ki, tá ke gé, ag tỳ ã ki ge kỳ nýtĩn kỳ. Ag mỳ tag kãmén nĩ,” he sóg tĩ, Topě mỳ.

²⁰ Ti tar tãvĩ nĩn kỳ tóg Cristo ter kar kỳ ti rĩn mãn ja nĩgtĩ gé. Kỳ tóg ti mỳ: “ha inh pẽgia tá nĩ,” he ja nĩ gé, kanhkã tá.

²¹ Ti tỳ tóg pã'i mág han, kỳ tóg tỳ pã'i kar ag kri ke jẽ, kanhkã tãn kar ag kri ke, ěg tỳ ùn vэг tũ kar ag kri ke, ùn tar ag, ùn mág ag. Tỳ tóg ag kri ke kar jẽ, Cristo ti, kỳ ti jiji vỹ vãnh kar ag jygji kãfór nĩ gé, ěg tỳ ùri ùn to mũ ag jygjy, ěg tỳ kar kỳ ùn tónh ke ag jygji mré hã.

²² Kỳ Topě tóg ti krẽm vãnh kar vin kãn. Kỳ tóg tỳ vãnh kar kri ke jẽ sir, Cristo ti. Kỳ tóg tỳ ěg kri jẽ nĩ sir, ěg tỳ tỳ ti tũ nýtĩn kỳ.

²³ Jãvo ěg tóg ti há ri ke nýtĩ gé sir, kỳ ěg tóg tỳ ùn pir nýtĩ jagně mré, Jesus ti mré ke gé. Ěg há vỹ ã pir mỳ tỳ nén ù tũ nĩ. Ěg krĩ mré tóg tỳ nén ù pir nĩ, ěg há ti. Rĩ ke ti nĩ, ěg tỳ Jesus mré tỳ ùn pir nýtĩ ti. Ti hã vỹ nén kar rĩr han tĩ, Jesus ti.

2

Ti ki ge kỳ ěg rĩnrĩr nýtĩ

¹ Vãsỹ ājag tóg nũgme ki vár ke mũ vẽ, ājag tỳ ti vĩ ki króm ja tũ nĩn kỳ, ājag tỳ ti vĩ mranh ja nĩn kỳ.

² Ěn kã ājag tóg ěprã ke ag jykre pãno jagma mũ ja nĩgtĩ, Nén-Kórég pã'i mág ěn tỳ ājag krĩn kỳ, ù tỳ nén ù ù tãn ag kri pã'i ěn tỳ ājag krĩn kỳ. Tỳ ti krĩg tãn ag kri pã'i nĩ gé. Ěn vỹ tỳ ù tỳ Topě vĩ mranh tĩ ag jagrẽ nĩ mỹr.

³ Vãsỹ ěg tóg tỳ ti tũ nýtĩ ja nĩgtĩ gé, ti krẽ ag ri ke. Ěn kã ěg tóg ěg tỳ nén to ěn mũ ěn han ja nĩgtĩ, ěg tỳ nén to jykren mũ kar ěn ti. Kỳ Topě tóg ěg vóg kónãn mũ vẽ, ti tỳ ag vóg kónãn ke ěn ri ke.

⁴ Hã ra Topě tóg ěg jagãgtãn pẽ han. Ěg to tóg há tãvĩ nĩ, kỳ ěg tóg tỳ ti fe nýtĩ.

⁵ Ěg tỳ ti vĩ mranh ja nĩn kỳ ěg tóg vẽser ri ke nýtĩ ja nĩgtĩ, hã ra tóg ěg rĩnrĩn mãn ja nĩgtĩ, Cristo mré. Ti tỳ ěg jagãgtãn kỳ tóg ěg krenkren han ja nĩgtĩ.

⁶ Cristo mré tóg ěg rĩnrĩn mãn ja nĩgtĩ gé. Kanhkã tá tóg ěg tỳ ùn mág han ke mũ, Jesus Cristo mré hã.

⁷ Tag ve kỳ vãnh kar vỹ ki kanhró nýtĩnh mũ, Topě tỳ Jesus Cristo tugrĩn ěg to há tãvĩ nĩn ki. Hã jé tóg ěg mỳ nén ù há ěn ven ke mũ. Tũ' he jãvãn ti nĩ, ti tỳ ěg mỳ nén ven ke ti. Ti tỳ Jesus Cristo to há nĩn kỳ tóg ěg mỳ nén ù há kar ven ke mũ.

⁸ Ha vé, ti t̄y ẽg jagãgtãn k̄y tóg ẽg kren han ja nĩgtĩ, ẽg t̄y ti ki ge k̄y n̄ytĩn k̄y. Ẽg t̄y v̄esóg ki v̄enh kren han pijé'. Topẽ t̄y ẽg kren han ja v̄e m̄yr. K̄y tóg ti t̄y ẽg m̄y presente han ri ke nĩ.

⁹ Ẽg v̄asãn pijé'. Ẽg t̄y ẽg v̄asãn to kren tĩ ra ẽg Topẽ m̄y: "há inh nĩ, v̄asãn ja inh nĩ, hã k̄y sóg kren m̄ũ," henh m̄ũ v̄e. Hã ra ẽg pi(jé) ẽg v̄asãn to kren ke m̄ũ'. Ti t̄y ẽg jagãgtãn v̄e m̄yr.

¹⁰ Ti hã ne ẽg han mãn ja nĩgtĩ'. Jesus Cristo t̄y tóg ẽg han ja nĩgtĩ, ẽg t̄y v̄enh jykre há han jé. Topẽ v̄y ẽg m̄y v̄enh jykre há tag nĩm kãn, ẽg t̄y v̄enh jykre tag jagma m̄ũ jé.

Ẽg t̄y Cristo mré t̄y ùn pir n̄ytĩ

¹¹ Ẽg t̄y v̄as̄y n̄en han tĩ ja ẽn mĩ ẽkré. Fóg v̄y t̄y ẽg n̄ytĩ, Judeu ag t̄y ù to: "ùn gré junun fár kym ja tũ ag," he m̄ũ ẽn ag v̄y t̄y ẽg n̄ytĩ. Jãvo Judeu ag v̄y ẽg gré junun fár kym tĩ. Hã ra ẽg fár v̄y t̄y ẽprã ke nĩ.

¹² Û t̄y kym tĩ ag jãvo ẽg tóg v̄as̄y Cristo ki kagtĩg ja n̄ytĩgtĩ, k̄y ẽg pi(jé) t̄y Israel ag mré ke n̄ytĩ ja nĩgtĩ', v̄as̄y. Topẽ t̄y Israel jóg'jóg ve ag mré n̄en ù to jykren m̄ũ ẽn ki kagtĩg ja ẽg tóg n̄ytĩ gé, Topẽ ki kagtĩg ja ẽg tóg n̄ytĩgtĩ gé, k̄y ẽg tóg Topẽ t̄y ẽg m̄y n̄en ven ke m̄ũ tag ki kagtĩg ja n̄ytĩgtĩ gé.

¹³ Ẽn kã tóg ẽg m̄y kuvar gy nĩ ja nĩgtĩ, Topẽ ti. Ûri tóg ẽg m̄y kakó nĩ ha, Topẽ ti, ẽg t̄y Jesus Cristo ki ge k̄y n̄ytĩn k̄y. Ti t̄y ẽg jagfy ã kv̄enh kujẽn ja tugrĩn tóg ẽg m̄y kakó nĩ ha.

¹⁴ Ûri ẽg tóg t̄y povo pir ri ke n̄ytĩ, Judeu ag, fóg ag, kanhgág ag. Topẽ hã ne ẽg t̄y jagnẽ to há n̄ytĩ tag han'. Jagnẽ fyn k̄y ẽg tóg n̄ytĩ ja nĩgtĩ, hã ra tóg v̄afynyn ẽn kókén, Jesus ter k̄y. Ẽg t̄y tóg povo pir ri ke han, ẽg t̄y jagnẽ kato v̄asãn mãn tũ nĩ jé.

¹⁵ Topẽ t̄y v̄as̄y Judeu ag jyv̄en tĩ ẽn t̄y tũ' he ja tóg nĩgtĩ, ti t̄y ag jyv̄en kar ẽn t̄y. Ẽ ter tugrĩn tóg t̄y tũ' he ja nĩgtĩ, ti t̄y ẽg m̄y ù tãg nĩm jé sir. N̄en ù r̄egre t̄y tóg ùn pir han ja nĩgtĩ, ù tãg, ẽg t̄y jagnẽ kato v̄asãn mãn tũ nĩ jé. Topẽ t̄y n̄en to jykren m̄ũn hã v̄e. Cristo tugrĩn tóg ẽg t̄y ùn pir han, ẽg t̄y t̄y v̄enh kanhkã pir n̄ytĩ jé.

¹⁶ Cristo v̄y ã ter k̄y Topẽ t̄y ẽg kar to há nĩ han, Judeu mré Judeu tũ ag to. Ti t̄y cruz to sa k̄y tóg Topẽ t̄y ẽg kato tẽ ẽn t̄y tũ' he kãn ja nĩgtĩ.

¹⁷ Jesus t̄y n̄en han jan hã v̄e. K̄y tóg Topẽ t̄y ẽg to há nĩ tag to ja nĩ, ẽg m̄y, ẽg t̄y t̄y Judeu tũ ra, ẽg m̄y ke gé, ẽg t̄y t̄y Judeu n̄ytĩn m̄y.

¹⁸ Ti tugrĩn ẽg tóg ẽg jóg t̄y Topẽ mré v̄em̄en tĩ ha, ẽg t̄y t̄y Judeu tũ ra, ẽg ke gé, ẽg t̄y t̄y Judeu n̄ytĩ ag ke gé. Ti kuprĩg v̄y t̄y ùn pir nĩ, hã t̄y ẽg kar tóg ti mré v̄em̄en tĩ.

¹⁹ Hã k̄y ẽg kórég tũ n̄ytĩ ha. Ẽg pi(jé) t̄y ẽmã ù tá ke n̄ytĩ ha', ti m̄y, ẽg t̄y t̄y fóg n̄ytĩ ra, ẽg t̄y t̄y kanhgág n̄ytĩ ra ke gé. Ẽg mré ke v̄y t̄y ẽg n̄ytĩ ha, Topẽ tũ v̄y t̄y ẽg n̄ytĩ ha. Topẽ kré v̄y t̄y ẽg n̄ytĩ ha.

²⁰ Topẽ jo ãn ri ke v̄y t̄y ẽg n̄ytĩ. Ti n̄una runrur ri ke v̄y t̄y apóstolo n̄ytĩ, Topẽ v̄i tó tĩ ag mré. Ti n̄una t̄ej ri ke v̄y t̄y Jesus Cristo nĩ. Ti kuge ri ke v̄y t̄y ẽg n̄ytĩ, ẽg mré.

²¹ Ìn n̄una tugrĩn ãn tóg jẽ nĩ, k̄y tóg kom̄er hã kar k̄y j̄enh m̄ũ. Ti kar k̄y jẽ k̄y tóg t̄y ẽg Senhor tũ jẽ sir.

²² Cristo v̄y kom̄er hã ti han m̄ũ, ãn kar ri ke ti, hã v̄y: ẽg, he m̄ũ. K̄y Topẽ kuprĩg v̄y kr̄em ẽmãn nĩ, ẽg kãkã. Û t̄y Jesus ki ge m̄ũ ag to ken hã v̄e.

3

Paulo tÿ fóg mré kanhgág ag mÿ Jesus kāmén

¹ Hã ký sóg Topē mré ví tí, inh, hã vÿ: Paulo, he mÿ. Se ký inh jé, Jesus Cristo tugrîn. Isÿ ājag to há jēn ký sóg se ký jē, isÿ ũ tÿ Judeu jykre han tú kar ag to há jēn ký.

² Ājag hÿn tóg Topē tÿ isar han, mÿ ēn mē. Isÿ ājag ki rîr jé tóg isar han, isÿ ũ tÿ Judeu jykre han tú ag ki rîr jé.

³ Topē ne inh mÿ ā tÿ vāsÿ nén to jykren mÿ ēn tó', hã ra ěg tóg ki kagtĭg ja nÿtĭgtĭ. Vãhã tóg inh mÿ tó mÿ ha', hã ký sóg ājag mÿ kāmén sí han huri, Topē tÿ nén ũ tãg to jykren mÿ ēn ti.

⁴ Ājag tÿ inh vėnh rán tag ve ký ājag tóg venh ke mÿ sir, inh jykre ti. Cristo vÿ nén ũ tãg han jé kãtĭg ja nĭ, ēn ki kanhró sóg nĭ.

⁵ Ti tÿ inh mÿ tag tó to há ag tóg ki kagtĭg ja nÿtĭgtĭ, ěg jóg'jóg ag, ěprã ke kar ag. Ūri tóg ěg mÿ tó mÿ, Topē ti, ā kuprĭg tÿ. Apóstolo ag mÿ tóg tó mÿ ha, ũri, tí tú ag mÿ, ěg jyvėn tí ag mÿ ke gé.

⁶ Ti tÿ ěg mÿ nén ũ tãg tó mÿn hã vė, ha mē. Vāsÿ Topē tóg Judeu ag hã mÿ ví há han ja nĭ. Ūri tóg fóg ag mÿ, kanhgág ag mÿ ví há han mÿ ha, Judeu ag mré. ěg kar vÿ tÿ Jesus Cristo há ri ke nÿtĭ ha, ěg tÿ ti ki ge ký nÿtĭn ký. Topē tÿ Judeu ag mÿ nén tó mÿ ēn, ěg tÿ Jesus Cristo tugrîn nén venh ke mÿ ēn ve kãn jé ag tóg ke mÿ gé, ěg mré, fóg ag, kanhgág ag. Ū tÿ Jesus ki ge ký nÿtĭ ag hã vÿ venh ke mÿ.

⁷ Tag to Topē tóg inh mÿ: “ha fóg kar ag mÿ, kanhgág kar ag mÿ tónh tĭg,” he ja nĭgtĭ, ký tóg tag to isar han. Ti tar nĭn ký tóg isar han, inh rãnrãjt o.

⁸ Topē tú kãsir ag kar jakrēm inh nĭ, hã ra tóg isar han, sÿ fóg ag mÿ, kanhgág ag mÿ Cristo kāmén jé. Cristo tugrîn tóg ěg mÿ nén (ũ) há tãvĭ han ke mÿ, Topē ti. Hã tó sóg tí, vėnh kar mÿ.

⁹ Vėnh kar mÿ sóg kāmén tí, Topē tÿ nén han ke ti, ti tÿ ā tÿ vāsÿ nén to jykren mÿ tag han ke ti. Vāsÿ tóg to: “tag han jé sóg ke mÿ,” he ja nĭgtĭ. Ti tÿ nén kar han tũg ki tóg to jykren ja nĭgtĭ. Ti hã ne nén kar han'. Ký tóg, ā tÿ ēn han ke to jykren mÿ ra tóg ũ mÿ tó ja tú nĭ ver.

¹⁰ Ūri tóg ve há tí ha, ti tÿ vāsÿ nén to jykren mÿ ēn ti. Kanhkã tãn ag mÿ tóg ve há tí ha, tá pã'i ag mÿ, Topē krĭ há tag vÿ ve há tí ha, ti jykre há pē ēn ti. Ag tÿ ũ tÿ Jesus ki ge ký nÿtĭ ag ve ký ag tóg Topē jykre ki kanhró nÿtĭ, kanhkã tãn ag.

¹¹ Vāsÿ tóg to jykren, Topē ti, ti tÿ ěg pã'i tÿ Jesus Cristo tugrîn nén (ũ) han sór mÿ ēn ti.

¹² Ti hã ki ěg ge ký nÿtĭ, hã ký ěg tóg jatun mÿ Topē mré vėmėn tí ha. ěg kanė jun mãn ke tú ti nĭ ha, Topē ti.

¹³ Hã ký sóg ājag mÿ: “sÿ ājag jagfy jagtar nĭ tag to jykren tũg nĭ,” he mÿ. Inh jagtar mĭ ěkrėn ký Jesus to krónh ke sór tũg nĭ gé. Ājag jagfy ke vė, isÿ nén vėg mÿ tag. Inh jagtar tag tugrîn ājag tóg nén ũ há venh ke mÿ, ha vemnĭ.

Cristo tÿ ěg to há nĭ

¹⁴ Hã jé sóg Topē mré vėmėn tí. ěg jóg vė mÿr.

¹⁵ Ti tugrîn ěg tóg rĭnrĭr nÿtĭ, ěprã ke kar, kanhkã tá ke kar ke gé, ký tóg ěg ki rĭr tĭgtĭ.

¹⁶ Ký sóg ti hã mÿ to ví tí, ti tÿ ā jykre tÿ ājag tÿ tar' he jé, ti kuprĭg tÿ. Nén ũ kar vÿ tÿ tí tú nÿtĭ, tar ti jē gé, hã ký sóg ti hã mÿ to ví tí,

17 ti tỹ Cristo tỹ ãjag ki ãmã han jé, ãjag tỹ ti ki ge nỹtĩn kỹ. Ti tỹ ãg to há nĩ vỹ tỹ ga ri ke nĩ, ãg tỹ ti ki jãrén jé, ka jãrén ri ke. Kỹ ãg tóg ti to tar nỹtĩ sir. Hã jé sóg ti mỹ ãjag tó tĩ gé.

18 Topẽ tỹ ãg kren han mũ vỹ ãg tỹ nén ve vãnħ ri ke nĩ, ge ve ja tũ ãg nĩgtĩ. Kỹ sóg Topẽ mré vémén tĩ, ti tỹ ãjag mỹ tag kãmén kãn jé, ti tũ kar ag mỹ ke gé. Nén (ũ) téj gy ri ke ti nĩ, nén (ũ) tãpér mág ri ke, kãgnó téj gy ri ke ti nĩ, nén (ũ) krỹg ja tũ ri ke ti nĩ, Topẽ tỹ ãg kren han mũ tĩ. Hã kỹ ãg tóg vësóg ki to jykrén kãn ke tũ nĩ.

19 Cristo vỹ ãg to há tãvĩ nĩ, tag to jykrén kãn ke tũ ãg tóg nĩ gé. Kỹ sóg Topẽ mỹ: “ha ag mỹ tag kãmén,” he tĩ, ãjag tỹ ti hã tỹ krĩn kỹ nỹtĩ jé.

20 Ha vé, Topẽ hã ne tar tãvĩ nĩ'. Hã kỹ tóg ãg tỹ ti mỹ nén (ũ) to vĩn kỹ (tóg) ãg tỹ ti mỹ nén (ũ) to vĩ mũ ãn kãfór han ki kanhró nĩ. Kỹ tóg ãg tỹ nén (ũ) to jykrén mũ kãfór han ki kanhró nĩ gé.

21 Kỹ ãg tóg ti hã mỹ vĩ há han ke mũ, ãg tỹ ti ki ge kỹ nỹtĩn kỹ, ãg tỹ Jesus Cristo ki ge kỹ nỹtĩn kỹ. ãg tỹ ti mỹ vĩ há han vỹ tũ' henħ ke tũ nĩ. Hã vë.

4

ãg tỹ Cristo mré tỹ ãn pir nỹtĩ

1 Kỹ sóg ãjag jyvën sór mũ ha. Se kỹ inh jé nĩ, ãg Senhor tugrĩn, kỹ sóg ãjag jyvën sór mũ. Mũ há han sórmnĩ. Topẽ vỹ ãjag kuprẽg, kỹ ãjag tỹ vãnħ jykre há han ke hã to vãsãn nĩ.

2 ãjag rãgre to: “ti kãfór vỹ tỹ inh nĩ,” he sór tũg nĩ. Jagnẽ mỹ komẽr hã vĩmnĩ. Jagnẽ to fe nỹtĩmnĩ. Jagnẽ to há nỹtĩmnĩ. Jagnẽ ajudar hemnĩ.

3 Topẽ kuprĩg vỹ tỹ ãn pir nĩ, kỹ tóg ãjag mỹ vãnħ jykre pir nĩm tĩ. Vãsãn nĩ, ãjag tỹ vãnħ jykre pir ãn hã han jé, ãjag tỹ krĩ kuprã nỹtĩn jé.

4 Topẽ kuprĩg pir ãn vỹ tỹ ãg kar jagrẽ nĩ, kỹ ãg kar vỹ tỹ Cristo há ri ke nỹtĩ, jãvo tóg tỹ ãg krĩ ri ke nĩ, Cristo ti. ãg kar mỹ ti nén ã há han ke mũ, jagnẽ ri ke, ti tỹ ãg kuprẽg kỹ.

5 Kỹ ãg Senhor vỹ tỹ ãn pir nĩ gé. ãg kar vỹ ti ki ge kỹ nỹtĩ. Ti jiji hã tỹ ãg kygpe kỹ nỹtĩ gé.

6 ãg jóg tỹ Topẽ vỹ tỹ ãn pir nĩ gé, ãg kar jóg ti. Ti hã ne tỹ vãnħ kar krĩg mỹ ke nĩ'. ãg kar tỹ tóg ã tỹ ãn han sór mũ ãn han tĩ, kỹ tóg ãg kãkã nĩ gé, ãg jóg ti.

7 Cristo vỹ ãg tar han tĩ gé, ãg kar, ti rãnrãj to. ã mỹ tóg vãnħ rãnrãj ã nĩm', nĩm' he tĩ.

8 Hã kỹ tag tóg rãn kỹ nĩ, ha mẽ: “ti tỹ kanhkã ra tãpry kỹ tóg ãn sigse kỹ nỹtĩ ãn ag tatĩn vyr. Kỹ tóg ãprã ke ag tar han mũ gé, ag tỹ ti rãnrãj han ke to,” he ja tóg nĩgtĩ, Topẽ vĩ rãn ki.

9 Ha vé, ti tãpry kỹ tóg ã tỹ kanhkã ra tũg ke to hã tóg tere ja nĩ gé, ãprã.

10 ãn tere mũ ãn vỹ tãpry mãn ja nĩ gé, kỹ tóg kanhkã pãtén kỹ tĩ mũ sir. Kanhkã pãtén kỹ tóg kanhkã kri nĩ nĩ sir. Kanhkã kri nĩn kỹ tóg nén (ũ) kar ki kanhró nĩ sir, ti tỹ ãmã kar vëg nĩn kỹ.

11 Ti hã ne ã rãnrãj kar to ãg tar han tĩ'. ã ag vin kỹ tóg ag tỹ apóstolo hyn han. ã tỹ tóg ti tỹ ãg jyvën tĩ nĩnħ ke han. ã mỹ tóg: “ũ tỹ inh vĩ mẽ ja tũ ag mỹ inh vĩ tónħ tũg nĩ,” he mũ. ã tỹ tóg igreja krẽm pã'i han, ã mỹ tóg: “ũ tỹ igreja krẽm vãnħ mãn tĩ ag mỹ inh vĩ kãmén nĩ,” he mũ gé.

12 Tag to tóg ěg tar han tí, ěg tý jagně tar han jé sir, ti rānhrāj to, ěg tý tý ti jāvy nýtīn kŷ, ti ve fag ke gé. ěg tý ěg rānhrāj tag ki króm kŷ Cristo há ěn vŷ tar pē nī ha, ěg tý tý ti há nýtīn kŷ.

13 Ti tý ěg kar tý vĕnh jykre pir han mŷ ve sór vĕ, ěg tý ti ki ge kŷ nýtīn kŷ, ěg tý Topě kósín ki kanhró nýtīn kŷ. Kŷ ěg kar vŷ ěg rānhrāj to tar nýtī sir, ěg tý jagně mré tý ūn pir nýtīn kŷ. Kŷ ěg Cristo tý ěprā ke jykre káfór nī ěn ri ke nýtī sir, kŷ ěg tóg komĕr hā ti tý nĕn kar han mŷ mré ti tý nĕn to jykřn mŷ ki kanhrān kān ke mŷ gé sir, kŷ ěg tóg ūn sanh há kanhró ri ke nýtī sir.

14 ěg tý gŷr ri ke nýtīn kŷ tóg ti mŷ há tŷ nī. Gŷr ag ne ki kagtŷg nýtī'. Kŷ ag tóg, ag tý nĕn ū mĕ kŷ ag tóg kānhmar nĕn ū nón tí', nĕn ū nón tí', he' he tí. ěg tý ti vŷ to gŷr tý ki kagtŷg ěn ri ke nýtīn kŷ tóg ěg tý ūn ón mŷ vŷ kri nŷm ja há (tóg) tí, ěg tý ki kagtŷg nýtīn kŷ. Ū ag tóg Topě vŷ to ón tí. Ag tý ěg tý ājag mré kygnĕ han sór vĕ. Vŷ há nŷ ve ag tóg nýtī, kŷ tóg ěg tý ag vŷ kri fi ja há tí sir.

15 Kŷ tóg há tŷnh mŷ, ěg tý Topě tý ki hā to mŷ ěn hā han kŷ. Kŷ ěg tóg jagnĕ to há tāvŷ nýtŷnh mŷ gé. Hā tý ěg tar nýtŷnh mŷ. Ti ki mog ri ke vĕ sir, ti tý tý ěg kri nŷ nŷn kŷ, Cristo ti.

16 ěg tý tý ti mré ke nýtīn kŷ ěg tóg tý ti há tý tý ūn pir ěn ri ke nýtī. ěg kar vŷ rānhrāj ke mŷ, ěg tý ti jykre pir to tar nýtī jé. ěg kar vŷ tý jagnĕ mré ke nýtī. ěg kar tý Topě tý ěg mŷ nĕn nŷm ja ěn to vāsānsān kŷ ěg tóg ūn sanh há tar ri ke nýtī sir. Mog jé ěg tóg ke mŷ, ěg tý jagnĕ to há nýtīn kŷ.

Cristo tý ěg mŷ vĕnh jykre tǎg nŷm

17 Kŷ sóg ājag jyvĕn sór mŷ, ěg Senhor tý inh mŷ: “ha ag jyvĕn,” hen kŷ. Hā kŷ sóg ājag mŷ: “ū tý Topě ki kagtŷg ag jykre han sór tŷg nŷ,” he mŷ. Kórég ti nŷ, ag jykre ti, mŷr. Ag tý vĕsóg ki nĕn to jykřn mŷ ěn hā han ag tóg tí.

18 Kutŷ mŷ ag mŷgtŷ, ki kagtŷg ag nýtī. Hā ra ag tóg ki kanhrān sór tŷ nŷ gé. Hā kŷ ag tóg Topě tý ěg mŷ vĕnh jykre nŷm ěn ki kagtŷg nýtī.

19 Kŷ ag tóg vĕnh jykre há to é he tí. Mŷ'āg vānh ag nýtī. Ag vĕnh kavĕnh vŷ ag mŷ há tí. Vĕnh jykre kórég tý ag kókég mŷ ra tóg ag mŷ sér tŷgtŷ, kŷ ag tóg to krónh ke jāvānh nýtī. Ke tŷg nŷ, ag jāvo.

20 Cristo jykre vŷ ge tŷ nŷgtŷ, ki kanhró ājag tóg nýtī.

21 Ti kāme ki kanhró kar ājag nýtī ha, ti jykre ke gé. Ājag mŷ ag tóg kāmĕn kān, Jesus jykre ti, ěg tý ti ki ge kŷ nýtīn kŷ nĕn han ke mŷ ěn ti.

22 Ti ki ge kŷ nýtīn kŷ ěg tóg ěg tý vāsŷ nĕn han ja ěn ri ke han mān ke tŷ nŷ ha. Tag mĕ ājag huri. Ājag jykre si ěn tovānh kān jé ājag tóg ke mŷ. Ājag tý ājag jykre si jagma mŷn kŷ ājag tóg ājag tý nĕn to ěn mŷ ěn hā han mŷ ja nŷgtŷ ver. Hā ra ěg tóg tag hā to ter ke mŷ.

23 Kŷ Topě mŷ to vŷmnŷ, ti tý ājag mŷ ājag jykre kurŷnh kān jé, ti tý ājag fe jānhkrig jé.

24 Vĕnh jykre tǎg hā han sórnmŷ, Topě tý ěg mŷ vĕnh jykre tǎg nŷm mŷ ěn ti. Kŷ ěg tóg ti ri ke nýtŷnh mŷ, kurŷj ěg nýtŷnh mŷ ha, há ěg nýtŷnh mŷ, ti há ri ke. Kŷ ěg vĕnh vŷ hā hā han ke mŷ.

25 Hā kŷ jagnĕ mŷ ón mān tŷg nŷ. Ki hā tómnŷ, jagnĕ mŷ. Jagnĕ mré ke vŷ tý ěg nýtī, ěg tý Cristo há ri ke nýtŷn kŷ.

26 Ājag fe tý gŷm ke mŷ ra Topě vŷ mranh tŷg nŷ. Ājag tý jagnĕ to jŷ nýtŷn kŷ kurā ū jāvānh sór tŷg nŷ. Kutŷg ke to hā tý há' hemnŷ.

27 Japo tý ājag krŷn sór mŷ ra ti vŷ jĕmĕ tŷg nŷ.

28 Vāsŷ ājag kāmī ū vŷ ū tŷ nén ū pigju (ka)mē ja nīgtī. Kŷ ěn han mǎn tūg nī. Ājag rānhrāj nón ājag mūnh ke mū ūri. Ājag nīgé tŷ nén ū há han nī, ājag tŷ ājag rānhrāj to nén (ū) kar ve jé. To vāsān nī, ti tŷ ājag mŷ kén jé, ājag tŷ ājag tŷ nén ū tŷ ūn jagāgtar ag jagāgtān jé.

29 Vēnh vī kórég tó sór tūg nī. Nén ū há há tŷ vēmén nī, ājag tŷ ājag vī tŷ jagnē tar han jé, ājag tŷ jagnē jykre kurynh jé.

30 Topē kuprīg fe kaj han sór tūg nī gé. Topē vŷ ěg mŷ ā kuprīg jēnē, ti tŷ há tigrīn ěg nīgěg jé, ěg krenkren ke to. Ti tŷ tŷ ěg jagrē nīn kŷ ěg tóg ki kanhró nŷtī, ěg tŷ Topē tŷ ěg krenkren han ke kurā ěn tá krŷg mūn ki.

31 Jagnē to jykrén kónān tūg nī. Jagnē to krī rŷ han tūg nī. Ājag fe tŷ gŷm ke (ka)mē nŷtī tūg nī. Féfén tūg nī. Jagnē to vī kónān tūg nī. Vēnh jykre pāno tovānh kǎn nī.

32 Jagnē to vī há han nī. Jagnē mŷ komēr hā vīmni. Jagnē mŷ vēnh pāte fón nī, Topē tŷ Cristo tigrīn ěg mŷ vēnh pāte fón ja ri kén.

5

Ěg jykre tǎg

1 Topē tŷ vēnh jykre han tī ěn hā han nī, ājag tŷ tŷ ti fe nŷtīn kŷ, ti krē.

2 Jagnē to há kar nŷtīmni, Cristo tŷ ěg to há nī ri ke. Ěg jagfy tóg vēnh fěg. Ěg tŷ Topē mŷ nén (ū) pūn ri ke ti nī, ti tŷ ěg jagfy vēnh fěg mū ěn ti. Topē mŷ nén ger há pūr ri ke ti nī, kŷ tóg Topē mŷ há tī sir.

3 Topē tŷ vŷ tŷ ājag nŷtī. Hā kŷ vēnh jykre pāno tŷ vēmén sór tūg nī, ājag tŷ han sór tŷ nī jé. Ěg prŷ tŷ mré nŷ, ěg mén tŷ mré nŷ, tŷ vēmén sór tūg nī, ājag tŷ nén e há tŷ vāsān (ka)mē tŷ vēmén sór tūg nī gé.

4 Kŷ jagnē mŷ vī kónān tūg nī, jagnē to vī kónān tūg nī gé. Fagrīnh mŷ vī tūg nī gé. Nén ū kavéj tŷ vēmén tūg nī gé. Ěg tŷ tag tó kŷn pi(jé) há nī', ěg tŷ tŷ Topē krē nŷtīn kŷ. Ěg tŷ nén tónh ken hā vē, ha mē: “ā tŷ inh mŷ nén jēněg mū kar tóg inh mŷ há nŷtī,” he jé ěg tóg ke mū, Topē mŷ agradecer hen kŷ.

5 Ěn to jykrén, ha mē: ū tŷ ā prŷ tŷ fi mré nŷ mū ěn, ū fi tŷ ā mén tŷ mré nŷ mū ěn fi pi(jé) Cristo tŷ tŷ ěg pā'i nī venh ke mū'. Ū tŷ ā tŷ nén e há tŷ vāsān mū ěn pi(jé) venh ke mū'. Ěg tŷ vēnh kǎggrá to jān ěn ri ke ti nī, ěg tŷ ěg tŷ nén e há tŷ vāsān mū ěn ti. Ū tŷ ge pi(jé) Cristo venh ke mū', Cristo tŷ tŷ ěg pā'i nī ěn ti.

6 Ū tóg ón kŷ ājag mŷ vēnh vī há tó sór tī. Ū tŷ ge vī jēmē tūg nī, ke tŷ nī mū ra Topē tóg ājag to jūnh ke mū. Ti vī mranh vē mŷr, kŷ tóg ū tŷ ge to jūnh ke mū.

7 Hā kŷ ag vī jēmē sór tūg nī.

8 Vāsŷ ājag tóg vēnh jykre ki kuty hā han ja nīgtī gé. Hā ra Topē tóg ājag mŷ vēnh jykre ki kurā ěn nīm, ājag tŷ ti ki gen kŷ. Kŷ vēnh jykre ki kurā tag hā han sórmni.

9 Ěg tŷ vēnh jykre ki kurā hā han kŷ ěg tóg jagnē mŷ vī há han ke mū, vēnh jykre kuryj. Ki há tó jé ěg tóg ke mū gé, jagnē mŷ.

10 Vēnh jykre tŷ ěg Senhor mŷ há nŷ ěn hā han sórmni. ěn hā to jykrén mág nī.

11 Kejěn ājag tóg ū vég tī, hā ra tóg vēnh jykre ki kuty han tī. Kŷ ti mré han sór tūg nī. Tī mŷ: “kórég ti nī, tovānh nī,” hemni.

12 Vēnh péju kŷ ag tóg han tī, vēnh jykre kórég ti. Ěg mŷ'a tóg tī, ěg tŷ ag tŷ nén han tī ěn ve kŷ.

13 Kejĕn tóg ag tŷ nĕn han mŷ kri kurāg tĭ, kŷ tóg ve há tŷgtĭ, ag tŷ nĕn han mŷ ti. Kurā ki ĕg tóg ti kórĕg nĭ ĕn vĕg tĭ.

14 Kŷ tóg há nĭ ha, ĕg tŷ vĕnh jykre kórĕg to: kórĕg ti nĭ, hen kŷ. Kŷ ĕg tóg tovānh sór ke mŷ. Hā kŷ ĕg tóg tag tó tĭ, ha mĕ: “Topĕ vĭ mranh sór mān tŷg nĭ. Nŷgme ki kutĕ sór mān tŷg nĭ. Kŷ Cristo vŷ ā mŷ jĕngreĕ han ke mŷ,” he ĕg tóg tĭ, ĕg jān kŷ.

15 Ājag tŷ nĕn han mŷ to jykrĕn nĭ. Krĭ tŷ nĭ sór tŷg nĭ, vĕnh jykre há ki vĕnh kanhrān kŷ mŷmŷnĭ.

16 Kurā kren tŷg sórnmĭ. Nĕn ũ jagy ve jĕ ĕg tóg ke mŷ, hā kŷ tóg há tĭ, ĕg tŷ kurā kren tŷ nĭn kŷ.

17 Ēg Senhor vŷ ĕg tŷ nĕn ũ há han mŷ ve sór tĭ. Kŷ ti tŷ nĕn (ŭ) ve sór mŷ tag há to jykrĕn nĭ, ājag tŷ tag há han jĕ.

18 Vinho tŷ vĕsĕn tŷg nĭ, tŷ vĕnh pĕnmān tŷg nĭ. Vĕnh jykre kórĕg vĕ, ĕg tŷ nĕn ũ fa tŷ vĕsĕn mŷ ti, tŷ vĕnh pĕnmān mŷ ti. Tope kuprĭg tŷ ĕg fān tag há ne há nĭ.

19 Jagnĕ mrĕ vĕmĕn kŷ Topĕ tŷ jān nĭ, ti jĕ tómnĭ, ĕg Senhor jĕ ti. Ti kuprĭg vŷ ĕg kanhrān tĭ gé, ĕg tŷ ĕg Senhor mŷ nĕn tó sór mŷ to, ĕg tŷ ti tŷ jān há han jĕ. Ēg tŷ ti mŷ: “há kar ti nĭ,” henh ke vĕ gé.

20 Ēg jóg tŷ Topĕ mŷ ĕg tóg tónh ke mŷ, ti hā mŷ ĕg tóg: “ā tŷ ĕg mŷ nĕn ven mŷ vŷ há kar nŷtĭ,” henh ke mŷ, ĕg tŷ ĕg Senhor tŷ Jesus Cristo jyjy tón kŷ.

21 Ēg tŷ Cristo kamĕg kŷ tóg há tĭ, kŷ tóg ĕg tŷ jagnĕ jykre mĭ mŷn kŷ (tóg) há tĭ gé, ĕg tŷ tŷ ti mrĕ ke nŷtĭn kŷ.

Ŭ tŷ jagnĕ mrĕ nŷtĭ fag jykre

22 Ŭn tŷtá fag jĕ ājag mĕn ag jykre mĭ mŷjĕg. Fag mŷ tóg ĕg Senhor ri ke nĭ, fag mĕn ti.

23 Fi krĭ vĕ, fi mĕn ti. Cristo vŷ tŷ ti ki ge kŷ nŷtĭ kar ag kri ke nĭ, kŷ ĕg tóg tŷ ti há ri ke nŷtĭ, ti tŷ ĕg kren han kŷ.

24 Hā kŷ ĕg tóg tŷ ti krĕm ke nŷtĭ, Cristo krĕm ke. Ge ti nĭgtĭ, ũn tŷtá fag jykre ti. Fag mĕn krĕm ke vŷ tŷ fag nŷtĭ, fag tŷ ājag mĕn vĭ han jĕ.

25 Kŷ sóg fag mĕn ag mŷ tag tó sór mŷ gé. Ājag prŷ to há tāvĭ nŷtĭmŷnĭ. Cristo vŷ ĕg to há nĭ, ĕg tŷ tŷ ti tŷ nŷtĭn kŷ. Ēg jagfy tóg vĕnh fĕg,

26 ĕg tŷ tŷ ti tŷ nŷtĭ jĕ. Kŷ tóg ĕg kykŷnh, goj tŷ ĕg kygpe kŷ, ti vĭ tŷ ke gé.

27 Ti tŷ ĕg há nŷtĭ ve sór vĕ, ĕg tŷ vĕnhmŷ nŷtĭnh ke tŷ vĕ, ĕg kaga ri ke nŷtĭnh ke tŷ vĕ, ĕg kórĕg nŷtĭnh ke tŷ vĕ gé, ĕg sĭnvĭ tāvĭ nŷtĭnh ke vĕ, ĕg tŷ tŷ ti tŷ nŷtĭn kŷ. Cristo prŷnh ke ri ke vŷ tŷ ĕg nŷtĭ.

28 Tag ri ke han nĭ, ājag prŷ tŷ. Fag to há nŷtĭmŷnĭ. “Inh há ri ke vŷ tŷ fi nĭ,” hemnĭ, fag to. Ŭ tŷ ā prŷ fi to há nĭn kŷ tóg vĕso há nĭ sir.

29 Vĕnh ki rĭr há han ĕg tóg tĭ, jĕg ĕg tóg tĭ, ĕg tar nŷtĭ jĕ. Ēg pi(jĕ) vĕnh kókĕn sór tĭ'. Cristo vŷ ĕg tŷ ge tĭ gé. Ēg ki rĭr há han tóg tĭ gé.

30 Ti há vŷ tŷ ĕg nŷtĭ, ĕg kar, ĕg tŷ ti ki ge kŷ nŷtĭn kŷ.

31 Tag vŷ rán kŷ nĭ, ha mĕ: “ŭn grĕ tóg ā prŷ fi to ā panh ré kŷ tĭ mŷ, ā mŷnh fi ré kŷ ke gé. Ā prŷ fi mrĕ tóg tĭnh mŷ. Fi mrĕ tóg tŷ ũn pir nĭ sir, ti prŷ fi mrĕ,” he ja tóg nĭgtĭ, Topĕ vĭ rán ki.

32 Tag vŷ tŷ nĕn ũ sĭnvĭ pĕ nĭ. Kŷ tóg Cristo to rán kŷ nĭ gé, ti tŷ ũ tŷ ti ki ge kŷ nŷtĭ ag mrĕ tŷ ũn pir nĭn kŷ.

33 Hā ra tóg ĕg mŷ rán kŷ nĭ gé, ĕg tŷ ĕg prŷ fag to há nŷtĭ jĕ, ĕg tŷ vĕnh ki rĭr há han mŷ tag ri ke. Kŷ tóg fag mŷ rán kŷ nĭ gé, fag tŷ ājag mĕn vĭ kŷ jĕmĕn jĕ.

6

Ēg han mū fag to vēnh jykre

¹ Kŷ sóg ājag krē mŷ tag tó mū, ha mē. “Ājag han mū fag vī kri finnī,” he sóg mū, ag mŷ. Há ti nī, Ēg Senhor jykren ha vē.

² Ājag han mū fag kamēg nī. Topē tŷ Ēg mŷ tag tó kŷ tóg Ēg mŷ nén ū há tó mū gé, hā vŷ:

³ “ā han mū fag kamēg nī, ā tŷ tŷg há han jé, ā tŷ ga kri tŷg mág han jé,” he ja tóg nī, Topē ti.

⁴ Kŷ sóg ūn sanh ag mŷ: “ājag krē mŷ vī tar pē han tŷg nī, ag tŷ ājag to jū tū nī jé,” he mū gé. Ājag krē jyvēn nī, ag mŷ Ēg Senhor jykre kāmén nī, ag tŷ mī mūn jé.

Camarada ag tŷ ājag patrão mré nŷtī jykre

⁵ Ājag kāmī ū ag tóg patrão krēm nŷtī gé, fagrīnh mŷ ti mŷ ti rānhrāj han tīn kŷ. Ājag patrão vī kri finnī. Ti kamēg nī, ti to jŷrn kemnī. Ti rānhrāj ki rīr há han nī, ājag tŷ Cristo rānhrāj ki rīr tī Ēn ri ke.

⁶ Ū tóg kejēn ti patrão tŷ ti mŷ vī há han hā jé (tóg) ti patrão tū ki rīr tī, ón kŷ. Tag han tŷg nī. Ājag patrão tū ki rīr pē han nī, ājag tŷ tŷ Cristo camarada nŷtīn kŷ, Topē jykre tŷ ājag mŷ sér nīn kŷ.

⁷ Ājag patrão rānhrāj ki rīr kŷ mŷ sér nŷtīmnī. Ājag tŷ Ēg Senhor rānhrāj ki rīr vē, ājag tŷ ājag patrão rānhrāj ki rīr kŷ.

⁸ Ha vē, Ēg tŷ nén ū há han kŷ Ēg tóg ti kaja venh ke mū, kanhkā tá. Ēg Senhor vŷ Ēg mŷ ti kaja ven ke mū, ti camarada ag mŷ, ag patrão mŷ ke gé, ti ki ge kŷ nŷtī kar ag mŷ.

⁹ Ājag kāmī ū vŷ tŷ patrão nŷtī, kŷ ājag camarada vŷ nŷtī, ājag krēm. Ag to há nŷtīmnī. Ag mŷ vī kónān tŷg nī. Ēg Senhor vŷ kanhkā tá nī. Ājag pā'i vē, ājag camarada pā'i vē gé hā ra, ū tŷ kanhkā tá nī ti. Ti mŷ Ēg tóg tŷ ūn pir nŷtī, tag ki ūn mág mré ūn kāsir ag.

Topē tŷ Ēg tŷ Japo katō vāsānsān jafā vin sór

¹⁰ Kŷ sóg ājag mŷ tag tó sór mū gé ver, ha mē. Ēg Senhor ki ge kŷ nŷtī to tar nŷtīmnī. Tar ti nī, kŷ tóg Ēg tar han ki kanhró nī gé.

¹¹⁻¹² Tag ki Ēg vēnh génh han tī, Ēg tŷ Japo kato vāsānsān kŷ nŷtīn kŷ. Hā ra Topē tóg Ēg mŷ Ēg tŷ ti kato vāsānsān jafā nīm tī. Kŷ mǎn nī, Topē tŷ Ēg mŷ ti kato vāsānsān jafā nīm mū Ēn ti, kŷ Japo tóg Ēg tŷ hē ri kenh ke tū nī. Tar jé Ēg tóg ke mū ha. Ēg pi(jé) ēprā ke ag kato vāsānsān tī', Ēg pi(jé) Ēg mré ke ag kato vāsānsān tī'. Pā'i ag nŷtī, ū tŷ Ēg kato vāsānsān mū ag, hā ra Ēg tóg ag vēg tū nŷtī. Kutŷ tān ag vē, ga to pā'i ag vē gé. Kanhkā krēm ag Ēmā nŷtī gé. Kórég kar ag nŷtī.

¹³ Kŷ mǎn kǎn nī, Topē tŷ Ēg mŷ nén tŷ ag kato vāsānsān jafā vin sór mū Ēn ti, ājag tŷ ag kato vāsānsān to tar nŷtī jé. Kejēn ag tóg Ēg kato vāsān mág han ke mū. Kurā Ēn ká ag tóg Ēg tŷ hē ri kenh ke tū nī, Topē tŷ Ēg tar han kŷ, ti tŷ Ēg mŷ Ēg tŷ ag kato vāsānsān jafā Ēn vin kŷ.

¹⁴ Hā kŷ tar nŷtīmnī. Ēg Senhor vŷ ón vānh nī. Ti ón vānh vŷ Ēg vēsóg fīn ja mág ri ke nī. Tŷ vēsóg fīn ri ke han nī, ti ón vānh ri ke han to ken hā vē. Vēnh jykre kuryj vŷ tŷ soldado tŷ camisa tŷ ferro ri ke nī. Ēn tu ri ke han nī, vēnh jykre kuryj han to ken hā vē.

¹⁵ Ëg tỹ Topê vĩ sér tó sór mũ vỹ ãg pẽn né, ãg pẽn to ró ri ke nĩ, ãg tỹ vẽn kar mũ Topê tỹ ãg krĩ kuprãg ke mũ tónh ke mũ tag ti. Ën rĩnh ri ke han nĩ, vẽn kar mũ Topê vĩ kãmén to ken hã vẽ.

¹⁶ Ëg tỹ ti ki rã kỹ tóg soldado tỹ vỹj ven jafã ma tĩ ãn ri ke nĩ. Satanás tỹ ãg kato vãsãn kỹ tóg ti tỹ no tỹ ãg to pẽg grug ri ke nĩ. Ëg tỹ vỹj ven jafã tỹ vỹj ven kỹ tóg tỹ nhyn ke tĩ, ti no gru ãn tỹ. Ëg tỹ Jesus ki rã to ken hã vẽ.

¹⁷ Ëg kren han ke vỹ soldado sãpe ri ke nĩ, sãpe tỹ ferro ãn ri ke. Kỹ Topê vỹ vỹ rógro ri ke nĩ gé. Topê kuprĩg vỹ ãg mũ kãmén tĩ, Topê vĩ ti. Topê tỹ ãg mũ Japo kato vãsãn jafã vin ke mũn hã vẽ.

¹⁸ Kỹ Topê mré vēmén nĩ gé, ti mỹ nén kar to vĩmnĩ. Ti kuprĩg vỹ ãg jagfy vỹ tĩ gé. Topê mré vĩ to krónh ke tũg nĩ. Ëg tỹ to krónh ken kỹ tóg ãg nũr ri ke nĩ sir. Ke tũg nĩ. Ëg mré ti ki ge kỹ nỹtĩ kar to vĩmnĩ.

¹⁹ Kỹ inh jagfy ti mré vēmén nĩ gé. Topê vĩ tó sóg tĩ. Kỹ inh mré to vĩmnĩ, sỹ tó há han jé, isỹ inh kato vãsãn mũ ag kamẽg tũ nĩ jé, isỹ vẽn kar mũ Topê tỹ nén han sór mũ ãn kãmén há han jé, vẽn vỹ sér ãn.

²⁰ Topê vỹ inh mũ tag nĩm ja nĩ, sỹ han jé, hã ra sóg ver se kỹ jẽ. Kỹ tóg sỹ ag kamẽg tũ nĩnh há tĩ, sỹ Jesus kãme tó kãn jé, sỹ ti tỹ inh mỹ: “ha ag mũ kãmén,” he mũ tag tó kãn jé.

Paulo tỹ Tíquico jẽnẽnh ke

²¹ Kỹ tóg inh mũ há tĩ, ãjag tỹ isỹ nén ve ja tag mẽ kãn jé, isỹ nén han mũ mré hã. Hã jé sóg ãjag mũ Tíquico ti jẽnẽnh ke mũ. Ëg régre ù vẽ gé, iso há tavĩ ti nĩ, Tíquico ti. Ëg Senhor rãnrãj han ti tĩ, ti to krónh ke tũ ti nĩgtĩ.

²² Ti hã vỹ ãjag mũ inh kãmén ke mũ, ti tỹ ãjag fe tỹ há' he jé. Hã jé sóg ti jẽnẽnh ke mũ.

²³ Ëg jóg tỹ Topê jé ãjag krĩ kuprãg, ãg régre kar ag mré hã. Ti jé ãjag tỹ jagnẽ to há kar han. Ti jé ãjag tỹ ti ki rã há han, ãg jóg tỹ Topê ti, ãg Senhor tỹ Jesus Cristo ti ke gé.

²⁴ Topê jé ãjag tar han, ù tỹ ãg Senhor tỹ Jesus Cristo to há nỹtĩ ag kar, kỹ tóg tũ' he jãvãnh nĩ, ãg tỹ ti to há nỹtĩ ti.

Hã vẽ.

PAULO TŶ CARTA HAN: FILIPOS TÁ KE AG MŶ CARTA

¹ Paulo tŷ rá vĕ, inh. Isŷ cidade tŷ Filipos tá ke ag mŷ rán hã vĕ. Kŷ Timóteo vŷ inh mré ājag mŷ jĕnĕg mŷ gé, vĕnh rá tag ti, inh mré Jesus Cristo mŷ rãnrãj tŷ tag ti. Isŷ ājag mŷ ti rá tag jĕnĕ vĕ, ājag tŷ tŷ Jesus Cristo ki ge kŷ nŷtĭn kŷ. Kŷ sóg ājag pã'i ag mŷ jĕnĕg mŷ gé, ũ tŷ ājag ki rŷr tŷ ag mŷ ke gé.

² Ēg jóg tŷ Topĕ jĕ ājag tar han, ti jĕ ājag krĭ kuprãg, ĕg Senhor tŷ Jesus Cristo ke gé.

Paulo tŷ Topĕ mré vĭ

³ Ājag to sóg Topĕ mré vĭ há han tŷ, sŷ ājag mĭ ĕkrĕn kŷ.

⁴ Sŷ ājag to Topĕ mré vĭ kŷ inh fe tóg mŷrĭn ke tŷ. Inh mŷ tóg sér tŷ, sŷ ājag mĭ ĕkrĕn kŷ.

⁵ Ājag tŷ inh mré Jesus kãmĕn kŷ tóg inh mŷ há tŷ, ājag tŷ inh mré ti to tar nŷtĭn kŷ. Kŷ sóg Topĕ mŷ vĭ há han tŷ, ājag to. Isŷ ājag mŷ ti vĭ tó vĕn kŷ ājag tóg kãnhmar inh mré ti kãmĕn ja nĭgtĭ, kŷ ājag tóg ũri ti vĭ tó há han tŷ gé. Tovãnh tŷ ājag nĭ. Kŷ tóg inh mŷ sér tŷ.

⁶ Tag ki kanhró sóg nĭ, ha mĕ. Topĕ vŷ ājag krĭn rã nĭ, komĕr hã, nĕn ũ há kar to. Kŷ tóg ājag krĭn tĭgtĭ sir, ti tŷ komĕr hã ājag krĭn kãn jĕ, Jesus Cristo kãtĭg mãn ke kurã to hã. Ti hã vŷ ājag krĭn ke mŷ, Topĕ ti.

⁷ Tag to sóg jŷkrĕn, sŷ ājag mĭ ĕkrĕn kŷ. Hã ra tóg há nĭ. Inh fe vŷ tŷ ājag nŷtĭ. Inh há mré tóg ājag tar han tŷ, ĕg Senhor ti. Hã kŷ ājag tóg inh mré jagãgtar nŷtĭ, inh se kŷ jĕ tag ti to. Isŷ vãsŷ kavãr kŷ jĕ ja nĭn kŷ sóg ag mŷ Topĕ vĭ kãmĕn ja nĭgtĭ, kŷ ājag tóg inh mré to tar nŷtĭ ja nĭgtĭ gé, pã'i ag tŷ inh ki Jesus jĕmĕn kŷ ke gé. Kŷ ājag tóg ũri inh mré ti to tar nŷtĭ gé.

⁸ Sŷ ājag kar venh há tóg tŷ, kŷ Topĕ vŷ ki kanhró nĭ. Inh mŷ ājag tóg tŷ inh fe pĕ nŷtĭ, ĕg tŷ Jesus Cristo mŷ tŷ ti fe pĕ ĕn ri ke ājag nŷtĭ, inh mŷ.

⁹ Sŷ Topĕ mré vĭn kŷ sóg ti mŷ tag tó tŷ, ājag to, ha mĕ. “Jagnĕ to há ag nŷtĭ,” he sóg tŷ, Topĕ mŷ. “Ag tŷ komĕr hã jagnĕ to há kar nŷtĭ han nĭ,” he sóg tŷ ājag to, Topĕ mŷ. “Ag kanhrãn nĭ gé, ag tŷ komĕr hã ã jŷkre ki kanhrãn kãn jĕ, ag tŷ ki króm kãn jĕ,” he sóg tŷ, ājag to.

¹⁰ “Ā tŷ ag kanhrãn kŷ ag tóg nĕn (ũ) há kar ki kanhró nŷtĭnh ke mŷ. Kŷ ag tóg to jŷkrĕn há han ke mŷ, ag tŷ nĕn ũ ve sór kŷ. “Tag vŷ há pe nĭ, tag vŷ há sĭ nĭ,” he jĕ ag tóg ke mŷ, ã tŷ ag kanhrãn kŷ,” he sóg tŷ ājag to, Topĕ mŷ. Ājag tŷ tag to jŷkrĕn há nŷtĭn kŷ ājag tóg jãnhkri nŷtĭnh ke mŷ, kŷ ājag tóg mŷ'ãg mãn ke tũ nĭ, Cristo kãtĭg mãn ke kurã ĕn kã.

¹¹ Kŷ ājag tóg vĕnh jŷkre há han kãn ke mŷ sir, Jesus Cristo tŷ ājag mŷ ã jŷkre há ĕn nĭm kŷ. Hã jĕ sóg Topĕ mŷ ājag tó tŷ. Ti tŷ ājag krĭ kugrynh kŷ vĕnh kar tóg ti tŷ tŷ ũn mág nĭ venh ke mŷ. Kŷ ag tóg ti mŷ vĭ há han ke mŷ gé sir.

Jesus tŷ inh jŷkre

¹² Inh kanhkã', inh jagtar mŷ ra Jesus kãmĕ tóg vĕnh kar kri rŷm ke mŷ. Tag to jŷkrĕn.

¹³ Vĕnh kar tóg mĕ kãn, ti vĭ ti, polĭcia ag mré hã, ũ tŷ palãcio ki rŷr tŷ ag mré hã. Cristo tugrĭn sóg se kŷ jĕ, hã vĕg ag tóg mŷ.

14 Kŷ Jesus mré ke tŷ hēn ri ke ag vŷ fe tar nŷtĩ gé sir, ěg Senhor jykre to, inh se kŷ jē tag tugrĩn. Hã kŷ ag tóg Topē vĩ tó tĩ sir, ag tŷ to fe tar nŷtĩn kŷ, ag mŷmēg vānh nŷtĩn kŷ.

15 Ũ ag tóg iso jũ nŷtĩ, ha kŷ ag tóg Jesus tó tĩ, ag tŷ inh ri ke han sórn kŷ. Kŷ ũ ag tóg iso há nŷtĩ, hã kŷ ag tóg ti tó tĩ sir.

16 Topē vĩ hã to sóg se kŷ jē, sŷ pã'i ag mŷ ti kāmén jé. Topē tŷ inh mŷ vēnh rānrhāj nĩm hã vē. Hã vég ag tóg tĩ, ũ tŷ iso há nŷtĩ ag, kŷ ag tóg ti vĩ tó tĩ, ũ tŷ iso há nŷtĩ ag.

17 Ũ ag tóg hã ra iso jũ nŷtĩ, hã kŷ ag tóg ón kŷ Cristo kāmén tĩ, ag tŷ inh vĩ káfór han sór kŷ. Ag tŷ inh kato tē mũ ag tŷ iso jũ han sór vēgtĩ gé, ag tŷ inh se tŷ hēn ri ke han sór vē. Hã jé ag tóg Cristo vĩ tó tĩ.

18 Hã ra sóg ag to vēnh mŷ nĩ sór tũ nĩ. Cristo tó ag tóg mũ mŷr. Ũ tóg ón kŷ tó tĩ, jo ũ tóg tó há han tĩ. Ag kar vŷ ti tó tĩ, kŷ tóg há tĩ. Hã kŷ tóg inh mŷ sér tĩ, kŷ sóg inh mŷ sér tŷ tũ' he sór tũ nĩ.

19 Hã ra sóg kren ke mũ gé, ha vemnĩ. Ki kanhró sóg nĩ. Ājag hã ne iso Topē mré vĩ tĩ', kŷ Jesus Cristo vŷ isar han tĩ gé, ā kuprĩg tŷ. Hã kŷ sóg kren ke mũ.

20 Kŷ sóg tag jāvānh mũ, ha mẽ. Hēn ri ke mũn ag tóg inh kyvān ke mũ, hēn ri ke mũn ag tóg isén ke mũ. Isŷ tag to jykren kónān tũ nĩ jé, hã jé sóg ti mré vĩ tĩ. Isar han jé tóg ke mũ, sŷ nén ũ kamēg tũ nĩ jé, sŷ ti kavēnh tũ nĩ jé, inh mŷ'āg tũ nĩ jé. Vēnh kar tŷ isugrĩn Jesus tŷ tŷ ũn mág nĩ ven kŷ tóg inh mŷ sér tĩ.

21 Inh jykre hã vŷ tŷ Cristo ti nĩ, hã kŷ sóg iser kŷ ti venh tŷg ke mũ, kŷ tóg sér tĩ.

22 Kŷ sóg hã ra inh kren kŷ ti rānrhāj hã han ke mũ. Hã kŷ sóg sŷ nén han sór mũ ki kagtŷg nĩ.

23 Inh kren ke mŷ inh mŷ hán tĩ vŷ, iser ke vó? he sóg tĩ. Iser kŷ sóg Cristo mré nĩ nĩ, kŷ tag tóg inh mŷ há pē nĩ, isŷ ti venh há tŷn kŷ.

24 Jāvo isŷ ājag mré nĩn kŷ sóg ājag tar han ke mũ, kŷ tag tóg inh mŷ há káfór nĩ.

25 Hã tóg inh mŷ ge nĩ. Kren jé sóg ke mũ, he sóg tĩ, kŷ sóg ājag kar mré nĩnh ke mũ. Ājag ve jé sóg ke mũ, ājag tŷ komēr hã inh vĩ mẽ kŷ ti vĩ kri fi kãn jé. Kŷ tóg ājag mŷ sér tŷnh mũ ěn vemnĩ.

26 Isŷ ājag mré nĩ mǎn ken kŷ tóg inh mŷ há tŷnh mũ. Kŷ ājag fe tóg mrin ke tǎvĩ han ke mũ, ājag tŷ inh ve mǎn kŷ. Ājag mŷ sóg tŷ ũn mág jē, Jesus Cristo tugrĩn.

27 Ha vé, Cristo jykre hã han nĩ, tag hã to vāsānsān nĩ. Hēn ri ke mũn sóg ājag venh kǎtŷg ke mũ, hēn ri ke mũn sóg ājag venh kǎtŷg ke tũ nĩ. Inh kǎtŷ tũ ra jagnē mré vēnh jykre pir han kŷ nŷtĩmnĩ, Jesus kāme hã tómnĩ, ti ki ge kŷ nŷtĩmnĩ. Sŷ tag mēnh há tóg tĩ, ājag to.

28 Ũ tŷ ěg kato vāsānsān mũ ag kamēg tŷg nĩ, hã tugnĩn ag tóg ājag tŷ nŷgme ki vár ke ki kanhró nŷtĩ, inferno ki. Hã tugnĩn ājag tóg ājag krenkren ke mũ ěn ki kanhró nŷtĩ gé sir. Topē vŷ ěg tar han ke mũ, ěg tŷ ag tŷ hēn ri ke jé gé, ũ tŷ ěg kato vāsānsān mũ ěn ag tŷ.

29 Cristo ki ge kŷ ājag nŷtĩ, kŷ ājag tóg ti tugrĩn jagāgtar nŷtĩnh ke mũ gé. Hã jé tóg ājag kuprēg.

30 Hã kŷ ājag tóg inh kóm ti jagy vég tĩ gé. Ag tŷ vāsŷ inh kato vāsānsān ěn ve ja ājag tóg nŷgtĩ gé. Ũri sóg hã vég tĩ ver. Kŷ inh kóm tar nŷtĩmnĩ.

2

Topê kósin tỳ tỳ ěprã ke nĩ

¹ Ha vé, sý ājag jyvĕn sór mũ, ha mĕ. Ājag tỳ Jesus jykre han kýt nýtĩ tag výt ājag tar han tũ. Tĩ tỳ ājag to há nĩ tag výt sér tũ. Tĩ kuprĩg výt tỳ ājag jagrĕ nĩ. Kýt ājag tóg jagnĕ to há nýtĩ gé, jagnĕ jagãgtãn ājag tóg tĩ gé.

² Kýt inh jagãgtãn nĩ gé, inh fe tỳ mrin kemnĩ gé, inh mýt sér tĩ jé. Jagnĕ mrĕ vĕnh jykre pir hã han nĩ, ha mĕ. Jagnĕ to há tãvĩ nýtĩmnĩ. Ājag tỳ nĕn ũ to jykrĕn kýt jagnĕ mrĕ to jykrĕn nĩ, ājag tỳ vĕnh jykre pir hã han jé.

³ Vĕsýt ũn mág han sór tũg nĩ, jagnĕ kãfór han sór tũg nĩ. “Týt inh ũn sĩ nĩ,” hemnĩ. Jagnĕ to: “inh kãfór ti nĩ,” hemnĩ gé.

⁴ Ājag tỳ ājag tũ ki rĩr mrĕ hã jagnĕ tũn ki rĩrmnĩ gé.

⁵ Jesus Cristo kóm ti jykre han nĩ gé, jagnĕ mýt. Tĩ tỳ vĕnh jykre han hã vĕ, ha mĕ.

⁶ Topĕ hã pĕ ja ti nĩ mýt, Jesus ti, ti tỳ ti mrĕ nĩn kýt. Hã ra tóg tá nĩ kýt: “isũ vĕ, kanhkã ti, hã kýt sóg ěprã ke ag to tũg ke tũ nĩ,” he ja tũ nĩ.

⁷ Kanhkã tá ā tỳ nĕn tovãnh kãn sór ja ti nĩ, kýt tóg ěg ri ke nĩ jé kãtĩg sór ja nĩ, hã kýt tóg kãtĩg ja nĩ. ěprã ke jagtar ri ke tóg nĩ, ti tỳ ěprã ke fi ki mur kýt. ěg tỳ ěprã ti ve kýt tóg tỳ ěg hã pĕ nĩ, ti tỳ kanhkã tá tỳ Topĕ hã pĕ ja ra.

⁸ Vĕsýt ũn mág han ja tũ tóg nĩ, kýt tóg ā jóg vĩ hã han ja nĩgtĩ. Tĩ vĩ han kýt tóg ter ja nĩ, cruz to sa kýt tóg ter ja nĩ, mýt, ha mĕ.

⁹ Hã kýt Topĕ tóg ti tỳ vĕnh kar kãfór han sir, kýt tóg ti jijin mũ sir, kýt ti jyjy tag tóg vĕnh kar jyjji kãfór nĩ.

¹⁰ ěg tỳ ti jyjy mĕ kýt vĕnh kar ag tóg ti krĕm mũgmũg ke kãn mũ sir, kanhkã tá ke kar ag, ěprã ke kar ag ke gé, vĕnh kuprĩg kar ag ke gé.

¹¹ Kýt vĕnh kar ag tóg: “Jesus Cristo výt tỳ pã'i mág nĩ,” hĕnh ke mũ sir. Tag hã tugrĩn ag tóg sir Topĕ to: “týt tóg ěg kãfór kar nĩ,” he mũ. Tag to jykrĕn nĩ, ājag tỳ ti kóm han jé, Jesus Cristo kóm.

ěg tỳ ěprã ke ag mýt jĕngrĕ há han

¹² Inh kanhkã', ājag ki sóg fe nĩ. Inh vĩ han ājag tóg mũgtĩ, sý ājag mrĕ nĩn kýt, hã ra sóg ũri ājag mrĕ nĩ tũ nĩ. Ge ra inh vĩ kri fi há han nĩ. Ājag krenkren ke vĕ, kýt Topĕ jykre hã han nĩ. Topĕ kamĕg nĩ, ājag fe tỳ jũrũn kemnĩ. “Tĩ mýt ěg to jũnh ke tũ nĩ výt?” hemnĩ. Kýt ti jykre hã han nĩ.

¹³ Tĩ hã ne tóg ājag krĩn há han tũ', ti jykre tỳ ājag mýt sér tũn jé, ājag tỳ hã mũ hã mũn jé.

¹⁴ Ājag tỳ ti jykre han kýt ti jykre to vĩ vĩ he tũg nĩ, ti tỳ kejĕn ājag mýt jagy ra. Kýt jagnĕ mýt jagnĕ vĩ kafãn tũg nĩ gé, ti jykre to.

¹⁵ Hã tugnĩn ũ tóg ājag to jykrĕn kónãn ke tũ nĩ, ājag tỳ kygnĕg tũ nĩn kýt. Kýt ājag tóg jãnhkri nýtĩ. Kýt ājag tóg tỳ Topĕ krĕ nýtĩ gé, ājag tỳ ti jykre há ri ke nýtĩn kýt. ěprã ke kar výt jykre pãno nýtĩ, Topĕ vĩ mranh kýt ag tóg nýtĩ, ājag tỳ ũn mrĕ ga kri mũ ag. Kýt ājag tóg ag mýt jĕngrĕ ri ke nýtĩ, ājag tỳ ag mýt Topĕ vĩ kãmĕn kýt, ũ tỳ ěg rĩnrĩr han mũ ěn vĩ ti.

¹⁶ Ājag tỳ tag han kýt sóg tỳ ũn mág jĕnh ke mũ gé, ājag tugrĩn, Cristo kãtĩg mãn ke kurã ěn kã. Kýt sóg ājag to: “inh pi(jé) fagrĩnh mýt ag to vãsãn', inh pi(jé) fagrĩnh mýt ag mýt Topĕ vĩ kãmĕn',” hĕnh ke mũ.

¹⁷ Hĕn ri ke mũn ag isĕn ke mũ, kýt inh kyvĕnh tỳ inh ki kutĕ kýt tóg ěg tỳ Topĕ mýt nĕn ũ pũn ri ke nĩnh mũ. Ājag tỳ ti ki ge kýt nýtĩ tugrĩn ke vĕ. Ge ra tóg inh mýt sér tũnh mũ. Inh fe tóg mrin kĕnh ke mũ, ājag kóm.

18 Kŷ tóg inh mŷ ti tŷ ājag mŷ sér tŷnh há tŷ gé, iser ke ti.

Timóteo mré Epafrodito

19 Sŷ ājag mŷ Timóteo jĕnĕnh há tóg tŷ, ěg Senhor tŷ to: “hej,” hen kŷ. Sŷ ti jĕnĕnh ke vē, ti tŷ tá vŷn ke kŷ inh mŷ ājag kāmĕn jé. Kŷ inh krŷ tóg ājag to kĕnhvy' henh ke mŷ sir, isŷ ājag vēmé há mĕn kŷ.

20 Ti hĕ ne tóg ājag mŷ ěkrĕn mĕg tŷ, Timóteo ti. Ũ tóg ti ri ke tŷ pe nŷ, ti tŷ ājag to há nŷn ki.

21 Ag kar vŷ: “inh rĕnhrĕj vŷ inh kutĕn mŷ,” he kĕn mŷ. Hĕ kŷ ag tóg Jesus rĕnhrĕj han tŷ nŷgtŷ.

22 Hĕ ra ājag tóg Timóteo ki kanhró nŷtŷ. Inh kósin ri ke ti nŷ. ěg krĕ ag vŷ ěg mré ěg rĕnhrĕj han tŷ. Kŷ Timóteo vŷ inh mré Topĕ vŷ tó tŷ rĕnhrĕj tŷgtŷ, ti tŷ tŷ inh kósin ri ke nŷn kŷ.

23 Ti hĕ jĕnĕ jé sóg ke mŷ, ājag to. Hĕ ra sóg ver ag tŷ inh mŷ nĕn tónh ke jĕvĕnh sór mŷ, ŷ tŷ inh ség mŷ ag. Isŷ ag tŷ inh mŷ nĕn tó mŷ mĕ kar kŷ sóg vĕhĕ ti jĕnĕnh ke mŷ.

24 Hĕn ri ke mŷn sóg kĕnhmar ājag venh tŷg ke mŷ gé. ěg Senhor tŷ Jesus hĕ ne ki kanhró nŷ.

25 Hĕ ra tóg sŷ vēsŷmĕr ŷ jĕnĕnh há tŷ, ājag to. Hĕ kŷ sóg Epafrodito mŷ: “ha ag to vŷn ké,” he mŷ. Ājag hĕ ne ti jĕnĕ ja nŷgtŷ, ti tŷ inh ki rŷr jé. Kŷ tóg inh mŷ há tŷ. Inh mré tóg Topĕ rĕnhrĕj han tŷ mŷr. Kŷ tóg inh mré Topĕ vŷ to jagtar nŷ gé.

26 Hĕ ra tóg ājag mŷ ěkrĕg mŷ, Epafrodito ti. Kŷ tóg ājag to krŷ kufy jagy nŷ sir, ājag tŷ ti kaga mĕ ja ĕn tugrŷn.

27 Kaga ja tóg nŷgtŷ mŷr, kŷ tóg ter kren ja nŷgtŷ. Hĕ ra Topĕ tóg ti jagĕgtĕn, kŷ tóg há' he mŷ sir. Ti ter ra sóg ijagtar tag krŷg mŷ vēsŷrĕnh mĕg ke mŷ vē, hĕ ra Topĕ tóg ti jagĕgtĕn, kŷ tóg inh jagĕgtĕn gé.

28 Hĕ kŷ sóg ti mŷ: “ha tŷg, ĕ tŷg to fŷrŷn,” he mŷ sir, ājag fe tŷ mŷrin ke jé, ājag tŷ ti ve kŷ. Hĕ kŷ inh jagtar tóg pĕgsŷ' henh mŷ gé sir.

29 Ti jun kŷ ti to mŷ sér nŷtŷmnŷ, ājag tŷ ti ve mĕn kŷ, ěg Senhor tŷ ti jy nŷgĕn kŷ. Kŷ ti mŷ: “há tóg tŷ,” hemnŷ, ājag mŷ sér tŷn kŷ, ti kĕtŷg kŷ.

30 Cristo rĕnhrĕj tugrŷn tóg ter kren mŷr. Hĕ ra tóg tovĕnh ja tŷ nŷ, ĕ ter kren mŷ ra. Hĕ kŷ tóg inh ki rŷr há han. Ājag jĕgja kĕ jĕg kŷ tóg inh ki rŷr há han. Ũ tŷ ge mŷ vŷ há han nŷ.

3

Jesus tŷ ěg kurynh pĕ han

1 Inh kanhkĕ', vĕhĕ sóg ājag mŷ nĕn ŷ tónh ke mŷ gé sir, ha mĕ. ěg Senhor ki ājag ge kŷ nŷtŷ, hĕ kŷ mŷ sér nŷtŷmnŷ. Tag rĕn inh huri, hĕ ra sóg rĕn mĕn mŷ. Sŷ ājag mŷ tag tó to sóg krónh ke sór tŷ nŷ. Ājag mŷ tóg há tŷ, sŷ ti tŷ ājag mŷ sér nŷ to ājag jyvĕn kŷ.

2 Vĕnh ki rŷr. Őn kŷ Topĕ vŷ tó ti ag vŷ junjun ke mŷ, vĕnh jykre pĕno han mŷ ag, ha vemnŷ. Inh mŷ ag tóg cachorro ri ke nŷtŷ. Őn kŷ ag tóg ājag grĕ junun fĕr kym sór mŷ. Hĕ kŷ vĕnh ki rŷr.

3 “ěg fĕr kym hĕ tugrŷn ěg tóg tŷ Topĕ krĕ nŷtŷ,” he ag tóg tŷ, ōn kŷ. Hĕ tŷ vē. Topĕ kuprŷg vŷ tŷ ěg jagrĕ nŷ, kŷ ěg tóg ěg jagrĕ tag tugrŷn Topĕ mŷ vŷ há han tŷ. Kŷ Jesus Cristo vŷ ěg mŷ tŷ ŷn mĕg nŷ, ěg tŷ ti ki ge kŷ nŷtŷn kŷ. Hĕ tugrŷn ěg

tóg tÿ Topê krê pê nÿtí. Êg tÿ êg fár kym mũ ra tóg tÿ nén ù tũ nĩ sir. Êg fár vê mÿr, kÿ tóg êg kren han ke tũ nĩ.

⁴ Êg fár tÿ êg kren han ki kanhró nĩ ra sóg tÿ inh kren han sór mũ vê. Moisés jykre hã tÿ êg kren han ke ki kanhró nĩ ra sóg hã tÿ inh kren han sór mũ vê. Hã ra tóg ge tũ nÿ.

⁵ Vãsÿ inh jykre hã vê, ha mẽ. Isÿ kurã tÿ 8 (ke) han kÿ ag tóg inh gré junun fár kym, isÿ tÿ povo tÿ Israel krê nĩn kÿ, êg jóg'jóg ve tÿ Benjamim krê'krê ag kã ù. Kÿ inh han mũ fag vÿ tÿ Hebreu pê nÿtí. Inh mog kÿ sóg tÿ Fariseu nĩ, hã ra Fariseu ag tóg Judeu ag jykre to tar tãvĩ nÿtí.

⁶ Sÿ êg jykre to tar pê nĩn hã kÿ sóg Jesus ki ge kÿ nÿtí ag vóg kónãn. Topê tÿ Moisés mÿ vènh jykre nĩn ja ên ki króm kãn ja sóg nĩgtí mÿr. Vènh jykre ên mranh ja tũ sóg nĩgtí, ên kã sóg tÿ ùn kuryj ja nĩgtí.

⁷ Hã kÿ sóg ag mÿ tÿ ùn há pê ja nĩgtí. Hã ra sóg ùri tag kar to: “nén ù tũ vê, inh kókén jé tóg ke mũ,” he mũ sir. Sÿ Cristo ki rã kÿ sóg ên tovãnh kãn mũ sir.

⁸ Kÿ, hã vê. Inh jykre si kar tóg inh mÿ kórég nÿ, ùri, ti tÿ inh kókén kÿ. Nén pir hã ne há nÿ, hã vÿ: isÿ êg Senhor tÿ Jesus Cristo ki kanhró nĩ jé, he mũ. Êg tÿ nén ki kanhró kar kãfór ti nĩ, êg tÿ ti ki kanhró nĩ ti. Tag to sóg inh jykre si ên fón kãn. Inh mÿ tóg vènh jãgfa prènhpréj ên ri ke nÿ, inh jykre si ên ti, isÿ Cristo hã ki rã kÿ jèn kÿ.

⁹ Kÿ sóg ti hã ki rã kÿ jê sir. Ûri sóg Moisés jykre ki króm tigrĩn vèsÿ ùn mág han mãn sór tũ nĩ ha. Jesus ki rã hã tigrĩn sóg tÿ ùn mág jê ha. Hã tigrĩn Topê tóg iso: “há ti jê ha,” he mũ. Jesus ki rã tigrĩn ke vê ha.

¹⁰ Sÿ ti ki kanhrãn kÿ jê tag hã tóg inh mÿ há nÿ. Ti hã vÿ ã ter kar kÿ rĩr mãn, kÿ sóg ti mré rĩr mãn sór mũ gé. Hã jé sóg ti mré jagtar sór mũ gé, iser kÿ sóg ti ter ri ke han sór mũ gé.

¹¹ Sÿ rĩr mãn há tóg tĩ mÿr, iser kar kÿ. Hã jé sóg ti ri ke han sór tĩ.

Vènhvó to comparação

¹² Ver sóg ki kanhrãn kãn ja tũ nĩ, ver sóg tá krÿg ja tũ nĩ. Hã ra sóg vãsãn tĩ, sÿ komêr hã ti ki kanhrãn kãn jé, ti tÿ inh ki kanhró nĩ ên ri ke, isÿ tÿ ti tũ jèn kÿ, Cristo ti.

¹³ Inh kanhkã', ver sóg tá krÿg ja tũ nĩ. Hã ra sóg tag han mũ, ha mẽ. Vèsÿjãm sóg mĩ êkrén mãn tũ nĩ ha, vãsãn mãn', vãsãn mãn', he jé sóg ke mũ ha, isÿ kejèn tá krÿg jé.

¹⁴ Ag tÿ jagnê mré pétê ri ke han sóg tĩ mÿr. Jagnê mré ag tóg pétê tĩ, ù tóg ganhar he sór tĩ. Ên ri ke han sóg tĩ. Inh ganho vÿ tÿ isÿ rĩr krÿg ja tũ venh ke ti nĩ. Hã jé Topê tóg êg kuprêg, Jesus Cristo tigrĩn.

¹⁵ Û tÿ Jesus to sygsanh mũ ag jé inh kóm han kãn. Û tÿ hã ra to: “hã tũ vê,” hen kÿ Topê jé ti kanhrãn.

¹⁶ Kÿ ãjag tÿ ti jykre mæg mũ tag hã jagma mũmnĩ, ãjag tÿ tá junjun jé.

¹⁷ Inh kanhkã', inh jykre hã han kãn nĩ. Kÿ ù tÿ inh jykre ri ke han mũ ên jykre tugnÿm nĩ gé, ãjag tÿ ag mré hã han jé.

¹⁸ Û ag tóg ón kÿ Jesus Cristo ki ge kÿ nÿtí, hã ra ag tóg ti jykre kato vãsãnsãn mũ, Jesus tÿ êg jagfÿ cruz to ter mũ ra. Ag kãmén inh huri mÿr, ãjag mÿ. Tó tÿ hèn ri ke han isóg huri. Hã ra sóg ãjag mÿ ag tó mãn ke mũ gé sir. Inh fe kaj tóg tĩ, kÿ sóg fÿ mũ sir, ag jykre to.

19 Nũgme ki ag tóg vár ke mũ, inferno ki, ha mẽ. Jẽn há tãvĩ han sór ag tóg mũ, tag hã tóg ag mẽ sér tí. Nén tý ãg mẽ'a han tí tag hã tóg ag mẽ sér tí. Ëg tý tag mẽ vég tí ên hã to ag tóg jykrén sór tí.

20 Ag jãvo ãg jamã vỹ tý kanhkã ti nĩ. Kanhkã tá tóg kãtĩg ke mũ, ãg kren han ke mũ tí, hã vỹ: ãg Senhor tý Jesus Cristo, he mũ. Ti hã jãvãnh ãg tóg nỹtĩ.

21 Ti hã ne tóg ãg han mãn ke mũ', ã kãtĩg ký'. Ëg tý ga kri mũn ký ãg tóg ver krój nỹtĩ, ãg tý tý ãprã ke nỹtĩn ký. Ti tý ãg han mãn ký, ti tý ãg mẽ ãg fãr tãg han ken ký, ký ãg tóg ti ri ke nỹtĩn mũ, ti mág ri ke, ti tar ri ke, ti sĩnvĩ ên ri ke. Ti hã tóg ãg tý ù tãg han mãn ke mũ, ti tý tý ùn tar nĩn ký. Ti tar tugnĩn tóg nén kar tý ã krẽm ke han mãn ke mũ gé.

4

Paulo tý ãg jyvẽn

1 Inh kanhkã', tý ãjag tóg inh mẽ inh jãvy ri ke nỹtĩ, ký tóg sỹ ãjag venh há tũgtĩ, sỹ ãjag to há nĩn ký. ãjag hã tugnĩn inh fe tóg mrin ke tí, ãjag hã tugrĩn sóg tý ùn mág jẽ. ãjag to sóg há pẽ nĩ. Hã ký tar nỹtĩmĩ, ãg Senhor jykre to.

2 Vãhã sóg Evódia fi jyvẽn sór mũ, Síntique fi ke gé, ha mẽ. "Jagnẽ mrẽ vẽnh jykre pir hã han nĩ," he sóg mũ, ãjag mẽ. "Jesus mrẽ ke vỹ tý ãjag nỹtĩ, ký jagnẽ kato vãsãn tũg nĩ," he sóg tí.

3 Ký sóg ã mẽ ke mũ gé, vỹ. Inh ri kén ã tóg ãg Senhor rãnrãj han tí. Ký fag jyvẽn nĩ, fag tý jagnẽ to há nỹtĩ jẽ. Inh mrẽ fag tóg vẽnh kar mẽ Jesus kãmén tí, ký fag tóg Clemente mrẽ Topẽ ví ti tó tí gé, inh mrẽ ti tó mũ kar ag mrẽ ke gé. Fag jygjy vỹ rãnrãn ký nỹtĩ, Topẽ livron ki, hã ký fag tóg rĩr krỹg ja tũ venh ke mũ. Hã ký tóg tý ù nỹ, fag tý jagnẽ to jũ ti.

4 Ëg Senhor mrẽ ke vỹ tý ãg nỹtĩ, ký mẽ sér nỹtĩmĩ. Tag tó inh huri, hã ra sóg tó mãn ke mũ sir, ha mẽ. Mỹ sér nỹtĩmĩ mỹr, ha mẽ.

5 Vẽnh kar to fe nỹtĩmĩ. Ëg Senhor kãtĩg mãn ke vỹ kakó tí ha, ha mẽ.

6 Krĩ kufy nỹtĩ tũg nĩ. Nén kar tómnĩ, Topẽ mẽ, ti mrẽ vĩn ký. Ký ti mẽ nén kar to vĩmĩ gé, ãjag tý nén ve sór mũ kar to. Ký ti mẽ nén kar to: "há ti nĩ," hemnĩ gé, ãjag tý ti mẽ agradecer hen ký.

7 Ký Topẽ vỹ ãjag krĩ tý kuprã' henh ke mũ. Ëg tý nén kar to jykrén há ra ãg tóg vėsóg ki ãg krĩ kuprãg ki kagtĩg nỹtĩ. Ti hã ne ãg fe tý há' he tí', ti hã ne ãg krĩ kuprãg tí', ký tóg kuprãg pẽ nĩgtĩ sir, ti tý ãg krĩ tý kuprã' hen ký, ãg tý Jesus Cristo ki ge ký nỹtĩn ký.

8 Inh kanhkã', vãhã sóg ãjag mẽ nén ù tó sór mũ gé. Nén ù há hã to jykrén nĩ, hã vỹ: "ki hã tó," he mũ. Ëg tý nén ù to: "há ti nĩ," he ên hã to jykrén nĩ. Vẽnh jykre kuryj hã to jykrén nĩ, nén ù jãnhkri hã to jykrén nĩ. Nén ù sĩnvĩ kar to jykrén nĩ gé, ki hã ke kar to. Tag kar to ãg tóg: sér ti tí, he tí, hã ký to jykrén mág han nĩ.

9 ãjag kanhrãn mág sóg huri, sỹ ãjag mẽ ti jykre kãmén ký. Ký ãjag tóg inh jykre tugnỹm ja nĩ gé. ãjag tý isỹ nén han mũ ên hã han nĩ. Ký ù tý ãg krĩ kuprãg mũ ên hã vỹ ãjag tar han ke mũ, Topẽ tí.

Paulo tý ag mẽ agradecer he

10 Ha vé, inh fe tóg mrin ke mũ, ãjag tý inh mẽ nén ù jẽnẽn ký. Ký sóg to Topẽ mrẽ ví há han', ví há han' he mũ. Inh mẽ ãjag tóg ãkrẽg mũgtĩ, hã ký ãjag tóg inh mẽ nén ù jẽnẽn mãn. Vãsỹ ãjag tý inh mẽ ne jẽnẽnẽh ke tóg tũ tí, hã ký ãjag tóg inh mẽ nén ù jẽnẽn ja tũ nĩgtĩ. Vãhã tóg jun, ãjag tý inh mẽ nén jẽnẽn mũ tí.

11 Hã ra sóg ãjag mÿ isÿ nén ve sór mÿ ên ti tó ja tũ nĩ. Sÿ nén vég mÿ kar vÿ inh mÿ há nÿ.

12 Isÿ nén ù vég tũ (hã) ra tóg inh mÿ há nÿgtĩ gé. Isÿ nén ù e vég mÿ ra tóg inh mÿ há nÿgtĩ gé. Nén kar tag ve sóg huri. Kejën sóg tógá nÿgtĩ, kejën sóg kókĩr nÿgtĩ. Kejën sóg nén ù kar vég tĩ, kejën sóg nén ù vég tũ nÿgtĩ.

13 Nén kar to sóg tar nĩ, êg Senhor tÿ isar han kÿ.

14 Hã ra tóg há nÿ, ãjag tÿ inh jagãgtãn kÿ, ãjag tÿ inh jagtar nĩ tag to jykrén kÿ.

15 Vãsÿ ãjag tóg inh mÿ ù nĩm ja nÿgtĩ gé, isÿ ãjag mÿ Jesus kãmén vén kÿ. Sÿ ga tÿ Macedônia ki kutê kÿ ãjag hã tóg inh mÿ nén ù jênê ja nÿgtĩ, ãjag pir mÿ, ãjag, hã vÿ: Filipos tá ke ag, he mÿ. Û pi(jé) ãjag mré isÿ nén vég mÿ to jykrén ja nÿgtĩ, isÿ nén vég tũ ên to ke gé. ãjag pir mÿ ãjag tóg inh mré to jykrén inh hã, tag ki kanhró ãjag tóg nÿtĩ.

16 Isÿ cidade tÿ Tessalônica tá nĩn kÿ ãjag tóg inh mÿ nén ù jênê mãn ja nÿgtĩ gé, kar kÿ ãjag tóg ù jênê mãn', ù jênê mãn' he ja nÿgtĩ gé, ãjag tÿ inh ki rĩr há han jé.

17 Hã ra sóg isÿ jãnkamy venh ke ên to jykrén sór tũ nÿgtĩ. ãjag tũ mág nÿtĩ kÿ tóg inh mÿ há tĩ.

18 Nén kar vÿ inh ki junjun há han, kÿ sóg ve kãn mÿ, sÿ nén ve sór mÿ ên ve kãn inh huri. Epafrodito vÿ inh mÿ vin kãn, ãjag tÿ inh mÿ nén jênêg mÿ ti. Topê mÿ nĩm ja vê, ãjag tÿ inh mÿ nén nĩm ja ti, kÿ tóg ti mÿ sér tĩ sir. Ti mÿ tóg ãjag tÿ ti mÿ nén ger há pũn ên kri nĩ nĩ sir, ãjag tÿ inh mÿ nén jênêg mÿ ên ti.

19 Êg jóg tÿ Topê vÿ ãjag mÿ nĩm kãn ke mÿ, ãjag tÿ nén ve sór mÿ ên ti. Ti hã ne tóg nén kar tÿ tũ nĩ, kanhkã tá nĩ ên ti, hã kÿ tóg ãjag mÿ nén kar nĩm ke mÿ, Jesus Cristo tugrĩn.

20 Êg kar jé êg jóg tÿ Topê to: “tÿ ti ùn mág nĩ, tÿ ti ùn tar nĩ,” hé, kÿ êg tÿ ti mÿ vÿ há han vÿ tũ' henh ke tũ nĩ. Hã vê.

Paulo tÿ ag mĩ êkrén

21 Û tÿ Jesus Cristo ki ge kÿ nÿtĩ kar ag mĩ sóg êkrég tĩ. Êg kanhkã tÿ tag ki inh mré nÿtĩ ag vÿ ãjag mĩ êkrég tĩ gé.

22 Kar kÿ tag mĩ ù tÿ Topê ki ge kÿ nÿtĩ kar ag vÿ ãjag mĩ êkrég tĩ gé, pã'i tÿ imperador Ìn tÿ palácio krêm nÿtĩ ag kar ke gé.

23 Êg pã'i tÿ Jesus Cristo jé ãjag tar han. Hã vê.

PAULO TŶ CARTA HAN: COLOSSOS TÁ KE AG MŶ CARTA

¹ Paulo tŷ rá vĕ. Topĕ vŷ inh fĕg, sŷ tŷ Jesus Cristo apóstolo jĕ jé. Hã kŷ sóg ajag mŷ carta tag rán mŷ. Kŷ ěg régre tŷ Timóteo vŷ inh mré rán mŷ gé.

² ěg tŷ cidade tŷ Colossos tá Topĕ tŷ ag mŷ rán hã vĕ, ěg kanhkã ag mŷ, ũ tŷ Cristo ki ge tovãnh tŷ ag mŷ. ěg jóg tŷ Topĕ jĕ ajag tar han, ti jĕ ajag krĭ kuprãg.

Topĕ kuprĭg tŷ ěg tar han

³ ěg Senhor tŷ Jesus Cristo panh mŷ sóg vĭ há han tĭ, ajag to, ti mŷ sóg agradece he tĭ, kurã kar ki, sŷ Topĕ mré vĕmén kŷ.

⁴ Ajag tŷ Jesus Cristo ki ge tag mĕ inh, kŷ ajag tóg nĕji jagnĕ to há tãvĭ nŷtĭ gé, Topĕ ki ge kŷ nŷtĭ ag kar to ke gé.

⁵ Topĕ tŷ kanhkã tá ěg mŷ nĕn (ũ) ven ke mŷ ěn hã to jykrĕn ajag tóg tĭ nĕji. Ti tŷ ěg mŷ nĕn ũ ven ke mŷ mĕ ajag tóg huri. Ajag tŷ Cristo kãme sér ěn mĕ kŷ ajag tóg tag mĕ gé.

⁶ Ga kar mĭ tóg tĭ ha, vĕnh vĭ há tag, hã kŷ tóg ajag ki jun ja nĭ gé. Vĕnh vĭ há tag tóg Topĕ mŷ ěkré kanĕ ri ke han tĭ, vĕnh kar tŷ ti ki ge kŷ. Hã kŷ ajag tóg ti ki ge gé, ajag tŷ ti vĭ mĕ vén kŷ. ěn kã ajag tóg Topĕ tŷ ěg jagãgtãn ki kanhrãn ja nĭ, kŷ ajag tóg ki kanhró nŷtĭ ha.

⁷ Ũ tŷ ajag mŷ tóg vén mŷ vŷ tŷ Epafras nĭ. Jagnĕ to há tãvĭ ěg nŷtĭ, Epafras mré. Inh mré tóg Cristo rãnrãj han tĭgtĭ. Ajag ki rĭr há han tóg tĭ, ajag mŷ ti vĭ kãmĕn kŷ. To krónh ke tŷ ti nĭgtĭ.

⁸ Ti hã vŷ inh mŷ ajag tŷ ěg to há nŷtĭ tag tó, Topĕ kuprĭg tŷ ajag tŷ ěg to há nŷtĭ han mŷ ěn ti.

⁹ Epafras vĭ mĕ kŷ sóg ajag jagfy Topĕ mré vĕmén tĭ sir. Ti mŷ sóg to vĭ tĭ, ajag tŷ ti tŷ ajag ki nĕn ve sór mŷ ěn ki kanhrãn kãn jé, ti tŷ ajag mŷ krĭ há nĭm jé, ti tŷ ã kuprĭg tŷ ajag kanhrãn jé.

¹⁰ Kŷ ajag tóg ěg mré ěg Senhor jykre ki tŷ króm kenh ke ki kanhró nŷtĭnh mŷ gé, ajag jykre tŷ ti mŷ há nŷn jé. ěg tŷ vĕnh jykre há han kŷ ěg tóg ti mŷ ěkré kanĕ há ěn ri ke han tĭ. Ajag tŷ tag han kŷ tóg há tĭ. Kŷ ajag tóg Topĕ ki kanhrãn há han ke mŷ gé sir.

¹¹ Kŷ ajag tóg tŷ ũn tar nŷtĭnh mŷ gé sir. Ti hã ne ajag tar han tĭ', ti tar nĭn kŷ. Kŷ ajag tóg ti to krónh ke tŷ nĭgtĭ. Vĕnh kar to ajag fĕ nŷtĭnh mŷ.

¹² Kŷ tóg ajag mŷ sér tĭnh mŷ gé. Kŷ ajag tóg ěg jóg mŷ vĭ há han ke mŷ. Ti hã ne ajag tŷ há' he mŷ', ajag tŷ kanhkã ve jé. Ti tŷ ěg krĭn ken kŷ ěg tóg kurã krŷg ja tŷ ěn venh ke mŷ, kŷ ajag tóg venh ke mŷ gé, ěg mré.

¹³ ěg kygva tóg huri, hã kŷ ěg tóg tŷ kuty tân ag krĕm ke tŷ nŷtĭ ha. Topĕ kósĭn krĕm ke vŷ tŷ ěg nŷtĭ, ũri, Topĕ tŷ ũ to: inh fe, he mŷ ěn krĕm.

¹⁴ Ti hã ne ěg kren han mŷ', ti hã tigrĭn Topĕ tóg ěg mŷ vĕnh pãte fón mŷ, ěg tŷ ti vĭ mranh ja ti.

Jesus tigrĭn nĕn kar tóg vĕnh ven ke mŷ

¹⁵ Topĕ ri ke pĕ ti nĭ, ti kósĭn ti. ěg pi(jé) Topĕ vég tĭ'. ěg tŷ ti kósĭn ve kŷ ěg tóg Topĕ ki kanhró nŷtĭ. Ā panh kósĭn ve vŷ tŷ ti nĭ. Topĕ tŷ nĕn (ũ) kar hyn han kŷ tóg ã panh mré nĭ nĭ, ti kósĭn ti.

16 Ā kósin tugrīn tóg ā t̄y nén (ū) kar hyn han t̄i ěn nīm ja n̄igt̄i gé, Topē ti. Kanhkā tá ke ěn hyn han k̄an ja ti n̄igt̄i, Topē ti, ā kósin tugrīn, ga kri ke kar hyn han ja ti n̄igt̄i gé, ěg t̄y nén vég t̄i kar hyn han ja ti n̄igt̄i gé, ěg t̄y nén ve vānh kar hyn han ja ti n̄igt̄i gé. Pā'i kar hyn han ja ti n̄igt̄i gé, ūn tar ag kar, ūn mág ag kar hyn han ja ti n̄igt̄i, ūn kāsir kar ag mré hā. Ā kósin tugrīn tóg nén ū kar hyn han ja n̄i, k̄y tóg ti hā m̄y hyn han k̄an ja n̄i, nén (ū) kar ti.

17 Nén kar t̄y vėnh ven t̄ug ki tóg k̄ā n̄i n̄i, Cristo ti. Ti tugrīn nén kar tóg vāhā vėnh ven k̄an t̄i.

18 Ti ki ge k̄y n̄yt̄i kar ag kr̄i ri ke ti n̄i, k̄y ěg tóg ti há ri ke n̄yt̄i. Ūn ve v̄y t̄y ti n̄i, k̄y tóg r̄ir m̄an gé, ti ter kar k̄y, ěg r̄ir m̄an ken jo. Nén (ū) kar kri ke v̄y t̄y ti n̄i.

19 Topē m̄y tóg sér t̄i, ti kósin t̄y ti ri ke pe n̄in k̄y, ti t̄y t̄y ti ve p̄e n̄in k̄y.

20 K̄y tóg ti ter tugrīn vėnh kar to há n̄i ha, Topē ti, Jesus t̄y cruz to sa tugrīn, ti kyvėnh jamėn k̄y. K̄y Topē tóg ěg to j̄u t̄u n̄i ha, ū t̄y ga kri m̄u ag to, kanhkā t̄an ag to ke gé.

21 Hā k̄y tóg ājag to há n̄i ha, ke gé. Vās̄y ājag tóg vėnh jykre kórég hā han ja n̄igt̄i, hā k̄y ājag tóg Topē kato vās̄ans̄an ja n̄yt̄igt̄i.

22 Hā ra ti kósin tóg ěg ri ke mur ja n̄i, k̄y tóg ěg jagfy ter ja n̄i, hā k̄y Topē tóg ājag to há n̄i ha, ājag t̄y t̄y ti t̄u n̄yt̄i jé, ājag t̄y há p̄e n̄yt̄i jé, k̄y ājag jykre si ěn tóg t̄u t̄i ha.

23 Hā jé ti ki ge tovānh t̄ug n̄i. Tar n̄yt̄imn̄i, ti to krónh ke t̄ug n̄i. Ājag t̄y Jesus k̄ame sér ěn m̄e k̄y ājag tóg Topē t̄y ěg m̄y nén (ū) vin ke m̄u ěn k̄ame m̄e ja n̄igt̄i gé. Tag hā m̄i ěkrén n̄i, tovānh t̄ug n̄i. Ga kri m̄u kar ag v̄y m̄eg m̄u ha, Jesus k̄ame sér ěn. Inh r̄anhr̄aj hā vē, s̄y ag m̄y tónh ke ti, inh, hā v̄y: Paulo, he m̄u.

Paulo t̄y vēs̄yrėnh mág ja

24 Ājag jagfy sóg vēs̄yrėnh m̄u. Hā ra tóg inh m̄y sér t̄i. Cristo v̄y vēs̄yrėnh mág, ěg t̄y ti ki ge jé, k̄y ěg tóg ti vēs̄yrėnh ěn ri ke han ke m̄u gé, ū t̄y h̄en ri ke ag t̄y ěg tugrīn ti v̄i ki króm sór jé.

25 Topē ne inh m̄y: “hā vėnh kar m̄y inh v̄i ti tóg,” he ja n̄igt̄i, s̄y ti r̄anhr̄aj ki r̄ir jé, s̄y ājag m̄y tóg jé gé, ti v̄i ti. Ti t̄y ājag m̄y vėnh v̄i jėnė vē.

26 Topē tóg vās̄y ā t̄y nén han ke to jykrén ja n̄igt̄i, ā t̄y nén (ū) kar hyn han t̄ug ki tóg to jykrén ja n̄igt̄i. Hā ra tóg ěn k̄ā ū m̄y tóg ja t̄u n̄i ver. Vāhā tóg ū t̄y ti ki ge m̄u ěn ag m̄y tóg m̄u, ti t̄y vās̄y nén to jykrén ja ěn ti.

27 ěg hā m̄y tóg tóg m̄u ha, ti t̄y povo kar m̄y nén ū há t̄av̄i vin sór m̄u ti, hā k̄y tóg to há ū m̄y tóg j̄ā t̄u n̄i ver, ti t̄y ěg hā m̄y tóg sór k̄y. Ti t̄y ěg m̄y nén vin ken há vē, ha m̄e: Cristo v̄y ājag k̄at̄ā jam̄an n̄i ha, hā k̄y ājag tóg ěg t̄y kanhkā tá nén venh ke ěn ti venh ke m̄u gé sir, ěg mré, ū t̄y ti ki ge k̄y n̄yt̄i ag.

28 Cristo jykre tag hā tóg inh t̄i, vėnh kar m̄y. Vėnh kar kanhr̄an há han sóg t̄i, Topē t̄y inh m̄y kr̄i há n̄im jan tugrīn. K̄y sóg vėnh kar jyvėn t̄i gé, ag t̄y ti ki ge há han jé, ag t̄y kygnė sór t̄u n̄i jé. K̄y ag tóg há p̄e n̄yt̄inh m̄u, ag t̄y Cristo ki ge k̄y.

29 Hā to sóg vās̄an t̄i, k̄y sóg to ron t̄i gé. Ti hā ne isar han t̄i, ti tar n̄in k̄y.

2

1 Ha vé, ājag jagfy sóg vėnh r̄anhr̄aj mág p̄e to vās̄an t̄i, Laodicea tá ke ag jagfy ke gé, ū t̄y inh ve ja t̄u ag jagfy ke gé. Inh m̄y tóg há t̄i, ājag t̄y is̄y vās̄an tag m̄en k̄y.

²“Ag tỳ tag mẽ kỳ ag hỹn tóg nén ù kamẽg ke tũ nĩ, kỳ ag hỹn jagnẽ to há kar nỹtĩn mũ,” he sóg tĩ. Kỳ ãjag tóg ki kanhrãn ke mũ gé, Topẽ tỳ nén to jykrén mũ ẽn ti. Inh mẽ tóg ãjag tỳ tag ki kanhrãn kãn há tĩ, inh mẽ tóg ãjag tỳ to krĩ há nỹtĩn há tĩ. Topẽ tỳ nén to jykrén jan hã vỹ tỳ Cristo nĩ.

³Ëg tỳ ti ki kanhrãn kỳ ẽg tóg Topẽ ki kanhró nỹtĩn ke mũ gé. Ti pãte ẽg tóg vẽnĩ vĩ sér ù ve mãn ke tũ nĩ, ti hã tugrĩn ẽg tóg Topẽ ki kanhrãn kỳ nỹtĩ.

⁴Tag kãmén sóg mũ ãjag mẽ, ù tỳ ãjag krĩn kónãn tũ nĩ jé. Û tỳ ãjag krĩn kónãn sór mũ vĩ tóg há nĩ ve nĩ, hã ra tóg tỳ hã tũ nĩ.

⁵Ãjag vэг tũ sóg nĩ. Hã ra sóg ãjag ki ẽkrég tĩ, kỳ tóg sỹ ãjag ve ẽn ri ke tĩ inh mẽ. Inh mẽ tóg sér tĩ, ãjag tỳ Cristo ki ge tovãnh tũ nĩn kỹ, ãjag tỳ ti to tar tãvĩ nỹtĩn kỹ.

Cristo jykre

⁶Ha vé, Jesus Cristo ki ge kỹ ãjag nỹtĩ, ẽg Senhor ki. Kỹ ti jykre hã han nĩ.

⁷Ti hã vỹ ẽg mẽ ga ri ke nĩ. Ti ki jãre han nĩ, ka jãre ẽn ri ke han nĩ. Kỹ tóg ẽg mẽ ĩn tỳ kri jẽ jafã ri ke nĩ gé, ĩn nũna tỳ kri gunh kỹ fẽg ẽn ri ke ti nĩ gé. Ti ki ge tovãnh tũg nĩ. Tag hã mẽ ãjag, ãjag tỳ ti vĩ mẽ vẽn kỹ. Kỹ to tar nỹtĩmĩ, Topẽ mẽ vẽn vĩ há tó kỹ.

⁸Ha vé, veso jykrén. Inh mẽ tóg ù tỳ ón kỹ ãjag krĩn kónãn sór ha mẽ tĩ. Û tóg krĩg tãn tó tĩ, ù tóg nén ù tãn tó tĩ gé. Nén kórég mré ke ag vè, nén ù tãn kar ti. Kỹ ù tóg ẽprã ke jykre tó tĩ gé. Cristo jykre tũ vè, ẽprã ke jykre kar ti. Hã kỹ ù tỳ ãjag mẽ tag tó sór mũ ag vĩ jẽmẽ tũg nĩ.

⁹⁻¹⁰Cristo vỹ tỳ nén (ũ) kar kri ke nĩ, pã'i kar kri ke vỹ tỳ ti nĩ. Ti fãr vỹ ẽg ri ke ja nĩgtĩ, ti tỳ ga kri ti mũn kỹ, hã ra tóg tỳ Topẽ jẽ nĩ, ti fãr kãkã ti jẽ nĩ, Topẽ ti. Topẽ pẽ hã vè sir. Kỹ ãjag tóg há nỹtĩ gé sir, ãjag tỳ ti ki ge kỹ, há tãvĩ.

¹¹Kỹ, ẽg tỳ ẽg gré junun fãr kym mũ vỹ ge nĩ, ha mẽ. Ti ki ge kỹ ẽg tóg ẽg jykre si tovãnh mũ sir. Judeu ag tóg ãjag gré junun fãr kym ja nĩgtĩ, vẽn kar tỳ ag tỳ Topẽ jykre hã han mũ ẽn ki kanhró nỹtĩ jé. Ûri ẽg tóg ẽg jykre si tovãnh mũ, vẽn kar tỳ ẽg tỳ Topẽ jykre han mũ ki kanhró nỹtĩ jé. Ẽg tỳ ti mré ter ri ke ti nĩ, ẽg tỳ ẽg jykre si tovãnh mũ ti, kỹ ẽg tóg ẽg tỳ nén ù to ẽn mũ ẽn han mãn ke tũ nĩ. Ẽg tỳ Cristo mẽ vẽn fẽg to ken hã vè.

¹²Ti mré ter ri ke han kỹ ẽg tóg vẽnĩ kej kãkã nỹ ri ke han mũ gé, ti mré. Vẽnĩ kype to ken hã vè, batismo to ken hã vè, hã vỹ: ti mré vẽnĩ kej kãkã nỹ ri ke han mũ, he mũ. Kỹ ẽg tóg ti mré rĩr mãn ri ke han mũ gé sir, ẽg tỳ goj kãtã kãkutẽ kỹ. Ẽg jykre si tỳ tóg hur tũ' hé, kỹ ẽg rĩr mãn vè sir. Topẽ vỹ Cristo rĩn mãn, ti ter kỹ. Ẽg tỳ ti ki ge kỹ tóg ẽg rĩn mãn mũ gé sir.

¹³Vãsỹ ãjag tóg vèser ri ke nỹtĩ ja nĩgtĩ. ãjag tỳ ti vỹ mranh tugrĩn, ãjag tóg ãjag kãgter ra mũ ja nĩgtĩ, ãjag gré junun fãr kym tũ ja tugrĩn. Hã ra tóg ãjag rĩn mãn ja nĩgtĩ, Cristo mré Topẽ ti. ãjag mẽ tóg hur vẽnĩ pãte fón, ãjag tỳ vẽnĩ jykre kórég han ja ẽn ti tỳ.

¹⁴Ẽg név(e) rá ẽn tỳ tóg tũ' hé huri, ẽg mẽ. Rãn kỹ tóg nĩ ja nĩgtĩ, ẽg név(e) ẽn ti, hã vỹ: ẽg tỳ ti vỹ mranh, he mũ. Tag to tóg ẽg to jũ ja nĩ vè. Hã ra Cristo tóg tỳ tũ' hé. Cruz to tóg ti sa, ẽg név(e) ẽn ti, kỹ tóg tỳ tũ' hé. Kajãm kãn tóg hur.

¹⁵Kỹ tóg Japo pã'i kar ag tỳ tũ' he ja nĩgtĩ gé, ùn tar ja ẽn ag tỳ. Cruz to sa kỹ tóg ag tar tỳ tũ' hé, ù tỳ ti kato vãsãnsãn mũ ẽn ag tỳ, kỹ ẽg kar tóg ag venh ke mũ, kỹ ẽg tóg ag to é henh ke mũ sir. Cristo tóg ag pan kar kỹ ag tatĩn tũg kãn ke mũ, nũgme ki ag vãm jé. Tag ve jé ẽg tóg ke mũ.

¹⁶ Kĩ ù tỹ vėjēn há to ājag mỹ: “ā tỹ tag kon kỹ Topē tóg ā to jũnh mũ,” hen kỹ hã ra kri nĩm tũg nĩ. Kurã kórég tó sór ag tóg tĩ gé, festa kar, kysã tãg ke gé, vėnh kãn ke kurã ke gé.

¹⁷ Vãsỹ ke ja vė, vėnh jykre tag, Cristo kãtĩg ke jo ke ja vė, tag. Cristo kãtĩg kỹ ěg tóg vėnh jykre tãg vėg nỹtĩ ha, kỹ ěg ti si tovãnh mũ sir.

¹⁸ Ū tóg ājag mỹ Topē tỹ jēnē jafã ag tó sór mũ ěg. “Topē tỹ jēnē jafã vėg sóg tĩ, tag hã tóg inh mỹ sér tĩ,” he ag tóg tĩ. “Isỹ tỹ nén ũ tũ (hã) ra sóg vėg tĩ. Kỹ sóg kãnhkã tãn tag ag mỹ jãn sór tĩ,” he ag tóg tĩ, ón kỹ. Hã ra ag tóg tag hã to (ag tóg) tỹ ũn mág nỹtĩ sór mũ, ājag kãfór nỹtĩ sór ag tóg mũ.

¹⁹ Ag pi(jé) Cristo jykre han sór mũ'. Cristo jykre hã tóg ā pir mỹ tar nĩ. Ěg krĩ ri ke ti nĩ, Cristo ti, kỹ ěg tóg ti há ri ke nỹtĩ, ěg tỹ ti ki ge kỹ nỹtĩn kỹ. Ěg krĩ vỹ ěg tỹ nén (ũ) han sór mũ ěn han tĩ, ěg kujej tỹ, ěg mó tỹ ke gé. Kỹ ěg há tóg mog mũ sir, ti tỹ ěg krĩ mré vėnh jykre pir han kỹ. Kỹ ěg tóg Cristo jykre han ke mũ, ti tỹ ěg krĩ ri ke nĩn kỹ. Hã ra ag tóg tag han sór tũ nĩ, ũ tỹ ājag krĩn kónãn tĩ ag.

Jesus mré ěg rĩnrĩr nỹtĩnh

²⁰ Hã kỹ ājag tóg Cristo mré ter ri ke han. Krĩg tãn kórég ag pi(jé) ājag tỹ hė ri ke mãn mũ ha', nén ũ ũ kar tãn kórég ag ke gé. Kỹ ag jykre ěn vỹ ājag mỹ tũ' hė. Ąjag tỹ ne jé ag tỹ ājag mỹ vĩ jēmē sór nē, ag tỹ ón kỹ vėjēn há to:

²¹ “tag vóg tũg nĩ, Topē mỹn kórég nĩ, tag ko tũg nĩ, ěn vóg tũg nĩ,” hen kỹ? Ag vĩ tag jēmē tũg nĩ.

²² Ěprã ke ag jykre vė, tag ti. Tag mĩ ke vė, ěg tỹ nén (ũ) vóg mũ ti. Tũg kãn jé tóg ke mũ, kejēn, hã kỹ ěg tóg Topē vĩ hã jēmēg tĩ.

²³ Ag jykre vỹ há nỹ ve nĩ. Krĩ há nĩ ve ag nỹtĩ. Kãnhkã tãn to ag há nỹtĩ, ag to ag jãn tĩ, kỹ ag tóg vėsỹ vėnh kar krēm ke nỹtĩ sór ve nĩ ěg, vėsãvĩn vóg kónãn ag tóg tĩ gé. Tag hã to jykren kỹ ag tóg vėsỹ ũn mág han sór mũ jãvo. Ąjag tỹ nén to ěn mũ ěn han ag tóg tĩ, vėnh jykre tag han kỹ, hã kỹ ag vĩ jēmē sór tũg nĩ.

3

¹ Ha vé, Cristo mré ājag tóg rĩnrĩr mãn. Hã kỹ ti jykre hã han sórmnĩ. Kãnhkã tá tóg nĩ nĩ, Topē pėgia tá ti nĩ, Cristo ti. Kỹ ti hã mĩ ěkrėn nĩ, ājag tỹ ti mré tá junjun ti jé.

² Ū tỹ kynhmỹ nĩ ěn jykre hã han sórmnĩ. Ěprã vėnh jykre to jykren tũg nĩ.

³ Ter jé ěg tóg ke mũ, ěg fãr tag ti. Hã ra ěg tóg Cristo mré Topē ki vėnh pėju ri ke han. Tĩ tỹ ěg jy nĩgãn to ken hã vė, ěg ter pė han tũ nĩ jé, ěg tỹ ti mré rĩnrĩr nỹtĩ jé.

⁴ Kejēn tóg vėnh ven ke mũ, Cristo ti, ěg rĩnrĩr han mũ ti. Kỹ vėnh kar tóg venh ke mũ, ěg tỹ ti mré rĩnrĩr nỹtĩ ti, ěg tỹ tỹ ũn mág nỹtĩ ti.

Ěg jykre si mré ěg jykre tãg

⁵ Ąjag jykre si tovãnh nĩ, ājag tỹ nén to ěn mũ ěn mỹ vėnh nenh nĩ. Ěg jykre si hã vė, ha mē: ěg prũ tũ mré nỹ, ěg mén tũ mré nỹ, nén vėnh mỹ kar han, Topē tỹ nén ũ to: “han tũg nĩ.” he mũ ra to ěn mũ, ā tỹ nén e hã tỹ vãsãn (ka)mē. Vėnh kãgrá to jãn ěn ri ke ti nĩ, ěg tỹ ěg tỹ nén e hã tỹ vãsãn sór kỹ.

⁶ Tag tugrĩn Topē tóg ěg to jũ mũ, ti vĩ mranh hã vė.

⁷ Tag han ja ājag tóg nỹtĩgtĩ, vãsỹ, ājag tỹ vėnh jykre kórég tag mĩ mũn kỹ.

⁸ Hã kÿ tag tovãnh kãn.

Fe gÿv (ka)mẽ han tũg nĩ. Jagnẽ to krĩ rÿ han tũg nĩ. Ũ to jykren kónãh tũg nĩ. Ũ mÿ vĩ kónãh tũg nĩ, ù to vĩ kónãh tũg nĩ gé.

⁹ Jagnẽ mÿ ón tũg nĩ gé. Ājag jykre si ên tovãnh kãn nĩ, kÿ tóg êg tÿ êg kur si nũnh ri ke nĩ.

¹⁰ Kÿ vènh jykre tãg hã han kãn nĩ gé, kÿ tóg êg tÿ kur tãg tu ri ke nĩ. Êg tÿ tóg ù tãg han sór mũ, Topẽ ti, êg tÿ tÿ ti kãnhvæg ri ke nÿtĩ jé, ù tÿ êg han mũ kãnhmég ên ri ke, êg tÿ ti ki kanhrãn pẽ han jé.

¹¹ Kÿ êg tóg tÿ ùn pir nÿtĩ ha, fóg ag, Judeu ag, ù tÿ Judeu jykre han mũ ag, ù tÿ ag jykre han tũ ag ke gé, kanhgág ag, kanhgág jũ ag, patrão krêm ke ag, ag patrão mré hã. Êg tÿ Cristo ki ge kÿ êg tóg tÿ ùn pir nÿtĩ, kÿ Cristo hã vÿ tÿ êg kar krĩg mÿ ke nĩ.

¹² Topẽ vÿ ājag kupræg, ājag tÿ tÿ ti tũ nÿtĩ jé, ti tÿ ājag to há tãvĩ jèn kÿ. Kÿ ti jykre hã han nĩ. Jagnẽ jagãgtãn nĩ. Jagnẽ mÿ vĩ há han nĩ. Vèsÿ ùn mág han sór tũg nĩ. Koměr hã vĩmnĩ. Jagnẽ to fen mág nÿtĩmnĩ.

¹³ Jagnẽ to jũ tũg nĩ. Jagnẽ mÿ vènh pãte fón nĩ, ù tÿ ājag mÿ vĩ kórég han kÿ. Êg Senhor vÿ êg mÿ vènh pãte fón tĩ gé, kÿ jagnẽ mÿ vènh pãte fón nĩ, ti ri kén.

¹⁴ Ājag tÿ jagnẽ fe ri ke nÿtĩn kÿ tóg há kar tĩ. Kÿ ājag tóg vènh jykre pir han ke mũ.

¹⁵ Cristo jé ājag krĩ kuprãg, kÿ ājag tóg krĩ kãnhvy nÿtĩnh mũ ha. Êg krĩ kuprã nĩn kÿ êg tóg jatun mÿ jagnẽ mré nÿtĩnh mũ, êg tÿ Cristo há ri ke nÿtĩ jé. Hã jé tóg êg jé prær, Topẽ ti. Kÿ ti mÿ tag to agradecer hemnĩ.

¹⁶ Cristo vĩ hã tÿ jagnẽ mÿ tómnĩ, hã ki kanhrãn sórmnĩ. Tag tÿ jagnẽ jyvèn nĩ, tag hã to krĩ há han nĩ. Kÿ Topẽ mÿ vĩ há han nĩ gé. Ti mÿ jãn nĩ, ti jé hã tómnĩ, ti kuprĩg tÿ ājag mÿ nén tó mũ ti. Ti hã mÿ vĩ há han nĩ, ti mÿ: “inh mÿ tóg há tĩ, ã tÿ inh mÿ nén han mũ ti,” hemnĩ.

¹⁷ Ājag tÿ nén ù han kÿ êg Senhor mré vèmén kar kÿ han nĩ, ājag tÿ ti jykre hã han jé. Ājag tÿ nén ù tó sór kÿ ti hã mÿ tó vén nĩ gé. Êg Senhor tÿ Jesus jykre hã han jé êg tóg ke mũ, kÿ êg tóg ti hã tigrĩn (êg tóg) êg jóg tÿ Topẽ mÿ vènh vĩ há tónh ke mũ gé sir, ti mÿ agradecer hen kÿ.

Êg jykre tãg

¹⁸ Kÿ sóg ùn mén nÿtĩ fag jyvèn sór mũ. Ājag mén jykre mĩ mũmnĩ. Êg Senhor jykren hã vè.

¹⁹ Ājag mén jyvèn sór sóg mũ gé. Ājag prũ to há tãvĩ nÿtĩmnĩ. Fag mÿ vĩ tar han tũg nĩ.

²⁰ Kÿ sóg ājag krẽ mÿ tag tó sór mũ gé. Ājag han mũ fag vĩ jëmêmnĩ. Êg Senhor vÿ tag ve sór mũ, ājag ki.

²¹ Kÿ sóg ùn sanh ag mÿ: ājag krẽ mÿ vĩ tar pẽ han tũg nĩ, ag tÿ ājag to jũ tũ nĩ jé, he mũ gé. Krónh ke jé ag tóg ke mũ, ājag tÿ ag mÿ vĩ tar pẽ han kÿ.

²² Ājag kãmĩ ù tóg patrão mÿ rãnrãj tĩ, fagrĩnh mÿ. Ājag jyvèn kÿ sóg ājag mÿ: ājag patrão vĩ ki hã han nĩ, he mũ. Ũ tóg kejèn ã patrão tÿ ti mÿ vĩ há han hã jé tóg ã patrão tũ ki rĩr tĩ, ón kÿ. Tag han tũg nĩ. Ājag patrão tũ ki rĩr pẽ han nĩ, ājag tÿ êg Senhor kamæg kÿ. Vènh jykre pir hã han nĩ, ājag patrão mÿ.

²³ Ti rãnrãj ki rĩr kÿ mÿ sér nÿtĩmnĩ. Ājag tÿ êg Senhor tÿ Jesus rãnrãj han ri ke ti nĩ, ājag patrão rãnrãj han mũ ti.

²⁴ Ęg Senhor vỹ ājag mỹ ājag rānhrāj kajām ke mũ, ājag tỹ ti tũ kar ag mré tá junjun ken kỹ. Tá ti vin han kỹ nỹtĩ, ti tỹ ājag mỹ nén vin ke mũ ěn ti. Ājag patrão pẽ vỹ tỹ ěg Senhor tỹ Cristo nĩ. Ti hã mỹ ājag tóg rānhrāj tĩ.

²⁵ Ū tỹ vĕnh jykre pāno han mũ ěn vóg kónān jé tóg ke mũ, Topẽ ti, ag tỹ tỹ ũn mág nỹtĩ (hã) ra. Topẽ mỹ ěg tóg jagnẽ ri ke kar nỹtĩ, tag ki ũn mág ag mré ũn kāsir ag. Vĕnh kar vóg kónān jé tóg ke mũ, vĕnh jykre pāno to, Topẽ ti.

4

¹ Ājag kāmĩ ũ vỹ tỹ patrão nỹtĩ, kỹ sóg patrão hã jyvĕn sór mũ ha. Ājag camarada ag vỹ ājag rānhrāj han tĩ. Kỹ ag mỹ vĕnh jykre kuryj han nĩ. Ag ki rĩr há han nĩ. Patrão ũ vỹ tỹ ājag krĩg mỹ ke nĩ, hã vỹ: ěg Senhor, he mũ, kanhkã tá nĩ ti. Tag to jykren.

Paulo tỹ ěg jyvĕn

² Topẽ mré vĕmĕn tovānh tũg nĩ. Ti mỹ: “inh mỹ tóg há tĩ,” hemnĩ gé. Mũmĕg nĩ, ājag tỹ ti mré vĕmĕn to krónh ke tũ nĩ jé.

³ Kỹ ti mré iso vĕmĕn nĩ gé. Topẽ vĩ tó sóg tĩ. Kỹ ti mỹ to vĩmnĩ, ag tỹ inh vĩ mĕ há han jé, sỹ ag mỹ Cristo kāmĕn kỹ, sỹ ag mỹ Topẽ tỹ nén han sór mũ ěn kāmĕn kỹ. Tag tugrĩn sóg se kỹ jé.

⁴ Hã ra sóg tó há han sór mũ, Topẽ tỹ inh mỹ vĕnh rānhrāj tag nĩm kỹ. Hã jé iso ti mré vĕmĕn nĩ.

⁵ Ū tỹ ěg jāvo Jesus ki ge tũ ag mỹ vĩ há han nĩ. Kurã kren tũg sórmnĩ.

⁶ Nén ũ há tỹ vĕmĕn nĩ, vĕnh kar mỹ sér tĩ jé, ag tỹ ājag vĩ mĕn kỹ. Kỹ ājag tóg vĕnh kar mỹ kāmĕn há han ki kanhró nỹtĩnh mũ.

Paulo tỹ ag mĩ ěkrĕn

⁷ Sỹ ājag mỹ Tíquico jĕnĕ vĕ, ti tỹ ājag mỹ isỹ nén (ũ) vég mũ kāmĕn kãn jé, isỹ nén (ũ) han mũ ti ke gé. Ęg régre vĕ, Tíquico ti. Ęg to há tãvĩ ti nĩ. Ęg Senhor rānhrāj han ti tĩ, to krónh ke tũ ti nĩgtĩ.

⁸ Ti hã vỹ sỹ nén vég mũ tó kãn ke mũ, hã jé sóg ti jĕnĕg mũ, ti tỹ ājag fe tỹ mrin ke jé.

⁹ Ti mré sóg ājag mré ke tỹ Onésimo jĕnĕg mũ gé. Ęg régre vĕ gé, ěg to há ti nĩgtĩ gé, Topẽ ki rã to krónh ke tũ ti nĩgtĩ. Ag hã ne ājag mỹ tónh ke mũ', cidade tag ki nén kutĕ mũ ti.

¹⁰ Aristarco vỹ inh mré se kỹ jĕ gé. Ājag mĩ tóg ěkrĕg tĩ. Marcos vỹ ājag mĩ ěkrĕg tĩ gé, Barnabé kanhkã ěn ti. Marcos to sóg ājag mỹ vĕnh vĩ jĕnĕ huri, ājag tỹ ti mỹ: “ha kārã,” he jé, ti tỹ kejĕn ājag tá jun ti kỹ.

¹¹ Josué vỹ ājag mĩ ěkrĕg tĩ gé, ag tỹ ũ to: Justo, he mũ tag ti. Judeu ag vĕ, Aristarco mré Marcos mré Josué ti. Inh mré ag tóg rānhrāj tĩ, Topẽ vĩ ki. Ag jāvo Judeu ũ ag vỹ inh mré rānhrāj jāvānh nỹtĩ gé. Kỹ ũ tãgtũ tag ag tóg inh fe tỹ mrin ke tĩ, ag tỹ inh mré rānhrāj kỹ.

¹² Epafras vỹ ājag mĩ ěkrĕg tĩ gé, ājag mré ke tag ti. Jesus Cristo rānhrāj han kỹ tóg jĕ nĩ. Ājag to tóg Topẽ mré vĕmĕn tĩ, to tóg vāsān tĩ, to krónh ke tũ ti nĩgtĩ, ājag tỹ kygnĕg tũ nĩn jé, ājag tỹ Topẽ tỹ ěg ki nén ve sór mũ ěn hã han sór jé, ājag tỹ tag hã to tar nỹtĩ jé.

¹³ Ājag hã ki tóg ěkrĕg tĩ, tag vég sóg tĩ, kỹ tóg Laodicĕia tá ke ag mĩ ěkrĕg tĩ gé, Hierápolis tá ke ag mĩ ke gé.

¹⁴ Lucas vỹ ājag mĩ ěkrĕg tĩ gé, médoco ěn ti, ũ tỹ ěg to há tãvĩ ěn ti, kar kỹ Demas ti ke gé.

¹⁵ Laodicéia tá ãg régre ag mÿ tómnĩ, sÿ ag mĩ ěkrég mũ ti. Ninfa fi mĩ sóg ěkrég tĩ gé, fi ĩn tá vĕnh mǎn jafǎ ěn ki.

¹⁶ Ājag tÿ vĕnh rán tag to ke kar kÿ Laodicéia tá Topĕ ki ge kÿ nÿtĩ ag mÿ jĕnĕmnĩ, kÿ tá ke ag tũ to kemnĩ gé, vĕnh kato, sÿ ag mÿ carta jĕnĕg mũ ti.

¹⁷ Kÿ Arquivo mÿ: ěg Senhor tÿ Ā mÿ nĕn (ũ) tó mũ ěn han nĩ, to krónh ke tũg nĩ," hemnĩ.

¹⁸ Vǎhǎ sóg vĕsóg ki ājag mÿ rán ke mũ ha', inh, hǎ vÿ: Paulo, he mũ. Isÿ se kÿ jĕ tag kǎ jatu' he tũg nĩ. Topĕ jĕ ājag tar han tĩ. Hǎ vĕ.

PAULO TÛ CARTA HAN: TESSALÔNICA TÁ KE AG MÛ CARTA VE

¹ Paulo tÛ rá vë. Isÿ cidade tÛ Tessalônica tá ke ag mÛ rán hã vë. Tessalônica tá ãjag tóg vënh mãn tĩ, Topê vĩ mẽ jé. Topê tũ vÿ tÛ ãjag nÿtĩ, ãg jóg mág ti. Jesus Cristo tũ vÿ tÛ ãjag nÿtĩ gé, ãg Senhor ti. Sÿ ãjag mÛ vënh rá jënê vë, kÿ Silas vÿ jënêg mũ gé inh mré, Timóteo ke gé. Topê mÛ sóg to vĩ tĩ, ti tÛ ãjag tar han jé, ti tÛ ãjag mÛ vënh jykre kusa nĩm jé.

Vënh kar tÛ Tessalônica tá ke ag jykre vég tĩ

² Kurã kar ki sóg ãjag to Topê mré vĩ tĩ. Ti mÛ sóg: “há ti nĩ, ã tÛ ag krĩn há han kÿ,” he tĩ, kurã kar ki.

³ Sÿ ti mré vĩn kÿ sóg ãjag mĩ êkrég tĩ. ãjag tÛ ti ki ge kÿ nÿtĩn kÿ ãjag tóg nén ù há kar han mügtĩ. ãjag tÛ ti to há nÿtĩn kÿ ãjag tóg rãnrãj mág han mügtĩ. ãjag tÛ ãg Senhor tÛ Jesus Cristo ve sór kÿ ãjag tóg to krónh ke tũ nĩgtĩ. Tag mĩ sóg êkrég tĩ, kurã kar ki, sÿ Topê mré vĩn kÿ, ãg jóg mág mré.

⁴ Inh kanhkã!, tÛ ãg tóg Topê fe nÿtĩ, ti tÛ ãg kuprëg ja nĩn kÿ. Tag ki kanhró ãg tóg nÿtĩ.

⁵ Sÿ ãjag mré nĩn kÿ sóg ãjag mÛ Topê vĩ sér tó ja nĩgtĩ. Inh pi(jé) inh jykre tÛ vëmén ja nĩgtĩ'. Topê jykre hã tÛ sóg vëmén tĩ, Topê kuprīg tÛ inh krĩn kÿ. Ti hã vÿ ãg tar han tĩ. Ki hã tó sóg mũ ãjag mÛ, tag ki kanhró ãjag tóg nÿtĩ. Isÿ ãjag mré nĩn kÿ ãjag tóg inh ve ja nĩgtĩ, hã kÿ ãjag tóg inh jykre ki kanhró nÿtĩ. Sÿ ãjag to há nĩn kÿ, hã kÿ sóg ãjag mÛ tó ja nĩ.

⁶ Inh ri ke han sór ãjag tóg mũ, ãg Senhor ri ke ke gé. Sÿ ãjag mÛ nén tó ja ãn kri fig ãjag tóg tĩ. Kÿ ãjag tóg to vësÿrénh jagy han tĩ, ùri, pã'i ag tÛ ãjag to kórég nÿtĩn kÿ. Hã ra Topê kuprīg vÿ tÛ ãjag jagrê nĩ, hã kÿ ãjag krĩ tóg kãnhvy' he mũ, ãjag vësÿrénh mũ (hã) ra, ãprã.

⁷ Hã kÿ vënh kar tóg ãjag tÛ nén han mũ mëg mũ sir, ga tÛ Macedônia tá, ga tÛ Grécia tá ke gé, ag tÛ ãjag kóm han kãn jé sir, ù tÛ Jesus ki ge kÿ nÿtĩ kar ag ke gé.

⁸ Vënh kar vÿ ãjag tÛ nén han mũ mëgmë kãn huri. Topê vĩ tó ãjag tóg mũ, hã kÿ ag tóg ga tÛ Macedônia tá mëgmë, ga tÛ Grécia tá ke gé, ãmã kar mĩ hã. ãjag tÛ Topê ki ge mũ mëgmë kãn ag tóg huri. Isÿ ag mÛ tó sór kÿ ag tóg: “më ãg huri,” he tĩ.

⁹ Kÿ ag tóg inh mÛ kãmén mũ, sÿ ãjag mÛ Topê vĩ tó ja ãn ti. “Ã vĩ kri fig ag nëji mũ, Tessalônica tá ke ag,” he ag tóg tĩ inh mÛ, ãjag to. “Topê ki ge kÿ ag nëji nÿtĩ, vënh kãgrá tÛ topê tovãnh kÿ, ag tÛ Topê vĩ hã han jé sir, ùn rĩr mũ vĩ tĩ, hã vÿ: Topê pë, he mũ,” he ag tóg tĩ ãjag to.

¹⁰ “Ti kósin nëji vÿn kenh ke mũ, kanhkã tá. Ti kãtīg jãvãnh ag nëji mũ,” he ag tóg tĩ. “Topê nëji ti rĩn mãn, ti ter kar kÿ, Jesus ti. ãn nëji ãg krenkren han mũ, ãg tÛ Topê jũ vég tũ nĩ jé, Jesus kãtīg jãvãnh ag nëji mũ, Tessalônica tá ke ag,” he ag tóg tĩ ãjag to.

2

Paulo tÛ ag mÛ Topê vĩ tó há han

¹ Inh kanhkã', inh ve ãjag tóg, isỹ ãjag mré nĩ ja nĩn kã. Isỹ ãjag mỹ Topẽ ví tó ký ãjag tóg Topẽ ki rá. Tó há han ja sóg nĩ.

² Cidade tý Filipos tá ag tóg inh vóg kónãn ja nĩgtĩ. Tá ag tóg iso é he ja nĩgtĩ. Tá kãkutẽ ký sóg ãjag tá jun ja nĩgtĩ. Tag ki kanhró ãjag tóg nỹtĩ. Ge ra sóg ãjag mỹ tó, Topẽ ví sér ti. ãjag kamẽg ja tũ sóg nĩ, Topẽ tý isar han ký, sỹ inh jagtar jagy ẽn ve ja ra.

³ Sỹ ãjag jyvẽn ký sóg ãjag mỹ ki hã tó ja nĩgtĩ, kygnẽ ja tũ inh nĩ. Nén ù vẽnhmỹ tó ja tũ sóg nĩgtĩ gé. ãjag tý nén ù to ẽn ja tũ sóg nĩgtĩ gé.

⁴ Topẽ hã ne inh jykre ve ký inh mỹ: “ha inh ví ti tó,” he ja nĩ'. Hã ký sóg tó mũ sir. Êprã ke ag tý iso ví há han tũ ra tóg inh mỹ tý nén ù tũ nỹ. Topẽ tý iso ví há han ke tag hã tóg inh mỹ há nĩ'. Hã jé sóg ti ví hã ki króm sór mũ. Ti hã ne ẽg jykre ve ký ẽg ki kanhró nĩ', Topẽ ti.

⁵ Hã ký sóg ãjag mỹ ón ký: “há ãjag tóg nỹtĩ,” he ja tũ nĩgtĩ. Tag ve ãjag mỹr. ãjag tý nén ù to ẽn ja tũ sóg nĩgtĩ gé. ãjag ki sóg ganho ve sór ja tũ nĩ gé. Topẽ hã ne tag vé'.

⁶ Ký ẽprã ke ag tý iso ví há han tũ ra tóg inh mỹ tý nén ù tũ nỹ mỹr. ãjag tý inh mỹ ví há han tũ ra tóg inh mỹ tý nén ù tũ nỹ gé.

⁷ Cristo há vỹ inh jẽnẽ ja nĩ, hã ký tóg, sỹ ãjag mỹ ví tar han há tóg tí vẽ. Hã ra sóg ke ja tũ nĩ. Komẽr hã sóg ví ja nĩgtĩ. Ẽg tý ẽg krẽ kãsir mré ví ri ke han ja sóg nĩgtĩ. Gĩr mỹnh fi tý komẽr hã ví ẽn ri ke han ja sóg nĩgtĩ.

⁸ ãjag to sóg há távĩ nĩ, hã ký sóg ãjag mỹ Topẽ ví sér tó kãn sór ja nĩgtĩ. Ký tóg inh mỹ tý nén ù tũ nĩ gé, sỹ ãjag jagfy ter ke ti.

⁹ Inh kanhkã', inh rãnhrajĩ to jykrén nĩ. Inh rãnhrajĩ vỹ inh kutãn tí. Kuty ki sóg inh rãnhrajĩ han tí, kurã ki ke gé, isỹ vėjẽn comprar he jé. Hã ký sóg ãjag jẽn ko ja tũ nĩgtĩ. Topẽ ví hã tó ja sóg nĩ, ãjag kanhrãn ký. Tag to jykrén.

¹⁰ Isỹ nén han mũ ve kãn ãjag tóg, ký Topẽ vỹ inh vég tí gé. Topẽ jykre hã han isóg tí, vẽnh jykre kuryj ti, nén ù vẽnhmỹ han vãnh sóg nĩgtĩ. ãjag rĩnve sóg han, ãjag tý Jesus ki ge ký nỹtĩn ký.

¹¹ Gĩr panh vỹ ã kósin jyvẽn tí, ký tóg kejẽn ti jyvẽn tar han tí gé. Ký tóg kejẽn ví há han tí gé, ti fỹn ký. Ti ri ke han ja sóg mỹr, ãjag mỹ.

¹² Hã ký sóg ãjag fe tar han. ãjag jyvẽn ja sóg nĩgtĩ, ký sóg ãjag jyvẽn tar han ja nĩgtĩ gé kejẽn, ký sóg ãjag fe tý há' he ja nĩgtĩ gé, sỹ ãjag jyvẽn tar han kar ký. ãjag tý Topẽ jykre ki króm jé, hã jé sóg ãjag mỹ ke ja nĩgtĩ. Ti hã ne ãjag kuprẽg', ãjag tý ti tý tỹ ẽg pã'i nĩ ve jé, ãjag tý ti jykre mág ve jé, ti jykre tý ẽg kãfór nĩ ẽn tí.

¹³ ãjag tý Topẽ ví mẽ ký ãjag tóg to: “hej,” he ja nĩgtĩ. ãjag mỹ sóg tó, ti ví ti, ký tóg ãjag mỹ há ja nĩgtĩ. Tag to sóg Topẽ mỹ: “ã hã ne tóg ag krĩn', ký tóg inh mỹ sér tí,” he tí. Kurã kar ki sóg ti mỹ tó tí. Isỹ ãjag mỹ Topẽ ví tó ký ãjag tóg to: “Topẽ ví vẽ,” he ja nĩgtĩ. Hã ra tóg ge nĩ. Hã ký tóg ãjag jykre kugrynh mũ sir, Topẽ ví ti, ãjag tý ti ví kri fin ký.

¹⁴ Inh kanhkã', ga tý Judéia tá ke ag kóm ãjag tóg vėsỹrénh mũ. Tá ù ag tóg vẽnh mãn tí, Topẽ ví mẽ jé, ag tý Jesus Cristo ki ge ký nỹtĩn ký. Ký ag mré ke ag tóg ag vóg kónãn tí, Israel ag. Ge ti nĩ gé, ãjag mré ke ag tý ãjag vóg kónãn tí. Hã ký ãjag tóg ag kóm vėsỹrénh mũ gé.

¹⁵ Israel pã'i ag vỹ Jesus tén, ẽg Senhor ti. Topẽ ví tó tí ag kãgtén ag tóg tí gé. Ký ag tóg ẽg vóg kónãn tí gé sir. Hã ki ag tóg Topẽ jũ han tí. Êprã ke kar ag kato vãsãnsãn ag tóg tí.

¹⁶ Hã kŷ ag tóg inh mŷ: “ker fóg ag mŷ vŷ hē’,” he tŷ. “Ker kanhgág ag mŷ Topē vŷ tó hē’, ag krenkren tũ nŷ jé,” he ag tóg tŷ inh mŷ. Hã ki ag tóg Topē vŷ mrynhranh kãn tŷ. Kŷ ag tóg ti vŷ mranh kãn kŷ nŷtŷ ha. Hã kŷ Topē tóg ag to jũ mũ sir. Kŷ tóg ag vóg kónãn kãn ke mũ gé sir, vènh kaja jé.

Paulo krŷ kufy

¹⁷ Inh kanhkã’, isŷ ãjag vég tũ nŷn kŷ tóg inh mŷ e tŷ. Hã kŷ sóg fe kaj nŷ. Tãg ti tŷ ver, sŷ ãjag ve ja ti. Hã ra inh pi(jé) ãjag kã jatu’ he mũ’. ãjag ve sór tãvŷ inh nŷ, kŷ sóg ãjag to kãtŷg kren.

¹⁸ Isŷ ãjag to kãtŷg ke vè vè, hã ra Satanás vŷ inh kato tē. Kar kŷ sóg to jykrén mãn, hã ra Satanás vŷ inh kato tē mãn. Hã kŷ sóg ãjag to jun ja tũ nŷ, inh, hã vŷ: Paulo, he mũ’.

¹⁹ ãjag hã to sóg jykrén mũ, Jesus tŷ ãjag hã ki inh jykre ve jé, ti kãtŷg mãn kŷ, ěg Senhor ti. ãjag tŷ ti vŷ ki króm kŷ tóg vég mũ, inh rãnhřaj ti, Jesus ti. ãjag hã to inh fe tóg mrin ke mũ, ãjag hã ki sóg tŷ ũn mág nŷnh mũ, Jesus mŷ. Hã kŷ sóg ãjag to jykrén tŷ.

²⁰ ãjag hã tugrŷn sóg tŷ ũn mág nŷ, ãjag hã tugrŷn tóg inh mŷ sér tŷ.

3

¹ ãjag to jykrén mág sóg tŷ, hã kŷ sóg Timóteo jēnē ja nŷ, ti tŷ ãjag ve jé, ěg tŷ cidade tŷ Atenas tá nŷtŷn kŷ. Ti mŷ sóg: “ha inh ré kŷ tŷg,” he ja nŷ, “sŷ inh pir mŷ tag kã nŷ jé,” he ja sóg nŷ. “Ag hŷn ne han mũ’? he sóg mũ, kŷ ag venh tŷg, inh mŷ,” he ja sóg nŷ ti mŷ, isŷ ãjag to krŷ kufy ja nŷn kŷ.

² Timóteo vŷ tŷ Jesus mré ke nŷ. Topē camarada ri ke tóg nŷ. Cristo kãmén ti tŷgtŷ, inh ri ke. Kŷ tóg ãjag tá jun kŷ ãjag jyvèn ja nŷ, ãjag fe tŷ há’ he ja tóg nŷ, ãjag tŷ Jesus ki rã tovãnh tŷg jé. Hã jé sóg ti jēnē ja nŷ.

³ “Hēn ri ke mũn ag hŷn krŷ kufy nŷtŷ, ag jagãgtar mũn kŷ,” he ja sóg nŷgtŷ ãjag to. “Ag mré ke ag ne tóg ag vóg kónãn mũ’, Topē jykre to’,” he ja sóg nŷgtŷ. Hã ra sóg ãjag mŷ tó ja nŷ, ěg jagãgtar ke ti, Topē jykre to.

⁴ Isŷ ãjag mré nŷ mũ ěn kã sóg ãjag mŷ tó, ěg jagãgtar ke ti, ti tugrŷn. Hã ra tóg ge nŷ. Hã to ãjag tóg jagãgtar tŷ, vēsŷrénh tŷ sir.

⁵ Hã kŷ sóg Timóteo jēnē, isŷ ãjag to krŷ kufy ja nŷn kŷ. “Ag mŷ Topē tovãnh tũ nŷ vŷ?” he ja sóg nŷ. “Ěg krŷn kónãn tŷ ěn mŷ ag krŷn tũ nŷ vŷ, Japo ti?” he ja sóg nŷ mŷ. “Ti tŷ ag krŷn kónãn kŷ sóg tagrŷnh mŷ ag mŷ tó ja nŷ mŷr’,” he ja sóg nŷ ãjag to. Hã kŷ sóg Timóteo jēnē ja nŷ.

Timóteo tŷ Paulo krŷ kuprãg

⁶ Hã ra tóg sir inh ki jun mãn mũ, Timóteo ti, ãjag ve kar kŷ. Ūri tóg jun. ãjag kãmén tóg mũ, tó há han tóg mũ, kŷ inh fe tóg mrin ke mũ sir. “Jesus ki ge to tar ag nŷtŷ,” he tóg mũ. “Jagnē to há ag nŷtŷ, ã mŷ ěkrég ag tóg tŷ. Ā ve sór ag tóg tŷ. Ā tŷ ag ve sór ri ke han ag tóg tŷ,” he tóg mũ inh mŷ, Timóteo ti.

⁷ Kŷ inh krŷ tóg kãnhvy’ he mũ sir ãjag to. Inh jagtar mũ ra inh fe tóg há’ he mũ sir, ãjag tŷ Jesus ki ge kŷ nŷtŷn kŷ.

⁸ ãjag tŷ ti to tar nŷtŷn kŷ tóg inh mŷ inh rŷr mãn ri ke nŷ, kŷ sóg mrin ke ri ke han mũ sir.

⁹ Topē mŷ sóg vŷ há han mũ sir ãjag to. Inh fe vŷ mrin ke mũ, sŷ ãjag tŷ nén han mũ ěn mē kŷ. Hã kŷ sóg Topē mŷ vŷ há han mũ sir, ãjag tŷ inh fe tŷ mrin ken kŷ.

¹⁰ Kuty kar ki sóg ti mré vémén tĩ, kurā kar ki ke gé. Sý ājag ve sór nĩn kŷ sóg Topē mŷ isĩg ke to vĩ tĩ, sŷ ājag tar han sór kŷ, ājag tŷ ti ki rā to tar nŷtĩ jé.

¹¹ Topē tŷ kejēn inh mŷ: “ha ag venh tŷg,” hen kŷ tóg inh mŷ sér tĩnh mŷ, ěg jóg mág tŷ inh mŷ tag tó kŷ, Jesus ti ke gé, ěg Senhor ti.

¹² ěg Senhor mŷ sóg to vĩ tĩ, ti tŷ ājag tŷ jagnē to há tāvĩ han jé. Jagnē to há ājag nŷtĩ, kŷ sóg ti mŷ to vĩ tĩ, ti tŷ tag to ājag tar tāvĩ han jé, ājag tŷ vėnh kar to há nŷtĩ to tar nŷtĩ jé gé, isŷ ājag to há nĩ ri ke.

¹³ Kŷ sóg ti mŷ to vĩ tĩ gé, ti tŷ vėnh jykre há to ājag tar han jé. Kejēn ěg Senhor tŷ Jesus vŷ kātĩg mǎn ke mŷ, ā tũ kar ag mré. ěg jóg tŷ Topē tŷ ŷri ājag tar han kŷ ājag tóg kurā ěn kǎ ti rĩnja tá jānhkri nŷtĩnh mŷ, ājag tŷ kygnē ja tũ nĩn kŷ.

4

Jesus jykre mĩ ěg mũnh ke mŷ

¹ Inh kanhkā', vāhā sóg ājag mŷ nén ũ to sór mŷ gé. ěg Senhor tŷ Jesus rĩnve sóg ājag jyvėn sór mŷ. Ājag mŷ sóg ti jykre tó huri, ājag tŷ ti japry jagma, ti jamĩn jagma mŷ há han jé, ājag tŷ Topē mŷ há nŷtĩ jé. Tag han ājag tóg mŷgtĩ. Gemnĩ. To tar nŷtĩmnĩ.

² Tag kǎmėn sór isóg mŷ ājag mŷ, ěg Senhor tŷ Jesus tŷ inh mŷ: “tag tómnĩ,” he ja nĩn kŷ.

³ Topē vŷ ājag to jykrėn, ājag tŷ ti jykre hǎ han jé. Kŷ ājag prũ tũ fag mré nŷ tũg nĩ, ājag mėn tũ ag mré nŷ tũg nĩ gé.

⁴ Ājag tŷ ājag prũ fi mré nŷ kŷ fi mré nŷ há han nĩ, Topē jykre han jé. Kŷ ěprǎ ke ag vŷ ājag to jykrėn kónǎn ke tũ nĩ gé. Fi tŷ prũg kónǎn tũg nĩ.

⁵ Fi to én kónǎn tũg nĩ gé, ājag prũ fi to. Ũ tŷ Jesus ki rǎ tũ ag jykre han tũg nĩ. Ũ tŷ Topē jykre ki kagtĩg nŷtĩ ag jykre há tũg nĩ, ājag prũ fi to. Fi tŷ prũg há han nĩ.

⁶ Ājag rėgre tŷ nén ũ to én tũg nĩ. Ti tũ vė mŷr, kŷ ti tũ ki Topē vĩ mranh tũg nĩ. Topē hǎ ne tag to jũ tĩ'. Kŷ ājag rėgre tŷ nén ũ vóg tũg nĩ. Ājag tŷ ti tũ vóg kŷ Topē vŷ ājag vóg ke mŷ gé, ti kajǎm jé. Tag tó sóg huri ājag mŷ, tag to sóg ājag mŷ vĩ tar han huri, hǎ ra sóg ājag mŷ tó mǎn mŷ gé.

⁷ ěg tŷ vėnh kavėnh kŷ ěg tóg Topē jykre han tũ nĩgtĩ mŷr. Ti jykre vŷ kuryj nŷ. ěg tŷ tŷ ti tũ nŷtĩ hǎ jé tóg ěg kuprėg.

⁸ ěprǎ ke vĩ pijé', sŷ ājag mŷ nén tó mŷ tag ti'. Topē vĩ vė mŷr. Ājag tŷ inh vĩ tag han tũ nĩn kŷ ājag tóg Topē vĩ mranh mŷ. Ti hǎ ne tóg ā kuprĩg tŷ inh jagrė han ja nĩ', kŷ tóg tŷ ājag jagrė han ja nĩ gé.

⁹ Nén ũ to ājag tar nŷtĩ, hǎ vŷ: jagnē to há, he mŷ. Hǎ kŷ sóg tag to ājag mŷ rǎn mág han ke tũ nĩ. Topē vŷ ājag kanhrǎn, ājag tŷ jagnē jagǎgtǎn ken ki. Kĩ hǎ han ājag tóg tũ.

¹⁰ Ga tŷ Macedônia tá ke kar ag to ājag há nŷtĩ, Jesus mré ke kar ag to ke gé. To tar nŷtĩmnĩ, to krónh ke tũg nĩ, ājag tŷ tŷ Jesus mré ke nŷtĩn kŷ. Hǎ jé sóg ājag jyvėn mŷ.

¹¹ Vǎsǎn nĩ, ājag tŷ jatun mŷ nŷtĩ jé, jatun mŷ ājag rǎnhrǎj hyn han jé. Ājag rǎnhrǎj pė ěn to tar nŷtĩmnĩ, hǎ jé sóg ājag jyvėn ja nĩ. Kŷ sóg to ājag jyvėn mǎn mŷ, ājag rǎnhrǎj to.

¹² Kŷ nén ũ vŷ ājag mŷ tũ' henh ke tũ pė nĩ. Hǎ ki vėnh kar tóg ěg jykre há ki kanhró nŷtĩnh mŷ. Ājag tŷ ājag rǎnhrǎj to nén ũ kar ve kŷ tóg há tĩ, ũ tŷ ājag mŷ nén ũ nĩm tũ nĩ jé, fagrĩnh mŷ.

Jesus mré ke ter kÿ fÿ mág tũg nĩ

¹³ Inh kanhkã', sÿ nén ù ki ãjag kanhrãn há tóg tĩ gé, ha mẽ. Ëg mré ke ù ag tóg kãgter kÿ nÿtĩ. Kÿ fÿ mág tũg nĩ ag jé. Jesus ki ge tũ ag ri ke han tũg nĩ. Ag ter kÿ ag tóg nén ù há venh ke tũ nĩ. Hã kÿ ag tóg fÿ mág tĩ, Jesus ki ge tũ ag. Hã ra tóg ãg mÿ ge tũ nĩ.

¹⁴ Jesus vÿ ter ja nĩ, kar kÿ tóg rĩr mãn ja nĩ. Tag ki kanhró ãg tóg nÿtĩ. Hã ri ke ti nĩ, Jesus ki ge mũ ag kãgter ti. Topê vÿ ãg han mãn ke mũ, Jesus tugrĩn, ãg tÿ ti mré nÿtĩ jé sir.

¹⁵ Ëg Senhor vÿ inh kanhrãn, hã kÿ sóg tó mũ. Ti jẽnky ki tóg kutê, sÿ tónh ke tag ti, ha mẽ. Ver ãg rĩnrĩr nÿtĩ. Hẽn ri ke mũn ãg kãgter kãn ke tũ nĩ, ti kãtĩg ken jo. Kÿ ãg tóg ti kãtĩg venh mũ sir. Hã ra ãg tóg ùn kãgter mũ ag jo mũnh ke tũ nĩ. Ag hã mré ãg tóg mũnh ke mũ.

¹⁶ Ti kãtĩg vÿ ge nĩnh mũ, ha mẽ. Tére jé tóg ke mũ, ãg Senhor ti, kanhkã tá. Kÿ venh vĩ tóg mẽ há tĩnh mũ. Topê tÿ jẽnê jafã ag pã'i mág vÿ prêr ke mũ sir. Topê tÿ vãykn jafã vÿ mẽ há tĩnh mũ, trombeta ên ti. Kÿ ùn kãgter mũ ag vÿ rĩnrĩr mãn mũ sir, Jesus mré ke ag.

¹⁷ Kar kÿ ãg tóg ag mré jãprynũ mũ gé, ãg tÿ ti kãtĩg ke jo ter tũ hã ra. Ag mré ãg tóg jãprynũ mũ, ùn rĩnrĩr mãn mũ ag mré. Kanhkã góg kãmĩ ãg tóg jãprynũ mũ, kÿ ãg tóg ãg Senhor kato tãgtẽnh mũ sir, kanhkã krẽm. Hã kÿ ãg tóg ti mré nÿtĩnh mũ sir, ãg Senhor mré, ãg tÿ kanhkã ra mũn kÿ. Ti ré kÿ ãg mũ mãn ke tũ nĩ sir.

¹⁸ Tag tómnĩ jagnê mÿ, ãjag krĩ tÿ kãnhvy' he jé, ùn kãgter mũ ag to.

5*Jesus tÿ kãnhmar kãtĩg mãn ke*

¹ Inh kanhkã', ti kãtĩg ke ki kanhró ãg tóg nÿtĩ, hã ra ãg tóg ti kurã hã ki kãtĩg nÿtĩ, ti prÿg ke gé. Tag mẽ ãjag tóg huri, hã kÿ sóg ãjag mÿ tó mág ke tũ nĩ ha.

² Vãhãn kãtĩg, ãg Senhor ti, hã ra tóg tÿ nén ù pēju mé kãtĩg ri ke nĩnh mũ, ti kãtĩg ti. Ëg vatãnh tá tóg ãg tũ mág tĩ, nén ù pēju mé ti. Kÿ tóg ge nĩnh mũ, ãg Senhor kãtĩg ti.

³ Ti to há tũ ag vÿ: "jatun mÿ ãg nÿtĩ," henh ke mũ. "Û vÿ ãg vóg ke tũ nĩ," he jé ag tóg ke mũ. Ag tÿ tag tó mũ ra tóg vãhã kãtĩ mũ, ãg Senhor ti. Kÿ ag tóg nũgme ki vár mũ sir. Ag tÿ to jykrén tũ hã ra ti kãtĩg kÿ ag tóg krenkren ke tũ pẽ nĩ, ha vemnĩ.

⁴ Inh kanhkã', ãjag hã ne tóg tÿ Jesus mré ke nÿtĩ'. Hã kÿ tóg ãjag ki kuty tũ nĩ. Kÿ ãjag tóg ki kanhró nÿtĩ, kÿ ti kãtĩg vÿ ãjag mÿ nén ù pēju mé kãtĩg ri ke tũ nĩ, ãjag tÿ ti ki kanhró nÿtĩn kÿ.

⁵ Ti krê vÿ tÿ ãjag nÿtĩ, hã kÿ tóg ãjag ki kurã nĩ, ãjag tÿ ki kanhró nÿtĩn kÿ. Kuty tũ ti nĩ, ãg ki. Ti kãtĩg ke ki kanhró ãg tóg nÿtĩ, hã kÿ tóg ãg ki kurã nĩ sir.

⁶ Kÿ ti kãtĩg ke kã jatũ ke tũg nĩ. Vẽso jykrén nĩ, ãjag tÿ ti kãtĩg ke to venh preparar ken jé, ãjag tÿ kã jatũ ke tũ nĩ jé.

⁷ Ûn nũgnũr mũ ag vÿ kuty kÿ nũgnũr tĩ, kÿ ag tóg ti kãtĩg ke kã jatũ nÿtĩ. Kÿ ùn kronkron mũ ag vÿ kuty kÿ pẽnmev nÿtĩ, kãgter ag nÿtĩ gé. Kÿ ag tóg vẽso jykrén tũ nÿtĩ. Kuty tá venh jykrén hã vẽ.

⁸ Ëg jé kurã tá venh jykre há ên ti han jãvo. Ëg jé vẽso jykrén kÿ ti ki rã to krónh ke tũg. Ëg jé jagnê to há to krónh ke tũg gé.

Kỹ ẽg tóg vẽn h gẻn h jafã ag tar ri ke nýtĩ. Kỹ tóg ẽg mỹ soldado kur ri ke nĩ sir, ti ki rã ti, jagnẽ to há ti ke gé. Soldado tỹ camisa tỹ ferro ri ke ti nĩ, ẽg tỹ ti ki rã kỹ jagnẽ to há to tar nýtĩn kỹ. To tar nýtĩn kỹ ẽg krenkren ke mũ, nũgme ki vár ke tũ ẽg nĩ. Tag mĩ ẽkrẻn nĩ. Kỹ tóg ẽg mỹ soldado tỹ sãpe tỹ ferro ri ke nĩ sir, ẽg tỹ ti ve sỏr mũ to tar nĩ ti. To tar nýtĩn kỹ ẽg tóg vẽn h preparar ke kỹ nýtĩ, vẽn h kãn kỹ ẽg nýtĩ, ti kãtĩg ke to.

⁹ Topẽ vỹ ẽg kuprẻg, ẽg tỹ ti jũ vẻg tũ nĩ jẻ, ẽg krenkren jẻ, ẽg tỹ nũgme ki vár tũ nĩ jẻ, Jesus Cristo tugnĩn, ẽg Senhor ti.

¹⁰ Ti hã ne ẽg jagfy ter ja nĩ, ẽg tỹ ti tugrĩn rĩnrĩn nýtĩ jẻ, ti mrẻ nýtĩ jẻ sir. Ẽg tỹ ti kãtĩg ke jo kãgter mũ ra ẽg tóg ti mrẻ nýtĩn h mũ, ti kãtĩg kỹ. Ẽg kãgter tũ ra ẽg tóg ti mrẻ tá nýtĩn h ke mũ gé, ti kãtĩg kỹ. Jagnẻ ri ke ẽg nýtĩn h mũ.

¹¹ Tag tỏm nĩ jagnẻ mỹ. Tỹ jagnẻ krĩ tỹ kãn hvy' hem nĩ gé, ừn ter mũ to. Kỹ tỹ jagnẻ jyvẻn nĩ gé, ảjag tar nýtĩ jẻ. Tỏ ảjag tóg mũgtĩ, kỹ tỏ há han nĩ.

Vẽn h jykre há ti

¹² Inh kanhkã', nẻn ừ tỏ jẻ sỏg ke mũ gé. ảjag kãmĩ ừ ag tóg tỹ ảjag pã'i nýtĩ, igreja to, Jesus mrẻ ke ừ ag. ảjag jyvẻn ag tóg tĩ, ảjag to ag tóg vãsãn tĩ.

¹³ Ẽn ag kamẻg nĩ. Ag mỹ vĩ há han nĩ, ag to há tãvĩ nýtĩm nĩ, ag tỹ ảjag ki rĩr kỹ. Jagnẻ krĩ rỹg tũg nĩ.

¹⁴ Inh kanhkã', tag ti tỏ jẻ sỏg ke mũ gé, ha mẽ. Ừ tỹ vẽn h mỹ mẽ ag jyvẻn tar han nĩ. Ừ tỹ kãn h mar krỏn h ke tĩ ag mrẻ komẻr vĩm nĩ. Ừn fe krỏn h krỏj ag fe tỹ tar' hem nĩ. Vẽn h kar mỹ komẻr hã vĩm nĩ.

¹⁵ Ừ tỹ ảjag mỹ nẻn ừ kỏrẻg han mũ ra ti mỹ nẻn ừ kỏrẻg han tũg nĩ jãvo, vẽn h kajãm tũg nĩ. Nẻn ừ há tãvĩ han nĩ jagnẻ mỹ, vẽn h kar mỹ ke gé.

¹⁶ Kurã kar ki ảjag fe tỹ mrin kem nĩ.

¹⁷ Kurã kar ki ẽg jỏg mág mrẻ vĩm nĩ, ảjag tỹ ti to krỏn h ke tũ nĩn jẻ.

¹⁸ Nẻn ừ kar to ti mỹ: “inh mỹ tóg há tĩ,” hem nĩ gé. Topẽ jykren hã vẻ. Jesus Cristo nỏn ẽg tóg ti jykre han ke mũ. Ẽg tỹ nẻn ừ vẻg mũ kar to ẽg tóg: “inh mỹ tóg há nĩ,” hẻnh ke mũ, Topẽ mỹ.

¹⁹ Topẽ kuprẻg tỹ ảjag krĩn sỏr kỹ ti mỹ: “vỏ,” he tũg nĩ.

²⁰ Kejẻn Topẽ kuprẻg tóg ừ krĩn tĩ, kỹ tóg Topẽ vĩ tỏ mũ sir. Ẽn to ẻ he tũg nĩ.

²¹ Ừ tỹ ảjag mỹ vĩn kỹ to: “vẽn h vĩ há mỹ'?” hem nĩ. Ti tỹ tỹ ảjag mỹ vẽn h vĩ há nĩn kỹ jẻmẻm nĩ.

²² Ti há tũ nĩn kỹ jẻmẻ tũg nĩ, ảjag tỹ nẻn ừ kỏrẻg han tũg jẻ. Nẻn ừ kỏrẻg han sỏr tũg nĩ.

²³ Topẽ vỹ ảjag krĩ kuprẻg tĩ. Ti mỹ sỏg to vĩ tĩ, ti tỹ ảjag tar han jẻ, ảjag tỹ tỹ ti tũ nýtĩ to tar nýtĩ jẻ. Ti mỹ sỏg to vĩ tĩ gé, ti tỹ ảjag tỹ kygnẻ kamẻg jẻ, ti tỹ ảjag jykre há han jẻ, ảjag fe ti ke gé, ảjag krĩ ti ke gé. Ẽg Senhor tỹ Jesus Cristo kãtĩg mãn kỹ tóg ẽg jykre tugnỹm ke mũ sir, hã jẻ tóg ẽg jykre há han sỏr mũ.

²⁴ Ừ tỹ ẽg kuprẻg mũ vỹ ẽg jykre há han sỏr mũ, hã vỹ: Topẽ, he mũ. Fagrĩn h mỹ vĩ vãn h ti nĩgtĩ.

²⁵ Inh kanhkã', iso Topẽ mrẻ vĩm nĩ gé.

²⁶ Jagnẻ ki nhun ke ri ke han nĩ, Jesus mrẻ ke kar ki, jagnẻ nĩgẻ kãgmĩ kỹ.

²⁷ Ẽg Senhor rĩn ve sỏg ảjag mỹ tag tỏ mũ, ha mẽ. “Jesus ki ge kỹ nýtĩ kar ag tỹ isỹ nẻn rãn mũ tag mẽ kãn ke vẻ,” he sỏg mũ mỹr. Hã kỹ sỏg: “ag kar mỹ to kem nĩ,” he mũ.

²⁸ Ẽg Senhor tỹ Jesus Cristo mỹ sỏg to vĩ tĩ, ti tỹ ảjag tar han jẻ.

Hã vẻ.

PAULO TÏY CARTA HAN: TESSALÔNICA TÁ KE AG MÏY CARTA Û

1 Paulo tÏy rá vë. IsÏy cidade tÏy Tessalônica t'a ke ag mÏy rán hã vë. Tessalônica tá ájag tóg Topë ví mè jé vënhmãn tí. Topë tú vÏy tÏy ájag nÏyí, ãg jóg mág tí. Jesus Cristo tú vÏy tÏy ájag nÏyí gé, ãg Senhor tí. SÏy ájag mÏy vënh rá jënê vë. KÏy Silas vÏy jënêg mÏy gé inh mré, Timóteo ke gé.

2 Ëg jóg tÏy Topë mÏy sóg to ví tí, ti tÏy ájag tar han jé, ti tÏy ájag krí kuprãg jé gé. Ëg Senhor tÏy Jesus Cristo mÏy sóg tag to ví tí gé.

Cristo tÏy ù tÏy ãg vóg kónãn mÏy ag vóg kónãn ke

3 Inh kanhkã', isÏy kurã kar ki ájag to Topë mré ví vë, ájag to sóg ti mÏy ví há han tí. Ájag jÏkre tóg inh mÏy sér tí. Ájag hã ne tóg ti ví to tar távĩ nÏyí', kri fi kÏy. Jagñë mré ájag tóg há távĩ nÏyí gé, ájag kar tí. Hã kÏy sóg Topë mÏy ví há han tí, ájag to.

4 Hã kÏy sóg Topë tú kar ag mÏy ájag tó tí, ãg vënhmãn kÏy. "Ti ví kri fi to ag tar nÏyí, ag tÏy ag vóg kónãn mÏy ra," he sóg tí ájag to. "Ag jagãgtar mÏy ra ag tóg ti to tar nÏyí," he sóg tí. IsÏy tag tó tóg inh mÏy sér távĩ tí.

5 Hã tigrĩn ãg tóg Topë jÏkre kuryj ki kanhró nÏyí, ájag tÏy ti tovãnh tú nĩn kÏy. KÏy ti tÏy nèn han mÏy vÏy kugryj kar nÏyí, ti tÏy nèn tó mÏy kar ke gé. Jagtar ájag tóg mÏy, hã ra ájag tóg ti tovãnh tú nĩgtí. Ti tÏy tÏy ãg pã'i nĩ ve jé ájag tóg ke mÏy, kanhkã tá krÏg he jé ájag tóg ke mÏy, ti tuginĩn, ha vemnĩ. Hã kÏy ájag tóg sir ti tigrĩn jagtar mÏy sir.

6 Ha vé, ù tÏy ájag jagãgtar han mÏy ãn jagãgtar han jé tóg ke mÏy gé, vënh kaja jé, Topë tí. Hã ki ãg tóg ti jÏkre kuryj ki kanhrãn mÏy sir. Tag to jÏkrén.

7 Ag jávo tóg ájag tar han mÏy sir, ájag jagtar mÏy hã ra, kÏy tóg sir ájag jagãgtar tÏy tÏg' he mÏy gé sir, ãg kar mÏy, ãg Senhor tÏy Jesus Cristo tÏy kanhkã tá kãtig kÏy. Kanhkã tân ag mré tóg kãtig ke mÏy, kÏy ãg tóg ti venh mÏy sir.

8 TÏy tóg pi gru ve kãtig ke mÏy. KÏy tóg ù tÏy Topë ki kanhrãn jávãnh ag vóg kónãn ke mÏy sir, vënh kaja jé, ù tÏy ãg Senhor tÏy Jesus ví sér mranh mÏy ãn ag.

9 Ag vóg kónãn jé tóg ke mÏy, kÏy ag vësÏrénh vÏy tú' henh ke tú nĩ. Ëg Senhor mré ag nÏyĩnh ke tú nĩ sir. Ti jÏkre há ãn venh ke tú ag nĩ, ti tÏy tÏy pã'i mág pë nĩ ãn tí, ùn mág távĩ ãn.

10 Æ kãtig kÏy tóg ag vóg ag vóg kónãn ke mÏy. KÏy tóg vãhã ã tú ag tÏy ùn mág han ke mÏy sir. KÏy vënh kar tóg ãg tigrĩn ti jÏkre ve kãn ke mÏy, ãg tÏy ti ki ge kÏy nÏyĩn kÏy. Ájag hã tóg inh ví kri fi, sÏy ájag mÏy ti ví tón kÏy. Hã kÏy ájag tóg kurã ãn venh ke mÏy.

11 Hã jé sóg ájag to Topë mré ví tí, kurã kar ki. Ti mÏy sóg: "ag tar han nĩ," he tí. "Nén ù há han sór ag tóg mÏy, ã ki ge kÏy nÏyí ag, ã jÏkre han sór ag tóg mÏy, kÏy ag tar han nĩ, ag tÏy kygnëg tú nĩ jé. Ag kuprëg á tóg, ag tÏy kurã ãn ve jé, kÏy ag tar han nĩ, ag tÏy kurã ãn tá krÏg jé," he sóg tí (mÏy), Topë mÏy.

12 Ti tÏy ájag krí tÏy ùn mág nĩ jé, há jé sóg ti mÏy tó mÏy. Ti tÏy ãg krí tÏy ùn mág nĩn kÏy tóg ãg tÏy ùn mág han mÏy gé. Topë tÏy ãg mÏy ã tÏy nèn ù há nĩn ãn hã vë, ãg Senhor tÏy Jesus Cristo tÏy ke gé.

2

Jesus kato tẽ mág mũ ên tỹ vãnh ke

¹ Inh kanhkã', sỹ ãjag jyvẽn há tóg tí sir. Kãnhmar ti kãtĩg mũ, ãg Senhor tỹ Jesus Cristo ti, kỹ ãg tóg vãnh mãn mũ, ti tỹ ãg gé(g) tĩg jé sir. Kỹ ãg tóg ti mré nỹtĩ.

² Ha ra tóg ver kór gy sĩ tí, kuvar gy sĩ ti nĩ ver. Kỹ ù tỹ ãjag mũ: “Topẽ kuprĩg tóg inh mũ: ùri ke vê, hé,” he mũ ra kri fi tũg nĩ, ãjag fe tỹ jũrũn ke tũg nĩ. Û tỹ ãjag mũ: “Paulo vỹ inh mũ tó, kỹ tóg: ùri ke vê, hé,” he mũ ra kri nĩm tũg nĩ gé. Û tỹ ãjag mũ vãnh rá ven mũ ra, to: “Paulo tỹ rá vê mỹr,” he mũ ra kri fi tũg nĩ gé.

³ Ag jykre tugnỹm ra, ù tỹ ãjag krĩn kónãn sór mũ ag. Ûri ke tũ vê ver, ti kãtĩg ke ti. Û tỹ hẽn ri ke ag vỹ ti tovãnh ke mũ ver, ti kãtĩg ke to hã. Ti kato tẽgtẽ jé ag tóg ke mũ ver. Kỹ ù tóg ver vãnh ven ke mũ gé, hã vỹ: ù tỹ Topẽ vĩ mranh tí ên, he mũ, ù tỹ nũgme ki kutẽn ke mũ ên ti, he mũ.

⁴ Ti ve pẽ vê, Topẽ vĩ mranh mũ ti, hã kỹ Topẽ vỹ nũgme ki ti fón ke mũ. Ên vỹ tóg Topẽ kato tẽn ke mũ ver, vãnh kãggrá tỹ topẽ kato ke gé. Nén kar to: topẽ, he mũ kar kato tóg tẽn ke mũ ver. “Topẽ kar kãfór vỹ tỹ inh nĩ,” he jé tóg ke mũ. Kỹ tóg vãhã sir Jerusalem tá Topẽ ãn krẽm rãnh mũ, Topẽ nĩg ja ên tá tóg nĩnh mũ, kỹ tóg vẽso: “tỹ sóg Topẽ nĩ,” henh ke mũ, ón kỹ.

⁵ Isỹ ãjag mré nĩn kỹ sóg ãjag mũ tag tó ja nĩ. Mĩ êkrén nĩ, sỹ ãjag mũ tó ja ên ti.

⁶ Mĩ êkrén kỹ ãjag tóg ki kanhró nỹtĩ sir, ù tỹ ver ti ki rĩr mũ ên ki. Ti kỹ ti ki rĩr nĩn kỹ tóg ver vãnh ven tũ nĩ, ù tỹ ón kỹ: “tỹ sóg Topẽ nĩ,” he mũ ên ti. Ti kurã ki tóg vãnh ven ke mũ sir vãhã.

⁷ Ûri ù tỹ hẽn ri ke ag tóg vãnh jykre pãno han mũgtĩ, Topẽ vĩ mranh kỹ. Hã ra ag tóg ver vãnh pigju kỹ han tí, kỹ ãg tóg ve hã han tũ nĩ, ag jykre pãno ti. Kỹ Û tỹ ón kỹ: “tỹ sóg Topẽ nĩ,” he mũ ên tóg vãnh ven tũ nĩ gé ver. Û tỹ ti ki rĩr nĩ ên tóg ver ti ki rĩr mũ, ti vãnh ven tũ nĩ jé ver.

⁸ Ti tỹ ti ki rĩr tovãnh kỹ tóg vãnh ven ke mũ sir vãhã, ùn jykre pãno ên ti. Hã ra ãg Senhor tỹ Jesus vỹ ti tén ke mũ, ã jẽnger tỹ. Kỹ tóg tí tỹ tũ' he mũ sir, ã vãnh ven ti kỹ, Jesus ti. ã jun kỹ tóg ti tỹ tũ' he mũ.

⁹ Hã ra ùn jykre pãno ên vỹ tóg Satanás jykre han mũ, Nén-Kórég tỹ ti krĩn kỹ. Kỹ tóg ón kỹ vãnh jykre tar hyn han mũ, ãg tỹ nén han vãnh ên (mỹr). Kujá ag jykre ri ke han jé tóg ke mũ.

¹⁰ Vãnh kar lograr he jé tóg ke mũ gé. Jykre kuryj nĩ ve tóg nĩnh mũ, hã ra tóg pãno nỹ. Kỹ ù tỹ nũgme ki vár ke mũ ag vỹ ti vỹ kri fi kãn ke mũ, ag tỹ Topẽ vĩ kri fig tũ nỹtĩn kỹ. Vãnh vĩ há to ag tóg há tũ nỹtĩ, hã kỹ ag tóg krenkren ke tũ nĩ. Hã kỹ ag tóg ki rom ke mũ sir, nũgmen ki, infernon ki.

¹¹ Hã jé Topẽ tóg ag mũ vãnh ó jẽnẽn ke mũ, ón kỹ vãnh jykre ên ti, ag tỹ vãnh ó ên kri fi jé, ag tỹ kri nĩm sór nỹtĩn kỹ.

¹² Topẽ tỹ ag jykre tugnỹm kỹ tóg nũgme ki ag vãm ke mũ. Vãnh vĩ há kri fi jãvãnh ag tóg nỹtĩ (mỹr). Vãnh jykre pãno há to ag tóg hã tãvĩ nỹtĩ (mỹr), hã kỹ tóg ag vãm ke mũ, nũgme ki, Topẽ ti.

Topẽ tỹ ãg kuprẽg, ãg krenkren jé

¹³ Jãvo sóg ãjag to Topẽ mré vĩ há han tí, kurã kar ki (mỹr). Tỹ ãjag tóg Jesus mré ke nỹtĩ, ãg Senhor mré ke ag. Kỹ tóg ãjag to há tãvĩ nĩ. Topẽ vỹ ãjag kuprẽg,

nén kar há(r) ven ki, ājag krenkren jé, nūgme to, inferno to. Ā kuprīg tỹ tóg ājag tỹ ā tũ han ja nĩ. Ājag tỹ tag ve jé ājag tóg ti vĩ kri fig mũ, vènh vĩ há ěn kri.

¹⁴ Isỹ ājag mỹ Jesus vĩ tón kỹ Topẽ vỹ ājag kuprèg, ājag tỹ ěg Senhor tỹ Jesus Cristo mré tỹ ùn mág nỹtĩ jé.

¹⁵ Inh kanhkã', tar nỹtĩmnĩ, sỹ ājag kanhrãn to, ājag kỹ ti króm jé. Isỹ ājag mỹ Jesus jykre tó mũ ěn to tar nỹtĩmnĩ, sỹ ājag mỹ nén rán mũ tag to ke gé.

¹⁶ ěg Senhor tỹ Jesus Cristo há vỹ ěg to há tãvĩ nĩ, ěg jóg tỹ Topẽ ke gé. Kỹ tóg ěg kri kuprãg mũ sir, ěg tỹ to krónh ke tũ nĩn jé. Ti há ne tóg ěg mỹ ā tỹ nén ù há ěn ven ke mũ. Há ve sór ěg tóg mũ.

¹⁷ Ti mỹ sóg to vĩ tĩ, ti tỹ ājag fe tỹ há' he jé, ti tỹ ājag tỹ nén ù há han jé, ājag tỹ ki há kãmén jé ke gé.

3

Topẽ tỹ ěg jy nĩgãn

¹ Inh kanhkã', vãhã sóg ājag mỹ nén ù to vĩ mũ gé. Iso Topẽ mré vĩmnĩ, ěg Senhor vĩ tỹ vènh kar kri rũm ke jé, kãnhmar (mỹr), vènh kar tỹ ti vĩ to há nỹtĩ jé ke gé, ti mỹ vĩ há han jé (mỹr), ag tỹ ājag ri ke nỹtĩ jé.

² Ti mỹ to vĩmnĩ, ti tỹ ijj nĩgãn jé, vènh jykre pãno han mũ ag jo, ùn jykre pãno ag jo ke gé. Û ag tóg Jesus ki ge jãvãnh nỹtĩ, há kỹ ag tóg iso kórég nỹtĩ sir.

³ Há ra ěg Senhor vỹ ā tỹ nén tó ja ěn han ke mũ. Ājag tar han jé tóg ke mũ. Ājag jy nĩgãn jé tóg ke mũ gé, Japo jo, Nén-Kórég ěn jo.

⁴ Ājag hỹn inh vĩ han ke mũ, kỹ tóg inh mỹ há tí. Topẽ vỹ ājag krĩn ke mũ, ājag tỹ sỹ ājag mỹ nén tó mũ ěn ki króm jé. Ki króm ājag tóg mũ (mỹr), kỹ ājag tóg to krónh kenh ke tũ nĩ sir.

⁵ ěg Senhor je ājag krĩn, ājag tỹ ti to há nỹtĩ jé, ti tỹ ěg to há ri ke. Ti jé ājag krĩn, ājag tar nỹtĩ jé, ājag jagãgtar há ra. Cristo vỹ ge ja nĩ gé. Kỹ ti nón gemnĩ.

ěg tỹ vènh rãnrãj to tar nỹtĩnh ke

⁶ Inh kanhkã', vãhã sóg ājag jyvèn mũ gé sir, ājag jyvèn tar han sóg mũ gé. ěg Senhor tỹ Jesus Cristo jykre tỹ sóg ājag mỹ tag tó mũ, ha mẽ: Jesus mré ke ù ag tóg vènhmỹ mẽ han sór nỹtĩ. Inh vĩ mranh sór ag nỹtĩ, sỹ ājag mỹ nén tó ja ěn ti. ěn mré vĩ mãn tũg nĩ.

⁷ Sỹ ājag mré nĩn kỹ sóg vènhmỹ mẽ han ja tũ nĩ. Tag ve ājag (mỹr), kỹ ājag tóg inh kóm han ki kanhrãn ke mũ.

⁸ Fagrĩnh mỹ sóg ājag mré rãgró ko ja tũ nĩgtĩ (mỹr). Kajãm ja sóg nĩgtĩ (mỹr), sỹ ājag mré nén ko ja ti. Kutỹ kar ki sóg rãnrãj ja nĩgtĩ, kurã kar ki ke gé. Kỹ sóg inh rãnrãj to ron mág ja nĩgtĩ. Sỹ ājag tũ kagrãg tũ nĩ jé, há jé sóg rãnrãj mág ja nĩgtĩ. Há ve ājag mỹr.

⁹ Sỹ ājag tũ konh ke vè vè, há ra sóg ājag tỹ nén han ke mũ ěn han sór ja nĩgtĩ ājag mỹ, ājag tỹ to ki kanhrãn jé, ājag tỹ inh kóm han jé sir inh nón.

¹⁰ Isỹ ver ājag mré nĩn kỹ sóg ājag mỹ tag tó ja nĩ gé, ha mẽ: “ùn rãnrãj vãnh ěn vỹ ne konh ke tũ nĩ,” he ja sóg nĩgtĩ ājag mỹ.

¹¹ Ājag kãmĩ ù ag nẽji tag han vãnh nỹtĩ. Rãnrãj vãnh ag nẽji nỹtĩ, há ra ag nẽji vènh kar to vĩ vĩ he tĩ.

¹² ěn jyvèn sór sóg nĩ, ěg Senhor tỹ Jesus Cristo jykre tỹ. Ag jyvèn tar han jé sóg ke mũ, ha mẽ: “rãnrãj ra, jatun mỹ. Ājag tũ há ko ra, ājag rãgró ti. Û jèn ko tũg ra,” he sóg mũ sir ājag mỹ.

¹³ Inh kanhkã', nén ù há tävĩ han kãn sórmnĩ. To krónh ke tũg nĩ.

¹⁴ Hẽn ri ke mũn ù tóg isỹ rá tag kri finh ke tũ nĩ. Ęn jykre vég nĩmnĩ, ký ti mré vémén tũg nĩ, ti mỹ'ãg jé sir, ti tỹ to jykrén mãn jé.

¹⁵ Hã ra ti kato vãsãn tũg nĩ, ti to kry nĩ tũg nĩ. Jesus mré ke vë mỹr, ký ti jyvën nĩ, ti tỹ to jykrén mãn jé.

¹⁶ Ha mẽ, ěg Senhor mỹ sóg to vĩ tĩ, ti tỹ ãjag krĩ kuprãg jé, ãjag jagtar hã ra. Ti hã ne tóg ěg krĩ kuprãg tĩ'. Ęg Senhor jé ãjag mré nĩgtĩ.

¹⁷ Sỹ vãhã vësóg ki ãjag mỹ rán vë, ù tỹ inh vĩ rán ja pãte, inh hã vỹ Paulo nĩ. Isỹ rán mũn hã vë. Ge inh nĩgtĩ, isỹ ù mỹ vënh rá jënën ký.

¹⁸ Ęg Senhor tỹ Jesus Cristo mỹ sóg to vĩ tĩ, ti tỹ ãjag tar han jé. Hã vë.

PAULO TŶ CARTA HAN: TIMÓTEO MŶ CARTA VE

¹ Paulo tŷ rá vē. Topē ne inh kuprēg ja nī', ēg kren han tī ti. Isŷ tŷ Jesus Cristo apóstolo jē jé tóg inh fēg ja nī. Ti hā ve sór ēg tóg mŷ, Jesus Cristo ti.

² Isŷ inh kósin tŷ Timóteo mŷ rán hā vē. Tŷ ā inh kósin pē ri ke nī, ā tŷ isugrīn Topē vī kri fin kŷ.

Ēg jóg tŷ Topē mŷ sóg to vī tī, ti tŷ ā tar han jé, ti tŷ ā jagāgtān jé, ti tŷ ā krī kuprā han jé, ēg Senhor tŷ Jesus Cristo ti ke gé.

Ēg tŷ vŷrmŷ vēnh vī jēmē sór ke tŷ

³ Isŷ cidade tŷ Éfeso tá kākutē kŷ ga tŷ Macedônia ra tīg kŷ sóg ā mŷ to vī, ā tŷ ver Éfeso tá ke ag ki rīr jé. Ā mŷ sóg tó, ā tŷ tá nŷtī ag jyvēn jé. Ón kŷ ag tóg Topē jykre kāmén sór tī. Tag to ag mŷ: "han tŷg nī," hemnī.

⁴ Topē jykre tovānh kŷ ag tóg vŷrmŷ nén ū ū to jykrén sór mŷ, hā vŷ: kanhkā tān tŷ ó, he mŷ, kar ag tóg gufā ag jiji tó sór mŷ gé. Ag tŷ nén tó mŷ ēn tó kān ke tŷ ēg tóg nī. Tag to jagnē vī kafān mŷ vŷ kutē tī. Ēg pi(jé) tag tŷ Topē jykre han tī'. Topē jykrén hā vē, hā vŷ: vēnh kar tŷ ti ki rā, he mŷ.

⁵ Ēg tŷ Topē jykre han kŷ ēg tóg jagnē to há tāvī nŷtī, ēg fe kar tŷ, kŷ ēg tóg jagnē mŷ vēnh jykre pir han tī gé, ti ki rā há han jé ēg tóg ke mŷ gé.

⁶ Tá ke ū ag tóg vēnh jykre há tag togvānh, kŷ ag tóg véké vēmén mŷ nī ha. Ag tŷ kygnēn hā vē.

⁷ Topē tŷ vāsŷ ēg jyvēn tī ēn tŷ ag tóg ājag kanhrān sór tī, ag tŷ ki kagtīg (hā) ra. Ón kŷ ag tóg tó tī, ag tŷ ki kagtīg nŷtīn kŷ. Topē vī kāmén sór ag tóg tī, to ag tóg: "tag to ke vē," he tī, ag tŷ ki kagtīg nŷtīn kŷ.

⁸ Ag jāvo ēg tóg ki kanhró nŷtī, Topē tŷ vāsŷ ēg jyvēn tī ēn há nī ti. Ēg tŷ to jykrén há han kŷ ēg tóg ti há nī vég tī.

⁹ Topē pi(jé) ū tŷ ti vī ki króm mŷ ag tŷgrīn ēg jyvēn ja nŷgtī'. Ū tŷ vēnh jykre kuryj han vānh ēn ag tŷgnīn ken hā vē, ū tŷ ti vī han sór tŷ ag tŷgrīn, ū tŷ Topē to é he mŷ ag tŷgrīn, ū tŷ ti vī mranh mŷ ag tŷgrīn, ū tŷ ti ki kanhrān sór vānh ag tŷgnīn, ū tŷ vēnh jykre pāno han mŷ ag tŷgrīn ke gé. Ū tŷ ge ag vŷ ājag panh tén tī, ājag mŷnh tén ag tóg tī, jagnē kāgtén ag tóg tī,

¹⁰ ājag prŷ tŷ fag mré ag tóg nŷ tī, ājag mén tŷ ag mré fag tóg nŷ tī, jagnē ki vŷn ke ag tóg tī, jagnē vēne he ag tóg tī, jagnē mŷ ag tóg ón tī, jagnē to ag tóg ón tī gé, vēnh jykre pāno kar han ag tóg tī, Topē tŷ nén ū to: "kórég ti nī," he mŷ ēn han kān ag tóg tī.

¹¹ Ū tŷ tag han mŷ tŷgnīn tóg ēg jyvēn ja nī, Topē ti, ēg tŷ han tŷg jé. Ti hā vŷ ēg mŷ vēnh vī sér tó ja nŷgtī', ti hā vŷ inh mŷ to: "hā vēnh kar mŷ tónh tŷg," he ja nī'. Topē hā ne ā pir mŷ há nī'. Jāvo ag tóg ti vŷ tag kato tē tī.

Topē tŷ ēg jagāgtān sór

¹² Ēg Senhor tŷ Jesus Cristo ne isar han tī', hā kŷ sóg ti hā mŷ vī há han tī. Ti hā ne iso jykrén kŷ inh kuprēg', sŷ ti rānrāj han jé, kŷ tóg vég mŷ, sŷ to tar nī ti, ti tŷ isar han kŷ.

¹³ Sŷ tá krŷg ke tŷ vē vē, isŷ ti rānrāj han jé. Vāsŷ sóg ti mŷ vī kónān ja nŷgtī, ti vóg kónān ja sóg nŷgtī, ti to jŷ pē han ja sóg nŷgtī gé. Hā ra sóg ti ki kagtīg nī ja nŷgtī, kŷ sóg ti ki rā sór ja tŷ nŷgtī gé. Hā kŷ tóg inh jagāgtān, sŷ ti ki rā jé.

¹⁴ Inh jagāgtān há tāvī han tóg, ěg Senhor ti, hā kŷ sóg ti ki rā há han, kŷ sóg ti to há tāvī nī gé, Jesus Cristo to.

¹⁵ Tag vŷ tŷ vĕnh vī há nī, ha mĕ, kŷ vĕnh kar tŷ tag to há nŷtī ran jé há ti vĕ, hā vŷ: Jesus Cristo vŷ ga kri mur, ti tŷ Topĕ vī mranh tī ag kren han jé, he mŭ. Topĕ vī mranh tī ag kar kórég káfór vŷ tŷ inh nī.

¹⁶ Hā kŷ tóg inh jagāgtān ja nī gé. Jesus Cristo tŷ vĕnh kar mŷ ven sór vĕ, ti tŷ Topĕ vī mranh tī ag jagāgtān sór mŭ ti. Hā kŷ tóg inh jagāgtān, sŷ ũ tŷ ti vī mranh mŭ ag káfór han ja hā ra. Kŷ vĕnh kar tóg inh ve kŷ Topĕ tŷ ag to há ki kanhró nŷtīnh mŭ. Vĕnh kar vŷ ěg rīr krŷg ja tŭ venh ke mŭ, ěg tŷ ti ki ge kŷ.

¹⁷ Topĕ hā ne ā pir mŷ tŷ pā'i mág nī'. Á tŷ nĕn kar han to tóg nī nī, kŷ tóg ter ke tŭ nī gé. Ti vég tŭ ěg tóg nīgtī. Á pir mŷ tóg tŷ Topĕ nī. Kŷ ěg tóg ti hā mŷ vī há han ke mŭ, ti to ke gé. Ti mŷ vī há han ke tag tóg tŷg' henh ke tŭ nī gé. Amém.

Timóteo rānrhāj

¹⁸ Timóteo', inh kósin vŷ tŷ ā nī. Sŷ ā mŷ ā rānrhāj tag nīm vĕ. Vāsŷ ā tóg mĕ ja nī, Topĕ vī tó tī ag tŷ ā to nĕn tó ja ti. Kŷ ag vī mī ěkré. Soldado tŷ ā rānrhāj to vāsān ri ke han kŷ ā jĕ nī, Topĕ vī tó kŷ. Topĕ vī tó tī ag vī vŷ ā tar han ke mŭ, ā tŷ ā rānrhāj to vāsān há han jé.

¹⁹ Ti ki rā to krónh ke tŷg nī. Á fe kavĕnh sór tŷg nī. Ũ ag tóg ājag fe kavĕnh ja nīgtī. Hā ra ag tóg kykŭnh sór ja tŭ nīgtī, ag fe kavĕj ti. Hā kŷ ag tóg ti ki rā kŷ tī tovānh tī, kŷ tóg ěg barco tŷ goj ki pun ke ri ke nī.

²⁰ Ag kāmī ũ vŷ tŷ Himeneu nī, Alexandre ti ke jé. Topĕ to é he ag tóg mŭ ha ũri, hā kŷ sóg Satanás mŷ ag vīn, ti tŷ ag vóg kónān jé. Satanás tŷ ag vóg kónān tugrīn ag hŷn ki kanhrān ke mŭ, ěg tŷ Topĕ to é henh ke tŭ ti.

2

Igreja krĕm vĕnh jykre

¹ Á tŷ ā tŭ ag jyvĕn kŷ ag mŷ ag tŷ Topĕ mré vĕmén ke hā tómnī. Ag mŷ: “Topĕ mré vĕmén e han nī,” hemnī. “Ti mŷ nĕn ũ kar to vīmī, vĕnh kar jagfŷ vīmī, ti mré, ti mŷ nĕn ũ kar to: “há ti nī,” hemnī gé,” hemnī ag mŷ.

² Pā'i mág ag jagfŷ Topĕ mré vīmī gé, pā'i kar ag to ke gé. Kŷ ag tóg jatŭ nŷtī. Kŷ ěg tóg jatun mŷ ag krĕm nŷtīn kŷ ěg rānrhāj nón mŭnh ke mŭ gé, ěg tŷ Topĕ to há nŷtīn kŷ, ěg tŷ jagnĕ to há nŷtīn kŷ ke gé.

³ Topĕ mŷ tóg há nī, tag ti, ũ tŷ ěg kren han tī ti mŷ, ti mŷ tóg sér tī.

⁴ Ti tŷ tag han sór vĕ, ha mĕ: ěprā ke ag krenkren han sór tóg mŭ, vĕnh kar tŷ ti tŷ ki hā tó mŭ tag mĕ han kán jé.

⁵ Pir ti nī, Topĕ ti. Pir ti nī gé, ũ tŷ Topĕ mré ěg jagfŷ vī mŭ ti, hā vŷ: ěg mré ke tŷ Jesus Cristo, he mŭ, ũ tŷ ěg ri ke mur ja ěn ti.

⁶ Ti hā ne vĕnh fĕg', ti tŷ vĕnh kar kygĵām jé. Topĕ tŷ ti mŷ kurā nīm ěn kā ke ja vĕ. Kŷ vĕnh kar vŷ mĕnh ke mŭ, ũ tŷ ve ja ag vī ti.

⁷ Hā kŷ tóg inh mŷ: “ha vĕnh kar mŷ tónh tŷg,” he ja nī. Sŷ tŷ ti apóstolo jĕ jé tóg inh kuprĕg, hā kŷ sóg tó mŭ. Ki hā sóg tó mŭ. Inh pí(jé) ón mŭ'. Fóg ag to tóg inh jĕnĕ, kanhgág ag to ke gé, sŷ ag mŷ vĕnh vī há tó jé, ag tŷ Topĕ ki ge jé gé.

⁸ Kŷ tá Jesus ki ge kŷ nŷtī ag mŷ tómnī, ag kar tŷ igreja krĕm Topĕ mré vĕmén jé. Hā ra tóg há tŭ nī, ũ tŷ ā jykre pāno tovānh sór tŭ nīn kŷ, ti tŷ Topĕ mré vĕmén mŭ (hā) ra. Ag tŷ Topĕ mré vĕmén kŷ ag tóg ājag jŭ tovānh ke mŭ, ag tŷ ũn kato tĕ mŭ ag tovānh jé ag tóg ke mŭ gé. Tag tómnī ag mŷ.

9-10 Kĩ ùn týtá fag vỹ ge nýtĩnh mũ gé, ãjag tỹ vẽnħ mẫn kỹ nýtĩn kỹ. Fag sĩnvĩ han jafã vỹ tỹ fag jykre kuryj nĩ. Fag tũ hã vễ. Tag han kỹ ẽg tóg vếg mũ, fag tỹ Topê to há nýtĩ ti. Kur to mỹ'ãg tí ra rẫnh ke tũ fag nĩ hã ra. Fag tỹ ãjag kur tỹ vễĩ tãvĩ han tĩ to ken hã vễ, fag gẫnh to ke gé. Pí(jé) há nĩ', fag tỹ brinco mág tỹ vếso vin kỹ, jẫnka e tỹ vếso sa kỹ, kur kaja e tu kỹ, fag tỹ nẻn kar kaja e gẻnh kỹ tóg há tũ nĩ, fag tỹ tỹ vễĩ tãvĩ han kỹ. Fag kur há vỹ há nĩ, kur sĩnvĩ ti.

11 ãjag tỹ vẽnħ mẫn kỹ nýtĩn kỹ fag vỹ vĩnh ke tũ nĩ. Mễ tãvĩ han jẻ fag tóg ke mũ, fag tỹ tỹ ag krẻm ke nýtĩn kỹ.

12 Fag tỹ ag mỹ vẽnħ jykre nẻm kỹ tóg há tũ nĩ. Fi tỹ fi mẻn krẻn sỏr nẻn kỹ tóg kỏrẻg nẻ gé. Fag tỹ ẻmẻ kã nýtĩn kỹ tóg há tĩ.

13 Tag to jykẻn nẻ, ha mễ. Topẻ tỹ ùn han vẻn mũ vỹ tỹ Adão nẻ, kar kỹ Eva fi. Ti tỹ tỹ fi kri ke to ken hã vễ.

14 Kỹ Japo tỹ ùn krẻn kỏnẫn mũ fi vỹ tỹ fi nẻ ja nẻgtĩ. Adão pijẻ'. Fi hã ne Topẻ vỹ mranh vẻn', kỹ tóg fi nỏn mranh ja nẻgtĩ gé, Adão ti. Hã kỹ tóg há tũ nẻ, fag tỹ ag krẻn sỏr kỹ.

15 Hã ra fag krenkren ke mũ gé, fag krẻ mrẻ hã. Kỹ tóg há nẻ, fag tỹ Jesus tovẫnh sỏr tũ nýtĩn kỹ, fag tỹ ti to há nýtĩn kỹ, jagnẻ to há ke gé, fag tỹ tỹ ti tũ nýtĩn kỹ. Fag krẻ há nýtĩn kỹ tóg há tĩ.

3

Igreja to pã'i mág

1 Sỹ ke há vễ, ha mễ. Ủ tỹ igreja to tỹ pã'i mág nẻ sỏr kỹ tóg vẽnħ rẫnhrẫj mág han ke mũ.

2 Hã ra igreja to pã'i mág vỹ ge jẻnh mũ, sỹ ã mỹ ti jykre kãmẻn ke vễ, ha mễ. Ủ tỹ kygnẻ tũ vỹ há nẻ, ủ tỹ prủ pir han kỹ nẻ, ủ tỹ nẻn ủ há to jykẻn mũ, ủ tỹ vếso jykẻn mũ, ủ tỹ kỏr há tá ke ag mỹ: “inh mrẻ nẻnh kẫtĩg,” he tĩ, ủ tỹ ag kanhrẫn há han tĩ,

3 ủ tỹ vinho kron (ka) mễ tũ, ủ tỹ ã fe tỹ gỹm ke vẫnh, ủ tỹ vẽnħ kar mỹ komẻ hã vĩ tũ, ủ tỹ vẽnħ kar krẻ kuprã nẻ ve sỏr tĩ, ủ tỹ rico nẻ sỏr vẫnh,

4 ủ tỹ ã ẫn krẻm nýtĩ fag ki rẻr há han tĩ, ủ tỹ ã krẻ jyvẻn há han tĩ, ti krẻ ag tỹ ti kamẻg jẻ.

5 Ủ tỹ ã ẫn krẻm nýtĩ fag ki rẻr há han tũ nẻ tóg igreja krẻm ke ag ki rẻr há han ke tũ nẻ gé.

6 Ủ tỹ Jesus ki rã tãg tóg tỹ pã'i jẻnh ke tũ nẻ ver, ke tũ nẻ mũ ra tóg inh mỹ ti tỹ: “tỹ sỏg ùn mág nẻ,” hẻnh ha mễ tĩ, kỹ tóg inh mỹ ti tỹ Japo jykre han ha mễ tĩ, Japo tỹ ti krẻn kỹ. Kỹ Topẻ tóg ti vóg kỏnẫn ke mũ.

7 Vẽnħ kar tỹ igreja to pã'i to vĩ há han kỹ tóg há tĩ, ủ tỹ Jesus ki ge tũ ag mrẻ hã. Kỹ tóg mỹ'ãg ke tũ nẻ, ti tỹ kygnẻg tũ nẻn kỹ. Kỹ tóg Japo jykre han mẫn sỏr ke tũ nẻ gé. Hã kỹ ùn há tãvĩ vỹ tỹ pã'i jẻnh mũ.

Igreja to pã'i kẫsĩr

8 Kỹ igreja to pã'i kẫsĩr ag vỹ nýtĩ gé. Ủ tỹ ge ag vỹ vẽnħ jykre há han kỹ nýtĩnh mũ gé, vẽnħ vĩ pir han kỹ nẻ, vinho kron mág tũ, nẻn ủ to ẻn ke tũ, rico nýtĩ sỏr ke tũ.

9 Topẻ vỹ ẻg mỹ vẽnħ vĩ jẻnẻ, ẻg tỹ ti ki rã jẻ, ẻg tỹ ti vĩ tag to krỏnh ke tũ nýtĩ jẻ, ẻg tỹ ẻg fe kavẻnh tũ nẻ jẻ gé. Ag tỹ ti vĩ tag to tar nýtĩnh ke vễ, igreja to pã'i kẫsĩr ag.

10 Ủ tỹ Jesus ki rã tãg nẻ kỹ tóg ver tỹ pã'i nẻnh ke tũ nẻ, ẻg tỹ ver ti jykre ven jẻ. Ti tỹ kygnẻg tũ nẻn kỹ tóg há tĩ, ti tỹ tỹ pã'i nẻnh ke ti.

11 Kŷ ag prŭ fag vŷ ge nŷtĩnh mũ gé. Fag tŷ nén ũ há han kãn kŷ tóg há tí. Kŷ tóg há tí gé, fag tŷ ũ mŷ vĩ kónãn tũ nĩn kŷ, fag tŷ nén ũ há kar to jykrén kŷ, fag tŷ fag rãnhrãj ki rĩr há han kŷ.

12 Igreja to pã'i sĩ vŷ prŭ pir han kŷ nĩnh mũ gé, kŷ tóg ã krê kanhrãn há han ke mũ gé, kŷ tóg ã ĩn krêm nŷtĩ fag ki rĩr há han ke mũ gé.

13 Ũ tŷ ã rãnhrãj tag ki rĩr há han kŷ tóg tŷ ũn mág jênh mũ. Jesus Cristo ki rã kŷ tóg jênh mũ, kŷ tóg Topê to kanê jur mãn ke tũ nĩ, jatun mŷ tóg nĩnh mũ.

Jesus kãme

14 ã mŷ sóg vênh rá tag han mũ, hã ra sóg kãnhrãm ã ve sór mũ.

15 Hã ra sóg hên ri ke mũn kãtĩg vãnhrãm han ke mũ, kŷ ã tóg Topê jo ĩn krêm vênh jykre ki kanhró nĩnh mũ. Hã jé sóg ã mŷ rán mũ. Topê vŷ rĩr jê. Tĩ tũ vŷ tŷ êg nŷtĩ, ũ tŷ ti ki ge kŷ nŷtĩ ag. Êg hã vŷ vênh vĩ há hã tó tí, Topê vĩ to, vênh kar tŷ mẽ jé. ĩn nũna tugrĩn ĩn vŷ tar jê. Jãvo êg tugnĩn vênh kar vŷ vênh vĩ há ên mẽnh ke mũ.

16 Ha vé, Topê tŷ ũri êg mŷ nén tó mũ tag vŷ tŷ nén ũ há tãvĩ nĩ. Vãvŷ ag tóg mẽ ja tũ nĩ, êg tŷ ũri mẽg mũ tag tí. Tĩ jykre hã vê, ha mẽ:

Jesus Cristo vŷ êg ri ke mur, ga kri, kŷ Topê tóg ti tŷ ũn mág han, tá, ti tŷ jykre kuryj nĩn kŷ.

Kŷ tóg ã tŷ jêgnê jãfã ag mŷ ti ven, kŷ ti mré mũ tĩ ag vŷ povo kar mŷ ti tó.

Hã kŷ ga kri mũ ag vŷ ti ki ge mũ, kŷ Topê tóg kanhkã tá ti tŷ ũn mág han.

Êg tŷ Jesus kãmén hã vê.

4

Ōn kŷ Topê kãmén tĩ ág

1 Ha vé, Topê kuprĩg vŷ êg mŷ nén ũ jagy tó tí, ha mẽ. Jesus kãtĩg mãn ke tŷ kakó ên kã ũ ag nêji ti tovãnhrãm ke mũ, ag tŷ vênh ó hã ki rã jé, Nén-Kórég ag jykre ki, Japo tŷ ag kanhrãn mũn ki.

2 Ũ tŷ Japo mré ke ag vŷ un'ón tĩ, hã ra ag tóg ag vĩ jêmê kŷ Jesus tovãnhrãm ke mũ. Jykre rêgre han ag tóg tí, Japo mré ke tag ag. Ājag fe kygvênh ja ag nŷtĩgtĩ, kŷ ag tóg ki kagtĩg nŷtĩ ha, ag tŷ un'ón mũ ti. "Vênh vĩ há vê," he ag tóg tí, vênh ó to.

3 "Prũg tũg ra, mên tũg ra," he ag tóg tí. "Tag ko tũg ra," he ag tóg tí gé, Topê tŷ nén han ja to. Êg tŷ Cristo ki ge há han kŷ, êg tŷ ti vĩ kri fi kŷ êg tóg tí hã mŷ to vĩ há han ke mũ, vêjên to, kŷ êg tóg nén kar konh ke mũ.

4 Topê tŷ nén han mũ kar vŷ há nĩ. Kŷ êg tŷ ti mŷ: "há ti nĩ, ã tŷ êg mŷ vêjên tag ven mũ ti," hen kŷ êg jatun mŷ konh ke mũ. "Tag konh ke tũ ĩnh nĩ," henh ke tũ êg tóg nĩ.

5 Topê vĩ vŷ nén kar jãnhkri han tĩ, kŷ êg tóg to Topê mré vêmén tĩ gé, kŷ êg tóg jatun mŷ konh ke mũ.

Êg mré ke kar ag kanhrãn nĩ

6 Tag kar tómnĩ, êg mré ke kar ag mŷ. Ag mŷ kãmén kŷ ã tóg Jesus Cristo rãnhrãj han há han mũ. Topê vĩ vŷ ã mŷ tŷ vêjên ri ke nĩnh mũ, kŷ ã tóg tŷ tar jê, ã tŷ ti jykre mĩ tĩn kŷ. Kĩ kanhró ã tóg nĩ, Topê jykre ti, êg tŷ ti ki rã kŷ nŷtĩ tĩ.

7 Ũ tóg vŷrmŷ nén ũ to jykrén sór tũ, tŷ vênh ó han kŷ, Topê vĩ ki rán kŷ nĩ tũ ên. Tag jêmê sór tũg nĩ. Vênh jykre kuryj hã mĩ tũg nĩ, tag hã to tar nĩmnĩ.

⁸ Kejen ěg tóg vâkrég tí. ěg tý vâkre to tar nýtín ký tóg há sí ní. ěg tý jávo věnh jykre kuryj kar to tar nýtí tag vỹ há táví ní sir. Tag to ěg tóg tag mĩ mũ há han tí, kar ěg tóg tá mũ há han ke mũ gé.

⁹ Tag vỹ tý věnh ví há ní, věnh jykre kuryj ti. Věnh jykre kuryj tý věnh kar mỹ há ní ra tóg há tí vě.

¹⁰ Věnh jykre kuryj ve jé sóg rânhráj mũ, tag ve jé sóg vâsân mũ. Topě há ki ěg tóg něn ũ kar věg tí, há ký sóg ti há to vâsân mũ. Rír ti ní, ěg jóg tý Topě ti. Tí há ne ěg kren han tí', věnh kar ag, ũ tý ti ki ge ký nýtí ag.

¹¹ Tag kâmén ní, tag to věnh kar mỹ: “tag han ra,” hemní.

¹² Kyrũ ě tóg jě. Ũ jě ě to é he tũg, ě kyrũ jěn ký. Něn kar há ěn han ní, ag tý ve jé, ag tý ě kóm han sór jě, ě ví ri ke ěn ti, ě tý něn han mũ ri ke, ě tý věnh kar to há ní ri ke, ě tý Jesus ki rá ký jě ri ke, ě tý něn ũ jánhkri han ja ri ke ke gé.

¹³ Inh kâtũg ke to há ě tý něn han tí ěn han tũmĩ ver. Ag mỹ Topě ví rán to kemní, ag jyvěn ní, ag kanhrân ní gé.

¹⁴ ěg jyvěn tí ag ne ě mỹ tó', Topě tý něn to ě tar han ke ti, Topě kuprĩg tý ag krĩn ký, igreja to pâ'i ag tý ějag nĩgé tý ě kri fi ja ěn kã.

¹⁵ Ag tý ě mỹ něn tó ja ěn tovãnh tũg ní. To jykren ní, to tar nĩmĩ, věnh kar tý ě tý to tar ní ěn ve jé.

¹⁶ Věso jykren ní, ký ě tý Topě ví tý ag kanhrân ke ěn to jykren ní gé, ě tý kygně tũg jě. Tag to tar nĩmĩ. ě tý tag han ký ě kren ke mũ, ký ũ tý ě ví měg mũ ag vỹ krenkren ke mũ gé.

5

¹ Ũn si há ag mỹ ví tar han tũg ní. Koměr há ag jyvěn ní, ěg tý ũ tý ěg han mũ ěn mré ví ri ke han ní, ě tý ũn si há ag mré věmén ký. ě tý kyrũ ag jyvěn ký ěg tý ěg jávy ag jyvěn ri ke han ní.

² ě tý ũn si há fag jyvěn ký ěg tý ěg mỹnh fi jyvěn ri ke han ní. ě tý tátãg fag jyvěn ký ěg tý ěg ve fi jyvěn ri ke han ní. ě tý fag jyvěn ký věnh ki rĩrmĩ, ě tý fag to ěn tú ní jě.

Ũ tý ě ěn ý ũn mén ter ja fag ki rĩr ke mũ

³ Ũ fag mén vỹ ter, há ra tóg tú tí, ũ tý fag ki rĩr ke ti. ěn fag ki rĩrmĩ.

⁴ Ũn mén ter ja ũ fag krě vỹ nýtí, fag krě'krě mré há. Ký fag krě há vỹ fag ki rĩr ke mũ'. Ag tý ějag mré ke fag jagãgtãn ký tóg há tí, ũ tý ag han mũ fag. Ag tý gĩr nýtí kã fag tóg ag jě'ŷn ja nĩgtí, ký ag tóg věnh kaja jě fag jě'ŷn mũ ha. Topě jykren há vě, tag vỹ ti mỹ há ní.

⁵ Há ra ũn mén ter ja ũ fag vỹ krě tú nýtí, ký ũ tý fag jě'ŷn ke tóg tú tí gé. Ký Jesus ki ge mũ kar ag vỹ fag jě'ŷn ke mũ, fag tý Topě há ki něn ũ kar ve sór ký, tí mré věmén ký, tí há mỹ něn ũ kar to ví ký. Fag tý tag to krónh kenh ke tú vě, kurã mré há, kuty mré há ke gé.

⁶ Fag tý há ra ag to kanhir sór ký fag tóg věnh jykre pãno han mũ, ký fag tóg mũ kónãn ke mũ.

⁷ Tag tómnĩ, fag mỹ, fag tý tý prãnh ke tú ní jě.

⁸ ě rânhráj jafã tá ke ag kãmĩ ũ tóg kejen ě mré ke fag ki rĩr tú ní, ě ĩn krěm nýtí fag. ěn vỹ Jesus ki rá tovãnh ja ní, tí tý fag ki rĩr ja tú tũgrĩn. Kórég táví ti ní, tag ti. Ũ tý Jesus ki rá ja tú kórég kãfór ti ní.

Ũ tý ě ěn ý igreja ki rĩr ke

⁹ Tá ùn mén ter ja fag vỹ ãjag jiji ránrán sór mũ, fag tỹ igreja ki rĩr jé. Ùn si há fag jiji rán nĩ, ù tỹ 60 anos kãfór nỹtĩ fag, ùn mén pir han kỹ nỹtĩ ja fag.

¹⁰ Vẽnh kar tỹ fi jykre há ki kanhró nỹtĩn kỹ fi jyjy rán nĩ, fi tỹ fi krẽ ki rĩr há han ja nĩn kỹ, fi tỹ kór há tá ke fag mỹ: “inh mré nĩnh kãtig,” he ja nĩn kỹ, fi tỹ ã ìn krẽm Topẽ tũ ag ki rĩr há han ja nĩn kỹ, fi tỹ vẽnũ kar jagãgtãn ja nĩn kỹ, ùn vẽnỹrẽnh mũ ag, fi tỹ nén ù há kar to tar ja nĩn kỹ. Û tỹ ge fi jiji rán nĩ.

¹¹ Ùn mén ter ja ù fag vỹ si há tũ nỹtĩ ver, kỹ fag jyjy rán tũg nĩ. Fag tỹ ù to ẽn kỹ fag tóg Cristo tovãnh kỹ mén sór mũ.

¹² Kỹ tóg vẽnũmỹ tĩnh mũ, fag tỹ fag jiji rán ja nĩn kỹ, hã vỹ: “mén mãn ke tũ inh nĩ ha, sỹ Cristo tũ hã ki rĩr jé,” he mũ. Fag mén sór kỹ fag tóg fag vĩ tag mranh mũ sir.

¹³ Kỹ fag tóg rãnrhãj tũ nỹtĩn kỹ fag tóg ìn kar mũ pasa he sór mũ, ha vemnĩ, kỹ fag tóg fagrĩnh mỹ vẽnũn ke mũ gé sir. Vẽnũ kar tỹ nén han mũ tỹ fag tóg vẽnũn sór mũ, ha vemnĩ. Nén tó vãnũ tó jé fag tóg ke mũ gé. Kỹ tóg há tũ nĩnh mũ.

¹⁴ Hã kỹ tóg há tĩnh mũ, fag mén mãn kỹ, ùn mén ter ja tỹ gĩr fag. Fag tỹ krẽ ve kỹ tóg há tũ. Fag tỹ fag ìn ki rĩr há han kỹ tóg há tĩ gé. Kỹ ù tỹ ẽg mỹ fag to vĩ sór mũ ra tóg ag mỹ vẽnũmỹ tĩnh mũ, ha vemnĩ.

¹⁵ Ha vé, ù fag vỹ Cristo tovãnh huri, ùn mén ter ja tỹ gĩr ù fag, kỹ fag tóg Satanás jykre han mũ sir. Kỹ tóg kórég nĩ.

¹⁶ Tá ke fag kãmĩ ù ìn krẽm ùn mén ter ja ù fag vỹ nỹtĩ. Fag hã vỹ fag jẽ'ỹn ke mũ. Fag tỹ fag mỹ: “Jesus ki ge mũ ag tỹ ã jẽ'ỹn kỹ tóg inh mỹ há tĩnh mũ vẽ,” henh ke tũ vẽ. Ke tũ nĩ mũ ra Jesus ki ge kỹ nỹtĩ ag vỹ ù tỹ hẽn ri ke fag ki rĩr ke mũ, kỹ fag jẽn vỹ fag kã kyn kenh mũ, fag tỹ e nỹtĩn kỹ. Jesus ki ge mũ ag vỹ ùn mén ter ja tỹ ge hã ki rĩr ke mũ, hã vỹ: ùn kanhkã tũ, ùn krẽ tũ, he mũ.

Jesus ki ge kỹ nỹtĩ ag tỹ igreja to pã'i ag jẽ'ỹn ke

¹⁷ Tá ke ag kãmĩ ù tóg tỹ pã'i nỹtĩ, igreja to. Ag tỹ ag rãnrhãj ki rĩr há han kỹ ag tóg ẽg mỹ tỹ ùn mág tãvĩ nỹtĩ. Igreja to pã'i ag kãmĩ ù tóg igreja ki kẽ ag kanhrãn tĩ, Topẽ vĩ tỹ, kỹ ag tóg to krónh ke tũ nĩgtĩ. Tag ag vỹ tỹ ẽg mỹ ùn mág tãvĩ nỹtĩ. Ag tỹ igreja krẽm ùn kanhrãn tĩ ag jé ag mỹ kajãm mág, ù tỹ ag kanhrãn tĩ ag mỹ.

¹⁸ Tag vỹ rán kỹ nĩ, ag to, ha mẽ: “monh tỹ ẽkré jãnkre ki rãnrhãj kỹ ti jẽnky tógfĩn tũg nĩ, ti jẽn kamẽg tũg nĩ,” he ja tóg nĩ, Topẽ vĩ rán ki. Kỹ tag vỹ rán kỹ nĩ gé: “ùn rãnrhãj mũ ẽn tóg ti kaja venh ke mũ, ã rãnrhãj kaja ti,” he ja tóg nĩ gé, Topẽ vĩ rá ki. Ti tỹ ẽg tỹ Topẽ vĩ tó tĩ ag mỹ kajãm to ken hã vẽ, ẽg tỹ Jesus ki ge kỹ nỹtĩn kỹ.

¹⁹ Û tóg kejẽn ã mỹ igreja to pã'i jykre kórég tó sór mũ. Ùn régre ag tỹ ti jykre kórég ve ja nĩn kỹ ã mỹ tó kỹ ag vĩ jẽmẽmĩ, ke tũ nĩn kỹ ùn tãgtũ ag vĩ ti. Ùn pir vĩ jẽmẽ sór tũg nĩ.

²⁰ Pã'i ù tỹ kygnẽ kỹ vẽnũ kar rĩnve ti jyvẽn nĩ, vẽnũ kar tỹ ti mré ẽg tỹ kygnẽg tĩ ẽn kamẽg jé.

²¹ Tag han ra, ha mẽ. Ker han tũg hẽ'. Topẽ vỹ ã tỹ nén han mũ vэг tĩ, Jesus Cristo ti ke gé, Topẽ tỹ jẽnẽ jafã ag ke gé, Topẽ tỹ ùn kuprẽg ja ag. Ti hỹn ã mỹ jagy nỹ, sỹ ã mỹ tó mũ tag. Hã ra vẽnũ kar mỹ vẽnũ jykre pir han nĩ. Û to: “ti tỹ iso há nĩn kỹ sóg ti mỹ vĩ tar han sór tũ nĩ, ti tỹ kygnẽ ja ra,” he sór tũg nĩ. Ge ra ti jyvẽn tar han nĩ.

22 Kŷ kãnhmar ũ kri ã nŷgé fi sór tũg nŷ gé. Ti tŷ ã tŷ Topê vŷ mranh ja ên tovãnh kãn ja tú nŷn kŷ ã tóg ti mré mranh mũ, ã tŷ ge ra ti kri ã nŷgé fi kŷ, ti vŷ mranh tŷ ver ti kãkã nŷn kŷ. Kŷ veso jykren nŷ gé, ã jãnhkri kar jê jê.

23 Goj tãvŷ kron sór tũg nŷ. Sŷn kŷ vinho kron nŷ. Vênh kagta vê ã mŷ, ã kaga nŷn kŷ, ã tŷ fe kórég (ka)mê nŷn kŷ.

24 Ũ ag tóg Topê vŷ mranh pê han tŷ, kŷ vênh kar tóg ag vég tŷ. Topê vŷ ag vóg kónãn ke mũ, ag tŷ ti vŷ mranh pê han to. Ũ ag tóg vênh péju kŷ mranh tŷ. Ag tŷ Topê vŷ mranh mũ ên vŷ vênh ven ke mũ gé kejên, ha vemnŷ.

25 Ge ti nŷ gé, vênh jykre há mré. Vênh kar vŷ vég mũ, ũ tŷ vênh jykre há han mũ ti. Kejên ũ tóg nén ũ há han tŷ, hã ra tóg vênh péju kŷ han tŷ. Vênh ven jê tóg ke mũ gé, ti tŷ han mũ tag ti.

6

Patrão camarada jykre

1 Tã ke ag kãmŷ ũ tóg tŷ patrão camarada nŷtŷ. Kŷ ũ ag patrão vŷ Cristo ki kagtŷg nŷ. Ti camarada ag mŷ kemnŷ, ag tŷ ãjag patrão kamêg jê, ag tŷ ag patrão tú ki rŷr há han jê. Kŷ ũ tóg êg to vŷnh ke tú nŷ, Topê to, ti vŷ to, ag tŷ vênh jykre há han kŷ.

2 Ũ ag patrão vŷ Cristo ki rã ja nŷ. Ti camarada ag mŷ kemnŷ, ag tŷ ti to é he tũg jê. “Inh mré ke vŷ tŷ ti nŷ, inh patrão ti, ti tŷ Cristo ki rã kŷ. Kŷ inh hŷn ti vŷ han ke tú nŷ,” he tũg nŷ. Ti tŷ êg mré Jesus ki rã kŷ Jesus vŷ ti to há nŷ. Kŷ tóg ũn vêsŷrênh mũ ag jagãgtãn tŷ, ag patrão ti. Kŷ tóg há tŷ, ti camarada ag tŷ ti tú ki rŷr há tãvŷ han kŷ. Tag tómnŷ, vênh kar mŷ. Tag tŷ ag jyvênh nŷ.

Ón kŷ Topê kãmén tŷ ag

3 Ũ ag tóg vŷrmŷ jykren kŷ nén ũ tó sór tŷ. Topê vŷ rán kŷ nŷ ên tó sór tú ag nŷgtŷ. Êg Senhor tŷ Jesus Cristo tŷ nén tó mũ ên tovãnh kŷ ag nŷtŷ ha, vênh vŷ há ên, Topê jykre ên.

4 “Ũn mág vŷ tŷ êg nŷtŷ,” he ag tóg tŷ. Hã ra ag tóg jykre tú nŷtŷ. “Topê hŷn tóg tag tó sór mũ, ti tŷ ên tó kŷ,” he ag tóg tŷ, ón kŷ, ag tŷ ũ tŷ ag mŷ vênh vŷ há tó mũ ag kato tê sór kŷ. Kaga ag nŷtŷ, krŷ vênhmŷ ag nŷtŷ, hã kŷ ag tóg fagrŷnh mŷ vŷ mũgtŷ. Ag vŷ tugnŷn jagnê tú ki vêŷ vŷ kutê tŷ, jagnê to jũ ke gé, jagnê to vŷ kónãn, jagnê to jykren kónãn,

5 jagnê to féfén ke gé. Krŷ tú nŷ ve ag nŷtŷ. Vênh vŷ há ki kagtŷg ag nŷtŷ. Kŷ ag tóg ón kŷ Topê kãmén to rŷcon sór nŷtŷ.

6 Hŷ, Topê to êg rico nŷtŷnh mũ, êg tŷ êprã rŷcon sór tú nŷtŷn kŷ.

7 Ha vé, êg mur kŷ êg tóg tŷ nén ũ tú mur, kŷ êg ter ken kŷ êg tóg nén kar tovãnh kŷ tũg mũ gé.

8 Kŷ tóg há tŷ, êg tŷ ŷri vêjên mré êg kur ven kŷ, tag tãvŷn.

9 Êg tŷ rico nŷtŷ sór kŷ tóg inh mŷ êg tŷ Topê vŷ mranh ha mê tŷ. Kãnhmar êg tóg nén ũ to én', nén ũ to én' he tŷ, kŷ tag tóg inh mŷ êg kókén ha mê tŷ. Kŷ êg tag to nũgme ki vár ke mũ. Pí(jé) há nŷ'.

10 Êg tŷ jãnkamy mág to én kŷ êg tóg nén ũ kórég kar han sór tŷ. Ka jãre kórég ri ke ti nŷ, êg tŷ jãnkamy mág ve sór mũ ti. Vênh jykre kórég vê. Tag to ũ ag tóg Jesus ki rã tovãnh huri, kŷ ag tóg vêsŷrênh mũ ha, ag tŷ jãnkamy mág to há nŷtŷ tugnŷn.

Ã rãnhrãj ki rŷr há han nŷ

11 Ag jāvo ā hā vỹ tỹ Topē tũ nĩ. Kỹ vĕnh jykre kórég tag tovānh kǎn. Ā tỹ nén han ken hā vē, hā vỹ: vĕnh jykre kuryj, he mũ, Topē kamĕg mũ, he mũ, ti ki rǎ kỹ tĩ, he mũ, vĕnh kar to há nĩ, he mũ, vĕnh kar to fen nĩ, he mũ, komĕr hā vĩ, he mũ gé.

12 Ēg tỹ ti ki rǎ kỹ ĕg tóg ti jykre to vāsānsān ke mũ, ĕg tỹ ka kunũnh sór kỹ to vāsān ri ke. To tar nĩmnĩ, ā tỹ ĕg rĩr krỹg ja tũ ve jé. Tag hā to tóg ā jé prĕr, Topē ti. Kỹ ā tóg vĕnh kar mỹ tó ja nĩ gé, kurā ĕn kǎ. Ũn e ag vỹ ā vĩ ĕn mĕgmĕ. Kỹ to tar nĩmnĩ.

13 Sỹ ā jyvĕn sór vē, kỹ Topē vỹ mĕnh mũ. Ti hā ne nén kar rĩnrĩr han tĩ', Topē ti. Kỹ Jesus Cristo vỹ inh vĩ mĕnh mũ gé. Ti hā ne vĕnh kāmĕn há han', pǎ'i tỹ Pôncio Pilatos ĕn mỹ.

14 Sỹ tag tó sór vē, ā mỹ, ha mĕ: ā rǎnhrǎj ki rĩr há han nĩ. To krónh ke tũg nĩ, to kygnĕ sór tũg nĩ gé. Tag han kỹ ĕg Senhor tỹ Jesus Cristo tỹ vỹn ke ĕn jāvānh nĩ.

15 Ti kurā ki Topē vỹ ti mỹ: “ha tũg,” henh ke mũ. Topē vỹ ā pir mỹ tỹ nén ũ kar kri ke nĩ. Kỹ ĕg tóg ti hā mỹ vĩ há han ke mũ. Pǎ'i kar kri tóg tỹ pǎ'i nĩ. Ũn mág kar kri tóg tỹ ũn mág nĩ.

16 Ti hā ne ā pir mỹ ter ke tũ nĩ'. Ti hā ne jĕngrĕ kǎkǎ nĩ nĩ', tá ĕg jun ke tũ nĩ. Ēprǎ ke ũ vỹ ti ve ja tũ nĩ gé, kỹ ĕg tóg ti venh ke tũ nĩ gé, ĕg tỹ tỹ ĕprǎ ke nỹtĩn kỹ. Ti hā ne tỹ ũn mág nĩ'. Ti hā ne tar nĩ'. Tũg' he jāvānh ti nĩ, ti tỹ tỹ ũn mág nĩ ti. Amém.

Ēprǎ ũn rico ag

17 Ēprǎ ũn rico ag mỹ tómnĩ, ag tỹ vēso: “tỹ inh ũn rico mág nĩ,” he tũ nĩ jé. Kỹ tóg há tũ nĩ gé, ag tỹ: “isỹ nén ũ kar tỹ tũ nĩn kỹ isóg nén ũ jagy venh ke tũ nĩ,” henh kỹ. Ag rico vỹ kǎnhmar tũg' henh mũ. Ag jé Topē hā ki nén ũ kar ve sór. Ti hā vỹ ĕg mỹ nén ũ kar nĩm tĩ, ĕg fe tỹ mrin ken jé.

18 Ũn rico ag jé vĕnh jykre kuryj han, ag jé ājag tũ tỹ vĕnh kǎpām, ag jé ũn jagǎgtar ag jagǎgtǎn to krónh ke tũg.

19 Ag tỹ nén ũ há kar han kỹ ag tóg kanhkǎ tá rico nỹtĩnh mũ, kanhkǎ tá ag tóg vin han ke mũ, ājag tũ ti. Kỹ ag tóg ĕg rĩr krỹg ja tũ venh ke mũ gé. Ā tỹ ĕprǎ ũn rico ag mỹ tónh ken hā vē.

20 Timóteo', ā tỹ Topē vĩ mĕ ja ĕn kǎ jatu tũg nĩ, ki króm nĩ, to jykren kỹ. Ũ ag tóg fagrĩnh mỹ vĕmĕn mág han sór tĩ, ón kỹ vĩ (ka)mĕ han kỹ. Ón kỹ ag tóg: “vĕnh vĩ há vỹ jagnĕ kato tĕ tĩ,” he tĩ, kỹ ag tóg Topē vĩ tỹ jagnĕ kato tĕ ĕn tó sór tĩ. Hā ra ag tóg fagrĩnh mỹ vĩ tĩ. Ag vĩ mĕ sór tũg nĩ.

21 “Ki kanhró ĕg nỹtĩ,” he ag tóg tĩ, hā ra ag tóg Topē ki rǎ tovānh huri. Kórég ag nỹtĩ.

Topē mỹ sóg to vĩ tĩ, ti tỹ ājag tỹ ā to tar han jé.
Hā vē.

PAULO TÝ CARTA HAN: TIMÓTEO MÝ CARTA Û

¹ Paulo tý rá vě. Topě ne inh fëg', isý tý Jesus Cristo apóstolo jě jé. Inh mý tóg tó, isý věnh kar mý ěg tý Jesus Cristo tigrĭn rĭnrĭr nýtĭnh ke tag tó jé. Topě tý ěg mý nén han sór mĭn hã vě.

² Isý inh kósin tý Timóteo mý rán hã vě, isý ù to há tãvĭ nĭ ěn mý. Ěg jóg tý Topě mý sóg to vĭ tí, ti tý ã tar han jé, ti tý ã jagãgtãn jé, ti tý ã krĭ kuprãg jé ke gé. Ěg Senhor tý Jesus Cristo mý sóg tag to vĭ tí gé.

Paulo tý Topě mý vĭ há han

³ Topě mý sóg vĭ há han tí. Ti hã mý sóg rãnrãj tí, inh jóg'jóg ve ag ri kén. To kygně sór vãnh inh nĭgtĭ.

Ā tó sóg tí, sý Topě mré věmén ký. To krónh ke tũ inh nĭgtĭ, kurã kar ki, kuty ki ke gé.

⁴ Isĭg ký ã tóg fý ja nĭ. Hã mĭ sóg ěkrég tí, hã ký sóg ã ve sór tãvĭ nĭ, inh fe tý mrin ke jé.

⁵ Jesus ki rá há han ã tóg nĭ, ã fe kar tý, ã vóvó tý Lóide fi ri ke, ã mýnh tý Eunice fi ri ke. Fag ri ke han ký ã tóg ti ki rá gé, ki kanhró sóg nĭ.

⁶ Hã ký sóg ã jyvĕn sór mũ. Topě vý ã mý věnh rãnrãj nĭm, isý inh nĭgé tý ã kri fi ja nĭn ký. Ěn to tar nĭmnĭ.

⁷ Topě vý ěg mý ã kuprĭg jĕnĕ, ěg kanĕ jur tũ nĭ jé, ěg tar nýtĭ jé, ěg tý jagnĕ to há nýtĭ jé, ěg tý vēso jykrĕn jé.

⁸ Hã ký ěg Senhor to mý'ãg tũg nĭ. Ti kãmén nĭ, ký inh kãmén nĭ gé, isý ti tũgnĭn se ký jĕ tag ti. Ký ã tý ti tigrĭn vēsýrĕnh ke tag kamĕg tũg nĭ gé inh mré. Topě vĭ to ěg vēsýrĕnh tí, hã ra Topě tóg to ěg tar han tí gé.

⁹ Ti hã ne ěg kren han', ti hã ne ěg kuprĕg', ěg tý tý ti tũ nýtĭ jé. Ěg tý vēsóg ki to vãsãn pijé'. Ti hã ne to jykrĕn', ký tóg ěg jagãgtãn ký ěg kuprĕg, Jesus Cristo tũgnĭn. Ěg tý ti ri ke há nýtĭ jé tóg ěg kuprĕg. Hã ra tóg nén kar han ke to há tag to jykrĕn ja nĭgtĭ.

¹⁰ Ký tóg ũri hã ěg mý tó, ěg kren han tí tý Jesus Cristo jĕnĕn kã. Ěn vý ěg ter ke tag tý tũg' hé, ký tóg ěg rĭnrĭr han mũ sir, ěg tý ěg rĭr krýg ja tũ ve jé sir, ěg tý ti vĭ sér kri fi ký.

¹¹ Ký tóg inh mý: "věnh kar mý inh vĭ tónh tũg," he ja nĭ gé, sý tý ti apóstolo jĕ jé, sý ti vĭ tý věnh kar kanhrãn jé.

¹² Hã ký sóg se ký jĕ ha. Hã ra sóg mý'ãg ke tũ nĭ. Ti ki rá ký sóg jĕ ha, ti ki kanhró sóg nĭ, sý ũn ki rá ja ěn ti. Nén ũ kar to tóg tar nĭ, hã ký tóg inh ki rĭr há han ki kanhró nĭ gé, sý ti mý věnh fĕg ký, isý kurã tý ěgno pĕtĕm há han jé.

¹³ Isý nĕn tý ã kanhrãn ja ěn kã jatũ tũg nĭ. Vĕnh vĭ há vě, sý ã mý nĕn tó ja ti. Tag ki króm ký inh ri kén kãmén nĭ. Ti ki rá to tar nĭmnĭ, věnh kar to há nĭmnĭ gé, Jesus Cristo tý nĕn han ja ěn ri ke han nĭ.

¹⁴ Ti tý ã mý věnh rãnrãj nĭm ja ěn ki rĭr há han nĭ, ù tý Topě vĭ tý ù han tũ nĭ jé. Topě kuprĭg vý ěg kãki jamã nĭ. Ěn vý ã tar han ke mũ, ã tý ti vĭ tó há han ke to.

¹⁵ Hã vé, ga tý Ásia tá ke kar ag vý isovãnh kãn, Fígelo ke gé, Hermógenes ke gé. Tag mě ã hýn huri.

¹⁶ Topě mý sóg to vĭ tí, ti tý Onesíforo mré ke fag jagãgtãn jé, ũn tũg mũ ěn ti. Iso há tãvĭ ti nĭ ja nĭgtĭ. Iso mý'ãg tũ ja ti nĭgtĭ, ise ký jĕ (hã) ra.

17 Ti tŷ cidade tŷ Roma tag ki jun kŷ tóg inh jāvānh tāvī han ja nī, kŷ tóg kejĕn inh ve ja nī.

18 Ēg Senhor hŷn ti jagāgtān ke mŷ, ti tŷ kurā tŷ ěgno ki ti kren han jé, kŷ tóg inh mŷ sér tĭnh mŷ. Ki kanhró ā tóg nī, ti tŷ Ēfeso tá inh ki rĭr há han ja ti. Sŷ ā mŷ Onesiforo jykre tón hā vē.

2

Ēg vāsān ke

1 Inh kósin', Jesus Cristo ne ā tar han ke mŷ', kŷ krónh ke tŷg nī.

2 Inh vī mē ā, sŷ ūn e ag kanhrānrān kŷ. Tag tómnī gé, ū ag mŷ. Ū tŷ krónh ke tŷ ag mŷ tómnī, ū tŷ ā kóm ag kanhrān ke to jykre há nŷtī ag mŷ.

3 Ēg tŷ Jesus tugrĭn vēsŷrénh ke to tar nĭmnī inh mré, Timóteo'. Jesus Cristo soldado ri ke ěg nŷtī.

4 Soldado jykre tag to jykren nī. Ag pi(jé) vyr mŷ jykren tĭ', soldado ag. Ājag pā'i vī ki hā han ag tóg tĭ, ājag pā'i tŷ ag to há nī jé. Hā kŷ ag tóg vyr mŷ ganho ve sór tŷ nĭgtĭ. Soldado ag ri ke han nī gé, Timóteo'.

5 Kŷ ū ag tŷ corrida han mŷ ag jykre to jykren nī gé. Ag corrida vŷ to vēnh jykre nī. Corrida to vēnh jykre ěn hā han ag tĭ, ag tŷ ganhar ken jé. Ū tŷ corrida han mŷ ag ri ke han nī, Timóteo'.

6 Kŷ ěpŷ ki rĭr tĭ ag vŷ rānrĕj mág han tĭ gé, hā kŷ ag tóg krān kŷ ti kanē kó tĭ. Ag ri kén ā tóg venh ke mŷ gé, ā tŷ nén ve sór mŷ ti, ā rānrĕj mág kŷ, ha vemnī.

7 Tag to jykren há han nī, sŷ ā mŷ tó mŷ tag to. Kŷ ěg Senhor vŷ ā tŷ to jykren há tāvī han ke mŷ sir.

8 Jesus Cristo mĭ ěkren nī. Ti ter kar kŷ tóg rĭr mĕn. Ti jóg'jóg ve vŷ tŷ Davi ja nĭgtĭ. Hā tó sóg tŷ, ti kāmén kŷ.

9 Hā kŷ sóg se kŷ jé, ferro tŷ mŷr. "Ti hŷn tŷ ūn jykre pāno nī," he ag tóg tĭ iso, hā kŷ ag tóg ferro tŷ isé. Hā ra Topē vī pi(jé) se kŷ nī nī'. Tāmĭ tóg tĭ ha.

10 Hā kŷ sóg ise kŷ jé (hā) ra ti to tar nī, Topē tŷ ūn kuprĕg mŷ ag jagfy, ag krenkren jé, ag tŷ Jesus Cristo ki ge tugrĭn, ag tŷ ti tugnĭn kanhkā tá junjun jé.

11 Vēnh vī há vē, tag ti, ha mē: ěg tŷ ti tugrĭn kĕgter mŷ ra ěg tóg ti mré rĭnrĭr mĕn ke mŷ gé.

12 Ēg tŷ ti tugrĭn nén ū jagy kar to tar nŷtĭn kŷ ěg tóg ti mré tŷ ūn mág nŷtĭnh ke mŷ gé. Ēg tŷ ti tovānh kŷ tóg ěg tovānh ke mŷ gé.

13 Ēg tŷ ti to krónh ke tĭ ra tóg ěg to krónh kenh ke tŷ nī jāvo. Ti pi(jé) ón tĭ', hā kŷ tóg ěg to krónh kenh ke tŷ nī gé, ti tŷ: "krónh ke tŷ inh nī," hen kŷ.

Ēg tŷ Topē rānrĕj han há han ke

14 Tag tómnī, vēnh kar mŷ. Tŷ ag jyvĕn nī, kŷ ag jyvĕn tar han nī gé. Topē vŷ ā vī mĕnh mŷ. Ag mŷ: "ěg kato tē mŷ ag vī kafān sór tŷg nī," hemnī. "Jagnē vī kafān pi(jé) ěg tar han mŷ'. Ū tŷ tag mē kŷ tóg krónh ke sór mŷ," hemnī ag mŷ.

15 Vāsān ra, Topē tŷ ā rānrĕj to: "há ti nī," he jé, ā tŷ ā rānrĕj to mŷ'āg tŷ nī jé. Topē vī to vāsān nī, ā tŷ ki kanhrān há han jé, ā tŷ vēnh kar mŷ tó há han jé gé.

16 Ū tŷ kanhir kŷ nén ū kórég tó kŷ jĕmē sór tŷg nī, ūn vī (ka)mē ěn vī ti. Ū tŷ tag tó mŷ ag vŷ Topē to kórég tāvī nŷtĭ, kŷ ag vī vŷ ag kókén ke mŷ, kŷ tóg ag jykre pāno pē han mŷ.

¹⁷ Vēnh vī t̄y ge v̄y ěg kar kókén ke m̄, komēr hā, ti t̄y vēnh kar kri rūm ken k̄y. Vēnh kaga kórég t̄y vēnh kar kri rūm ke ri ke ti nī.

Ū t̄y vēnh vī t̄y ge han m̄ v̄y t̄y Himeneu nī gé, Fileto ke gé.

¹⁸ Tag ag v̄y un'ón t̄i, Topē v̄i to. “R̄ir m̄n ri ke han ěg huri, ěg t̄y Cristo ki gen k̄y, hā k̄y ěg r̄ir̄ir̄ m̄n ke t̄u n̄t̄i ha, ěg ter kar k̄y, Jesus k̄at̄ig m̄n k̄y,” he ag tóg t̄i. Ag t̄y tag tó k̄y ag tóg ũ ag t̄y Jesus to krónh ke han t̄i, k̄y ag tóg Cristo tovānh m̄ ha ag t̄ugr̄in.

¹⁹ Ěg t̄y ĩn han k̄y ěg tóg ti t̄y kri jē jafā ěn tar han t̄i. Ěn ri ke ti nī, Topē jykre ti. Jesus Cristo k̄āme v̄y há nī, k̄y tóg t̄ug' henh ke t̄u nī, ũ ag t̄y ón k̄y to vī m̄ (hā) ra. Ěg t̄y ti ki ge k̄y n̄t̄in k̄y tag v̄y ěg to rán k̄y nī, ha mē: “ěg Senhor v̄y ā t̄u ag ki kanhró nī,” he tóg m̄.

Kar k̄y tag v̄y rán k̄y nī gé, ha mē: “vēnh jykre p̄āno tovānh k̄ān ra, ājag t̄y: ĩnh Senhor v̄y t̄y ti nī, Jesus ti, he jé,” he tóg m̄. Cristo jykre to ken hā vē. Ón vānh ti n̄gt̄i.

²⁰ Ha vé, ĩn mág krēm kukrū v̄y e n̄t̄i. Ū v̄y ouro t̄y há n̄t̄i, ũ v̄y prata t̄y há n̄t̄i. K̄y ũ v̄y ka t̄y há n̄t̄i gé, ũ v̄y go'or t̄y há n̄t̄i gé. Kukrū há v̄y t̄y vējēn né nī, k̄y ũn kórég v̄y t̄y v̄áfár né nī gé.

²¹ K̄y tóg ge nī, ũ t̄y kanhir k̄y nén ũ kórég tó (ka)mē ěn ag. Kukrū kórég ri ke ag n̄t̄i. Hā k̄y Topē tóg ag m̄y: “ĩnh r̄ānr̄āj han ra,” henh ke t̄u nī sir. Ěg t̄y ti kórég tovānh k̄ān k̄y ěg tóg kukrū há ri ke n̄t̄i, k̄y Topē tóg ěg m̄y: “ĩnh r̄ānr̄āj han nī,” henh ke m̄ gé sir. Ti t̄u v̄y t̄y ěg n̄t̄inh m̄, k̄y tóg ěg m̄y ā r̄ānr̄āj n̄m sór m̄, ěg t̄y han jé. K̄y ěg tóg vēš̄mér han sór m̄ sir, ti t̄y ěg m̄y tó k̄y, k̄y tóg Topē m̄y sér t̄i.

²² Kyrū ag v̄y nén ũ kar to én (ka)mē n̄t̄i. Ěn tovānh k̄ān. Vēnh jykre há hā m̄ t̄ig sórn̄i. Jesus ki r̄ā hā to jykren nī, vēnh kar to há n̄m̄nī, kr̄i kuprā n̄m̄nī, ũ t̄y ěg Senhor mré ke ag to, ũn j̄ānhkri ag to, vēnh kar to ke gé.

²³ Ū ag tóg ón k̄y: “Topē h̄yn tag tó sór m̄, ti t̄y ěn tó k̄y,” he sór ti. Topē t̄y nén tó vānh ěn tó sór ag tóg t̄i. Tag t̄ugr̄in jagnē to j̄u tóg kutē t̄i, hā k̄y ag mré to jykren sór t̄ug nī.

²⁴ Ū t̄y Topē m̄y r̄ānr̄āj t̄i jé vēnh kar to há nī. Ti t̄y k̄ānhmar ag to j̄un k̄y tóg t̄y ũ n̄y. Ti t̄y komēr hā v̄i k̄y tóg há t̄i, ag kanhrān jé, vēnh kar to fe há n̄n k̄y.

²⁵ Ū tóg ti v̄i kafān sór m̄. Ěn m̄y tóg v̄i há han ke m̄. Komēr hā tóg ag m̄y Topē v̄i tónh ke m̄, Topē t̄y ag jagāgtān jé, ag t̄y ājag jykre tovānh k̄y, vēnh v̄i há hā nón m̄ jé.

²⁶ K̄y ag kr̄i há n̄t̄inh m̄. Japo t̄u v̄y t̄y ag n̄t̄i ja n̄gt̄i, ti t̄y ag se jan k̄y, ag t̄y ti r̄ānr̄āj han jé. Ag t̄y ti tovānh k̄y Topē tóg ag krenkren han ke m̄. K̄y tóg ag t̄y Japo jykre tag to vēnh nenh to ag tar han ke m̄, ěg ke gé. K̄y tóg há t̄i.

3

Kurā t̄y ěgno to hā vēnh jykre

¹ Tag to jykren, ha mē. Ga t̄y t̄u' henh ke to hā ěg tóg nén ũ jagy ve k̄ān ke m̄. Vēnh kar t̄y vēnh jykre p̄āno han m̄ ve jé ěg tóg ke m̄.

² Ājag jykre hā han sór jé ag tóg ke m̄. Nén ũ kar to én jé ag tóg ke m̄, ag rico n̄t̄i jé. “T̄y ĩnh ũn mág nī, tag han ĩnh t̄i, tag han ĩnh t̄i,” he jé ag tóg ke m̄. Jagnē to v̄i kónān jé ag tóg ke m̄. Ājag panh v̄i ki hā han ke t̄u ag tóg nī. “Kórég ti nī,” he jé ag tóg ke m̄, ũ t̄y ag m̄y nén ũ há n̄m m̄ ra. Topē to ag é henh ke m̄ gé.

³ Jagnē to jykre kórég ag nýtīnh mū, ājag krē to ke gé. Jagnē mý vēnh pāte fón ke tū ag nī gé. Jagnē to ag un'ón ke mū. Vēso jykren ke tū ag tóg nī. Ag tỹ ũ vóg kónān kỹ tóg ag mý sér tīnh mū. Vēnh jykre há kato tē jé ag tóg ke mū.

⁴ Ājag régre ag vatānh tá ag tóg ag to ví kónān ke mū gé. Ũ tỹ ājag jykre kórég to ag vóg kónān ke tag kamēg vānh ag nýtī. Vēso ag tóg: “vēnh kar kāfór vỹ tỹ inh nī,” henh ke mū gé. Ag tỹ Topē to há nýtīnh ke vē vē, hā ra ag tóg ājag tỹ nēn to én mū ēn hā han sór ke mū.

⁵ Ōn kỹ ag tóg Topē to há nī ve nýtīnh mū, hā ra ag tóg ti jykre han sór ke tū nī, ti tỹ ēg tar han tī tag vỹ ag mý há tū nīnh mū. Ũ tỹ ge ag tovānh nī, vỹ.

⁶ Ag kāmī ũ ag vỹ ĩn kar mī mūnh mū, kỹ ag tóg ũn týtá jykre tū fag mré vēmén sór ke mū, ũ tỹ Topē ví mranh tī fag, ũn én sór (ka)mē fag. Ēn fag mý ag tóg vīnh mū, fag tỹ ag ví ki han jé.

⁷ Ōn kỹ fag tóg vēnh kanhrān to tar nýtīnh mū, hā ra fag tóg vēnh ví há ki kagtīg nýtī, hā kỹ fag tóg ag ví ki han mū, ũ tỹ fag mý ón mū ag vīn ki.

⁸ Ũ tỹ fag mré vēmén mū ēn ag vỹ Topē ví kato tē nýtī, vēnh ví há ēn kato. Vāsỹ Janes vỹ Moisés ví kato tē ja nīgtī, Jambres ti ke gé. Ag ri ke ag nýtī, Topē ví kato tē ag tóg tī, ũ tỹ fag nón mū ēn ag. Vēnh jykre pāno han (ka)mē ag tóg nýtī, krī tū ag nýtī. Ōn kỹ ag tóg Jesus ki ge nýtī ve nī, ag tỹ ón kỹ ti ví tón kỹ.

⁹ Hā ra ũn e vỹ ag ví kri fīnh ke tū nī, ha vemnī. Vēnh kar vỹ ag krī tū tag venh ke mū, ha vemnī. Janes mré Jambres ri ke han jé ag tóg ke mū. Vēnh kar vỹ ag krī tū ki kanhró ja nýtīgtī gé, Janes mré Jambres ti.

Ēg tỹ Topē to tar nýtīn kỹ ēg nén jagy vēnh ke mū

¹⁰ Ag jāvo ā tóg inh ví kri fi há han tī, Timóteo'. Isỹ nén han mū ēn ri ke han ā tóg tī gé. Isỹ nén ve sór mū ēn ve sór ā tóg tī gé. Isỹ Jesus ki rā ri ke han ā tóg tī gé. Isỹ komēr hā ví ri ke han ā tóg tī gé. Isỹ vēnh kar to há nī ri ke han ā tóg tī gé.

¹¹ Ag tỹ inh vóg kónān ve ja ā nī gé, isỹ nén ũ jagy vég tī Ēn ti. Inh vóg kónān tỹ hēn ri ke han ja ag tóg, Antioquia tá, Icônia tá, Listra tá ke gé. Ter kren pē han inh, tá. Hā ra ēg Senhor tóg inh jy nīgān.

¹² Ha vē, ēg tỹ Jesus Cristo jykre mī mūn kỹ ēg kar tóg ag tỹ ēg vóg kónān venh mū.

¹³ Ēg jāvo ũn jykre pāno ag vỹ komēr hā vēnh jykre pāno han kán kỹ nýtī, ũn un'ón mū ag ke gé. Ũ ag lograr ke ag tóg tī, hā ra ag tóg ag lograr ke tī gé, vēnh kato.

¹⁴ Ag jāvo isỹ ā mý nén tó ja ēn mī tīg nī, ā tỹ nén mē ja kar ēn mī, ā tỹ ki rā kỹ jē ēn mī. Isỹ ā kanhrān ja ēn to tar nūmī. Inh jykre ki kanhró ā tóg nī.

¹⁵ Ā sī kā ā tóg Topē ví mē, ā kónēg kā. Ēn kā ā tóg Topē ví tỹ rán kỹ nī ēn mē. Topē ví tỹ rán kỹ nī ēn to jān kỹ ā tóg ki kanhrān mū, ēg tỹ Jesus Cristo ki rā tugnīn krenkren ke mū ti.

¹⁶ Ũ tỹ hēn ri ke ag vỹ Topē ví ránrán ja nīgtī. Hā ra Topē kuprīg tóg ag mý tó ja nīgtī, ag tỹ nén rán ke ti, hā kỹ ag tóg ránrán. Ti ví rán kỹ nī to ken kỹ ēg tóg vēnh ví há ki kanhrān mū, kỹ ēg tóg kāmēn há han ke mū gé. Ēg mý tóg ēg tỹ kygnē ja ēn ven tī, kỹ ēg tóg jagnē mý ven tī gé. Tỹ Topē tóg ēg jyvēn mū gé, ti ví rán kỹ nī ki, kỹ ēg tóg jagnē jyvēn ke mū gé. Kỹ ēg tóg vēnh jykre kuryj ki kanhrān tī gé, ti ví rán kỹ nī ki, ēg tỹ jagnē mý tó jé.

¹⁷ Topě tũ vỹ tỹ ěg nýtĩ. Ti pi(jé) ěg tỹ věnh kygně ve sór mũ'. ěg tỹ kygněg tũ nýtĩn kỹ ěg tóg nén ũ kar há han to tar nýtĩ. Ti tỹ tag ve sór vē, hã jé tóg ěg mỹ ã vỹ jěně ja nĩgtĩ.

4

¹ Inh kósin', sỹ ã jyvěň ke vē, ha mẽ, kỹ Topě vỹ mẽňh mũ, Jesus Cristo ti ke gé, ũ tỹ věňh kar jykre tugnỹm ke mũ ěn ti, ũn rĩnrĩr nýtĩ ag jykre, ũn kãgter nýtĩ ag jykre ke gé. Vỹn ke mãn jé tóg ke mũ, ha vemnĩ, kỹ tóg tỹ pã'i mág jěňh mũ, ha vemnĩ. ěg Senhor rĩnve sóg ã mỹ:

² "Topě vỹ kãmén ra," henh mũ. Kejěň ag tóg mẽ sór ti, kejěň ag tóg mẽ sór tũ nĩgtĩ. Ge ra ag mỹ kãmén nĩ. Ag jyvěň nĩ, ag mỹ ag tỹ věňh kygně ja ěn tómnĩ, ag jyvěň tar han nĩ, ag tỹ mẽ jãvãnh kỹ. Ag jyvěň to króňh ke tũg nĩ, ag tỹ kejěň Jesus ki rã sór jé. Topě vỹ tó há han nĩ.

³ Kurã tỹ ěgno to hã ag tóg jěmě sór ke tũ pě nĩnh mũ, věňh vỹ há ti, ha vemnĩ. Kỹ ag tóg věňh vỹ kórég nóň mũ sór mũ, ag tỹ nén to én mũ ěn ti. ũ tỹ óň kỹ ag mỹ tóňh ke mũ ěn vỹ veme sér tóňh ke mũ, kỹ tóg ag mỹ sér tĩnh mũ.

⁴ Věňh vỹ há jěměňh ke tũ ag nĩ, hã kỹ ag tóg věňh ó jěměňh ke mũ sir.

⁵ Ag jãvo nén ũ kar to jykren há han nĩ. Ā tỹ nén ũ jagy ve kỹ kato tar nĩmnĩ. Cristo to veme sér ěn kãmén nĩ, věňh kar mỹ. Ā rãnrãj ki rĩr há han nĩ gé.

⁶ Ag hỹn kãnhmar isén ke mũ, Jesus Cristo tũgrĩn. Hã ra tóg inh mỹ tỹ nén ũ tũ nĩ. Jesus tũgnĩn ke vē, iser ke ti, hã kỹ tóg inh mỹ tỹ nén ũ tũ nĩ.

⁷ Kejěň ěg tóg rárã tí, kỹ ěg tóg vãsãñ tí. ěg tỹ rárã to vãsãñ ri ke han inh, Topě rãnrãj han kỹ. ěg tỹ carreira han kỹ ěg tóg vãsãñ tãvĩ han tí gé, ěg tỹ ganhar he jé. Věňhvó tãvĩ han ěg tóg tĩgtĩ. Tag ri ke han inh, isỹ Topě rãnrãj han kỹ. Ti rãnrãj han kãñ inh huri. Ti ki rã tovãňh ja tũ inh nĩgtĩ.

⁸ ũ tỹ carreira ki ganhar he mũ ěn vỹ ka fėj tỹ coroa ganhar he tí. ěn ri ke nĩm jé tóg ke mũ inh mỹ, Topě ti, inh jykre kuryj to. Nĩm han kỹ tóg nĩ nĩ, Topě tỹ inh mỹ nén nĩm ke mũ ti, ag tỹ coroa vég mũ ěn ri ke ti. Kurã ěn kã tóg inh mỹ nĩm ke mũ, ěg Senhor ti. Věňh kar mỹ ti nĩm ke mũ gé, ũ tỹ ti kãtĩg jãvãnh kỹ nýtĩ ag kar mỹ.

Paulo tỹ nén ve ja

⁹ Kuri inh venh kãtĩg.

¹⁰ Demas vỹ isovãňh kỹ vyr. ěprã věňh jykre han sór ti nĩ, hã kỹ tóg isovãňh kỹ Tessalónica ra vyr. Crescente vỹ Galácia ra vyr, kỹ Tito vỹ Dalmácia ra vyr.

¹¹ Lucas vỹ inhhã inh mré nĩ nĩ. Marcos pére kãtĩg, ti tỹ inh rãnrãj han jé. Tag to tóg tar nĩ.

¹² Tíquico jěně inh, ti tỹ ěfeso ra tĩg jé.

¹³ Kỹ, ã kãtĩg kỹ inh mỹ inh capa ma kãtĩg. Tróade tá ti nĩ, Carpo ĩn krěm. Kỹ inh mỹ inh livro gé kãtĩg gé, livro grĩngĩn kỹ nýtĩ ěn mré hã, nén ũ fãr ki rãñ kỹ nýtĩ ěn mré. Isỹ livro ěn venh há pě tóg tũ.

¹⁴ Alexandre, ũ tỹ ferro tỹ nén ũ kar han tí ěn vỹ iso kórég tãvĩ nĩ. ěg Senhor vỹ ti jykre kórég to ti vóg kónãñ ke mũ.

¹⁵ Ti kaměg ra. Inh vỹ kato tẽ mág han tóg.

¹⁶ Fóg tỹ pã'i vỹ inh ki inh jykre jěmě pin huri. ěn kã ũ tóg inh mré ve ja tũ nĩ. Isovãňh kãñ ag tóg. Topě mỹ sóg to vỹ tí, ti tỹ ag mỹ věňh pãte fón jé.

¹⁷ Ag jāvo ẽg Senhor vỹ isar han, ti tỹ inh mré tag kã jẽ nĩn kỹ. Hã kỹ vẽn kar vỹ ti vỹ mẽ huri, isỹ ag mỹ kãmén kỹ. Povo kar ag vỹ hur mẽ kãn. Kỹ ẽg Senhor tóg inh jy nĩgãn, ag tỹ mĩg mỹ inh fón tũ nĩ jé.

¹⁸ Inh jy nĩgãn mãn jé tóg ke mũ gé, Nén-Kóreg tỹ isỹ hẽ ri ke tũ nĩ jé. Inh ki tóg rĩr há han ke mũ, sỹ kanhkã ra tũg há han jé, ti nĩgja ra. Ti hã mỹ ẽg vỹ há han ke mũ'. Kỹ tóg tũg' henh ke tũ nĩ, ẽg tỹ ti mỹ vỹ há han ke ti. Amém.

¹⁹ Priscila fi mré fi mén tỹ Áquila mĩ sóg ẽkrég tĩ, Onesíforo mré ke fag mĩ ke gé.

²⁰ Erasto vỹ Corinto tá nĩ nĩ. Jāvo Trófimo tóg Mileto tá kaga nỹ ja nĩ, isỹ tá kãtĩ mũn kã.

²¹ Kur kãtĩg mẽ han, prỹg tỹ kusa tá krỹg tũ ki. Êubulo vỹ ã mĩ ẽkrég tĩ, Prudente ti ke gé, Lino ti ke gé, Cláudia fi ke gé, ẽg régre kar ag mré hã. Ẽn ag vỹ ã mỹ abraços jẽnẽg tĩ.

²² Ẽg Senhor mỹ sóg to vỹ tĩ, ti tỹ ã tar han jé, ti tỹ ãjag kar tar han jé gé. Hã vẽ.

PAULO TÛ CARTA HAN: TITO MÛ CARTA

¹ Paulo tÛ rá vë. Sÿ Tito mÛ rán hã vë. Topë mÛ sóg rãnrhãj tÿgtĩ, kÿ Jesus Cristo vÿ inh fëg, sÿ tÿ ti apóstolo jë jé. Topë tóg èprã ke ù ag kuprëg, ag tÿ ti ki ge jé. Kÿ tóg inh mÛ: “ha isÿ ùn kuprëg ja ag mÛ tónh tÿg,” he ja nĩ. “Ag mÛ inh vĩ ti kãmén nĩ, sÿ ki hã tó mÛ ên ti, ag tÿ ã vĩ jëmë kÿ inh ki ge há han jé,” he ja tóg nĩ.

² Topë vÿ èg mÛ: “rĩr krÿg ja tũ ve jé ãjag tóg ke mÛ,” he ja nĩ. Hã ve sór èg tóg mÛ. Topë tÿ nén tón hã vë, vãsÿ, hã ra tóg ón tũ nÿgtĩ.

³ Vãhã tóg èg mÛ ã vĩ tag jënë ja nĩ, ti tÿ èg mÛ jënënh ke kurã ki. Jesus tÿ tóg èg mÛ jënë ja nĩ. Hã to Topë tóg inh mÛ: “ha vënh kar mÛ tónh tÿg,” he ja nĩ, èg kren han tí ên ti.

⁴ Hã kÿ sóg ã mÛ tó mÛ, Tito'. Inh kósín pë vÿ tÿ ã nĩ, ã tÿ inh mré Jesus ki rá kÿ jën kÿ. Èg jóg tÿ Topë mÛ sóg to vĩ tí, ti tÿ ã tar han jé, ã krĩ kuprã nĩ jé ke gé. Èg kren han tí tÿ Jesus Cristo mÛ sóg tag to vĩ tí gé.

Tito tÿ Creta ki ke ag ki rĩr

⁵ ã sóg: “ha ver gog vãso tÿ Creta tá jë,” he ja nÿgtĩ, ã tÿ tá isÿ nén han kãn ja tũ ên han kãn jé. Hã kÿ sóg ã mÛ: “cidade kar ki igreja to pã'i vin,” he ja nĩ. ã tÿ ù kuprëg kÿ, ti tÿ tÿ pã'i jë jé, kÿ tag to jykrén nĩ, ha më.

⁶ Ûn kãme kórég tũ jãvãnh jé ã tóg ke mÛ, ùn prũ pir han kÿ nĩ ti. Ti krë tÿ Jesus ki rá kÿ tóg há tĩnh mÛ, ag tÿ nén ù vënhmÿ han tũ nĩn kÿ, ãjag panh vĩ jëmën kÿ.

⁷ Ha vé, ù tÿ tÿ igreja to pã'i jë sór kÿ tóg tÿ ùn jykre há jënh mÛ, ù tÿ Topë tũ ki rĩr há han mũnh ke mÛ ti. Ti tÿ ã mré ke ag to: “ag kãfór vÿ tÿ inh nĩ,” henh ke tũ vë. Ûn fe tÿ gÿm ke (ka)më vÿ há tũ nĩ, ù tÿ vinho kron (ka)më ti, ùn jũ (ka)më ti. Kÿ tóg ã tÿ rico kenh ke hã to ên ke tũ nĩ gé.

⁸ Ti tÿ ù tÿ kuvar há tá kãmũ ag mÛ: “inh mré jë,” henh kÿ tóg há tí, ti tÿ vënh jykre há to há nĩn kÿ, ti tÿ vëso jykrén kÿ, vënh jykre kuryj han kÿ, Topë vĩ hã ki króm kÿ, ti tÿ vënh kanhrãnh kÿ tÿg kÿ.

⁹ Topë vĩ më ja tóg nĩ. Kÿ ti tÿ tag kã jatu tũ nĩn kÿ tóg há tí gé. Kÿ tóg ù tÿ ã vĩ mÿg mÛ ag kanhrãnh há han ke mÛ gé, ag jyvën há han jé tóg ke mÛ gé. Û tÿ ti vĩ kafãnh mÛ mÛ tóg tó há han ke mÛ gé, ti tÿ kã jatu tũ nĩn kÿ.

¹⁰ Ha vé, ù tÿ hën ri ke ag tóg mÛ jãvãnh nÿtĩ. Véké ag tóg ón kÿ vëmén tí. Ag tÿ ù lograr he sór vë. Judeu ag vÿ tag to tar nÿtĩ, ha më.

¹¹ Èg tÿ ag vĩ tÿ tÿg' henh ke vë. Ha vé, ù fag ne ag vĩ kri fi sór mÛ', kÿ fag tóg Topë vĩ tovãnh sór mÛ, fag mén mré hã, fag krë mré hã. Un'ón ag tóg tũ, ù tÿ fag kanhrãnh sór mÛ ag. Hã ra ag tóg hã to nén ù ve sór mÛ, jãnkamy tí, ag tÿ rico nÿtĩ jé.

¹² Ag kãmĩ ù vÿ ki hã tó ja nĩ, ag jyvën tí ù, ti tÿ ag kato tẽ kÿ tag tón kÿ, ha më: “Creta tá ke ag vÿ tÿ ùn ón mé nÿtĩ,” he ja tóg nÿgtĩ. “Mĩg jũ ri ke ag nÿtĩ. Rãnrhãj vãnh ag nÿtĩ, hã ra ag tóg jën mág tãvĩ han sór tí,” he ja tóg nÿgtĩ.

¹³ Hã ra tóg ge nĩ. Hã kÿ ag jyvën tar han nĩ, ag tÿ Topë ki rá to tar nÿtĩ jé.

¹⁴ Ag mÛ: “Judeu ag tÿ vënh ó tó mÛ jëmë sór tÿg nĩ,” hemnĩ. Kÿ ag tóg ag mÛ èprã ke jykre tó sór mÛ gé, ù tÿ Topë vĩ há më vãnh ag. Èg mré ke ag mÛ ké, ag tÿ ù tÿ ge vĩ jëmë tÿg jé.

¹⁵ Ha vé, ũ tŷ vĕnh jykre kuryj han mũ mŷ tóg kuryj kar tĩ, jăvo ũ tŷ vĕnh jykre păno han mũ mŷ tóg păno kar tĩ gé, ũ tŷ ti ki ge tũ ag mŷ. Ag krĩ vŷ kórég nĩ, kŷ ag tóg âjag jykre păno to: “há ti nŷ,” he tĩ, jăvo ag tóg vĕnh jykre há to: “kórég ti nŷ,” he tĩ gé.

¹⁶ “Topĕ ki kanhró ěg tóg nĩ,” he ag tóg tĩ, ón kŷ. Hă ra ag tóg ti jykre han vănh nŷtĩ. Ag tŷ ti jykre han vănh ki ěg tóg vég tĩ, ag ón mũ ti. Ũ tŷ ge to ti kórég nĩ, Topĕ ti, ag tŷ ti vĩ ki króm sór tũ pĕ nŷtĩn kŷ. Nén ũ há han ki kagtĩg ag nŷtĩ.

2

Vĕnh kar jyvĕn há han nĩ

¹ Ag jăvo Topĕ vĩ kămén há han nĩ, ģ tŷ ag jyvĕn kŷ, Tito'.

² Kófa ag mŷ: “nén ũ há hă to jykren nĩ,” hemnĩ. “Goj fa kron sór tũg nĩ. Nén há kar hă han sórmnĩ. Vĕso jykren nĩ. Ti ki ră há han kŷ nŷtĩmnĩ. Jagnĕ to há nŷtĩmnĩ. Ti tovănh sór tũg nĩ,” hemnĩ, kófa ag mŷ.

³ Kŷ kófa fag jyvĕn nĩ gé. “Vĕso jykren nĩ,” hemnĩ fag mŷ. “Ũ to vĩ kónăn tũg nĩ. Vinho to én sór tũg nĩ. Vĕnh jykre há hă han nĩ, vĕnh kar tŷ ve jé.

⁴ Kŷ âjag tóg tátăg fag kanhrăn há han ke mũ,” hemnĩ fag mŷ. “Fag kanhrăn nĩ, fag tŷ âjag mén to há nŷtĩ jé, fag krĕ to,

⁵ fag tŷ vĕso jykren jé, nén ũ vĕnhmŷ han sór tũg jé, fag tŷ âjag ĩn ki rĩr há han jé, vĕnh kar mŷ vĩ há han jé, fag tŷ âjag mén vĩ mranh sór tũg jé, hemnĩ, tátăg fag mŷ,” hemnĩ, kófa fag mŷ. Fag tŷ tag han kŷ ũ tóg Topĕ vĩ to é henh ke tũ nĩ, fag tũgrĩn.

⁶ Kyrũ ag jyvĕn nĩ gé. Ag mŷ: “nén ũ kar to jykren há han nĩ, âjag tŷ ěg tŷ nén to ěn ěn han tũ nĩ jé,” hemnĩ.

⁷ Tag han nĩ gé, Tito', vĕnh kar tŷ ģ jykre há tag ve kŷ ģ kóm vĕnh jykre há han sór jé gé. Ą tŷ ag kanhrăn kŷ ki hă tómnĩ. Kanhir kŷ vĩ tũg nĩ.

⁸ Topĕ vĩ tó há han nĩ, ũ tŷ ģ to: “kygnĕ ti huri,” he tũ nĩ jé. Kŷ ũ tŷ ěg kato tĕ mũ ag vŷ nén ũ tónh ke tũ nĩ. Kŷ tóg ag mŷ'a tĩnh mũ, ag tŷ ón kŷ ěg kato vĩ ja nĩn kŷ.

⁹ Ũ mŷ rănhrăj tĩ ag jyvĕn nĩ gé. Ag mŷ: “âjag patrăo vĩ han nĩ,” hemnĩ. “Ti mŷ há ěn han nĩ, ti tŷ âjag mŷ vĩ há han jé. Ti vĩ kafăn tũg nĩ.

¹⁰ Ti tũ péju(g) tũg nĩ. Ti tũ ki rĩr há han nĩ, ti tŷ ģ to vĩ kónăn tũ nĩ jé. Ą tŷ ti tũ ki rĩr há han kŷ tóg Topĕ vĩ to vĩ há han ke mũ, ěg kren han tĩ ěn vĩ to, ģ patrăo ti, ti tŷ Topĕ vĩ mĕ kŷ,” hemnĩ, ũ mŷ rănhrăj tĩ ag mŷ.

¹¹ Topĕ tóg ěg jagăgtăn sór mũ, ěpră ke kar ag, kŷ tóg ěg kren han sór mũ. Hă jé Jesus tóg kătĩg ja nĩ.

¹² Kŷ tóg ěg kanhrăn sór mũ gé, ěg tŷ ti kato tĕ tũ nĩ jé, ěg tŷ nén ũ to én sór tĩ ěn han tũ nĩ jé gé, ěg tŷ ga kri mũn kŷ. ěg kanhrăn sór tóg mũ, ěg tŷ vĕso jykren jé, vĕnh jykre kuryj han jé, Topĕ jykre tĩ.

¹³ Ti kătĩg ve sór ěg nŷtĩ, hă kŷ tóg ěg mŷ sér tĩ. Tŷ ti pă'i mág tăvĩ nĩ, Topĕ ti. Tar tăvĩ ti nĩ, ěg kren han tŷ Jesus Cristo ti ke gé. Ti ve jé ěg tóg ke mũ, kŷ tóg sĭnvĩ tĩnh mũ, sér pĕ. Hă kŷ tóg há tĩ, ěg tŷ tag ki mũ há han kŷ.

¹⁴ ěg jagfy tóg ter ja nĩ, ti tŷ ěg jykre kórég ěn kókén jé. Kŷ tóg ěg kykũg mũ, ěg jănhkri nŷtĩ jé. Kŷ ěg tóg tŷ ti tũ nŷtĩnh mũ sir, vyr mŷ. ěg pí(jé) tŷ ũ tũ nŷtĩ há'. Ti tũ vŷ tŷ ěg nŷtĩ, ěg tŷ vĕnh jykre há to tar nŷtĩ jé.

¹⁵ Tag kar tómnĩ, Tito'. Tŷ ag jyvĕn tar han nĩ gé kejĕn. Ą tũ vĕ mŷr, ģ tŷ ag jyvĕn ke ti, kŷ ũ jé ģ to é he tũg.

3

Topě jykre

¹ Ag mý: “governo vī jēmēmni, ěg pā'i vī ti,” hemni. “Ag vī ki króm ni. Ag tŷ nén ũ há to: han ni, hen kŷ han sórmni, vēsŷmér,” hemni.

² “Ŭ to vī kónān tŷg ni,” hemni ag mý. “Ŭ vī kafān tŷg ni. Vēnh kar mŷ vī há han ni. Vēnh kar mŷ komēr hā vīmni,” hemni ag mý.

³ Ha vé, vāsŷ ěg tóg kórég nŷti ja nŷgti gé. Ki kagtŷg nŷti ja ěg nŷgti. Ti vī mranh ja ěg tóg nŷgti gé. Vāgfor mŷ ja ěg tóg nŷgti, kŷ ěg tóg ũ tŷ ón kŷ ěg mŷ vēnh jykre tó mŷ ěn vī han ja nŷgti gé. ěg tŷ nén to ěn mŷ ěn han kān ja ěg tóg nŷgti, nén ũ vēnhmŷ kar ěn ti. Vēnh jykre pāno han ja ěg tóg nŷgti. Jagně tŷ to ěn ja ěg tóg nŷgti. ěg jykre kórég tag vŷ vēnh kar mŷ kórég ni ja nŷgti. Jagně to jŷgŷ (ka)mě (pě) ja ěg tóg nŷgti.

⁴ Vāhā ěg tóg ki kanhró nŷti, Topě tŷ ěg jagāgtān kŷ, ěg kren han ti ti. Ti tŷ ěg to há ni mě ěg tóg vāhā.

⁵ ěg pi(jé) vēnh jykre kuryj han ja nŷgti'. Hā ra tóg ge ra ěg jagāgtān ja nŷgti, hā kŷ tóg ěg kren han mŷ sir. ěg han mān ja tóg ni, ěg kygpe kŷ nŷtŷn kŷ. Ā kuprŷg tŷ tóg ěg han mān, kŷ ěg tág nŷti ha.

⁶ ěg mŷ tóg ā kuprŷg jēně, ti tŷ tŷ ěg jagrě ni jé. Jesus Cristo hā tŷgrŷn tóg ti jēně, ěg kren han ti ěn hā tŷgrŷn.

⁷ Hā kŷ tóg ěg mŷ vēnh pāte fón mŷ sir. Ti tŷ ěg jagāgtān hā vē. Kŷ tóg ěg mŷ ā tŷ tovānh sór mŷ. Hā tó ja ti ni. Rŷr krŷg ja tŷ ve jé ěg tóg ke mŷ. ěg tŷ tag ve jé tóg ěg mŷ ā kuprŷg jēně.

⁸ Tag vŷ ki hā ke ni. Hā kŷ vēnh kar mŷ tómnŷ, ag jyvěn to krónh ke tŷg ni. Ŭ tŷ Topě ki ge mŷ ag jyvěn há han ni, ag tŷ vēnh jykre há hā han sór jé. Kŷ ag tóg tag hā to vāsān ke mŷ. Tag vŷ há ni. Kŷ tóg ěg mŷ nén ũ há han ke mŷ gé, vēnh jykre há ti.

⁹ Judeu ũ ag tóg véké ón kŷ vēmén sór ti. Tag jēmě sór tŷg ni. Ājag gufā ag jiji tó sór ag tóg ti. Jagně vī kafān ag tóg ti. Kŷ ag tóg Topě tŷ vāsŷ ěg jyvěn ti ěn to jagně vī kafān mŷ gé. Tag kar vŷ ěg mŷ nén ũ há han ke tŷ ni. Nén ũ tŷ vē, tag ti, hā kŷ jēmě sór tŷg ni.

¹⁰ Ŭ tŷ vŷrmŷ vēnh jykre han sór kŷ ti mŷ: “ke tŷg ra,” hemni. “Ke tŷg ra,” he régre han ni, ti tŷ kānhmar ā vī jēměg tŷ nŷn kŷ. Tag pāte ti tovānh ni, ti tŷ mě jāvānh nŷn kŷ.

¹¹ Ti jykre vŷ pāno tāvŷ ni. Topě vī mranh ti ti. Topě vŷ ũ tŷ ge to: “kórég ti ni,” he ti.

Tito tŷ ne han ke ti

¹² Kejēn sóg ā mŷ Ártemas jēně sór mŷ, ke tŷ ni kŷ Tíquico ti. Ti tŷ ā tá jun kŷ, vēsŷmér inh kukām kātŷg, cidade tŷ Nicópolis ra. Tá sóg kusa fin rām ke mŷ.

¹³ Zenas ki rŷr há han ni gé, lei to estudo han ti ěn ti, kar kŷ Apolo ti ke gé. Kŷ, ag tŷ mŷ mān ken kŷ ag mŷ vin ni, jānkamy tŷ ag mŷ tŷg ke mŷ ěn ti.

¹⁴ Kŷ, ěg mré ke kar ag jyvěn há han ni, ag tŷ vēnh rānhraj há to tar nŷti jé. Kŷ ag tóg ũn jagtar ag mŷ vin ke mŷ gé, ājag tŷ nén ũ vēnh kāpām kŷ. Tag ne há nŷnh mŷ'. ěg tŷ Topě jykre han to ken hā vē, kŷ tóg ěg tŷ Topě mŷ nén ũ kaně han ri ke ni sir.

¹⁵ Inh mré nŷti kar ag vŷ ā mŷ ěkrég ti. Kŷ ěg mré Jesus ki ge mŷ kar ag mŷ: “ājag mŷ ti ěkrég ti, Paulo ti,” hemni, ěg to há nŷti kar ag mŷ.

Topě mŷ sóg to vī ti, ti tŷ ājag kar tar han jé.

Hã vễ.

PAULO TỠ CARTA HAN: FILEMOM MỠ CARTA

¹ Paulo tỡ rá vễ, inh, isỷ se kỡ jẻ ra rá vễ. Kỡ ẻg rẻgre tỡ Timóteo vỡ inh mớ rỏn mủ gẻ. Isỷ Filemom mỡ rỏn hỏ vễ. ỏ to hỏ tỏvỡ sỏg nỡ, Filemom'. Inh mớ rỏ ỏ tỏg Cristo rỏnhrỏj han tỡ gẻ.

² Kỡ sỏg ẻg rẻgre tỡ ỏfia fi mỡ rỏn mủ gẻ, Arquipo mỡ ke gẻ, inh mớ rỏn Cristo rỏnhrỏj to vỏsỏn tỡ tag ti, kar kỡ sỏg ử tỡ Filemom ỉn krẻm vẻnh mỏn tỡ ag mỡ rỏn mủ gẻ, ử tỡ Topẻ vỡ mẻ jẻ vẻnh mỏn tỡ ag mỡ.

³ ẻg jỏg tỡ Topẻ mỡ sỏg to vỡ ti, ti tỡ ỏjag tar han jẻ, ti tỡ ỏjag krỡ kuprỏg jẻ, ẻg Senhor tỡ Jesus Cristo panh ẻn ti.

Filemom jykre

⁴ Isỷ Topẻ mớ vẻmẻn kỡ sỏg ỏ mỡ ẻkrẻg tỡ, Filemom', kỡ sỏg ỏ to Topẻ mỡ vỡ hỏ han tỡ.

⁵ ẻg Senhor tỡ Jesus ki rỏ hỏ han kỡ ỏ tỏg nẻji nỡ, hỏ kỡ ỏ tỏg nẻji Jesus ki ge kỡ nỷtỉ ag to hỏ tỏvỡ nỡ gẻ. Tag mẻ inh.

⁶ Hỏ kỡ sỏg Topẻ mỡ to vỡ ti, ti tỡ ỏ krỡn hỏ han jẻ, ỏ tỡ ti jykre hỏ mỡ tỡg ki kanhrỏ hỏ nỡ jẻ, ỏ tỡ ẻg mớ rỏn Cristo ki rỏ kỡ jẻn kỡ. Kỡ tỏg ỏ krỡ tỡ hỏ' hẻnh ke mủ, ỏ tỡ komẻ hỏ ti vỡ ki krỏm ki kanhrỏn kỏn jẻ. ẻg tỡ Cristo ki ge kỡ nỷtỉn kỡ ẻg tỏg vẻnh jykre sẻr to tar nỷtỉ.

⁷ Jỏvỷ', inh fe tỡ mớin ke ja ỏ nỡ, inh fe tỡ hỏ' he ja ỏ nỡ, ỏ tỡ iso hỏ tỏvỡ nỡn kỡ. Kỡ Topẻ ki ge kỡ nỷtỉ kar ag vỡ ỏ jykre ki kanhrỏ kar nỷtỉ. Kỡ ag fe tỏg mớin ke mủ gẻ.

Paulo tỡ Onésimo jagfy vỡ

⁸ Kỡ sỏg ỏ mỡ: “tag han jẻ ỏ tỏg ke mủ,” hẻnh ke mủ vễ,

⁹ Hỏ ra sỏg ỏ mỡ vỡ tar han sỏr tủ nỡ. Komẻ hỏ sỏg ỏ mỡ to vỡ sỏr mủ, ỏ tỡ iso hỏ nỡ tugrỏn tag han jẻ, sỷ ỏ mỡ nẻn to vỡ sỏr mủ tag ti. Ha vẻ, kỏfa inh nỡ ha, inh, hỏ vỡ: Paulo, he mủ. Jesus Cristo tugnỏn sỏg se kỡ jẻ ha.

¹⁰ ỏ mỡ sỏg inh kỏsin tỡ Onésimo jagfy vỡ sỏr mủ. Inh kỏsin ri ke ti nỡ ha, ti tỡ isugrỏn Cristo ki rỏ kỡ, isỷ tag kỏ se kỡ jẻ hỏ ra.

¹¹ Vỏsỷ tỏg ỏ tủ ki rỡr tỡ vẻ, hỏ ra tỏg ỏ mỡ nẻn ử hỏ han ja tủ nỷgtỉ. ửri tỏg hỏ nỡ ha, kỡ tỏg ỏ tủ ki rỡr hỏ han ke mủ ha, ti tỡ inh ki rỡr hỏ han mủ tag ri ke.

¹² Sỷ ỏ mỡ ti jẻnẻnh ke vẻ. Inh fe vỡ tỡ ti nỡ.

¹³ Hỏ kỡ sỏg ti jẻnẻsỏr ja tủ nỡ vẻ, ti tỡ ỏ jẻgja ki inh ki rỡr jẻ, isỷ Jesus kỏme sẻr tugrỏn se kỡ jẻn ki.

¹⁴ Hỏ ra sỏg ỏ mỡ ti jẻnẻnh ke mủ, isỷ ỏ mỡ: “mỡ hỏ, ti tỡ inh ki rỡr mủ tag ti?” he ja tủ nỡn kỡ. Isỷ ti tỡg kamẻg mủ ra tỏg ỏ tỡ inh ki rỡr mủ ri ke nỡ vẻ, hỏ ra ỏ tỏg ki kagtủg nỡ vẻ, ỏ tỡ inh mỡ nẻn ử hỏ han mủ tag ti. Hỏ kỡ sỏg ỏ mỡ ti jẻnẻnh ke mủ, ỏ tỡ ỏ tỡ nẻn han sỏr mủ ẻn han jẻ, vẻnh jykre hỏ ẻn ti.

¹⁵ ỏ camarada ja vẻ, Onésimo ti, hỏ ra tỏg ỏ tovỏnh kỡ vẻnh pẻju kỡ vừ. Vẻnh pẻju sỉ han tỏg, hỏ ra tỏg ỏ to vỷn ke mỏn ke mủ ha, isỷ ti jẻnẻn kỡ. Tỡg mỏn ke tủ ti nỡ ha.

¹⁶ Ti tỡ vẻnh pẻju kỡ tỡ mủ ẻn kỏ tỏg tỡ ỏ camarada jẻ vẻ, hỏ ra tỏg tỡ ỏ jỏvỷ jẻ ha, ửri. ỏ to hỏ tỏvỡ tỏg jẻ ha, ti tỡ Cristo ki rỏ kỡ jẻn kỡ. Ti to sỏg hỏ tỏvỡ nỡ gẻ, kỡ tỏg ỏ tỡ ti to hỏ nỡ jẻ hỏ tỡ gẻ. ỏ camarada vỡ tỡ ti nỡ, hỏ ra tỏg tỡ ỏ jỏvỷ nỡ gẻ, kỡ tỏg ỏ tỡ ti to hỏ pẻ nỡn kỡn hỏ tỡ.

¹⁷ Kŷ, ă tŷ iso há nŷn kŷ ti mŷ koměr hă vŷmŷnŷ, ă tŷ koměr hă inh mŷ vŷ ěn hă han nŷ, ti mŷ, ti tŷ inh jĕgja ki ă to jun kŷ.

¹⁸ Ti mŷ ă tŷ nĕn ŷ pĕju kŷ ma vyr'? Ti mŷ ă mŷ nĕv(e) jĕ'? Kajăm jĕ sóg ke mŷ, ti jagfy.

¹⁹ Vĕsóg ki sóg ă mŷ rán mŷ, inh, hă vŷ: Paulo, he mŷ. Kajăm jĕ sóg ke mŷ, ti nĕv(e) ti, ki hă sóg tó mŷ. Hă ra ă tóg inh mŷ nĕv(e) jĕ gé, ă tŷ isugrŷn Jesus ki ra kŷ.

²⁰ Ha vĕ, jăvy'. Inh fe tŷ mŷn kemnŷ, inh mŷ han nŷ, sŷ ă mŷ nĕn to vŷ mŷ tag ti, ěg tŷ jagnĕ mrĕ ěg Senhor ki ge kŷ nŷtŷn kŷ. Inh fe tŷ há' hemnŷ, ă tŷ tŷ inh mrĕ ke nŷn kŷ, ă tŷ inh mrĕ Cristo ki ră kŷ jĕn kŷ.

²¹ Isŷ ă mŷ nĕn to vŷ mŷ tag han já ă tóg ke mŷ, ki kanhró sóg nŷ. Hă kŷ sóg ă mŷ rán mŷ. Isŷ ă mŷ nĕn to vŷ mŷ tag kăfór han jĕ ă tóg ke mŷ gé, ki kanhró sóg nŷ.

²² Kŷ inh jo inh nŷr jafă ti kăn nŷ gé. Topĕ vŷ kănhmar ăjag vŷ mĕnh ke mŷ, hă kŷ sóg ăjag venh kătŷg ke mŷ, ha vemnŷ.

Ū tŷ Filemom tá ke ag mŷ ěkrĕg tŷ ag

²³ Epafŷas vŷ ăjag mŷ ěkrĕg tŷgtŷ. Inh mrĕ tóg se kŷ jĕ, Jesus Cristo tugrŷn.

²⁴ Marcos vŷ ăjag mŷ ěkrĕg tŷ gé, Aristarco ti ke gé, Demas ti ke gé, Lucas ti ke gé. Inh mrĕ ag tóg rănhŷrăj mŷgtŷ, tag ag.

²⁵ Ěg Senhor tŷ Jesus Cristo jĕ ăjag tar han kăn. Hă vĕ.

HEBREU AG MỸ CARTA

Topê kósin

¹ Topê vỹ vāsỹ ãg jóg'jóg ve ag mré vēmén (ka)mē ja nĩgtĩ. Ag mỹ tóg tó mǎn', tó mǎn', he ja nĩgtĩ. Tĩ vĩ tó tĩ ag mỹ tóg tó ja nĩgtĩ, vāsỹ, ag tỹ vėnh kar mỹ ti vĩ kǎmén jé.

² Ūri tóg kakó tĩ ha, kurā tỹ ěgno ti, kỹ tóg ūri ā kósin jėnė, ti tỹ ěg mỹ Topê vĩ tó jé. Tĩ mré tóg nén ũ kar hyn han ja nĩgtĩ, Topê ti, ā kósin mré. Kỹ tóg ti mỹ nén ũ kar tag vin ke mũ gé. Tĩ hǎ mỹ tóg vin sór mũ, Topê ti, ā tũ kar ěn ti.

³ Ęg tỹ Topê kósin ve kỹ ěg tóg Topê tỹ tỹ ũn mág nĩ ki kanhró nỹtĩ. Tĩ ri ke pė ti nĩ, ti hǎ pė, tỹ ti Topėn hǎ ve nĩ, ti kósin ti. Tĩ vĩ vỹ tar nĩ, tỹ tóg ěg tỹ nén kar vėg mũ tag ki rĩr tĩ, ā vĩ tỹ. Tĩ hǎ vỹ ěg tỹ Topê vĩ mranh ěn tỹ tũg' he tĩ, kỹ tóg ěg jǎnhkrig kỹ ěg fėg ke mũ. Ęg jagfy ter kar kỹ tóg Topê pėgja tá nĩ nĩ, ũn tỹ vėnh kar tar kǎfór nĩ ěn pėgja tá, ti kósin ti.

Topê kósin tỹ Topê tỹ jėgnė jafā ag kǎfór nĩ

⁴ Topê kósin vỹ Topê tỹ jėgnė jafā ag kǎfór nĩ, kanhkā tǎn ag. Tĩ jiji vỹ ag jygjy kǎfór nĩ gé. Hǎ kỹ ěg tóg vėg tĩ, ti tỹ ag kǎfór nĩ ti.

⁵ Topê pi(jé) ā tỹ jėnė jafā ag kǎ ũ mỹ: “inh kósin vỹ tỹ ā nĩ,” he ja nĩgtĩ. “Ūri hǎ sóg ā mỹ: tỹ inh ā panh nĩ, he mũ,” he ja tũ ti nĩ, Topê ti, ā tỹ jėgnė jafā ag kǎ ũ mỹ. Kỹ tóg ag kǎ ũ to: “tĩ panh vỹ tỹ inh nĩnh mũ, kỹ tóg tỹ inh kósin nĩnh mũ,” he ja tũ nĩ gé. Ā kósin hǎ to tóg tag tó ja nĩ, Topê ti.

⁶ Ā kósin ve ěn jėnė ja ti nĩ, ěg to, Topê ti. Ā tỹ ti jėnėn kỹ tóg tag tó gé, ha mē: “isỹ jėgnė jafā ag vỹ ti krēm mũg ke kǎn mũ, ha vemnĩ,” he ja ti nĩ, Topê ti.

⁷ Hǎ ra ti tỹ jėgnė jafā ag to vėnh jykre tag tóg rán kỹ nĩ, ha mē: “Topê vỹ ā tỹ jėgnė jafā ag tỹ kǎka ri ke han, kỹ tóg ag tỹ pĩ gru ri ke han mũ gé, Topê ti,” he tóg mũ gé, Topê vĩ rán ki, kanhkā tǎn ag to.

⁸ Kỹ tóg ā kósin mỹ tag tó, ha mē: “Topê vỹ tỹ ā nĩ. Ā tỹ tỹ pǎ'i mág nĩ vỹ tũg' henh ke tũ pė nĩ. Vėnh jykre kuryj han ā tĩ, ā krēm ke kar ag mỹ.

⁹ Vėnh jykre kuryj to ā há nĩ. Vėnh jykre pǎno to ā jũ nĩ. Hǎ kỹ sóg ā kuprėg, isỹ tỹ Topê nĩn kỹ, isỹ tỹ ā pǎ'i nĩn kỹ. Ā tỹ sóg ũn mág han, ā krēm ke kar ag kǎfór ā tóg nĩ. Ā tỹ tỹ pǎ'i mág nĩ tugrĩn ā fe tóg mrin kenh ke mũ, vėnh kar fe tỹ mrin ke kǎfór,” he ja tóg nĩ gé, Topê ti, ā kósin ti mỹ.

¹⁰ Kỹ tóg ti mỹ tag tó gé, ha mē: “ěg tỹ nén (ũ) kar han ve ki ā tóg ga han, kanhkā ti ke gé, ā nĩgė tỹ.

¹¹ Tũg' he kǎn jé tóg ke mũ, ā tỹ nén han ja tag ti, jǎvo ā hǎ tóg tũg' henh ke tũ pė nĩ. Ā tỹ nén han ja tóg ā sinsin kỹ kugnǎnh ke mũ, kur ri ke.

¹² Tĩ kǎnhpėn jé ā tóg (ke) mũ, ěg tỹ kur kónhpėn ri ke. Ęg kur kunũg ěg tĩ, ěg tỹ ũ kǎra rǎg jé. Tag ri ke han jé ā tóg ke mũ, ā tỹ han ja kar tag ti tỹ, ā tỹn kókėn kỹ. Hǎ ra ā hǎ tóg tũg' henh ke tũ nĩ. Sin ke tũ pė ā tóg nĩ jǎvo, kófǎn ke tũ pė a tóg nĩ jǎvo,” he ja tóg nĩ, Topê ti, ā kósin ti mỹ.

¹³ Hǎ ra Topê pi(jé) ā tỹ jėgnė jafā ag mỹ: “inh pėgja tá nĩ,” he ja nĩ. “Nĩ ra ver, inh pėgja tá, sỹ ā kato vĩ mũ ag tỹ ā krēm vin jé, kỹ ag se vė sir,” he ja tũ ti nĩ, ti tỹ jėgnė jafā ag mỹ. Ā kósin hǎ mỹ tóg tag tó.

¹⁴ Topě tỳ jěgně jafā ag vỹ věnh kuprīg ri ke nýtī, hā ra ag tóg Topě rānhrāj ti han tī. Topě vỹ ag jěgněg tí, ag tỳ ti tũ ag jy nīgān jé, ũn krenkren ke mũ ěn ag jy.

2

Ěg tỳ Topě vỹ to é henk ke tũ

¹ Hā kýt tóg há tí, ěg tỳ ti vỹ mẽ kýt ti jykre hā han kýt, ěg tỳ tỳ prānh ke tũ nĩ jé.

² Topě tỳ jěgně jafā ag vỹ vāsỹ Topě vỹ ma kāmũ ja nĩgtī. Hā ra ag tóg ki hā tó ja nĩgtī. Ũ tỳ ag vỹ ki krov tũ ěn vóg kónān ja ti nĩgtī, Topě ti. “Ũ tỳ ag vỹ mẽ sór tũ ěn ag vóg kónān jé sóg ke mũ,” he ja ti nĩ, hā kýt tóg hā ra ke ja nĩgtī.

³ Kýt ěg tóg ũri kren ke tũ nĩ gé, ěg tỳ ti to é hen kýt, ti tỳ ěg kren han sór mũ ra. Nén ũ mág pě vě mỹr, Topě tỳ ěg krenkren han sór mũ tag ti. Ěg pā'i vỹ ā mré mũ tĩ ag mỹ tó vén, ti tỳ ěg kren han sór mũ tag ti. Ũ tỳ ti vỹ mẽg mũ ag vỹ ěg mỹ tó ja nĩgtī gé, ti tỳ ěg kren han sór tag ti, hā kýt ěg tóg ki kanhró nýtī ha.

⁴ Kýt Topě vỹ ũ tỳ ěg mỹ ti vỹ tó mũ ěn ag vỹ to: “há ti nĩ,” he ja nĩ gé, hā kýt tóg ag tar han, ag tỳ ěg tỳ nén ũ han vānh ěn hyn han jé, milagre ti, ěg tỳ vėsóg ki nén han ki kagtīg ěn. Tag to ag tar nýtī, Topě tỳ ag tǎn kýt, ũ tỳ ti vỹ tó tĩ ag. Kýt tóg ag mỹ ā kuprīg jěně gé. Ti hā ne to jykrén kýt: “tag tar han jé sóg ke mũ, ěn to, kýt sóg ũ ěn tar han ke mũ, ũ ũ to,” he ja nĩ, ti vỹ tó tĩ ag to, Topě ti.

Topě kósín tỳ ěg tỳ ũn mág han ke

⁵ Topě vỹ nén (ũ) kar ěn han mǎn ke mũ, kýt tóg tỳ ũ tǎg nýtĩnh mũ. Ěn kri pā'i vỹ tỳ ěg nýtĩnh mũ, ěg tỳ tỳ ěprā ke nýtĩ ra. Ti tỳ jěgně jafā ag pí(jé) tỳ ga tǎg kri pā'i nýtĩnh mũ'.

⁶ Hā kýt ti vỹ tó tĩ ũ vỹ tag rán ja nĩ, ti vỹ rán ki, ha mẽ. Topě mỹ tóg: “tỳ ěg tóg nén ũ tũ nýtĩ vě, ěg tỳ tỳ ěprā ke nýtĩnh kýt, hā ra ā tóg ěg hā mĩ ěkrén kýt nĩ nĩ,” he ja nĩ. “Tỳ ěg tóg nén ũ tũ nýtĩ vě, ěg tỳ tỳ ěprā ke krě nýtĩnh kýt, hā ra ā tóg ěg ki rĩr tĩ.

⁷ Kýt ā tóg prỹg pipir ki ā tóg ěg tỳ ũn kāsir han ja nĩ, kýt ěg tóg ěn kǎ ā tỳ jěgně jafā ag krēm nýtī. Tag pǎte ā tóg ěg tỳ ũn mág han ke mũ, ũn tar, pā'i mág tỳ ũn há nĩ ěn ri ke, ěg tỳ věnh kar kri nýtĩ jé.

⁸ Kýt ā tóg ěg krēm nén (ũ) kar vin kǎn ke mũ,” he ja tóg nĩ, Topě mỹ, Topě vỹ tó tĩ ti.

Ha vé, Topě vỹ ěg krēm nén (ũ) kar vin ja nĩ, ěg tỳ tỳ nén (ũ) kar pā'i nýtĩ jé. Kýt nén (ũ) kar vỹ ěg krēm nýtī. Ěg krēm nýtī tũ vỹ tũ tĩ. Hā ra ěg tóg ver vėg tũ nĩgtī, nén (ũ) kar tỳ ěg krēm nýtī ti. Ver tóg nén ũ ũ tỳ ěg tũ tũ nýtĩ ven nĩ.

⁹ Hā ra ěg tóg Jesus hā tỳ tỳ ũn mág nĩ ěn vėg tí, ũri, ti tỳ tỳ ũn há nĩ ěn, pā'i mág ri ke. Prỹg pipir ki Jesus tóg Topě tỳ jěgně jafā ěn ag krēm ke ja nĩ, kanhkā tǎn ěn ag krēm, kýt tóg ěg kar jagfy ter ja nĩ, Topě tỳ ěg jagǎgtǎn kýt. Kýt tóg ũri tỳ ũn mág pě nĩ nĩ, ti tỳ ěg jagfy ter ja ěn tugrĩn.

¹⁰ Topě vỹ tỳ nén (ũ) kar kri ke nĩ, kýt nén (ũ) kar vỹ ti tugrĩn rĩnrĩr nýtī. Hā kýt tóg vėnhmỹ tũ nĩ, Topě tỳ Jesus mỹ: “ā jagtar tugrĩn ā tóg tỳ ũn há tǎvĩ nĩnh mũ,” hen kýt. Hā jé Jesus tóg jagtar nĩ ja nĩgtī, ti tỳ tỳ ũn há tǎvĩ nĩn jé. Kýt tóg ũn e krenkren han mũ sir. Ěg jo tóg tĩg mũ sir, Topě krě kar ag jo, ěg tỳ ti ri ke há nýtĩ jé gé, ěg tỳ Topě jamā sínvĩ ěn tá junjun jé, ti mré.

11 Ha vé, Jesus vỹ ãg tar han tĩ, ãg tỹ Topẽ vĩ mranh mãn sór tũ nĩ jé. Kĩ ù tỹ ãg tar han mũ vỹ ãg mré jóg pir nĩ, Jesus ti. Hã kĩ tóg ãg to: “inh jãvy ag, inh ve fag,” he mũ. Ëg to tóg mỹ'ãg tũ nĩ.

12 Ëg to tóg: “inh jãvy ag mỹ sóg ã jiji tónh ke mũ, jóg;” he ja nĩ. “Ag rĩnve sóg ã tỹ tỹ ùn há nĩ ãn kãmén ke mũ, ã jé tó jé sóg ke mũ, ag to sóg mỹ'ãg ke tũ nĩ,” he ja tóg nĩ, Jesus ti, ãg to.

13 Kĩ tóg: “Topẽ ki sóg rã kĩ jẽ,” he mũ gé. Kĩ tóg: “inh mré ke ag há vẽ, Topẽ tỹ inh mỹ ùn vìn mũ ag kar há vẽ, fag ke gé,” he ja nĩ gé.

14 Jesus mré ke ãn ag há vỹ tỹ ãprã ke ag nỹtĩ, fag ke gé. Hã kĩ Jesus vỹ ag mré ke tỹ ãprã ke nĩ ja nĩ gé, há kĩ tóg ãg jagfỹ ter ja nĩ. Tĩ tỹ Japo tũg ke vẽ, ã ter tũgrĩn. Japo vỹ ãg tén sór to tar nĩ, há ra Jesus vỹ ti tỹ tũ' henh ke mũ.

15 Kĩ tóg ãg krenkren han ke mũ, ãg tỹ ãg ter ke kamẽgmẽg kĩ. Ëg ter ke tũgrĩn ãg tóg nén (ũ) tỹ ãg tén ke mũ kar kamẽg tĩ, nén (ũ) tỹ ãg vóg kónãn tĩ kar ke gé. Hã ra Jesus tóg ãg krenkren han mũ, kĩ ãg tóg nén ù kamẽg mãn ke tũ nĩ ha.

16 Tĩ pi(jé) Topẽ tỹ jẽgnẽ jafã ag krenkren han mũ', kanhkã tãn ag'. Abraão krẽ ag há krenkren han tóg mũ, ag jóg mré há, há kĩ tóg rãn kĩ nĩ.

17 Hã jé tóg ã jãvy ag ri ke nĩ ja nĩgtĩ, Jesus ti. Tỹ tóg ãg há pẽ ja nĩgtĩ. Ëg tỹ nén (ũ) kar han mũ ve kãn ja ti nĩgtĩ, ãg jagtar mré há. Hã kĩ tóg ãg jagfỹ vẽn h fẽg, kĩ tóg ãg tỹ Topẽ vĩ mranh tỹ tũ' he ja nĩ. Topẽ tũ ki rĩr tĩ to pã'i mág tỹ vẽn rãnrhãj han mũ ãn ri ke han ja ti nĩ, Jesus ti. Tĩ tỹ ãg jagfỹ Topẽ tũ ki rĩr nĩn kĩ tóg ãg jagãgtãn tĩ. Ki rĩr há han tóg tĩ gé, ti tỹ ãg mré tỹ ãprã ke ja nĩn kĩ.

18 Ëg mré tóg jagtar ja nĩgtĩ, Jesus ti. Japo vỹ ti tỹ Topẽ vĩ mranh han sór ja nĩgtĩ gé, ãg ri ke, há ra tóg mranh ja tũ nĩ inhhã. Hã kĩ tóg ki kanhró nĩ, ãg tỹ nén (ũ) vég mũ kar ki. Hã kĩ tóg tag kar to ãg tar han ki kanhró nĩ inhhã.

3

Jesus tỹ tỹ Moisés kri ke nĩ

1 Inh kanhkã', Topẽ tũ vỹ tỹ ãjag nỹtĩ. Kĩ tóg ãjag kuprẽg, ãjag tỹ kanhkã tá ve jé. Hã kĩ Jesus mĩ ãkrén nĩ. Topẽ vỹ ti fẽg. Kĩ tóg ãg mỹ Topẽ tũ ki rĩr tĩ to pã'i mág ãn ri ke nĩ, ãg tỹ ti ki rã kĩ. Tĩ há kãmén ãg tóg tĩ gé.

2 Û tỹ ti fẽg mũ ãn rãnrhãj han tóg tĩ, Moisés ri ke. Moisés vỹ Topẽ tũ kar ki rĩr há han ja nĩgtĩ gé, Topẽ povo kar ki, ti ãn krẽm ke kar fag ki.

3 Hã ra Jesus vỹ Moisés kãfór nĩ. Û tỹ ãn han tĩ vỹ ù tỹ ãn ki rĩr tĩ ãn kãfór nĩ. Ri ke ti nĩ, Jesus tỹ Moisés kãfór nĩ ti. Ëprã ke vỹ tỹ ti nĩ, Moisés ti, kĩ Jesus vỹ ti kãfór nĩ.

4 Gĩr kar vỹ panh nỹtĩ gé. Û tỹ vẽn kar han mũ vỹ tỹ Topẽ ti nĩ.

5 Moisés vỹ Topẽ tũ ag ki rĩr ja nĩgtĩ, kĩ tóg ki rĩr há han ja nĩgtĩ. Topẽ camarada vỹ tỹ ti nĩ ja nĩgtĩ, kĩ tóg Topẽ ãn krẽm ke fag ki rĩr nĩ ja nĩgtĩ. Hã ra tóg Cristo tỹ nén han ke ãn kãmén ja nĩ gé, Moisés ti.

6 Cristo vỹ tỹ Topẽ kósin nĩ, kĩ tóg Topẽ tũ ag ki rĩr há han tĩ, há ra ag tóg tỹ ti tũ nỹtĩ, ti ãn krẽm ke kar ãn ag, ã tỹ ùn ki rĩr tĩ ag, fag ke gé. Ëg há vẽ, ti tũ vỹ tỹ ãg nỹtĩ, ti ãn krẽm ke vỹ tỹ ãg nỹtĩ, ãg tỹ ti to tar nỹtĩn kĩ, ãg tỹ ti kãmén há han kĩ, ti tỹ ãg mỹ sér nĩn kĩ, ãg tỹ tá nén venh ke ti.

Ëg tỹ vẽnkhãn ke

7 Tag tó tóg mũ, Topẽ ti, ã kuprĩg tỹ, ha mẽ: “Ãjag tỹ ùri inh vĩ mẽ kĩ vẽn h kutu han tũg nĩ,” he tóg.

8 “Ājag jóg'jóg ve ag vỹ vėnh kutu han ja nĩgtĩ, kỹ ag tóg inh kato vāsān ja nĩgtĩ, ag tỹ ga kórég ki nỹtĩn kỹ,” he tóg, Topě ti.

9 “En kã ag tóg iso vĩ pãtigtén ja nĩgtĩ gé. “Ēg tỹ ti vĩ mranh mũ ra tóg ěg vóg konān ke tũ nĩ,” he ja ag tóg nĩgtĩ, ag tỹ isỹ nén han mũ ěn ve ja ra, isỹ prỹg tỹ 40 (ke) ěn ki ag ki rĩr há han mũ ra.

10 Hã kỹ sóg ag to jũ ja nĩ. Ag to sóg: “kórég ag nỹtĩ,” hé. “Vėnh jykre há to jykrén tũ ag tóg nỹtĩgtĩ,” he sóg. “Inh japry ve sór ja tũ ag tóg nỹtĩ, inh jamĩn ti,” he sóg.

11 Kỹ sóg ag to jũ nĩn kỹ (sóg) ag to vĩ jũ han kỹ tag tó, ha mẽ. “Sỹ ag vėnhkán han ke vė vė, há ra ag tóg iso vĩ jũ han ja nĩ, há kỹ ag tóg vėnhkán han ke tũ nĩ ha. Hã kỹ ag ri ke han tũg nĩ, ājag tỹ ũri inh vĩ mẽ kỹ, he sóg mũ,” he tóg, Topě ti.

12 Inh kanhkã, tag to jykrén, ājag tỹ Topě kato vāsān sór tũ nĩ jé, ājag tỹ ti vĩ mranh sór tũ nĩ jé gé, ājag tỹ Topě tovānh sór tũ nĩ jé. Ti há ne ěg rĩnrĩr han ki kanhró nĩ, Topě ti. Hã kỹ ti tovānh tũg nĩ.

13 Jagně jyvėn nĩ, kurã kar ki, ũri mỹr. Ājag tỹ jagně jyvėn to tar nỹtĩn kỹ ājag tóg Topě to tar nỹtĩnh ke mũ gé, ha vemnĩ, kỹ ājag kãmĩ ũ vỹ vėnh kutu han ke tũ nĩ. Ēg tỹ ti vĩ mranh kỹ ěg tóg kutu nỹtĩ, ha mẽ, ti vĩ mranh tỹ ěg mỹ sĩn vĩ nĩn kỹ.

14 Ha mẽ, Cristo tũ vỹ tỹ ěg nỹtĩ, ěg tỹ ti tovānh sór tũ nỹtĩn kỹ. Ēg tỹ ti ki rã ve kã ěg tóg ti to tar nỹtĩ ja nĩgtĩ. Ēg tỹ ěn ri ke ti to tar nỹtĩn kỹ ěg tóg tỹ ti tũ nỹtĩ.

15 Hã kỹ tóg ěg mỹ: “ājag tỹ ũri inh vĩ mẽ kỹ vėnh kutu han tũg nĩ,” he mũ. Ājag jóg'jóg ve ag vỹ tóg vėnh kutu hyn han' he ja nĩgtĩ, kỹ ag tóg inh kato vāsānsān, isỹ ag jykre ve sór ja nĩn kỹ. Ag ri ke han sór tũg nĩ,” he tóg mũ ěg mỹ.

16 Ũ tỹ hě nỹ hỹn ti vĩ mẽ kỹ ti kato vāsānsān ja nĩgtĩ? Ũ tỹ ga tỹ Egito tá kã pa ja ěn ag há ja vė, ha mẽ, Moisés tỹ tá ag tatĩn kãtĩg kỹ.

17 Kỹ Topě hỹn ũ tỹ hě to jũ ja nĩgtĩ, prỹg tỹ 40 (ke) ěn ki? Ũ tỹ ti vĩ mranh ja ěn ag há to tóg jũ ja nĩ, há kỹ ag tóg ga kórég ěn ki tũ' he kãn.

18 Kỹ Topě hỹn ũ tỹ hě to: “vėnhkán ke tũ ag nỹtĩ ha,” he ja nĩgtĩ? Ũ tỹ ti vĩ han sór tũ ěn ag to ke ja vė, mỹr, ha mẽ.

19 Ag tỹ ti tovānh kỹ, há kỹ ag tóg ag tỹ nén ve sór ja ěn ve ja tũ nĩ sir, mỹr, ha mẽ.

4

1 Topě vỹ ěg mỹ tag tó ja nĩgtĩ gé. Ti tỹ ěg vėnhkán han sór vė, kỹ ti vĩ to é he tũg nĩ. Vėnh ki rĩr há han nĩ, ājag tỹ to krónh ke tũ nĩn jé.

2 Mě ěg huri, Topě tỹ ěg mỹ nén han sór mũ ěn ti, ũ tỹ ga kórég mĩ mũ ěn ag tỹ mẽ ri ke han ěg tóg huri. Hã ra ag tóg vėké mẽ ja nĩgtĩ, kri fi ja tũ ag nỹtĩgtĩ, ag tỹ mēg mũ ra. Hã kỹ tóg ag mỹ nén ũ há han ja tũ nĩ, Topě vĩ ti.

3 Ēg tỹ ti ki ge há kỹ ěg tóg vėnhkánkán ke mũ. Hã kỹ Topě vỹ tag tó, ha mẽ: “ag to jũ nĩn kỹ sóg ag to vĩ jũ han kỹ tag tó, ha mẽ. “Sỹ ag vėnhkán han ke vė vė, há ra ag tóg vėnhkán ke tũ nỹtĩ ha,” he ja ti nĩ. Topě vỹ vāsỹ vėnhkán ja nĩgtĩ, ti tỹ nén (ũ) kar pě han han ti kỹ. Kỹ nén (ũ) kar vỹ hyn han kỹ nỹtĩ ha.

4 Hã kỹ kurã tỹ 7 (ke) ěn to tag tóg rán kỹ nĩ, ha mẽ. Topě tỹ nén kar hyn han kãn ja to tag tóg rán kỹ nĩ, ha mẽ: “kurã tỹ 7 (ke) ki Topě vỹ vėnhkán, ā rãnrãj han kãn kỹ,” he tóg mũ, Topě vĩ rán ki.

⁵ Hã ra tóg Israel ù ag to tag tó ja nĩ gé, hã vỹ: “kỹ ag tóg vènhkánkán ke tũ nỹtĩ ha,” he mũ gé.

⁶ Hã kỹ ù ag tóg vènhkánkán ke mũ. Vãsỹ Topẽ tóg ẽg jóg'jóg ve ag mỹ ag vènhkánkán ke tag tó ja nĩgtĩ vè, hã ra ag tóg ti vĩ jẽmẽ ja tũ nĩgtĩ, hã kỹ ag tóg vènhkánkán ke tũ nỹtĩ ha. Kỹ Topẽ tóg ù ag kuprẽg ja nĩgtĩ, kỹ tóg ag hã mỹ ag vènhkánkán ke ti nĩm mũ sir, ẽg hã mỹ.

⁷ Kurã tãg nĩm ja ti nĩ gé, ẽg vènhkán ke to, hã vỹ: “ũri,” he mũ. Hã kỹ Davi tóg kurã tãg tag to tag rán ja nĩ, ha mẽ. Ag tỹ ga kórég ẽn tá kãpa kar kỹ, ag tỹ ga há tá junjun kar kỹ Davi tóg tag rán ja nĩ gé, ha mẽ: “ãjag tỹ ùri ti vĩ mẽ kỹ vènh kutu han tũg nĩ,” he ja tóg nĩ. Kurã tãg to ken hã vè.

⁸ Josué vỹ Israel ag mré ga há ẽn ra tũg ja nĩgtĩ. Hã ra ag tóg tá vènhkán pẽ han ja tũ nĩgtĩ ver, hã kỹ Davi vỹ ag mỹ kurã ù tó ja nĩ, ag vènhkán pẽ han ke ẽn ti tó ja ti nĩgtĩ.

⁹ Ha mẽ, Topẽ povo vỹ vènhkán ke mũ, ha vemnĩ, ti tỹ ag mỹ kurã nĩv ki.

¹⁰ Û tỹ vènhkán pẽ ẽn vèg mũ vỹ ã rãnrhãj ki vènhkán ke mũ, Topẽ tỹ ã rãnrhãj ki vènhkán mũ ẽn ri ke, kurã tỹ 7 (ke) ẽn ki.

¹¹ Hã kỹ vãsãnsãn, ãjag tỹ tỹ prãnh ke tũ nĩ jé, ãjag tỹ ga kórég kri mũ ja ẽn ag nón ti vĩ mranh tũ nĩ jé, ãjag tỹ ãjag vènhkán ke ẽn ve jé.

¹² Topẽ vĩ hã tugrĩn ẽg tóg rĩnrĩr nỹtĩ. ã vĩ hã tỹ tóg nén kar hyn han tĩ. Rógro jã régre vỹ nén (ũ) kym há nỹgtĩ. Hã ra Topẽ vỹ vỹ ti tỹ nén (ũ) kym há kãfór han tĩ, kỹ ti vĩ tóg ẽg kãra rã tĩ, ẽg nĩ ti kãra, ẽg kukã ti kãra ke gé, ẽg krĩ ti kãra ke gé, ẽg kuprĩg ti kãra tóg rã tĩ gé. Kỹ tóg ẽg tỹ nén (ũ) to jykrén mũ kar ki kanhró nĩ, ẽg tỹ nén (ũ) han sór mũ ki kanhró kar ti nĩ gé, Topẽ ti.

¹³ Nén (ũ) kar ki kanhró tóg nĩ, Topẽ ti, ã tỹ nén han mũ kar ki kanhró tóg nĩ. Nén ù tóg ti mỹ vènh pèju kỹ nĩ tũ pẽ nĩ. Û tóg ti vatánh tá nén ù han ke tũ pẽ nĩ gé. Ki kanhró kar ti nĩ, ù tỹ ẽg jykre tugnỹm ke mũ ẽn ti.

Jesus tỹ ẽg jagfỹ vĩnh ke

¹⁴ Ti to tar nỹtĩmĩnĩ, ha mẽ. Ti ki rã kỹ ãjag nỹtĩ, kỹ ti to tar nỹtĩmĩnĩ. Ẽg jagfỹ Topẽ tũ ki rĩr tĩ to pã'i mág vỹ nĩ nĩ, hã vỹ: Jesus, he mũ, Topẽ kósin, he mũ. Ẽn vỹ kanhkã tá jun huri.

¹⁵ Ti pi(jé) ẽg krój nỹtĩ tag ki kagtĩg nĩ'. Ki kanhró tóg nĩ mỹr. Ẽg ri kén tóg jagtar nĩ ja nĩgtĩ gé, kỹ Japo vỹ ti tỹ Topẽ vĩ mranh han sór ja nĩgtĩ gé, hã ra tóg inhã mranh ja tũ nĩgtĩ.

¹⁶ Hã kỹ ẽg tóg Topẽ mré vèmén ke mũ, jatun mỹ. Mũmẽg vãnh nỹtĩ jé ẽg tóg ke mũ. Ẽg jagãgtãn jé tóg ke mũ, Topẽ ti, kỹ tóg ẽg tar han ke mũ gé, ẽg krój nỹtĩn kỹ.

5

¹ Ẽprã ke tỹ Topẽ tũ ki rĩr tĩ to pã'i mág jykre vỹ ge nỹgtĩ, ha mẽ. ã mré ke ag jagfỹ tóg vĩ tĩ, Topẽ mré, kỹ tóg ag jagfỹ Topẽ mỹ nén ù pũn tĩ gé, kỹ tóg ag mẽg tãnh kỹ pũn tĩ gé, ag tỹ Topẽ vĩ mranh ja tugrĩn.

² Hã ra tóg tỹ ẽprã ke nĩ gé, ag mré, ag krój ri ke tóg nĩ gé, hã kỹ tóg ag krój nỹtĩ ra ag jagãgtãn há han tĩ, ù tỹ Topẽ vĩ mranh sór tũ ra mranh mũ ẽn ag.

³ Mranh tóg ti gé, Topẽ tũ ki rĩr tĩ to pã'i mág ẽn ti, hã kỹ tóg ã tỹ mranh mũ ẽn to Topẽ mỹ tãnh kỹ pũn tĩ gé, ã mré ke ag tũ ẽn mré.

⁴ Hã ra tóg vèso: “inh hỹn Topẽ tũ ki rĩr sór mũ, kỹ inh hỹn tỹ tag to pã'i mág nĩnh mũ,” henh ke tũ pẽ nĩ. Topẽ hã ne ù to: “isũ ki rĩr tĩ to pã'i mág vỹ tỹ ã nĩnh mũ,” he tĩ', ti tỹ vãsỹ Arão kuprẽg vén ẽn ri ke.

⁵ Hã kÿ Cristo vÿ vêsóg ki tag to jykrén ja tũ nĩ gé. Ti pi(jé) vêsÿ pã'i han ja nĩgtĩ', vêsÿ Topê tũ ki rĩr tĩ ên to pã'i mág han sór ja tũ tóg nĩgtĩ'. Topê hã ne ti mÿ: "inh kósin vÿ tÿ ã nĩ," he ja nĩ. "Uri sóg ã mÿ: tÿ inh ã panh nĩ, he mũ," he ja ti nĩ, Topê ti, Jesus mÿ.

⁶ Kÿ tóg ti mÿ tag tó gé, kÿ tóg rán kÿ nĩ gé, Topê vĩ tÿ rán kÿ nĩ ki, ha mẽ: "isũ ki rĩr jê ã tóg ke mũ. Tũ' henh ke tũ ti nĩnh mũ, ã tÿ isũ ki rĩr nĩ ti, Melquisedeque tÿ isũ ki rĩr mũ ên ri ke," he ja ti nĩ gé, Cristo mÿ, Topê ti.

⁷ Jesus vÿ, ã tÿ ga mũ tũg kÿ jagtar nĩn kÿ (tóg) Topê mÿ to vĩ', to vĩ' he ja nĩgtĩ, ti tÿ ti kren han jé, ti ter tũ nĩ jé. Kÿ tóg fÿ gé, Topê mré vémén kÿ. Vêsÿrénh jagy han tóg. Kÿ Topê vÿ ti vĩ jêmê ja nĩ, Jesus tÿ ti mÿ to vĩn kÿ. Topê mÿ tóg tÿ ùn há nĩ, Jesus ti, hã kÿ tóg ti vĩ jêmê ja nĩ.

⁸ Topê kósin vÿ tÿ ti nĩ, Jesus ti, hã ra tóg ã jagtar tugrĩn (tóg) Topê tÿ nén tó mũ ki kanhrãn kãn ja nĩ, ti tÿ Topê vĩ hã han jé.

⁹ Ti tÿ vènh kanhrãn kãn kÿ tóg êg kren pè han ki kanhró nĩ ge sir. Êg jagfy tóg ter ja nĩ, kÿ tóg êg kren han mũ, êg tÿ ti vĩ ki króm kÿ.

¹⁰ Topê vÿ ti mÿ: "inh mÿ isũ ag ki rĩrmnĩ, to pã'i mág vÿ tÿ ã nĩ, Melquisedeque ên ri ke," he ja nĩ. Hã kÿ tóg tÿ pa'i nĩ, Jesus ti.

Êg tÿ ti to krónh kenh ke tũ

¹¹ Sÿ ãjag mÿ tag kãmén kãn sór mũ ra tóg jagy tĩ. Tó jagy ti tĩ, tag ti. Kÿ ãjag tóg mẽ há han tũ nĩgtĩ gé. ãjag pi(jé) krĩ há nÿtĩ ver'.

¹² ãjag tÿ ù ag kanhrãn ke vè vè, ãjag tÿ vãsÿ Topê vĩ mẽ ja nÿtĩn kÿ. Hã ra ãjag tóg ver ki kagtũg nÿtĩ. ãjag kã ù tÿ ãjag mÿ Jesus kãmén vén ên tó mãn kÿ tóg há nÿnh mũ vè. Gĩr kãsir ri ke ãjag nÿtĩ. Gĩr kãsir ag vÿ leite hã kron tĩ, ãjag tÿ ver kãsir nÿtĩn kÿ.

¹³ Jãvo ùn sanh ag hã vÿ vèjèn kufy ko tĩ'. Gĩr tÿ leite kron mũ ri ke ãjag nÿtĩ, ãjag tÿ Jesus kãme ên ki kanhrãn kãn tũ nÿtĩn kÿ ver.

¹⁴ Û tÿ to jykrén há han mũ ên vÿ ùn sanh há ri ke nĩ, kÿ tóg ki kanhró nĩ. "Tag vÿ há nĩ, tag vÿ há tũ nĩ, tag vÿ kuryj nĩ, jãvo tag vÿ kygnê kÿ nĩ," he jé tóg ke mũ, ù tÿ ki kanhrãn há han mũ ên.

6

¹ ãjag tÿ ver gĩr kãsir ri ke nÿtĩ ra sóg ãjag mÿ Jesus kãmén vén ja ên tó sór tũ nĩ ha. Sÿ ãjag mÿ ùn sanh ag tũ kãmén sór vè ha, ãjag tÿ ver to tar nÿtĩ tũ ra. Jesus kãmén vén jã ên hã vè, gĩr tÿ ã pafa ja kron ên ri ken hã vè, ha mẽ: vènh jykre kórég tovãnh jé êg tóg ke mũ, êg tÿ nén to ter ke mũ ên tovãnh kãn jé êg tóg ke mũ. Topê ki rã jé êg tóg ke mũ.

² Û tÿ ti ki rã mũ ên kype jé êg tóg ke mũ, kÿ êg tóg ti kri êg nĩgé finh ke mũ gé, ti tÿ êg mré Jesus ki rã kÿ jê jé. Kar kÿ êg tóg êg ter kar kÿ rĩr mãn ên to jykrén ke mũ gé, Topê tÿ êg jykre tugnÿm ke ên to. Vènh kãme tag kar vÿ gĩr tÿ ã pafa ja kron ên ri ke nĩ.

³ Tag tó mãn sór tũ inh nĩ ha, ãjag tÿ vãsÿ mẽ ja tag. Sÿ ãjag mÿ tag pãte Jesus kãmén sór vè, kÿ tóg ùn sanh tÿ vèjèn kufy ko ên ri ke nĩ. Topê tÿ tag to isar han kÿ sóg ãjag mÿ kãmén há han ke mũ.

⁴ Ha mẽ, êg kãmĩ ù ag tóg ag tÿ Topê ki rã kar kÿ (ag tóg) ti tovãnh pè han ja nĩgtĩ. Kÿ ag tóg ti ki ge mãn ke tũ nÿtĩ ha. Êg tÿ Topê ki ge kÿ tóg êg kanhrãn ke mũ, vènh jykre há ki. Topê vÿ êg mÿ kanhkã tá vènh jykre há ên nĩm mũ. Êg mÿ tóg ã kuprĩg jènêg mũ gé.

⁵ Topē vī há nĩ ěn vég ěg tóg tí. Ěg tý kanhkā tá nén venh ke ěn ve sī han ěg tóg tí, ěprā, ěg tý Topē ki ge ký.

⁶ Ů tý ti jykre tag ve kar ký ti tovānh pē han ký tóg vĕnhmý nĩ. Ký tóg ti ki rā mǎn ke tú nĩ ha, ā jykre kórég tovānh mǎn ke tú ti nĩ ha, ũ tý ti tovānh pē han mũ ěn ti. Ha vé, ěg tý ti ki rā há han kar ký ti tovānh ký ěg tóg ti tý cruz to sa mǎn ri ke han mǎn mũ sir, Topē kósin ti. Ěg tý vĕnh kar tý ti to é he han mǎn vē sir.

⁷ Ěpý ri ke ti nĩ, ha mē. Ta tý ti kri kutē ký ga mrǎn ký ěg jakré tóg mog há han tí, ěg tý ga há ki ti krǎn ti ký. Ěg tý ěpý há ri ke nýtĩn ký, ěg tý Topē mý vĕnh jykre há han ký tóg ěg ve há han mũ, Topē ti.

⁸ Ěpý ũ tóg hā ra kórég nĩ. Ký sónh hā tóg ki munmur tí, vānh ti ke gé, ký tóg mogmog kónǎn tí sir, ěg jakré ti. Ěg tý ěpý kórég ěn ri ke nýtĩn ký Topē vý ěg tovānh ke mũ sir, ký tóg ěg mý vī kónǎn han ke mũ, ký ěg kejĕn pūr ke mũ, kurā ěn kā.

⁹ Ha mē, vī tar han inh huri. Hā ra ājag tóg ti jagy tag venh ke tú pē nĩ, ki kanhró inh nĩ. Ājag to sóg há nĩ. Krenkren jé ājag tóg ke mũ, ki kanhró inh nĩ.

¹⁰ Rǎnhrāj há han ājag tóg tí. Ti to ājag há tāvĩ nýtĩ. Ti tú ki rĩr há han ājag tóg tí gé. Topē vý tag vég tí, ājag rǎnhrāj há tag. Ti pí(jé) kā jatu nĩgtĩ. Vĕnh jykre vĕnhmý han tú pē ti nĩgtĩ, Topē ti.

¹¹ Hā ra sóg ājag mý tag tó, ājag tý ti to tar tāvĩ nýtĩ jé, ājag tý ti to krónh ke tú nĩ jé. Ký ājag tóg venh ke mũ, ājag tý nén (ũ) ve sór mũ ěn ti.

¹² Ājag tý ti to krónh ken ký tóg kórég nĩ. Ů tóg ěg jo Topē ki rā ja nĩgtĩ, hā ra ag tóg ti tovānh ja tú pē nĩgtĩ, ký ag tóg hur vé, Topē tý ěg mý nén ven sór mũ ěn ti. Tag ag ri ke han nĩ, ũ tý ěg jo ti tovānh jāvānh ěn ag ri ke han nĩ.

Topē tý ā vī ěn han kǎn ke

¹³⁻¹⁴ Topē vý Abraão mý: “ā to vī há han jé sóg ke mũ, ā krē e han jé sóg ke mũ,” he ja nĩ. Ký tóg ti mý: “ā pí(jé) tag venh ke tú nĩ, inh hā vý ki kanhró nĩ,” he ja nĩ gé. Ů tý ti kǎfór nĩ ra tóg ěn to: “ti hā vý ki kanhró nĩ,” henh ke vē vē. Hā ra ũ tóg Topē kǎfór nĩ tú nĩ, hā ký tóg: “inh hā vý ki kanhró nĩ,” he ja nĩ, Topē ti.

¹⁵ Ký Abraão vý Topē tý ti mý nén tó ja tag to tar nĩ ja nĩgtĩ gé. Jatun mý tóg ā kósin ke ěn jāvānh ja nĩgtĩ, hā ký tóg kejĕn ti vé.

¹⁶ Ěprā ke ag vý, ag tý jagnē mý vī há han sór ký ag tóg jagnē mý: “inh kri nĩ ěn vý ki kanhró nĩ, sý ā mý nén han ke ti,” he tí. Tag tó ký ag tóg jagnē jũ tý tú' he tí. Ů tý tag tó ký ag tóg ki kanhró nýtĩ, ti tý ki hā tó ja ti. Ěprā ke ag jykre hā vē.

¹⁷ Vĕnh jykre tag han ja ti nĩ, Topē ti, ti tý ěg mý ā vī jĕnĕn ký. Ti tý ěg mý nén tó ja ěn ve jé ěg tóg ke mũ. Ěg tý tag ki kanhrǎn há han hā jé tóg ěg mý: “ki kanhró inh nĩ,” he ja nĩ. Tó ũ han mǎn ke tú ti nĩ ha. Ā tý tó ja ěn hā han jé tóg ke mũ, ti tý: “ki kanhró inh nĩ,” henh ký.

¹⁸ Ti vī régre to ěg tóg ki kanhrǎn há han tí. Ěg mý tó kar ký tóg: “ki kanhró inh nĩ,” he ja nĩ gé. Ti vī régre hā vē. Hā ký ěg tóg venh ke mũ, ti tý ěg mý nén tó ja ti. Tó ũ han mǎn ke tú ti nĩ ha, hā ra tóg ón ja tú nĩ gé, ti tý ón ki kagtĩg nĩn ký. Ti tý ěg mý nén tó ja ěn ve sór ěg tóg mũ, hā vý: kanhkā, he mũ, hā ký tóg ěg hā mý tó ja nĩ, Topē ti.

¹⁹ Ęg tŷ kanhkã ve sór kŷ ěg tóg to krónh ke tũ nŷgtĩ. Ęg tŷ kanhkã tá ũn ve sór mũ há vŷ ěg tar han tí, ěg tŷ tŷ prãnh ke tũ nĩ jé. Tá jun jé ěg tóg ke mũ, ha vemní, Topê jamã tá.

²⁰ Jesus vŷ tá jun vén, ěg jo, kŷ tóg ěg mũ Topê to ěpŷy ti han, Topê to ěmĩn ti. Ęg jagfy tóg tŷ Topê tũ ki rĩr tí to pã'i mág nĩ, Melquisedeque ěn ri ke. Kurã krŷg ja tũ ti nĩ, ti tŷ tŷ pã'i nĩ ti. Kŷ tóg ěg jo Topê rĩnja tá nĩ nĩ, ěg tŷ ti nón tá junjun jé gé.

7

Melquisedeque kãme

¹ Melquisedeque ěn vŷ tŷ pã'i mág nĩ ja nŷgtĩ, cidade tŷ Salém kri, kŷ tóg Topê tũ ki rĩr nĩ ja nŷgtĩ gé, ũ tŷ vėnh kar kri ke nĩ ěn tũ ki. Abraão vŷ pã'i tŷ 4 (ke) ěn mré vėnh génh han ja nĩ. Ti tŷ ag kãgtén kar kŷ Melquisedeque ěn vŷ ti kato tē, kŷ tóg ti mũ: “Topê vŷ ã ve há han, kŷ tóg ã ve há han mãn ke mũ gé,” he mũ.

² Kŷ Abraão vŷ ti mũ dízimo ěn nĩm mũ sir, ã tũ tŷ 10 (ke) kar ki tóg ũn pir nĩm mũ sir, Melquisedeque mũ, ti tŷ ũn kato tē mũ ěn ag tũ mãn ja tŷ dízimo ěn ti. Ti jiji to ken há vė, há vŷ: vėnh jykŷe kuryj to pã'i, he mũ, há vŷ: Melquisedeque, he mũ. Kŷ tóg tŷ cidade tŷ Salém to pã'i nĩ, há vŷ: ũn krĩ kuprã ěn ag pã'i, he mũ.

³ Panh tũ ti nĩ, mũnh tũ ke gé, jóg'jóg ve tũ ti nĩ gé. Ũ ki mur já tũ ti nĩ, kŷ tóg ter ja tũ nĩ gé. Topê kósin ri ke ja ti nĩ. Topê tũ ki rĩr kŷ tóg nĩ nĩ, ti kurã vŷ krŷg ja tũ nĩ, Melquisedeque kurã ti.

⁴ Pã'i mág pē vė, Melquisedeque ti, há kŷ Abraão vŷ ti mũ ã tũ tŷ dízimo nĩm ja nĩ gé. Há ki ěg tóg ki kanhró nŷtĩ, ti tŷ Abraão kãfór nĩ ti, Melquisedeque ti.

⁵ Ũ tŷ Israel ag kãmĩ dízimo mág tí ag vŷ tŷ Levi krē nŷtĩ, ũ tŷ Topê tũ ki rĩr tí ěn ag. Ājag mré ke ki ag tóg dízimo ěn mág tí, ag kar tŷ tŷ Abraão krē'krē nŷtĩ ra.

⁶ Há ra Melquisedeque pi(jé) tŷ Abraão mré ke nĩ ja nŷgtĩ'. Ge ra Abraão tóg ti mũ dízimo ěn nĩm ja nĩ, kŷ tóg ti mũ: “Topê vŷ ã ve há han,” he mũ gé, Melquisedeque ti, Abraão mũ, Topê tŷ Abraão mré vėmén kar kŷ, Topê tŷ ti mũ: “ã kófa ra ã kósin ke mũ,” he kar kŷ.

⁷ Kŷ tóg Abraão kãfór nĩ, Melquisedeque ti, ti tŷ ti mũ: “Topê vŷ ã ve há han,” hen kŷ. Ti kri ke vŷ tŷ ti jé.

⁸ Levi krē'krē ěn vŷ tŷ ěprã ke nŷtĩ gé, ũ tŷ ãjag mré ke ki dízimo mág tí ěn ag. Há ra Melquisedeque vŷ ter ja tũ nĩ nēji, há kŷ tóg rán kŷ nĩ, Topê vĩ tŷ rán kŷ nĩ ki. Ũn ter tũ vŷ Abraão ki dízimo mãn ja nĩ, há vŷ: Melquisedeque, he mũ.

⁹ Kŷ, Abraão tŷ ti mũ dízimo nĩm ěn kã tóg ã krē'krē kósin tŷ Levi jagfy ti mũ dízimo nĩm ja nĩ gé, Melquisedeque mũ. Há kŷ Levi krē'krē ag vŷ ãjag mré ke ag ki dízimo ve ja nŷgtĩ gé sir.

¹⁰ Abraão tŷ Melquisedeque mũ dízimo nĩm ěn kã Levi vŷ mur ja tũ nĩ ver, há kŷ ti jóg'jóg ve tŷ Abraão vŷ ti jagfy dízimo nĩm ja nĩ. Nĩm kar kŷ tóg kejēn Levi vovo han mũ sir, Abraão ti, Melquisedeque tŷ ti mré vėmén kar kŷ.

¹¹ Topê tŷ Levi krē'krē ag mũ: “isũ ki rĩr mĩnĩ,” he ěn kã tóg ag mũ tag to vėnh jykŷe nĩm ja nŷgtĩ gé, ag tŷ ki rĩr ke to. Ag há tŷ ki rĩr há han ke vė vė, há ra ag tóg ki rĩr kãn já tũ nĩ, há kŷ Topê tóg ũ tŷ ki rĩr ke mũ ũ jēnē ja nĩ, ũ tŷ Melquisedeque ri ke ěn, há vŷ: Jesus Cristo, he mũ. Ag tŷ ki rĩr há han ja nĩ ra Topê hŷn ti jēnēnh ke tũ nĩ vė, kŷ Arão krē'krē ěn ag há vŷ ki rĩr nŷtĩnh ke vė vė.

¹² Kŷ, Jesus tŷ Topě tũ ki rŷr kŷ Topě vŷ ti mŷ tag to vĕnh jykre tãg han ja nŷ gé.

¹³⁻¹⁴ Hã kŷ tóg ki rŷr nŷ sir. Ti pi(jé) tŷ Levi krĕ'krĕ ag kã ũ nŷ, ěg Senhor tŷ Jesus ti. Judã krĕ'krĕ ag kã ũ vŷ tŷ ti nŷ. Ge ra tóg Topě tũ ki rŷr mũ. Judã krĕ'krĕ ũ tóg Topě tũ ki rŷr ke tũ tŷ vĕ, ag tŷ Topě mŷ nĕn ũ pũn ke tũ vĕ vĕ. Ag rãnrãj tũ vĕ vĕ, tag, Judã krĕ'krĕ ag, kŷ Moisés tóg ag to nĕn ũ tó ja tũ nŷ gé, ti tŷ Topě tũ ki rŷr ke tag rán kŷ. Hã ra Jesus tóg Topě tũ ag ki rŷr jĕ, ti tŷ tŷ Judã krĕ'krĕ ag kã ũ nŷ ra. Topě tŷ ti mŷ vĕnh jykre tãg nŷm hã vĕ.

Jesus tŷ Melquisedeque ri ke nŷ

¹⁵ Levi krĕ'krĕ ag vŷ Topě rãnrãj han kãn ki kagtŷg ja nŷgtŷ. Hã kŷ Topě tóg ã tũ ki rŷr ke ũ jĕ prĕr, ũ tŷ Melquisedeque ri ke ěn, hã vŷ: ěg Senhor tŷ Jesus, he mũ. Hã ki ěg tóg vég tŷ, Levi krĕ'krĕ ag tŷ ti rãnrãj han ki kagtŷg nŷtŷ ti.

¹⁶ Kŷ ěg Senhor tŷ Jesus pi(jé) ěprã ke ag jykre ri ke han kŷ Topě tũ ki rŷr mũ', kŷ ěprã ke ũ vŷ: "ha ki rŷr," he ja tũ nŷ gé. Topě tŷ ti mŷ nĕn tó jan hã vĕ. Ter mãn ke tũ ti nŷ ha, hã kŷ tóg ki rŷr há han mũ ha.

¹⁷ Ti to tag tóg rán kŷ nŷ, Topě vŷ tŷ rán kŷ nŷ ki, ha mĕ: "isũ ki rŷr jĕ ã tóg ke mũ. Tũ' henh ke tũ (pĕ) ti nŷ, ã tŷ isũ ki rŷr nŷ ti, Melquisedeque tŷ isũ ki rŷr nŷ ěn ri ke," he ja ti nŷ.

¹⁸ Tag tó kŷ tóg Moisés jykre ěn tŷ tũ' he mũ, ti krój nŷn kŷ, ti tŷ ěg há han mãn ki kagtŷg nŷn kŷ.

¹⁹ Hŷ, Moisés jykre ěn vŷ ěg tar han ki kagtŷg ja nŷgtŷ, ěg tŷ Topě vŷ ki króm han ki kagtŷg ja tóg nŷgtŷ, kŷ ěg ti jykre han sór mũ ra kanhkã tá jun ke tũ nŷ, ěg tŷ Moisés jykre han mũ ra. Vãhã Topě tóg ěg mŷ vĕnh jykre tãg nŷm ja nŷ, ũ tŷ Moisés jykre kãfór nŷ ěn, hã vŷ: Jesus jykre, he mũ. Kŷ ěg tóg Jesus tũgrŷn Topě nŷgja tá junjun ke mũ.

²⁰ Tag to Topě tóg vŷ kãfór han ja nŷ. Moisés tŷ Levi krĕ'krĕ mŷ: "Topě tũ ki rŷr nŷ," hen kŷ tóg vŷ kãfór han ja tũ nŷ.

²¹ Hã ra Topě tóg Jesus mŷ tag tó. Ti mŷ tóg: "isũ ag ki rŷr jĕ ã tóg ke mũ," he ja nŷ. "Tũg ke tũ ti nŷ, ã tŷ isũ ag ki rŷr tŷ ěn ti. Vŷ kãfór han inh mŷr. Tó ũ han mãn ke tũ sóg nŷ, vĕnh jykre ũ han mãn ke tũ sóg nŷ," he ja tóg nŷ, ěg jóg mág ti, ã kósin mŷ.

²² Hã kŷ Jesus jykre vŷ Moisés jykre kãfór nŷ, Jesus tŷ ěg mŷ vĕnh jykre tãg nŷm mũ ěn.

²³ Nĕn ũ ki tóg sir Moisés jykre ri ke tũ nŷ, Jesus jykre ti, ha mĕ. Moisés jykre ki Topě tũ ki rŷr tŷ ag vŷ e ja nŷtŷgtŷ. Ājag kã ũ ter kŷ ag tóg jagnĕ jĕgja kã ũ fĕg' he ja nŷgtŷ, ti tŷ Topě mŷ ti tũ ki rŷr jĕ. Hã kŷ ag tóg e ja nŷtŷgtŷ, Moisés jykre ki Topě tũ ki rŷr tŷ ag.

²⁴ Hã ra Jesus vŷ ter mãn ke tũ nŷ inhhã, Topě tũ ki rŷr tóg nŷ nŷ, ũ tóg ti jĕgja kã jĕnh ke tũ nŷ.

²⁵ Hã kŷ tóg ã tŷ ũn ki rŷr nŷ mũ ag kar krenkren han tŷ, ũ tŷ ti tũgrŷn Topě jamã tá junjun ke mũ ěn ag kar. Rŷr tóg nŷ nŷ, kŷ tóg ěg jagfy Topě mrĕ vĕmĕn tŷ. Kurã krŷg ja tũ ti nŷ, Jesus ti.

²⁶ ěg to ti há nŷ, Jesus ti, ti tŷ ěg jagfy Topě tũ ki rŷr nŷn kŷ. Topě kósin vŷ tŷ ti nŷ. Kŷgnĕ ja tũ pĕ ti nŷ. Nĕn ũ kórĕg venh ke tũ ěg nŷ, ti ki. Topě vŷ mranh tŷ ag mrĕ ke tũ vĕ. Kŷ tóg tŷ kanhkã tãn kar ag kri ke nŷ gé sir, ŷri.

²⁷ ěprã ke ag tŷ Topě tũ ki rŷr nŷtŷn kŷ ag tóg Ājag tŷ Topě vŷ mranh ja tũgrŷn Topě mŷ nĕn ũ pũn vĕn tŷ, kurã kar ki, kar kŷ ag tóg Ājag mrĕ ke ag tŷ Topě vŷ mranh tũgrŷn ag jagfy Topě mŷ nĕn ũ pũn tŷ gé sir. Jesus vŷ Topě vŷ mranh ja

tũ nĩ inhã. Hã kÿ tóg, ã tÿ vênh fêg kÿ tóg ag tÿ Topê mÿ nén ù pũn ri ke han. Vênh fêg pir han tóg, kÿ tóg ã tÿ vênh fêg pir ên ki êg tÿ Topê vĩ mranh e ja ên tÿ tũ' he kãn.

²⁸ Moisés tÿ êprã ke ag mÿ: “Topê tũ ki rĩr,” hen kÿ ag tóg ki rĩr mũ, hã ra ag tóg kygnê mág kÿ nÿtĩ ja nĩgtĩ gé, ag tÿ tÿ êprã ke nÿtĩn kÿ. Hã ra Topê tóg vênh jykre tãg han kÿ tóg ã kósĩn mÿ: “ki rĩr jé ã tóg ke mũ, tag to sóg vĩ kãfór han mÿ,” he ja nĩ. Û tÿ kygnê ja tũ pẽ ên mÿ tóg tag tó ja nĩ, hã kÿ tóg kygnênh ke tũ pẽ nĩ gé.

8

Jesus hã tÿ êg jagfy Topê tũ ki rĩr

¹ Ha mẽ, sÿ ãjag mÿ nén kãmén ja ti. Tag tó sór ja inh nĩ, ha mẽ. Êg jagfy Topê tũ ki rĩr tĩ to pã'i mág hã vÿ nĩ nĩ. Topê pẽgja tá tóg nĩ nĩ, kanhkã tá.

² Topê nĩg jafã pẽ tá tóg ti tũ ki rĩr mũ. Topê nĩgja pẽ ên pi(jé) tÿ êprã ke ag tÿ há nĩ'. Topê hã tÿ há vê, ên ti. Ên tá tóg nĩ nĩ, êg jagfy, Topê tũ ki rĩr nĩ ên ti.

³ Topê tũ ki rĩr tĩ to pã'i mág jykrehan hã vê, ha mẽ. Topê mÿ ag tóg nén ù nĩ pũn tĩ, nén ù ù ke gé. Kÿ ù tÿ êg jagfy Topê tũ ki rĩr tĩ to pã'i mág tag vÿ Topê mÿ nén (ũ) nĩm ke mũ gé, Jesus ti, hã vÿ: vênh fêg, he mũ.

⁴ Ti tÿ ver tag mĩ ga kri mũ ag mré ga kri tĩ ra Topê tóg ti mÿ vênh rãnrãj tag nĩm ke tũ nĩ vê, ti tÿ Topê tũ ki rĩr jé. Êprã ù tÿ Topê tũ ki rĩr mũ ag vÿ nÿtĩ ver, ù tÿ Judeu ag jykre ki Topê tũ ki rĩr mũ ù ag.

⁵ Topê jo ãn krêm ag tóg nén ù nĩ pũn tĩ, Moisés tÿ ag mÿ vênh jykre nĩm kÿ. Topê vÿ Moisés mÿ tó ja nĩ, ti tÿ kur tÿ Topê jo ãn han jé. Ti mÿ tóg: “ã mÿ sóg ã tÿ nén han ke mũ ên ti ven kãn huri,” he mũ. “Ã tÿ pãnónh kri nĩ ên kã sóg ã mÿ ven kãn. Sÿ ã mÿ nén ven mũ ên hã han nĩ,” he ja tóg nĩ, Topê ti, Moisés mÿ, hã kÿ tóg han. ãn ên krêm ag tóg ùri nén ù ù pũn tĩ, Judeu ag jykre ki, Topê tũ ki rĩr tĩ ag. Hã ra tóg tÿ kanhkã tá vênh jykre tag hã pẽ tũ nĩ ver. Nén sĩ ki tóg ri ke nĩ, ag tÿ nén han mũ ti, kanhkã tá vênh jykre ri ke sĩ ti nĩ. Jesus hã vÿ kanhkã tá vênh jykre pẽ ên han kãn mũ.

⁶ Hã kÿ Jesus rãnrãj vÿ êprã ke ag rãnrãj kãfór nĩ. Topê vÿ êg mÿ Jesus jênê, ti tÿ êg mÿ vênh jykre tãg nĩm jé, kÿ tóg ti tÿ Moisés tÿ êg mÿ vênh jykre há nĩm ên há kãfór nĩ. Kÿ tóg êg mÿ nén ù há tãvĩ han ke mũ, Topê ti, ti tÿ Jesus jênên kÿ. Hã kÿ Jesus rãnrãj vÿ Moisés rãnrãj kãfór nĩ, Jesus tÿ êg mÿ vênh pãte fón ken kÿ.

⁷ Topê mÿ tóg pãgsĩ ja nĩ, ã tÿ Moisés mÿ vênh jykre nĩm ja ên ti, hã kÿ tóg vênh jykre tãg han to jykrén ja nĩ.

⁸ ã povo jykre ve kÿ tóg ti mÿ kórég nĩ, hã kÿ tóg tag tó, ha mẽ. “Kãnhmar sóg povo tÿ Israel mÿ vênh jykre tãg nĩm ke mũ, Judá krê'krê ag mÿ ke gé,” he ja tóg nĩ, êg jóg mág ti.

⁹ Vênh jykre tãg tag vÿ isÿ ag jóg'jóg ve ag mÿ vênh jykre nĩm ja ên ri ke tũ nĩnh mũ. Ag jóg'jóg ve ag mÿ sóg vênh jykre ù nĩm ja nĩ gé, isÿ ga tÿ Egito tá ag kãpan kÿ. Ag nĩgé kãgmĩ kÿ sóg ag taĩn kãtĩ mũ, ag ga pẽ ra. Hã ra ag tóg isÿ ag mÿ vênh jykre nĩm ja ên mranh, hã kÿ sóg sir ag togvãnh ja nĩ,” he tóg, êg jóg mág ti.

¹⁰ “Hã ra sóg vãhã ag mÿ vênh jykre tãg han sór mũ, povo tÿ Israel ag mÿ, ha mẽ,” he tóg, êg jóg mág ti. “Ãjag krĩ tÿ ag tóg isÿ ag jyvên mũ ên ki kanhrãn ke mũ, kÿ ag tóg han sór ke mũ gé, ti tÿ ag fe kãkã nĩn kÿ. Ag Topê vÿ tÿ inh nĩnh mũ, kÿ ag tóg tÿ inh krê nÿtĩnh ke mũ gé, ên kã.

¹¹ Kĩ ũ tóg ã mré ke ag kanhrân mân ke tũ nĩ ha. “Ëg jóg mág vỹ ge nĩgtĩ, ge ti nĩgtĩ,” he mân ke tũ ag nỹti ha, jagně mỹ. Ag kar vỹ inh ki kanhró nỹtĩnh mũ, ên kã, ùn kãsir ag, ùn mág ag ke gé, ên kã.

¹² Ag tỹ inh ví mranh mũ (hã) ra sóg ge ra ag jagãgtãn ke mũ. Vẽnh pãte fón je sóg ke mũ, ag tỹ inh ví mranh ja ên ti,” he ja tóg nĩ, Topě ti.

¹³ Kĩ, Topě tỹ vẽn h jykre tag han kỹ vẽn h jykre ve ên vỹ ti mỹ tỹ vẽn h jykre si nĩ sir. Hã ra nén (ũ) si kar ên vỹ kejên tũ' henh ke mũ, kãnhmar.

9

Vãsỹ Topě jykre mré ũri Topě jykre

¹ Topě tỹ ag mỹ vẽn h jykre ve ên nĩm kỹ tóg ag mỹ ag tỹ nén han ke ên kãmén ja nĩ. Ag tỹ ti jo ãn han tó ja ti nĩ, kar kỹ tóg ag tỹ ti jo ãn krêm ti mré vẽnén ke tó ja nĩ gé, ag tỹ ti mỹ nén (ũ) pũn ke ti ke gé.

² Kỹ ag tóg kur tỹ ãn ên han, ti tỹ Topě jo ãn jě jé. Hã ra tóg vẽn h kãpãm kỹ nĩ, kur tỹ ke gé, kỹ ag tóg ãn vãfynyn ki jun vẽn mũ ên to ag tóg: “Topě mré ví jafã,” he tĩ. Ên tá mesa kri vela tỹ kri vin jafã vỹ jě, kar kỹ mesa ti ke gé, mesa tỹ kri pão vin jafã ên.

³ Tag pãte tóg kur nĩ, jãnkã tỹ kur, kỹ kur ên pãte ãn vãfynyn ũ vỹ nĩ gé, ùn sĩ. Ên to ag tóg: “Topě nĩg jafã,” he tĩ, ãn vãfynyn ên to.

⁴ Tá tóg Topě mỹ kri nén (ũ) pũn jafã nĩ, ouro tỹ há ti. Kri ag tóg nén ũ ger há pũn tĩ, ouro ên kri. Kar kỹ Topě caixa vỹ tá nỹ gé. Ti to tĩr hã vỹ tỹ ouro nĩ. Caixa ên kãkã ouro tỹ pẽnky vỹ nĩ, kỹ kanhkã tá vějên vỹ pẽnky ên ki nĩ, Topě tỹ ag mỹ pão jẽnê ên ti, ag tỹ ga kórég kri mũn kỹ. Kar kỹ Arão vátó vỹ kã nỹ gé, ti kãtó ti, kãtó fėj mũ ên ti. Caixa ên kãkã tóg nỹ nĩ, vátó ên ti. Kar kỹ Topě tỹ Moisés mỹ vẽnhrã nĩm ja ên vỹ kãki nỹti gé, caixa ên kãki. Pó régre ki tóg rãnrãn ja nĩ, Moisés ti, Topě tỹ ãg jyvẽn mũ ên ti. Pó régre ên tóg caixa kãki nỹti gé.

⁵ Caixa ên kri tóg nỹti, Topě tỹ jěgně jafã régre ag kãggrã, querubim he mũ ên, ũ tỹ Topě rĩnja tá nỹti ên. Fěr ag nỹti, kỹ ag fěr tóg krỹg he kỹ nỹti. Ag fěr fẽnja krêm Topě vỹ ãg mỹ vẽn h pãte fón tĩ, ãg tỹ ti ví mranh ja ti. Hã ra sóg tag kãmén kãn sór tũ nĩ ver.

⁶ Kỹ tóg vãfynyn régre nĩ, ãn tỹ kur ên ti, Topě tũ ên ti. Ti vãfynyn ve ki ag tóg kãra ge ti, Topě tũ ki rĩr tĩ ag, kurã kar ki. Tá ag tóg ãjag rãnrãj ti han tĩ.

⁷ Ti vãfynyn ũ ên tá tóg kãra rã pin' he tĩ, prỹg kar ki, ag to pã'i mág ti, ti tãvi. Ag męg kvvẽn h ma tóg tĩ ti, Topě mỹ ven jé, Topě tỹ ti mỹ vẽn h pãte fón jé, povo kar mỹ ke gé, ag tỹ Topě ví mranh ja ên ti, ag tỹ mranh sór tũ ra mranh ja ên ti.

⁸ Topě kuprĩg vỹ ãg mỹ kãmén mũ, ũri, vẽn h jykre si ên ti. Kur tỹ ãn vãfynyn vỹ ge nĩ, ha mẽ. Ti vãfynyn ve ên tỹ ver ãn krêm nĩn kỹ ãg tóg ti vãfynyn ũ tá jun ke tũ nĩ ver, Topě nĩg jafã tá.

⁹ Ëg tỹ ũri vэг mũ tag ki kanhrãn jé, hã jé Topě tóg vẽn h jykre tag han ja nĩgtĩ, ãg tỹ to comparação han jé. Topě jo ãn ên tá ag tóg Topě mỹ nén ũ pũn tĩ, kỹ ag tóg ag męg ti tãnh kỹ pũn tĩ gé. Ag tỹ Topě mỹ sĩnvĩ nỹti sór vê, hã jé ag tóg ti mỹ nén (ũ) pũn tĩ. Hã ra ag tóg ti mỹ pũn mũ ra (ag tóg ti mỹ) sĩnvĩ tũ nỹti, ag jykre tỹ ver kórég nĩn kỹ.

¹⁰ Kỹ, ag tỹ ti mỹ pũn há han jé ag tóg vẽn h jykre tỹ ge han tĩ gé, ha mẽ: vějên to ag tóg jykren tĩ, kỹ ag tóg vějên ũ to: “tag konh ke tũ ãg nĩ, tag kron ke tũ ãg nĩ,” he tĩ, ti tỹ ag mỹ tó kỹ nĩn kỹ. Kỹ ag tóg goj tỹ vẽn h kyge tỹ hên ri ke han

han tĩ gé. Tag ki věnh jykre kar vē, ěprā. Kŷ Topě tŷ věnh jykre tǎg han kŷ ěn vŷ tóg tũ' he mũ sir.

11 Váhā Cristo vŷ hur kătĩg, kŷ tóg tŷ ěg jagfy Topě tũ ki rĩr to pǎ'i mág nĩ ha, kŷ tóg ěg kren pě han mũ. Ti tŷ Topě jo ĩn kǎra rǎ vŷ ĩn si ěn mág kǎfór nĩ gé. Há tǎvĩ ti nĩ, Jesus tŷ hě tá Topě tũ ki rĩr nĩ ěn ti. Ěprā ke tŷ ĩn há pijé', tag ki ĩn pijé', kanhkā tá ke vē.

12 Kŷ, Jesus tŷ ěn kǎra rǎ kŷ tóg rǎ pir han, Topě nĩgafā pě ěn kǎra, Topě tŷ ěg mũ věnh pǎte fón jé. Kŷ tóg, ā tŷ kǎra rǎ kŷ ti pi(jé) ag mĕg kyvénh ma vyr', cabrito ěn, monh tǎgy ěn. Ā kyvénh hǎ tŷ tóg ěg kren pě han, Jesus ti.

13 Ů ter kŷ ũ tŷ ti va mũ mũ ěn ag vŷ, ag tŷ Topě jo ĩn kǎ ra ge sór kŷ ag vŷ Topě tũ ki rĩr tĩ ag mŷ: "ha ěg to tŷ kó kó hé, ěg mĕg kyvénh tŷ," he tĩ. Ag tŷ ag to tŷ kó kó he kar kŷ ag tóg jǎnhkri nŷtĩ sir, ag tŷ cabrito kyvénh tŷ ag to tŷ kó kó hen kŷ, ke tũ nĩn kŷ monh kyvénh tŷ, ke tũ nĩn kŷ monh fi pũr tŷ mrĕj tŷ. Ag tŷ ag jǎnhkri han jan hǎ vē.

14 Hǎ ra Cristo vŷ ā kyvénh hǎ tŷ ěg jǎnhkri pě han. Topě kuprĩg tŷ ti krĩn kŷ tóg Topě mŷ věnh fĕg, Cristo ti. Kygnĕ ja tũ pě ti nĩ, hǎ kŷ tóg há kar nĩ, ti tŷ věnh fĕg kŷ. Ti kyvénh vŷ ěg jǎnhkri pě han mũ, ěg jykre mré tóg ěg kuryj han mũ, kŷ ěg tóg věnh jykre kórég han mǎn ke tũ nĩ sir, ěg tŷ ěg jykre si tугrĩn ter ke mũ ěn ti. Váhā ěg tóg Topě tũ han há nĩgtĩ, ũn rĩr nĩ ěn tũ ti.

Cristo tŷ ěg mũ věnh jykre tǎg ma kătĩg

15 Hǎ kŷ Cristo vŷ ěg mũ věnh jykre tǎg ma kătĩg. Ter ja tóg nĩ, Topě tŷ ěg mũ věnh pǎte fón jé, ěg tŷ ti jykre ve mranh ěn ti. Ti ter kar kŷ Topě tóg ũ ag kuprĕg huri, ag tŷ Topě tŷ kanhkā tá ěg mũ nĕn ven ke ěn ki kanhrǎn jé. Jesus tŷ ěg mũ han hǎ vē.

16 Kejĕn ũ tóg ā ter ke to hǎ: "iser kar kŷ ěn vŷ isũ tag mǎn ke mũ, ũ ěn vŷ isũ ũ mǎn ke mũ gé," he tĩ. Rǎn tóg tĩ, tag, kŷ tóg tógfĩg tĩ, věnh rǎ ti. Kŷ ag tóg ag tŷ věnh rǎ ěn ve sór mũ ra ag tóg ti ter kar kŷ hǎ věg tĩ.

17 Ti tŷ ver ter tũ nĩn kŷ ag tóg věnh rǎ ěn venh ke tũ nĩ. "Iser kar kŷ," he tóg, hǎ kŷ ũ tóg ver ti tũ mǎg tũ nĩ, ti tŷ ver ter tũ nĩn kŷ, ũ tŷ rǎn mũ ěn ti.

18 Ri ke ti nĩ, Topě tŷ ěg mũ věnh jykre nĩm ja ěn ti, ti si mré hǎ. Ag mĕg ter kar kŷ ke ja vē.

19 Hǎ kŷ Moisés vŷ povo kar mŷ Topě tŷ ti mŷ nĕn tó ja ěn kǎmĕn, Topě tŷ nĕn to ag jyvĕn mũ ěn ti. Ti tŷ ag mŷ kǎmĕn kar kŷ tóg monh tǎgy tǎnh kŷ ti kyvénh mǎn ja nĩ, cabrito tǎnh kŷ ke gé. Goj mǎn kŷ tóg ki kujĕn ja nĩ gé, kŷ tóg tŷ kujǎjǎg mũ, goj mré tóg ti kujǎjǎg mũ sir, carneiro kyki kusũg mré hǎ tóg tŷ kujǎjǎg mũ sir, re no fej mré hǎ. Kŷ tóg livro kri tŷ kó he mũ, to tŷ krig ke tóg mũ gé, povo kar to tóg tŷ kó kó he mũ gé, ag tŷ jǎnhkri kŷ nŷtĩ jé.

20 Ag to tŷ krig ke kar kŷ tóg ag mŷ: "Topě tŷ ěg mũ nĕn han ke mũ to věnh kyvénh hǎ vē," he mũ, "Topě tŷ ěg mũ věnh jykre nĩm mũ to věnh kyvénh hǎ vē," he tóg mũ, Moisés ti.

21 Kar kŷ tóg ĩn tŷ kur to tŷ krig ke mũ gé, pĕnky kar to tóg tŷ kó he mũ gé, ag tŷ Topě tũ han jafā kar to. Vĕnh kyvénh ěn tŷ tóg kri tŷ kó he kǎn mũ, ag kar jǎnhkri nŷtĩ jé.

22 Ha vé, ag tŷ vǎsŷ Topě jykre ěn ki nĕn ũ tŷ jǎnhkri' he sór kŷ ag tóg nĕn ũ kyvénh hǎ tŷ jagnĕ jǎnhkrig tĩ. Pir ti nĩ, ag tŷ nĕn ũ kyvénh tũ ra tŷ jǎnhkri' ke mũ ti. Hǎ kŷ ěg tóg ki kanhró nŷtĩ. Ěg tŷ Topě vĩ mranh kŷ tóg ěg mũ ěg mĕg ter hǎ tугrĩn věnh pǎte fón ja nĩgtĩ, vǎsŷ věnh jykre ěn ki.

Cristo tÿ ěg jagfy ter pir han

²³ Vĕnh jykre ěn vÿ kanhkā tá vĕnh jykre ri ke sĭ nĭ, hā kÿ vĕnh mĕg kyvĕnh vÿ nĕn kar ěn jānhkri han ja nĭgtĭ. Ěg tÿ hā ra kanhkā ve jé tóg há tũ nĭ, ěg mĕg tÿ ěg jagfy ter mũ ti. Ěg mĕg vÿ ěg tÿ kanhkā tá jun han ki kagtĭg nĭ.

²⁴ Cristo hā vÿ ěg tÿ tá jun han ke mũ. Kÿ tóg ěprā ke tÿ Topĕ jo ĩn kāra rā ja tũ nĭgtĭ gé, kanhkā jykre ri ke sĭ ěn kāra rā ja tũ ti nĭ. Kanhkā pĕ ra tóg vyr, kÿ tóg Topĕ rĭnja tá nĭ nĭ, Topĕ mré vĕmén jé, ěg jagfy.

²⁵ Kÿ ěprā ke ěn tóg ěprā Topĕ tũ ki rĭr tí to pā'i mág ěn tóg prÿg kar ki ag tÿ ĩn vāfynyn to: Topĕ nĭgjafā, he mũ ěn kāra tóg rā tí, ag mĕg kyvĕnh mǎn kÿ tóg ra rā tí. Hā ra Cristo vÿ vĕnh fĕg pir han.

²⁶ Ti tÿ prÿg kar ki vĕnh fĕg mũ ra tóg ter tÿ hĕn ri ke han ke vĕ vĕ, Topĕ tÿ ga han kar kÿ. Hā ra tóg vāsÿ vĕnh ven ja tũ nĭ. Ūri, kurā tÿ ěgno to hā tóg vĕnh ven pir han, kÿ tóg vĕnh fĕg pir han, ěg tÿ Topĕ vĭ mranh ěn tÿ tũ' he jé, ā ter tugrĭn.

²⁷ Ěprā ke ag vÿ ter pir han tí gé. Ěg ter kar kÿ Topĕ vÿ ěg jykre tugnÿm ke mũ.

²⁸ Tag ri ke ti nĭ, Cristo tÿ vĕnh fĕg mũ ti. Vĕnh fĕg pir han tóg, ā tÿ ũn e tÿ Topĕ vĭ mranh tÿ tũ' he jé. Kejĕn tóg kātĭg mǎn ke mũ. Hā ra tóg ěg tÿ Topĕ vĭ mranh ja tugrĭn ter mǎn ke tũ nĭ, ti kātĭg mǎn kÿ. Ěg jé prĕr jé tóg kātĭg ke mũ, ti tÿ ũ tÿ ti kātĭg jāvānh mũ ag jé prĕr jé.

10

¹ Ěg tÿ Judeu ag jykre ve kÿ ěg tóg ve sĭ han tí, Topĕ tÿ ěg mÿ nĕn han sór mũ ti. Prÿg kar ki ag tóg Topĕ mÿ tǎnh kÿ pũn', tǎnh kÿ pũn' he tí. Hā ra ag mĕg tÿ ag jagfy ter mũ ra tóg ag jykre há han ki kagtĭg ja nĭgtĭ.

² Ag tÿ Topĕ mÿ nĕn (ũ) pũn mũ ra ag tóg Topĕ vĭ mranh mǎn', mranh mǎn' he tí. Ag tÿ mranh tũ nĭ ra ag tóg ti mÿ pũn mǎn ke tũ nĭ vĕ, ti tÿ ag mÿ vĕnh pāte fón jé. Hā ra ag tóg ki kanhró nÿtĭ, ag tÿ ti vĭ mranh tí tag, hā kÿ ag tóg ti mÿ nĕn pũn tovānh tũ pĕ nĭgtĭ, ti tÿ ag mÿ vĕnh pāte fón tovānh tũ nĭ jé.

³ Prÿg kar ki ag tóg Topĕ mÿ pũn tugrĭn (ag tóg) ag tÿ ti vĭ mranh ja ěn mĭ ěkrég tí.

⁴ Hÿ, monh kyvĕnh vÿ ěg tÿ Topĕ vĭ mranh tÿ tũg' hĕnh ke tũ pĕ nĭ, cabrito tÿ ěg jagfy ter mũ ěn ti ke gé.

⁵ Hā kÿ Cristo tóg, ā tÿ ga kri mur ken kÿ (tóg) Topĕ mÿ: “ag tÿ ājag mĕg tǎnh kÿ pũn mũ ra tóg tÿ nĕn ũ tũ nĭ ā mÿ,” he ja nĭ. “Ag tÿ ā mÿ nĕn ũ ũ pũn mũ ra tóg ā mÿ tÿ nĕn ũ tũ nĭ gé. Hā ra ā tóg inh mÿ inh fār ti nĭm, isÿ ag jagfy ter jé.

⁶ Ag tÿ ā mÿ ag mĕg pũn mũ ra tóg ā mÿ sér tũ nĭ, ag tÿ ā mÿ nĕn ũ ũ pũn mũ ra. Ag tÿ ā vĭ mranh tag tÿ tũ' he ki kagtĭg tóg nĭ, ag tÿ ā mÿ nĕn pũn mũ tag.

⁷ Hā kÿ sóg ā mÿ: “ha vé, sÿ ā mÿ vĕnh fĕg ke vĕ,” he mũ, “isÿ ā tÿ inh ki nĕn ve sór mũ ěn tÿ ā mÿ han jé,” he sóg mũ. Hā kÿ tóg rán kÿ nĭ, iso, ā vĭ rá kí,” he tóg, Cristo tí, Topĕ mÿ.

⁸ Ti mÿ tóg tag tó vĕn, ha mĕ. “Ag tÿ ājag mĕg tǎnh kÿ pũn mũ ra tóg tÿ nĕn ũ tũ nĭ ā mÿ. Ag tÿ ā mÿ ājag mĕg pũn mũ ra tóg ā mÿ sér tũ nĭ, ag tÿ ā mÿ nĕn ũ ũ pũn mũ ra. Ag tÿ ā vĭ mranh tag tÿ tũg' he ki kagtĭg tóg nĭ, tag,” he vĕn tóg. Hā ra tóg rán kÿ nĭ, Judeu ag tÿ Topĕ mÿ tag pũn jé. Ge ra Jesus tóg tag to: “nĕn ũ tũ vĕ,” he ja nĭ.

⁹ Tag tó kar ký tóg Topě mý: “ha vé, sý ã mý věnh fěg ke vē, isý ã tý inh ki nén ve sór mũ ên tý ã mý han jé,” he mũ gé, Topě mý. Á tý tag tó ký tóg věnh jykre si ên tý tũ' he mũ, ũn tãg han jé.

¹⁰ Jesus tý Topě ví ki króm ja tigrĩn ěg tóg ũri tý Topě krě nýtĩ ha. Jesus Cristo vỹ ěg jagfy ter ja nĩ, věnh fěg ký. Ti ter pir ki tóg ěg név(e) kajãm kãn, ký Topě tóg ěg mý věnh pãte fón kãn mũ sir.

¹¹ Ěprã ke ag tý Topě tũ ki rĩr tí ag vỹ kurã kar ki ãjag rãnrãj han tĩ, Topě tũ ki rĩr jé. Kurã kar ki ag tóg Topě mý ãjag měg tãnh ký pũn tí, hã ra ag tý Topě mý nén pũn mũ ên pí(jé) ag tý Topě ví mranh tý tũ' he ja nĩgtĩ.

¹² Ag jãvo Jesus Cristo vỹ věnh fěg pir han, ã ter tigrĩn tóg ěg tý Topě ví mranh ěn tý tũ' he kãn. Tag han kar ký tóg Topě pěgia tá nĩ nĩ.

¹³ Tá tóg nĩ nĩ. Topě vỹ ti kato vãsãnsãn mũ ag tý ti pěn krěm vin ke mũ. Ag sigse ký nýtĩ to ken hã vē. Tag hã jãvãnh tóg nĩ nĩ, Jesus ti.

¹⁴ Ti tý věnh fěg pir ěn tigrĩn tóg Topě krě kar ag krenkren han kãn huri, ký ěg Topě mý sĩnvĩ nýtĩ.

¹⁵ Topě kuprĩg vỹ ěg mý tag tó tí gé. Tag tó tóg mũ, ha mě.

¹⁶ “Tag pãte sóg ag mý věnh jykre tãg han ke mũ,” he tóg, ěg jóg mág ti. “Věnh jykre tãg ěn hã vē, ha mě. Isý něn to ag jyvěn mũ ên tý sóg ag fe kãkã nĩm ke mũ, ký tóg sý ag krĩ ki rãn ri ke nĩnh mũ sir, ký ag tóg han sór ke mũ,” he tóg.

¹⁷ Tag tó kar ký tóg tag tó gé, ha mě. “Ag tý inh ví mranh ja ěn mũ ěkrěn mãn ke tũ inh nĩ ha, ag jykre pãno ěn mũ ěkrěn mãn ke tũ pě inh nĩ ha,” he tóg mũ gé.

¹⁸ Ha vé, Topě tý ěg mý věnh pãte fón ký ěg tóg ti mý nén ũ pũn mãn ke tũ nĩ ha, ti tý ěg mý věnh pãte fón kãn ký nĩn ký, ěg tý ti ví mranh ja kar ěn ti.

Ěg tý Topě to krónh ke tũ

¹⁹ Inh kãnhkã, Jesus tý ěg jagfy ter tigrĩn ěg tóg jatun mý Topě nĩgjfã tá jun ke mũ.

²⁰ Jesus tý ěg jagfy ter ěn tóg ti tý kur tý jãnkã ěn fĩn rãm ri ke nĩ, ěg tý ti nón fĩn rãm ri ke han jé, ěg rĩnrĩr nýtĩ jé. Topě jo ĩn krěm kur tý jãnkã nĩfe ěn vỹ jaran ke ký sa nĩ, Jesus ter ký. Ký ěg tóg rã genh há nýtĩ ha.

²¹ Ěg jagfy Topě tũ ki rĩr tí to pã'i mág vỹ nĩ nĩ, hã vỹ: Jesus, he mũ. Topě jamã tá ke ěn ag kar kri ke vỹ tý ti nĩ.

²² Ký jatun mý Topě mrě věměn nĩ. Ti ki rã há han nĩ, ãjag fe tý ti ki gemnĩ, ãjag tý ti nĩgjfã tá junjun jé. Ón ký ti ki ge sór tũg nĩ. Ěg jãnhkri han tóg, ěg jykre pãno kar tý tóg tũ' hé, ěg tý to jykrěn mãn tũ nĩ jé. Ěg tý jãnhkri han tóg, ěg tý goj jãpri tý věnh kype ěn ri ke, ký ěg há nýtĩ.

²³ Ti tý ěg mý nén tó mũ ên mũ ěkrěn nĩ, to krónh ke tũg nĩ, sý ãjag mý nén tó mũ ên to. Ve jé ěg tóg ke mũ, ti tý ěg mý nén tó mũ ên ti. Ũ tý ěg mý tó ja ěn vỹ ón vãnh nĩgtĩ, hã ký to krónh ke tũg nĩ.

²⁴ Jagně mũ ěkrěn nĩ, ãjag tý jagně jyvěn jé. “Věnh kar to há nĩmnĩ,” hemnĩ jagně mý. “Nén ũ há kar han nĩ,” hemnĩ gé jagně mý.

²⁵ Ũ ag tóg culto venh kãmũ vãnh nýtĩgtĩ. Tag han tũg nĩ. Culto venh kãmũmnĩ. Ký jagně jyvěn nĩ, ãjag tar nýtĩ jé. Kakó ti nĩ, ti kãtig mãn ke kurã ti. Ve há ti tí ha, tag.

²⁶ Ha vé, Topě ví mě kãn ěg huri. Ěg tý ti ki rã kar ký culto venh kãtig tũ nĩ' hen ký, ěg tý ge ra Topě ví mranh sór ký mranh tí ký tóg ũ tý ěg jagfy kajãm mãn ke tóg tũ tí.

²⁷ Hÿ, ãg tÿ mranh sr kÿ mranh kÿ Top vÿ ãg vg knn p han ke mÿ. Pÿ tÿ tg ag tÿ tÿ' henh ke mÿ, Top ti, ù tÿ ti kato vsnsn mÿ ag.

²⁸ Û tÿ Moisés tÿ ãg jyvn mÿ n m jvnh nÿ n tn ja ag tg nÿgtÿ, Israel ag, ùn rgre ag tÿ ti jykre pno ve ja tag tugrÿn, ke tÿ nÿn kÿ ùn tgtÿ ag. Ti jaggtn ja tÿ ja ag nÿgtÿ, ùn jykre pno n.

²⁹ H ki ãg tg vg mÿ, Top tÿ ãg vg knn p han ke mÿ ti, ãg tÿ Top ksin to  he kÿ, ãg tÿ ti vÿ mranh sr kÿ. ãg tÿ mranh sr kÿ ãg tg ti kyvnh to  he ti, ti jykre to. Ti tÿ ãg jnhkri han ja n to  he ãg tg tÿ sir. ãg mÿ tg tÿ nn ù tÿ nÿ sir, Top kuprÿg tÿ ãg jaggtn ja n ti. Û tÿ tag han mÿ vg knn j tg ke mÿ, Top ti, ha vemnÿ.

³⁰ H kÿ tg tag t, ha m: “n jykre pno ag vg knn j sg ke mÿ, ag tÿ kajm j, ag tÿ nn ù krg han mÿ kar,” he tg, Top ti. Û tÿ tag t mÿ ki kanhr ãg tg nÿ mÿr. H ra tg tag t g, ha m. “ mr ke ag jykre tugnÿm j tg ke mÿ, ãg jg mg ti,” he ja tg nÿ g.

³¹ Rÿr ti nÿ, Top ti. Ti tÿ ãg to jÿ nÿn kÿ tg jagy tvÿ tÿ, nn ù jagy kar kfr ti nÿ.

ãg tÿ to tar nÿtÿnh ke

³² Jag tÿ vsÿ ti mÿ vnh fg vn ja n kur mÿ kren nÿ. n k ag tg Jag kato vsnsn mg, kÿ Jag tg ag to vsÿrnh, kys tÿ hn ri ke ki, Jag tÿ Top vÿ m vn n k. H ra Jag tg to krnh krnh ke ja tÿ nÿgtÿ.

³³ Jag k ù to ag tg vÿ knn mg' he ja nÿgtÿ, n k, Top kato vsnsn mÿ ag, kÿ ag tg Jag vg knn g, h ra vnh kar vÿ v, ag tÿ Jag vg knn ja ti. Jag k ù vg knn ja ag tg nÿgtÿ, kÿ tg Jag kar mÿ jagy tÿ ja nÿgtÿ, ag mr, Jag tÿ tÿ ag mr Jesus ki ge nÿtÿn kÿ.

³⁴ Kÿ ag tg Jag k ù sigse ja nÿ g. Kÿ Jag tg ùn sigse kÿ nÿtÿ n ag jaggtn ja nÿgtÿ, ag tÿ Jag mr Jesus ki ge kÿ nÿtÿ kÿ. P'i ag tÿ Jag tÿ nn gg mÿ ra tg Jag mÿ sr nÿ ja nÿgtÿ. Jag tÿ kanhk t nn ù h tvÿ n venh ke h mÿ Jag tg kren ja nÿgtÿ, ag tÿ Jag tÿ nn gnh kÿ, Jesus tugrÿn. Jag tÿ kanhk t nn venh ke n vÿ tÿ' henh ke tÿ p nÿ.

³⁵ Kÿ ùri to krnh ke tÿg nÿ g. Jag tÿ ti to tar nÿtÿn kÿ Jag tg nn ù h tvÿ venh ke mÿ, ha m. Jag vsÿrnh ja n kaja ri ke ve j Jag tg ke mÿ.

³⁶ ãg tÿ ti tÿ han to tar nÿtÿnh ke v, ãg tÿ ti tovnh ke tÿ p nÿtÿnh ke v. Tag h vÿ h nÿ. Kÿ Jag tÿ Top tÿ ãg mÿ nn t mÿ n han kn kÿ nÿtÿn kÿ Jag tg venh ke mÿ, ti tÿ ãg mÿ nn () ven ke mÿ n ti.

³⁷ H kÿ tag vÿ rn kÿ nÿ, Top vÿ rn ki, ha m: “knhmar p ti jun ke mÿ, ùn ktÿg ke mÿ n ti. Ktÿg m han j tg ke mÿ, ha vemnÿ.

³⁸ Kÿ ù tÿ inh ki ge kÿ nÿtÿ n ag h vÿ krenkren ke mÿ, inh mr ke n ag, isÿ ùn mÿ vnh pte fn mÿ n ag. Jvo ù tÿ isovnh mÿ n vÿ inh mÿ krg nÿnh mÿ,” he tg, Top ti.

³⁹ ãg pÿ(j) ti tovnh ke mÿ', kÿ ãg tg ù tÿ ti tovnh mÿ n ag vgfor n ri ke han ke tÿ nÿ g. Ti ki r kÿ ãg tg nÿtÿ, h kÿ ãg krenkren ke mÿ.

11

Û tÿ ãg jo Top ki ge kÿ nÿtÿ ag

¹ Top ki r to ken h v, h vÿ: ti tÿ ãg mÿ nn t mÿ n kri nÿm, he mÿ. Ti tÿ nn ù to: “ve j Jag tg ke mÿ,” he mÿ n kri fi j ãg tg ke mÿ, ãg tÿ ver vg tÿ ra.

² Ti si ag vỹ kri nĩm kỹ ti ki ge ja nĩgtĩ gé. Hã kỹ ag tóg Topê mỹ tỹ ùn há ja nỹtĩgtĩ, vãsỹ ke ag, ha mẽ.

³ Ęg tỹ Topê ki rã kỹ Ęg tóg ki kanhró nỹtĩ, ti tỹ ã vỹ tỹ Ęg tỹ nén vég mũ kar hyn han ja ti. Ti vỹ vég tũ Ęg tóg nĩgtĩ, kỹ tóg Ęg tỹ nén vég tũ tỹ tóg Ęg tỹ vég mũ hyn han ja nĩgtĩ, Topê ti, ã vỹ tỹ tóg nén kar hyn han ja nĩgtĩ.

⁴ Kỹ Abel vỹ Topê ki rã kỹ nĩ ja nĩgtĩ gé, hã kỹ tóg Topê mỹ pũn há han, ti tỹ ti mỹ ã męg pũn kỹ. Jãvo ti kãke tỹ Caim vỹ ti ki rã ja tũ nĩ, kỹ tóg Topê mỹ nén ù pũn tĩ (hã) ra (tóg) ti mỹ pũn kónãn. Abel tỹ Topê ki rã kỹ tóg Topê mỹ pũn há han ja nĩ, Abel tỹ ti mỹ pũn mũ ěn ti. Topê tỹ Abel to: “inh mỹ tóg tỹ ùn jykre kuryj nĩ,” he ja vë, hã kỹ ti tũ tóg pũr há han. Ter ti huri, Abel ti, hã ra Ęg tóg ti tỹ nén han ja tugrĩn Topê ki ge ki kanhrãn mũ sir.

⁵ Enoque vỹ Topê ki rã kỹ nĩ ja nĩgtĩ gé, hã kỹ Topê vỹ ti jé prër, ti tỹ kankhã ra tĩg jé, ti rĩr ra, ti ter tũ ra. Ti ve mãn tũ ag tóg, Topê tỹ ti jé prër kar kỹ, hã ra tóg ã ter tũ ra kankhã ra vyr. Topê tỹ ti jé prër to hã tag vỹ ti to rãn kỹ nĩ Topê vỹ tỹ rãn kỹ nĩ ki, ha mẽ: “Topê tỹ ti jykre ve kỹ ti fe tóg mrin ke mũ,” he ja ti nĩ, Enoque to.

⁶ Ęg tỹ Topê ki ge tũ nỹtĩn kỹ tóg Ęg to há nĩnh ke tũ nĩ, Topê ti. Ęg tỹ Topê ra mũ sór kỹ Ęg tóg tag to jykren ke mũ, ha mẽ. “Topê vỹ nĩ,” he jé Ęg tóg ke mũ. Kỹ Ęg tóg ti to: “Ęg tỹ ti to mũ kỹ tóg Ęg mỹ nén ù há ěn nĩm ke mũ, ti tỹ Ęg mỹ nén tó ja ěn ti,” henh ke mũ gé. Tag tó kỹ Ęg tóg ti to mũnh ke mũ, kỹ tóg Ęg mỹ han ke mũ, ha vemnĩ.

⁷ Noé vỹ Topê ki rã kỹ nĩ ja nĩgtĩ gé, hã kỹ Topê vỹ ti mỹ tó ja nĩ, ag kar tỹ kar kỹ ti jagy venh ke ti, hã vỹ: ta kutë, he mũ. Kỹ tóg Topê vỹ kri fi kỹ canoa mág ěn han mũ, kỹ tóg han kãn kar kỹ (tóg) ki rã kỹ (tóg) kren mũ, ti prũ fi mré, ti krë mré ke gé. Topê ki rã kỹ tóg ù tỹ Topê kato vãsãnsãn mũ ag mré tĩg mãn ja tũ nĩ. Hã kỹ Topê vỹ ti mỹ ùn jykre kuryj ag tỹ nén venh ke ěn ven, ti tỹ ù tỹ ti ki rã kỹ nỹtĩ ag mỹ nén ven ke ěn tũ.

⁸ Abraão vỹ Topê ki rã kỹ nĩ ja nĩgtĩ gé, hã kỹ tóg Topê vỹ kri nĩm ja nĩgtĩ. Topê tóg ti mỹ: “ha tĩg,” he mũ, kỹ tóg tĩg ja nĩ, ga ù ra, Topê tỹ ti mỹ ga nĩm ke mũ ěn ra. ã tỹ ki kagtĩg ra tóg ra tĩg ja nĩ. ã jamã tá kãkutë kỹ tóg ã tỹ ki kagtĩg ěn ra vyr, Abraão ti.

⁹ Topê ki rã kỹ jé kỹ tóg ga ěn mĩ tĩg ja nĩgtĩ. Topê tỹ ti mỹ ga ěn nĩm sór ja vë, hã ra tóg tỹ ã tũ tũ ra tóg mĩ tĩg ja nĩgtĩ, tá. Kur tỹ ĩn krëm ěmãn kỹ tóg ga ěn mĩ tĩg ja nĩgtĩ, ti kósin tỹ Isaque mré, Isaque kósin tỹ Jacó mré ke gé. Ti krë'krë ag vỹ ti mré ga ěn venh ke ja nỹtĩ gé, hã kỹ Topê tóg Abraão mỹ tó ja nĩ, hã ra ag tóg ver vég tũ nĩ.

¹⁰ Ge ra tóg tovãnh ja tũ nĩgtĩ. Cidade tỹ Topê tũ ěn ve sór ja ti nĩ, ù tỹ tũg ke tũ pë ěn. Topê hã vỹ cidade ěn han. To jykren kỹ tóg han. Ti pi(jé) ěprã ke ag cidade ri ke nĩ. ěn ve sór kỹ tóg ti tovãnh ja tũ pë nĩ, hã kỹ tóg vé, Abraão ti.

¹¹ Sara fi vỹ Topê ki rã kỹ nĩ ja nĩgtĩ gé, hã kỹ fi tóg ã kófa pë ra (fi tóg) kufyğ ja nĩgtĩ, Topê tỹ fag tỹ tag to tar han kỹ, Sara fi, fi mën tỹ Abraão mré. ù tỹ fag mỹ: “kósin ve jé ãjag tóg ke mũ,” he mũ ěn vỹ kri fi kỹ fag tóg ve ja nĩgtĩ.

¹² Hã kỹ ùn pir ěn, ùn kófa pë ěn krë'krë vỹ e tãvĩ nỹtĩ, krĩg e ěn ri ke, goj fyr mĩ rỹnhryj e ěn ri ěn, goj kafã tũ fyr ěn mĩ rỹnhryj e ěn ri ke.

¹³ Topê ki ge kỹ nỹtĩn kỹ ag kãgter, Abraão, Isaque, Jacó. Topê vỹ ag mỹ ga ěn tó ja nĩ, hã ra ag tóg ve ja tũ nĩ ver. ãjag tỹ ve pë han tũ ra ag kãgter. Ve sĩ han ja ag tóg nỹtĩgtĩ, Topê tỹ ag mỹ ga tó ja ti, hã ra ag tóg ve pë han ja tũ nĩ kỹ tóg ag mỹ Ęg tỹ kór há tá nén ù vég mũ ri ke nĩ ja nĩgtĩ. Ag tỹ venh ke to tóg ag

mý sér gy tí há ra. “Tag ki, ga kri ěg tóg ũn pygsa mũ ěn ri ke han tí, ěg jamā vỹ tý tag ki ke tú nĩ,” he ag tóg tí.

¹⁴ Ag jamā pẽ jávãnh ký ag tóg ga kri mũ ja nĩgtĩ, há ký ag tóg: “ěg jamā pẽ tú vẽ, tag ki,” he ja nĩgtĩ.

¹⁵ Ag pi(jé) ájag jamā si ěn ra vỹn vỹn ke sór ja nĩgtĩ, há ký ag tóg vỹn vỹn ke ja tú nĩ.

¹⁶ Ěmā há pẽ ěn ve sór ja ag tóg nĩgtĩ, kanhkā tá. Há ký ag tóg Topẽ mý há ja nỹti, ti pi(jé) ag to mý'ág ke mũ'. Há ký tóg vẽso: “Abraão Topẽ, Isaque Topẽ, Jacó Topẽ vỹ tý inh nĩ,” he tí, Topẽ ti. Cidade han tóg, ag mý, kanhkā tá.

¹⁷ Abraão vỹ Topẽ ki rá ký nĩ ja nĩgtĩ gé, há ký tóg Isaque nenh ja tú nĩgtĩ. Topẽ mý tóg ti fẽg, Topẽ tý ti mý ti kósin to vĩn ký. Ti kósin pir ja vẽ, há ra tóg ti tãnh kren, Topẽ mý.

¹⁸ Topẽ tóg Abraão mý: “ã kósin tý Isaque krẽ vỹ e nỹtĩnh mũ,” he ja nĩgtĩ.

¹⁹ Ký tóg, ti tý ti tãnh kren ký tóg: “Topẽ hỹn ti rĩn mãn ki kanhró nĩ, isỹ ti tén ký,” he mũ. Há ký tóg ti ve mãn gé. Ti tý ti tãnh kren ký tóg Topẽ mý ti tý ti tãnh ri ke nĩ ja nĩgtĩ, há ra tóg ti ve mãn, Topẽ tý ti mý: “ti tãnh tũg ra,” hen ký.

²⁰ Isaque vỹ Topẽ ki rá ký nĩ ja nĩgtĩ gé, há ký tóg Jacó mý vĩ há han, Esaú mý ke gé, ti tý ag mý ag tý nén venh ke ěn tó ký.

²¹ Jacó vỹ Topẽ ki rá ký nĩ ja nĩgtĩ gé, há ký tóg ã ter ke to há (tóg) José krẽ régre ěn ag mý vĩ há han gé. Ký tóg ã vátó to jẽ ký (tóg) Topẽ krẽm mũg ke mũ, ký tóg Topẽ mý: “Topẽ vỹ tý ã nĩ,” he ja nĩ.

²² José vỹ Topẽ ki rá ký nĩ ja nĩgtĩ gé, há ký tóg ã ter ke nỹ ra tóg ã ter ken jo (tóg) Israel ag mý kãmén ja nĩgtĩ, ag krẽ'krẽ ag tý ga tý Egito tá kãpanh ke ěn ti. Ký tóg ag tý kãpanh ke ěn tó ký (tóg) ag mý to vĩ ja nĩ, ag tý ti kuka gé kãmũnh jé, ag kãmũnh ken ký.

²³ Moisés han mũ fag vỹ Topẽ ki ge ký nỹti gé, há ký fag tóg Moisés pēju, ti mur kar ký, kysã tágtũ ki. Fag mý tóg sĩnvĩ nĩ ja nĩgtĩ, gĩr si ti. Ký fag tóg pã'i mág kamẽg sór ja tú nĩ, pã'i mág tý: “gĩr gré ag kãgtén kãn nĩ,” he mũ ra.

²⁴ Moisés vỹ Topẽ ki rá ký nĩ ja nĩgtĩ gé, há ký tóg, ã mog kar ký (tóg): “inh pi(jé) tý Faraó kósin fi kósin nĩ!,” he ja nĩgtĩ.

²⁵ Ti tý Topẽ povo ag mré jagtar nĩ ra tóg ti mý tý nén ũ tú nĩ ja nĩgtĩ. Há ra tóg Egito tá ke ag mré rico nĩ sór ja tú nĩgtĩ. Topẽ vỹ mranh ký ag tóg ỏn ký rico nỹti ja nĩgtĩ, Egito tá ke ag.

²⁶ Ěg tý Cristo tugrĩn jagtar nỹti tag tóg ti mý ěg rico nỹti tag há kãfór nĩ ja nĩgtĩ, há ký Egito tá ke ag rico tag tóg ti mý kórég ja nĩgtĩ, Moises mý. Topẽ tý kanhkā tá ěg mý nén ũ há nĩm ke ěn há to tóg jykrén ja nĩgtĩ.

²⁷ Moisés vỹ Topẽ ki rá ký nĩ ja nĩgtĩ, há ký tóg ga tý Egito tá kãkutẽ ja nĩgtĩ, pã'i jũ kamẽg vãnh nĩn ký. Topẽ vég tú ěg tóg nĩgtĩ, há ra tóg Topẽ há ki ěkrén ký nĩ ja nĩgtĩ. Ti vỹ tóg ti mý ti tý ti vég nĩ ri ke nĩ ja nĩgtĩ. Há ký tóg krónh ke ja tú nĩgtĩ, Moisés ti.

²⁸ Moisés vỹ Topẽ ki rá ký nĩ ja nĩgtĩ, há ký tóg Israel ag mý festa tý Páscoa ěn nĩm. Ag mý tóg: “ĩn jãnkã to tĩn, ovelha kyvénh tý,” he mũ, “Topẽ tý jẽnẽ jafã tý ájag krẽ ve ag kãgtén tú nĩ jé,” he ja tóg nĩgtĩ, Moisés ti, Israel ag mý. Há ký ag tóg festa tý Páscoa ěn han tí, ũri.

²⁹ Israel ag vỹ Topẽ ki ge ký nỹti ja nĩgtĩ gé, há ký ag tóg goj kusũg he mũ ěn kã rêgrẽg há han inhhã, ěg tý ga kri mũ ěn ri ke han ag tóg. Mrĩnmrér ja tú ag tóg nĩgtĩ. Egito tá ke ag tý ag nón kã rêgrẽg sór mũ ra tóg ag kri rũm ke mũ sir, goj ěn ti, ký ag tóg nỹgnỹr ký kãgter kãn mũ sir.

³⁰ Israel ag vỹ Topê ki ge kỹ nỹtĩ ja nĩgtĩ gé, hã kỹ cidade tỹ Jericó jy ró ên vỹ vêsóg ki kórég kãn ja nĩgtĩ. Ag tỹ pénĩn mũ tỹ 7 (ke) han kar kỹ tóg vêsóg ki kórég ja nĩ, ag tỹ kurá tỹ 7 (ke) ki pénĩn mũ kar kỹ.

³¹ Raabe fi vỹ Topê ki rã kỹ nĩ ja nĩgtĩ gé. Ûn mén (ka)mê vỹ tỹ fi nĩ ja nĩgtĩ, hã ra fi tóg Topê ki rã. Hã kỹ fi tóg Israel ag mỹ: “ha kãge jêg,” he ja nĩ, ù tỹ fi jamã venh kãmũ mũ ag. Hã kỹ ag tóg fi tén ja tũ nĩ gé. Cidade tá ke kar kãgtén ja ag tóg nĩgtĩ, ag tỹ Topê ví mẽ sór ja tũ tũgrĩn, hã ra fi tóg inhhã kren ja nĩgtĩ.

³² Inh hỹn ù tónh ke mũ gé ver'. Isỹ ag tó kãn sór mũ ra tóg inh mỹ vẽnhmỹ tĩ. E ag nỹtĩ, e tãvĩ, Gideão ti, Baraque ti, Sansão ti, Jefte ti, Davi ti, Samuel ti, Topê ví tó tĩ kar ag.

³³ Topê ki ge kãn kỹ ag nỹtĩ, hã kỹ ag tóg pã'i ag mré vẽnh génh han, hã ra ag tóg pã'i ên ag tỹ hẽn ri ke kãn. Vẽnh jykre kurj han ag tóg tĩ, vẽnh kar mỹ. Kỹ Topê tóg ag mỹ ã tỹ ag mỹ vẽnh jykre há tó mũ ãn tỹ ag mỹ ven mũ sir. Mĩg tỹ ù mãn sór mũ ra tóg tĩ tỹ hẽ ri ke ja tũ nĩgtĩ gé, mĩg ti.

³⁴ Pĩ gru jagy ên vỹ ag tỹ hẽ ri ke ja tũ nĩgtĩ gé, ù tỹ Topê ki ge kỹ nỹtĩ ag. Û tỹ rógro tỹ ag tén sór mũ ra tóg ag tỹ hẽ ri ke ja tũ nĩgtĩ gé. Ag krój nỹtĩ ra ag tóg tar gy nỹtĩ ja nĩgtĩ. Vẽnh génh han kỹ ag tóg rará há han, kỹ ag tóg ag kato vãsãnsãn mũ ag tỹ pêtê han gé.

³⁵ Ûn tỹtã ù fag vỹ, ãjag krê ter kar kỹ fag vỹ ag ve mãn, ag tỹ ag rĩn mãn kỹ, Topê ki ge kỹ nỹtĩ ên ag.

Hã ra ag kato vãsãnsãn mũ ag vỹ ag to jũ mág, kỹ ag tóg ag kãmũ ù ag vóg kónãn gé. Kỹ ag tóg ag kygrêg gé, ù tỹ Topê ki ge kỹ nỹtĩ ag, ag tỹ Topê to jũ kỹ, ù tỹ ag kygrêg mũ ag. Ag mỹ ag tóg: “ãjag tovãnh jé êg tóg ke mũ, ãjag tỹ Topê tovãnh kỹ,” he ja nĩgtĩ, hã ra ag tóg Topê tovãnh sór ja tũ nĩ. Ag tỹ kanhkã tá rĩnrĩr nỹtĩ sór ja vê, hã kỹ ag tóg Topê tovãnh ja tũ nĩ.

³⁶ Ag kãmũ ù ag to ag tóg é he mũ gé, kỹ ag tóg ag mrãnmrãn gé, ag sigse ag tóg, ke gé, kỹ ag tóg vêsẽ jafã kãtã ag vãm gé.

³⁷ Pó tỹ ag pin kỹ ag tóg ag kãgtén gé, rãnran jafã tỹ ag tóg ag rãnran gé, serrote tỹ. Rógro tỹ ag tóg ag kãgtén gé, Topê ki ge kỹ nỹtĩ ag. Ag tỹ hẽ mĩ mũn kỹ ag tóg carneiro fár tỹ kur rĩnh ja nĩgtĩ, cabrito fár tỹ kur ke gé, ag tỹ Topê ki ge tũgrĩn jagtar nỹtĩn kỹ. Vêjẽn ve ja tũ ag tóg nĩgtĩ kejẽn, jagãgtar ag tóg nỹtĩ, ag vóg kónãn ja ag tóg nĩgtĩ gé.

³⁸ Ag mré ke ag vỹ kórég pẽ nỹtĩ ja nĩgtĩ, hã kỹ ag tóg ùn há tag ag to kórég nỹtĩ ja nĩgtĩ. Kỹ ag tóg ga kórég kri mũ ja nỹtĩgtĩ, ag jo pêtê kỹ, sór kri ag mũgtĩ, kỹ ag tóg pãnónh nor kãki nỹtĩ ja nĩgtĩ gé, ga nor kãki ke gé, ù tỹ Topê ki ge kỹ nỹtĩ ag. Êprã ke ag vỹ ag to jũ mág nỹtĩ ja nĩgtĩ.

³⁹ Ag tỹ Topê ki ge kỹ nỹtĩn kỹ tóg hã ra ag to há nĩ, Topê ti. Hã ra ag tóg tag ki ve ja tũ nĩ ver, ag tỹ nẽn ve sór mũ ên ti, Topê tỹ ag mỹ nẽn tó ja ên ti.

⁴⁰ Topê vỹ êg to jykrén ja nĩ gé, hã kỹ tóg ver ag mỹ ven ja tũ nĩ. Ti tỹ êg mré ag mỹ ven sór vê, êg tỹ jagnê mré kanhkã tá junjun jé.

12

Topê tỹ êg kanhrãn sór mũ

¹ Ha vé, e tãvĩ ag nỹtĩ, ù tỹ êg jo Topê tovãnh tũ ag. Êg pénĩn ag e nỹtĩ, êg ve kỹ. Kỹ tóg há tĩ, êg tỹ Topê japry jagma mũ há han ke ti, ti jamĩn jagma. Êg tỹ corrida han ri ke ti nĩ. Êg tỹ tỹ vaj kỹ corrida han ken kỹ êg tóg vẽnkhãn há han ke mũ. “Sỹ tag han kỹ inh mỹ corrida to krónh kenh ke tũ nĩ vỹ?” he êg tĩ. “Ne nỹ isar han mũ, corrida to?” he êg tóg tĩ gé. Êg tỹ nẽn han ke mũ ên tovãnh

ĕg tóg tĩ, ĕg tỹ corrida to krónh ke tũ nĩ jé. Topĕ jykre ri ke ti nĩ, tag ti. “Tag mỹ Topĕ to isar han mũ vỹ?” hemnĩ, ājag tỹ nén han ke mũ ĕn kar to. Ājag tỹ nén han ke mũ tugrĩn ti to tar nỹtĩn kỹn há tĩ. Ājag tỹ nén han ke mũ ĕn tugrĩn ti to krónh kenh ha mẽ tĩn kỹ han tũg nĩ, tovānh nĩ. Ti vỹ mranh sór tũg nĩ gé. Tag vỹ ĕg kókén pĕ han tĩ. Ājag tỹ nén han tĩ tag kar tovānh kỹ ājag tóg ti jykre hā to krónh kenh ke tũ pĕ nĩ.

² Jesus hā mĩ ĕkrén nĩ, ti jykre hā tỹ krĩn kỹ nỹtĩmnĩ. Ti hā vỹ ĕg tỹ Topĕ ki rā han, kỹ tóg ĕg tỹ ti tovānh ke tũ han ĕn ki kanhró nĩ gé. Cruz to sa kỹ tóg ter mỹr, ag tỹ ti to é he mũ ra tóg ti mỹ tỹ nén ũ tũ tĩ. Ti tỹ kar kỹ nén venh ke ĕn mĩ tóg ĕkrén ja nĩ, nén tỹ ti mỹ sér nĩnh ke ĕn mĩ. Hā kỹ tóg ũri Topĕ pĕgja tá nĩ nĩ.

³ Jesus mĩ ĕkrén nĩ. Ēprā ke kar ag vỹ ti kato vỹ ja nĩgtĩ, ũ tỹ Topĕ vỹ mranh mũgtĩ ĕn ag, ge ra tóg Topĕ to krónh ke ja tũ nĩgtĩ, Jesus ti. Ti ki ĕkrén kỹ to krónh krónh ke tũg nĩ, to: “ron inh mũ,” he tũg nĩ gé.

⁴ Ha vé, Topĕ vỹ mranh tũg nĩ. Ājag tỹ ti vỹ mranh sór mũ tag kato vāsānsān nĩ, ke tũ nĩ (mũ) ra ājag tóg to ter mũ.

⁵ Ājag mỹ Topĕ tỹ ĕg jyvĕn ĕn kã jatu? Ēg jyvĕn kỹ tóg tag tó, ha mẽ. Ā krĕ mỹ tóg tag tó, Topĕ ti, ha mẽ: “inh kósin, isỹ ā vóg kónān kỹ inh mỹ vĕnh nenh tũg nĩ,” he tóg. “Isỹ ā mỹ vỹ tar han mũ ra to krónh ke tũg nĩ.

⁶ Isỹ ā to há nĩn kỹ, hā kỹ sóg ā mỹ vỹ tar han tĩ. Ā kanhrān jé ke vĕ. Isỹ ā mỹ: “inh kósin vỹ tỹ ā nĩ,” hen kỹ sóg ā mrānmrān tĩ gé, ā kanhrān ti jé,” he tóg, Topĕ vỹ tỹ rán kỹ nĩ ki.

⁷ Hā kỹ ti tỹ ājag mrānmrān tag to tar nỹtĩmnĩ. Ājag kanhrān jé ke vĕ. Topĕ tỹ ājag mỹ: “inh krĕ,” he vĕ. Ēg panh vỹ ĕg mrānmrān kỹ ĕg kanhrān ja nĩgtĩ gé. Vĕnh kar jykren hā vĕ. Topĕ vỹ ā krĕ kar mrānmrān kỹ ag kanhrān tĩ.

⁸ Kỹ, ti tỹ ājag mrānmrān tũ nĩ ra ājag pi(jé) tỹ ti krĕ pĕ nỹtĩnh mũ vĕ’.

⁹ Ha vé, ĕg han mũ fag vỹ ĕg mrānmrān tĩ, ĕg kanhrān jāvānh nĩn kỹ, kỹ ĕg tóg fag kamĕg tĩ. Kỹ ĕg tóg Topĕ kamĕg kãfór han ke mũ, ũ tỹ ĕg rĩnrĩr han mũ ti, ĕg jóg mág ti.

¹⁰ Kỹ ũ tỹ ĕg han mũ tóg ĕg to ā jykre fi ja nĩgtĩ. To jykren kỹ tóg ĕg mrānmrān tĩ kejĕn, ĕg sĩn kã. Kejĕn tóg ā tỹ kygnĕ kỹ nĩ ra ĕg kanhrān sór tĩ gé, ĕg panh tĩ. Hā ra Topĕ tỹ ĕg mrānmrān kỹ tóg to jykren há han tĩ inhhā. Ti tỹ ĕg kãnhrān há han sór vĕ, ĕg tỹ ti ri kén kygnĕg tũ nĩ jé, ĕg tỹ ti ri kén há tãvĩ nỹtĩ jé.

¹¹ Ti tỹ ĕg mrānmrān ĕn kã tóg ĕg mỹ sér tũ nĩ ver. Ēn kã tóg ĕg mỹ jagy tĩ. Kar kỹ ĕg tóg vāhā vég tĩ, ti há nĩ ja ti, ĕg tỹ kanhrān há han kar kỹ. Ti tỹ ĕg mrānmrān hā kỹ ĕg tóg vĕnh jykre há han ĕn ki kanhrān mũ sir, jagnĕ krĩ kuprãg ki ĕg kanhrān mũ gé sir.

Ēg tỹ jagnĕ tar han ke

¹² Krónh ke ve ājag tóg nĩ, kỹ ājag tóg tỹ ũn kaga tĩg kórég ĕn ri ke nỹtĩ. To tar’ he mǎn nĩ, ājag tỹ mũ há han mǎn jé.

¹³ Topĕ japry kuryj hā jagma ĕvānh nĩ, kỹ ũ tỹ ājag mỹ to krónh ke ha mẽ ĕn ag vỹ ājag mré to tar’ he mǎn mũ gé. Topĕ jykre tovānh sór nĩ ve ājag nỹtĩ, hā ra tóg ājag tar han mǎn sór mũ.

¹⁴ Vĕnh kar mré vĕnh jykre kuryj han sórmnĩ. Kỹ Topĕ vỹ ki króm kỹ kygnĕ sór tũg nĩ. Ēg tỹ tag to vāsān tũ nĩn kỹ ĕg pi(jé) ĕg jóg mág venh ke mũ’.

¹⁵ Vĕnh ki rĩr há han nĩ, ājag kãmĩ ũ tỹ Topĕ tỹ ĕg jagãgtān mũ tag to é he tũg jé. Ājag kãmĩ ũn pir tỹ vĕnh jykre kórég to tar nĩn kỹ tóg ĕg mỹ ti tỹ ũn e ag krĩn

kónān ha mē tī, ag t̄y ti jykre kórég ěn ri ke n̄y t̄i jé. K̄y tóg ěg jakré kāmī vānh jagy ri ke n̄i. Ěg jakré kókég ti t̄i, vēnh jykre kórég t̄y ěg kókén ri ke.

¹⁶ Vēnh ki r̄ir há han n̄i gé, ājag kāmī ū t̄y Esáu jykre kórég ěn ri ke han t̄u n̄i jé, ū t̄y Topē kato vāsān t̄u n̄i jé. Esáu v̄y Topē to é he ja n̄i ḡt̄i, k̄y tóg v̄ējēn tugr̄in ā panh t̄y ti m̄y v̄i há han ke ěn kren. Ā jāvy m̄y tóg tovānh, ti panh t̄y ti m̄y v̄i há han ke ěn ti, ā jēn ke pir tugr̄in m̄y. Ti t̄y ā panh t̄y ti m̄y v̄i há han ke ěn to é he hā vē.

¹⁷ Kar k̄y tóg mē sór ja n̄i, ti panh t̄y ti m̄y v̄i há han ke ti, hā ra tóg m̄eg t̄u n̄i sir. K̄y tóg f̄y ja n̄i ḡt̄i, ti panh t̄y ti m̄y v̄i há han jé, vāhā tóg ti m̄y e n̄i ja n̄i ḡt̄i, hā ra tóg sir rāké ja n̄y. M̄eg t̄u tóg n̄i sir, ti panh t̄y ti m̄y v̄i há han ke ti. Tag ri ke han sór t̄u n̄i.

Topē jū t̄y jagy pē

¹⁸ Vās̄y Topē v̄y ěg jóg'jóg ve ag m̄y ā jykre n̄im ja n̄i ḡt̄i. Pānóh t̄y Sinai tá ag tóg junjun ja n̄i ḡt̄i. P̄i ve ag tóg, tá, k̄y tóg tá kuty n̄i ja n̄i ḡt̄i gé, kuty pē, kóho jū ke gé.

¹⁹ K̄y trombeta ěn v̄y kyr ja n̄i ḡt̄i gé. K̄y Topē v̄y ag m̄y v̄i ja n̄i gé. Ag t̄y ti v̄i mē k̄y ag tóg j̄ūrūn ke ja n̄i ḡt̄i, k̄y ag tóg ti m̄y to v̄i m̄u, ti t̄y ag m̄y vēmēn t̄u n̄i jé, ti t̄y ag k̄ānhm̄y Moisés hā mré vēmēn jé, ěgno ki.

²⁰ Ag m̄y tóg: “ājag m̄eg ū t̄y pānóh tag rā hā jun k̄y ti tén n̄i,” he ja n̄i, “pó t̄y ti pin k̄y, ājag krē ke gé, ājag pr̄u fag ke gé, ājag t̄y tá nén v̄eg m̄u kar ěn ti. Ti t̄y pānóh tag vóg tugr̄in ti tén n̄i,” he ja tóg n̄i, Topē ti. Hā tóg ag m̄y e ja t̄i ḡt̄i.

²¹ Topē t̄y ag mré vēmēn k̄y tóg ag m̄y e tāv̄i n̄i ja n̄i ḡt̄i, Moisés mré hā, hā k̄y tóg: “j̄ūrūn ke inh, m̄um̄eg k̄y,” he m̄u gé, Moisés ti.

²² Hā ra tóg ag t̄y nén ve ja ěn ri ke t̄u n̄i, ěg t̄y ūri Topē r̄inja tá jun ke ti. Pānóh ěn ri ke t̄u ti n̄i, ěg t̄y kanhkā tá nén venh ke ti. Ěg t̄y kanhkā tá jun ken k̄y ěg ter m̄ān ke t̄u n̄i gé, ěg t̄y kanhkā tá pānóh t̄y Siāo he m̄u ěn tá jun ken k̄y. Topē jamā tá ke vē, ūn r̄ir m̄u ěn jamā tá ke vē, hā v̄y: Jerusalém, he m̄u, kanhkā tá cidade ěn ti. Topē t̄y j̄egnē jafā ag v̄y tá n̄y t̄i. E tāv̄i ag n̄y t̄i, e tāv̄i, ti t̄y j̄egnē jafā ag. Festa mág pē vē, tá.

²³ K̄y Topē krē sanh kar ag v̄y tá n̄y t̄inh ke m̄u gé, ūn t̄y Jesus ki ge k̄y n̄y t̄i ag kar. Ag jygjy v̄y kanhkā tá rán k̄y n̄y t̄i. K̄y Topē v̄y tá n̄i gé, ū t̄y vēnh kar jykre tugn̄ym ke ti. K̄y ū t̄y ěg jo Topē ki ge k̄y n̄y t̄i ag kupr̄ig v̄y tá n̄y t̄i gé, ū t̄y ěg jo tá junjun m̄u ěn ag.

²⁴ K̄y Jesus v̄y tá n̄i gé, ū t̄y ěg m̄y vēnh jykre t̄ag n̄im m̄u ěn ti, ū t̄y ěg jagfy ter m̄u ěn ti, k̄y ěg tóg ti kyvénh tugr̄in jānhkri n̄y t̄i, Topē t̄y ěg m̄y vēnh p̄āte fón ti k̄y. Topē t̄y Abel kyvénh ven k̄y tóg jū m̄u, ū t̄y ti tén ja ěn to. Topē t̄y Jesus kyvénh ven k̄y tóg jāvo ěg m̄y vēnh p̄āte fón m̄u. Ěg t̄un hā vē, Jesus t̄y ěg m̄y vēnh jykre n̄im jan hā vē, hā k̄y tóg Moisés jykre k̄áfór n̄i, Jesus ti.

²⁵ Hā k̄y j̄ēmē há han n̄i. Ū t̄y ājag m̄y Topē v̄i tó m̄u ěn v̄i j̄ēmē há han sórmn̄i. Ěg jóg'jóg ve ū ag v̄y Topē v̄i mē sór ja t̄u n̄i ḡt̄i, ti t̄y ag jyv̄ēn m̄u ra. Hā k̄y ag krenkren ja t̄u n̄i. K̄y ěg krenkren ke t̄u n̄i gé, ěg t̄y ū t̄y kanhkā tá n̄i ěn to ěg mré vēmēn sór m̄u ěn v̄i j̄ēmē sór t̄u n̄in k̄y, ti t̄y ěg jyv̄ēn m̄u ti.

²⁶ Vās̄y tóg, ā t̄y ěg jóg'jóg ve ag mré vēmēn k̄y tóg ga t̄y ragra ke han ja n̄i ḡt̄i. Ūri tóg ěg m̄y tag tó, ha mē. “Ga t̄y ragra ke pir han m̄ān jé sóg ke m̄u,” he tóg. “Ěn k̄ā kanhkā v̄y ragra ke m̄u gé, ha vemn̄i,” he tóg.

²⁷ Ti tÿ: “ke pir han mǎn jé sóg ke mǔ,” hen kÿ ěg tóg ki kanhró nÿtĭ, ti tÿ ǎ tÿ nén han ja tag tÿ tǔ’ he sór mǔ ti, ti tÿ ga tÿ ragra kenh ken ki. Nén ũ tÿ ragra kenh ke tǔ ěn hǎ tóg nĭnh ke mǔ inhhǎ, hǎ vÿ: “Topê jamǎ, he mǔ.

²⁸ Kÿ tóg há tĭ, ěg tÿ Topê mÿ: “há ti nĭ, ǎ tÿ ěg mÿ nén han mǔ ti,” hen kÿ. Ěg jamǎ tǎg vÿ inhhǎ ragra kenh ke tǔ pē nĭ, ti tÿ ěg mÿ ěg jamǎ nĭm ke ěn ti. Kÿ tóg há nĭnh mǔ gé, ěg tÿ Topê rǎnhrǎj han há han kÿ, ti tÿ ti mÿ sér nĭ jé. Ti kamĕg jé ěg tóg ke mǔ gé, ěg tÿ tóg jǔrŭn kenh mǔ.

²⁹ Topê vÿ pi tÿ nén ũ kar kugprŭg mǔ ri ke nĭ.

13

Topê tÿ ěg jyvĕn

¹ Jesus ki ge kÿ nÿtĭ ag tÿ jagnĕ to há nÿtĭ to krónh ke tŭg nĭ.

² Ũ tÿ kuvar há tá ājag to pasa ken kÿ ti mÿ: “inh mré jĕ,” hemnĭ. Ěg jo ke ũ ag tóg, ag tÿ ũ ag to: “inh mré nÿtĭ,” hen kÿ (ag tóg) Topê tÿ jĕnĕ jafǎ ag mÿ: “inh mré nÿtĭ,” he ja nĭgtĭ, ag tÿ ag ki kagtĭg (hǎ) ra. Hǎ kÿ tag han nĭ.

³ Ũn sigse kÿ nÿtĭ ag ki rĭrnmĭ. Ājag tÿ kejĕn Jesus tigrĭn sigse kÿ nÿtĭnh ke tag mĭ ěkrén nĭ, hǎ kÿ jagnĕ ki rĭr há han nĭ. Ag tÿ ũn vóg kónǎn mǔ ag ki rĭrnmĭ gé. Kejĕn ag tóg ājag vóg kónǎn ke mǔ gé, Jesus tigrĭn, hǎ kÿ ag ki rĭr há han nĭ.

⁴ Ũ prŭ fi to én tŭg nĭ, ũ mén to én tŭg nĭ gé. Ājag prŭ nÿtĭnh kÿ ũ fi mré nÿ sór tŭg nĭ, ājag mén nÿtĭnh kÿ ũ mré nÿ sór tŭg nĭ gé. Topê vÿ ũ tÿ vĕnh jykre kórég han (ka)mĕ ěn ag to jŭnh ke mǔ, ũ tÿ fag mré nÿ sór (ka)mĕ ěn ag to, fag tÿ ag mré nÿ sór (ka)mĕ ěn fag to ke gé.

⁵ Rico nÿtĭ sór tŭg nĭ gé. Ājag tÿ nén vég mǔ ěn vÿ há nĭ. Topê vÿ ěg mÿ tag tó, ha mĕ: “ājag kǎ jatu’ henh ke tǔ pē sóg nĭ, ājag ki sóg rĭr nĭ nĭ,” he tóg, Topê ti.

⁶ Hǎ kÿ tag tómnĭ, ha mĕ: “ěg jóg mág vÿ inh ki rĭr ke mǔ,” hemnĭ. “Ti hǎ kamĕg isóg mǔ. Ěprǎ ke ũ vÿ inh vóg ke tǔ pē nĭ, ti tÿ inh ki rĭr nĭn kÿ,” hemnĭ, Topê vĭ kri fi kÿ.

⁷ Ũ tÿ ājag mÿ Topê vĭ tó vén mǔ ěn mĭ ěkrén nĭ. Ga kri mŭn kÿ ag tóg Topê tovǎnh ja tǔ pē nĭgtĭ, ājag tÿ ti tovǎnh tǔ ra ag tóg kǎgter ja nĭ. Ag ri ke han sórmnĭ, ti ki rǎ ěn tovǎnh sór tŭg nĭ gé, ag ri ke han nĭ.

⁸ Jesus Cristo hǎ vÿ ter tǔ nĭ. Ti tÿ vǎsÿ nén to jykrén mǔ ěn hǎ han ti tĭ, ũri, kÿ tóg hǎ han mǎn ke mǔ gé. Tÿ ũ han ke tǔ ti nĭ, kÿ tóg kurǎ krÿg ja tǔ nĭ gé.

⁹ Ũ tÿ ón kÿ ājag mÿ nén ũ ũ tó sór mǔ ěn vĭ jĕmĕ tŭg nĭ, ag tÿ ón kÿ Topê to nén ũ ũ tó mǔ ra. Ājag krĭn kónǎn jé ag tóg ke mǔ. Ājag tÿ tÿ prǎnh ke han sór jé ag tóg ke mǔ. Topê vÿ ājag tar han ki kanhró nĭ, ājag jagǎgtǎn kÿ. Ũ tóg: “ǎ tÿ vĕjĕn tag kon kÿ ǎ tóg Topê jykre to tar nĭ,” he tĭ. Ag ón vĕ. Vĕjĕn vÿ ěg tÿ ti jykre to tar nĭ han ke tǔ pē nĭ. Topê hǎ ne ěg tar han ki kanhró nĭ’.

¹⁰ Ha mĕ, Moisés jykre ki Topê mÿ nén ũ pŭn tĭ ag pi(jé) ěg mré Jesus jamĭn ěn konh ke mǔ’.

¹¹ Ag tÿ Topê tǔ ki rĭr tĭ to pǎ’i mág ěn vÿ ag mĕg ũ tǎnh kÿ ti kyvĕnh ma tĭ tĭ, ag tÿ to: “Topê nĭgjafǎ,” he mǔ ěn ra. Ti tÿ ag mĕg kyvĕnh ěn tÿ ěg tÿ Topê vĭ mranh mǔ tÿ tŭg’ he sór vĕ vĕ. Hǎ ra ag tóg ājag jamǎ jy ró pǎnĭ to ag tóg ājag mĕg tǎnh kÿ pŭn tĭ.

¹² Hǎ kÿ Jesus tóg cidade jy ró ěn pǎnĭ to ter ja nĭ gé, ti tÿ ěg jagfy ter kÿ, ěg jǎnhkri han jé.

13 Kÿ ãg tóg ti jagtar ri ke han ke mũ gé. Û tÿ ti ki ge jãvãnh ag jykre han tũ ãg tóg nĩ, kÿ ãg tóg ag mré han ke tũ nĩ gé. Jesus tÿ cidade jy ró pãnĩ to ter ja ên mĩ ãg tóg êkrén kÿ nÿtĩ, kÿ ãg tóg ù tÿ ti ki ge tũ ag mré ag jykre han ke tũ pẽ nĩ.

14 Tag ki, ga kri ãg tóg ãg jamã pẽ venh ke tũ nĩ. Kanhkã tá ãg tóg ve sór mũ, ãg jamã ti.

15 Ëg tÿ Jesus tugrĩn Topẽ mÿ vĩ há han kÿ tóg há tĩ. Ëg tÿ nén vég mũ kar to ãg tóg ti mÿ: “ãg mÿ tóg há tĩ, ãg mÿ tóg sér tĩ,” henh ke mũ. Ëg tÿ ti mÿ nén ù pũn mũ ri ke tóg nĩ, presente ri ke tóg nĩ, ãg vĩ tag. “Ëg jóg vẽ,” he jé ãg tóg ke mũ gé, ti to. Ti mÿ vĩ há han ke to krónh ke tũg nĩ.

16 Jagnẽ ki rĩrmnĩ gé, jagnẽ mré nén kar han kÿ. Tag to krónh ke tũg nĩ gé. Ëg tÿ Topẽ mÿ nén ù pũn ri ke ti nĩ, ãg tÿ ti mÿ presente han ri ke ti nĩ, ãg tÿ jagnẽ ki rĩr tĩ ti, kÿ tóg ti mÿ sér tĩ.

17 Û tÿ ãjag kanhrãn tĩ ên ag vĩ jêmêmnĩ, ag tÿ ãjag mÿ nén tó mũ ên ki króm nĩ. ãjag ki rĩr ag tóg nĩgtĩ, ãjag tÿ Topẽ tovãnh tũ nĩ jé, kÿ Topẽ vÿ ag rãnrãj tugnÿm ke mũ. ãjag tÿ ag vĩ jêmên kÿ tóg ag mÿ kufy tũ nĩnh mũ, ag rãnrãj ti, kÿ tóg ag mÿ sér tĩnh mũ. Ti tÿ ag mÿ kufy nĩn kÿ tóg há tũ nĩ gé, ãjag mÿ.

Ëg tÿ Topẽ mré vēmén ke

18 Inh jagfy Topẽ mré vēmén nĩ. Nén ù kórég han ja tũ inh nĩ, ki kanhró sóg nĩ. Isÿ nén ù kuryj han sór vẽ mÿr, tag hã to sóg jykren tĩ.

19 Kÿ inh jagfy Topẽ mré vēmén nĩ, Topẽ tÿ kãnhmar ãjag to inh jẽnẽ mãn jé. Ti mÿ tag to vĩn kÿ krónh ke tũg nĩ.

20 Topẽ mré sóg vēmén tĩ ãjag to. Ëg krĩ kuprãg ti tĩ. Kÿ tóg Jesus ti, ãg Senhor ti rĩn mãn ja (ti) nĩ gé, ti tÿ ãg jagfy ter kar kÿ. Ëg jagfy ter kÿ tóg ù tÿ mé ki rĩr tĩ ên ri ke nĩ, hã ra tóg ên kãfór nĩ gé, ti tÿ ãg ki rĩr há han nĩn kÿ. Ëg jagfy ter kÿ tóg ãg mÿ vẽnã jykre tãg ên nĩm ja nĩ, ù tÿ tũ' he vãnh ên.

21 Topẽ hã mÿ sóg to vĩ mũ, ti tÿ ãjag tar han jé, ãjag tÿ nén (ũ) tÿ ti mÿ há nĩ ên hã han jé. Ti há vÿ Jesus Cristo mÿ: “ag tar han nĩ,” he ja nĩ. Ti hã mÿ ãg tóg vĩ há han ke mũ, Jesus Cristo mÿ, kÿ tóg tũ' henh ke tũ nĩ, ãg tÿ ti mÿ vĩ há han ke ti. Amém.

22 Inh kanhkã, sÿ ãjag mÿ tag tó sór ja vẽ. Jatun mÿ mẽ sórmnĩ, sÿ ãjag jyvẽn mũ tag. Inh pi(jé) vẽnã rãnrãn mág han. Vẽnã rãnrãn sĩ han sóg ãjag mÿ.

23 Ha mẽ, ãg régre tÿ Timóteo vÿ se kÿ jé mãn tũ nĩ ha. Ti kava ag huri. Ti tÿ kãnhmar ki jun kÿ tóg inh mré ãjag venh kãtĩg ke mũ.

24 ãjag pã'i kar ag mĩ sóg êkrég tĩ, Topẽ ki ge kÿ nÿtĩ kar ag mĩ ke gé. Tag ki ke ag, ga tÿ Itália ki Topẽ ki ge kÿ nÿtĩ ag vÿ ãjag mĩ êkrég tĩ gé.

25 Topẽ jé ãjag tar han kãn.

Hã vẽ.

TIAGO TỸ CARTA

¹ Tiago tỹ rá vê. Isỹ Israel ag mỹ rán há vê. Êg povo tỹ 12 (ke) vỹ tỹ ãjag nỹti. Povo kar mĩ ãjag tóg mũgtĩ, fóg ag kar mĩ, kanhgág ag mĩ ke gé. Sỹ ãjag mỹ vênh rá jênê vê. Tỹ sóg Topê mỹ rânhrãj tĩ nĩ, êg Senhor tỹ Jesus Cristo mỹ. Hã kỹ sóg ãjag mỹ rán kỹ jênêg mũ sir. ãjag mĩ sóg êkrêg tĩ.

Êg tỹ Topê vĩ to: hỹ mỹ vỹ? henh ke tũ

² Inh kanhkã', ãjag tỹ Jesus tugrĩn nén ù jagy ve kỹ to vênhmỹ nỹti tũg nĩ. Mỹ sér nỹtĩmnĩ há ra.

³ Topê tỹ ãjag tỹ ti ki rã há han ja ve sór vê, hã kỹ ãjag tóg tag kar vég tĩ. Kỹ ti tovãnh sór tũg nĩ, kỹ ãjag tóg ti to tar nỹtĩnh mũ, ãjag tỹ nén ù jagy vég mũ ra ti tovãnh tũ nĩn kỹ. Tag to jykrén.

⁴ ãjag tỹ nén ù jagy vég mũ ra to tar nỹtĩmnĩ, ãjag tỹ komêr hã há nỹti jé, Topê jykre ki króm há han kỹ. Komêr hã ãjag tóg kygnênh ke tũ nĩ, nén ù kar ki, ãjag tỹ ti to krónh ke tũ nĩn kỹ.

⁵ ãjag tỹ nén ù to jykrén tũ nĩn kỹ Topê mỹ to vĩmnĩ, ti tỹ ãjag kanhrãn jé. Êg kanhrãn jé tóg ke mũ, Topê ti. To tóg: "han ke tũ inh nĩ," henh ke tũ nĩ, vĩ tar han ke tũ ti nĩ, êg tỹ ti mỹ nén ù to vĩn kỹ. Êg to tóg fe há nĩ, hã kỹ tóg êg kanhrãn tag to há nĩ.

⁶ ãjag tỹ ti mỹ nén ù to vĩn kỹ: "êg mỹ tóg han tĩ, Topê ti," hemnĩ. "Ti mỹ inh mỹ han mũ vỹ?" he tũg nĩ. ãjag tỹ: "ti mỹ inh mỹ han mũ vỹ?" hen kỹ ãjag tóg venh ke tũ nĩ, ãjag tỹ ti mỹ nén to vĩ mũ ên ti. Kỹ ãjag tóg goj ri ke nỹti. Goj tóg kejên fagrĩnh mỹ krém krém ke tĩ, kãka tỹ ti kã nĩ kỹ. Kỹ tóg ra tũg, tá kãtũg ke mũ. Ên ri ke tóg nĩ, ù tỹ Topê vĩ kri fig tũ ên ti.

⁷⁻⁸ Fagrĩnh mỹ tóg Topê mỹ nén ù to vĩ tĩ, ti tỹ: "ti mỹ inh mỹ han mũ vỹ?" hen kỹ. Venh ke tũ tóg nĩ sir. Krĩ régre ti nĩ. Nén ù to jykrén kỹ tóg kãnhmar nén ù hã to jykrén mân mũ gé, vênh jykre pir han vãnh nĩn kỹ. Kĩ kãgtũg tóg nĩ, hã kỹ tóg venh ke tũ nĩ gé sir.

Ûn jagtar ag mré ùn rico ag jykre

⁹ Êg Senhor tỹ Jesus mré ke ù ag tóg jagãgtar nỹti. Hã ra ag tóg êg Senhor ki ge kỹ nỹtĩn kỹ ùn rico ri ke nỹti, ag tỹ tỹ Topê krê nỹtĩn kỹ. Kỹ tag to jykrén nĩ, ãjag mỹ sér tĩ jé, ãjag jagtar nỹtĩn kỹ.

¹⁰ Kỹ êg Senhor tỹ Jesus mré ke ù ag tóg rico nỹti há ra. Ag tỹ êg Senhor ki ge kỹ nỹtĩn kỹ ag tóg ùn jagãgtar ri ke nỹti, Topê mỹ. "Ter jé êg tóg ke mũ, kỹ tóg êg mỹ há tĩ, Topê tỹ êg jagãgtãn ken kỹ, ùn jagtar ag ri ke," hemnĩ, ãjag rico nỹtĩn kỹ. Re fej ri ke êg tóg nỹti, êg kar.

¹¹ Rã tỹ jun ke kỹ tóg rỹ jagy tĩ. Kỹ tóg tugtóg tĩ, re ti, kỹ ti fej tóg kógungun tĩ gé. Kỹ ti sĩnvĩ ên tóg tũ' henh mũ sir. Ên kãgter ri ke êg tóg nỹti gé. Kỹ ùn rico ag tóg ke tĩ gé, kãgter kỹ. Kỹ ag há ên tóg tũ' he mũ gé sir, ag rânhrãj tỹ ag mỹ sér nĩ ra.

Êg tỹ Topê vĩ mranh sór mũ

¹² Kejên ù tóg Jesus tugrĩn êg to jũ nĩ. Êg tỹ há ra Topê tovãnh tũ nĩn kỹ tóg há tĩ. Kỹ êg Senhor tóg êg mỹ êg rĩr krỹg ja tũ ven ke mũ, êg tỹ êg jagãgtar mũ ra ti tovãnh tũ nĩn kỹ. Kỹ tóg êg tỹ carreira ki ka féj tỹ coroa ganhar he mũ ên

ri ke nĩ sir. Êg Senhor vỹ êg mỹ: “rĩr krỹg ja tũ ve jé ãjag tóg ke mũ, ãjag tỹ iso há nỹtĩn kỹ,” he ja nĩgtĩ, hã kỹ tóg êg mỹ tỹ presente han ke mũ.

13 ãjag tỹ Topê vĩ mranh sór mũn kỹ to: “Topê vỹ inh krĩn, sỹ ti vỹ mranh jé,” he tũg nĩ. Topê pi(jé) vẽn h jykre pãno han ja nĩgtĩ'. Kỹ ù pi(jé) to Topê krĩn kónãn tí gé'. Kỹ tóg êg krĩn kónãn tũ nĩgtĩ gé (mỹr), Topê ti.

14 Êg tỹ Topê vỹ mranh sór kỹn ge nĩ, hã nỹ ve nĩ, kỹ êg tóg to én tí.

15 Êg tỹ to én kỹ êg tóg to jykren mág nĩ. Kỹ êg tóg sir han sór mũ. Êg tỹ han sór kỹ êg tóg han mũ. Kỹ êg tỹ ti vỹ mranh vẽ sir. Kar kỹ êg tóg mranh mãn', mranh mãn', he mũ gé, vẽn h jykre pãno vẽ sir. Hã ra êg tóg to nũgme ki vár ke mũ, inferno ki.

16 Inh kanhkã', ãjag to sóg há tãvĩ nĩ. Hã kỹ sóg ãjag mỹ: “kygnê tũg nĩ, Topê to,” he mũ.

17 Topê hã ne ã pin kỹ êg mỹ nén ù há kar han tí'. Nén ù há tãvĩ han tóg tí, Topê tí, êprã ke ag mỹ, hã vỹ: êg, he mũ. Ti hã tóg jẽngrê hyn han'. Rã tỹ êg ki kupũn tũ nĩn kỹ tóg fẽnja tí. Hã ra Topê tóg tag han tũ nĩgtĩ (mỹr). Ti pi(jé) kejẽn êg ki rĩr tũ nĩgtĩ'. Êg ki rĩr tóg nĩ nĩ hã ra.

18 Ti hã tóg êg han mãn', êg tỹ ti ki ge kỹ. Ti tỹ êg han mãn sór kỹ tóg êg han mãn. Êg to tóg ã vỹ há jẽnê. Vẽn h vỹ há tag tỹ tóg êg han mãn mũ sir. Ti tỹ êg han mãn kỹ êg tóg ti tỹ nén han mũ kar kri ke nỹtĩ, êg tỹ tỹ ti krê nỹtĩn kỹ.

Êg tỹ Topê vĩ ki króm ke

19 Inh kanhkã', tag to jykren mág nĩ. Û tỹ nén ù há kãmén kỹ jẽmê há han nĩ. Kãnhmar vỹ tũg nĩ. Kãnhmar jũ tũg nĩ gé.

20 Êg jũ nỹtĩn kỹ êg tóg Topê jykre han tũ nĩgtĩ (mỹr), ti jykre kuryj ti. Hã kỹ jũ tũg nĩ.

21 Hã kỹ nén tỹ êg kavénh tí ên tovãnh kãn nĩ, vẽn h jykre pãno mré hã. Êg kókég tóg tí, êg fãn tóg tí, vẽn h jykre pãno ti. Tovãnh ra. Jatun mỹ Topê vỹ mêmni. Topê hã ne ã vỹ tỹ êg kanhrãn'. Êg tỹ kri fi kỹ êg tóg krenkren ke mũ.

22 Kỹ Topê vỹ han kỹ nỹtĩmni. ãjag tỹ mẽg mũ (hã) ra ki króm tũ nĩn kỹ ãjag tóg krenkren ke tũ nĩ. Ôn kỹ ãjag tóg: “kren jé sóg ke mũ,” henh ke mũ.

23 Êg tỹ jẽmêg mũ (hã) ra ki króm tũ nĩn kỹ êg tóg tag ri ke nỹtĩ, ha mẽ. Kejẽn ù tóg vẽn h vэг mũ, ki vẽn h ve jafãn ki (mỹr, ha mẽ). Kỹ tóg ã kakã vэг mũ sir.

24 ã kakã ve kar kỹ tóg to jykren mãn tũ nĩ. Kỹ tóg ki kagtĩg' he mũ. Tĩg tóg mũ, kỹ tóg ã kakã ki kagtĩg' he mũ. Kỹ tóg fagrĩnh mỹ vẽn h ven ja nĩ sir. Ge êg nỹtĩ, êg tỹ Topê vỹ jẽmêg mũ (hã) ra ki króm tũ nĩn kỹ. Kỹ êg tóg fagrĩnh mỹ mẽ ja nĩ sir.

25 Êg tỹ ti vỹ to jykren mág kỹ tóg hã ra êg mỹ sér tĩnh mũ. Topê vỹ vỹ há nĩ, ti jykre tí. Êg jykre pãno tỹ tũg' he tóg tí, êg tỹ han mãn tũ nĩn jé. Kỹ êg tóg êg tỹ ti vỹ jẽmê kỹ nỹtĩn kỹ to jykren ke mũ. Kã jatun ke tũ êg tóg nỹtĩ sir. Kỹ êg tỹ ki króm kỹ Topê tóg êg mỹ vỹ há han ke mũ sir, êg tỹ nén han mũ kar to.

26 Û ag tóg Topê to: “ti to sóg há nĩ,” he tí. Hã ra ag tóg ù to vỹ kónãn tí, ãjag vỹ to jykren tũ nĩn kỹ. Kỹ ag tóg ón kỹ: “ti to sóg há nĩ,” he ja nĩgtĩ. Kygnêg êg tóg tí, êg tỹ gen kỹ. Hã kỹ êg tóg ón kỹ: “ti to sóg há nĩ,” he tí, êg tỹ ù to vỹ kónãn kỹ.

27 Êg tỹ êg jóg tỹ Topê to há nỹtĩn kỹ, kỹ êg tóg tag han mũ, ha mẽ: ùn panh ter mũ kar jagãgtãn kãn êg tóg tí, ùn mén ter ja fag ke gé, ùn jagãgtar fag. Fag ki rĩr jé êg tóg ke mũ, fag mỹ há tí jé. Kỹ êg tóg nén ù vẽn hmỹ han ke tũ nĩ gé

sir. Topē kato tē mū ag jykre han ke tū ěg tóg nĩgtĩ gé. Hã kŷ ěg tóg ti mŷ kavéj tū nŷtĩ sir. Hã kŷ ěg tóg ón kŷ: “Topē to sóg há nĩ,” he tū nĩgtĩ gé.

2

Ěg tŷ jagnē to věnh jykre pir han ke

¹ Inh kanhkā', ěg Senhor tŷ Jesus Cristo ki ājag ge mū mŷr. Pã'i kar káfór vē (mŷr), ěg Senhor tŷ Jesus Cristo ti. Ge ra ājag ne tóg ūn rico ag to há nŷtĩ', kŷ ūn jagāgtar ag tóg ājag mŷ tŷ nén ū tū nŷtĩ. Ke tŷg nĩ.

² Hēn ri ke mūn ūn rico vŷ Topē vŷ jēmēnh kātŷg mū, ājag vēnhmān kŷ. Ti kur vŷ há tāvĩ nĩ, kŷ ti nĩgē kānĩm ja vŷ tŷ ouro nĩ. Kŷ ūn jagtar vŷ kātŷg ke mū gé, kur kórég tu kŷ.

³ Kŷ ājag hŷn tóg ūn rico mŷ: “ha tag kã nĩ, vēnh nĩg ja há kri,” he tĩ. Jó ūn jagtar mŷ ājag hŷn tóg: “ha tā tá jē,” he tĩ, ke tū nĩn kŷ: “ha inh mré nĩ, hã ra ěprã nĩ, gan kri,” he ājag hŷn tĩ.

⁴ Hã ki ājag tóg ūn rico to há nĩ ve nĩ, ti tū tugrĩn. Jãvo ājag tóg ūn jagtar to é he mū ve nĩ, ti jagtar nĩn kŷ. Ke tŷg nĩ. Ājag tŷ jagnē ri ke nŷtĩ to jykrén nĩ, ke tū nĩ mū ra ājag tóg vēnh jykre pãno han mū.

⁵ Inh kanhkā', jēmē há han ra. Ājag to sóg há nĩ (mŷr), hã kŷ sóg ājag jyvēn mū. Topē vŷ ūn jagāgtar ag kuprēg, ag tŷ ti to ricon jé, ti ki ge kŷ. Ga mĩ mūn kŷ ag tóg jagāgtar nŷtĩ. Ěg Senhor ki ge kŷ ag tóg há nŷtĩ jãvo. Topē tŷ tŷ ěg pã'i nĩ ve jé ag tóg ke mū, ag tŷ ti to há nŷtĩn kŷ. Topē hã ne tag tó ja nĩgtĩ', ěg tŷ ti venh ke ti, kŷ tóg han ke mū, ā tŷ tó ja ěn ti.

⁶ Jãvo ājag tóg ūn jagāgtar ag to é he tĩ. Ūn rico ag to ājag tóg vŷ há han tĩ. Hã ra ūn rico ū ag tóg ājag to kórég nŷtĩ gé. Kŷ ag tóg ājag fóg mŷ ājag to vŷ kónãn tĩ, ājag fóg tŷ ājag jé prēr jé. Kŷ ājag tóg to jagtar nŷtĩ sir, ag tŷ ājag to vŷ kónãn tĩ ěn to. Hã kŷ tóg sir vēnhmŷ nŷ, ājag tŷ ūn jagāgtar to é he ti.

⁷ Kŷ ūn rico ū ag tóg ěg Senhor to é he tĩ gé. Ti to ag tóg vŷ kónãn tĩ gé, hã ra ěg tóg tŷ ti mré ke nŷtĩ. Hã kŷ ag tóg ěg to vŷ kónãn mū gé, ti to vŷ kónãn kŷ.

⁸ Topē tŷ vãsŷ ěg mŷ vēnh jykre nĩm ja ěn ki króm nĩ, hã vŷ: “ã régre to há nĩmnĩ, ā tŷ vēso há nĩ ri ke nĩmnĩ, ā régre tŷ,” he ja tóg nĩgtĩ ěg mŷ, Topē ti. Kŷ tóg rán kŷ nĩ. Ājag tŷ tag han kŷ tóg há nĩ.

⁹ Ājag tŷ hã ra ūn rico to há nŷtĩn kŷ, ūn jagtar to kórég nŷtĩn kŷ, kŷ ājag tóg ti vŷ mranh mū sir, ti tŷ ěg jyvēn ja ti. Kŷ Topē tóg ājag to jykrén kónãn mū, ājag tŷ ti vŷ mranh kŷ.

¹⁰ Ha vé, hēn ri ke mūn ěg kãmĩ ū tóg Topē tŷ ěg mŷ vēnh jykre nĩm ja kar ki króm tĩ. Hã ra tóg sir nén pir ki ti vŷ mranh mū. Kŷ ti tŷ ti vŷ mranh kãn vē sir, ti vŷ pir mranh kŷ.

¹¹ Topē tóg ěg mŷ: “ã prũ tū fi mré nŷ tŷg nĩ, kŷ ā mén tū mré nŷ tŷg nĩ gé,” he ja nĩgtĩ. Kŷ tóg ěg mŷ: “jagnē tén tŷg nĩ,” he ja nĩgtĩ gé. Hēn ri ke mūn ěg tóg ěg prũ tū fag mré nŷ tŷ nĩgtĩ. Ěg tŷ hã ra jagnē tén kŷ ěg tóg ti vŷ mranh kãn mū, ti tŷ ěg jyvēn ja ti.

¹² Kŷ tag to jykrén nĩ, ājag tŷ nén ū han ke to jykrén kŷ. Ěg Senhor vŷ ěg jykre kar vég tĩ, ti tŷ ěg tŷ ti jykre ki króm mū ve sór kŷ. Kŷ ājag jykre to jykrén nĩ, ājag vŷ to ke gé.

¹³ Ěg tŷ jagnē jagāgtãn tū nĩn kŷ tóg ěg jagāgtãn ke tū nĩ gé, ěg Senhor ti, ti tŷ ěg jykre tugnŷm ken kŷ, kurã ěn kã. Ěg tŷ hã ra jagnē jagāgtãn kŷ tóg ěg

jagāgtān ke mū gé, ti t̄y ẽg jykre tugn̄ym ken k̄y. K̄y ti pi(jé) ẽg vóg kónān mū sir'.

Ti ki rā há

14 Inh kanhkā', ũ tóg kejēn: "ti ki sóg rā k̄y n̄i," he t̄i, Topē to. Hā ra tóg ti v̄i han tū n̄igt̄i. K̄y tóg ón k̄y ti ki rā k̄y n̄i ja n̄i. Kren ke tū tóg n̄i sir.

15 Kejēn Jesus mré ke ũ tóg kur vég tū n̄igt̄i, v̄ejēn vég tū tóg n̄igt̄i gé, Jesus mré ke ũ fi ke gé.

16 K̄y ājag kām̄i ũ tóg h̄en ri ke mūn ti m̄y, fi m̄y tóg: "tág," he mū. "Ha t̄ig, jatun m̄y. Á jé kusa m̄eg tū n̄i, ā jé kók̄ir tū n̄i," he tóg mū. Hā ra tóg fag m̄y n̄en ũ n̄im tū n̄i. K̄y tóg fagr̄inh m̄y fag m̄y: "ā jé jagtar tū n̄i," he ja n̄i.

17 Ge ti n̄i, ẽg t̄y ón k̄y: "ti ki rā k̄y sóg j̄e," hen k̄y. ẽg t̄y ti v̄i han tū n̄i k̄y ẽg tóg fagr̄inh m̄y: "ti ki sóg rā k̄y n̄i," he mū sir. N̄en ũ tū vē.

18 Ājag kām̄i ũ tóg h̄en ri ke mūn: "ũ tóg Jesus ki rā k̄y n̄i, jāvo ũ tóg ti jykre han t̄i," he sór mū, ājag t̄y ti jykre han sór tū n̄yt̄in k̄y. Tag to sóg ājag m̄y: "inh h̄yn ne tugr̄in ki kanhr̄an mū, ā t̄y ti ki rā ja ti?" he mū. "Á t̄y ti jykre ki króm vanh k̄y sóg ki kagt̄ig n̄i. "Ti m̄y Jesus ki rā k̄y j̄e n̄i v̄y?" he jé sóg ke mū ā to. Ā jāvo sóg ti jykre han t̄i inhhā. Hā to ā tóg ki kanhró n̄i, s̄y ti ki rā k̄y j̄e ti," he jé sóg ke mū, ājag t̄y inh ki j̄em̄en k̄y.

19 "Topē v̄y t̄y ũn pir n̄i," he ājag tóg t̄i gé. Ājag t̄y ki hā tó vē. K̄y Japo ag v̄y tag tó t̄i gé. "Pir tóg n̄i, Topē t̄i," he ag tóg t̄i gé, N̄en-Kórég ag. Ag t̄y ti pir ki kanhró (hā) ra ag tóg krenkren ke tū n̄i, ag t̄y ti jykre han tū n̄in k̄y. Hā k̄y ag tóg kam̄egm̄eg k̄y j̄ür̄un ke t̄i sir, ag t̄y Topē to jykren k̄y, Japo ag. Hā k̄y ẽg tóg ẽg t̄y Topē kām̄en há (hā) ra krenkren ke tū n̄i gé, ẽg t̄y ti jykre han tū n̄in k̄y.

20 Ājag t̄y tag to jykren tū n̄in k̄y ājag tóg kr̄i tū (p̄e) n̄yt̄i (m̄yr). ẽg t̄y ti v̄i ki króm tū n̄in k̄y ẽg tóg ón k̄y ti ki ge k̄y n̄yt̄i. N̄en ũ tū vē sir, ẽg t̄y ti ki ge k̄y n̄yt̄i tag ti. ẽg m̄y tóg n̄en ũ há han ke tū n̄i.

21 ẽg jóg'jóg ve t̄y Abraão to jykren n̄i. Topē tóg ti m̄y: "ā kósin t̄y Isaque t̄anh k̄y p̄un, inh m̄y," he ja n̄i. K̄y tóg ti m̄y: "hej," he ja n̄i sir, Abraão ti. Hā k̄y tóg Topē m̄y há n̄i sir, Abraão ti, ti t̄y ti v̄i ki króm to há ja n̄in k̄y. K̄y tóg ti to: "inh ki rā há han ja ti n̄i," he mū, Topē ti, Abraão to.

22 Ve ra ha. Ti t̄y Topē ki rā k̄y j̄en k̄y, hā k̄y tóg ti m̄y: "hej," he ja n̄i, Abraão ti. K̄y tóg, ti t̄y ti m̄y: "hej," hen k̄y (tóg) ti ki rā k̄y j̄e ẽn to tar n̄i sir, Topē v̄i ki króm ke to. Ge ti n̄i (m̄yr).

23 Rán k̄y tóg n̄i gé, Abraão ti, k̄y tóg: "Topē v̄i kri tóg fi, Abraão ti," he mū, Topē v̄i t̄y rán k̄y n̄i ki. "Hā k̄y ẽg jóg mág tóg ti to: "inh ki rā há han ja ti n̄i," he ja n̄igt̄i. K̄y Topē tóg ti to: "ũ t̄y iso há n̄i ẽn," he t̄i," he tóg, Topē v̄i t̄y rán k̄y n̄i ki, Abraão to.

24 Hā ki ājag tóg vég mū. ẽg t̄y ti v̄i han k̄y tóg ẽg to: "inh ki rā há han ja ti n̄i," henh ke mū gé. ẽg t̄y ón k̄y ti ki rā k̄y n̄yt̄in k̄y ẽg tóg hā ra ti m̄y há tū n̄yt̄i, Topē m̄y, ẽg t̄y ti v̄i ki króm tū n̄in k̄y.

25 Raabe fi to jykren n̄i gé, ũn mén jafā ẽn fi to. ẽg povo v̄y ũ ag j̄egn̄e ja n̄i, ag t̄y fi jamā ve jé, cidade mág ẽn ti. K̄y fi tóg ag m̄y: "k̄age j̄eg ra," he ja n̄i. K̄y fi tóg ag kanhr̄an ja n̄i sir, fi jamān ki, ag t̄y ẽpy ũ m̄i k̄āpa jé, ẽm̄in ũ m̄i, ag kato t̄e ag t̄y ag vég tū n̄i jé. Tag to fi tóg kren mū (m̄yr), fi t̄y tag han to. K̄y Topē tóg fi to: "inh ki rā há han fi," he ja n̄i sir, fi t̄y ti v̄i kri fi to.

²⁶ Ge ti nĩ gé, ěg m̃y. Ěg t̃y ti ki ge k̃y ñy t̃n k̃y ěg tóg ti vĩ kri fig m̃u, Raabe fi ri ke. Ěg t̃y ti vĩ han tũ ñn k̃y tóg ěg m̃y nén ũ há han ke tũ nĩ gé, ěg t̃y ón k̃y ti ki ge m̃u tigr̃n, ěg fár t̃y kupr̃g tũ ra ter k̃y ñy ěn ri ke ti nĩ.

3

Ěg t̃y ěg ñn ě t̃y Topē vĩ mranh ke tũ

¹ Inh kanhk̃ā', k̃ānhmar jagnē m̃y: “s̃y ā kanhr̃ān há tóg t̃i, ā t̃y kygnē to,” he tũg nĩ. Ěg kar ṽy kygnēg t̃i. K̃y Topē ṽy ěg t̃y kygnē to ěg vóg kónān mág m̃u, ěg t̃y k̃ānhmar ěg mré Jesus ki ge k̃y ñy t̃i ag kanhr̃ān sór k̃y.

² Ěg kar ṽy kygnē (ka)mē ñy t̃i. Ũ t̃y ā vĩ ki kygnēg tũ pē ñn k̃y tóg kuryj kar nĩ sir. Ěg pi(jé) ne ki kygnēg t̃i, ěg t̃y ěg vĩ ki kygnēg tũ ñn k̃y.

³ Cavalo to jykrén nĩ. Freio t̃y ěg tóg ti jēn k̃āra fig t̃i. K̃y ěg tóg t̃y ti vóg t̃i sir, cavalo ti, k̃y tóg ā t̃g ke ěn ra t̃i m̃u sir, ũ t̃y cavalo kri nĩ ěn ti.

⁴ K̃y canoa mág to jykrén nĩ gé. Ęhé tóg ñy, h̃ā ra k̃āka ṽy ti t̃n t̃i. K̃y ag tóg ti vóg jaf̃ā t̃y ti vóg t̃i. K̃y tóg ag m̃y ki ke t̃i. T̃i vóg m̃u ag m̃nh ke ra tóg t̃i m̃u sir. T̃i vóg jaf̃ā s̃i ra tóg ki ke m̃u, canoa mág ti.

⁵ Ge tóg nĩ, ěg ñn ě t̃i. S̃i ti nĩ (m̃y), h̃ā ra ěg tóg t̃y vĩ mág han t̃i gé.

Pĩ ri ke tóg nĩ. T̃i s̃i ra tóg kejēn ṽnh p̃n t̃i (m̃y), ñn kar ti.

⁶ Ęn ri ke tóg nĩ, ěg ñn ě t̃i. T̃y ěg tóg ṽnh jykre p̃āno tó t̃i. K̃y ěg tóg ěg ṽi tag to kavéj kar ñy t̃i, ěg t̃y ěg ṽi tag to ti vĩ mranh k̃y. Ěg k̃āsir ñy t̃i ra ěg tóg ṽnh jykre p̃āno tó t̃i, ěg sanh há ñy t̃i ra ke gé, ěg kófa ra ke gé. Japo t̃y ěg kr̃n h̃ā ṽe, ěg t̃y ěg ṽi ki Topē vĩ mranh jé.

⁷ Ha mē, bicho kar ṽy t̃y ěg m̃g ñy t̃i. Ũ ag ṽy m̃g t̃y m̃g ñy t̃i, k̃y ũ ag ṽy s̃ēs̃i t̃y m̃g ñy t̃i, ũ ag ṽy p̃y ñ t̃y m̃g ñy t̃i, ũ ag ṽy goj ki ke kar t̃y m̃g ñy t̃i gé. T̃i kar kanhr̃ān ěg tóg t̃i m̃y, ha mē.

⁸ H̃ā ra ěg pi(jé) ěg ñn ě kanhr̃ān t̃i'. T̃i kanhr̃ān ki kagt̃g ěg ñy t̃i. Ṽnh jykre p̃āno tāṽi tó sór ěg tóg t̃i. K̃y tóg veneno ri ke nĩ, ěg ṽi ti. T̃y ěg tóg jagnē k̃āgt̃n ri ke han t̃i, ěg ñn ě t̃y, jagnē m̃y ṽi kónān k̃y.

⁹ T̃y ěg tóg Topē m̃y ṽi há han t̃i, ěg jóg mág m̃y, ěg ñn ě t̃y. K̃y ěg tóg t̃y ěpr̃ā ke ag m̃y ṽi kónān t̃i gé. H̃ā ra Topē tóg ěg han, ěg t̃y ti ri ke ñy t̃i jé. K̃y ěg t̃y jagnē m̃y ṽi kónān k̃y ěg t̃y Topē m̃y ṽi kónān ri ke ṽe sir.

¹⁰ Ěg jēn k̃ātá tóg k̃ākutē t̃i, ěg ṽi há ti, ěg ṽi kónān ti ke gé. Pir ti nĩ, ěg jēnky ti, h̃ā ra ěg tóg t̃y ṽi régre han t̃i. Tag ṽy kórég tāṽi nĩ, inh kanhk̃ā'.

¹¹ Gój t̃y ṽnh kanē to jykrén nĩ, ěganē to. T̃i há ñn k̃y tóg há nĩ, goj ti. T̃i kajā ñn k̃y tóg kajā nĩ. T̃i pi(jé) t̃y goj régre nĩ', goj t̃y ěg kanē ti. Pir tóg nĩ.

¹² K̃y ka kanē to jykrén nĩ gé. Ka t̃y p̃ēnva ki ěg tóg jy mi vég tũ ñgt̃i (m̃y). K̃y ěg tóg ṽnh t̃y jóhó ki p̃ēnva vég tũ ñgt̃i gé. Pir ti nĩ, ka kanē ti. Ge ti nĩ gé, goj ti. T̃i kajā ñn k̃y tóg kajā nĩ gé. K̃y gemñi gé, ājag ñn ě t̃y. Ṽi pir han nĩ.

Topē t̃y ěg m̃y kr̃i há ñm

¹³ Ājag m̃y kr̃i há ñy t̃i'? Ājag m̃y Topē ṽi ki kanhr̃ó ñy t̃i'? K̃y tóg há t̃i. K̃y ṽnh jykre há kar han k̃y ñy t̃imñi. H̃ā ki ṽnh kar ṽy ājag kr̃i há ṽnh ke m̃u sir. H̃ā ra t̃y ṽi mág han tũg nĩ. T̃y ṽnh k̃āfór han tũg nĩ gé.

¹⁴ Ājag t̃y ũ to fe kórég ñn k̃y tóg t̃y ũ ñy jāvo, ājag t̃y jagnē k̃āfór ñy t̃i sór k̃y, jagnē to jũ (ka)mē ñy t̃n k̃y, ājag t̃y ṽēs̃y ũn mág han sór k̃y. Ājag t̃y tag han k̃y ṽeso: “kr̃i há inh nĩ, Topē ṽi ki kanhr̃ó inh nĩ,” he tũg nĩ. Ṽnh ó ṽe, tag ti.

¹⁵ Topě tỳ ěg kanhrãn ja pijé', ěg tỳ ũ to fe kórég nĩ ti, jagně káfór han sór mũ ti, jagně to jũ (ka)mě ti ke gé. Ěpra věnh jykre vē (mỹr), Topě kato tẽ ti. Japo jykre vē (mỹr), ěg fe jũ tag ti.

¹⁶ Ěg tỳ jagně káfór han sór kỹ ěg tóg jagně kato tẽgtẽ mũ sir, ěg tỳ vēsỹ ũn mág han sór kỹ. Kỹ ěg tóg vĩ mẽ han kỹ jagně to věnh jykre pãno han kãn mũ sir.

¹⁷ Ěg tỳ hã ra Topě tỳ ěg kanhrãn mũ han kỹ ěg tóg tag han tĩ, ha mẽ: jãnhkri ěg nỹtĩ, kavěj tũ (mỹr). Jagně to ěg tóg krĩ kusa nỹtĩ. Jagně mỹ ěg tóg koměr hã vĩ tĩ gé. Ũ tỳ ěg mré vĩn kỹ ěg tóg ti vĩ mẽnh mũ, ti vĩ há nĩn kỹ. Jagně jagãgtãn ěg tĩ sir. Nén kar há han ěg tĩ. Topě vĩ to ěg tar nỹtĩ. Jykre régre tũ ěg nỹtĩ.

¹⁸ Ěg tỳ ti jykre tag han kỹ ěg tóg jagně krĩ kuprãg mũ sir, ěg tỳ jykre kuryj nỹtĩ jé sir, ha mẽ.

4

Ěg pi(jé) tỳ Topě kato tẽgtẽ mũ ag mré ke nỹtĩ

¹ Ājag hã ne tóg jagně to jũgũ nỹtĩ'. Hẽ ri ken kỹ hỹn'? Ājag tỳ nén ũ vēnhmỹ han sór nỹtĩn kỹ, hã kỹ ājag tóg jagně to krĩ rỹ nỹtĩ. Jykre pãno ājag tóg nỹtĩ (mỹr), kỹ ājag tóg vēnh jykre há kato tẽ nỹtĩ sir.

² Nén ũ to én mũ (hã) ra ājag tóg mãn sór mũ, hã kỹ ājag tóg vég tũ nĩ (mỹr). Hã kỹ ājag tóg jagně kãgtén sór mũ sir, jagně tỳ nén ũ mãn jé. Jagně tỳ nén ũ to én kỹ ājag tóg jagně kato tẽgtẽ ti. Ājag tỳ Topě mỹ to vĩ tũ nĩn kỹ, hã kỹ ājag tóg vég tũ nĩgtĩ.

³ Ājag tỳ ti mỹ to vĩ mũ ra ājag tóg venh ke mũ vē, hã ra ājag tóg vĩ há han tũ nĩgtĩ gé, hã kỹ tóg ājag mỹ han tũ nĩgtĩ sir, Topě ti. Ti mỹ ājag tóg to vĩ mũ, ājag tỳ nén to én mũ ěn mãn jé. Hã ra tóg ti mỹ tỳ ũ nỹ, ājag tỳ nén to én mũ ěn ti. Hã kỹ tóg ājag mỹ han tũ nĩ sir, Topě ti.

⁴ Ěg tỳ Topě ki rã kar kỹ vēnh jykre pãno to én kỹ ěg tóg ti kato tẽ mũ sir. Ũn týtã kórég fi ri ke ěg nỹtĩ, ěg tỳ ge kỹ. Ā mén kavénh fi tóg tũ, ũ to én kỹ. Ěg tỳ ěpra vēnh jykre to én kỹ ěg tóg Topě kato tẽ mũ sir. Tag ki kanhrãn nĩ, to jykrén mág han nĩ.

⁵ Topě vĩ tag to jykrén nĩ, ũ tỳ vãsỹ rán kỹ nĩ ěn to, ha mẽ: “Topě kuprĩg vỹ tỳ ěg jagrẽ nĩ, Topě tỳ tỳ ěg jagrẽn kỹ. Kỹ tóg ěg ki rĩr mũ sir. Kỹ ěg tỳ nén ũ vēnhmỹ to há nĩn kỹ tóg fe kaj nĩ, Topě kuprĩg ti,” he tóg, Topě vĩ rá ki. Ti pi(jé) véké tag to ja nĩ'. Kỹ tag to jykrén nĩ.

⁶ Hã ra tóg ěg tar han tĩ, Topě kuprĩg ti, ěg tỳ nén ũ vēnhmỹ han sór tag kato tẽ jé. Ěg jagãgtãn kỹ tóg ěg tar han tĩ. Kỹ tóg tag to mũ sir, ha mẽ: “Topě vỹ ũ tỳ: “ũn mág vỹ tỳ inh nĩ,” he mũ ěn ag to kórég nĩ, hã ra tóg ũ tỳ: “nén ũ tũ vỹ tỳ inh nĩ,” he mũ ěn ag jagãgtãn tĩ,” he tóg, ti vĩ rá ki.

⁷ Hã kỹ Topě mỹ: “hej,” hemnĩ, ti tỳ ājag krĩn kỹ. Japo mỹ: “nejé,” hemnĩ, ti tỳ ājag krĩn sór kỹ. Kỹ tóg ājag tovãnh ke mũ sir, Japo ti, ājag tỳ ti mỹ: “nejé,” hen kỹ.

⁸ Topě mré vĩ kỹ nỹtĩmnĩ, kỹ tóg ājag to há nĩ sir, ājag mré ti nĩ nĩ gé, ěg jóg mág ti. Ti vĩ mranh tĩ vỹ tỳ ěg nỹtĩ. Kỹ ti vĩ mranh tovãnh nĩ. Jykre régre ěg nỹtĩ gé. Kỹ vēnh jykre pir han kỹ nỹtĩmnĩ, hã vỹ: Topě jykre, he mũ.

⁹ Ājag tỳ Topě vĩ mranh kỹ mỹ jagy nỹtĩmnĩ. Vēsỹrénh nĩ, fỹmnĩ, ny mãn tũg nĩ. Fe kaj nỹtĩmnĩ. To krĩ kufy nỹtĩmnĩ. Mỹ sér tũ nỹtĩmnĩ, ājag tỳ Topě vĩ mranh kỹ.

¹⁰ Ëg Senhor mÿ: “kórég inh nĩ, isÿ vĕnh jykré pãno han ký,” hemnĩ. Ký ti hã vÿ ãjag mÿ vĩ há han ke mũ sir, ký ãjag fe vÿ mrin ke mũ sir.

Ëg tÿ jagnĕ to vĩ kónãn ke tũ

¹¹ Inh kanhkã', jagnĕ to vĩ kónãn tũg nĩ. ãjag tÿ jagnĕ to vĩ kónãn ký ãjag tóg Topĕ jykre to vĩ kónãn mũ sir, ký ãjag tóg to: “nén ũ tũ vĕ,” he mũ sir, Topĕ tÿ ěg mÿ vĕnh jykre nĩm ja ěn to. ãjag tÿ hã ra ti jykre to vĩ kónãn ký ãjag tóg ti ki króm ke tũ pĕ nĩ sir.

¹² Ũ tÿ ěg mÿ ã jykre nĩm ja ěn vÿ pir nĩ, ký tóg ěg jykre tugnÿm ke mũ gé sir. Ti hã tóg: “ěn vÿ kren ke mũ, ěn vÿ kren ke tũ nĩ,” henh ke mũ, ã pir mÿ, Topĕ ti. Hã ký tóg vĕnhmÿ nÿ, ãjag tÿ jagnĕ to vĩ kónãn ký.

Ëg tÿ vĕsÿ ũn mág han sór ke tũ

¹³ ãjag kãmĩ ũ tóg vĕsóg ki ãjag tÿ nĕn han ke to jykrén sór tĩ, Topĕ ki jĕmĕ sór tũ nĩn ký. “Hĕn ri ke mũn sóg vaj ký ěn ra tĩ mũ, ke tũ nĩn ký vaj ũn ký,” he ãjag tóg tũ. “Cidade ěn ra sóg tũg mũ, tá sóg nĩnh mũ. Tá sóg prÿg pir tũg' he mũ. Ký sóg negociar henh ke mũ, sÿ rico nĩ jé,” he ãjag tóg tĩ (mÿr).

¹⁴ Hã ra ãjag pí(jé) ãjag tÿ nĕn venh ke ki kanhró nÿtĩ', ha mĕ. Ne ve jé ěg ke mũ, vaj ký? Ha'. Ki kagtũg ěg nÿtĩ. Ëg mÿ vaj ký ter ke tũ nĩ vÿ? Ha'. Krÿj sĩ ri ke ěg nÿtĩ. Ve sĩ han ěg tĩ, krÿj sĩ ti. Ëg tÿ ki ěvãnh mãn mũ ra tóg tũ' he mũ sir. Ge ěg nÿtĩ. Kãnhmar ěg tóg tũg' he tĩ, ěg ter ký.

¹⁵ ãjag tÿ ãjag tÿ nĕn han ke to jykrén ký Topĕ mĩ ěkren nĩ, ũ tÿ ěg mÿ ěg ter ke kurã tónh ke ěn mĩ. “Ti mÿ sÿ nĕn han ke to há nĩ vÿ?” hemnĩ.

¹⁶ Hã ra ãjag tóg vĕsÿ ũn mág han sór mũ, ãjag tÿ: “tag han jé sóg ke mũ,” hen ký. Há tũ ti nĩ, ěg tÿ vĕsÿ ũn mág han sór ký.

¹⁷ Ký tag tóg vĕnhmÿ nÿ gé, sÿ tónh ke tag, ha mĕ. Kejĕn ěg tóg nĕn ũ há to jykrén tĩ, ěg tÿ han jé. Hã ra ěg tóg han tũ nĩgtĩ. Ký ěg tÿ Topĕ vĩ mranh ũ vĕ gé sir, ěg tÿ nĕn ũ há han sór mũ (hã) ra han tũ nĩn ký.

5

Ũn rico ag vĕsÿrĕnh ke

¹ Vãhã sóg ũn há ag to tag tó mũ sir, ũn rico ag to, ũ tÿ Jesus ki ge jãvãnh ěn ag to, ha mĕ. Ag mÿ sóg: “ha mĕ,” he mũ. “Kygfÿ ra. Vĕsÿrĕnh mág han ra. Vĕnh jagtar jagy ve jé ãjag tóg ke mũ.

² ãjag tÿ nĕn ũ vÿ vag kãn ke mũ. ãjag kur sĩnvĩ ěn vÿ târyj kãn ke mũ gé, ti ga tÿ kon ký.

³ Ký ãjag jãnkamy vÿ vĕso jãgfanh ke mũ. ãjag tÿ ũn jagãgtãn vãnh ja tugrĩn tóg vĕso jãgfanh ke mũ. Tag ve ký vĕnh kar vÿ ãjag jykre kórég venh ke mũ. Ký ãjag tóg to jagtar ke mũ, ký tóg pí tÿ ěg pũn ri ke nĩ, ãjag jagtar ke ti, ãjag vĕsÿrĕnh ke ti. ãjag hã ne tóg ãjag tÿ nĕn ũ génh mág', ěg tÿ kãnhmar kurã tÿ ěgno tá krÿg he mũ (hã) ra, Topĕ tÿ ěg jykre tugnÿm ke kurã ěn tá.

⁴ ãjag camarada ag vÿ ãjag jakré tá rãnhãj mũ, hã ra ãjag tóg ag mÿ kajãm tũ nĩgtĩ. Hã ra ěg Senhor vÿ végtĩ. ãjag camarada vĕsÿrĕnh mĕ ti (mÿr). Vĕnh kar pã'i vĕ (mÿr), ěg Senhor ti, nĕn kar pã'i vĕ gé.

⁵ ãjag tÿ nĕn ve sór mũ kar ve ãjag huri, vĕjĕn mág, kur sĩnvĩ, ãjag tÿ nĕn to ěn mũ kar ěn ti. Tag tâvĩ to ãjag tóg jykrén tĩ, ãjag tÿ ga kri mũn ký. Tãg gy ãjag nÿtĩgtĩ, ěg tÿ ěg mĕg jĕn há han tĩ ri ke, ěg tÿ ti tãnh jé. Kakó ti nĩ, Topĕ tÿ ãjag tãnh ke ti, mÿr, ha mĕ.

⁶ Kŷ ājag tóg ũn jykre kuryj ag vóg kónān tī gé. Ag kăgtén ājag tóg tī, hã ra ag tóg ājag kato tē tū nĭgtĭ, ājag kato vī tū ag tóg nĭgtĭ gé. Jykre kórég ājag nŷtĭ,” he sóg mŭ, ũn rico ag mŷ.

Ĕg tŷ ěg Senhor kătĭg măn jăvānh ke

⁷ Inh kanhkă', ěg Senhor kătĭg ke jăvānh nĭ, jatun mŷ, ag jăvo. Ĕg tŷ ěkrān kar kŷ ěg tóg ti mog jăvānh tŷgtĭ, jatun mŷ. Kŷ ta tóg kri kutē mŭ, kŷ tóg kri kutē măn mŭ gé sir. Kŷ vāhă ěg tóg ti kanē vég mŭ.

⁸ Tag ri ke han nĭ, jatun mŷ ti kătĭg jăvānh nĭ, ěg Senhor ti. Ti jăvānh to tar nŷtĭmnĭ. Kānhmar ti kătĭ mŭ, ěg Senhor ti, ha vemnĭ.

⁹ Inh kanhkă', jagnē vī to vī vī he tŷg nĭ. Ke tū nĭ mŭ ra ěg Senhor tóg ājag jykre ve kŷ ājag vóg kónān ke mŭ. Ha vé, vāhă ti vĕnh ven ke kătĭg mŭ kănhmar, ũ tŷ ěg jykre tugnŷm ke mŭ ěn ti.

¹⁰ Văsŷ Topē vī tó tĭ ag to jykren. Topē vī tó ag tóg tĭ, kŷ ũ tŷ mē jăvānh ja ěn ag tóg ag vóg kónān. Ge ra ag tóg jatun mŷ Topē vī tó ja nĭgtĭ, ag tŷ ag vóg kónān mŭ ra. Ag ri ke han nĭ, văsŷ Topē vī tó tĭ ag ri ke.

¹¹ Ag jykre to jykren nĭ. Ājag jagtar nŷtĭ ra ag tóg to krónh ke ja tū nĭgtĭ gé. Hă kŷ Topē tóg ag mŷ vī há han mŭ sir, ti vī tó tĭ ag mŷ.

Topē mré ke tŷ Jó kăme mē ājag huri. Ā jagtar ra tóg to krónh ke ja tū nĭ gé. Kŷ vāhă Topē tóg ti ki rĭr há han mŭ, ti jagtar kŷ. Hă ki ājag tóg ěg Senhor jykre vég mŭ sir. Ĕg jagăgtān tóg mŭ, ti tŷ ěg jagtar nŷtĭ ven kŷ. Kŷ tóg sir ěg jagăgtān tovānh tū nĭgtĭ.

¹² Inh kanhkă', ón kŷ vī tŷg nĭ. Ón kŷ: “hej,” he tŷg nĭ. Ki hă tómnĭ, ājag tŷ: “hej,” hen kŷ, Topē tŷ ājag vóg kónān tū nĭ gé. Kŷ ón kŷ: “Topē vŷ ki kanhró nĭ,” he tŷg nĭ gé. Ón kŷ: “ŭ tŷ kanhkă tá nĭ ěn vŷ ki kanhró nĭ,” he tŷg nĭ gé. Ón kŷ: “ŭ tŷ ga kri nĭ ěn vŷ ki kanhró nĭ,” he tŷg nĭ gé. Ki hă tómnĭ. Ón tŷg nĭ, jagnē mŷ.

Ĕg tŷ ũn kaga ag to Topē mré vĭnh ke

¹³ Ājag tŷ nĕn ũ jagy ven kŷ Topē mré vĭmnĭ. Ājag mŷ sér tĭn kŷ Topē mŷ jăn nĭ, kŷ ti jé tómnĭ.

¹⁴ Ājag kaga nŷtĭn kŷ igreja to pã'i ag jé prĕrmnĭ, Jesus tū ki rĭr tĭ ag. Ĕn ag vŷ ũn kaga to Topē mré vĭnh ke mŭ, kŷ ag tóg azeite tŷ ũn kaga to tĭn ke mŭ, ěg Senhor jiji tó kŷ.

¹⁵ Ag tŷ ěg Senhor mré vĭn kŷ tóg ũn kaga ěn tŷ há' henh ke mŭ sir, ěg Senhor ti, ag tŷ ti tŷ há' henh ke to: “hŷ mŷ vŷ?” he tū nĭn kŷ. Ĕg Senhor vŷ ti tŷ há' henh ke mŭ sir. Ũn kaga tŷ ti vī mranh kŷ Topē vŷ ti mŷ vĕnh pãte fón ke mŭ gé sir.

¹⁶ Hă jé jagnē mŷ tó, ājag tŷ Topē vī mranh ja ti. “Ti vī mranh inh, tag han kŷ,” hemnĭ jagnē mŷ. Kŷ jagnē to Topē mré vĭmnĭ gé, ti tŷ ājag tŷ há' he jé, ti tŷ ājag kaga tŷ tŷg' he jé. Ĕg tŷ vĕnh jykre kuryj han kŷ tóg ěg vī mē kŷ han mŭ sir, Topē ti, ěg tŷ ti mŷ nĕn to vī', to vī' hen kŷ. Nĕn há kar ve jé ěg tóg ke mŭ sir, ěg tŷ ti mŷ to vĭn kŷ, ěg Senhor mŷ.

¹⁷ Topē mré ke tŷ Elias mĭ ěkrén nĭ. Ĕg mré tóg ěpră ke ja nĭgtĭ, Elias ti. Hă ra tóg Topē mré vĭ', vĭ' he ja nĭgtĭ, ta kutē tū nĭ gé. Kŷ tóg kutē tū ja nĭgtĭ, ta ti, prŷg tăgtŭ kri kysă tŷ 6 ki.

¹⁸ Kŷ tóg Topě mré vĭ mǎn ja nĭgtĭ, Elias ti, kŷ tóg kutě ja nĭ sir, ta ti. Kŷ nén kar tóg gan kri mur mǎn ja nĭ, kŷ tóg kanĕn mǎn ja nĭgtĭ gé sir. Topě tŷ ti vĭ han hǎ vĕ. Tag mĭ ěkrén nĭ.

¹⁹ Inh kanhkǎ', kejĕn ěg mré ke ũ tóg prǎnh ke tĭ, vĕnh vĭ há tovǎnh kŷ. Kŷ ti jyvĕn nĭ, ti tŷ kygnĕ mǎn tŷ nĭ jé.

²⁰ Kŷ ũ tŷ ti mré vĭ mŭ ěn tóg ti kren han mŭ sir, nŭgme to, ti tŷ ě jykre kygnĕ ja ěn tovǎnh kŷ. Kŷ Topě vŷ ti tŷ ě vĭ mranh ja ěn tŷ vĕnh pǎte fón mŭ sir. Tag to jykrén nĭ.

Hǎ vĕ.

PEDRO TÝ CARTA HAN VÉN

1 Pedro tý ājag mý carta rán hã vë, Jesus Cristo tý inh fëg hã vë, sý tý ti apóstolo jê jé. Sý Topê tý ùn kuprëg mü ag mý rán hã vë. Ěg mré ke tú ag kãmĩ ājag tóg mügtĩ, ù tý Jesus ki ge tú ag kãmĩ, Ponto tá, Galácia tá, Capadócia tá, Ásia tá, Bitínia tá ke gé.

2 Topê vỹ ājag kuprëg. Vãsý tóg to jykren ja nĩ, ājag kuprëg ke to, ěg jóg tý Topê ti. Ājag mý tóg ā kuprĩg jënë, hã kỹ ājag tóg tý ti tú nýtĩ, ājag tý Jesus Cristo vĩ kri fi jé, ti tý ā kyvënh tý ājag kygpe jé, ājag tý ti ri ke há nýtĩ jé. Topê jé ājag tar han mãn', han mãn' he, kỹ ājag jé krĩ kãnhvy nýtĩ.

Topê tý ěg mý nén ù há ven ke

3 Topê mý sóg vĩ há han tí, ěg Senhor tý Jesus Cristo panh mý. Ěg jagãgtãn tãvĩ han tóg tí. Jesus Cristo rĩn mãn tóg, ti ter kar kỹ, kỹ tóg Jesus tugrĩn ěg mur mãn ri ke han tí gé. Kỹ tóg ěg mý sér tí,

4 ěg tý kãnhkã mĩ ěkrën kỹ. Tá ěg tóg nén ù sĩnvĩ kar venh ke mü. Tá ěg tú vỹ tú' henh ke tú pë nĩ. Kómóg ke tú tóg nĩ, tá ěg tú ti, tá ù tóg ti kókén ke tú nĩ gé.

5 Topê ki ājag tóg ge kỹ nýtĩ, kỹ tóg ājag ki rĩr há han nĩ nĩ. Nén ù kar han há tóg nĩ, kỹ tóg ěg ki rĩr há han tí gé, Topê ti. Ājag krenkren han jé tóg ke mü, ājag tý ti tý ěg mý nén nĩm ke mü ěn ve jé. Nĩm han kỹ tóg nĩ nĩ, ti tý ěg mý nén ven ke ěn ti. Kurã tý ěgno ki ěg tóg ěn venh ke mü.

6-7 Ver tóg ājag mý jagy tí. Ge ra mý sér nýtĩmĩ. Kãnhmar tóg tú' henh ke mü, nén tý ěg mý jagy nĩ tag ti. Topê tý ěg jykre ve sór vë, hã kỹ ěg tóg ver nén ù jagy ve vén tí. Ěg tý ti jagy to tar nýtĩn kỹ tóg vég mü, ěg tý ti ki rã há han kỹ nýtĩ ti. Ha vé, ouro rỹg ěg tóg tí, pĩ rỹ jagy ki, ěg tý ti há nĩ ěn ve jé. Ge ti nĩ, ěg mré. Tú' he jé tóg ke mü, ouro ti. Ouro kãfór ti nĩ, ěg tý ti ki rã ti. Ěg tý nén ù jagy ve to tar nýtĩn kỹ tóg ve há tí, ěg tý ti ki rã há han kỹ nýtĩ ti. Kỹ tóg ěg to vĩ há han ke mü, Cristo ti. Ěg tý tóg ùn mág han ke mü, ùn tar, Jesus tý vënh kar mý vënh ven ke kurã ěn kã.

8-9 Ti to há ājag nýtĩ, ājag tý ti ve ja tú (hã) ra. Ti ki ge kỹ ājag nýtĩ, ājag tý ti vég tú ra. Hã kỹ ājag tóg krenkren ke mü. Ājag krenkren ke ěn hã tóg ājag mý sér pë tĩnh mü, sér gy ti tĩnh mü, ha vemnĩ. Ājag fe tóg mrin ke tãvĩ han ke mü, kurã ěn kã, ha vemnĩ.

10-11 Topê vĩ tó ti ag tóg vãsý tó ja nĩgtĩ, Topê tý ùri ěg krenkren han mü tag ti. Topê kuprĩg vỹ ag kãnhrãn ja nĩ. Ag mý tóg Cristo tý ěg jagfỹ jagtar jagy han ke kãmén ja nĩ. Kỹ tóg ag mý ti tý kar kỹ tý ùn mág jënh ke tó ja nĩ gé, ti tý ěg jagfỹ vësýrënh kar kỹ tý ùn mág nĩnh ke ti. Kỹ ag tóg tag ve sór ja nĩgtĩ, vãsý Topê vĩ tó ti ag. “Kurã tý hë kã kenh ke në hỹn?” he ja ag tóg nĩgtĩ, Cristo jagtar ke to. “Ti tý hë ri kenh ke nê?” he ja ag tóg nĩgtĩ gé. Tag ve sór tãvĩ ja ag tóg nýtĩgtĩ.

12 Hã ra Topê tóg ag mý: “inh pi(jé) ājag hã mý tag ven ke mü’;” he ja nĩ. “Ājag nón ke ag hã mý ke vë, ag hã ne ājag tý nén tó mü venh ke mü.” he ja tóg nĩ, Topê ti, vãsý ti vĩ tó ti ag mý. Ti tý ag mý ājag tó jan hã vë. Hã kỹ ājag tóg hur mē, ti mré ke ù ag tý ājag mý Jesus kãme sér kãmén kỹ. Topê kuprĩg vỹ ag tar han ja nĩ, Topê tý ag mý ā kuprĩg jënën kỹ, kãnhkã tá, hã kỹ ag tóg ājag mý ti

kāmén kāmū ja nī. Ha vé, Topē tŷ jēnē jafā ag tŷ ki kanhrān há tóg tī, ājag tŷ ti kāmē mēg mū tag ti, hā ra ag tóg ki kagtŷg nŷtī.

Ēg tŷ Topē vī ki króm kān ke

¹³ Hā kŷ Topē tŷ ěg mŷ nén tó mū hā han sórmnī. Vēnh ki ěmēmni, Jesus tŷ ěg mŷ nén nīm ke mū ěn hā mī ěkrén nī. Jesus tŷ vēnh ven ke kurā ěn kā ěg tóg venh ke mū sir, ti tŷ ěg mŷ nén nīm ke mū ěn ti.

¹⁴ Vāsŷ ājag tóg ājag tŷ nén to ěn mū ěn han ja nŷgtī, ājag tŷ Topē vī mē ja tū nŷtŷn kŷ. Ūri Topē vī hā ki króm nī, ājag tŷ vāsŷ nén han ja ěn tovānh kān nī.

¹⁵ Topē jykre hā han nī, kŷ tóg vēnh ven mū, ājag tŷ tŷ ti tū nŷtŷn ti. Ājag tŷ ti jykre hā han jé Topē tóg ājag kuprēg. Há tāvī ti nī, Topē ti, kŷ ti jykre ri ke han nī.

¹⁶ Tag tó ja ti nī, ha mē: “ŭn há pē vŷ tŷ inh nī, kŷ inh ri ke nŷtŷ sórmnī, vēnh jykre há hā han kŷ nŷtŷmni,” he ja tóg nī, Topē ti.

¹⁷ Ēg tŷ Topē mré vēmén kŷ ěg tóg ti mŷ: “ěg jóg,” he tī. Hā kŷ ěg tóg ti kamēg ke mū, ti tŷ tŷ ěg jóg nŷn kŷ. Ha vé, ěg kar tŷ nén han mū vég ti nŷgtī, kŷ tóg vēnh kar jykre ki kanhró kar nī, Topē ti, kŷ tóg vēnh kar jykre tónh ke mū. Ver ěg tóg ū tŷ ti ki kagtŷg ag kāmī mŷgtī. Ēg tŷ ag kāmī mŷn kŷ ěg tóg Topē vī ki króm há han ke mū.

¹⁸ Kaja e to tóg ěg kygŷm ja nī, ki kanhró ājag tóg nŷtī. Ājag jo ke ag vŷ ājag jo vēnh jykre kórég han ja nŷgtī, ājag tŷ ag nón han jé. Hā ra tóg kaja e to ājag kygvān ja nŷgtī, ājag tŷ vēnh jykre kórég ěn han mǎn tū nī jé. Kaja e to tóg ěg kygŷm. Ouro to ke pijé'. Prata to ke pijé', ti kaja ěn ti. Tū' he jé tóg ke mū, ouro mré prata ti.

¹⁹ Hā ra tóg ā kyvénh hā to ěg kygŷm, kŷ tóg tū' he jāvānh nī, ti kyvénh ti. Nén ū kaja kāfór kar ti nī, ti kyvénh ti. Ūn há tāvī vŷ tŷ ti nī, ū tŷ ā kyvénh tŷ ěg kygŷm mū ěn ti, hā vŷ: Cristo, he mū. Kygnē ja tū pe ti nī. Kŷ tóg ovelha hā tāvī ri ke nī, ti tŷ ěg jagfy ter kŷ.

²⁰ Topē vŷ ti kuprēg, ti tŷ ěg jagfy ter jé. Ā tŷ nén ū kar han tū ki tóg ti kuprēg, vāsŷ. Hā ra tóg ūri ga kri mur ja nī, ājag tŷ ti vī mē jé, kurā tŷ ěgno to hā.

²¹ Ti tŷgrŷn ājag tóg Topē ki ge kŷ nŷtī. Ti rŷn mǎn ja tóg nī, Topē ti, kŷ tóg ti tŷ ūn mág han ja nī gé, kanhkā tá. Kŷ Topē ki rā há han nī. Ājag krenkren han jé tóg ke mū, ha vemnī.

²² Topē vī pē ki króm ājag tóg tī, hā kŷ ājag tóg jānhkrig kŷ nŷtŷ ha, ūri. Ājag mré ke kar ag to ājag tóg há tāvī nŷtŷ gé. Kŷ jagnē to há nŷtŷ to tar nŷtŷmni gé. Ōn kŷ jagnē to há nŷtŷ tŷg nī.

²³ Topē vŷ ājag han mǎn, kŷ tóg ěg mur mǎn ri ke nī. Ā vŷ tŷ tóg ěg han mǎn ja nī. Rŷr ti nī, ūn vī mū ti, hā vŷ: Topē, he mū. Tū' henh ke tū ti nī. Ti tŷ ěg han mǎn kŷ tóg tŷ ěg panh pir nī, ūn ter ke tū ěn ti. Ēg panh ter mū ěn ri ke tū ti nī.

²⁴ Hā kŷ tag tóg rán kŷ nī, ha mē: “ěprā ke ag vŷ re ri ke nŷtŷ, re fej sŷnvī ěn ri ke. Hā ra tóg kǎnhmar tóg tī, re ti, kŷ ti fej tóg kǎgter kǎn tī. Kŷ ěprā ke ag tóg kǎnhmar kǎgter tī gé, re fej ri ke.

²⁵ Jāvo Topē vŷ vŷ tŷ' henh ke tū pē nī,” he tóg, Topē vŷ tŷ rán kŷ nī ki. Tag mē ājag. Topē vŷ sér to ken hā vē.

2

1 Hã kÿ ãjag jykre kórég tovãnh kãn nĩ. Ón mãn tũg nĩ. Û lograr he mãn tũg nĩ. Û tũ to én mãn tũg nĩ. Û to vĩ kónãn mãn tũg nĩ gé.

2 Nẽnẽ vÿ leite kron (ka)mẽ nĩgtĩ. Topẽ vĩ vÿ ãg mÿ gĩr sĩ pafa mũ ãn ri ke nĩ. Kãnhmar vẽn hã ãn mẽ mãn', mẽ mãn' hemnĩ. Kÿ ãjag tóg mog há han ke mũ, ãjag krenkren jé.

3 Hã kÿ tag tóg ti to rãn kÿ nĩ, ha mẽ: “ki kanhrãn sĩ han ãjag tóg huri, ãg Senhor tÿ tÿ ãn há tãvĩ nĩn ki,” he ja tóg nĩ, Topẽ vĩ rá ki.

4 Ëg Senhor to kãmũ jãg. Pó ri ke ti nĩ, ãn han mũ ag tÿ pó fón mũ ãn ri ke ti nĩ. Hã ra tóg rĩr jẽ, ãg Senhor ti. Ag tÿ ti fón mũ ra tóg Topẽ mÿ há tãvĩ nĩ, pó kar ag há kãfór.

5 Kÿ ãg tóg pó ri ke nÿtĩ gé. Kÿ Topẽ kuprĩg vÿ ãg tÿ Topẽ jo ãn ri ke han ke mũ, pó tÿ ãn ãn ri ke. Kÿ ti tÿ ãjag mÿ nãn han sór mũ ãn to ti mÿ vẽn hã nẽnh tũg nĩ, ti mÿ: “hej,” hemnĩ. Jesus Cristo vÿ ãjag tar han sór mũ, ãjag tÿ ti tũ ki rĩr há han jé. Vãsÿ Topẽ tũ ki rĩr ti ag tÿ ti mÿ nãn ù kar pũn ja ãn ri ke tóg nĩ sir, ãg tÿ Jesus tũ han kÿ. ãjag tÿ ti tũ ki rĩr há han kÿ tóg ti mÿ há tĩnh mũ.

6 Hã kÿ tag tóg rãn kÿ nĩ, ha mẽ. “Pó há kuprãg ãnh, kÿ sóg tÿ ãn nũna ri ke han, Sião tá. Û tÿ ti ki rã kÿ tóg venh ke mũ, Topẽ tÿ nãn tó mũ ãn ti,” he tóg, Topẽ vĩ rá ki.

7 ãjag hã to tóg rãn kÿ nĩ, ti vĩ tag, ãjag tÿ ti ki ge kÿ nÿtĩn kÿ. Û tÿ ti kato vãsãnsãn mũ ag to tag tóg rãn kÿ nĩ gé, ha mẽ. Ag to tóg: “pó tÿ ãn han jafã fón ag tóg, pó tÿ ãn han tĩ ag,” he mũ. “Ag mÿ tóg kórãg ja nĩ, pó ãn ti. Hã ra Topẽ tóg pó ãn hã tÿ ãn nũna han mũ,” he tóg, Topẽ vĩ rá ki.

8 Kÿ tag tóg rãn kÿ nĩ gé, ha mẽ. “Pó ãn tÿ ag tóg krĩm ke tĩ. Pãró vẽ sir, pó ãn ti, kÿ ag tóg pãró tÿ krĩm krĩm ke kÿ vár mũ sir,” he tóg mũ gé, Topẽ vĩ rá ki. Û tÿ Topẽ vĩ kri fi sór tũ ag hã vÿ tÿ krĩmkrĩm ke tĩ. Topẽ tÿ nãn han hã vẽ gé.

9 ãjag hã kuprãg tóg, Topẽ ti, ãjag tÿ tÿ pã'i mág nÿtĩ jé, ti tũ ki rĩr tĩ to, ãjag tÿ tÿ ti povo nÿtĩ jé, vyr mÿ. ãjag kuprãg tóg, Topẽ ti, ãjag tÿ ti tÿ nãn han mũ kãmẽn jé, ti jykre tar ti, ãjag tÿ tÿ ti tũ nÿtĩn kÿ. Vãsÿ ãjag tóg kuty mĩ mũ ja nĩgtĩ, hã ra tóg ãjag tatĩ kãtĩg, ãjag tÿ ùri kurã mĩ mũ jé, ti tÿ ãjag mÿ jãngrẽ nũm kÿ.

10 ãjag pi(jé) vãsÿ tÿ ù tũ ja nÿtĩgtĩ'. Ûri ãjag tóg tÿ Topẽ povo nÿtĩ, ti tũ. ãjag pi(jé) vãsÿ Topẽ tÿ ãjag jagãgtãn sór mũ tag mẽ ja nĩgtĩ'. Ûri tóg hã ra ãjag jagãgtãn, Topẽ ti.

Jesus tÿ vẽn hã jykre pãno to ãg kygvãn

11 ãnh kanhkã', tag ki ãg tóg ãg mré ke tũ ag jamã mĩ mũgtĩ. Ëg jamã pijé', ga tag ti'. Hã kÿ sóg ãjag jyvẽn mũ. ãjag tÿ nãn ù to én mũ ãn han sór tũg nĩ. ãjag kókén jé tóg ke mũ, kÿ ãjag tóg ãg Senhor tovãnh sór ke mũ, ha vemnĩ.

12 Jesus ki ge kÿ nÿtĩ tũ ag kãmĩ ãjag tóg nÿtĩ, hã kÿ vẽn hã jykre há tãvĩ han nĩ. ãjag to ón sór ag tóg tũ, ãjag to ag tóg: “jykre pãno ag nÿtĩ,” he sór tĩ. Kÿ vẽn hã kar tÿ ãjag jykre há ve kÿ ag ón ãn tóg ve há tĩnh mũ. ãjag jykre há ve kÿ ag tóg: “Topẽ jykre vÿ há nĩ,” hẽnh ke mũ, hãn ri ke mũn, Topẽ tÿ ag kutãn kÿ.

13 Ëg Senhor to há ãjag tóg nÿtĩ. Ti to há nÿtĩn kÿ ãprã ãjag pã'i ag vĩ ki króm nĩ gé. Pã'i mág pẽ tÿ imperador ãn vĩ ki króm nĩ, vẽn hã kar ag mÿ tÿ ãn mág ãn vĩ ti.

14 Ti krãm pã'i ag vĩ ki króm nĩ gé, governador ag. Pã'i mág pẽ ãn tÿ vin mũ ag vẽ, governador ag, ag tÿ ãn jykre pãno ag vóg kónãn jé, ag tÿ ãn jykre há ag to vĩ há han jé gé.

15 Û tÿ ki kagtÿg ag vÿ äjag to vÿ kónãn tÿ. Kÿ nén ù há tâvÿ hã han nÿ, kÿ ag tÿ äjag kato ne tónh ke vÿ tũ tÿnh mü, ha vemnÿ. Tag vÿ há nÿ, Topê mÿ.

16 Cristo vÿ êg kygvã, vènh jykre pãno to. Kÿ vènh jykre pãno han mãn sór tÿg nÿ. To: “inh kava ti huri, Cristo ti, hã kÿ sóg jatun mÿ han ke mü, isÿ nén to én mü kar ti,” he tÿg nÿ. Topê tũ vÿ tÿ êg nÿtÿ, kÿ ti jykre hã han nÿ. Hã jé tóg êg kygvã, êg tÿ tÿ ti tũ nÿtÿ jé.

17 Êprã ke ù to é he tÿg nÿ. Êg mré Jesus ki ge kÿ nÿtÿ ag kar to há nÿtÿmñ. Topê kamêg nÿ. Êprã ke tÿ pâ'i mág tÿ imperador ên kamêg nÿ gé.

Êg tÿ Cristo ri kén jagtar nÿtÿnh ke

18 Äjag kãmÿ ù ag tóg patrão mÿ rãnhraj tÿ, fagrÿnh mÿ. Äjag patrão vÿ ki króm nÿ, ag kamêg nÿ. Äjag kãmÿ ù patrão vÿ há nÿ, komêr hã tóg vÿ tÿ, äjag to jykrén há han tóg tÿ. Äjag tÿ ti to há nÿtÿnh kÿ tóg há tÿ. Äjag kãmÿ ù patrão tóg kórég nÿ. Ên to vÿ há han nÿ gé, ti kamêg nÿ gé.

19 Kejên tóg fagrÿnh mÿ äjag to jÿnh ke mü, äjag patrão kórég ti. Äjag tÿ Topê jykre han sór mü to tóg äjag to jÿnh ke mü. Ge ra ti to jũ tÿg nÿ, kÿ Topê tóg äjag mÿ vÿ há han ke mü.

20 Kejên äjag patrão tóg äjag tÿ kygnê to äjag mrãnmrãn tÿ. Tag vÿ tÿ nén ù tũ nÿ. Ti tÿ äjag jykre há to äjag mrãnmrãn kÿ Topê tóg äjag mÿ vÿ há han ke mü.

21 Hã jé Topê tóg äjag kuprêg.

Cristo vÿ êg jagfy vêsÿrénh gé, mÿr, ha mē. Ti vêsÿrénh tugrÿn êg tóg ti kóm tar nÿtÿnh mü, êg tÿ kejên ti kóm jagtar nÿtÿnh ken kÿ.

22 Nén ù kórég han ja tũ ti nÿ. Û pí(jé) ti ón venh mü', ti ón vãnh nÿn kÿ.

23 Ag tÿ ti mÿ vÿ kónãn mü ra tóg ag mÿ vÿ kónãn ja tũ nÿ. Ag tÿ ti vêsÿrénh han mü ra tóg ag mÿ vÿ ja tũ nÿ gé. Topê hã mÿ tóg êkrén ja nÿgtÿ. “Ti hã ne ag jykre tugnÿm ke mü', inh jykre ti ke gé,” he ja ti nÿ. “Ti hã ne ag vóg kónãn ke mü',” he ja ti nÿ, Cristo ti.

24 Ha vé, Cristo vÿ êg tÿ Topê vÿ mranh ja ên kajãm ja nÿgtÿ, cruz to tóg ter ja nÿgtÿ. Hã tugrÿn êg jykre si tóg tũ tÿ ha, ti tÿ êg jykre si tÿ tũ' hen kÿ. Vènh jykre há hã han jé êg tóg vènh fêg kÿ nÿtÿ. Ti vêsÿrénh tugrÿn êg tóg tÿ ùn há nÿtÿ.

25 Vãsÿ êg tóg vènh mēg tÿ carneiro vãgfor ri ke nÿtÿ ja nÿgtÿ. Hã ra tóg hur êg tatÿn, êg vãgfor ja ra, Jesus ti. Kÿ êg tóg ti mré mü mü sir, carneiro fag tÿ pastor mré mü ri ke. Ti hã ne êg ki rÿr nÿ ha'.

3

Fag tÿ ag mré vènh jykre há han ke

1 Sÿ ùn tÿtã fag jyvèn hã vè, ha mē. Äjag mén vÿ han nÿ. Äjag kãmÿ ù fag mén ag vÿ ver Topê ki rã sór ja tũ nÿ. Ge ra ti mré ti vÿ ki króm nÿ, ti tÿ tÿ ã mén nÿn kÿ. Ti tÿ ã jykre há ve kÿ tóg hèn ri ke mÿn ti ki rã sór ke mü, ã tÿ ti mÿ nén ù tó tũ ra.

2 Topê kamêg kÿ ti jykre hã han nÿ, äjag jãnhkri nÿtÿ jé. Kÿ äjag mén ag vÿ äjag jykre há venh ke mü.

3 Vêsÿnÿvÿ han sór tÿg nÿ, äjag gãnh tÿ, pó sÿnvÿ kaja e tÿ ke gé, kur kaja e tÿ ke gé. Êg tÿ vêsÿnÿvÿ han sór ke tũ vè.

4 Äjag jykre hã sÿnvÿ han nÿ, hã vÿ: komêr hã vÿ, he mü, vÿ mág tũ, he mü. Vènh jykre sÿnvÿ tag vÿ há nÿ, Topê mÿ, kÿ tóg tũ' henh ke tũ nÿ gé.

5 Gen kÿ fag tóg nÿtÿ ja nÿgtÿ gé, êg mÿnh'mÿnh ve fag. Topê tũ fag, ù tÿ Topê ve sór ja fag. Fag mén jykre hã mÿ fag tóg mü ja nÿgtÿ,

⁶ Sara fi ke gé. Abraão jykre mī fi tóg tī ja nīgtī, hā kī fi tóg ti to: “inh pā'i vē,” he ja nīgtī. Kī vēnh jykre há hā han nī. Ū tī ājag tī vēnh jykre há han kamēg mū ra ge ra han nī. Kī ājag tóg tī Sara fi krē'krē fag ri ke nīti.

⁷ Kī sóg ag jyvēn sór mū gé. Ājag prū fag ki rīr há han nī, ha mē. Fag pi(jé) ājag tar ri ke nīti'. Hā ra Topē tóg fag mī rīr krýg ja tū ēn nīm ke mū gé, ti tī ājag mī rīr krýg ja tū nīm ēn ri ke. Ājag tī ājag prū fag ki rīr há han kī ājag tóg jatun mī Topē mré vēmén ke mū.

Ēg tī kejēn Cristo jykre to jagtar ke

⁸ Vāhā sóg ājag mī tag tó sór mū, ha mē. Jagnē mré vēnh jykre pir han nī. Ū fī kī ti mré fīmnī, ū mī sér tīn kī ti mré mī sér nītimnī. Jagnē to há tāvi nītimnī. Jagnē mré komēr hā vīmī. Jagnē kāfór han sór tūg nī.

⁹ Ū tī ājag mī nén ū kórég han mū ra ti mī nén ū kórég han tūg nī. Ū tī ājag mī vī kónān mū ra ti mī vī kónān tūg nī gé. Vēnh kajām sór tūg nī. Hī, vēnh kar to Topē mī: “ag ve há han nī,” hemnī. Topē vī ājag ve há han sór mū, hā jé tóg ājag kuprēg.

¹⁰ Hā kī tag tóg rán kī nī, ha mē: “ājag mī jatun mī nīti sór mū', nén ū kar tī ājag mī sér tī jé'? Kī vī kónān mán tūg nī. Ōn mán tūg nī gé.

¹¹ Vēnh jykre pāno han mán tūg nī, vēnh jykre há hā han nī, vēnh kar krī tī kánhvī' he sórmī gé, tag hā to vāsān nī, ti tī ājag mī sér tī jé.

¹² Ēg Senhor vī ū tī vēnh jykre kuryj han mū ag ki rīr há han mū. Ag tī ti mī nén ū to vīn kī tóg ag vī mēg mū, Topē ti. Hā ra tóg ū tī vēnh jykre pāno han mū kato tē tī, Topē ti,” he tóg, Topē vī rá ki.

¹³ Ū vī ājag mī nén ū kórég han ke tū nī, ājag tī vēnh kar mī nén ū há han sór kī.

¹⁴ Kejēn ājag tóg hā ra vēnh jykre há tigrīn vēsýrénh ke mū, Topē vī tigrīn. Kī mī sér jagy nītimnī. Ēprā ke ag kamēg tūg nī. Ag vī jēmē sór tūg nī, ag tī ājag tī ti tovānh han sór mū ra.

¹⁵ “Cristo vī tī inh pā'i nī, kī sóg ti há kamēg nī,” hemnī. Tag hā mī ēkrén nī. Kejēn ū tóg ājag mī: “ne to ke nē, hā vī: Cristo ki rá, he mū?” he tī. Ēn mī kāmén kán nī.

¹⁶ Ū tī ge mī komēr hā vīmī. Topē vī vég nī nī, ājag tī ti mī nén tó mū ēn ti. Fe kavéj nīti sór tūg nī. Kī ājag tóg ū tī Cristo jykre to vī kónān sór mū ag vī tī tū' hēnh ke mū, ha vemnī.

¹⁷ Kejēn ājag tóg vēnh jykre há to jagtar ke mū, Topē tī tag to jyrén kī. Hā ra tóg há nī. Ājag tī vēnh jykre kórég to jagtar nītin kī tóg kórég nī.

¹⁸ Cristo hā to jyrén nī, ha mē. Ter ja tóg nī, ēprā ke ag tī Topē mī név(e) nīti tigrīn. Ā ter pir ki tóg kajām kán. Jykre kuryj tóg nī, Jesus ti, hā ra tóg ūn jykre pāno ag jagfī ter ja nī. Tī tī Topē mī ēg tatīn tīg sór vē. Tī tén ja ag tóg nī, hā ra Topē kuprīg vī ti rīn mán.

¹⁹ Topē kuprīg vī ti tar han, kī tóg vēnh kuprīg ag jamā ra vyr gé, ag mī Topē vī sér tó jé, vēnh kuprīg sigse kī nīti ag mī.

²⁰ Vāsý ag tóg ti vī mē sór ja tū nīti, vēnh kuprīg sigse kī nīti ēn ag. Noé tī ga kri tīg kī, ti tī barco mág han mū ēn ká ke ja vē. Ēn ká Topē tóg ver ag to fé nī ja nī, kī tóg ag vóg kónān jāvānh ja nī ver. Noé tī barco han kán ja ra tóg ag vóg kónān mū sir, Topē ti. Kī ū tī 8 (ke) ag tāvi vī krenkren mū, barco ēn káki. Goj var kī barco tóg kri tī nī, kī tóg ag krenkren han, barco ti.

21 Goj t̄y ājag tóg kygpe k̄y n̄yt̄i, ājag krenkren jé. Barco t̄y goj kri t̄ig ri ken hā vē, hā v̄y: batismo, he m̄ū. Ājag mro pijé'. Vēnh jykre to ken hā vē. Topē t̄y ēg t̄y ēg fe kavéj t̄y jānhkri han to ken hā vē. Ēg t̄y Topē m̄y vēnh fēg to ken hā vē, hā v̄y: batismo, he m̄ū. Topē v̄y Jesus Cristo r̄in m̄an ja n̄i, hā k̄y tóg ēg krenkren han ke m̄ū gé.

22 Kanhkā tá tóg n̄i n̄i, Jesus ti, k̄y tóg Topē pēgja tá n̄i n̄i. Tá tóg t̄y ūn mág n̄i, Topē t̄y jēgnē jafā ag kri, ūn tar kar ag kri, ēg t̄y kanhkā tá ūn vэг tú kar ēn ag mré hā. Vēnh kar kri ke v̄y t̄y ti n̄i, Jesus ti.

4

Vēnh jykre t̄ag

1 Ha vé, Cristo v̄y jagtar n̄i ja n̄i, vēs̄yrénh k̄y. K̄y tag to tar n̄yt̄imn̄i gé, ājag t̄y ti kóm jagtar n̄yt̄in k̄y. Tag v̄y ki hā ke m̄ū, ha mē: ū t̄y ēprā jagtar k̄y tóg Topē v̄i mranh tú n̄igt̄i.

2 Hā k̄y ūri Topē v̄i hā han sórmn̄i, ti v̄i tovānh t̄ug n̄i, ājag t̄y ga kri m̄un k̄y. Ājag t̄y nén to én m̄ū ēn han sór t̄ug n̄i.

3 Vās̄y ājag tóg ū t̄y Topē ki kagt̄ig ag jykre han ja n̄igt̄i, pr̄yḡ t̄y hēn ri ke ki, m̄ȳr, ha mē. Ēn kā ājag tóg ājag pr̄ū tú fag to én (ka)mē han ja n̄igt̄i, ājag mén tú ag to ke gé. Ājag t̄y nén to én m̄ū ēn han ājag tóg n̄igt̄i. Kronkron m̄ū ja ājag tóg n̄igt̄i, kr̄i tú ja ājag tóg n̄yt̄igt̄i. Vēnh m̄an k̄y ājag tóg kronkron k̄y k̄agter m̄ū ja n̄yt̄igt̄i gé, vēnh k̄aggrā m̄y festa kórég ēn han ja ājag tóg n̄igt̄i gé.

4 Ūri ājag tóg tag han m̄an sór tú n̄yt̄i ha, hā k̄y tóg ag m̄y e t̄i, ū t̄y vēnh jykre kórég to tar n̄yt̄i ag m̄y. Ag m̄y tóg e t̄i, ājag t̄y ag mré ag jykre pāno han m̄an sór tú n̄yt̄in k̄y, ājag t̄y ag kr̄i tú jāvo kr̄i há n̄yt̄in k̄y. Hā k̄y ag tóg ājag to v̄i kónān t̄i, ūri.

5 Hā ra Topē tóg ag jykre vэг n̄i n̄i. Vēnh kar jykre tugn̄ym ti t̄i m̄ȳr, k̄y tóg ag m̄y ag jykre to: “tag v̄y há n̄i, ēn v̄y kórég n̄i,” henh ke m̄ū, ūn r̄ir m̄ū ag jykre to, ūn k̄agter m̄ū ag jykre to ke gé.

6 Ū t̄y hēn ri ke ag tóg Jesus mur ke to hā k̄agter ja n̄igt̄i. Ēn ag m̄y tóg vēnh v̄i sér tónh vyr gé, Cristo ti, vēnh kupr̄ig ag jamā ra, ag krenkren jé. Ag t̄y han ja to Topē tóg ag vóg kónān, ag t̄y ājag t̄y ga kri m̄ugt̄i kā vēnh jykre han m̄ū ēn to. Hā ra Topē tóg ag r̄inr̄in m̄an sór ja n̄i gé, hā k̄y tóg ag k̄agter m̄ū ra ag m̄y vēnh v̄i jēnēg m̄ū gé, ag t̄y kanhkā tá junjun jé.

7 Kakó ti t̄i ha, ga tag t̄y t̄ug' henh ke kurā ti. Vēs̄o jykrén n̄i, kr̄i há han n̄i, ājag t̄y Topē mré vēmén há han jé.

8 K̄y jagnē to há tāv̄i n̄yt̄imn̄i. Tag to krónh ke t̄ug n̄i. Ēg t̄y jagnē to há n̄yt̄in k̄y ēg tóg jagnē m̄y vēnh p̄ate fón ke m̄ū, ēg t̄y Topē v̄i mranh m̄ū ti, ti e n̄yt̄i hā ra.

9 Ū t̄y kuvar há tá ājag to pasa k̄y ti m̄y: “inh mré jē,” hemn̄i. Ti to v̄i t̄ug n̄i, ti to m̄y sér n̄yt̄imn̄i.

10 K̄y, Topē v̄y ēg tar han t̄i. Ū tóg nén ū to tar n̄i, jāvo ū tóg nēn ū ū to tar n̄igt̄i gé. Ēn ki r̄irmn̄i, ājag t̄y nén ū to tar n̄yt̄i ēn hā ki r̄irmn̄i, vēnh kar t̄y ājag tugr̄in tar n̄yt̄i jé. Ēg t̄y Topē t̄y nén to ēg tar han m̄ū ēn ki r̄ir há han ke vē, tag v̄y Topē m̄y há n̄i. Ēg tar pē han ti t̄i, Tope ti.

11 Ājag kām̄i ū vēmén k̄y Topē v̄i hā t̄y vēmén n̄i. Ū tóg Topē tú ag ki r̄ir t̄igt̄i, k̄yn jé Topē m̄y to v̄i, ti t̄y to ti tar han jé. Ājag t̄y ājag r̄anhr̄aj tag ki r̄ir há han

kỹ Jesus ki ge kỹ nýtĩ kar ag vỹ Topẽ mỹ vĩ há han ke mũ. Jesus Cristo hã vỹ tỹ ùn mág nĩ, ti hã vỹ tar nĩ, kỹ tóg tũg' henh ke tũ pẽ nĩ. Amém.

Ag tỹ Jesus tũgrĩn ẽg vóg kónãn ke

¹² Inh kanhkã', ãjag to sóg há távĩ nĩ. Nén ù jagy pẽ vég ãjag tóg mũ. Ge ti nýtĩ, kỹ to jykrén tũg nĩ. Ẽg kar vỹ tag vég tí, Jesus tũgrĩn.

¹³ Mỹ sér nýtĩmnĩ. ãjag jagtar kỹ ãjag tóg Cristo tỹ ẽg jagfy jagtar mũ ẽn ri ke vég tí. ãjag tỹ ti ri ke jagtar kỹ ãjag tóg ti mré tỹ ùn mág nýtĩnh ke mũ gé, ti tỹ tỹ ùn mág nĩnh ke kurã ẽn kã. Ẽn kã tóg ãjag mỹ sér gy tĩnh mũ, ha vemnĩ.

¹⁴ Hỹ, tá tóg ãjag mỹ sér távĩ tĩnh mũ, ag tỹ ùri ãjag mỹ vĩ kónãn han mũ ra, ãjag tỹ Cristo ki rã kỹ nýtĩ tũgrĩn. Ag tỹ ãjag to vĩ kónãn tũgrĩn ãjag tóg ki kanhró nýtĩnh ke mũ, Topẽ kuprĩg tỹ tỹ ãjag jagrẽ nĩ ti. Ti kuprĩg vỹ ãjag tỹ ùn mág han ke mũ, Topẽ tỹ tỹ ùn mág nĩ ẽn ri ke.

¹⁵ Û ag tóg ãjag tỹ ù tén tũgrĩn jagtar nýtĩ, ãjag tỹ ù tũ péju tũgrĩn ke gé. Kỹ ù ag tóg ãjag tỹ crime han tũgrĩn jagãgtar nýtĩ gé, ãjag tỹ vènh kar to vĩ tũgrĩn ke gé. ãjag tỹ ag mré vènh jykre pãno tũgrĩn jagtar kỹ tóg Topẽ mỹ há tũ nĩ. ãjag tỹ ti vĩ mranh ke tũ vè vè.

¹⁶ ãjag tỹ hã ra Cristo tũgrĩn jagtar kỹ tóg ti mỹ há tí. Tag to mỹ'ãg tũg nĩ. Tag to Topẽ mỹ vĩ há han nĩ, ãjag tỹ tỹ Cristo mré ke nýtĩnh kỹ.

¹⁷ Topẽ vỹ vènh kar jykre tũgnỹm kãn ke mũ, kurã kakó kí. Hã ra tóg ù tỹ ti ki ge kỹ nýtĩ ag jykre tũgnỹm vèn ke mũ. Ti tỹ ẽg jykre tũgnỹm kỹ ẽg tóg nén ù jagy ve kren ke mũ. Kỹ ù tỹ ti ki ge tũ ag vỹ nén ù jagy pẽ ẽn ve kãn ke mũ, ha vemnĩ, ù tỹ ti vĩ kato tẽ mũ ag.

¹⁸ Hã kỹ tag tóg rán kỹ nĩ, ha mẽ: “ù tỹ Topẽ vĩ há han sór mũ ag vỹ ter kren ke mũ. Kỹ ù tỹ ti vĩ mranh tí ag vỹ kren ke tũ pẽ nĩ, ù tỹ ti kato tẽ mũ ag,” he ja tóg nĩ, Topẽ vĩ tỹ rán kỹ nĩ ki.

¹⁹ Topẽ tỹ ẽg to: “tag vỹ ti jagy venh ke mũ,” hen kỹ ẽg tóg venh ke mũ. Kỹ, ẽg jagtar mũ ra ẽg vènh jykre há hã han kỹ nýtĩnh ke mũ. Û tỹ ẽg han mũ ẽn to jykrén jé ẽg tóg ke mũ, Topẽ to. Ti pí(jé) ẽg tovãnh ke mũ'. Ẽg mré tóg nĩ nĩ.

5

Pedro tỹ ẽg jyvẽn

¹ Vãhã sóg ù tỹ Jesus ki ge kỹ nýtĩ ag to pã'i ag jyvẽn sór mũ, ha mẽ. ãjag ri ke inh nĩ, isỹ tỹ ãjag kóm ù tỹ Jesus ki ge kỹ nýtĩ ag to pã'i jèn kỹ. Cristo jagtar ve ja inh nĩ gé hã ra. Ti vènh ven mãn ke kurã ẽn kã sóg tỹ ùn mág jènh ke mũ gé.

² Kỹ sóg ãjag mỹ tag tó sór mũ, ha mẽ. ãjag krêm ke ag ki rĩr há han nĩ. Û tỹ carneiro ki rĩr tí ẽn tỹ ã mẽg ki rĩr há han tí ẽn ri ke han nĩ. Topẽ tỹ ãjag mỹ vènh rãnrãj nĩm jan hã vè. ãjag rãnrãj tỹ ãjag mỹ sér tĩn kỹ tóg há tí. ãjag tỹ ãjag rãnrãj han sór tũ nĩnh kỹ tóg ù tí. Kỹ ãjag ganho mĩ ẽkren sór tũg nĩ gé. Topẽ tũ vè, ãjag rãnrãj ti, hã kỹ ki rĩr há han sórmnĩ.

³ Kỹ ãjag krêm ke ag ki rĩrmnĩ, ag mỹ komẽr hã vĩmnĩ. Ag rĩnve vènh jykre há hã han kỹ nýtĩmnĩ, ag tỹ ãjag jykre há ve kỹ ãjag kóm han sór jé.

⁴ Kãnhmar ti kãtĩg mãn ke mũ, ẽg pã'i mág tí, ẽg ki rĩr tí ti. Kỹ tóg ãjag tỹ ùn mág han ke mũ. ãjag mỹ tóg krĩ tógfĩ ri ke vin ke mũ, ãjag tỹ tỹ ùn mág nýtĩnh kỹ, hã ra tóg kórég vãnh nĩ, ẽg krĩ tógfĩ ẽn ti.

⁵ Kỹ sóg kyrũ ag jyvẽn sór mũ. ãjag mỹ sóg: “ùn sanh tỹ ãjag mỹ nén ù tó mũ ẽn han nĩ,” he sór mũ.

Kỹ sóg vënh kar jyvën sór mũ gé. Vënh kar mỷ sóg: “jagnë to é he tũg nĩ,” he mũ. “Jagnë ki rĩr há han nĩ, jagnë mỷ nén ù há kar han nĩ,” he sóg mũ. Tag vỹ rán kỹ nĩ, Topë vĩ rá ki, ha mẽ. “Topë vỹ ù tỹ jagnë to é he mũ ag kato tẽ tí. Hã ra tóg ù tỹ: “ũn sĩ vỹ tỹ inh nĩ,” he mũ ên to há nĩ,” he tóg, Topë vĩ rá ki. Hã kỹ vësỹ ùn mág han sór tũg nĩ.

⁶ Topë vỹ tar nĩ, kỹ tóg kejën êg mỷ nén ù jagy jënêg tí. Ti kato tẽ tũg nĩ hã ra, ti tovãnh sór tũg nĩ gé. Kỹ tóg ã kurã ki ãjag tỹ ùn mág han mãn ke mũ, ha vemñĩ.

⁷ ãjag krĩ kufy nĩn kỹ ti hã mỷ tómnĩ, kỹ tóg ãjag mỷ ãjag krĩ kuprãg ke mũ. Ti hã vỹ êg ki rĩr nĩgtĩ.

⁸ Vënh ki rĩrmnĩ. Nũr ri ke han tũg nĩ. Ha vé, êg kato vãsãn tí ên, Japo ên tóg êg to vãjig tĩgtĩ. Mĩg kókĩr ri ke ti nĩ, ti tỹ êg mãn sór kỹ.

⁹ Hã kỹ ti kato vãsãnsãn nĩ, Jesus Cristo ki rá tovãnh tũg nĩ gé, ù tỹ ãjag tỹ ti tovãnh han sór mũ ra. Ha vé, êg kanhkã kar ag vỹ jagtar tí, ãjag kóm, ga kri ke kar ag. Ag mũ êkrén kỹ tar nỹtĩmnĩ.

¹⁰ Kurã pipir ki ãjag tóg jagtar tí. Kar kỹ Topë vỹ ãjag tỹ ùn há tãvĩ han ke mũ, ãjag tỹ kygnë mãn tũg jé. Ti hã vỹ êg tar han tí, êg tỹ ti to krónh ke tũ nĩ jé. Ti hã vỹ ãjag tỹ ùn há han ke mũ gé, kỹ ãjag tóg ti tovãnh ke tũ pẽ nĩ. Êg to há pẽ ti nĩ, Topë ti. Êg kuprêg tóg mỷr, êg tỹ Cristo tugrĩn kanhkã ve jé, êmã sĩnvĩ pẽ ên tí, ù tũg vãnh ên tí.

¹¹ Topë hã vỹ ã pir mỷ tar nĩ'. Ti hã vỹ tũ' henh ke tũ nĩ'. Amém.

Pedro tỹ ag mũ êkrén

¹² Tó sĩ han sóg ãjag mỷ, kỹ Silas tóg inh mỷ ãjag mỷ rán mũ, inh vĩ ti. Êg kanhkã vỹ tỹ ti nĩ, Silas tí, Jesus tovãnh jãvãnh ti nĩgtĩ, kỹ tóg iso há nĩ gé. Isỹ ãjag tar han sór vë, hã kỹ sóg ãjag mỷ inh vĩ jënêg mũ. Sỹ ãjag mỷ: “Topë vỹ êg tar han ke mũ mỷr,” he mũ gé. Ti to krónh ke tũg nĩ.

¹³ Cidade tỹ Babilônia tá êg nỹtĩ, kỹ tag ki ù tỹ ãjag mré Jesus ki ge kỹ nỹtĩ ag vỹ ãjag mũ êkrég tí. ãjag mré tóg êg kuprêg, Topë ti. Kỹ inh kósĩn tỹ Marcos vỹ ãjag mũ êkrég tí gé.

¹⁴ Jagnë ki nhun ke ri ke han nĩ, jagnë nĩgé kãgmĩ kỹ, ãjag tỹ tỹ jagnë mré ke nỹtĩn kỹ.

Cristo mré ke vỹ tỹ ãjag nỹtĩ. Topë jé ãjag krĩ tỹ kãnhvy' hé. Hã vë.

PEDRO TỸ CARTA HAN MÃN

1 Simão Pedro tỹ ãjag mỹ carta rán hã vễ. Jesus Cristo tỹ inh fễ vễ, sỹ ti rãnhrãj han jé, sỹ tỹ ti apóstolo jễ jé. Isỹ ù tỹ inh mré Jesus Cristo ki ge kỹ nỹtĩ kar ag mỹ rán hã vễ. Topễ vỹ ẽg kuprễg, ùn jykre kuryj ẽn vỹ ẽg kuprễg, ẽg tỹ ẽg krenkren han mũ tỹ Jesus Cristo ki ge jé. Nén ù sér vễ, ti ki ge mũ ti.

2 ãjag to sóg Topễ mré vĩ tĩ, ãjag tỹ ẽg Senhor tỹ Jesus Cristo ki kanhrãn há han jé, Topễ ki ke gé, ãjag tỹ komễr hã ti ki kanhrãn kãn jé. Kỹ tóg ãjag tar han ke mũ. Kỹ tóg ãjag krĩ tỹ kãnhvy' henh ke mũ gé.

Topễ tỹ ẽg kuprễg

3 Topễ ki kanhró ẽg tóg nỹtĩ. Ẽg kuprễg tóg, ti tỹ ẽg tar han jé, ti tar nĩ ẽn ri ke. Kỹ tóg ẽg tỹ ùn mág han ke mũ gé, ti tỹ tỹ ùn mág nĩ ẽn ri ke. Ẽg tỹ tag ki kanhró há han kỹ ẽg tóg ti to tar nỹtĩ, ẽg tỹ ti jykre jagma mũ há han jé.

4 Kỹ Topễ tóg ẽg mỹ nén ù há to ja nĩgtĩ gé. Ừ tóg ẽg mỹ vễnh vĩ há tỹ ge tónh ke tũ nĩ. Topễ tỹ ẽg mỹ vĩ há han ri ke venh ke tũ ẽg tóg nĩ. Tag to ti ẽg mỹ, ha mẽ. Ẽprã ke kar vỹ nũgme ki vár ke mũ, ãjag tỹ nén to ẽn mũ ẽn han tugrĩn. Ag jãvo ẽg tóg krenkren ke mũ, kỹ ẽg tóg Topễ ri ke nỹtĩnh ke mũ, mỹr, ha mẽ.

5 Hã kỹ vãsãn, ãjag tỹ ti ki rã to tar nỹtĩ jé, ãjag tỹ ti ki rã tugrĩn vễnh jykre há há han jé. Vễnh jykre há han kỹ vễnh kanhrãn kỹ mũmnĩ gé.

6 Vễnh kanhrãn kỹ mũ kỹ vễso jykren nĩ gé. Vễso jykren kỹ ti tovãnh tũg nĩ gé. Ti tovãnh tũ nĩn kỹ ti jykre hã mũ mũmnĩ gé.

7 Ti jykre hã mũ mũn kỹ jagnễ to há tãvĩ nỹtĩmnĩ gé, ẽg kãnhkã kar ag to. Ẽg kãnhkã to há nỹtĩn kỹ ẽprã ke kar ag to há nỹtĩmnĩ gé.

8 ãjag tỹ tag han kãn kỹ tóg há tĩ. Kỹ ãjag tóg ẽg Senhor tỹ Jesus Cristo ki kanhrãn há han ke mũ gé, kỹ ãjag tóg vễnh jykre há to krónh ke tũ nĩ gé. Kỹ ãjag tóg komễr hã ti ki kanhrãn kãn ke mũ, ha vemnĩ.

9 Ừ tỹ vễnh jykre há han sór tũ nĩn kỹ tóg ùn kyvó ri ke nĩ, ùn ẽvãnh kórég, ùn kutu ri ke ti nĩ sir. Ẽn vỹ ẽg Senhor ki kagtũg nĩ. Vãsỹ Topễ vỹ ti kykũnh ja nĩ, ti tỹ Topễ vĩ mranh ja ẽn to. Hã ra tóg kã jatun kỹ nĩ ha, hã kỹ tóg ti kórég han mãn sór mũ.

10 Inh kãnhkã', Topễ vỹ ãjag kuprễg. Kỹ vãsãnsãn, vễnh kar tỹ ãjag jykre há tugrĩn ki kanhró nỹtĩ jé, ti tỹ ãjag kuprễg mũ ẽn ti. Kỹ ãjag tóg tỹ prãnh kenh ke tũ nĩ, ha vemnĩ.

11 Kãnhkã ve jé ãjag tóg ke mũ, ha vemnĩ, ẽg Senhor tỹ Jesus Cristo tũ ti, ẽg krenkren han tĩ ẽn tũ ti. Tũ' henh ke tũ ti nĩ, ti tỹ tá tỹ ùn mág nĩ ti.

12 Hã kỹ sóg ãjag mỹ tó mãn', tó mãn' he mũ. Ki kanhró ãjag tóg nỹtĩ, vễnh vĩ há to tar ãjag tóg nỹtĩ, ãjag tỹ mẽg mũ ẽn to.

13 Ge ra sóg ãjag jyvẽn mãn sór mũ, ãjag tỹ kã jatu tũ nỹtĩ jé. Isỹ ãjag mré nĩ mũ ẽn kã sóg ãjag mỹ tag to, ãjag jyvẽn mág inh. Kỹ kã jatun nỹtĩ tũg nĩ.

14 Há vé, kãnhmar sóg iser kỹ inh fãr tovãnh kỹ tũg ke mũ, ki kanhró sóg nĩ. Ẽg Senhor tỹ Jesus Cristo vỹ inh mỹ isỹ kãnhmar tũg ke ti tó.

15 Hã kỹ sóg vễnh rán tag to fũrũn mũ, ãjag tỹ iser kar kỹ kã jatun tũ nỹtĩ jé.

Pedro tỹ Jesus ve ja

¹⁶ Ha vé, inh pi(jé) ājag mý ón mū', isy ājag mý ēg Senhor tŷ Jesus Cristo kātīg vén mū ēn tón kŷ, isy ti jykre tar tón kŷ. Ti ve inh, sy ājag mý nén tó mū ti. Ti ve inh, ti tŷ tŷ ūn mág pē ní ti.

¹⁷⁻¹⁸ Ti jóg tŷ Topē vŷ ti tŷ ūn mág han. Ti tŷ tóg ūn tar han gé. Ēg tŷ Jesus mré pānónh kri nŷtī ēn kā ēg tóg kanhkā tá vēnh vī ēn mēg mū, ēprā nŷtīn kŷ. Kŷ tóg ti to tag tóg, ū tŷ vēnh kar kri ke ēn ti, Topē ti, ha mē. “Inh kósín pir hā vē,” he ja tóg nī, Topē ti, Jesus to. “Inh fe pē vē,” he ja tóg nī. Topē tŷ pānónh ki kātēre mū ēn kri ke ja vē. Ēn tá sóg Jesus tŷ tŷ ūn mág jē vé.

¹⁹ Hā kŷ ēg tóg ū tŷ vāsŷ Topē vī tó ti ag vī kri fig mū, tovānh tū ēg nŷtī. Kri nīmī gé, ājag. Lampião grug ri ke ti nī ēg mŷ, ag vī ti. Lampião grug vŷ ēg mŷ kuty tá jēngrē han ti. Kurā ke kátá ēg tóg lampião grug ve mán sór tū nŷgtī. Kurā ke kátá krīg mág hā vŷ ēg fe tŷ mrin ke tí. Jesus to ken hā vē, hā vŷ: krīg mág, he mū.

²⁰ Kŷ, ājag tŷ Topē vī rá to ken kŷ tag to jykrén nī, ha mē: ēg pi(jé) vēsóg ki to jykrén ke mū', Topē vī rá to', Topē tŷ ā vī tó ti ag mŷ nén tó mū ēn to'. Topē hā ne to ēg krīn ke mū'.

²¹ Kŷ Topē vī tó ti ag pi(jé) vēsóg ki ājag krī ki to jykrén kŷ rán ja nŷgtī gé'. Topē kuprīg tŷ ājag krīn mū ēn hā rán ja ag tóg nŷgtī, hā kŷ tóg tŷ Topē vī ní, vēnh rán ki.

2

Ón kŷ Topē vī tó ti ag

¹ Hā ra ū ag tóg ón kŷ Topē vī tó ja nŷgtī gé, vāsŷ, Israel ū ag. Tag ve jé ājag tóg ke mū gé. Ū ag tóg ón kŷ ājag mŷ Topē vī kāmén sór ke mū, ha vemní. Ēn ag vī vŷ ón kŷ ājag mŷ mē há tí mē tīnh ke mū, hā ra tóg ājag kókén ke mū. Ēg Senhor tovānh jé ag tóg ke mū, ū tŷ ēg kygĵān ja ēn ti. Hā ra Topē vŷ vāhā ag tŷ tŷ' hēnh ke mū.

² Ge ra ū tŷ hēn ri ke ag tóg ag jykre pāno han ke mū, ag mré. Kŷ ū tŷ ag mré vēnh jykre pāno han mū ēn ag tugrīn Topē jykre kato vī vŷ hēnh ke vē, tag tŷ mē há' hēnh ke vē sir, ti tŷ ki hā tó mū ra.

³ Ag tŷ jānkamy mág ve sór vē, hā kŷ ag tóg ón kŷ vēme sīnvī tó sór mū, ag tŷ ājag lograr he jé. Hā ra ū tŷ ag vóg kónān ke mū ēn tóg ag vég tí. Ag tŷ tŷ' he jé tóg ke mū, kānhmar, ha vemní.

⁴ Topē tŷ jēgnē jafā ū ag vŷ Topē vī mranh. Ēn ag vóg kónān tóg huri, Topē ti. Ag pi(jé) krenkren'. Nūgme ki tóg hur ag vām, Topē ti. Tá ag tóg sigse kŷ nŷtī, ferro tŷ corrente tŷ. Tá tóg kuty nŷ. Tá ag tóg Topē tŷ vēnh kar jykre tugnŷm ke kurā ēn jāvānh nŷtī.

⁵ Kŷ Noé mré ke ag vŷ nŷtīgtī gé. Topē vŷ ag vóg kónān ja ní gé. Goj var tŷ tóg ū tŷ ti vŷ mranh mū ag tŷ tŷ' he kán. Ag pi(jé) krenkren'. Ū tŷ 8 (ke) ag tāvī vŷ krenkren, ēn kā, hā vŷ: Noé, he mū, ū tŷ vēnh kar mŷ: “Topē vī kri fimní,” he mū ēn ti, kar kŷ ti mré ke tŷ 7 (ke) ēn ag ke gé. Ti mré ga kri mū ū ag vŷ tŷ' he kán.

⁶ Topē vŷ cidade tŷ Sodoma tá ke ag, cidade tŷ Gomorra tá ke ag vóg kónān ja (tóg) nŷgtī gé, kŷ cidade ēn tá ĩn tóg kugpūr kán ja ní. Ēg tŷ tag ve kŷ ēg tóg Topē tŷ ūn jykre pāno ag vóg kónān ke ēn ki kanhró nŷtī gé.

⁷ Cidade ēn tá ūn pir vŷ kren, hā vŷ: Ló, he mū. Ēn vŷ jykre há ní ja nŷgtī, kŷ ti mré ke ag jykre kórég vŷ ti mŷ e ní ja nŷgtī, tag to tóg krī kufy han ja nŷgtī.

⁸ Kurā kar ki tóg ag kāmī ag jykre pāno ve ja nīgtī, kŷ ti krī tóg kufy jagy nī ja nīgtī, ti tŷ ag jykre kórég ve kŷ, ag vī kórég ke gé. Ēn vŷ ā pir mŷ kren, Ló ti.

⁹ Ū tŷ Topē to: “ŭn mág vŷ tŷ ti nī,” he mŷ ag krenkren han ki kanhró tóg nī, Topē ti. Hā ra tóg ū tŷ vėnh jykre pāno han mŷ ag vóg kónān ke mŷ, ti tŷ vėnh kar jykre tugnym ke kurā ěn ká.

¹⁰ Ū ag vóg kónān mág pē han jé tóg ke mŷ, Topē ti, hā vŷ: ū tŷ ājag tŷ nén to ěn mŷ han tí ěn ag, he mŷ, ŭn vėnh kavėnh tí ag, he mŷ, ū tŷ: “Topē pi(jé) tŷ ěg Senhor nī,” he mŷ ěn ag, he mŷ.

Ōn kŷ Topē vī tó tí tag ag vŷ ěg vī kafān tí. “Inh hā tóg ki kanhró nī,” he ag tóg tí. Kŷ ag tóg kanhkā tăn ag kamėg vānh nŷtī gé. Ag to ag tóg vī kónān tí, kanhkā tăn ag to, ón kŷ Topē vī tó tí ag.

¹¹ Topē tŷ jėgnē jafā ag vŷ tag han tŷ nīgtī, ha mē. Kanhkā tăn ag to ag tóg vī kónān tŷ nīgtī. Topē rīnve, Topē tŷ jėgnē jafā ag. Ag tŷ ū tŷ ón kŷ Topē vī tó tí ag tar káfór nŷtī ra ag tóg kanhkā tăn ag to vī tŷ nīgtī.

¹² Ag jāvo ū tŷ ón kŷ Topē vī tó tí ěn ag vŷ krī tŷ nŷtī, vānh kāmī sē ag jykre tŷ ri ke ag nŷtī. Vānh kāmī tóg tŷgtī, sē ti, ěg tŷ ti to vājig kŷ ti tén jé. Hā jé tóg mur tí. Tag ri ke ag nŷtī, ū tŷ ón kŷ Topē vī tó tí ag. Ājag tŷ kanhkā tăn ag ki kagtŷg nŷtīn kŷ ag tóg ag to vī kónān tí. Hā kŷ Topē tóg ag tŷ tŷ' henh ke mŷ, ěg tŷ sē tén tí ěn ri ke.

¹³ Ag tŷ ājag jykre pāno kajām hā vē. Kurā ki ag tóg ag tŷ nén to ěn mŷ ěn han tí, mŷ, ha mē. Kŷ ag tóg ājag mré jėg tí gé, ājag tŷ festa han kŷ. Ha ra ag tóg nén tŷ ěg mŷ'a han tí ěn hā han tí, ag tŷ ājag mré jėn kŷ. Ājag kavėnh ag tóg tí. Jykre régre ag nŷtī, ón kŷ ag há nī ve nŷtī.

¹⁴ Ūn tŷtá fag kar to ěn ag tóg tí, fag ki ěvānh kŷ. Topē vī mranh sór ag tóg tí, ti vī mranh to ag tóg krónh ke tŷ nīgtī. Ūn krój ag krīn kónān ag tóg tí, ag tŷ ag mré mranh jé. Ag topē vŷ tŷ jānkamy nī. Topē vŷ ag vóg kónān ke mŷ, ha vemnī.

¹⁵ Topē japry ti, ti jamīn ti tovānh ag tóg, vāgfor kŷ ag nŷtī. Beor kósín tŷ Balaão ěn ri ke han ag tóg tí. Ēn vŷ jānkamy to há tāvī nī ja nīgtī. Hā kŷ tóg ā jykre kórég ěn to jānkamy ve sór mág ja nī.

¹⁶ Hā ra Topē tóg tí mŷ vī tar han, ti tŷ ti vī mranh kŷ. Hā kŷ ti mēg fi tóg ā vī vānh ra ti mŷ vī ja nīgtī, ěg tŷ jagnē mré vėmén ri ke han ja fi tóg nīgtī, ti mēg fi. Ti mŷ vī kŷ fi tóg tí tŷ vėnh jykre kórég han ke mŷ ra tŷ tŷ' he mŷ, ti mŷ, ū tŷ Topē vī tó tí ěn mŷ, ti tŷ ón kŷ Topē vī tó tí sór mŷ ěn ká.

¹⁷ Ōn kŷ Topē vī tó tí ag vŷ goj nīhŷg ja ki goj tŷ ěn ri ke nŷtī. Kanhkā góg ri ke ag tóg nŷtī gé, kākā tŷ vējo kanhkā góg ag vóg kŷ tŷ tŷ' he ěn ri ke ag nŷtī, ū tŷ ón kŷ Topē vī tó tí ag. Topē vŷ kuty tāvī tá ag vin han ke mŷ.

¹⁸ “Ūn mág vŷ tŷ inh nī,” he ag tóg tí, ón kŷ. Krī tŷ ag nŷtī. Nén ū vėnhmŷ kar to ěn ag tóg tí, nén ū tŷ ěg kavėnh tí ěn to ěn ag tóg tí. Vėnh jykre pāno han kŷ ag tóg ū tŷ ūri Topē ki ge sór mŷ ag krīn kónān tí, ū tŷ ūri ěg tŷ kygnē kŷ han tí ěn tovānh sór mŷ ag.

¹⁹ “Jatun mŷ ěg tóg ěg tŷ nén han sór mŷ ěn han kán ke mŷ,” he ag tóg tí, ón kŷ. “Topē vŷ ěg to jŷnh ke tŷ nī,” he ag tóg tí, ón kŷ. Hā ra ag tóg ěprā vėnh jykre hā mī mŷgtī, nén tŷ ěg kavėnh tí ěn hā han ag tóg tí. Kŷ tóg tŷ ag jagrē nī, ěprā vėnh jykre ti. ěg tŷ nén ū tovānh sór mŷ ra tovānh ki kagtŷg nŷtī ěn vŷ tŷ ěg jagrē nī sir, mŷr, ha mē.

²⁰ Ëg Senhor tÿ Jesus Cristo ki kanhró ja ag tóg nÿtí vê, Ëg kren han mũ ên ti. Ti tugrîn ag tóg êprã vênh jykre kavéj kar tovãnh ja nÿgtí vê, Ëg tÿ nén tugrîn ter ke mũ tovãnh ja ag tóg nÿgtí vê. Hã ra ag tóg ãjag tÿ nén tovãnh mũ ên han mãn mũ, kÿ tóg tÿ ag jagrê nĩ mãn mũ sir. Kÿ tóg ùri kórég káfór nĩ, ag mÿ.

²¹ Ag tÿ Topê japry ên, ti jamĩn ên sãn ja tũ nĩ ra tóg há tí vê. Hã ra ag tóg ti sãn sĩ han kar kÿ kyrãgrã mũ. Topê tÿ ag mÿ vênh vĩ há jênêg mũ ên tovãnh ag tóg.

²² Ag to Ëg tóg tag tó tí, ha mẽ: “cachorro vÿ ã tũgtũv ên ko mãn tí,” he Ëg tóg tí. “Porco tóg ã vênh kype há han kÿ jê ra óré mĩ vêsĩn mãn tí, kÿ tóg vênh kavênh mãn tí,” he Ëg tóg tí gé. Û tÿ vênh jykre kórég tovãnh kar kÿ han mãn tí ag to ken há vê.

3

Jesus kãtĩg mãn

¹ Inh kanhkã', ãjag to sóg há tãvĩ nĩ. ãjag mÿ sóg vênh rá ù han huri, kÿ sóg ãjag mÿ rán mãn mũ ha. Inh vênh rá kar ki sóg ãjag jyvên tí, ãjag tÿ nén jãnhkri hã to jykren kÿ nÿtí jé, ãjag tÿ tag kã jatu nÿtí tũ nĩ jé.

² Topê vĩ tó tí ag vÿ vãsÿ Topê vĩ tó ja nÿgtí. Ên mĩ êkren nĩ. Kÿ apóstolo ag vÿ ãjag mÿ tó ja nÿgtí gé, Ëg Senhor tÿ nén to Ëg jyvên mũ ti, Ëg kren han tí ên vĩ ti. Ên mĩ êkren nĩ gé.

³⁻⁴ Tag to jykren nĩ, ha mẽ. Kurã tÿ êgno to hã êprã ke ù ag vÿ ãjag to é henh ke mũ, ha vemnĩ. “Ti mÿ kãtĩg mãn mũ vÿ?” he jé ag tóg ke mũ. “Ti tÿ vãsÿ kãtĩg mãn ke vê vê, hã ra Ëg jo ke ag vÿ vãsÿ tũg, ti tÿ ã kãtĩg mãn ke tó mũ ra ag tóg kãgter. Kãtĩg ke tũ ti nĩ. Ga vÿ nĩnh mũ, tũ' henh ke tũ ti nĩ, ga ti, ha vemnĩ,” he jé ag tóg ke mũ, Ëg to é he kÿ, ha vemnĩ. Û jykre kórég ag vê, ù tÿ tag tó mũ ag. ãjag tÿ nén to ên mũ ên hã han ag tóg tí.

⁵ Topê tÿ vãsÿ nén han mũ ên ki kagtĩg ag tóg nÿtĩgtí, ag tÿ ki kanhrãn sór tũ nÿtĩn kÿ. Topê tÿ vãsÿ nén han jan há vê, ha mẽ. Kanhkã han tóg, vãsÿ, ga ti ke gé. Á vĩ tÿ tóg nén kar hyn han ja nÿgtí, Topê ti. Ga ên vÿ goj tÿ vênh kãpãm kÿ nÿ ja nĩ, kÿ ù tóg goj kri nÿ ja nĩ gé.

⁶ Ga ên kri ke kar ag vÿ hur tũg, goj tÿ, goj var mũ ên tÿ.

⁷ Kÿ Ëg tÿ ùri nén vég mũ tag vÿ tũ' henh ke mũ gé, ha vemnĩ. Topê vÿ ti tÿ tũ' henh ke to kurã nĩm huri, kÿ tóg pĩ tÿ ti tÿ tũ' henh ke mũ, Topê tÿ: “tag’,” hen kÿ. Kurã ên kã Topê vÿ ù tÿ ti vĩ mranh mũ ag tÿ tũ' he kãn ke mũ gé. Ag vóg kônãn ke kurã vê sir.

⁸ Inh kanhkã', tag to jykren nĩ, ha mẽ. Topê kurã vÿ Ëg kurã ri ke tũ nĩ. Kurã pir vÿ ti mÿ prÿg tÿ mil (ke) ri ke nĩ, kÿ prÿg tÿ mil (ke) vÿ ti mÿ kurã pir ri ke nÿtĩ gé.

⁹ Kÿ tóg ã tÿ Ëg mÿ nén tó mũ ên tovãnh ke tũ nĩ, Topê ti. Û tóg: “han sór tũ ti nĩ, hã kÿ Ëg tóg vég tũ nÿgtí,” he tí, ón kÿ. Hã ra ag tóg hã tũ tó tí. Ti tÿ ver Ëg to fe nĩ vê, hã kÿ tóg kãtĩg vãnh han. Ti pí(jé) Ëg kãmĩ ù tÿ nũgme ki kutê mũ ve sór mũ'. Hã kÿ tóg ver Ëg mÿ kurã ù nĩm mãn', kurã ù nĩm mãn' he mũ, kÿ vênh kar jé ãjag jykre kórég tovãnh, ag krenken jé.

¹⁰ Hã ra tóg kãtĩg mãn ke mũ, ha vemnĩ. Vãhã tóg kãtĩg ke mũ, kÿ tóg ù tÿ Ëg tũ péju(g) tí tÿ Ëg vatãnh tá kãtĩg ri ke nĩnh ke mũ. Ên kã kanhkã tóg tov kÿ kréj ke kÿ vãr ke mũ. Kanhkã tá nén kar vÿ jonh ke kãn ke mũ gé, krĩg kar ag, pĩ ên tÿ ag tÿ kréj ken kÿ. Kÿ vãhã ga vÿ tũ' henh ke mũ, ga kri ke kar ag ke gé.

¹¹ Ge kŷ nén (ũ) kar vŷ tũ' henh ke mũ. Hã mĩ êkrén kŷ vènh kãn sórmnĩ. Topê tŷ ãg mŷ nén tó mũ ên hã han nĩ. Topê mŷ vènh vin nĩ.

¹² Topê kurã ên jãvãnh nĩ, Topê rãnhràj to vãsãnsãn nĩ, ti kurã ên tŷ kãnhmar tá krŷg jé. Kurã ên kã kanhkã vŷ pũr ke mũ, kŷ kanhkã tá nén kar vŷ jonh ke kãn ke mũ gé, krŷg kar ag.

¹³ Topê vŷ ã tŷ ãg mŷ nén tó mũ ên han kãn ke mũ. Kanhkã tãg han jé tóg ke mũ, ga tãg ke gé. Tá tóg vènh jykre kuryj tãvĩ nĩ. Ëg tŷ ga tãg tag, kanhkã tãg tag venh ha pẽ tóg tĩ.

¹⁴ Inh kanhkã', ãjag to sóg há tãvĩ nĩ. Topê kurã tag jãvãnh kŷ ãjag tóg nŷtĩ. Kŷ vãsãnsãn nĩ, ãjag tŷ kygnê tũg jé. Vãsãnsãn nĩ, ãjag tŷ Topê mŷ jãnhkri nŷtĩ jé, ãjag tŷ ti há ri ke nŷtĩ jé. Kŷ ãjag tóg ti kato vãsãnsãn tũ nĩ.

¹⁵ Ha vé, ti tŷ ver ãg to fe nĩn hã kŷ ãg tóg ãg jykre kórég tovãnh kŷ krenkren ke mũ. Tag rán tóg huri ãjag mŷ, ãg kanhkã tŷ Paulo ti. Ti to sóg há tãvĩ nĩ, Paulo to. Topê vŷ ti mŷ krĩ há tãvĩ nĩm.

¹⁶ Kŷ tóg, ti tŷ ã mŷ carta han kŷ tóg isŷ nén rán mũ tag ri ke han tĩ gé. Ti vĩ tóg inh vĩ ri ke pẽ nĩ. Carta e han tóg huri, Paulo ti, kŷ ti carta ã vŷ to jykrén jagy tĩ gé. Kŷ ã ag tóg ti carta to ke mũ ra ki kagtũg nŷtĩn kŷ ti to vĩ kónãn sór mũ. ã tŷ ki kagtũg ag vê, ãn krój ag vê, ã tŷ Paulo tŷ rá to vĩ kónãn mũ ag. Topê vĩ rá ã to ag tóg vĩ kónãn tĩ gé, ãn ag. Tag tugrĩn ag tóg kãgter ke mũ, ha vemnĩ.

¹⁷ Inh kanhkã', ãjag mŷ sóg rán kãn huri. Hã kŷ vènh ki rĩr há han nĩ. Ker ã tŷ ãjag mŷ ón kŷ kri nĩm hẽ'. Ke tũ nĩ mũ ra ag tóg ãjag lograr henh ke mũ, ã tŷ ãjag fe kavènh sór mũ ag, ãn jykre pãno ag. ãjag tŷ ag vĩ kri fi tugrĩn ãjag tóg vãgfor ke mũ, ha vemnĩ. Ëg tŷ kãgnó ki tĩr ri ke han jé ãjag tóg ke mũ, ha vemnĩ.

¹⁸ Ëg Senhor ki kanhrãn ke hã to tar nŷtĩmĩ. Ti tŷ ãg tar han mũ tag hã ve sórmnĩ, ãg kren han tĩ tŷ Jesus Cristo ti. Ti hã mŷ ãg tóg vĩ há han ke mũ, ãri, kar kŷ kanhkã tá ke gé, kŷ tóg tũ' henh ke tũ pẽ nĩ. Amém.

JOÃO TÛ CARTA HAN VËN

Topë vî

¹ Topë tÛ ver nén kar han tÛg ki tóg nî nî, Topë vî ti, hã vÿ: Jesus Cristo, he mÛ. Topë tÛ Jesus mré nén ù kar hyn han ký tóg rîr nî, Topë vî ti. Sÿ ãjag mÿ Jesus Cristo tag kãmén ke vë. Më inh, ti vî ti. Ti ve inh ke gé, inh kanë tÿ. Ti ki inh ëvãnh, ti vóg inh, inh nîgé tÿ.

² Ëg rînrîn tî ën vÿ vënh ven, hã ký sóg ti vé. Ti hã tó sóg tî, hã ký sóg ãjag mÿ ti kãmén mÛ. Á tÿ nén kar han tÛg ki tóg kã nî nî, ù tÿ ti han ja tÛ hã ra. Ën kã tóg ã panh mré nî ja nî sir. Hã ra tóg ëg mÿ vënh ven.

³ Ký sóg ti vé. Ti vî më sóg ke gé. Hã ký sóg ãjag mÿ ti kãmén mÛ ha, ãjag tÿ inh mré ti ki kanhrãn jé. Ëg jóg tÿ Topë mré ke vÿ tÿ ëg nÿtî, ti kósin tÿ Jesus Cristo mré ke ke gé, ký ëg tóg tÿ jagnë mré ke nÿtî gé.

⁴ Æjag mÿ sóg tag rán ký jënë sór mÛ, ti tÿ ãjag mÿ sér tî jé, ãjag mÿ há tãvî tî jé ke gé.

Topë vÿ jëngrë ri ke nî

⁵ Ha vé, ti tÿ ëg mÿ nén tó mÛn hã vë, ha më. Ti vî më ký sóg ãjag mÿ tó sór mÛ, ha më. Topë vÿ jÿkre kuryj nî, hã ký tóg kurã ri ke nî, jëngrë ri ke, ki kuty tÛ pë ti nî, Topë ti.

⁶ Ký, ëg tÿ: “ti mré ke vÿ tÿ inh nî,” hen ký ëg tóg kuty ki vënh jÿkre kórég ën han ke tÛ nî, ke tÛ ra ëg ón ký: “ti mré ke vÿ tÿ inh nî,” he tî. Vënh ó vë sir. Ký ëg tóg ón ký nén ù kar han tî gé.

⁷ Ëg tÿ ti kóm kurã ki vënh jÿkre há ën han ký ëg tóg jagnë to há nÿtî. Jagnë mré ke vÿ tÿ ëg nÿtî, ëg tÿ vënh jÿkre há han ký. Ký ti kósin tÿ Jesus vÿ ëg kykÛnh ke mÛ sir, ã kyvënh tÿ, ëg tÿ ti vî mranh ja (hã) ra.

⁸ Û tóg kejën: “inh pi(jé) Topë vî mranh tî’,” he sór mÛ. Ti ón vë. Hã ra tóg ti hã mÿ tÿ vënh vî há më tî, ti ón mÛ ti.

⁹ Ëg tÿ Topë vî mranh ký ëg tóg ti mÿ tónh ke mÛ. “Á vî mranh inh, tag han ký,” he jé ëg tóg ke mÛ. Ký tóg ëg mÿ vënh pãte fón ke mÛ sir. Tag tó ja ti nî, ký tóg han ke mÛ. Kuryj ti nî mÿr. Ký tóg ëg kykÛnh ke mÛ sir, ëg jÿkre pãno tÿ tÛg’ he jé.

¹⁰ Ëg tÿ: “inh pi(jé) ti vî mranh ja nîgtî’,” hen ký ëg tóg Topë to: “ti ón vë,” he mÛ. Ký ëg pi(jé) ti vî ki kanhrãn há nÿtî’.

2

Jesus vÿ ëg tar han ke mÛ

¹ Inh krë, sÿ tag rán vë ãjag mÿ, ãjag tÿ ti vî mranh sór tÛ nî jé. Kejën ãjag kãmî ù tóg Topë vî mranh tî hã ra. Ký ù tóg ti jagfy vînh ke mÛ ha, ëg jóg tÿ Topë mÿ, hã vÿ: Jesus Cristo, he mÛ, ùn jÿkre kuryj jë ën ti.

² Ti hã tóg ù tÿ ti tén ke mÛ ag mÿ vënh fëg’, ti tÿ ëg jagfy ter jé, ti tÿ ëg tÿ Topë vî mranh tÿ tÛ’ hen jé. Hã ký tóg ëg mÿ vënh pãte fón sór mÛ. Hã ra tóg ëg tãvî mÿ vënh pãte fón sór tÛ nî. Ëprã ke kar mÿ ke vë, mÿr’.

³ Ha vé, ëg tÿ Topë vî kri fi ký ëg tóg vëso: “vãhã inh ti ki kanhró nî,” henh ke mÛ.

4 Û tóg kejĕn: “ti ki kanhró sóg nĭ,” he tĭ. Hã ra tóg ti tÿ ěg mÿ nĕn tó ja ěn han tũ nĭgtĭ. Ti ón vē. Ti pi(jé) Topĕ tÿ ki hã tó mũ ki kanhró nĭ’.

5 Ěg tÿ hã ra Jesus vĭ kri fi kÿ ěg tóg Topĕ to há nÿtĭ. Kÿ ěg tóg ti to há tãvĭ nÿtĭ ha ke gé. Tag han kÿ ěg tóg ti ki kanhrân mũ, kÿ ěg tóg ti ki ge kÿ nÿtĭ ha, ha mĕ.

6 Û tóg ti to: “ti ki sóg rã kÿ jĕ,” he tĭ. Kÿ tóg ti jykre han kãn mũ sir. Jesus Cristo tÿ nĕn han ja han kãn tóg mũ. Kÿ tóg ti ki rã kÿ jĕ sir.

Ěg tÿ jagnĕ to há nÿtĭnh ke

7 Ājag to sóg há tãvĭ nĭ. Inh pi(jé) ājag mÿ nĕn ũ tãg rán sór mũ’. Nĕn ũ si rán sór inh mũ, ha mĕ. Vãsÿ Topĕ tóg ěg jyvĕn ja nĭgtĭ, ěg tÿ jagnĕ to há nÿtĭ jé. Cristo mur tũg ki tóg ěg mÿ tag tó ja nĭgtĭ, kÿ ājag tóg vãsÿ mĕ ja nĭgtĭ gé.

8 Hã ra tóg tãg nĭ gé, sÿ ājag mÿ rán mũ tag ti. Cristo vÿ ěg mÿ tó mãn ja nĭ, ěg tÿ jagnĕ to há nÿtĭ jé, kÿ tóg ki króm ja nĭ, kÿ ěg tóg ti nón ki króm sór mũ gé. Kĭ hã tó ja ti nĭ, kÿ tóg nĕn ũ tãg ri ke nĭ. Cristo tÿ Topĕ nón tó mãn kÿ. Ha vē, komĕr hã tóg kurãg tĭ. Kurã kãtĭg kÿ ti kuty tÿ tũg’ he tĭ, komĕr hã. Jesus tÿ ěg mÿ: “jagnĕ to há nÿtĭmĭ,” he to ken hã vē, hã vÿ: kurã, he mũ.

9 Û tóg kejĕn: “inh hÿn kurã mĭ tũg mũ ha,” he tĭ, hã ra tóg ā régre to jũ nĭ, ā irmão to. Ěn vÿ kuty mĭ tĭ nĭ ver.

10 Û tÿ ā régre to há nĭ ěn hã vÿ kurã mĭ tũg ke mũ. Ěn vÿ ā régre tÿ prãnh ke han ke tũ pĕ nĭ.

11 Û tÿ ā régre to jũ nĭ ěn vÿ kuty mĭ tĭ mũ. Kuty to vĕnh jykre han kÿ tóg jĕ nĭ ver. Kÿ tóg ā tÿ hĕ ra tũg ke tag ki kagtũg nĭ gé. Kyvó ri ke ti nĭ, ti tÿ kuty mĭ tĭnh kÿ.

12 Inh krĕ, sÿ ājag mÿ rán vē. Ājag tÿ Topĕ vĭ mranh ja ěn vÿ vĕnh pãte fón kÿ nĭ nĭ, Jesus Cristo tugrĭn.

13 Ājag kãmĭ ke ũ vÿ sanh há nÿtĭ. Sÿ ājag mÿ rán vē gé. Û tÿ ā tÿ nĕn kar han mũ to hã kã nĭ ěn ki kanhró ājag tóg nÿtĭ. Ājag kãmĭ ke ũ vÿ kyrũ nÿtĭ. Sÿ ājag mÿ rán vē gé. Nĕn-Kórég vÿ ājag tÿ hĕ ri ke ja tũ nĭgtĭ.

14 Inh krĕ, sÿ ājag mÿ rán vē. Ěg jóg mág ki kanhró ājag tóg nÿtĭ. Ājag kãmĭ ke ũ vÿ sanh há nÿtĭ. Sÿ ājag mÿ rán vē. Û tÿ ā tÿ nĕn kar han mũ to hã kã nĭ ěn ki kanhró ājag tóg nÿtĭ. Ājag kãmĭ ke ũ vÿ kyrũ nÿtĭ. Sÿ ājag mÿ rán vē. Tar ājag nÿtĭ. Topĕ vĭ ki kanhró ājag tóg nÿtĭ. Nĕn-Kórég vÿ ājag tÿ hĕ ri ke ja tũ nĭgtĭ.

15 Ěg tÿ tag ki nĕn ũ kórég vég mũ tag ki vē’ĭ sór tũg nĭ, tag ki vĕnh jykre ki vē’ĭ sór tũg nĭ gé. Ěg tÿ tag to há nÿtĭnh kÿ ěg tóg ěg jóg mág to há tũ nÿtĭ.

16 Ěprã vĕnh jykre pi(jé) tÿ Topĕ jykre nĭ’. Ěprã vĕnh jykre hã vē, ha mĕ: nĕn ũ kar to ěn ěg tóg tĭ. Ěg tÿ nĕn ũ ve kÿ ěg tóg ěn mãn sór tĭ. Kÿ ěg tóg: “ũn mág vÿ tÿ inh nĭ, isũ to, isÿ nĕn ũ kar to,” he tĭ gé. Topĕ jykre pijé’. Ěprã vĕnh jykre hã vē.

17 Hã ra tóg kãnhmar tũ’ henh ke mũ, ěg tÿ nĕn vég mũ tag ti, ti tũg kÿ ěg tÿ ne to ěn ke tóg tũ tĭ gé. Û tÿ Topĕ vĭ han tĭ ěn vÿ tũ’ henh ke tũ nĭ jãvo.

Û tÿ Cristo kato tĕ

18 Inh krĕ’, kurã tÿ ěgno vÿ kakó tĭ ha. Kurã ěn kakó nĭnh kÿ Cristo kato tĕ pĕ ěn vĕnh ven ke mũ. Tag mĕ ājag huri. Hã ra ag tóg hur vĕnh vinven, ũ tÿ ti kato tĕ mũ tÿ hĕn ri ke ag. Hã ki ěg ki kanhró nÿtĭ, kurã tÿ ěgno kakó nĭ ti.

19 Ěg mré ke ag vē vē, ũ tÿ ti kato tĕ mũ tag ag, hã ra ag tóg ón kÿ tÿ ěg mré ke ja nÿtĭgtĭ. Ag tÿ tÿ ěg mré ke pĕ nÿtĭ ra ag tóg ver ěg mré mũnh ke mũ vē.

Hã ra ag tóg ti tovãnh ký ti kato tê mũ ha. Hã ki tóg ve há tí, ag tý tý ãg mré ke tú nýtí ti.

²⁰ Ājag kar vỹ vãnh vĩ há ki kanhró nýtí. Jagrê ājag nýtí, ũn jykre há ěn kuprĩg tý, hã ký ājag tóg ki kanhró nýtí.

²¹ Hã ký sóg ājag mỹ rán mũ, ājag tý ki kanhró nýtĩn ký. Ājag pi(jé) ki kagtĩg nýtĩ'. Ũ tý vãnh vĩ há tó mũ ěn pi(jé) ón tí'.

²² Ký ũn nỹ hỹn ón tí'? Ũ tý ge vỹ ón pẽ han tí, ha mẽ: ũ tóg Jesus to: “ti pi(jé) tý Cristo nĩ,” he tí. “Topẽ tý ti jẽnẽ pijé’, Topẽ kósin pijé’,” he ag tóg tí gé, Jesus to. Ũ tý Cristo kato tê mũn hã vẽ. Ēg jóg to ag tóg ón tí, ti kósin to ke gé.

²³ Ũ tý Jesus to: “ti pi(jé) tý Topẽ kósin nĩ,” hen ký tóg ãg jóg mág ki kagtĩg nĩ gé. Ký ũ tý Jesus to: “Topẽ kósin vỹ tý ti nĩ,” hen ký tóg ãg jóg mág ti ki kanhró nĩ gé.

²⁴ Vãsỹ ājag tóg ti vĩ mẽ vén. Ēn kã jatu tũg nĩ, ěn hã mũ ěkrén nĩ. Ājag tý tag to tar nýtĩn ký ājag tóg Topẽ kósin ki ge ký nýtí, ti panh ki ke gé. Hã ký ājag tý nén mẽ vén ja ěn tovãnh tũg nĩ.

²⁵ Ti hã vỹ ãg mỹ tó ja nĩ, ãg tý ãg rĩr krỹg ja tú venh ke ti.

²⁶ Ũ ag tóg ājag krĩn kónãn sór mũ, ājag mỹ ón ký, ti vĩ tó ký. Hã ký sóg ājag mỹ vãnh rán tag han mũ.

²⁷ Hã ra ājag tóg jagrê nýtí, Topẽ kuprĩg tý. Ký tóg ājag kanhrãn mũ sir, Topẽ kuprĩg ti. Ti hã vỹ ãg kanhrãn tí, ký ũ vỹ ãg kanhrãn mãn ke tú nĩ ha. Nén kar kãmén ti tí, ãg mỹ, ãg jagrê ti. Vãnh vĩ há há tó ti tí. Ti pi(jé) ón tí'. Ti tý ājag mỹ tó mũ ěn hã mũ mũmni, ti tý ājag mỹ: “Jesus hã ki ge ký nýtĩmni,” hen ký.

²⁸ Inh krê', ti ki ge ký nýtĩmni. Ký tóg há tí. Kãnhmar ti kãtĩg ke mũ, kãnhmar ti vãnh ven ke mũ. Ký ãg tóg mỹ'ãg ke tú nĩ, ti kãtĩg ký, ãg tý ti ki ge ký nýtĩn ký. Ēg mỹ'ãg ký ãg tóg ti kãtĩg ký vãnh pigju sór mũ. Hã ký ke tũg nĩ.

²⁹ Ti hã ne vãnh jykre kuryj hã mũ tĩg ja nĩgtĩ'. Ký ũ tý vãnh jykre kuryj han mũ vỹ tý ti kósin nĩ. Tag mũ ěkrén.

3

Jesus jãvy ag

¹ Ha vé, ãg jóg mág tóg ãg to há tãvĩ nĩ, hã ký tóg ãg to: “inh krê,” he mũ sir. Ti krê vỹ tý ãg nýtí, Jesus jãvy. Hã ký ěprã ke ũ ag vỹ ãg jykre ki kagtĩg nýtí. Ag pi(jé) Topẽ ki kanhró nýtĩ', hã ký ag tóg ãg jykre ki kagtĩg nýtĩ gé, ãg tý tý ti krê nýtĩn ký.

² Ājag to inh há tãvĩ nĩ. Ũri ãg tóg tý Topẽ krê nýtí. Kãnhmar ãg tóg ti mré nýtĩnh mũnh mũ. Ký ãg hỹn hẽ ri ke nýtĩnh mũ, kanhkã tá? Ha'. Kar ký ãg venh ke mũ, ti kãtĩg kar ký. Ēn kã ãg tóg tý ti hã pẽ nýtĩnh mũ, ãg tý ãg kanẽ tý ti ve ký. Ti ve pẽ han jé ãg tóg (ke) mũ, kurã ěn kã.

³ Ēg tý tag hã ve sór vẽ. Hã ký ãg vãnh jãnhkrig ke mũ, ãg tý ti jãnhkri nĩ ěn ri ke nýtĩ jé, vãnh jykre pãno tovãnh kãn ký.

⁴ Ēg tý ti vĩ mranh ký ãg tóg mranh mũ sir, ti tý ãg mỹ nén tó ja ti. Hỹ, mranh ký ãg tóg mranh tí, ti tý ãg jyvẽn ja ti.

⁵ Hã ra Cristo vỹ kãtĩg ja nĩ, ti tý ãg tý ti vĩ mranh ja tý tũg' he jé. Tag ki kanhró ãg tóg nýtí. Ti pi(jé) mranh ja nĩgtĩ', Topẽ vĩ ti, inhhã.

⁶ Ēg tý ti ki ge ký nýtĩn ký ãg tóg mranh mãn sór tú nĩ ha. Ũ tý ver mranh mãn sór ký tóg ti ve ja tú nĩ, ti ki kagtĩg nĩ sir.

⁷ Inh krê', ker ù vī jēmē hē', ù tỳ ãjag krīn kónān sór mū vī ti. Û tỳ vēnh jykre kuryj han mū ěn hā vỹ kuryj nī, Topē kuryj nī ěn ri ke.

⁸ Û tỳ Topē vī mranh mū ěn vỹ tỳ Japo mré ke nī. Japo hā ne Topē vī mranh tĩgtĩ'. Topē tỳ nén ù kar han mū ěn kã Japo ne ti vī mranh vén', kỹ tóg ùri ti vī mranh tĩ nĩ gé. Hã ra Topē kósin vỹ Japo tỳ nén han mū kókén ja nĩ, hã jé tóg mur ja nĩ.

⁹ Ęg tỳ tỳ Topē krē nýtĩn kỹ ěg tóg Topē vī mranh mǎn sór vǎnh nýtĩ ha, ěg tỳ Topē kuprĩg tỳ jagrē nýtĩn kỹ. Topē vī mranh mǎn sór ke tũ ěg nĩ ha, ěg tỳ tỳ ti krē nýtĩn kỹ.

¹⁰ Ęg tỳ ag jykre tugnỹm kỹ ěg tóg ù tỳ tỳ Topē krē mré Japo krē ki kanhró nýtĩ. Û tỳ vēnh jykre kuryj han jǎvǎnh ěn pi(jé) tỳ Topē krē nýtĩ', ù tỳ ã régre to há tũ nĩ ěn pi(jé) tỳ Topē krē nýtĩ gé'.

Ęg tỳ jagnē to há nýtĩnh ke

¹¹ Tag mē ãjag tóg, ãjag tỳ Topē vī mē vén kỹ, hā vỹ: “jagnē to há nýtĩmnĩ,” he mū.

¹² Ęg pi(jé) Caim jykre han ke mū'. Satanás mré ke ja vē, Caim ti, hã kỹ tóg ã jǎvy tén. Ne nỹ hỹn ti jũ han, kỹ tóg ti tǎnh? Jykre kórég ja ti nĩ, jǎvo ti jǎvy vỹ jykre há ja nĩ. Hã kỹ tóg ã jǎvy tǎnh, ti jykre há ěn to. Hã kỹ jagnē jykre vég mū ra jagnē to jũ tũg nĩ.

¹³ Inh kanhkã', ù tỳ Topē ki rã tũ ag pi(jé) ěg to há nýtĩnh mū'. Tag jé ãjag mỹ kórég nỹ tũg hã ra.

¹⁴ Ha vé, jykre tǎg ěg nýtĩ, kỹ ěg tóg ěg rĩr krỹg ja tũ venh ke mū. Ęg jykre si tovǎnh ěg huri. Tag ki kanhró ěg nýtĩ, ěg tỳ ù tỳ ěg mré ti ki rã kỹ nýtĩ kar ag to há nýtĩn kỹ. Û tỳ ěg mré Jesus ki rã mū to há tũ nĩ ěn vỹ venh ke tũ nĩ, ěg rĩr krỹg ja tũ ti.

¹⁵ Ęg tỳ ù to kórég tĩ nĩn kỹ ěg ti tén ri ke han huri. Kỹ ěg tỳ ù tén kỹ ěg pi(jé) ěg rĩr krỹg ja tũ venh ke mū', tag ki kanhró ãjag nýtĩ.

¹⁶ Cristo vỹ ěg tỳ jagnē to há nĩ tag tỳ ěg kanhrǎn. Vēnh fēg tóg, ù tỳ ti tén ke mū ag mỹ, ti tỳ ěg jagfy ter jé. Hã kỹ ěg tóg ěg mré ke jagfy ter ke tag to tar nýtĩnh ke mū gé, ù tỳ ag jagfy ěg tén sór kỹ.

¹⁷ Ha vé, ù tóg tag ki nén ù mág vég tĩ. Jǎvo ti mré Jesus ki rã kỹ nĩ ù tóg tỳ nén ù tũ nĩ. Hã ra tóg ti jagǎgtǎn sór tũ nĩ. ěn vỹ Topē to há tũ nĩ gé.

Kanē jur ke tũ ěg nĩ

¹⁸ Inh krē', ãjag vī tǎvĩ tỳ jagnē to há nýtĩ tũg nĩ, krĩg mỹ. Jagnē ki rĩrnmĩ. Jagnē to há tǎvĩ nýtĩ to ken hã vē.

¹⁹ Kỹ ěg tóg ki kanhró nýtĩ, ěg tỳ tỳ ù tỳ ki hã tó mū ěn krē nýtĩn kỹ. Kỹ Topē tóg ěg kanē jun mǎn ke tũ nĩ ha. Jatu ěg nýtĩ ha, ěg tỳ jagnē to ha pē nýtĩn kỹ.

²⁰ Kejēn ěg tóg ěg kygnē ja to ěkrég tĩ. Hã ra Topē tóg ki kanhró kar nĩ. Ęg kǎfór tóg nĩ, Topē ti, hã kỹ tóg kǎnhmar ěg vóg kónān ke tũ nĩ.

²¹ Inh krē', kejēn ěg tóg Topē jykre ki króm há han tĩ. Kỹ ěg tóg: “inh hỹn kygnē ja tũ nĩ,” he tĩ. Kỹ ěg tóg jatun mỹ Topē mré vēmén tĩ sir.

²² Kỹ tóg ěg mỹ nĩm ke mū, ěg tỳ ti mỹ nén to vī mū ti. Ti tỳ ěg mỹ nén tó mū ěn hã han ěg tóg tĩ, nén tỳ ti mỹ há nĩ hã ki króm ěg tóg tĩ, hã kỹ ěg tóg jatun mỹ ti mỹ nén ù to vī tĩ.

²³ Ti tỳ ěg mỹ nén tó mũn hã vē, ha mē: “inh kósin tỳ Jesus Cristo ki gemnĩ, kỹ jagnē to há nýtĩmnĩ,” he ja ti nĩ ěg mỹ. Ęg tỳ tag han mū hã ve sór ti mū.

24 Ëg tỹ ti vĩ ki króm kỹ Ëg tóg sir ti ki ge kỹ nỹtĩ. Kỹ Topẽ tóg tỹ Ëg mré ke nĩ sir. Ā kuprĩg jẽnẽ ja tóg nĩ Ëg mỹ, kỹ ti kuprĩg tóg Ëg mỹ tó tĩ, Topẽ tỹ tỹ Ëg mré ke nĩ ti.

4

Topẽ kato tẽ mũ ag kuprĩg ti

1 Ājag to há tãvĩ sóg nĩ, ha mẽ. Kãnhmar ù vĩ jẽmẽ sór tũg nĩ, ti tỹ: “Topẽ kuprĩg vỹ tỹ inh jagrẽ nĩ,” he mũ ra. Komẽr hã ti vĩ tugnỹm, ājag tỹ ve jé, ti tỹ Topẽ kuprĩg tỹ jagrẽ nĩ ti. Ôn kỹ Topẽ vĩ tó tĩ ag vỹ mũ mũgtĩ, ù tỹ hẽn ri ke ag, ha mẽ.

2 Û tỹ Topẽ kuprĩg tỹ jagrẽ nĩ ẽn vỹ tag tó tĩ, ha mẽ: “Jesus Cristo ti, Topẽ kósın ti vỹ Ëg ri ke han kỹ mur ja nĩ,” he ti tĩ, ù tỹ Topẽ ki rã kỹ jẽ ti.

3 Û tỹ Jesus to tag tó tũ nĩn kỹ tóg Topẽ kuprĩg tỹ jagrẽ tũ nĩ. Cristo kato tẽ tĩ ẽn kuprĩg tỹ tóg jagrẽ nĩ, ha mẽ. Ẽn vỹ vẽn ven ke mũ, ù tỹ ti kato tẽ mũ ti. Tag mẽ ājag huri. Hã ra tóg hur jun, kỹ tóg mũ tĩ ha.

4 Inh krẽ', Topẽ tũ vỹ tỹ ājag nỹtĩ. Ôn kỹ Topẽ vĩ tó tĩ ag fĩn rãm ājag huri. Ha vé, Topẽ kuprĩg tỹ Ëg jagrẽ vỹ ag jagrẽ kãfór nĩ. Hã kỹ Ëg tóg Ëg kato tẽ ag fĩn rãm kãn huri.

5 Topẽ ki rã tũ ag vẽ, hã kỹ ag tóg ù tỹ Topẽ ki ge tũ ag jykre tó tĩ, kỹ ù tỹ Topẽ ki ge tũ ag vỹ ag vĩ jẽmẽg tĩ.

6 Ag jãvo Ëg tóg tỹ Topẽ tũ nỹtĩ. Kỹ ù tỹ Topẽ ki kanhró nĩ ẽn vỹ Ëg vĩ mẽnh mũ. Ti tũ tũ ag vỹ Ëg vĩ mẽ sór tũ nỹtĩ. Hã ki Ëg tóg ki kanhró nỹtĩ, vẽn jagrẽ tỹ vẽn vĩ há tó mũ ti, vẽn jagrẽ tỹ ag tỹ kygnẽ han tĩ ẽn ti ke gé.

Topẽ vỹ Ëg to há nĩ vén

7 Ājag to sóg há tãvĩ nĩ, ha mẽ. Jagnẽ to há nỹtĩmĩ. Ëg tỹ jagnẽ to há nỹtĩn kỹ Ëg tóg Topẽ jykre han tĩ. Ti hã vỹ Ëg to há nĩ vén. Ëg tỹ jagnẽ to há nỹtĩn kỹ Ëg tóg tỹ Topẽ krẽ nỹtĩ, Jesus jãvy, kỹ Ëg tóg Topẽ ki kanhró nỹtĩ gé.

8 Ëg tỹ jagnẽ to há tũ nỹtĩn kỹ Ëg tóg Topẽ ki kagtĩg nỹtĩ, kỹ Ëg ti ki rã ja tũ nĩ. Topẽ jykre vẽ, hã vỹ: Ëg to há, he mũ, ti tỹ Ëg to há nĩ sór nĩn kỹ. Hã kỹ Ëg tóg jagnẽ to há nỹtĩnh ke mũ gé.

9 Tag to Ëg tóg ki kanhró nỹtĩ, Topẽ tỹ Ëg to há nĩn ki, ha mẽ: Ā kósın pir jẽnẽ ja tóg nĩgtĩ, Topẽ ti, ti tỹ ga kri mur jé, Ëg tỹ ti kósın tugrĩn rĩr krỹg ja tũ ẽn ve jé.

10 Ëg pi(jé) ti to há nỹtĩ ja nĩgtĩ'. Ti hã ne Ëg to há nĩ vén', hã kỹ tóg Ā kósın jẽnẽ, ti tỹ Ëg jagfy ter jé, ti tỹ Ëg tỹ ti vĩ mranh tỹ tũg' he jé. Ti tỹ Ëg to há nĩn hã vẽ.

11 Ha vé, inh krẽ', Topẽ vỹ Ëg to há tãvĩ nĩ. Hã kỹ tóg há nĩ gé, Ëg tỹ jagnẽ to há nỹtĩn kỹ.

12 Û pi(jé) Topẽ vég tĩ'. Ëg tỹ jagnẽ to há nỹtĩn kỹ tóg hã ra Ëg ki ẽmãn mũ ha, Topẽ ti. Kỹ Ëg tóg ti to há tãvĩ nỹtĩnh mũ gé sir, Ëg tỹ jagnẽ to há nỹtĩn kỹ.

13 Topẽ vỹ Ā kuprĩg tỹ Ëg jagrẽ han. Ëg jagrẽ tag to Ëg tóg ti tỹ Ëg ki ẽmãn mũ tag ki kanhró nỹtĩ, Ëg tỹ ti ki ge kỹ nỹtĩ tag ti ke gé.

14 Topẽ vỹ Ā kósın jẽnẽ, ti tỹ ga kri mur jé, ti tỹ Ëg kren han jé. Tag ve sóg, hã kỹ sóg tó mũ.

15 Û tóg Jesus to: “Topẽ kósın vẽ,” he tĩ. Topẽ vỹ ti kãkã ẽmã nĩ, ù tỹ tag tó mũ ẽn kãkã, kỹ tóg Topẽ ki rã kỹ jẽ nĩ gé.

16 Topê vỹ ãg to há nĩ, tag ki kanhró ãg tóg nỹtĩ. Kỹ ãg tóg ti vỹ kri fig mũ gé, ti tỹ ãg mỹ: “ãjag to sóg há nĩ,” hen kỹ.

Topê vỹ ãg to há nĩ. Kỹ, ãg tỹ ti to há nỹtĩn kỹ ãg tóg ti ki ge kỹ nỹtĩ, kỹ Topê vỹ ãg ki êmãn ha.

17 Topê vỹ ãg tar han sór mũ, ãg tỹ ti to há tãvĩ nỹtĩn jé. ãg tỹ ti to há nỹtĩ ki kygnẽg tũ nĩn kỹ ãg tóg kurã ên kã kanẽ jur ke tũ nĩ, ti tỹ ãg jykre tugnỹm ke kurã ên kã. Cristo tỹ ga kri tũg kỹ nén han mũ ên ri ke han jé ãg tóg (ke) mũ, hã kỹ ãg tóg kanẽ jur ke tũ nĩ.

18 ãg tỹ Topê to há nỹtĩn kỹ ãg kanẽ jur ke tũ pẽ nĩ. Ha vé, ãg tỹ Topê to há nỹtĩn kỹ kygnẽg tũ nỹtĩn kỹ ãg tóg mũmẽg ki kagtũg nỹtĩ gé. Topê tỹ ãg vóg kónãn ke to ãg tóg ti kamẽg ke mũ. ãg mũmẽg vỹ ãg vỹsỹrenh han mũ.

19 Ti hã vỹ ãg to há nĩ vén inhhã, hã kỹ ãg tóg ùri ti to há nỹtĩ ha.

20 Û tóg kejẽn: “Topê to sóg há nĩ,” he tĩ. Hã ra tóg ù tỹ ãg mré Jesus ki rã kỹ jẽ to kórég nĩ. Ti ón vỹ. ãg régre mré ãg mũgtĩ, gan kri. ãg tỹ ãg régre to há tũ nỹtĩn kỹ ãg hỹn hẽ ri kenh ke mũ, ãg tỹ Topê to há nỹtĩ jé, ãg tỹ ùn vég tũ ên to? ãg tỹ ãg régre to há tãvĩ nỹtĩn kỹ, hã kỹ ãg tóg Topê to há nỹtĩ gé.

21 Tag to ja tĩ nĩ, ãg mỹ, ãg tỹ ti vỹ ki króm jé, Topê ti, ha mẽ: “ãjag tỹ Topê to há nĩ sór kỹ ãjag régre to há nỹtĩmĩnĩ gé,” he ja ti nĩ.

5

Û tỹ Jesus ki rã tũ ag jykre fĩn rãm ãg huri

1 ãg tỹ Jesus to: “Cristo vỹ tỹ ti nĩ, Topê kósin vỹ tỹ ti nĩ,” hen kỹ ãg tóg tỹ ti jãvy nỹtĩ. Kỹ ãg tỹ ãg jóg mág to há nỹtĩn kỹ ãg tóg ti krẽ ù ag to há nỹtĩnh ke mũ gé, ù tỹ ãg mré ti ki ge kỹ nỹtĩ ag to.

2 ãg hỹn hẽ ri kenh ke mũ, ãg tỹ Jesus jãvy ù ag to há nỹtĩ jé? Topê to ãg há nỹtĩnh mũ, kỹ ãg tóg ti vỹ ki króm ke mũ gé. Jagnẽ to há to ken hã vỹ.

3 ãg tỹ Topê to há nỹtĩ sór kỹ ãg tóg ti vỹ ki króm ke mũ gé. Ti to há nĩ to ken hã vỹ. Ti vỹ pi(jé) kufy nĩ, ãg tỹ nén ki króm ke ti.

4 Jesus jãvy ag ne ù tỹ ti ki ge tũ ag jykre fĩn rãm tĩ. ãg hỹn hẽ ri kenh mũ, ãg tỹ ti ki ge tũ ag jykre fĩn rãm jé? Topê ki rã jé ãg tóg ke mũ. ãg tỹ ti ki rã kỹ ãg tóg hur fĩn rãm.

5 ãg tỹ Jesus to: “Topê kósin vỹ tỹ ti nĩ,” hen kỹ ãg tóg fĩn rãm ke mũ, ù tỹ ti ki ge tũ ag jykrén fĩn.

Jesus vỹ tỹ Topê kósin nĩ

6 Jesus Cristo tỹ ga kri tũg kỹ tóg goj tỹ vỹnh kype kỹ jẽ, kỹ ti kyvénh tóg ti ki kãkutẽ gé, ti ter kỹ. Kỹ tóg nén ù régre han ja nĩ. Nén ù pir pijé! Ti vỹnh kype tãvĩ pijé! Ti vỹnh kype vỹ nĩ, kar kỹ ti kyvénh ti ke gé, ti tỹ ãg jagfy ter tag ti. Kỹ Topê kuprĩg vỹ ãg mỹ ti kãmén tĩ gé. Ti pi(jé) ón tĩ, Topê kuprĩg ti.

7 Kỹ ãg ù tãgtũ tugrĩn ti tỹ tỹ Topê kósin nĩ ki kanhró nỹtĩ,

8 Topê kuprĩg tugrĩn, kar kỹ ti vỹnh kype ja tugrĩn, kar kỹ ti kyvénh tugrĩn ke gé, ti tỹ ãg jagfy ter kỹ. Nén ù pir hã tó ag tĩ ti to, hã vỹ: “Topê kósin vỹ tỹ ti nĩ,” he mũ.

9 Êprã ke ag tỹ ãg mỹ nén ù tó kỹ ãg tóg ag vỹ kri fig tĩ. Topê vỹ êprã ke ag vỹ kãfór nĩ, kỹ ti vỹ vỹ ki hã ke tãvĩ nĩ gé. Kỹ ù tỹ ãg mỹ Topê kósin tó mũ vỹ tỹ Topê ti nĩ, hã kỹ tóg tỹ vỹnh vỹ há nĩ.

¹⁰ Ëg tÿ Topê kósin ki rá kÿ Ëg tóg ti ki kanhró nÿtí. Ti ki rá kÿ Ëg tóg to jykrén há han ke mũ. Topê há vÿ ã kósin kāmén tĩ. Ëg tÿ ti vĩ to: “vênh vĩ há vê,” he sór tũ nĩn kÿ Ëg tóg ti to: “ti ón vê,” he mũ sir, Ëg tÿ ti vĩ kri fi sór tũ nĩn kÿ.

¹¹ Tag tó ti tĩ, Topê ti, ha mẽ. “Ájag tÿ rĩr krÿg ja tũ venh ke han jé sóg ke mũ. Inh kósin ter ja to ájag tóg rĩr krÿg ja tũ venh ke mũ,” he tóg, Topê ti.

¹² Ëg tÿ ti kósin ki ge kÿ Ëg tóg Ëg rĩr krÿg ja tũ venh ke mũ. Ëg tÿ jãvo ti ki ge tũ nĩn kÿ Ëg tóg rĩr krÿg ja tũ venh ke tũ nĩ.

Topê vÿ Ëg vĩ jēmēg tĩ

¹³ Ájag há ne Topê kósin ki ge kÿ nÿtĩ'. Kÿ ájag tóg Ëg rĩr krÿg ja tũ venh ke mũ. Sÿ tag tó sór vê, ájag mẽ, há kÿ sóg rán mũ.

¹⁴ Ëg tÿ ti mré vènh jykre pir han kÿ Ëg tóg jatun mẽ ti mré vēmén ke mũ gé. Kÿ Ëg tóg ti mẽ nén ù kar to vĩ tĩ. Nén tÿ ti mẽ há nĩ ěn há to vĩ jé Ëg tóg ke mũ. Ëg tÿ ti mẽ nén tÿ ti mẽ há nĩ ěn há to vĩ kÿ tóg Ëg vĩ mẽnh ke mũ sir.

¹⁵ Ti tÿ Ëg vĩ mẽ kÿ tóg Ëg mẽ han ke mũ gé sir. ěn kã ti pi(jé) han ke tũ nĩ', Ëg tÿ ti mẽ nén to vĩ mũ ti.

¹⁶ Kejēn Ëg tóg Ëg mré Jesus ki rá kÿ jē ù vég tĩ, há ra tóg Topê vĩ mranh mũ. Há ra tóg Topê tovãnh sór tũ nĩ. Topê tovãnh sór tũ ra tóg kygnē kÿ mranh mũ, Topê vĩ ti. Kÿ Ëg tóg Topê mré vēmén ke mũ, ti to, kÿ Topê vÿ ti krĩn ke mũ, ti tÿ ti jykre kórég tovãnh jé, ti tÿ Ëg rĩr krÿg ja tũ ve jé. Ëg kãmĩ ù tóg kejēn Topê tovãnh pē han mũ. ěn to sóg ájag mẽ: “ti to Topê mré vēmén,” he sór tũ nĩ.

¹⁷ Ëg tÿ vènh jykre vènhmÿ sí han kÿ Ëg tóg ti vĩ mranh tĩ. Ëg tÿ sĩn kÿ mranh mũ ra tóg kórég nĩ, kÿ tóg há ra Ëg mẽ vènh pãte fón sór mũ, kÿ Ëg tóg ti tovãnh pē han ke tũ nĩ. Ëg tÿ ti tovãnh pē han kÿ Ëg nũgme ki vár ke mũ, infernon ki.

¹⁸ Ëg tÿ tÿ Jesus jãvy nÿtĩn kÿ Ëg tóg ti vĩ mranh mãn sór tũ nĩ. Ëg jy nĩgãn ti tĩ, Topê kósin ti, Satanás tÿ Ëg vóg tũ nĩ jé.

¹⁹ Ëg há ne tÿ Jesus jãvy nÿtĩ'. Tag ki kanhró Ëg tóg nÿtĩ. Jãvo ěpra ke ù ag vÿ tÿ Satanás krēm ke kar nÿtĩ.

²⁰ Topê kósin vÿ kãtĩg ja nĩgtĩ. Tag ki kanhró Ëg tóg nÿtĩ. Ëg nĩgrēg róm tóg, Ëg tÿ Topê ki kanhrãn jé, Topê pē ti. Ti ki ge kÿ Ëg nÿtĩ, Ëg tÿ ti kósin tÿ Jesus Cristo ki ge kÿ nÿtĩn kÿ. Ti há vÿ tÿ Topê pē nĩ, Jesus Cristo panh ti. Ti há vÿ Ëg tÿ Ëg rĩr krÿg ja tũ venh ke han tĩ.

²¹ Inh krē', vènh kãggrá tÿ topê jykre han sór tũg nĩ. Há vê, sÿ ájag mẽ nén rán sór mũ ti.

JOÃO TỸ CARTA HAN MÃN

¹ Joaõ kófa tỹ rá vë. Isỹ fi mỹ rán hã vë, Topê tỹ fi kuprêg ký, fi krê mỹ ke gé, hã vỹ: Topê ki ge ký nỹtĩ kar, he mũ. Ājag to sóg há távĩ nĩ, ha mẽ. Ký ù tỹ vënh vĩ há kri fig mũ kar vỹ ājag to há nỹtĩ gé inh mré.

² Vënh vĩ há vỹ ěg kākã nĩ nĩ, tovãnh ke tũ pë ěg tóg nĩ. Hã ký ěg tóg jagnë to há nỹtĩ.

³ ěg jóg tỹ Topê mré sóg vëmén tĩ, ti tỹ ājag jagãgtãn jé, ti tỹ ājag tar han jé, ti tỹ ājag krĩ kuprãg jé ke gé. Jesus Cristo mỹ sóg tag to vĩ tĩ gé, ěg jóg mág kósin mỹ. Tĩ vĩ kri fig ěg tóg tĩ, vënh vĩ há kri, ký ěg tóg jagnë to há nỹtĩ gé.

Ěg tỹ jagnë to há nỹtĩnh ke

⁴ Ā krê kãmĩ ù vỹ vënh vĩ há nón mũ mũ, jỹ, ký tóg inh mỹ sér pë tĩ, sỹ tag mẽ ký. ěg jóg tỹ ěg mỹ nén tó ja ěn han kãn sór ag nëji mũ.

⁵ Ký sóg ā mỹ rán mũ, jỹ. Ā mỹ sóg: “jagnë to há nỹtĩmnĩ,” he mũ. Nén ù tãg pijé’, sỹ ā mỹ nén rán mũ tag ti. Vãsỹ ěg tóg tag mẽ, ěg tỹ ti ki rã vén ký.

⁶ ěg tỹ Topê to há nỹtĩnh ký ěg tóg Jesus tỹ ěg mỹ nén tó ja ěn han kãn ke mũ sir. Tĩ tỹ ěg mỹ nén tó vén hã vë, hã vỹ: “jagnë to há nỹtĩmnĩ,” he mũ.

Ū ag tóg Jesus to ón tĩ

⁷ Ū tỹ hën ri ke ag vỹ mũ mũgtĩ, hã ra ag tóg Jesus Cristo to ón tĩ. Tĩ to ag tóg: “tĩ pi(jé) ěg ri ke mur ja nĩ’, ěprã ke fi kósin pijé’,” he tĩ. Ag ón vë. Cristo kato tẽ ag vë.

⁸ Vënh ki rĩrnmĩ, ājag tỹ ag vĩ kri fig tũ nĩ jé, ājag rãnhrãj tỹ ājag mỹ tũ’ he tũ nĩ jé. Vãsãn nĩ, ājag tỹ tá ti kaja ve jé, Topê tỹ ěg mỹ nén nĩm sór mũ ti.

⁹ Ū tóg Cristo kãme pãtén sór mũ, ti vëme pãte tóg ù tó sór mũ. Tĩ tovãnh to ken hã vë. Ū tỹ ge pi(jé) Topê ki rã ký jẽ ha’. ěg tỹ Jesus kãme mũn ký ěg tóg ěg jóg mág ki rã ký nỹtĩ, ti kósin ki ke gé.

¹⁰ Kejën ù tóg ājag tá jun tĩ, hã ra tóg tag tó tũ nĩgtĩ. Ký ti mỹ: “inh mré nĩnh kãtĩg,” he sór tũg nĩ gé. Tĩ mỹ: “Topê vỹ ā ve há han,” he tũg nĩ gé.

¹¹ ěg tỹ ù tỹ ge mỹ: “Topê vỹ ā ve há han,” hen ký ěg tóg ti jykre to: “há ti nĩ,” he mũ gé. Ký tóg ěg tỹ ti mré ón mũ ri ke nĩ sir, ěg tỹ ti mỹ vĩ há han ký.

¹² Sỹ ājag mỹ nén rán sór mũ vỹ ver e tĩ, hã ra sóg rán ký jënë sór tũ nĩ. Sỹ ājag ki jun sór vë, ký sóg ājag mỹ tó sór mũ, ājag mré vëmén sór isóg mũ, ěg tỹ jagnë fe tỹ mrin ke jé.

¹³ Ā régre fi krê vỹ ā mũ ěkrég tĩ. Topê tỹ ùn kuprêg mũ fi vë. Hã vë, sỹ ājag mỹ nén rán sór mũ tĩ.

JOÃO TỸ CARTA Ũ HAN MÃN

¹ João kófa tỹ rá vë. Sỹ inh mré ke tỹ Gaio mỹ rán há vë.

² Ā to sóg há tãvĩ nĩ. Hỹ, há tãvĩ sóg nĩ, ā to. Ā to sóg Topê mré vëmén tĩ, ti tỹ Ā mỹ nén há kar nĩm jé, Ā kaga tũ nĩ jé ke gé. Topê to tar Ā tóg jê, tag ki kanhró, sóg nĩ.

³ Ā mré ke ag tóg inh ki junjun, kỹ ag tóg inh mỹ tó, Ā tỹ vënh vĩ há nón tũ mũ ti, Ā tỹ to tar nĩ ti. Kỹ tóg inh mỹ sér pê ti.

⁴ Inh krê tỹ vënh vĩ há nón mũn kỹ tóg inh mỹ sér tãvĩ tĩ, nén ũ tỹ inh mỹ sér nĩ kar kãfór, há kỹ tóg inh mỹ sér tĩ, Ā tỹ vënh vĩ há nón tũg kỹ.

⁵ Ā to sóg há tãvĩ nĩ, Gaio'. Ęg mré ke ag ki rĩr há han Ā tóg nĩgtĩ, ũ tỹ kór há tá kãmũ mũ ag mré há.

⁶ Tag tó ag tóg tag ki, igreja krêm, Ā mré ke ag. Ag to há tãvĩ Ā nêji nĩ. Ag ki rĩr măn nĩ gé, ag tỹ Ā ki junjun kỹ, kỹ ag mỹ nĩm nĩ, nén ũ tỹ ag mỹ tũ ên ti.

⁷ Topê rãnrãj han ag tóg tĩ. Jesus Cristo jyjy tó kỹ ag tóg hên ra mũgtĩ, kỹ ag tóg ũ tỹ ti ki ge kỹ nỹtĩ tũ ag tũ măn vãnh nĩgtĩ.

⁸ Há kỹ tóg há tĩ, Ęg tỹ ũ tỹ ge ki rĩr há han kỹ, Ęg mré ke ag. Ęg tỹ ag ki rĩr há han kỹ tóg Ęg tỹ ag mré Topê vĩ há tó mũ ri ke nĩ sir.

⁹ Ā jamã tá igreja krêm vënh măn tĩ ag mỹ sóg vënh rá jënê, há ra Diótfrefes vỹ inh vĩ mẽ jãvãnh nĩ. Ag kri tỹ ũn mág jê sór ti nĩ, Diótfrefes ti.

¹⁰ Isỹ tá jun kỹ sóg ti mỹ tónh ke mũ, ti jykre pãno ti, vënh kar rĩnve. Ón kỹ tóg iso féfén tĩ. Há ra tóg nén ũ kórég ũ han tĩ gé, há kỹ tóg Ęg mré ke ag tỹ Ājag tá junjun kỹ tóg ag mỹ: “inh mré nĩnh kãmũ jêg,” he vãnh nĩgtĩ. Kỹ tóg ũ ag tỹ ag mỹ: “inh mré nĩnh kãmũ jêg,” he sór mũ ra tóg ag tỹ ag mỹ vĩ há han kamêg tĩ gé. Ag mỹ tóg: “igreja krêm Ājag tóg rã măn ke tũ nĩ ha,” he tĩ, ag tỹ Ęg mré ke ag mỹ vĩ há han sór kỹ. Jykre kórég tãvĩ ti nĩ, Diótfrefes ti. Há kỹ sóg tĩ kato tênh ke mũ, ha vemnĩ.

¹¹ Tĩ jãvo sóg Ā to há tãvĩ nĩ, Gaio'. ũ tỹ nén ũ kórég han mũ ra ti kóm han sór tũg nĩ. Nén ũ há há han sórmnĩ. Ęg tỹ nén ũ há kar han kỹ Ęg tóg tỹ Topê krê nỹtĩ gé. ũ tỹ ti kórég han mũ vỹ Topê ki kagtĩg nĩ.

¹² Demétrio vỹ tỹ ũn jykre há nĩ, há ra. Vënh kar vỹ ti to vĩ há han tĩ. Ki há ag tóg tó ti, ag tỹ ti to vĩ há han kỹ, há kỹ sóg ag mré tó mũ gé. Isỹ vënh vĩ há há tó mũ ki kanhró Ā tóg nĩ.

¹³ Sỹ Ā mỹ nén rán sór mũ vỹ ver e tĩ, há ra sóg rán kỹ jënê sór tũ nĩ.

¹⁴ Kãnhmar sóg Ā venh ke kãtĩg mũ. Kỹ Ęg tóg jagnê mré vëmén ke mũ.

¹⁵ Ā jé jatun mỹ nĩ nĩ. Tag ki inh mré Ā to há nỹtĩ ag vỹ Ā mĩ êkrég tĩ. Kỹ Ā jamã tá inh mré ke kar mỹ: “Ājag mĩ tóg êkrég tĩ,” hemnĩ iso. Vyrmỹ ag mỹ tómnĩ, sỹ ag mĩ êkrég mũ ti.

Hã vë, sỹ Ā mỹ nén rán sór mũ ti.

JUDAS TÝ CARTA

¹ Judas tý rá vě, Tiago jávy ti. Jesus Cristo mý sóg rānhrāj tūgtī. Isý ũ tý ěg jóg tý Topě tý kuprěg ja ag mý rán hā vē, ti tý ũ to há ag mý. Ti tý ājag kuprěg ký tóg ājag jy nīgān tī gé, Jesus Cristo tugrīn.

² Topě mré sóg věmén tī, ti tý ājag jagāgtān pē han jé, ti tý ājag krī kuprā pē han jé, ti tý ājag tý jagnē to há tāvī han jé ke gé.

Ū tý Topě to un'ón mū ag

³ Inh krē', ājag mý sóg Topě tý ěg kar kren han tag tónh ke nī vē, inh věnh rá tag ti ki. Hā ra vāhā ũ ag tóg ājag krīn kónān sór mū ha, hā ký sóg ājag mý: "Topě ki rá to tar nýtīmni," he mū. Topě tý ěg mý nén tó mū vỹ pir nī, hā vỹ: Topě jykre to tar nī, he mū. Ā tū ag kar mý tóg tag tó ja nī. Ū tý tag kato vī ký ti vī jēmē sór tūg nī.

⁴ Ha vé, ũ ag tóg Topě to un'ón tī, ājag krīn kónān jé. Ūn jykre pāno ag vē, hā ra ag tóg jykre hā nī ve nýtī, hā ký ājag tóg ag vī kri fi sór mū. Hā ra ag tóg ón ký: "Ěg jóg tý Topě vỹ ěg jagāgtān mū, hā ký ěg jatun mý věnh jykre věnhmý kar han ke mū," he tī, ũ tý ājag krīn kónān mū ag. Ěg Senhor tý Jesus Cristo to ag tóg: "ti vī han ke tū ěg nī," he tī. Ti hā ne tý ěg kri ke nī', Jesus ti. Hā ra ũ tý ti vī han sór tū ag tóg rán ký nýtī gé. Vāsý ag tóg ag to rán ja nīgtī, Topě vī rán tī ag, ký ag tóg Topě tý ũ tý ge ag vóg kónān ke mū ěn tó ja nīgtī.

⁵ Ha vé, vāsý ěg Senhor vỹ ga tý Egito tá ā povo tý Israel mré kākutē ja nīgtī, ag tý ājag ga ra mū jé. Hā ra ag kāmī ũ ag tóg ti vī kri fi vānh ja nýtīgtī. Hā ký Topě vỹ ag tý tūg' he kān, ũ tý ti vī kri fi jāvānh ja ag. Tag mē ājag huri. Ki kanhró ājag nýtī. Hā ra sóg rán mān sór mū, ājag tý mī ěkrén jé.

⁶ Ký kanhkā tān ag vỹ ge ja nīgtī gé. Ag kāmī ũ ag tóg Topě tý ag mý nén nīm ja ěn tovānh. Ājag jamā tovānh ag tóg. Ký Topě vỹ ag sigsé, ký tóg ěmā kuty tá ag vin han. Ag se vỹ tūg' henh ke tū nī. Topě tý ěg kar jykre tugným ke kurā ěn kā tóg ag jykre tugným ke mū gé.

⁷ Kar ký cidade tý Sodoma mī ěkrén nī gé, cidade tý Gomorra mī ke gé, ti pēnīn ěmā kāsir mī ke gé. Ěn tá ke ag ne věnh jykre pāno tāvī han ti ja nīgtī', kanhkā tān ag ri ke. Jagnē mré ný kónān tāvī han ja ag tóg nīgtī, ký ag tóg ũ ag to ěn ja nīgtī gé, ag mré ke tū ag, ũn gré tý ũn gré ũ mré ný sór ký. Ký Topě vỹ pí nhyr vānh ki ag vām ja nīgtī, ěg tý ag to jykrén ký to ki kanhró nýtī jé.

⁸ Ký ũ tý Topě to ón mū ag vỹ věnh jykre kórég han mū ěn ag ri ke han tī gé. Topě vī mranh ký ag tóg nīgtī. Ag věnh péti tóg ag mý sér tī. Hā ra ag tóg věnh kavénh tī, ājag jykre pāno tugrīn. "Ěg pí(jé) tý ũ krēm ke nýtī'," he ag tóg tī. Ký ag tóg ěg tý ũn vég tū ag to vī kónān tī gé, ũ tý kanhkā tá tý ũn mág nýtī ag mý.

⁹ Topě tý jēnē jafā to pā'i tý Miguel vỹ tag han ja tū nīgtī, ha mē. Satanás mré tóg rárā, ti tý Moisés ter ma tūg sór ký, Miguel ti. Hā ra tóg Satanás mý vī kónān ja tū nīgtī, ti tý tý pā'i nī ra. Ti mý tóg: "ěg Senhor jé ā vóg kónān," he ja nīgtī ti.

¹⁰ Hā ra ũn ón tī tag ag vỹ kanhkā tān ag to vī kónān tī, ag tý ag ki kagtūg (hā) ra. Bicho ri ke ag nýtī, ag tý ājag tý nén to ěn mū ěn han mūn ký. Krī tū ag nýtī, hā ký ag tóg nén ũ věnhmý kar han tī. Hā ra Topě vỹ ag vóg kónān ke mū.

¹¹ Ag ve kónān ti tī, Topē ti. Caim tỳ Topē vī kato tē ja ěn ri ke han ag tóg mǔ. Ag tỳ rico nýtī sór kǵ ag tóg vĕnh jykre kórég tó tī, Balaão tỳ vĕnh jykre kórég tó ja ěn ri ke. Coré ri ke ag tóg Topē kato tē tī, hā ra ag tóg tag to nǔgme ki vár ke mǔ.

¹² Ājag tỳ Jesus ki ge kǵ jagně to há nýtīn kǵ ājag tóg igreja krĕm festa han tī. Ěn ká ag tóg ājag mré jĕn tī gé, ũ tỳ Topē to ón tī ag. Hā ra ag tóg ki ājag kavĕnh tī gé. Jatun mý ag tóg jĕn mág tī. Mý'ág vānh ag nýtī. Ũ to jykrĕn vānh ag tóg nýtī gé. Ājag jĕn mág hā mǐ ag tóg ěkrég tī. Kejĕn kāka tóg kanhkā góg tatīn kātīg mǔ, hā ra tóg kutĕ tǔ nǐgtī. Tag ri ke ag nýtī, véké ag tóg vī tī. Ka ũ tóg kanĕn vānh nýtī. Ěn kunǔg ěg tóg tī, ti jāre mré hā, kǵ tóg kanĕn mǎn ke tǔ pĕ nī sir. Ter ti nī ha. Tag ri ke ag tóg nýtī gé, ũ tỳ Topē to ón mǔ ag.

¹³ Kejĕn goj kafā tǔ tóg krĕm ke mǔ, kǵ tóg jĕngĕj nī. Tag ri ke ag nýtī gé. Ti jĕngĕj vỹ tỳ ag jykre pāno nī. Vĕnh ven ti tī. Krīg tī tī ri ke ag tóg nýtī gé. Sīnvī nī ve tóg nī, hā ra tóg ón kǵ tī tī, krīg tī tī ti. Tag ri ke ag nýtī. Topē vỹ kuty ki ag vām ke mǔ, kǵ ag tóg tá kápa mǎn ke tǔ pĕ nī, ũ tỳ Topē to ón mǔ ag.

¹⁴ Ag hā to tóg rán ja nī, Enoque ti. Adāo krĕ tỳ ki krĕg mǎn tỳ 7 (ke) vỹ tỳ ti nī, Enoque ti. Tī hā vỹ ag to: “ha vé, ěg Senhor vỹ jun ke mǔ, ti tỳ jĕnĕ jafā ag mré hā,” he ja nī. “E tǎvī ag nýtī, ti tỳ jĕnĕ jafā ag.

¹⁵ Ti kātīg kǵ tóg ěprā ke ag jykre tugným kǎn ke mǔ. Kǵ tóg ũn jykre pāno ag vóg kónān ke mǔ, ag jykre pāno to, ag tỳ Topē kato tē to, ag tỳ ti to vī kónān to. Ũ tỳ ti vī mranh tī ag vỹ ti mý vī kónān pĕ han tī, hā kǵ tóg ag vóg kónān ke mǔ,” he ja tóg nī, Enoque ti.

¹⁶ Topē to ón mǔ ěn ag tỳ nĕn ũ jagy ve kǵ tóg ag mý kórég nī, hā kǵ ag tóg: “Topē ne tóg jykre kórég nī!” he tī. Ājag tỳ nĕn to ěn mǔ ěn hā han ag tóg tī. Hā ra ag tóg ón kǵ vī mág tī. Kǵ ag tóg vĕnh kar mý vī há han tī, ón kǵ, ag tỳ ājag vī há to nĕn ũ ve jé, ag tỳ to rico nýtī jé.

Ěg tỳ apóstolo ag vī jĕmĕnh ke

¹⁷ Ag jāvo apóstolo ag vī mǐ ěkrĕn nī, inh krĕ'. Ěg Senhor tỳ Jesus Cristo hā vỹ apóstolo ag vin ja nǐgtī, hā kǵ ag vī mǐ ěkrĕn há han nī.

¹⁸ “Kurā tỳ ěgno to hā ag tóg ājag to é hĕnh ke mǔ,” he ja ag tóg nǐgtī, apóstolo ag. “Ājag tỳ nĕn ũ kórég to ěn mǔ ěn hā han sór ag tóg mǔgtī, ũ tỳ ājag to é hĕnh ke mǔ ěn ag,” he ja ag tóg nǐgtī. Apóstolo ag tỳ tó jan hā vĕ.

¹⁹ Ag hā vĕ, sý ājag mý ũn tó mǔ ag. Ũ tỳ Topē to ón mǔ ěn ag hā vĕ. Ěg tỳ jagně kato tē han sór ag tóg mǔ. Ag tỳ nĕn ũ to ěn mǔ tag hā ne ag mý há tī'. Ag pí(jé) Topē kuprīg tỳ jagrĕ nýtī'.

²⁰ Ag jāvo ājag tóg Topē jykre ki ge kǵ nýtī, Topē tǔ ki, kǵ to jagně tar han nī, inh krĕ'. Topē kuprīg tỳ ājag krĕn kǵ Topē mré vĕmĕn nī.

²¹ Topē vỹ ājag to há tǎvī nī. Tī tovānh tǔg nī. Ěg Senhor tỳ Jesus Cristo tỳ ājag jagāgtān ke tag hā ve sórmnī, kǵ ājag tóg ěg rĕr krýg ja tǔ venh ke mǔ.

²² Ũ ag tóg tag to tar tǔ nýtī ver, “hỹ mý vỹ?” he ag tóg tī. Tag ag jagāgtān nī.

²³ Ag kren han nī, pí jo ag jy nǐgān kǵ. Kǵ ũ ag tóg ājag tỳ nĕn to ěn mǔ kar ěn han tī. Ag jagāgtān nī gé. Hā ra vĕso jykrĕn nī gé, ājag tỳ ag jykre pāno nón mǔ sór tǔ nī jé. Kavĕj ag nýtī, ag jykre kórég to. Kǵ ag kavĕj tag to ěn sór tǔg nī. Vĕso jykrĕn tǎvī han nī.

Topē tỳ tỳ ũn mág nī

²⁴ Topě vỹ ěg tỹ prãnh ke tũ han ki kanhró nĩ. Kỹ tóg ěg tỹ ùn há tãvĩ han ki kanhró nĩ gé, ti tỹ kejẽn ěg jé prěr ken ký, ěg tỹ ti rĩnja tá nỹtĩ jé. Tá tóg sĩnvĩ pẽ nĩ, sér pẽ.

²⁵ Pír ti nĩ, Topě ti, ěg kren han tí ti. Ěg Senhor tỹ Jesus Cristo tigrĩn tóg ěg kren han tí. Tĩ hã ne tóg tar nĩ', ti hã ne tóg tỹ ùn mág nĩ', ti hã ne tóg tỹ pã'i nĩ', ti hã ne tóg tỹ vẽnĥ kar kri ke nĩ'. Vãsỹ tóg kã nĩ nĩ, nén ũ kar han tũg ki, ũri ke gé, hã ra tóg tũg' henĥ ke tũ pẽ nĩ gé, ti tỹ tỹ ùn mág jẽ ti.

Amém.

JOÃO TỸ ẼG TỸ NÉN VENH KE MŨ RÁ

¹ Topě vỹ Jesus Cristo mỹ nén (ũ) tỹ hên ri ke ven, ẽg tỹ kãnhmar nén venh ke mũ ti, kỹ Jesus vỹ ẽg mỹ ven, ẽg tỹ tỹ ti camarada nỹtĩn kỹ. Kỹ tóg ã tỹ jẽnẽ jafã jẽnẽ, ti tỹ ti camarada tỹ João mỹ tó jé gé.

² Ve kãn ja ti nĩ, João ti, Topě tỹ ti mỹ nén ven mũ ti, Jesus Cristo tỹ ti mỹ nén ven mũ ti ke gé. Ti tỹ ve kỹ tóg rán ja nĩ, João ti, hã vỹ nĩ.

³ Ũ tỹ vẽn hã tag to ke mũ ag mỹ tóg vĩ há han ke mũ, Topě ti, ù tỹ vẽn vĩ tag mẽg mũ ag mỹ ke gé. Topě tỹ tó mũn hã vẽ, ẽg tỹ ti vĩ ki króm jé. Kãnhmar ẽg tóg tag ki rán kỹ nĩ tag ve kãn ke mũ, kakó tãvĩ tóg tĩ ha.

João tỹ ẽmã tỹ 7 (ke) tá Jesus mré ke ag mỹ ti vĩ tó

⁴ João tỹ rá hã vẽ. Isỹ ga tỹ Ásia tá Jesus mré ke ag mỹ rán hã vẽ, cidade tỹ 7 (ke) ki ke ag mỹ.

Topě jé ãjag tỹ tar' hé, kỹ ãjag jé krĩ kãnhvy nỹtĩ. Topě vỹ nĩgtĩ. Vãsỹ tóg nĩ ja nĩgtĩ, kỹ tóg ùri nĩ nĩ, hã ra tóg kãtĩg ke mũ gé. Ti kuprĩg vỹ ti mré nĩ gé, kỹ tóg tỹ ù tỹ 7 (ke) ve nĩ, ti kuprĩg ti. Topě nĩgia tá tóg nỹtĩ, ti kuprĩg tỹ tỹ ù tỹ 7 (ke) ve ẽn ti. Ti kuprĩg ẽn jé Topě mré ãjag krĩ tỹ kãnhvy' hé,

⁵ Jesus Cristo mré ke gé. Jesus vỹ Topě vĩ tó há han ja nĩgtĩ, to tóg krónh ke ja tũ nĩgtĩ. Kỹ tóg ã ter kar kỹ rĩr mãn vẽn ja nĩ. Kỹ ẽg rĩnrĩr mãn ke mũ gé, ti nón. Kỹ Jesus tóg ẽprã pã'i ag kri tỹ ùn mág jẽ gé.

Ẽg to há tãvĩ ti nĩ, Cristo ti. Ti kyvẽn hã tóg ẽg jagfy ti ki kãkutẽ, tỹ tóg ẽg krenkren han, ẽg tỹ Topě vĩ mranh ja to.

⁶ Kỹ tóg ẽg tỹ pã'i han ke mũ gé, ti krêm. Topě tũ ki rĩr jé ẽg tóg ke mũ gé, ti jóg tũ ki. Ti hã ne ã pir mỹ tỹ ùn mág nĩ', Jesus ti. Ti hã ne ã pir mỹ tar nĩ', ùri, kỹ tóg tũ' henh ke tũ nĩ, ti tar nĩn kỹ. Hã vẽ.

⁷ Ha vé, kãtĩg mãn jé tóg ke mũ, kãnhkã góg kãmĩ. Vẽn hã kar vỹ ti venh ke mũ, ẽn kã, ù tỹ ti kusón mũ ag mré hã. Kỹ povo kar vỹ ti tugrĩn jagtar kãn ke mũ. Jagtar jé ag tóg ke mũ, vêsỹrẻnh jé ag tóg ke mũ, ha vemnĩ. Hã vẽ.

⁸ “Ũn ve vỹ tỹ inh nĩ, hã ra sóg tỹ ẽgno nĩnh ke mũ gé,” he tóg, ẽg pã'i mág ti. Vãsỹ tóg nĩgtĩ, kỹ tóg ver ùri nĩ gé, kỹ tóg kãtĩg ke mũ gé, ù tỹ nén (ũ) kar han ki kanhrãn mũ ẽn ti.

João tỹ Jesus ve

⁹ ãjag mré ke vỹ tỹ inh nĩ, inh, hã vỹ: João, he mũ. Jesus mré ke vỹ tỹ inh nĩ, ãjag mré. Jagtar inh nĩ gé, ãjag jagãgtar ri ke inh nĩ gé, hã ra sóg ãjag kóm to krónh ke tũ nĩgtĩ gé, kỹ sóg ãjag mré Topě tỹ tỹ ẽg pã'i nĩ venh ke mũ gé. Goj vãsõ tá inh nĩ nĩ, ti jyjyn hã vỹ: Patmos, he mũ. Ki sóg se kỹ nĩ nĩ, isỹ Topě vĩ tó ja tugrĩn. Jesus vỹ ẽg mỹ ki hã tó ja nĩ. Ti vĩ ẽn tó ja inh nĩ, vẽn hã kar mỹ, hã tugrĩn isóg se kỹ jẽ.

¹⁰ Domingo ù kã Topě kuprĩg tóg inh mỹ nén nẽ ven. Inh pãnĩ tá sóg jamã há(r) vẽn vĩ mẽ, kỹ tóg trombeta kyr mẽ ja nĩ, vẽn vĩ ẽn ti.

¹¹ Kỹ tóg inh mỹ: “rán nĩ, ã tỹ nén vég mũ tag ti,” he ja nĩ. “Livro ki rán nĩ. Inh mré ke ag mỹ livro tag jẽnẽmnĩ, cidade tỹ Ếfeso ra, cidade tỹ Esmirna ra, cidade tỹ Pérgamo ra, cidade tỹ Tiatira ra, cidade tỹ Sardes ra, cidade tỹ Filadélfia ra, cidade tỹ Laodicéia ra ke gé,” he ja tóg nĩ, inh pãnĩ tá inh mỹ vẽn vĩ tó mũ ẽn ti.

12 Kŷ sóg vĕsŷjãm ěvãnh, sŷ ũ tŷ inh mré vĭ mũ ěn ve jé. Isŷ vĕsŷjãm ěvãnh kŷ sóg néj tŷ kri vin jafã tŷ 7 (ke) vé, vela tŷ kri vin jafã ěn, ouro tŷ tóg hyn han kŷ nŷtĭ.

13 Néj tŷ kri vin jafã ag kaju kã ũ tóg jĕ nĭ, hã ra tóg tŷ ěprã ke nĭ ve nĭ. Kur tĕj tu kŷ tóg jĕ nĭ, ouro tŷ tóg vĕsóg fĭn kŷ jĕ nĭ gé, ti fe kri, ũ tŷ tŷ ěprã ke nĭ ve ěn ti.

14 Gãnh kupri pĕ tóg jĕ, vĕnh mĕg tŷ carneiro kyki kupri ri ke tóg nĭ, ti gãnh ti, kukryr kó ri ke. Kanĕ gru tóg jĕ nĭ, pĭ gru ri ke.

15 Pĕn jĕngrĕ tóg jĕ nĭ, ouro jĕngrĕ ri ke. Ěg tŷ pĭ ki ouro vãm kŷ ti tŷ jonh ke kŷ jĕngrĕ sĭnvĭ han ěn ri ke ti nĭ, ti pĕn ti. Ti vĭ vŷ goj krog tŷ óóh he ěn ri ke nĭ.

16 Krĭg tŷ 7 (ke) génh kŷ tóg jĕ nĭ. Ā pĕgja tŷ tóg krĭg tŷ 7 (ke) génh kŷ jĕ nĭ. Kŷ rógro jã vŷ ti jĕnkã tá kãkutĕ mũ. Jã régre ti nĭ, rógro ti, jã há. Ti kakã vŷ kókov nĭ, rá tŷ ěg nĭno kã sa kŷ kókov ěn ri ke ti nĭ, ũ tŷ tŷ ěprã ke nĭ ve ěn kakã ti.

17 Sŷ ti ve kŷ sóg ti pĕn krĕm kutĕ mũ, ga kri. Ter ve han inh. Hã ra tóg Ā pĕgja tŷ inh mĕg mũ, kŷ tóg inh mŷ: “inh kamĕg tŷg nĭ,” he mũ. “Ūn ve vŷ tŷ inh nĭ, ěgno ke gé.

18 Rĭr inh jĕ nĭ. Ter ja inh nĭ, hã ra sóg rĭr jĕ nĭ, kŷ sóg ter mãn ke tŷ pĕ nĭ. Isŷ ũ mŷ: “ter jĕ Ā tóg ke mũ,” hen kŷ tóg ter ke mũ. Isŷ ũ mŷ: “ter ke tŷ Ā tóg nĭ,” hen kŷ tóg ter ke tŷ nĭ gé, kŷ tóg vĕser jamã venh ke tŷ nĭ gé,” he tóg.

19 “Rãn nĭ, Ā tŷ nĕn vĕg mũ tag ti, ěprã ke ag tŷ ũri nĕn vĕg mũ ti, ag tŷ kar kŷ nĕn venh ke mũ ti ke gé,” he tóg.

20 “Krĭg ag vĕg Ā tóg jĕ nĭ, inh nĭgé kãki. Kŷ Ā tóg néj tŷ kri vin jafã ag vĕg mũ gé, ouro tŷ vela tŷ kri vin jafã tŷ 7 (ke) tag ag. Nhŷ Ā mŷ kãmĕn, Ā tŷ nĕn vĕg mũ tag ti. Krĭg tŷ 7 (ke) tag ri ke ag nŷtĭ, Topĕ tŷ jĕgnĕ jafã ag. Inh ki ge kŷ nŷtĭ ag ki ag tóg rĭr tŷ, Topĕ tŷ jĕgnĕ jafã tag ag. Sŷ Ā mŷ cidade tŷ 7 (ke) tó mũ ěn tá ag nŷtĭ, inh mré ke ag, ag tŷ ũn ki rĭr mũ ag. Kar kŷ néj tŷ kri vin jafã ri ke ti nŷtĭ, ũ tŷ inh ki ge kŷ nŷtĭ tag ag,” he tóg, ũ tŷ tŷ ěprã ke nĭ ve ěn ti.

2

Jesus tŷ Ěfeso tá igreja tá ke ag mŷ Ā vĭ jĕnĕ

1 “Ū tŷ cidade tŷ Ěfeso tá inh mré ke ag ki rĭr mũ ěn mŷ tag rãn nĭ, ha mĕ,” he tóg, ũ tŷ tŷ ěprã ke nĭ ve ěn ti. “Ū tŷ Ā mŷ vĕnh vĭ jĕnĕg mũ vŷ krĭg tŷ 7 (ke) génh kŷ jĕ nĭ, ti pĕgja tá ti nĭgé kãki, hemnĭ. Kŷ tóg néj tŷ kri vin jafã tŷ 7 (ke) kãmĭ tí mũ gé, hemnĭ.

2 Ājag tŷ nĕn han mũ ki kanhró sóg nĭ, he ti, hemnĭ iso. Vãsãn Ājag tóg tí. Iso krónh ke tŷ Ājag tóg nŷtĭ. Ūn jykre pãno ag tóg Ājag mŷ kórég nŷtĭ. Ājag kãmĭ ũ tóg ón kŷ: apóstolo vŷ tŷ ěg nŷtĭ, he ja nŷtĭ. Ag jykre tugnŷm kŷ Ājag tóg ag ón mũ tag to ag pan.

3 Iso tar Ājag tóg nŷtĭ. Isugrĭn Ājag tóg jagtar, ge ra Ājag tóg iso krónh ke ja tŷ nĭ.

4 Hã ra sóg nĕn ũ sĭ tó sór mũ, Ājag mŷ. Ājag tŷ nĕn han mũ ũ tóg inh mŷ há tŷ nĭ. Ājag tŷ inh ki ge vĕn kŷ Ājag tóg iso há tãvĭ nŷtĭ ja nĭgtĭ, kŷ tóg há tí ja nĭ, hã ra Ājag tóg ũri krónh ke mũ.

5 Ājag tŷ vãsŷ iso tar ěn mĭ ěkrĕn nĭ. Ājag jykre kórég tovãnh nĭ. Ājag tŷ inh ki ge vĕn ěn ri ke han mãn nĭ, iso há tãvĭ nŷtĭ mãn nĭ. Ājag tŷ tag han sór tŷ nŷtĭn kŷ sóg Ājag ki jun kŷ (sóg) Ājag tŷ néj tŷ kri vin jafã ěn ma tĭg ke mũ, ha vemnĭ.

6 Nén ũ tóg hã ra há nĩ, ãjag tỹ nén han mũ ũ ti. Nicolaítas he mũ ên ag jykre to ãjag tóg kórég tâvĩ nỹtĩ, isỹ ag jykre to kórég kóm, he tóg, hemnĩ, Éfeso tá ke ag mỹ, vènh rán ki,” he tóg inh mỹ, ũ tỹ tỹ êprã ke nĩ ve ên ti.

7 “Ũ nĩgrêg nỹtĩ ag tỹ tỹ jêmê jé, Topê kuprĩg vĩ ti. Ũ tỹ inh ki ge kỹ nỹtĩ ag hã mỹ tóg tó tĩ, Topê kuprĩg ti,” he tóg. “Ũ tỹ isovãnh tũ ên vỹ ka kanê há konh ke mũ, ka tỹ êg rĩnrĩr han mũ ên kanê, Topê jakré ên kanê,” he tóg, ũ tỹ tỹ êprã ke nĩ ve ên ti. Ti tỹ Éfeso tá ke ag mỹ vènh vĩ jêñêg mũn hã vê.

Jesus tỹ Esmirna tá igreja tá ke ag mỹ ã vĩ jêñê

8 Kỹ tóg: “ũ tỹ cidade tỹ Esmirna tá inh ki ge kỹ nỹtĩ ag ki rĩr mũ ên mỹ tag rán nĩ, ha mẽ,” he mũ gé, ũ tỹ tỹ êprã ke nĩ ve ên ti. “Ũ tỹ ã mỹ vènh vĩ jêñêg mũ vỹ tỹ ùn ve nĩ, hã ra tóg tỹ êgno nĩ gé, hemnĩ. Ter ja ti nĩ, hã ra tóg rĩr mãn, hemnĩ iso.

9 Isugrĩn ag tóg ãjag to kórég nỹtĩ, kỹ ãjag tóg jagãgtar nỹtĩ. Ki kanhró sóg nĩ. Ge ra ãjag tóg inhhã rico ri ke nỹtĩ. ãjag to ag tóg vĩ kónãn tĩ, ũ tỹ ón kỹ: “Judeu vỹ tỹ êg nỹtĩ, Topê tũ vỹ tỹ êg nỹtĩ,” he mũ ag. Ag pi(jé) tỹ Topê tũ nỹtĩ! Satanás tũ vỹ tỹ ag nỹtĩ.

10 ãjag jagtar han jé ag tóg ke mũ, isugrĩn. Mũmêg tũg nĩ hã ra. Japo vỹ ãjag kato vãsãn ke mũ, kỹ ag tóg vêseja kãtã ãjag vãm ke mũ. Japo tỹ ãjag jykre ve sór hã vê. Kurã tỹ 10 (ke) ki ke vê, ag tỹ ãjag vóg kónãn ke ti. Isovãnh tũg nĩ, ag tỹ ãjag tén sór mũ ra. Kỹ ãjag tóg rĩr krỹg (ja) tũ venh ke mũ, kỹ tóg ãjag mỹ sér tĩnh mũ, he tóg, hemnĩ, vènh rán ki,” he tóg, ũ tỹ tỹ êprã ke nĩ ve ên ti, inh mỹ.

11 “Ũ nĩgrêg nỹtĩ ag tỹ tỹ jêmê jé, Topê kuprĩg vĩ ti. Ũ tỹ inh ki ge kỹ nỹtĩ ag hã mỹ tóg tó tĩ, Topê kuprĩg ti,” he tóg. “Ũ tỹ isovãnh tũ ên vỹ nũgme ki vár ke tũ nĩ,” he tóg, ũ tỹ tỹ êprã ke nĩ ve ên ti. Ti tỹ Esmirna tá ke ag mỹ vènh vĩ jêñêg mũn hã vê.

Jesus tỹ Pérgamo tá igreja tá ke ag mỹ ã vĩ jêñê

12 Kỹ tóg: “ũ tỹ cidade tỹ Pérgamo tá inh ki ge kỹ nỹtĩ ag ki rĩr mũ ên mỹ tag rán nĩ, ha mẽ,” he mũ gé, ũ tỹ tỹ êprã ke nĩ ve ên ti. “Ũ tỹ ã mỹ vènh vĩ jêñêg mũ vỹ rógro jã régre vyn kỹ jê nĩ, ùn jã há ên, hemnĩ iso.

13 Satanás nĩgja tá ãjag tóg êmã nỹtĩ, ki kanhró sóg nĩ. Iso tar ãjag tóg nỹtĩ. ãjag régre tỹ Antipas tén ja ag tóg nĩ, ti tỹ inh jyjy tó tugrĩn. Ge ra ãjag tóg iso: “ti ki kagtĩg sóg nĩ,” he ja tũ nĩ, ãjag tỹ Satanás jamã tá nỹtĩ ra.

14 Hã ra sóg nén ũ tó sór mũ gé, ãjag mỹ, ti tỹ inh mỹ há tũ nĩn kỹ. ãjag kãmĩ ũ ag tóg Balaão jykre han sór mũ. Balaão vỹ Balaque mỹ kãmên ja nĩ, ti tỹ Israel krê ag krĩn kónãn jé, Topê vĩ mranh ke to. Ti tỹ ag krĩn kónãn kỹ ag tóg vènh kãggrã to festa ko ja nĩgtĩ. Ag tỹ ón kỹ vènh kãggrã to: topê, he mũ ên mỹ festa ja vê. Ên ko kỹ ag tóg ãjag prũ tũ fag mré nỹgnỹ he ja nĩgtĩ gé. Tag han sór ag tóg mũ gé, Balaão kóm, ãjag kãmĩ ũ ag, kỹ tóg inh mỹ kórég nỹ.

15 Kỹ ãjag kãmĩ ũ ag tóg Nicolaítas he mũ ên ag jykre han sór mũ gé.

16 Tovãnh nĩ, ãjag jykre tag. Ke tũ nĩ mũ ra sóg ãjag ki jun ke mũ, sỹ ũ tỹ vènh jykre tag han mũ ag kato vãsãn jé, rógro tỹ inh jênkã tá kãkutê mũ ên tỹ, hemnĩ, vènh rán ki,” he tóg, inh mỹ, ũ tỹ tỹ êprã ke nĩ ve ên ti.

17 “Ũ nĩgrêg nỹtĩ ag tỹ tỹ jêmê jé, Topê kuprĩg vĩ ti. Ũ tỹ inh ki ge kỹ nỹtĩ ag hã mỹ tóg tó tĩ, Topê kuprĩg ti,” he tóg.

“Ũ tỹ isovãnh tũ mỹ sóg kanhkã tá vễjên ên nĩm ke mũ, vễjên tỹ pēju kỹ nĩ ên. Ag mỹ sóg pó kupri nĩm ke mũ gé. Kri vènh jyjy tãg tóg rán kỹ nĩ. Ũ pi(jé)

věnh jiji tag ki kanhró nĩnh mũ'. Ũ tỹ pó kupri ěn mǎg mũ ěn hǎ tóg ki kanhró nĩnh mũ, ǎ pir mỹ, ti jyjy tǎg ki, he tóg, hemnĩ," he tóg, ũ tỹ tỹ ěprǎ ke nĩ ve ěn ti. Ti tỹ cidade tỹ Pěrgamo tá ke ag mỹ věnh vĩ jěněg mũn hǎ vē.

Jesus tỹ Tiatira tá igreja tá ke ag mỹ ǎ vĩ jěně

18 Kỹ tóg: "ũ tỹ cidade tỹ Tiatira tá inh ki ge kỹ nỹtĩ ag ki rĩr mũ ěn mỹ tag rǎn nĩ, ha mē," he mũ gé, ũ tỹ tỹ ěprǎ ke nĩ ve ěn ti. "Ũ tỹ ǎ mỹ věnh vĩ jěněg mũ vĩ tỹ Topě kósin nĩ, hemnĩ," he tóg. "Ti kanē vĩ pí gru ri ke nĩ, ti pěn vĩ ouro jěngrē ri ke nĩ gé, hemnĩ iso.

19 Ājag tỹ nén han mũ vég sóg tĩ. Iso há tǎvĩ ājag tóg nỹtĩ, inh ki rǎ pē han kỹ ājag tóg nỹtĩ. Inh rǎnhrāj han ājag tóg mũgtĩ, to krónh ke tũ ājag tóg nĩgtĩ. Vǎsỹ ājag tóg inh jykre to tar nỹtĩ ja nĩgtĩ, kỹ ājag tóg ũri to tar kǎfór nỹtĩ gé.

20 Hǎ ra sóg nén ũ sĩ tó sór mũ gé, ājag mỹ, ti tỹ inh mỹ há tũ nĩn kỹ. Jezabel fi vĩ kamēg ja tũ ājag tóg nĩgtĩ, hǎ kỹ fi tóg ón kỹ vĩ tĩ nĩ. Inh camarada ag krĩn kónǎn fi tóg tĩ, ag tỹ fi mré nỹ jé, ag tỹ věnh kǎggrǎ mỹ nén (ũ) nĩ pũn mũ ěn ko jé gé.

21 Fi tovǎnh isóg mũ vē, fi tỹ ǎ jykre tugnỹm jé, hǎ ra fi tóg ǎ jykre kórég tovǎnh sór tũ nĩ.

22 Fi kagǎg jé sóg ke mũ. Ũ tỹ fi jykre han mũ ag vóg kónǎn jé sóg ke mũ gé, ag tỹ fi jykre kórég tovǎnh jǎvǎnh nỹtĩn kỹ.

23 Fi krē kǎgtén kǎn jé sóg ke mũ gé. Kỹ inh ki ge kỹ nỹtĩ kar ag vĩ inh jykre ki kanhró nỹtĩnh mũ. Věnh kar tỹ nén to jykrén mũ ěn ve kǎn sóg tĩ, věnh kar tỹ nén han sór mũ ěn ke gé. Ājag tỹ nén han mũ ěn ri ke han jé sóg ke mũ, ājag mỹ, ha vemnĩ.

24 Ājag kǎmĩ ũ ag tóg hǎ ra fi jykre han ja tũ nĩgtĩ, ājag tỹ Tiatira tá nỹtĩ ra. Ājag pí(jé) fi tỹ věnh jykre han mũ han ja nĩ. Ag tỹ nén to: "Satanás jykre jagy," he mũ ěn han sór ja tũ ājag nĩgtĩ. Hǎ kỹ sóg ājag mỹ nén ũ jagy tónh ke tũ nĩ gé.

25 Ājag tỹ nén han mũ to tar nỹtĩmĩ, gen kỹ inh kǎtĩg mǎn ke tag jǎvǎnh nỹtĩmĩ.

26 Ũ tỹ isovǎnh tũ ěn ag tỹ sóg pǎ'i hyn han ke mũ, povo kar kri, ũ tỹ inh vĩ ki króm mũ ag tỹ, ũ tỹ iso krónh ke tũ ěn ag tỹ ke gé. Inh panh vĩ isỹ pǎ'i han, hǎ kỹ sóg ājag tỹ pǎ'i han ke mũ gé, inh kóm,

27 ājag tỹ inh kóm tỹ povo kri pǎ'i nỹtĩ jé. Kỹ ājag tóg ag to vǎsǎn ke mũ, ferro tỹ ag mrǎnmrǎn kỹ, ěg tỹ go'or tỹ kukrũ gǎm mũ ěn ri ke.

28 Tar ājag tóg nỹtĩnh mũ, kỹ sóg ājag mỹ krĩg mǎg nĩm ke mũ gé, he tóg, hemnĩ, ag mỹ, věnh rǎn ki," he tóg, ũ tỹ tỹ ěprǎ ke nĩ ve ěn ti.

29 "Ũ nĩgrēg nỹtĩ ag tỹ tỹ jěmē jé, Topě kuprĩg vĩ ti. Ũ tỹ inh ki ge kỹ nỹtĩ ag hǎ mỹ tóg tó tĩ, Topě kuprĩg ti," he tóg, ũ tỹ tỹ ěprǎ ke nĩ ve ěn ti. Ti tỹ cidade tỹ Tiatira tá ke ag mỹ věnh vĩ jěněg mũn hǎ vē.

3

Jesus tỹ Sardes tá igreja tá ke ag mỹ ǎ vĩ jěně

1 Kỹ tóg: "ũ tỹ cidade tỹ Sardes tá inh ki ge kỹ nỹtĩ ag ki rĩr mũ ěn mỹ tag rǎn nĩ, ha mē," he mũ gé. "Ũ tỹ ǎ mỹ věnh vĩ jěněg mũ vĩ Topě kuprĩg tỹ jagrē nĩ, ti kuprĩg tỹ 7 (ke) nĩ ve ěn tỹ, kỹ tóg krĩg tỹ 7 (ke) mǎn kỹ jé nĩ gé, hemnĩ iso," he tóg. "Ājag tỹ nén han mũ ki kanhró sóg nĩ. Věnh kar vĩ ājag to: "há ag nỹtĩ, tar ag nỹtĩ," he tĩ, hǎ ra ājag tóg iso krónh ke ja nĩ, hǎ kỹ ājag tóg ũn kǎgter mũ ri ke nỹtĩ.

² Nūr tovānh nī, tar nýtīmñī, ke tū nī mū ra ājag kāgter pē han kān ke mū. Ājag jykre tugným inh, hā ra tóg há tū nī ver. Topē vỹ ājag tỹ nén han mū to há tū nī ver.

³ Vēnh vī sér mē ājag mýr, kỹ to jykrén há han nī. To tar nýtīmñī, to vāsān nī. Ājag nūgnūr kỹ sóg ājag krīg mý jun ke mū, ũ tỹ ěg tỹ nén péju(g) tĩ tỹ ěg nūr krīg mý jun mū ri ke han jé sóg ke mū. Inh jun ke kurā ki kagtīg ājag tóg nýtĩ mýr.

⁴ Ājag kāmĩ ũ ag tóg hā ra vēnh kavénh ja tū nī, Sardes tá. Tag ag vỹ kur kupri ěn rĩnh ke mū, inh mré ag nýtĩnh ke mū.

⁵ Ũ tỹ isovānh tū ěn ag vỹ kur kupri ěn rĩnh kān ke mū. Ag jygyjy kykũnh ke tū inh nī, inh livro ki. Ũn rĩnrĩr ke mū ag jygi vỹ ki ránrán kỹ nýtĩ, inh livro ěn ki. ěn ag jygyjy tóg jé sóg ke mū, inh panh mý, ti tỹ jěgně jafā kar ag mý ke gé, he tóg, hemnĩ, vēnh rán ki,” he tóg, inh mý, ũ tỹ tỹ ěprā ke nĩ ve ěn ti.

⁶ “Ũ nĩgrěg nýtĩ ag tỹ tỹ jěmě jé, Topē kuprīg vĩ ti. Ũ tỹ inh ki ge kỹ nýtĩ ag hā mý tóg tónh ke mū, Topē kuprīg ti,” he tóg, ũ tỹ tỹ ěprā ke nĩ ve ěn ti. Ti tỹ cidade tỹ Sardes tá ke ag mý vēnh vī jěněg mũn hā vē.

Jesus tỹ Filadélfia tá igreja tá ke ag mý ā vĩ jěně

⁷ Kỹ tóg: “ũ tỹ cidade tỹ Filadélfia tá inh ki ge kỹ nýtĩ ag ki rĩr mū ěn mý tag rán nī, ha mē,” he mū gé. “Ũ tỹ ā mý vēnh vī jěněg mū vỹ tỹ ũn há pē nī, ũn tar tāvĩ, kỹ tóg ki hā tó tĩ, hemnĩ. Davĩ ěn tỹ jānkā róm jafā vyn kỹ tóg jě nī, jānkā nón jafā ěn ti, chave ěn ti, hemnĩ. Ti tỹ jānkā ũ róm kỹ ũ tóg nífěnh mān ke tū nī, kỹ ti tỹ jānkā ũ nífěnh kỹ ũ tóg nón mān ke tū nĩ gé, hemnĩ, iso,” he tóg.

⁸ “Ājag tỹ nén han mū ki kanhró sóg nī. Tỹ nén mág tũ ājag nýtĩ. Hā ra ājag tóg isỹ ājag mý nén tó mū ěn ki króm kỹ nýtĩgtĩ, isovānh ja tū ājag tóg nĩgtĩ. Ājag mý sóg ěg tỹ jānkā róm tĩ ěn ri ke han, kỹ ũ tỹ ājag jo nífěnh ke tóg tū tĩ.

⁹ Ha mē, sỹ nén tónh ke ti. Ājag mý sóg ũ ag jěgněnh mū, Satanás mré ke ũ ag. Őn kỹ ag tóg: “Judeu vỹ tỹ ěg nýtĩ, Topē mré ke vỹ tỹ ěg nýtĩ,” henh ke mū. Ag ón hā vē. Ag tỹ ke sór tū ra ag tóg ājag krēm mũg kenh ke mū, ājag mý: “ěg káfór ājag tóg nýtĩ,” henh kỹ, ha vemnĩ. Ājag to há tāvĩ sóg nī. Hā kỹ ājag kato vāsānsān mū ag vỹ tag venh ke mū, ha vemnĩ.

¹⁰ Inh vĩ ki króm ājag tóg mū mýr, sỹ ājag mý: “isovānh tũg nī,” henh kỹ. Hā kỹ sóg ājag jy nĩgān ke mū, ga kri ke kar ag tỹ nén ũ jagy venh ke kurā ěn kā. Ti jagy tāvĩ ve jé ag tóg ke mū, ěprā ke kar ěn ag, isỹ ag jykre tugným ken kỹ.

¹¹ Kānhmar inh kātīg ke mū. Ājag tỹ inh ki ge kỹ nýtĩ tag tovānh tũg nī, ke tū nī mū ra ũ ag tóg ājag jěgia kā jé kỹ nén tỹ ājag mý sér tũnh ke mū ěn venh ke mū inhhā.

¹² Ũ tỹ isovānh tū ěn ag tỹ sóg ĩn nũna ri ke han ke mū, kanhkā tá, Topē jo ĩn ri ke ěn tá. Tá ag pa mān ke tū nýtĩ ha. Ag kri sóg Topē jiji rán ke mū gé, Topē jamā jygy ti ke gé. Cidade tỹ Jerusalém tǎg to ken hā vē. Kanhkā tá tóg kátěrenh kenh ke mū, Topē tá, Jerusalém tǎg tag ti. Kar kỹ sóg ag kri inh jiji tǎg rán ke mū gé, he tóg, hemnĩ, vēnh rán ki,” he tóg inh mý, ũ tỹ tỹ ěprā ke nĩ ve ěn ti.

¹³ “Ũ nĩgrěg nýtĩ ag tỹ tỹ jěmě jé, Topē kuprīg vĩ ti, ũ tỹ inh ki ge kỹ nýtĩ ag hā mý tóg tónh ke mū, Topē kuprīg ti,” he tóg, ũ tỹ tỹ ěprā ke nĩ ve ěn ti. Ti tỹ cidade tỹ Filadélfia tá ke ag mý vēnh vī jěněg mũn hā vē.

Jesus tỹ Laodicéia tá igreja tá ke ag mý ā vĩ jěně

14 Kŷ tóg: “ũ tŷ cidade tŷ Laodicéia tá inh ki ge kŷ nŷtŷ ag ki rŷr mũ ěn mŷ tag rán nŷ, ha mẽ,” he mũ gé. “Ũ tŷ ã mŷ vĕnh vŷ jĕnĕg mũ jyjyn hã vŷ: “ki hã tó mũn hã vĕ,” he mũ, hemnŷ,” he tóg. “Ki hã tóg tó tŷ, nĕn ũ kar ki. Őn vãnh ti nŷgtŷ, hemnŷ. Ti hã tugrŷn Topĕ tóg nĕn (ũ) kar han ja nŷgtŷ, hemnŷ iso,” he tóg.

15 “Ājag tŷ nĕn han mũ ki kanhró sóg nŷ. Ājag pi(jĕ) goj rŷ jagy ri ke nŷtŷ”, kŷ ājag pi(jĕ) goj kusa ri ke nŷtŷ gé’. Ājag tŷ goj rŷ jagy ěn ri ke nŷtŷ ran há tŷnh mũ vĕ, ājag tŷ goj kusa ěn ri ke nŷtŷ ran há tŷnh mũ gé vĕ vĕ.

16 Hã ra ājag tóg goj rŷ mẽ ri ke nŷtŷ, ājag tŷ iso krój nŷtŷn kŷ. Hã kŷ sóg ājag vãm sór mũ, ěg tŷ rĕrŷr tá goj rŷ mẽ ěn pra kŷ kujĕn ěn ri ke han jĕ sóg ke mũ, ājag tŷ, ha vemnŷ.

17 Vĕso ājag tóg: “rico ěg nŷtŷ, há ěg nŷtŷ, nĕn ũ tóg ěg mŷ tũ’ he tũ pĕ nŷ,” he tŷ. Hã tũ tó ājag tóg tŷ. Jagāgtar ājag tóg nŷtŷ, mŷr, ha mẽ. Tŷ nĕn tũ ājag tóg nŷtŷ, jykre kórĕg ājag tóg nŷtŷ, kur tũ ājag tóg nŷtŷ, kyvó ājag tóg nŷtŷ, ājag tŷ há nŷtŷ ve ra. Hã ra ājag tóg ki kagtŷg nŷtŷ, ājag kórĕg nŷtŷ tag ki.

18 Hã kŷ sóg ājag mŷ: “inh ki mãn kãmũ jĕg, ouro há ěn ti,” he sór mũ, ājag tŷ rico nŷtŷ jĕ. Kur kupri kajãm nŷ, ājag tŷ kator nŷtŷ tũ nŷ jĕ, ājag mŷ’āg tũ nŷ jĕ. Vĕnh kagta kajãm nŷ, ājag kanĕ mŷ, ājag tŷ ve há han mãn jĕ.

19 Isŷ ũ to há nŷ ěn mŷ sóg vŷ tar han tŷ, ti kanhrãn jĕ. Vĕso jykrĕn kŷ ājag jykre kórĕg togvãnh nŷ.

20 Mĕ há han nŷ, sŷ ājag mŷ nĕn tó mũ tag. Re tá inh jĕ nŷ, jãnkã tá, kŷ sóg tŷ tórón’ tórón’ ke mũ, tŷ tag’ tag’ ke sóg mũ. Ũ tŷ inh vŷ mẽg mũ mŷ tóg há tŷ, kŷ tóg inh mŷ nón ke mũ, jãnkã ti, kŷ sóg ti ĩn kãra rãnh ke mũ. Kŷ sóg ti mrĕ jĕn ke mũ, kŷ tóg inh mrĕ jĕn ke mũ gé, ha mẽ.

21 Ũ tŷ isovãnh tũ ěn mŷ sóg: “inh mrĕ nŷ,” he sór mũ, kŷ tóg inh ri ke tŷ ũn mág nŷnh ke mũ. Inh panh mrĕ sóg tŷ ũn mág nŷ ha, isŷ ti tovãnh ja tũ nŷn kŷ, kŷ tóg tá inh mrĕ nŷnh ke mũ gé, he tóg, hemnŷ, vĕnh rán ki,” he tóg, ũ tŷ tŷ ěpra ke nŷ ve ěn ti.

22 “Ũ nŷgrĕg nŷtŷ ag tŷ tŷ jĕmĕ jĕ, Topĕ kuprŷg vŷ ti, ũ tŷ inh ki ge kŷ nŷtŷ ag hã mŷ tóg tónh ke mũ, Topĕ kuprŷg ti,” he tóg, ũ tŷ tŷ ěpra ke nŷ ve ěn ti. Ti tŷ cidade tŷ Laodicéia tá ke ag mŷ vĕnh vŷ jĕnĕg mũn hã vĕ.

4

Ag tŷ kanhkã tá Topĕ mŷ vŷ há han

1 Kŷ sóg kynhmŷ ěvãnh, kŷ sóg kanhkã jãnkã vé, hã ra tóg róm ke kŷ jĕ nŷ. Kŷ sóg vĕnh vŷ ěn jĕmĕ mãn, vĕnh vŷ tŷ trombeta kyr ri ke ěn, kŷ tóg inh mŷ: “ha kãtãpyr,” he mũ. “Ā mŷ sóg ven sór mũ, ājag tŷ kar kŷ nĕn venh ke mũ ti,” he tóg, vĕnh vŷ ti.

2 Kŷ vãhã Topĕ kuprŷg tóg inh krŷn mũ, kŷ sóg nĕn nĕn vĕg mũ. Kanhkã tá tóg nŷgia sŷnvŷ jĕ nŷ, kŷ ũ tóg kri nŷ nŷ.

3 Ti kakã tóg jĕngrĕ nŷ, pó sŷnvŷ jĕngrĕ ěn ri ke, pó tŷ jaspe jĕngrĕ ěn ri ke, pó tŷ sardônio jĕngrĕ ěn ri ke. Nŷgia sŷnvŷ ěn vŷ ta no ri ke nŷ, kŷ tóg jĕngrĕ jĕ gé, ta no ěn ti, pó tŷ esmeralda jĕngrĕ ěn ri ke.

4 Nŷgia sŷnvŷ ěn pĕnŷn nŷgia sŷnvŷ ũ tóg nŷtŷ gé, ũ tŷ 24 (ke) ti nŷtŷ. Nŷgia ěn kri kófa ag tóg nŷgnŷ kŷ nŷtŷ, kófa tŷ 24 (ke) ag. Kur kupri rŷnh kŷ ag tóg nŷtŷ, ouro tŷ krŷ tógfŷ rŷnh kŷ ag tóg nŷtŷ gé.

5 Nŷgia sŷnvŷ ěn tá ta tŷ kómkóm ke ri ke ěn tóg vĕnh ven mũ, kŷ ta tŷ tŷrŷr he ri ke ěn tóg mẽ há tŷ gé, vĕnh vŷ ke gé. Ti jo pŷ jónhkó gru tŷ 7 (ke) tóg nŷtŷ gé.

Topē kuprīg to ken hã vë, ù tỹ 7 (ke) nĩ ve ãn, hã vỹ: pĩ jónhkó gru tỹ 7 (ke), he mü.

⁶ Nĩgja sĩnvĩ kakãm nén ù tóg nỹ nĩ, kỹ tóg vidro tỹ goj nĩ ve nĩ, goj jãpri, goj kókov (pë).

Kỹ nĩgja sĩnvĩ ãn pėnĩn ù ag tóg nỹtĩ, ù tỹ 4 (ke) ag, ùn kanë e tãvĩ ag. Ag kakã ki ag tóg kanë e nỹtĩ, kar kỹ ag pãnĩ tá ke gé.

⁷ Ag kãmĩ ù tóg mĩg ve ri ke nĩ, kỹ ù tóg monh tãg ve ri ke nĩ gé, kỹ ù tóg ěg kakã ve ri ke nĩ, jãvo ù tóg kónhkó mág tẽ tĩ ve ri ke nĩ.

⁸ Ag kar vỹ fěr tỹ 6 (ke) nỹtĩ. Kỹ ag tóg ãjag fěr ki kanë e nỹtĩ gé, fěr ven ja tá, ti kãtã ke gé. Kurã kar ki ag tóg jãn tĩ, kuty kar ki ke gé, jãn to krónh ke jãvãnh ag tóg nỹtĩ. Ag jãn hã vë, ha mē: “ũn mág', mág', mág' vỹ tỹ ti nĩ, ěg jóg tỹ Topē tĩ, ù tỹ nén kar han ki kanhró nĩ ěn ti. Vãsỹ tóg nĩ ja nĩgtĩ, kỹ tóg ùri nĩ gé, jãvo tóg kãtĩg ke mü gé,” he ag tóg tĩ, jãn kỹ, nén nẽ tỹ 4 (ke) ěn ag.

⁹ Gen kỹ ag tóg Topē mỹ jãn tĩ, ti tỹ tỹ ùn mág nĩ ěn hã tỹ ag tóg jãn tĩ. Ti mỹ vĩ há han ag tóg tĩ. Ti mỹ ag tóg: “nén kar hyn han há ã tóg nĩ,” he tĩ. Û tỹ nĩgja sĩnvĩ ěn kri nĩ mü mỹ ag tóg jãn tĩ, ùn rĩr nĩ ěn mỹ. Ti rĩr nĩ vỹ tũg' henh ke tũ pẽ nĩ.

¹⁰ Ag tỹ ti mỹ jãn kỹ kófa tỹ 24 (ke) ěn ag vỹ mügmũg ke tĩ, ù tỹ nĩgja sĩnvĩ kri nĩ ěn krēm. Mügmũg ken kỹ ag tog ti mỹ: “Topē vỹ tỹ ã nĩ,” he tĩ, ùn rĩr nĩ ěn mỹ. Ti rĩr nĩ vỹ tũg' henh ke tũ pẽ nĩ. Kỹ ag tóg ãjag krĩ tógfĩ ěn vin tĩ, nĩgja sĩnvĩ ěn krēm.

¹¹ Ti mỹ ag tóg tag tó tĩ, ha mē: “ěg Senhor vỹ tỹ ã nĩ, Topē vỹ tỹ ã nĩ. Nén ù kar hyn han ja ã nĩgtĩ. To jykrén kỹ ã tóg nén ù kar hyn han ja nĩgtĩ, hã kỹ tóg ki nỹtĩ, ã tỹ nén hyn han mü kar ěn ti. Á hã ne ã pir mỹ tá krỹg he mü', kỹ vėnh kar vỹ ã mỹ vĩ há han ke mü, ã to: “ũn mág vỹ tỹ ti nĩ,” hen kỹ, kỹ ag tóg ã vĩ ki króm tĩ gé,” he ag tóg tĩ, kófa ag, ù tỹ nĩgja sĩnvĩ kri nĩ ěn mỹ.

5

Jesus tỹ livro mãn

¹ Kỹ sóg livro vég mü, livro ěn vỹ grĩn kỹ nỹ. Û tỹ nĩgja sĩnvĩ kri nĩ ěn vỹ livro ěn mãn kỹ nĩ nĩ, ti pėgja tỹ. Kãtã tóg rán kỹ nĩ, ti ven ja tá ke gé. Tógfĩn kỹ tóg nĩ nĩ, livro ti. Tógfĩn ja tỹ 7 (ke) tóg nĩ. Ti tógfĩn kri tóg go'or nĩ gé, ù tỹ kygvãg tũ nĩ jé.

² Kỹ sóg Topē tỹ jėnë jafã éhé tãvĩ vég mü gé. Vĩ tóg mü, jamã hár(a), kỹ tóg: “ũ nỹ hỹn tá krỹg mü, ti tógfĩn kavãn ti jé?” he mü.

³ Hã ra ag tóg ù tỹ tá krỹg mü vég tũ nĩ, kanhkã tá, ěprã, vėnh kuprĩg ag kãmĩ ke gé. Kỹ ù tỹ livro kavãn ke tóg tũ tĩ, ti rá ve jé.

⁴ Kỹ sóg fỹ mü. Inh mỹ tóg e tĩ, ù tỹ livro kavãn ke tũ tĩn kỹ, ěg tỹ ti rá ven jé.

⁵ Kỹ kófa ag kã ù tóg inh mỹ: “fỹ tũg ra,” he mü. “Povo tỹ Judeu kãmĩ ùn pir tóg mĩg tar ri ke nĩ, Davi krë'krë ag kã ùn pir ěn vỹ tóg vėnh kar tỹ hėn ri ke ja nĩ. ěn vỹ ti tógfĩn tỹ 7 (ke) ěn kygvãn ki kanhró nĩ, kỹ tóg livro ki rá ěn venh ke mü,” he tóg inh mỹ, kófa ti.

⁶ Kỹ sóg nĩgja sĩnvĩ ěn jo cordeiro vég mü, mé krë ěn ti. Nén nẽ tỹ 4 (ke) ag vỹ ti pėnĩn nỹtĩ, kófa ag ke gé, cordeiro ěn pėnĩn ag nỹtĩ. Kỹ tóg tỹ ag tỹ tãnh kỹ rĩr mãn ěn ri ke jé. Nĩka tỹ 7 (ke) ti nĩ, kanë tỹ 7 (ke) ke gé, cordeiro ěn ti. Topē kuprĩg to ken hã vë, ù tỹ 7 (ke) nĩ ve ěn ti, hã vỹ: nĩka tỹ 7 (ke) mré kanë tỹ 7 (ke), he mü. Topē vỹ ti jėnë ja nĩ, ti tỹ ga kar mĩ tĩg jé, Topē kuprĩg ti.

7 Kŷ cordeiro ěn vŷ ũ tŷ nĭgja sĭnvĭ kri nĭ ěn t jun mŷ, kŷ tg ti ki livro ěn mg mŷ, ũ tŷ  pĕgja tŷ livro mn kŷ nĭ ěn ti ki.

8 Kŷ nĕn nĕ tŷ 4 (ke) ěn ag vŷ mŷgmŷg ke kn mŷ, kfa tŷ 24 (ke) ag ke g, cordeiro ěn krĕm ag tg mŷgmŷg ke kn mŷ sir. Kfa ag vŷ vkyn jaf tŷ harpa gnh kŷ nŷtĭ. Pnky tŷ ouro gnh kŷ ag nŷtĭ g. Pnky ěn kki tg fr nĭ, ti pŷn kŷ ger h han jaf ěn tŷ, h vŷ: ěg tŷ Topĕ mr vĕmn tĭ, he mŷ.

9 Cordeiro ěn mŷ ag tg jn mŷ, Jesus j tag tg tg mŷ, ha mĕ. “ h ne t krŷg mŷ!” he ag tg. “ h ne livro mn kŷ ti tgfĭ kygvg mŷ ha’  tn ja ag tg, kŷ  tg ter kŷ ěpr ke ag kygjm, Topĕ mŷ, p’i ag kar krĕm ke ag kmĭ, vĕnh vĭ kar t tĭ ag kmĭ, naao kar ag kmĭ, povo kar ag kmĭ  tg ũ ag kygjm ja nĭgtĭ.

10  tŷ ũn kygjm mŷ ag mŷ  tg vĕnh rnhrj nĭm ja nĭ g, ag tŷ  mŷ  tŷ ki rĭr j, ag tŷ tŷ Topĕ camarada nŷtĭ j. Kŷ ag tg ěpr ke ag krĭg mŷ tŷ ũn mg nŷtĭnh mŷ,” he ag tg, kfa ag, jnjn kŷ.

11 Kŷ sg Topĕ tŷ jĕgnĕ jaf tŷ hĕn ri ke vg mŷ g, mil tŷ mil tŷ hĕn ri ke. Ag e tvĭn ra ěg tg ag nĭgkrn ke tŷ nĭ. Nĭgja sĭnvĭ ěn jo ag tg nŷtĭ, nĕn nĕ tŷ 4 (ke) ěn mr, kfa ag mr ke g.

12 Jnjn kn ag tg mŷ g, jam hr(a), kŷ ag tg: “cordeiro tag tn ja ag tg nĭ, h kŷ tg ũri tŷ ũn mg j,” he mŷ. “Tŷ tg vĕnh kar kri ke j ha, rico tg j ha, ki kanhr tg j ha, tar tg j ha, tŷ tg ũn mg j ha, sĭnvĭ tg j ha, vĕnh kar vŷ ti mŷ vĭ h han mŷ ha,” he ag tg, Topĕ tŷ jĕgnĕ jaf ag.

13 Kŷ vh kanhk tn kar ag vŷ jnjn mŷ, ěpr ke kar ag ke g, vĕnh kuprĭg kar ag ke g, goj ki ke kar ag ke g. Ag kar vŷ jnjn mŷ ha, jam hr(a), kŷ ag tg: “ũ tŷ nĭgja sĭnvĭ kri nĭ mŷ ěn mŷ ěg tg vĭ h han ke mŷ ha, cordeiro ěn mŷ ke g,” he mŷ. “jag pir mŷ ag tg tŷ ũn mg nŷtĭ, jag pir mŷ ag tg sĭnvĭ nŷtĭ, vĕnh kar kri ke vŷ tŷ ag nŷtĭ, kŷ ag tg tŷg’ hnh ke tŷ pĕ nĭ,” he ag tg mŷ sir, vĕnh kar pĕ ti.

14 Kŷ nĕn nĕ tŷ 4 (ke) ěn ag vŷ tg vĭ mŷ g sir. “H vĕ,” he ag tg mŷ. Kŷ kfa ag tg mŷgmŷg ke kn mŷ sir, “Topĕ vŷ tŷ  nĭ,” hn kŷ.

6

Jesus tŷ livro tgfĭ kygvn

1 Kŷ sg cordeiro tŷ ti tgfĭ ve kavn vg mŷ sir, ti tgfĭ tŷ 7 (ke) ěn ag k ũn ve ěn ti. Kŷ sg nĕn nĕ tŷ 4 (ke) ag k ũ vĭ mĕg mŷ g sir. Ti vĭ vŷ ta tŷ tŷrŷr he ri ke nĭ. “Tg’,” he tg.

2 Kŷ sg vĕsŷjm ěvnh kŷ cavalo kupri vg mŷ. Ũ tŷ kri nĭ vŷ vyj tŷ no rĕr tŷ pĕg jaf vyn kŷ nĭ nĭ. Ti mŷ ag tg krĭ tgfĭ jun mŷ, ti tŷ tŷ ěpr ke kri ke jĕn kŷ. Kŷ tg vĕnh kar ag tŷ  krĕm ke han tĭ mŷ.

3 Kŷ cordeiro vŷ ti tgfĭ ũ kavg mŷ g. Ti tgfĭ rgre t krŷg vĕ sir. Kŷ nĕn nĕ ag kmĭ ũ tg: “tg’,” he mŷ g.

4 Kŷ cavalo kusŷg vŷ jun mŷ. Ũ tŷ kri nĭ mŷ ěn mŷ ag tg rgro tj jun mŷ, ti tŷ ěpr ke ag tŷ jagnĕ kato vsnsn han j, ěpr ke ag tŷ jagnĕ kgtn j sir.

5 Kŷ cordeiro ěn tg ti tgfĭ ũ kavg mŷ g. Ti tgfĭ tgtŷ t krŷg vĕ sir. Kŷ nĕn nĕ ag kmĭ ũ tg: “tg’,” he mŷ g. Kŷ sg vĕsŷjm ěvnh kŷ cavalo s vg mŷ sir. Ũ tŷ kri nĭ ěn vŷ ěg tŷ nĕn ũ kar kufyg jaf mn kŷ nĭ nĭ, ěg tŷ nĕn ũ kar kmun jaf ti.

6 Kŷ sg nĕn nĕ tŷ 4 (ke) ěn k vĕnh vĭ ũ jĕmĕg mŷ g, kŷ tg: “trigo tŷ quilo pir mn j ag tg ke mŷ, por dia kaja to,” he mŷ, “ke tŷ nĭn kŷ ag tg cevada tŷ

quilo tãgtũ mãn ke mũ, por dia kaja ên to. Azeite vóg tũg nĩ hã ra, vinho vóg tũg nĩ gé, ên vỹ kaja pir nĩnh mũ,” he tóg mũ, vènh vĩ ti.

⁷ Kĩ cordeiro ên tóg ti tógfĩ ù kavãg mũ gé. Ti tógfĩ tỹ 4 (ke) tá krỹg vè sir. Kĩ nén nẽ ag kãmĩ ù tóg: “tãg’,” he mũ gé.

⁸ Kĩ sóg cavalo ù vég mũ, hã ra tóg vèser jógťánh ri ke nĩ. Û tỹ kri nĩ ên tóg êg tén tĩ, kỹ vènh kuprĩg ag vỹ ti nón kãmũ mũ gé, ti kãtĩg ên kã. Ag tỹ êprã ke ag tỹ vènh kãpów tỹ 4 (ke) ag kã ti vènh kãpów pir ag kãgtén ke vè, rógro tỹ, ag kókĩr tỹ ke gé, vènh kaga tỹ ke gé, mĩg tỹ ke gé.

⁹ Kĩ cordeiro vỹ ti tógfĩ ù kavãg mũ gé. Ti tógfĩ tỹ 5 (ke) tá krỹg vè sir. Kĩ sóg nĩgja sĩnvĩ ên krêm êvãnh kỹ êprã ke ag kuprĩg vigvég mũ, ag tỹ Topẽ vĩ tugrĩn ùn kãgtén mũ ag kar kuprĩg ti. Topẽ vĩ tó to krónh ke ja tũ ag tóg nỹtĩ, hã kỹ ag tóg ag kãgtén ja nĩgtĩ, ù tỹ ag vĩ jêmẽ sór tũ ên ag.

¹⁰ Ên ag vỹ jamã hár(a) tag tó mũ, ha mẽ: “kake’,” he ag tóg mũ. “Ûn mág vỹ tỹ ã nĩ. Ā tỹ nén tó mũ ên han Ā tóg tĩ. Hã ra êg tóg hur Ā tỹ nén han ke mũ jãvãnh mág. Ā mỹ kãnhmar êprã ke ag jykre tugnỹm sór tũ, Ā tỹ ag vóg kónãn jé, ag tỹ êg kãgtén ja tag tugrĩn?” he ag tóg mũ, ag tỹ Jesus tugrĩn ùn kãgtén mũ ên ag.

¹¹ Kĩ ag tóg ag mỹ kur kupri junjun mũ sir, kỹ ag tóg ag mỹ: “toreg ver’,” he mũ. “Û ag tóg nỹtĩ gé, ag tỹ ùn kãgtén mũ ù ag. Ag tỹ ãjag kãgtén ja ri ke han ke vè, ãjag mré ke ù ên ag tỹ. Topẽ vỹ ag nĩgkré, kỹ tóg ki kanhró nĩ, ag tỹ ù tỹ hèn ri ke kãgtén ke mũn ki. Ag tỹ ãjag mré ke ên ag kãgtén kãn kar kỹ tóg ag jykre tugnỹm kãn ke mũ, ha vemnĩ,” he tóg, ag tỹ ùn kãgtén mũ ên ag mỹ.

¹² Kĩ sóg cordeiro ve mãn mũ, kỹ tóg livro tógfĩ ù kavãg mũ gé. Ti tógfĩ tỹ 6 (ke) tá krỹg vè sir. Kĩ ga tóg jũrũn ke mũ ha. Rã vỹ kuty’ he mũ, êg tỹ ù ter kỹ kur sã tu tĩ kuty ên ri ke. Kysã vỹ kusũg’ he mũ gé.

¹³ Kĩ krĩg vỹ vár kãn ke mũ gé. Kejèn kãka tóg ka tỹ vyryn vyryn ke tĩ, kỹ ti kanẽ tóg vár kãn tĩ, ti tánh ra. Ge ti nĩgtĩ, krĩg vár kãn ke mũ tag ti.

¹⁴ Kĩ kãnhkã vỹ tũg’ he mũ gé, êg tỹ livro grĩn ên ri ke ti nĩ, kãnhkã tũg ti. Pãnónh vỹ tũg kãn mũ gé, goj vãso kar ke gé.

¹⁵ Êprã ke ag vỹ pãnónh nor krêm vènh pigjunh mũ, pãró vãso krêm, pãnónh vãso krêm ke gé, pã’i ag, vènh kar kri ke ag, soldado ag pã’i ag mré hã, ùn rico ag mré hã, ùn tar ag mré hã, ùn camarada ag mré hã, ag patrão ag mré hã, êprã ke kar ag mỹr, ha mẽ.

¹⁶ Kĩ ag tóg pãnónh mỹ vĩ mũ, pãró mỹ ke gé. “Ha êg kri vár, ha êg kri tỹ tam ké,” he ag tóg mũ, ón kỹ, pãró mỹ. “Ha êg pigju. Cordeiro ên vỹ êg to jũ mũ, kỹ ù tỹ nĩgja sĩnvĩ kri nĩ ên vỹ êg ki êvãnh mũ. Ag jo êg pigju,” he ag tóg mũ ón kỹ, êprã ke kar ag, pãnónh kar mỹ.

¹⁷ “Ag tỹ êg to jũnh ke vè. Pétẽm ti huri, kurã kórég tag ti. Krenkren ke tũ êg tóg nĩ,” he ag tóg mũ, êprã ke kar ag, cordeiro ên jũ kamêg kỹ.

7

Topẽ tỹ jẽnẽ jafã tỹ ùn e ag ránrán

¹ Kĩ sóg ga fyr mĩ êvãnh kỹ Topẽ tỹ jẽnẽ jafã tỹ 4 (ke) ag vigvég mũ. Ga péno tỹ 4 (ke) ki ag jègĩgĩg kỹ nỹtĩ. Kãka tỹ 4 (ke) vỹ tá nỹtĩ gé. Kỹ ag tóg kãka tỹ 4 (ke) ên ag ki rĩr nỹtĩ, kãka tỹ hẽ kãtã mũ tũ nĩ jé. Kỹ kãka tóg tũ tĩ, ga kri, goj kri ke gé, ka kãmĩ ke gé.

² Rã jur ja tá sóg Topẽ tỹ jẽnẽ jafã ù kãtĩg vég mũ gé. Topẽ tỹ êg ránrán jafã ma tóg kãtĩ mũ. Kỹ tóg kãnhkã ra tãpřy mũ. Kỹ tóg Topẽ tỹ jẽnẽ jafã tỹ 4 (ke)

ěn ag mŷ vī mŷ. Topě vŷ ag mŷ: “ga mré goj kókén nī,” he ja nī, ũ tŷ 4 (ke) ěn ag mŷ.

³ Kŷ ũ tŷ věnh rán jafā ma kātī mŷ ěn tóg ag mŷ: “toreg ver’,” he mŷ. “Ga vóg tŷg nī ver, goj ke gé, ka ke gé,” he tóg. “Ěg tŷ ver Topě camarada ag ránrán sór vē, věnh rán jafā tag ti tŷ, ag kakā ki,” he tóg, Topě tŷ jěně jafā ti, ũ tŷ 4 (ke) ěn ag mŷ.

⁴ Kŷ tóg ag rán tī mŷ. Ũ tŷ 140 mil (ke) ag hā vē, fag mré hā, ti tŷ Israel krĕ'krĕ ag kar kāmī ũn ránrán mŷ ag. Ti número mĕ inh.

⁵ Judá krĕ tŷ 12 mil (ke) tóg rán kŷ nŷtī, Rubem krĕ tŷ 12 mil (ke) ke gé, Gade krĕ tŷ 12 mil (ke) ke gé,

⁶ Aser krĕ tŷ 12 mil (ke) ke gé, Naftali krĕ tŷ 12 mil (ke) ke gé, Manassés krĕ tŷ 12 mil (ke) ke gé,

⁷ Simeão krĕ tŷ 12 mil (ke) ke gé, Levi krĕ tŷ 12 mil (ke) ke gé, Issacar krĕ tŷ 12 mil (ke) ke gé,

⁸ Zebulom krĕ tŷ 12 mil (ke) ke gé, José krĕ tŷ 12 mil (ke) ke gé, Benjamim krĕ tŷ 12 mil (ke) ke gé. Ěn ag ránrán kân tóg mŷ, Topě tŷ jěně jafā ti.

Ũn e tŷ Topě mŷ vī há han

⁹ Tag pāte sóg ũn tŷ hĕn ri ke ag vigvég mŷ. E tāvĭn ag nŷtī, e tāvĭn, kŷ ũ tŷ ag nĭgkrĕn ke tóg tī tī. Tŷ ag ěprā ke ja nŷtī. Nação kar kāmī ke ũ ag vŷ tá nŷtī, pā'i kar krĕm ke ũ ag ke gé, povo kar kāmī ũ ag ke gé, věnh vī kar tó tī ag kāmī ũ ag ke gé. Kur kupri rĭnh kŷ ag tóg nŷtī, ũn e ěn ag. Nĭgja sĭnvī ěn pénĭn ag tóg jĕgĭgĕ kŷ nŷtī, cordeiro rĭnve tá, tãnh féj génh kŷ ag tóg nŷtī.

¹⁰ Ěn ag vŷ jamā hár(a): “Topě hā vŷ ěg krenkren han mŷ,” he mŷ. “Ũ tŷ nĭgja sĭnvī kri nī ěn vŷ ěg krenkren han mŷ, cordeiro ti ke gé,” he ag tóg mŷ, jamā hár(a), ũn e ěn ag.

¹¹ Topě tŷ jĕgnĕ jafā kar ag vŷ nĭgja sĭnvī ěn pénĭn nŷtī gé, ũn e ěn ag mré. Kófa ěn ag pénĭn ag nŷtī, nĕn nĕ tŷ 4 (ke) ěn ag pénĭn ke gé. Nĭgja sĭnvī ěn krĕm ag tóg mŷgmŷg ke mŷ, kŷ ag tóg ũ tŷ kri nī ěn mŷ: “Topě vŷ tŷ ā nī,” he mŷ.

¹² Kŷ ag tóg: “ha vé, věnh kar jĕ Topě hā mŷ věnh vī há tó,” he mŷ. “Topě hā vŷ sĭnvī jĕ, Topě hā vŷ ki kanhró nī, Topě hā mŷ ěg tóg věnh vī há tó tī. Tŷ tóg ũn mág jĕ, věnh kar kri tóg jĕ, tar tóg jĕ, Topě ti, ũri, kŷ tóg tŷ' henh ke tŷ nĭ gé. Hā vē,” he ag tóg mŷ, Topě tŷ jĕgnĕ jafā ag.

¹³ Kŷ kófa ěn ag kā ũ tóg inh mŷ: “ag tŷ hĕ ri ke nĕ hŷn, hā kŷ ag tóg kur kupri rĭnh kŷ nŷtī?” he mŷ.

¹⁴ Kŷ sóg ti mŷ: “inh pi(jé) ki kanhró nī,” he mŷ. “Ā hŷn tóg ki kanhró nī,” he sóg ti mŷ. Kŷ tóg inh mŷ: “nĕn ũ jagy mág pĕ ve ja ag tóg nŷtī, cordeiro tugrĭn,” he mŷ. “Ag vóg kónān jagy han ja ag tóg. Ag kur kygfa ag, cordeiro kyvénh tŷ, kŷ tóg kupri nŷtī, ag kur ti.

¹⁵ Kŷ ag tóg Topě nĭgja sĭnvī pénĭn nŷtī. Ti rãnrĕj han ag tóg tī, kurā kar ki, kuty ki ke gé, ti ĭn krĕm. Ũ tŷ nĭgja sĭnvī kri nī ěn vŷ ag jy nĭgān mŷ.

¹⁶ Ag pi(jé) kókir mǎn ke mŷ', ag pi(jé) og'og sór mǎn mŷ'. Rā vŷ ag ki hupŭn mǎn ke tŷ nī ha, nĕn ũ gru ke gé,

¹⁷ cordeiro tŷ ag ki rĭr kŷ, ũ tŷ nĭgja sĭnvī tá jĕ ěn ti. Ag tatī tŷg jĕ tóg ke mŷ, goj nĭhŷg ja ra, goj tŷ ag rĭnrĭr han mŷ ěn ra tóg ag tatī tŷg ke mŷ. Topě vŷ ag kygfŷ tŷ tŷg' henh ke mŷ,” he tóg inh mŷ, kófa ti, ũn e ěn ag to.

8

Jesus tȳ livro tógfī tȳ ěgno kavān

¹ Kȳ cordeiro vȳ livro tógfī tȳ ěgno kavāg mū. Ti tógfī tȳ 7 (ke) tá krȳg hā vē. Kȳ tóg katy' he mū, kanhkā tá, meia hora ki.

² Kȳ sóg Topē tȳ jĕgnē jafā tȳ 7 (ke) ag vég mū. Ag mȳ ag tóg trombeta tȳ 7 (ke) junjun mū. Topē nĭgja sĭnvĭ jo ag tóg nȳtĭ.

³ Kȳ Topē tȳ jĕnē jafā ũ tóg tá jun mū gé, kȳ tóg ouro tȳ pĕnky ma kātĭ mū, ěg tȳ pĕnky ki Topē mȳ ti ger há pūn jafā ěn ti. Nĭgja sĭnvĭ ěn to tóg jĕ mū, Topē tȳ jĕnē jafā ti. Kȳ ag tóg ti mȳ ka jĕnjo ger há tȳ hĕn ri ke jun mū, ti tȳ Topē mȳ pūn jé, Topē nĭgja to jĕn kȳ. Ęprā ke tȳ Topē ki ge kȳ nȳtĭ kar ag tóg Topē mré vĕmén tĭ. Ag vĭ ja ěn mré tóg ti ger há ěn pūn sór mū, Topē mȳ, Topē tȳ jĕnē jafā ti.

⁴ Kȳ tóg sir pūn mū, Topē kato jĕn kȳ. Kȳ ti ger há ěn tóg kynhmȳ tāpry mū sir, Topē tū ag tȳ ti mré vĕmén ja ěn mré hā.

⁵ Kȳ Topē tȳ jĕnē jafā ěn tóg pĕnky ěn fān mū, pránh gru tȳ. Topē mȳ nĕn ũ kar pūn jafā tá tóg pránh gru ěn mǎg mū, kȳ tóg pĕnky kākā nĭm mū. Kȳ tóg ga kri ti fón mū sir, pĕnky tĭ, pránh gru tȳ kākā nĭn kȳ. Kȳ ta tóg kómkóm ke kȳ tȳrȳr he mū, jū kȳ tóg mrārān ke mū gé, ga kri. Kȳ ga tóg jūrūn ke mū gé sir.

Ag tȳ trombeta kynkyn

⁶ Kȳ Topē tȳ jĕgnē jafā tȳ 7 (ke) ěn ag tóg vĕnh kǎn mū sir, ag tȳ trombeta kynkyn jé.

⁷ Kȳ ũn tóg ā tū kyn vén mū. Kȳ nǎfy tóg ěprā ke ag kri vár mū, pĭ mré hā, vĕnh kyvĕnh mré hā ke gé. Kȳ ka vĕnh kǎpóv tǎgtū ag kǎ ti vĕnh kǎpóv pir tóg kugpūr kǎn mū, ga vĕnh kǎpóv pir ke gé. Re vȳ pūr kǎn pĕ han mū sir.

⁸ Kȳ Topē tȳ jĕgnē jafā tȳ 7 (ke) ěn ag kǎ ũ tóg trombeta kyn mū gé. Trombeta régre tá krȳg vē sir. Kȳ nĕn ũ tóg goj kafā tū ki kutĕ mū, hā ra tóg tȳ pānónh gru nĭ ve nĭ, pānónh mǎg tǎvĭ. Kȳ goj vĕnh kǎpóv tǎgtū ag kǎ ti vĕnh kǎpóv pir tóg vĕnh kyvĕnh ri ke nĭ ha.

⁹ Goj ga vĕnh kǎpóv tǎgtū ag kǎ ti vĕnh kǎpóv pir tóg kǎgter kǎn mū gé. Goj kri mū mū ěn, barco ěn vĕnh kǎpóv tǎgtū ag kǎ ti vĕnh kǎpóv pir tóg tū' he kǎn mū gé, pānónh ěn tugrĭn.

¹⁰ Kȳ Topē tȳ jĕgnē jafā tȳ 7 (ke) ěn ag kǎ ũ tóg trombeta kyn mū gé. Trombeta tǎgtū tá krȳg vē sir. Kȳ krĭg mǎg pĕ tóg kanhkā tá kátĕre mū, hā ra tóg gru nĭ, pĭ gru ěn ri ke. Kȳ tóg ěganĕ vĕnh kǎpóv tǎgtū ag kǎ ti vĕnh kǎpóv pir kri kutĕ mū, goj nĭhȳg vĕnh kǎpóv tǎgtū ag kǎ ti vĕnh kǎpóv pir kri ke gé.

¹¹ Krĭg ěn jyjyn hā vȳ: "Fa," he mū. Kȳ goj ěn tóg fa nĭ sir. Kȳ ěprā ke tȳ hĕn ri ke ag kǎgter mū, goj kórég ěn kron kȳ.

¹² Kȳ Topē tȳ jĕgnē jafā tȳ 7 (ke) ěn ag kǎ ũ tóg trombeta kyn mū gé. Trombeta tȳ 4 (ke) tá krȳg vē sir. Kȳ nĕn ũ tóg rǎ kókég mū, kȳ jĕngre tóg sĭ' he mū ha, kysǎ jĕngre ti ke gé, krĭg kar jĕngre ti ke gé. Jĕngre vĕnh kǎpóv tǎgtū ag kǎ ũn pir tóg tūg' he mū ha. Kȳ kurá tóg sĭ nȳ ha, jávo kuty tóg kuty tǎvĭ nȳ ha.

¹³ Kȳ sóg kónhkó mǎg vég mū, ti tĕ tĭn kȳ, kynhmȳ. Ęn vȳ jamā hár(a) prĕr mū. "!.Jagy ti tĭnh mū, jagy ti tĭnh mū, jagy ti tĭnh mū, ěprā ke ag mȳ..! !.Topē tȳ jĕgnē jafā tǎgtū ũ ag vȳ ějag tū ti kynkyn ke mū ha, kȳ tóg kórég tǎvĭ nȳnh mū ha, ěprā ke ag mȳ..!" he tóg mū, kónhkó mǎg ti.

9

¹ Kŷ Topě tŷ jěgně jafã tŷ 7 (ke) ěn ag kã ũ tóg trombeta kyn mũ gé. Trombeta tŷ 5 (ke) tá krŷg vĕ sir. Kŷ sóg krŷg vég mũ. Kanhkã tá tóg kãtĕre ja nĩ, ěprã, krŷg ěn ti. Kŷ ag tóg ti mŷ nŷgme nón jafã fig mũ, chave ti, krŷg ěn mŷ.

² Kŷ tóg róm mũ sir, nŷgme ti, hã ra nĩja tóg tá tũmtũm ke mũ, nĩja tar pĕ. Kŷ rã tóg kuty' he mũ, nĩja ěn to. Ga kri tóg kuty' he kãn mũ.

³ Nĩja ěn kãtã tóg vãhã kãpa mũ, tŷ ópã tŷ hĕn ri ke nŷtĩ ve ti, hã ra tóg pŷn kakrã tar ri ke nŷtĩ, tŷ ópã nŷtĩ ve ěn ti.

⁴ Ti pi(jé) re ko tĩ', ti pi(jé) ka féj ko tĩ', ti pi(jé) ěkré ko tí gé'. Ti tŷ ěprã ke ag mŷ vĕnh kaga han kãtŷg vĕ. ěprã ke ũ ag tóg tŷ Topě tŷ rágrã tũ nŷtĩ, ag kakã ki. ěn ag mŷ vĕnh kaga han jé ag junjun mũ, tŷ ópã nŷtĩ ve ěn ag.

⁵ Ag pi(jé) ěprã ke ag kãgtĕn mũ hã ra'. Kysã tŷ 5 (ke) ki ag tóg ěprã ke ag mŷ vĕnh kaga nĩm mũ. Ag tŷ ag vóg kŷ tóg pŷn kakrã tŷ ěg tugtãn ri ke nĩ, ti kaga ti.

⁶ Kŷ ěprã ke ag tóg ter sór mũ ha, ti kaga jagy to, hã ra ag tóg ter ke tũ nĩ, kysã tŷ 5 (ke) ěn ki. Ag tŷ ter sór mũ ra ag tóg ter ke tũ pĕ nĩ.

⁷ Ópã ěn tóg tŷ cavalo nŷtĩ ve nĩ, cavalo tŷ vĕnh génh mũnh ke ri ke tóg nŷtĩ. Ouro tŷ krĩ tógfĩ ag tóg nŷtĩ. Ag kakã vŷ ěg kakã ri ke nĩ.

⁸ Ag gãnh vŷ fag gãnh téj ri ke nĩ gé. Ag jã vŷ mŷg jã ri ke nĩ.

⁹ Ag fe fãr tóg ferro tŷ camisa ri ke nĩ. Ag fĕr tŷ rãnrãnh he tóg mĕ há tí, kŷ tóg cavalo tŷ hĕn ri ke tŷ carroça tŷ hĕn ri ke nŷgnŷn ri ke nĩ, ag tŷ vĕnh génh mũnh ken kŷ.

¹⁰ Ag my kã tóg nĩ, ag prĕj ti, pŷn kakrã prĕj ri ke ti. Ag my tŷ ag tóg ěprã ke ag vóg kónãn tũ, kysã tŷ 5 (ke) ki.

¹¹ Ũ tŷ nŷgme ki rĩr tí ěn, ũ tŷ Topě tŷ jĕnĕ jafã ri ke nĩ ěn vŷ tŷ ag pã'i mág nĩ, ópã ěn ag pã'i mág. Hebreu ag ví ki ti jiji vŷ: Abadom, he mũ, kŷ tóg Grego ag ví ki: Apolião, he mũ, hã vŷ: nĕn ũ kar kókĕg tí, he mũ, ěg ví ki, hã vŷ: Apolião, he mũ.

¹² Nĕn jagy ve ve inh huri, sŷ nĕn jagy régre venh ke nĕ ha.

¹³ Kŷ Topě tŷ jěgně jafã tŷ 7 (ke) ěn ag kã ũ tóg trombeta kyn mũ gé. Trombeta tŷ 6 (ke) tá krŷg vĕ sir. Kŷ sóg vĕnh ví mĕg mũ. Topě mŷ nĕn ũ pũn jafã tŷ ouro tá tóg mĕ há tí, vĕnh ví ti. Mesa ěn péno tŷ 4 (ke) ki, mesa tŷ Topě jo jĕ ěn ki tóg mĕ há tí, vĕnh ví ti.

¹⁴ Vĕnh ví ěn tóg ũ tŷ ũri kyn mũ ěn mŷ: "Topě tŷ jěgně jafã tŷ 4 (ke) ěn kygvãn tŷg," he mũ. "Ũ tŷ goj mág tŷ Eufrates tá sigse kŷ nŷtĩ ěn ag kygvãn tŷg," he tóg.

¹⁵ Kŷ tóg ag kygvãn tí mũ, ũ tŷ 4 (ke) ěn ag. Tá ag tóg jãvãnh nŷtĩ ja nŷgtĩ, ag tŷ ěprã ke tŷ hĕn ri ke ag kãgtĕn jé. Topě vŷ ag mŷ ag tŷ prŷg ki ag kãgtĕn ke, kysã ki ag kãgtĕn ke, kurã ki ag kãgtĕn ke, hora ki ag kãgtĕn ke mũ ěn nĩm ja nĩ. ěprã ke vĕnh kãpóv tãgtũ ag kã ũn pir ag kãgtĕn kãn jé ag tóg ke mũ, Topě tŷ jěgně jafã tŷ 4 (ke) ěn ag.

¹⁶ Ag krĕm soldado ag número mĕ inh, ũ tŷ cavalo kri mũgtfĩ ag. 200 mil (ke) ag nŷtĩ, ag krĕm soldado ag.

¹⁷ Kŷ sóg ag vég mũ, soldado tŷ cavalo kri mũ mũ ag. Ferro tŷ camisa ag nŷtĩ, kŷ ũ ag tóg kusũg nŷtĩ, pĩ kusũg ri ke, ũ ag tóg tánh nŷtĩ, pó tŷ safir tánh ri ke, ũ ag tóg mãréro nŷtĩ, pó tŷ enxofre mãréro ri ke. Cavalo krĩ vŷ mŷg krĩ ri ke nŷtĩ. Ag jĕnkã tá pĩ gru tóg kãkutĕ mũ, nĩja ke gé, pó tŷ enxofre nĩja ke gé, vãn pũr nĩja ri ke ěn ti.

¹⁸ Tag tÿ ag tóg ěprã ke ag kãgtén ke mũ, pĩ tÿ, nĩja tÿ, pó tÿ enxofre nĩja tÿ ke gé, cavalo ag.

¹⁹ Nén tÿ cavalo jĕnkã tá kãkutĕ mũ ěn vÿ ěprã ke ag kãgtén ke mũ, kÿ ag my vÿ ag kãgtén ke mũ gé. Ag my vÿ tÿ pÿn hã ve nĩ, pÿn krĩ. ěn tÿ ag tóg ěprã ke ag kókén ke mũ gé, ag my tÿ.

²⁰ ěprã ke ũ ag tóg hã ra krenkren ke mũ ver. Ag kãgtén kãn ke tũ ag tóg nĩ ver. Kÿ ũn krenkren mũ ag pi(jé) Nén-Kórég ag tovãnh mũ', vĕnh kãggrã tovãnh tũ ag nÿtĩ, ouro tÿ vĕnh kãggrã ěn, prata tÿ vĕnh kãggrã ěn, ferro kusũ tÿ vĕnh kãggrã ěn, pó tÿ vĕnh kãggrã ěn, ka tÿ vĕnh kãggrã ěn ke gé. Ver ag tóg tag kar to: "Topĕ vÿ tÿ ti nĩ," he tĩ gé. Ag tÿ vĕsóg ki vĕnh kãggrã hyn han mũ ra tóg ag mÿ tÿ Topĕ nĩ ve nĩ, ti kanĕ tũ ra, ti nĩgrĕg nor tũ ra, ti tÿ ã pĕn tÿ tũg vãnh (hã) ra.

²¹ Ag pi(jé) ag jykre tovãnh sór mũ', ěprã ke krenkren mũ ěn ag. Jagnĕ kãgtén ag tóg mũgtĩ, kujá jykre han ag tóg mũgtĩ, curandeiro jykre ěn ti. Ajag prũ tũ fag mrĕ ag tóg nÿgnÿ mũgtĩ, ajag mén tũ ag mrĕ fag tóg nÿgnÿ mũgtĩ gé, jagnĕ tÿ nén ũ pigju(g) ag tóg mũgtĩ gé, ěprã ke ag.

10

Livro sĩ

¹ Kÿ sóg Topĕ tÿ jĕnĕ jafã tar ũ vég mũ. Kanhkã tá tóg kãtĕre mũ, ěprã. Kanhkã góg vÿ ti kri rũm kÿ nÿ nĩ. Ti krĩ kri ta no tóg vĕnh ven mũ. Ti kakã vÿ rã ri ke nĩ, ti fa vÿ pĩ gru ri ke nÿtĩ, ti fa jĕngrĕ ti.

² Livro sĩ mãn kÿ tóg jĕ nĩ, livro tÿ jĕn ke kÿ tóg ma jĕ nĩ. Ā pĕgja tÿ tóg goj kafã tũ sãn mũ, kÿ tóg ã jakãnh tÿ ga sãn mũ.

³ Prĕr tóg mũ sir, jamã hár(a), kÿ tóg tÿ mũg kyr mĕ tĩ, ti prĕr ti. Kÿ ta tÿ tÿrÿr he tÿ 7 (ke) vÿ ti vĩ kafã mũ, jamã hár(a).

⁴ Kÿ sóg ta tÿ tÿrÿr he mũ vĩ ěn rãn sór mũ. Hã ra ũ tÿ kanhkã tá vĩ mũ tó inh mÿ: "rãn tũg nĩ," he mũ. "Ta tÿ tÿrÿr he mũ ěn vĩ tó sór tũg nĩ, ũ mÿ," he tóg.

⁵ Kÿ Topĕ tÿ jĕnĕ jafã ěn, ũ tÿ goj mrĕ ga kri jĕ mũ ěn tóg ã nĩgé tÿ kanhkã ki ven mũ, ã pĕgja tÿ.

⁶ Kÿ tóg: "sÿ ki hã tónh ke vĕ," he mũ. "Topĕ vÿ ki kanhró nĩ, sÿ ki hã tó mũn ki," he tóg. "Ũn rĩr nĩ ěn vÿ ki kanhró nĩ, ũn ter vãnh ěn vÿ ki kanhró nĩ, ũ tÿ kanhkã han mũ ěn vÿ ki kanhró nĩ, ũ tÿ ga han mũ ěn ti, ũ tÿ goj han mũ ěn ti, ũ tÿ ũn rĩnrĩr nÿtĩ kar ag hyn han mũ ěn ti. ěn hã vÿ isÿ ki hã tó mũ ki kanhró nĩ," he tóg. "Ha vĕ, ã tÿ nén han ke mũ ěn tovãnh mãn ke tũ ti nĩ ha, Topĕ ti.

⁷ Ti tÿ jĕgnĕ jafã tÿ 7 (ke) ěn ag kã ũ vÿ trombeta kyn ke mũ, kÿ tóg ũ tÿ 7 (ke) tá krÿg ke mũ. Ti tÿ kyn kÿ Topĕ vÿ ã tÿ nén han sór mũ ěn han ke mũ ha, ã tÿ vãsÿ to jykren mũ ěn ti. Hã tó ja ti nĩ, ti rãnrãj han tĩ ag mÿ, ti vĩ tó tĩ ag mÿ ke gé, Topĕ ti," he tóg, Topĕ tÿ jĕnĕ jafã ti.

⁸ Kÿ kanhkã tá ke ũ tóg inh mrĕ vĕmén mãn mũ. Inh mÿ tóg: "ha tũg," he mũ. "Livro sĩ tÿ jĕn ke kÿ nĩ ěn mãn tũg," he tóg. "Ũ tÿ goj mrĕ ga sãn kÿ jĕ ěn ki livro mãn tũg," he tóg, kanhkã tá ke ěn ti.

⁹ Kÿ sóg ti ra tĩ mũ, kÿ sóg ti mÿ livro to vĩ mũ. Kÿ tóg inh mÿ: "té, ko ra," he mũ. "Mÿg ri ke ti nĩ, ã tÿn kon kÿ. Ko kar kÿ tóg hã ra fa nĩnh mũ, ha vemnĩ," he tóg.

¹⁰ Kÿ sóg livro sĩ ěn mãn kÿ ko mũ. Kÿ tóg mÿg ri ke nĩ. Isÿn ko kar kÿ tóg fa nĩ sir.

11 Kŷ ũ tóg inh mŷ: “Topě tŷ nén hyn han ke mũ tó mǎn jé ǎ tóg ke mũ,” he mũ. “Tĩ tŷ povo kar ag tŷ nén hyn han ke mũ tó jé ǎ tóg ke mũ, ti tŷ nação kar ag tŷ nén hyn han ke mũ ên ti, ti tŷ pǎ'i krêm ke kar ag tŷ nén hyn han ke mũ ên ti, ti tŷ pǎ'i kar ag tŷ nén hyn han ke mũ ên ti ke gé,” he tóg, vĕnh vĩ ti.

11

Ũ tŷ Topě vĩ tó tĩ ag

1 Kŷ ag tóg inh mŷ vǎn jun mũ, vǎn tŷ nén ũ kǎmun jafǎ ti. Kŷ ũ tóg inh mŷ: “tǎg’,” he mũ. “Topě jo ĩn kǎmun nĩ, Topě mŷ nén ũ pũn jafǎ mré hǎ. Ũ tŷ krêm Topě mré vĕmén kŷ nŷtĩ ên ag nĩgrĕn nĩ gé.

2 Topě jo ĩn vǎso ên kǎmun tũg nĩ hǎ ra. Fóg ag tũ vĕ, kŷ kǎmun tũg nĩ. Kysǎ tŷ 42 (ke) ki fóg ag tóg cidade ên kókĕn ke mũ, Topě tŷ cidade ũ to: isũ vĕ, he mũ ên ti.

3 Ũ tŷ inh vĩ tó tĩ régre ag jĕgnĕ jé sóg ke mũ. Ĕg tŷ nén ũ tŷ ĕg mŷ e nĩn kŷ kur kórĕg rĩg tĩ ên rĩnh jé ag tóg ke mũ, sacco ên, ũn régre ên ag. Isŷ ag mŷ nén tónh ke mũ ên tó jé ag tóg ke mũ, kurǎ tŷ 1260 (ke) ên ki,” he tóg inh mŷ, ag kǎmĩ ũ ti.

4 Topě vĩ tó tĩ régre ên ag vŷ Topě vĩ to tar nŷtĩ, ka tŷ oliveira tar nĩ ên ri ke ag nŷtĩ. Topě vĩ tó ag tóg tĩ, kŷ ag tóg néj gru ri ke nŷtĩ, néj tŷ kri fĕg jafǎ ên kri nŷtĩn kŷ. Ũ tŷ ĕprǎ ke ag kri ke ên rǎ hǎ ti nŷtĩ, vela tŷ kri fĕg jafǎ régre ên ag. Tag ri ke ag nŷtĩ, Topě vĩ tó tĩ régre ên ag.

5 Ũ tŷ ag kato vǎsǎn kŷ ag tóg pĩ tŷ ag jĕnkǎ tá kǎkutĕ mũ ên tŷ ag tŷ tũ' he tĩ, ũ tŷ ag kato vǎsǎnsǎn mũ ag tŷ. Hǎ kŷ ag kǎgter kǎn' he tĩ, ũ tŷ ag vóg kónǎn sór mũ ag.

6 Ag tŷ Topě vĩ tón kŷ ag tóg ag tŷ ta kutĕ kamĕg sór kŷ ti kutĕ kamĕg tĩ, kŷ tóg kutĕ tũ nĩgtĩ. Kŷ, ag tŷ goj tŷ vĕnh kyvénh ri ke han sór kŷ ag tóg tŷ vĕnh kyvénh ri ke han tĩ gé. Ag tŷ ga kri ke ag vóg kónǎn sór kŷ ag tóg ag vóg kónǎn tĩ gé. Nén ũ jagy tŷ hĕn ri ke han ag tóg tĩ, Topě vĩ tó tĩ régre ên ag.

7 Kejĕn ag tóg kǎmĕn kǎn mũ sir, Topě tŷ ag mŷ nén tó mũ ên ti. Kŷ nũgme tá mĩg tóg kǎkutĕ mũ, kŷ tóg ag to rá ke mũ. Ag tŷ hĕ nŷ ri ken kŷ ag kǎgtĕn mũ, mĩg ên ti.

8 Ājag kǎgter kŷ ag tóg cidade kuju tá vǎr kŷ nŷtĩ nĩ, ĕg Senhor tŷ cidade tá ka to sa ja ên tá. Cidade ên tá ke ag jykre tóg cidade tŷ Sodoma tá ke ag jykre ri ke nĩ, ga tŷ Egito tá ke ag jykre ri ke ti nĩ gé.

9 Kurǎ tǎgtũ mré kurǎ kuju ki ag tóg vĕser ên vigvég mũ. Vĕnh kar ag vŷ ag vigvég mũ, povo kar ag, pǎ'i krêm ke kar ag, vĕnh vĩ kar tó tĩ ag kar ke gé. Ag pĩ(jé) ga krêm ag pigjunh ke mũ', vĕser ên ag.

10 Ĕprǎ ke kar ag mŷ tóg sér tĩ, ag kǎgter ti. Festa mǎg han ag tóg mũ. Jagnĕ mŷ ag tóg presente jĕgnĕg mũ. Topě vĩ tó tĩ tag ag vŷ ĕprǎ ke ag vóg kónǎn jagy han ja nĩgtĩ, hǎ kŷ ag kǎgter tóg vĕnh kar mŷ sér gy tĩ sir.

11 Kurǎ tǎgtũ kri kurǎ kuju tũg kŷ Topě tóg hǎ ra ag rĩn mǎn mũ sir, ti kuprĩg tŷ. Kŷ vĕnh kar ag tóg jũrũn ke pĕ han mũ sir.

12 Kŷ kǎnhkǎ tá vĕnh vĩ tóg ag mŷ mĕ há tĩ, Topě vĩ tó tĩ régre tag ag mŷ. Kŷ tóg ag mŷ: “kunĩg,” he mũ. Kŷ ag kato vǎsǎnsǎn mũ ag vŷ ag tŷ kǎnhkǎ ra jǎpny vég mũ sir, kǎnhkǎ góg kǎmĩ.

13 Kŷ ga tóg jũrũn ke mũ sir. Cidade tá ĩn kókĕg tóg mũ, ga tŷ jũrũn ke ti. ĩn vĕnh kǎpóv tŷ 10 (ke) ag kǎ ũn pĩr kókĕn kǎn tóg mũ. Ĕprǎ ke tŷ mĩl tŷ 7 (ke) vŷ kǎgter mũ, ên kǎ. ũn kǎgter tũ ag kǎnĕ tóg jur mũ. Ag mũmĕg vŷ ag kǎgtĕn

kren mû. Kÿ ag tóg Topê to: “Ûn mág vÿ tÿ ti nÿ,” he mû vâhâ. “Tar ti nÿ, ù tÿ kanhkâ tân ag kri nÿ ên ti,” he ag tóg mû vâhâ.

¹⁴ Nén jagy ù vÿ hur tû' hé. Nén jagy ù tóg ver kâ nÿ nÿ.

Trombeta tÿ êgno kyr

¹⁵ Kÿ Topê tÿ jëgnê jafâ tÿ 7 (ke) ên ag kâ ù tóg trombeta kyn mû gé sir. Trombeta tÿ 7 (ke) tá krÿg vê. Kÿ kanhkâ tá vênh vÿ tÿ hên ri ke tóg mê há nÿtÿ. “Vâhâ tóg êprâ ke kar ag kri tÿ ùn mág jê, Topê ti, êg Senhor ti ke gé,” he ag tóg, ù tÿ kanhkâ tá vÿ mû ag. “Vâhâ ag tóg nén ù kar kí rÿr nÿtÿ ha, Topê ti, â kósin mré, kÿ tóg tû' henh ke tû nÿ, ag rânhrâj ti,” he ag tóg, ù tÿ kanhkâ tá vÿ mû ag.

¹⁶ Kÿ kófa tÿ 24 (ke) ên ag, ù tÿ Topê mré âjag nÿgja kri nÿgnÿ kÿ nÿtÿ ên ag vÿ ti krêm mügmüg ke kân mû. Kÿ ag tóg Topê mÿ: “Topê vÿ tÿ â nÿ,” he mû sir.

¹⁷ Jân ag tóg mû gé sir, ha mê. “Topê, pâ'i mág, nén ù kar han há â tóg nÿ,” he ag tóg mû, jân kÿ. “Vâsÿ â tóg nÿ nÿ, kÿ â tóg ùri nÿ nÿ gé. Êg mÿ tóg sér tí, â tÿ tÿ pâ'i mág nÿn kÿ, â tÿ vênh kar ki rÿr kÿ tóg sér pê tí. Á tar nÿ kÿ â tóg pâ'i ù ag pan kân.

¹⁸ Ag to jû jê â tóg ke mû ha. Ûn kâgter ja ag jykre tugnÿm kân jê â tóg ke mû ha. Povo kar vÿ â kato vâsânsân ja nÿgtÿ, kÿ â tóg ag kato vâsân mû ha. Á kurâ vÿ hur jun, kÿ â tóg â rânhrâj han tí ag mÿ ag rânhrâj kaja ti ven ke mû, â vÿ tó tí ag mÿ ke gé, â tû kar ag mÿ, ùn mág ag mÿ, ùn kâsir ag mÿ, ù tÿ â kamêg nÿtÿ kar ag mÿ â tóg ag rânhrâj kaja ven ke mû ha. Á kurâ vÿ hur jun, kÿ â tóg ù tÿ êprâ ke ag kókén ja ên ag kókén kân ke mû ha,” he ag tóg mû, kófa tÿ 24 (ke) ên ag.

¹⁹ Kÿ ù tóg Topê jo ïn nón mû, ïn tÿ kanhkâ tá jê ên. Kÿ Topê jo ïn jânkâ róm kÿ jê kÿ Topê caixa ên tóg ve há' he kÿ nÿ nÿ, Topê tÿ â tû ag mré jykrén kÿ ag mÿ caixa fig mû ên ri ke ti. Kÿ ta tóg kómkom ke mû, tÿrÿr he ke gé. Ga vÿ ragra ke jagy han mû sir, kÿ nâfy vÿ vár mû gé sir, nâfy mág.

12

Mÿg fêr kâme

¹ Kÿ kanhkâ tá nén ù vênh mÿ tóg vênh ven mû. Ûn tÿtá fi vÿ tóg vênh ven mû. Kÿ rá tóg fi mÿ tÿ fi kur nÿ. Kysâ sân kÿ fi tóg jê nÿ. Fi krÿ tógfi vÿ krÿg tÿ há nÿ, krÿg tÿ 12 (ke) tÿ.

² Kufÿ fi tóg jê nÿ, há ra fi tóg kaga mû, kÿ fi tóg jagtar nÿ sir.

³ Kÿ kanhkâ tá nén ù ù tóg vênh ven mû gé. Mÿg fêr kusüg tóg vênh ven mû. Á pir ra tóg krÿ tÿ 7 (ke) nÿ, nÿka tÿ 10 (ke) ti nÿ gé. Ti krÿ tógfi tóg nÿtÿ, ti krÿ tÿ 7 (ke) to.

⁴ Á my tÿ tóg krÿg tÿ hên ri ke kókég mû, kÿ tóg êprâ vár mû, krÿg tÿ hên ri ke ti. Krÿg vênh kâpóv tâgtû ag kâ ùn pir kókén kân tóg mû. Kÿ tóg ùn tÿtá ên fi jo tá jê nÿ, fi kósin tÿ mur ken kÿ, mÿg fêr kusüg ên ti. Ti tÿ fi kósin mân sór vê, ti mur kÿ.

⁵ Kÿ tóg mur mû sir, fi kósin ti, há ra tóg gré nÿ. Tÿ tóg pâ'i mág pê jênh ke mû, êprâ ke kar kri. Ag kri jên kÿ tóg ag mÿ vÿ tar gy han ke mû. Ti mur kÿ ag tóg kanhkâ ra ti va mû mû, Topê nÿgja sÿnvÿ ên ra, mÿg fêr jo.

⁶ Kÿ ùn tÿtá ên fi tóg ga kórég ra vênhvâg tí mû, mÿg fêr jo vênh péju kÿ. Tá Topê tóg fi mÿ fi tÿ ki vênh péjunh ke han ja nÿ. Tá ù tóg fi mÿ vÿjên vin tí, kurâ tÿ 1260 (ke) ki.

⁷ Kŷ kanhkā tá vėnh génh tóg kutē mŭ. Topē tŷ jėgnē jafā ag to pā'i mág tŷ Miguel vŷ mĭg fēr ěn kato vāsān mŭ, ā krēm ke ag mré. Kŷ mĭg fēr ěn tóg ā krēm ke ag mré Miguel to rará mŭ gé sir.

⁸ Hā ra ag tóg ti tŷ hěn ri ke mŭ sir, kanhkā tá ke ag, mĭg fēr ěn ti tŷ. Kŷ ag tóg kanhkā tá ti kutēm mŭ, ti mré ke kar ag mré hā.

⁹ Mĭg fēr ěn kutēm ag tóg mŭ sir. Pŷn ve tŷ ũn ve fag krĭn kónān ěn hā vē, Japon hā vē, Satanās hā vē, ěprā ke ag tŷ Topē kato vāsānsān han mŭ ěn hā vē, hā vŷ: mĭg fēr, he mŭ. Ag tŷ kanhkā tá ti kutēm kŷ ag tóg ga kri ti fón mŭ sir, ti krēm ke kar ag mré hā. Kŷ ag tóg ga kri mŭgtĭ ha, Japo ag.

¹⁰ Kŷ sóg kanhkā tá vėnh vĭ ũ mĕg mŭ gé. Jamā hār(a) tóg vĭ mŭ, kŷ tóg: "tág!" he mŭ. "Ēg krenkren han tóg huri, Topē ti. Vāhā vėnh kar tóg vé, Topē tŷ tŷ ũn mág pē nĭ ti. Vāhā Cristo tóg vėnh kar mŷ ā tŷ tŷ ũn tar nĭ ěn ven huri. Ag tŷ ũn kutēm mŭ ěn tóg ěg mré ke ag kato vĭ kónān ja nĭgtĭ, Topē mŷ, kurā ki, kuty tá ke gé. Hā ra tóg kutēm kŷ jē ha.

¹¹ Ēg mré ke ag vŷ ti tŷ hěn ri ke ja nĭgtĭ, cordeiro kyvėnh ěn tugrĭn, vėnh vĭ há ěn tugrĭn, ag tŷ vėnh kar mŷ Topē vĭ tó tĭ ěn tugrĭn. Ag kā ũ kāgtĕn ja ag tóg nĭgtĭ, hā ra tóg ag mŷ tŷ nén ũ tŭ nĭ ja nĭgtĭ, ag tŷ Jesus tugrĭn ag kāgtĕn mŭ ra. Hā kŷ ag tóg Japo tŷ hěn ri ke ja nĭ.

¹² Ti kutēm kŷ jĕn kŷ tóg kanhkā tĕn kar mŷ sér tĭ ha. Hā ra tóg ga kri mŭ ag mŷ jagy tĭnh mŭ, goj kri mŭ ag mŷ ke gé. Japo vŷ ag mré jē ha, ga kri, ag tŷ kanhkā tá ti kutēm kŷ. Kŷ tóg jŭ jagy han kŷ kánē tĭ. Ti kurā vŷ kakó nĭ ha. Tag tugrĭn tóg jŭ jagy han kŷ kánē tĭ nĭ, Japo ti," he tóg, ũ tŷ kanhkā tá vĭ mŭ ti.

¹³ Kŷ mĭg fēr ěn tóg ěprā jē mŭ. Kŷ tóg ũn tŷtá ěn fi vóg kónān sór mŭ, ũ tŷ gĭr vég mŭ ěn fi.

¹⁴ Kŷ ag tóg fi mŷ fēr mág junjun mŭ, kónhkó mág fēr ěn ri ke. Kŷ fi tóg tŷ ga kórég ěn ra tē tĭ mŭ. Tá fi tóg vėnh péju kŷ nĭ nĭ, prŷg tĕgtŭ kri prŷg kju ki. Kŷ pŷn kórég ěn tóg tá fi vóg tŭ nĭ ha, fi vėnh péju ja tá.

¹⁵ Kŷ tóg goj var ri ke han mŭ, pŷn ti. Ti jĕnkā tá tóg kākutē mŭ, goj var ti. Ti tŷ ũn tŷtá ěn fi nār han sór vē.

¹⁶ Hā ra ga tóg fi mŷ goj ěn tŷ gym ke mŭ, goj tŷ mĭg fēr jĕnkā tá kākutē mŭ ěn tŷ, kŷ fi tóg ga tugrĭn kren mŭ sir.

¹⁷ Kŷ mĭg fēr tóg jŭ kŷ tĭ mŭ, ũn tŷtá ěn fi tovānh kŷ. Kŷ tóg fi krē kato vāsān jé tĭ mŭ gé, hā vŷ: ũ tŷ Topē vĭ ki króm mŭ ag, he mŭ, fi krē ag, hā vŷ: ũ tŷ Jesus to krónh ke tŭ ag, he mŭ, ũn tŷtá ěn fi krē ag.

¹⁸ Kŷ mĭg fēr ěn tóg goj fyr ra tĭ mŭ.

13

Mĭg régre ag kāmē

¹ Kŷ mĭg ũ tóg goj mág kātá kākutē mŭ. Ā pir ra tóg krĭ tŷ 7 (ke) nĭ, nĭka tŷ 10 (ke) ti nĭ gé. Ti krĭ tógfĭ tóg ti nĭka kri nŷtĭ, kŷ ti jygi tóg ti krĭ kri ránrán kŷ nŷtĭ, ti tŷ tŷ pā'i mág nĭn kŷ, goj kātá mĭg ěn ti. Hā ra Topē to vĭ kónān vē sir, ti krĭ to ránrán kŷ nŷtĭ ěn ti.

² Ti kātá mĭg ěn tóg mĭg rá ri ke nĭ. Ti pĕn tóg urso pĕn ri ke nŷtĭ. Ti jĕnky tóg mŷ kusŷg jĕnky ri ke nĭ. Kŷ mĭg fēr ěn tóg goj kātá mĭg tŷ pā'i mág pē han mŭ, ti tŷ ag nĭgja kri nĭ jé, ti tŷ ā jykre tar ěn han jé ke gé, mĭg fēr jykre ěn ti.

³ Ti krĭ ũ fynh ja ag tóg nĭ, kŷ tóg ter kren, hā ra tóg há' he mĕn, goj kātá mĭg ěn ti. Ēprā ke kar ag vŷ ti vég mŭ, kŷ tóg ag mŷ e kar tĭ. Ti vĭ kri fig ag tóg mŭ.

4 Mĭg fĕr ěn to ag tóg: “Topĕ vĕ,” he tĭ, ěprā ke kar ag, ti jykre tar tugrĭn, ti tĕ goj kātā mĭg ěn tar han ja tugrĭn. Goj kātā mĭg ěn to ag tóg: “Topĕ vĕ,” he tĭ gé. “Ů tóg ti ri ke tũ pĕ nĭgtĭ,” he ag tóg tĭ. “Ů tóg ti tar káfór tũ nĭ,” he ag tóg tĭ gé, ěprā ke ag, mĭg ěn to.

5 Goj kātā mĭg ěn vĕ vĭ vĕnhmĕ han jĕ nĭ. Ā vĭ tĕ tóg Topĕ kato vāsān mũ. Kysā tĕ 42 (ke) ki tóg tar jĕ nĭ, vĕnh kar kri.

6 Kĕ tóg Topĕ to vĭ kónān mũ, Topĕ jygy to ke gé, ti jo ĭn to ke gé, kanhkā tān kar ag to tóg vĭ kónān mũ gé.

7 Kĕ tóg Topĕ tĕ ũn kuprĕg mũ ag kĕgtĕn to vāsān mũ gé, kĕ tóg ag tĕ hĕn ri ke mũ gé sir, goj tān tĕ mĭg ěn ti. Hā ra Topĕ tóg ver ti to fen nĭ. Kĕ povo kar ag, naçāo kar ag, pā'ĭ krĕm ke kar ag, ũ tĕ vyr mĕ vĭ nĕtĭ ěn ag kar vĕ mĭg ěn vĭ hā jĕmĕg mũ.

8 ěprā ke kar ag vĕ ti to: “Topĕ vĕ,” he' he tĭ. Ag jāvo ũ ag jygy tóg ránrán kĕ nĕtĭ, Topĕ livron ki. Ů tĕ rĭr krĕg ja tũ venh ke mũ ěn ag vĕ ki ránrán kĕ nĕtĭ. Topĕ tĕ nĕn ũ kar han ke to hā tóg ag jygy ránrán ja nĭgtĭ, livro ěn ki. Cordeiro tĕ ag jagfy ter ja ěn tũ vĕ, livro ěn ti. Ů tĕ ki ránrán kĕ nĕtĭ ag vĕ mĭg ěn jykre han tũ nĭgtĭ.

9 Ůn nĭgrĕg nĕtĭ ag tĕ tĕ jĕmĕ jé.

10 Topĕ tĕ ā ki ge kĕ nĕtĭ ũ ag to: “nĭgfĕnh kĕ ag nĕtĭnh mũ, isugrĭn,” hen kĕ ag tóg nĭgfĕnh kĕ nĕtĭnh mũ, cadeia ki. Ti tĕ ag to: “rógro tĕ ag tóg ag kĕgtĕn ke mũ,” hen kĕ ag tóg rógro tĕ ag kĕgtĕn ke mũ sir. Ů tĕ Topĕ mĕ vĕnh vin mũ ěn ag jé to krónh ke tũg, ag jé Topĕ tovānh tũg.

11 Kĕ sóg mĭg ũ vĕg mũ gé. Ga kātā tóg kĕkutĕ mũ. Nĭka régre ti nĭ, cordeiro nĭka ri ke. Ti vĭ tóg hā ra mĭg fĕr ěn vĭ ri ke nĭ.

12 Goj kātā mĭg ěn rĭnve tóg ā tĕ han mũ kar hyn han tĭ, ā jykre tar ěn ti, ga kātā mĭg tĭ. Kĕ tóg ěprā ke kar ag to vāsān mũ, ag tĕ goj kātā mĭg ěn to: “Topĕ vĕ,” he jĕ, ũn ter kren mũ ěn to.

13 Ga kātā mĭg tag vĕ nĕn ve vānh tĕ hĕn ri ke hyn han mũ. Pĭ tĕ kanhkā tā kĕtĕre han tóg tĭ, ěprā ke kar ag rĭnve.

14 Ti tĕ ěg tĕ nĕn han vānh tĕ hĕn ri ke hyn han kĕ tóg ěprā ke kar mĕ ón mũ, ag tĕ ti kamĕg jé. Goj kātā mĭg ěn rĭnve tóg mĭlagre tĕ hĕn ri ke hyn han mũ. Kĕ tóg ěprā ke ag mĕ ke mũ, ag tĕ goj kātā mĭg kĕggrā han jé. Ag tĕ mĭg ěn fynh mũ ra tóg ter ja tũ nĭ, hā kĕ tóg vĕnh kar mĕ: “ha ti kĕggran,” he mũ, ga kātā mĭg ěn ti.

15 Kĕ tóg goj kātā mĭg kĕggrā ki hu he mũ, kĕ tóg rĭr mũ, ti kĕggrā ti, kĕ tóg vĭ mũ gé. Kĕ tóg ũ tĕ ti to: “Topĕ vĕ,” he jāvānh ěn ag kĕgtĕn kĕn mũ sir, ti kĕggrā rĭr jĕ ěn ti.

16 Ga kātā mĭg ěn tóg tĕ ěprā ke kar ag kri ke nĭ, ũn mág ag kri, ũn kāsir ag kri ke gé, ũn rico ag kri ke gé, ũn jagāgtar ag kri ke gé, ũ tĕ tĕ camarada nĕtĭ ag kri ke gé, ag patrāo ag kri ke gé. Kĕ tóg ag kar to vāsān mũ, ag tĕ ājag pĕgja tā ājag nĭgé pānĭ ki ti jĭji ránrán jé, ke tũ nĭ kĕ ti nũmero ti. Ājag kakā ki ag tóg ti jygy ránrán mũ gé.

17 Ů tĕ gen kĕ ránrán kĕ nĕtĭ ag hā tóg nĕn ũ comprar he tĭ, nĕn ũ vender he tĭ gé inhā. Ůn rá tũ ag vĕ nĕn ũ comprar he mĕn ke tũ nĕtĭ ha. Vĕnh rá tag vĕ tĕ ga kātā mĭg ěn jygy nĭ, ke tũ nĭn kĕ ti nũmero ti. Ti nũmero vĕ ti jĭji tó tĭ gé.

18 Ůn krĭ há ag hā tóg ti nũmero to jykrĕn há han ke mũ. Ůn krĭ tũ ěn ag pi(jé) to jykrĕn ke mũ', ti nũmero to. ěprā ke jygy vĕ, ti nũmero ti, hā vĕ: 666, he mũ.

14

Ůn krenkren kŷ nŷtŷ ag jŷn

¹ Kŷ sŃg ki  v nh kŷ cordeiro  n ve m n mŷ. P n nh kri t g j  nŷ, p n nh tŷ Si o he mŷ  n kri, cordeiro  n ti. Ůn e ag t g ti mr  t  nŷtŷ, ŷ tŷ 144 mil (ke) ag. Cordeiro  n jyjy t g ag kak  ki r n kŷ nŷ, ŷ tŷ ti mr  t  nŷtŷ ag kak  ki. Cordeiro  n j g jiji vŷ ag ki r n kŷ nŷ g .

² Kŷ sŃg kanhk  t  n n ŷ m g mŷ. Tŷ t g sa krog m  tŷ, tŷ t g ta tŷ tŷrŷr he ri ke tŷ g . Kŷ t g tŷ ag tŷ v kyn jaf  tŷ harpa kyn  n ri ke tŷ g , ti kyr ti.

³ V j n t g t  ag t g mŷ g , n n n  tŷ 4 (ke)  n ag rŷnve, k fa ag rŷnve ke g , nŷga sŷnvŷ  n t . Ů tŷ 144 mil (ke) ag vŷ Top  j  t g tag t  h  nŷtŷ,  n ag t vŷ.  pr  ke ja ag v , h  ra ag t g krenkren kŷ nŷtŷ, ŷ tŷ ti j n t g t  mŷ  n ag.

⁴ J nhkri ag nŷti. Ag pi(j ) fag v g ja nŷgtŷ!, cordeiro mr  mŷ ja ag t g nŷgtŷ, ag tŷ tŷ  pr  ke ra.  pr  ke ag k mŷ t g ag kygŷm ja nŷ, cordeiro ti. Kŷ ag t g tŷ Top  tŷ nŷtŷ, cordeiro tŷ ke g . Ag mŷ ag t g h  p  nŷtŷ.

⁵ Ag pi(j ) ŷ mŷ  n ja nŷgtŷ!. Kygn  ja tŷ p  ag t g nŷgtŷ.

Top  tŷ j n  jaf  t gtŷ ag

⁶ Kŷ sŃg Top  tŷ j n  jaf  ŷ v g mŷ g . Kanhk  kr m t g t  tŷ mŷ. Kŷ t g Top  vŷ ma k tŷ mŷ, Top  vŷ  n vŷ tŷg' henh ke tŷ nŷ. Ti tŷ  pr  ke kar ag mŷ Top  vŷ t nh ke v , na o kar ag mŷ, povo kar mŷ ke g , p 'i kr m ke kar ag mŷ, vyr mŷ vŷ nŷtŷ kar ag mŷ ke g .

⁷ Kŷ t g pr r mŷ sir. "Top  h  kam g nŷ, ti h  to: ŷn m g vŷ tŷ ti nŷ, hemnŷ," he t g, Top  tŷ j n  jaf   n ti. "Ti kur  vŷ hur jun.  pr  ke ag jykre tugnŷm j  t g ke mŷ ha. Ů tŷ kanhk  han mŷ mŷ: "Top  vŷ tŷ   nŷ," hemnŷ, ŷ tŷ ga han mŷ  n mŷ, ŷ tŷ goj han mŷ  n mŷ, goj nŷhŷg mr  h .  n h  mŷ: "Top  vŷ tŷ   nŷ," hemnŷ," he t g, Top  tŷ j n  jaf   n ti.

⁸ Ti n n Top  tŷ j n  jaf  ŷ t g jun mŷ g , kŷ t g: "k k n kŷ t g nŷ nŷ," he mŷ. "Cidade tŷ Babil nia vŷ k k n kŷ nŷ ha," he t g. " pr  ke kar to t g v s n ja nŷ, Babil nia to p 'i ti, ag tŷ ti mr   jag prŷ tŷ fag mr  nŷgnŷ j , fag tŷ ti ri ke  jag m n tŷ ag mr  nŷgnŷ j , kŷ t g v nh kar tŷ ti mr  vinho fa p  kron ri ke nŷ," he t g, Top  tŷ j n  jaf  ŷ  n ti.

⁹ Kŷ Top  tŷ j n  jaf  ŷ t g ag n n k tŷ mŷ g .  n vŷ pr r kŷ: "!.. pr  ke ŷ ag t g mŷg to: top  v , he ja nŷgte..!" he mŷ, pr r kŷ. "!..Ti k ggr  to ag t g: top  v , he ja nŷgte..!  jag kak  ki ag t g ti r  han ja nŷgte..! Ag nŷg  p nŷ ki ag t g r nr n kŷ nŷtŷ g ..!"

¹⁰  n ag vŷ Top  tŷ ag to jŷ jagy han venh ke mŷ ha..! Kŷ t g ag tŷ vinho kron ri ke nŷ nŷ ha..! Top  vŷ jŷ jagy han kŷ j  ha..! Kŷ ti tŷ ag to jŷnh ke t g kar kŷ nŷ ha..! Kŷ t g  g tŷ vinho tŷ copo f n kŷ f g  n ri ke nŷ ha..! ti tŷ ag to jŷnh ke ti..! Top  tŷ v nh k n kŷ j  to ken h  v ..! Ů tŷ mŷg to: top  v , he ja  n ag vŷ jag gtar m g venh ke mŷ ha..! cordeiro rŷnve..! Top  tŷ j gn  jaf  ag kar rŷnve ag jagtar k n kŷ nŷtŷ ha..! Pŷ ki ag t g jag gtar ke mŷ ha..! p  tŷ enxofre prŷ nŷja ki ke g , v n pŷr nŷja ri ke  n ki..!

¹¹ Ag tŷ pŷ ki jag gtar mŷ  n nŷja t g kanhk  to t pry mŷ ha..! Tŷg' henh ke tŷ ti nŷ, pŷ  n ti..! Ů tŷ mŷg to: top  v , he mŷ  n ag vŷ v nhk nk n ke tŷ p  nŷ..! ŷ tŷ ti k ggr  to: top  v , he mŷ  n ag kar ti..! ŷ tŷ ti jyjy tŷ r nr n kŷ nŷtŷ  n ag kar ti..! V nhk n ke tŷ ag nŷtŷ ha..! kur  ki, kuty mr  h ..!" he t g, pr r kŷ, Top  tŷ j n  jaf  ŷ  n ti.

12 Ů tŷ Topē ki ge kŷ nŷtŷ ag jé ti to krónh ke tŷg, ag jé Topē tovānh tŷg, ů tŷ Topē vŷ kri fig mŷ ag, ů tŷ Jesus to tar nŷtŷ ag.

13 Kŷ sóg kanhkā tá vĕnh vŷ ů mĕg mŷ gé. Kŷ tóg: “tag rán nŷ, ha mĕ,” he mŷ, ů tŷ kanhkā tá vŷ mŷ ti. “Ů tóg ěg Senhor ki ge kŷ nŷtŷ, gen kŷ ag tóg kăgter ja nŷ. Ěn ag mŷ tóg sér tâvŷ tŷ ha,” he tóg, ů tŷ kanhkā tá vŷ mŷ ti. Kŷ Topē kuprŷg tóg: “hŷ,” he mŷ gé. “Ag rănhrăj kaja vég ag tóg mŷgtŷ, kŷ ag tóg ag rănhrăj to vĕnhkân kŷ nŷtŷ ha,” he tóg, Topē kuprŷg ti, ůn kăgter mŷ ag to, ů tŷ ěg Senhor ki ge kŷ nŷtŷ ag to.

Topē tŷ jĕnĕ jafă ag tŷ ěpră ke ag vóg kónăn

14 Kŷ sóg kanhkā góg kupri vég mŷ gé sir. Ů tóg kanhkā góg ěn kri nŷ nŷ, tŷ tóg ěpră ke nŷ ve nŷ. Hă ra tóg krŷ tógŷ tŷ ouro nŷ nŷ, kŷ tóg ěg tŷ tŷ trigo kre jafă vyn kŷ nŷ nŷ gé. Jukén kŷ tóg nŷ, trigo kre jafă ěn ti.

15 Kŷ Topē tŷ jĕnĕ jafă ů tóg kătŷ mŷ gé, Topē jo ěn kătă. Kŷ tóg ů tŷ kanhkā góg kri nŷ ěn mŷ: “trigo kre jafă tŷ krenh tŷg nŷ,” he mŷ. “Tŷ ti krenh ke kură vĕ. Vĕnh kân kŷ ag nŷtŷ nŷ, ěpră ke ag,” he tóg.

16 Kŷ ů tŷ kanhkā góg kri nŷ ěn tóg trigo kre jafă ěn tŷ krenh tŷ mŷ.

17 Kŷ sóg Topē tŷ jĕnĕ jafă ů vég mŷ gé. Topē jo ěn kătă tóg kăkutĕ mŷ. Uva kre jafă vyn kŷ tóg tá kăkutĕ mŷ.

18 Kŷ Topē tŷ jĕnĕ jafă ů tóg jun mân mŷ gé. Topē jo ěn kătă tóg kăkutĕ mŷ gé, Topē mŷ nĕn ů pŷn jafă ěn tá. Topē tŷ jĕnĕ jafă tag vŷ pŷ ki rŷr tŷgtŷ. Kŷ tóg ů tŷ uva kre jafă văg mŷ ěn mŷ: “uva kre jafă tŷ krenh tŷg,” he mŷ. “Ga kri ti nŷtŷ, uva kanĕ ti. Ěn krenh tŷg. Ră há ti nŷtŷ ha,” he tóg.

19 Kŷ tóg tŷ mŷ, Topē tŷ jĕnĕ jafă ěn ti. Uva kanĕ krĕg tóg mŷ sir. Kŷ tóg uva jĕgmŷ jafă ki ag văm mŷ, hă vŷ: Topē tŷ vĕnh kar to jŷ, he mŷ, hă vŷ: uva jĕgmŷ jafă, he mŷ.

20 Cidade fyr tá tóg jĕ nŷ, uva jĕgmŷ jafă ěn ti, kŷ ag tóg uva jĕgmŷg mŷ sir, Topē tŷ jĕnĕ jafă ěn ag. Kŷ ag tóg tá ag kyvĕnh kujĕg mŷ, ěpră ke ag kyvĕnh ti, kŷ tóg târa tŷ mŷ, 300 (ke) quilômetros ra, ag kyvĕnh ti. Tŷ tóg goj mág nŷ ve nŷ, ag kyvĕnh ti. Cavalô tŷ kă jĕ ra tóg pun kĕnh ke mŷ vĕ.

15

Topē tŷ jĕnĕ jafă ag tŷ ěpră ke ag vóg kónăn măn

1 Kŷ sóg kanhkā tá nĕn ů vég mŷ gé. Inh mŷ tóg e tŷ, isŷ nĕn nĕ ěn ve kŷ, kŷ tóg inh kanĕ jun mŷ. Topē tŷ jĕnĕ jafă tŷ 7 (ke) ag vigve inh. Ga kri ke ag vóg kónăn jé ag tóg ke mŷ, vógvóg tŷ 7 (ke) ki. Ag tŷ ga kri ke ag vóg kónăn kar kŷ Topē tóg jŷ mân ke tŷ nŷ ha.

2 Kŷ sóg goj tŷ vidro kăki pŷ gru vég mŷ. Kŷ sóg ů ag vigvég mŷ gé, ů tŷ mŷg ěn kato văsănsăn mŷ ěn ag. Ag pi(jé) âjag tŷ tŷ ěpră ke nŷtŷ ra mŷg kăggră ěn to há nŷtŷ ja nŷgtŷ', ag pi(jé) vĕnh ki ti número rán ja nŷgtŷ', ti jyjy tŷ. Ag pi(jé) mŷg vŷ kri nŷm ja nŷgtŷ'. Hă kŷ ag vŷ goj tŷ vidro jo nŷtŷ, kŷ ag tóg văkyn jafă tŷ harpa vyn kŷ nŷtŷ nŷ, Topē tŷ ag mŷ harpa vin mŷ ěn.

3 Kŷ ag tóg Topē mŷ rănhrăj tŷ tŷ Moisés tŷ jĕ ěn to mŷ, ti tŷ jăn ti. Cordeiro ěn mŷ ag tóg jăn mŷ, ha mĕ: “Topē kósin vŷ tŷ â nŷ, pă'i mág vŷ tŷ â nŷ, vĕnh kar kri ke vŷ tŷ â nŷ,” he ag tóg mŷ, cordeiro mŷ, jăn kŷ. “Nĕn ů há tâvŷ han ja â tóg nŷ, ge ve ja tŷ ěg tóg nŷtŷ. Ā jykre vŷ kuryj tâvŷ nŷ, ki há to â tóg tŷgtŷ. Povo kar kri â tóg jĕ nŷ.

⁴ Vēnh kar ag vỹ ā kamēg tī, pā'i mág kar ag. Vēnh kar ag vỹ ā jiji to: “ūn mág vỹ tỹ ti nī,” he tī. Ā hā ne ā pir mỹ há nī'. Povo kar tóg ā tá junjun ke mū, kỹ ag tóg ā mỹ: “Topē vỹ tỹ ā nī,” henh ke mū. Ā jykre kuryj ēn ve kân jé ag tóg ke mū, povo kar ag,” he ag tóg mū, jānjān kỹ, ũ tỹ mīg kato vāsānsān mū ēn ag.

⁵ Kar kỹ sóg kanhkā tá Topē jo īn vég mū. Ti jānkā nón ag tóg mū, kur tỹ īn ēn róm kỹ, Topē nīg jafā ēn.

⁶ Kỹ Topē tỹ jēgnē jafā tỹ 7 (ke) ēn ag tóg tá kāpa mū, ũ tỹ ga vóg kónān ke mū ēn ag. Kur kupri jānhkri rīnh kỹ ag tóg kāmū mū, pyrfé tỹ kur rīnh kỹ, kỹ ag tóg ouro tỹ vēsógfīn kỹ nỹtī gé, ājag fe kri.

⁷ Kỹ nén nē tỹ 4 (ke) ēn ag kāmī ũ tóg ag mỹ ouro tỹ pēnky junjun mū, Topē tỹ jēgnē tỹ 7 (ke) ēn ag mỹ. Pēnky tỹ 7 (ke) junjun ag tóg mū, ag mỹ. Fór ti nỹtī, pēnky ti, Topē jũ tỹ. Topē vỹ tũ' henh ke tũ pē nī. Ti jũ tỹ tóg fór nỹtī, pēnky ti.

⁸ Kỹ Topē jo īn ēn krēm tóg nīja nī. Topē tá tóg tũmtũm ke kātī mū, nīja ēn ti, Topē tỹ tỹ ũn mág nīn kỹ, ti tar nīn kỹ. Topē tỹ jēgnē jafā tỹ 7 (ke) ēn ag tỹ ga vóg kónān ke to hā ũ tóg Topē jo īn ēn kára rānh ke tũ nī.

16

Topē jũ

¹ Kỹ sóg vēnh vī ũ jēmēg mū, Topē jo īn ēn kátá. Topē tỹ jēgnē jafā tỹ 7 (ke) ēn mỹ tóg vī mū, ũn vī mū ēn ti, kỹ tóg: “pēnky tỹ funfór ēn tỹ ga kri kugiēn mūjēg,” he mū.

² Kỹ Topē tỹ jēnē jafā ũ tóg tī mū, ti pēnky ki nī ēn tỹ ga kri kujēn jé. Kỹ ũ tỹ mīg ēn jiji tỹ ránrán kỹ nỹtī ēn ag kar vỹ fugfóm jagy han mū, kaga jagy. ũ tỹ mīg kāggrá to: “Topē vỹ tỹ ti nī,” he mū ag kar vỹ fugfóm kân mū.

³ Kỹ Topē tỹ jēnē jafā ũ tóg goj kafā tũ ki ā pēnky ki nī ēn kujēg mū gé. Kỹ goj tóg vēnh kyvénh ri ke nī ha, ag tỹ ũ tành mū kyvénh ēn ri ke. Kỹ goj kāmī mū kar ag vỹ kāgter mū ha.

⁴ Kỹ Topē tỹ jēnē jafā ũ tóg ā pēnky ki nī ēn kujēg mū gé, pēnky tāgtũ vē sir. Goj mág mré goj kāsir kar ki tóg kujēg mū, ti tũ ti, goj nīhỹg kar ki ke gé. Kỹ tóg vēnh kyvénh kar nỹtī ha, goj kar ti.

⁵ Kỹ ũ tỹ goj ki rīr tī ēn tóg: “ūn há vỹ tỹ ā nī,” he mū, Topē mỹ. “Vāsỹ ā tóg nī ja nīgtī, kỹ ā tóg ũri nī nī gé,” he tóg mū, Topē mỹ. “Vēnh jykre há han kỹ ā tóg nī nī.”

⁶ ũ tỹ ā ki ge kỹ nỹtī ag kāgtén ag tóg, ũ tỹ ā vī tó tī ag mré hā. Kỹ ā tóg ag mỹ vēnh kato vēnh kyvénh nīm mū sir, ag tỹ kron jé. Ag tỹ ag tỹ ag kāgtén kajām hā vē,” he tóg, Topē mỹ, Topē tỹ jēnē jafā ti.

⁷ Kỹ sóg vēnh vī ũ jēmēg mū gé. Topē mỹ nén ũ pūn jafā tá tóg vī mū, ũn vī mū ti, kỹ tóg: “Topē vỹ tỹ ā nī, pā'i vỹ tỹ ā nī, vēnh kar kri ke vỹ tỹ ā nī,” he mū. “Kuryj ti nī, ā jykre ti, kỹ ā tóg ki hā tó tī, kỹ ā tóg ki hā ag vóg kónān tī gé,” he tóg mū, ũn vī mū ēn ti.

⁸ Kỹ Topē tỹ jēnē jafā ũ tóg ā pēnky ki nī ēn kujēg mū gé. Pēnky tỹ 4 (ke) vē sir. Rā ki tóg ā tũ kujēg mū. Kỹ rā tóg vēnh kar kri hupūn jagy han mū, kỹ ag jagtar mū.

⁹ Kỹ ag tóg kugpūr mū sir, vēnh kar, rỹ jagy tỹ. Kỹ ag tóg Topē to vī kónān mū sir, ti tỹ ag vóg kónān tugrīn. Ge ra ag tóg ājag jykre tovānh sór tũ nỹtī, Topē mỹ ag tóg vēnh vin sór tũ nỹtī.

¹⁰ Kỹ Topē tỹ jēnē jafā ũ tóg ā tũ kujēg mū gé. Pēnky tỹ 5 (ke) vē sir. Mīg ēn nīgia kri tóg ā tũ kujēg mū. Kỹ tóg kuty nỹ, mīg ēn krēm ke kar ag mỹ. Kỹ tóg

věnh kar mý e távī tí. Kaga jagy han ag tóg mũ, ag fugfóm to. Ājag kaga jagy tugrīn ag tóg ājag nūnē kyprāg mũ.

¹¹ Ký ag tóg Topē tý kanhkā tá nī ěn mý vī kónān mũ, ag kaga to, ag tý ti jagy vég mũ kar to. Ge ra ag tóg ājag jykre kórég tovānh sór tū nýtī.

¹² Ký Topē tý jēnē jafā ũ tóg ā tū kujēg mũ gé. Pénky tý 6 (ke) vē sir. Goj tý Eufrates ki tóg ā tū kujēg mũ. Ký tóg tóg kān mũ, goj tý Eufrates ti. Hā ký pā'i tý rā jur ja tá kāmũ ěn ag tóg kāmũ mũ ha, ký goj tóg ja ěn vỹ tý ag japry nỹ ha, ag jamīn.

¹³ Ký sóg věnh kuprīg tāgtũ vég mũ, hā ra tóg tý pépo ve nýtī, věnh kuprīg ag. Ũ tóg mīg fēr ěn jēnkā tá kākutē mũ, ũ tóg goj kātá mīg ěn jēnkā tá kākutē mũ, ũ tóg ón ký Topē ví tó tí ěn jēnkā tá kākutē mũ gé.

¹⁴ Japo ag vē, věnh kuprīg tý tý pépo nýtī ve ěn ag, hā ra ag tóg ěg tý nēn han vānh hyn han mũ. Ký ag tóg ěprā ke to pā'i kar ag mré vēmén mũ gé, ag tý věnh gēnh ke to věnh mān jé, Topē tý ag mý kurā nív ěn ki. Topē hā ne tý ũn mág nī'.

¹⁵ “Hā vé, ājag tý nēn ũ péju(g) tí ěn kātīg ri ke ti nīnh mũ, inh kātīg mān ke ti. Ājag nūgnūr tū nýtīn ký tóg há tí, ājag kur kynkar ký nýtīn ký tóg há tí. Ký mý sér nýtīmnī. Ký ājag tóg kator nýtīnh ke tū nī. Mý'āg'āg ke tū ājag nýtī, ũ ag tý ājag vég mũ ra,” he tóg, ěg Senhor ti, ěg mý.

¹⁶ Japo tag ag vỹ pā'i kar tý věnh mān han mũ, ěmā tý Armagedom tá, Hebreu ví ki ěmā ěn jyyj vē.

¹⁷ Ký Topē tý jēnē jafā ũ tóg ā tū kujēg mũ gé. Pénky tý 7 (ke) hā vē. Kanhkā krēm tóg ā tū kujēg mũ. Ký nīgja sīnvī ěn tá, Topē jo ěn kākā nīgja ěn tá věnh ví tóg mē há tí, ký tóg: “nēn kar tóg kar kān ký nỹ ha,” he mũ, věnh ví ti.

¹⁸ Ký ta tóg kómóm ke mũ, týrýr he tóg mũ gé, ký ga vỹ ragra ke jagy han mũ gé. Ga tý ragra ke tý ge ve ja tū ěg tóg nýtī. ěg tý ga mī mũn kā tóg ragra ke tý ge han ja tū nī.

¹⁹ Cidade mág ěn tóg věnh kápóv ký nỹ ha, věnh kápóv tāgtũ tý. Ký ga kar mī cidade tóg kókén ký nýtī nī. Topē pí(jé) cidade tý Babilônia kā jatu ja nīgťī'. Cidade ěn ki ke ag to tóg jū távī han mũ, Topē ti, ag to tóg fe gýv han mũ. Hā ký tóg ag vóg kónān jagy han mũ, ký tóg ěg tý vinho kron ri ke nī.

²⁰ Ký goj vāso kar tóg tū nýtī ha ke gé, pānónh kar tóg tū nýtī gé.

²¹ Ký nāfy tóg vār mũ gé. Éhé távī ti nī, nāfy ěn ti, ũn pir tóg quilo tý hēn ri ke nī, kukryr tý nāfy ěn. ěprā tóg vār mũ. Ký ěprā ke ag tóg Topē mý vī kónān mũ gé sir, nāfy tag to, ti jagy távī nīn ký.

17

Ũn týtá kórég fi

¹ Ký Topē tý jēnē jafā ũ tóg inh ki jun mũ, ũ tý pénky mān mũ ja ěn ag kā ũ. Ký tóg inh mý: “kunīg,” he mũ. “Nhỹ ā mý cidade mág ti ven, cidade tý goj tý hēn ri ke tá nỹ ěn ti. Cidade ěn ki ke ag vỹ ũn mén (ka)mē fi ri ke nýtī, ký Topē vỹ ag vóg kónān ke mũ, ũn mén (ka)mē fi ri ke ěn ag.

² Pā'i kar vỹ fi mré nỹ ja nīgťī, ũn mén (ka)mē ěn fi mré. ěprā ke kar mý tóg sér tí, fi jykre ti, ký tóg ag tý kronkron ký kągter ri ke nī, ag tý ũn mén (ka)mē ěn fi mré nỹ ti,” he tóg inh mý, Topē tý jēnē jafā ti.

³ Ký Topē kuprīg tóg inh krīn mũ, ký sóg nēn nē ve ký ga kórég ra tí mũ. Topē tý jēnē jafā ěn vỹ inh pére tí mũ. Tá ũn týtá fi tóg nī nī. Fi mēg tý mīg kri fi tóg nī nī, hā ra tóg kusüg jē, fi mēg ti. Vēnh jygi tóg fi mēg kri ránrán ký nýtī, ký

tóg vĕnh kri tŷ rŭm ke kŷ jĕ, vĕnh jygyj rágrá tŷ. Vĕnh jygyj ěn tóg Topĕ to vĭ kónān kŷ nŷtĭ. Fi mĕg vŷ ā pir ra krĭ tŷ 7 (ke) nĭ, nĭka tŷ 10 (ke) ti nĭ gé.

⁴ Ūn tŷtá ěn fi vŷ kur kusŭg tu kŷ nĭ nĭ, kur kósóg pĕ. Ouro tu fi tóg nĭ gé, pó sĭnvĭ, pérola. Ouro tŷ copo mĕn kŷ fi tóg nĭ nĭ. Hā ra tóg nĕn ũ kórĕg kar tŷ fór jĕ, nĕn ũ kavĕj kar tŷ, copo ti. Fi tŷ vĕnh jykre pāno han mŭ to ken hā vĕ.

⁵ Fi jiji vŷ fi kakā ki rán kŷ nĭ, ũ tóg ā vĭ ki fi jygy tag mĕ ja tŷ nĭ ver. Hā ra tóg: “Babilônia hā vĕ,” he mŭ, fi jiji ti. “Ūn mág vŷ tŷ inh nĭ,” he tóg. “Ūn mĕn (ka)mĕ kar fag mŷnh vŷ tŷ inh nĭ, ũ tŷ nĕn ũ kavĕj kar han tĭ ag mŷnh vŷ tŷ inh nĭ, ěprā, ag tŷ inh jykre han kŷ,” he tóg mŭ, fi jygy ti.

⁶ Hā ra fi tóg kron kŷ ter nĭ, fi tŷ ũ tŷ Topĕ ki ge kŷ nŷtĭ ag kyvĕnh kron kŷ. Ū tŷ hĕn ri ke ag kágtĕn ja ag tóg nĭgtĭ, Jesus tugrĭn, ag tŷ Jesus tovānh sór tŷ tugrĭn, hā ra fi tóg ag kyvĕnh kron kĕn ja nĭ.

Inh mŷ tóg e tĭ, sŷ fi ve kŷ.

⁷ Kŷ Topĕ tŷ jĕnĕ jafá tóg inh mŷ: “mŷ ā mŷ e?” he mŭ. “Nhŷ ā mŷ fi kāmĕn, fi mĕg tŷ mĭg ti ke gé, fi mĕg krĭ tŷ 7 (ke) ěn, fi mĕg nĭka tŷ 10 (ke) ěn, fi tŷ kri nĭ jafá ěn ti,” he tóg, Topĕ tŷ jĕnĕ jafá ti.

⁸ “Fi mĕg tag vŷ vāsŷ jĕ ja nĭgtĭ. Ūri tóg ki tŷ nĭ, hā ra tóg kĕnhmar nŭgme tá kĕkutĕnh ke mŭ, Topĕ tŷ ti kókĕn pĕ han jĕ. Kŷ tóg ěprā ke ag mŷ e tĭnh mŭ, ag tŷ fi mĕg tag venh ken kŷ, ũn jygyj tŷ Topĕ livro ki rán kŷ nŷtĭ tŷ ag mŷ. Topĕ tŷ nĕn (ŭ) kar han to hā tóg ag rán ja tŷ nĭ, kŷ ag tóg rĭnrĭr ke tŷ nŷtĭ. ěn ag mŷ tóg e tĭnh mŭ, ag tŷ fi mĕg tŷ mĭg ven kŷ. Vāsŷ tóg nĭ ja nĭgtĭ, kŷ tóg ver ki tŷ nĭ, hā ra tóg keĵĕn kĕtĭg mĕn ke mŭ ha.

⁹ Topĕ tŷ ũn kanhrĕn mŭ ěn ag hā vŷ fi mĕg to jykrĕn ke mŭ. Ti krĭ tŷ 7 (ke) vŷ tŷ pānónh tŷ 7 (ke) nŷtĭ. Pānónh ěn kri fi tóg nĭ nĭ, ũn tŷtá kórĕg ěn fi. Pā'i tŷ 7 (ke) to ke vĕ gé, hā ra, ti krĭ tŷ 7 (ke) ěn ti.

¹⁰ Pā'i tŷ 5 (ke) vŷ hur tŷg, ũn pir vŷ ŭri nĭ nĭ, ũn pir ũ vŷ kar kŷ kĕtĭg ke mŭ gé. Ti kĕtĭg ken kŷ tóg nĭg sĭ pĕ han ke mŭ, ũ tŷ ěgno ěn ti.

¹¹ Fi mĕg tag, ũ tŷ vāsŷ nĭ ja kar kŷ ŭri kĕ nĭ tŷ ěn vŷ tŷ pā'i ũ nĭ gé. Pā'i tŷ 8 he mŭ vŷ tŷ ti nĭ. Pā'i tŷ 7 (ke) ěn mrĕ ke vŷ tŷ ti nĭ gé. Topĕ vŷ ti tŷ tŷ' hĕnh ke mŭ gé.

¹² Ti nĭka tŷ 10 (ke) vŷ tŷ pā'i tŷ 10 (ke) nŷtĭ gé. ěn ag vŷ ver kāmŭ tŷ nŷtĭ. Fi mĕg mrĕ ag tóg tŷ pā'i nŷtĭnh ke mŭ, hā ra ag tóg nĭg sĭ pĕ han ke mŭ gé.

¹³ Jagnĕ mrĕ ag tóg vĕnh jykre pir han ke mŭ, pā'i tag ag, fi mĕg ěn mrĕ. Fi mĕg mŷ ag tóg vĕnh vin ke mŭ.

¹⁴ Cordeiro ěn kato ag tóg vāsānsān ke mŭ. Hā ra cordeiro tóg ag tŷ hĕn ri kenh ke mŭ, ti mrĕ ke ag mrĕ, ũ tŷ ti tovānh ja tŷ ag mrĕ, ũn kuprĕg kŷ nŷtĭ ag mrĕ. Kŷ cordeiro ěn vŷ tŷ pā'i kar kri ke jĕ. Pā'i mág ag kar kri tŷ pā'i ti jĕ mŷr,” he tóg inh mŷ, Topĕ tŷ jĕnĕ jafá ti.

¹⁵ Kŷ tóg inh mŷ: “goj ve ja ā nĭ gé,” he mŭ. “Goj ěn tá fi tóg nĭ, ũn tŷtá kórĕg ěn fi. Povo kar to ken hā vĕ, hā vŷ: goj, he mŭ, ěprā ke kar to ken hā vĕ, nação kar to ken hā vĕ, vyrmŷ vĭ nŷtĭ ag kar to ken hā vĕ gé, hā vŷ: goj, he mŭ,” he tóg.

¹⁶ “Kŷ fi mĕg vŷ ti nĭka tŷ 10 (ke) ěn mrĕ (tóg) fi to kórĕg tāvĭ nŷtĭnh ke mŭ. Fi tŷ kunŭnh kĕn jĕ ag tóg ke mŭ, fi kur mrĕ hā, kŷ fi tóg kator nĭnh ke mŭ, ũn kórĕg ěn fi. Fi nĭ ko jĕ ag tóg ke mŭ gé, kŷ ag tóg fi pŭn ke mŭ gé.

¹⁷ Ag tŷ ki kagtĭg ra Topĕ tóg ag krĭn tĭ, ag vatānh tá, kŷ ag tóg Topĕ tŷ ag mŷ fi to vĕnh jykre nĭv ěn hā han tĭ. Topĕ tŷ ag krĭn kŷ ag tóg jagnĕ mrĕ vĕnh jykre pir hā han tĭ, kŷ ag tóg fi mĕg mŷ vĕnh vin tĭ gé, pā'i tŷ 10 (ke) ěn ag. Gen kŷ

ag tóg nén kar kánkân ke mû ên pétêm ke mû, Topê tÿ vâsÿ tó ja ên kar ti,” he tóg, Topê tÿ jênê jafâ ti.

¹⁸ “Kÿ ùn tÿtá kórég ên fi, ã tÿ ùn vég mû ên fi vÿ tÿ cidade mág ên nĭ. Êprâ pâ'i kri ke kar fi nĭ,” he tóg inh mÿ, Topê tÿ jênê jafâ ên ti.

18

Babilônia tÿ tû' he

¹ Kar kÿ sóg Topê tÿ jênê jafâ ù vég mû gé. Kanhkâ tá tóg kâtére mû. Tar pê tóg jê, jêngrê tóg jê gé, kÿ ti jêngrê tóg kurâ han mû, êprâ, Topê tÿ jênê jafâ ên ti.

² Ên vÿ prêr mû. “!..Kókén kÿ ti nÿ ha..!” he tóg mû, prêr kÿ. “!..Babilônia vÿ kókén kÿ nÿ, cidade mág ên ti..!” he tóg. “!..Japo ag, vênh jagrê kórég ag vÿ tá êmâ nÿtĭ ha..! Jêsi kavêj kar, sêsi kórég kar vÿ tá nÿtĭ ha, cidade jy ró ên kâmĭ..!”

³ Êprâ ke kar vÿ cidade ên jykre han ja nĭgte..! Kÿ tóg ag tÿ ù mré nÿ kónân ên ri ke ne..! Vinho kron mág ri ke ti ne..! cidade ên jykre ti..! Êprâ pâ'i ag vÿ tá vênh jykre han ja nĭgte..! Kÿ tóg ùn tÿtá kórég fi mré nÿ ri ke nĭ, ag jykre kórég ti..! Nén ù vender he tĭ ag vÿ cidade ên tigrĭn rico nÿtĭ ja nĭgte..! tá ke ag tÿ rico tâvĭ ja nÿtĭn ká..! Hã ra tóg kókén kÿ nÿ ha..!” he tóg, prêr kÿ, Topê tÿ jênê jafâ ti.

⁴ Kÿ sóg kanhkâ tá vênh vĭ ù mēg mû gé, ù tÿ Topê ki ge kÿ nÿtĭ ag mÿ tóg: “mû jê ha,” he mû, ù tÿ kanhkâ tá vĭ mû ên ti. “Cidade tá kâpamĭ, ke tû nĭ mû ra âjag tóg ag mré Topê vĭ mranh ke mû, kÿ Topê tóg ag mré âjag vóg kónân ke mû gé, ti tÿ cidade kókén ken kÿ,” he tóg, ù tÿ kanhkâ tá vĭ mû ti, ù tÿ Topê ki ge kÿ nÿtĭ ag mÿ. Cidade ên kókén ke to hã tóg ag mÿ tó mû.

⁵ “Topê vÿ ag jykre pâno ve kân, kÿ tóg kã jatu tû nĭ. Ag tÿ Topê vĭ mranh vÿ e tâvĭ nÿtĭ, kÿ ti pânĭ tóg kanhkâ pétêm mû, ag tÿ Topê vĭ mranh pânĭ ti.

⁶ Ag tÿ âjag mÿ nén han ja ên ri ke han nĭ, ag mÿ,” he tóg, ù tÿ Topê ki ge kÿ nÿtĭ ag mÿ. “Ag tÿ âjag mÿ ti kórég pir han kÿ ag mÿ ti kórég régre han nĭ, vênh kato. Âjag mÿ ag tóg ti kron jafâ kórég ven ja nĭ. Ag mÿ ti kron jafâ kórég ven régré nĭ.

⁷ Sĭnvĭ ja ag nÿtĭ, tÿ nén ù mág ja ag nÿtĭ. Ag jagtar han nĭ, ag sĭnvĭ tag to. Ag jagtar han nĭ, ag tÿ nén ù mág tag to, ù tÿ nén ù mág tû ag jagtar han nĭ gé, ag mré. “Ûn mág vÿ tÿ êg nÿtĭ,” he ag tóg mû. “Û pi(jé) êg jagtar han ke mû,” he ag tóg mû.

⁸ Hã ra ag tóg vâhã venh ke mû, ag jagâgtar ke ti, ag vêsÿrénh ke ti, ag vânhprâg ti, kÿ tóg ag tÿ vênh kaga jagy han ri ke nĭ sir. Kurâ pir ki ag tóg tag ve kân ke mû, kÿ ag tóg pĭ ki kâgter ke mû. Topê hã vÿ ag vóg kónân ke mû, pâ'i mág ti. Tar pê ti jê nĭ mÿr, Topê ti,” he tóg, ù tÿ kanhkâ tá vĭ mû ti, ù tÿ Topê ki ge kÿ nÿtĭ ag mÿ.

⁹ Kÿ êprâ pâ'i ag vÿ venh ke mû, cidade nĭja ti. Cidade ki ke ag mré tóg ag mÿ sér nĭ ja nĭgtĭ. Ag mré ag tóg nén (ù) kar vigve ja nĭgtĭ, kÿ tóg ag tÿ fag mré nÿ ri ke nĭ ja nĭ, ag tû mág ên ti. Cidade pÿr nĭja ve jê ag tóg ke mû ha, kÿ ag tóg fÿnh mû, jagtar ke mû.

¹⁰ Kuvar há tá ag tóg nÿtĭnh ke mû, ag kanê jur kÿ, ag tÿ cidade ki ke ag vânhprâg jagy mē kÿ. Kÿ ag tóg jagtar kÿ: “jagy tâvĭ tóg tĭ,” henh ke mû sir, pâ'i ag. “Êhé tâvĭn ja ti nĭ, cidade tÿ Babilônia tag ti, tar pê ja ti nĭ. Hã ra ag tóg hora pir ki ti kókén kân,” he jê ag tóg ke mû, pâ'i ag.

11 Kŷ nĕn (ũ) vender he nŷtĭgtĭ ag vŷ jagtar kŷ fŷnh ke mũ gé, cidade tũ to. Tá ag tóg nĕn (ũ) tŷ hĕn ri ke ve ja nĭgtĭ,

12 ouro ti, prata ti, pó sĭnvĭ ti, pérola ti, pyrfé tŷ kur ti, kur tŷ seda ti, kur kusũg ti, kur kusũg sá ti, ka kaja e ti, elefante jã tŷ nĕn han mũ ti, ka sĭnvĭ tŷ nĕn han mũ ti, ferro tŷ nĕn han mũ ti, ferro kusũg tŷ nĕn han mũ ti, pó tŷ mármore tŷ nĕn han mũ ti,

13 canela ti, vĕjĕn ger há ti, ka jĕnjo pũn kŷ ger há tŷ incenso ti, ka jĕnjo pũn kŷ ger há tŷ mirra ti, vĕnh mĭ tĭn jafã ti, vinho ti, azeite ti, farinha ti, trigo ti, monh ti, carneiro ti, cavalo ti, carroça ti, ũn gré ag, ũn tŷtã fag mré hã. Tag kar tŷ ag tóg negocio hyn han tĭ ja nĭgtĭ, vender he nŷtĭgtĭ ag, hã ra tóg tũ tĭ ha.

14 Kŷ nĕn ũ vender he nŷtĭgtĭ ag tóg jagtar kŷ tag tónh ke mũ, ha mĕ. “Nĕn kar ve ja ĕg tóg nĭgtĭ, cidade tá, kŷ tóg ĕg mŷ sér nĭ ja nĭgtĭ. Riqueza ĕn tóg tũ' he kãn. Ũ tóg nĕn kar ĕn to ĕn mãn ke tũ nĭ ha. Ve mãn ke tũ ĕg tóg nĭ ha, nĕn (ũ) kar ĕn ti,” he jĕ ag tóg ke mũ, nĕn (ũ) vender he nŷtĭgtĭ ag.

15 Kŷ ag tóg kuvar há tá nŷtĭnh mũ. Cidade ĕn tá negocio han to ag tóg vĕnh han ja nĭgtĭ, hã kŷ tóg ag mŷ e tĭ. Tãtã nŷtĭn kŷ ag tóg jũrũn ke mũ, ag tŷ cidade tá ke ag jagãgtar ve kŷ. Fŷ jĕ ag tóg ke mũ, vĕšŷrĕnh jĕ ag tóg ke mũ.

16 Kŷ ag tóg: “jagy tãvĭ tóg nĭ,” hĕnh ke mũ. “Hã tãvĭ ja ag nŷtĭ, cidade tag ki ke ja ag. Kur sĭnvĭ rĭnh ja ag tóg nŷtĭ, pyrfé tŷ kur, kur kusũg, kur kusũg sã. Ouro rĭnh ja ag tóg nŷtĭ, pó sĭnvĭ, pérola.

17 Hora pir ki ag tóg tũ' he kãn ja nĭ, ag tŷ nĕn (ũ) kar mré hã,” he jĕ ag tóg ke mũ gé, nĕn ũ vender he nŷtĭgtĭ ag.

18 Kŷ barco to pã'i ag vŷ nŷtĭnh ke mũ gé, goj kri mũ mũ kar ag, barco ki rĭr tĭ kar ag, ũ tŷ goj kri rãnrãj mũ kar ag ke gé. Tãtã nŷtĭ kŷ ag tóg cidade nĭja ĕn ve kŷ (ag tóg) prĕnprĕr mũ sir. “Cidade ĕn ri ke ve mãn ke tũ ĕg tóg nĭ ha,” he jĕ ag tóg ke mũ.

19 Kŷ ag tóg ga funfur tŷ vĕnh kri vãm ke mũ sir, ag mŷ e tĭn kŷ. Fŷ jĕ ag tóg ke mũ, vĕšŷrĕnh jĕ ag tóg ke mũ. “Jagy tãvĭ tóg tĭ,” he jĕ ag tóg ke mũ. “Hã tãvĭ ja ag nŷtĭ, cidade tag ki ke ja ag. Vĕnh kar vŷ ag tũ mãn kŷ vĕnh hyn han ja nĭgtĭ, ũ tŷ barco kãmĭ goj kri mũgtĭ ag. Kŷ tóg jagy tãvĭ tĭ. Hora pir ki tóg tũ' he kãn ja nĭ,” he jĕ ag tóg ke mũ gé, goj kri mũgtĭ ag.

20 “Kanhkã tá nŷtĭ kar'. Mŷ sér nŷtĭmnĭ. Topĕ ki ge kŷ nŷtĭ kar', mŷ sér nŷtĭmnĭ. Apóstolo kar', Topĕ vĭ tó tĭ kar', mŷ sér nŷtĭmnĭ. Tũ' he kãn ag huri, cidade ĕn tá ke kar ag. Topĕ vŷ hur ag vóg kónãn, ag tŷ ãjag vóg kónãn ja tugrĭn'.

21 Kŷ Topĕ tŷ jĕnĕ jafã tar ũ tóg pó mág vãg mũ. Kra tŷ pó ri ke ti nĭ, pó mág ĕn ti. Kŷ tóg goj nig ki ti fón mũ, jũ kŷ, kŷ tóg: “isŷ pó fón mũ tag ri ke ti nĭnh mũ, cidade tŷ Babilônia kókĕn ti,” he mũ. “Kókĕn kãn kŷ tóg nĭ. Ũ tóg ti ve mãn ke tũ nĭ ha, cidade ti.

22 Kãki ag tóg harpa kyn mãn ke tũ nŷtĭ ha, tŷnh mãn ke tũ ag nĭ ha, vãn tŷ vãkyr ĕn kyn mãn ke tũ ag nĭ ha, trombeta ti ke gé. Vãkyr mĕ mãn ke tũ ĕg nĭ ha, cidade tŷ Babilônia tá. Ũ tóg ki rãnrãj mãn ke tũ nĭ ha, ũ tóg ki nĭ mãn ke tũ nĭ ha. Ũ tóg ki tynyn mãn ke tũ nĭ gé.

23 Ũ tóg ki lampião grug mãn ke tũ nĭ ha. Ũ tóg ki vĕnh prũg to festa han mãn ke tũ nĭ gé. Há tãvĭ ja ag nŷtĭ, tá nĕn (ũ) kar vender he nŷtĭgtĭ ĕn ag, kŷ vĕnh kar vŷ ag vĭ jĕmĕ ja nĭgtĭ. Povo kar krĭn kónãn ja ag tóg nĭgtĭ, kujã tŷ ĕg mŷ ón tĭ ĕn ri ke han ja ag tóg nĭgtĭ.

24 Topē vī tó tī ag kăgtén ja ag tóg nĭgtī, cidade ên tá ke ag, Topē ki ge kŷ nŷtī ag kăgtén ja ag tóg nĭgtī. Ên hă tá tóg vĕnh ven ja nĭ, ag tŷ ũn kăgtén mŷ kyvĕnh kar tī. Hă kŷ ag tóg ag kar kyvĕnh kajâm kân ke mŷ,” he tóg mŷ, Topē tŷ jĕnĕ jafă tar ên tī.

19

¹ Kŷ sóg kanhkă tá nĕn ũ mĕg mŷ gé sir, hă ra tóg ũ tŷ hĕn ri ke ag jân mĕg nĭ. Jân kŷ ag tóg cidade ên to tag tó mŷ, ha mĕ. “Topē mŷ vĭ há han nĭ. Topē ne ĕg krenkren han ki kanhró nĭ. Ti hă ne tŷ ũn mág nĭ. Ti hă ne tar jĕ’.

² Ti tŷ nĕn han mŷ vŷ kuryj kar nŷ. Ũn tŷtá kórég ên fi vóg kónân tóg huri. Ĕpră ke kar kókĕn ja fi tóg nĭ, fi jykre păno tŷ. Topē vŷ fi vóg kónân, fi tŷ ti rănhrăj han tī ag kăgtén ja nĭn kŷ,” he ag tóg, kanhkă tăn ag, cidade tŷ Babilônia to.

³ Kŷ ag tóg jân măn kŷ tag tó mŷ gé, ha mĕ. “Topē mŷ vĭ há han nĭ. Cidade ên pŭr nĭja vŷ kanhkă ra tâpyr mŷ. Tŭ’ hĕnh ke tŭ ti nĭ, nĭja ên,” he ag tóg mŷ gé, jân kŷ, kanhkă tăn ên ag.

⁴ Kŷ kófa tŷ 24 (ke) ên ag tóg mŷg ke kân mŷ, nĕn nĕ tŷ 4 (ke) ên ag mré hă. Topē mŷ ag tóg: “Topē vŷ tŷ â nĭ,” he mŷ, ũ tŷ nĭgja sĭnvĭ kri nĭ ên mŷ. Kŷ ag tóg: “hă vĕ,” he mŷ gé. “Topē mŷ vĭ há han nĭ,” he ag tóg mŷ, jamă hăr(a).

Cordeiro vĕnh prŭg

⁵ Kŷ nĭgja sĭnvĭ ên tá vĕnh vĭ tóg mĕ há tĭ gé. “Ũ tŷ Topē mŷ rănhrăj tĭ,” he tóg. “Ũ tŷ Topē kamĕg tĭ,” he tóg. “Ũn mág,” he tóg. “Ũn kăsir,” he tóg. “Topē mŷ vĭ há han, âjag kar,” he tóg, vĕnh vĭ ên tī.

⁶ Kŷ sóg ũ tŷ hĕn ri ke ag jân mĕg mŷ gé. Tŷ tóg sa krog vĭ mĕ tĭ, tŷ tóg ta tŷ tŷrŷr he mĕ tĭ gé, ag jân tī. Jân kŷ ag tóg tag tó mŷ, ha mĕ. “Topē mŷ vĭ há han nĭ,” he ag tóg. “Ũ tŷ nĕn ũ kar han ki kanhró nĭ ên tóg tŷ pă’i mág pĕ jĕ, ĕg pă’i mág tī, Topē tī.

⁷ Kŷ tóg ĕg mŷ sér tâvĭ tĭ. Vĭ sér han jĕ ĕg tóg ke mŷ ha. “Tŷ tī ũn mág pĕ jĕ,” he jĕ ĕg tóg ke mŷ gé. “Cordeiro tŷ vâhă prŭg ke nĕ ha. Ti prŭnh ke fi vŷ vĕnh kân huri.

⁸ Ā kur kupri ên tu kŷ fi tóg jĕ nĭ, fi kur jĕngrĕ ên,” he ag tóg, ũn e ag, jânjân kŷ. Fi jykre tâg to ken hă vĕ, hă vŷ: fi kur kupri jĕngrĕ, he mŷ, fi tŷ Topē jykre há ên han kŷ nĭ hă vĕ. Ũ tŷ Topē ki ge kŷ nŷtĭ kar ag to ken hă vĕ, hă vŷ: cordeiro prŭnh ke, he mŷ.

⁹ Kŷ Topē tŷ jĕnĕ jafă tóg inh mŷ: “inh vĭ tag rán nĭ,” he mŷ. “Ũ tŷ hĕn ri ke ag tóg cordeiro prŭg tŷ festa konh ke mŷ. Topē vŷ ũ tŷ ti festa ko mŷ ag kar ve há han mŷ,” he tóg. Kŷ tóg: “Topē tŷ tón hă vĕ,” he mŷ gé. “Hă ra Topē tóg ón vânh nĭgtĭ,” he tóg, Topē tŷ jĕnĕ jafă tī.

¹⁰ Kŷ sóg ti krĕm mŷg ke mŷ, sŷ tī mŷ: “Topē vŷ tŷ â nĭ,” he jĕ. Hă ra tóg inh mŷ: “ke tŷg ra,” he mŷ, Topē tŷ jĕnĕ jafă ên tī. “Topē mŷ rănhrăj han jafă vŷ tŷ inh nĭ, â ri ke, â kanhkă ag ri ke, ũ tŷ Jesus tŷ ki hă tó mŷ ki króm mŷ ên ag kar ri ke sóg nĭ, Topē rănhrăj han kŷ,” he tóg. “Topē hă mŷ: Topē vŷ tŷ â nĭ, hemnĭ,” he tóg inh mŷ, Topē tŷ jĕnĕ jafă ên tī.

Topē vĭ tó tĭ ag vŷ Jesus tŷ ki hă tó mŷ ên hă kămén tĭ.

Ũ tŷ cavalo kupri kri nĭ

¹¹ Kŷ sóg kanhkă róm kŷ nŷ vég mŷ. Cavalo kupri vŷ tá jĕ nĭ. Ũ tŷ tī kri nĭ jŷjyn hă vŷ: “ũn ón vânh,” he mŷ. “Ũ tŷ nĕn (ŭ) há to krónh ke vânh,” he tóg mŷ

gé, ti jiji ti. Ti hã vỹ jykre kurjy nĩ, ù tỹ cavalo kupri kri nĩ ên ti, kỹ tóg ki hã tó tĩ gé. Nén ù há hã to tóg vãsân ti gé.

¹² Ti kanê vỹ tỹ pĩ gru ve nĩ. Ti krĩ tógfĩ vỹ e nỹtĩ. Ti kri ti jyjy tóg rán kỹ nĩ, há ra ù pi(jé) ti jiji ki kanhró nỹtĩ'. Ti hã vỹ ã pir mỹ ã jyjy ki kanhró nĩ'.

¹³ Ti kur vỹ kyvénh nĩ. Ti to ag tóg: "Topê vĩ," he ti.

¹⁴ Kanhkã tá soldado ag tóg ti nón kãmũ mü. Cavallo kupri kri ag tóg kãmũ mü, kanhkã tân ag, ti soldado ag. Kur kupri rinh kỹ ag tóg kãmũ mü.

¹⁵ Û tỹ ag jo tĩ mü ên jênkã tá rógro jã régre tóg kãkutê mü. Rógro tag tỹ tóg povo kar ag tỹ hên ri kenh ke mü. Tỹ ag kri jê kỹ tóg vênh jykre tar han ke mü, ag to. Uva jêgmĩ jafã tá tóg jêgmĩnh ke mü, uva ti, hã vỹ: Topê tỹ vênh kar to jũ jagy han mü, he mü, hã vỹ: uva jêgmĩ, he mü.

¹⁶ Ti kur ki tag tóg rán kỹ nĩ, ha mẽ. "Pã'i kar ag kri pã'i," he tóg, vênh rán ki. "Ûn mág kar ag kri ke," he tóg mü gé, vênh rán ki. Ti kre ki tóg rán kỹ nĩ gé.

¹⁷ Kỹ sóg Topê tỹ jênê jafã ù vég mü gé. Rã kri tóg jê nĩ. Kỹ tóg sêsi kar jé prêr mü, jêsi tỹ kanhkã krêm têgtê tĩ ag kar. Jamã hár(a) tóg ag mỹ: "!.kuneg..!" he mü. "!.Vênh măn kãmũ jeg..!" he tóg, "!.Topê tỹ festa konh kãmũ jeg..!"

¹⁸ Pã'i kãgter konh kãmũ jeg..! Soldado to pã'i ag, soldado ag, cavalo ag, ù tỹ cavalo kri mügtĩ ag, ù tỹ tỹ camarada nỹtĩ ag, ag patrão ag, ùn mág ag, ùn kãsir ag, êprã ke kar ag kãgter mü nĩ konh kãmũ jeg..!" he tóg, Topê tỹ jênê jafã ti, sêsi ag kar jé prêr kỹ.

¹⁹ Kỹ sóg goj kãtã mĩg ên ve măn mü gé, êprã pã'i kar ag ke gé, ag soldado ag mré hã. Vênh măn kỹ ag tóg nỹtĩ, ag tỹ ù tỹ cavalo kupri kri nĩ ên kato vãsãnsân jé, ag tỹ ti krêm ke ag kato vãsãnsân mág han jé.

²⁰ Kỹ ag tóg mĩg ên ség mü, ù tỹ ón kỹ Topê vĩ tó tĩ ên ag mré hã, ù tỹ mĩg rĩnve nén ve vánh tỹ hên ri ke hyn han ja ên ti. Ti tỹ milagre hyn han tugrĩn ù tỹ hên ri ke ag tóg ti vĩ kri nĩm ja nĩgtĩ. Ti tỹ ag krĩn kónãn hã vê, ù tỹ ti rá tỹ ránrán kỹ nỹtĩ kar ag, ù tỹ ti kãggrã to: "Topê vê," he mü kar ag. Kỹ ù tỹ mĩg ên ség mü ag tóg pĩ gru fir ki ti fón mü, pĩ mág pê ki, ù tỹ ón kỹ Topê vĩ tó tĩ ên mré hã. Ag rĩnrĩr hã ra ag tóg pĩ grug fir ên ki ag vãm mü, ag sigse kỹ. Pó tỹ enxofre pũr nĩja ên ki ag tóg vãm mü, vãn pũr nĩja ri ke ên ki.

²¹ Ag soldado ag kãgtén ag tóg mü gé sir, rógro tỹ, rógro tỹ ù tỹ cavalo kupri kri nĩ ên jênkã tá kãkutê mü ên ti. Kỹ jêsi kar ag tóg vênh fãn mü sir, ùn kãgter mü ag nĩ kon kỹ.

20

Satanás tỹ prỹg tỹ mil (ke) ki se kỹ jê

¹ Kỹ sóg Topê tỹ jênê jafã ù vég mü gé sir. Kanhkã tá tóg kãtêre mü, Topê tỹ jênê jafã ti. Nũgme jãnkã nífénh jafã vyn kỹ tóg kãtêre mü, ti chave ti. Ferro tỹ corrente vãg tóg mü gé.

² Ên vỹ mĩg fêr ên ség mü, hã vỹ: pỹn ve tỹ ùn ve fag krĩn kónãn mü, he mü, hã vỹ: Japo, he mü, hã vỹ: Satanás, he mü, mĩg fêr ên ti. Ên se kỹ tóg ferro tỹ ti mrĩnh mü sir. Kỹ tóg se kỹ jê nĩ, prỹg tỹ mil (ke) ki.

³ Nũgme ki tóg ti fón mü sir, mĩg fêr ti tỹ, Topê tỹ jênê jafã ên ti, kỹ tóg nũgme jãnkã nífénh hã han mü sir, chave tỹ. Kỹ mĩg fêr ên tóg povo ag krĩn kónãn măn ke tũ nĩ ha ver, prỹg tỹ mil (ke) ki. Prỹg tỹ mil (ke) tag tỹ tũ' hen kỹ ag tóg ver ti kavãn sĩ han măn ke mü, mĩg fêr ti.

⁴ Kỹ sóg nĩgja sĩnvĩ tỹ hên ri ke vigvég mü. Û tỹ kri nĩgnĩg kỹ nỹtĩ ag vỹ tỹ pã'i nỹtĩ, ag tỹ vênh kar jykre tugnỹm ke to pã'i. Kỹ sóg êprã ke kuprĩg tỹ hên

ri ke ag vigvég mū gé, ag tǵ ũn kǵgtén ja ěn ag kuprĭg. Ag tǵ vĕnh kar mǵ Jesus kāmén ja tugrĭn ag tóg ag kǵgtén ja nĭ, ag tǵ Topĕ vĭ tó tugrĭn. Mĭg ěn to ag tóg: “Topĕ vĕ,” he ja tǵ nĭgtĭ, ti kǵgrá to ke gé. Mĭg rá ěn tǵ ag tóg vĕnh rán ja tǵ nĭ gé, ag kaká ki, ag nĭgĕ pānĭ ki ke gé. Ēn ag vǵ tǵ Cristo mrĕ pā'i nǵtĭnh ha, prǵg tǵ mil (ke) ěn ki.

⁵ Vĕser ũ ag vǵ ver rĭnrĭr mǎn ke tǵ nĭ. Prǵg tǵ mil (ke) ěn tǵ tǵ' hen kǵ ag tóg kejĕn rĭnrĭr mǎn kǎn ke mǵ. Ũ tǵ Cristo mrĕ tǵ pā'i nǵtĭ tag ag vǵ rĭnrĭr vĕn ke mǵ.

⁶ Ũ tǵ rĭnrĭr vĕn mǵ mǵ tóg vĭ há han ke mǵ, Topĕ ti. Topĕ tǵ vǵ tǵ ag nǵtĭ. Kǵgter mǎn ke tǵ ag tóg nǵtĭ ha. Topĕ tǵ ki rĭr jĕ ag tóg ke mǵ, Cristo tǵ ki ke gé. Prǵg tǵ mil (ke) ki ag tóg tǵ pā'i nǵtĭnh mǵ, Cristo mrĕ hǎ.

Satanás kutĕ

⁷ Kejĕn prǵg tǵ mil (ke) ěn tóg tǵ' he mǵ. Kǵ ag tóg Satanás ěn kavǎn sĭ han mǎn ke mǵ.

⁸ Kǵ tóg tǵ mǵ, povo tǵ Gogue ag mrĕ Magogue ag krĭn kónǎn jĕ, tǎtá, ga fyr tá, Satanás ti. E tǎvĭ ag nǵtĭ, goj fyr tá rǵnhrǵj ri ke ěn ag, goj kafá tǵ fyr tá rĭnrĭj ri ke ěn ag. Ag vĕnh mǎn kǎn han jĕ tóg ke mǵ, Satanás ti.

⁹ Kǵ ag tóg tá kǎmǵ mǵ, ũn e tǎvĭ ěn ag. Ũ tǵ Topĕ ki ge kǵ nǵtĭ ag kato ag tóg kǎmǵ mǵ, cidade ěn kato, Topĕ tǵ cidade to há nĭ ěn kato. Ag tǵ ag tǵ tǵ' he kǎn sór vĕ. Hǎ ra pĭ tóg kǎnhkǎ tá kǎtĕre mǵ, kǵ tóg ag kǵgtén mǵ. Ũ tǵ Topĕ ki ge kǵ nǵtĭ ag tǵ tǵ' he sór mǵ ěn ag kǵgtén tóg mǵ, pĭ ti.

¹⁰ Japo ěn, ũ tǵ ag mǵ ón mǵ ěn fón pĕ han ag tóg mǵ, pĭ grug fir ěn ki, pĭ mág pĕ ěn ki, pó tǵ enxofre pŭr nĭja ěn kǎki, vǎn pŭr nĭja ri ke ěn kǎki. Goj kǎtá mĭg ěn vǵ tá nĭ ha, pĭ grug fir ěn kǎkǎ, kar kǵ ón kǵ Topĕ vĭ tó tĭ ěn ti ke gé. Pĭ grug fir ěn kǎki ag tóg nǵtĭ, tá kǎpa mǎn ke tǵ pĕ ag tóg nǵtĭ ha. Tá ag jagtar tǎvĭ nǵtĭ ha.

Vĕnh kar jykre tugnǵm ke kurǎ

¹¹ Kǵ sóg nĭgja mág pĕ vég mǵ gé, nĭgja kupri. Ũ tóg kri nĭ nĭ. Ti rĭnve ga tóg tǵ' he mǵ vǎhǎ, kǎnhkǎ ti ke gé. Vĕnh ven mǎn tǵ tóg nǵtĭ ha, kǎnhkǎ mrĕ ga ti.

¹² Kǵ sóg vĕser kar vigvég mǵ, ũn mág ag, ũn kǎsir ag ke gé. Nĭgja kupri ěn jo ag tóg nǵtĭ. Kǵ livro vǵ tá nǵtĭ gé. Livro ěn kygvǎg ag tóg mǵ. Vĕnh kar jykre vǵ livro ěn ki ránrán kǵ nǵtĭ. Kǵ livro ũ vǵ tá nĭ gé, ěn kavǎg ag tóg mǵ gé. Ũ tǵ rĭr krǵj ja tǵ vĕnh ke mǵ ag jygyj vǵ livro ěn ki ránrán kǵ nǵtĭ. Kǵ Topĕ tóg vĕser kar jykre tugnǵm ke mǵ, kǵ tóg ag mǵ ag tǵ nĕn vĕnh ke mǵ ti tónh ke mǵ. Ag tǵ ājag tǵ nĕn han ja kajǎm ke vĕ, ag tǵ ājag jykre tǵ livro ki ránrán kǵ nǵtĭ ěn kajǎm kǎn ke vĕ.

¹³ Ũ tǵ goj ki kǵgter mǵ ag vǵ tá nǵtĭ gé, ũ tǵ vĕser jamǎ tá nǵtĭ ag kar ti. Vĕnh kar vǵ tá nǵtĭ. Ag tǵ nĕn han mǵ kar kajǎm kǎn jĕ ag tóg ke mǵ ha.

¹⁴ Kǵ ũ vǵ ter mǎn ke tǵ nĭ ha. Ēg ter ke tag vǵ hur tǵg. Ũ tǵ pĭ grug fir ěn kǎki vǎr ke tag ag vǵ kǵgter ri ke han ke mǵ, kǵ tóg ag kǵgter pĕ han ri ke nĭ sir, ag tǵg pĕ han tǵ ra.

¹⁵ Kǵ ũn jygyj rán kǵ nǵtĭ tǵ ěn ag vǵ pĭ grug fir ěn kǎki vǎr kǎn ke mǵ, ũn jygyj tǵ Topĕ livro ki ránrán kǵ nǵtĭ tǵ ěn ag.

¹ Kŷ sóg kanhkā tǎg vég mŷ gé, ga tǎg ke gé. Kanhkā ve ěn tóg hur tŷg, ga ve ěn ke gé, goj ti ke gé.

² Kŷ sóg Topě tŷ cidade tag, Jerusalém tǎg tag vég mŷ gé. Kanhkā tá tóg kǎtére mŷ, Topě tá, cidade tǎg tag ti. Cidade sŷnvĭ han ja ag tóg nĭgtĭ, kŷ tóg ag tŷ tá věnh prŷg to festa han ke nĭ ve nĭ. Cidade sŷnvĭ tóg ũn prŷnh ke fi sŷnvĭ ri ke nĭ, fi tŷ ā mén ke ti jǎvǎnh kŷ.

³ Nĭgja kupri ěn tá věnh vĭ tóg mē há tĭ, kŷ tóg: “Topě jamǎn hǎ vē,” he mŷ. “Topě tŷ ěprǎ ke ag mré ěmǎn hǎ vē,” he tóg. “Ag mré tóg nĭ nĭ ha, ti tŷ vŷ tŷ ag nŷtĭnh ke mŷ ha. Topě vŷ ag mré nĭnh mŷ ha, kŷ tóg tŷ ag Topě nĭ sir.

⁴ Ag kaně var tŷ tŷ' he kǎn jé tóg ke mŷ ha. Ũ tóg ter mǎn ke tŷ pě nĭ ha, hǎ kŷ ũ tóg fe kaj nĭ mǎn ke tŷ nĭ gé, jagtar ke tŷm, kaganh ke tŷm. Tŷg ti nĭ ha, věnh jykre si kar ti. Věnh ven mǎn ke tŷ ti nĭ ha, věnh jykre si ti,” he tóg, věnh vĭ ěn ti.

⁵ Kŷ ũ tŷ nĭgja kupri kri nĭ ěn tóg: “nén (ŭ) kar han mǎn jé sóg ke mŷ ha,” he mŷ. Kŷ tóg inh mŷ: “inh vĭ tag rán nĭ,” he mŷ gé. “Sŷ ki hǎ tó vē. Věnh ven kǎn jé tóg ke mŷ, sŷ ā mŷ nén tó mŷ tag ti,” he tóg.

⁶ Kŷ tóg: “hŷ, věnh ven kǎn ti huri,” he mŷ gé. “Ũn ve vŷ tŷ inh nĭ, kŷ sóg tŷ ěgno nĭ gé. Isŷ nén (ŭ) kar han to hǎ sóg nĭ nĭ, kŷ sóg nén (ŭ) kar tŷg mŷ ra nĭnh mŷ gé. Ũ tóg goj kron sór mŷ. ěn mŷ sóg goj ven tĭ, kaja tŷ ra. Isŷ ti mŷ goj ven mŷ ěn vŷ ti ter tŷ han ke mŷ.

⁷ Ũ tŷ isovǎnh tŷ ěn mŷ sóg nĭm ke mŷ, presente tag ti, ha mē: ti Topě vŷ tŷ inh nĭnh mŷ, kŷ tóg tŷ inh kósin nĭnh mŷ gé,” he tóg inh mŷ, ũ tŷ nĭgja kupri kri nĭ ěn ti.

⁸ Hǎ ra ũ ag tóg pĭ grug fir kǎki, pĭ mág pě ěn kǎki vǎr ke mŷ, hǎ vŷ: ũn mŷměg (ka)mě ag, he mŷ, ũ tŷ isovǎnh mŷ ag, he mŷ, ũ tŷ věnh jykre pǎno tŷ věnh kavěnh tĭ ag, he mŷ, ũ tŷ ũ tén tĭ ag, he mŷ, ũ tŷ ā prŷ tŷ fag mré nŷgnŷ mŷ ag, he mŷ, ũ tŷ ā mén tŷ mré nŷgnŷ mŷ fag, he mŷ, kujá ag, he mŷ, curandeiro ag, he mŷ, ũ tŷ věnh kǎggrá jykre mĭ mŷ mŷ ag, he mŷ, ũn ón mŷ ag, he mŷ gé. Pĭ grug fir ěn kǎki tóg ag vǎm kǎn ke mŷ, pó tŷ enxofre pŷr nĭja ěn kǎki, vǎn pŷr nĭja ri ke ěn kǎki. Kŷ tóg ag kǎgtěn pě han ri ke nĭ sir,” he tóg, ũ tŷ nĭgja kupri kri nĭ ěn ti.

Jerusalém tǎg

⁹ Kŷ Topě tŷ jěně jafǎ ũ tóg inh ki jun mŷ, ũ tŷ pěnky kǎkǎ nĭ ěn tŷ ga kri ke ag vŷg kónǎn mŷ ěn ag kǎ ũ. Inh mŷ tóg: “kunĭg,” he mŷ. “Cordeiro prŷnh ke fi venh kǎtĭg,” he tóg inh mŷ.

¹⁰ Kŷ Topě kuprĭg tóg inh krĭn mŷ sir, kŷ sóg nén ně vég mŷ. Topě tŷ jěně jafǎ ěn tóg inh pěre tĭ mŷ, pǎnónh těj (gy) kri. Pǎnónh kri jě kŷ tóg inh mŷ Topě tŷ cidade tǎg ven mŷ sir, cidade tŷ Jerusalém, he mŷ tag ti, ũ tŷ kanhkā tá kǎtére mŷ tag ti, Topě tá.

¹¹ Sŷnvĭ pě tóg nĭ, Topě sŷnvĭ ěn ri ke ti nĭ, kókov tóg nĭ gé, pó tŷ jaspe kókov ri ke. Pó tŷ tonh vŷ tŷ ti nĭ, jaspe tĭ, kŷ tóg pó kókov fin ěvǎj ěn ri ke nĭ.

¹² Cidade jy ró tóg těj gy nŷ, věnh ra hǎ tóg těj gy jě gé. Ró ki jǎnkǎ tŷ 12 (ke) vŷ nŷtĭ. Kŷ Topě tŷ jěgně jafǎ tŷ 12 (ke) ag vŷ ki rĭr nŷtĭ, jǎnkǎ ki. Ki věnh jygyj tóg ránrán kŷ nŷtĭ, jǎnkǎ ki, Israel jóg'jóg ve tŷ 12 (ke) ěn ag jygyj ti.

¹³ Rǎ jur ja kǎtǎ tóg jǎnkǎ tǎgtŷ nĭ. Rǎ pur ja kǎtǎ tóg jǎnkǎ tǎgtŷ ũ nĭ gé, kanhkā tǎpér kǎtǎ tóg jǎnkǎ tǎgtŷ ũ nĭ gé, kanhkā tǎpér ũ kǎtǎ tóg jǎnkǎ tǎgtŷ ũ nĭ gé.

¹⁴ Pó t̄y 12 (ke) kri tóg hyn han k̄y n̄i n̄i, cidade ti. Pó ěn ki vĕnh jygyj tóg ránrán k̄y n̄y t̄i gé, apóstolo t̄y 12 (ke) ěn ag jygyj ti, cordeiro t̄u ěn ag jygyj ti.

¹⁵ K̄y ũ t̄y inh mré v̄i m̄u ěn, Topĕ t̄y jĕnĕ jafā ěn tóg ti kāmun jafā vyn k̄y jĕ n̄i, ti kāmun jafā t̄y ouro ti. K̄y tóg cidade kāmun sór m̄u, cidade jy ró ti, ti jänkā ti ke gé.

¹⁶ Péno t̄y 4 (ke) ti n̄i, cidade ti, k̄y ti tãpér v̄y ti téj ri ke n̄i. K̄y Topĕ t̄y jĕnĕ jafā ěn v̄y kāmun m̄u sir, cidade ti, ti kāmun jafā t̄y. Quilômetro t̄y 2 mil kri 200 (ke) ti n̄i, ti t̄y téj e k̄y n̄y ki, ti tãpér ki ke gé, ti t̄y vĕnh ra jĕn ke gé. Vĕnh ri ke kar ti n̄i, ti kāmur ti.

¹⁷ K̄y tóg cidade jy ró ěn kāmun m̄u gé. Ti tãpér v̄y metro t̄y 64 (ke) n̄i. Metro tag v̄y t̄y ěprā ke ag kāmun jafā n̄i, hā ra Topĕ t̄y jĕnĕ jafā v̄y kāmun m̄u, ěprā ke ag kāmun jafā t̄y.

¹⁸ Ró v̄y pó t̄y tonh t̄y jaspe t̄y han k̄y n̄y. K̄y cidade v̄y ouro t̄y han k̄y n̄i, hā ra tóg f̄in ěváj n̄i, vidro f̄in ěváj ri ke.

¹⁹ Cidade jy ró tóg pó t̄y tonh mág kri han k̄y n̄i. Pó ěn to pó t̄y tonh ũ tóg n̄y t̄i gé, ũn e ag. Pó t̄y tonh mág ũ tóg t̄y jaspe n̄i, k̄y ũ tóg t̄y safira n̄i, k̄y ũ tóg t̄y ágata n̄i, jo ũ tóg t̄y esmeralda n̄i,

²⁰ jo ũ tóg t̄y sardônio n̄i, jo ũ tóg t̄y sárdio n̄i, ũ tóg t̄y crisólito n̄i, ũ tóg t̄y berilo n̄i, ũ tóg t̄y topázio n̄i, ũ tóg t̄y crisópraso n̄i, ũ tóg t̄y jacinto n̄i, ũ tóg t̄y ametista n̄i gé. 12 (ke) ti n̄y t̄i, pó mág ti.

²¹ K̄y ti jänkā t̄y 12 (ke) v̄y pérola t̄y hyn han k̄y n̄y t̄i. Jänkā pir v̄y pérola pir n̄i m̄y, ha mĕ. K̄y ěpry mág ěn, ěm̄n mág ěn v̄y ouro t̄y han k̄y sa, hā ra tóg f̄in ěváj n̄i, vidro f̄in ěváj ri ke.

²² Hā ra sóg Topĕ jo ĩn vég t̄u n̄i, cidade ěn tá. Topĕ v̄y vĕnh kar kri n̄i, k̄y tóg nĕn (ũ) kar han ki kanhró n̄i gé. Topĕ hā v̄y cidade ěn tá ěmā n̄i, cordeiro ti ke gé, hā k̄y tóg tá ag jo ĩn t̄u n̄i.

²³ K̄y rā tóg tá t̄u n̄i gé, kysā ke gé. Topĕ t̄y jĕngrĕ v̄y ki kurā han t̄i, k̄y tóg tá kutyg vānh n̄i sir. Cordeiro ěn v̄y cidade ěn tá rā ri ke n̄i.

²⁴ K̄y vĕnh kar tóg Topĕ t̄y cidade ki jĕngrĕg ěn tugr̄in ěvānh há han t̄i, povo kar ag. ěprā pā'i kar ag v̄y ājag t̄y nĕn (ũ) kar gé kāmũnh m̄u, ag t̄y tá vin han jĕ.

²⁵ Jänkā v̄y nugnón k̄y n̄y t̄i, kurā kar ki. Kutyg t̄u n̄in k̄y ag tóg jänkā n̄igfĕnh t̄u n̄igt̄i.

²⁶ Povo kar ag v̄y ājag t̄y nĕn (ũ) gé kāmũnh ke m̄u, cidade ěn m̄i.

²⁷ Hā ra nĕn ũ kórĕg v̄y kārānh ke t̄u pĕ n̄i. Ũ t̄y vĕnh jykre pāno han m̄u ag v̄y rā genh ke t̄u n̄i, ũn ón m̄u ag ke gé. Ũn jygyj t̄y livro ki ránrán k̄y n̄y t̄i ěn ag hā v̄y ra genh ke m̄u. Ũ t̄y r̄ir kr̄yĝ ja t̄u vég m̄u ěn ag jygyj v̄y ránrán k̄y n̄y t̄i, cordeiro t̄y livro ěn ki.

22

¹ K̄y Topĕ t̄y jĕnĕ jafā tóg inh m̄y goj mág ven m̄u. Goj ěn v̄y ěg r̄inr̄ir han t̄i. Kómkóm ke ti t̄i, goj ěn ti, pó kupri f̄in ěváj t̄y kómkóm ke ěn ri ke, goj ti. Goj ěn n̄ih̄yĝ v̄y Topĕ n̄igja tá n̄i, cordeiro n̄igja ěn tá.

² K̄y tóg cidade kuju m̄i t̄i m̄u, ěpry mág jagma, ěm̄n mág ěn jagma, goj ti. Ti fyr tá ka tóg n̄y t̄i, ti fyr ũ tá ke gé. Ka kanĕ ěn v̄y ěg r̄inr̄ir han t̄i gé. ěn v̄y pr̄yĝ pir ki kanĕ t̄y 12 (ke) han t̄i. Kysā kar ki tóg ā kanĕ hyn han t̄i. Ti féj v̄y t̄y vĕnh kagta kar n̄i, vĕnh kaga kar t̄y tóg hághá' he k̄n t̄i.

³ Topĕ t̄y nĕn ũ to jũ v̄y tá n̄inh ke t̄u pĕ n̄i, cidade ěn tá.

Topē nĕgja vŷ cidade ěn tá nĭ nĭ, cordeiro nĕgja ěn ti, kŷ vĕnh kar vŷ ti to: “Topē vĕ,” henh ke mŭ, Topē rĕnhraj han tĭ ag kar.

⁴Topē ve jé ag tóg ke mŭ, kŷ ti jiji vŷ ag kakā ki rán kŷ nĭnh mŭ.

⁵Tá tóg kutyg vĕnh nŷgtĭ, hĕ kŷ ag tóg tá lampião grug ke tŭ nĭ. Rĕ vŷ tá tŭ nĭ gé. Topē vŷ ag mŷ tŷ jĕngrĕ han tŷgtĭ, ěg pĕi' i ti. Kŷ tá nŷtĭ ag tóg tŷ pĕi' i nŷtĭnh ke mŭ gé. Ag tŷ tŷ pĕi' i nŷtĭnh ke tag vŷ tŭ' henh ke tŭ nĭ.

Jesus kĕtĭg mĕn

⁶Kŷ Topē tŷ jĕnĕ jafĕ ěn tóg inh mŷ: “inh vĭ vŷ tŷ ki hĕ ke nĭ,” he mŭ. “Vĕnh ó pijé,” he tóg. “Ēg jóg tŷ Topē vŷ ũ tŷ ĕ vĭ tó tĭ ag mŷ ĕ kuprĭg jĕnĕ, ti tŷ ag kanhrĕn jé. Hĕ kŷ tóg ĕ tŷ jĕgnĕ jafĕ ag kĕ ũ jĕnĕ, ti tŷ ti mŷ rĕnhraj tĭ ag mŷ tó jé, nĕn tŷ kĕnhmar kutĕnh ke mŭ ti,” he tóg, inh mŷ, Topē tŷ jĕnĕ jafĕ ti.

⁷Jesus vŷ tag tó mŭ, ha mĕ. “Ha vé, inh kĕtĭg mĕn ke nĕ ha. Nĕn tŷ livro tag ki rán kŷ nĭ tag to jŷkrĕn há han nĭ, kŷ Topē tóg ĕjag mŷ vĭ há han ke mŭ,” he tóg, Jesus ti.

⁸Tag kar ve inh, mĕ inh ke gé, inh, hĕ vŷ: Joĕo, he mŭ. Isŷ ve kĕn kar kŷ sóg ũ tŷ inh mŷ tag ven mŭ ěn krĕm mŷg ke mŭ, sŷ ti mŷ: “Topē vŷ tŷ ĕ nĭ,” he jé.

⁹Hĕ ra tóg inh mŷ: “ke tŷg nĭ,” he mŭ. “Ā ri ke sóg nĭ, isŷ Topē rĕnhraj han kŷ. Ā régre ag ri ke sóg nĭ, ũ tŷ Topē vĭ tó tĭ ag ri ke sóg nĭ, ũ tŷ livro tag ki nĕn rán kŷ nĭ mĕg mŭ ag ri ke sóg nĭ gé. Topē hĕ mŷ: “Topē vŷ tŷ ĕ nĭ,” hemnĭ,” he tóg, inh mŷ, Topē tŷ jĕnĕ jafĕ ti.

¹⁰Kŷ Jesus vŷ tag tó mŭ gé, ha mĕ. “Livro tag ki nĕn rán kŷ nĭ tag péju sór tŷg nĭ,” he tóg, inh mŷ. “Kakó ti nĭ ha, ĕjag tŷ nĕn tŷ ki rán kŷ nĭ tag venh ke mŭ ti.

¹¹Ũ tŷ vĕnh jŷkre pĕno han mŭ ěn jé han kŷ nĭ nĭ. Ũ mŷn hŷn há tŷgtĭ, ti jŷkre kavĕj ti. Ti jé ĕ jŷkre kórĕg hĕ mĭ tĭg. Ũ tóg vĕnh jŷkre kuryj han tĭ. Ti jé to tar nĭ. Ũ ag tóg tŷ Topē tŷ nŷtĭ. Ag jé ti to krónh ke tŷg,” he tóg, Jesus ti.

¹²“Ha vé, inh kĕtĭg mĕn ke nĕ ha. Ājag kaja ma sóg kĕtĭg ke mŭ, ha vemnĭ. Vĕnh kar vŷ ve kĕn ke mŭ, ag tŷ nĕn han mŭ kaja ti.

¹³Topē vĭ kar han sóg tĭ. Ũn ve vŷ tŷ inh nĭ, ũn tŷ ĕgno vŷ tŷ inh nĭ gé. Isŷ nĕn kar han vén to hĕ sóg nĭ, kŷ sóg nĕn kar tŷ tŭ' he mŭ ra ĕgno kĕ nĭnh ke mŭ gé,” he tóg, Jesus ti.

¹⁴“Ũ ag tóg ĕjag jŷkre kugrynh sór tĭ, hĕ kŷ ag tóg ĕg tŷ ĕg kur kygfa ri ke han tĭ. Ēn ag mŷ tóg vĭ há han ke mŭ, Topē ti. Ka kanĕ tŷ ĕg rĭnrĭr han tĭ ěn ko jé ag tóg ke mŭ, kŷ ag tóg cidade ěn jĕnkĕ ra genh ke mŭ gé.

¹⁵Hĕ ra ũ ag tóg ěn ra genh ke tŭ nĭ, hĕ vŷ: ũ tŷ vĕnh jŷkre pĕno tŷ vĕnh kavĕnh tĭ ag, he mŭ, kujá ag, he mŭ, curandeiro ag, he mŭ, ũ tŷ ĕ prŭ tŷ fag mrĕ nŷgnŷ mŭ ag, he mŭ, ũ fag tŷ ĕjag mĕn tŷ ag mrĕ nŷgnŷ mŭ fag, he mŭ, ũ tŷ ũ tĕn mŭ ag, he mŭ, ũ tŷ vĕnh kĕggrá jŷkre mĭ mŭ mŭ ag, he mŭ, ũn ón mŭ ag, he mŭ, ũ tŷ ũ ag lograr he mŭ ag, he mŭ gé. Ēn ag vŷ cidade ra genh ke tŷ pĕ nĭ,” he tóg, Jesus ti.

¹⁶“Isŷ jĕnĕ jafĕ jĕnĕ inh, inh, hĕ vŷ: Jesus, he mŭ. Ti jĕnĕ inh, ti tŷ ĕjag mŷ ĕjag tŷ nĕn venh ke mŭ kar tó jé, ũ tŷ inh vĭ jĕmĕ jé vĕnh mĕn tĭ ag kar mŷ. Davi krĕ'krĕ ag kĕ ũ ěn vŷ tŷ inh nĭ. Krĭg mág hĕ sóg nĭ,” he tóg, Jesus ti.

¹⁷Kŷ Topē kuprĭg vŷ Jesus mŷ: “kur kĕtĭg,” he mŭ. Ũ tŷ ti ki ge kŷ nŷtĭ kar ag vŷ ti mŷ tag tó tĭ gé, ag tŷ tŷ ti prŭnh ke fi ri ke nŷtĭn kŷ. Ũ tŷ ag tŷ ti jé prĕr mĕg mŭ ag jé ti mŷ: “kur kĕtĭg,” he kĕn.

Kỹ Jesus tóg: “ũ tỹ goj kron sór mũ ẽn jé iso kãtĩ,” he mũ, “sỹ ti mỹ goj jun jé, fagrĩnh mỹ. Goj ẽn vỹ ti rĩr han ke mũ, ha vemnĩ,” he tóg, Jesus ti.

João tỹ ve ja

¹⁸Vãhã sóg tag tó sór mũ, inh, hã vỹ: João, he mũ, ha mẽ. Ũ tóg kejẽn isỹ nén rán mũ tag ve kỹ pãte ũ rán mãn sór ke mũ gé hẽn ri ke mũn. Ẽn vóg kónãn tãvĩ han jé tóg ke mũ, Topẽ ti, kỹ tóg sỹ nén ũ jagy tó mũ ẽn ve kãn ke mũ, ha mẽ.

¹⁹Kejẽn ũ tóg hẽn ri ke mũn isỹ nén rán mũ ũ tỹ nén ũ tũ han sór mũ. Ẽn tũ mág tỹ tóg tũ' henh ke mũ gé, Topẽ ti, kỹ tóg ka kanẽ tỹ ẽg rĩnrĩr han mũ ẽn konh ke tũ nĩ. Topẽ tỹ cidade nĩv ẽn ra rãnh ke tũ tóg nĩ gé, sỹ cidade kãmén mũ ẽn ra.

²⁰Ũ tỹ inh mỹ tag kar ven mũ ẽn vỹ: “inh kãtĩg mãn ke nẽ ha, sỹ ki hã tó vẽ,” he mũ.

Hỹ, kur kãtĩg, ẽg Senhor tỹ Jesus'.

²¹Ẽg Senhor tỹ Jesus jé ãjag kar tar han. Hã vẽ.

Ẽg tỹ Topẽ vĩ rá venh ke

Ẽg tỹ Topẽ vĩ rá ve kỹ ki kanhrãn kỹ ki krov kỹ ẽg hã han ke mũ. Kurã kar ki ẽg tóg to sĩ han ke mũ, kỹ ẽg tóg kãnhmar fĩn rãm ke mũ. Kỹ tóg há tĩ gé, ẽg tỹ prỹg kar ki Novo Testamento tag fĩn rãm kỹ, ẽg tỹ tỹ vẽn kanhrãn há han jé. Ẽg tỹ fĩn rãm jé ẽg tóg gen kỹ to kenh mũ, ha vẽ: